


Gadu Buku



New Testament in Saramaccan (NS:srm:Saramaccan)

Gadu Buku

New Testament in Saramaccan (NS:srm:Saramaccan)

copyright © 2009 Wycliffe Bible Translators, Inc.

Language: Saramaccan

Translation by: Wycliffe Bible Translators, Inc.

Saramaccan

srm

Suriname

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Saramaccan

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
34d0907e-4b31-5f4f-b863-1c52b958344e

Contents

Mateosi	1
Maikusi	77
Lukasi	124
Johanisi	199
Tjabukama	251
Loomë	321
1 Kolenti	353
2 Kolenti	382
Galasia	402
Efeise	414
Filipi	424
Kolosën	432
1 Tesalonika	439
2 Tesalonika	446
1 Timoteo	450
2 Timoteo	460
Titusi	467
Filemon	471
Hebelejën	473
Jakobosi	499
1 Petuisi	507
2 Petuisi	516
1 Johanisi	522
2 Johanisi	529
3 Johanisi	530
Judasi	531
Akoalimbo	535

Dee woto u Masa Jesosi dee Mateosi sikifi

Wan wöutu a fesi.

Söö. Wë andi di pisi u Gadu Buku aki kë taki da u, dee sëmbë? Wë a di fosu kamian nöö de kai ën Mateosi, biga wan womi de kai Mateosi sikifi ën. Di womi aki bi dë wan u dee tuwalufu bakama u Masa Jesosi dee a bi kai a wan apaiti fasi, dee de ta kai Apösutu. Nöö Mateosi abi tu në e. Biga te i lesi soni fëen a dee oto pisi u Gadu Buku, nöö de ta kai ën Leifi.

Nöö de taa Mateosi sikifi di pampia aki kuma 75 jaa baka u di de pali Masa Jesosi. Nöö te joo lesi ën, nöö joo si taa a sikifi ën möön taanga da dee Dju sëmbë. A ta biinga nöömō u de sabi taa Masa Jesosi hën da di Keesitu, di Kōnu di Gadu bi paamusi dee Dju sëmbë gaanduwe a fesi taa a o manda ko. Biga sōmëni pasi i sa si taa a ta hai sondi u dee fesiten tjabukama u dee Dju ko fiti ku dee wooko Masa Jesosi bi ta du, be de sabi taa hën da di Sëmbë di dee fesiten tjabukama bi ta taki.

Ma nöö fa Mateosi ta mëni dee Dju sëmbë möön gaanfa seei, ma na u de wanwan hedi Masa Jesosi ko e. Biga a ko faa tja wan njunjun tii ko da hii libisëmbë, nöö a di pampia aki i sa si fa di njunjun tii naandë dë. Nöö a di kaba pisi u di pampia di Mateosi sikifi aki, nöö a ta taki fa Masa Jesosi manda dee bakama fëen u de go a hii goonliba go paaja di buka fëen da hii mundu.

Nöö di pampia di Mateosi mbei nöö hën disì.

Aki ta konda soni u di lö

u Masa Jesosi.

Luk. 3:23-38

¹ Wë nöö dee sëmbë, fa i si woo taki aki, nöö dee gaan sëmbë u Masa Jesosi Keesitu dee a abi, nöö de wë woo kai da unu aki e. Biga di de pai Masa Jesosi, nöö de pai ën a di lö u Abahamu, di gaan sëmbë fuu dee Isaëli sëmbë, ufō a dë wan bakamii u Kōnu Dafiti tu.

² Wë nöö haika e. Di möön fesiten gaan sëmbë fuu di u Dju sëmbë abi, hën de kai Abahamu, nöö hën pali Isaki e, nöö Isaki ko pali Jakopu, nöö hën Jakopu pali Juda ku dee baaa fëen.

³ Nöö hën Juda tei Tamali nöö hën ku ën pali Pëlëzi ku Zelaki, nöö hën Pëlëzi toona ko pali Esilon, nöö hën Esilon ko pali Lam.

⁴ Nöö Lam ko pali Aminada, nöö Aminada toona ko pali Nakison, nöö hën Nakison ko pali Salima.

⁵ Nöö hën Salima tei Lakabu hën a pali Boasi. Hën Boasi tei Luti nöö hën a pali Obëti ku ën.

Nöö hën Obëti toona pali Isai.

⁶ Nöö Isai hën pali Kōnu Dafiti e, nöö hën Kōnu Dafiti toona pali Kōnu Salumon ku di mujëe u Ulia di a bi tei.

⁷ Nöö hën Salumon toona pali Kōnu Lahabiam, nöö hën Kōnu Lahabiam toona pali Kōnu Abia, nöö Kōnu Abia pali Kōnu Asa.

⁸ Nöö hën Kōnu Asa ko pali Kōnu Josafati,

nöö hën Könu Josafati toona ko pali Könu Jolam,
nöö hën Könu Jolam ko pali Könu Uzia.

⁹ Nöö hën Könu Uzia pali Könu Jotam,
nöö hën Könu Jotam ko pali Könu Akasi,
nöö hën Könu Akasi ko pali Könu Esikia.

¹⁰ Nöö hën Könu Esikia toona ko pali Könu Manase,
nöö hën Könu Manase ko pali Könu Amon,
nöö Könu Amon toona ko pali Könu Josia.

¹¹ Nöö hën Könu Josia ko pali Könu Jekonia ku dee baa feën.

Nöö a di ten u Könu Jekonia ala, nëen dee Babilon sëmbë kisi dee gaan sëmbë fuu tei tja go buta a katibo a Babilon köndë.

¹² Söö. Nöö woo kai dee gaan sëmbë u Masa Jesosi go dou. Nöö hën woo seti ku Könu Jekonia baka.

Könu Jekonia hën toona pali Seatiëli,
nöö hën Seatiëli pali Zebabeli.

¹³ Nöö hën Zebabeli toona ko pali Abiutu,
nöö hën Abiutu pali Eliakim,
nöö hën Eliakim toona pali Azolu.

¹⁴ Nöö hën Azolu toona ko pali Sadoki,
nöö hën Sadoki toona ko pali Akim,
nöö hën Akim ko pali Eliutu.

¹⁵ Nöö hën Eliutu toona ko pali Eleesa,
nöö hën Eleesa pali Maatan,
nöö hën Maatan ko pali wan sëmbë de kai Jakopu möön.

¹⁶ Nöö di Jakopu dë, hën ko pali Josëfu,
nöö di Josëfu aki, hën wë da di manu u Malia e,
nöö Malia hën pai Jesosi, di da di Keesitu.

↳ Nöö fa u kai ën di Keesitu dë, hën kë taki di Sëmbë di Gadu bi paamusi taa a o manda ko fu ko tii di goonliba a wan leti fasi.

¹⁷ Nöö sô u kai teni-a-fô gaan avo fu Masa Jesosi fu kumutu a Abahamu te dou a Könu Dafiti. Nöö fu kumutu a Könu Dafiti te dou a di ten de kisi de buta a katibo a Babilon dë, u toona kai teni-a-fô gaan avo feën baka. Nöö fu kumutu a di ten di de kisi de buta a katibo dë tee dou di ten di de pai di Keesitu, u toona kai teni-a-fô gaan avo baka. Nöö sô wë dee gaan sëmbë u Masa Jesosi bi waka e.

Aki ta konda fa a waka Malia

ko pai Masa Jesosi.

Luk. 2:1-7

¹⁸ Wë nöö fa i si woo taki ën aki, nöö sô de pai Jesosi Keesitu e, dee sëmbë. A dë sô taa Malia hën bi da di kiija mujëe u Josëfu. Nöö de an duumi seei, nöö hën wë de ko si taa di mujëe dë ku bëe gbolo. Nöö fa i si a ko dë ku bëe naandë, nöö di Akaa u Masa Gaangadu hën wë mbei a ko dë ku di bëe.

¹⁹ Nöö Josëfu dë wan sëmbë di ta libi leti a pasi kumafa Gadu kë. Nöö di Malia ko dë ku di bëe sô, nöö a kë disëen, ma an kë du ën a wan fasi fu sen kisi di mujëe, ma a kë du ën a wan tjubii fasi sô.

²⁰ Nöö hën wë a dë ta pakisei di soni te wan pisi, nöö hën a duumi. Hën a sunjan wan basia u Masa Gaangadu köndë ko nëen.

Hën a kai ën: "Josëfu, di böngô fu Könu Dafiti aki."

Hën a piki.

A taa: "Ja musu feëe fii tei Malia fii mujëe buta a i wosu e. Biga di bëe i si a dë ku ën naandë, na libisëmbë dëen. Di Akaa u Masa Gadu, hën wooko sô.

²¹ Nöo a o pai wan womi mii, nöo woon kai ën Jesosi. Hën kë taki 'di Heepima'. Biga a o heepi dee sëmbë fëen puu de a dee hogilibi u de basu."

²² Nöo fa i si di soni pasa dë sô, nöo a kai makandi ku di buka u Masa Gaangadu di a bi da wan fesiten tjabukama fëen „de kai Jesaja.

²³ A taa:

Un haika e, dee sëmbë.

Di wëndjê mujëë mii di an duumi ku manu wan daka,

hën o tei bëë, nöo a o pai wan womi mii.

Nöo de o kai di mii Imanuwëli.

Hën kë taki "Gadu dë ku u".

Sô di tjabukama bi taki kaa e.

²⁴ Sôo. Nöo di Josëfu hopo a duumi, nöo hën a du leti kumafa di basia taki dëën. Biga a tööu ku Malia hën a hoi ën nëën wosu.

²⁵ Ma nöo an sabi ën kuma mujëë fëen möönsö u teefa a pali wan womi mii, nöo hën wë de kai ën Jesosi.

Nöo a sô wan fasi de pali Masa Jesosi e.

2

Aki ta lei fa dee kônima

bi ko luku Jesosi.

¹ Wë nöo di de pai Masa Jesosi, nöo de pai ën a wan köndë de kai Betelehem a di pisiwata u Judea naandë. Nöo di juu dë, wan könu de ta kai Helodi hën bi ta tii di köndë.

Nöo hën de dë te wan pisi, nöo hën wanlô kônima ko a di köndë. Dee kônima dë, de ta luku teeja u de sabi andi o ta pasa a goonliba. Nöo hën de kumutu te a di sê u sonu kumutu ala, hën de waka te dë ko dou a Jelusalen. „Biga hën da di hediköndë u dee Dju sëmbë.”

² Nöo fa de ko dou a Jelusalen dë, nöo hën de ta hakisi taa: "Wë na unsë de pai di njunjun könu fuun dee Dju sëmbë aki? Biga di u bi dë a u köndë a di sê u sonu kumutu hën u si wan teeja di lei u soni fëen, nöo hën u ko aki fuu ko wai ku ën." Sô de ta hakisi.

³ Wë nöo di Könu Helodi jei di soni dee kônima ta hakisi naandë, nöo a toobi ën gaanfa, hën ku hii dee sëmbë u Jelusalen tuu.

⁴ Nöo hën a kai dee Gaan Begima u Dju ku dee Sabima u Wëti u de ko nëën. Hën a hakisi de taa: "Unfa di Buku taki? Naasë de o pai di Keesitu, di o ko dë könu fuu dee Dju sëmbë?"

⁵ Nöo hën de piki ën taa: "Wë leti a Judea aki a di köndë de kai Betelehem, ala de o pai di mii. Biga sô Gadu bi manda di tjabukama fëen faa musu sikifi. A taa:

⁶ Di köndë de kai Betelehem, fa i si a dë a di pisiwata u Judea aki, nöo an dë lagi möön dee oto köndë u Judea, a dee hedima wojo e.

Biga nëën wan gaan tiima o kumutu.

Hën o tii dee Isaëli sëmbë u mi kuma wan sëmbë ta kiija sikapu ta tii de fu de an musu kaba a sôsö.

Sô a dë sikifisikifi a di Buku e."

Nöo sô dee leima piki Könu Helodi.

⁷ Nöo di Könu jei sô, hën a kai dee kônima ko nëën saapi, nöo hën a ta fini de tefa a kaba fu de konda dëën gbelingbelin söndö ganjan ee un longi kaa de bi si di teeja. Hën de konda dëën tefa de kaba.

⁸ Nöo hën a manda de taa: “Un musu go a Betelehem e, nöo un suku finifini tee un go si di mii ka a dë, nöo un toona ko piki mi baka wantewante. Biga miseei kē go wai ku ën mbei piizii dëen tu.” Sö a taki da de.

⁹⁻¹⁰ Nöo hën wë di di Könu taki sö kaa, nöo hën de tei pasi nöo hën de go e. Nöo fa de nango dë, hën de ko si di wan seei teeja di de bi si a de köndë ala. Nöo di de si ën, nöo de wai seei. Nöo hën di teeja ta waka a de fesi ta tja de tee a go dou leti a di wosu ka di mii dë nëen dendu, nöo hën a tan piiii a di wosu liba.

¹¹ Nöo hën dee könima denda go a di wosu dendu, hën de go si di mii ku ën mama naandë, hën de tjökö kini a goon ta wai ku di mii ta bigi ën seei. Nöo hën de jabi dee toonpu u de, nöo hën de tei gaan dii gudu u di ten ala hën de da di mii. De dëen goutu. De dëen wan pei soni de ta tjuma nöo a ta sumëe suti, ku wan sumëe suti fatu degidegi kantii sö. Sö de dëen.

¹² Nöo di ndeti hën de duumi, hën de sunjan wan sunjan taa de an musu toona go a di könu möön. Nöo hën de tei wan oto pasi hën de waka go u de a de köndë.

Aki de tja Jesosi go tjubi

a Egepiti köndë.

¹³ Nöo hën a baka u di dë, hën wan basia u Masa Gaangadu köndë ko piki Josëfu a sunjan taa: “Womi, hopo e, nöo i tei di mii ku ën mama nöo un kule go a Egepiti köndë. Nöo un tan ala u tee un jei mi piki unu baka, biga di könu o ta suku di mii faa musu feni ën kii.”

¹⁴ Nöo hën a di ndeti naandë seei, hën Josëfu hopo hën a tei di mii ku ën mama hën de fusi go a Egepiti köndë.

¹⁵ Hën de fika ala teefa Könu Helodi dëdë bifö de toona ko baka.

Nöo fa di soni pasa dë, nöo a kai makandi ku wan oto buka Masa Gaangadu bi da dee tjabukama fëen a fesiten, a taa:

Mi kai di mii u mi puu a Egepiti köndë.

¹⁶ Ma nöo fa de bi dë a Egepiti köndë ala, hën di könu jei taa sö dee könima bi ganjëen, nöo hati fëen ko boonu seei tee an saanfa faa du. Nöo hën a kai dee sodati ko, hën a taki da de taa: “Un go a Betelehem e, nöo un go kii hii dee womi mii naandë tuu, kumutu a tide pai mii te kisi ku dee tu jaa mii.” Biga fu di soni naandë mbei a bi hakisi dee könima ee na un ten de bi si di teeja.

¹⁷ Nöo fa di soni pasa dë, nöo a kai leti ku di buka di Gadu bi da di tjabukama fëen de kai Jelemia, a taa:

¹⁸ A di köndë de kai Lama,

de ta jei wan tumisi wolo,

këe ta piki te na soni.

Mama Lakëli ta këe dëdë ku libi fu dee mii fëen hedi.

An kë sëmbë musu ganjëen möönsö biga dee mii fëen kaba tuu.

Sö wë di Buku bi taki a fesi e. Nöo sö wan gaan hogi pasa a di köndë di ten dë.

Aki de toona tja Jesosi ko

a Nazalëti.

¹⁹ Nöo hën de dë tee fa Könu Helodi dëdë, nöo hën wan basia u Masa Gadu Köndë toona ko a Josëfu a sunjan möön, te ka a dë a Egepiti köndë ala. A taki dëen taa:

²⁰ “Womi, hopo, nöo i tei di mii ku ën mama nöo un toona go a Isaëli köndë baka e. Biga dee sëmbë dee bi ta suku di mii u kii nöo de an dë ku libi möön.”

²¹ Nöo hën Josëfu hopo, hën a tei di mii ku ën mama hën de toona go a Isaëli Köndë.

²² Ma nöö di de dou, hën Josëfu ko jei taa di mii fu Kõnu Helodi de kai Akelausi ko dë kõnu u hii di pisiwata fu Judea nëen tata kamian. Nöö hën di a jei sô kaa, hën a panta seei.

Nöö hën a toona sunjan wan oto sunjan möön taa an musu go a di pisiwata u Judea ala möön. Nöö hën a bia tei di mii ku ën mama, hën de go a di pisiwata de kai Galilea.

²³ Hën de go libi a wan kõndë de kai Nazalëti, ka Josëfu ku ën mujëë bi ta dë a fesi.

Nöö fa u du dë, nöö a kai ku wan oto soni Masa Gadu bi manda wan tjabukama fëen faa taki a fesi, u di Paamusi Kõnu di Gadu o manda. A bi taa: De o kai ën sëmbë fu Nazalëti.

3

Aki Johanisi di dopuma ta bai basia a di sabana.

Maik. 1:1-8; Luk. 3:1-18; Joh. 1:19-28

¹ Wë nöö baka sômëni jaa longi, hën wan womi de kai Johanisi ko dë a di gaan sabana u Judea dendu ta bai basia.

² A ta bai taa: “Un disa dee hogilibi fuunu e, bia ko libi bunu. Biga di juu dou kaa fu Gadu musu tii unu a wan njunjun fasi.” Fa Johanisi ta bai di basia dë, nöö sô a ta taki.

³ Nöö di Johanisi dë, nöö hën wë da di sëmbë di di tjabukama u Masa Gadu de kai Jesaaja bi taki a fesi di a taa:

De ta jei wan tångö, wan sëmbë ta bai a di sabana taa:

“Un mbei di pasi da Masa ooo,
be a dë limbolimbo gbegedee dëen.

Un seeka dee bendibendi pisi u di pasi,
be de ko dë tololoo.”

Sô Jesaaja bi taki taa wan sëmbë o ko ta bai, nöö di sëmbë a bi taki dë, nöö di Johanisi aki wë e.

⁴ Nöö fa Johanisi sai dë, nöö di koosu a ta bisi nëen sinkii, nöö de mbei ën ku wan mbeti de kai kamëli puuma, nöö di banti a ta tai nëen mindi nöö ku mbeti kakisa de mbei ën. Nöö di soni a ta njan, a dë wan pei atiti ta dë a di sabana naandë, nöö höniwata a ta bebe. Sô wan sëmbë Johanisi dë.

⁵ Nöö hii dee sëmbë u Jelusalen te kisi hii dee oto kõndë u Judea tuu, te dou ku dee oto pisiwata u di lio de kai Joodan dë, de tuu seei ta hai ko nëen naandë.

⁶ Nöö fa a ta bai de a dee hogilibi u de dë, nöö de ta piki. De ko si taa de an ta libi bunu tuu, nöö hën Johanisi ta dopu de a di Joodan lio dë.

⁷ Nöö di juu dë, i abi tu paatëi a di dju keiki. Wan da Sadusei, wan da Falisei. Nöö fa dee sëmbë u de tu paatëi sai dë, de ta mbei deseei gaan hebima u Dju, bumbuu sëmbë. Nöö di de jei taa Johanisi ta dopu sëmbë, nöö hën sômëni u de ko nëen faa dopu de tu.

Ma di a si de, nöö hën a gandji da de seei. A taa: “Un dee takuhatima dë, unfa un hai ko gidjii sô naandë kuma wanlô hia sindeki ta lusu kumutu a dokunu ta kule da faja? Ambë bai unu taa fuun kule da di hatiboonu u Gadu fu an kai a unu liba?

⁸ “Wë nöö ee wan kë Gadu hati boonu ku unu, nöö un musu bia unu libi, be lanti si taa un disa dee hogilibi fuunu tuu e!

⁹ Wan musu sai naandë ta mbei taa: ‘Fa u dë Abahamu böngö tjika aki, nöö andi seei sa toobi u möön? Gadu sëmbë u dë kaa.’ Wan mëni di soni dë e! Biga mi taki da unu taa ee Gadu kë nöö a sa mbei dee sitonu i si aki kisi libi bia ko Abahamu böngö a unu kamian. [Biga wan ta libi bunu möön de.]

¹⁰ “Nöö mi taki da unu e, taa fa u dë aki, nöö de seti koti dee pau lutu kaa. Nöö ee wan pau sai dë an ta pai bumbuu njanjan, nöö de o faa ën puu koti tuwë a faja tjuma kaba a sösö.”

Sö Johanisi bai dee hedima u Dju keiki dee ko nëen dë.

¹¹ Nöö hën a toona fan möön taa: “Fa mi ta dopu sëmbë aki, nöö mi ta dopu de ku wata fu di de kë bia disa di hogilibi u de.

“Ma nöö wan oto sëmbë dë ta ko a mi baka, nöö a hebi gaanfa möön mi e. Ma bumbuu tjika seei u mi dë futuboi fëën ta tja saapatu fëën dëen. Nöö fa a o ko dë, nöö a o tja wan oto dopu ko, biga hën o dopu unu ku di Akaa u Masa Gadu, ku faja. Biga fa a o du ën dë, nöö di Akaa o dë a unu liba kuma faja ta tjuma hogilibi puu a unu hati.”

“Sö wë di Sëmbë di o ko aki o abi kaakiti tjika e.

¹² “Nöö fa u dë aki, a dë kabakaba këëë faa ko seeka di njanjan fëën. A o tja dee bumbuu njanjan ko lai a suwa, ma dee poipoi wan a o tjuma a di faja di an sa tapa a mundu möönsö.”

Sö Johanisi taki.

Aki Johanisi dopu Masa Jesosi.

Maik. 1:9-11; Luk. 3:21-22

¹³ Wë nöö di juu dë, hën Masa Jesosi seei kumutu a Galilea ko a Johanisi a Joodan Lio dë, faa musu dopu ën tu.

¹⁴ Ma nöö fa a ko dë, hën Johanisi kë tapëen. A taa: “Fa i dë aki, nöö mi bi musu ko a i fii dopu mi, nöö hën i ko a mi nö?”

¹⁵ Ma Masa Jesosi piki ën taa: “Nönö, na tapa mi e. Boo du ën nöö. Biga a fiti fuu du hii dee soni dee dë leti a Gadu wojo.”

Nöö di a taki sö kaa, nöö hën Johanisi dopu ën awaa.

¹⁶ Nöö di a dopu ën te a kaba, hën Masa Jesosi ta kumutu a di wata. Nöö wantewante dë, hën mundu jabii wajaa gbegedee nëen liba, hën a si di Akaa u Masa Gadu kuma wan pomba saka ko nëen liba.

¹⁷ Hën de jei wan tòngö piki te a liba ala taa: “Ja si di sëmbë aki ö? Hën wë da di lobi womi mii u mi. Libi fëën ta kai ku mi.”

Sö wan gaan soni wë pasa di Masa Jesosi dopu e, dee sëmbë.

4

Aki di didibi ta pooba

Masa Jesosi.

Maik. 1:12-13; Luk. 4:1-13

¹ Wë nöö baka u di Masa Jesosi dopu, nöö hën di Akaa u Gadu tjëen go a wan gaan sabana dendu, fu di didibi sa ko nëen ko poobëen luku ee a sa mbei a piki ën buka.

² Nöö hën Masa Jesosi go tan ala föteni daka ndeti ku didia ta begi söndö njan, nöö hangi ko kisi ën seei.

³ Nöö hën di poobasëmbëma de kai didibi go nëen ala. A taki dëen taa: “Wë di i dë di Mii u Gadu tuu, nöö be i fan ku dee sitonu i si aki be de bia sondi u njan da i.”

⁴ Ma nöö hën Masa Jesosi piki ën taa: “Ja jei fa a sikifi a Gadu Buku ö? A taa na soni u njan wanwan nöö ta hoi sëmbë a libi e, ma a hiniwan wöutu fu Gadu di a ta taki, nöö a de libi ta kumutu. Sö di Buku taki e.”

⁵ Nöö hën di didibi tei ën tja go te a di Wosu u Masa Gadu a Jelusalen naandë, tee a di tölu fëën a liba ala.

6 Hën a taki dëen taa: “Di i da Gadu Mii, nöö vinde i seei tuwë go a goon. Biga di Buku sikifi taa Gadu o manda dee basia fëen u de ko heepi i. De o tja i a maun fu ja musu naki futu a sitonu.”

7 Nöö hën Masa Jesosi piki ën taa: “Ma di Buku taki tu taa ja musu pooba Masa Gadu e. Biga hën da i Gadu.”

8 Nöö hën a baka u di dë möön, nöö hën di didibi tei Masa Jesosi tja go tee a wan hei kununu liba, hën a lei ën hii soni u goonliba palalaa lontu dou. Dee waiti soni nëbai wan u goonliba ku hii dee köndë, de tuu a lei ën.

9 Hën a taki dëen taa: “Ja si ö? Hii dee soni aki tuu mi o da i fii seei, ee i tjökö kini a goon a mi fesi aki begi mi.”

10 Nöö fa di didibi fan te tjika dë, nöö hën Masa Jesosi gandji dëen awaa. A taa: “Hetji pasa kumutu a mi fesi aki, ju didibi Saatan! Biga di Buku u Gadu taki taa ja musu begi na wan oto soni a mundu möön leki Gadu i Masa. Hën tö nöö i musu ta dini.”

11 Nöö fa a fan ku ën naandë, nöö hën di didibi disëen go, nöö hën dee basia u Masa Gadu Köndë ko nëen awaa ko sölugu ën.

Aki Masa Jesosi seti konda di buka u Gadu da sëmbë.

Maik. 1:14-15; Luk. 4:14-15

12 Nöö a baka u di dë, hën Masa Jesosi ko jei taa de kisi Johanisi di Dopuma buta a dunguwosu. Nöö di a jei sö, hën a kumutu a Judea go a di pisiwata u Galilea, a Nazalëti ka de bi kijjëen.

13 Ma nöö an tan dë. A pasa go libi a wan oto köndë u Galilea de kai Kapenaumi di dë a di ze bandja. Nöö di köndë a go sai dë, nöö a dë zuntu ku dee köndë ka dee Dju lö de kai Zebulon ku Nafutali ta libi.

14 Nöö a kai ku wan soni di tjabukama u Gadu de kai Jesaaja bi sikifi a di Buku di a taa:

15 Un luku dee köndë dë, dee u Zebulon ku Nafutali lö.

De dë leti a di pasi ka i ta waka nango a di ze, a di oto së banda u di Lio de kai Joodan, a Galilea seei, ka dee sëmbë na Dju ta libi.

16 Dee lö sëmbë naandë bi dë a suguu, ma awaa de ko si wan gaan limbo ta ko a de.

Fa de bi ta fëëë dëdë dë, nöö di limbo dë o ko puu de a di sitaafu dë basu, leti kuma te didia ta jabi faa jaka di ndeti go.

Sö Jesaaja bi sikifi.

17 Wë nöö di juu dë, nöö hën Masa Jesosi seti ta konda di buka u Gadu taa: “Dee sëmbë o, un disa dee hogilibi fuunu e, bia libi bunu. Biga Masa Gaangadu dë kabakaba faa tii unu a wan hii njunjun fasi awaa.”

Aki Masa Jesosi tei

dee fosu bakama fëen.

Maik. 1:16-20; Luk. 5:1-11

18 Tefa wan daka nöö hën Masa Jesosi ta waka a di ze u Galilea bandja naandë, hën a ko si wanlö womi ta tuwë nëti a wata u de kisi fisi. Nöö wan u dee womi de kai Petuisi, hënseei da Simon. Di otowan da hën baaa womi Andiasi. De tu baaa aki sö dë höndima ta kisi fisi.

19 Nöö fa Masa Jesosi ta pasa dë, hën a kai de: “Dee womi aki.”

Hën de piki.

A taa: “Un ko go ku mi e, be mi lei unu fa fuun kisi libisëmbë tja ko da Gadu.”

²⁰ Nöo fa a fan ku de dë, nöo hën wante de disa hii dee soni u de de bi ta höndi dë tuu, nöo hën de go ta waka a Masa Jesosi baka.

²¹ Nöo hën de waka go möön longi. Nöo hën Masa Jesosi si tu oto baaa möön, Jakobosi ku Johanisi, nöo deseeri dë höndima tu ta kisi fisi. Nöo de dë ku de tata Zebedeosi a wan boto dendu ta lapu dee nëti u de. Nöo hën a kai de tu, fu de ko waka nën baka.

²² Nöo hën de tu baaa kumutu wante a di boto disa de tata, nöo hën de go ta waka a Masa Jesosi baka.

Aki Masa Jesosi seti kula sëmbë.

Luk. 6:17-19

²³ Nöo hën Masa Jesosi kumutu dë ta waka a hii di pisiwata u Galilea naandë te dou. A nango a dee keikiwosu u dee Dju nango fa lei de ta konda di bunu buka u Masa Gaangadu da de kumafa di Njunjun Tii u Gadu o dë. Nöo a ta kula hii pei siki tu.

²⁴ Nöo fa u mbei naandë, nöo hën në fëen ko paaja a hii di pisiwata naandë tuu te kisi Silia köndë, nöo hën de ta tja peipei sikima ko nën faa kula de. So sëmbë sinkii ta njan de, so sëmbë dë ku gadu a hedi, so sëmbë dë ku pikimii siki ta naki de ta tuwë, so sëmbë dë lanlan, hii dee lö pei sëmbë dë tuu de ta tja ko nën nöo a ta kula de.

²⁵ Nöo na sikima wanwan nöo ta ko nën sö e. Ma hii sëmbë dee dë a Galilea dë tuu booko seei gililii ta ko nën, ku dee sëmbë u di pisiwata de kai Dekapolisi, ku dee sëmbë u Jelusalen te dou ku dee oto köndë u Judea tuu, te kisi dee sëmbë ta libi a oto banda u Joodan Lio ala. Hii dee sëmbë dee jei fëen palalaa dou, de tuu ta booko gililii ta ko nën.

5

Aki ta lei ambë dë bunu

a Gadu wojo.

Luk. 6:20-23

¹ Nöo di Masa Jesosi si dee hia sëmbë ta ko nën dë, nöo hën a subi wan kuun te dou nën mindi, nöo hën a sindo faa lei de. Hën dee bakama fëen hai ko dë möön zuntu ku ën.

² Nöo hën a tei dee wöutu aki nöo hën a lei de.

A taa:

³ “Dee sëmbë o, wan fëëë e, ee un ta fii taa söndö Gadu wan dë wan wojo soni. Un dë bunu e, biga dee sëmbë ta fii sö, nöo de dë a dendu u di Tii u Gadu kaa.

⁴ “Nöo un dë bunu e, dee sëmbë, ee un ta këë. ‘Biga ee un biibi a Gadu, nöo,’ Gadu o mbei hati fuunu ko kötö wan daka nöömö.

⁵ “Nöo un dë bunu e, dee sëmbë, ee un abi saka fasi. Biga a bakaten di goonliba aki o ko fuunu nöömö fuun tii.

⁶ “Nöo un dë bunu e, dee sëmbë, ee un ta kë fu hii soni musu ta waka tololoo a Gadu wojo. Biga wan daka woon si ën sö nöömö.

⁷ “Nöo un dë bunu e, dee sëmbë, ee un abi tjalihati u sëmbë. Biga Gadu o abi tjalihati fuunu tu.

⁸ “Nöo un dë bunu e, dee sëmbë, ee hati fuunu dë limbolimbo a Gadu wojo. Biga a a’ wan daka unu ku Gadu o miti nöömö fesi ku fesi.

⁹ “Nöo un dë bunu e, dee sëmbë, ee un lo’ u mbei sëmbë ku sëmbë ko fii ku deseeri. Biga sö wan sëmbë o tja di në taa a dë mihi u Gadu gbelingbelin.

10 “Nöo un dë bunu e, dee sëmbë, ee sëmbë ta suku unu a toobi fu di un ta libi bunu a Gadu wojo hedi. Biga sô wan sëmbë dë a di Tii u Masa Gadu dendu kaa.

11 “Nöo un dë bunu e, dee sëmbë, ee sëmbë ta kosi unu ta toobi unu ta mindi hii sootu pei hogi ta buta a unu hedi fu di un ta waka a mi baka hedi.

12 Un musu ta wai da di dë e. Un musu ta piizii seei, biga a Masa Gadu Këndë ala woon feni wan gaan paima. Biga leti sô nöo wë de bi du ku dee tjabukama u Gadu dee bi dë bifô unu.

Aki ta lei fa wan bakama u

Masa Jesosi musu dë kuma satu

ku fa a musu dë kuma limbo.

Maik. 9:50; Luk. 14:34-35

13 “Nöo un haika e, dee sëmbë. Fa un ko nama ku mi aki, nöo un dë kuma satu da dee sëmbë u di goonliba aki. Nöo i sabi fa satu ta heepi tjika. Ma nöo ee a bi sa lasi di tesi fëen, nöo an bi o abi heepi a mundu möönsô e. A sitaati nöo i bi o sa tuwëen go, ka sëmbë o makisëen ku futu. Nöo un musu luku bunu fu wan lasi di tesi fuunu, fuun ko kuma satu di lasi ën tesi.

14 “Nöo sôseei un dë kuma wan lampu faja tu e, da hii dee sëmbë u di goonliba aki. Nöo i sabi nö? Te wan këndë dë a wan hei kununu liba, nöo te dee faja fëen ta sëndë nëen nöo di këndë dë an sa dë tjubitjubi. Hii sëmbë ta si ën kaa. Nöo sôseei un musu dë tu e. Hii sëmbë musu ta si di libi fuunu fa a limbo tjika.

15 “Biga na wan sëmbë o sëndë faja nöo a butëen a wan tjubi kamian te ka sëmbë an sa si limbo ku ën. Nönö. Fa a o sëndëen dë, nöo a o hopo ën buta a liba be hii sëmbë a di wosu sa si soni ku di limbo fëen.

16 “Nöo sô nöo di libi fuunu musu dë a di goonliba aki e, dee sëmbë. A musu dë gbedeede kuma wan faja limbo. Nöo sëmbë o ko si dee bunu soni un ta du, nöo de o ta gafa di Tata fuunu di dë a liba ala.

Aki ta taki soni u dee soni dee bi dë sikifisikifi a Gadu Buku kaa.

17 “Dee sëmbë o, fa mi ko ta lei unu aki, ma ko u ko poi dee wëti Gadu da Mosesi fuu hoi e. Nönö. Nöo ma ko u ko poi dee soni dee fesiten tjabukama bi sikifi tu. Ma mi ko u ko mbei hii soni pasa kumafa dee soni dë sikifisikifi dë bi kë taki.

18 “Nöo un si hii dee soni dee dë sikifisikifi a di Buku nö? Wë mi sa taki da unu gbelin taa solanga dee soni u goonliba aki ku dee soni u liba ala dë eti, nöo na wan u dee soni sikifi a di Buku o fika di an o pasa e, te dou ku dee piki pisi fëen tuu. Hii de tuu seei o pasa.

19 “Nöo ee wan sëmbë i ta poi ee wan piki pisi seei u dee soni Gadu taki ta sôsö de nöo i ta lei sëmbë u de du sô tu, nöo di sëmbë dë o dë di möön sôsö wan a dee sëmbë dee Gadu ta tii dendu.

“Ma ee wan sëmbë i ta hoi i seei a dee wëti dë liba nöo i ta lei otowan andi de kë taki, nöo hën o dë gaan heima a dee sëmbë Gadu ta tii dendu.

20 “Nöo mi taki da unu e, taa ee wan ta libi möön bunu a Gadu wojo möön dee Faliseima ku dee Sabima u Wëti, nöo wan o sa dë a di Njunjun Tii u Gadu dendu möönsô e.

Aki ta lei taa ja musu abi

takuhati u otowan.

Luk. 12:57-59

21 “Wë nõõ un bi jei fa de bi fan ku dee gaan sëmbë fuu a fesi taa ja musu kii sëmbë, ma ee i kii sëmbë nõõ i musu kisi sitaafu fëen.

22 “Ma nõõ mii taki da unu taa di sëmbë di hati fëen boonu ku di otowan fëen kaa, nõõ hënseei musu kisi sitaafu tu e, kuma di sëmbë di kii sëmbë. Söseei di sëmbë di kosi di otowan fëen taku kosi nõõ hënseei musu kisi sitaafu tu. Nõõ di sëmbë di o kosi di otowan fëen taa a lau, nõõ a musu mëni ën seei bunu, ee nasõ a o go tja sitaafu a didibi faja.

Aki ta lei taa i musu seeka di taki di i ku sëmbë abi.

23 “Nõõ mi taki mõõn e, taa ee i go a di keikiwosu fii tja soni go da Gadu nõõ hën i ko mëni taa wan sëmbë ta hoi i a bëë a wan sondi,

24 nõõ i musu disa di paima fii leti dë, nõõ i go a di otowan go seeka di taki te i kaba bifõ nõõ i toona ko da Gadu di soni di i bi o dëen awaa.

25 “Nõõ ee wan sëmbë ta tja i go a kuutu u wan soni hedi, nõõ fa i si un dë a pasi nango naandë kaa, nõõ i musu biinga seei be un koti di taki wante. Biga ee i sai dë ta buuja te di felantima fii tja i go a kuutu, nõõ soni i miti e. Biga dee kuutuma o buta i a dee sikõutu maun, nõõ dee sikõutu o tuwë i go a dunguwosu.

26 Nõõ mi taki da i gbelin taa solanga ja paka di mõni de o kai da i fii paka teee dou ku di lasiti kópõsënsi, nõõ ja o sa kumutu dë mõõnsõ.

Aki ta lei fa fii biinga tjika

fii libi bunu a Gadu wojo.

Mat. 19:9; Maik. 10:11-12; Luk. 16:18

27 “Wë nõõ un bi jei fa de bi fan ku dee gaan sëmbë fuu taa ja musu duumi ku wan mujëë na mujëë fii u wosu. Na sõ de taki nõõ?

28 Ma nõõ mii taa di sëmbë di ta luku wan mujëë kuma a kë tei ën, nõõ nëen hati a tei ën kaa e.

29-30 “Dee sëmbë o, ƒfa mi ta fan aki, un musu biinga fuun du fa un sa du fii waka a Gadu pasi e. Boo taki ën sõ, taa, ee di fa i ta luku soni ku di wojo fii hën ta manda i fii du hogi, nõõ a mõõn bëtë i diki ën puu tuwë e. Nõõ söseei tu ee i kë du hogi ku di leti së maun fii, nõõ a bëtë i koti ën tuwë tu. Biga a sa mõõn bëtë da i taa wan kamian fii sinkii poi ma i feni di libi u teego mõõn leki de hiti i ku telu tuwë go a di didibi faja.

31 “De bi taki taa ee wan sëmbë tuwë di mujëë fëen nõõ a musu dëen wan biifi be lanti si taa a tuwëen.

32 Ma nõõ mii taki da unu taa ee wan sëmbë tuwë hën mujëë ma na manu a tei nëen wosu, nõõ a mbei di mujëë naandë ko jajo mujëë e. Nõõ ee wan womi go tei sõ wan mujëë, nõõ hënseei booko Gadu wëti tu. Biga a tei wan oto sëmbë mujëë.

Aki ta lei taa ja musu ta soi.

33 “Un bi jei fa de bi fan ku dee gaan sëmbë fuu mõõn taa te i tei Gadu nõõ soi, nõõ ja musu booko di soi dë mõõnsõ. I musu du di soni nõõmõ. ƒMa ee i tei wan oto soni soi, nõõ di soi dë an hogi poi fu booko.ƒ

34 “Ma nõõ mii taki da unu taa wan musu soi mõõnsõ e, kwetikweti. Wan musu tei liba ala soi ku ën biga ala di kõnubangi fu Gadu dë.

35 Nõõ wan musu tei di goonliba aki soi ku ën tu, biga aki di bangi fëen dë ka a ta buta futu. Nõõ söseei ja musu tei Jerusalem soi ku ën biga hën da di kõndë u di Gaan Kõnu.

36 Nõõ ja musu tei i hedi soi ku ën tu, biga fa i sai naandë, ja a' kaakiti a i seei tjika fii mbei na wan niën u di uwii fii bia ko weti ee nasõ baaka.

“Hën mbei wë mi taki e, taa an dë fii soi möönsö ufö di soni i taki dë tuu. Ma te joo taki wan soni nöö i fan gbelin, nöö a bunu kaa.

³⁷ Wë biga te i taki aai, a musu tan aai e. Te i taa nöönö, a musu tan nöönö. Ma ee i musu soi ufö de o tei taa tuu, nöö a go a di së u hogi kaa.

Aki ta lei fa fii libi ku i felantima.

Luk. 6:27-30, 32-36

³⁸ “Nöö un bi jei tu fa de ta taki taa, du ku du na wisi. Ee wan sëmbë booko wan së wojo fii, nöö i musu toona booko wan së wojo fëen tu. Ee wan sëmbë naki i booko tanda nöö i musu toona naki di fëen tanda booko tu. Na sö de ta taki nö?”

³⁹ “Ma nöö mii taki da unu taa wan musu puu hatiboonu a wan sëmbë liba taa te a du i hogi nöö joo du ën hogi baka e. Ee di sëmbë hogi seei, ma ja musu libi sö ku ën. Ma ee wan sëmbë naki i baai maun a i bandja jesi, nöö i bia di oto së dëen be a naki möön.

⁴⁰ Nöö ee wan sëmbë kë tja i go a kuutu fu di a kë di liba bisi fii hedi, nöö i dëen di liba bisi fii ku di basu wan tuu.

⁴¹ Ee wan sëmbë ta duwengi i fii waka ku ën wan hafu juu langa, nöö i waka ku ën wan hii juu langa e.

⁴² Ee wan sëmbë hakisi i sondi fii dëen, nöö i dëen. Ee a hakisi i soni fii leni ën, nöö i leni ën. Na niinga.

⁴³ “Nöö un bi jei de bi taki taa i musu lobi di sëmbë di ta libi bunu ku i, ma di felantima fii i sa buuse ën.

⁴⁴ “Ma nöö mii taki da unu taa un musu lobi dee felantima fuunu e. Un musu ta begi da dee sëmbë dee ta du hogi ku unu.

⁴⁵ Nöö te un du sö kaa, nöö woon djeesi unu Tata a liba kuma miii fëen gbelingbelin. Wë biga fa a sai dë, nöö te di sonu fëen ta jabi, nöö a ta jabi da dee bunu sëmbë ku dee hogi wan tuu. Te tjuba fëen ta kai, a ta kai te dou a hii sëmbë, dee ta libi bunu nëen wojo ku dee an ta libi bunu nëen wojo tuu.

⁴⁶ “Nöö ee i ta lobi dee sëmbë dee ta lobi i nöö, ma ja ta lobi dee felantima fii, nöö un paima fëen seei joo feni? Biga sö nöö dee hogisonima u di goonliba aki ta libi u de kaa.

⁴⁷ Ee i ta fan ku dee sëmbë i ku de ta fii nöö, nöö na wan apaiti soni i du dë e. Sö nöö dee sëmbë u di goonliba aki ta libi dee an sabi na wan wojo soni u Gadu möönsö. Ma i musu libi bunu ku hii sëmbë.

⁴⁸ “Wë nöö mi taki e, taa un musu biinga be un libi söndö föutu te dou, leti kumafa unu Tata di dë a liba ala ta libi söndö föutu te dou.”

Nöö sö Masa Jesosi ta lei dee sëmbë.

6

Aki ta lei taa ja musu du soni

u feni në.

¹ Nöö Masa Jesosi toona nango dou ku di lei fëen eti. A taa: “Haika e, dee sëmbë, ee woon du wan soni fuun dini Gadu, nöö wan musu du ën fuun feni në a libisëmbë e. Biga ee i du ën fu sö hedi, nöö wan o kisi na wan paima a unu Tata a liba. Kaba u di taki di dë kaa.

² “Nöö söseei tu, ee joo da wan sëmbë wan soni fii puu ën a fuka, nöö ja musu tei ën ta bai basia a ganda mindi e, kumafa dee sëmbë ta pëe deseei u bumbuu sëmbë ta du. Biga de ta hopo a dee keiki ee nasö a sitaati ta bai ta konda soni u hii sëmbë musu si de taa sö de du wan gaan bumbuu soni. Nöö na sö un musu du, dee sëmbë. Biga mi taki da unu taa fa i si de du ën dë, nöö de an o kisi oto paima fëen a Gadu möönsö, biga de kisi di paima u de kaa.

3 “Ma te joo puu wan sɛmbɛ a fuka, nɔɔ i musu du ɛn a wan tjubi fasi kuma leti maun fii an saandi tɔɔtɔmaun fii ta du, tɔɔtɔmaun an saandi leti maun ta du.

4 Nɔɔ di Tata fuu di ta si hii soni ee a tjubi seei, nɔɔ hɛn o si ɛn nɔɔ a o da i paima fɛɛn.

Aki ta lei fa fii begi.

Luk. 11:2-4

5 “Nɔɔ sɔseei tu, te joo begi nɔɔ ja musu ta du ɛn kumafa dee sɛmbɛ ta pɛɛ deseei u bumbuu sɛmbɛ ta du. Biga de lobi u hopo begi a keiki dendu ee nasɔ a ganda mindi, be hii sɛmbɛ musu si taa sɔ de sabi u begi tjika. Mi taki da unu taa fa i si dee lɔ sɛmbɛ sai dɛ, de an o kisi na wan wojo soni a Gadu e. Tuu fɛɛn seei wɛ di dɛ kaa.

6 “Ma te joo begi, nɔɔ be i go fii a i dendu wosu nɔɔ i tapa i dɔɔ, nɔɔ i begi i Tata ka i dɛ tapatapa dɔɔ dɛ te i kaba. Nɔɔ i Tata di ta si andi ta pasa a tjubii, hɛn o da i di paima fii.

7 “Nɔɔ te joo begi tu, nɔɔ ja musu ta hai di fan nango langalanga nɔɔmɔ e, kumafa dee sɛmbɛ u di goonliba aki dee an sabi Gadu ta du. Fa de sai u de dɛ, de ta mɛni taa te de ta begi longi sɔ nɔɔ Gadu musu u jei de.

8 Ma na sɔ un musu begi e. Biga ufɔ un go u go begi seei, nɔɔ Gadu sabi gaanduwe kaa andi ku andi un abi fanɔudu.

9 “Ma te woon begi, nɔɔ a di fasi aki un musu begi e, dee sɛmbɛ:

Ke, u Tata a liba o,
hii sɛmbɛ musu lesipeki i e,
sabi taa i dɛ bumbuu limbolimbo.

10 U begi taa di Tii fii musu paaja a hii goonliba,

be di fii kɛ pasa a goonliba aki leti kumafa a ta pasa a i a liba ala.

11 Nɔɔ u begi i tu, fii da u dee soni u abi fanɔudu fuu pasa u libi tide.

12 Nɔɔ u begi i o,

be i puu u a bɛɛ fu dee hogi dee u ta du,

leti kumafa i si u ta puu dee otowan fuu a bɛɛ fu dee hogi de ta du u.

13 Nɔɔ u begi i,

taa na disa u da dee soni dee sa hai u tja go a di sɛ u hogi e,

ma puu u a di didibi maun.

Sɔ fuun begi e, dee sɛmbɛ.

14-15 “Biga mi taki e, taa ee un ta hoi sɛmbɛ a bɛɛ u dee hogi de ta du unu, nɔɔ unu Tata a liba ala o hoi unu a bɛɛ tu e, u dee hogi dee un ta du. Ma ee un puu di otowan fuunu a bɛɛ, nɔɔ unu Tata a liba ala o puu unu a bɛɛ tu.

Aki ta lei fa fii begi sɔndɔ njan.

16 “Nɔɔ mi taki da unu mɔɔn e, taa te woon hoi begi sɔndɔ njan, nɔɔ wan musu dɛ gudjuu kuma dee sɛmbɛ dee ta mbei deseei u bumbuu sɛmbɛ. Fa de sai u de dɛ, de ta gudju fesi fu hii sɛmbɛ musu si taa aai, de da bumbuu sɛmbɛ, sɔ de ta hoi begi tjika sɔndɔ njan. Nɔɔ mi taki da unu taa fa i si de ta du naandɛ, tuu u de seei di dɛ kaa e. De an o kisi na wan kodo soni a Gadu mɔɔnsɔ.

17 “Ma te joo hoi begi sɔndɔ njan, nɔɔ be i wasi te i kaba, lo’ fatu a sinkii, kan i uwii te i kaba, seeka,

18 be sɛmbɛ an musu sabi sabi taa sɔ i ta hoi begi sɔndɔ njan. Nɔɔ di Tata fii di ta si hii soni ee a dɛ tjubitjubi seei, nɔɔ hɛn o sabi nɔɔ a o da i wan paima.

Aki ta lei taa na dee gudu u goonliba aki da di gaan soni.

Luk. 11:34-36, 12:22-31, 33-34, 16:13

19 “Wë nöö mi taki möön e, dee sëmbë, taa wan musu biinga fuun abi hia gudu a goonliba aki. Biga aki kopikopi sa njan dee gudu fii, ee nasö sukufu sa poi de. Fufuuma sa ko fufuu hii dee soni i abi tja go, i fika ku maun tjololoo. Sö di libi a goonliba aki dë kaa.

20 Hën mbei i musu biinga fii libi a sö wan fasi taa i ta lai gudu a Masa Gadu Köndë. Biga ala kopikopi an o ko njan mën, sukufu an o kisi ën, fufuuma an o ko dou dë u fufuu ën tja go. Nöö ala fii tjubi dee gudu fii e.

21 Biga ka gudu fii dë, nöö naandë di hati fii ta dë tu. Sö wë a dë e, dee sëmbë.

22 “Boo taki ën sö taa di wojo fii di dë a i sinkii dë, nöö a dë kuma wan lampu faja fii sa si soni limbolimbo. Nöö te i ta si soni sö kaa, nöö hii libi fii o dë gbegedee limbolimbo.

23 Ma nöö ee i ta luku dee soni u di goonliba aki ku di wojo fii söndö i mëni Gadu, nöö joo fika a dungu. Di wojo fii di bi musu heepi i fii si soni limbolimbo an heepi i möönsö, ma i fika leti a dungu dë.

24 “Haika e, dee sëmbë, na wan sëmbë sa dini tu masa makandi e. I musu fu lobi wan möön wan, ee nasö joo hëngi a wan möön wan. Nöö söseei tu, ja sa waka a Masa Gadu baka ku dee gudu u goonliba aki baka makandi e, kwetikweti.

Aki ta lei taa Gadu ta sölu

di sëmbë ta waka nëën baka.

25 “Nöö mi taki da unu taa ja musu ta a’ bookohedi ta hakisi taa: ‘Maingë, andi seei mi o feni u njan?’ nasö ‘Unsä mi o feni wata u bebe baa?’ nasö i ta hakisi taa: ‘Naasë seei mi o feni koosu u mi tapa di sinkii u mi aki?’ Nönö, na sö i musu ta pakisei e. Biga fa i feni libi a Gadu dë kaa, nöö an bunu möön soni u njan ku soni u bebe nö? Nöö di sinkii fii wë? An bumbuu möön di koosu fii bisi nëën nö?

26 Wë nöö di Gadu da i dee gaan soni naandë kaa, nöö an sa da i dee möön piki soni kuma njanjan ku koosu tu nö?

“Un luku dee fou ta buwa ta lontu a liba ala. Fa de sai naandë, nöö de aan goon ta paandi fu de sa feni njanjan. De an abi na wan suwa möönsö ka de sa tjubi njanjan tu. Ma de ta njan kädë biga di Tata fii di dë a liba ala ta sölu de. Wë nöö mi taki da unu taa un bumbuu gaanfa möön dee fou e!

27 “Fa un dë aki sö, undi fuunu sa libi tjë sö seei pasa möön leki fa Gadu bi buta da i, fu di i ta booko hedi mbei? Na wan sëmbë e!

28 Wë ee ja sa heepi i seei a dee pikipiki soni dë, nöö andi i ta booko hedi ku koosu soni u du?

“Un luku dee folo naandë, fa de hanse. Ma na deseeri ta mbei dee bisi u de, nöö de an ta wooko u de bai de tu.

29 Ma nöö mi taki da unu e, taa fa Könu Salumon bi ta bisi dee gaan waiti bisi fëen seei, ma dee bisi fëen an bi ta hanso kuma dee folo naandë.

30 “Nöö fa Gadu ta bisi dee söso uwii ku hanse folo dë, an dë taa de ta sai dë longi seei. Te mamate i si taa de dë sö hanse, te u sapaté de puu kai dëe u de tja go tjuma. Wë nöö unu wë? Na möön hesi Gadu o sölu unu ku soni u bisi tu nö? Ee, dee sëmbë aki, unfa seei a waka te nöö di biibi fuunu piki sö baa?

31 “Fëen mbei mi taki da unu taa, wan musu ta booko hedi taa: ‘Maingë, unsë woo feni soni u njan? Unsë woo feni wata u bebe? Unfa woo feni koosu u bisi?’

32 Mi taki da unu taa dee sëmbë an dë ku Masa Gaangadu a wan së, de ta a’ bookohedi a dee lö pei soni dë. Ma unu Tata a liba bi sabi gaanduwe kaa taa un abi dee lö soni naandë fanödu.

³³Ma nöö a di fosu kamian un musu biinga fuun ta dë a di Tii u Masa Gadu dendu ta libi kumafa a kë, nöö hii dee soni u taki dë tuu woon feni.

³⁴“Nöö sö mi ta taki da unu e, dee sëmbë, taa ja musu abi bookohedi fu dee soni fu amanjan, biga te amanjan dou, nöö a sa sölugu fëen seei. Nöö hiniwan daka ta abi hën soni fii booko hedi nëen te tjika kaa.”

7

Aki ta lei taa i musu seeka i seei ufö i suku otowan u seeka.

Luk. 6:37-38, 41-42

¹Nöö hën Masa Jesosi ta fan eti, a taa: “Wë nöö mi taki da unu taa na kuutu sëmbë e, nöö sëmbë an o kuutu i tu.

²Biga fa i si i ta kuutu sëmbë dë, nöö söseei de o toona kuutu i baka. Biga ku di wan seei maaka di i tei maaka di otowan fii, nöö ku ën seei a o toona maaka i baka.

³“Boo taki ën sö taa i ta si wan sakisi a i baaa wojo, ma nöö wan gaan gindi baliki dë a i seei wojo, ja ta si ën.

⁴Nöö hën i sai dë ta taki da di otowan fii taa: ‘Tan e womi, be mi puu di sakisi a i wojo da i,’ ma nöö di gaan gindi baliki dë leti a i seei wojo goboo naandë.

⁵I hödjëema, fa i si i ta mbei i seei gaan bambuu sëmbë möön di otowan fii naandë, faandi mbei ja sa puu di gaan baliki di dë a i seei wojo, nöö joo si möön limbo fii puu di sakisi a di otowan fii wojo?

Aki ta lei taa i musu sabi

ku ambë i ta fan.

⁶“Nöö mi taki möön e, taa, i musu ta mëni i seei ku di sëmbë di joo ta konda wan bambuu soni da. Biga, te i tuwë wan bambuu soni da dagu, nöö a o disëen dë bia ko kisi i njan tënë pisipisi. Nöö söseei tu, ee joo tuwë bambuu soni da hagu, an o si ën u soni. Ma a o bia makisëen ku futu fiönfiön pasa go fëen.

Aki ta lei taa Gadu o piki

ee i begi ën.

Luk. 11:9-13

⁷“Nöö un haika e, dee sëmbë. Un musu ta begi Masa Gaangadu soni, nöö woon kisi. Un musu ta suku soni nëen, nöö woon feni. Un musu ta naki ën döö nöömö, nöö a o jabi döö da unu.

⁸Wë biga di sëmbë di ta begi Gadu, nöö hën o kisi. Di sëmbë di ta suku soni nëen, nöö hën o feni. Di sëmbë ta naki ën döö, nöö hën a o jabi döö da.

⁹Biga kumafa un dë aki, ee di mii fii hakisi i wan pisi bëëë, undi fuunu o go tei sitonu dëen?

¹⁰Ee a hakisi wan pisi fisi nöö joo go tei wan pisi sindeki tja ko dëen ö? Wë nönö, ja o du sö e.

¹¹Biga hii fa i si hati fii an dë bambuu te dou seei, ma i ta da dee mii fii bambuu soni. Nöö di Tata fuunu di dë a liba ala wë? Na möön hesi a o da unu bambuu soni te un begi ën nö?

¹²“Nöö mi taki e, i musu libi ku sëmbë leti kumafa i seei kë u de musu libi ku i tu. Biga te i libi sö kaa, nöö hën da i piki di mama u hii dee wëti dee Gadu bi buta Mosesi ku dee fesiten tjabukama u de sikifi buta a di Buku fëen.

Aki ta lei tu pasi dee dë

u sēmbē waka.

Luk. 13:24

13-14 “Wē dee sēmbē, fa u dē a goonliba aki, nōo tu dōobuka dē di sēmbē ta denda e, wan gaan wan ku wan piki wan. Nōo un musu biinga fuun denda a di piki wan. Biga ee i denda a di gaan wan nōo joo go dou a di didibi faja. Nōo di pasi di ta tja i go a di dōo dē baai e, nōo an taanga u waka. Hia sēmbē ta tei ēn. Ma ee i denda a di piki dōo nōo joo feni di libi u teego. Ma di pasi di ta tja i go dou a di piki dōo dē piki tu, nōo a taanga u waka. Nōo biti sēmbē ta waka nēen.

Aki ta lei taa i musu kōni ku ganjansēmbēma.

Luk. 6:43-46, 13:25-27

15 “Nōo mi taki e, dee sēmbē, taa un musu mēni unu seei bunu ku dee sēmbē dee ta waka ta ganjan sēmbē taa de ta tja Gadu buka, ma na Gadu hēn manda de. Dee lō sēmbē naandē, de dē leti kuma wan takumbeti di bisi sikafu puuma te a kaba, nōo a go a dee sikafu dendu ta mbei kuma hēnseei da sikafu tu. Ma hii fu di dē takumbeti hati a abi. Sō dee ganjansēmbēma ta libi.

16 Ma fa de o ko dē seei, joo sabi de e, biga joo si a di libi u de taa ganjansēmbēma de dē.

“Biga ja sa booko bumbuu fuuta a matunga e.

17 Di pau di bi ta pai bumbuu njanjan nōo bumbuu njanjan nōo a o ta pai nōomō, nōo di pau di an bi naa pali bumbuu njanjan nōo an o pai ēn mōönsō.

18 Wan bumbuu pau an sa pai poipoi njanjan, sōseei wan poipoi pau an sa pai bumbuu njanjan.

19 Nōo ee wan pau dē an ta pai bumbuu soni mōönsō, nōo de o faa ēn gboogboo tuwē a gufalu tjuma puu dē.

20 Hēn mbei wē mi taki taa i sa sabi dee sēmbē u bi taki dē a di libi u de.

21 “Biga na hii sēmbē di ta kai mi ‘Masa’ ta dē a di Tii u Gadu dendu fu de dou nēen kōndē e. Ma dee sēmbē dee ta du dee soni dee mi Tata kē, nōo de nōo o dou nēen kōndē.

22 “Nōo hēn mbei te di gaan kuutu daka dou, nōo mi o jaka sōmēni sēmbē puu a mi fesi taa ma sabi de. Nōo de o fia taa: ‘Masa, unfa wē? Na u bi da sēmbē buka a i nē nō? Na u bi jaka sōmēni gadu puu a sēmbē hedi ku di nē fii ö? Sōmēni hia gaan foondo wooko u bi du a i nē, nōo unfa a waka ja sabi u?’

23 “Nōo mi o piki de taa: ‘Ambē? Mi? Na wan ten seei mi bi sabi unu mōönsō e. Un waka pasa kumutu a mi fesi naandē, un takusēmbēma!’ ”

Aki Masa Jesosi da di oto u de tu wosu sēmbē ta mbei.

Luk. 6:47-49; Maik. 1:22

24 Nōo hēn Masa Jesosi da wan oto mōön, a taa: “Ee wan sēmbē i ta jei dee soni mi ta fan ku unu aki nōo i tei de fu tii i libi, nōo sō wan sēmbē mi ta si ēn kuma wan gaan fusutan sēmbē di go u go mbei wan wosu fēen. Nōo a seti ēn ku wan goonsei taangataanga gingin kuma sitonu.

25 Nōo di a mbei di wosu te a kaba, nōo hēn wan gaan tjuba kai a mundu bigi mōön hii soni singi di kamian zuuu pii, gaan ventu ko tee ta naki di wosu. Tee a pasa go, di wosu dē fēen gingin a pē naandē eti. An booko kai seei mōönsō, biga de seti ēn bunu.

26 “Ma nōo di sēmbē di ta jei di lei u mi aki, ma an tei ēn faa libi kumafa mi taki, nōo hēn mi ta si kuma wan gaan don sēmbē di mbei di wosu fēen a sandu liba.

27 Nōo hēn wē tjuba kai singi di kamian dē pii, di ventu ta böö ta naki di wosu te wan pisi hēn a booko kai djolou kaba a sōsō fijaa.”

Nöö a sō wan fasi Masa Jesosi lei dee bakama fëen tefa a kaba.

²⁸ Nöö fa a fan dë, hii sëmbë tuu foondo gaanfa seei.

²⁹ De taa: “Di sëmbë aki sō, an dë kuma dee Sabima u Wëti e. Biga hën, a ta konda soni da u gbelin seei kuma hënseei da basi fëen.”

8

Aki Masa Jesosi kula

wan tjinama.

Maik. 1:40-45; Luk. 5:12-16

¹ Nöö hën Masa Jesosi bazia di kuun ko a goon, nöö hën dee gaan hia sëmbë ku ën bi dë ala, hën de dë nëen baka ta ko.

² Te wan pisi hën wan sëmbë waka ko nëen, hën a tjökö kini a goon nëen fesi. Di sëmbë aki siki tjinna siki hën a begi Masa Jesosi taa: “Masa o, gaantangi, ee i kë, nöö i kula mi be mi ko bunu baa.”

³ Hën Masa Jesosi tuwë maun panjëen, hën a taki dëen taa: “Aai, mi kë. Ko bunu fii e.” Nöö hën wantewante dë hën a ko bunu. Sinkii fëen limbo gbegedee.

⁴ Nöö hën Masa Jesosi bai ën taa: “Womi, fa joo go aki, nöö na konda di soni aki da na wan kodo sëmbë e. Ma be i waka tololoo go a di begima u keiki be de si taa i ko bunu. Nöö i tja di paima go paka Masa Gadu kumafa di wëti dë taa te wan sëmbë i ko bunu u sō wan siki nöö sō i musu du.”

Aki ta lei fa wan sodati hedima biibi Masa Jesosi tjika.

Luk. 7:1-10

⁵ Nöö a baka u di dë, hën Masa Jesosi toona go a Kapenaumi. Nöö fa a go dou naandë, hën wan hedima u dee Loomë köndë sodati ko nëen.

⁶ Hën a taki dëen taa: “Masa o, mi ko a i aki. Wan u dee futuboi u mi suwaki teee piki sō fika a dëdë. A dë a wosu kandikandi, nöö a dë a gaan fuka seei te an sa buli. Nöö hën mi ko a i ko begi i gaantangi be i kulëen da mi.”

⁷ Hën a piki ën taa: “Söö, mati mi jei. Mi o go nëen.”

⁸ Ma nöö hën di sodati hedima toona taki dëen taa: “Wë Masa o.”

A piki.

A taa: “Ma bumbuu tjika sō e, fii ko a mi wosu. Ma nöö i sabi nö? Be i fan leti ka i si i sai aki nöö, nöö di futuboi u mi o ko bunu kaa. Biga sō mi sabi taa i abi taki tjika.

⁹ “Biga miseei, fa mi dë aki, mi sabi andi da taki. Biga mi dë a sëmbë basu kaa, nöö miseei abi sëmëni sodati a mi basu tu. Nöö ee mi taki da wan u de taa be a go ala, nöö a o go. Ee mi taki dëen taa be a ko aki, nöö a o ko. Ee mi manda wan u dee futuboi u mi faa du wan soni, nöö a o du ën.

“Nöö sōseei mi sabi taa i abi taki tu, te a siki liba seei. Nöö hën mbei mi taa fii fan leti ka i dë aki nöö, nöö di futuboi u mi o ko bunu kaa.”

¹⁰ Nöö di Masa Jesosi jei fa di sodati hedima fan dë, nöö a bigi dëen tee na soni. Hën a fan ku dee Dju sëmbë dee ta waka ku ën dë taa: “Dee sëmbë, i si fa di sëmbë aki fan ö? Wë mi taki da unu seei gbelin taa, fa mi ta waka ta lontu a u Isaëli köndë aki, nöö ma si di biibi u di sëmbë aki wan daka e. Ma nöö hën an dë Isaëli sëmbë seei faa musu biibi sō.

¹¹ “Nöö un mëni unu seei e. Biga mi taki da unu taa sëmëni sëmbë na u Dju kuma di sodati hedima i si aki, o kumutu a dee peipei köndë u goonliba ko biibi a mi disa unu. Nöö de o go sindo makandi ku dee gaan sëmbë fuunu, dee Abahamu, Isaki, Jakopu sō, ka Masa Gaangadu dë könu, ta njan di gaan piizii.

12 Ma nöö un dee sëmbë bi musu feni di piizii dë, nöö woon fika söndö ën e. Dee basia u Gadu Köndë o tuwë unu go a döo a dungudungu ala, nöö na ala woon dë ta bai ta kai olo ta njan tanda, ma an o heepi möönsö.”

13 Nöö di a bai de sö kaa, nöö hën a bia fan ku di sodati hedima awaa, a taa: “Mati o.”

Hën a piki.

Hën a taa: “Toona go fii a wosu e. Di soni di i kë, nöö a pasa leti kumafa i biibi naandë.” Nöö fa a fan dë, nöö hën di juu dë seei hën di futuboi u di sodati ko bunu kaa.

Aki Masa Jesosi kula Petuisi mai ku sëmëni oto sëmbë.

Maik. 1:29-34; Luk. 4:38-41

14 Nöö hën Masa Jesosi kumutu dë, hën a go a di bakama fëen de kai Petuisi wosu. Nöö hën a go si di mai u Petuisi sikisiki pëtëë a bedi naandë. Fëbë nöö kisi ën sö.

15 Nöö hën a tëndë maun panjëen, hën di mujëe ko bëtë wantewante. Nöö hën a hopo go seeka soni u njan da Masa Jesosi.

16 Hën di sapate buka dë seei, hën de ta tja wanlö hia sëmbë ta ko a Masa Jesosi faa musu kula de. Sëmëni u dee sëmbë naandë dë ku soni a hedi, nöö hën Masa Jesosi ta jaka de ta puu a de. Wan wöutu nöö a ta taki, nöö dee soni ta kumutu a de liba go kaa. Sö a abi kaakiti tjika, nöö sö a kula hii dee suwakima de tja ko nëen dë tuu.

17 Nöö fa Masa Jesosi ta du dë, nöö a kai makandi ku di soni di tjabukama u Gadu de kai Jesaaja bi sikifi a fesi di a taa:

A tei dee suwaki fuu ku dee siki fuu tuu tja go.

A puu de a u liba.

Aki Masa Jesosi ta fan ku tu sëmbë dee kë ko nëen baka.

Luk. 9:57-62

18 Nöö hën de dë te wan pisi, hën Masa Jesosi si fa dee hia sëmbë ko ta lontu ën, nöö hën a fan ku dee bakama fëen taa: “Un boo koti wata go a di oto së banda ala ufö e.”

19 Ma nöö di juu dë, hën wan u dee Sabima u Wëti ko a Masa Jesosi.

A kai ën taa: “Mësitë.”

A piki.

A taa: “Mi kë ko ta waka ku i o, hii kamian ka i nango.”

20 Nöö hën Masa Jesosi piki ën taa: “I fan bunu e, mati. Ma fii waka a mi baka na sösö soni e., Biga fa dee mbeti ta dë a sabana dë, nöö de abi baaku ta libi. Söseei dee fou dee ta buwa ta lontu i si dë, nöö de abi wosu a dee pau hedi. Ma nöö Mi di ko dë Libisëmbë Mii aki, ma abi kamian ka mi ta duumi e.”

21 Nöö hën wan oto sëmbë bi dë ku ën dë tu, hën a taki dëen taa: “Wë miseei kë waka ku i tu, ma te mi tata dëdë mi bei te mi kaba bifö.”

22 Nöö hën Masa Jesosi piki ën taa: “Mati o, be dee sëmbë dee dë paatipaati ku Gadu bei de na de e. Ma be i ko go ku mi nöö.”

Aki Masa Jesosi du wan gaan foondo soni a wata liba.

Maik. 4:35-41; Luk. 8:22-25

23 Nöö hën Masa Jesosi subi a boto, hën ku dee bakama fëen,

24 hën de ta koti nango a di oto së banda. Ma te u de mëni, hën wan gaan ventu ko, a bigi möön hii soni. Hën di wata ta seki nango a di boto dendu teee kuma a sa singi di boto. Ma hii u di dë, Masa Jesosi dë pii a wan kamian u di boto ta duumi.

25 Nöö hën dee bakama fëen kule go nëen go kai ën taa: “Masa o! Masa!”

Hën a piki.

De taa: “Heepi u o! Woo kaba a wata!”

²⁶ Hën a taki da de taa: “Womi, andi un ta fëëë sö u du? Piki nöö di biibi fuunu piki sö nö?”

Nöö fa a fan dë, hën a hopo gandji da di ventu ku di wata taa: “Un tan pii!” Nöö wantewante dë hën di wata kótö pii. Di ventu kaba.

²⁷ Nöö di dee bakama fëën si sö kaa, nöö a foondo de te na soni. De luku de na de taa: “Womi, ambë seei da di sëmbë aki, womi? Te a fan ku ventu ku wata nöö de ta piki. A bigi da u o. Poosian nöö a abi sö.”

Aki Masa Jesosi puu wanlö taku soni a tu sëmbë liba.

Maik. 5:1-20; Luk. 8:26-39

²⁸ Nöö hën de go dou a oto banda a di pisiwata u dee Galasëni sëmbë. Nöö fa de kumutu a tela naandë, hën de ko miti ku tu womi ta libi a wan geebi naandë. Dee sëmbë dë, de dë ku wanlö taku soni a de liba, nöö de ta hogi tee na wan sëmbë tjika u ko a di kamian ka de sai dë.

²⁹ Nöö di de si Masa Jesosi kaa, hën de bai kai logologo wolo taa: “Ambë ta ko dë, ju di Mii u Gaangadu dë! I ta ko fii da u sitaafu bifö di daka dou nö?” Sö de bai.

³⁰ Nöö di juu dë, wanlö hia hagu bi dë te ala ta pii soni ta njan.

³¹ Hën dee taku soni dee dë a dee sëmbë liba naandë begi Masa Jesosi taa: “Wë ee joo jaka u puu aki, nöö gaantangi da u pasi fuu go a dee hagu ala.”

³² Hën Masa Jesosi piki de taa: “Un go!” Nöö fa a fan dë, wantewante hën de kumutu a dee sëmbë liba go a dee hagu. Nöö hën dee hagu kule ku baai gbulululu bazia wan kununu dë teee go kai a wata djolou dëdë tuu fijaa.

³³ Ma nöö di dee sëmbë bi ta luku dee hagu si sö, nöö hën de kule go a ganda go konda taa sö wan soni pasa ku dee sëmbë dee bi dë ku dee taku soni a hedi naandë.

³⁴ Nöö hën hii di köndë booko gililii ko miti ku Masa Jesosi. Nöö hën de begi ën taa gaantangi, be a kumutu a di pisiwata u de dë go fëën a oto kamian.

9

Aki Masa Jesosi kula wan lanma.

Maik. 2:1-12; Luk. 5:17-26

¹ Wë nöö di dee Galasëni sëmbë taki sö, hën Masa Jesosi ku dee bakama fëën toona subi a boto. Hën de koti wata toona go a di oto së banda ka de bi kumutu, hën de go a di köndë ka Masa Jesosi ta libi.

² Nöö fa de ko dou, hën de tja wan lan sëmbë ko nëën faa kulëën. A dë kandikandi a wan kama liba. Nöö di Masa Jesosi si fa dee sëmbë dee tja di womi ko nëën dë ta biibi ën tjika, hën a taki da di womi taa: “Womi, na fëëë e. Masa Gaangadu da i paadon u dee hogi dee i bi du. An o hoi i a bëë möön.”

³ Ma nöö so u dee Sabima u Wëti sai naandë, hën de kuutu ku de na de taki taa: “Womi, un luku fa a ta mbei kuma hën da Gadu.”

⁴ Ma nöö Masa Jesosi saandi de ta pakisei kaa, hën a piki de taa: “Dee sëmbë o, unfa un ta mëni hogi u mi a unu hati sö?”

⁵ “Be mi hakisi unu wan soni. Fii taki da sö wan sëmbë taa Gadu puu ën a bëë, naa fii taki dëën taa be a hopo waka go, undi u dee tu soni sa möön fukë u taki ku buka? Na di fosuwan nö? Biga sëmbë an sa go a Gadu faa go hakisi ee di soni i taki dë ee tuu, ee ganjan.”

⁶ “Ma nöö un luku, mi o toona fan ku di womi aki möön. Nöö joo si fa Mi di ko dë Libisëmbë Mii aki abi makiti tjika tuu u puu di sëmbë aki a Gadu bëë.”

Hën a bia fan ku ën taa: “Womi.”

A piki.

A taa: “Mi taki e, hopo taanpu, nöö i tei di kama fii, nöö i go a wosu.”

⁷ Nöö fa a fan dë, hën wantewante sô hën di womi di bi dë lanlan dë hopo vu taanpu a hii dee sëmbë fesi naandë. Hën a tei di kama fëën hën a waka go fëën nëën wosu.

⁸ Nöö fa di soni pasa naandë, hën dee hia sëmbë bi sai dë da Masa Gadu tangi e. De gafëën seei fu di a da libisëmbë sô wan gaan kaakiti.

Aki Masa Jesosi kai Mateosi

faa ko dë bakama fëën.

Maik. 2:13-17; Luk. 5:27-32

⁹ Nöö hën Masa Jesosi kumutu dë, hën a ta waka nango. Te wan pisi, hën a si mi, Mateosi, dë sindosindo a mi kantoo naandë ta pii lanti möni.

Hën a kai mi taa: “Mati.”

Hën mi piki.

Hën a taa: “Ko go ku mi e. Ko ta waka a mi baka.”

Hën di a kai mi sô, hën mi hopo wante ko ta waka nëën baka.

¹⁰ Nöö baka u di dë, nöö hën mi kai Masa Jesosi ku dee oto bakama fëën fu de ko njan ku mi a mi wosu. Nöö fa u go sai dë, nöö wanlö oto sëmbë ko dë tu, dee ta pii lanti möni kuma miseei, ku wanlö oto sëmbë lanti ta si kuma poipoi sëmbë u di köndë, de tuu ko makandi a mi Mateosi wosu naandë.

¹¹ Nöö hën dee Faliseima ko si u dë, hën de bigi ta buja ku dee oto bakama u Masa Jesosi taa: “Unfa a waka di mësitë fuunu ta sindo ku dee pii-lanti-mönima ku dee oto poipoi sëmbë u di köndë ta njan a wan tafa?”

¹² Nöö fa de fan dë, hën Masa Jesosi jei gbolo. Hën a taki da de taa: “Dee sëmbë un haika, mi o hakisi unu wan soni.”

Hën de taki aai.

Hën a taa: “Ambë un sabi abi data fanöudu, dee sëmbë dee dë bumbuu naa dee sikima?”

¹³ Hën a taa: “Mi o tei wan soni fu Gadu Buku konda da unu e, nöö un musu pakisei bunu ee andi a kë taki. Gadu taki e, taa:

Fa un ta tja dee mbeti ta ko ta kii da mi aki,

nöö na dee lö soni dë mi kë e.

Ma mi kë fuun abi tjalihati u sëmbë.

Hën nöö wë mi ta suku a unu.

Sô di Buku taki.

“Wë nöö fa mi ko a goonliba aki, nöö ma ko u kai un dee gaan bumbuu sëmbë e. Nönö. „Biga mi si taa un dë fa un kë kaa.” Ma mi ko u ko kai dee sëmbë dee sabi taa de an ta libi bunu kuma dee aki, be de bia libi fu mi sa heepi de puu de a dee hogilibi u de.” Sô Masa Jesosi fan ku dee Faliseima.

Aki dee bakama u Johanisi

di Dopuma ko hakisi

Masa Jesosi wan soni.

Maik. 2:18-22; Luk. 5:33-39

¹⁴ Nöö baka u di dë, hën dee bakama u Johanisi di Dopuma ko a Masa Jesosi. Hën de taa: “Wë u ko a i aki ko hakisi i wan soni. So juu u ku dee Faliseima ta begi söndö njan kumafa di wëti taki, wë ma wa ta si i ku dee bakama fii ta du sô. Un ta njan ta bebe kodo. Nöö u kë sabi faandi mbei.”

¹⁵ Nöö hën Masa Jesosi piki de taa: “Haika e. Te wan womi ta tööu, nöö te de dë a di piizii dendu nöö dee sëmbë di tööuma bi tei u ta seeka soni dëën,

nöö de ta wai biga a dë leti a de dendu naandë. Ma nöö te di juu dou de ko puu ën a de dendu bifö de o dë söndö njan ta kusumi awaa.

„Ma nöö fa mi ta fan ku unu aki, ma a sa toobi unu fuun tei.”

¹⁶ Biga de an ta tei wan njunjun koosu pisi lapu wan awoo koosu e. Biga te i wasi ën, nöö di njunjun koosu o hai disa di awoo wan, nöö di soni o ko möön hogi.

¹⁷ “Söseei de an ta tei njunjun diingi lai a wan awoo mbeti kakisa saku e. Biga di njunjun diingi o soopu, ma nöö di saku an o sa soopu möön biga a gaandi kaa. Te wan pisi a o basiti gboo latja, tuwë di diingi tuu fiaa. Nöö a ko dë taa di saku ku di diingi tuu kaba a söso.”

“Ma njunjun mbeti kakisa saku fi tei, nöö i lai di njunjun diingi nëen te i kaba e. Nöö te di diingi ta soopu nöö di saku seei o ta soopu tu. Nöö di diingi o dë bumbuu nöö di saku seei o dë bumbuu tu.”

Aki Masa Jesosi heepi wan mujëë ku wan mujëë mi.

Maik. 5:21-43; Luk. 8:40-56

¹⁸ Nöö Masa Jesosi an kaba u fan seei, nöö hën wan fesima u Dju keiki ko suti kini a goon nëen fesi. Hën a taki dëen taa: “Mësitë o, mi ko a i aki ko begi i taa wan mujëë mi u mi suwaki teee fa u dë aki a dë seei a dëdë ku libi maun. Nöö hën mi ko hakisi i ee i sa ko buta maun nëen da mi be a toona ko libi.”

¹⁹ Nöö hën Masa Jesosi piki ën taa: “Antoobi, mati. Un boo go.”

Nöö hën a hopo, hën ku u dee bakama fëen, hën u nango.

²⁰ Te wan pisi hën wan mujëë waka ko a u baka dë. Nöö di mujëë dë bi abi wan siki, tuwalufu jaa longi soni ta kule nëen an ta koti möönsö. Ma nöö di a si Masa Jesosi ta ko dë, hën a waka saapi ko nëen baka, hën a panjan di koosu buka fëen tjë sö.

²¹ Biga a ta pakisei nëen hati taa: “Ee mi sa nama tjë seei a di koosu fëen, nöö mi libi kaa.”

²² Nöö fa u taki dë, hën Masa Jesosi bia luku, hën a si di mujëë. Hën a taa: “Mujëë o, na fëëë e. Di biibi di i abi a mi liba dë heepi i kaa.” Nöö wantewante seei di mujëë ko bëtë gbegedee u di siki fëen.

²³ Nöö hën Masa Jesosi nango te a di wosu u di hedima u keiki di bi kai ën dë. Nöö fa a go dou, hën a si wanlö baakuma sai dë kaa ta böö foloiti, kumafa di guwenti fuu dee Dju sëmbë dë te wan sëmbë dëdë. Hia sëmbë sai dë ta bai ta këë tee di kamian ta mbei wööo seei, biga de si taa di mujëë mi dëdë kaa.

²⁴ Hën Masa Jesosi taki da de taa: “Dee sëmbë, un hai kumutu aki da mi pasi. Biga na dëdë di mi dëdë e. Duumi nöö a ta duumi.” Ma nöö di de jei a taki sö, nöö hën dee hia sëmbë dë lafu ën mbei ën fa te a bigi.

²⁵ Nöö hën dee sëmbë dee abi di wosu mbei dee sëmbë go a döo. Hën Masa Jesosi pasa go dou ka di mujëë mi dë, hën a panjënë a maun. Nöö fa u mbei dë, wantewante naandë hën di mujëë mi weki hopo taanpu.

²⁶ Nöö fa a du dë, hën di soni bigi da sëmbë tee di buka paaja dou hii di pisiwata naandë tuu taa sö wan foondo soni Masa Jesosi du.

Aki Masa Jesosi kula wanlö sëmbë möön.

²⁷ Nöö hën Masa Jesosi kumutu naandë. Hën a ta waka nango te wan pisi, nöö hën tu bookowojoma ta ko nëen baka ta bai seei ta kai ën taa: “Na i da di bakamii u Kõnu Dafiti ö, di Gadu bi paamusi taa a o manda ko faa heepi u,? U begi i gaantangi, be i a’ tjalihati fuu nöö i heepi u o!” Sö de ta bai ta ko nëen baka nöömö. Ma Masa Jesosi an piki de möönsö, a pasa go fëen a wosu.

²⁸ Te wan pisi, hën de go dou nëën ka a dë a wosu dendu naandë. Nöö hën a hakisi de taa: “Wë dee sëmbë, fa un ko a mi aki, nöö un ta biibi tuutuu taa mi sa kula unu nö?”

Hën de taa: “Aai, Masa, u ta biibi e.”

²⁹ Hën a taki aai. Nöö hën a nama maun a de wojo hën a taki da de taa: “Söö. Wë be a pasa ku unu leti kumafa i si un ta biibi dë e.”

³⁰ Nöö fa u mbei dë, hën wojo u de tu sëmbë dë ko limbo seei gbegedee.

Ma nöö hën Masa Jesosi bai de taanga taa: “Wan musu kondëen da na wan sëmbë e!”

³¹ Ma hii fa a bai de dë seei, ma de paaja di soni a du dë te dou hii di köndë.

³² Nöö hën Masa Jesosi ku u dee bakama fëen kumutu naandë. Nöö di u nango, hën de tja wan womi ko nëën faa musu kulëen da de. Di sëmbë aki abi wan soni nëën hedi ta tapëen buka te an sa fan.

³³ Nöö hën Masa Jesosi bai ën puu nëën liba tefa a kaba, nöö wantewante dë hën di womi toona ko ta fan baka.

Nöö fa dee gaan hia sëmbë bi sai naandë si di soni pasa dë, hën de taa: “Hëen, aai maingë, u si foondo soni tide di wa bi si a u köndë aki wan daka.”

³⁴ Ma nöö dee Faliseima bi sai dë tu, hën de bai taa: “Höön, andi wë! Wan si taa di hedima u didibi hën ta dëen kaakiti faa jaka dee soni nö?”

Aki ta lei fa Masa Jesosi abi tjalihati u sëmbë tjika.

³⁵ Nöö hën Masa Jesosi ta waka ta lontu a dee gaangaan köndë ku dee pikipiki köndë fuu dee Dju sëmbë tuu te dou. A nango a dee keikiwosu fuu ta lei sëmbë soni u Gadu ta konda di Bunu Buka da de kumafa di Njunjun Tii u Gadu dë. Nöö hiniwan sooti pei siki di sëmbë abi kaa, de tuu a ta kula.

³⁶ Ma nöö fa a si dee gaan hia sëmbë ta ko nëën nöömö dë, nöö tjali u de kisi ën teee. Biga a si taa de dë fukafuka weiwei, kuma wanlö hia sikafu dë a mundu söndö sëmbë u kiija de.

³⁷ Nöö hën a bia fan ku u dee bakama fëen, a taa: “Dee sëmbë o, a tjali da mi e. Wan si fa dee sëmbë ta ko gidjii nöömö a mi nö? De dë kuma wan gaan goon njanjan lepilepi fii koti buta a suwa, ma wookoma biti poi o.

³⁸ Nöö un musu begi di goon Masa, be a manda möön hia wookoma fu de koti di njanjan buta a suwa.”

10

Aki Masa Jesosi lei dee bakama fëen fa de musu wooko.

Maik. 3:13-19, 6:7-13, 9:41, 13:9-13; Luk. 6:12-16, 9:1-6, 12:2-9, 51-53, 14:26-27, 21:12-17

¹⁻⁴ Söö. Wë a di pisi aki woo kai dee në fuu dee bakama u Masa Jesosi dee a bi tei a dee otowan mindi, fuu dë dee apaiti tjabukama fëen de ta kai “apösutu”. Di fosu wan hën de kai Simon, di oto në fëen da Petuisi, ku di baaa fëen de kai Andiasi. Nöö i abi Jakobosi ku ën baaa Johanisi, dee mii u Zebedeosi. Nöö a baka u di dë i abi Filipi ku Batolomisi, ku Tomasi, ku mi Mateosi di bi ta pii lanti möni dë. Ufö joo kisi Jakobosi di womi mii u Alufasi, ku Tadeosi, ku Simon di bi dë a dendu u dee sëmbë bi kë puu u dee Dju sëmbë a Loomë köndë basu, ku Judasi Isikaliotu, di o sei Masa Jesosi da dee felantima fëen fu de kii.

Nöö u dee tuwalufu sëmbë u kai aki, Masa Jesosi kai u ko nëën, nöö hën a da u makiti fuu ta jaka dee gadu ta kisi sëmbë a hedi ta puu. Nöö söseei a da u makiti tu, fuu kula hii pei sikima ko bunu.

5 Nöo hën a o manda u go a köndëköndë fuu ta konda di buka u Gadu. Nöo hën a fan ku u te a kaba fa u musu waka.

A taki da u taa: “Fa woon go aki, nöo wan musu go a dee oto sëmbë na Isaëli e. Nönö. Na a dee Samalia sëmbë seei un musu go.

6 Ma a dee Isaëli sëmbë fuu, dee i si ta dë kuma lasilasi sikafu dë, a de nöo un musu go.

7 “Nöo fa i si woon go dë, nöo un musu ta konda soni da de gbelingbelin, be de fusutan taa abiti möön nöo Gadu o seti di tii fëen a wan hii njunjun fasi.

8 “Nöo fa mi ta manda unu go aki, nöo te un dou a wan köndë nöo un musu kula dee sikima e. Ee wan sëmbë dëdë, nöo un weki ën. Nöo un kula dee sëmbë dee siki tjina nöo un jaka dee gadu puu a sëmbë hedi. Nöo fa un kisi di kaakiti aki, na bai un bai ën e, nöo wan musu mbei sëmbë paka unu fëen tu.

9 “Nöo fa un nango aki, na köpö sensi seei fuun musu tja go ku unu e.

10 Wan musu lai na wan soni a saku tja. Wan musu tei tu djakiti ee nasö tu susu tja go ku unu e. Nöo na tei tu pau fii mbei kokoti, ma i sa tei wan. Biga di sëmbë di i ta heepi, nöo hën musu söluu i.

11 “Söö. Nöo te un go a wan köndë, ee gaan wan ee piki wan, nöo un musu suku wan sëmbë di de abi lesipeki da a di köndë, nöo unu tuwë lai nëen wosu. Nöo a di wosu naandë, nëen i musu ta libi fu tee i kumutu dë e.

12 “Nöo te woon denda a di wosu, nöo un da dee sëmbë odi taa ‘Masa Gadu musu da unu kötöhati e, dee sëmbë.’

13 Nöo mi taki da unu taa ee dee sëmbë u di wosu naandë dë a pasi u kisi di lö bunu dë, nöo Gadu o da de kötöhati tuu. Ma ee de an dë a pasi u de feni ën, nöo de an o feni ën. Di bunu dë o toona ko a unu baka.

14 “Nöo ee un go a wan köndë ee nasö a wan wosu, nöo dee sëmbë an kë tei unu, de an kë jei di buka un ta tja go dë seei, nöo un kumutu dë go fuunu e. Nöo te woon go, nöo un musu puu di susu fuunu a unu futu, nöo un naki ën puu di doti di bi peka nëen tuwë disa da de, nöo un kumutu dë e.

15 Nöo mi taki da unu taa te di daka Masa Gadu o kuutu a libisëmbë liba, nöo di köndë dë o kisi wan möön gaan hebi sitaafu möön leki fa dee hogi köndë de kai Sodom ku Gomola bi kisi.

16 “Nöo un haika e, dee sëmbë. Fa i si mi ta manda unu go aki, nöo a dë leti kuma mi ta manda sikafu go a takumbeti dendu. Nöo un musu dë wekiweki ta wooko ku fusutan e, ma nöo un musu dë ku saapi fasi seei tu kuma pomba.

17 Nöo wojo fuunu musu ta dë limbolimbo nöömö. Un musu saandi un ta du. Wë biga mi o bai unu a fesi taa de o kisi unu tei tja go a dee gaan kuutu u de e, nöo de o fon unu a dee keikiwosu u de seei.

18 De o ta tja unu go a dee hedima u köndë fu di në u mi hedi. Ma wan musu fëëë, biga naandë woon feni pasi fuun sa konda soni u mi da hii sëmbë, Dju sëmbë te dou ku dee na Dju sëmbë tuu.

19 “Nöo te de kisi unu tja go a dee kuutu u de, nöo wan musu dë pantapanta ta booko hedi ta pakisei taa: ‘Unfa woo piki de?’ Nönö. Biga a di juu dë Gadu o da unu di fa fuun piki de.

20 Nöo an o dë taa unu o fan di fan naandë e, ma di Akaa fuu Tata di dë a unu liba dë, hën o ta fan da unu.

21 “Nöo mi taki e, taa wan baaa o tjëen baaa go könku u de kii puu fu di a nama ku mi hedi. Söseei tu wan tata o tjëen mii go könku u de kii puu, fu di di mii ta nama ku mi hedi. Dee mii o ta hopo ta puu de mama ku dë tata a de liba manda go kii fu di de ta nama ku mi hedi.

22 Boo taa hii sëmbë o buuse unu fu di un ta nama ku mi hedi. Ma nöo di sëmbë di ta hoi te go dou a di kaba pisi, nöo hën o feni di heepi u Gadu.

23 “Nöö te un go a wan köndë nöö te de ta toobi unu tumisi, nöö un kule kumutu dë go a oto köndë e. Biga mi taki da unu taa wan o sa kaba di wooko a hii dee köndë u dee Isaëli sëmbë fuu tuu bifö a dë taa mi di ko dë Libisëmbë Mii aki o toona ko a goonliba.

24-25 “Ma nöö fa i si de o du ku unu dë, nöö söseei de ta du ku mi aki kaa e. Hën mbei an musu dë gaan soni da unu. Biga di sëmbë di ta tei lei an sa hei möön di sëmbë di ta lei ën. Söseei tu, wan futuboi an sa hei möön hën masa, ma a sa dë kuma hën masa nöö. Hën mbei fa de ta kosi mi aki taa di didibi hën ta wooko a mi liba, wë nöö na möönmöön de o kosi un dee sëmbë ta nama ku mi nö?

26 “Nöö mi taki e, taa fa mi ta manda unu go aki, nöö wan musu fëëë fuun konda dee soni mi ta manda unu fuun konda. Biga na wan soni sa dë a tjubi te nöö an o ko a döo. Nöö na wan soni sa pasa te nöö sëmbë an o ko sabi ën.

27 Nöö fëën mbei dee soni i si mi ta konda da unu sapisapi a së aki, un musu ta bai ta konda de a lanti dendu.

28 “Nöö wan musu fëëë tu te sëmbë o ta suku unu fu de kii. Biga de sa kii unu sinkii, ma de an sa kii unu akaa. Ma di Sëmbë fii fëëë, hën da Masa Gaangadu e. Biga ,ee ja a' bisi ku ën, nöö, a sa disa i te i kaba a sösö, nöö di sinkii fii ku di akaa fii tuu o go a didibi faja.

29 “Dee sëmbë o, un luku dee sösö piki fou ta buwa ta lontu aki. Sëmbë an ta si de u gaan soni, hën mbei de ta sei tu u de u wan tiisënsi nöö. Ma nöö fa i si de ta buwa dë, na wan kodo u de sa puu kai a goon ee na u Tata a liba da pasi.

30-31 Wë nöö un dee libisëmbë wë? Wan bumbuu gaanfa möön dee piki fou naandë ö? Nöö te i si wan soni pasa ku unu, nöö nëën da u Tata dëën pasi fa a pasa sö nö? Nöö hën mbei mi taa wan musu fëëë. Biga Masa Gaangadu sabi hii soni fuunu finifini, te dou ku un mëni niën uwii dë a unu hedi.

32 “Nöö mi taki e, taa ee ja fëëë fii piki a lanti fesi taa mi ku i nama, nöö miseei tu ma o fëëë u piki mi Tata a liba ala taa mi ku i nama.

33 Ma ee wan sëmbë ja kë piki taa mi ku i nama, nöö miseei tu, ma o piki mi Tata taa mi ku i nama.

34 “Dee sëmbë o, fa i si mi ko a di goonliba aki, na wata mi tja ko e, ma faja mi tja.

35 Mi ko u ko paati sëmbë ku sëmbë. Biga fu mi hedi a o pasa leti kumafa i si Gadu Buku taki. A taa:

Wan womi mii ku ën tata o kisi gaan toobi.

Mujëë mii ku ën mama o kisi gaan toobi.

Mai ku mai o kisi gaan toobi.

36 Nöö dee möön gaan felanti di wan sëmbë o abi, de o dë dee bëë fëën seei.

Sö a bi sikifi a Gadu Buku kaa e.

37 Ma nöö ee wan sëmbë lobi hën mama ku ën tata möön mi, ee nasö a lobi ën womi mii ku ën mujëë mii möön mi, nöö di sëmbë dë an bunu tjika u waka a mi baka.

38 “Un haika e, dee sëmbë. Ja si fa de ta buta wan sëmbë faa tja hën lakpa pau te de o tjëën go kii ö? Wë sö nöö hiniwan sëmbë o abi fëën sitaafu di a musu tjai ee a o ko waka a mi baka. Nöö ee ja kë tja di sitaafu dë, nöö ja fiti fii dë wan bakama u mi e.

39 “Söseei tu, ee wan sëmbë i kë dë fii seei, nöö ja o feni wan suti libi kumafa i kë möönsö. Poi nöö libi fii o ta poi. Ma nöö di sëmbë di ta sakëën libi da mi, hën o feni wan suti libi nöömö kumafa a kë.

40 “Nöö mi taki e, taa fa mi ta manda unu fuun ta tja di buka u Masa Gaangadu aki, ee wan sêmbê tei unu buta a wosu nöö miseei wê a tei dê kaa e. Nöö ee wan sêmbê tei mi, nöö di Sêmbê di manda mi ko a goonliba aki, nöö hênseei wê a tei dê tu.

41 Nöö ee i si wan sêmbê ta tja Gadu buka nöö hên i hoi ên a i wosu fu di a dê tjabukama u Gadu hedi, nöö i seei o feni paima a Gadu leti kumafa di tjabukama dê seei o feni. Sôseei tu, ee i si wan sêmbê ta libi bunu kumafa Gadu kê, nöö hên i kisi ên hoi fu di i sabi taa sô a ta libi hedi, nöö joo feni paima a Gadu leti kumafa di sêmbê dê seei o feni.

42 “Un luku dee sêmbê ta waka a mi baka aki o, dee sêmbê. Sômêni u de dê lagilagi sêmbê seei a libisêmbê wojo. Ma mi taki e, taa ee dëewata kisi wan u de nöö i dëên wan kan kötö wata faa bebe fu di a ta waka a mi baka hedi, nöö joo feni paima fêên a Gadu nöömö.”

Nöö sô Masa Jesosi leti u dee bakama fêên te a kaba ufö a manda u go.

11

Aki dee bakama u Johanisi

ko a Masa Jesosi.

Luk. 7:18-35

1 Baka u di Masa Jesosi fan ku u sô, hên a kumutu dê, ta waka ta lontu a dee köndêköndê u Galilea ta konda di buka u Masa Gaangadu ta lei sêmbê soni fêên finifini.

2 Wê nöö di juu dê, de bi kisi Johanisi di dopuma buta a dunguwosu kaa. Nöö ala a dê ta jei u hii dee soni dee Masa Jesosi, di Keesitu, ta du. Nöö hên a kai dee bakama fêên ko nêên, hên a manda de taa: “Un go a Jesosi e,

3 nöö un hakisi ên ee hên da di sêmbê tuu, di Gadu bi paamusi u taa a o manda ko, naa u musu luku wan oto sêmbê möön? Sô fuun hakisi ên e.”

4 Nöö hên dee bakama u Johanisi nango te de go dou a Masa Jesosi. Hên de dëên di buka te de kaba.

Nöö hên Masa Jesosi piki de, a taa: “Un toona go a Johanisi e, nöö un konda hii dee soni dee un si ku dee un jei a mi aki tuu dëên.

5 Un taki dëên taa, hii dee soni Gadu Buku bi taki u di Sêmbê Gadu o manda ko, nöö de tuu ta pasa fa u dê aki. Biga bookowojoma ko ta si soni, lanma hopo ta waka, sikitjinama ta ko bunu, bookojesima ko ta jei soni, dëdê sêmbê ta weki, dee möfina sêmbê ta jei di suti Buka u Masa Gadu. Sô fuun taki dëên e.

6 Nöö un taki dëên tu, taa di sêmbê di an ta mati fu di ma ta du kumafa a bi mênî, nöö sô wan sêmbê dê bunu e.”

Sô Masa Jesosi piki de te a kaba.

Nöö hên de toona go a Johanisi baka.

Aki Masa Jesosi taki soni u Johanisi di Dopuma.

7 Nöö fa dee bakama u Johanisi nango dê, hên Masa Jesosi bia fan ku dee hia sêmbê dee ku ên sai dê. A taa: “Fa un bi kule go a Johanisi a di sabana dê, un sooti sêmbê un go si ala? Un si wan sêmbê di aan pakisei, kuma wan kambaluwa di ventu ta böö nango ta ko nöö?”

8 Ee nasö un si wan sêmbê bisibisi ku gaan waiti koosu nö? Nönö, Johanisi an bi dê sô e. Biga dee sêmbê ta bisî gaan waiti koosu, nöö a guduma wosu de ta dê. Na a sabana dendu de ta libi.

9 “A kandê un bi mênî tu taa fa woon go dê, nöö woon si wan gaan tjabukama u Gadu ta du gaan foondofoondo soni. Wê mi taki da unu taa un si wan tjabukama u Gadu tuu, ma a möön hei möön wan tjabukama seei.

10 Biga Johanisi wë da di sëmbë di dee fesiten tjabukama u Gadu bi sikifi soni fëen, taa Gadu o manda wan sëmbë ko faa seeka pasi da di Heepima di o ko.

11 “Nöo mi taki da unu seei gbelin taa fu hii dee libisëmbë mujëe pai, nöo na wan u de hei kuma di Dopuma de kai Johanisi e. Ma fa mi fan dë seei, ma hiniwan sëmbë di dë a di Njunjun Tii u Gadu dendu te dou ku dee möön lagi wan seei, nöo de tuu a’ kôlôku möön Johanisi.

12 “Nöo fa mi ta fan soni u di Njunjun Tii u Gadu aki, nöo a ta ko taanga seei kaa e, dee sëmbë, fu kumutu a di ten Johanisi hopo seti konda soni fëen fu te kisi fa u dë aki. Nöo di sëmbë di ta biinga taanga nëen baka nöo hën o dë nëen dendu.

13 Nöo di Njunjun Tii aki, hën da di soni di Mosesi ku hii dee fesiten tjabukama u Gadu tuu bi ta taki, te kisi di ten u Johanisi aki.

14 “Nöo ee un kë piki, nöo woon ko sabi taa Johanisi wë da di sëmbë di bi musu ko a di ten di di tii aki o seti. Hën wë da di Elia di dee oto fesiten tjabukama bi ta taki taa a o toona ko. „Biga di wan seei fasi Johanisi ku Elia abi.”

15 Nöo fa i si mi ta fan ku unu aki nöo un pakisei ën bunu e, be un fustütëen.”

16 Nöo hën a bai taa: “Ee, dee sëmbë aki, andi seei mi sa tei maaka ku unu kumafa un dë aki baa? Un dë kuma dee mii ta pëe a sitaati, soni an ta kai ku de möönsö. Fa de sai dë, de ta buja ku de seei taa:

17 “U böo tutu da unu te u wei fuun baja, ma wan kë baja. Nöo hën u bia kanda tjali kanda da unu fuun këe, ma wan kë këe.”

“Nöo sô wë nöo un dë tu e, dee sëmbë.

18 Biga Johanisi ko, nöo hën an bi ta njan kuma unu, an bi ta bebe kuma unu, nöo un kosi ën taa a lau, soni dë nëen liba.

19 “Nöo hën Mi di ko Libisëmbë Mii aki ko, nöo hën mi ta njan ta bebe ku unu, nöo hën un ta kosi mi tu taa mi a’ langabëe tumisi, mi dë bebesonima, mi ta hulu takulibisëmbëma u di köndë. Ma mi sabi taa a o ko a döo nöömö u sëmbë musu ko fusutan taa Gadu hën manda mi ku Johanisi tuu ko, biga u tu tuu bi libi leti kumafa Gadu kë.”

Aki Masa Jesosi ta bai helu

da dii köndë.

Luk. 10:13-15

20 Nöo hën Masa Jesosi ko gandji da dee sëmbë u dee köndë awaa ka a bi du dee möön hia wooko fëen, foondofoondu wan, ma töku de an bi bia ko piki ën möönsö fu de disa dee hogilibi u de.

21 A taa: “Mi bai helu da unu e, un dee sëmbë u Kolazin, ku un dee sëmbë u Betisaida. Biga fa dee köndë de kai Tilusi ku Sidon sai naandë, dee sëmbë u de hogi tee de hogi. Ma ee de bi si dee gaan foondo wooko dee un bi si aki, nöo de bi o bia de libi gaanduwe. Mi taki da unu taa, de bi o buta maun a mindihedi ta bai ta këe ta tuwë deseei a goon ta logoda ta bisi djodjo. Sô di hogilibi de bi ta libi dë bi o hati de tjika. Ma un wan du sô.

22 “Hën mbei mi taki da unu taa a di gaan kuutudaka u Gadu, nöo di sitaafu di dee sëmbë u Tilusi ku Sidon o kisi an o bigi kuma di woon kisi e.

23 “Nöo sôseei un dee sëmbë u Kapenaumi fa un hei di gaan hei aki, nöo un ninga taa hën o tja unu go a Gadu Köndë ö? Na seei. Mi taki da unu taa a di didibi faja a o tja unu go kaba a sôsö. Biga fa dee sëmbë u Sodom bi hogi tjika dë seei, ma ee de bi si dee gaan foondo wooko dee un si aki, nöo de bi o bia libi gaanduwe. Nöo Gadu an bi o booko di köndë u de kaba a sôsö te kisi fa u dë aki.

²⁴ “Nöo mi taki da unu taa di sitaafu di Sodom o kisi a di gaan kuutudaka an o bigi kuma di un dee sëmbë u Kapenaumi aki o kisi e. Biga wan kē bia unu libi möönsö.”

Aki Masa Jesosi fan ku ën tata

ufö a fan ku

dee sëmbë dee dë ku fuka.

Luk. 10:21-22

²⁵ Nöo hën Masa Jesosi bia fan ku ën Tata awaa. A taa: “Taata o, i wë da Masa u liba ala ku goon aki tuu. Nöo mi gafa i o, fu di fa i ta wooko. Biga i ta hoi dee soni fii tjubitjubi da dee kônima u di goonliba aki ku dee sëmbë dee ta mbei taa de sabi soni poi, nöo hën i ta mbei dee lagilagi sëmbë ko sabi de.

²⁶ Aai Taata, a bigi o, biga wë sö i feni ën bunu fii du. Gaantangi fii e.”

²⁷ Nöo hën a bia fan ku dee sëmbë hën ku de sai dë möön. A taa: “Dee sëmbë o, fa mi dë aki, mi Tata buta hii soni a mi maun e. Nöo na wan sëmbë sabi mi fa mi dë boiti mi Tata nöo, nöo söseei na wan sëmbë sabi mi Tata tu fa a dë boiti mi di Mii fëen aki nöo, ku di sëmbë di mi kē mbei a ko sabi ën.”

²⁸ Nöo hën a taa: “Haika e, dee sëmbë, ee wan sëmbë i dë fukafuka, i ko wei u dee lai dee i ta tja, nöo be i ko a mi e. Nöo mi o mbei i ko dë bööböo.

²⁹ Dee sëmbë, un saka unu seei da mi o, be mi ta tii unu ta lei unu soni. Biga fa mi dë aki, mi abi tjalihati, mi a saka fasi, nöo ee wan sëmbë i ko a mi nöo joo feni böö te dou a i hati.

³⁰ Biga di tii u mi an taanga e, nöo dee lai dee mi o da unu fuun tjai, de dë fukëfukë.”

Sö Masa Jesosi fan ku dee sëmbë ta haikëen dë tefa a kaba.

12

Aki Masa Jesosi lei taa

hën da basi u saba daka.

Maik. 2:23-28; Luk. 6:1-5

¹ Nöo hën u dë te wan saba daka, hën u ku Masa Jesosi ta waka ta pasa a wanlö goon dendu. Nöo dee goon dë ku wan pei soni kuma alisi, ma i sa njan mën kuwakuwa. Nöo hangi bi kisi u, nöo hën u ta booko so taka fëen ta buuka ta njan.

² Te wan pisi hën dee Faliseima si taa sö u ta du, hën de taki da Masa Jesosi taa: “Ja si fa dee bakama fii ta wooko a di saba daka ta poi di tjina nö?”

³ Hën a piki de taa: “Dee sëmbë o, wan bi lesi a di Buku di soni bi pasa ku Dafiti ku dee mati fëen ö? Hangi bi ta kii de,

⁴ nöo hën de go a di wosu u Masa Gaangadu hën dee begima da de di bëëe di de ta buta da Masa Gadu. Wë nöo di bëëe naandë, dee begima wanwan nöo ta a’ pasi u njan mën, na sö nö? „Ma tökuseei Gadu an tei Dafiti ku dee sëmbë fëen fu hogi di de njan mën.”

⁵ “Nöo wan ta lesi a di Buku tu nö, taa a a’ juu dee begima musu ta wooko a di saba daka nö? Wë ma tökuseei de an ta du hogi. „Biga a di Wosu u Gadu de ta wooko, nöo di Wosu hei möön dee wëti u saba daka.”

⁶ Wë nöo mi taki da unu e, taa Mi di Sëmbë di un ta si dë taanputaanpu a unu fesi aki, nöo mi hebi gaanfa pasa di Wosu u Gadu. „Nöo ee ma si taa dee sëmbë aki du hogi, nöo an dë fuun musu kuutu de e.”

⁷ “Wan jei fa Gadu taki a di Buku fëen ö? A taa: Fa un ta tja dee mbeti ta ko ta kii da mi dë,

na dee lö soni dè mi kè a unu e.
Ma mi kè fuun abi tjalihati u sèmbè.
Hèn nöö mi ta suku a unu.

Sõ Gadu taki e. Wè nöö misikumama ee un bi sabi andi di Buku kè taki dè, nöö wan bi o kuutu dee sèmbè aki sò, „ma un bi o abi tjalihati u de fa di hangì ta kii de dè.”

⁸“Nöö mi toona taki da unu möön taa Mi di ko dè Libisèmbè Mii aki, nöö mi abi taki a saba daka liba e.”

Sõ Masa Jesosi taki da dee Faliseima di juu dè.

Aki Masa Jesosi kula wan sèmbè

a di saba daka.

Maik. 3:1-6; Luk. 6:6-11

⁹Nöö hèn u kumutu naandè, hèn u go dou a wan keikiwosu fuu dee Dju sèmbè, hèn u denda nëèn.

¹⁰Nöö hèn u ko si wan sèmbè dè, wan sè maun fèèn dè dèedèè tjakaa sò.

Wè nöö dee felantima u Masa Jesosi bi sai leti dè kaa, nöö hèn de o poobèèn luku ee de sa feni fòutu nëèn. Hèn de hakisi èn taa: “Unfa i mèni? A fiti fu kula wan sèmbè a saba daka nò?”

¹¹Hèn Masa Jesosi piki de taa: “Haika e. Ee i abi wan sikafu fii ta kiija nöö hèn a kai go a baaku dendu a saba daka, nöö ja o go puu èn fu an musu dèdè ö?”

¹²Wè nöö wan libisèmbè wè? An bumbuu möön wan mbeti nò? Nöö ee i kè du wan sèmbè bunu a saba daka nöö aan tjina e.”

¹³Nöö hèn a bia fan ku di sèmbè di abi di dèedèè maun taa: “Womi, tëndè di maun fii ko i si.”

Nöö fa a tëndè maun taaan naandè kaa, hèn di maun fèèn ko bunu gbelingbelin kuma di oto sè maun.

¹⁴Ma nöö di dee Faliseima si di soni Masa Jesosi du dè, nöö an kai ku de seei. Hèn de go a dõõ go ta kuutu fa u de du de kii èn puu dè.

¹⁵Ma Masa Jesosi sabi kaa taa sò fèèn de ta pakisei, nöö hèn a kumutu disa de dè, hèn a go fèèn. Nöö fa a nango dè, wanlõ hia sèmbè ta waka ta ko nëèn baka hèn a kula dee sikima u de tuu.

¹⁶Ma nöö hèn a ta bai de taa de an musu mbei lanti ko sabi soni fèèn.

Aki ta lei taa Masa Jesosi hèn da di Futuboi u Gadu di bi musu ko.

¹⁷Nöö hii fa Masa Jesosi ta du naandè, nöö a ta pasa leti kumafa Gadu bi buta di fesiten tjabukama fèèn de kai Jesaaja faa sikifi a di Buku taa:

¹⁸Luku di futuboi u mi aki, di mi tei u miseei vò,
hèn wè mi lobi e.

Gaan piizii fèèn seei dè a mi hati.
Nëèn liba wè mi o buta di Akaa u mi,
nöö a o ta konda da dee peipei sèmbè u goonliba
andi da bunu ku andi da hogi.

¹⁹Fa a o sai dè, nöö an o ta fia ta kai wolo.
Na wan sèmbè seei o jei bai fèèn a sitaati möönsõ.
Nöö a o abi tjalihati u sèmbè teee.

²⁰Te a si wan sèmbè booko saka,
kuma wan piki pau de booko piè hængi buta tækèè dè,
nöö an o fèn èn puu.
Ee a si wan sèmbè abi wan pikii biibi a Masa Gadu liba eti,
kuma wan lampu di oli fèèn ta kaba
nöö a ta tapa nango njöiin,

nöö an o böö en tapa.

Sö a o abi tjalihati u sëmbë tjika e.

Nöö sö a o ta libi fëen fu te a wini hii mundu buta u de musu libi a wan leti fasi nëen wojo.

²¹ Nöö hii dee pepei nasiön u di goonliba aki o buta pakisei nëen liba fu de feni heepi a Gadu. Sö wë di Buku bi taki fu di Futuboi u Gadu di bi o ko.

Aki dee Faliseima ku Masa Jesosi toosa töngö.

Maik. 3:20-30; Luk. 6:43-45, 11:14-26

²² Nöö di juu dë, hën de tja wan sëmbë ko a Masa Jesosi faa kulëen. Di womi dë, wan soni bi tapëen buka, a booko en wojo. Nöö hën Masa Jesosi puu di soni nëen liba. Nöö wantewante dë hën buka fëen jabi a ko ta fan, wojo fëen ko limbo a si soni baka.

²³ Nöö di soni foondo dee hia sëmbë sai dë te na soni, hën de ko ta hakisi de na de taa: “Maingë, a sa kë di Bakamii u Könu Dafiti di Gadu bi paamusi u taa a o ko, di Heepima, hën disi nö?” Sö dee sëmbë ta hakisi deseeli.

²⁴ Ma nöö di dee Faliseima jei fa de ta taki dë, hën de taa: “Höön, andi wë? Di soni dë na gaan soni sö. Fa i si a ta puu dee soni a sëmbë liba dë, nöö di hedima u dee didibi de kai Belisabo hën wë ta dëen di kaakiti faa du sö e. Na oto soni möönsö.”

²⁵ Ma nöö Masa Jesosi sabi kaa taa sö fëen dee Faliseima ta pakisei. Hën a fan ku de taa: “Unfa un mëni? Ee wan könu dë nöö hën dee sëmbë dee dë nëen tii hopo ta feti ku de na de, nöö nëen da di tii fëen o booko nö? Sösei tu, ee wan piki köndë ee nasó wan bëë ko paati ta feti ku de na de, nöö na kaba a ta kaba a sösö nö?”

²⁶ “Nöö ee di didibi ta feti ku dee otowan fëen ta jaka de na de ta puu a sëmbë liba, nöö nëen da di tii fëen ta kaba a sösö nö?”

²⁷ Nöö fa un taki dë, taa mi ta puu dee soni a sëmbë liba ku di didibi kaakiti, nöö dee sëmbë fuunu wë? Ku un kaakiti de ta puu de? Wë de o da unu adjabëe o, biga ku di wan seei kaakiti mi ku de ta puu de.

²⁸ “Ma nöö ee mi ta puu de ku di kaakiti u di Akaa u Gadu, nöö un musu sabi taa di Njunjun Tii u Gadu ko a unu awaa e.

²⁹ Biga ee wan sëmbë i kë go a wan taanga sëmbë wosu u go tei dee gudu fëen, nöö i musu kisi en tai te i kaba bifö, na sö nö? Wë nöö hën mi ta du aki.”

³⁰ “Nöö ee wan sëmbë ja tuwë gogo ku mi a wan së, nöö hën da i dë felantima u mi e. Ee ja ta wooko makandi ku mi fii hai sëmbë ko a mi, nöö hën da i ta jaka sëmbë puu a mi kaa.

³¹ “Nöö un haika bunu fa mi o fan aki, dee sëmbë. Mi taki e, taa a dë wan gaan hogi soni fii sösö di Akaa u Masa Gaangadu. Biga hii hogi di wan libisëmbë sa du ku hii pei hogi soni a sa taki ta sösö Masa Gaangadu, de tuu sa puu a Gadu bëë. Ma ee i ta sösö di Akaa fëen, nöö heepi an o dë da i möön e, biga Gadu an o puu i nëen bëë möönsö.

³² Aluwasi ee wan sëmbë i ta mindi soni da Mi di ko dë Libisëmbë Mii aki ta sösö mi, nöö Gadu o sa puu i a bëë. Ma ee i ta mindi soni da di Akaa fëen ta sösö en, mi taki da unu gbelin seei taa Gadu an o puu i a bëë möönsö, na a di ten u dë aki, na a bakaten tu.

³³ “Nöö fa un fan di soni dë, nöö wan sabi taa a di pau njanjan nëen i ta sabi un sootu pau a dë nö? Ee di njanjan bunu nöö hën da di pau seei bunu, ma ee di njanjan an bunu nöö di pau seei an bunu tu.”

³⁴ Nöö hën Masa Jesosi kosi dee Faliseima seei awaa, a taa: “Fa un hai ko zunta na dokunu gidjii kuma wanlö hila sindeki naandë, nöö un sa taki

bumbuu soni möönsö nö? Nönö, sösö hogi nöö un sa taki. Biga di hogi di dë a unu hati, hën nöö ta kumutu a unu buka te un ta fan.

³⁵ “Nöö un haika e, dee sëmbë. Ee wan sëmbë i dë nöö bumbuu soni dë a i hati, nöö bumbuu fan joo ta fan. Ma ee wan sëmbë i dë nöö hogi wanwan nöö dë a i hati, nöö hogi soni nöö joo ta taki ta tuwë.

³⁶ “Ma nöö mi taki da unu gbelin taa te di gaan kuutu daka u Masa Gaangadu kisi, nöö hiniwan sëmbë o piki fu hiniwan sösö fan di a bi fan söndö pakisei.

³⁷ Dee fan dee i bi ta fan, nöö de Gadu o tei ta kuutu i luku ee a dë faa da i leti, ee a dë fii musu kisi sitaafu fëën.”

Aki dee hedima u Dju ta hakisi wan maaka.

Maik. 8:11-12; Luk. 11:24-32

³⁸ Nöö hën wanlö u dee Sabima u Wëti ku dee Faliseima seei, hën de toona ko a Masa Jesosi möön. Hën de taki dëen taa: “Mësitë, wë fii du wan foondo soni boo si ee a Gadu di taki fii ta kumutu tuu.”

³⁹ Hën Masa Jesosi gandji da de, a taa: “Un dee takulibima aki, fa un disa Gadu dë, nöö un dë leti kuma wan mujëë di bia baka disëën manü go tei oto womi nëën manü wosu. Sö un hogi tjika. Hën mbei un kë u mi lei unu wan maaka ufö un sa biibi. Wë mi taki da unu e, taa ma a’ maaka fu mi lei unu möönsö möön leki di soni di bi pasa ku di tjabukama u Gadu de kai Jona.

⁴⁰ Biga fa a bi dë dii daka ndeti ku didia a di fisi bëë dendu bifö a kumutu, nöö söseei Mi di ko dë Libisëmbë Mii aki o dë a goon basu dii daka ndeti ku didia ufö mi o kumutu.

⁴¹ “Nöö fa wan kë biibi mi aki, nöö mi taki da unu gbelin taa a di gaan kuutu daka u Masa Gaangadu nöö dee sëmbë u Ninifei o hopo da unu adjabëë e. Biga di Jona konda di buka u Gadu da de, nöö hesihesi seei de piki di buka hën de disa di hogilibi u de bia ko begi Masa Gadu faa puu de a bëë. Ma nöö di Sëmbë di ta fan ku unu aki, nöö a hebi möön Jona gaanfa e, ma wan kë piki ën buka möönsö.

⁴² “Nöö söseei mi taki da unu tu taa di mujëë kõnu di bi ko a Kõnu Salumon, hënseei o da unu adjabëë tu a di gaan kuutudaka u Gadu e. Biga a bi kumutu te a longi ko haika Kõnu Salumon luku fa a kõni tjika. Ma nöö di Sëmbë un ta si aki, a hebi möön Kõnu Salumon gaanfa e, ma wan ta tei ën u soni möönsö.”

⁴³ Nöö hën Masa Jesosi bai dee sëmbë ta haikëën dë taa: “Un haika e, dee sëmbë. Te wan soni kumutu a wan sëmbë hedi, nöö a o ta waka ta lontu ta suku kamian faa tan te a wei, an feni möönsö.

⁴⁴ “Nöö a o taa: ‘Söö, antoobi. Mi o toona go a di sëmbë di mi bi kumutu nëën.’

“Nöö a o toona go dou nëën baka, nöö te a si di kamian hooo, oto soni an ko nëën hedi möönsö, nöö a o wai. Biga a dë kuma wan wosu de baí seeka te de kaba buta gbegedee.

⁴⁵ “Nöö a o taa: ‘Söö, mi böö.’

“Nöö a o go kai sëbën oto gadu möön hogi möön hënseei fu de ko kisi di sëmbë dë a hedi. Nöö mi taki da unu taa di lö sëmbë dë, soni fëën o ko möön hogi möön leki fa a bi dë a fesi.

“Nöö sö wan soni o pasa ku unu e, un dee takulibisëmbëma u di ten aki. Biga hii fa un taa un ta dini Gadu dë seei, ma wan ta tei mi u soni möönsö.”

Aki dee famii u Masa Jesosi

ko nëën.

Maik. 3:31-35; Luk. 8:19-21

⁴⁶ Nöo fa Masa Jesosi ta fan ku dee hia sêmbê naandê, nöo a wan wosu dendu a dê ta fan. Te wan pisi, hên hên mama ku dee baa fêen ko nëen u de ko fan ku ên, nöo hên de taanpu a döo buka naandê.

⁴⁷ Nöo hên wan sêmbê go taki da Masa Jesosi taa: "I mama ku dee baaa fii dê a döobuka dê e, nöo de kê fan ku i."

⁴⁸ Nöo hên a piki taa: "Aai, wê antoobi. Ma un haika e. Ambê sa dê mi mama ku dee baaa u mi tuutuu?"

⁴⁹ Nöo hên a lei finga a u dee bakama fêen taa: "Ja ta si de naandê nô? Dee sêmbê dê, de da mi mama ku dee baaa u mi.

⁵⁰ Biga hiniwan sêmbê di ta du kumafa mi Tata a liba ala kê faa du, nöo hên wê da mi baaa ku mi sisa ku mi mama."

13

Aki Masa Jesosi da di oto

fu di sêmbê ta jaa böngö.

Maik. 4:1-9; Luk. 8:4-8

¹ Nöo hên di daka dê seei, hên Masa Jesosi kumutu a di wosu go sindo a bandja wata ala.

² Nöo hên wanlö gaan hila sêmbê hai go ta lontu hên gilili sö. Hên a hopo go sindo a wan boto bi sai dê dendu, nöo hên dee hia sêmbê dê a tela ala ta haikêen.

³ Nöo hên a tei wanlö oto ta lei de soni, a taa: "Wan daka nöo hên wan sêmbê go nëen goon go ta jaa böngö.

⁴ Nöo fa a ta jaa ên dê, nöo hafu u di böngö kai a pasi liba, nöo hên dee piki fou pii ên njan puu dê.

⁵ Hafu fêen kai a sitonu kamian ka hia doti an dê, nöo hên a nasi hesi seei.

⁶ Ma di di sonu ko hati taanga, nöo hên dee lö böngö dê dëe gbegeede kaba a sösö. De an ko soni möönsö.

⁷ Nöo hafu u di böngö kai a maka dendu, nöo a nasi ma nöo hên di maka göö peetêen te an ko soni möönsö.

⁸ "Ma nöo so u di böngö kai a bunu doti nöo hên a ko soni seei. So fêen puu diiteni toon möön hia möön fa a bi paandi. Otowan fêen puu sikisiteni toon möön hia, otowan puu wan höndö."

⁹ Nöo di Masa Jesosi taki di oto te a kaba, nöo hên a taa: "Söö. Wê di woto mi taki aki, nöo un pakisei ên bunu e, dee sêmbê, be un fusutêen."

Aki ta lei faandi mbei Masa Jesosi ta lei sêmbê ku nöngö.

Maik. 4:10-12; Luk. 8:9-10

¹⁰ Nöo hên u dee bakama fêen ko nëen hên u hakisi ên taa: "Masa o, faandi mbei i ta lei dee sêmbê ku nöngö sö? Biga de an ta fusutan."

¹¹ Nöo hên Masa Jesosi piki u taa: "Fa un dee bakama u mi dê aki, unu wê a kai da e, fuun sa ko sabi dee tjubitjubi woto u Gadu. Biga unu sa fusutan fa di Njunjun Tii fêen dê. Ma na dee sêmbê naandê e, biga de an kê tei di lei u mi u soni.

¹² "Biga ee wan sêmbê i jei wan soni nöo hên i tei ên u gaan soni, nöo möönmöön seei joo ta sabi ên. Ma ee i jei ên, nöo ja tei ên u gaan soni möönsö, nöo di pi kiwan i bi jei dê, hênseei o lasi da i tu, joo fika ku sösö maun tjololoo.

¹³ "Nöo hên wê mbei mi ta lei dee sêmbê dê ku nöngö e. Biga hii fa de ta si mi aki, ma de an sabi ambê da mi möönsö. Fa mi ta fan aki, nöo de ta haika ma de an ta fusutan möönsö. Biga de aan di pakisei u de fusutan soni.

14 Fa de sai u de dë, nöö a ta pasa ku de leti kumafa Jesaaja di tjabukama bi sikifi buta a Gadu Buku. A taa:

Woon ta si soni ku unu wojo,
ma wan o saandi un ta si.
Woon ta jei soni ku unu jesi,
ma wan o fusutan andi un ta jei.

15 Biga fa un sai dë,
hii un tuu hati dë tapatapa.
Jesi fuunu booko te wan sa jei soni.
Wojo fuunu dë dungudungu pii da dee soni u Gadu.

Ee nasö, fa i si un ta luku soni ku unu wojo dë,
nöö un bi o saandi un ta si.
Un bi o jei soni ku unu jesi,
nöö un bi o abi fusutan a unu hati,
te nöö un bi o ko a mi fu mi kula unu.
Sö wë Gadu bi taki a fesiten u wanlö sëmbë e, nöö dee sëmbë u di ten aki, sö nöö de dë tu.

16 Ma nöö un dee bakama u mi aki, wan dë sö. Biga un ta si soni ku di wojo fuunu, un ta jei soni ku di jesi fuunu.

“Nöö Gadu naki unu kölöku tuu o.

17 Biga sëmëni u dee fesiten tjabukama u Gadu ku dee oto sëmbë bi ta libi bunu a Gadu wojo a fesi, de bi hangî seei u si dee soni un ta si ku dee un ta jei aki, ma de an bi si de o. De an bi jei de tu.”

Aki Masa Jesosi ta puu di nöngö

u di böngö.

Maik. 4:13-20; Luk. 8:11-15

18 Nöö hën Masa Jesosi taa: “Söö. Wë awa mi o puu di hedi u di woto da unu awaa.

19 “I abi so sëmbë de ta jei di buka u di Njunjun Tii u Gadu aki, ma nöö de an kë kai ën gaan soni u de fusutëen hoi a de hati. Nöö te wan pisi di hogihatima de kai didibi hën o ko puu di buka de bi jei dë a de hati gbegedee. Nöö sö wan sëmbë hën hati dë kuma di pasi liba ka di böngö bi kai. An ko soni möönsö biga dee fou bi pii ën njan puu dë.”

20 “Nöö ka di böngö kai a di sitonu kamian naandë, nöö hën da di sëmbë di jei di buka nöö hën a kisi ën seei ku wai.

21 Ma nöö an pakisei ën go dou möönsö. Di fa a jei ën wante wai dë, nöö a kaba.

“Nöö te wan fuka ko miti ën, ee nasö sëmbë ko suku ën a toobi fu di wöutu di a bi jei naandë hedi, nöö an o hoi go dou. A o disëen bia baka da Gadu. Hën wë da di böngö di bi kai a di sitonu kamian.

22 “Nöö ka di böngö kai a maka dendu naandë, nöö hën da di sëmbë di jei di buka, ma a abi bookohedi a soni u di goonliba aki poi, ufö dee gudu u di goonliba aki ta ganjëen ta hai ën baka te di buka u Gadu an sa ko soni dëen möönsö.

23 “Ma ka di böngö kai a di bunu doti naandë, hën da di sëmbë di jei di buka nöö a kisi ën seei limbolimbo, nöö a hoi ën nëen hati. Sö wan sëmbë dë kuma di bunu doti ka di böngö kai hën a pai dou diitëni toon möön leki fa a bi dë, ee nasö sikisiteni, ee nasö wanhöndö. Sö di buka ko soni dëen tjika.”

Aki Masa Jesosi ta da di oto

u di sëmbë di ta jaa taku sii

a sɛmbɛ goon.

²⁴ Nöo hɛn Masa Jesosi toona tei wan oto woto möön ta lei dee sɛmbɛ kumafa di Njunjun Tii u Gadu dɛ. A taa: “A dɛ leti kuma wan sɛmbɛ tei wan bambuu njanjan böngö tja go jaa nëen goon te a kaba, nöo hɛn a go.

²⁵ Nöo tefa ndeti, köndɛ kötö pii, nöo hɛn wan felantima fɛɛn tei wan taku sii hɛn a go saapi a di goon fu di sɛmbɛ. Nöo hɛn a go jaa di taku sii a di goon dendu te a kaba, nöo hɛn a go fɛɛn.

²⁶⁻²⁷ “Nöo hɛn de dɛ tee juu dou, di njanjan seti nasi. Nöo hɛn dee wookoma fɛɛn ko si taa wanlö taku soni dɛ a di njanjan dendu.

“Nöo hɛn de kule go a di sɛmbɛ abi di goon hɛn de taa: ‘Wɛ na bambuu böngö i bi jaa a di goon nö? Wɛ u si taku uwii ta nasi ta ko a dee bambuu wan dendu gidji. Unsɛ dee di dɛ kumutu?’

²⁸ “Nöo hɛn a piki de taa: ‘Nönö, womi. Bambuu böngö nöo mii bi paandi e. Wɛ a musu dɛ taa wan felantima u mi du sö ku mi.’

“Nöo hɛn de hakisi ɛn taa: ‘Wɛ nöo unfa fɛɛn i mɛni? Ja kɛ fuu go hön dee hogi wan puu a dee bambuu wan dendu nö?’

²⁹ “Nöo hɛn a taa: ‘Nönö e, dee sɛmbɛ. Un boo disa de ufö, biga ee un go u go hön de, nöo woon hön dee bambuu wan tu.

³⁰ A möön bɛtɛ un disɛɛn te de tuu lepi, nöo mi o manda sɛmbɛ go koti dee taku wan tai a bondji tja go tuwɛ a faja tjuma. Nöo de go koti dee bambuu wan awaa, tja go lai a suwa.’ ”

Nöo sö wan oto Masa Jesosi tei lei dee sɛmbɛ te a kaba.

Aki Masa Jesosi da wanlö oto

u di uwii de kai mutaadi,

ku di mujɛɛ ta dian boon.

Maik. 4:30-34; Luk. 13:18-21

³¹ Nöo hɛn a toona da de wan woto möön, faa lei de kumafa di Njunjun Tii u Gadu dɛ. A taa: “A dɛ leti kuma di uwii de kai mutaadi di de ta paandi a di köndɛ fuu aki.

³² Fa a sai dɛ, di sii fɛɛn piki möön hii soni de ta paandi. Ma nöo te i paandi ɛn kaa, nöo a ta ko bigi möön hii dee oto uwii tuu dee u ta paandi a goon dendu, te fou seei ta ko ta mbei wosu nëen.”

³³ Nöo hɛn a toona da de wan woto möön. A taa: “Fa di Tii u Masa Gaangadu sai dɛ, nöo a djei kuma te wan mujɛɛ ta dian boon. A ta tei wan pikiin sooda sö tuwɛ nëen, nöo di sooda ta soopu di boon tee a ko gindii, gaan hia soni möön fa a bi dɛ.”

³⁴ Nöo sö Masa Jesosi ta fan ku dee sɛmbɛ. An ta lei de soni söndö an taki ɛn a nöngö da de.

³⁵ Nöo a kai makandi ku di soni wan tjabukama u Gadu bi sikifi buta a di Buku. A taa:

Mi o koti nöngö da de.

Dee soni bi dɛ tjubitjubi fu sensi di goonliba mbei,

mi o tei de taki awaa.

Sö Gadu bi taki a fesi e, nöo awaa a ta pasa.

Aki Masa Jesosi ta puu di oto

u di taku sii.

³⁶ Nöo di Masa Jesosi lei de sö te a kaba, hɛn a toona go a wosu. Nöo hɛn u dee bakama fɛɛn ko nëen ko begi ɛn taa gaantangi, be a puu di oto möön limbo da u andi di taku sii ku di bunu böngö dɛ bi kɛ taki.

³⁷ Nöo hën a piki u taa: “Antoobi. Un haika e. Di sëmbe di jaa di bunu böngö naandë, nöö Mi wë di ko dë Libisëmbe Mii aki.

³⁸ Nöo di goon doti, hën da hii di goonliba u dë aki. Nöo di bunu böngö naandë, hën da dee sëmbe dee dë a di Njunjun Tii u Gadu dendu. Nöo dee taku sii, de da dee sëmbe dee ta dë a di tii u di didibi dendu.

³⁹ Nöo di gaan felantima di i si jaa di taku sii naandë, hën wë da di didibi seei. Nöo di ten u koti dë, hën da di kaba juu u di ten u ta libi aki. Nöo dee sëmbe dee o koti di njanjan buta a suwa, nöo de da dee basia u Masa Gadu Köndë.

⁴⁰ “Wë nöo fa i si dee sëmbe bi koti dee taku uwii tai a bondji tja go tjuma dë, nöö sö sondi o waka te di ten di u dë aki o kaba.

⁴¹ Biga wan juu o ko, nöö Mi di ko dë Libisëmbe Mii aki o manda dee basia u Gadu Köndë go pii hii dee sëmbe dee ta libi takulibi, ku dee ta lei oto sëmbe u de libi sö tu. De o puu dee lö sëmbe dë a dendu u dee sëmbe dee Gadu ta tii,

⁴² nöö de o tja de go tuwë a didibi faja. Nöo naandë de o dë ta kai wolo ta bai ta këe ta njan tanda.

⁴³ “Ma nöo dee sëmbe dee bi libi bunu a Gadu wojo, nöö de o dë a di köndë ka Gadu dë könu, nöö hii sëmbe o si fa de bi libi bunu tjika. Biga di bunu libi u de o ko a döo ta sëndë leti kuma sonu u hii sëmbe musu si ën.

“Nöo fa u ta fan aki, nöö un pakisei ën bunu e, be un fusutëen.”

Aki Masa Jesosi ta da

wanlö sati oto möön

u lei fa di Tii u Gadu dë.

⁴⁴ Hën Masa Jesosi toona tei wan oto woto ta lei sëmbe möön kumafa di Njunjun Tii u Gadu dë. A taa: “A dë leti kuma wan gaan gudu bi dë tjubitjubi a wan pisi goon. Nöo hën wan sëmbe go si ën. Nöo fa a si ën dë, hën a toona tjubi ën te a kaba. An piki na wan sëmbe. Nöo hën a kule go ku gaan wai nëen hati, hën a go sei hii dee soni fëen dee a bi abi tuu fiaa. Nöo hën a tei di möni go bai di goon naandë gbom tei, faa feni di gudu di dë nëen dendu. Sö di gudu bumbuu dëen tjika.

⁴⁵ “Söseei tu, di Njunjun Tii u Gadu dë kuma wan wënkëma ta suku gaan bumbuu djamati sitonu faa musu bai.

⁴⁶ Hën a ta waka ta lontu tee a ko si wan gaan waiti wan, a dii te na soni. Nöo hën a go sei hii dee soni fëen dee a bi abi tuu fiaa, hën a tei di möni tuu hën a go bai di djamati sitonu dë puu tei. Sö a bumbuu dëen tjika.”

⁴⁷ Hën a toona taki wan otowan da de möön. A taa: “Di Njunjun Tii u Gadu aki, nöö a dë leti kuma dee sëmbe ta kisi fisi. De tuwë wan gaan nëti u de a wata. Hën de kisi hii pei fisi, dee dë u njan ku dee na dë u njan tuu,

⁴⁸ te di nëti fuu pöö. Hën de hai ën gbulululu puu a tela.

“Nöo hën wë de go sindo, hën de ta pii dee bunuwan ta tei ta buta a manda, nöö de ta tuwë dee na bunu.”

⁴⁹ Nöo hën a taa: “Nöö sö a o pasa e, dee sëmbe, te di kaba juu u di ten u ta libi aki dou. Biga Gadu o manda dee basia fëen köndë u de go pii dee takulibisëmbe puu a dee sëmbe dendu dee ta libi bunu a Gadu wojo.

⁵⁰ Nöo de o tuwë de go a di faja dendu ka de o dë ta bai ta kai wolo ta njan tanda te de wei, de an o kumutu dë möönsö.”

⁵¹ Nöo hën a hakisi de taa: “Dee sëmbe o, fa mi ta fan ku unu aki, nöö un ta fusutan mi ö?” Hën de taa: “Aai, Masa, u ta fusutan i e.”

⁵² Nöo hën a taa: “Wë a bunu. Biga ee wan leima bi sabi dee awoo lei fu Gadu dee bi dë a di Buku kaa, nöö hën a toona ko kisi dee njunjun lei u di Tii u Gadu aki, nöö di sëmbe dë hën abi bumbuu sondi seei te a hia e. A dë leti

kuma wan sɛmbɛ di abi wan kamba fuufuu ku awoo ten ku njunjun ten gudu tuu, nɔɔ a sa nango ta tei kumafa a kɛ.”

⁵³ Sɔ Masa Jesosi taki da dee sɛmbɛ tefa a kaba.

Aki Masa Jesosi toona go

a Nazalɛti ka a bi kiija.

Maik. 6:1-6; Luk. 4:16-30

Nɔɔ hɛn a kumutu dɛ,

⁵⁴ hɛn a tei pasi go a Nazalɛti ka de bi kiijɛn. Nɔɔ hɛn wɛ a go a di keikiwosu u di kɔndɛ go ta lei dee sɛmbɛ sai dɛ. Nɔɔ fa a ta lei de naandɛ, hɛn a foondo de te na soni.

Hɛn de ta hakisi de na de taa: “Wɛ dee sɛmbɛ o, naasɛ di mii aki sɔ feni di kɔni dɛ ku di kaakiti ta du dee foondo wooko?”

⁵⁵⁻⁵⁶ Biga na di mii u di tɛmbɛma fuu aki disi nɔ? Jee? Na Malia da mama fɛɛn nɔ? Nɔɔ dee baaa fɛɛn, Jakopu, Judasi, Josɛfu, ku Simon, ku dee sisa fɛɛn, na u ku de ta dɛ aki nɔ? Naasɛ a go feni dee soni dɛ?”

⁵⁷ Hɛn de tei ɛn fu hogi seei.

Hɛn Masa Jesosi taa: “Awa, sɔ a dɛ tuu o. Wan tjabukama u Gadu sa feni gafa a hii oto kɔndɛ ma boiti nɛɛn seei kɔndɛ e, ku ɛn wosu dendu ka a bi kiija.”

⁵⁸ Nɔɔ hɛn mbei wɛ an du hia foondo wooko a Nazalɛti naandɛ. Biga dee sɛmbɛ fɛɛn an kɛ biibi ɛn.

14

Aki ta lei fa de du ku Johanisi

di Dopuma.

Maik. 6:14-29; Luk. 9:7-9

¹ Wɛ nɔɔ di juu dɛ, Kɔnu Helodi di ta tii di kɔndɛ ko jei fu dee foondo soni Masa Jesosi ta du a dee kɔndɛkɔndɛ.

² Nɔɔ hɛn a taki da dee otowan ku ɛn bi sai dɛ, taa: “Fa di sɛmbɛ ta du dee soni naandɛ, nɔɔ a musu dɛ taa di dopuma de kai Johanisi hɛn di dɛ e. A toona weki baka a dɛdɛ, nɔɔ hɛn mbei wɛ a abi kaakiti faa du soni gaanfa sɔ.”

³ Wɛ nɔɔ di soni mbei di kɔnu fan sɔ. A dɛ sɔ taa a bi tei di mujɛɛ u wan baaa womi fɛɛn de kai Filipi buta nɛɛn wosu. Di mujɛɛ hɛn de kai Helodiasi.

⁴ Nɔɔ hɛn Johanisi fan ku ɛn taa di soni a du dɛ, an bunu, aan leti seei kwetikweti. Gadu wɛti wɛ a poi fa a tei di mujɛɛ fɛɛn baaa dɛ. Sɔ Johanisi fan ku di kɔnu tefa a kaba.

⁵ Nɔɔ di a fan sɔ, nɔɔ hɛn di kɔnu hati boonu ku ɛn seei te a bi kɛ kii ɛn, ma fu di a fɛɛɛ hogi nɛ a lanti nɔɔ hɛn mbei an kii ɛn ma a tuwɛɛn a dunguwosu. Biga wɛ hii sɛmbɛ bi ta si Johanisi taa a dɛ wan tjabukama u Gadu.

⁶ Ma nɔɔ te wan pisi, hɛn di kɔnu fujai. Nɔɔ di mujɛɛ di a bi tei dɛ abi wan mujɛɛ mii fɛɛn di a bi pai ku Filipi. Nɔɔ fa de dɛ a di piizii u di kɔnu dendu naandɛ, nɔɔ hɛn di mujɛɛ mii ko baja wan baja a di piizii dendu te a bigi. Nɔɔ di soni suti da di Kɔnu seei te na soni,

⁷ nɔɔ hɛn a kai di mujɛɛ mii ko nɛɛn. Hɛn a paamusi ɛn ku soi a hii sɛmbɛ fesi naandɛ taa hiniwan soni di a hakisi kaa, nɔɔ a o dɛɛn.

⁸ Nɔɔ fa di kɔnu fan dɛ, hɛn di mujɛɛ mii kule go piki ɛn mama taa sɔ di kɔnu paamusi ɛn, nɔɔ ee andi a musu hakisi ɛn.

Nɔɔ hɛn di mama taa: “Wɛ go taki da Kɔnu taa i kɛ faa manda sɛmbɛ go kii di Dopuma de kai Johanisi, nɔɔ a koti hɛn hedi buta a wan gaan paabi dendu,

nöö a tja ko da i. Sö fii taki deēn e.” Nöö hēn di mujēē mii kule go a di kōnu go taki di soni deēn te a kaba.

⁹ Nöö di di kōnu jei sö, hēn hati feēn latja te na soni. Biga an bi mēni taa sö wan soni di mujēē mii bi o hakis. Ma nöö fu di a bi soi sö a hii lanti fesi kaa, hēn mbei an sa piki nōnō möön.

¹⁰ Nöö hēn wante fa u mbei dē, hēn a manda sēmbē go a dinguwosu go koti Johanisi hedi belim puu.

¹¹ Hēn de butēēn a wan paabi dendu, hēn de tjēēn ko da di mujēē mii. Hēn di mujēē mii tei, nöö hēn a tja go deēn mama.

¹² Nöö hēn dee bakama u Johanisi go tei di dēdē sinkii feēn hēn de tja go bei. Nöö hēn de go piki Masa Jesosi taa sö wan soni. Johanisi dēdē.

Aki Masa Jesosi da 5000 sēmbē soni u njan.

Maik. 6:30-44; Luk. 9:10-17; Joh. 6:1-14

¹³ Nöö fa Masa Jesosi jei di buka dē „nöö a bigi deēn tee„. Nöö hēn a kumutu naandē, hēn a subi a boto, u ku ēn, hēn u koti wata go a di oto sē banda ala. Biga a bi kē fuu dē u wanwan pii ufö.

Ma nöö di dee sēmbē u dee peipei kōndē si ka u ta puu nango dē, hēn wē de booko seei gilili kule a futu koti tapa u a fesi ala.

¹⁴ Nöö di ten u go dou a lampeesi fuu kumutu a boto go a tela, nöö dee sēmbē sai dē gidjiu kaa ta luku u. Nöö hēn tjali u dee hia sēmbē dē kisi Masa Jesosi tee na soni, nöö hēn a ta kula dee suwakima u de tefa a kaba.

¹⁵ Nöö di juu dē, nöö a bi dē ndeti buka kaa. Nöö hēn u ko a Masa Jesosi ko taki deēn taa: “Masa o, luku. Ndeti ta ko. Na fii manda dee sēmbē go, be de go suku soni bai u de njan nö? Biga ka u sai aki, kamian u bai soni u njan an dē aki seei.”

¹⁶ Ma nöö hēn a piki u taa: “An dē u de go e. Be unu da de soni u njan.”

¹⁷ Hēn u mbei: “Huun? Wē Masa, wa a’ soni u njan aki möönsö. Feifi bēē tö u abi aki, ku tu pikipiki fisi.”

¹⁸ Hēn a taa: “Antoobi. Un tja de ko da mi aki.”

¹⁹ Nöö hēn u tja de ko deēn. Nöö hēn a manda dee hia sēmbē u de go sindo a goon a di ahun liba dē, nöö hēn de sindo te de kaba. Nöö hēn a tei dee bēē ku dee fisi hēn a hopo wojo luku liba, hēn a da Masa Gaangadu tangi te a kaba. Nöö hēn a booko dee bēē „ku dee fisi„ pisipisi tefa a kaba, hēn a tēndēēn da u.

Hēn a taa: “Un tja go paati da dee sēmbē e.”

²⁰ Hēn u tja go paati da de. Hēn de njan teefa bēē u de fuu, ma tökusee soni fika eti. Hēn u toona pii dee pisipisi dee fika te u kaba, u feni tuwalufu manda fuufuu. Sö a fika hia tjika u dee feifi bēē ku dee tu pikipiki fisi dē.

²¹ Ma nöö fa u du ēn dē, de bi dē feifi dusu womi sēmbē dee bi njan dē, boiti dee mujēē ku dee mii.

Aki Masa Jesosi waka a wata liba.

Maik. 6:45-54; Joh. 6:15-21

²² Nöö baka u di dē, hēn Masa Jesosi manda u taa be u toona koti wata go ka u bi kumutu, ma nöö hēn a o fika naandē ufö faa manda dee sēmbē toona go a wosu.

²³ Nöö di a manda de go kaa, nöö hēn a go a wan kununu kamian naandē go ta begi hēn wanwan.

Nöö di juu dē, kamian ko dingu kaa.

²⁴ Nöö u dē te a mindi wata ala nango ku di boto. Te wan pisi hēn wan gaan ventu ko ta seki di wata teee wa sa go möön.

²⁵ Hën u sai dë ta biinga teefa ganian kanda wa sa dou möönsö.

Nöö hën u bia luku te ala. Hën u si wan sëmbë ta waka ku futu tjuwatjuwa a di wata liba ta ko a u. Wë nöö di sëmbë dë, Masa Jesosi wë e, ma nöö wa bi sabi.

²⁶ U mëni taa jooka. Nöö hën u bai kai olo, fëëë nöö u fëëë sö.

²⁷ Nöö hën Masa Jesosi bai da u wante taa: “Dee sëmbë, wan fëëë e. Un tai hati. Mi wë disi e!”

²⁸ Nöö hën Petuisi taa: “Masa, ju nö? Wë ee ju di dë tuutuu, nöö i piki mi be mi waka a di wata liba tu ko a i.”

²⁹ Nöö hën Masa Jesosi piki ën taa: “Antoobi. Waka ko nöö.”

Nöö hën Petuisi kumutu a di boto, hën a ta waka a di wata liba nango a Masa Jesosi.

³⁰ Ma te wan pisi hën a ko ta luku fa di ventu ta böö ku fa di wata ta seki tjika, nöö hën a panta te na soni, hati fëën latja, nöö hën a ta saka nango a basuwata zuuu.

Nöö hën a bai kai wolo taa: “Masa, heepi mi o. Heepi mi!”

³¹ Nöö hën Masa Jesosi tëndë maun panjëën. Hën a taa: “Womi, unfa i panta sö? Unfa biibi fii piki gaanfa sö?”

³² Nöö fa de mbei dë, hën de ko a di boto dendu. Nöö wantewante dë, hën di ventu saka, di wata ko dë pii.

³³ Nöö fa u si dee soni pasa dë, nöö hën u tuu saka tjökö kini a Masa Jesosi fesi dë, hën u taa: “Aai Masa, i da di Mii u Masa Gaangadu tuutuu.”

Aki Masa Jesosi ta kula sikima

a Ganesalëti.

Maik. 6:53-56

³⁴ Nöö hën u go dou a di köndë ka u bi nango. Hën da Ganesalëti.

³⁵ Nöö di dee sëmbë dë si u kaa, hën de sabi taa Masa Jesosi hën ko dë, nöö hën de paaja buka waaa a hii di köndë lontu dou taa hën ko a de dë.

Nöö hën dee sëmbë kisi dee sikima u de, hën de booko gililili ko a Masa Jesosi.

³⁶ Hën de begi ën taa gaantangi, be a da dee sikima pasi u de nama tjë sö seei a di libakoosu fëën buka. Hën Masa Jesosi da de pasi. Nöö fa de ta nama nëën dë, nöö hën hii de tuu fiaa ko bunu u hiniwan siki di de bi abi.

15

Aki Masa Jesosi ta lei de andi sa sundju sëmbë a Gadu wojo.

Maik. 7:1-23

¹ Wë nöö di juu dë, hën wanlö Faliseima ku wanlö Sabima u Wëti kumutu te a Jelusalen ala ko a Masa Jesosi ko hakisi ën wan soni.

² De taa: “Faandi mbei dee bakama fii ta poi dee wëti fuu sö? Biga de an ta wasi maun a di fa dee gaan sëmbë fuu bi buta fuu musu wasi maun bifö u njan.” Sö de hakisi.

³ Ma nöö hën a piki de taa: “Dee sëmbë o, faandi mbei un ta tötö dee wëti u Gadu buta go a wan së, nöö un ta buta dee lei fuunu a de kamian sö?”

⁴ “Biga Gadu taki taa i musu kai i mama ku i tata gaan soni. Ee wan sëmbë i dë nöö i ta kosi i mama ku i tata ta wisiwasi de, nöö di wëti taki taa sëmbë o kii i puu dë. Sö Masa Gadu hei mama ku tata tjika.

⁵ “Ma nöö unu taa wan sëmbë sa taki dëën mama ku ën tata taa: ‘Wë dee sëmbë, heepi an dë. Mi bi abi soni u da unu, ma mi tei ën buta a wan së kaa u mi da Gadu. Wë ma a’ kõni fuunu möön e.’

⁶ Nöo un feni taa te wan sëmbë du sò, nöo a bunu poi. Ma na tuu seei. Hogi a ta du fa an ta sölugu ën mama ku ën tata dë.

“Nöo hën mbei mi taa un ta tötö dee wëti u Gadu nöo un ta hai dee lei fuunu tja ko buta a de kamian.”

⁷ Nöo hën a kosi de awaa taa: “Un dee bödjëema aki, hii fa un ta pëe unu seei u bumbuu sëmbë naandë, ma unu wë di tjabukama de kai Jesaaja bi taki e, di a sikifi buta a di Buku taa:

⁸ Dee sëmbë aki, ku de buka de ta mbei taa de ta hei mi, ma mëni u de an dë a mi seei.

⁹ Hii fa de mbei taa de ta begi mi kuma Gadu u de naandë, ma sösö soni seei de ta du dë e.

Biga na mi wë de ta hei.

Fa de ta mbei taa de ta lei sëmbë Gadu wëti dë, ma na tuu seei.

Libisëmbë soni tö nöo de ta lei.

Sö Jesaaja bi taki, nöo unu wë a bi taki dë e.”

¹⁰ Nöo hën Masa Jesosi kai dee hia sëmbë dee bi sai dë ko nëen awaa, hën a taa, “Dee sëmbë o, mi o taki wan soni da unu aki, nöo un musu fusutëen bunu.

¹¹ Mi taki e, taa dee soni i ta njan söndö wasi maun, na de sa mbei i ko sundju a Gadu wojo e. Ma dee soni dee i ta fan ku i buka, de wë ta mbei i ko sundju a Gadu wojo.”

¹² Nöo di a fan sò te a kaba, nöo hën u dee bakama fëen ko taki dëen taa: “Masa o, fa i si i fan dë, i sabi taa dee Faliseima tei i fu hogi ö?”

¹³ Hën a piki u taa: “An dë fuu a’ toobi ku de e, biga na Gadu ta manda de a dee soni dë ta du. Nöo hii dee soni dee mi Tata an paandi nöo a o hön de puu.

¹⁴ Dee lö sëmbë dë, de dë kuma wanlö bookowojoma ta suku u de tja oto bookowojoma fu de go pasa ngötö. Nöo na de tuu o kai go a di ngötö nö? Nöo hën mbei mi bi piki unu taa an dë fuun a’ toobi ku de.”

¹⁵ Nöo hën Petuisi hakisi ën taa: “Wë nöo Masa o, di soni di i taki fu di njan söndö wasi maun dë, ja sa puu ën möön fini da u nö?”

¹⁶ Hën a piki taa: “Dee sëmbë, unfa a waka wan bi fusutëen?”

¹⁷ “Wë un haika e. Di soni di wan sëmbë ta njan, nöo hën nango nëen bëe. Te wan pisi a o kumutu a i bëe baka, na sö nö? Nöo hën mbei an sa sundju i a Gadu wojo, biga hën da kaba fëen kaa.

¹⁸ “Ma dee soni dee i ta puu a i buka ta taki, nöo na kaba u de di dë e. Biga a i hati de ta kumutu, nöo de ta mbei i ko sundju a Gadu wojo.

¹⁹ Biga wë a libisëmbë hati dendu hii pei hogi ta kumutu, kuma kii sëmbë, tei otowan mujëe ku hii oto fanafiti libi a di së u manu ku mujëe, fufuu, mindi soni, ganjan sëmbë, kosi sëmbë, njan sëmbë a baka. Hii dee soni dë tuu ta dë a sëmbë hati u de kumutu ko a döo.

²⁰ Nöo mi taki da unu e, taa dee lö soni dë wë ta sundju sëmbë a Gadu wojo. Ma fii njan söndö wasi maun a wëti fasi, sö wan soni an sa sundju i a Gadu wojo e, kwetikweti.” Sö wë Masa Jesosi fan ku u tefa a kaba.

Aki Masa Jesosi heepi wan mujëe di an dë Dju sëmbë.

Maik. 7:24-30

²¹ Nöo hën u kumutu a di köndë naandë, hën u go a di pisiwata fu Tilusi ku Sidon.

²² Nöo fa u go dou dë, hën wan mujëe u di pisiwata naandë ko a Masa Jesosi. Nöo di mujëe dë, Kaana sëmbë a dë e, na Dju sëmbë.

Nöö hën a ko ta bai taa: “Masa o, na i da di böngö u Könu Dafiti di bi musu ko nö? Na i da di Heepima nö? Wë nöö a’ tjalihati u mi o. Biga wan gadu dë a di mujëe mii u mi hedi ta dëen sitaafu ta kii. Mi begi i baa, gaantangi, heepi mi ku ën e.”

²³ Ma nöö fa di mujëe ta bai dë seei, ma Masa Jesosi an piki ën möönsö.

Nöö hën u dee bakama fëen taki dëen taa: “Masa o, gaantangi, piki di mujëe dë be a disa u baa. A ta bai ta ko a u baka kodo.”

²⁴ Hën a piki taa: “Haika e. Gadu an manda mi u mi go a oto pei sëmbë e, ma a dee Isaëli sëmbë fuu nöö mi musu go. Biga de dë kuma wanlö hia lasilasi sikafu di dë söndö tiima, nöö de a’ heepi fanöudu.”

²⁵ Ma nöö di juu dë hën di mujëe ko suti kini a goon nëen fesi, nöö hën a begi ën taanga taa: “Masa o, gaantangi, heepi mi o. Di mii u mi ta dëdë.”

²⁶ Hën a taa: “Wë mujëe o, na kë ma kë heepi i e, ma ja dë Isaëli sëmbë, nöö an fiti u puu bëëë a dee mii maun tuwë da dagu mii.”

²⁷ Hën di mujëe piki taa: “Aai Masa, wë sö a dë tuu o. Ma dee pikipiki pisi ta puu ta kai a tafa basu wë? Dee dagu mii an sa njan de nö?”

²⁸ Wë nöö fa di mujëe fan dë, nöö a suti da Masa Jesosi seei, hën a taa: “Aai mujëe, i ta biibi mi taanga tuu o. Wë nöö di soni di i si i ta suku dë, nöö i fendi ën kaa e.”

Nöö an kaba u fan seei, hën di mujëe mii u di mama ko bunu gbegedee.

Aki Masa Jesosi ta da 4000

sëmbë soni u njan.

Maik. 8:1-10

²⁹ Nöö hën Masa Jesosi kumutu dë, hën u ku ën ta waka a di ze u Galilea bandja dë ta lontu te u go dou a wan kamian ka wanlö kuun dë, nöö hën a go sindo.

³⁰ Nöö hën wanlö hia sëmbë booko gililili ko nëen möön, nöö de tja hia sikima ko tuwë nëen fesi faa musu kula da de. Hën a kula de tuu fiaa: lanlan sëmbë, bookowojoma, makisamakisa sëmbë, tapabukama, hii de tuu a kula te a kaba gbegedee.

³¹ Nöö di dee sëmbë ko si fa dee tapabukama ko ta fan, dee lanma ko ta waka, dee makisamakisa sëmbë ko bëtë seei, dee bookowojoma ko ta si soni, nöö a bigi da de tee. A foondo de tuutuu, nöö hën de da Masa Gaangadu tangi taa: “Ee, di Gadu fuu dee Isaëli sëmbë aki, a bigi tuu o.”

³² Nöö baka fëen, hën Masa Jesosi kai u dee bakama fëen te u piki, a taa: “Tjali u dee hia sëmbë aki kisi mi o. Biga tide mbei di u dii daka di de dë ku mi aki, nöö de an njan na wan wojo soni möönsö. Wë nöö ma sa manda de go söndö njan, biga a kandë so u de sa faau a pasi.”

³³ Nöö hën u piki ën taa: “Aai, u jei, ma nöö unsë woo sa fendi sö wan hia soni u njan fuu sa da de, ka u dë a sösö kamian a sabana aki?”

³⁴ Hën a hakisi u taa: “Wë un mëni bëëë un abi dë?”

Hën u piki ën taa: “U abi sëbën bëëë aki ku wantu piki fisi.”

Hën a taa antoobi.

³⁵ Hën a manda dee sëmbë go sindo leti a goon na ahun liba dë.

³⁶ Nöö hën de sindo te de kaba, hën Masa Jesosi tei dee sëbën bëëë ku dee pikipiki fisi naandë, hën a da Masa Gadu tangi te a kaba. Nöö hën a booko de pisipisi, hën a tëndë da u taa: “Un tja go paati da dee sëmbë.”

³⁷ Nöö hën u tei, hën u ta paati da dee hia sëmbë dë te dou de tuu.

³⁸ Hën de tuu njan seei teee bëë u de fuu.

Nöö hën u toona go pii dee pisipisi dee de njan fika, te fuu sêbën gaan manda. Nöö fa di soni pasa dë, de bi dë fô dusu womi a di kamian ufô i abi dee mujëë ku dee mi. Sô dee sêmbë bi hia tjika.

³⁹ Nöö di de njan tefa de kaba kaa, hën Masa Jesosi manda de go a wosu awaa. Nöö hën u ku ên tei boto hën u koti wata go a di kôndë de kai Magidala.

16

Aki dee hedima u keiki hakisi Masa Jesosi wan maaka möön.

Maik. 8:11-13; Luk. 12:54-56

¹ Nöö fa Masa Jesosi ko a Magidala dë, hën dee Saduseima ku dee Faliseima ko nëën. Wë de tu keiki paatëi dë, de an kē piki möönsö taa a Gadu Masa Jesosi kumutu. Nöö fa de ko nëën dë, hën de taa de kē faa lei de wan maaka kumutu a Gadu ala, ee nasö de an o piki taa Gadu hën mandëën ko.

² Ma nöö hën Masa Jesosi piki de. A taa: “Dee sêmbë, a toobi mi poi da unu. Biga te sapate ee un si bundji a liba ala bē njaan, nöö un taa amanjan sonu o hati.

³ Te mamate un si di sonu bē hëii, tjuba ta baaka, nöö woon taa tjuba o kai tide. Sô un sabi u wegi dee maaka u liba ala tjika.

“Wë nöö unfa a waka wan sa wegi dee maaka dee dë leti a unu wojo un ta si aki? Biga ee un luku dee soni ta pasa a di ten u dë aki, de ta kai seei ku dee soni dee tjabukama u Gadu bi sikifi a fesi e. Nöö hën da di ten de bi taki dë, hën dou kaa.”

⁴ Nöö hën a gandji da de awaa, a taa: “Un dee takulibima aki, un dë leti kuma wan mujëë disëën manu go ta waka ta suku oto manu. Biga Gadu bi da unu dee maaka fëën gaanduwe kaa, nöö hën un disa de go ta suku oto maaka möön.” Nöö mi piki unu taa wan o feni oto maaka a mi möönsö e, möön leki di i si mi bi taki da unu kaa u di tjabukama de kai Jona.”

Aki Masa Jesosi ta bai dee bakama fëën a di lei u dee Dju hedima.

Maik. 8:14-21

Nöö di Masa Jesosi fan ku dee hedima u keiki sö kaa, hën wë a disa de dë.

⁵ Nöö hën u ku ên toona subi a boto möön, hën u ta koti nango a di oto sê banda ka u bi kumutu. Ma nöö u bi fëëkëtë u tja bëëë go ku u.

⁶ Nöö fa u nango dë, hën Masa Jesosi bai u a soni, a taa: “Un mëni unu seei e, dee sêmbë, ku di sooda u dee Faliseima ku dee Saduseima.”

⁷ Ma nöö di a fan sö, hën u pakisei wante taa wë a kandë fu di wa tja bëëë, nöö hën mbei a fan sö.

⁸ Nöö Masa Jesosi sabi taa sö u ta mëni. Hën a taa: “Dee sêmbë aki, unfa biibi fuunu piki sö? Unfa un sa mëni taa bëëë soni mi ta taki?”

⁹ Wan ta fusutan mi möönsö nö? Naasë un bi dë di mi tei dee feifi bëëë da feifi dusu sêmbë, de njan te de wei toona fika sômëni manda eti?

¹⁰ Nöö naasë un bi dë möön di mi tei dee sêbën bëëë da dee fô dusu sêmbë, de njan te de wei toona fika sômëni manda möön?

¹¹ “Nöö unfa a waka wan ta fusutan taa ma ta a' bookohedi ku soni u njan? Nöö na bëëë soni mi taki dë. Ma mi taki e, taa un musu mëni unu seei ku di sooda u dee Faliseima ku dee Saduseima.”

¹² Nöö fa a fan dë ufô u ko kisi u seei awaa taa na di sooda di de ta dian boon, nëën a ta taki, ma di poipoi lei u dee Faliseima ku dee Saduseima di de ta paaja a hii di goonliba, leti kuma wan piki sooda ta soopu ta paaja a wan hia boon, hën wë a ta taki di taki.

Aki Petuisi taki

*ambë da Masa Jesosi.**Maik. 8:27-30; Luk. 9:18-21*

13 Nöo di u dou a oto banda dë, hën u ta waka te u go dou a di pisiwata de kai Sesalia Filipi. Nöo hën Masa Jesosi kai u te u piki, a taa: “Unfa un ta jei de ta taki u Mi di ko dë Libisëmbë Mii aki?”

14 Nöo hën u piki ën taa: “Wë u ta jei so sëmbë ta taki fii taa i da di dopuma Johanisi, hën toona weki baka a dëdë. So u de taa i dë wan u dëe oto tjabukama u Gadu bi dë a fesi kuma Elia, kuma Jelemia sô, hën toona weki baka. Sô u ta jei de ta taki fii.”

15 Nöo hën a toona hakisi u taa: “Wë unu wë? Ambë un ta mëni taa mi dë?”

16 Hën Simon Petuisi piki ën taa: “Masa o, i da di Keesitu e, di Kõnu Gadu bi paamusi taa a o manda ko. I da di Mii u Masa Gaangadu seei, di abi libi fu teego.”

17 Nöo di Masa Jesosi jei fa a fan dë, hën a taa: “Aai womi Simon, ju di mii u Jonasi aki, Gadu naki i kõlõku tuutuu. Biga di soni di i ko sabi dë, nöo na libisëmbë lei i ën. Ma mi Tata a liba ala hënseei mbei i ko sabi ën.

18 “Nöo fa de ta kai i Petuisi dë, na ‘sitonu’ di në fii kë taki nõ? Wë nöo mi taki da i taa ku di gaan sitonu i si aki mi o seti di keiki u mi e. Nöo fa mi o seti ën dë, nöo di didibi ku hii di kaakiti di a abi, ku dëdë kõndë seei, an o sa tapëën ën möönsô.

19 “Nöo mi taki da unu taa mi o da unu taki a di Njunjun Tii u mi dendu, te hiniwan soni di i si un tai a goonliba aki nöo a o dë taitai a Gadu ala. Söseei tu hiniwan soni di un lusu a goonliba aki, a o dë lusulusu a Gadu ala.”

20 Nöo di a fan sô te a kaba, hën a bai u tuu seei taa wa musu konda da na wan sëmbë taa hën da di Kõnu Gadu bi paamusi taa a o manda ko.

*Aki Masa Jesosi konda di hogi**di o pasa ku ën.**Maik. 8:31-9:1; Luk. 9:22-27*

21 Nöo a di ten dë hën Masa Jesosi seti fan ku u, fuu sabi andi o pasa ku ën a bakaten. A taa: “Te wan pisi nõo woo go a Jelusalen. Nöo dee Gaan Womi ku dee Gaan Begima ku dee Sabima u Wëti, de o kisi mi da sitaafu te a tjika de, nõo de o kii mi. Ma nõo a di u dii daka fëën, nõo mi o toona weki baka a dëdë e.”

22 Nöo fa a fan naandë, hën Petuisi kai ën tja go a së, hën a fia ku ën taa: “Masa, na taki dee lö soni dë e. Biga de an o sa pasa ku i seei, kwetikweti.”

23 Nöo hën a bia gandji dëën taa: “Waka pasa kumutu a mi fesi dë e, ju didibi Saatan. I dë kuma wan sitonu a pasi da mi u mi naki futu kai kumutu a di pasi Gadu buta da mi u mi waka. Biga fa i fan dë, nõo na Gadu da i di pakisei dë e. Libisëmbë pakisei nõo di dë.”

24 Nöo di a fan ku Petuisi sô te a kaba, nõo hën a bia fan ku u tuu taa: “Dee sëmbë o, wan mëni fa mi bi fan ku unu nõ, taa hiniwan sëmbë abi sitaafu fëën fu tjai ufõ a sa waka a mi baka. Nöo ee i kë waka a mi baka tuutuu, nõo i musu disa di soni di i seei ta kë, nõo i tei di sitaafu dë tja.

25 “Biga ee wan sëmbë i ta suku wan suti libi da i seei a di goonliba aki, nõo ja o feni ën fa i kë möönsô e. Lasi nõo joo lasi. Ma nõo ee i saka i libi fu mi hedi, nõo joo fendì ën kumafa i kë nõömö.

26 “Nöo ee i feni hii soni u di goonliba aki tuu te dou, ma i seei lasi go a di didibi faja, nõo un heepi seei a abi da i? Nöo andi seei dë a goonliba aki waiti tjika tu, fii tookëën ku di libi u teego? Soni an dë e, baa.

27 “Biga te wan daka, Mi di ko dë Libisëmbë Mii aki o toona ko a di goonliba aki nöömö, fu mi kuutu a libisëmbë liba. Nöö fa mi o ko dë, nöö mi ku dee basia u mi Tata köndë tuu o ko makandi, nöö ku di gaan hei u mi Tata seei woo ko e. Nöö mi o paka hiniwan sëmbë kumafa a fiti di libi di a bi libi a di goonliba aki.”

28 Nöö hën a taa: “Mi taki da unu e, taa so fuunu dë aki an o dëdë möönsö bifö un si Mi di ko dë Libisëmbë Mii aki toona ko dou ku di Njunjun Tii u mi.” Sö Masa Jesosi fan ku u tefa a kaba.

17

Aki dee bakama u Masa Jesosi si di Gadu fasi fëen di a abi.

Maik. 9:2-13; Luk. 9:28-36

1 Nöö hën a baka sikisi daka, hën Masa Jesosi tei Petuisi ku de tu baaa Jakobosi ku Johanisi, nöö hën de subi go te a wan hei kununu liba.

2 Nöö hën de sai dë te wan pisi, hën Masa Jesosi ko tooka a de wojo seei. Fesi fëen ko ta koti faja kuma sonu, nöö dee koosu nëen sinkii ko weti faan te sëmbë wojo an sa kai ku de.

3 Nöö te u de kë mëni, hën de si tu womi ko taanpu nëen bandja, wan de kai Elia, wan da Mosesi. De tu womi dë bi dë awoo tjabukama u Gadu u fesiten, gaan nëbai sëmbë, nöö de bi dëdë gaanduwe kaa, ma nöö hën de ko a Masa Jesosi dë ko ta fan ku ën.

4 Nöö fa de ta fan ku ën dë, hën Petuisi taa: “Masa o, a bunu fa i tja u ko aki. Nöö ee i kë, nöö mi sa mbei dii tjëkë liba da unu: wan fii, wan u Mosesi, ku wan u Elia.”

5 Ma nöö di a fan sö kaa, hën wan gaan limbo wöluku saka zalalaa ko tapa de buuu. Hën de jei wan töngö ta fan a di wöluku dendu dë taa: “Un luku di lobi Womi Mii u mi aki. Libi fëen ta kai ku mi. Nöö hën fuun ta haika e.” Sö di töngö piki.

6 Nöö fa de dii bakama u Masa Jesosi jei di fan dë, nöö hën de fëëe te de kai ku fesi a goon.

7 Hën Masa Jesosi waka go panjan de hën a taa: “Womi o, un hopo. Wan fëëe sö e.”

8 Nöö di de ko jabi wojo, nöö Masa Jesosi wanwan nöö de si. De an si de tu sëmbë möön.

9 Nöö hën de toona ta bazia di kununu ta saka nango a goon. Nöö fa de nango dë, hën Masa Jesosi bai de taa: “Un haika e, di soni di un si a di kununu liba naandë, nöö wan musu taki ën da na wan kodo sëmbë e. Un musu hoi ën a unu hati ufö. Tee Mi di ko dë Libisëmbë Mii aki dëdë toona weki baka ufö un sa taki ën.”

10 Nöö hën de taki dëen taa: “Masa o, u kë hakisi i wan soni. Faandi mbei dee leima fuu, dee Sabima u Wëti, taa Elia hën fosu musu ko ufö di könu Gadu bi paamusi o ko a u?”

11 Hën a piki de taa: “Awa, fa de ta lei unu dë, nöö sö a dë tuu. Elia bi musu ko a fesi fa a seeka pasi da di Könu.

12 Ma nöö mi taki da unu taa a ko kaa e. Ma dee sëmbë an bi sabi ën, nöö hën de du ku ën kumafa de kë. Nöö söseei de o du ku Mi di ko dë Libisëmbë Mii aki tu.” Sö Masa Jesosi taki.

13 Nöö fa a fan dë ufö de ko sabi taa Johanisi di Dopuma hën a ta taki dë. Hën wë bi da di Elia di bi musu ko.

Aki Masa Jesosi kula

wan womi mii bi dē ku miii siki.

Maik. 9:14-29; Luk. 9:37-43a

¹⁴Nöo hēn de ta bazia di kuun ta ko te de ko kai a palala goon, nöo hēn de ko si wanlö hia sēmbē naandē ta luku de. Nöo hēn wan womi kule kumutu a dee sēmbē dendu ko kai a goon a Masa Jesosi fesi.

Hēn a begi ēn taa:

¹⁵“Masa gaantangi, a’ tjalihati fu wan womi mii u mi aki o. Miii siki dē ku ēn seei te na soni. So juu a ta naki ēn ta tuwē a faja, so juu a ta tuwēēn a wata. Sö a ta fukēēn tjika.

¹⁶Nöo mi bi tjēēn ko a dee bakama fii aki u de heepi mi kulēēn, ma de an bi sa heepi mi möönsö. Nöo hēn wē i si mi tjēēn ko a i seei.”

¹⁷Nöo hēn Masa Jesosi djēmē, a taa: “Ee! Andi seei mi feni a dee sēmbē u di ten aki maun? Fa mi ku de dē aki, de an ta biibi möönsö. Taangajesi nöo de abi sö. Un longi mi musu dē ku unu aki ta hoi pasensi da unu ufö un sa biibi mi?”

Nöo hēn a taa: “Söö. Wē tja di mii ko a mi aki i si.”

¹⁸Nöo hēn de tjēēn ko dēēn. Hēn a jaka di soni di bi dē nēēn liba dē puu tuwē go, nöo wantewante dē hēn di mii ko bunu fiaa.

¹⁹Nöo baka u di dē, hēn u dee bakama fēēn ko nēēn. Hēn u hakisi ēn taa: “Masa o, andi seei mbei wa bi sa jaka di gadu dē puu a di mii liba?”

²⁰Nöo hēn a taa: “Awa, wē baaa o, fu di wan ta biibi a di fa wē mbei e. Biga mi taki da unu taa ee un abi wan piki biibi tēin sö seei kuma di sii fu di pau de kai mutaadi, nöo i sa go taki da wan gaan kununu taa ‘hopo kumutu dē’, nöo a o kumutu dē go. Biga te di biibi fuunu dē a di fa kaa, nöo na wan soni o dē di wan o sa du e.

²¹“[Ma boiti u di dē, sö wan pei soni, ja sa puu ēn a sēmbē liba ee na i tei ten fii begi Masa Gaangadu gaanfa söndö njan.]” Sö Masa Jesosi piki u di ten dē.

Aki Masa Jesosi toona fan soni

u di dēdē fēēn möön.

Maik. 9:30-32; Luk. 9:43b-45

²²Nöo baka u di dē, hēn u ku Masa Jesosi ko makandi a di pisiwata u Galilea naandē, hēn a taki da u taa: “Dee sēmbē, mi kē taki wan soni da unu aki taa Mi di ko dē Libisēmbē Mii aki, nöo wan daka de o buta mi a dee felantima u mi maun.

²³Nöo de o kii mi e. Ma di u dii daka fēēn nöo mi o toona weki baka. Sö wē o pasa ku mi e, dee sēmbē.” Nöo fa a fan ku u dē, nöo a dē wan gaan tjali soni seei da u, a da u fuka te na soni.

Aki Masa Jesosi ku Petuisi

o paka keiki möni.

²⁴Nöo hēn u toona go a Kapenaumi möön. Nöo hēn dee sēmbē ta pii möni da di Gaan Keikiwosu a Jelusalen dē, nöo hēn de ko a Petuisi ko hakisi ēn taa: “Wē mati o, fa di mēsitē fuunu sai dē, hēn an ta paka di keikimöni nö?”

²⁵Hēn a taa: “Aai höön, a ta paka.” Ma nöo fa de ta fan dē, nöo Masa Jesosi an sai naandē.

Nöo hēn Petuisi go nēēn a wosu. Ma nöo fa a denda a di wosu, an jabi buka fan seei, hēn Masa Jesosi kai ēn taa: “Womi Simon.”

Hēn a piki.

A taa: “Mi kē hakisi i wan soni. Fa dee könu u di goonliba aki ta pii lantimöni, nöo na ambē de ta pii ēn? A deseei mii, naa a dee sēmbē dee an dē a di könu famii?”

²⁶ Hën Petuisi piki ën taa: “Wë a dee oto sëmbë dee na famii u kõnu.”

Nöö hën Masa Jesosi taa: “Söö. Wë hën da an dë u dee mii u di kõnu seei musu paka, na sô nö?”

²⁷ Ma nöö un boo paka nöö e, fu de an musu mati u.

“Nöö haika e. Tei di huku fii nöö i go a huku. Nöö di fosu fisi di i si joo kisi nöö i jabi ën buka luku, nöö joo si wan möni nëën dendu, nöö i tei ën tja go paka u mi ku i.”

18

Aki ta lei ambë da hei sëmbë

a di tii u Gadu dendu.

Maik. 9:33-37; Luk. 9:46-48

¹ Hën u dë te wan daka, nöö hën u dee bakama u Masa Jesosi ko nëën ko hakisi ën taa: “Masa o, u kë hakisi i wan soni. Undi fuu sa dë di möön hei wan a di Njunjun Tii u Gadu dendu di ta ko aki?”

² Nöö hën Masa Jesosi kai wan piki mii tja ko nëën, nöö hën a butëën leti a u dendu naandë.

³ Hën a taa: “Wan ta si di mii aki nö? Ee wan sëmbë ja bia ko abi di fasi di wan piki mii abi, nöö ja o sa dë a di Njunjun Tii dendu möönsö e.

⁴ Ma nöö ee i abi sô wan sakafasi, nöö joo dë gaan hei sëmbë a di Njunjun Tii dendu.”

⁵ Hën a taki da u möön taa: “Ee i du sô wan piki mii kuma di i si aki wan bunu fu di a nama ku mi hedi, nöö miseei wë i du di bunu dë kaa e.

⁶ “Nöö ee wan mii kuma disi ko biibi a mi liba, nöö hën wan fuunu mbei a kumutu a Gadu pasi, nöö mi taki e, di sitaafu fëën di joo kisi a Gadu nöö a o hebi gaanfa e. A bi sa möön bëtë da i de bi tei wan gaan gindi sitonu tai a i gangaa te de kaba, nöö de tja i go tuwë a di möön fundu kamian u di ze dubuu pii. Biga di sitaafu dë an o hebi kuma di i bi o kisi a Gadu, ee i bi mbei so wan sëmbë kumutu a di pasi u Gadu.”

Aki ta lei fa i musu kõni tjika

fii tan a di tii u Gadu.

Maik. 9:42-48; Luk. 17:1-2

⁷ Hën a taa: “Mi bai helu da di goonliba aki e, da dee soni fëën ta ganjan sëmbë puu a Gadu pasi. A dë sô tuu taa sô di goonliba aki dë kaa, ma tokuseei mi bai helu da dee sëmbë dee ta buta sëmbë fu de du dee soni dee an kai ku Gadu.

⁸⁻⁹ “Nöö mi bai unu taa ee i kë du wan soni ku i maun di o mbei i kumutu a di pasi u Gadu, nöö a möön bunu i koti di maun fii kolon puu a i sinkii tuwë wante.

“Nöö söseei tu, ee ku di wojo fii dë i kë luku wan soni di o puu i a Gadu pasi, nöö a möön bunu i diki ën puu tuwë. Biga a möön bëtë da i i lasi wan kamian fii sinkii ma i feni di libi u teego, möön leki de hiti i ku telu go a di didibi faja.

¹⁰⁻¹¹ “Nöö mi taki da unu möön e, taa un musu mëni unu seei bunu a di fa i ta libi ku dee piki mii kuma di i si aki sô. Wan musu tei de u sösö soni. Biga dee basia u mi Tata kõndë dee ta waka nango ta ko nëën fesi nöömö dë, nöö de wë ta watji dee mii aki e. Hën mbei wan musu ta kai de sösö soni.”

Aki Masa Jesosi taki soni u

wan sikapu di bi lasi.

Luk. 15:3-7

12 Nöo hën a tei wan oto konda da u, a taa: “Ee wan sëmbë abi wan höndö sikafu ta kiija, nöo hën wan u de kumutu a dee otowan dendu lasi go te a go pii, nöo unfa i mëni? Na a o disa dee nëigiteni-ku-nëigi ka de ta njan a di sabana dë, nöo a go suku di lasi sikafu dë tee a feni ën nö? Aai, sö a o du.

13 Nöo mi taki da unu, taa te a feni di wan kodo di bi lasi go dë, nöo a o wai ku ën gaanfa seei möön leki dee nëigiteni ku nëigi dee an bi go lasi.

14 “Nöo söseei wë mi Tata di dë a liba ala dë tu e, dee sëmbë. Biga an kë na wan kodo sëmbë fëen musu lasi, te dou ku dee piki mii kuma disa aki seei. Sö a ta kai de gaan soni tjika.

Aki ta lei fa fii du ku wan sëmbë di du hogi ku i.

15 “Nöo mi o taki wan oto soni da unu möön. Ee wan otowan fii du i wan hogi, nöo i musu go nëen i wanwan go fan ku ën, fuun seeka di taki be un ko bunu baka. Nöo ee di otowan fii piki tei di fan fii, nöo hën da i wini ën tja ko buta a pasi.

16 Ma ee i fan ku ën an kë haika möönsö, nöo i musu toona go kai wantu sëmbë, nöo un tuu go nëen makandi nöo un fan ku ën te un kaba. Nöo a o kai ku di Buku u Gadu ka a sikifi taa i musu abi tu ee nasö dii kotoigima ufö de sa sitampu wan soni taa a dë tuu.

17 “Ma nöo ee di otowan fii an kë haika unu möönsö fu di taki musu seeka, nöo be un tja di taki go a dee oto biibima fuunu ka un ta miti makandi a keiki. Nöo ee un go taki ën te un kaba, ma seei di sëmbë an kë piki möönsö, nöo a ko dë taa heepi an dë. Nöo un luku ën kuma wan sëmbë na sabi soni fu Gadu, kuma wan takulibima.

18 “Nöo mi taki da unu e, taa fa un dee sëmbë u mi ta ko makandi naandë, nöo di soni di i si un sitampu te un kaba taa hën bunu, nöo Gadu seei o nama ku unu nëen taa a bunu. Nöo ee un luku wan soni a goonliba aki tee un kaba sitampu taa an bunu, nöo Gadu seei o taa an bunu tu. Sö taki fuunu a goonliba aki o a’ kaakiti tjika e.

19 “Nöo mi taki e, taa ee wantu fuunu ko miti a wan kamian fuun begi mi Tata a liba faa du wan soni da unu, nöo mi piki unu gbelin taa a o du ën e.

20 Biga ka tu dii fuunu ko makandi fu di un nama ku mi, nöo mi seei o dë leti a unu mindi dë.”

Aki ta lei taa u musu da sëmbë paadon.

21 Nöo hën Petuisi ko nëen, hën a hakisi ën taa: “Wë Masa o, ee wan otowan u mi ta du hogi ku mi nöo hën mi puu ën a bëë te dou sëbën pasi kaa, nöo an tjika nö?”

22 Hën a piki ën taa: “Nönö, womi, an tjika e. I musu ta puu ën a bëë nöömö, ee sëbënteni toon sëbën pasi seei. Ja musu hoi ën a bëë möönsö.”

23 Nöo hën a toona da u wan oto möön faa lei u fa di Njunjun Tii u Gadu dë. A taa: “A dë leti kuma wan kõnu di abi sëmëni wookoma ta juu möni nëen. Nöo hën a dë te wan daka nöo hën a kai de ko fu de pakëen di möni di de bi juu nëen.

24 “Wë nöo di de seti di soni, hën de tja wan sëmbë ko nëen. Di sëmbë naandë bi abi sëmëni milion faa pakëen.

25 “Hën di kõnu taa: ‘Wë mati o, da mi di möni u mi di i musu paka mi.’

“Ma nöo di womi an abi di möni. Nöo hën di kõnu taa: ‘Wë antoobi. Un sei ën, hën ku ën mujëë ku dee mii fëen ku hii soni a abi tuu, nöo un tja di möni u de ko da mi, be mi feni di möni u mi.’

26 “Ma nöö di di womi jei sö, nöö hën a saka tjökö kini a goon nëen fesi, hën a begi ën taa: ‘Köndë Masa o, i a’ leti, ma mi begi i gaantangi hoi pasensi da mi o. Di möni di mi juu a i, nöö mi o paka i ën nöömö.’

27 “Nöö fa a begi ën te a kaba dë, nöö hën tjali fëen kisi di könu. Nöö hën a taa: ‘Wë mati o, wë an dë fii paka mi di möni möön e. Un boo disa di taki nöö.’ Nöö di a fan ku ën sö tefa a kaba, nöö hën a mandëen go.

28 “Ma nöö fa di womi kumutu dë, hën a go miti ku wan otowan fëen a pasi, di hën ku ën tuu ta wooko makandi da di könu. Nöö di womi aki bi juu kuma wan teni-a-feifi kolu sö a di womi di kumutu a di könu dë. Nöö fa de miti dë, nöö hën a djombo kisi di otowan a gangaa gbolou peeta. Hën a taa: ‘Söö, womi, wë u miti. Paka mi di möni u mi wantewante, nasö mi o du ku i tide.’

29 “Nöö hën di womi tjökö kini a goon nëen fesi hën a begi ën taa: ‘Gaantangi baa, hoi pasensi da mi o. Te mi feni di möni nöö mi o da i ën nöömö.’

30 “Ma nöö di fosu womi naandë, hën an dë a di taki dë seei, kwetikweti. An haika seei andi di otowan fëen ta taki. Nöö hën wë a mbei dee siköutu ko tei ën tja go buta a dinguwosu fu tee a sa paka di paima.

31 “Ma nöö fa di soni pasa dë, nöö dee oto wookoma u könu sai dë ta si, nöö hën de kule tjalalaa go piki di könu taa sö wan soni de si pasa, a bigi te an sa taki.

32 “Nöö hën di könu toona kai di wookoma dë ko nëen möön, hën a gandji dëen seei awaa, a taa: ‘Ju hogihatima ju, hii di gaan hia möni di i bi abi u paka mi nöö hën wë mi disa i fu di i bi begi mi.’

33 Wë nöö an bi bunu da i fii abi tjalihati da di otowan fii nö? Jee? Sö i dë ö?”

34 “Nöö hati fëen boonu ku ën teee, nöö hën a kai dee siköutu, a taki da de taa: ‘Un kisi di sëmbë dë tja go tuwë a dinguwosu, be a ta tja sitaafu fu teee a paka hii di möni di a bi musu paka mi, tee dou ku dee lasiti bësënsi tuu.’ ”

35 Nöö sö Masa Jesosi taki wan oto da u te a kaba. Hën a taa: “Un si fa di soni pasa dë ö? Wë nöö leti sö nöö mi Tata di dë a liba ala o libi ku unu tu e, ee wan puu dee otowan fuunu a bëë ku hii unu hati a dee hogi de ta du unu.”

19

Aki Masa Jesosi ta taki fa

manu ku mujëë an musu tuwë.

Maik. 10:1-12; Luk. 16:18

1 Nöö hën a baka u di dë, hën u ku Masa Jesosi kumutu a Galilea naandë latja Judea go te a di oto së banda u Joodan Lio.

2 Nöö fa u ta waka nango dë, wanlö hia sëmbë ta dë a Masa Jesosi baka ta ko nöömö. Nöö di u dou a di oto së banda u di lio, nöö hën a kula dee sikima u de tefa a kaba.

3 Nöö di juu dë, hën wanlö Faliseima ko nëen fu de poobëen luku ee de sa feni föutu nëen u de tjëen go kaagi da lanti. Nöö hën de hakisi ën taa: “Mësitë o, u kë hakisi i wan soni aki. Unfa di wëti u Gadu taki? Wan womi sa tuwëen mujëë fu hiniwan piki soni di hën ku ën abi ö?” Sö de hakisi ën.

4 Nöö hën a piki de taa: “Wan bi lesi a di Buku nö, taa di Gadu mbei goonliba te a kaba nöö hën a mbei libisëmbë, wan womi ku wan mujëë.

5 Nöö kumutu a di ten dë te kisi fa u dë aki, wan womi o kumutu disa hën mama ku hën tata go libi ku ën mujëë, nöö de o ko dë wan sinkii.

6 De an o dë kuma tu sëmbë möön. Wë nöö fa Masa Gaangadu buta de ko di wan dë, nöö libisëmbë aan leti u paati de möönsö e.”

7 Hën de hakisi ën taa: “Wë nõõ ee a dë sò tuu, nõõ faandi mbei Mosesi bi buta da u Dju sëmbë taa i sa mbei wan pampia a lanti te i kaba taa i ku di mujëe fii tuwë, nõõ i manda di mujëe fii go? Faandi mbei a taki sò?”

8 Hën a taa: “Awa, wë fa a da unu di pasi dë, fu di un abi taangajesi wë mbei e. Ma a seti u goonliba nõõ an bi dë sò.”

9 Nõõ mii taki da unu seei gbelin taa ee wan sëmbë i abi wan mujëe fii nõõ i tuwëen ma na manu a tei a i wosu nõõ hën i toona go tei wan oto mujëe, nõõ Gadu wëti hën wë i booko dë e.” Nõõ sò Masa Jesosi piki dee sëmbë.

10 Nõõ di u dee bakama fëen jei a taki sò, hën u taa: “Wë nõõ Masa o, ee sò di wëti fu Gadu dë, nõõ an dë fu womi abi mujëe, an dë u mujëe abi manu tu e. Un boo dë fuu sò nõõ.”

11 Hën a taa: “Ma na hii sëmbë sa fika sò e. Nönö. Ma dee sëmbë dee a kai da, nõõ de nõõ sa dë sò.”

12 Biga so sëmbë an sa tei mujëe biga de pai ën sò kaa. So sëmbë an sa tei mujëe fu di oto sëmbë du hogi ku de. So sëmbë, deseei feni ën fu bunu fu de dë ku wan hati ta biinga fu di Tii u Gadu musu paaja a mundu, hën mbei de an tei mujëe.

“Nõõ di sëmbë di sa tei di lei aki, nõõ be a tei ën e.”

Aki de tja dee mihi ko

a Masa Jesosi.

Maik. 10:13-16; Luk. 18:15-17

13 Nõõ di juu naandë, hën de tja wanlò mihi ko a Masa Jesosi faa musu buta maun a de hedi begi da de. Nõõ di u dee bakama fëen si sò, hën u gandji da dee sëmbë seei.

14 Ma nõõ hën Masa Jesosi si taa sò u ta du, hën a bai u taa: “Nönö womi, wan tapa de e. Be de tja dee mihi ko da mi nõõ. Biga dee sëmbë dee abi sò wan saka fasi kuma dee piki mihi i si aki, nõõ de nõõ o dë a di Tii u Gadu dendu e.”

15 Hën a buta maun a dee mihi hedi, hën a begi da de te a kaba.

Aki Masa Jesosi ta fan

ku wan guduma.

Maik. 10:17-31; Luk. 18:18-30

Nõõ baka fëen, hën u kumutu a di kamian dë nango mõn.

16 Te wan pisi, hën wan kijoo ko a Masa Jesosi hën a kai ën te a piki, a taa: “Mësitë, wë mi ko a i aki. Mi ko hakisi i ee un bumbuu soni dë fu mi sa du nõõ mi feni di libi u teego?”

17 Hën Masa Jesosi hakisi ën taa: “Faandi mbei i hakisi mi soni u bumbuu? Biga Gadu nõõ da bumbuu sëmbë, nõõ ee i kë feni libi u teego, nõõ i musu hoi i seei a dee wëti fëen.”

18 Hën di womi hakisi taa: “Undi u dee wëti fëen fu mi hoi?”

Hën a taa: “Ja musu kii sëmbë. Ja musu go a wan mujëe na mujëe fii. Ja musu fufuu sëmbë soni. Ja musu mindi soni da sëmbë.

19 I musu a' lesipeki da i mama ku i tata. I musu lobi hii sëmbë kumafa i lobi i seei.”

20 Hën a taa: “Aaa, dee soni dë nõ? Wë hii dee wëti dë tuu seei mi bi ta hoi kaa, fu sensi mi bi dë mihi. Ma nõõ ee i si taa wan soni toobi mi eti, nõõ gaantangi be i taki ën da mi o.”

21 Hën Masa Jesosi piki ën awaa, a taa: “Söö, wë antoobi. Wë ee i kë ko dë wan bumbuu sëmbë te dou, nõõ i go sei hii dee gudu fii dee i abi tuu te i kaba, nõõ i tei di mõni paati da dee mõfina sëmbë u di kõndë. Nõõ te i du sò kaa,

nöö joo abi gudu a Masa Gaangadu köndë te a hia e. Nöö te i kaba, nöö i ko bakama u mi ta waka a mi baka.”

²² Wë nöö fa Masa Jesosi fan ku ën te a kaba dë, nöö hën di kijoo bia go ku gaan tjali nëën hati, biga a abi hia gudu tuu.

²³ Nöö fa a go dë, hën Masa Jesosi bia fan ku u dee bakama fëën, a taa: “Womi, a dë wan taanga soni tuu fu sô wan guduma musu ko a di Tii u Gadu dendu e.

²⁴ Ja si fa di mbeti de kai kamëli bigi ö? Ee i luku ën te i kaba, nöö ja sa maakëën seei taa a sa pasa na aguja baaku. Ma mi piki unu taa, di soni dë möön fukë möön leki fu wan guduma sa ko a di Tii u Gadu dendu.”

²⁵ Nöö di u jei sô kaa, nöö a toobi u seei. Hën u hakisi ën taa: “Wë ee sô a taanga da wan sëmbë di Gadu heepi sô te a ko gudu, nöö ambë seei sa feni di libi u teego baa?”

²⁶ Hën a luku u diin sô, hën a taa: “Ee a nama a di kaakiti u libisëmbë, nöö na wan sëmbë sa feni ën e. Ma a di kaakiti u Masa Gadu a nama, nöö soni seei an dë di hën an sa du.”

²⁷ Nöö hën Petuisi taa: “Wë Masa o, uu bi disa hii soni seei ko ta waka a i baka, nöö un paima u o feni?”

²⁸ Hën a taa: “Haika e. Te a dou di juu fu hii soni musu ko njunjun, nöö Mi di ko dë Libisëmbë Mii aki o go sindo a di kõnu sutuu u mi ku hii di hei u Gadu di a abi. Nöö di juu dë, nöö un dee tuwalufu sëmbë bi ta waka a mi baka aki, nöö woon ko sindo a tiima sutuu tu, ta kuutu dee tuwalufu lö u Isaëli.

²⁹ “Nöö na unu wanwan o feni paima e. Ma hii dee sëmbë dee disa de wosu, ee nasö de baaa, ee nasö sisa, tata, mama, miii, pandasi kamian, hiniwan soni fu di a kë waka a mi baka hedi, mi taki da unu taa dee lö sëmbë dë an o lasi. Biga de o toona feni dee soni naandë höndö toon baka, nöö te fu kaba fëën nöö de o feni di libi u teego a Gadu tu.

³⁰ “Nöö di juu dë, nöö sëmëni sëmbë dee de bi ta tei u heihei sëmbë a goonliba aki, de tuu o ko dë lagi sëmbë. Nöö sëmëni sëmbë dee bi dë lagima a goonliba aki o ko hei sëmbë awaa.”

Sô Masa Jesosi taki da u tefa a kaba.

20

Aki da wan oto fu wanlö wookoma bi wooko a wan goon.

¹ Nöö hën wë Masa Jesosi konda wan oto woto da u möön, faa lei u fa di Njunjun Tii u Gadu dë. A taa: “Wan guduma abi wan gaan goon fëën. Nöö hën di mamate biten hën a hopo go suku sëmbë fu de heepi ën wooko di goon.

² Nöö di a feni sëmbë, hën a mbei buka ku de te a kaba taa a o paka de wan daka wooko möni. Hën de taki aai, a bunu. Nöö hën wë a manda de go a di goon.

³ “Nöö hën a sai dë te kuma nëigi juu sô, hën a toona go suku sëmbë möön u de musu heepi ën wooko di goon. Nöö hën a go si wanlö sëmbë taanputaanpu pii a wojowojo naandë, de aan soni seei u du möönsö.

⁴ “Nöö hën a taki da de taa: ‘Un ko go wooko da mi a mi goon, nöö mi o paka unu kumafa a fiti.’ Hën de taki aai, nöö hën a manda de go.

⁵ “Nöö hën a dë te kuma tuwalufu juu, hën a toona go suku sëmbë möön fu de heepi ën wooko di goon. Hën a feni sëmbë möön.

“Nöö a di dii juu, hën a toona go suku möön.

⁶ “Hën a dë tee sapate feifi juu hën a toona go möön. Hën a go si wanlö sëmbë dë taanputaanpu a wan kamian, na soni seei de ta du möönsö.

“Hën a hakisi de taa: ‘Andi mbei un dë taanputaanpu aki di wan hii daka nõömõ sõ?’

⁷“Hën de taa: ‘Wë nõnõ, wa feni wooko seei möönsõ e.’

“Nõõ hën a taa: ‘Sõõ. Wë mi o manda unu be un go wooko a mi goon ala. Un kë õ?’

“Hën de taki aai. Hën a manda de go a di wooko.

⁸“Nõõ hën de ta wooko tee fa juu kisi u de kumutu a di wooko. Nõõ hën di sëmbë abi di goon hën a go fan ku di basi taa: ‘Wë go kai dee wookoma tja ko, nõõ i paka de da mi. Nõõ joo seti ku dee bi ko lasiti dë te kisi dee fosu sëmbë dee bi ko di mamate e.’

⁹“Nõõ hën di a go u go paka de, nõõ hën a seti ku dee bakawan hën a paka de wan hii daka mõni. Nõõ sõ a paka de tuu te dou.

¹⁰“Ma nõõ di a paka dee sëmbë bi ko a fesi, nõõ de bi mëni taa de o kisi möön hila mõni möön dee ko a baka dë. Ma nõõ de ko si taa di wan mõni nõõ de tuu feni.

¹¹Nõõ di soni an kai ku de seei, nõõ hën de sai dë ta guunjan di sëmbë abi di goon.

¹²“Te wan pisi hën de go nëen gbolo, hën de hakisi ën taa: ‘Unfa di soni waka? Di mamate hën u ko dë ta pena a di sonu mindi tefa di ndeti aki, ma nõõ dee sëmbë dee wooko di wan kodo juu langa dë, u ku de tuu kisi di wan seei mõni. A bunu sõ nõ?’

¹³“Nõõ hën di goon masa kai wan u de, a taa: ‘Mati.’

“Hën a piki.

“A taa: ‘Fa un taki dë, nõõ ma du hogi ku unu e. Biga na mi ku unu bi mbei buka taa mi o paka unu wan daka mõni nõ? Wë nõõ un mëni dë a i maun naandë? Na wan daka mõni mi da i dë nõ?’

¹⁴⁻¹⁵“ ‘Nõõ unfa i pakisei? Di soni di mi abi, ma sa du ku ën kumafa mi kë nõ? Sõ nõõ mi bi kë da dee sëmbë dee ko lasiti dë, nõõ fu di mi abi bunuhati u de fëen mbei un ta haun sõ nõ?’ ”

¹⁶Sõ wan oto Masa Jesosi tei konda da de. Hën a taa: “Sõ nõõ a o dë a di Njunjun Tii u Gadu e. Dee sëmbë i mëni taa o dë a fesi, nõõ de sa ko dë a baka e. Nõõ dee sëmbë i sabi taa o dë a baka, nõõ de sa ko fesima.”

Aki Masa Jesosi taki soni

u di dëdë fëen möön.

Maik. 10:32-34; Luk. 18:31-34

¹⁷Nõõ a baka u di dë, hën Masa Jesosi o go a Jerusalen. Nõõ hën a kai u dee tuwalufu bakama fëen a së.

Hën a fan ku u te a kaba taa:

¹⁸“Dee sëmbë, un haika e. Woo go a Jerusalen awaa. Nõõ fa i si woo go dë, nõõ wan gaan soni o pasa ku Mi di ko dë Libisëmbë Mii aki e. De o sei mi da dee Gaan Begima ku dee Sabima u Wëti, nõõ de o kuutu ku de na de te de kaba fiti buka taa mi musu dëdë.

¹⁹Nõõ de o tja mi go buta a dee oto kõndë sëmbë maun dee na dë Dju sëmbë, u de ta sösõ mi ta mbei mi fa. Nõõ de o fon mi te a tjika de ufõ de o tei mi tja go peka a lakpa pau kii. Ma nõõ a di u dii daka, nõõ mi o toona weki baka e.”
„Sõ wë a fan ku u gbelingbelin tjika.”

Aki wan mama ta hakisi hei kamian da dee womi mii fëen.

Maik. 10:35-45

²⁰Ma nõõ baka di Masa Jesosi fan sõ, hën di mama u Jakobosi ku Johanisi, dee mii u Zebedeosi, ko nëen ko tjökõ kini a goon nëen fesi taa: “Masa o, mi kë begi i wan soni.”

21 Nöo hën Masa Jesosi piki ën taa: “Antoobi, mujëe. Andi i kë?”

Hën a taa: “Wë ja si dee tu womi mii u mi aki ö? Wë mi ko begi i taa te joo subì a di kõnu bangi fii, fii tii di kõndë, nöo mi kë i mbei de sindo a i bandja, wan u de a i leti maun së, di otowan a i tóotómaun së.”

22 Hën Masa Jesosi hakisi ën taa: “Wë mujëe o, fa i ko begi mi di soni aki, ma nöo i saandi i ta begi mi nö?”

Hën a bia fan ku de tu baaa, a taa: “Womi, di soni di de lai da mi u mi bebe aki, nöo un sa bebëen tu ö?”

Nöo hën de taa: “Aai, Masa, u sa bebëen.”

23 Hën a taa: “Awa, wë woon bebe wan pikiwan fëen tuu o. Ma haika e. Ee a dë taa fii ko sindo a dee hebi kamian a mi bandja dë, nöo an dë a mi aki fu mi sa mbei buka ku unu nëen e. Biga dee sëmbe dee mi Tata a liba ala buta, nöo de nöo sa feni dee lö kamian naandë.” Sö Masa Jesosi piki de.

Aki ta lei ambë o hei a di tii u Gadu dendu.

24 Wë nöo di u otowan ko jei fa de tu baaa bi fan dë, nöo hati fuu ko boonu ku de seei.

25 Nöo hën Masa Jesosi kai hii u tuu ko nëen makandi, hën a fan ku u taa: “Womi, un haika e. Fa dee hedima u di goonliba aki ta tii kõndë, nöo de ta masa sëmbe ta buta de a de basu, nöo dee sëmbe dee dë a de basu dë seei ta masa oto sëmbe tu ta buta a de basu. A sö wan fasi wë dee hedima u goonliba aki ta tja kõndë.

26 “Ma nöo unu, wan musu dë sö e. Nönö. Biga ee wan fuunu kë ko heima a di Njunjun Tii u Gadu aki, nöo i musu saka i seei da di otowan fii.

27 Ee i kë ko fesima u dee otowan, nöo i musu ko dë kuma futuboi seei da de.

28 A di soni dë un musu ta djeesi mi e, dee sëmbe. Biga fa i si Mi di ko dë Libisëmbe Mii ko a goonliba aki, nöo ma ko fu sëmbe musu dini mi e, ma mi ko u miseei musu dini sëmbe. Mi ko u mi lasi mi libi seei paka paima fu sömëni hia sëmbe sa ko bunu ku Gadu.” Sö Masa Jesosi taki da u a di ten dë.

Aki Masa Jesosi kula

tu bookowojoma.

Maik. 10:46-52; Luk. 18:35-43

29 Nöo hën u ku ën ta waka nango tefa u go dou a wan kõndë de kai Jelikou. Nöo fa u nango dë, na u wanwan e. Wanlö gaan hia sëmbe ta waka a Masa Jesosi baka gidjii kumafa de bi guwenti kaa, nöo hën u ta kumutu a di kõndë.

30 Nöo di juu dë tu bookowojoma bi dë leti a bandja pasi naandë. Nöo di de jei taa Masa Jesosi hën ta pasa dë, nöo hën de seti bai dëen taa: “Masa gaantangi, na i da di bakamii u Kõnu Dafiti di bi musu ko nö? Saa u ooo, saa u!” Sö de ta bai.

31 Ma nöo dee hia sëmbe dee ta waka ku u dë ta gandji da dee bookowojoma taa: “Un kabuka naandë!” Ma de an haika seei. Awa de ta bai taa: “Masa, ju di Heepima dë, u begi i gaantangi, saa u ooo! Heepi u!”

32 Nöo hën Masa Jesosi taanpu piiii, hën a kai de.

Hën de ko dou.

Hën a hakisi de taa: “Andi un kë fu mi musu du da unu?”

33 Hën de taa: “Masa, u kë fii heepi u be u ko ta si soni.”

34 Nöo fa de fan dë, hën tjali u de kisi Masa Jesosi tee na soni, hën a tëndë maun nama a de wojo. Nöo hën wantewante dë, hën wojo u de limbo, de ko si soni ghegedee. Nöo hën de ta waka nango a Masa Jesosi baka, de ku dee hia sëmbe dë.

21

Aki dee sëmbë ta wai ku Masa Jesosi kuma wan kõnu.

Maik. 11:1-11; Luk. 19:28-40; Joh. 12:12-19

¹ Nöö u ku Masa Jesosi nango tefa u ko dou a wan kõndë de kai Betifaigi. Di kõndë dë dë zuntu ku Jelusalen, leti a di kuun de kai Oleifi Kuun bandja naandë.

Nöö hën Masa Jesosi kai tu fuu dee bakama fëen,

² hën a taki da de taa: “Womî, un go a di kõndë a u fesi naandë e. Nöö te un go dou nöö woon si wan buliki dë taitai ku ën mii nëen bandja. Nöö un lusu de tja ko da mi.

³ “Nöö ee a ko dë sô taa wan sëmbë ko hakisi unu taa: ‘Unsë un nango ku dee mbeti?’ nöö un piki ën taa: ‘Di Masa fuu, hën abi de fanöudu,’ nöö de o disa de da unu.” Sô Masa Jesosi fan ku de tu bakama te a kaba.

⁴ Wë nöö fa i si di soni o pasa aki, nöö a o kai ku di soni wan tjabukama u Gadu bi sikifi gaanduwe a fesi, a taa:

⁵ Un go taki da dee sëmbë u Jelusalen naandë,

leti a Sion dë seei, taa:

“Un luku di kõnu fuunu ta ko a unu a wan saapi fasi dë.

A dë sindosindo a wan buliki liba ta waka ta ko, a wan buliki mii seei.”

Sô wë di tjabukama bi taki fu di kõnu Gadu o manda ko, nöö awaa a ta pasa.

⁶ Nöö hën de tu bakama du leti kumafa Masa Jesosi manda de. Biga de nango te de go dou, hën de go si di buliki taitai ku ën mii nëen bandja.

⁷ Hën de lusu de hën de tei tja ko da Masa Jesosi. Nöö hën de jabi koosu a de baka, nöö hën Masa Jesosi subi ,a di mii wan liba, ta waka nango a Jelusalen.

⁸ Nöö di juu dë, hën dee hia sëmbë dee ta waka ku u naandë, hën de tei koosu jabi a di pasi liba, so sëmbë ta koti palo maun ta tuwë a di pasi u di buliki di Masa Jesosi dë nëen liba musu waka a de. Bigi nöö de ta bigi ën sô.

⁹ Nöö hën de ta waka nëen baka ta waka nëen fesi, te wan pisi hën de seti bai dëen taa:

Ke baa, u böö!

Di Gaan Kõnu fuu dou,

di Bakamii u Kõnu Dafiti di Gadu bi paamusi u.

Masa Gaangadu musu dë ku i e!

Fa i si a manda i ko aki,

në fii musu bai te dou a Gadu Kõndë ala!

Sô dee hia sëmbë ta bai ta wai ta mbei piizii dëen.

¹⁰ Nöö fa u mbei dë, nöö Masa Jesosi dou a Jelusalen kaa, nöö di juu dë kõndë ta booko seei, sëmbë ta mbei wajawajawajawaja. Sëmbë ta hakisi taa: “Maingë, ambë ko aki?”

¹¹ Hën de taa: “Ja jei ö? Jesosi u Nazalëti wë, di tjabukama u Gadu di ta dë a di pisiwata u Galilea, hën ko aki e, hën wë u ta wai ku ën sô.”

Aki Masa Jesosi jaka sëmbë puu

a di wosu fëen Tata.

Maik. 11:15-19; Luk. 19:45-48; Joh. 2:13-22

¹² Nöö fa Masa Jesosi ko dou a Jelusalen naandë, nöö hën a go wante a di Wosu u Gadu. Nöö di a go dou, hën a si wanlö hia sëmbë sai naandë ta sei soni da dee wakama ta ko dë. De ta sei dee mbeti ku dee pomba sô dee de ta kii da Gadu ta paka paima. So sëmbë sai dë ta tooka mõni. Nöö sô de buta di pisi kamian ko dë kuma wojowajo ta wooko mõni te a hia a dee sëmbë ta ko dë.

Nöö hën di Masa Jesosi si sô kaa, hën hati fëen boonu seei. Hën a jaka dee sëmbë puu dë, a kandi dee tafa u de tuwë djolou a goon, a tötö dee bangi u dee sëmbë ta sei pomba dë tuwë ku baka a goon.

13 Hën a gandji da de taa: “Wan bi jei fa Masa Gaangadu bi taki a di Buku ö? A taa di wosu fëen dë wan kamian ka sëmbë musu ta ko ta begi ën. Ma nöö unu tei ën buta ko tan kamian u fufuuma!”

14 Nöö a baka u di dë, hën dee bookowojoma ku dee lan sëmbë u di köndë ko nën naandë a di Wosu u Gadu, nöö hën a kula de te a kaba.

15 Nöö di juu dë, wanlö mii sai dë eti ta kanda ta bai taa: “Gaantangi u di Bakamii u Könu Dafiti di Masa Gadu manda da u aki ooo!”

Ma nöö di dee Gaan Begima ku dee Sabima u Wëti ko si dee foombo wooko Masa Jesosi ta du dë, ku di fa dee mii ta kanda ta bai dëen a di Wosu, nöö hati u de ko boonu.

16 Hën de taki dëen taa: “Fa dee mii ta bai ta kai olo dë, ja ta jei fa de ta taki ö? Ja o tapa de be de kabuka nö?”

Hën a piki de taa: “Awa, mi ta jei. Ma nöö wan bi lesi a di Buku u Gadu ö, taa Gadu ta buta dee piki mii u de gafëen, te dou ku dee mii a bobu tuu.”

Nöö hën di a taki sô,

17 hën a kumutu disa de dë, nöö hën a go a di köndë de kai Betania. Naandë a duumi di ndeti dë.

Aki Masa Jesosi fan ku wan pau.

Maik. 11:12-14, 20-26

18 Nöö di dobooko fëen, hën u ku Masa Jesosi kumutu a Betania fuu toona go a Jelusalen möön. Nöö di u dë a pasi nango, hën hangi ko kisi Masa Jesosi.

19 Nöö hën a si wan fuuta pau leti a bandja pasi dë de kai figa, hën a go suku njanjan nën faa musu njan. Ma nöö an feni. Uwii nöö di pau abi nën hedi. Nöö hën a fan ku di pau taa: “Fa i si ma feni njanjan a i aki, nöö ja musu pai a di goonliba aki möön e.” Nöö di a fan sô, hën wantewante dë hën di pau uwii lenguwa waaa fiaa.

20 Nöö di u dee bakama ko si di pau taa a dë, nöö soni fëen toobi u tumusi. Hën u hakisi Masa Jesosi taa: “Masa o, unfa a waka i fan ku di pau dë hën a dëe hesi sô?”

21 Nöö hën a piki u taa: “Dee sëmbë, un haika e. Ee i ta biibi Masa Gadu ku hii i hati, nöö unu seei sa du sô tu e. Nöö na di dë nöö, ma möön gaan soni seei un sa du. Biga ee hën i taki da di kuun aki taa: ‘Hopo kumutu fii aki go a di ze,’ nöö a o du leti kumafa i taki dëen.

22 Biga ee i abi biibi a Masa Gadu tjika, nöö hiniwan soni di i begi ën nöö i sa feni ën nën.”

Aki Masa Jesosi tai dee Dju hedima ku fan.

Maik. 11:27-33; Luk. 20:1-8

23 Nöö hën u toona go a di Wosu u Masa Gadu möön, nöö hën Masa Jesosi seti ta lei sëmbë. Te wan pisi hën dee Gaan Womi ku dee Gaan Begima ko nën möön.

Hën de hakisi ën taa: “Ambë da i taki fii du dee soni i ta du aki?”

24 Hën a piki de taa: “Wë fa un hakisi di soni dë, nöö miseei o hakisi unu wan soni tu. Nöö te un piki mi, nöö miseei o piki unu unsë mi feni di taki.”

25 Hën a hakisi de taa: “Di dopu Johanisi bi ta dopu sëmbë, ambë bi butëen a ta du di lö wooko dë, Masa Gadu naa libisëmbë?”

Wë nöö fa a hakisi de naandë, hën de go a së go pakisei di soni go, de pakisei di soni ko, te de wei, hën de taa: “Wë unfa woo taki di soni aki? Biga ee u piki

taa Masa Gaangadu hën mandëen, nõo a o hakisi u ee faandi mbei wa bi piki ën buka? Wë nõo woo peka.

²⁶ Ma nõo ee u taki taa libisëmbë hën mandëen nõo u musu fëëë, biga hii dee sëmbë u di kõndë aki tuu tei Johanisi fu wan gaan tjabukama di Gadu seei manda ko. Mõön bëtë fëen nõo un boo piki ën taa wa sabi.”

²⁷ Nõo hën de go a Masa Jesosi hën de piki ën taa: “Wë di soni i hakisi u dë, nõo wa feni u piki i e.”

Hën a taki da de taa: “Wë di wan feni, nõo miseei tu, më sa konda da unu ambë da mi di taki u mi ta du dee soni mi ta du aki e.”

Aki Masa Jesosi da wan oto

fu tu baaa.

²⁸ Hën a toona fan ku de mõön taa: “Un haika, mi o taki wan woto da unu aki, nõo un pakisei ën bunu e.

“Wan tata bi abi tu womi mii fëen. Nõo hën a go a di mõön gaan wan hën a taki dëen taa: ‘Womi o, baa, wë mi kë fii go a u goon tide go wooko e.’

²⁹ “Nõo hën a taa: ‘Ambë? Mi ö?’ A taki aai. A taa: ‘Nõnõ, ma o go e.’

“Ma nõo hën a sai dë te wan pisi, di soni ko hati ën fu di a bi piki hën tata gaan buka sò, nõo hën a hopo go a di goon dendu go wooko.

³⁰ “Ma nõo söseei di tata bi go a di oto womi mii fëen tu, hën a taki dëen taa: ‘Womi, mi kë fii go a u goon dendu go wooko tide e baa.’

“Nõo hën a piki ën taa: ‘Söö. Wë antoobi Taata, mi o go e.’ Wë ma nõo hën an go mõönsö.”

³¹ Nõo hën Masa Jesosi taa: “Wë nõo mi hakisi unu, de tu mii u di tata, di a fan ku de undi u de piki ën buka?”

Nõo hën de piki taa: “Wë di gaan wan, hën du kumafa di tata bi kë.”

Nõo hën Masa Jesosi taki da de taa: “Awa, sò a dë tuu. Nõo un haika e. Dee fufuuma u di kõndë aki, ku dee jajo mujëë dee un ta mbei fa, nõo dee lõ sëmbë dë sa ko a di Njunjun Tii u Gadu dendu mõön hesi mõön unu e. Biga de sabi kaa taa de an ta libi bunu. Ma nõo unu, un ta mbei kuma un ta piki Gadu buka, un dë bambuu sëmbë kaa, nõo hën mbei a taanga da unu fuun saka unu seei a di tii u Gadu basu.

³² “Biga di Johanisi ko, nõo a bi ta lei unu unfu fuun libi ufö un sa ko bunu ku Gadu, ma nõo wan bi kë piki. Nõo hën dee sëmbë dee bi a’ poi në a di kõndë, nõo de bia piki Johanisi hesihesi. Ma nõo unu, hii fa un si taa sò de ta piki, ma tõkuseei wan bia piki ën buka mõönsö. Un mbei taangajesi go dou te kisi fa u dë aki eti.”

Aki Masa Jesosi da wan oto fu wanlõ hogihati wookoma.

Maik. 12:1-12; Luk. 20:9-19

³³ Nõo hën a tei wan woto konda da de mõön, a taa: “Wan guduma bi dë e. Nõo hën a koti wan gaan goon hën a paandi di fuuta de kai doloifi nëen te a kaba faa musu ta mbei win. Hën a mbei wan peni te a kaba lomboto di goon. Nõo hën a diki wan baaku te a kaba mbei baki nëen, fu te di doloifi lepi nõo a di baki dë dendu de o ta makisëen ta mbei di win. Nõo hën a mbei wan hei wosu buta a di peni dendu u dee wakitima musu ta watji fufuuma.

“Nõo di a mbei hii dee soni tefa a kaba, hën a kai wanlõ sëmbë ko nëen. Nõo hën a mbei buka ku de tefa a kaba taa de o ta wooko a di goon, nõo te juu kisi di fuuta lepi, nõo de o ta mbei win nõo hën ku de o ta paati ën.

“Nõo di di goon masa mbei di buka ku dee sëmbë te a kaba, hën a mbei wan lëisi go tee a wan oto kõndë.

34 “Nöö hën a go dë ala teee juu dou di fuuta lepi. Nöö hën wë a kai wanlô futuboi fëen manda go a di goon, fu de go tei di win fëen a dee sëmbë tja ko dëen.

35 “Nöö hën wë de nango tefa de go dou. Ma nöö di dee sëmbë dee ta wooko a di goon si taa de ta ko, hën de buta ku de. Wan u de de fon tee a fika a dëdë ku libi maun. Di otowan hën de fon kii. Di otowan hën de naki ën ku sitonu kii.

36 “Nöö hën a baka u di dë, hën di goon masa toona manda oto sëmbë u de go möön go suku di win tja ko dëen. Nöö hën de nango tefa de go dou. Hën dee sëmbë dee dë a di goon du ku de leti kumafa i si de bi du ku dee fosuwan.

37 “Nöö a baka u di dë, nöö hën di goon masa taa: ‘Söö. Wë mi o manda di womi mii u mi seei go awaa. A kandë te dee sëmbë si ën, nöö de o abi lesipeki fëen, di a dë mi mii.’

“Nöö hën a manda di womi mii fëen go gbolo.

38 Ma di dee sëmbë dee dë a di goon si taa hën ta ko dë, nöö hën de taa: ‘Söö. Wë di sëmbë a’ di goon, luku di womi mii fëen ta ko dë e.’

“Nöö hën de kuutu ku deseei taa: ‘Te di masa dëdë nöö di mii i si naandë, hën o ko tei di goon aki puu a u maun. Nöö un sabi nō? Un boo kii ën puu aki wante, nöö di goon o fika da u wanwan.’

39 “Nöö hën wë di womi mii ko dou. Nöö hën dee sëmbë kisi ën tja go a döösë u di djai, hën de kii ën gbedede puu dë.”

Sö wan woto Masa Jesosi konda da de te a kaba.

40 Hën a taa: “Wë nöö fa dee soni pasa dë, nöö te di goon masa ko, andi un mëni taa a o du ku dee sëmbë naandë?”

41 Hën de taa: “Höön, wë di soni naandë dë u taki ô? A o sitaafu de ku wan gaan hogi sitaafu di fiti de nöö a o kii de. Nöö a o da oto sëmbë di goon di a sabi taa a sa feni wini fu di goon fëen a de.”

42 Nöö hën Masa Jesosi hakisi de, a taa: “Wan sabi fa de taki a di Buku u Gadu nō? De taa:

Dee sëmbë ta mbei sitonu wosu,
de si wan sitonu taa an bunu,
nöö hën de tuwëen a kapëë.

Ma nöö bakaten,

hën di sitonu dë ko di mama posu u di wosu.

Masa Gadu seei wë du di soni sô,

nöö a dë wan gaan foondo soni da u.

Sö wë di Buku taki.

43 “Nöö mi taki da unu taa Masa Gadu an o biinga ku unu möön e, faa buta unu a di Tii fëen basu möön. Nönö. A o disa unu, nöö a o tei wanlô oto sëmbë buta a di Tii fëen di a o sa feni wini a de.

44 “Biga di soni Gadu buta taa a bunu, nöö hën un feni taa an bunu kwetikweti, leti kuma di sitonu de bi tuwë dë.” Nöö un sabi fa di sitonu naandë dë nō? Ee un kai nëen liba nöö woon booko pisipisi, ma ee di sitonu hën kai a unu liba nöö lala a o lala unu finufinu kaba a sösö fiaa.”

45 Wë nöö fa Masa Jesosi fan dë, nöö dee Gaan Begima ku dee Faliseima jei, nöö de sabi taa de wë a tjökö ku di fan a fan dë, nöö hati u de boonu teee.

46 Nöö de kë kisi ën tja go buta a dunguwosu, ma fu di de fëëë lanti hën mbei de an du sô. Biga hii sëmbë ta tei Masa Jesosi u wan gaan tjabukama u Gadu seei.

fu wan tööu wosu.

Luk. 14:15-24

¹⁻² Nöo hën Masa Jesosi toona tei wan woto möön konda faa lei u fa di Njunjun Tii u Gadu dë.

A taa: “Wan könu abi wan womi mii fëen o tööu, nöo hën a kai sëmbë a fesi fu te di daka dou nöo de ko a di tööuwosu. Nöo hën a seeka soni te a kaba këë.

³ Nöo hën a manda dee futuboi fëen fu de go piki dee sëmbë dee a bi kai dë taa wë aan soni, di daka hën a dou. Be de ko a di tööuwosu ko njan di gaan piizii.

“Nöo hën dee futuboi go, hën de da di buka te de kaba. Ma nöo dee sëmbë a bi kai dë, de an kë ko. De an dë a di soni dë seei.

⁴ “Nöo hën di könu manda wanlö oto futuboi fëen möön taa be de toona go taki da de taa a seeka hii soni tuu kaa. Dee gaan kau, ku dee kau mii dee a bi kiija buta naandë fu de fatu tjika u de njan di daka, nöo a kii de tuu kaa seeka boi. Nöo be de ko a di piizii. Sö a manda taki da de.

⁵ “Ma nöo fa dee futuboi go da di buka te de kaba naandë, hën dee sëmbë tjëkë ahwa maun da de taa de an dë a di soni dë. Hën wan u de hopo go fëen nëen goon dendu, di otowan go fëen a möni wooko.

⁶ Nöo dee sëmbë dee fika, hën de hopo, hën de kisi dee futuboi u di könu hën de du hogihogi ku de te a tjika de, hën de kii de puu dë gbelin.

⁷ “Nöo hën di könu jei taa sö wan soni, nöo hën hati fëen ko boonu seei tee na soni. Hën a kai wanlö sodati fëen, hën a manda de go kii dee sëmbë dee bi kii dee futuboi fëen, hën de booko di köndë, de suti faja nëen tjuma gbegedee.

⁸ “Nöo hën wë di könu toona kai wanlö oto futuboi u de ko nëen, hën a taa: ‘Wë un luku. Dee soni u seeka buta dë fuu njan di piizii, nöo u kaba u seeka de gaanduwe kaa e, ma dee sëmbë dee mi kai u de ko nöo de hogi poi. An fiti u de ko njan di piizii aki möön.

⁹ “‘Wë nöo un sabi nö? Un go a di köndë nöo un paaja waka a hii dee sitaati tuu, gaan wan ku piki wan. Nöo hiniwan sëmbë di un si, nöo un kai ën taa be a ko a di tööuwosu aki ko njan.’

¹⁰ “Nöo hën de paaja hii di köndë. Nöo hën de kai hii sëmbë dee de si kaa, bunuwan ku hogiwan tuu, hën de tja de ko a di piizii te di wosu fuu pöö ku sëmbë.

¹¹ “Ma nöo di tööu bi abi wan wëti taa di könu seei o buta di koosu fii bisi ko a di tööuwosu. Nöo hën de dë a di piizii dendu te wan pisi nöo hën könu ko u ko da de wodi. Nöo fa a ta da de wodi ta lontu dë, te wan pisi hën wojo fëen ko kai a wan sëmbë ko naandë. A dë fëen ku fëen seei koosu nëen sinkii gbolo. An bisi di koosu könu bi dëen möönsö.

¹² “Hën könu luku ën diin, a kai ën: ‘Womi.’

“A piki.

“A taa: ‘Unfa a waka i ko aki söndö i bisi di koosu di mi da i fii musu bisi?’

“Hën di womi dë pii. An sa piki na wan soni.

¹³ “Nöo hën di könu manda dee futuboi fëen taa: ‘Un kisi di sëmbë dë tai ën maun ku ën futu te un kaba, nöo un vindëen go a döo a dungudungu ala, ka sëmbë dë a sitaafu ta bai ta këë ta djëmë nöömö.’”

¹⁴ Sö wan oto Masa Jesosi taki da de naandë e. Hën a taa: “Nöo sö wë a dë e, dee sëmbë. Masa Gadu kai hia sëmbë u de ko, ma nöo biti sëmbë nöo ta ko nëen a di fasi di a buta faa tei de.”

Aki Masa Jesosi ta taki soni

u lanti möni.

Maik. 12:13-17; Luk. 20:20-26

15 Nöo fa Masa Jesosi fan te a kaba dë, hën dee Faliseima go a së go kuutu ku de na de unfa u de du de feni ën kisi tai ku dee fan a ta fan.

16 Nöo hën de feni wan soni fu de hakisi.

Nöo hën de kai dee bakama u de, ku wanlō sëmbë u Könu Helodi paatëi, hën de manda de go a Masa Jesosi go hakisi ën di soni de pakisei dë.

Nöo hën de naki te de go dou. Hën de kai ën: “Mësitë o.”

Hën a piki.

De taa: “Wë u ko a i aki.”

A taki aai.

“Wë u sabi taa fa i dë aki, nöo i dë gaan bumbuu sëmbë. Biga i ta konda dee soni u Gadu gbelingbelin da u leti kumafa de dë. Ja a’ toobi ku di fa sëmbë ta pakisei fii, hën mbei ja ta kwei di fan da u. Wë nöo hën i si u ko a i aki ko hakisi i wan soni, nöo di fa a dë nöo i piki u.

17 “Fa di Gaan Könu a Loomë ta duwengi u fuu ta paka lanti möni aki, wë nöo unfa i si ën? A fiti fuu pakëen naa an fiti?” Sö de hakisi ën.

18 Ma nöo Masa Jesosi sabi kaa taa politik wë de ta naki ën sö, hën a piki de taa: “Un dee bödjëema aki, andi mbei un ta suku mi fuun tai ku fan sö?”

19 Wë un da mi wan kwëngëlë möni i si.”

Nöo hën de tei wan kwëngëlë möni tja ko dëen.

20 Nöo hën a hakisi de taa: “Wë ambë abi di në ku di fesi dë a di möni liba aki?”

21 Hën de piki taa: “Di Gaan Könu.”

Hën a taa: “Nasö nö?”

De taki aai.

Hën a taki da de taa: “Wë nöo di soni di dë u könu nöo un da könu ën e, nöo di soni di dë u Masa Gaangadu nöo un da Masa Gaangadu ën.”

22 Nöo fa a piki de dë, nöo a bigi da de seei. De an bi mëni taa sö a bi o piki de a sö wan köni fasi te de an sa feni soni u taki möön. Nöo hën de kumutu disëen dë, hën de go u de.

Aki dee Saduseima ko hakisi Masa Jesosi soni u di dëdë weki baka.

Maik. 12:18-27; Luk. 20:27-40

23 Nöo hën di daka dë seei, hën wanlō sëmbë u di keiki paatëi de kai Sadusei ko a Masa Jesosi. Wë dee lö pei sëmbë naandë, de an kë biibi taa te sëmbë dëdë nöo di akaa fëen ta fika ku libi faa toona ko a di sëmbë sinkii a bakaten, be a weki baka.

Nöo fa de ko nëen dë, hën de hakisi ën taa:

24 “Mësitë o, de taa te sëmbë dëdë nöo a o toona weki baka. Wë nöo u ko hakisi i wan soni fëen fii piki u.

“Wë Mosesi bi da u wan wëti. A taa ee wan womi ku ën mujëe libi te nöo hën di womi dëdë söndö a pali ku ën, nöo di baaa fëen musu hoi ën suwagi, be a pali mihi ku ën fu di baaa fëen böngö an musu kaba. Na sö nö?”

25 “Söö. Wë nöo de bi dë sëbën baaa womi a u mindi aki. Nöo hën di gaan wan u de tei wan mujëe. Hën de dë te wan pisi hën dëdë kii di womi gbolo, hën ku di mujëe an pai möönsö. Nöo hën di oto baaa hoi di mujëe.

26 Te di womi dë seei dëdë, an pali ku ën möönsö. Hën di u mbei dii hoi di mujëe. Tefa a dëdë an pai ku ën möönsö. Nöo sö hii dee sëbën baaa womi tuu libi ku di mujëe, ma na wan u de pali mihi ku ën möönsö.

27 Nöo a baka u di dë, hën di mujëe seei ko dëdë tu.

28 “Wë nöo di soni u kë hakisi i, hën da ee sëmbë dëdë de ta weki baka, nöo unfa di soni o pasa te de tuu weki baka? Undi u dee sëbën baaa o abi di mujëe? Biga de tuu bi libi ku ën.”

²⁹ Nöo hën Masa Jesosi piki de taa: “Wë un ta tei di taki a wan föutu fasi poi e, fu di wan saandi Gadu Buku taki, nöo wan sabi un kaakiti Gadu abi tu.

³⁰ Biga tee sëmbë dëdë weki nöo manu ku mujëë soni an o dë möön e, ma hii sëmbë tuu o dë kuma dee basia u Masa Gaangadu köndë.

³¹ “Ma nöo fuu taki a di fa sëmbë ta dëdë weki baka dë, nöo wan ta lesi a di Buku u Gadu fa Gadu bi fan ku Mosesi a di faja dendu ö?

³² A taa: ‘Mi da di Gadu di dee gaan sëmbë fii ta begi, de Abahamu ku Isaki ku Jakopu.’

“Wë wan jei ö? An taa, ‘Mi da di Gadu di de bi ta begi,’ ma a taa ‘Mi da di Gadu de ta begi.’ Wë nöo Masa Gaangadu an dë di Gadu u dëdëdëdë sëmbë e, ma a dë di Gadu u libilibi sëmbë. Wë nöo hën da Abahamu ku Isaki ku Jakopu, di akaa u de dë ku libi a wan kamian eti, nasö nö? Nöo faandi mbei wan kë piki taa tee sëmbë dëdë nöo de dë ku libi eti?”

³³ Wë nöo di dee hia sëmbë sai dë jei fa Masa Jesosi piki dee Saduseima, nöo a bigi da de te na soni.

Aki Masa Jesosi ta lei undi u dee wëti u Gadu da di möön hebi wan.

Maik. 12:28-34; Luk. 10:25-28

³⁴ Nöo di dee Faliseima ko jei taa sö Masa Jesosi wini dee Saduseima a fan, nöo hën de toona hai ko makandi möön ko ta suku soni möön u de go kisi ën.

³⁵ Te de kaba nöo hën de go nëën.

Nöo de bi abi wan fiafia lei wan a de dendu di sabi Dju wëti finifini, nöo hën o fan di fan.

³⁶ Nöo hën a kai ën taa: “Mësitë.”

A piki.

A taa: “Wë nöo fa Mosesi sikifi dee wëti u Gadu buta a di Buku, nöo undi u de da di möön hebi wan u de tuu?”

³⁷ Hën a piki de taa: “Di möön hebi wan ö? Hën da i musu lobi Gadu i Masa te dou ku hii i hati ku hii i akaa ku hii di pakisei fii di i abi.

³⁸ Hën da di möön hebi wan u hii dee wëti tuu.

³⁹ Ma nöo wan otowan dë leti nëën baka, hën da i musu lobi di otowan fii leti kumafa i lobi i seei.

⁴⁰ De tu wëti dë, de dë a fesi u hii dee otowan tuu. Biga hii dee wëti Mosesi ku dee tjabukama bi kisi a Gadu tuu, de tuu ta hëngi a de tu wëti naandë e.”

Sö Masa Jesosi piki de.

Aki Masa Jesosi tai dee Faliseima ku wan hakisi.

Maik. 12:35-37; Luk. 20:41-44

⁴¹ Wë nöo di dee Faliseima dë a Masa Jesosi dë kaa, nöo hën a bia hakisi de wan soni awaa.

⁴² A taa: “Wë miseei o hakisi unu wan soni. Unfa un ta mëni u di Könu de kai Keesitu, di Gadu bi paamusi taa a o manda ko? Ambë bakamii a musu dë?”

Hën de taa: “Wë a musu dë wan bakamii u Könu Dafiti.”

⁴³ Hën a taa: “Na sö nö? Wë nöo unfa a waka Dafiti seei kai ën ‘Masa’, ee bakamii feën nöo a o dë? Biga i sabi fa di Buku taki. Di Akaa u Gadu ko a Dafiti liba nöo hën a taki wan soni u di Paamusi Könu taa:

⁴⁴ Masa Gadu taki da mi Masa taa:

‘Ko sindo a mi letimaun së aki

ta luku te mi buta dee felantima fii a i basufutu.’

Na sö Dafiti bi taki ö?

⁴⁵ “Wë nöo andi Dafiti kë taki ku di soni dë? Biga ee di Paamusi Könu o dë hën bakamii nöo, unfa a o sa dë hën Masa möön?” Hën di soni dë Masa Jesosi hakisi dee Faliseima.

46 Ma nöö fa a hakisi de di soni dë, na wan u de saanfa u piki ën möönsö. Nöö hën mbei fu kumutu a di ten naandë, nöö na wan sëmbë abi hati u go hakisi Masa Jesosi soni u de sa kisi ën möön.

23

Aki Masa Jesosi bai helu da dee hedima u keiki ku dee Faliseima.

Maik. 12:38-40; Luk. 11:37-52, 20:45-47

1 Nöö a baka u di dë, hën Masa Jesosi fan ku u dee bakama fëen ku dee hia sëmbë dee sai dë tuu. A taa:

2 “Un haika e, dee sëmbë. Wan si fa dee Sabima u Wëti ku dee Faliseima ta libi ö? De buta deseei a di kamian di Mosesi bi abi ta lei sëmbë dee wëti u Gadu.

3 Nöö fa un jei de ta fan dë, nöö un musu piki de tuu. Ma nöö wan musu suku u djeesi de a di fa de ta libi e. Nönö, biga de an ta libi kumafa dee wëti ta taki.

4 Nöö de ta lai wëti tee a hia da unu fuun musu ta tjai, ma de seei an ta tja wan pikiwan fëen seei.

5 “Nöö fa dee lö sëmbë dë sai dë, nöö hiniwan soni di de o du kaa nöö de ta du ën fu sëmbë wojo musu si de taa de dë bumbuu sëmbë. Biga Gadu bi taki taa i musu sikifi dee wëti fëen buta a i mindifesi ku i maun fu ja musu fëekëtë de. Ma nöö dee lö sëmbë dë, de ta mbei gaan gindi dosu te de kaba ta sikifi Gadu wëti te a hia lai nëen ta tai buta a de mindi fesi ku de maun te de kaba fu sëmbë musu si de taa aai, sò de ta biibi Gadu tjika.

“Söseei Masa Gaangadu bi taki taa te de o nai di koosu u de, nöö de musu nai ën ku jëkëjêkë a buka. Ma nöö de ta nai gaan langalanga jëkëjêkë te pasa maaka fu hii sëmbë musu si taa sò de ta biibi Gadu hebi tjika. Ma an dë sò a de hati. Un si ö?

6 “Nöö fa i si de sai dë, ee de o go a wan piizii ee nasö de go a keiki, nöö de lobi u sindo a dee möön hei kamian fu hii sëmbë wojo musu ta kai a de.

7 Nöö te de o go a wojowojo ee nasö a wan oto kamian a lanti dendu, nöö de lobi u sëmbë musu ta da de wodi a lanti dendu dë ta kai de ‘Munëli, Munëli.’ A ta suti da de seei.

8 “Wë ma nöö mi taki da unu taa na sò un musu libi e, dee sëmbë. Biga un tuu dë baaa ku baaa makandi.

9-10 Nöö wan musu buta unu seei hei möön sëmbë fu de ta ko ta kai unu ‘Munëli’ ee nasö ‘Taata,’ ee nasö ‘Masa.’ Di fa dë an bunu e! Biga wan kodo Masa nöö un abi, ku wan kodo Tata, hën da Masa Gaangadu di dë a liba. Nöö wan kodo Mësitë nöö un abi hën da di kõnu di Gadu bi paamusi taa a o manda ko. Nöö wan musu tei libisëmbë buta a dee lö kamian dë e, nöö wan musu hopo unu seei buta a dee lö kamian dë tu. Nönö.

11 “Ma nöö ee wan fuunu kë dë fesima, nöö i musu saka i seei ko dë kuma futuboi u dee otowan fii.

12 Biga ee wan sëmbë i ta suku u hopo i seei, nöö Gadu o booko i saka. Ma ee i saka i seei, nöö Gadu o buta i möön hei.”

13 Nöö hën Masa Jesosi gandji da dee hedima u Dju awaa, a taa: “Mi bai helu da unu e, un dee Sabima u Wëti ku un dee Faliseima aki, un bödjëema unu! Fa un sai naandë, wan ta ko a di Njunjun Tii u Gadu dendu möönsö, nöö dee sëmbë dee dë fa u ko nëen nöö un ta tapa di pasi da de tu. Un ta tapa di döö seei a de fesi u de an musu denda ko a dendu.

[
14 “Nöö mi toona bai helu da unu möön e, un dee Sabima u Wëti ku un dee Faliseima naandë, un bödjëema unu! Biga te un si wan mujëe manu fëen dëdë

a fika a ganda, nöö un ta tei dee gudu fëen ku hii dee soni dee dë nëen wosu tuu ko fuunu. Nöö naandë seei un ta dë ta begi gaan langa begi, ta mbei taa un dë bumbuu sëmbë poi. Fa un ta du dë, nöö mi taki da unu taa woon kisi wan gaan sitaafu fëen a Gadu e.]

15 “Nöö mi bai helu da unu möön e, un dee Sabima u Wëti ku dee Faliseima aki, un bödjëema unu! Biga fa i si un sai dë, nöö un ta waka hii di mundu fuun feni ee wan kodo sëmbë seei hai tja ko a unu së. Nöö te un wini ën kaa, nöö un ta butëen ko tu toon didibi möön leki fa un sai dë.

16 “Nöö mi bai helu da unu möön e, un dee bookowojoma dë. Biga fa un sai dë, un ta suku u ta lei otowan pasi ma unu seei wan ta si di pasi möönsö.

“Biga un taa ee wan sëmbë i tei di Wosu u Masa Gadu soi, nöö di soi dë aan kaakiti. Ee i poi ën seei nöö an o kisi i. Ma ee i tei di goutu di dë a di Wosu soi, nöö hën a’ kaakiti tjika fu di soi kisi i. Sö di lei fuunu di un abi, sö a dë.

17 Wë un dee bookowojoma dë, unfa un du don sö? Biga di goutu ku di Wosu u Masa Gadu, undi u de möön hebi? Na di Wosu nö? Nöö fu di di goutu dë a di Wosu dë, hën mbei a ko dë wan hebi soni, na sö nö?

18 “Söseei tu, un ta lei sëmbë taa ee de tei di begitafa soi, nöö di soi aan kaakiti tjika. Ma ee i tei di soni de tja ko buta a di tafa dë soi, nöö hën abi kaakiti, di soi o kisi i ee i booko ën. Na sö un ta taki ö?

19 Wë nöö un wisiwasi di dë? Biga di soni de tja ko buta a di tafa, nöö nëen hebi e. Ma di begitafa hën hebi, nöö te i tja di soni ko buta a di tafa liba ufö a o ko wan hebi soni.

20 Nöö mi taki da unu taa, ee i tei di begitafa dë soi, nöö hën da i soi ku ën ku hii dee soni dee dë nëen liba tuu.

21 “Nöö söseei tu, ee i tei di Wosu u Masa Gaangadu soi nöö hën da i ta soi ku ën ku hii dee soni dee nama ku ën tuu, te dou ku Masa Gaangadu seei tu di ta dë a di Wosu.

22 Nöö te i tei liba ala soi, nöö hën da i tei di könubangi u Masa Gaangadu a liba ala ku Masa Gadu seei di dë sindosindo nëen. Sö di soi fuunu hebi tjika.

23 “Nöö mi bai helu da unu möön e, un dee Sabima u Wëti, ku un dee Faliseima, un bödjëema unu! Biga hii dee soni un ta paandi fuun njan te dou ku dee pikipiki sii tuu, nöö de tuu un ta paati a teni pisi finifini nöö i ta da Gadu fëen pisi. Sö un ta mbei taa un ta hoi Gadu wëti fini tjika. Ma nöö dee gaan wëti u Gadu kuma fii wegi soni luku a wan leti fasi, ee nasö fii abi tjalihati da otowan, ee nasö fii libi a wan leti fasi fu sëmbë sa futoou i, dee di dë wan ta kai de gaan soni möönsö. Nöö an bunu e! Biga ee i lobi u hoi wëti sö, nöö dee wëti dë tuu i bi musu hoi makandi söndö i disa hafu u de.

24 “Nöö mi bai helu da unu möön, un dee bookowojoma ta lei otowan pasi naandë. Biga un dë leti kuma wan sëmbë ee wan kipi sundju kai a di wata fëen di a ta bebe, nöö a o hopo wante go maani ën puu te a kaba bifö a o bebëen. Ma ee wan gaan gindi mbeti dë a di wata nöö an o si ën möönsö. A o bebe di wata wiö. Nöö sö wan sabi u wegi soni tjika.

25 “Nöö mi bai helu da unu möön, un dee Sabima u Wëti ku un dee Faliseima, un bödjëema unu! Biga un ta wasi paabi fuunu ee nasö kan fuunu finifini a wëti fasi, ufö de sa limbo da unu tjika. Ma hii fu di dë, hati dendu fuunu an dë limbolimbo. A lai ku söso giii ku langahati ku takufasi.

26 Un dee bookowojoma Faliseima aki, un haika e! Un mbei hati fuunu ko dë limbolimbo, nöö hii dee döösë soni fuunu o dë limbolimbo tu.

27 “Nöö mi bai helu da unu möön e, un dee Sabima u Wëti ku un dee Faliseima aki, un bödjëema unu! Fa un sai dë, un dë leti kuma dee geebi de ta seeka feifi a döösë tee de ko dë wetiweti faan limbolimbo. Ma dendu u de lai ku dëdë sëmbë pondipondi fika bonu.

²⁸ Sö un dë e, fa i si un sai dë. Biga un ta mbei unu seei kuma gaan bumbuu sëmbë, ma hati dendu fuunu lai ku sösö ganjan ku bödjëë fasi ku hii pei hogi.

²⁹ “Nöo mi bai helu da unu möön e, un dee Sabima u Wëti ku un dee Faliseima, un bödjëëma unu! Fa un sai naandë, un ta seeka dee geebi u dee fesiten tjabukama u Gadu, ku dee u dee oto sëmbë dee bi libi bunu a Masa Gaangadu wojo. Un ta bisi de te de hanso möön hii soni.

³⁰ Sö un ta du e, nöo hën wë un sai dë ta taki taa ee unu bi dë a di ten u de ala, nöo wan bi o kii de kumafa dee gaan sëmbë fuunu bi kii de.

³¹ “Ma nöo hii fa un taki dë seei, ma ee sëmbë wegi di fa un ta libi te de kaba, nöo de musu si taa un dë lalalala bakamii u dee gaan sëmbë fuunu dee bi kii dee tjabukama dë. Un djei de tumisi ku di hogilibi fuunu.

³² Nöo mi taki e, taa be un libi di hogilibi fuunu go dou nöo e, te nöo a o kisi di maaka di dee gaan sëmbë fuunu bi buta da unu.

³³ “Nöo fa un hai ko zunta gidjii kuma sindeki lolulolu na akata dë, nöo un sabi taa un sa lusu kule go te de an o kisi unu tuwë a di didibi faja nö?

³⁴ Wë nönö e! Un haika, mi o toona manda wanlö oto tjabukama ko a unu möön, ku fusutan sëmbë. Bumbuu leima seei mi o manda da unu leti kumafa Masa Gadu bi manda ko da dee gaan sëmbë fuunu a fesiten. Nöo hafu u de woon peka a lakpa pau kii, hafu u de woon kii a oto fasi, hafu u de woon fon a dee keikiwosu fuunu, hafu u de woon ta buta ku de ta jaka ta puu a köndëköndë kuma dagu. Sö woon du ku de tjika.

³⁵ “Nöo hën mbei mi taki da unu taa hii dee bumbuu sëmbë u Gadu dee de bi kii a goonliba aki tuu kaa, de tuu o fika a unu liba e, kumutu na Abeli te dou a Sakaliasi di mii u Belekia di de bi kii a di Wosu u Masa Gadu ganda mindi.

³⁶ Hii di hebi u de tuu o kai a un dee hogi sëmbë ta libi a di ten aki liba e.” Sö Masa Jesosi fan ku dee hedima u Dju naandë.

Aki Masa Jesosi ta këë

da Jelusalen.

Lk. 13:34-35

³⁷ Nöo di a fan sö te a kaba, nöo hën wan gaan tjali kisi ën u di köndë. Hën a taa: “Ee aai, Jelusalen, Jelusalen, a i ganda mindi aki de vinde sitonu naki dee sëmbë kii, dee Gadu bi manda. Hii dee tjabukama tuu de kii a i aki. A tjali e. Sömëni pasi mi bi hangi fu mi kai dee sëmbë fii ko a mi, kumafa wan ganian mama ta kai hën miii fu de ko nëen hanza basu faa tjubi de. Ma nöo de an bi kë ko möönsö.

³⁸ Da a ko dë taa wë heepi an dë. Nöo mi o disa unu be un libi kumafa un kë e, be di kamian fuunu aki booko kaba a sösö.

“Biga mi disa unu fuun bai sabi sö.

³⁹ Nöo mi taki e, te di daka dou u mi toona ko möön, nöo woon dë kabakaba fuun tei mi awaa. Nöo woon toona bai kumafa un bi bai dë kaa taa: ‘Gaantangi u Gadu u di sëmbë a manda da u aki. Gadu musu dë ku ën.’ ”

Sö Masa Jesosi fan te a kaba di ten dë.

24

Aki ta lei dee maaka u te

di ten u dë aki o kaba.

Maik. 13:1-31; Luk. 21:5-33

1 Nöo hën di a ta kumutu a di Wosu u Masa Gadu a Jelusalen dë faa go, nöo hën u dee bakama fëen ko nëen ko hakisi ën taa: “Masa o, ja si fa dee wosu fu di keikipisi aki waiti nö?”

2 Nöo hën a taa: “Awa, ma fa i si de hanso seei, ma wan daka ta ko di na wan u dee gaan sitonu i si aki o fika oto a oto liba möön e. De tuu de o booko tuwë a goon paaja fanjanfanjan.”

3 Nöo hën a kumutu dë, hën a go a di kuun de kai Oleifi Kuun go sindo. Nöo hën u ko nëen naandë u wanwan hën u hakisi ën taa: “Masa, wë di soni i taki dë, na un juu ten a o ko pasa? Nöo un maaka joo lei u tu, fuu sa sabi di juu di joo toona ko baka ku di juu di ten u dë aki o kaba?”

4 Nöo hën Masa Jesosi piki u taa: “Söö. Wë a bunu fuun sabi ën tuu e, fu sëmbe an sa ganjan unu.

5 Biga di juu dë, nöo sëmëni sëmbe o hopo ta tei mi në taa de da di Paamusi Könu, nöo a di fasi dë de o ta kisi sëmëni sëmbe ta ganjan.

6 “Nöo un haika e. Te di juu ta kisi, nöo woon ta jei taa: ‘Feti dë aki,’ te wan pisi, ‘Feti dë ala.’ Nöo wan musu panta e, biga dee lö soni dë musu ko pasa ufö. Ma nëen da di kaba eti e.

7 Di juu dë, nöo wan köndë o hopo go feti ku di oto köndë, wan könu o hopo go feti ku wan oto könu, gaan hangì o ko, goonliba o ta seki, kamian o ta bai ta latja.

8 Nöo di dë hën da di seti nöo fu di gaan fuka ten di dë u ko. A o dë leti kuma te bëe seti njan wan mujëe faa pai. Sö dee fuka dë o ta lei taa di juu zuntu fu di ten u dë aki musu kaba.

9 “Nöo di juu dë, de o seti du ku un dee sëmbe u mi tu. De o buta unu a sëmbe maun u de sitaafu kii. Hii sëmbe o ta buuse unu fu di un nama ku mi hedi.

10 Hën wë mbei hia sëmbe o bia baka, de an o a’ biibi a mi liba möön. Nöo di juu ten dë, di libi o hogi tee. Sëmbe o ta tja de na de go sei, de o ta buuse deseeti te na soni.

11 Nöo sëmëni sëmbe o hopo ta konda taa de da tjabukama u Gadu, nöo de o ta ganjan hia sëmbe ta kisi ta hai tja ko a de së.

12 “Nöo fa dee sëmbe u di ten dë o libi hogi ku deseeti tjika dë, nöo gaan së u de an o lobi de na de möön e.

13 Ma nöo dee sëmbe dee o tai hati ta biibi a Gadu tee dou di kaba pisi, nöo de o feni di libi u teego.

14 Ma nöo di bunu buka u di Njunjun Tii u Gadu musu paaja te dou hii goonliba e, be hii föluku musu jei. Nöo baka u di dë ufö di ten u dë aki o kaba.

15 “Nöo te wan pisi, nöo woon si di gaan hogi di di tjabukama u Gadu de kai Daniëli bi taki e. Di hogi dë, Masa Gaangadu an sa si ën a wojo seei, kwetikweti, biga hën ta biinga u poi hii bumbuu soni kaba a sösö gbededee. Nöo di hogi dë o hopo ën seei buta leti a di kaba apaiti kamian u Masa Gaangadu Wosu, ka hën wanwan bi musu dë. Sö a o hopo ën seei tjika. (Nöo fa u sikifi ën aki, nöo di sëmbe di ta lesi, nöo be a buta mëni nëen bunu faa musu fusu tëen.)

16 “Nöo te di soni u taki dë pasa, nöo dee sëmbe dee dë a Judea köndë aki nöo de musu kule hesihesi go tjubi a dee gaan kununu liba e.

17 Ee wan sëmbe i dë a i wosu a baiko a liba ala, nöo i musu bazia wante kai a goon kule go tjubi. Ja musu bia go a i wosu dendu seei taa i nango tei soni fii tja go ku i. Nönö. Sö i musu biinga kule hesi tjika.

18 Nöo dee sëmbe dee dë a goon dendu, sö nöo de musu kule wantewante go tu. De an musu go a wosu go tei koosu u de tjai.

19 Nöo a o tjali möönsö o, dee sëmbe, da dee mujëe dë ku bëe ku dee dë ku mihi a maun. Biga dee daka naandë o dë wan hebi daka seei da de.

20 “Nöö un musu ta begi Gadu taanga e, be di juu naandë an kisi i a kötö ten, ee nasö a saba daka ‚di a’ tjina fii kule.„

21 Biga mi taki da unu taa, fu sensi di Masa Gadu mbei goonliba, nöö di lö gaan fuka dë an bi ko pasa wan daka eti. Nöö söseei tu an o pasa ufö di ten dë dou. Nöö fa a o pasa naandë, nöö an o pasa möön tu e.

22 Ka soni o hogi tjika dë, mi taki da unu taa ee Masa Gaangadu an tapëen hesi, nöö na wan sëmbë o dë ku libi a goonliba möön. Hii sëmbë seei tuu fiaa o dëdë kaba. Ma fu dee sëmbë dee Masa Gaangadu tei ko sëmbë fëen, nöö fu de hedi wë a o tapëen möön hesi.

23 “Söö. Nöö di juu dë, nöö wan sëmbë o ko taki da i taa: ‘Luku di Paamusi Kõnu leti naandë!’ Ma wan musu piki e.

24 Biga sëmëni sëmbë o ta hopo ta ganjan sëmbë taa de da tjabukama u Gadu ee nasö de da di Paamusi Kõnu. De o ta du gaan foondo soni ta bia sëmbë hedi ta hai tja ko a de së. Mi taki da unu taa ee a bi sa, nöö de bi o ganjan dee sëmbë fu Gadu seei tu, dee a bi tei kaa ko sëmbë fëen seei. Un si ö?

25 Nöö fa mi ta taki dee soni da unu aki, nöö mi ta taki de a fesi da unu fu buuja an musu kisi unu. Biga un bi jei de kaa.

26 “Nöö mi o toona bai unu wan pasi möön, kumafa i si mi bi bai unu dë kaa taa ee de ko taki da i taa: ‘Di Paamusi Kõnu ko e! A dë leti a sabana dendu ala!’ nöö wan musu kule go luku e. Biga na tuu. Ee de taa: ‘Haika, a dë leti tjubitjubi a wosu dendu dë, ma wan musu piki e.

27 Biga te mi ko, nöö an o dë wan tjubitjubi soni sö. Nönö. A o dë limbolimbo u hii sëmbë u goonliba sa si, leti kuma te gaangadu koti faja a di së u sonu kumutu nöö i ta si ën te a di së u sonu go tu. Sö nöö di ko u Mi di ko Libisëmbë Mii aki o dë e. An o dë seei u oto pena taki da oto, biga hii sëmbë o si mi kaa.

28 “Ja sabi fa a dë te soni dëdë pondi a wan kamian nö? Te wan pisi nöö joo si hia tingifou ta hai ta ko gidjii dë u de ko njan di soni. Wë sö nöö di ko u mi o dë u hii sëmbë sa si tu. An o dë a tjubi.

29 “Nöö a baka u di fukaten u bi taki dë, nöö wanlö gaan soni o pasa, leti kumafa di tjabukama u Gadu bi taki ën. A taa:

Di sonuwojo o dungu kankan.

Nöö di libawojo an o tuwë limbo möön tu.

Nöö dee teeja dee dë a liba ala,

de o ta kumutu a de kamian ta puu ta kai.

Hii soni u munda kaa o ta seki.

Sö di tjabukama bi taki, nöö sö a o ko pasa a di ten u ta taki aki.

30 “Nöö di juu ten dë, de o si di maaka fu Mi di ko dë Libisëmbë Mii aki te a liba ala, nöö hii sëmbë u di goonliba aki tuu o ta bai ta këe te na soni. Biga de o si mi ta koti faja ta ko a dee bundji dendu ala ku gaan kaakiti.

31 Nöö fa mi o ta ko dë, nöö wan tutu o piki taanga. Nöö dee basia fu Masa Gaangadu kondë o ta waka ta pii hii dee sëmbë u Gadu tuu hai tja ko buta a wan kamian. De o pii de a hii kamian ka de bi dë, ee a sonu go, ee a sonu kumutu, ee a basusë, ee a libasë. Sö dee basia o hai de ko makandi.

32 “Söö dee sëmbë, be mi lei unu wan soni a di fuuta pau de kai figa. Te un si di pau dë toona ta buta njunjun uwii ta ko, nöö un sabi taa a deewei buka u dë, na sö nöö?

33 Wë nöö so seei tu, te un si dee soni mi bi taki da unu aki ta pasa, nöö un musu sabi taa di juu kisi u Mi di ko dë Libisëmbë Mii aki toona ko.

34 Nöö mi taki da unu seei gbelin taa dee lö sëmbë u di ten u dë aki, na de tuu o dëdë e, bifö hii dee soni mi taki dë tuu o ko pasa.

35 “Nöo fa mi ta fan ku unu aki, nöo mi taki e, taa hii soni u goonliba aki ku hii soni a liba ala tuu sa kaba a sösö, ma dee wöutu dee mi ta taki da unu aki, na wan u de seei o lasi kaba a sösö möönsö. Sö de dë tuutuu soni tjika.

Aki ta lei taa i musu dë

seekaseeka da di kaba u di ten

u dë aki.

Maik. 13:32-37; Luk. 12:41-48, 17:26-30, 34-36

36 “Ma nöo fa mi taki dee soni dë seei, ma na wan sëmbë sabi na un juu ten de o pasa e. Dee basia u Gadu Köndë an sabi, nöo Mi di Mii u Gadu aki seei, ma sabi tu. Ma mi Tata a liba wanwan tö nöo sabi un juu de o pasa.

37 “Nöo leti kumafa un jei soni bi waka a di ten u Noa, nöo sö nöo soni o dë a di ten Mi di ko dë Libisëmbë Mii aki o toona ko a goonliba.

38 Biga dee sëmbë u di ten naandë bi dë ta njan u de ta bebe ta tei mujëe ta da mujëe manu, tee dou di daka Noa go a di gaan sipi.

39 De an bi mëni seei taa sö wan hogi dë u ko miti de. Ma te u de kë mëni, nöo hën tjuba kai gbulululu singi di goonliba piiii, sawa de tuu fia tja go kii puu dë.

“Nöo mi taki da unu taa leti sö nöo a o dë a di juu ten mi o toona ko a goonliba.

40 Biga tu sëmbë sa dë u de a goon dendu ta wooko, te wan pisi mi o ko tei wan u de tja go, di otowan o fika naandë.

41 Tu mujëe o dë u de ta puu fania, te wan pisi mi tei wan u de tja go, di otowan fika.

42 Nöo hën mbei mi ta bai unu aki taa be un ta dë setiseti ta mëni mi e. Biga wan o sabi na un juu di Masa fuunu aki o toona ko a unu.”

43 Nöo hën Masa Jesosi toona taki wan oto soni u di ko fëen möön taa: “Di ko u mi o dë leti kuma te wan fufuuma go booko wan wosu a ndeti. Wë nöo di sëmbë di abi di wosu, ee a bi sabi un juu di fufuuma bi o ko, nöo a bi o dë ku wojo setiseti ta watji ën fu an ko booko di wosu fëen. Na sö nö?”

44 Nöo hën mbei un musu ta dë setiseti e. Biga tee wan daka nöo mi o dou a unu liba vau sö, a wan juu di wan bi mëni seei taa mi ta ko.”

45-46 Hën a taa: “Di juu dë o dë kuma te wan guduma o go a wan kamian. Nöo a o kai wan u dee futuboi fëen ko nëen faa musu butëen basi a dee otowan fëen liba. Hën o ta seeka de ta da de njanjan kumafa a dë fanöudu, fu tee di juu kisi fu de masa toona ko.

“Wë nöo a o bunu seei da di lö futuboi dë e, ee a dë taa a ta du di wooko fëen a wan bunu fasi ku fusutan.

47 Biga tee di juu dou u di masa fëen toona ko, nöo a o si taa a wooko bunu. Nöo a o wai ku ën seei te a o buta hii gudu fëen tuu nëen maun faa musu ta seeka dëen nöömö.

48 “Ma ee di futuboi dë wan hogi sëmbë, nöo kandë a o pakisei nëen hati taa: ‘Wë fa di masa u mi ta hoi longi tjika aki, nöo kandë an o ko eti.’

49 Nöo a o seti ta fon dee oto futuboi kuma hën ta du hogihogi ku de. Nöo a o ta waka ku dee mati fëen ta njan ta bebe soni a kamiankamian ta dööngö.

50 Nöo i sabi andi o pasa ö? Te wan pisi nöo di masa fëen o ko dou a wan juu di an bi mëni ën seei.

51 Nöo mi taki da unu taa a o sitaafu di futuboi fëen naandë wan gaan hogi sitaafu e. Biga a o tuwëen go a di kamian ka dee bödjëema ta dë, nöo naandë a o dë ta tja fuka ta bai ta kai olo ta njan tanda fu nöömö.”

Sö wë Masa Jesosi taki da u di juu dë.

25

*Disi da di oto u dee**teni mujëe mii.*

¹ Nöo hën Masa Jesosi taa: “Mi o konda wan oto woto da unu aki möön u lei unu fa di Njunjun Tii u Gadu dë.”

Hën a taa: “Wë un sabi fa di guwenti dë kaa, u te wan womi ku wan mujëe o tööu. Dee wëndjë mujëe mii o go miti ku di womi fu de tei ën tja go tööu ku di mujëe. Na sö nö?”

“Wë nöo hën wë de o hoi wan tööu, nöo teni mujëe mii bi musu go miti ku di womi a wan kamian, fu de tjëen ko a di mujëe. Hën wë de seeka te de kaba, hën de tei de lampu faja hën de nango.

²⁻³ Ma nöo feifi u dee mujëe mii waka a wan don fasi. Biga de an tja oli möön leki di dë a de lampu kaa.

⁴ Ma nöo de feifi otowan, de waka ku fusutan. Biga di de kumutu fu de go, nöo hën de tja oli go ku de.

⁵ “Nöo hën wë de go sai dë ta luku di womi o tööu di tööu faa ko. Ma nöo a waka lati seei, hën de sai dë tefa ndeti, hën wë duumi tja de gbolo.

⁶ “Hën de dë te tuwalufu juu u ndeti, te u de kë mëni hën de jei bai taa: ‘Un hopo! Un hopo seeka! Di womi ta ko e!’

⁷ “Nöo hën de teni mujëe mii panta hopo vu, hën de kisi lampu u de valai seeka hesihesi.

⁸ “Ma nöo dee feifi dee bi waka a don fasi dë, hën de pidi dee otowan taa: ‘Mujëe gaantangi, u begi unu un da u wan piki oli fuu munjan maaun, biga faja fuu ta tapa.’

⁹ “Ma nöo de piki de taa: ‘Wë nöo, mujëe, di fuu an hila tjika fuu da unu e. Be un go bai a dee wënkëma.’

¹⁰ “Nöo hën wë de feifi mujëe mii hën de go u go bai oli. Nöo fa de go dë, hën di womi ko miti ku de feifi mujëe mii dee bi fika dë, nöo hën de tjëen go a di tööuwosu. Nöo di de go dou, hën de tapa döo gbalai söötö, biga di juu pasa kaa u sëmbë musu ko a di piizii. Nöo hën de dë a di piizii wante.

¹¹ “Nöo hën de sai dë tee wan pisi hën de feifi mujëe mii dee bi fika baka dë ko dou ko ta naki di döo ta bai taa: ‘Gaantangi o, dee sëmbë. Un ko jabi döo da u baa.’

¹² “Nöo hën di womi di abi di tööu hakisi taa: ‘Ambë da dee sëmbë ta bai ta kai mi dë?’ Hën a gandji da de taa: ‘Un go kumutu dë e! Ma sabi unu seei!’ ” Sö wan oto wë Masa Jesosi tei konda da u te a kaba.

¹³ Nöo hën a taa: “Hën wë mbei mi ta bai unu e, taa be un dë seei kabakaba hiniwanten. Biga wan sabi di juu di mi o toona ko a goonliba.”

*Aki da di oto u wanlö sëmbë di bi musu wooko ku möni.**Luk. 19:11-27*

¹⁴ Nöo hën a toona tei wan oto woto konda da u möön, faa lei u fa di Tii u Gadu dë. A taa: “Wan guduma bi dë nëen köndë, nöo hën wë a o go a waka a wan oto köndë. Nöo di a o go, hën a kai dii futuboi fëen ko nëen, nöo hën a tei möni hën a paati da de fu de musu wooko ku ën dëen.

¹⁵ “Wë nöo di fosuwan a buta feifi dusu nëen maun. Di u mbei tu a buta tu dusu. Di u mbei dii hën a buta wan dusu. Nöo fa a da de di möni pepei dë, nöo a da de ën leti kumafa a sabi taa de abi köni tjika fu de sa wooko ku ën. Hën a baka u di dë, hën a tei pasi hën a go.

16 “Nöö fa di masa go dë, hën di futuboi di feni di feifi dusu dë, hën a ta wooko ku ën tefa a toona feni feifi dusu möön buta nëen liba, a ko teni dusu. Sö di sëmbë dë wooko ku di fëen tjika.

17 Nöö söseei di u tu, a wooko ku di fëen tee a feni tu dusu möön buta a di fëen liba, a ko fö dusu.

18 “Ma nöö di u mbei dii, hën a tei di wan dusu fëen dë nöö hën a go diki baaku te a kaba, hën a bei ën buta a goon basu dë.

19 “Wë nöö di masa u de go tan longi seei ufö a toona ko. Nöö di a toona ko, nöö hën a kai dee futuboi fu de ko konda dëen unfa de wooko ku di möni tjika.

20 “Nöö hën di fosuwan ko. Nöö hën a taki dëen taa: ‘Masa o.’ A piki. A taa: ‘Wë di feifi dusu i bi disa da mi aki nöö mi wooko ku ën e, tee nöö hën mi feni feifi dusu toona buta nëen liba möön. Nöö ja ta si ën aki nö? Mi tjëen ko da i.’

21 “Hën di masa fëen wai ku ën seei. A taa: ‘Aai, womi, i dë wan sëmbë u futoou e. I dë wan bambuu futuboi u mi seei. Wë nöö di i wooko sö bunu ku di piki soni mi bi buta a i maun dë, nöö mi o toona buta wan möön gaan soni a i maun awaa. Nöö be i fika ku mi aki e, be u tuu ta wai makandi.’

22 “Nöö baka u di dë, hën di u mbei tu hën a ko. Nöö hën a taa: ‘Wë, Masa.’ Hën a piki. A taa: ‘Wë i bi da mi tu dusu. Wë nöö mi wooko ku ën te nöö hën mi toona feni tu dusu buta nëen liba möön. Ja ta si ën aki nö? Mi tjëen ko da i.’

23 “Hën di masa fëen taki dëen taa: ‘Aai, womi, i dë wan sëmbë u futoou e. I dë wan bambuu futuboi u mi seei. Wë nöö di i wooko sö bunu ku di piki soni mi bi buta a i maun dë, nöö mi o toona buta wan möön gaan soni a i maun awaa. Nöö be i fika ku mi aki e, be u tuu ta wai makandi.’

24 “Nöö hën di u mbei dii nöö hën a ko dou. Hën a taa: ‘Wë Masa, wë fa i dë aki, wë nöö mi bi sabi taa i dë wan hogi sëmbë. I ta koti soni ka ja bi paandi. I ta pii ka ja bi jaa tuwë.

25 Nöö di mi sabi sö fii kaa, nöö mi fëëë e. Nöö hën wë mbei mi go diki baaku te mi kaba hën mi bei di möni fii. Nöö ja ta si ën kädë aki, mi tjëen ko da i.’

26 “Nöö di di sëmbë fan sö te a kaba, nöö hën di masa fëen hati boonu. Hën a gandji dëen te na soni, a taa: ‘Ju hogisonima, malëngëma ju! Di i bi sabi taa mi ta koti soni ka ma bi paandi, mi ta pii soni ka ma bi jaa tuwë,

27 wë nöö i bi sa tja di möni u mi tololoo go buta a banku. Biga mi bi sa feni wan piki wini nëen te mi ko.’

28 “Nöö hën a manda dee oto futuboi fëen taa: ‘Un go puu di wan dusu nëen maun naandë e, nöö un da di sëmbë di abi teni dusu ën.

29 Biga di sëmbë di bi abi te a hila kaa, nöö hën o toona feni te pasa maaka. Ma nöö di sëmbë di abi wan pikiwan nöö, nöö nëen maun de o puu di pikiwan a abi dë, be a fika ku sösö maun tjololoo.’

30 “Hën a taa: ‘Un go tei di sösö futuboi naandë puu a mi aki, nöö un tuwëen go a dungudungu ala, ka sëmbë ta tja fuka ta bai ta kai olo ta njan tanda fu nöömö.’

Nöö sö wan woto Masa Jesosi tei lei u e.

Aki ta lei fa Masa Jesosi o kuutu sëmbë a bakaten.

31 Hën a toona fan ku u möön, a taa: “Te wan daka nöö Mi di ko dë Libisëmbë Mii aki o toona ko a goonliba e, mi ku dee basia u Gadu Köndë tuu. Nöö fa mi o ko dë, nöö ku hii di hei u Masa Gadu di a abi, ku hën wë mi o ko e. Biga mi o ko fu mi ko sindo a di könubangi u mi, nöö di waiti u Gadu o ta koti faja a hii di kamian.

132-133 “Nöö di juu ten dë, nöö de o kai hii sëmbë u goonliba kumutu a hii dee köndëköndë tuu fia tja ko a mi fesi, nöö mi o paati de a tu pei. Hafu u de o dë a mi letimaun së, hafu u de o dë a mi töötömaun së, leti kumafa dee sëmbë ta kiija mbeti ta paati dee mbeti u de, sikapu dë a wan së, kaabita dë a wan së.

134 “Nöö mi o taki da dee sëmbë dee dë a mi letimaun së taa: ‘Söö, wë un dee sëmbë Gadu limbo fesi da aki, un pasa ko tei di kamian fuunu a mi Tata köndë aki e, di i si a bi seeka buta dë gaanduwe da unu kaa bifö a seti mbei goonliba.

135 Biga di mi bi dë da hangii ta kii, nöö hën un da mi soni mi njan. Di dëewata bi ta kii mi, hën un da mi wata mi bebe. Di mi bi dë wakama, nöö hën un tei mi buta a unu wosu seeka.

136 Mi bi dë pënëpënë söndö soni a sinkii, hën un tei koosu da mi, mi bisi. Di mi bi siki hën wë un sölugu mi. Nöö di de bi tja mi go söötö a dinguwosu nöö hën un ko luku mi e.’

137 “Nöö fa mi o fan dë, nöö a o bigi seei da de. Nöö de o hakisi mi taa: ‘Wë Masa o, na un juu u bi si i a kamian hangii bi ta kii i, hën u da i soni fii njan? Na un juu u bi si dëewata ta kii i, hën u da i wata i bebe?’

138 Na un juu u bi si i kuma wakama a wan kamian hën u tei i buta a wosu? Na un juu u bi si i söndö koosu a sinkii hën u da i soni u bisi?’

139 Na un juu u si i suwakisuwaki ee nasö a dinguwosu, hën u bi ko luku i?’

140 “Nöö mi o piki de taa: ‘Haika e. Hii dee bunu dee i si un bi ta du dee sëmbë u mi tee dou ku dee kaba lagiwan tuu ala, nöö mi seei wë un bi ta du dee bunu dë e.’ Sö mi o piki de.

141 “Nöö baka u di dë, nöö mi o bia fan ku dee dë a mi töötömaun së taa: ‘Un waka pasa kumutu a mi fesi dë! Fa di siba u Gadu kisi unu dë, nöö un kaba a sösö e! Nöö un go a di faja di ta kisi u nöömö, di de bi seeka da di didibi ku dee basia fëen.

142 Biga mi bi dë ku hangii ma wan bi da mi soni u njan. Dëewata bi kisi mi, ma wan bi da mi wata mi bebe.

143 Mi bi dë wakama a unu mindi ma wan tei mi buta a wosu. Mi bi dë pënëpënë ma wan da mi soni mi bisi. Mi bi siki, mi bi dë a dinguwosu, ma wan ko sölugu mi.’

144 “Nöö de o piki mi taa: ‘Aan, ma Masa o, a bigi da u poi. Na un juu seei u bi si i ku hangii, ma wa bi da i soni u njan? Na un juu u bi si i dëewata ta kii, ma wa bi da i wata fii bebe? Na un juu u bi si i kuma wakama ma wa bi tei i buta a wosu? Na un juu u bi si i söndö koosu a sinkii ma wa da i koosu fii bisi? Na un juu seei i bi dë suwakisuwaki ee nasö a dinguwosu, ma wa bi sölugu i?’ Sö de o hakisi mi.

145 “Nöö hën mi o piki de taa: ‘Mi taki da unu seei gbelin, taa fa i si wan bi heepi dee sëmbë u mi te dou ku dee kaba lagiwan seei, nöö mi seei wë i si wan bi heepi dë e.’ Sö mi o piki de.

146 “Wë sö wë i ta si taa dee takulibima o feni gaan sitaafu fu teego, ma nöö dee sëmbë ta libi bunu a Gadu wojo, de o feni di libi u teego.”

Nöö sö wan oto Masa Jesosi taki dë.

26

Aki dee felantima u Masa Jesosi ta kuutu u de kii ën.

Maik. 14:1-2; Luk. 22:1-2; Joh. 11:45-53

1 Nöö a baka u di dë, hën Masa Jesosi kai u dee bakama fëen te u piki. Hën a fan ku u taa:

² “Dee sēmbē, fa u dē aki tu daka nōō fika e, nōō di Pasika o kai. Nōō a dee daka ta ko aki de o kisi Mi di ko Libisēmbē Mii aki tja go buta a sēmbē maun u de musu peka mi a lakpa pau kii.” Sō wan soni Masa Jesosi taki da u.

³ Wē nōō di juu dē kaa, nōō dee Gaan Begima ku dee Gaan Womi bi go dē a di wosu u di Kaba Hei Begima de kai Kajafasi.

⁴ Nōō naandē wē de go sindo ta kuutu unfa de sa du de feni Masa Jesosi tja go kii.

⁵ Ma so u de dē a di kuutu taa: “Dee sēmbē, un haika e. Ee woo du di soni aki, nōō wa musu du ēn a di Pasika daka, biga di kōndē o mbei wajawaja da u poi nōō woo abi hōgi nē a lanti.” Sō so u de taki a di kuutu dendu.

Aki wan mujēē du Masa Jesosi wan gaan bunu.

Maik. 14:3-9; Joh. 12:1-8

⁶ Nōō di juu dē, u ku Masa Jesosi dē a di kōndē de kai Betania. Nōō hēn u go a di wosu u wan womi de kai Simon di bi siki tjināsiki, go njan.

⁷ Nōō hēn u ta njan te wan pisi, hēn wan mujēē ko dou ku wan hanse bata nēēn maun ku wan gaan dii sumēsuti fatu nēēn dendu. Nōō hēn a waka tolooo ko a Masa Jesosi ka a dē a tafa naandē, hēn a tutu di fatu nēēn hedi te di fatu kaba kēēē a di bata.

⁸ Nōō fa a du ēn dē, nōō di soni an bunu da u dee bakama u Masa Jesosi seei, nōō hēn u sai dē ta guunjan di mujēē taa: “Wē andi a du dē maingē? Di gaan dii fatu dē sō hēn a poi kaba a sōsō nō?”

⁹ Biga a bi sa sei ēn puu gaan hila mōni, nōō de tei di mōni paati da dee penama u di kōndē.”

¹⁰ Ma fa u ta fan dē, Masa Jesosi sabi kaa. Hēn a hakisi u taa: “Ma dee sēmbē o, andi mbei un sai dē ta guunjan di mujēē u du? An du wōgi e. Wan gaan bambuu soni seei wē a du da mi aki.

¹¹ Biga dee pootima o dē aki nōōmō fuun ta sōlugu, ma mi, ma o dē ku unu longi mōōn e.

¹² “Ma nōō boiti u di dē, i si fa di mujēē du dē ō? Fa a tutu di fatu a mi sinkii aki, nōō mi sinkii wē i si a seeka sō a fesi e, da di bei di de o bei mi abiti mōōn aki.

¹³ “Nōō mi taki da unu taa a hii kamian u goonliba ka de o ta konda di buka u mi kaa, nōō sō de o ta konda di bambuu soni di mujēē aki du da mi tu.”

Aki Judasi go a dee felantima

u Masa Jesosi.

Maik. 14:10-11; Luk. 22:3-6

¹⁴ Nōō fa u mbei dē, hēn wan fuu de kai Judasi Isikaliotu hopo vu disa u, nōō hēn a waka tolooo go a dee Gaan Begima ka de ta kuutu dē, dee felantima u Masa Jesosi. Hēn a go hakisi de taa: “Wē ee mi mbei mōiti fuun sa feni Jesosi kisi, nōō andi woon paka mi?”

¹⁵ Hēn de taa: “Sō nō womi? Wē ee u da i diiteni pisi soofu mōni, nōō a o tjika ō?”

Hēn a taki aai.

Hēn de tei di mōni konda kpaakpaa te de kaba gbelin, hēn de tēndē dēēn. Hēn a tei ēn nōō hēn a go.

¹⁶ Nōō fu seti a di ten dē, hēn a ta suku pasi nōōmō unfa a sa du buta Masa Jesosi a dee felantima fēēn maun.

Aki Masa Jesosi ku dee bakama fēēn ta njan di Pasika.

Maik. 14:12-26; Luk. 22:7-23; Joh. 13:21-30; 1 Kol. 11:23-25

17 Wë nöö di gaan piizii de kai Pasika dë, nëen de ta njan di bëëë di de ta jasa söndö sooda, „nöö sömöni daka longi de ta njan mën. Nöö a di fosu daka fëen de ta kii di sikafu mii njan.” Nöö hën mbei u hakisi Masa Jesosi taa: “Masa o, naasë i kë fuu seeka kamian fuu ku i sa njan di daka?”

18 Hën a taki da u taa: “Wë un haika. Un go a di köndë di dë leti a u fesi aki, nöö woon si sö wan womi. Nöö un taki dëen taa: ‘Di Mësitë taki e, a taa di juu Gadu buta dëen nöö a ko zuntu kaa. Nöö a taa a kë ko njan di Pasika aki a i wosu.’ Sö fuun taki da di womi e.”

19 Nöö hën so fuu go hën de feni di wosu, hën de seekëen te de kaba fuu go njan.

20 Nöö hën di sapate hën u go sindo a tafa ta njan, Masa Jesosi ku u dee tuwalufu bakama fëen tuu.

21 Hën u dë te wan pisi, hën a fan ku u taa: “Mi taki e, taa wan fuunu dë leti a u dendu aki o tja mi go sei da dee felantima u mi.”

22 Nöö di a fan sö tefa a kaba, hën a hati u tee, a da u gaan pakisei. Nöö hën u ta hakisi ën taa: “Masa o, fa i fan dë, nöö a sa kë taa mi ö?” Sö u ta hakisi oto a oto baka.

23 Hën a piki taa: “Wan fuunu di i si mi ku ën ta munjan bëëë a di wan kodo baafu paabi aki, hën wë o sei mi sö e.

24 Nöö a dë sö tuu taa dee tjabukama bi sikifi sömöni soni a fesi u Mi di ko Libisëmbë Mii aki, nöö de tuu musu pasa. Ma helu u di sëmbë di o sei mi aki. A bi möön bëtë hën mama an bi pai ën wan daka ko a di goonliba aki.”

25 Nöö fa a fan dë, hën Judasi seei hakisi ën awaa taa: “Wë Mësitë, ambë da di sëmbë? Mi nö?”

Hën a piki ën taa: “Leti kumafa i si i taki ën dë, nöö sö a dë e, womi.”

26 Nöö fa u dë a tafa ta njan naandë, te wan pisi hën Masa Jesosi tei wan bëëë hën a da Gadu tangi te a kaba. Nöö hën a booko ën hën a tëndëen da u. Hën a taa: “Ja si fa mi booko di bëë aki ö? Hën da di sinkii u mi di o booko fu libisëmbë hedi.” Un tei ën nöö un njan e.”

27 Nöö a baka u di dë, hën a tei wan kan win hën a toona da Gadu tangi möön te a kaba, hën a tëndëen da u.

28 A taa: “Un tei nöö un bebe e. Hën da di gadjabia u mi di mi o tuwë a goon fu Gadu sa mbei wan njunjun buka ku libisëmbë. Biga fa de o kii mi aki, nöö hën o mbei Gadu o puu hia sëmbë a bëë u dee hogi de bi du.”

29 Hën a taa: “Mi taki da unu e, taa te mi ku unu bebe win a di fasi aki möön, nöö di Njunjun Tii fu mi Tata hën seti kaa e.”

30 Nöö di u njan te u kaba kaa, hën u kanda wan kanda da Masa Gaangadu te u kaba, hën wë u hopo kumutu naandë ta waka nango a di kuun dë kai Oleifi Kuun.

Aki Masa Jesosi ta taki da Petuisi andi o pasa.

Maik. 14:27-31; Luk. 22:31-34; Joh. 13:36-38

31 Hën Masa Jesosi fan ku u, a taa: “Dee sëmbë o, a di ndeti i si aki seei nöö na wan fuunu o abi biibi a mi liba möön e. Un tuu o go disa mi. Biga a o pasa leti kumafa dee fesiten tjabukama bi sikifi buta a di Buku taa de o fon di sëmbë di ta luku dee sikafu, nöö hii dee sikafu tuu o kule paaja fanjanfanjan.

32 “Ma nöö mi taki e, te mi weki baka kumutu a dëdë, nöö mi o go dë a Galilea ta luku unu.” Nöö sö Masa Jesosi fan ku u tefa a kaba.

33 Ma nöö fa a fan dë, hën Petuisi piki ën wante taa: “Ambë, Masa! Aluwasi hii dee otowan aki tuu go disa i ma mi, aan juu seei di mi o disa i möönsö.”

34 Nöo hën Masa Jesosi piki ën taa: “Womi, fa mi o fan aki, nöo tuutuu soni mi o taki e. A di ndeti aki seei, ganian an o kanda ufö joo fia dii toon taa ja sabi mi, womi.”

35 Wë nöo Petuisi an sa jei di soni dë. A taa: “Aluwasi ee mi ku i musu dëdë makandi seei, ma ma o fia möönsö taa ma sabi i. Na seei.” Nöo fa Petuisi taki dë, nöo sö nöo u dee oto bakama tuu taki.

Aki Masa Jesosi dë a di djai

de kai Gëtiseimani.

Maik. 14:32-42; Luk. 22:39-46

36 Nöo hën u ku Masa Jesosi nango tefa u go dou a wan djai de ta kai Gëtiseimani. Nöo hën a taki da u taa: “Un sindo aki ufö e, nöo mi o go ala go begi.”

37 Nöo hën a tei Petuisi ku de tu mii u Zebedeosi, hën de ta waka nango te de go dou a wan kamian u di djai. Nöo hën gaan pakisei ko a Masa Jesosi liba te an saanfa u du. A ko dë seei fukafuka tee na pi.

38 Hën a taki da de taa: “Womi, fuka ku tjali fuu mi hati tee kuma a sa tja dëdë kii mi. Nöo un tan aki ta da mi taanga e.”

39 Nöo hën a waka go a fesi abiti sö, hën a kai tapa fesi a goon dë wante. Nöo hën a begi taa: “Ke Taata o, gaantangi mi begi i, di soni di i lai da mi u mi bebe aki, ee i sa puu ën da mi u ma bebëen nöo be i puu ën o. Ma nöo fa mi fan aki seei, ma na du di soni di mi kë e, ma be a pasa kumafa i kë.”

40 Nöo di a begi sö tefa a kaba, hën a hopo toona go a de dii womi dee a bi disa dë, nöo hën a si taa de ta duumi.

Hën a kai Petuisi te a piki a taa: “Womi, wan sa tan ku wojo ku mi di wan kodo juu langa aki seei nö?”

41 Wë un weki hoi wakiti e, nöo un begi taanga be di didibi an wini unu. Ma mi sabi taa hati fuunu kë du kumafa a fiti, ma wan taanga sö.”

42 Nöo hën a toona go begi di wan seei begi baka. A taa: “Taata, di soni di i lai da mi u mi bebe, nöo ee an sa puu, nöo heepi mi be mi bebëen nöo. Biga di soni di i kë, nöo hën musu pasa.”

43 Nöo hën a toona ko a de dii bakama fëen möön, hën a si taa de toona ta duumi möön. Duumi nöo hebi a de wojo sö.

44 Nöo hën a disa de dë, hën a toona go begi di u mbei dii pasi, di wan seei begi te a kaba.

45 Nöo hën a toona ko a de dii bakama dë möön. Hën a fan ku de taa: “Duumi nöo un ta duumi ta böö sinkii sö nö baa? Wë ma nöo di juu kisi o. De sei Mi di ko dë Libisëmbë Mii aki da dee hogihatima kaa.

46 Nöo un hopo boo go e, biga di sëmbë di sei mi hën wë ta waka ta ko dë.”

Aki de kisi Masa Jesosi.

Maik. 14:43-50; Luk. 22:47-53; Joh. 18:3-12

47 Nöo Masa Jesosi an kaba u fan seei, nöo hën wë Judasi dou, hën ku wanlö gaan hila sëmbë. De ko ku feti lai e, de ko ku ufangi, de dë ku kodjo a maun. Nöo fa de ko dë, nöo dee Gaan Begima ku dee Gaan Womi wë bi manda de e.

48 Wë nöo Judasi di kõnkuma bi taki da de kaa taa: “Haika, mi o da unu wan maaka. Fa i si woo go dou naandë, nöo di sëmbë di i si mi o bosu, nöo hën da di sëmbë di un musu kisi e.” Sö wan buka a bi mbei ku de te a kaba.

49 Nöo fa de go dou naandë, hën a waka go a Masa Jesosi wante, hën a dëen odi taa: “Mësitë, odi o.” Hën a bosu ën a bandjajesi naandë, kumafa di guwenti u di kõndë bi dë te joo da wan sëmbë fii odi.

50 Hën Masa Jesosi taa: “Mati o, di soni di i ko aki fii ko du, nöö be i du en nöö e.” Nöö fa a fan dë, hën dee sëmbë kule voo ko kisi en gbalau panjan gingin wante u de tja go.

51 Nöö hën wan fuu dee bakama u Masa Jesosi hai di ufangi fëen valau puu a dosu hën a hiti go dë. Nöö hën a koti di futuboi u di Kaba Hei Begima jesi belim puu tuwë a goon naandë.

52 Ma nöö hën Masa Jesosi taa: “Nönö womi, toona tuusi di ufangi fii nëen dosu e. Biga di sëmbë di hopo ufangi a liba nöö ju ufangi o kii.”

53 Hën a toona taa: “Unfa i mëni, baa? I sa’ taa ma abi kaakiti fu mi sa hakisi mi Tata faa heepi mi nöö? Biga a sa manda möön a mëni dusudusu basia fëen köndë u ko puu mi a dee sëmbë aki maun.

54 Ma nöö ee mi du sô, nöö dee soni dee fesiten tjabukama bi sikifi buta a di Buku, nöö de an o pasa möön.”

55 Nöö hën a bia fan ku dee hia sëmbë ko nëen naandë, a taa: “Dee sëmbë, faandi mbei un ko a mi aki ku feti soni ku kodjo ku ufangi, fuun ko kisi mi kuma mi da wan toobisëmbëma a di köndë? Biga hiniwanten mi bi dë a di Wosu u Masa Gadu ta lei sëmbë, ma tókuseei wan bi kisi mi.

56 “Ma seei mi sabi taa dee soni ta pasa aki, nöö de musu fu ko pasa, be dee soni dee fesiten tjabukama bi sikifi musu ko tuu.”

Nöö fa a fan dë, nöö hën hii u dee bakama fëen tuu fiaa kule go disëen. A fika hën wanwan ku dee sëmbë dee ko kisi en dë.

Aki de tja Masa Jesosi go a kuutu.

Maik. 14:53-65; Luk. 22:54-55, 63-71; Joh. 18:13-14, 19-24

57 Nöö hën de tei en tja go tee a di wosu fu di Kaba Hei Begima u bi taki dë de kai Kajafasi. Biga naandë dee Sabima u Wëti ku dee Gaan Womi tuu bi hai ko makandi ta luku u de tja Masa Jesosi ko.

58 Ma nöö fa dee sëmbë ta tjëen go dë, nöö Petuisi bi dë te a baka ala ta waka sapisapi ta ko. Nöö hën a nango tee go dou a di djai dendu. Nöö hën a sindo ku dee watjima u di wosu ta luku ee unfa de o du ku Masa Jesosi.

59 Nöö di juu dë, hën di Kaba Hei Begima ku dee tiima ku hii dee oto kuutuma u dee Dju tuu sai dë kaa ta mindi soni ta buta a Masa Jesosi hedi. De ta suku föutu nëen nöömô fu de feni tja go konda da dee lanti u Loomë dee ta tii di köndë, be gaan lanti sa piki taa a musu dëdë.

60 Ma nöö hii fa de ta pii soni ta mindi dëen seei, ma na wan soni de si bigi tjika faa musu dëdë.

61 Te wan pisi, hën tu u dee mindisonima hopo taanpu. Hën de taa: “Lanti, un haika e. Di womi i si aki sô, hën bi taki taa a sa booko di Wosu u Masa Gadu tuwë a goon, nöö a dii daka dendu nöö a sa toona mbei en baka. Sô wë a bi taki e, fa i si un ta si en aki.”

62 Nöö hën di Kaba Hei Begima hopo vu taanpu a pë. Nöö hën a fan ku Masa Jesosi, a taa: “Wë di soni fii de ta taki aki, andi fëen joo taki? Soni de ta mindi da i, naa sô i taki tuu?”

63 Ma Masa Jesosi dë fëen pii. An piki en na wan tögö seei.

Nöö hën di Kaba Hei Begima fan ku en möön taa: “Mi manda i e, fii soi da mi a di libilibi Gadu fesi aki, taa di soni joo piki mi, a o dë tuutuu soni. Nöö mi hakisi i taa ee ju da di Könu di Gadu bi paamusi taa a o manda ko? Ju da di Mii u Gadu nöö?”

64 Nöö hën Masa Jesosi piki en awaa, a taa: “Wë leti kumafa i si i taki dë, nöö sô nöö mi dë e. Nöö di juu o dou, nöö woon si Mi di ko dë Libisëmbë Mii aki sindosindo leti a letimaun sê u Masa Gaangadu di abi hii kaakiti a mundu.

Woon si mi kumutu a liba ala ta saka ta ko e, a dee bundji dendu.” Sö a piki en.

⁶⁵ Wë nöö fa a fan dë, nöö hën di Kaba Hei Begima tënë dee koosu fëen sinkii seei zaaa, „hati fëen nöö boonu sö„. Hën a taa: “Dee sëmbë, andi un kë jei möön? An dë fuu suku kotoigi möön e. Biga wan jei fa a mindi soni da Masa Gaangadu nö?”

⁶⁶ Andi un pakisei fuun du ku en?”

Hën de tuu bai piki a di kuutu taa: “Aan soni u du möönsö, dëdë nöö a musu dëdë e!”

⁶⁷ Nöö fa u mbei dë, hën de bigi u du hogihogi ku Masa Jesosi awaa. De ta tunta nëen fesi, de ta naki en ku böö, „de tai en wojo„ hën de ta naki en baai maun a bandjajesi ta mbei en fa taa:

⁶⁸ “Di i taa i da di Paamusi Könu, i ku Gadu ta fan, nöö konda da u ee ambë naki i di naki?” Nöö sö dee sëmbë ta du ku Masa Jesosi di juu naandë.

Aki Petuisi fia taa an sabi

Masa Jesosi.

Maik. 14:66-72; Luk. 22:56-62; Joh. 18:15-18, 25-27

⁶⁹ Ma nöö fa dee soni ta pasa dë, Petuisi hën a dë pii sindosindo ku dee watjima a di djai dendu. Te wan pisi hën wan mujëë futuboi fu di wosu ko nëen, hën a hakisi en taa: “Wë womi, na i bi dë ku di Jesosi fu Galilea naandë nö?”

⁷⁰ Nöö hën Petuisi fia a hii dee sëmbë dë fesi taa: “Ambë? Mi? Nönö! Ma saandi i ta taki dë.”

⁷¹ Hën a hopo kumutu dë waka go a di djai dööbuka ala.

Nöö hën wan oto mujëë mii ko nëen möön, hën a fan ku dee sëmbë taa: “Di womi i si aki, a bi dë ku Jesosi u Nazalëti tu e.”

⁷² Hën Petuisi toona fia möön, a soi seei taa: “Ma sabi di sëmbë un ta taki dë e!”

⁷³ Te wan pisi, hën wanlö sëmbë bi dë taanputaanpu dë, hën de ko a Petuisi möön taa: “Womi, an dë fii pena fia taa ja dë sëmbë u di womi dë e. Biga u ta jei a di töngö tatai fii taa i da wan Galilea sëmbë.”

⁷⁴ Höön, wë Petuisi an bi fia eti e. Hën a ta konda sondi a buka ta sibëen seei ta fia tee, a taa: “Mi taki da unu e, taa di womi dë ma sabi en seei wan daka, kwetikweti!” Nöö fa a fan dë, wante nöö hën wan ganian bai kanda te a koti.

⁷⁵ Nöö hën Petuisi ko mëni di fan di Masa Jesosi bi fan ku en taa: “A di ndeti aki seei, ganian an o kanda bifö joo fia dii pasi taa ja sabi mi.” Nöö di a ko mëni di soni dë, hën a kule go a döö go këë te a bigi. Hati nöö a hati en sö.

27

Aki de tja Masa Jesosi go

a Gaama Pilati.

Maik. 15:1; Luk. 23:1-2; Joh. 18:28-32

¹ Nöö hën di dobooko fëen mamate biten, hën dee Gaan Begima ku dee Gaan Womi kai kuutu u de taki unfä de sa du buta Masa Jesosi a dee gaan lanti fu Loomë maun. „Biga de an sa manda sëmbë go kii ee na dee Loomë lanti dë da de pasi„ Hën de kuutu tefa de ko feni wan baaku.

² Nöö hën de go tei Masa Jesosi, hën de bui en te de kaba. Hën de tjëen go tee a di gaama de kai Pilati, di dee Loomë lanti bi buta faa tii dee Dju sëmbë.

Aki ta lei andi pasa ku Judasi.

Tjab. 1:18-19

³ Wë nõõ di juu dë, hën Judasi ko si taa fa a sei Masa Jesosi dë nõõ de o kii ën tuu. Nõõ di sondi ko hati ën tee an saanfa u du mõõn. Nõõ hën a tei de diiteni pisi soofu moñi dee de bi pakëën dë, hën a go a dee Gaan Begima ku dee Gaan Womi.

⁴ Hën a taki da de taa: “Dee sëmbë, ma du bunu e. Sõ wan bumbuu sëmbë mi sei fu de kii ën tuwë buuu fëën a goon. Biga fa i si a sai dë, na hogi a du mõõnsõ e.”

Ma nõõ hën de piki ën taa: “Ambë? Wa a’ soni fëën u taki mõõn e. A fika da i.”

⁵ Nõõ di de piki ën sõ kaa, nõõ hën a hiti di mõni tuwë djolou a goon leti a di Wosu u Masa Gadu dendu naandë, hën a kule go hëngi hëensee kii.

Nõõ sõ wë di soni dë pasa ku Judasi e.

⁶ Nõõ hën dee Gaan Begima go pii di mõni te de kaba. Hën de taa: “Wë di mõni aki an bunu u buta a di keiki kasi mõõn. An o kai ku di wëti fuu, biga hën da mõni di de paka u de kii sëmbë.”

⁷ Nõõ hën de kai pakisei te de kaba ee unfa u de du ku di mõni. Nõõ hën de ko fendi taa de o go a dee sëmbë ta mbei dee soni kuma agban sõ go bai wan pisi goon a de fu de ta bei wakama.

⁸ Hën mbei de ta kai di goon dë Buuu Goon te kisi fa u dë aki.

⁹ Wë nõõ fa di soni pasa naandë, nõõ a kai makandi ku wan soni di tjabukama u Gadu de kai Jelemia bi taki a fesi, a taa: “De tei dee diiteni soofu mõni di dee Isaëli sëmbë bi si taa a hia tjika fu paka u di sëmbë dë,

¹⁰ nõõ hën de go bai wan goon ku ën a dee sëmbë ta tëmbë ku doti, kumafa Masa Gadu manda mi.” Sõ a bi dë sikifisikifi a di Buku kaa e.

Aki de dë a Gaama Pilati pisi.

Maik. 15:2-15; Luk. 23:3-5, 13-15; Joh. 18:33-19:16

¹¹ Wë nõõ di juu dë, de bi tja Masa Jesosi go a Gaama Pilati kaa. Nõõ hën di Gaama hakisi ën taa: “Wë ju da di kõnu u dee Dju sëmbë tuu nõõ?”

Nõõ hën Masa Jesosi piki ën taa: “A dë leti kumafa i si Gaama taki naandë.”

¹² Di juu dë, dee Gaan Begima ku dee Gaan Womi ta pii soni ta mindi ta buta a Masa Jesosi hedi tee a hia, ma Masa Jesosi an ta piki. A dë fëën pii nõõ.

¹³ Nõõ hën di Gaama hakisi ën taa: “Wë ja ta jei dee hia hogi fii de ta konda dë nõõ? Nõõ ja o piki nõõ?”

¹⁴ Ma Masa Jesosi an taki na wan soni mõõnsõ. Nõõ di soni ko bigi da Gaama seei fu di a dë fëën pii, an ta piki.

¹⁵ Wë nõõ a bi dë sõ taa te di Pasika daka dou, nõõ Gaama bi guwenti u puu wan sëmbë di lanti kë a dunguwosu da de.

¹⁶ Nõõ di ten dë, wan gaan hogihatima de ta kai Balabasi bi dë a dunguwosu.

¹⁷ Nõõ hën Gaama bia fan ku dee hia sëmbë dee bi hai ko dë taa: “Wë lanti, un saanfa di guwenti fuunu dë taa mi musu lusu wan sëmbë da unu.” Wë nõõ undi u dee sëmbë aki un kë fu mi lusu da unu: Balabasi, naa Jesosi di un ta kai di Paamusi Kõnu fuunu aki?”

¹⁸ Wë fa a hakisi di soni naandë, nõõ a sabi taa dee Dju hedima bi tja Masa Jesosi ko nëën fu di de ta haun ku ën. “Hën wë mbei na de a hakisi di soni ma a hakisi dee sõsõ sinkii sëmbë.”

¹⁹ Nõõ fa Gaama ta fan ku dee sëmbë dë, nõõ a bi dë sindosindo a di kuutubangi fëën. Te wan pisi, hën wan sëmbë tja wan buka ko dëën taa hën mujëë taki taa an musu dë a dendu fu di kuutu u di gaan bumbuu sëmbë

naandë. Biga a di ndeti dë a bi sunjan wan sunjan, nöö a dëen fuka seei gaanfa nëen hati. Sö wë di mujëe u Gaama manda taki dëen.

²⁰Nöö di juu ten Gaama ta haika di buka fëen mujëe naandë, nöö dee Gaan Begima ku dee Gaan Womi ta tuusi dee sösö sinkii sëmbë a baka ta duwengi de taa: “Un piki taa Balabasi faa lusu e! Un piki taa Balabasi un kë. Jesosi nöömö de musu kii.” Sö dee felantima u Masa Jesosi ta manda de u de taki.

²¹Nöö hën aan soni möön. Gaama bia hakisi de taa: “Wë andi un feni fuun piki?”

Nöö hën de tuu bai wööö ku wan tóngö taa: “Balabasi hën u kë e! Balabasi hën i musu lusu!”

²²Hën a hakisi taa: “Wë andi un kë u mi du ku Jesosi di de ta kai di Paamusi Könu fuunu aki?”

Hën de bai piki taa: “De musu pekëen a lakpa pau kii e!”

²³Nöö hën Gaama toona hakisi de taa: “Ma wë un hogi seei wë a bi du?”

Hën de ta bai möön taanga nango taa: “Un pekëen nöö, un pekëen a lakpa pau kii e!”

²⁴Nöö fa de ta bai dë, nöö Gaama ta luku de diin. A si taa an sa tapa de te a heepi möönsö. Ee an piki fa de kë, nöö de o mbei toobi booko di köndë.

Nöö hën a tei wata nöö hën a wasi maun te a kaba a hii dee sëmbë fesi dë. Hën a taa: “Söö, mi kaba e. Mi wasi maun puu miseei a dendu fu di buuu u di bumbuu sëmbë aki an fika a mi hedi. Soni fëen fika da unu e.”

²⁵Nöö hën hii dee Dju sëmbë sai naandë tuu bai taa: “Aai, be a fika a u ku dee mii fuu tuu hedi e, taa u kii ën. Wa a’ toobi!”

²⁶Nöö hën wë Gaama lusu Balabasi puu a dunguwosu da de. Hën a manda dee sodati fëen u de fon Masa Jesosi te de kaba, hën a butëen a de maun u de pekëen a lakpa pau kii.

Aki dee sodati ta mbei

Masa Jesosi fa.

Maik. 15:16-20; Joh. 19:2-3

²⁷Nöö hën dee sodati tei Masa Jesosi hën de tjëen go a di wosu u Gaama dendu. Nöö hën de bai da dee otowan u de taa: “Un kö lontu ën e!”

Nöö hën hii dee sodati u di lö dë tuu ko lomboto ën gililii sö.

²⁸Hën de puu dee koosu fëen nëen sinkii di a bi bisi, hën de bisi ën wan langa djapona bëëë sö, kumafa könu ta bisi.

²⁹Nöö hën de tei wan agbago maka hën de lolu ën te de kaba mbei kuma könu kaapusa, hën de tuusi ën nëen hedi. Nöö hën de tei wan baluma hën de butëen nëen maun kuma könu pau. Nöö hën de ta mbei ën fa ta tjökö kini a goon ta bai taa: “Wodi o, könu u dee Dju! Wodi o, könu!”

³⁰Nöö de ta tunta nëen fesi. Te wan pisi nöö hën de puu di pau nëen maun nöö hën de ta naki ën ku ën a hedi gboogboo sö sömëni pasi.

³¹Nöö di de du ku ën sö tefa de kaba, hën de toona puu di könu djapona nëen sinkii, hën de tei dee fëen koosu toona bisi dëen baka. Nöö awaa de o tjëen go ka de o pekëen a di lakpa pau.

Aki de peka Masa Jesosi

a lakpa pau.

Maik. 15:21-32; Luk. 23:26-43; Joh. 19:17-27

³²Nöö fa de ta tja Masa Jesosi nango dë, te wan pisi nöö hën de miti ku wan womi de kai Simon. A dë wan sëmbë u di köndë de kai Sileni, wan Afiiikan

köndë. Nöö fa de si ën dë, hën de duwengi ën faa tei di lakpa pau u Masa Jesosi tja dëen, biga hënseei an sa tjëen möön.

³³⁻³⁴ Nöö hën de nango te de go dou a di kamian de kai Golugata, hënseei da Hedibonu Kamian. Nöö hën de tei win mökisi ku bita hën de da Masa Jesosi faa bebe. Ma di a tesi ën kaa nöö an këen. Nöö hën de kandi ën a di lakpa pau a goon dë peka ku peegu tefa de kaba.

³⁵ Nöö di dee sodati pekëen tefa de kaba kaa, hën de hopo ën ku di lakpa pau taanpu a pë. Nöö hën de tei dee bisi fëen dee bi dë nëen sinkii, hën de tuwë lötu luku ambë ku ambë o wini dee koosu fëen te de kaba, nöö hën de paati de puu.

³⁶ Nöö di de du sö kaa te de kaba, nöö hën de sindo u de naandë ta watji Masa Jesosi.

³⁷ Ma nöö de bi tei wan paanga hën de sikifi soni nëen te de kaba taa DISI DA JESOSI DI KÖNU U DEE DJU SËMBË, hën de pekëen leti a di lakpa pau hedi. Biga sö dee Loomë lanti bi guwenti u piki sëmbë faandi mbei de peka di sëmbë a di lakpa pau.

³⁸ Nöö fa de ta kii Masa Jesosi a lakpa pau dë, nöö de ta kii tu oto sëmbë a lakpa pau tu. Wan dë nëen letimaun së, wan dë nëen töötömaun së, nöö Masa Jesosi dë a mindi. Wë de tu oto sëmbë naandë, de bi dë fufuuma ta watji sëmbë ta kisi fon u de tei soni fii tja go, nöö hën de peka de ku Masa Jesosi a di wan ten dë.

³⁹ Nöö fa u du dë, nöö sëmëni sëmbë ta waka ta pasa a di kamian. Nöö te de si Masa Jesosi a di lakpa pau, nöö de ta kosi ën ta mbei ën fa ta seki hedi,

⁴⁰ ta taki taa: “Wë ju bi taa joo booko di Wosu u Masa Gadu puu nöö a dii daka dendu joo toona mbei ën baka. Sö i bi mbei taa i a' kaakiti tjika. Wë nöö andi mbei ja sa puu i seei a di lakpa pau dë? Ee i da di Mii u Gadu tuutuu, nöö saka kumutu a di lakpa pau boo si e.” Sö de ta taki fa i si de ta pasa dë.

⁴¹ Nöö söseei dee Gaan Begima ku dee Sabima u Wëti ku dee Gaan Womi ta mbei ën fa ta lafu ën tu. De ta taki taa:

⁴² “Höön, wë a bi ta heepi oto sëmbë. Andi mbei an sa heepi ën seei? Jee? Ee hën da di Paamusi Könu fuu tuu, wë nöö be a saka kumutu a di lakpa pau ko a goon, nöö woo hiibi ën.

⁴³ Fa a sai dë, a taa a ta buta futoou fëen a Gadu liba. Wë nöö be Gadu heepi ën biga a taa Gadu dëen tata.”

⁴⁴ Nöö söseei dee hogi sëmbë dee dë pekapeka nëen bandja dë ta kosi ën ta mbei ën fa tu, fa de ku ën sai naandë.

Aki Masa Jesosi dëdë.

Maik. 15:33-41; Luk. 23:44-49; Joh. 19:28-30

⁴⁵ Ma nöö fu kumutu a tuwalufu juu sonuati u tee kisi dii juu sapate, nöö hii di köndë tuu ko zuguu pii. Hii dii juu langa a tan sö dungudungu kankan.

⁴⁶ Nöö a di dii juu ten dë, hën Masa Jesosi bai taanga a di töngö fuu, a taa: “Eloi, Eloi, lama sabaktani?” Di dë kë taki: “Gadu e, di Gadu u mi, andi mbei i bia baka disa mi sö?”

⁴⁷ Nöö dee sëmbë dee sai taanputaanpu naandë nöö de jei ën, ma nöö de an sabi andi a taki. Nöö hën de taa: “Dee sëmbë, un haika. Elia në wë a ta kai dë sö e, faa musu ko heepi ën.”

⁴⁸ Nöö hën wan u de kule go tei wan sipönsu, hën a munjëen ku wan gandjigandji win te a kaba, hën a butëen a wan pau buka tëndë dëen faa bebe.

⁴⁹ Ma dee otowan taa: “Nönö, un tan. Un disëen boo luku ee Elia o ko heepi ën tuu.”

⁵⁰ Nöö fa u mbei dë, nöö hën Masa Jesosi bai wan taanga bai möön, hën a manda di akaa fëen go awaa. A dëdë pii, böö fëen koti.

⁵¹ Nöö di juu dë seei, hën sômëni gaan foombo soni ko pasa. Biga di gaan degi koosu bi dë a di Wosu u Masa Gadu di bi tapa di möön hebi kamba u Masa Gaangadu fu libisëmbë an sa dou ala, hën tënë seei zalalaa kumutu a liba te kisi goon, di kamian fika jabijabi hooo. Goonliba ta seki ta bai. Gaangaan sitonu ta bai ta latja.

⁵² Nöö sômëni u dee geebi u di köndë booko jabi, nöö wanlô hia sëmbë dee bi ta biibi Gadu toona weki ko ku libi baka.

⁵³ Hën de kumutu a dee geebi, ma nöö de an go a di köndë ganda u Jelusalen eti. Tefa baka di Masa Jesosi seei toona weki baka a dëdë bifô de go a Jelusalen awaa. Nöö sômëni sëmbë si de e, fa de toona weki baka dë.

⁵⁴ Söö. Wë nöö dee sodati ku di hedima u de, di de si fa di goonliba seki, dee gaangaan soni pasa dë, nöö hati u de latja te na soni. De taa: “Wë di soni aan soni. Di sëmbë aki, a bi musu dë Miii u Masa Gaangadu tuutuu.”

⁵⁵ Nöö hii fa i si de bi ta du ku Masa Jesosi naandë, nöö wanlô mujëë bi dë taanputaanpu te a longi ala ta luku. Dee mujëë naandë, fu sensi a di ten di Masa Jesosi bi seti di wooko fëen a Galilea, nöö de bi ta sölugu fëen nöömö.

⁵⁶ Wan u de da Malia u Magidala, di otowan da Malia di mama u Jakobosi ku Josëfu, ku di mama u de tu womi müi u Zebedeosi. Sô de bi dë te ala ta luku andi de ta du ku Masa Jesosi.

Aki de tja Masa Jesosi sinkii

go bei.

Maik. 15:42-47; Luk. 23:50-56; Joh. 19:38-42

⁵⁷ Nöö hën u dë tefa sapate buka. Nöö wan guduma de kai Josëfu bi dë a Jelusalen dë, nöö di köndë de kai Alimatea hën da köndë fëen. Nöö hënseei bi dë wan sëmbë ta biibi a Masa Jesosi tu.

⁵⁸ Nöö di a si taa Masa Jesosi dëdë, hën a go a Gaama Pilati go hakisi ën pasi faa go tei di dëdë sinkii fëen tja go bei. Hën Gaama taa antoobi, hën a manda sodati fu de puu ën a di lakpa pau dëen.

⁵⁹ Nöö hën Josëfu tei di dëdë, hën a lolu ën a wan gaan langa weti koosu tefa a kaba.

⁶⁰ Nöö a bi abi wan sitonu baaku di de bi seeka njunjun u bei sëmbë, nöö hën a tja di dëdë go buta a di baaku dë dendu. Hën de logoda wan gaan gindi sitonu tuwë ko tapa di baaku buka te de kaba, nöö hën de go.

⁶¹ Nöö fa de ta du dë, nöö Malia fu Magidala ku di oto Malia bi dë leti dë sindosindo a di oto së u di geebi ala ta luku.

Aki dee sodati ta watji di geebi.

⁶² Nöö di juu dë, di daka de ta seeka da di saba pasa kaa. Ma hii fu di dë, dee Gaan Begima ku dee Faliseima, hën wë de go a Gaama gbolo.

⁶³ Hën de kai ën: “Köndë Masa.”

A piki.

De taa: “Wë u ko a unu aki. U ko taki wan oto ku unu taa di ten di di bödjëema naandë bi dë ku libi, nöö a ta taki kodo taa te a dëdë nöö a di u dii daka fëen nöö a o toona weki ko ku libi baka. Sô a bi ta taki e.

⁶⁴ “Wë nöö u kë begi Gaama fuun buta sëmbë a di geebi be de watji ën dii daka longi fu sëmbë an musu ko dë. Biga ee wan du sô, nöö dee bakama fëen o go fufuu di sinkii fëen tja go, nöö de o go ta ganjan sëmbë taa a weki baka a dëdë. Nöö di lö ganjan dë o hogi möön leki fa de bi ta ganjan sëmbë a fesi

e. Nöo hën wë tja u ko a Gaama aki, u ko begi ën faa musu heepi u a di lö pisi dë.”

⁶⁵ Nöo hën Gaama taa: “Wë un go tei wanlö sodati tja go buta, nöo un seeka di geebi tapa kumafa un sa tapëen.”

⁶⁶ Nöo di a da de pasi sô, nöo hën de go tapa di geebi tee de kaba naki sitampu nëen fu sëmbë an ko dë. Hën de tei sodati buta a di kamian ta watji da de, nöo hën de go u de.

28

Aki Masa Jesosi weki baka.

Maik. 16:1-10; Luk. 24:1-12; Joh. 20:1-10

¹ Wë nöo hën u dë teefa di saba daka pasa. Nöo di oto daka di o ko dë möön, hën da di fosu daka u di wiki. Hën da sonde. Hën di daka dë, hën Malia fu Magidala ku di oto Malia hopo hën de tei pasi nango a di geebi ka de bi bei Masa Jesosi. Nöo di juu dë, sonu seti kumutu kaa.

² Wë nöo wan gaan soni bi pasa a di ndeti dë. Goonliba bi seki tee na soni, hën wan basia u Masa Gadu Köndë kumutu a liba ala bazia ko a di geebi ka de bi bei Masa Jesosi. Nöo hën a puu di gaan gindi sitonu di de bi tapa di baaku buka, hën a go sindo leti a di sitonu dë liba.

³ Nöo fa a sai naandë, fesi fëen ta sëndë teee kuma te gaangadu koti faja, nöo dee koosu fëen sinkii dë wetiweti faan.

⁴ Nöo hën dee sodati dee bi sai dë ta watji di geebi, di de si di soni pasa sô kaa, nöo hën de fëëë tee de ta tëëmë tjatjatja tombi kai a goon gbolou dë pii kuma de dëdë. Sô de panta tjika.

⁵ Wë nöo hën de tu mujëë waka go dou a di geebi. Nöo di de si di basia fu Gadu dë, hën de fëëë te na soni.

Nöo hën a kai de taa: “Dee mujëë aki.”

De piki.

A taa: “Wan fëëë sô e. Mi sabi ambë un ta suku kaa. Jesosi di de kii a di lakpa pau, hën wë un ta suku.

⁶ Wë an dë aki möön e. A weki baka leti kumafa i si a bi taki da unu ufö a dëdë. Un ko luku di kamian ka de bi butëen. Wan si ö? Sëmbë an sai dë möön. A go.

⁷ “Nöo mi taki e, un bia toona, nöo un kule go a dee bakama fëen go piki de taa a weki baka a dëdë nöo a o waka a de fesi go a Galilea. Ala de ku ën o miti kumafa a bi taki. Un jei bunu fa mi taki da unu ö? Mi fan ku unu kaa e.”

⁸ Nöo hën dee mujëë toona kumutu dë. De ta panta möönsö ma etiseei de ta wai. Hën de ta kule nango u de tja di bunu buka dë go konda da u dee bakama u Masa Jesosi.

⁹ Ma nöo fa de nango dë, te u de kë mëni, hën de ku Masa Jesosi seei miti a pasi. Hën Masa Jesosi da de odi taa: “Dee mujëë aki, un weki nö?”

Nöo di sondi bigi da de teee. Hën de saka tjökö kini a goon nëen fesi, hën de ta kisi ën a futu dë ta baasa.

¹⁰ Ma nöo hën Masa Jesosi taki da de taa: “Dee mujëë, wan fëëë e. Un go taki da dee otowan u mi taa be de go a Galilea, nöo ala mi ku de o miti kumafa mi bi taki da de.”

Aki de buta dee wakitima

u de mindi soni.

¹¹ Wë nõö di juu dë, so u dee sodati kumutu ka de bi ta watji di geebi naandë, hën de kule go a ganda go a dee Gaan Begima. Hën de go konda da de kumafa hii soni bi pasa ka de bi ta watji a di geebi ala.

¹²⁻¹³ Nõö di dee begima jei sö kaa, nõö hën de kai dee Gaan Womi tuu ko a de. Hën de go sindo a kuutu fu de taki ee andi de sa feni fu di soni di pasa naandë.

Nõö di de kuutu tefa de kaba, hën de toona kai dee sodati ko a de mõn, hën de taki da de taa: “Wë un haika e. Woo paka unu wan gaan mõni aki, nõö wan musu konda taa weki di womi weki e. Ma un musu piki sëmbë taa un bi duumi, nõö hën dee bakama fëen ko fufuu ën tei tja go. Sö un musu taki. Nõö wan musu fëë e.

¹⁴ Biga ee di taki dë dou a di Gaama jesi, nõö woo heepi unu fan ku ën tee nõö hati fëen o kötö.”

¹⁵ Nõö hën wë dee watjima tei di mõni naandë, nõö hën de ta konda leti kumafa dee hedima manda de. Nõö fa de ta taki ën dë, nõö sö nõö dee Dju sëmbë ta kondëen te kisi fa u dë aki eti.

Aki Masa Jesosi ta manda dee sëmbë fëen u de go paaja di buka.

Maik. 16:14-18; Luk. 24:36-49; Joh. 20:19-23; Tjab. 1:6-8

¹⁶ Nõö hën wë dee mujëe ko dou a u dee ëlufu bakama u Masa Jesosi, hën de da u di buka te de kaba. Nõö di u jei sö nõö aan soni mõn, hën wë u go a Galilea. Hën u nango tefa u go dou a di kuun ka Masa Jesosi bi taki da u a fesi fuu go, nõö hën u go si ën ala.

¹⁷ Nõö di u si ën, hën u tjökö kini a goon nëen fesi ta bigi ën. Ma nõö so fuu an saandi seei fuu pakisei, a bigi da u poi.

¹⁸ Nõö hën Masa Jesosi waka ko a u awaa, hën a taki da u taa: “Söö, wë dee sëmbë, un haika e. Mi kisi hii makiti a liba ala ku goon aki tuu.

¹⁹ Nõö un musu ta waka a dee kõndëkõndë u goonliba ta paaja di buka u mi da hii sëmbë, be de bia ko dë bakama u mi kuma unu. Nõö un musu dopu de a di në u mi Tata ku di në u mi di Mii fëen aki ku di në u di Akaa fu mi Tata tu.

²⁰ Nõö un musu ta lei de u de piki hii dee soni tuu dee mi manda unu fuun musu ta du kaa. Nõö fa woon nango dë, nõö mi taki da unu taa mi o dë ku unu hiniwanten e, u tee a kaba u di goonliba aki.”

Sö wë Masa Jesosi fan ku u dee bakama fëen a di kuun liba ala e.
A kaba.

Dee woto u Masa Jesosi dee Maikusi sikifi

Wan wöutu a fesi.

Söö. Wë andi di pisi u di buku aki o taki da u, dee sëmbë?

Wë a di fosu kamian, nöö di pisi aki de kai Maikusi, biga hën da di në u di womi di de taa sikifi ën. Nöö a so pisi u Gadu Buku de ta kai di womi aki Johanisi Maikusi. Di womi aki an bi dë wan u dee tuwalufu bakama ta waka ku Masa Jesosi hiniwanten e, ma a bi dë wan biibima nöö u di ten dë.

Nöö fa Maikusi sikifi sondi u Masa Jesosi aki, nöö a sikifi andi a bi jei fëën a oto sëmbë, ku andi hënseei bi sabi tu. Biga di dee bakama u Masa Jesosi seti di wooko ta tja di buka ta konda a köndëköndë, nöö di Maikusi aki bi dë ku de a di wooko. Nöö so sëmbë si kuma Petuisi hën bi konda sëmëni u dee sondi dëën, biga a ta fan hia sondi u Petuisi a di pampia aki.

Wë nöö dee fö sëmbë dee bi sikifi soni u di libi u Masa Jesosi a goonliba aki, nöö so u de bi sikifi möön fini a dee soni dee a bi ta lei. Ma Maikusi, hën a sikifi möön fini a dee soni dee a du, be sëmbë sabi taki aai, Masa Jesosi bi abi gaan kaakiti ku gaan taki tuu.

Nöö di a o tapa di pampia, hën a taki finifini fa de kii Masa Jesosi. Ma nöö fu di a taki a di weki baka a dëdë fëën kölö poi, hën mbei wanlö oto sëmbë taki di pisi dë go möön longi.

Nöö dee leima ta mëni kuma Maikusi sikifi di pampia aki kuma 70 jaa baka di Masa Jesosi ko pali a goonliba aki. Nöö fa a sikifi ën, nöö a sikifi ën da dee oto köndë sëmbë dee an dë Dju sëmbë, be de sabi dee soni dee Masa Jesosi bi du di a bi dë a goonliba aki.

Aki ta lei fa di Bunu Buka

u Masa Jesosi seti.

Mat. 3:1-12; Luk. 3:1-18; Joh. 1:19-28

¹ Söö dee sëmbë, leti kumafa woo taki aki, nöö sô nöö di Bunu Buka u Masa Jesosi di Paamusi Könu seti e. Jesosi Keesitu hën da di Mii u Masa Gaangadu seei, nöö di pampia aki o lei i fa a dë.

² Nöö a bi ko pasa leti kumafa di sëmbë de kai Jesaaja bi sikifi buta a di Buku u Gadu. Biga Jesaaja bi dë wan tjabukama u Gadu u fesiten, hën a sikifi wan soni u di Könu Gadu bi paamusi taa a o manda ko a dee Dju sëmbë. A taa, Gadu o manda wan sëmbë waka a di Paamusi Könu dë fesi faa musu buta sëmbë a pasi dëën.

³ Nöö di sëmbë dë o dë a di sabana dendu ta bai basia ta taki taa:

Un seeka di pasi da Masa ooo,

be a dë limbolimbo gbegedee dëën.

Un seeka dee bendibendi pisi u di pasi,

be de ko dë tololoo.

Sô Jesaaja bi sikifi taa sô wan sëmbë o ko sai dë ta bai.

⁴ Wë nöö da sô a ko pasa tuu leti kumafa Gadu bi taki dë e. Biga wan womi de kai Johanisi di Dopuma, hën Gadu manda ko. Nöö fa a ko naandë, nöö a ta libi a di sabana dendu u di pisiwata de kai Judea. Naandë a ta bai di basia ta dopu sëmbë. Nöö sëmëni sëmbë ta ko nëën nöömö, nöö a ta bai ta taki: “Un bia disa di hogilibi fuunu oo, nöö unu ku Masa Gaangadu o ko bunu. Gaangadu an o hoi dee hogi du fuunu a bëë möön.” Sô a ta bai ta taki.

⁵ Nöo hii dee sëmbë u di pisiwata u Judea naandë, ku di mama köndë fëen de kai Jelusalen, nöo de tuu ta ko a Johanisi naandë ta ko ta haika fa a ta bai di basia. Nöo hën de ko ta piki taa: “Awa, wa ta libi bunu tuu.” Nöo te wan sëmbë i piki sô kaa, nöo Johanisi ta dopu i a di lio de kai Joodan dë.

⁶ Söö. Wë nöo di koosu fu Johanisi di a ta bisi nëen sinkii, a mbei ku di puuma u di mbeti de ta kai kamëli. Atiti ku höniwata da sondi u njan fëen. Sö wan sëmbë a bi dë e.

⁷⁻⁸ Nöo Johanisi toona ta fan ku dee sëmbë. A taa: “Un haika e, dee sëmbë. Wan oto Sëmbë o ko a mi baka nöo a hebi möön mi gaanfa e. Ma bumbuu tjika seei u sa bendi lusu di susu fëen puu nëen futu. Fa mii dë aki, mi ta dopu unu ku wata, ma di Sëmbë di o ko dë, nöo hën a o dopu unu ku di Akaa u Masa Gaangadu. „Biga a o mandëen ko a unu liba.”

Di pisi aki o lei fa Johanisi

dopu Masa Jesosi.

Mat. 3:13-17; Luk. 3:21-22

⁹ Wë nöo di juu dë, hën Masa Jesosi kumutu a di köndë de kai Nazalëti u di pisiwata de kai Galilea, nöo hën a ko a Joodan Lio naandë fu Johanisi musu dopu ën. Nöo hën Johanisi dopu ën te a kaba.

¹⁰ Nöo fa Masa Jesosi ta kumutu a di wata dendu ta ko a tela, nöo hën a luku nëen liba ala hën a si liba jabi hoo. Nöo hën a si di Akaa u Gadu kuma wan pomba bazia ko nëen liba.

¹¹ Nöo hën wan tóngö piki a liba ala taa: “I da mi lobi Womi Mii. Libi fii ta kai ku mi e.”

Sö wan soni pasa di Masa Jesosi dopu.

Aki di didibi ta biinga ku Masa Jesosi faa du hogi.

Mat. 4:1-11; Luk. 4:1-13

¹² Söö. Wë nöo a baka u di dë, nöo hën di Akaa u Gadu tja Masa Jesosi go a wan sabana kamian.

¹³ Nöo hën a go dë ala hii föteni daka. Nöo a dee föteni daka dendu dë, nöo di didibi ta mbei möiti ku ën nöömö faa musu piki ën buka a soni, ma nöo Masa Jesosi an du kumafa a kë möönsö.

Nöo fa Masa Jesosi dë a di sabana dee hia daka naandë, nöo dee mbeti u di sabana bi sai dë tu, ma dee basia u Gadu Köndë bi dë ku ën ta tjubi ën.

Aki o lei fa Masa Jesosi kai

dee fosu bakama fëen.

Mat. 4:12-22; Luk. 4:14-15, 5:1-11

¹⁴ Hën de dë te wan daka, nöo hën de kisi Johanisi di Dopuma söötö a dunguwosu. Nöo baka u di dë, hën Masa Jesosi toona go a Galilea, nöo hën a seti ta waka ta lontu ta konda di Bunu Buka u Gadu da dee sëmbë u di pisiwata dë.

¹⁵ A ta taki da de taa: “Di juu ko zuntu e, u Masa Gadu musu tii unu a wan njunjun fasi. Nöo ee wan sëmbë i kë ko a di Njunjun Tii u Gadu dendu, nöo i musu bia disa di hogilibi fii, nöo i piki di Bunu Buka u Gadu di mi ta konda aki.” Sö Masa Jesosi ta taki da de.

¹⁶ Nöo wan piki ze bi dë a di pisiwata u Galilea naandë. Te wan daka nöo hën Masa Jesosi go ta waka a di ze dë bandja, nöo hën a ko miti ku tu womi. Dee womi aki dë baaa ku baaa. Wan de kai Simon, „hënseei de ko ta kai Petuisi. Di otowan da Andiasi. De dë ta tuwë nëti u de kisi fisi biga hën da wooko u de de ta du.

17 Nöo hën Masa Jesosi kai de tu baaa dë te de piki. A taa: “Un ko dë ku mi ta waka a mi baka e, nöo mi o lei unu fuun kisi libisëmbë tja ko a mi së.”

18 Nöo wantewante naandë, hën de tu womi disa dee nëti u de hën de go ta waka a Masa Jesosi baka.

19-20 Nöo hën Masa Jesosi waka go möön longi, nöo hën a ko si tu oto baaa möön. De seei dë höndima tu ta kisi fisi. Nöo fa Masa Jesosi ta pasa dë, nöo de bi dë ku de tata a boto ta seeka wanlö nëti u de. Wan u dee baaa de ta kai Johanisi, di otowan da Jakobosi, nöo di tata u de hën de kai Zebedeosi.

Nöo di Masa Jesosi si de tu baaa dë, hën a kai de taa: “Un ko go ku mi e.” Nöo hën wante dë, hën de disa de tata ku dee wookoma u de naandë, nöo hën de go ta waka a Masa Jesosi baka.

Aki ta lei fa Masa Jesosi abi taki

a dee gadu liba tjika.

Luk. 4:31-37

21 Nöo hën Masa Jesosi kumutu naandë, hën ku dee bakama fëen, hën de go a wan u dee köndë u Galilea de ta kai Kapenaumi. Nöo hën de dë te di saba daka, hën Masa Jesosi go a di keikiwosu u di köndë go ta lei dee sëmbë dee bi ko dë di lei fëen.

22 Nöo fa a ta lei de naandë, a bigi da hii sëmbë tee na sondi. Biga an ta lei de kumafa dee Sabima u Wëti bi guwenti u lei de Gadu wöutu, ma a ta lei de seei a wan apaiti fasi kuma hënseei abi di lei.

23 Wë nöo di daka dë gbolo, wan womi bi dë a di keikiwosu naandë, a dë ku wan soni nëen liba. Nöo hën wë a bai ko a hedi ko ta fan. A taa:

24 “Jesosi u Nazalëti, andi seei u ku i abi? I ko aki fii kaba u a sösö nö? Wë mi sabi ambë da i. I wë da di apaiti Sëmbë u Gadu di a manda ko a di goonliba aki.”

25 Nöo hën Masa Jesosi bai ën taa: “Kabuka naandë! Kumutu a di sëmbë liba wante.”

26 Nöo fa a fan dë, hën di soni ko möön taanga a di sëmbë liba te hii sinkii fëen ta tëëmë tjatjatjatja. Hën a bai taanga bifö a kumutu nëen awaa.

27 Wë nöo fa di soni pasa naandë, a ko foondo dee sëmbë tumisi. Hën de ko ta taki da de na de taa: “Dee sëmbë, andi u ta si aki? Njunjun lei ko a u nö? Di sëmbë aki abi taki a dee soni ta kisi sëmbë a hedi liba tee de ta piki hën buka a sondi seei.”

28 Nöo hën di soni Masa Jesosi du naandë paaja a hii dee köndëköndë u Galilea tuu paliu dou. Sö a bigi da sëmbë tjika.

Aki ta lei fa Masa Jesosi

kula wanlö hia sëmbë.

Mat. 8:14-17; Luk. 4:38-41

29 Nöo hën Masa Jesosi kumutu a di keikiwosu naandë, hën ku Jakobosi ku Johanisi, nöo hën de go a di wosu u Simon ku ën baaa Andiasi.

30 Di juu dë di mai u Simon bi dë ku gaan fëbë. A dë leti a bedi naandë. Hën de köndëen da Masa Jesosi.

31 Nöo hën wë Masa Jesosi go a di mama, hën a panjëen a maun hopo ën sindo. Nöo hën wantewante di fëbë go, a ko bunu seei te a hopo seeka soni da de.

32 Nöo hën de dë tefa sonu go, hën dee sëmbë u di köndë tja sëmbë te a hia ko a Masa Jesosi naandë. Dee sëmbë de tja ko dë, de dë ku peipei siki ufö i abi dee sëmbë dee dë ku soni a hedi.

33 Hii sëmbë u di köndë tuu fiaa hai ko a di dööbuka naandë,

³⁴ Nöo hën Masa Jesosi kula hii dee sëmbë ku dee pepei siki naandë te a kaba. Söseei a jaka dee soni ta kisi sëmbë a hedi. An da de pasi u de fan möönsö, biga an kë u de konda ambë dëen.

Aki ta lei fa Masa Jesosi lei dee sëmbë u di pisiwata u Galilea.

Luk. 4:42-44

³⁵ Nöo hën di mamate biten, ganian an kanda seei, nöo hën Masa Jesosi hopo. Hën a kumutu a di köndë ganda go dë a wan kamian piiii hën wanwan ta begi Masa Gaangadu.

³⁶ Te wan pisi hën Simon ku dee otowan fëen ko hopo, de an si Masa Jesosi a wosu dë, hën de go ta suku ën te fa de ko si ën.

³⁷ Nöo hën de hakisi ën taa: “Andi pasa? Dee sëmbë ta hakisi fa fii poi.”

³⁸ Nöo hën Masa Jesosi piki de taa: “Nönö, na soni. Ma un boo go a dee oto köndë ala tu e, go tja di Bunu Buka u Gadu go paaja. Biga wë hën mbei mi ko a goonliba.”

³⁹ Nöo hën de kumutu ala, hën de ta waka a dee köndëköndë u Galilea tuu. Fa de ta waka dë, nöo Masa Jesosi ta konda di Bunu Buka u Gadu da dee sëmbë a hii dee keikiwosu u dee Dju sëmbë. Nöo a ta jaka dee soni ta kisi sëmbë a hedi ta puu a de liba.

Aki ta lei fa Masa Jesosi kula

wan sëmbë ku tjinasiki.

Mat. 8:1-4; Luk. 5:12-16

⁴⁰ Hën de dë te wan daka, nöo hën wan sëmbë dë ku tjinasiki ko a Masa Jesosi. Nöo hën a tjökö kini a goon nëen fesi begi ën taa: “Ee, Masa o, mi sabi taa ee i kë i sa kula mi o.”

⁴¹ Nöo hën tjali u di sëmbë kisi Masa Jesosi, nöo hën a tëndë maun panjëen. Hën a taa: “Aai mati, mi kë e. Be i ko bunu wante!”

⁴² Nöo fa a fan dë, hën di sëmbë ko bunu wantewante naandë, di tjinasiki an dë u si nëen sinkii möön seei.

⁴³⁻⁴⁴ Nöo hën Masa Jesosi mandëen taa be a go. Ma nöo a bai ën tu taa: “Na konda di sondi pasa ku i aki da sëmbë e! Ma waka tololo go a di begima di ta dë a di keikiwosu, be a si taa i ko bunu. Nöo i tja di paima go tuwë da Gadu kumafa Mosesi bi taki.” „Biga gaanduwe Gadu bi da wan tiima u dee Dju sëmbë de kai Mosesi dee wëti fëen. A taa te wan sëmbë i ko bunu u sö wan siki, nöo i musu tja paima go da Gadu bifö i sa toona go a wosu baka.”

⁴⁵ Ma nöo fa di sëmbë kumutu naandë, an tapëen buka möönsö. Ma a go ta paaja di taki naandë te dou hii di köndë, te Masa Jesosi an bi sa ko a dee köndë ganda möön u sëmbë si ën. Nöo hën a fika a döösë ka sëmbë an ta dë hia, ma töku sëmbë ta kumutu a hii së nango nëen ala eti.

2

Aki Masa Jesosi kula wan sëmbë.

Mat. 9:1-8; Luk. 5:17-26

¹ Baka wan tu daka sö, hën Masa Jesosi toona go a Kapenaumi. Nöo an dou seei, hën di njunsu paaja taa sö wan soni, Masa Jesosi toona ko nëen wosu.

² Nöo hën dee sëmbë u di köndë booko gulululu ko fuu di kamian naandë pöö te kamian an dë u denda go a wosu dendu möön seei.

³ Di juu dë, Masa Jesosi dë a di wosu dendu ta konda di Buka u Gadu da dee sëmbë.

Te wan pisi hën fö womi ko dou ku wan lanlan sëmbë di de ta tja a wan kama liba ko dëen faa kula.

4 Ma nöö fa sëmbë hia a di kamian tjika dë, nöö de fõ womi an sa feni pasi u pasa go dou a Masa Jesosi. Nöö hën de subi a wan sikada go a di wosuliba. „Biga dee wosuliba u di köndë bi dë paatapaata.” Nöö hën de fula wan baaku leti a Masa Jesosi liba dë, hën de saka di womi a di kama liba zëngëë ku tatai te go buta leti a Masa Jesosi fesi a goon dë.

5 Nöö hën di Masa Jesosi si fa dee womi ta biibi ën tjika te de mbei sò wan gaan möiti, nöö hën a taki da di lan womi taa: “Na fëëë, womi. Mi da i paadon u dee hogi dee i bi du. Masa Gadu an ta hoi i a bëë möön e!”

6 Ma nöö wanlõ Sabima u Wëti bi dë sindosindo leti naandë ta haika soni. Nöö di fa Masa Jesosi fan dë an bunu a de seei, kwetikweti. Nöö hën de ta guunjëën a de hati taa:

7 “Unfa di womi dë sa a’ hati u taki sò wan gaan soni? Na sösö a ta sösö Masa Gadu nõ? Biga ambë sa puu sëmbë a Gadu bëë boiti Masa Gadu seei nõ?”

8 Ma nöö Masa Jesosi sabi taa sò de ta pakisei, nöö hën a hakisi de taa: “Dee sëmbë o, unfa un ta mëni hogi u mi a unu hati sò?”

9 Wë mi hakisi unu e, taa ee fii taki da sò wan sëmbë taa Gadu puu ën a bëë, ee nasõ fii taki dëën taa, be a hopo waka go, nöö undi u de tu soni dë sa möön fukë u taki ku buka? „Na di fosu wan nõ? Biga sëmbë an sa go a Gadu go hakisi ën ee a puu di sëmbë a bëë tuu.”

10 “Ma nöö un luku. Mi o lei unu taa Mi di ko Libisëmbë Mii aki, na fan nõö mi sa fan, ma mi abi makiti tu a di goonliba aki fu mi sa puu sëmbë a Gadu bëë.”

11 Nöö hën a bia fan ku di womi taa: “Mati, hopo taanpu! Tei i kama nõö i go fii a wosu!”

12 Nöö fa a fan dë, hën di womi hopo vu taanpu a pë a dee hia sëmbë fesi naandë, nöö hën a tei ën kama hën a waka go fëën a wosu.

Nöö di soni naandë bigi da hii sëmbë tee de ko ta gafa Gadu taa: “Hoo, wa si sò wan gaan soni wan daka.”

Aki Masa Jesosi kai Leifi

faa ko waka nëën baka.

Mat. 9:9-13; Luk. 5:27-32

13 Nöö hën Masa Jesosi kumutu hën a go a di piki ze u Galilea bandja. Nöö sëmbë ta ko nëën naandë te a hia, nöö a ta da de di lei fëën.

14 Nöö hën a ta waka nango. Te wan pisi, hën a si wan womi de kai Leifi. „Hën seei da Mateosi.” A dë fëën sindosindo a wan piki wosu a bandja pasi dë ta pii lantimõni, biga hën da wooko fëën kaa. Nöö di Leifi aki, wan womi de kai Alufasi hën pai ën. Nöö di Masa Jesosi si ën, hën a kai ën faa musu ko bakama fëën. Nöö wantewante hën Leifi hopo ko ta waka nëën baka.

15 Wë nõö a ko pasa sò taa Leifi kai Masa Jesosi ku dee bakama fëën fu de musu ko njan ku ën nëën wosu. Nöö hën de go sindo u de njan. Nöö sëmëni u dee pii-lanti-mõnima ku sëmëni oto sëmbë dee abi poi nè a di köndë, nõö sò de ko dë ta njan ku de a wan tafa makandi. Biga hia u dee lõ pei sëmbë naandë bi ta waka a Masa Jesosi baka kaa.

16 Te wan pisi nõö hën wë dee Sabima u Wëti ko ta pasa naandë gbolo, dee u di Dju paatëi de kai Falisei. Nöö hën de ko si Masa Jesosi dë sindosindo ku dee pii-lanti-mõnima ku dee oto nëpoima u di köndë dë ta njan makandi, nõö di soni an bunu a de seei, kwetikweti.

Nöö hën de hakisi dee bakama u Masa Jesosi taa: “Faandi mbei di mësitë fuunu go dë ta njan ku dee lõ pei sëmbë naandë a wan tafa u du?”

¹⁷ Nöo di Masa Jesosi jei di hakisi u de, nöo hën a piki de a nöngö taa: “Dee sëmbë o, unfa un mëni? Wan sëmbë di siki ku wan sëmbë di dë bumbuu, undi u de abi data fanöudu? Na di sikima nö? Wë nöo ma ko u kai dee sëmbë dee dë bumbuu sëmbë kaa e, ma mi ko u kai dee sëmbë dee an ta libi bunu a Gadu wojo, fu mi heepi de.” Nöo sö a piki de.

Aki ta lei faandi mbei Masa Jesosi

ku dee bakama fëen an ta disa

u njan a di fasi u Dju.

Mat. 9:14-17; Luk. 5:33-39

¹⁸ Hën de dë te wan pisi. Nöo di juu dë, dee bakama u Johanisi di Dopuma ku dee u dee Faliseima ta hoi deseei söndö njan. Biga sö dee Dju sëmbë abi wan guwenti taa so juu de ta tja hangi u wan pisiten fu begi hedi. Nöo hën wan tu sëmbë ko a Masa Jesosi, hën de hakisi ën taa: “Faandi mbei dee bakama u Johanisi ku dee u dee Faliseima ta tja hangi fu begi hedi, ma i ku dee bakama fii wan ta du sö?”

¹⁹ Nöo hën Masa Jesosi piki de a wan nöngö fasi, a taa: “Fa u dë aki, ee wan sëmbë o tööu, nöo a o kai sömëni sëmbë ko a di piizii, na sö nö? Wë nöo solanga di tööuma dë ku de naandë, nöo de an sa ta kusumi ta tja hangi. Wai nöo de o ta wai.

²⁰ Ma te di juu dou de ko puu ën a de mindi bifö de o sa ta kusumi ta tja hangi awaa.”

²¹ Nöo hën a taa: “Fa mi ta fan ku unu aki, ma a sa toobi unu fu un tei. Biga na wan sëmbë o tei wan njunjun koosu pisi u lapu wan awoo koosu. Biga te i wasi ën nöo di njunjun pisi o hai kumutu disa di awoo wan, nöo di baaku o ko möön bigi möön leki fa a bi dë kaa.

²² “Söseei tu, ja sa tei wan njunjun win lai a wan awoo mbeti kakisa saku. Biga di awoo saku gaandi kaa, an ta hai möön. Nöo ee i lai di njunjun win go nëen dendu, nöo te di win soopu nöo di saku o tënë tuwë di win fiaa. Da a ko dë i lasi di win fii ku di saku tuu.

“Ma nöo i musu tei wan njunjun saku nöo i lai di njunjun win nëen, nöo de tuu o dë bunu kumafa a fiti.”

Aki ta lei taa Masa Jesosi

hën da basi u di saba daka.

Mat. 12:1-8; Luk. 6:1-5

²³ Nöo hën de dë te wan saba daka, nöo hën wë Masa Jesosi ku dee bakama fëen ta latja ta pasa a wan goon dendu. Di goon naandë, de paandi wan pei soni kuma alisi nëen, ma i sa njan mën kuakua. Nöo hën wë dee bakama ta booko dee taka dee bendi ko a di pasi naandë ta gili a maun ta njan.

²⁴ Di juu dë wanlö sëmbë u di Faliseima kulupu si de, hën de ko hakisi Masa Jesosi taa: “Fa dee bakama fii ta du dë, na Gadu wëti de ta poi nö? Biga de ta wooko a saba daka.”

²⁵⁻²⁶ Nöo hën a piki de taa: “Wan bi lesi a Gadu buku nö, di soni bi pasa ku Dafiti a di ten u di Kaba Hei Begima de kai Abiata? Hangi bi ta kii hën ku dee mati fëen, nöo hën a go a di wosu u Gadu, hën dee begima da de di bëë di de ta buta da Gadu naandë. Nöo hën Dafiti njan mën, hën ku dee mati fëen tuu. Wë nöo di bëë naandë, dee begima wanwan nöo bi a' pasi u njan mën, na sö nö? Ma tökuseei Gadu an tei Dafiti ku dee sëmbë fëen fu hogi di de njan mën o.”

²⁷ Nöo hën a taki da de taa: “Haika e, dee sëmbë. Masa Gaangadu an mbei libisëmbë fu de hoi saba tjina hedi e, ma a mbei di saba faa heepi libisëmbë.

28 Nöo mi taki da unu, taa Mi di i si ko Libisëmbë Mii aki, nöo mi dë Masa a hii soni liba e te dou ku di saba tuu.”

Sö wan soni Masa Jesosi taki da dee Faliseima a di ten dë.

3

Aki ta lei fa Masa Jesosi kula

wan sëmbë a saba daka.

Mat. 12:9-14; Luk. 6:6-11

1 Wë nöo a wan oto saba möön, hën Masa Jesosi toona go a di keikiwosu. Nöo di a go dou, nöo wan womi sai naandë, wan së maun fëen dë dëedëe tjakaa.

2 Ma nöo sëmbë dë leti dë ta watji Masa Jesosi ee a o kula di womi a di saba daka naandë, biga de kë feni föutu nëen u de tjëen go kaagi.

3 Nöo hën wë aan soni. Hën Masa Jesosi taki da di womi di dë ku di dëedëe maun naandë taa be a hopo taanpu a dee hia sëmbë fesi dë. Nöo hën a hopo taanpu.

4 Nöo hën Masa Jesosi bia hakisi dee sëmbë dee sai naandë taa: “Unfa Gadu Buku taki, dee sëmbë? Undi möön bunu? Fii du bunu a saba, naa fii du hogi? Fii musu puu sëmbë a dëdë buka, naa fii disëen faa dëdë? Unfa Gadu wëti sikifi fëen?” Ma nöo fa a hakisi de naandë, na wan sëmbë piki ën möönsö, de tuu ko dë pii.

5 Nöo hën a luku de ku hatiboonu. Ma nöo a hati ën tu, fu di de abi sö wan taangajesi da Gadu te tjali u sëmbë an ta kisi de möönsö.

Nöo hën a bia fan ku di womi taa: “Mati, tëndë di maun fii i si.” Nöo hën di womi tëndëen maun, nöo hën wantewante di maun ko bunu leti kumafa a bi musu dë.

6 Nöo hën wë dee Faliseima kumutu dë, hën de waka go langalanga tee a di kulupu u di Könu u di köndë, hën da Helodi. Nöo hën de ko ta kuutu makandi unfa u de du de kisi Masa Jesosi kii.

„Sö di soni Masa Jesosi du dë hati de tjika.”

Aki ta lei fa dee sëmbë ta ko hia a Masa Jesosi liba.

7 Wë nöo wan daka möön, hën Masa Jesosi ku dee bakama fëen hën de go a di piki ze u Galilea bandja.

8 Nöo fa de ko dou dë, hën wanlö hia sëmbë hai ko nëen gidjii, dee sëmbë u Jelusalen ku hii dee oto köndë u Judea, ku dee u di pisiwata de kai Idumea, ku dee sëmbë dee ta dë a di oto së banda u Joodan Liö, ku dee u dee köndëköndë u dee pisiwata de kai Tilusi ku Sidon. Sö dee sëmbë hai ko a Masa Jesosi tjika, biga de bi jei u dee foondo wooko a ta du.

9 Nöo di de ko hia sö kaa, nöo hën Masa Jesosi taki da dee bakama fëen taa be de seeka wan boto buta a bandja wata naandë dëen. Biga fa a ta kula sëmbë dë, nöo awaa seei de ta pusa ta ko nëen liba.

10 Biga de ta si taa ee de nama nëen, nöo de sa ko bunu nöömö.

11 Di juu dë, dee sëmbë dë ku soni a hedi, te de ko dou a Masa Jesosi nöo de ta bai kai olo seei kai a goon. Nöo de ta taki dëen taa: “U sabi ambë da i e!” I da di Mii u Masa Gaangadu.”

12 Ma nöo hiniwanten te de taki sö kaa, nöo Masa Jesosi ta gandji da de taa de an musu taki di soni dë.

Aki ta lei ambë ku ambë Masa Jesosi tei u ko bakama fëen.

Mat. 10:1-4; Luk. 6:12-16

¹³ Wë nõõ te wan pisi hën Masa Jesosi go a wan kamian ka wanlö hia kuun dë, nõõ hën a kai sòmëni sëmbë u de ko nëën.

¹⁴ Nõõ hën a pii tuwalufu womi a de dendu tei u de fika ku ën ta lei nëën nõömö, nõõ de de kai “apösutu”. Nõõ a o manda de go a køndëkøndë u de paaja di Bunu Buka u Gadu,

¹⁵ nõõ a o da de makiti tu u de ta jaka dee gadu ta kisi sëmbë a hedi puu a de liba.

¹⁶ Söö. Wë nõõ dee nè u de tuwalufu womi dee a tei dë, nõõ di fosu wan hën da Simon, hën Masa Jesosi ta kai Petuisi.

¹⁷ Nõõ joo kisi Jakobosi ku ën baaa Johanisi, de da de tu womi mii u di womi de kai Zebedeosi. Nõõ Masa Jesosi da de wan nè, a ta kai de Boanëgësi, nõõ di nè dë hën kë taki “Mii u Döndö”, „biga sò de tu baaa fasi bi dë.”

¹⁸ Nõõ baka u dee baaa dë, nõõ joo kisi Andiasi, Filipi, Batolomisi, Mateosi, Tomasi ku wan oto Jakobosi. Hën tata da Alufasi. Nõõ joo kisi Tadeosi ku wan oto Simon, nõõ di womi aki, hën bi dë a di paatëi u dee sëmbë dee ta suku u puu Loomë lanti a de liba.

¹⁹ Ufö joo kisi Judasi Isikaliotu, hën o sei Masa Jesosi buta a dee felantima maun.

Nõõ sò wanlö sëmbë Masa Jesosi tei u de dë ku ën makandi e.

Aki dee Dju hedima taa Masa Jesosi ta wooko ku didibi kaakiti.

Mat. 12:22-32, 46-50; Luk. 8:19-21, 11:14-23, 12:10

²⁰ Te wan daka möön hën Masa Jesosi go dë a wan wosu, nõõ hën sëmbë booko ko nëën naandë tee hën ku dee bakama fëen an sa fendi pasi u njan seei.

²¹ Te wan pisi hën dee mama bëë fëen ko jei taa sò ta pasa, hën de taa de o ko tei ën tja go. Biga de ta si kuma tja sondi kamian fëen an dë bunu möön.

²² Nõõ di juu dë, wanlö Sabima u Wëti u Jelusalen bi dë a Masa Jesosi naandë, hën di de si andi ta pasa hën de taa: “Wë di sondi aki an dë u taki oto fasi möönsö e. Hën di gaan hedima u dee didibi de kai Belisabo hën wë kisi ën a hedi sò. Hën ta dëen di taanga faa ta jaka dee gadu puu a dee sëmbë liba.”

²³ Nõõ Masa Jesosi „sabi taa sò de ta taki, hën a „kai de ko, hën a taki da de taa: “Dee sëmbë, unfa di didibi sa jaka dee otowan fëen puu a wan kamian? A sa booko di tii fëen seei sò nõõ?

²⁴ Biga ee dee sëmbë u wan køndë hopo feti ku deseiei, nõõ na booko di køndë dë o booko nõõ?

²⁵ Söseei ee wan bëë hopo ta feti ku deseiei, nõõ na booko di bëë naandë ta booko kaba a sösö nõõ?

²⁶ Wë nõõ ee di didibi ta feti ku ën seei sò, nõõ nëën da a ta kaba di tii fëen a sösö nõõ? Ma nõõ di soni ta pasa aki, na di soni un ta taki dë e.

²⁷ “Ma mi o taki da unu andi da di soni ta pasa aki. Te joo go tei gudu a wan taanga womi wosu, nõõ i musu kisi ën tai gingin ufö i sa go tei dee gudu fëen awaa. Wë nõõ hën u ta du aki e.

²⁸ Nõõ un dee leima u wëti aki, un haika. Fa i si un fan dë, un musu mëni unu seei e. Biga fu hii dee hogi dee sëmbë ta du, ee de ta kosi Masa Gaangadu seei ta sösö ën ta poi ën nè, Gadu sa puu de nëën bëë eti.

²⁹ Ma ee wan sëmbë i ta kosi di Akaa u Gadu ta wisiwasi ën, di sëmbë naandë an o kisi paadon a Gadu möönsö a mundu.”

³⁰ Nõõ sò Masa Jesosi fan ku dee sëmbë, fu di de taki taa di hedima u dee didibi hën dë nëën liba ta du dee foondo wooko.

³¹ Te wan pisi Masa Jesosi mama ku dee baaa fëen ko dou a dööbuka dë gbolo, hën de manda kai ën.

³² Nöö di juu dë, sëmëni sëmbe bi sindo lontu Masa Jesosi a di wosu dendu. Nöö hën sëmbe taki dëen taa: “Masa o, dee sëmbe fii ko aki, i mama ku dee baa fii, nöö de ta kai i e. De dë leti a dööbuka dë.”

³³ Nöö hën a taa: “Dee sëmbe u mi nö?”

³⁴⁻³⁵ Nöö hën a luku dee sëmbe sindosindo lontu ën naandë, hën a taa: “Un dee sëmbe aki dee ta du kumafa Gadu kë, nöö unu wë da mi mama ku mi baa ku mi sisa e.”

4

Aki Masa Jesosi da di oto

u di sëmbe ta jaa böngö.

Mat. 13:1-9; Luk. 8:4-8

¹ Wë nöö te wan oto daka möön, hën Masa Jesosi toona ko dë a di piki ze u Galilea bandja möön ta lei sëmbe Gadu wöutu. Nöö hën sëmëni sëmbe booko seei gililili ko nëen naandë, nöö hën a subi a wan boto bi dë a lampeesi dë, nöö hën a sindo. Nöö dee hia sëmbe dë a tela liba dë,

² nöö hën a tei wanlö woto ta lei de sëmëni sondi a wödu fasi.

³ A taa: “Wan goonma go ta jaa böngö nëen goon dendu.

⁴ Nöö fa a ta jaa ën naandë, nöö so fëen ta kai a di pasi liba nöö dee piki fou ta ko ta pii ën ta njan.

⁵ “So u di böngö ta kai a sitonu kamian ka doti an dë hia, nöö a nasi hesi seei.

⁶ Ma nöö hën di sonu ko hati, hën a kii ën, biga di sitonu kendi di lutu fëen.

⁷ “Nöö so u di böngö kai a maka dendu, nöö di böngö ku dee maka tuu ta göö makandi, ma dee maka ta peeta di njanjan te an sa ko sondi.

⁸ “Ma nöö dee otowan kai a bunu goon doti, nöö hën a göö ko puu njanjan e. Biga so puu diiteni toon möön hia möön fa a bi dë, so puu sikisiteni toon möön hia, otowan puu wanhöndö. Nöö sö di pisi dë ko njanjan tjika.”

⁹ Sö wan woto Masa Jesosi da dee sëmbe te a kaba, nöö hën a taa: “Wë fa mi fan ku unu aki, nöö un pakisei ën bunu e, be un fusutëen.”

Aki Masa Jesosi puu andi

di oto kë taki.

Mat. 13:10-23; Luk. 8:9-18

¹⁰ Nöö hën de dë te wan pisi, Masa Jesosi dë ku wantu sëmbe ku de tuwalufu bakama fëen, nöö hën de hakisi ën taa: “Masa o, faandi mbei i ta lei dee sëmbe a tjubi fasi sö?”

¹¹ Nöö hën a piki de taa: “Haika e. Unu wë Gadu naki kölöku fuun sa ko sabi dee tjubitjubi soni u di tii fëen. Ma dee oto sëmbe naandë, de an ta kë saka deseeri a di Tii u Gadu basu möönsö, nöö fëen mbei, mi ta lei de a tjubi fasi sö.

¹² Nöö a ko dë taa de ta si kodo ma de an ta fusutan, de ta haika kodo ma de an ta jei möönsö. Biga ee nasö de bi o bia de libi ko a Gadu, nöö a bi o puu de a bëë.”

¹³ Nöö hën a hakisi dee bakama fëen taa: “Wan bi fusutan di woto di mi lei dee sëmbe ö? Wë nöö unfu woon du fusutan dee oto sondi mi o toona lei sëmbe möön?”

¹⁴ Hën a taa: “Söö. Wë nöö un haika e, mi o puu ën da unu. Di goonma mi bi taki naandë, hën da di bosikopuma u Gadu e, nöö di böngö hën da di wöutu u Gadu di a ta tjia ta paaja.

15 Nöo ka di böngö kai a pasi liba, dee piki fou ko pii en njan dë, hën da dee sëmbë ta jei di wöutu u Gadu, ma te de jei en, nöo wantewante di didibi ta ko puu en a de pakisei djee, de an ta mëni en möön.

16 “Nöo ka di böngö kai a di doti ku sitonu a basu, hën da dee sëmbë dee jei di wöutu u Gadu hën de tei en seei ku wai,

17 ma de an ta hoi dou. Biga te sëmbë ta hoi de u felanti, fuka ku toobi ko miti de u di wöutu hedi, nöo de ta kumutu disa di biibi djee. Biga di wöutu an bi go fundu a de hati tjika.

18 “Nöo di goon ka di böngö kai a maka dendu dë, hën da dee sëmbë ta jei di wöutu

19 ma de ta abi bookohedi ku dee sondi u goonliba aki poi. Dee gudu u di goonliba aki ta ganjan de, de ta kë peipei sondi te de an ta a’ ten u di wöutu u Gadu, nöo an sa göö ko sondi a de libi möönsö.

20 “Ma nöo ka di böngö kai a di bunu goon, hën da dee sëmbë tei di wöutu u Gadu nöo de ta dëen pasi faa wooko a de hati. Nöo Gadu ta fendi wini a dee lö sëmbë naandë seei te a hia, leti kuma di böngö di puu diiteni toon möön hia möön fa a bi dë, ku sikisi toon, ku wan höndö toon.”

21 Nöo hën Masa Jesosi taa: “Fa i si di womi jaa di böngö naandë, nöo sö a musu du e, biga di wöutu u Gadu an musu fika tjubitjubi. Biga ee wan sëmbë tja wan faja ko a wan wosu dendu, nöo an o butëen a sondi basu. Ma a o butëen a wan kamian be hii sëmbë sa si limbo ku en, na sö nö?”

22 “Nöo un haika e, dee sëmbë. Dee soni mi ta lei a di fasi aki, de an o fika sö tjubitjubi u nöömö e. De o ko a döo wan daka nöömö u sëmbë musu ko sabi de. Biga hiniwan soni di dë tjubitjubi musu u ko a döo wan daka nöömö.”

23 Hën a taa: “Söö. Wë nöo fa mi fan ku unu aki, nöo un pakisei en bunu e, be un fusutëen.”

24 Nöo hën a taa: “Dee sëmbë, un buta pakisei a dee soni mi ta taki e. Biga di wan seei maaka joo tei u maaka soni, nöo ku hënseei de o toona maaka da i tu, nöo möön hia seei joo kisi a liba.

25 Biga ee wan sëmbë i kisi wan piki soni, nöo hën i wooko ku en, nöo joo toona kisi möön hia. Ma nöo ee ja wooko ku en möönsö, nöo di pikiwan di i bi kisi naandë joo lasi en fiaa.”

Sö Masa Jesosi taki di ten dë.

Aki Masa Jesosi konda wan woto fu di fa njanjan ta waka ko soni.

Mat. 13:31-34; Luk. 13:18-19

26 Nöo hën wan oto toon, hën Masa Jesosi tei wan oto woto toona lei dee sëmbë möön fa di Njunjun Tii u Gadu dë. A taa: “A dë leti kuma wan goonma go nëen goon dendu go jaa njanjan böngö te a kaba, nöo hën a go fëen a ganda.

27 Nöo fa a go dë, a fëeketé di oto naandë. A dë fëen nöo ta duumi ta weki.

28 “Ma nöo fa di böngö sai a di goon naandë, te wan pisi a tja aguja ko a döo. Hën a ta göö fëen ta ko, teee a ko dë ku bëë ko puu jakajaka seei ko abi njanjan.

29 Te wan pisi a lepi, juu fëen dou, hën di goonma ko koti. Ma nöo hii fa di njanjan waka ko sö naandë, ma di sëmbë di paandi en an saanf a du ufo a ko sö. Wë nöo leti sö nöo a ta pasa a di Njunjun Tii u Gadu dendu e.”

Sö wan oto Masa Jesosi da di juu dë.

30 Nöo hën a taa: “Un oto mi o toona tei u mi lei unu möön fa soni ta waka a di Njunjun Tii u Gadu dendu?”

31 Hën a taa: “Wë a dë sö leti kuma di uwii de kai mutaadi di u ta paandi a di köndë fuu aki. Fa a sai dë, nöo di sii fëen piki möön hii dee oto sii de ta paandi, na sö nö?”

³² Ma nöö te a göö, nöö a ta ko bigi pasa hii dee oto uwii tuu dee u ta paandi a goon dendu, te piki fou seei ta ko ta mbei wosu a dee maun fëen.

“Nöö sö nöö sondi dë a di Njunjun Tii u Gadu dendu e.”

³³⁻³⁴ Wë nöö te Masa Jesosi ta konda di wöutu u Gadu da sëmbë, nöö dee lö oto aki a lobi u tei konda. Biga a ta fan ku de a wan fasi kumafa de sa fusutan soni nöö. Ma te hën ku dee bakama fëen dë de wanwan, nöö a ta puu sondi da de möön fini.

Aki Masa Jesosi du wan gaan foondo soni a wata liba.

Mat. 8:23-27; Luk. 8:22-25

³⁵ Wan daka hën Masa Jesosi dë ta konda di wöutu u Gadu da dee gaan hia sëmbë naandë tefa sapate, nöö hën a fan ku dee bakama fëen taa: “Womi, un boo koti go a di oto së banda ala ufö.” Hën de taki aai.

³⁶ Nöö aan soni, hën de disa dee hia sëmbë naandë, nöö hën de tei Masa Jesosi leti fa a sai dë, nöö hën de subi a boto, hën de ta aba di piki ze naandë nango. Ma nöö wanlö oto boto ta faaka de.

³⁷⁻³⁸ Nöö fa de nango dë, hën Masa Jesosi go a di boto gogo ala wante go kandi buta hedi a wan kunsu liba, hën a duumi pii. „Wei nöö a wei sö.”

Nöö hën de nango te wan pisi, hën wan gaan ventu ko bigi möön hii soni ta seki di wata teee, di wata nango a di boto dendu seei djululuu, kuma de sa singi. Nöö dee bakama fëëë te na soni hën de kule go a Masa Jesosi go weki ën taa: “Masa, ja si taa woo dëdë kaba a di wata aki ö? Ja a’ toobi nö?”

³⁹ Nöö hën Masa Jesosi weki, hën a hopo. Hën a bai di ventu ku di sekiwata taa: “Un tan pii e!” Nöö fa a fan dë, wantewante hën di ventu ku di wata tan pii.

⁴⁰ Nöö hën Masa Jesosi hakisi dee bakama taa: “Andi mbei un fëëë sö? „Wan a’ futoou a mi liba eti nö?”

⁴¹ Nöö hën dee bakama panta te na soni, de ko dë ta luku deseei diin ta hakisi de na de taa: “Womi, ambë da di sëmbë aki di abi sö wan poosian te gaan ventu ku sekiwata seei ta piki ën buka a soni?”

5

Aki Masa Jesosi jaka wanlö taku soni puu a wan womi liba.

Mat. 8:28-34; Luk. 8:26-39

¹ Wë nöö hën Masa Jesosi ku dee bakama fëen aba di piki ze go tjökö a di pisiwata u dee Galasëni sëmbë.

²⁻⁴ Nöö fa de ta kumutu a boto dë, nöö hën de ko miti ku wan womi di wanlö taku soni dë nëën liba gbolo. Di womi aki ta libi a dee sitonu baaku u di köndë ka de ta bei sëmbë, nöö a dë sö taanga tee na wan sëmbë seei sa kisi ën hoi buta a wan kamian pii. Biga sëmëni pasi de bi pooba bui ën nëën maun ku ën futu tuu, ma nöö a ta koti dee këti seei wököwökö kule go fëen.

⁵ Nöö a ndeti ku didia di womi aki ta dë a di geebi naandë ta sanga nango ta ko ta bai ta kai wolo ta koti ën seei ku sitonu pisi hii ën sinkii.

⁶ Nöö fa a dë a di kamian naandë te wan pisi hën a si Masa Jesosi te ala, nöö hën a kule ko kai a goon nëën fesi holou sö.

⁷ Nöö hën a ta bai taanga seei ta fan ku ën taa: “Andi tja i ko aki, Jesosi, i di Womi Mii u di möön hei Gadu u mundu? Andi u ku i abi eee? Mi begi i taa be i soi a Masa Gadu fesi taa ja o da mi sitaafu e!”

⁸ Nöö sö a taki, biga Masa Jesosi bi fan ku di soni nëën liba naandë taa a musu go kumutu dë.

⁹ Nöö hën Masa Jesosi hakisi di womi taa: “Un në fii?”

Hën a taa: “Mi de kai A-Hia-Möön-Hii, biga u dë seei te a hia.”

¹⁰ Nöo hën de ta begi Masa Jesosi seei nöömö, taa: “Gaantangi, na jaka u puu a di pisiwata aki e, u begi i.”

¹¹ Nöo zuntu ku di kamian naandë i abi wan kununu, nöo wanlö hia hagu bi sai nëen ta pii sondi ta njan.

¹² Nöo hën dee taku soni begi Masa Jesosi taa: “Ee joo puu u a di sëmbë aki liba, nöo gaantangi da u pasi fuu go a dee hagu e.”

¹³ Hën Masa Jesosi da de pasi.

Hën de tuu kumutu a di sëmbë go a dee hagu. Fa u mbei naandë hën dee hagu tei kule seei ta bazia di kununu naandë gililili te a di ze u Galilea dubuu pii. Dee hagu dëdë a wata fiaa. Nöo de bi dë kuma tu dusu hagu sö.

¹⁴ Nöo di dee sëmbë bi dë ta watji dee hagu naandë si di soni, nöo hën de kule go a ganda go konda taa sö wan sondi pasa ku dee hagu.

Nöo hën dee sëmbë u di köndë booko seei gililili ko a Masa Jesosi.

¹⁵⁻¹⁶ Fa de ko dou, hën de si di sëmbë di bi dë ku dee hia taku soni nëen liba sindosindo pii ku koosu a sinkii, ku bunu fusutan seei. Nöo dee sëmbë dee bi sai dë, hën de konda da dee otowan te de kaba kumafa de si soni pasa ku di womi ku dee hagu.

¹⁷ Nöo hën dee sëmbë u di köndë begi Masa Jesosi taa gaantangi be a kumutu a di pisiwata u de go fëen.

¹⁸ Nöo Masa Jesosi an fia ku de. A piki, hën a go a boto wante faa go.

Ma nöo hën di womi a bi jaka dee taku soni puu nëen liba dë begi ën taa: “Masa, gaantangi, be mi go ku i e.”

¹⁹ Ma nöo Masa Jesosi an dëen pasi faa go ku ën. A taki dëen taa: “Mati o, toona go a dee sëmbë fii ku dee mati fii e, nöo i go konda da de di bunu Gadu du da i aki, ku di fa a saa i tjika.”

²⁰ Nöo hën di womi go e, hën a ta konda di sondi pasa ku ën a hii di pisiwata naandë tuu palalaa te dou, kumafa Gadu heepi ën tjika. Baa nöo di sondi dë foond sëmbë e.

Nöo da sö wan gaan wooko Masa Jesosi du a di pisiwata de kai Dekapolisi naandë.

Aki Masa Jesosi heepi wan mujëë ku wan mujëë mii.

Mat. 9:18-26; Luk. 8:40-56

²¹ Wë nöo hën Masa Jesosi ku dee bakama fëen toona aba go a di oto së banda ala, nöo fa de go dou dë hën sëmbë ko lontu ën seei te a hia buta a mindi.

²² Nöo di juu dë, hën wan womi de kai Jailusi ko dou. Di womi aki, a dë wan u dee hedima u keiki u di köndë naandë. Nöo di a si Masa Jesosi hën a kai ku kini a goon.

²³ A taki dëen taa: “Gaantangi mi begi i, nama maun a wan mujëë mii u mi da mi. A siki seei te fu dëdë.”

²⁴ Nöo hën de tei pasi u de go a di hedima wosu, nöo dee hia sëmbë naandë ta bondji Masa Jesosi seei gililili sö nango ku ën.

²⁵ Wë nöo di juu dë wan mujëë bi dë a dee sëmbë dendu naandë, sondi ta kule nëen tuwalufu jaa longi kaa.

²⁶ A bi go a sëmëni data, de kulëen te de wei. Hii möni fëen tuu kaba këëë, ma ka u di siki bëtë awaa a ta ko möön hogi.

²⁷⁻²⁸ Nöo hën di mujëë ko jei u Masa Jesosi gbolo, nöo hën a taa a o ko nëen ko suku heepi tu. Biga a taa: “Ee mi sa nama tjë söseei a di koosu fëen, nöo mi si kuma mi sa ko bëtë nöömö.” Sö di mujëë ta taki nëen hati.

Nöö hën a ta tuusi hënseei a dee sëmbë mindi dë tefa a ko nama maun a di koosu u Masa Jesosi kumafa a bi taki.

²⁹ Nöö di a nama nëën, wantewante dë a fii taa a ko bëtë djeee, di soni an ta kule nëën möön. A ko böö u di sitaafu dë.

³⁰ Nöö Masa Jesosi seei fii taa wan poosian kumutu nëën kula wan sëmbë, nöö hën wante a bia hakisi dee hia sëmbë ta waka nëën baka naandë taa: “Ambë panjan di koosu u mi?”

³¹ Nöö hën dee bakama fëën piki taa: “Masa, dee gaan hia sëmbë ta bondji i gililili aki, hën i taa ee ambë nama a i nö?”

³² Ma nöö Masa Jesosi ta tuwë wojo a dee hia sëmbë dendu naandë, faa si ee ambë bi panjëen.

³³ Nöö hën di di mujëe ko sabi taa sö wan gaan sondi pasa ku ën, nöö hën a ko fëëe seei. Hën a ko tuwëen seei a goon a Masa Jesosi fesi naandë, hën a konda hii di sondi te a kaba kumafa a bi waka.

³⁴ Nöö hën Masa Jesosi fan ku ën taa: “Mujëe, di fa i si i biibi a mi tjika dë, hën wë mbei i fendi heepi e. Nöö go fii, i böö u di siki bi ta sitaafu i dë.”

³⁵ Nöö an kaba u fan ku di mujëe seei, nöö hën wanlô sëmbë ko dou dë. De kumutu a di wosu u Jailusi, di hedima u keiki di bi ko begi Masa Jesosi faa ko kula di mujëe mii fëen dëen. Nöö hën de fan ku Jailusi taa: “Mati o, gaan sondi. An dë u di mësité ko a i wosu möön e, biga di mujëe mii fii lasi libi kaa.”

³⁶ Nöö hën Masa Jesosi jei fa de fan, ma nöö an dë gaan sondi dëen seei. Nöö hën a fan ku Jailusi taa: “Na fëëe e, mati. Ta biibi a mi nöömö.”

³⁷ Nöö hën de nango a di wosu ka di mujëe mii dë dëdëdëdë ala. Ma nöö Masa Jesosi an mbei dee hia sëmbë go ku ën möön. Petuisi, ku Jakobosi, ku ën baa Johanisi, de nöö a mbei go ku ën.

³⁸ Nöö di de naki tefa de go dou a di wosu, nöö sëmëni sëmbë sai naandë kaa ta mbei wajawaja ta bai ta këë ta kai olo te a bigi.

³⁹ Nöö hën Masa Jesosi denda go a di wosu, hën a hakisi dee sëmbë taa: “Andi un ta du a di kamian aki sö? Biga na dëdë di mujëe mii dëdë e. Duumi a ta duumi.”

⁴⁰ Nöö fa a fan dë, hën de lafu ën te a bigi, biga de sabi bunu taa di mujëe mii dëdë tuu.

Nöö hën a buta dee sëmbë naandë tuu go a döö, nöö hën a kai di tata ku di mama u di mujëe mii, ku de dii bakama fëën naandë, nöö hën de go a di kamba ka di dëdë dë.

⁴¹ Nöö hën Masa Jesosi go panjan di dëdë a maun, hën a taa: “Talita kumi,” dati wan taki: “Mujëe mii, hopo taanpu fii e!”

⁴² Nöö fa a taki naandë, hën di mujëe mii hopo taanpu a pë. Hën a ta waka ta lontu a di wosu dendu, biga a abi tuwalufu jaa kaa. Baa nöö di soni pasa dë, a bigi da dee sëmbë e.

⁴³ Nöö hën Masa Jesosi bai de taa: “Di sondi i si pasa aki, wan musu taki ën da sëmbë e. Nöö un da di mujëe mii soni u njan.”

Nöö sö wan gaan soni Masa Jesosi du möön e, ka a dë a di pisiwata naandë.

6

Aki Masa Jesosi toona go

a Nazalëti.

Mat. 13:53-58; Luk. 4:16-30

¹ Wë nöö hën Masa Jesosi ku dee bakama fëën kumutu naandë, nöö hën de go a di köndë ka a bi kiija. [Hën da Nazalëti.]

² Nöo a di saba daka, hën a go a di keikiwosu go ta lei dee sëmbë u di köndë dee lei fëen.

Nöo fa a ta fan dë, a ta bigi da de seei, nöo hën de bia ta hakisi de na de taa: “Naasë a kumutu ko aki ku dee lei fëen dë? Unsë a feni sö wan köni? Ambë dëen kaakiti faa ta du dee foondo wooko u ta jei a ta du?”

³ Biga na di tëmbëma bi dë aki nëen disi nö? Na di mii aki Malia bi pali nö? Dee baaa fëen u sabi de bunu: Jakobosi, Josëfu, Judasi, ku Simon. Dee sisa fëen, na u ku de ta dë aki nö?” Nöo hën de tei ën u hogi te na soni.

⁴ Nöo hën Masa Jesosi taki da de taa: “Un haika e, dee sëmbë. Wan tjabukama u Gadu an ta fuka u nëbai a oto köndë e, boiti a di köndë ka a bi kiija, ku dee bëë fëen. A de nöo an ta fendi gafa.”

⁵⁻⁶ Ma fa a fan dë seei, ma a bigi dëen fa dee sëmbë an kë biibi ën. Nöo fëen mbei an du foondo wooko naandë möönsö, boiti wantu sëmbë nöo a kula, di a buta maun a de liba.

Nöo hën a kumutu naandë hën a go a dee oto köndë u di pisiwata dë go ta lei sëmbë.

A di pisi aki Masa Jesosi manda

dee bakama fëen go

a dee köndëköndë.

Mat. 10:1, 5-15; Luk. 9:1-6

⁷ Te wan daka hën Masa Jesosi kai de tuwalufu bakama fëen ko nëen. Nöo hën a taki da de taa: “Un haika e, mi o manda unu go tu ku tu a dee köndëköndë, nöo woon go konda taa Masa Gadu ta hopo wan njunjun tii.” Nöo mi o da unu makiti fuun sa jaka dee soni ta ko a sëmbë hedi puu a de liba.

⁸⁻⁹ “Ma nöo fa woon go aki, wan musu tja soni e. Wan musu tja bëëë. Wan musu tja tu susu, di fuunu futu dë tjika kaa. Wan musu tja tu koosu tu, di dë a unu sinkii dë tjika kaa. Wan musu tja möni e. Nöo di kokoti a i maun dë, hën nöo fii tja.

¹⁰ “Nöo fa woon go aki, nöo te un dou a wan köndë, nöo di sëmbë di o kisi unu buta nëen wosu, nöo naandë un musu tan fu te un kumutu a di köndë dë e. Wan musu kumutu dë go tan a oto wosu möönsö.

¹¹ “Nöo te un go a wan köndë ka de an kë unu, de an kë jei di lei fuunu, nöo un kumutu disa di köndë dë go e. Ma bifö un go un musu feki di basufutu sandu fuunu tuwë a di köndë kuma wan maaka u de si taa di hebi fika da de.”

Nöo sö Masa Jesosi fan ku dee bakama fëen te a kaba.

¹² Nöo hën dee bakama go e. Hën de go ta konda da dee sëmbë a dee köndëköndë taa be de bia disa dee hogilibi u de.

¹³ Nöo fa de go dë, nöo de heepi sëmbë e. Biga de jaka sëmëni soni bi ta kisi sëmbë a hedi puu a de liba, de tutu fatu a sëmëni sikima sinkii kula de ko bunu.

Aki ta lei andi pasa ku Johanisi

di Dopuma.

Mat. 14:1-12; Luk. 9:7-9

¹⁴⁻¹⁶ Nöo fa Masa Jesosi ta du dee foondo wooko a di pisiwata u Galilea naandë, nöo në fëen ta bai ta paaja nango a dee köndëköndë. De ta taki nëen liba seei.

So sɛmbɛ taa: “Un haika, dee sɛmbɛ. Johanisi di Dopuma di di kɔnu bi manda dee sodati kii, hɛn wɛ toona weki a dɛdɛ e, hɛn a tei oto nɛ ta tja.”

Otowan taa: “Nɔnɔ, di fesiten Tjabukama u Gadu de kai Elia, hɛn di dɛ e. Hɛn toona weki ta tja oto nɛ.”

Otowan a dendu taa: “Nɔnɔ e, na weki di sɛmbɛ aki weki a dɛdɛ, ma a dɛ wan hebi Tjabukama u Gadu nɔɔ, kuma dee bi dɛ a fesi.” Nɔɔ sɔ dee sɛmbɛ ta fan pepei soni u Masa Jesosi.

Te nɔɔ di kɔnu u di kɔndɛ de kai Helodi seei ko jei u Masa Jesosi. Hɛn a taa: “Awa, Johanisi di Dopuma di mi bi manda sɛmbɛ kii, hɛn toona weki tuu. Biga hɛn nɔɔ sa du dee lɔ foondo wooko mi ta jei di sɛmbɛ naandɛ ta du dɛ.” Sɔ hɛn a taki.

¹⁷⁻²⁰ Wɛ nɔɔ fa di Kɔnu fan dɛ, a bi kii di Dopuma tuu o, biga a bi manda sodati go koti ɛn hedi puu. Nɔɔ di sonɔi mbei a du sɔ. Di Kɔnu bi abi wan baaa fɛɛn de kai Filipi, nɔɔ di baaa bi abi wan mujɛɛ de kai Helodiasi. Nɔɔ hɛn di Kɔnu tei di mujɛɛ u di baaa fɛɛn aki buta a wosu gbolo. Nɔɔ hɛn di a du sɔ, hɛn wɛ Johanisi bai ɛn taa an du bunu, biga a booko Gadu wɛti fa a tei ɛn suwagi dɛ.

Nɔɔ hɛn di di mujɛɛ jei taa sɔ Johanisi bai di manu fɛɛn, nɔɔ a tei Johanisi fu hogi. A hoi ɛn a bɛɛ seei, a kɛ kii ɛn nɔɔmɔ. Ma nɔɔ di Kɔnu an dɛɛn pasi faa musu kii ɛn, biga a ta lesipeki Johanisi, a ta si taa a dɛ wan bumbuu sɛmbɛ ta libi kumafa Gadu kɛ. Ma nɔɔ u di Kɔnu musu du di mujɛɛ fɛɛn wan piizii, hɛn a manda sodati buta Johanisi a dunguwosu. Ma so juu di kɔnu ta kai Johanisi faa fan ku ɛn, nɔɔ a lobi u ta haikɛɛn, hii fa dee fan u Johanisi ta toobi ɛn seei.

²¹ Wɛ nɔɔ hɛn de dɛ te wan daka gbolo, di mujɛɛ kisi pasi faa du ku Johanisi kumafa a bi kɛ. Biga a ko pasa sɔ taa di Kɔnu fujai, nɔɔ hɛn a hoi wan gaan piizii. A kai hii dee bigima u di pisiwata naandɛ tuu ko a di piizii: dee lanti hedima, ku dee hedima u sodati, ku dee guduma.

²² Nɔɔ hɛn de dɛ a di piizii dendu tee wan pisi. Nɔɔ di baa mujɛɛ fɛɛn di a tei dɛ bi abi wan mujɛɛ mii fɛɛn. Nɔɔ hɛn di mujɛɛ mii ko baja wan gaan, dɛɛ wojo, baja bigi mɔɔn hii sonɔi. Baa nɔɔ a suti da di Kɔnu ku hii dee bigima sai naandɛ te na soni, fa di mujɛɛ mii baja dɛ.

²³ Nɔɔ hɛn di kɔnu kai di mujɛɛ mii ko nɛɛn, hɛn a taa: “Wɛ mii, di baja i baja aki a suti poi, nɔɔ mi kɛ paka i e. Ma nɔɔ i musu piki mi andi i kɛ, nɔɔ mi soi a hii dee bigima aki fesi tuu taa hiniwan sonɔi di i hakisi mi mi o da i ɛn kaa. Ee hafu u di kɔndɛ mi ta tii aki seei i kɛ, mi o da i ɛn.” Sɔ di Kɔnu taki da di mujɛɛ mii.

²⁴ Nɔɔ di a taki sɔ, hɛn di mii kule seei hesihesi go nɛɛn mama taa: “Maama o, sɔ di Kɔnu taki da mi e, nɔɔ andi mi musu hakisi ɛn?”

Nɔɔ hɛn di mama piki di mujɛɛ mii taa: “Go piki di kɔnu e, taa i kɛ u de tja di hedi u Johanisi di Dopuma a wan paatu dendu ko da i.”

²⁵ Nɔɔ hɛn di mii kule hesihesi go a di kɔnu. A taa: “Wɛ Kɔndɛ Masa, mi ko piki di sonɔi mi kɛ e. Mi kɛ fii da mi di hedi u Johanisi di Dopuma a wan paatu dendu hesihesi seei.”

²⁶ Wɛ nɔɔ di di Kɔnu jei sɔ, nɔɔ hati fɛɛn ko latja, biga a hati ɛn faa musu du sɔ wan sonɔi ku di Dopuma. Ma nɔɔ fu di soi a bi soi a dee bigima naandɛ fesi da di mujɛɛ mii kaa, fɛɛn mbei an sa puu di buka dɛ mɔɔn.

²⁷ Nɔɔ aan kɔni, hɛn a manda wan sodati faa go koti Johanisi hedi buta a wan paatu tja ko. Nɔɔ hɛn di sodati go koti Johanisi hedi belim puu,

²⁸ hɛn a tei buta a di paatu tja ko da di mujɛɛ mii. Nɔɔ hɛn di mii tei tja go nɛɛn mama.

²⁹ Wè nöö di dee bakama u Johanisi jei di taki dë, nöö a hati de e, ma heepi an dë. Nöö hën de ko tei di dëdë sinkii fëen tja go bei. Nöö da sò wan gaan hogi Kõnu Helodi du e.

Aki ta lei fa Masa Jesosi bi da

hia sëmbë soni u njan.

Mat. 14:13-21; Luk. 9:10-17; Joh. 6:1-14

³⁰ Wè nöö hën dee bakama u Masa Jesosi, dee a bi manda go a køndëkøndë, hën de toona ko nëen baka, nöö hën de konda dëen te de kaba fa de lei dee sëmbë ku fa de du di wooko tjika.

³¹ Nöö hën Masa Jesosi taki da de taa: “Un sabi nö? Un boo go a wan pii kamian u wanwan ka sëmbë an dë, fuu sa böö abiti sò.” Nöö di sondi mbei a taki sò, biga hia sëmbë ta kumutu a dee køndëkøndë ta ko nëen nöömò ta suku heepi te hën ku dee bakama fëen an sa fendi pasi u njan, bamba u de böö seei.

³² Nöö hën de kai a boto ta puu nango a di kamian ka de o go dë de wanwan.

³³ Ma nöö wanlò hia sëmbë si de, nöö de sabi kaa taa a sò wan kamian de nango. Nöö hën de kule lontu a bandja wata u de go miti ku de a di oto sè banda ala.

³⁴ Nöö di Jesosi ku dee bakama fëen go tjökò, hën de si dee hia sëmbë naandë ta luku de kaa. Nöö aan soni, hën Masa Jesosi go ta lei de sòmëni soni möön, biga tjali u de kisi ën. A si taa de dë kuma wanlò hia sikafu sòndò tiima ta waka ta daama nango ta ko.

³⁵⁻³⁶ Nöö fa u mbei dë, nöö sapate ta ko kaa, nöö hën dee bakama taki da Masa Jesosi taa: “Masa o, i sabi nö? A tjika fii manda dee sëmbë go, be de go suku sondi u njan bai a dee køndëkøndë a u bandja aki. Biga sëmbë an ta libi ka u dë aki, nöö sondi u njan an dë aki u fendi tu.”

³⁷ Ma nöö hën Masa Jesosi taa: “Nönö e, unu musu da de sondi u njan.”

Hën de taki dëen taa: “Unfa i mëni? Dee sòmëni sëmbë aki, u o da de sondi u njan nö? Biga di möni di u musu puu bai sondi u njan da de, nöö a musu dë aiti liba wooko möni.” Sò dee bakama fëen piki ën.

³⁸ Nöö hën Masa Jesosi hakisi de taa: “Un mëni bëëë un abi aki? Un go luku i sl.”

Nöö hën de go luku te de ko, hën de ko piki ën taa: “U abi feifi bëëë ku tu fisi nöö.”

³⁹ Nöö hën a manda de taa: “Un go mbei dee sëmbë sindo a dee ahun liba aki na alò e.”

⁴⁰ Nöö hën de go mbei dee sëmbë sindo a hiphipi, feifiteni ku feifiteni a wan hipi, wan hõndò ku wan hõndò a wan hipi.

⁴¹ Nöö hën di de sindo sò kaa, hën Masa Jesosi tei de feifi bëëë ku de tu fisi, nöö hën a hopo wojo luku liba da Masa Gadu tangi te a kaba, hën a booko de pisipisi te a kaba. Nöö hën a tëndë da dee bakama taa be de paati da dee sëmbë. Nöö hën de tei paati da dee sòmëni sëmbë naandë tee lontu ko kai.

⁴² Nöö hii dee sëmbë tuu seei njan te bëë u de fuu, de an kè möön.

⁴³⁻⁴⁴ Wè nöö di mëni sëmbë njan di ten dë, feifi dusu womi sëmbë de konda e, ufò i abi dee mujëë ku dee mii. Nöö di de njan te de kaba, hën dee bakama go pii di bëëë ku di fisi dee fika nöö a dou hii tuwalufu manda fuufuu eti.

Nöö da sò wan gaan foondo wooko Masa Jesosi du a di lò kamian dë e.

Aki ta lei fa Masa Jesosi waka

a wata liba.

Mat. 14:22-33; Joh. 6:15-21

⁴⁵ Nöo di dee sēmbē njan te de kaba naandē kaa, hēn Masa Jesosi kai dee bakama ko nēēn, hēn a taa: “Un go tei di boto, nöo un puu go a Betisaida ala.” Sö Masa Jesosi taki da de. Ma nöo hēn a o fika dē faa manda dee sēmbē go.

⁴⁶ Nöo hēn dee bakama fēēn go. Nöo di Masa Jesosi manda dee oto sēmbē go kaa, hēn a go a wan kuun kamian naandē hēn wanwan go ta begi Masa Gaangadu.

⁴⁷ Nöo hēn di sapate, di boto u dee bakama fēēn dē tee a mindiwata ala.

⁴⁸ Te wan pisi hēn Masa Jesosi tuwē wojo luku, a si taa de dē a gaan toobi seei. Biga de ta puu kodo ma de an nango fesi. Wan gaan ventu wē ko ta kii de sö. Nöo a gaan ndeti seei di sondi dē ta pasa, biga fosu ganian an kanda eti.

Nöo di Masa Jesosi si sö, hēn a bazia di kuun ko a di wata bandja hēn a ta waka seei tjuwatjuwa ta ko a dee bakama fēēn.

Nöo hēn di a ko zuntu ku de hēn a mbei kuma a ta pasa.

⁴⁹⁻⁵⁰ Di juu dē dee bakama wojo ko kai a di sēmbē ta waka a di wata liba naandē, nöo hati u de latja te na soni, de bai kai wolo, biga de mēni taa jooka de si dē.

Nöo hēn Masa Jesosi kai de taa: “Kijoo, wan fēēē sö e. Un tai hati. Mi wē disi.”

⁵¹ Nöo hēn a subi a di boto dendu. Fa a subi dē, nöo wante hēn di ventu kōto pii.

Wē nöo di sondi dē bigi da dee bakama fēēn te na soni.

⁵² Biga wē hii fa de bi si Masa Jesosi tei de feifi bēēē hēn a da dee gaan hia sēmbē, de njan dē seei, ma tōku de an bi buta mēni nēēn fu de sabi ambē dēēn.

Aki ta lei fa Masa Jesosi kula sōmēni sikima.

Mat. 14:34-36

⁵³ Nöo hēn de puu go tjökō a di pisiwata u dee Genesalēti sēmbē ala, nöo hēn de tai di boto u de te de kaba.

⁵⁴ Nöo fa de ko dou dē, hēn sēmbē si de sabi wante kaa.

⁵⁵ Nöo hēn de kule go paaja di njunsu te dou hii dee köndē naandē, taa: “Jesosi di kulama dē a di köndē fuu.” Nöo hēn dee sēmbē kule go tei dee sikima buta a kama ta tja ko a Masa Jesosi seei gililili sö.

⁵⁶ Wē nöo sö. Hii ka Masa Jesosi nango kaa, a dee gaangaan köndē ku dee pikipiki köndē te dou ku dee pandasi kamian tuu, dee sēmbē ta tja dee sikima u de ko buta a sitaati dēēn faa musu kula de da de. Nöo de ta begi ēn taa be a da de pasi u de ta nama a di jēkējēkē u di koosu buka fēēn, nöo hii dee sēmbē dee nama sö kaa, de tuu ko bētē.

Nöo da sö Masa Jesosi kula dee sēmbē u di pisiwata dē tjika.

7

Aki ta lei fa dee Faliseima

ku dee Sabima u Wēti ta kuutu

Masa Jesosi.

Mat. 15:1-9

¹ Wē nöo hēn de dē te wan daka, hēn so u dee Faliseima ku dee Sabima u Wēti kumutu a Jerusalen ko a Masa Jesosi dē.

² Te wan pisi hēn de ko si taa te dee bakama u Masa Jesosi ta njan, nöo de an ta wasi maun a di fa dee Dju sēmbē guwenti u wasi maun.

³ Biga wan tuutuu Dju sēmbē an o njan ee na a wasi maun kumafa a lei a dee gaan sēmbē fēēn,

4 taa te a kumutu a wojowojo ko, nöö a musu wasi a wan apaiti fasi bifö a sa njan. Nöö a musu wasi dee paabi lai fëen a wan apaiti fasi tu, kuma dee kan u bebe wata, gansë, paabi u njan. Biga de ta mëni taa ee de an du sö nöö de an o dë limbolimbo a Gadu wojo.

5 Nöö hën mbei dee Faliseima ku dee Sabima u Wëti hakisi Masa Jesosi taa: “Faandi mbei dee bakama fii an ta hoi dee wëti dee dee gaan sëmbë fuu buta da u?”

6 Nöö hën Masa Jesosi fan ku de, a taa: “Un dee bödjëema i si aki, un haika e. Gadu bi da di tjabukama fëen de kai Jesaaja wan buka u wanlö sëmbë, nöö a bi a’ leti e. Biga a taa:

Dee sëmbë i si aki sö,
de ta lesipeki mi ku de buka,
ma hati u de an dë a mi seei.

7 Fa de ta bai taa de ta hei mi naandë, na tuu.

Sösö sondi seei de kai në ta du dë.

Biga na dee wëti u mi de ta lei sëmbë möönsö.

Libisëmbë wëti nöö de ta lei.

Sö Jesaaja bi taki, nöö dee sëmbë a taki dë, unu wë e.”

8 Nöö hën a taa: “Dee lei libisëmbë buta, de un ta tei u gaan soni seei, ma nöö dee lei Gadu buta, de un ta disa a wan së ala.”

9 Hën a taa: “Aai, un köni seei baa, fa un saanfa u buta dee lei u dee gaan sëmbë fuunu a dee lei u Gadu kamian tjika.

10 Biga a fesiten di Gadu bi da Mosesi dee wëti, hën a taa i musu lesipeki i mama ku i tata. Ee wan sëmbë i ta kosi i mama ku i tata ta wisiwasi de, nöö de musu kii i puu. Sö Gadu hei mama ku tata tjika.

11 “Ma nöö un biëen ko wan hii oto soni. Biga wan sëmbë sa taki dëen mama ku ën tata taa: ‘Dee sëmbë, mi si taa un dë a fuka. Ma nöö di sondi mi bi musu tei u heepi unu, mi butëen a wan së da Gadu kaa. Da a ko heepi fëen an dë. Ma a’ soni u da unu möön.’

12 Nöö fa di sëmbë fan dë, nöö un ta si taa a fan bunu poi. Nöö sö un sai dë ta tapa sëmbë u de an sa puu de mama ku de tata a fuka möön.

13 “Wë nëen da un puu dee lei u Gadu buta dee lei u dee gaan sëmbë fuunu a de kamian nö? Nöö di soni mi taki dë, hën da wan kodo nöö, u dee hia sösö lei fuunu dee un ta lei sëmbë.”

Aki ta lei dee soni ta sundju sëmbë a Gadu wojo.

Mat. 15:10-20

14 Nöö hën Masa Jesosi mbei dee hia sëmbë dee bi ko dë hai ko möön zuntu ku ën, nöö hën a taa: “Un haika bunu fa mi o fan aki, be un fusutëen.

15 Mi taki e, dee sondi ta kumutu a döö së nango a i sinkii, na de ta mbei i ko sundju a Gadu wojo e. Ma dee sondi ta kumutu a i hati ko a döö, de ta sundju i a Gadu wojo. [

16 Nöö fa mi fan ku unu aki, nöö un pakisei ën bunu e, be un fusutëen.]”

17 Nöö hën a disa dee sëmbë naandë, hën a go a wosu.

Nöö hën dee bakama fëen ko hakisi ën taa: “Masa o, andi di soni i lei dee sëmbë naandë kë taki?”

18 Nöö hën a taa: “Fa mi fan dë, unu seei tu wan fusutan nö? Wan sabi nö, taa di sondi di i njan tuwë go a i bëë an sa mbei i ko sundju a Gadu wojo?”

19 Biga te wan pisi a ta toona kumutu a i sinkii baka.” (Nöö ku di lei aki i sa si taa Masa Jesosi puu tjina a hii soni u njan.)

20-21 Hën a fan go möön longi, a taa: “Di sondi di ta kumutu a wan sëmbë hati ko a döö, nöö hën ta sundju ën a Gadu wojo, kuma te i ta libi fanafiti a

manu ku mujëe soni, kuma te i ta fufuu, i ta kii sëmbë, i ta tei sëmbë mujëe ee nasô sëmbë manu,

²² i a' langahati u sëmbë soni, i ta a' hogihati u sëmbë, i ta ganjan sëmbë, i ta du fanafiti soni, i ta haun ku sëmbë, i ta tja sëmbë go sei a baka, i abi gaan fasi, i abi wisiwasi fa.

²³ Hii dee lö sondi naandë tuu, a libisëmbë hati de ta kumutu ko a döo, nöo de ta mbei i ko sundju a Gadu wojo. Un jei bunu fa mi taki aki nö? Söo."

Aki Masa Jesosi heepi

wan mujëe di an dë Dju.

Mat. 15:21-28

²⁴ Nöo hën Masa Jesosi kumutu a di köndë naandë, hën a go a di pisiwata zuntu ku di köndë de kai Tilusi, nöo hën a denda go a wan wosu. Ma nöo an kë u sëmbë sabi taa sö a ko sai naandë. Ma di soni an sa tjubi, sëmbë ko sabi gbolo taa a dë a di köndë.

²⁵ Nöo wan mujëe bi sai dë bi abi wan piki mujëe mii, nöo wan taku soni dë a di mujëe mii liba. Nöo sö hesi di di mujëe ko sabi taa Masa Jesosi sai dë, nöo hën a waka seei langalanga ko nëen naandë. Nöo hën a tjökö kini nëen fesi

²⁶⁻²⁷ ta begi ën gaanfa seei taa: "Masa, gaantangi, ko jaka wan sondi puu a di mujëe mü u mi liba da mi. Biga a ta penëen te na soni."

Ma nöo hën Masa Jesosi piki ën taa: "Mujëe o, an fiti fii musu puu bëëe a de mii maun tuwë da dagu mii e. Biga dee mii fosu musu njan." Nöo fa a fan dë, a kë taki taa dee Dju sëmbë fëen fosu musu fendi heepi, biga wë di mujëe aki sö an dë Dju sëmbë, oto köndë sëmbë a dë. De pai ën a Finisia u Silia köndë.

²⁸ Nöo di Masa Jesosi piki ën sö, nöo hën di mujëe hakisi ën taa: "Wë Masa o, dee sakasaka dee ta puu a di tafa liba ta kai a goon, nöo dee dagu mii an sa pii de njan nö?"

²⁹ Nöo hën Masa Jesosi piki ën taa: "Aai mujëe, i hakisi bunu o, nöo i fendi heepi kaa. Toona go fii a wosu, biga di taku soni kumutu disa di mujëe mii fii e."

³⁰ Nöo hën di mujëe toona go a wosu. Nöo fa a go dou dë, hën a si di mii fëen dë kandikandi pii, biga di taku soni disëen go kaa.

Nöo da sö Masa Jesosi heepi di mujëe naandë e.

Aki Masa Jesosi kula

wan bookjesima.

³¹ Nöo hën a kumutu a di pisiwata u Tilusi naandë nöo hën a o toona go a di ze u Galilea. Nöo fa a nango dë, hën a latja Sidon pasa go dou a di pisiwata de kai Dekapolisi möön.

³² Nöo di a dou, nöo hën de tja wan womi ko nëen. Di womi aki sö an ta jei soni, an ta fan bunu tu. Nöo hën de ko begi Masa Jesosi taa gaantangi, be a buta maun nëen liba faa sa ko bunu.

³³ Nöo hën Masa Jesosi puu di womi a dee sëmbë naandë mindi nöo hën a tjëen go a wan së. Nöo hën a buta finga a di womi jesi toona puu. Hën a tunta nëen finga buta a di womi töngö.

³⁴ Nöo hën a luku liba nöo a hai böö taanga. Nöo hën a taa: "Efata," dati wan taki: "Un jabi." Di töngö Masa Jesosi ta fan hën taki sö e.

³⁵ Nöo fa u mbei naandë, nöo hën di womi ko ta fan limbolimbo, a ko ta jei soni seei gbegeede.

³⁶ Nöo hën Masa Jesosi bai dee sëmbë taanga taa de an musu konda di soni di pasa naandë da na wan sëmbë. Ma nöo di möön a ta bai de, möönmöön seei de ta paajëen nango.

³⁷ Nöo hën di soni bigi da hii mundu. De sai dë ta taki taa: “Aai oo, hii dee soni di sëmbë aki ta du, de tuu bunu e. Biga dee tapabukama ku dee sëmbë dee an ta jei soni seei a ta mbei de ta ko ta jei soni ta fan.”

8

Aki Masa Jesosi da fõ dusu sëmbë soni u njan.

Mat. 15:32-39

¹ Wë nöo hën a ko pasa sö a di ten naandë taa wanlö hia sëmbë ko dë ku Masa Jesosi möön ta haika di lei fëen. Hën de sai ku ën dë te nöo hangi ko kisi de poi, soni an dë u de njan.

Nöo hën Masa Jesosi kai dee bakama fëen ko nëen, hën a taa:

² “Un haika e. Tjali kisi mi da dee sëmbë aki, biga disi mbei dii daka di de dë ku mi aki, nöo hangi kisi de poi.

³ Ma nöo ee mi manda de go a wosu söndö njan, nöo so u de o faau a pasi, biga ka de ta libi ku aki longi poi.”

⁴ Nöo hën dee bakama piki taa: “Wë ma sëmbë an ta libi a di kamian aki, nöo unsë u sa feni soni u njan tjika u da dee hia sëmbë aki?”

⁵ Nöo hën a hakisi de taa: “Un mëni bëëë un abi aki?”

Nöo hën de piki taa: “Sëbën nöo u abi.”

⁶ Nöo hën a taa antoobi. Hën a mbei dee sëmbë sindo leti a goon naandë. Nöo hën a tei de sëbën bëëë, hën a begi da Gadu tangi te a kaba. Nöo hën a booko dee bëëë pisipisi, hën a tëndë da dee bakama u de paati da dee sëmbë. Nöo hën dee bakama tei, hën de paati da dee hia sëmbë dë te lontu ko kai.

⁷ Nöo de bi abi wantu fisi naandë tu, nöo hën de tei de tja ko da Masa Jesosi. Nöo hën a toona begi Gadu te a kaba dëen tangi, nöo hën a tëndë da dee bakama fëen. Nöo hën de tei toona paati da dee sëmbë te de kaba.

⁸⁻⁹ Nöo hën hii sëmbë njan te bëë u de fuu. Nöo dee sëmbë bi njan di njan naandë bi dë fõ dusu e.

Nöo di de njan te de kaba, hën dee bakama go pii dee njanjan fika naandë te de kaba zunta, nöo a fuu hii sëbën manda. Nöo hën Masa Jesosi ko manda dee sëmbë go a wosu awaa.

Nöo da sö wan gaan foondo wooko Masa Jesosi du möön a di pisi kamian dë e.

Aki dee Faliseima hakisi

Masa Jesosi wan maaka.

Mat. 16:1-4

¹⁰ Nöo a baka u di dee sëmbë go, hën Masa Jesosi ku dee bakama fëen subi a boto kumutu dë. Nöo hën de hai go a di pisiwata de kai Damanuta.

¹¹ Nöo di de ko dou, nöo wantewante hën dee Faliseima ko a Masa Jesosi ko ta suku ën buka a soni. Nöo hën de fan go, de fan ko, nöo hën de hakisi ën taa a musu du wan foondo wooko u lei de taa a Gadu di kaakiti fëen ta kumutu tuutuu.

¹² Nöo di de hakisi sö, hën Masa Jesosi djëmë hun. Hën a taa: “A bigi a mi, di a dë taa dee sëmbë u di ten aki ta suku foondo wooko nöömö ufö de sa piki taa Gadu hën manda mi ko.”

Nöo hën a piki de, a taa: “Ma o du na wan foondo wooko lei unu kumafa un kë möönsö e.”

13 Sö a piki de, nöö hën a disa de naandë go fëen. Hën ku dee bakama fëen toona subi a boto fu de go a di oto së banda u di ze ala baka.

Aki Masa Jesosi ta bai dee bakama u de mëni deseei ku dee poipoi lei u dee Dju hedima.

Mat. 16:5-12

14-16 Ma nöö fa Masa Jesosi ku dee bakama fëen dë a di boto nango dë, de bi fëekëtë u tja bëëë. Nöö hën de nango te wan pisi, hën Masa Jesosi bai de a wan sondi a nongö fasi sö, a taa: “Un mëni unu seei e, be wan tei di sooda u dee Faliseima ku di u Könu Helodi.”

Ma nöö fa a fan dë, dee bakama an fusutan andi a kë taki da de. Nöö hën de ta fan ku deseei taa: “Awa womi, wan kodo bëëë tö nöö u tja ku u a di boto, nöö hën mbei wë i si a bai u sö e.”

17 Ma nöö Masa Jesosi sabi taa sö de ta taki, nöö hën a gandji da de, a taa: “Dee sëmbë o, unfa un sa taki sö wan soni taa u di wa tja bëëë hën mbei mi ta fan sö ku unu? Wan fusutan fa mi dë eti nö? Unfa un sa don sö?”

18 Biga misikuma un abi wojo ma wan ta si sondi, un abi jesi ma wan ta jei sondi. Wan sabi möön andi bi paka

19 di mi bi tei de feifi bëëë booko pisipisi, hën un paati da de feifi dusu sëmbë nö? Di de njan te bëë u de fuu, unfa di bëëë bi fika hia tjika?”

Nöö hën de piki taa: “Tuwalufu manda.”

20 Nöö hën a hakisi taa: “Wë di mi booko de sëbën bëëë un bi paati da de fö dusu sëmbë wë? Un mëni manda bi fika?”

Nöö hën de piki taa: “Sëbën.”

21 Hën a taa: “Wë nöö an tjika fuun sabi taa fa mi dë aki, ma ta abi bookohedi ku njanjan sondi nö?”

Aki Masa Jesosi kula

wan bookowojoma.

22 Nöö hën de tjökö a di köndë de kai Betisaida. Nöö di de ko dou, hën wanlö sëmbë tja wan bookowojoma ko a Masa Jesosi, nöö hën de begi ën faa musu nama maun a di womi be a ko ta si sondi.

23 Nöö hën a panjan di womi a maun tja puu a di köndë ganda. Nöö hën a tunta a di womi wojo, hën a nama maun nëen.

Nöö hën a hakisi ën taa: “I ta si sondi ö?”

24 Hën di womi piki taa: “Wë mi ta si sëmbë ta waka ma de djei pau.”

25 Nöö hën Masa Jesosi toona lobi maun nëen wojo wan pasi möön, nöö hën a hakisi ën taa: “Unfa i ta si sondi möön?”

Nöö hën di womi luku sondi möön. Fa u mbei dë, a ko ta si sondi gbegeedee seei awaa.

26 Nöö hën Masa Jesosi bai ën taa an musu toona go a di köndë naandë. Hën a mandëen go a wosu.

Aki de taki ambë da Masa Jesosi.

Mat. 16:13-20; Luk. 9:18-21

27 Wë nöö hën Masa Jesosi ku dee bakama fëen, hën de tei pasi nango a dee köndëköndë dee dë zuntu ku di gaan köndë de kai Sesalia Filipi. Nöö fa de dë a pasi nango dë, nöö hën Masa Jesosi hakisi dee bakama fëen, a taa: “Womi, ambë un ta jei de ta taki taa mi dë?”

28 Nöö hën de piki taa: “Wë de ta taki taa i da wan u dee nëbai Tjabukama u Gadu di toona weki a dëdë, kuma Johanisi di Dopuma, kuma de Elia sö. Sö lanti ta mëni fii e.”

²⁹ Nöo hën a bia hakisi de taa: “Wë unu wë? Ambë uun taa mi dë fa mi ku unu ta lontu aki?”

Nöo hën Petuisi piki taa: “Masa, i da di Keesitu e, di Paamusi Könu di bi o ko.”

³⁰ Nöo hën Masa Jesosi bai de taa: “Fa Petuisi taki dë, nöo wan musu kondëen da na wan sëmbë e. Un musu hoi ën tjubitjubi ufö.”

Aki Masa Jesosi ta taki u di hogi di o pasa ku ën.

Mat. 16:21-28; Luk. 9:22-27

³¹ Nöo hën a seti fan ku de soni fëen seei limbolimbo awaa. A taa: “Mi o taki wan soni da unu aki e, taa Mi di ko dë Libisëmbë Mii aki, mi o tja sëmëni pei sitaafu a dee Gaan Womi ku dee Gaan Begima ku dee Sabima u Wëti maun. Biga de an kë tei mi u soni möönsö. Te wan pisi nöo de o kii mi. Ma nöo a di u dii daka, nöo mi o toona weki ko ku libi baka.”

³² Nöo sö a fan ku dee bakama fëen limbolimbo.

Ma nöo hën Petuisi kai ën a së, hën a taa: “Haika, di fan i fan dë, ja musu taki sö e. Sö wan soni an musu pasa ku i seei, kwetikweti.”

³³ Nöo di a fan sö, hën Masa Jesosi bia luku dee oto bakama naandë, nöo hën a gandji da Petuisi. A taa: “Pasa kumutu a mi fesi dë, Didibi Saatan ju, biga fa i fan dë, na sö Gadu ta mëni soni. Libisëmbë pakisei nöo di dë.”

Aki Masa Jesosi taki andi

wan sëmbë musu du

faa waka nëen baka.

³⁴ Nöo hën a kai dee oto bakama fëen, ku wanlö hia sëmbë bi sai dë, u de hai ko möön zuntu ku ën. Nöo hën a taa: “Un haika e, dee sëmbë. Ee wan sëmbë i kë ko dë bakama u mi, nöo i musu disa di soni di i seei kë du, nöo i musu dë kabakaba fii tei hiniwan soni di ko a i liba fu di i ta nama ku mi hedi, te dou ku dëdë seei. Ja musu hai baka möönsö.” Sö a fan ku de.

³⁵ Nöo hën a taa: “Fa mi fan dë, di soni mbei mi taki sö. Biga ee wan sëmbë i ta suku fii hoi i libi kumafa i kë, nöo joo lasi di suti libi Gadu kë da i. Ma ee wan sëmbë i ta saka i libi fu mi hedi nasö fu di Bunu Buka u Gadu musu paaja hedi, nöo di sëmbë dë o fendi libi a Gadu nöömö.”

³⁶ “Nöo unfa un mëni, dee sëmbë? Ee wan sëmbë i fendi di goonliba aki njan kumafa i kë, ma i lasi go a di didibi faja fu teego, nöo andi seei a heepi i?”

³⁷ Nöo di juu o dou, nöo Mi di ko dë Libisëmbë Mii aki waiti tjika tu fii sa lasi i seei fëen hedi?

³⁸ “Nöo wan ta si fa dee sëmbë u di ten u dë aki ta disa Gadu ta libi dee hogilibi u de nö? Wë nöo ee hën wan sëmbë sen ta kisi i fii piki a dee lö sëmbë dë dendu taa i ta nama ku mi, ee nasö sen kisi i fii piki dee soni mi ta taki da unu aki, nöo söseei sen o kisi mi da i tu, a di daka di mi o ko.

“Biga di juu o dou, nöo Mi di ko dë Libisëmbë Mii aki o toona ko a goonliba aki, mi ku dee basia u mi Tata köndë tuu. Nöo fa i si woo ko dë, ku hii di gaan hei u mi Tata ku di waiti fëen tuu mi o ko e. Nöo a di juu dë, mi o piki seei gbelin taa ma sabi i di lö sëmbë naandë tu.”

Nöo da sö Masa Jesosi bai dee sëmbë te a kaba.

9

¹ Hën a taki da dee bakama fëen taa: “Dee sëmbë o, mi piki unu seei gbelin taa, so fuunu dë aki an o dëdë bifö un si di Tii u Gadu ko a goonliba ku kaakiti e.”

Aki dee bakama si di Gadu fasi

u Masa Jesosi di a abi.

Mat. 17:1-13; Luk. 9:28-36

² Nöo hën a baka sikisi daka u di a fan ku dee bakama fëen sö kaa, nöo hën a tei Petuisi, Jakobosi, ku Johanisi, hën de subi wan gaan hei kununu go te nëen liba ala, de wanwan. Nöo hën de sai dë te wan pisi, hën de ko si Masa Jesosi tooka gaanfa seei a de wojo.

³ Dee koosu fëen sinkii ko weti faan. Ka de weti tjika dë, na wan libisëmbë tjika u mbei koosu ko weti kuma di dë e.

⁴ Nöo hën de ko si tu sëmbë ta fan ku Masa Jesosi dë. Mosesi ku Elia wë e, de tu gaan nëbai tjabukama u Gadu u fesiten, de wë ko fan ku ën sö, ma de bi dëdë gaanduwe kaa.

⁵ Nöo hën Petuisi taki da Masa Jesosi, a taa: “Mësitë o, a suti fa u dë aki. Nöo i sabi nõ, woo mbei dii tjëkëliba da unu, wan fii, wan u Mosesi, ku wan u Elia.”

⁶ Ma fa a fan dë seei, ma na ku fusutan e, biga di ten dë hën ku dee otowan fëen bi fëëe te de an sa fa u taki.

⁷ Di juu dë, hën de si wan bundji saka zaaa ko tapa de buuu. Nöo hën de jei wan tōngō ta piki a di bundji dendu taa: “Di sëmbë aki, hën wë da di lobi Womi Mii u mi e. Nöo hën un musu ta haika.” Sö di tōngō taki.

⁸ Nöo te u de Petuisi kë mëni, de an si de tu sëmbë dë möön. Masa Jesosi wanwan tö nöo de si fika dë.

Aki Masa Jesosi ku de dii bakama ta bazia di kuun ta ko.

⁹ Nöo hën de bia kumutu a di kununu liba ta saka nango a goon. Te wan pisi hën Masa Jesosi taki da de, a taa: “Un haika e, dee sëmbë. Di sondi un si a di kununu liba ala, wan musu taki ën da na wan sëmbë e. Ma un hoi ën fuunu wanwan ufö. Te mi di ko dë Libisëmbë Mii aki weki baka a dëdë bifö fuun sa kondëen.” Sö a bai de.

¹⁰ Nöo hën mbei de an kondëen da sëmbë tu. Ma di de ta bazia di kuun nango, hën de ta taki a di sondi dë liba de na de nöo. Nöo de ta hakisi deseei taa: “Fa a taki soni u dëdë weki baka dë, andi a kë taki ku di dë?”

¹¹ Nöo hën de bia hakisi Masa Jesosi taa: “Masa o, faandi mbei dee Sabima u Wëti ta lei u taa Elia fosu bi musu ko bifö di Paamusi Könu ko?”

¹²⁻¹³ Nöo hën a piki de taa: “Awa, sö a dë a Gadu Buku tuu e, taa Elia fosu musu ko lei sëmbë buta a pasi bifö di Paamusi Könu ko. Ma nöo mi taki da unu taa Elia ko kaa e, nöo hën de du ku ën kumafa de kë, leti kumafa di Buku bi taki taa de bi o du.”

¹⁴ Nöo fa a fan dë, hën dee bakama ko fusutan taa Johanisi di Dopuma a ta taki dë. Hën wë bi dë di Elia di bi musu ko.

Hën a taa: “Wan oto soni dë sikifisikifi a di Buku tu, taa te di Sëmbë di ko Libisëmbë Mii o ko, nöo de an o si ën u wan wojo sondi. De o sitaafu ën te a tjika de. Sö di Buku taki. Nöo unfa un mëni u di dë?” Sö a hakisi de. ¹⁵ Ma de an sabi unfa u piki ën.

Aki Masa Jesosi puu wan taku soni a wan mii liba.

Mat. 17:14-21; Luk. 9:37-43a

¹⁴ Nöo hën de ta saka ta ko tefa de kai a palala goon, ka dee oto bakama bi dë a di kununu futu dë. Nöo di de ko dou, hën de ko si sëmëni sëmbë a di kamian ta fan nango ta ko kuma de dë a wan gaan buja, nöo dee Sabima u Wëti seei bi dë a dendu tu.

¹⁵ Nöo te u dee sëmbë kë mëni, hën de si Masa Jesosi gbegedee ta ko, nöo de ko foondo gaanfa seei. Hën de kule go nëen go dëen odi.

¹⁶ Nöo hën a hakisi de taa: “Andi ta pasa a di kamian aki mbei un ta fan hia sö?”

17 Nöo hën wan womi piki ën taa: “Mësitë o, mi bi ko a i aki. Wan soni dë a wan womi mii u mi liba ta biinga seei u kii ën. A ta tapëen buka te an sa fan,

18 nöo te a ta ko nëen liba, nöo a ta kisi ën ta tuwë a goon holou, sukuma ta puu nëen buka fukuu, a ta tai ën tanda gingin, sinkii fëen ta ko gagagaa sô. Nöo di ja bi dë, hën wë i si mi begi dee bakama fii u de musu jaka di soni puu a di mii liba da mi. Ma nöo de biinga seei te de wei, de an sa du na wan soni da di mii. Nöo sô e baa.”

19 Nöo hën Masa Jesosi piki taa: “Ee maingë, andi seei mi fendi a dee sëmbë u di ten aki maun di a dë taa wan ta biibi möönsô? Un longi seei mi musu dë ku unu aki eti bifô woon biibi? Un longi mi musu hoi pasensi ku unu?”

Nöo hën a taa: “Un go tei di mii tja ko aki i si.”

20 Nöo hën de go tei di mii. Ma fa de ta ko ku ën dë, nöo hën di soni di dë nëen liba si Masa Jesosi gbegedee, nöo aan soni, hën a kisi ën ta du soni te na sipootu. Biga a tuwë di mii a goon holou, a ta logoda a goon, ta puu sukuma a buka seei fukuu.

21 Nöo hën Masa Jesosi hakisi di tata u di mii taa: “Un longi di soni dë ku di mii kaa?”

Hën a piki taa: “Wë u sensi di a dë piki mii a maun,

22 hën a ta ko nëen te kisi fa u dë aki. Nöo sômëni pasi seei a ta biinga u kii ën, te a wata ku faja tuu a ta hiti ën go. Wë nöo Mësitë, ee i sa heepi u, nöo gaantangi mi begi i tei tjalihati fuu nöo i heepi u.” Sô di tata u di mii taki.

23 Nöo hën Masa Jesosi piki ën taa: “Wë na a mi a dë e, ma a i a dë. Biga ee wan sëmbë ta biibi Gadu, nöo soni seei an dë di Gadu an sa du dëen.”

24 Nöo di a taki sô hën di tata u di mii bai taanga taa: “Mësitë o, mi ta biibi e. Ma nöo fii heepi mi be mi biibi tjika.”

25 Nöo di juu dë, hën Masa Jesosi si taa sômëni sëmbë ta booko ta ko a de naandë. Nöo hën a bai di soni di dë a di mii liba taa: “Ju di soni ta dë a di mii aki liba ta tapëen jesi ku ën buka, mi taa, hetji pasa kumutu disëen! Nöo na toona ko nëen möön a mundu!”

26 Nöo fa a bai ën dë kaa, hën di soni bai kai wan hogi olo. Nöo hën a kisi di mii wan pasi möön, di mii ta seki ta du soni, sinkii fëen ko kakakaa. Nöo hën a kumutu go disa di mii djee awaa. Ma nöo di mii fika a goon pii, nöo hën dee sëmbë sai naandë taa: “Awa, dëdë a dëdë e.”

27 Ma nöo hën Masa Jesosi panjëen a maun hopo taanpu, biga a ko bunu kaa.

28 Nöo hën a kumutu dë ku dee bakama fëen hën de toona go a wosu. Nöo di de dou, hën dee bakama hakisi ën taa: “Masa o, faandi mbei wa bi sa puu di soni a di mii liba?”

29 Nöo hën a piki de taa: “Sô wan taku soni ja sa jakëen puu go söndö begi e.”

Aki Masa Jesosi taki soni

u di dëdë fëen möön.

Mat. 17:22-23; Luk. 9:43b-45

30 Nöo hën Masa Jesosi ku dee bakama fëen kumutu a di köndë naandë. Nöo fa de nango dë, de ta latja ta pasa a di pisiwata de kai Galilea. Nöo di ten dë Masa Jesosi an kë u lanti sabi naasë a dë,

31 biga a kë lei dee bakama fëen a wantu soni liba.

Nöo hën de nango te wan pisi, hën a kai de te de piki, hën a taa: “Un haika e. De o könku Mi di ko dë Libisëmbë Mii aki buta a sëmbë maun e, nöo de o kii mi. Ma nöo a di u dii daka nöo mi o toona weki baka.” Sô a fan ku de.

³² Ma nöö dee bakama an ta fusutan di sondi a ta taki da de dē, nöö de fēēē u hakisi ēn tu.

Aki ta lei ambē o dē hei sēmbē

a di tii u Gadu dendu.

Mat. 18:1-5; Luk. 9:46-48

³³ Nöö hēn de nango te de dou a Kapenaumi nöö hēn de go denda a wosu. Nöö hēn Masa Jesosi hakisi de taa: “Fa u bi dē a pasi ta ko dē, andi un bi fendu ta fia ku unu seei sō?”

³⁴ Ma nöö de an piki ēn, de dē piiii seei. Biga di soni de bi ta fia, de bi ta hakisi de na de taa tee Masa Jesosi ko kōnu, nöö ee undi u de o dē möön hei möön dee oto.

³⁵ Nöö hēn Masa Jesosi sindo te a kaba, hēn a kai de tuwalufu bakama fēēn tuu ko nēēn. Nöö hēn a fan ku de, a taa: “Sōö. Wē un kē ko fesima a di kōnu tii u mi dendu ö? Wē be mi taki da unu, taa di fuunu di o saka hēnseei tei di möön lagi kamian ta dini dee otowan fēēn, hēn wē o dē di möön hei sēmbē fuunu tuu e.” Sō a piki de.

³⁶ Nöö hēn a kai wan piki mii ko a de fesi dē. Hēn a hopo ēn tei.

³⁷ Hēn a taa: “Haika e. Ee wan sēmbē i tei sō wan lagi sēmbē kuma di mii aki sō u gaan sondi fu di i nama ku mi hedi, nöö miseei i tei dē e. Nöö fa i tei mi dē, nöö na mi wanwan i tei, ma i tei Masa Gaangadu tu di manda mi ko a goonliba aki.” Nöö sō Masa Jesosi fan ku dee bakama fēēn te a kaba.

Aki ta lei ambē ku Masa Jesosi

dē a wan sē.

Luk. 9:49-50; Mat. 10:42

³⁸ Nöö baka u di dē, hēn Johanisi taki wan sondi da Masa Jesosi, a taa: “Masa o, u bi si wan sēmbē ta tei di nē fii ta jaka dee soni ta kisi sēmbē a hedi puu a de liba. Nöö hēn u fan ku ēn faa disa, biga an dē a di kulupu fuu.”

³⁹ Nöö hēn Masa Jesosi piki, a taa: “Wē an bi dē fuun tapēēn e. Biga na wan sēmbē sa tei di nē u mi du foondo wooko, nöö a bia sō hesi ta kosi mi.

⁴⁰ Nöö boiti di dē, fa a ta du foondo wooko a mi nē dē, hēn da an dē felantima fuu. Nöö ee wan sēmbē an dē felanti fuu, nöö hēn da u ku ēn dē a wan sē.” Nöö sō Masa Jesosi piki.

⁴¹ Nöö hēn a taa: “Mi o taki wan sondi aki da unu gbelin seei. Di sēmbē di o du wan sēmbē bunu a di nē u mi di Paamusi Kōnu, ee wan gangaa wata seei a dēēn, nöö Gadu o dēēn paima nöömō.”

Aki ta lei fa a dē gaan soni tjika

u wan sēmbē fika a Gadu pasi.

Mat. 18:6-9; Luk. 17:1-2

⁴² Hēn Masa Jesosi fan ku dee bakama fēēn go möön longi, a taa: “Ja si fa di mii aki dē nō? [An kisi fusutan fu soni fu mi wan bētē eti.]. Nöö ee sō wan sēmbē ko biibi a mi, nöö hēn i mbei a du wan soni faa kumutu a Gadu pasi, nöö gaan hogi seei i du dē e. A bi sa möön bētē da i de bi tai wan gaan gindi sitonu a i gangaa te de kaba, nöö de tja i go tuwē a di möön fundu kamian u di ze dubuu piiii. Biga mi taki da unu taa di sitaafu naandē an hogi kuma di joo kisi ee i mbei wan lagi sēmbē kuma di i si aki kumutu a Gadu pasi.

⁴³ “Nöö mi taki e, i musu biinga seei fii fika a Gadu pasi. Fēēn mbei ee wan gaan soni fii kuma di letisē maun fii kē puu i a Gadu pasi, nöö a bētē i koti ēn puu tuwē e. Biga a dē möön bunu da i fii dou a Gadu Kōndē ku wan sē maun, möön leki de tuwē i a didibi faja ku telu. [

⁴⁴ Biga di faja ala an ta tapa möönsö, söseei dee bitju ta njan sëmbë ala de an ta dëdë möönsö tu.]

⁴⁵ “Nöö ee di futu fii ta suku u puu i a Gadu pasi tu, nöö fii koti ën puu tuwë e. Biga a dë möön bunu ee i dou a Gadu Köndë ku wan së futu, möön leki i dou a didibi faja ku de tu së futu fii, fii go ta tja sitaafu u nöömö. [

⁴⁶ Biga di faja ta tjuma sëmbë ala, an ta tapa möönsö, söseei dee bitju ta njan sëmbë ala, de an ta dëdë tu.]

⁴⁷ “Söseei, ee di letisë wojo fii kë puu i a Gadu pasi, nöö fii diki ën puu tuwë e. Biga a dë möön bunu da i i dou a Gadu Köndë ku wan së wojo, möön leki i dou a didibi faja ku tu së wojo go ta tja sitaafu u nöömö.

⁴⁸ Biga di faja ta tjuma sëmbë ala an ta tapa möönsö, söseei dee bitju ta njan sëmbë ala, an ta dëdë möönsö tu e.”

⁴⁹⁻⁵⁰ Nöö hën Masa Jesosi fan möön, a taa: “Un haika e, dee sëmbë. Satu dë wan bumbuu soni da u a goonliba aki. Ma ee a lasi ën kaakiti, nöö soni an dë u toona dëen kaakiti möön e. [Nöö sö un sa luku di libi fuunu. A musu a’ kaakiti tu, kuma satu. Ma bifö a sa ko sö,] nöö i musu tai hati pasa sëmëni soni dee ta pooba i ufö. [Ma ee nasö, nöö joo dë kuma di satu u taki dë di lasi ën kaakiti, ja o abi wan wojo heepi da sëmbë möön.]

“Nöö sö e baa, wan musu lasi unu kaakiti, ma un musu ta libi fiifi ku unu seei nango nöömö.”

10

Aki Masa Jesosi ta taki fa manu ku mujëe an musu tuwë.

Mat. 19:1-12; Luk. 16:18

¹ Nöö hën Masa Jesosi ku dee bakama fëen kumutu a di kamian naandë, nöö hën de toona go a Judea. Hën de koti Joodan Lio aba go a di oto së banda. Nöö di de go dou, nöö sëmëni sëmbë ko a Masa Jesosi, nöö hën a seti u lei de kumafa a bi guwenti.

² Te wan pisi hën wanlö sëmbë u dee Faliseima kulupu ko nëen naandë, nöö hën de ko hakisi ën soni fu de sa feni ën kisi. Biga de hakisi ën taa: “Mësitë o, unfa di wëti u Gadu dë? Wan womi sa tuwë di mujëe fëen nö?”

³ Nöö hën hënseei toona hakisi de wan soni. A taa: “Unfa Mosesi bi sikifi u di soni dë buta a di buku u Gadu?”

⁴ Hën de piki taa: “Wë a sikifi buta taa ee wan womi o tuwë di mujëe fëen, nöö a musu sikifi wan pampia te a kaba u taki di soni mbei an këen möön ufö a mandëen go.”

⁵ Nöö hën a taa: “Awa, sö a sikifi tuu. Ma fu di taangajesi fuunu mbei Mosesi da un sö wan pasi. Ma un haika e.

⁶ A seti di Masa Gaangadu mbei hii soni u goonliba, nöö hën a mbei wan womi ku wan mujëe nöö.

⁷ Nöö fëen mbei wan womi o kumutu disa hën mama ku ën tata nöö a go dë ku ën mujëe,

⁸ nöö de an o dë tu sëmbë paatipaati möön, ma de o ko dë di wan sinkii.

⁹ Nöö dee sëmbë Gadu tja ko makandi sö kaa, nöö na wan sëmbë abi leti u paati de e.” Sö Masa Jesosi piki dee Faliseima.

¹⁰ Nöö di de toona ko a wosu, hën dee bakama hakisi ën a di manu ku mujëe soni liba di a bi taki naandë.

¹¹ Nöö hën a piki de taa: “Mi taki da unu e, taa ee wan womi tuwëen mujëe go tei oto mujëe, nöö Gadu wëti seei a booko dë.

¹² Söseei tu ee wan mujëe tuwëen manu go tei oto manu, nöö Gadu wëti di mujëe dë booko tu.” Sö a piki de.

Aki ta lei fa Masa Jesosi tei pikimii u gaan soni.

Mat. 19:13-15; Luk. 18:15-17

¹³ Wan daka hën wanlô sëmbë ta tja dee mii u de ko a Masa Jesosi faa musu buta maun a de liba. Nöö di dee bakama si sô, hën de gandji seei da dee sëmbë taa de an musu tja dee mii ko nëen.

¹⁴ Nöö hën di Masa Jesosi si sô kaa, nöö hati fëen boonu. Hën a bai de taa: “Wan tapa dee mii u de an ko a mi e. Biga di fasi i si wan piki mii abi, hën da di fasi di dee sëmbë dee dë a di Tii u Masa Gadu musu abi.

¹⁵ Biga mi taki da unu gbelin taa ee wan sëmbë an sa futoou hënseei a Masa Gaangadu maun kumafa wan piki mii ta futoou hënseei a dee gaan sëmbë fëen maun, nöö soni an o mbei te a sa dë a di Tii u Gadu dendu möönsô.”

¹⁶ Nöö di a fan sô te a kaba, hën a tei dee mii nëen maun, hën a begi Masa Gaangadu da de.

Aki ta lei fa a dë gaan soni da

wan guduma faa ko

a di Tii u Gadu dendu.

Mat. 19:16-30; Luk. 18:18-30

¹⁷ Nöö hën Masa Jesosi kumutu a di pisi kamian naandë ta waka nango. Te wan pisi hën wan womi ko tjökô kini a goon nëen fesi, hën a hakisi ën taa: “Di bumbuu mësitë aki o, andi seei mi sa du u mi feni di libi u teego a Gadu?”

¹⁸ Nöö hën Masa Jesosi piki ën taa: “Fa i taa mi bumbuu dë, na wan sëmbë dë bumbuu boiti Masa Gaangadu tö.

¹⁹ “Ma nöö fu piki a di hakisi fii naandë, nöö ja sabi dee wëti Gadu buta da sëmbë u de libi ku de nö? A taa ja musu kii sëmbë, ja musu tei oto sëmbë mujëë, ja musu ta fufuu, ja musu ta mindi soni buta a sëmbë hedi, ja musu ganjan sëmbë a kõni fasi njan, i musu lesipeki i mama ku i tata, na sô nö?”

²⁰ Nöö hën di womi piki ën taa: “Aai, ma sensi di mi bi dë piki mii, nöö hën mi ta hoi miseei a dee wëti naandë liba te kisi fa u dë aki.”

²¹ Hën Masa Jesosi luku di womi nöö a lobi ën seei. Nöö hën a taki dëen taa: “Wë ma wan soni toobi i eti. Go, nöö i sei hii dee gudu fii dee i abi te i kaba, nöö i tei di mõni nöö i paati ën da dee pootima, nöö joo abi gudu a Gadu Këndë ala e. Nöö ko fika ku mi ta waka a mi baka.”

²² Nöö di di womi jei fa a fan naandë, nöö hën a saka hedi a goon ko dë pii. Nöö ku gaan tjali a hati a go a wosu biga a abi gudu te a hia a di goonliba aki.

²³ Hën Masa Jesosi bia luku dee bakama fëen, hën a taa: “Un si ô? A taanga e, fu wan guduma musu ko a di Tii u Gadu dendu.”

²⁴ Fa Masa Jesosi taki naandë, nöö a bigi da dee bakama fëen te na soni.

Nöö hën a taa: “A taanga tuu e, dee mii. Mi taki da unu seei taa fu wan guduma musu ko a di Tii u Gadu dendu, an dë sôsô soni e.

²⁵ Leti kumafa di gaan mbeti de kai kamëli an sa pasa a wan aguja baaku, nöö sôseei a taanga da wan guduma faa ko a di Tii u Gadu dendu.”

²⁶ Nöö fa a taki naandë, awaa seei di sondi ko foondo dee bakama fëen biga de an bi mëni sô. Nöö hën de bia ko ta hakisi deseeri taa: “Wë nöö ee sô a dë, nöö hën da na wan sëmbë sa feni libi u teego e.”

²⁷ Nöö hën Masa Jesosi luku de diin, hën a taa: “Ee a nama a di kaakiti u libisëmbë nöö na wan sëmbë sa feni ën tuu. Ma a nama a di kaakiti u Masa Gadu, nöö soni an dë di hën an sa du.”

²⁸ Nöö hën Petuisi hakisi ën taa: “Wë nöö u wë Masa? Fa u disa hii soni ko ta waka a i baka aki, un wini fëen woo feni.”

²⁹ Nöo hën Masa Jesosi piki taa: “Aai, sö a dë tuu. Ma nöo mi taki da unu taa di sëmbë di o disa hën baaa, ku ën sisa, ku ën mama, ku ën tata, ku ën mii, ku dee pandasi kamian fëen fu di a ko nama ku mi, ee nasö fu di a kë paaja di bunu buka u Gadu, nöo an o lasi e.

³⁰ Biga a o toona feni hii soni wan höndö toon baka: ee sisa, ee baaa, mama, tata, pandasi kamian, ku köndë tuu seei a o feni a di ten u dë aki, ma nöo a o kisi sitaafu tu o. Ma nöo a di ten di ta ko, nöo a o feni di libi u teego a Gadu.

³¹ “Nöo a di ten dë tu, sëmëni sëmbë dee bi dë heima a goonliba aki o ko lagi sëmbë e. Nöo sëmëni sëmbë dee an bi dë wan wojo soni a libisëmbë wojo aki, nöo de o ko fesima seei.”

Nöo sö Masa Jesosi fan ku dee bakama fëen di ten dë.

Aki Masa Jesosi taki di dëdë soni fëen wan pasi möön.

Mat. 20:17-19; Luk. 18:31-34

³² Nöo di juu dë, Masa Jesosi nango a Jelusalen. Nöo a dë a pasi nango seei, ma nöo dee bakama fëen dë nëen baka ta waka, ma na ku wai. Biga de dë fëëfëë pantapanta. Söseei dee oto sëmbë ta waka ku de, deseei dë fëëfëë tu, biga de ta sinti taa soni o pasa ku ën ala.

Te wan pisi, hën a kai de tuwalufu bakama fëen a së, nöo hën a toona fan ku de möön kumafa a bi fan ku de a fesi kaa.

³³ A taa: “Womì, un haika e. Fa u nango a Jelusalen aki, nöo de o du ku Mi di ko Libisëmbë Mii aki e. Biga de o sei mi buta a dee Gaan Begima ku dee Sabima u Wëti maun, nöo de o tei mi tja go a kuutu te de kaba buta taa mi musu dëdë. Nöo baka u di dë, nöo de o tja mi go buta a dee oto köndë sëmbë dee ta tii di köndë i si aki maun.

³⁴ Nöo de o mbei mi fa seei, de o tunta a mi, de o fon mi ku wipi. Te u kaba fëen de o kii mi. Ma nöo a di u dii daka nöo mi o toona weki baka ko ku libi e.”

Nöo sö Masa Jesosi piki dee bakama fëen gbelin möön.

Aki tu u dee bakama u Masa Jesosi ko suku hei kamian nëen.

Mat. 20:20-28

³⁵ Wë nöo baka u di dë hën Jakobosi ku ën baaa Johanisi, dee mii u Zebedeosi, kai Masa Jesosi a së. De taa: “Masa o, u ko begi i wan soni aki.”

³⁶ Hën a hakisi de taa: “Wë andi un kë sö baa?”

³⁷ Hën de taa: “Wë Masa, u kë begi i fii buta da u taa te i tei di könu kamian fii, nöo wan fuu o dë a i leti maun së, di otowan o dë a i töötömaun së ta heepi i tii di köndë. Nöo hën da di soni u ko begi i.”

³⁸ Nöo hën Masa Jesosi piki de taa: “Ma kijoo, di soni un hakisi mi aki, ma un sabi andi un ta hakisi ö? Di kan de lai da mi u mi bebe aki, woon sa bebëen tu nö? Di sitaafu mi o tja aki, woon sa tjëen nö?”

³⁹ Nöo hën de piki taki taa: “Aai Masa, woo sa tjëen.”

Nöo hën a taa: “Awa, woon tja sitaafu tuu,

⁴⁰ ma fuun feni dee hei kamian dë, di dë ma sa paamusi unu e, biga an dë a mi. Gadu nöo a fika da, faa da dee sëmbë ku dee sëmbë dee a bi buta fu de feni sö wanlö hei kamian.”

⁴¹ Wë nöo di dee oto bakama ko jei taa sö de tu baaa naandë go suku sö wan hei kamian a Masa Jesosi, nöo hën de tei de fu hegi seei.

⁴² Ma nöo hën Masa Jesosi kai hii de tuu makandi ko nëen, hën a taa: “Un haika e, kijoo. Dee goonliba hedima dee an ta biibi a Gadu, un sabi fa de ta libi kaa. De tuu ta kë pëe basi a oto sëmbë liba te dou a deseei liba tu.

⁴³ Ma nöo unu, na sö un musu libi e. Di fuunu di kë dë heima nöo a musu sakëen seei ta dini dee otowan fëen.

⁴⁴ Nöo di sëmbë di kë ko di möön hei wan fuunu tuu, nöo a musu dë kuma saafu da dee otowan.

⁴⁵ Biga fa mi ko dë Libisëmbë Mii aki, ma ko u sëmbë musu dini mi e. Ma mi ko u mi dini sëmbë. Mi ko seei u mi paka mi libi kuma paima fu sëmëni hia sëmbë sa ko bunu ku Gadu.”

Aki Masa Jesosi kula

wan bookowojoma.

Mat. 20:29-34; Luk. 18:35-43

⁴⁶ Nöo hën Masa Jesosi ku dee bakama fëen ko a wan köndë de kai Jelikou tefa de nango. Nöo di de ta kumutu a di köndë, nöo wanlö hia sëmbë nango ku de.

Di juu dë, nöo wan bookowojoma bi dë leti a di pasi bandja naandë sindosindo ta pidi möni. Di womi aki de kai Balitimeosi. A di tóngó u de, hën kë taki, di mii u Timeosi.

⁴⁷ Nöo hën di a ko jei taa di nëbaima u Nazalëti de kai Jesosi, hënseei ta pasa dë wante, nöo hën a seti ta bai ta kai ën taa: “Jesosi, na i da di bakamii u Könu Dafiti di bi o ko di Heepima nö? Gaantangi mi begi i o, saa mi, saa mi e!”

⁴⁸ Nöo fa a ta bai dë, hën sëmëni u dee sëmbë ta waka a Masa Jesosi baka naandë gandji dëen taa: “Womi, kabuka naandë e!” Ma nöo an haika de seei. Möönmöön a ta bai eti taa: “Jesosi, di bakamii u Könu Dafiti dë, saa mi, saa mi e!”

⁴⁹ Nöo hën Masa Jesosi taanpu piiii hën a taa: “Un kai di sëmbë ta bai dë da mi.”

Nöo hën de go a di womi, de taa: “Söö. Be hati fii kötö e, womi. A ta kai i. Nöo fii hopo boo go.”

⁵⁰ Nöo di a jei sö kaa, hën a feki ën liba koosu vau tuwë go ala, hën a hopo vu taanpu, hën de tjëen go dou a Masa Jesosi.

⁵¹ Nöo di Masa Jesosi si ën a taa: “Mati, andi i kë u mi du da i?”

Hën a taa: “Mësitë, mi kë i heepi mi be mi ko ta si soni e.”

⁵² Hën Masa Jesosi taa: “Wë fa i ta biibi a mi tjika aki, mati, nöo i feni heepi kaa e.” Nöo fa u mbei naandë, hën di womi ko si soni gbegedee, nöo hën a ta waka nango a Masa Jesosi baka mökisi ku dee oto sëmbë.

11

Aki ta lei fa de ta wai ku Masa Jesosi kuma wan könu.

Mat. 21:1-11; Luk. 19:28-40; Joh. 12:12-19

¹ Wë nöo hën Masa Jesosi ku dee bakama fëen ta waka nango te de ko dou a di pisiwata ka de köndë de kai Betifaigi ku Betania dë, ka di kununu de kai Oleifi dë tu. Hën da de ko zuntu ku Jelusalen.

Nöo hën Masa Jesosi kai tu u dee bakama fëen ko nëen. Hën a taki da de taa:

² “Un go langalanga a di köndë a u fesi dë e, nöo te un denda nëen, nöo woon si wan njönku buliki taitai a bandja pasi dë, di sëmbë an sindo nëen liba waka wan daka. Nöo un lusu ën tja ko da mi.

³ “Nöo ee wan sëmbë hakisi unu taa: ‘Faandi mbei un ta lusu di buliki?’ nöo un musu piki ën taa: ‘Masa abi ën fanöudu.’ ” Nöo sö Masa Jesosi manda de te a kaba.

⁴ Nöo hën de tu bakama naandë go a di köndë. Nöo fa de go dou, hën de si di buliki taitai a wan dööbuka a bandja pasi naandë tuu, leti kumafa Masa Jesosi bi taki. Hën de go ta lusu ën.

⁵ Nöo wanlö sëmbë bi dë taanputaanpu dë, nöo di de si taa sö de ta lusu di buliki, hën de hakisi de taa: “Andi un ta lusu di buliki u du?”

⁶ Hën de piki de leti kumafa Masa Jesosi bi taki da de taa: “Masa abi ën fanöudu.” Nöo fa de fan dë, hën dee sëmbë an tapa de möön.

⁷ Nöo hën de tja di buliki ko da Masa Jesosi hën de jabi koosu nëen liba. Nöo hën Masa Jesosi subi a di buliki liba.

⁸ Nöo hën sëmëni sëmbë ko ta jabi koosu a di pasi liba, otowan ta denda a kapëë ta koti uwii tja ko tuwë a di pasi a Masa Jesosi fesi, nöo di buliki ta waka a dee uwii ku dee koosu liba. Bigi nöo de ta bigi Masa Jesosi sö.

⁹ Nöo fa de nango dë, sëmbë ta waka a fesi, sëmbë ta waka a baka, Masa Jesosi dë a mindi.

Di juu dë, hii sëmbë ta bai taanga taa:

“Hosana e! Hosana! Gadu dë ku di sëmbë aki!”

Otowan ta bai taa:

“Aai, Gadu dë ku di sëmbë di a manda ko a u aki!”

¹⁰ Otowan taa:

“Ke baa! Gadu o toona seti di tii u Könu Dafiti baka!”

Otowan taa:

“Aai, hosana! Di bai aki a musu go dou seei te a Masa Gaangadu köndë!”

Sö dee sëmbë ta bai ta taki.

¹¹ Nöo hën Masa Jesosi go dou a Jelusalen dendu gbolo, nöo hën a go wante a di Wosu u Masa Gadu nöo hën a denda nëen. Nöo hën a tuwë wojo luku hii sondi naandë finifini te a kaba. Ma nöo fu di a ko lati kaa an sa du soni möön, nöo hën hën ku dee tuwalufu bakama fëen hën de toona go a Betania go duumi.

Aki Masa Jesosi fan ku wan pau.

Mat. 21:18-19

¹² Di dobooko fëen hën de kumutu a Betania u toona go a Jelusalen baka, nöo hangi ko kisi Masa Jesosi.

¹³ Nöo hën a tuwë wojo go te ala hën a si wan fuuta pau de kai figa, nöo a si taa a dë ku uwii seei tjentjen. Nöo hën a go suku njanjan nëen. Ma nöo di a go dou, an feni na wan kodo, biga an bi dë ten u di pau pai njanjan eti.

¹⁴ Nöo hën a taki da di pau taa: “Na wan ten sëmbë o feni njanjan a i njan möön e.” Nöo fa a fan dë, dee bakama bi haikëen nöo hën de pasa go.

Aki Masa Jesosi jaka sëmbë

a di Wosu u Masa Gaangadu.

Mat. 21:12-17; Luk. 19:45-48; Joh. 2:13-22

¹⁵ Nöo hën Masa Jesosi ku dee bakama fëen ta waka te de go dou a Jelusalen, nöo hën de toona go wante a di Wosu u Masa Gadu möön. Nöo di de go dou, hën de si taa sëmbë sai naandë gidjii te a hia, so u de ta sei soni, so u de ta tooka möni da dee wakama dee ta ko naandë ta feni hia wini a de. Nöo hën wë di soni an bunu da Masa Jesosi seei, nöo hën a jaka dee sëmbë puu dë. A kandi dee tafa u dee sëmbë ta tooka möni naandë tuwë djolou a goon. Nöo i bi abi wanlö sëmbë ta sei pomba da sëmbë u de sa paka paima da Gadu, nöo hën Masa Jesosi kandi dee bangi u de tuwë tu.

¹⁶ Nöo hën a tapa pasi da dee sëmbë dee ta waka ta pasa a di keikipisi naandë kuma gaan pasi, be de an waka naandë möön ku dee soni de ta sei dë.

¹⁷ Nöo hën a bai dee sëmbë dë taa: “Wan bi jei fa Gadu Buku taki nö? A taa: ‘Mi wosu musu dë wan kamian u hii pei nasiön sëmbë ta ko ta begi Mi,’ ma uun tei ën ko buta wan kamian u ta tjubii fufuuma.”

18 Nöo hën dee Gaan Begima ku dee Sabima u Wëti ko jei taa sö Masa Jesosi du, nöo an bunu da de seei kwetikweti, nöo hën de ta suku wan fasi u de sa kisi ën kii. Ma da töku de fëëë biga wë hii mundu tei ën u gaan soni u di fasi fa a ta lei de soni u Gadu.

19 Nöo hën de fika dë te di ten sonu go a goon, hën Masa Jesosi ku dee bakama fëën toona kumutu a Jelusalen go.

Aki Masa Jesosi lei dee bakama fa de musu begi Gadu ku biibi tjika.

Mat. 21:20-22

20 Di dobooko möön, hën Masa Jesosi ku dee bakama fëën ta toona go a Jelusalen baka. Te wan pisi hën de dou a di figa pau di a bi siba naandë, nöo hën dee bakama luku, de si taa dee uwii fëën ko laulau. Di pau dëdë seei te dou a lutu.

21 Nöo hën Petuisi ko mëni fa Masa Jesosi bi fan ku di pau, nöo hën a kai ën te a piki, a taa: “Mësitë, luku di figa pau di i bi siba jeside aki, a dëdë tuu o.”

22 Hën Masa Jesosi piki ën taa: “Awa, sö a dë tuu, nöo fëën mbei un musu ta biibi Gadu e.”

23 Aai, mi taki da unu taa ee un ta futoou Gadu tuutuu söndö panta a unu hati, nöo sondi an o dë di Gadu an o sa du da unu. Biga ee i taki da di kununu aki sö taa be a hopo kumutu naandë go tuwëën seei a ze, nöo a o du sö tuu.

24 “Fëën mbei mi taki da unu taa, ee woon hakisi Gadu wan soni nöo un ta biibi a unu hati taa un abi di soni kaa, nöo woon kisi ën e.”

25 Nöo hën a fan ku de möön a taa: “Haika e, te un ta begi, nöo ee i ko mëni taa i ku sëmbë a’ soni, nöo i musu puu di sëmbë a bëë ufö i go dou ku di begi e, nöo Masa Gaangadu o puu i a bëë tu u dee hogi dee i ta du. [

26 Ma nöo ee wan ta puu sëmbë a bëë u dee hogi dee de ta du unu, nöo unu Tata a liba an o puu unu a bëë tu u dee hogi dee un ta du.]”

Aki Masa Jesosi tai dee hedima

u Dju keiki.

Mat. 21:23-27; Luk. 20:1-8

27 Nöo hën de ko dou a Jelusalen awaa, nöo hën de toona go a di Wosu u Masa Gadu möön. Nöo fa Masa Jesosi ta waka ta lontu naandë, nöo hën wë a ko miti ku dee Gaan Begima ku dee Sabima u Wëti ku dee Gaan Womi.

28 Nöo hën de kai ën te a piki, de taa: “Wë u ko hakisi i wan sondi. Dee soni dee i du a di Keikiwosu aki, unsë i feni di leti fi du sö? Ambë da di sëmbë di manda i fi du sö wanlö soni?”

29 Nöo hën Masa Jesosi piki de taa: “Wë antoobi. Ma mi o hakisi unu wan sondi tu. Nöo ee un piki mi, nöo mi o piki unu ambë manda mi.

30 “Wë mi taki e, taa Johanisi di Dopuma, ambë bi mandëën faa dopu sëmbë: libisëmbë, naa Masa Gadu?”

31-32 Nöo di a hakisi de sö, hën de hai go a së go ta kuutu nango ta ko te de wei, de taa: “Ee u taa Gadu hën bi mandëën, nöo a o hakisi u ee faandi mbei wa bi piki ën? Ma nöo wa sa piki taa libisëmbë mandëën.” Nöo di soni mbei de taki sö, biga de fëëë lanti, fu di sömëni sëmbë bi biibi taa Johanisi bi dë wan tjabukama u Gadu tuutuu.

33 Nöo hën de toona ko a Masa Jesosi, hën de piki ën taa: “Wa sabi ambë bi mandëën e.”

Nöo hën a piki de taa: “Ee wan sa piki mi, nöo miseei ma sa piki unu tu.”

Nöo hën de disa di oto.

12

Aki ta lei di oto u wan goon masa.

Mat. 21:33-46; Luk. 20:9-19

¹ Nöo hën Masa Jesosi tei wan oto ta lei dee sëmbë a wödu fasi. A taa: “Wan womi bi dë, nöo hën a koti wan gaan goon fëen te a kaba, nöo hën a paandi di pau de kai doloifi a di goon, faa ta mbei win u bebe ku di njanjan fëen. Nöo hën a mbei wan sitonu peni te a kaba lontu di goon. Nöo hën a toona mbei wan goon mata ku sitonu ka de o ta fon di doloifi ta mbei di win. Nöo a baka u di dë, hën a mbei wan wakiti wosu tjongoo sö go a liba.

“Nöo di a kaba u du dee lö soni dë kaa, nöo hën a buta di goon a wanlö sëmbë maun fu de musu ta wooko ën dëen. Nöo hën a kumutu dë go a wan oto köndë.

² “Nöo hën a dë ala tee a sabi taa di juu dou u di fuuta lepi de mbei di win kaa. Nöo hën a kai wan futuboi fëen ko nëen, hën a mandëen taa be a go a dee wookoma go tei di fëen pisi u di win di a bi musu feni u di goon, tja ko dëen.

³ “Ma nöo di di futuboi dë naki te a go dou a di goon, nöo hën dee wookoma kisi ën hën de fon mën te a fon, nöo hën de mandëen go ku sösö maun.

⁴ “Nöo a baka u di dë, hën di womi toona manda wan oto futuboi go möön. Nöo di dee wookoma si di futuboi ko dou, hën de kisi ën, hën de fon mën a hedi te a fon nöo hën de toona du sëmëni oto hogihogi soni ku ën te a tjika de.

⁵ “Nöo hën di goon masa manda wan oto futuboi go möön, hën de toona kisi di dë kii. Nöo hën a ta puu futuboi ta manda nango a dee wookoma kodo, so u de de ta fon, so u de de ta kii,

⁶ teee a fika wan kodo sëmbë tö di a sa manda möön, hën da di wan kodo womi mii fëen di a lobi te na soni.

“Hën a taa: ‘Wë mi o manda di womi mii u mi aki go. A kandë te dee wookoma si ën nöo de sa abi lesipeki fëen fu di a dë miii u mi.’

⁷ “Nöo hën a manda di womi mii fëen go. Ma nöo di dee wookoma si di womi mii u di tata ta ko, nöo hën de taki da de na de taa: ‘Söö, ja ta si di womi mii u di sëmbë abi di goon aki ta ko naandë nö? Hën wë o kisi di gudu fëen tata a bakaten. Wë nöo un sabi nö? Un böo kisi ën kii, nöo di goon aki o fika a u maun.’

⁸ “Nöo hën de kisi di womi mii, nöo hën de kii ën wantewante naandë, hën de puu ën a di djai dendu tuwë go a kapëë ala. De an bei ën seei.”

⁹ Nöo hën Masa Jesosi hakisi taa: “Wë nöo fa dee soni pasa dë, nöo di sëmbë di bi disa di goon da dee wookoma naandë, unfa i mëni taa a o du? Na a o manda sëmbë go kii dee hogihatima dë puu dë nö? Awa, nöo a o buta di goon fëen a oto sëmbë maun.

¹⁰ “Nöo wan bi lesi fa Masa Gadu Buku taki nö? A taa:

Dee sëmbë ta mbei sitonu wosu dë,

de si wan sitonu taa an bunu,

nöo hën de tuwëen a kapëë.

Ma nöo bakaten,

hën di sitonu dë ko di mama posu u di wosu.

¹¹ Masa Gadu seei wë du di soni sö e,

nöo a dë wan gaan foondo soni seei da u.

Na sö di Buku taki ö?”

¹² Nöo di Masa Jesosi fan sö hën a tapa dë. Ma nöo dee keikihedima u Dju dee sai naandë, hën hati u de boonu seei te de kë kisi ën kii. Biga de sabi limbolimbo taa de a fan tjökö ku di oto naandë. Ma nöo töku de fëë taa lanti

o du ku de ee de kisi Masa Jesosi a wajaa naandë. Nöö hën mbei de disëen, nöö hën de go.

Aki de ta hakisi Masa Jesosi

soni u lanti möni.

Mat. 22:15-22; Luk. 20:20-26

¹³ Baka u di dë, nöö hën dee keikihedima dë go puu wanlô sëmbë u di Faliseima kulupu, ku di u kõnu Helodi, hën de manda de go a Masa Jesosi go luku ee de sa kisi ën ku fan.

¹⁴ Nöö fa de ko dou dë, hën de kai ën te a piki, hën de taa: “Mësitë, u sabi taa i dë wan leti sëmbë di an ta ganjan sëmbë. Fa i dë aki nöö libisëmbë an sa ta hai i nango ta ko ku di u de pakisei. Biga ja a’ toobi ku di fa de ta pakisei soni. Nönö. Fa i sai dë, i ta lei sëmbë Gadu wöutu seei gbegedee kumafa Gadu kë u sëmbë musu sabi, nöö hën i si u ko a i aki ku wan hakisi.

“Wë fa di gaan kõnu u Loomë kondë ta duwengi u fuu musu ta paka lanti möni aki, nöö unfa i feni fëen?

¹⁵ A fiti fuu pakëen, naa an fiti? Unfa i si ën?”

Ma nöö Masa Jesosi sabi taa bödjëe de ko ta pëe u de musu kisi ën, nöö hën a taki da de taa: “Baja, mi un kë kisi sô nöö? Wë un da mi wan kpëngëlë möni i si.”

¹⁶ Nöö hën de tei wan kpëngëlë möni tja ko dëen, nöö hën a luku ën, a taa: “Ambë abi di në ku di fesi dë a di möni liba aki?”

Hën de piki taa: “Wë di Gaan Kõnu u Loomë.”

¹⁷ Hën a taa: “Na sô nöö? Wë nöö un da di Gaan Kõnu di soni di da fëen e, nöö un da Masa Gadu di soni di dë fëen.” Sô a piki de.

Nöö fa a piki dë, nöö a foondo de seei, biga de an bi mëni taa sô a bi o piki de a sô wan kõni fasi.

Aki dee Saduseima pooba u kisi Masa Jesosi ku wan hakisi möön.

Mat. 22:23-33; Luk. 20:27-40

¹⁸ Nöö hën sëmbë u di Saduseima kulupu ko a Masa Jesosi awaa. Wë nöö fa dee Saduseima sai dë, de an kë piki taa te wan sëmbë dëdë nöö a o toona weki baka. Biga de an ta biibi seei taa di akaa u wan sëmbë ta fika ku libi baka u di a dëdë.

¹⁹ Nöö fa de ko a Masa Jesosi dë, hën de kai ën te a piki, de taa: “Mësitë, u kë hakisi i wan soni aki. Wë i sabi fa Mosesi bi sikifi buta da u, taa ee wan womi tei wan mujëe ma nöö an pai ku di mujëe, nöö te a dëdë nöö wan baaa fëen musu hoi ën suwagi faa musu pai ku ën, be hën baaa böngö an kaba. Na sô a dë nöö?

²⁰ “Wë nöö a pasa sô taa de bi dë sëbën baaa, nöö hën wan u de tei wan mujëe. Te a dëdë an pai ku ën möönsö,

²¹ nöö hën wan oto baaa fëen hoi suwagi. Te di baaa naandë seepi dëdë tu, an pai ku di mujëe tu. Te dou di u dii, hën seepi ko dëdë tu, an pai ku di mujëe möönsö.

²² Nöö sô a go tee dou dee sëbën baaa tuu. Hii de tuu libi ku di mujëe ma na wan kodo pai mihi ku ën möönsö. Baka u di dë, hën di mujëe seepi ko dëdë tu.

²³ “Wë nöö di de ta bai taki taa te wan sëmbë dëdë nöö a o toona weki baka, wë nöö u kë hakisi i wan soni. Te sëmbë weki baka a dëdë, undi u dee sëbën baaa naandë o abi di mujëe? Biga de tuu bi libi ku ën.” Nöö sô dee Saduseima hakisi Masa Jesosi.

²⁴ Hën a piki de taa: “Wë awa mi jei, ma di hakisi fuunu föutu tumisi fu di wan sabi Masa Gaangadu Buku, hën tu wan sabi di kaakiti di Masa Gadu abi tu.

²⁵ Biga te sɛmbɛ weki baka a dɛdɛ kaa, nɔɔ manɔ ku mujɛɛ soni an o dɛ mɔɔn ɛ. Womɔ an o tei mujɛɛ mɔɔn, mujɛɛ an o tei manɔ mɔɔn tu, ma de o dɛ kuma dee basia u Gadu Kɔndɛ.

²⁶ “Ma nɔɔ boiti u di dɛ, wan jei fa Mosesi bi sikifi buta a di Buku nɔ? Di ten a bi si di faja ta kisi a di uwii ma di uwii an ta tjuma, nɔɔ hɛn Gadu fan ku ɛn. A taa: ‘Mi da di Gadu di dee gaan sɛmbɛ fii ta begi: de Abahamu, Isaki, Jakopu sɔ.’ Na sɔ a taki nɔ? Wɛ nɔɔ fa a fan dɛ, an taa mi bi dɛ di Gadu u dee lɔ sɛmbɛ dɛ e, ma a taa mi da di Gadu u de.”

²⁷ Wɛ nɔɔ Masa Gadu an dɛ Gadu u wan sɛmbɛ di an dɛ ku libi e. Nɔɔ hɛn da de Abahamu sɔ dɛ ku libi a wan kamian eti, hii fa de bi dɛdɛ a sinkii fasi gaanduwe kaa. Nɔɔ hɛn mbei mi taa wan a’ leti seei a di soni un hakisi dɛ.”

Nɔɔ sɔ Masa Jesosi piki dee Saduseima di ten dɛ.

Aki ta lei undi u dee wɛti u Gadu da dee mɔɔn hebi wan.

Mat. 22:34-40; Luk. 10:25-28

²⁸ Wɛ nɔɔ fa Masa Jesosi ku dee Saduseima fan te de kaba naandɛ, nɔɔ wan Sabima u Wɛti bi sai leti naandɛ ta haika. Nɔɔ di a si taa Masa Jesosi piki de sɔ bunu hɛn a hakisi ɛn taa: “Mɛsitɛ o, dee hia wɛti Gadu buta da u fuu ta hoi aki, undi u de da di mɔɔn hebi wan u de tuu?”

²⁹ Nɔɔ hɛn a piki ɛn taa: “Di mɔɔn hebi wan u de nɔ? Wɛ hɛn da disi: Un dee sɛmbɛ u Isaɛli aki, un haika e.

Masa Gaangadu di Gadu fuunu, hɛn wanwan tɔ da Masa u mundu.

³⁰ Nɔɔ un musu lobi ɛn ku hii unu hati

ku hii unu akaa

ku hii unu pakisei,

te dou ku hii di kaakiti di un abi.

³¹ Nɔɔ di otowan dɛ sɔ taa,

I musu lobi oto sɛmbɛ leti kumafa i lobi i seei.

Nɔɔ de tu wɛti aki, de da dee mɔɔn hebi wan u dee wɛti u Gadu tuu.”

³² Nɔɔ hɛn di Sabima u Wɛti piki Masa Jesosi taa: “Aai Mɛsitɛ, fa i si i taki dɛ, sɔ a dɛ tuu. Biga Masa Gaangadu hɛn tɔ nɔɔ da Gadu u mundu, otowan an dɛ mɔɔnsɔ.

³³ Nɔɔ hɛn nɔɔ fuu lobi ku hii u hati ku hii u pakisei ku hii u akaa, ku hii di kaakiti di u abi. Wɛ nɔɔ sɔseei u musu lobi oto sɛmbɛ leti kumafa u lobi u seei tu. Wɛ nɔɔ misikuma ee wan sɛmbɛ i ta libi sɔ kaa, nɔɔ di dɛ dɛ mɔɔn bunu mɔɔn leki hii dee mbeti i ta tja ko ta tjuma da Masa Gaangadu, ku hii dee oto soni u ta tja ko ta tuwɛ dɛɛn, na sɔ nɔ?”

³⁴ Nɔɔ di Masa Jesosi jei fa di womi piki ku fusutan, nɔɔ hɛn a taki dɛɛn taa: “Aai mati, misikuma ja dɛ longi poi fii sa ko a di Tii u Masa Gaangadu dendu.”

Wɛ da sɔ Masa Jesosi fan ku di Sabima u Wɛti naandɛ. Nɔɔ di dee hia sɛmbɛ jei fa a ta piki ku fusutan tjika dɛ, nɔɔ na wan u de abi hati u hakisi ɛn soni mɔɔn.

Aki Masa Jesosi tai sɛmbɛ

ku wan hakisi.

Mat. 22:41-46; Luk. 20:41-44

³⁵ Nɔɔ fa Masa Jesosi dɛ a di Wosu u Masa Gadu ta lei sɛmbɛ naandɛ, te wan pisi hɛn hɛnseei bia hakisi wan soni. A taa: “Dee sɛmbɛ, faandi mbei dee Sabima u Wɛti ta lei unu taa di Paamusi Kɔnu o dɛ wan baka mii u Dafiti nɔɔ?”

³⁶ Biga wɛ di Akaa u Gadu seei bi ko a Dafiti liba. Hɛn a taki soni u di Paamusi Kɔnu di o ko. A taa:

Masa Gadu taki da mi Masa taa:

'Ko sindo a mi letisë maun aki,
u tee mi buta hii dee felantima fii a i basufutu.'
Na sò Dafiti sikifi nõ?

³⁷ "Wè nõõ ee Kõnu Dafiti ta kai di Paamusi Kõnu Masa fëen, nõõ unfa a sa dè hèn bakamii nõõ?"

Nõõ sò wan soni Masa Jesosi hakisi dee sèmbè naandè, ma de an saanfa u piki. Nõõ fa a fan kõni tjika dè te a tai hii sèmbè te dou ku dee hedima u Dju, nõõ a ta suti da dee sòsò sinkii sèmbè naandè tee na soni.

Aki ta lei fa Masa Jesosi ta puu dee hedima u keiki gogo a dõõ.

Mat. 23:1-36; Luk. 11:37-54, 20:45-47

³⁸ Nõõ hèn a fan go mõõn longi. A bai dee sòmèni sèmbè naandè taa: "Un haika e, dee sèmbè. Un musu mèni unu seei bunu ku dee Sabima u Wèti e. Aai. Biga fa i si de sai dè, nõõ de lo' u ta waka ta poolo a lanti dendu ku dee gaan langa djakiti u de zèèè, be hii sèmbè musu ta saka ta da de odi a wan gaan lesipeki fasi.

³⁹ De lobi u ta sindo a dee mõõn gaan hedima kamian a dee keiki fuunu. Te de go a wan sèmbè wosu u de go njan, nõõ de nango ta sindo a dee mõõn gaan heima bangi. Sò de ta mbei de seepi u bumbuu sèmbè tjika.

⁴⁰ "Ma na bumbuu sèmbè de dè e. Biga fa i si de sai dè, nõõ ee de si wan mujèè manu fëen dèdè a fika tjökòò a ganda naandè, nõõ de o ko njan dee gudu fëen wosu puu nèen maun fiaa seei. Nõõ ku èn sò de o ta ko ta taanpu a lanti wojo ta begi wanlò gaan langa begi u de, ta mbei deseei bumbuu sèmbè a sèmbè wojo.

"Wè nõõ mi taki da unu taa dee lõ sèmbè i si naandè, de o kisi wan gaan sitaafu a Gadu maun e, te a o ko kuutu libisèmbè."

Sò Masa Jesosi bai dee sèmbè naandè.

Aki ta lei ambè bi tuwè di mõõn gaan hia mõni da Gadu.

Luk. 21:1-4

⁴¹ Nõõ fa Masa Jesosi ku dee bakama fëen dè a di gaan keikiwosu naandè, te wan pisi nõõ hèn a waka go sindo zuntu ku di kamian ka de ta tja mõni ta ko ta tuwè da Gadu a di keikiwosu. A ta luku fa de ta tuwè dee mõni. Nõõ di ten naandè, nõõ dee guduma ta tja mõni ta ko ta tuwè seei djolodjolo sò.

⁴² Te wan pisi hèn wan pooti mujèè waka ko naandè. Di mujèè aki, hèn manu bi dèdè disèen, nõõ hèn a ko tuwè u kpèngèlè mõni da Gadu, an dou wan bèsènsi seei.

⁴³ Nõõ hèn Masa Jesosi kai dee bakama fëen te de piki, a taa: "Un si di pooti mujèè dè nõ? Hèn tuwè di mõõn gaan hia mõni mõõn hii de tuu da Gadu e. Aai.

⁴⁴ Biga fa i si dee guduma ta tja mõni u de ta ko ta tuwè dè, nõõ wan pikiwan nõõ de ta tuwè u dee gaan hia wan de abi. Ma nõõ di mujèè naandè, di soni a abi faa tei heepi èn seei, hèn i si a tei tuwè tuu dè kaa. Nõõ fëen mbei mi taki da unu taa hèn tuwè di mõõn hia mõni."

Nõõ sò Masa Jesosi taki da dee bakama fëen di daka dè.

13

Aki Masa Jesosi ta lei dee maaka u di ten goonliba o kaba.

Mat. 24:1-35; Luk. 21:5-33

¹ Nõõ hèn Masa Jesosi ku dee bakama fëen kumutu a di Wosu u Masa Gadu ko kai a dõõ. Nõõ hèn wan u dee bakama kai èn te a piki, a taa: "Mèsitè o, ja si fa dee wosu u di keikipisi aki waiti nõ? Luku fa dee sitonu u de bigi!"

² Nöo hën a piki taa: “Sö a dë tuu o, ma fa i ta si dee wosu dë sitampusitampu aki seei, ma nöo mi taki da unu taa wan daka o dou, hii dee sitonu i si aki tuu o booko kai paaja fanjanfanjan sö. Na wan u de o fika oto a oto liba möön e.” Sö a piki de.

³ Nöo hën de kumutu naandë waka go a Oleifi Kununu. Nöo hën Masa Jesosi go sindo a di kununu bandja ta luku go a Jelusalen, nöo a ta si di Wosu u Masa Gadu seei gbegedee.

Te wan pisi hën Petuisi, ku Jakobosi, ku Johanisi ku Andiasi hën de ko nëën. Hën de taa:

⁴ “Wë Masa o, fa i bi taki di booko u di Gaan Keikiwosu di u bi dë ala, un juu dee lö soni dë o pasa? Un maaka joo da u fuu sa sabi taa di ten dë dou?” Sö de hakisi ën.

⁵ Nöo hën a piki de taa: “Awa, a dë fuun dë ku mëni fëen tuu, fu sëmbe an musu ganjan unu.

⁶ Biga mi taki da unu taa sëmëni sëmbe o hopo tei mi në ta taki taa de da di Paamusi Kõnu kaa. Nöo ku di fan u de dë, de o ta ganjan sëmëni sëmbe hai tja ko a de së. Hën mbei un musu mëni unu seei e.

⁷ “Söo. Wë nöo di ten dë, nöo woon ta kisi njunsu taa gaan feti ta pasa a sëmëni köndë u goonliba aki. Nöo te un jei sö, nöo an musu buuja unu e, biga dee lö soni naandë tuu musu pasa. Ma nëën da di kaba u goonliba eti e.

⁸ Mi taki da unu taa wan nasiön sëmbe ku wan oto nasiön sëmbe o ta hopo ta feti ku deseei. Wan kõnu o manda dee sodati fëen u de ta miti ta feti ku dee sodati u wan oto kõnu. Goon o ta seki ta jabi a kamiankaman, gaan hangi o ko a sëmëni köndë ta kii sëmbe. Nöo fa dee lö soni dë o pasa, de o dë leti kuma te bëe ta njan wan mujëe, juu fëen zuntu faa pali. „Sö dee fuka u kai dë o lei taa di juu zuntu fu di goonliba aki musu kaba.”

⁹ “Söo. Nöo di juu dë, un musu luku bunu ku unu seei taa un dë tololoo a Gadu pasi. Biga sëmbe o ta kisi unu tja go a kuutu e, de o ta fon unu a dee keikiwosu fuunu. De o ta tja unu go a dee gaama ku dee kõnu u de kuutu unu. Dee lö soni dë tuu de o du ku unu fu di un ta nama ku mi hedi. Ma nöo töku a bunu o, biga a di fa dë woon kisi okasi fuun musu taki soni u mi da de.

¹⁰ Nöo mi taki e, taa hii nasiön sëmbe u goonliba musu ko jei di bunu njunsu u Gadu, biga te a dë sö kaa ufö di kaba u goonliba sa dë.

¹¹ “Söo. Nöo haika. Te sëmbe kisi unu tja go a kuutu fu mi hedi kaa, nöo wan musu sai dë ta booko hedi taa: ‘Andi woon taki ee?’ Nönö, un fan go nöo. Biga na unu o fan ma di juu dë di Akaa u Gadu seepi o da unu andi fuun taki.

¹² “Nöo di ten dë sëmbe o hogi e, dee sëmbe. Biga wan baaa womi o tei ën baaa tja go kõnku u de kii ën, söseei wan tata o kõnku ën mii da de u de kii. Dee mii o ta biinga u puu dee gaan sëmbe u de a de liba, de o ta kõnku de da sëmbe seei u de kii. Sö libisëmbe o hogi tjika e.

¹³ Di juu dë, hii sëmbe o buuse unu fu di un nama ku mi hedi. Ma nöo di sëmbe di o tai hati fika a di pasi u Gadu go dou, nöo hën o feni di libi u teego a Gadu.”

Nöo sö Masa Jesosi fan ku dee bakama fëen di ten dë.

¹⁴ Wë nöo gaanduwe a fesi kaa wan tjabukama bi taki u wan gaan hogi soni o ko pasa a di Gaan Wosu u Masa Gaangadu dendu, nöo di sëmbe di ta lesi Gadu buku nöo be a buta pakisei faa fusutan andi di soni aki kë taki.

Hën Masa Jesosi fan ku dee bakama fëen go möön longi, a taa: “Te un si di Gaan Hogi Soni ko taanpu a di kamian ka an bi musu dë ta poi Masa Gaangadu tjina, nöo aan soni u taki möön. Un dee sëmbe a di pisiwata u Judea aki musu kule go tjubi a dee gaan kununu liba e.

15 “Ee wan sɛmbɛ dɛ nɛɛn liba wosu a baiko dɛ, nɔɔ a musu saka kai a goon wante kule go ka a sa go. An musu denda a wosu go tei soni.

16 Ee wan sɛmbɛ dɛ a goon dendu ta wooko, a musu kule go wante ka a o go. An musu go tei koosu a gangasa seei.

17 Nɔɔ mi taki da unu e, taa dee mujɛɛ dee dɛ ku bɛɛ, ku dee o dɛ ku miii a maun, a o dɛ gaan fuka soni da de o. Aai.

18 Nɔɔ un musu begi Gadu be di soni aki an musu pasa a gaan kɔtɔ ten, nasɔ a gaan tjuba ten.

19 Biga mi taki da unu taa fu sensi Masa Gadu mbei goonliba, nɔɔ di lɔ gaan fuka dɛ an bi ko pasa wan daka eti, nɔɔ baka u di ten naandɛ nɔɔ an o pasa mɔɔn tu.

20 “Nɔɔ hɛn mbei mi taki da unu taa ee Masa Gaangadu an sati di ten puu hafu u dee daka naandɛ, nɔɔ na wan sɛmbɛ o fika ku libi mɔɔn e. Ma fu dee sɛmbɛ dee Masa Gaangadu tei ko sɛmbɛ fɛɛn, fu de hedi mbei an o disa di hogi naandɛ go dou, ma a o koti ɛn hafu.

21 “Sɔɔ. Nɔɔ a di ten naandɛ, ee de ko taki da unu taa di Paamusi Kɔnu dɛ a sɔ wan kamian, wan musu piki e.

22 Biga sɔmɛni sɛmbɛ o ta hopo ta mindi soni taa de da di Paamusi Kɔnu, de o ta mindi soni taa Gadu hɛn ta wooko a de liba, nɔɔ de o ta du gaan foondo wooko seei. Nɔɔ a sɔ wan fasi de o ta biinga u kisi dee sɛmbɛ u Gadu ta ganjan puu nɛɛn pasi, ee de sa.

23 Hɛn mbei mi taa un musu ta luku bunu ku unu seei.

“Un si, mi taki hii soni da unu a fesi kaa e, nɔɔ be un kɔni.”

24 Nɔɔ hɛn Masa Jesosi taki mɔɔn a taa: “Nɔɔ baka u di gaan fuka ten u taki dɛ, nɔɔ wanlɔ oto gaan soni o ko pasa tu e, kumafa di tjabukama bi taki a fesi. A taa:

Di sonuwojo o dungu kankan,
nɔɔ di libawojo an o tuwɛ limbo mɔɔn tu.

25 Dee teeja dee dɛ a liba ala,
de o ta kumutu a de kamian ta puu ta kai.
Hii kaakiti u mundu kaa o ta seki.

26 Nɔɔ di juu dɛ, sɛmbɛ o si Mi di ko Libisɛmbɛ Mii aki kumutu a liba ala ta ko a dee wɔluku dendu. Nɔɔ ku gaan kaakiti mi o ko e, ku waiti seei, ta koti faja ta ko.

27 Nɔɔ di ten naandɛ nɔɔ mi o manda dee basia u mi go ta pii hii dee sɛmbɛ dee mi tei ko sɛmbɛ u mi kaa kumutu a hii dee peipei kamian u mundu ka de dɛ tuu, tja ko a mi.

28 “Nɔɔ fa mi ta fan ku unu aki, nɔɔ un tei wan lei a dee figa pau u di kɔndɛ aki. Te i si taa de ta buta njunjun uwii, nɔɔ i sabi taa deewei zuntu kaa, na sɔ nɔɔ?”

29 Nɔɔ sɔseei a dɛ ku dee soni dee mi ta taki aki. Te i ta si taa de ta pasa sɔ kaa kumafa mi taki de dɛ, nɔɔ un musu sabi taa di juu dou fu Mi di ko Libisɛmbɛ Mii aki musu toona ko a goonliba. Mi dɛ leti a baka huku naandɛ ta ko e.

30 Nɔɔ mi taki da unu taa dee lɔ sɛmbɛ u di ten u dɛ aki, de an o dɛdɛ kaba tuu bifɔ dee soni dee i jei mi taki aki o ko pasa.

31 “Nɔɔ fa i si dee soni u di goonliba aki ku dee u mundu sai dɛ, nɔɔ de tuu sa pasa go kaba a sɔsɔ e. Ma dee wɔutu dee mi ta konda da unu aki, nɔɔ de an o kaba a sɔsɔ mɔɔnsɔ. Sɔ de dɛ tuutu soni tjika.”

Aki ta lei taa i musu dɛ

seekaseeka da di daka di

*Masa Jesosi o toona ko.**Mat. 24:36-44*

³² Nöo hën a taa: “Di juu ku di ten di mi o toona ko a goonliba, na wan sëmbe sabi ën e. Dee basia u Masa Gaangadu köndë an sabi ën, nöo miseei di ko Libisëmbe Mii aki an sabi ën tu. Gadu u Tata wanwan tö nöo sabi di juu ku di ten dë.

³³ Hën mbei un musu dë kabakaba këëë ta watji mi. Biga wan sa na un juu mi o ko.

³⁴ “Mi o kondëën da unu a wan fasi aki taa a dë leti kuma wan bigima di o go a oto köndë go waka. Nöo hën a kai dee wookoma fëën go buta wooko a de maun te a kaba u de ta du, hiniwan sëmbe ku ën wooko. Nöo hën a fan ku di sëmbe ta watji a di dööbuka taa: ‘I musu dë kabakaba ta luku mi e.’

³⁵ “Nöo mi wë da di bigima mi taki dë. Nöo un musu dë kabakaba ta luku mi. Biga wan o sabi di ten nasö di juu di mi o ko e, ee a sapate buka, ee a gaan ndeti, ee a ganian kanda, ee te kamian ta limbo, wan o sabi.

³⁶ Te fii sabi nöo mi dou kaa, nöo na be a dë taa i dë kuma i ta duumi di juu dë e.

³⁷ “Nöo sö e. Fa i si mi ta fan ku unu aki, nöo sö nöo mi ta fan ku hii sëmbe. Un musu dë kabakaba ta luku mi e, dee sëmbe.”

14*Aki wan mujëë du Masa Jesosi wan gaan bunu.**Mat. 26:1-13; Luk. 22:1-2; Joh. 11:45-12:8*

¹ Wë nöo fa Masa Jesosi ta fan ku dee bakama fëën dë, nöo a fika tu daka nöo de o njan di gaan piizii daka u dee Dju de kai Pasika. „A di daka dë, de ta mëni fa dee gaan sëmbe u de bi kumutu a saafu a Egepiti köndë,„ nöo de ta njan wan pei bëëë de ta jasa söndö sooda.

Söö. Nöo di juu dë, dee Gaan Begima ku dee Sabima u Wëti sai dë ta watji Masa Jesosi u de kisi kii a wan köni fasi.

² Ma de ta kuutu ku deseëi taa: “Wa musu kisi ën a di gaan daka e, biga ee nasö dee hia sëmbe o mbei toobi ku u, nöo di köndë o seki poi.” So de ta taki.

³ Nöo di ten dë, Masa Jesosi dë a di köndë de kai Betania a di wosu u wan womi de kai Simon. Di womi aki bi abi tjinasiki, nöo nëën wosu Masa Jesosi ku dee bakama fëën dë ta njan.

Te wan pisi hën wan mujëë waka ko dou naandë. A dë ku wan sitonu bata nëën maun, ku wan sumëë suti fatu nëën dendu. Di fatu aki, de mbei ën ku di lutu u wan pei uwii nöo a dii te na soni. Nöo fa di mujëë ko denda a wosu dë, nöo hën a waka tololoo go a Masa Jesosi, nöo hën a booko di bata a buka naandë kpö, hën a ta tutu di fatu a Masa Jesosi hedi te hii di fatu kaba këëë a di bata.

⁴ Ma nöo fa a du dë, nöo so u dee sëmbe sai naandë an tei di soni u bunu seei, nöo hën de ta guunjëën taa: “Faandi mbei a poi di fatu sö u du baa? Jee?

⁵ Biga di fatu dë, ee de bi sei ën, nöo wan hii jaa möni a bi o puu, nöo de bi sa tei di möni paati da dee pootima u di köndë. Nöo hën a poi ën sö.” Sö de ta guunjëën.

⁶ Ma Masa Jesosi bai de taa: “Un disa di mujëë e. Andi mbei un ta guunjëën u du? Mi taki da unu taa wan gaan bumbuu soni a du da mi aki.

⁷ Biga ee un kë da dee pootima möni, nöo un sa ta da de hiniwanten. Ma mi, ma o dë ku unu aki fu nöömö e.

⁸ Nöo fëën mbei di mujëë aki ta du andi hën a sa du da mi wante. Un si? Biga fa a du di soni aki, nöo a du ën da di dëdë mi o dëdë abiti möön, leti kumafa de ta tuwë fatu a sëmbe sinkii u de tjä go bei.

⁹ “Nöö mi taki gbelin seei da unu taa te de ta tja di bunu buka u Gadu ta paaja a goonliba da sëmbë, nöö de o ta taki di soni di di mujëë du aki nöömö. De an o fëëkëtëën möönsö.”

Aki Judasi go a dee felantima

u Masa Jesosi.

Mat. 26:14-16; Luk. 22:3-6

¹⁰ Nöö fa Masa Jesosi fan naandë kaa, nöö hën di bakama fëën de kai Judasi Isikaliotu, nöö hën a kumutu a dee otowan dendu naandë, nöö hën a waka go tololoo a dee Gaan Begima, dee felantima u Masa Jesosi. Hën a go taki da de taa a sa heepi de u de kisi Jesosi.

¹¹ Nöö di de jei sö nöö de wai e, nöö hën de paamusi ën taa de o pakëën ee a du sö.

Nöö fu kumutu a di ten naandë, nöö di Judasi aki ta suku wan okasi nöömö faa sa buta Masa Jesosi a dee Dju hedima naandë maun.

Aki de ta seeka u njan di Pasika.

Mat. 26:17-25; Luk. 22:7-14, 21-23; Joh. 13:21-30

¹² Nöö baka u di dë, hën di fosu daka u di Pasika piizii dou. Nöö a di daka dë, nëën de ta njan di bëëë de ta mbei söndö sooda. Nöö de ta kii wan sikapu u de njan tu, nöö ku di sikapu dë de ta mëni fa Gadu bi puu de a saafu a fesiten. Nöö hën mbei de ta seeka da di daka dë seei gaanfa.

Söö. Nöö hën dee bakama u Masa Jesosi hakisi ën taa: “Masa, naasë i kë fuu musu seeka fuu njan di daka?”

¹³ Hën a kai tu u de taa: “Un haika, mi kë manda unu go a Jelusalen ganda. Nöö fa woon nango te un go dou dë, nöö woon si wan womi ta waka ta ko ku wan djogu wata, nöö un faakëën.

¹⁴ Nöö te un si taa a denda a wan wosu, nöö woon go fan ku di sëmbë abi di wosu taa ee naasë di kamba dë di di Mësitë ku dee bakama fëën musu ko njan di daka.

¹⁵ Nöö te un hakisi ën sö kaa, nöö a o lei unu wan gaan kamba a di wosu a liba, ka hii soni dë di un abi fanöudu. Nöö di kamba dë, hën un musu seeka te un kaba e.” Nöö sö Masa Jesosi manda dee bakama fëën, nöö hën de go.

¹⁶ Nöö di de naki te de go dou a di köndë, nöö hën de si hii sondi leti kumafa a bi taki da de, nöö hën de seeka te de kaba.

¹⁷ Nöö hën di sapate buka, nöö hën Masa Jesosi ku dee oto bakama ko dou a di wosu.

¹⁸ Hën de go sindo a tafa u de njan.

Aki Masa Jesosi pindja dee

bakama fëën a wan hogi sondi

o pasa.

Te wan pisi hën Masa Jesosi kai de te de piki, a taa: “Un haika e, dee sëmbë. Wan fuunu ta njan ku mi aki o könku mi e.”

¹⁹ Fa a taki dë, a booko dee bakama hati seei, hën de ta hakisi ën wan fu wan taa: “Masa, mi a o sa dë nö?”

²⁰ Hën a toona piki de taa: “Mi taki seei gbelin da unu taa wan fuun dee tuwalufu i si ta nama di bëëë ku mi a di wan kodo baafu paabi aki, o du sö ku mi e.

²¹ Nöö a o pasa ku mi leti kumafa a bi sikifi a Masa Gadu buku kaa, taa di Sëmbë di o ko Libisëmbë Mii musu dëdë. Ma nöö mi taki da unu taa helu u di

sëmbë di o kônku mi e. A bi sa möön bëtë de an bi pali ën ko a di goonliba aki wan daka.” Sö Masa Jesosi fan ku de te a kaba.

Aki Masa Jesosi njan di lasiti njan ku dee bakama fëen.

Mat. 26:26-30; Luk. 22:15-20; 1 Kol. 11:23-25

²² Nöo fa de ta njan makandi dë, te wan pisi hën Masa Jesosi tei wan bëë nöö hën a da Gadu tangi te a kaba, nöö hën a booko ën.

Nöö hën a langa da dee bakama fëen, taa: “Disi da di sinkii u mi e. Un tei njan.”

²³ Söseei a tei di kan ku di win nëen dendu, hën a da Gadu tangi te a kaba. Hën a langëen da dee bakama taa: “Un bebe tjëntjën te lontu ko kai.” Hën de bebëen lontu dou te de kaba.

²⁴ Nöö hën a taa: “Fa i si un bebe di win aki, hën da di buuu u mi di o kai a goon fu Gadu sa mbei wan njunjun buka ku libisëmbë. Biga fa mi o dëdë aki, hën o paka puu sëmëni hia sëmbë a Gadu bëë u dee hogi du u de.”

²⁵ Nöö hën a taa: “Mi taki da unu tuutuu seei, taa ma o bebe di win a di fasi aki möön e. Biga tee i si mi bebëen möön, nöö Gadu ko ku di Njunjun Tii fëen a libisëmbë mindi.”

²⁶ Nöö baka u di dë, hën de kanda wan kanda te de kaba da Gadu tangi, nöö hën de kumutu naandë. Nöö hën de nango a di kununu de kai Oleifi Kununu.

Aki Masa Jesosi fan ku Petuisi

a wan soni o pasa ku ën.

Mat. 26:31-35; Luk. 22:31-34; Joh. 13:36-38

²⁷ Nöö fa Masa Jesosi ku dee bakama fëen dë a pasi nango dë, hën a kai de te de piki, a taa: “A di ndeti aki hii unu tuu o paaja go disa mi fiaa. A o pasa leti kumafa a sikifi a di Buku u Gadu, taa de o fon di sikafuma nöö dee sikafu o paaja fanjanfanjan go u de.”

²⁸ Nöö hën a taa: “Ma te mi weki baka a dëdë, nöö mi o waka a unu fesi go a Galilea e. Ala mi ku unu o toona miti.”

²⁹ Nöö hën Petuisi piki taa: “Masa, ee dee otowan aki tuu disa i go seei ma mi, ma o disa i möönsö e.”

³⁰ Ma nöö Masa Jesosi toona piki ën taa: “Womi, haika. Mi taki da i taa a di ndeti aki ganian an o kanda dou tu pasi bifö joo fia dii pasi taa ja sabi mi a goonliba wan daka.”

³¹ Wë nöö Petuisi an sa jei di soni dë. Hën a taa: “Ambë, Masa! Ee u mi dëdë ku i seei, nöö mi dë kabakaba kaa. Ma sa piki wan daka taa ma sabi i e.” Nöö sö nöö dee otowan tuu ta piki tu.

Aki de dë a di djai de kai Gëtiseimani.

Mat. 26:36-46; Luk. 22:39-46

³² Nöö hën Masa Jesosi ku dee bakama fëen nango te de go dou a wan kamian de kai Gëtiseimani. Nöö hën a taki da de taa: “Un dë aki ta luku mi e. Mi o go begi ala.”

³³ Ma nöö a tei Petuisi ku Johanisi ku Jakobosi fu de musu go ku ën möön fundu a di kamian.

Te wan pisi hën Masa Jesosi ko dë fukafuka te na soni.

³⁴ Nöö hën a fan ku de dii bakama naandë taa: “Wan gaan fuka ko a mi liba seei tee kuma mi sa dëdë. Nöö un tan aki ufö ta da mi taanga e.”

³⁵ Nöö hën a waka go wan pikiwan möön longi, nöö hën a tuwëen seei a goon.

³⁶ Nöö hën a begi Masa Gaangadu taa: “Ke Taata o, mi sabi taa i sa du hii soni. Nöö di kan di i lai da mi u mi bebe aki, nöö a hebi da mi o. Nöö mi begi

i, ee a sa, nöö be i tei en puu a mi. Ma nöö fa mi fan aki seei, ma na du kumafa mi kë e, ma du kumafa i kë.”

³⁷ Nöö di a begi sô te a kaba nöö hën a toona ko a de dii bakama fëen, hën a si taa de duumi pii.

Nöö hën a kai Simon Petuisi te a piki, a taa: “Simon, duumi i ta duumi sô nõ, womi? Wan sa dë ku wojo di wan kodo juu aki ta da mi taanga nõ?”

³⁸ Hën a toona taa: “Be un dë ku wojo ta begi e, dee sëmbë, be di didibi an wini unu. Ma mi sabi taa hati fuunu kë du kumafa a fiti, ma sinkii fuunu an taanga sô.”

³⁹ Nöö fa a taki dë, hën a toona go a di begi baka. A begi di wan seei begi di a bi begi te a kaba,

⁴⁰ nöö hën a toona ko a dee bakama fëen möön. Awaa seei de dë ta duumi, biga duumi nöö hebi a de wojo sô. Nöö di a weki de, nöö a ko bigi da de te de an saanfa u fan ku en möön.

⁴¹ Nöö hën a toona go begi te a kaba di u dii pasi, nöö hën a toona ko a de möön. Hën a taa: “Duumi nöö un ta duumi ta böö sinkii fuunu sô nõ baa? Aai. Wë di juu dou e, u de buta Mi di ko Libisëmbë Mii aki a dee takuhatima maun.

⁴² Biga di sëmbë di sei mi, nöö a dou kaa. Nöö un hopo boo go.”

Aki de kisi Masa Jesosi.

Mat. 26:47-56; Luk. 22:47-53; Joh. 18:3-12

⁴³ Wë nöö Masa Jesosi an kaba u fan seei, nöö hën Judasi dou. Hii fa a bi dë wan u dee tuwalufu bakama u Masa Jesosi seei, ma töku a ko dou ku wanlö hia sëmbë. De dë ku kodjo ku ufangi a maun u de ko kisi Masa Jesosi. Dee Gaan Begima, ku dee Sabima u Wëti, ku dee Gaan Womi, de wë manda de.

⁴⁴ Wë nöö Judasi bi mbei buka ku dee sëmbë dë kaa taa: “Te i si mi bosu wan sëmbë, nöö di sëmbë dë hën fuun kisi tei e. Nöö un musu panjëen taanga, fu an sa kumutu.” Sô Judasi bi fan ku dee sëmbë a fesi.

⁴⁵ Nöö di de ko dou, nöö hën Judasi waka go miti ku en nöö hën a taa: “Odi o, Mësitë.” Nöö hën a baasëen bosu.

⁴⁶ Fa u mbei naandë, hën dee sëmbë kisi Masa Jesosi gbalau panjan gingin wante.

⁴⁷ Ma nöö wan u dee bakama dë a dendu naandë hai en ufangi valau, hën a djafu wan futuboi u di Kaba Hei Begima jesi belim puu tuwë a goon naandë.

⁴⁸ Nöö hën Masa Jesosi hakisi dee sëmbë dee ko naandë taa: “Dee sëmbë, a mi liba un ko sô nõ, ku pau ku kodjo ku ufangi, kuma mi da wan sëmbë ta booko di köndë nõ?”

⁴⁹ Wë nöö un bi ta si mi hiniwanten a di Wosu u Masa Gaangadu ta lei sëmbë Gadu wöutu, nöö unfa wan bi kisi mi ala?

“Ma mi sabi taa fa un ta du aki, nöö a ta pasa leti kumafa a bi sikifi a Gadu Buku kaa.”

⁵⁰ Fa u mbei naandë, hii dee bakama u Masa Jesosi paaja kule go disëen fiaa.

⁵¹ Ma nöö wan kijoo bi dë a de dendu naandë, a bi dë ku wan gaan koosu nëen sinkii lolulolu, nöö hën dee felantima tuwë maun kisi en wante.

⁵² Nöö hën a feki di gaan koosu valau puu nëen sinkii disa, hën a kule pënëpënë go.

Aki de tja Masa Jesosi go

a dee gaan kuutuma.

Mat. 26:57-68; Luk. 22:54-55, 63-71; Joh. 18:13-14, 19-24

⁵³ Wë nõö fa dee sëmbë bi ko kisi Masa Jesosi naandë, nõö hën de tjëen go tee a di wosu u di Kaba Hei Begima. Nõö di ten naandë hii dee hedima u Dju tuu, dee Gaan Begima ku dee Gaan Womi ku dee Sabima u Wëti, sô de tuu hai ko makandi naandë.

⁵⁴ Di juu dë Petuisi bi dë te a baka ala ta waka sapisapi ta ko. Nõö hën a ko dou a di djai dendu naandë, nõö hën a go sindo ku dee wakıtima bi sai dë ta këndë faja ku de makandi.

⁵⁵ Nõö di ten naandë, dee Gaan Begima ku hii dee kuutuma u dee Dju sëmbë, nõö de seti ta kuutu a Masa Jesosi liba kaa. Nõö de ta suku u tja kaagi fëen ko a fesi u de sa feni wan soni fu de sa buta taa a musu dëdë, ma de an sa feni soni möönsö.

⁵⁶ Biga hii fa dee sëmbë ta tja sômëni soni ko ta mindi dëen, ma de an ta kai a di wan baaku möönsö.

⁵⁷ Te wan pisi hën wanlô sëmbë hopo taki wan soni, taa:

⁵⁸ “Dee sëmbë aki, un haika wan soni u seei bi jei ku u seei jesi. Di womi aki bi taki taa a o booko di Wosu u Masa Gadu di de mbei ku libisëmbë maun tuwë a goon, nõö a dii daka dendu nõö a o toona mbei ën baka söndö libisëmbë maun. Sô a bi taki e.”

⁵⁹ Ma fa dee sëmbë fan dë seei, ma dee fan u de an ta kai a wan möönsö.

⁶⁰ Nõö hën di Kaba Hei Begima hopo taanpu a dee oto kuutuma fesi naandë, nõö hën a hakisi Masa Jesosi taa: “Wë dee soni fii de ta taki aki, nõö ja o piki de möönsö nõ, ee tuu soni de ta mindi da i. Unfa i taki?”

⁶¹ Ma Masa Jesosi an jabi ën buka piki na wan soni. Nõö hën di Kaba Hei Begima hakisi ën baka taa: “I da di Kõnu di Masa Gaangadu bi paamusi taa a o manda ko nõ? I da di Mii u di möön hei Gadu u mundu nõ?”

⁶² Nõö hën Masa Jesosi piki awaa taa: “Leti kumafa i taki dë, nõö sô a dë. Nõö wan daka o dou, nõö woon si mi di ko dë Libisëmbë Mii aki dë sindosindo a di letisë maun u Gadu di abi hii makiti u mundu. Söseei woon toona si mi ta saka ta ko a dee bundji dendu ala.” Sô Masa Jesosi piki.

⁶³ Wë nõö di di Kaba Hei Begima jei fa a piki ën naandë, nõö hati fëen boonu e, tee a hai di koosu nëen sinkii naandë tënë zaan sô.

⁶⁴ Nõö hën a hakisi hii dee kuutuma dee sai naandë taa: “Dee sëmbë aki, un ta suku kaagi a di womi aki möön nõ? Wan jei fa a piki dë nõ? A butëen seei makandi ku Gadu. Nõö unfa un mëni fëen?”

Nõö hën de tuu piki a di kuutu taa: “An dë u taki möön e. Dëdë nõö a musu dëdë.”

⁶⁵ Nõö fa u mbei dë, nõö di kamian ko ta fanjanfanjan kaa. Hën de bigi ta tunta a Masa Jesosi fesi, te wan pisi de tai ën wojo ku hangisa, hën de ta naki ën ta dëen baaimaun, ta hakisi ën taa: “Wë di i taa Gadu ta lei i soni, wë nõö piki u, ambë naki i dë?” Dee wakıtima u di kamian seei ta naki ën ku böö tu.

Aki di soni Masa Jesosi taki da Petuisi ko pasa ku ën.

Mat. 26:69-75; Luk. 22:56-62; Joh. 18:15-18, 25-27

⁶⁶ Wë nõö fa de ta du ku Masa Jesosi dë, nõö Petuisi dë a di djai dendu a goon ala.

Te wan pisi nõö hën wan mujëë futuboi u di Kaba Hei Begima waka ko dou.

⁶⁷ Nõö hën a si Petuisi sindosindo ta këndë faja ku dee sëmbë naandë. Hën a luku ën diin. A taa: “Womi, na i seei bi dë makandi ku di Jesosi u Nazalëti dë nõ?”

⁶⁸ Nõö hën Petuisi piki taa: “Ma saandi i ta taki dë e. Ma fusutan seei.” Nõö hën a kumutu dë go taanpu zuntu ku di djai dööbuka. Ma nõö fa a taki dë, nõö hën wan womi gianan kanda kënkenjênkëen.

⁶⁹ Te wan pisi, nöö hën di mujëe mii toona si ën möön, hën a fan ku dee sëmbë dee ku ën sai dë taa: “Di womi aki da wan u dee sëmbë u di womi de ta kuutu dë e.”

⁷⁰ Nöö hën Petuisi toona fia taa: “Mi taki e, ma sabi di sëmbë naandë.”

Hën de sai dë te wan pisi, nöö hën dee sëmbë ku Petuisi taanpu naandë taa: “Womi, i musu dë wan sëmbë fëen, biga i da Galilea sëmbë e.”

⁷¹ Nöö hën Petuisi fia awaa taa: “Dee sëmbë aki, ee mindi mi ta mindi soni nöö Masa Gaangadu seei musu sitaafu mi e. Biga mi ta soi da unu taa ma sabi di sëmbë un ta taki dë, kwetikweti.”

⁷² Di a fan sô kaa, hën wantewante di ganian toona kanda di u tu pasi. Nöö hën Petuisi ko mëni fa Masa Jesosi bi taki dëen taa: “Ganian an o kanda dou tu toon bifõ joo fia dii pasi taa ja sabi mi.” Nöö di a ko mëni sô kaa, nöö hën a bia go ta këe seei te a bigi. Hati nöö a hati ën sô.

15

Aki de ta tja Masa Jesosi go

a Gaama Pilati.

Mat. 27:1-2, 11-26; Luk. 23:1-5, 13-25; Joh. 18:28-19:16

¹ Wë nöö di juu dë, dee Gaan Begima ku dee Sabima u Wëti ku dee Gaan Womi, ku dee oto kuutubasi u dee Dju sëmbë bi sai naandë ta kuutu makandi nöömö unfa u de du ku Masa Jesosi. Nöö hën de ta kuutu tefa di ganian kanda, nöö hën de kai a wan pakisei. Hën de toona kisi Masa Jesosi tai gingin. Nöö hën de tjëen go a di sëmbë di dee Loomë lanti bi buta faa ta kuutu sondi da dee Dju sëmbë. Hën da Gaama Pilati.

² Nöö hën de go a di kuutu wante. Hën di gaama hakisi Masa Jesosi taa: “Fa de ta taki fii aki, ju da di kõnu u dee Dju tuu nöö?”

Nöö hën Masa Jesosi piki taa: “Kumafa Gaama taki dë nöö.”

³ Nöö di ten dë, dee Gaan Begima ta pii sömëni sondi ta kaagi Masa Jesosi da di gaama.

⁴ Nöö hën di gaama toona bia fan ku Masa Jesosi möön. A taa: “Haika dee hia hogi de ta konda taa i du aki. Ja o piki ee sondi de ta mindi da i nöö?”

⁵ Ma nöö Masa Jesosi an piki na wan soni seei.

Nöö di sondi dë bigi da Gaama Pilati e, di Masa Jesosi an ta piki ta fia ku dee sëmbë a dee sondi de ta kaagi ën dë.

⁶ Wë nöö wan guwenti bi dë taki taa te di Pasika piizii o dou, nöö dee Dju sëmbë o hakisi di gaama faa puu wan sëmbë a dinguwosu da de.

⁷ Nöö di juu dë wan womi de kai Balabasi ku wanlõ otowan fëen bi dë a dinguwosu sötösötö. Biga de bi kii wanlõ sëmbë a wan wajawaja dendu, di ten de ta feti u puu dee Loomë lanti a de liba. Nöö hën mbei de bi sötö de.

⁸ Di juu dë, hën dee hia sëmbë dee bi ko a Masa Jesosi baka di de ta tjëen go a Gaama Pilati dë, hën de hai ko möön zuntu ku di wosu hën de bai taa: “Du da u kumafa i bi guwenti e, Gaama.”

⁹ Nöö hën Gaama hakisi de taa: “Ambë un kë mi musu lusu da unu? Un kë mi lusu di kõnu fuunu aki nöö?”

¹⁰ Fa a hakisi de di soni dë, a hakisi sô biga a sabi taa, na dee sösö sinkii sëmbë dë bi tja Masa Jesosi ko dë. Ma dee Gaan Begima bi tjëen ko fu di de ta hau ku ën hedi.

¹¹ Ma nöö di juu dë, dee Gaan Begima dë a dee sëmbë dendu naandë ta da de faja taa: “Un ta piki taa Balabasi e! Un piki taa Balabasi, hën a musu lusu.”

Nöö hën dee sëmbë seti ta bai ta taki da di gaama taa: “Balabasi hën i musu lusu e!”

12 Nöo hën di gaama hakisi taa: “Nöo andi mi musu du ku di sëmbë un ta kai di kõnu fuunu aki?”

13 Hën de bai taa: “Pekëen a lakpa pau! Pekëen a lakpa pau kii e!”

14 Hën Gaama toona hakisi taa: “Faandi mbei un taki sô? Un hogi a du?”

Hën de bai möön taanga taa: “Pekëen a lakpa pau kii e!”

15 Wë nöo di gaama kë u dee sëmbë hati musu kötö, hën a lusu Balabasi puu a di dunguwosu da de. Nöo hën a manda dee sodati hën de wipi Masa Jesosi wan gaan taku wipi te de kaba. Nöo hën Gaama butëen a dee sodati maun awaa fu de tjëen go peka a lakpa pau.

Aki dee sodati ta mbei

Masa Jesosi fa.

Mat. 27:27-31; Joh. 19:2-3

16 Nöo hën dee sodati tei Masa Jesosi hën de tjëen go a wan apaiti kamba u di wosu u di gaama. Nöo hën de kai hii di sodati lö u de tuu ko makandi.

17 Nöo hën de tei wan baaubaa u koosu sô kumafa kõnu ta bisi, hën de bisi Masa Jesosi te de kaba. Nöo hën de tei wan tatal ku maka hën de lolu ën te de kaba mbei kuma kõnu kaapusa, tuusi nëen hedi.

18 Nöo hën de ta hoi ën a sipootu awaa. De ta wai maun dëen ta taki taa: “Odi o, kõnu! Odi o, kõnu u deë Dju!”

19 Nöo hën de tei wan pau, hën de ta naki ën a hedi. Nöo de ta tunta nëen fesi, de ta saka ta tjökö kini nëen fesi a goon ta mbei kuma de ta dëen lesipeki.

20 Nöo di de kaba u mbei ën fa sô kaa, nöo hën de toona puu di koosu de bi bisi nëen sinkii, nöo hën de bisi di fëen seei koosu dëen baka. Nöo hën de tjëen puu a di kõndë ganda go a döösë u de go pekëen a lakpa pau awaa.

Aki de tja Masa Jesosi go peka

a lakpa pau.

Mat. 27:32-44; Luk. 23:26-43; Joh. 19:17-27

21 Nöo hën de nango ku ën te wan pisi, hën de miti ku wan womi de kai Simon. A kumutu a kamian ta ko a ganda. Di womi aki, a dë u wan kõndë u Afikan de kai Sileni, nöo a dë di tata u Lufusi ku Alekesani. Nöo fa a ta pasa naandë, hën dee sodati duwengi ën faa musu tja di lakpa pau u Masa Jesosi dëen, biga Masa Jesosi ko suwaki te an sa tjëen möön.

22 Nöo hën dee sodati ta tja Masa Jesosi go tee a wan kamian de kai Golugata, hën da Hedibonu Kamian, sô de kai di kamian naandë.

23 Nöo di de ko dou, nöo hën de mökisi win ku wan pei deesi dëen faa musu bebe, be di sinkii hati fëen musu bösö, ma nöo Masa Jesosi an kë bebëen.

24 Nöo hën dee sodati kandi ën a di lakpa pau peka awaa, hën de hopo di pau taanpu a pë. Nöo a baka u di dë, hën de ta tuwë lötu luku ambë o wini dee koosu u Masa Jesosi di de bi puu nëen sinkii buta dë. Nöo sô de paati dee koosu fëen te de kaba.

25 Nöo di ten de peka Masa Jesosi a di lakpa pau dë, nöo a bi dë wan pisiten u nëigi juu mamate sô.

26 Nöo de bi sikifi wan soni a wan paanga pisi peka a di lakpa pau hedi naandë, de sikifi taa JESOSI, DI KÖNU U DEE DJU, HËN DISI. Biga sô dee Loomë lanti bi guwenti u piki sëmbë faandi mbei de peka di sëmbë a di lakpa pau.

27 Wë nöo fa de du ku Masa Jesosi dë, nöo de peka tu oto sëmbë buta nëen bandja, wan dë nëen leti maun së, di otowan dë nëen töötömaun së. Dee sëmbë dë, de bi ta kii sëmbë ta tei soni u de, hën mbei de ta kii de a sô wan fasi. [

²⁸ Nöo sö a ko pasa leti kumafa Masa Gaangadu Buku bi taki gaanduwe u di Sëmbë di Gadu o manda ko taa: “De o kondëen makandi ku dee takulibima.”]

²⁹ Nöo sëmbë ta waka ta pasa naandë, nöo de ta lafu Masa Jesosi seei, de ta seki hedi ta lei finga nëen ta taki taa: “Luku, i bi ta taki taa joo booko di Wosu u Gadu nöo a dii daka dendu joo toona mbei ën baka. Na sö i bi taki nö?”

³⁰ Wë nöo be i saka kumutu a di lakpa pau di i a’ makiti sö!”

³¹ Söseei dee Gaan Begima ku dee Sabima u Wëti ta taki tu. De taa: “Fa a sai naandë, a bi ta heepi oto sëmbë ta puu de a sitaafu, na sö nö? Wë nöo andi mbei an sa heepi ën seei?”

³² Biga ee hën da di Paamusi Könu tuu, nöo be a saka kumutu a lakpa pau ko a goon be u si, nöo woo biibi nëen liba.” Söseei de tu womi dee dë pekapeka ku ën naandë ta taki soni ta tjökö ën tu.

Aki ta lei fa Masa Jesosi dëdë

ku andi pasa di ten dë.

Mat. 27:45-56; Luk. 23:44-49; Joh. 19:28-30

³³ Wë nöo a di sonuati tuwalufu juu, nöo hën wan gaan dungu ko kai a goonliba kankan, nöo a dë sö teee di juu sapate.

³⁴ Nöo hën Masa Jesosi bai taanga, a taki a di töngö fëen taa: “Eloi, Eloi, lama sabaktani?” Hën kë taki: “Gadu e, di Gadu u mi, andi mbei i bia baka disa mi sö?”

³⁵ Nöo dee sëmbë dee dë taanputaanpu naandë, de jei fa a bai “Eloi,” hën so u de taa: “Un haika, a ta kai di fesiten tjabukama fuu de kai Elia e, faa ko puu ën a di lakpa pau.”

³⁶ Nöo hën wan sëmbë sai dë kule go tuusi wan sipönsu a wan asin mbeimbei di de abi naandë, hën a fingëen a wan papai tëndë go a Masa Jesosi buka faa tjupa. Nöo hën a taa: “Söö. Un boo tan luku ee Elia o ko puu ën a di lakpa pau tuu.”

³⁷ Ma nöo hën Masa Jesosi bai wan pasi möön a wan taanga töngö te a kaba, nöo hën böö fëen koti awaa. A dëdë pii.

³⁸⁻³⁹ Nöo di oposii, di hedima u dee sodati, a sai leti taanputaanpu a Masa Jesosi fesi naandë. Nöo di a jei fa a bai, a si di fasi fa a dëdë naandë, nöo hën a taa: “Aai, di sëmbë i si de kii aki, Mii u Gadu wë a bi dë tuu e.”

Di juu dë, nöo de bi abi wan gaan degi gaan koosu a di Wosu u Masa Gadu a Jelusalen naandë ta tapa di kamian u di wosu ka di Kaba Hei Begima ku Gadu ta miti wan pasi a wan jaa, fu sëmbë an sa go nëen dendu. Nöo fa Masa Jesosi böö koti dë, hën wantewante di gaan degi koosu dë tënë a tu pisi kumutu a liba ala zalalaa te kisi goon, disa di kamian hoo. Sö wan gaan soni pasa a di ten naandë.

⁴⁰ Nöo wanlö mujëe bi dë taanputaanpu te a longi ala ta luku fa Masa Jesosi ta dëdë. Wan u dee mujëe de kai Salome, wan da Malia, di u di köndë de kai Magidala, ku wan oto Malia, di mama di bi pali Josëfu ku di piki baa fëen de kai Jakobosi.

⁴¹ De dii mujëe aki sö bi ta waka a Masa Jesosi baka a di pisiwata de kai Galilea ta sölugu ën a sömëni fasi. Nöo wanlö oto mujëe bi ko ku de tu, fa de bi ko a Jelusalen naandë, nöo sö de tuu bi sai naandë ta luku dee soni de ta pasa.

Aki ta lei fa de bei Masa Jesosi.

Mat. 27:57-61; Luk. 23:50-56; Joh. 19:38-42

⁴² Nöö fa dee soni ta pasa aki, nöö saba ta kisi kaa. Biga fa i si sonu o go dë, nöö saba kai a goon, nöö de an o sa du soni möön. Nöö dee Dju sëmbë ta seeka gaanfa da di lö saba dë, fu di a ta kai a di ten u di Pasika.

⁴³ Nöö di juu dë wan womi de kai Josëfu u di köndë de kai Alimatea bi dë a Jelusalen naandë. Di womi aki, a dë wan u dee möön hebi kuutuma u dee Dju sëmbë. Nöö a dë wan sëmbë ta dini Masa Gaangadu seei, biga a dë ta luku di ten di di Njunjun Tii fëën o ko a goonliba. Sö wan sëmbë di Josëfu aki bi dë. Wë nöö di a si taa Masa Jesosi dëdë, di saba ta ko saaa sö seei, hën mbei a tei hati waka langalanga go a Gaama Pilati. Nöö hën a hakisi ën taa, gaantangi be a dëën di dëdë sinkii u Masa Jesosi faa tja go bei.

⁴⁴ Wë nöö fa Josëfu hakisi di soni dë, nöö a foondo di gaama möönsö, biga an kë piki taa Masa Jesosi dëdë sö hesi. Nöö hën a kai di oposii hakisi ën ee a dëdë kaa, nöö hën di oposii piki ën taa aai, a dëdë tuu.

⁴⁵ Nöö di Gaama jei sö, hën a da Josëfu pasi faa musu go tei di dëdë sinkii fëën tja go bei.

⁴⁶ Nöö hën Josëfu kumutu dë, hën a go bai wan pei finu weti wojo koosu. Nöö hën de go puu di dëdë sinkii u Masa Jesosi a di lakpa pau, hën de lolu ën te de kaba ku di weti koosu. Nöö hën de tjëën go buta a wan sitonu baaku dendu di de bi diki seeka u bei sëmbë. Biga a di fasi dë dee Dju bi ta bei dëdë. Nöö di de du sö te de kaba, hën de lola wan gaan gindi sitonu tapa di baaku buka buuu.

⁴⁷ Nöö di juu naandë, de tu Malia dee u bi taki dë, de dë leti naandë ta luku ka de buta di sinkii u Masa Jesosi.

Nöö da sö wanlö gaan soni pasa a di daka naandë.

16

Aki wanlö mujëë ko jei taa

Masa Jesosi weki baka.

Mat. 28:1-8; Luk. 24:1-12; Joh. 20:1-10

¹ Nöö hën de njan di saba daka te de kaba, nöö hën Malia u Magidala, ku Salome, ku di oto Malia, di mama u Jakobosi, nöö hën de go bai pepei sumëë suti soni u de musu go sakwi a di dëdë sinkii u Masa Jesosi kumafa di guwenti u dee Dju sëmbë dë.

² Nöö hën di dobooko fëën, a di fosu daka u di wiki dë, nöö hën dee mujëë tei pasi ta waka nango a di geebi. Di ten naandë, sonu bi ta ko kaa.

³ Nöö fa de ta waka nango, nöö de ta hakisi deseei taa: “Mujëë, fa woo go aki, nöö ambë seei woo feni heepi u lola di gaan gindi sitonu puu a di baaku buka, fuu sa go nëën dendu?”

⁴ Nöö hën de naki tee de ko zuntu ku di geebi. Hën de ko si taa di gaan sitonu di bi dë a di baaku buka, a dë te a wan së ala. Di baaku fika hoo.

⁵ Hën de denda go a di baaku. Nöö hën de si wan basia u Masa Gaangadu köndë leti naandë kuma wan njönku kijoo sö, a dë sindosindo a letimaun së a di baaku dendu. Fa a sai dë, a dë bisibisi ku wan langa djakiti zëëë sö, wetiweti faan. Nöö dee mujëë panta seei.

⁶ Nöö hën di basia fan ku de, a taa: “Wan panta sö e, dee mujëë. Na Jesosi u Nazalëti un ta suku ö, di sëmbë di de bi peka a di lakpa pau kii? Wë an dë aki möön e. A weki baka a dëdë. Un luku ka de bi bei ën aki. Un si taa a dë aki möön nö?”

⁷ Hën a taki da de taa: “Un toona go, nöö un go piki dee bakama fëën te dou ku Petuisi tu e, taa a o go a Galilea. Nöö ala unu ku ën o miti kumafa a bi taki da unu. Sö fuun taki da de.”

⁸ Nöo di dee mujëe jei a taki sö, nöo a toobi de. De fëëe seei. Nöo hën de kumutu a di baaku dendu ko a döo, hën de kule vililili go. De panta tee de an konda da na wan sëmbë andi de bi si dë.

Aki sëmëni sëmbë si taa

Masa Jesosi weki baka.

Mat. 28:9-10, 16-20; Luk. 24:13-53; Joh. 20:11-23; Tjab. 1:6-11

[⁹ Wë nöo fa Masa Jesosi bi weki baka a dëdë dë a di fuuku mamate u di fosu daka u di wiki, nöo Malia u Magidala hën bi da di fosu sëmbë di si ën ku wojo taa a weki baka tuu. Di mujëe dë, a fesi a bi dë ku sëbën gadu nëen hedi, nöo hën Masa Jesosi bi jaka de puu.

¹⁰ Nöo hën fa di mujëe si ën naandë, nöo hën a kule go wante a dee bakama u Masa Jesosi ka de bi go ta kusumi ta këë. Nöo hën a go konda da de taa sö a si Masa Jesosi gbolo, a weki baka a dëdë.

¹¹ Ma fa dee bakama jei taa Masa Jesosi dë ku libi dë, Malia seei si ën, ma töku de an biibi.

¹² Nöo hën a baka u di dë, hën Masa Jesosi tjëen seei go lei tu oto sëmbë möön. Dee sëmbë aki bi kumutu a Jelusalen ganda ta waka nango, nöo hën Masa Jesosi ko a de ko ta fan ku de kuma wan hii oto sëmbë. „Ma nöo te u kaba fëën nöo hën de ko si taa hën di dë tuu, a weki baka a dëdë.”

¹³ Nöo hën de toona go a Jelusalen wante go konda da dee bakama taa sö Masa Jesosi weki baka a dëdë tuutuu, de bi si ën. Ma tökusee dee bakama an kë piki.

¹⁴ Nöo baka u di dë, hën dee ëlufu bakama bi dë a tafa ta njan a wan kamian. Te u de kë mëni, hën Masa Jesosi dou a de dendu naandë kaa. Nöo hën a gandji da de fu di de an bi ta biibi. A bai de fu di de bi abi taangajesi sö te de an kë piki dee sëmbë dee bi konda di soni da de taa sö a weki baka a dëdë.

¹⁵ Nöo hën a fan ku de taa: “Söö. Wë nöo awaa un musu paaja go a hii köndë u goonliba e, go konda di Bunu Buka u mi da hii sëmbë.

¹⁶ Nöo di sëmbë di o biibi tei dopu, nöo hën Gadu o da libi u teego. Ma nöo di sëmbë di an biibi möönsö, nöo hën o kisi sitaafu a Gadu fu teego.”

¹⁷ Nöo hën a taki da de möön taa: “Dee soni aki sö o ta pasa a dee sëmbë dendu dee o biibi mi tuutuu. De o kisi kaakiti a Gadu u de ta du pepei foondo wooko. Biga de o ta jaka dee gadu ta kisi sëmbë a hedi. De o ta fan a wanlö oto töngö di de an bi sabi wan daka.

¹⁸ Ee de panjan hogi sindeki ku maun, ma soni an o du de. Ee de bebe taku soni seei, ma an o du de hogi. De o buta maun a dee sikima hedi begi da de, nöo de o ko bëtë. Hii dee soni aki sö o ta pasa a dee biibima dendu u lei taa di wöutu de ta konda dë, a Gadu a kumutu tuu.”

¹⁹ Nöo sö Masa Jesosi fan ku dee bakama fëën te a kaba. Nöo di a manda de sö kaa, nöo hën Gadu hopo ën tja go a liba, hën a go sindo a di letisë maun u Gadu.

Nöo hën dee bakama waka go a hii köndë go konda di Buka.

²⁰ Nöo Masa heepi de seei, a da de maun a di wooko. Biga de du sëmëni foondofoondo wooko u lei taa di buka de ta konda naandë, a Gadu a kumutu tuutuu.

Da sö.]

Dee woto u Masa Jesosi dee Lukasi sikifi

Wan wöutu a fesi.

Wë dee sëmbë, wan womi de kai Lukasi hën mbei di pampia aki e. A bi dë data, nöö hën a ko dë wan mati u di tjabukama u Masa Jesosi de kai Paulosu. A ta waka ta lontu ku ën ta paaja di Buka u Gadu.

Nöö Lukasi mbei di pampia aki manda da wan mati fëen de ta kai Teofilusi, be a sabi soni u Masa Jesosi. Ma hii fa a mbei ën apaiti da Teofilusi seei, ma a mbei ën a wan fasi fu hii sëmbë musu sa fusutëen. Dee Isaëli sëmbë ku dee sëmbë dee an dë u Isaëli, ku dee biibima u Masa Jesosi ku dee sëmbë dee an dë biibima, de tuu sa lesi ën fusutan. Biga sëmëni sëmbë bi jei di Buka kaa ma de an bi jei ën ku telu, nöö hën a kë fu de jei ën finifini be de sabi seti fëen te go dou a kaba fëen.

Nöö hën da di pampia aki.

Aki Lukasi seti di fan fëen.

¹ Wë, mi mati Teofilusi, mi, Lukasi, manda gaan odi da i. Nöö mi kë taki da i kumafa soni bi pasa ku Masa Jesosi. Ma nöö fa mi o taki aki, na mi da fosu sëmbë di mbei ën buta a pampia e. Biga sëmëni sëmbë bi sikifi soni fëen kaa.

²⁻³ Nöö dee bakama u Masa Jesosi ku sëmëni oto sëmbë bi si dee soni aki ku deseeri wojo kumutu a seti fëen te kaba fëen, nöö de fika ta konda da sëmbë kumafa a bi pasa. Nöö leti fa de ta kondëen dë, nöö sô nöö dee sëmbë ta sikifi ën buta a pampia. Nöö misei jei ën finifini tu, biga mi nango ta hakisi sëmbë, de ta kondëen da mi. Nöö di mi jei ën sô, nöö mi si taa a bunu fu mi mbei di pampia aki manda da i

⁴ fii seei musu jei ën finifini tu taa na lëgëdë. Dee soni de bi lei i dë, de tuu dë tuutuu soni.

Aki di oto u Johanismi

di Dopuma seti.

⁵ Wë a di juu ten di di sëmbë de kai Helodi bi dë kônu u Judea Köndë, nöö hën wan begima bi dë de kai Sakaliasi. A bi dë a wan feleniki u dee begima de kai Abia. Nöö hën mujëe de ta kai Elizabëti, nöö hënseei dë famii u dee Begima tu.

⁶ Nöö de tu sëmbë dë tuu bi ta libi kumafa Masa Gaangadu kë. De ta hoi dee wëti fëen te na wan sëmbë bi feni föutu a de.

⁷ Ma wan soni nöö bi makei de, hën da de an bi abi miii, biga Elizabëti an bi pai wan daka, nöö de tu sëmbë tuu ko gaan sëmbë kaa.

⁸ Nöö hën de dë te wan daka, nöö hën Sakaliasi ku dee oto begima musu go du di wooko u de a di Gaan Wosu u Masa Gaangadu „a Jelusalen naandë.”

⁹ Nöö hën de dë a di wooko te wan pisi, nöö hën de tuwë lötu kumafa di guwenti u de bi dë, fu de luku ee ambë o go tjuma sumëe suti soni da Masa Gadu nëen Wosu dendu dë. Nöö hën de tuwë tefa de kaba, nöö hën di lötu kai a Sakaliasi. Nöö hën de mandëen go.

¹⁰ Nöö di a go a di wosu faa go tjuma di soni, nöö hii dee oto sëmbë tuu dë taanputaanpu a dööbuka ta begi Masa Gadu.

¹¹ Nöö hën Sakaliasi dë a di Wosu dendu te wan pisi, hën wan basia u Gadu ko nëen ko taanpu a letimaun së u di tafa ka de ta tjuma di sumëe suti soni.

¹² Nöö di Sakaliasi si ën, nöö hën hati fëen latja. A panta tee na sipootu.

13 Hën di basia taki dëen taa: “Na fëëe e, Sakaliasi. Masa Gaangadu jei dee begi fii, nöö di mujëe fii, Elizabëti, o pai wan womi mii. Nöö i musu kai ën Johanisi.

14 Nöö te i pai di mii, nöö joo abi gaan piizii ku ën. Söseei hii sëmbë o wai ku di mii.

15 Nöö fa joo pai ën dë, nöö a o dë wan hei sëmbë a Masa Gadu wojo. Hiniwan taanga diingi di sa döongö sëmbë nöö an musu bebëen. Nöö sensi nëen mama bëe dendu seei di Akaa u Masa Gadu o dë ku ën, nöö di mii o ta dë nëen leiki.

16 Nöö a o mbei sëmëni sëmbë u Isaëli Köndë aki bia de libi toona ko a Masa Gaangadu, di Gadu u de.

17 “Nöö di mii di woon pai dë o dë wan sëmbë kuma di fesiten tjabukama de kai Elia. Biga kumafa di kaakiti u Masa Gadu bi dë a Elia liba, nöö só a o dë a di mii liba tu. Nöö leti kumafa Elia bi dë a di Akaa u Masa Gadu leiki, nöö söseei di mii o dë tu. Nöö a o waka a Masa fesi faa seeka hii soni dëen. A o ta bia sëmbë hati, tata ku mii o ko ta libi bunu ku deseei. A o mbei dee sëmbë dee an bi ta piki Gadu buka musu bia ko abi bunu fusutan, kuma dee sëmbë dee ta libi bunu a Masa Gadu wojo. Leti kumafa mi taki aki, nöö só a o seeka sëmbë hati da Masa.”

18 Nöö hën Sakaliasi hakisi di basia taa: “Wë fa un taki dë, wë nöö un maaka un o da mi fu mi sa sabi taa a sa dë sö tuu? Biga mi ko gaandi kaa, nöö di mujëe u mi seei ko gaandi tu.”

19 Nöö hën di basia piki ën taa: “Mi da Gabiëli, di basia u Masa Gadu di ta dë hiniwanten leti nëen bandja. Hën wë manda mi ko a i fu mi tja di bunu buka aki ko da i.

20 Ma nöö fu di ja kë biibi, nöö di maaka mi o da i hën da buka fii o tapa. Ja o fan möön u te di mujëe dë ku bëe te a pai bifö joo fan möön. Biga dee soni mi taki da i aki, te di daka dou nöö de tuu o pasa sö tuu.”

21 Nöö di juu dë, dee hia sëmbë bi dë a dööbuka ta luku Sakaliasi. Hën de tuu foombo. De taa: “Wë unfa a tan longi a di Wosu dendu sö?”

22 Te wan pisi, hën Sakaliasi kumutu ko a döö. Nöö buka fëen tapa, an sa fan ku dee sëmbë möön. Nöö de ko si wante taa wan soni a si a di Wosu dendu, biga a ta biinga u kondëen da de ku maun.

23 Nöö hën Sakaliasi ta wooko a di Wosu u Masa Gadu tefa juu fëen kisi faa go a wosu, nöö hën a go.

24 Nöö an longi möön seei, hën di mujëe fëen, Elizabëti, tei bëe. Nöö hën a tjubi feifi liba longi a wosu dendu.

25 Hën a da Gadu tangi seei taa: “Masa Gadu, gaan tangi fii. I du mi wan gaan bunu fu di i mëmbë mi ku i bunuhati. Biga awaa ufö i puu sen a mi wojo a hii sëmbë fesi.”

Aki Masa Gadu manda Gabiëli go a Malia.

26 Nöö baka u di dë, hën Elizabëti dë ku di bëe tee a a' sikisi liba, nöö hën Masa Gadu toona manda di basia dë seei go a wan wëndjë mujëe mii de ta kai Malia. A ta libi a di pisiwata de kai Galilea a di köndë de ta kai Nazalëti.

27 Nöö di mujëe aki an sabi womi wan daka, ma wan womi de kai Josëfu bi pidi ën ta küja. Ma an bi tei ën eti. Nöö Josëfu bi dë wan sëmbë u di lö u di fesiten kënu de kai Dafiti.

28 Wë nöö fa di basia go dou a Malia naandë, nöö hën a dëen odi taa: “Tia, odi oo. I a' bunuhedi möön hii mujëe e. Biga Masa Gaangadu dë ku i. A o naki i kölöku möön hii mujëe u goonliba.”

29 Wë di Malia jei di odi hën a panta teee, biga a toobi ën. Hën a hakisi ën seei taa: “Wë un sooti odi disis? Andi a kë taki?”

30 Hën di basia taki dëen taa: “Malia, na fëëe e! Masa Gadu seei tei i apaiti kaa faa lei i di bunuhedi fasi fëën.

31 Biga joo dë ku bëe, nöö joo pai wan womi mii. Nöö i musu kai ën Jesosi.

32 Nöö di mii di joo pai dë, a o hebi möön hii sëmbë. Biga di në fëën o dë ‘di Mii u di möön hei Gadu a liba.’ Nöö Masa Gadu o butëën ko kõnu nëen gaan avo Dafiti kamian,

33 nöö a o dë kõnu u dee bakamii fuunu gaan avo Jakopu u nöömō. Taki fëën an o kaba möönsō a mundu.”

34 Hën Malia hakisi di basia taa: “Unfa mi sa du dë ku bëe? Biga ma sabi womi wan daka.”

35 Hën di basia piki ën taa: “Di Akaa u Masa Gadu hën o ko a i e, nöö di taanga u Gadu hën o du di soni naandë. Nöö hën mbei di mii di joo pai, de o kai ën Gaangadu Mii. A o dë wan apaiti sëmbë u Masa Gadu limbolimbo.

36 “Nöö haika e, i sisa Elizabëti dë ku gaan bëe a di gaandigaandi ten fëën aki. Fa u dë aki, a dë ku bëe sikisi liba longi kaa. Di wan seei mujëe di hii sëmbë bi sabi taa an sa pai mii, hën wë ko dë ku bëe e.

37 Biga na wan soni dë a goonliba aki di Masa Gaangadu an sa du.”

38 Hën Malia piki ën taa: “Wë mi dë a mi Masa maun dendu. Be a pasa ku mi kumafa i taki dë.” Hën di de fan sō te de kaba, hën di basia go fëën.

Aki Malia go a Elizabëti.

39 Nöö a baka u di di basia fan ku Malia sō kaa, nöö an longi möön seei, nöö hën Malia hopo tei pasi. Hën a waka hesihesi go tee a wan kõndë u di pisiwata de kai Judea a dee kuun mindi.

40 Hën di a go dou, hën a denda go a Sakaliasi wosu, hën a da Elizabëti odi.

41 Nöö hën di Elizabëti jei di odi u Malia, hën di mii dë nëen bëe dendu dë buli seei.

Nöö hën di Akaa u Masa Gadu ko a Elizabëti liba

42 hën a bai taa: “Kee, mujëe, i a’ bunuhedi möön hii mujëe. Gadu dë ku i. Sösei di mii di dë a i bëe dendu dë tu, Masa Gadu a’ gaan piizii ku ën.

43 Unfa mi du ufō mi a’ bunuhedi sō tee di mama u mi Masa seei ko haika mi?

44 Wë biga di mi jei di odi fii, nöö di mii dë a mi bëe dendu aki wai te a buli.

45 “Wë nöö fa i si i piki Gadu buka dë, mujëe, nöö joo si bunu fëën e. Biga dee soni a taki da i dë, nöö de tuu o pasa sō tuu.”

46 Nöö hën Malia seei bia gafa Gadu tu. A taa:

“Mi gafa Masa tee dou ku mi akaa tuu.

47 Mi ta wai seei a mi hati ku di Gadu u mi.

Hën da mi Heepima.

48 Biga a bi luku mi möfina sëmbë te a buta mi ko hei sëmbë a goonliba.

Nöö di hei a hei mi aki, mi abi ën fu teego.

Hii sëmbë u goonliba o ta kai mi në

taa sō Masa bi dë ku mi.

49 Wë biga di Sëmbë di abi kaakiti a hii mundu liba

nöö hën wë du mi di gaan bunu aki.

Di Sëmbë di abi limbo hati möön hii sëmbë a goonliba

nöö hën du mi ën.

50 An ta wei möönsō

fu du dee sëmbë dee ta lesipeki ën gaan bunu.

A ta heepi dee lö sëmbë dë nöömō fu teego.

Biga a a' tjalihati u libisëmbë.

⁵¹ Nöö a taanga, a a' makiti u du soni.

Biga a jaka dee gaanfasi sëmbë ku dee bigimëmbë wan paaja.

⁵² Dee gaan kõnu u goonliba
a ta hai puu a de kõnu bangi.

Ma dee sakafasi sëmbë
a ta hopo fu de musu ko dë hei sëmbë.

⁵³ A ta paati dee gudu fëën da dee pena sëmbë,
dee ta kë Masa Gadu.

Ma dee guduma dee aan fanöudu fëën,
a ta mbei de go ku sösö maun.

⁵⁴⁻⁵⁵ A ta a' tjalihati nöömö
ta heepi dee sëmbë fëën u Isaëli,
leti kumafa a bi paamusi u tata Abahamu ku dee bakamii fëën.

Fa a bi fan dë,
nöö an fëëkëtë möönsö.

A heepi u tuu.

Nöö a o ta heepi u nöömö.”

Sö Malia fan te a kaba gafa Gadu.

⁵⁶ Nöö hën a fika ku Elizabëti naandë te a abi dii liba, nöö hën a toona go
fëën nëën köndë.

Aki de pai Johanisi di Dopuma.

⁵⁷ Nöö hën de dë te di ten u Elizabëti dou faa pai, nöö hën a pai wan womi
mii.

⁵⁸ Nöö di dee famii fëën ku dee sëmbë a di pisiwata dë jei taa sö Gadu du ën
sö wan gaan bunu, nöö hën de tuu wai ku ën seei.

⁵⁹ Hën de dë tefa di mii abi aiti daka, hën de ko u ko koti di mii buta di maaka
faa dë taa sëmbë u Gadu disi, kumafa di guwenti u dee Dju sëmbë bi dë. Nöö
de bi kë tei ën tata në ta kai di mii Sakaliasi.

⁶⁰ Ma hën mama taa: “Nönö, u musu kai ën Johanisi.”

⁶¹ Hën de piki ën taa: “Wë nönö mujëë, biga na wan sëmbë dë a di famii
fuunu de ta kai Johanisi.”

⁶² Hën de go fan ku ën tata ku maun hakisi ën ee un në a kë fu de musu kai
di mii.

⁶³ Nöö hën a mbei de dëen wan piki böutu sö, nöö hën a sikifi nëen taa di në
u di mii da Johanisi.

Hën de taa: “Hmmm, di soni aki, a foombo.”

⁶⁴ Nöö a di juu dë seei, Sakaliasi buka jabi, tóngö fëën lusu, hën a seti u fan
baka. Nöö di a si sö, hën a gafa Gadu seei.

⁶⁵ Nöö hii dee sëmbë u di pisiwata naandë foombo te na soni. Nöö hën di
woto dë ko paaja a hii Judea a dee kuun mindi naandë.

⁶⁶ Nöö di hii sëmbë jei fa di soni pasa naandë, nöö hën de ta pakisei a de hati
taa: “Wë unfa seei di mii naandë o dë?” Biga de si taa Masa Gadu dë ku ën.

Aki Sakaliasi ta gafa Gadu.

⁶⁷ Nöö hën di Akaa u Masa Gadu ko a Sakaliasi di tata u di mii liba, nöö hën
a konda wan buka u Masa Gadu taa:

⁶⁸⁻⁶⁹ Gaantangi u Masa Gadu,

di Gadu fuu dee Isaëli sëmbë aki,
fu di a ko puu u dee sëmbë fëën a sitaafu.

Biga [fa i si di wëndjë mujëë mii o pai di mii dë,

nöö Gadu o da u wan taanga Heepima
a di lö fu di futuboi fëen de kai Dafiti.

⁷⁰ A o da u ën leti kumafa a bi mbei dee fesiten tjabukama fëen bi paamusi
dee gaan sëmbë fuu gaanduwe kaa

⁷¹ taa hën sa ko puu u a dee felantima fuu basu.

Nöö dee sëmbë dee an lobi u, nöö de an o feni u ta sitaafu möön.

⁷²⁻⁷⁵ Biga Gadu taa a o ta a' tjalihati da dee gaan sëmbë fuu
faa ta heepi de.

Nöö a ta mëni di buka di a bi mbei ku de nöömö.

Biga a bi mbei wan buka ku u tata Abahamu

te a djula dëen taa a o puu u dee bakamii fëen a dee felantima fuu basu
fuu musu sa dini ën ta libi gbelingbelin kumafa a kë
söndö fëë fu tee u dëdë.

⁷⁶ Wë nöö, di mii u mi aki sö,

de sa kai i' Tjabukama u di möön hei Gadu a u liba.

Biga joo waka a Masa fesi go fan ku lanti

be de seeka hatiböö u de dëen.

⁷⁷ Joo taki da de taa

de musu bia de libi be Masa Gadu heepi de,
be an hoi di hogilibi u de a bëë möön.

⁷⁸⁻⁷⁹ Biga Masa Gadu a' tjalihati u libisëmbë.

An kë u de ta dë a dungudungu da dëdë ta sitaafu.

Hën mbei a tuwë di limbo fëen ko a goonliba

kuma te sonu ta booko ta ko,

fu de sa kumutu a dungu ko ta libi fiifi a di limbo u Gadu.

Sö Sakaliasi fan te a kaba.

⁸⁰ Nöö hën di mii sai dë ta göö ta ko. Nöö fusutan fëen ta göö tu biga di Akaa
u Gadu ta heepi ën.

Nöö hën a sai dë teefa a ko bigi tjika, hën a kumutu go ta libi a sabana dendu
hën wanwan, teefa a dou di juu faa konda di Buka u Gadu da dee Isaëli sëmbë.

2

Aki Lukasi ta konda soni

u di pai u Masa Jesosi.

Mat. 1:18-25

¹ Wë nöö a di ten dë, di Gaan Könu u dee Loomë sëmbë de kai Këisë Aukesi
bi ta tii, nöö hën a manda wan buka go a hii köndë ka a abi taki taa hii sëmbë
musu go sikifi de në buta a lanti buku. Biga de ta konda sëmbë.

² Di konda aki, hën bi dë di fosu toon de o konda sëmbë. Nöö di juu dë, di
gaama de kai Sileni bi dë gaama fu Silia Köndë.

³ Nöö hën hiniwan sëmbë nango a di kamian ka de bi pai hën avo fu de
musu tei hën në sikifi a lanti buku.

⁴⁻⁵ Nöö söseei Josëfu fu di köndë de kai Nazalëti a di pisiwata fu Galilea dë
hopo tu, hën ku ën kiija mujëë Malia di bi dë ku di bëë. Hën de go tee a di
köndë de kai Betelehem a di pisiwata u Judea ala. Biga hën da di köndë fu dee
gaan lö fu di fesiten könu de kai Dafiti, nöö Josëfu bi dë bakamii u Dafiti. Nöö
hën de go fu de sikifi de në.

⁶ Wë nöö di de dou a Betelehem naandë, nöö ten u Malia kisi faa pai.

⁷ Nöö hën a pai wan womi mii. Hën da fosu mii fëen. Hën a dimboli ën a
koosu, hën a kandi ën buta a wan këdë dendu ka sëmbë ta buta ahun da dee

mbeti ta njan. Biga a mbeti wosu de bi buta de fu de duumi, fu di kamian an bi dë a di lantiwosu möön.

Aki dee basia u Gadu ko konda

da dee sikafuma taa sö de

pai Masa Jesosi.

⁸Wë nöö sëmbë u di pisiwata naandë ta kiija di mbeti de ta kai sikafu. Nöö a di ndeti di de pai di mii dë seei, nöö wanlö womi bi dë a sabana ta luku sikafu fu soni an musu du de.

⁹Hën de dë te wan pisi, nöö te u de kë mëni hën wan basia u Masa Gadu Köndë bazia ko a de a di ndeti dë. Nöö hën kamian ko limbo gbegedee kuma didia, biga a Masa Gadu seei di limbo kumutu. Nöö fa di soni pasa dë, nöö dee womi ta luku sikafu dë tuu panta seei. De ko fëëë tee kuma de sa dëdë.

¹⁰Ma di basia taki da de taa, “Nönö dee womi, wan fëëë sö e. Biga fa mi ko aki, nöö mi tja wan gaan bunu buka, piizii wan seei, ko da unu. Nöö di piizii an o dë fu wan kodo sëmbë, ma a o dë u hii sëmbë u goonliba.

¹¹Biga mi ko taki da unu taa tide de pai di Heepima fuunu da unu awaa, di i si un bi ta jei soni fëën nöömö taa a o ko a goonliba. Hën de ta kai di Keesitu, di Paamusi Könu. Hën da di Masa fuunu. Nöö tide de pai ën a di köndë u Könu Dafiti de ta kai Betelehem.

¹²“Wë nöö mi o lei unu wan maaka e. Te un go nöö woon si wan mii dimboldimboli a koosu pisi. De kandi ën buta a wan këdë dendu ka de ta da mbeti soni u njan. Nöö te un si sö, nöö hën di mii di dë e.”

¹³Nöö hën wantewante dë, nöö hën wanlö oto basia u Gadu köndë ko gidjii ko mökisi ku di bi sai dë. Hën de ta gafa Gadu tee a bigi taa:

¹⁴“Masa Gadu, u ku hii dee sëmbë fii Köndë ala tuu ta bai i në.

U ta gafa i o,

biga gaan fii ko a goonliba

da dee sëmbë Gadu ta wai ku de.”

Sö de ta bai ta taki.

¹⁵Nöö di de konda di soni te de kaba, hën de toona go u de a Masa Gadu Köndë ka de bi kumutu.

Nöö di dee basia go, hën dee sëmbë fan ku deseeri taa: “Wë womi, di buka Masa Gadu manda ko da u aki, nöö un boo go a Betelehem go luku di soni.”

¹⁶Nöö de seeka hesihesi, hën de hopo go a Betelehem. Nöö hën de go si Malia ku Josëfu ku di mii tuu. Di mii dë kandikandi a wan këdë de ta da mbeti njanjan dendu.

¹⁷Nöö di de si ën sö kaa, hën de go konda di woto u di mii da hii sëmbë leti kumafa di basia bi taki ën da de.

¹⁸Nöö hii dee sëmbë dee jei di soni u di mii, nöö de tuu ko foondo te na soni, fu di buka dee sikafuma ko taki da de naandë.

¹⁹Nöö hën Malia tei dee soni a bi jei u di mii ku dee soni dee bi pasa tuu hoi nëën hati ta pakisei de nöömö.

²⁰Noö hën dee sikafuma bia toona go a di sabana baka. Nöö de ta gafa Masa Gaangadu ta bai ën në ta wai fu hii dee soni dee de bi jei ku dee de bi si ku de wojo. Biga de bi dë leti kumafa di basia bi taki da de.

²¹Nöö hën de dë tee di mii abi aiti daka hën de koti ën buta di maaka kumafa di wëti u Masa Gadu bi dë. Hën de dëën në. De kai ën Jesosi leti kumafa di basia u Masa Gadu bi kai ën kaa bifö hën mama bi tei bëë fëën.

Aki de tja di mii go

a di wosu u Gadu.

22-24 Nöo hën Malia ku Josëfu sai dë te di juu dou fu Malia musu seeka puu di pai sundju. Nöo hën a tei tu piki pomba faa tja go tjuma da Masa Gaangadu a di Gaan Wosu fëen, kumafa Gadu bi da Mosesi di wëti. Nöo hën de hopo, hën de tei di mii, hën de tjëen go a Jelusalen go butëen a wan apaiti fasi da Gadu kumafa di wëti taki u wan fosupai womi mii, ufö Malia tjuma dee pomba puu di pai sundju awaa.

25 Nöo di juu dë, wan womi bi ta dë a Jelusalen de ta kai Simion. A bi dë wan gaan bumbuu sëmbë ta libi kumafa Gadu kë ta hoi dee wëti fëen. Fa a sai dë a ta luku Masa Gadu nöömö faa musu puu dee Isaëli sëmbë fëen a dee sitaafu u de, be de feni böö. Nöo di Akaa u Gadu dë ku di womi aki ta tjëen nëen leiki.

26 Nöo di Akaa bi taki dëen kaa taa an o dëdë ufö a si di sëmbë de kai di Keesitu, di Paamusi Könu di Masa Gadu taa a o manda ko da de u heepi de.

27 Nöo di juu di de ta tja di Mii ko, hën di Akaa manda Simion faa go a di Wosu u Masa Gadu dendu. Hën fa a go dou dë, hën a si di mama ku di tata ta tja di mii ko, fu de seekëen kumafa di wëti u Masa Gadu taki.

28 Hën di a si de, hën a tei di mii puu a de maun. Hën a gafa Gadu, taa:

29-30 “Ke, Masa, awaa mi sa dëdë waiwai.

Mi hati ko kötö.

Biga mi seei wojo si di Heepima

kumafa i bi paamusi mi.

31-32 I mandëen ko da u dee Isaëli sëmbë faa heepi u ku hii dee oto sëmbë u goonliba tuu. A o puu u a di së u dungu buta ko a di së u limbo, nöo a o lei u di bunu pasi fuu waka.

Nöo fëen hedi sëmbë o bai u Isaëli sëmbë në taa: ‘Di mii u Isaëli Köndë hën heepi hii sëmbë u goonliba.’ ”

Sö Simion fan te a kaba.

33 Nöo fa a fan dë, nöo a toobi Josëfu ku di mama u di mii. A foombo de seei.

34-35 Hën Simion begi Gadu da de te a kaba. Hën a taki da Malia, di mama u di mii, taa: “Di mii i si aki sö, a o mbei sëmëni u dee Isaëli sëmbë aki booko saka e. Nöo söseei a o mbei sëmëni u de ko hei tu. Nöo a o puu sëmëni sëmbë gogo a döö, be de si dee pakisei u libisëmbë dee dë a de hati awaa. Biga a ko a u kuma wan maaka di Gadu da u. Di soni de an si wan daka, hën de o ta si nëen. Di soni de an bi jei wan daka, hën de o ta jei nëen. Fëen mbei na hii sëmbë o lobi ën. De o ta kosi ën. Nöo söseei tu, wan daka ta ko, nöo di soni di o pasa ku di mii aki o hogi da i kuma de suti i ku ufangi a i hati. Sö a o hogi da i tjika.”

36-37 Nöo di juu dë, wan m’ma bi sai naandë tu di Masa Gadu ta fan nëen liba. Hën de ta kai Hana. Wan tata de kai Fanuëli hën pai ën nöo gaan lö fëen dë Asë. Nöo a bi dë wan gaandi mujëe kaa. Fa a sai dë, a bi libi sëbën jaa ku di fosu manu fëen di a bi tei nëen njönku ten, nöo hën di womi dëdë. Nöo hën a dë a ganda te a dou aititeni-ku-fö jaa söndö manu. Nöo a ta dë a di Wosu u Masa Gadu nöömö, an ta kumutu dë möönsö. A sai dë ta begi Gadu ta hopo ën në ndeti ku didia te so juu an ta njan seei.

38 Nöo a di juu Simion ta fan dë, hën di mujëe aki seei ko dou tu, hën di a si di mii nöo hën a da Gadu tangi. Nöo hën a sai dë ta konda soni u di mii da hii dee sëmbë u Jelusalen dee bi ta mëni Masa Gadu faa manda di Heepima ko u ko puu de a sitaafu.

³⁹ Nöo hën Malia ku Josëfu seeka hii soni kumafa di wëti u Masa Gadu taki te de kaba, nöo hën de toona go u de a de köndë, a Nazalëti a di pisiwata u Galilea.

⁴⁰ Nöo hën di mii sai dë ta göö ta ko. A dë seei gaagaa. Möönmöön a ta a' fusutan u dee soni u Masa Gadu ku libisëmbë tuu. Nöo Masa Gadu seei ta dë ku ën tu ta tjëen a bunu liba.

Aki Jesosi bi fika a di

Gaan Wosu u Gadu dendu.

⁴¹ Wë nöo dee gaan sëmbë fëen bi guwenti fu go a Jelusalen hiniwan jaa u de go njan di gaan piizii de ta kai Pasika.

⁴² Nöo hën di Jesosi abi tuwalufu jaa, nöo hën de ku ën go a Jelusalen a di piizii.

⁴³ Nöo di dee piizii daka pasa kaa, nöo hën de toona nango a wosu baka. Ma nöo di juu dë Jesosi bi fika a Jelusalen, ma dee sëmbë fëen an bi sabi taa sö a fika ala.

⁴⁴ Biga de bi ninga taa sonte a waka ku dee oto sëmbë u de dee bi go a di piizii. Fëen hedi de waka wan hii daka te ndeti bifö de ko mëni u de suku ën. Hën de suku ën a dee famii u de ku dee mati u de dendu tefa de wei.

⁴⁵ Hën di de an si di mii, nöo hën de toona go a Jelusalen baka go suku ën.

⁴⁶ Nöo a di u dii daka dendu u di de ta suku ën ufö de go si ën a di Wosu u Masa Gadu dendu sindosindo a dee mësitë mindi. A ta haika fa de ta lei sëmbë soni u Masa Gadu, nöo a ta hakisi de soni tu, de ta konda dëen.

⁴⁷ Nöo hii dee sëmbë dee ta jei di fan u di mii, nöo a ta foondo de te na soni. Biga de an sabi unfa a waka a abi sö wan bumbuu fusutan te a ta piki dee sëmbë dee ta fan ku ën dë kuma na piki mii a dë.

⁴⁸ Nöo söseei di soni toobi Josëfu ku Malia tu tee de foondo.

Nöo di de go si di mii, nöo hën hën mama hakisi ën taa: "Ma di mii aki o, andi mbei i du sö ku u? Tide mbei dii daka di mi ku i tata ta booko hedi ta suku i."

⁴⁹ Hën a toona hakisi de taa: "Wë andi mbei un ta suku mi sö? Wan sabi taa mi dë aki a mi Tata wosu nö?"

⁵⁰ Ma fa di mii fan dë, hën tata ku hën mama an bi saandi a kë taki da de. De an fusutëen seei.

⁵¹ Nöo hën de tei ën nöo hën de toona go u de a Nazalëti baka. Nöo hën Jesosi toona sakëen seei a dee gaan sëmbë fëen basu. Ma hën mama tei hii dee soni u di mii buta nëen hati dendu ta pakisei nöömö.

⁵² Nöo hën di mii sai dë ta göö ta ko. Nöo möönmöön a ta a' fusutan u soni, nöo Masa Gadu ku libisëmbë tuu lobi ën.

3

Aki Lukasi ta konda dee soni

u Johanisi.

Mat. 3:1-12; Maik. 1:1-8; Joh. 1:19-28

¹ Wë nöo a di teni-a-feifi jaa u di tii u di Gaan Könu de kai Këisë Tibelia, nëen Johanisi seti di wooko fëen. Nöo a di ten dë sëmëni tiima bi dë a di Gaan Könu dë basu. Biga Gaama Pontuisi Pilati bi ta tii di köndë de kai Judea. Könu Helodi bi ta tii di köndë de kai Galilea. Nöo di baaa fëen de kai Filipi bi ta tii de tu köndë de kai Idumea ku Takonitisi. Nöo Gaama Lisamiasi bi ta tii di köndë de kai Abilene.

² Nöo a di ten dë, Ananiasi ku Kajafasi bi dë dee Kaba Hei Begima u dee Dju sëmbë.

Nöö hën Masa Gadu kai di mii u Sakaliasi de kai Johanisi ka a dë a sabana dendu ala.

³Nöö hën a hopo ta waka ta lontu a hii dee köndë a di pisiwata u di lio de kai Joodan, ta konda da sëmbë taa de musu bia de libi ko dopu, be Masa Gadu an hoi dee hogilibi u de a bëë möön.

⁴Nöö fa a ta du dë, a kai ku di soni di fesiten tjabukama u Gadu de kai Jesaja bi sikifi a di Buku u Gadu taa: Wan sëmbë ta bai a di sabana taa: “Un mbei di pasi da Masa ooo, be a ko dë tololoo.

⁵Hii dee hei liba ku dee kuun, te dou ku dee sakasaka kamian tuu musu ko dë palalaa.

Nöö dee bendibendi u di pasi musu ko dë tololoo. Söseei dee baaku dee dë a di pasi, de musu tapa de tuu ko buta palalaa.

⁶Nöö te a dë sö kaa, nöö hii sëmbë o si di heepi di Masa Gaangadu abi awaa.”

⁷Nöö fa Johanisi ta bai dë, nöö wanlö gaan hia sëmbë ta ko nëen faa dopu de.

Hën a taki da de taa: “Unu takuhatima kuma sindeki, un ko tei dopu nö? Ambë taki da unu taa un sa kumutu a di hatiboonu u Gadu, söndö un bia unu libi?”

⁸Un musu libi bunu e, be hii sëmbë si taa libi fuunu tooka. Wan musu sai dë ta taki taa fu di di gaan avo fuunu de kai Abahamu ku Masa Gadu bi dë gaan mati, nöö Gadu an o sitaafu unu e! Nönö, wan mëni sö. Biga ee Gadu kë, a sa mbei dee sitonu aki bia ko böngö u Abahamu, a unu kamian.

⁹Biga luku, de seti koti dee pau lutu kaa. Nöö ee wan pau sai dë an ta pai bumbuu njanjan, nöö de o faa ën puu koti tuwë a faja tjuma kaba a söso.” Sö Johanisi ta bai.

¹⁰Nöö hën de hakisi ën taa: “Wë nöö andi u musu du möön?”

¹¹Hën a piki de taa: “Ee wan sëmbë i abi tu hëmpi, nöö i musu tei wan nöö i da di sëmbë di na abi. Söseei ee wan sëmbë i abi njanjan, nöö i musu da di sëmbë di na abi.”

¹²Nöö a baka fëen, nöö hën dee pii-lanti-mönima ko nëen tu faa musu dopu de. Hën de hakisi ën taa: “Mësitë o, andi u musu du möön?”

¹³Nöö hën a taki da de taa: “Un haika e. Te un ta pii möni, nöö wan musu hakisi möön hia möön leki fa lanti buta.”

¹⁴Nöö hën dee sodati ko nëen tu, hën de hakisi ën taa: “Wë andi uu musu du?”

Nöö hën a taki da de taa: “Wan musu suku toobi ku sëmbë ta musu de ta tei möni a de e. Söseei wan musu mindi soni da sëmbë tu fii tja de go a kuutu fu möni hedi. Ma un musu dë tifi hedi ku di möni un ta kisi a lanti.”

¹⁵Nöö fa dee sëmbë ta jei di fan u Johanisi dë, hën de pakisei taa: “Wë ambë da di sëmbë naandë, maingë? A sa kë di Keesitu, di Paamusi Könu di Masa Gadu bi taa a o manda ko da u a goonliba aki nö?” Biga de bi kë fu di Paamusi Könu musu ko.

¹⁶Fëen hedi Johanisi piki de taa: “Nönö, dee sëmbë, nëen disi e. Ma hebi kuma ën. Ma di Sëmbë dë hën ta ko nöömö. Fa mi dë aki, ma hei tjika u mi lusu di susu fëen puu nëen futu seei. Biga mii ko u mi dopu sëmbë ku wata nöö, ma nöö te hën a ko nöö a o dopu unu ku di Akaa u Masa Gadu, ku faja. Biga di Akaa o limbo unu hati puu dee hogilibi dee bi dë a unu, kuma te faja ta tjuma goon puu dee soni fika di goon doti.”

17 Nöo fa di Sëmbë o ko dë, nöo a dë kabakaba këëë faa seeka di njanjan fëen. Dee bumbuu njanjan a o tei tjubi a gaan suwa, ma dee poipoi wan a o tuwë a di faja di an sa tapa a mundu möönsö, be de tjuma kaba a sösö.”

18 Nöo sö Johanisi ta wasiköi dee sëmbë nöömö ta konda di Bunu Buka u Masa Gadu da de.

19 Ma Johanisi bi gandji da Könu Helodi tu fu di di könu bi tei hënseei baaa mujëë, ufö a du sômëni oto hogi tu.

20 Nöo hën di Könu hopo hën a go du wan möön gaan hogi eti. A kisi Johanisi söötö a dunguwosu.

Di pisi aki ta konda fa Masa Jesosi ko dopu.

Mat. 3:13-17; Maik. 1:9-11

21 Ma bifö de söötö Johanisi a dunguwosu, nöo sômëni hia sëmbë bi ta ko nëen faa dopu de. Nöo Masa Jesosi seei bi kisi dopu nëen tu. Nöo fa a bi dë a di dopu, nöo a ta begi. Tee wan pisi, hën di mundu jabi waaa sö nëen liba.

22 Hën di Akaa u Masa Gadu saka ko kuma wan pomba ko tan nëen liba, nöo hën wan tóngö piki a liba ala taa: “I da mi lobi Womi Mii. Libi fii ta kai ku mi te.” Sö wan soni pasa a di dopu u Jesosi e.

Aki Lukasi kai dee gaan lö

u Josëfu da u.

Mat. 1:1-17

23 Nöo Jesosi bi abi diiteni jaa di a seti lei sëmbë. Nöo hiniwanten de bi ta luku ën kuma wan mii u Josëfu.

Nöo Josëfu, hën da di mii u Eli.

24 Nöo Eli, hën da di mii u Mataati.

Nöo Mataati, hën da di mii u Leifi.

Nöo Leifi, hën da di mii u Mëtji.

Nöo Mëtji, hën da di mii u Janai.

Nöo Janai, hën da di mii u Josëfu.

25 Nöo Josëfu, hën da di mii u Matatiasi.

Nöo Matatiasi, hën da di mii u Amosi.

Nöo Amosi hën da di mii u Naum.

Nöo Naum, hën da di mii u Esili.

Nöo Esili, hën da di mii u Nagai.

26 Nöo Nagai, hën da di mii u Maati.

Nöo Maati, hën da di mii u Matatiasi.

Nöo Matatiasi, hën da di mii u Semei.

Nöo Semei, hën da di mii u Joseki.

Nöo Joseki, hën da di mii u Joda.

27 Nöo Joda, hën da di mii u Joanan.

Nöo Joanan, hën da di mii u Lesa.

Nöo Lesa, hën da di mii u Zebabeli.

Nöo Zebabeli, hën da di mii u Seatiëli.

Nöo Seatiëli, hën da di mii u Neli.

28 Nöo Neli, hën da di mii u Mëtji.

Nöo Mëtji, hën da di mii u Adi.

Nöo Adi, hën da di mii u Kosan.

Nöo Kosan, hën da di mii u Elimadon.

Nöo Elimadon, hën da di mii u Eli.

29 Nöo Eli, hën da di mii u Josua.

Nöo Josua, hën da di mii u Eleise.

Nöo Eleise, hën da di mii u Jolim.

Nöö Jolim, hën da di mii u Mataati.

Nöö Mataati, hën da di mii u Leifi.

³⁰ Nöö Leifi, hën da di mii u Simion.

Nöö Simion, hën da di mii u Juda.

Nöö Juda, hën da di mii u Josëfu.

Nöö Josëfu, hën da di mii u Jonam.

Nöö Jonam, hën da di mii u Eliakim.

³¹ Nöö Eliakim, hën da di mii u Mëlia.

Nöö Mëlia, hën da di mii u Mëna.

Nöö Mëna, hën da di mii u Mataata.

Nöö Mataata, hën da di mii u Naatan.

Nöö Naatan hën da di mii u Dafiti.

³² Nöö Dafiti, hën da di mii u Isai.

Nöö Isai, hën da di mii u Obëti.

Nöö Obëti, hën da di mii u Boasi.

Nöö Boasi, hën da di mii u Salima.

Nöö Salima, hën da di mii u Nakison.

³³ Nöö Nakison, hën da di mii u Aminada.

Nöö Aminada, hën da di mii u Adimin.

Nöö Adimin, hën da di mii u Alini.

Nöö Alini, hën da di mii u Esilon.

Nöö Esilon, hën da di mii u Pëlëzi.

Nöö Pëlëzi, hën da di mii u Juda.

³⁴ Nöö Juda, hën da di mii u Jakopu.

Nöö Jakopu, hën da di mii u Isaki.

Nöö Isaki, hën da di mii u Abahamu.

Nöö Abahamu, hën da di mii u Teela.

Nöö Teela, hën da di mii u Naako.

³⁵ Nöö Naako, hën da di mii u Seluku.

Nöö Seluku, hën da di mii u Leu.

Nöö Leu, hën da di mii u Pëlëki.

Nöö Pëlëki, hën da di mii u Ebeli.

Nöö Ebeli, hën da di mii u Sela.

³⁶ Nöö Sela, hën da di mii u Kainan.

Nöö Kainan, hën da di mii u Apakasa.

Nöö Apakasa, hën da di mii u Semi.

Nöö Semi, hën da di mii u Noa.

Nöö Noa, hën da di mii u Lamëki.

³⁷ Nöö Lamëki, hën da di mii u Metusela.

Nöö Metusela, hën da di mii u Enöku.

Nöö Enöku, hën da di mii u Jeleti.

Nöö Jeleti, hën da di mii u Mahalali.

Nöö Mahalali, hën da di mii u Kainan.

³⁸ Nöö Kainan, hën da di mii u Enösi.

Nöö Enösi, hën da di mii u Seti.

Nöö Seti, hën da di mii u Adam.

Nöö Adam, hën da di mii u Masa Gadu.

„Dati wan taki Masa Gadu seepi bi mbei ën ku ën seei maun.”

4

Di pisi aki ta lei u kumafa di didibi pooba Masa Jesosi.

Mat. 4:1-11; Maik. 1:12-13

¹ Nöö di Masa Jesosi kumutu a Joodan Lio ka Johanisi bi dopu ën dë, nöö di Akaa u Masa Gadu bi dë nëen liba, hën a tei ën tja go a sabana dendu.

² Nöo ala di didibi go poobëen luku ee a o piki ën buka a soni. Hën Masa Jesosi tan föteni daka ku föteni ndeti a di sabana dë söndö njan, nöo hën hangi ko kisi ën.

³ Nöo hën di didibi taki dëen taa: “Luku, di i dë di Mii u Gadu kaa, nöo i fan ku di sitonu aki be a bia ko bëëë da i, fii feni soni u njan.”

⁴ Ma Masa Jesosi piki ën taa: “Nönö e. Biga di Buku u Gadu taa: ‘Na njanjan wanwan ta hoi sëmbë a libi.’ ”

⁵⁻⁷ Nöo hën di didibi tjëen go a wan hei kamian, hën a lei ën kôlô sô hii dee köndë tuu fu goonliba aki. Hën a taki dëen taa: “Luku, hii dee soni aki tuu dë u mi. Gadu da mi de, nöo ee mi kë da sëmbë, nöo mi sa da. Nöo de tuu mi sa da i ku di kaakiti u de ku hii dee gudu u de tuu, be i dë takima u de ta njan di bunu ku di waiti u de. Ma i musu tjökô kini a goon a mi fesi begi mi ufô.”

⁸ Hën Masa Jesosi piki ën taa: “Nönö e, biga a dë a Masa Gadu Buku taa: ‘Masa Gadu wanwan tö i musu ta begi. Hën wanwan nöo i musu ta dini, biga hën nöo da i Masa.’ ”

⁹ Nöo a baka u di dë, hën di didibi tjëen go a Jelusalen, tee a di Gaan Wosu u Masa Gadu liba a di tölu hedi ala. Hën a taki dëen taa: “Di i dë di Mii u Gadu, nöo hiti i seei puu aki tuwë go a goon, nöo soni an o du i.

¹⁰ Biga a dë a Gadu Buku taa: ‘Masa Gadu o manda dee basia fëen ko heepi i fu soni an musu du i.

¹¹ De o tja i a maun fu ja musu naki futu a sitonu.’ ”

¹² Hën Masa Jesosi toona piki ën taa: “Ma a dë a di Buku tu taa: ‘Ja musu pooba Masa Gadu e, biga hën da i Gadu.’ ”

¹³ Nöo sô di didibi pooba Masa Jesosi a hii soni te a wei, an sa wini ën möönsô. Nöo a baka fëen hën a disëen dë, hën a go fëen ufô.

Aki Masa Jesosi seti wooko a

di pisiwata u Galilea.

Mat. 4:12-17, 13:53-58; Maik. 1:14-15, 6:1-6

¹⁴ Nöo a baka fëen, hën Masa Jesosi toona ko a di pisiwata u Galilea. Nöo di kaakiti u di Akaa u Gadu bi dë ku ën te në fëen bai a hii di kamian.

¹⁵ Nöo a nango ta lei de di oto u Masa Gadu a dee keikiwosu u de, nöo hii sëmbë ta gafëen taa a sabi soni.

¹⁶ Nöo hën a sai dë te wan pisi hën a toona ko a Nazalëti ka de bi kiijëen. Nöo hën a dë tefa saba daka dou, hën a go a di keikiwosu kumafa a bi guwenti. Hën a hopo taanpu faa lesi Gadu Wöutu da de.

¹⁷ Hën wan u dee tiima u di keiki tei di pampia di di fesiten tjabukama u Masa Gadu de kai Jesaaja bi sikifi, hën a tëndëen dëen. Hën a jabi ën te a dou a wan kamian ka a de sikifikifi taa:

¹⁸⁻¹⁹ Di Akaa u Masa Gadu dë a mi liba.

Masa Gadu tei mi fu mi konda di Bunu Buka fëen da dee pootima ku dee möfina sëmbë.

A tei mi u mi konda da dee sëmbë dee dë taitai,
taa mi sa puu de a di fuka de sai dë fu de ko feni böö.

A tei mi u mi konda da dee bookowojoma
taa dee wojo u de sa ko bunu fu de ko si soni baka.

A tei mi u mi konda da dee sëmbë dee ta dë a sitaafu ta kaba a sôsô
taa de sa kumutu a di sitaafu dë basu.

A tei mi u mi konda da hii sëmbë tuu
taa di juu dou awaa fu Masa Gadu limbo fesi da libisëmbë.

²⁰ Nöo di Masa Jesosi kaba u lesi di pampia hën a tapëen, hën a toona tëndëen da di tiima baka. Nöo hën a go bazia sindo. Nöo hii dee sëmbë dë a di keikiwosu tuu ko ta luku ën diin.

²¹ Nöo hën a taki da de taa: “Wë di pisi u di Buku di i si u lesi aki, nöo di Sëmbë di Gadu taa a o manda ko dë nöo hën wë disi e.”

²² Nöo di a fan sò te a kaba nöo di fan fëen suti da dee sëmbë tee a foombo de. Ma tökuseei de an gafëen kaba. Biga so u de toona kosi ën taa: “Wë ambë da di sëmbë di ta fan di fan naandë? Na di mii u Josëfu nö?”

²³ Nöo hën Masa Jesosi piki de taa: “Aai, a bunu. Un sa koti wödu da mi kumafa un kë e. Un sa taki da mi taa: ‘Data o, heepi i seei. Biga un bi jei dee soni i bi ta du a Kapenaumi, nöo di i ko a i seei köndë aki nöo be i heepi dee sëmbë fii tu, boo si.’

²⁴ “Ma un haika e, mi o taki wan soni da unu. Wan tjabukama u Gadu an ta a’ në nëen seei köndë e.

²⁵ Biga luku di tjabukama de kai Elia. Di ten a bi dë, nöo sò de an bi tei ën u soni tu. A bi tapa di tjuba hii dii jaa ku sikisi liba longi nëen köndë Isaëli aki. Tjuba seei an bi kai möönsò, nöo hën wan gaan hangi ko. Nöo Isaëli köndë bi abi sòmëni mujëe di manu u de bi dëdë disa de.

²⁶ Ma tökuseei fu di dee sëmbë fëen seei köndë an bi biibi ën tjika, hën mbei Gadu puu ën manda go tee a wan oto köndë de kai Salepita te a di pisiwata u Sidon Köndë ala go ta heepi wan oto köndë mujëe di hën manu bi dëdë disa.

²⁷ “Nöo söseei a di tjabukama de ta kai Elisa ten, Isaëli köndë aki bi abi hia sikitjinama, ma Elisa an bi kula na wan kodo u de fu di de an biibi ën tjika. Ma wan oto sëmbë de kai Naaman kumutu te a wan oto köndë de kai Silia nöo hën a feni kula.”

Nöo sò Masa Jesosi fan ku dee sëmbë te a kaba.

²⁸ Nöo dee sëmbë dee bi dë a di keikiwosu dendu, di de ko jei fa Masa Jesosi fan, nöo hën hati u de ko boonu tee na sipootu. Biga de sabi taa de a ta taki.

²⁹ Hën de hopo vu hën de kisi ën hai tja go a döo. Hën de tjëen go a di kuun buka fu de tuusi ën tuwë go a goon. Biga di köndë bi dë a wan kuun liba.

³⁰ Ma te u de kë si, hën a pasa a de mindi dë go fëen.

Aki Masa Jesosi jaka wan gadu puu a wan sëmbë liba.

Maik. 1:21-28

³¹ A baka u di dë, nöo hën Masa Jesosi toona go a Kapenaumi, a di pisiwata u Galilea dë seei. Nöo hën a dë tefa di saba dou, hën a go a keiki go ta lei sëmbë.

³² Nöo fa a ta lei de dë, nöo a foombo de seei. Biga te a ta fan, i ta si taa hën abi di taki.

³³ Nöo fa de dë a keiki naandë nöo wan oto sëmbë bi ko dë tu. A bi dë ku wan gadu nëen hedi. Nöo di a si Masa Jesosi, hën a bai kai olo taa:

³⁴ “Disa u ooo, disa u, Jesosi u Nazalëti. Andi tja i ko aki? I ko fii ko kii u wante nö? Mi sabi i. Ju da di Sëmbë u Masa Gadu seei apaiti.”

³⁵ Ma hën Masa Jesosi gandji dëen taa: “Kabuka dë! Andi joo feni taki? Kumutu a di sëmbë dë liba e!” Nöo hën di gadu hiti di sëmbë tuwë a goon a dee oto sëmbë fesi dë, ma an du ën soni. Nöo hën a kumutu disëen go.

³⁶ Hën dee sëmbë tuu ko fëëe teee de taki ku deseei taa: “Maingë, andi u ta si aki! Dee soni a ta lei dë, andi seei da de? Biga ku di makiti ku di taanga fëen a puu di gadu a di sëmbë liba. Fa a fan dë, wante di soni disa di sëmbë.”

³⁷ Nöo hën oto fëen paaja a hii di köndë naandë.

Aki Masa Jesosi kula di mai u Simon ku wanlö oto sëmbë möön.

Mat. 8:14-17; Maik. 1:29-39

³⁸ Nöö hën Masa Jesosi kumutu a keiki, hën a go a di wosu u di womi de kai Simon. Hën a go si Simon mai sikisiki naandë. Wan taanga fëbë kisi ën. Nöö hën de begi Masa Jesosi faa kulëen da de.

³⁹ Nöö hën a bendi go a di mujëe liba hën a gandji da di fëbë. Nöö hën wantewante dë, hën di fëbë pasa di mujëe, hën a hopo go seeka soni da de de njan.

⁴⁰ Hën de sai dë tefa sapate buka, sonu nango. Nöö hën dee sëmbë u di köndë naandë tja wanlô hia sikima peipei wan ko a Masa Jesosi, nöö hën a buta maun a de kula de tuu ko bunu.

⁴¹ Nöö söseei a puu hia soni a sëmbë liba tu, dee ta kisi sëmbë a hedi. De ta bai taa: “Ju da di Womi Mii u Masa Gadu,” nöö a ta gandji da de taa: “Un kabuka dë! Wan fan dë möön e.” Biga de tuu bi sabi ën tuutuu taa hën da di Keesitu, di Paamusi Könu.

⁴² Hën di dobooko fëen, mamate biten, hën Masa Jesosi hopo go a döo, hën a go dë a wan kamian hën wanwan. Nöö hën dee hia sëmbë go ta suku ën teefa de go si ën naandë. Hën de begi ën taa gaantangi, be a tan ku de naandë. An musu go disa de.

⁴³ Ma Masa Jesosi taki da de taa: “Wë ma mi musu fu go a dee oto köndë tu u mi konda di Bunu Buka u Masa Gadu da de, be de jei kumafa a ta hopo di Njunjun Tii fëen fa u dë aki. Biga fu di soni dë hedi mbei a manda mi ko a goonliba aki.”

⁴⁴ Nöö hën a ta waka a hii dee köndëköndë u dee Dju tuu ta konda di Bunu Buka u Gadu da de a dee keiki u de.

5

Aki dee fosu bakama ko ta waka a Masa Jesosi baka.

Mat. 4:18-22; Maik. 1:16-20

¹ Wan daka hën Masa Jesosi bi dë a di ze de ta kai Genesalëti bandja, nöö hën sëmëni sëmbë ta ko nëen fu de jei Masa Gadu oto. De ko hila tee kamian an dë faa taanpu möön.

² Nöö hën a si tu boto a lampeesi dë. Wanlô sëmbë bi kumutu a hëndi ko ta wasi dee nëti u de.

³ Nöö hën a go subi a di boto u di womi de ta kai Simon. [Hën seei da Petuisi.] Hën a taa be a tuusi di boto go a wata abiti sô. Nöö hën a sindo a di boto ta lei dee sëmbë dee dë a tela liba ala.

⁴ Nöö di a kaba u lei de, nöö hën a taki da Simon taa: “Womi, tuusi di boto go a mindiwata, nöö un tuwë dee nëti fuunu be un kisi fisi.”

⁵ Nöö hën Simon piki taa: “Wë Mësitë o, hii di ndeti u ta dëdë ta tuwë nëti te u wei, wa kisi na wan wojo soni. Ma tôku di i taki sô, nöö u sa tuwë luku.”

⁶ Nöö hën de tuwë dee nëti a wata, hën de kisi fisi teee a fika piki sô nëti u de bi tënë.

⁷ Nöö hën de bai kai dee oto sëmbë a di oto boto ala, dee ku de ta wooko makandi, u de ko heepi de hai dee fisi. Nöö hën de ko a de, hën de ta kisi dee hia fisi ta buta a de tu boto teee a fika piki sô möön nöö de tu boto tuu bi singi.

⁸ Nöö di Simon Petuisi si sô, hën a tuwëen seei a goon a Masa Jesosi fesi. Hën a taa: “Masa, kumutu a mi aki e! Biga mi dë wan hogilibi sëmbë. [Ma bambuu tjika fii ko a mi bandja.]”

⁹ Di soni mbei a taki sô. Fa de kisi dee hia fisi di wan pasi dë, nöö a foombo ën te a ko fëeë, hën ku dee oto sëmbë dee ku ën sai naandë.

¹⁰ Nöö Johanisi ku Jakobosi, de da dee sëmbë dee ta wooko ku Simon makandi. De dë mii u wan tata de ta kai Zebedeosi. Nöö di soni foondo de tu.

Hën Masa Jesosi taki da Simon taa: “Na fëëë, womi. I bi ta kisi fisi, ma fa u dë aki mi o mbei i ko ta kisi libisëmbë ta tja ko u de musu sabi mi.”

¹¹ Hën de tja dee boto u de go buta, hën de disa hii soni u de dë, hën de go ta waka a Masa Jesosi baka.

Aki Masa Jesosi kula wan sëmbë di bi siki tjina siki.

Mat. 8:1-4; Maik. 1:40-45

¹² Wë nõo a baka u di dë, nõo hën Masa Jesosi go a wan kõndë. Nõo wan sëmbë bi sai naandë, sinkii fëën lai ku tjinasiki. Nõo di a si Masa Jesosi, hën a kai ku fesi a goon begi ën taa: “Masa, ee i kë nõo i sa kula di tjinasiki u mi da mi.”

¹³ Nõo hën Masa Jesosi tëndë maun nama nëën, hën a taa: “Wë mi kë. Ko bunu e!” Nõo hën wante dë, di sëmbë ko bunu kaa.

¹⁴ Nõo hën Masa Jesosi bai ën taa an musu konda da na wan sëmbë, ma be a go a di begima a Masa Gaangadu Wosu dë, be a si taa a ko bunu. Nõo be a tja paima go da Gadu kumafa di wëti taki. Biga da sò Gadu bi taki da di fesiten hedima u dee Dju de kai Mosesi taa sò sëmbë musu du te de ko bunu u di lõ siki dë, fu hii sëmbë sabi taa i ko bunu tuu.

¹⁵ Ma hii fa a bai ën dë seei, ma tõkusee soni u Masa Jesosi paaja a hii di kamian dë. Nõo hii sëmbë ta ko nëën gidjii u de jei dee soni a ta taki, sòseei faa heepi de a dee siki u de tu.

¹⁶ Ma Masa Jesosi lobi u nango a sabana dendu go begi hën wanwan.

Aki Masa Jesosi kula

wan lan sëmbë.

Mat. 9:1-8; Maik. 2:1-12

¹⁷ Wë nõo wan oto daka mõn hën Masa Jesosi ta lei sëmbë a wan wosu dendu. Nõo wanlõ sëmbë u di keiki paatëi de kai Falisei ku dee Sabima u dee Djuwëti seei dë sindosindo naandë tu. De bi kumutu a hii dee kõndëkõndë u Galilea ku Judea, te dou ku Jusalen. Nõo di juu dë, di kaakiti u Gadu bi dë a Masa Jesosi faa kula dee sikima.

¹⁸ Te wan pisi hën wanlõ womi ko dou ku wan lan sëmbë a wan kama liba ko suku heepi a Masa Jesosi.

¹⁹ Hën di de ko dou a di wosu ka Masa Jesosi dë, nõo sëmbë sai dë tee a hia. De an sa feni kamian seei u de tja di sëmbë go dou a Masa Jesosi. Nõo hën de subi go a di wosu liba, biga dee wosu liba u di kõndë bi dë palalaa sò. Nõo hën de go booko di wosu a liba ala. Nõo hën de saka di womi a di kama go a dee hia sëmbë dendu dë, go buta a Masa Jesosi fesi.

²⁰ Nõo hën di Masa Jesosi si fa dee sëmbë biibi tjika, hën a taki da di sikima taa: “Womi, wë Masa Gadu puu i a bëë e. An ta mëni dee hogi i bi du mõn.”

²¹ Nõo di dee Faliseima ku dee Sabima u Wëti jei fa Masa Jesosi taki, nõo hën de ta kuutu ën a de hati taa: “Huun? Unfa wan libisëmbë sa fan sò? Ambë da di sëmbë naandë di ta hoi Gadu a sipootu sò? Ambë tjika u puu sëmbë a Gadu bëë boiti hënseei nõo?”

²²⁻²³ Wë nõo Masa Jesosi sabi di pakisei de abi, nõo hën a piki de taa: “Dee sëmbë, andi mbei un musu ta pakisei dee soni dë u du? Andi seei mi musu du fuun sabi taa mi abi taki a di goonliba aki? Ee mi taa Gadu puu di sëmbë nëën bëë, ee nasö mi taki dëën taa be a hopo waka go nëën wosu, undi u de mi musu du fuun sabi taa mi abi taki a goonliba?”

²⁴ Ma nõo un luku e, mi o lei unu taa Mi di ko dë Libisëmbë Mii aki, na fan nõo mi sa fan, ma mi abi makiti tuú a goonliba aki fu mi sa puu sëmbë a Gadu bëë.”

Nöö hën a bia fan ku di sikima taa: “Mi taki e, hopo, nöö i tei di kama fii nöö i waka go fii a wosu.”

²⁵ Hën wante dë, hën di sëmbë hopo a hii dee sëmbë tuu fesi. Hën a tei hën kama hën a ta waka ta gafa Masa Gaangadu nango nëen wosu.

²⁶ Nöö hii sëmbë ko foondo. A bigi da de te na soni, hën de taa: “Aai, dee sëmbë, Masa Gaangadu bigi e. A bumbuu. U si foombo soni tide.”

Aki Masa Jesosi kai Leifi faa ko dë bakama fëen.

Mat. 9:9-13; Maik. 2:13-17

²⁷ A baka u di dë, hën Masa Jesosi go si wan sëmbë de kai Leifi sindosindo nëen kantoo ka a ta pii lanti möni, nöö hën a kai ën faa ko dë bakama fëen.

²⁸ Hën di womi hopo disa hii soni fëen dë, hën a waka go a Masa Jesosi baka.

²⁹ Nöö hën de dë te wan daka, nöö hën Leifi mbei wan gaan piizii nëen wosu da Masa Jesosi. Nöö sëmëni u dee sëmbë dee ta pii lanti möni ku sëmëni oto sëmbë bi dë a di piizii ta njan ku de tu.

³⁰ Te wan pisi hën dee Faliseima, ku dee Sabima u Wëti dee ta nama ku dee Faliseima, ko si Masa Jesosi ku dee lö sëmbë dë sindosindo ta njan makandi, hën hati u de boonu. Hën de hakisi dee bakama u Masa Jesosi taa ee faandi mbei de ta njan ta bebe ku dee sëmbë dee ta pii lanti möni dë ku dee oto takulibi sëmbë u di köndë? „Biga bumbuu sëmbë an bi musu ta hulu dee lö sëmbë dë.”

³¹ Hën Masa Jesosi koti wan nongö da de taa: “Ee wan sëmbë ja siki, nöö ja abi data fanöudu.

³² Nöö un haika e. Ma ko aki fu bumbuu sëmbë hedi e, ma u dee takulibi sëmbë hedi, u mi kai de u de bia de libi ko a Masa Gadu.”

Aki Masa Jesosi ta konda soni u

di njunjun lei ku di awoo lei

da de.

Mat. 9:14-17; Maik. 2:18-22

³³ Nöö hën dee Faliseima ku dee Sabima u Wëti toona hakisi ën taa: “Wë Mësitë o, andi mbei dee bakama fii an ta disa u njan fu begi hedi kumafa u ta disa? Biga dee bakama u Johansi di Dopuma ta begi söndö njan hiniwanten, söseei dee bakama fuu ta begi söndö njan tu. Ma dee bakama fii ta njan ta bebe kodo. Unfa a waka?”

³⁴ Nöö hën Masa Jesosi da de wan oto. A taa: “Ee wan sëmbë o tööu, nöö dee mati fëen o ko nëen a di tööu. Nöö fa hën ku de o sai dë, nöö de o ta njan ta piizii makandi.

³⁵ Ma tee di daka dou de puu ën a de mindi ufö de o ta kusumi ta tja hangii awaa.”

³⁶ Nöö hën a toona da de wanlö oto möön, ta lei de kumafa di awoo lei u de ku di njunjun lei fëen an ta kai. A taa: “Dee sëmbë, un haika e. Na wan sëmbë o tei wan njunjun koosu pisi go lapu wan awoo koosu. Wë biga ee a du sö, nöö a o poi di njunjun wan nöö di awoo wan an o kai ku ën tu.

³⁷ “Nöö söseei na wan sëmbë sa buta wan njunjun diingi a wan awoo mbeti kakisa saku. Biga a ko taanga kaa. Nöö te di diingi o soopu, nöö di awoo saku o bai latja. Di diingi o kaba a söso nöö di saku seei o kaba a söso tu.

³⁸ Ma te i buta di diingi a wan njunjun saku, nöö di saku dë diaan eti. Nöö te di diingi soopu, nöö di saku o tëndë, an o bai latja tuwë di diingi. Nöö di njunjun diingi ku di njunjun mbeti kakisa saku tuu o dë bunu.

³⁹ “Ma nöö na wan sëmbë ta bebe awoo diingi nöö i kë bebe njunjun wan möön, biga joo si taa di awoo diingi suti möön di njunjun wan.”

6

*Aki Masa Jesosi lei dee**Faliseima kumafa hën ku**saba daka dë.**Mat. 12:1-8; Maik. 2:23-28*

¹ Wë nöö a wan saba, hën Masa Jesosi ku dee bakama fëen ta waka ta pasa a wan goon dendu. Nöö wan sootu pei soni kuma alisi sô dë a di goon ma de sa njan mëen kuakua, nöö hën dee bakama ta booko ën ta buuka ta njan.

² Nöö hën so u dee Faliseima hakisi de taa: “Faandi mbei un ta booko di soni a di saba daka u du? Nëen da un ta booko di wëti nō?”

³ Nöö hën Masa Jesosi piki de taa: “Ja bi lesi a di Buku u Gadu andi Dafiti bi du nō, di ten hangi bi ta kii hën ku dee oto sëmbë ku ën bi ta waka?”

⁴ De bi ta lontu te de go dou a di wosu u Gadu dendu, hën Dafiti si dee bëë de bi tja go buta da Gadu naandë. An bi dë soni u de musu njan, biga dee begima wanwan tō nöö bi sa njan mën. Ma tókuseei Dafiti njan mën, hën ku dee otowan fëen tuu. „Ma Gadu an bi tei de u hogi fu di fuka u de hedi.”

⁵ “Ma „boiti u di dë,” un musu sabi taa mi di ko dë Libisëmbë Mii aki dë Masa u saba.”

*Aki Masa Jesosi kula wan sëmbë a wan saba daka.**Mat. 12:9-14; Maik. 3:1-6*

⁶ Nöö hën wan oto saba möön, hën Masa Jesosi go lei sëmbë a keiki. Nöö hën wan sëmbë ko naandë di wan së maun fëen doba fika dëedë.

⁷ Nöö wanlō Sabima u Wëti ku dee Faliseima bi sai dë kaa, nöö hën de ta luku ee a o heepi di sëmbë naandë a di saba, u de feni föutu nëen fu de tja go kaagi.

⁸ Ma nöö Masa Jesosi bi sabi kaa andi de ta mēni a de hati, hën a kai di sëmbë taa: “Womi, hopo ko taanpu a u fesi aki.” Nöö hën di sëmbë hopo hën a ko taanpu naandë.

⁹ Hën Masa Jesosi hakisi dee sëmbë sai dë taa: “Andi möön bunu fuu du a saba, hogi naa bunu? Fuu musu puu sëmbë a dëdë maun, naa fuu disëen faa dëdë? Unfa di wëti taki?”

¹⁰ Hën a luku dee sëmbë tuu lontu dou. Nöö hën a taki da di sëmbë taa: “Womi, tëndë di maun fii i si.” Nöö hën di di womi mbei kuma a kē tëndë di maun fëen, nöö hën wante hën a ko bunu djee kumafa a bi dë.

¹¹ Nöö hën dee sëmbë hati ko boonu ku Masa Jesosi tee kuma de sa lau sō, nöö hën de seti kuutu ku deseei ee unfa u de du ku ën.

*Aki Masa Jesosi tei tuwalufu sëmbë ko bakama fëen vō.**Mat. 10:1-4; Maik. 3:13-19*

¹² A di pisiten dë, hën Masa Jesosi go a wan kuun liba go begi Masa Gadu, nöö hën a tan dë begi wan hii ndeti.

¹³ Te di mamate fëen, hën a kai dee sëmbë dee bi ta waka nëen baka u de ko nëen. Nöö hën a tei tuwalufu sëmbë a de mindi, dee o dë apaiti tjabukama fëen de ta kai apōsutu.

¹⁴ Nöö haika dee nē u de. Di fosuwan de kai Simon, hënseei da Petuisi, ku ën baaa Andiasi, ku Jakobosi ku Johanisi ku Filipi ku Batolomisi,

¹⁵ Mateosi ku Tomasi, ku Jakobosi wan mii u Alufasi, ku Simon di bi dë wan sëmbë u di paatēi de kai Zeloti,

¹⁶ ku Judasi wan mii fu Jakobosi, ku Judasi Isikaliotu di sei Masa Jesosi.

Aki wanlö hia sëmbë ko suku heepi a Masa Jesosi.

Mat. 4:23-25

17 Nöo hën Masa Jesosi ku dee tuwalufu bakama dee a bi tei dë ku dee otowan dee fika, hën de saka go a goon a wan palala kamian. Nöo sëmbë u Jelusalen te dou ku dee oto kamian u Judea, ku sëmbë u de tu köndë ta dë a di ze bandja de kai Tilusi ku Sidon tuu sai dë kaa.

18 De ko u jei di lei fëen. So sëmbë ko faa kula de. So sëmbë bi abi soni a de liba ta toobi de, nöo hën de ko a Masa Jesosi faa puu de da de. Nöo hën a puu de tuu.

19 Hii sëmbë bi ta mbei möiti u de nama nëen, biga di kaakiti u Masa Gaangadu ta kumutu nëen ta kula de tuu.

Aki Masa Jesosi ta lei dee

bakama fëen fa u de libi

nöo de dë bunu.

Mat. 5:1-12

20 Nöo hën Masa Jesosi hopo wojo luku dee bakama fëen, nöo hën a taa: “Un dee möfina sëmbë aki, un dë bunu e, biga woon njan di bunu u di Njanjun Tii u Masa Gaangadu.

21 “Nöo un dee sëmbë dee ta hangi fuun ko kumafa Masa Gadu kë, nöo un dë bunu e, biga woon feni ën sö tuu.

“Nöo un dee sëmbë dee ta këe, un dë bunu, biga di këe fuunu o bia ko lafu.

22 “Nöo un dë bunu e, un dee sëmbë oto sëmbë an sa si a wojo fu di un ta biibi a Mi di ko dë Libisëmbë Mii aki hedi. Fa de ta puu unu a de mindi ta kosi un u ta poi unu në a köndëköndë, nöo un dë bunu e.

23 “Nöo un musu piizii, un musu wai seei, biga a Masa Gadu Köndë woon kisi wan gaan paima. Biga söseei dee fesiten sëmbë fuunu bi du ku dee fesiten tjabukama u Masa Gadu.

24 “Ma un dee sëmbë dee taa: ‘U abi gudu, „nöo wa abi Masa Gaangadu fanöudu möön,„ mi bai helu da unu, biga te bakaten te di gudu fuunu kaba, nöo wan o a’ soni möön. Biga un bi njan di bunu fuunu tuu a fesi kaa.

25 “Nöo un dee sëmbë dee ta mbei taa un dë fa un kë, „wan abi Masa Gadu fanöudu möön,„ mi bai helu da unu biga a bakaten wan o dë kumafa un kë möön.

“Nöo un dee sëmbë dee ta wai ta lafu fu di un feni andi un kë, mi bai helu da unu biga a bakaten këe nöo woon ta këe.

26 “Nöo un dee sëmbë ta kisi gafa a köndë „fu di un ta libi kumafa dee sëmbë dee an dë a Masa Gadu së kë,„ mi bai helu da unu. Biga söseei dee fesiten sëmbë dee bi ta ganjan taa de ta tja Gaangadu buka bi kisi gafa tu.”

Aki Masa Jesosi ta lei dee bakama fëen fa u de libi ku dee felantima u de.

Mat. 5:38-48, 7:12a

27 Hën Masa Jesosi toona taki da de taa: “Ma un dee sëmbë dee kë jei mi tuutuu aki, un haika. Mi taki e, un musu lobi dee felantima fuunu, nöo un du bunu da dee sëmbë dee abi hogihati fuunu.

28 Nöo söseei un musu wensi bunu da dee sëmbë dee ta siba unu ta kosi unu. Nöo un musu begi da dee sëmbë dee ta du hogihogi ku unu tu.

29 “Nöo ee wan sëmbë naki i baaimaun a bandjajesi, nöo i bia di oto së dëen be a toona naki e. Nöo ee wan sëmbë tei di liba koosu fii, nöo ja musu tapëen fu an tei di basu koosu fii tu.

30 Nöo söseei ee wan sëmbë hakisi i wan soni, nöo ja musu niingëen. Ee wan sëmbë tei soni fii, nöo ja musu toona tei ën nëen baka.

31 “Nöö leti kumafa i kë fu sëmbë musu libi ku i, nöö sö seei i musu libi ku sëmbë tu.”

32 Hën a taki da de möön taa: “Un haika e, dee sëmbë. Ee i ta lobi dee sëmbë dee ta lobi i nöö, nöö ja o feni gafa naandë e. Biga na wan apaiti soni i ta du dë. Biga dee sëmbë dee an dë ku Masa Gadu a wan së, sö deseeti ta libi tu.

33 “Nöö söseei ee i ta du dee sëmbë bunu dee ta du i bunu wanwan, nöö ja o feni gafa fëen tu. Biga sö nöö dee sëmbë dee an dë ku Masa Gaangadu a wan së ta libi u de kaa.

34 “Nöö ee i juu wan sëmbë soni fu di i sabi taa a o toona da i ën baka, nöö ja du wan apaiti soni fii kisi gafa e. Biga sö nöö dee sëmbë dee an dë ku Masa Gadu a wan së ta du tu. Nöö un musu libi bunu möön de.

35 “Biga un musu lobi dee felantima fuunu. Un musu du de bunu. Ee joo juu sëmbë soni, nöö i musu juu di sëmbë di ja abi pakisei taa joo feni soni nëen baka. Nöö te i du sö, nöö joo kisi wan gaan paima a Gadu e. Nöö a di fasi dë woon djeesi unu Tata Masa Gadu tu, biga sö a ta libi. A abi bunuhati u sëmbë, biga dee sëmbë an ta dëen tangi seei a ta heepi te kisi ku dee hogihati sëmbë tuu.

36 “Nöö un musu ta abi tjalihati u sëmbë e, leti kumafa Masa Gadu abi tjalihati.”

Aki Masa Jesosi ta bai de taa de an musu kuutu de na de.

Mat. 7:1-5

37 Nöö hën Masa Jesosi toona taki da de taa: “Ja musu ta kaagi sëmbë e, dee sëmbë, nöö de an o kaagi i tu. Ja musu kuutu de u de musu kisi sitaafu, nöö Masa Gadu an o kuutu i tu, fii kisi sitaafu. Ja musu ta hoi otowan a bëë nöö Masa Gaangadu an o hoi i a bëë tu.

38 I musu ta da sëmbë soni, nöö i seei o kisi tu. Nöö möön hia seei joo kisi e. Biga Gadu o lai ën a wan gaan manda ta zin ta fugu tee di manda an sa tei möön, nöö a hopo ën da i. Biga ku di wan seepi maaka di i ta maaka da otowan, nöö ku ën seei de o maaka da i tu.”

39 Nöö hën a koti wanlö nongö da de, a taa: “Bookowojoma an sa tja bookowojoma a maun e. Biga de tuu o go kai a ngötö dendu kaba a sösö.

40 Nöö söseei wan siköö mii an o sabi soni kuma di mësitë fëen e, ma te a ta lei te a ko sabi ufö a o ko dë kuma di mësitë.”

41-42 Nöö hën a taa: “Dee sëmbë o, unfä i ta si di piki sundju a di otowan fii wojo fii taki dëen taa: ‘Womi, be mi puu di sundju a i wojo dë da i,’ ma di gaan wan a i seei wojo dë, ja ta si ën? I bödjëema, i musu puu di gaan sundju di dë a i seei wojo te i kaba, nöö i sa si bunu fii puu di u di otowan dëen.”

Aki Masa Jesosi ta lei fa i sa

du sabi ee wan pau bunu.

Mat. 7:16-20, 12:33-35

43 Nöö hën a taa: “Ee wan pau ta pai sösö njanjan, nöö an dë wan bumbuu pau e. Söseei wan pau di ta pai bumbuu njanjan an dë wan sösö pau tu.

44 Biga hiniwan pau i sa sabi ën nëen njanjan. Ja o feni apeesina naa alandja pau, nöö söseei ja o feni mamaun a panpantii.

45 Dati wan taki ee i dë hogihatima, nöö ja o taki bumbuu soni. Nöö ee i dë bumbuu sëmbë, ja o taki hogihatima soni. Ma kumafa di hati fii dë, nöö sö di buka fii o ta fan.”

Aki ta taki u tu sëmbë

dee mbei wosu.

Mat. 7:24-27

⁴⁶ Nöo hën Masa Jesosi toona lei dee sëmbe soni möön. A taa: “Dee sëmbe o, faandi mbei un ta kai mi ‘Masa’ ma wan ta du dee soni dee mi ta taki da unu fuun du?”

⁴⁷⁻⁴⁸ “So sëmbe ta ko a mi ta ko ta jei di lei u mi, nöo te de go nöo de ta du kumafa de jei dë. Nöo sö wan sëmbe, a dë kuma wan sëmbe di o mbei wan wosu fëen, nöo hën a seti ën ku wan goonsei taangataanga gingin kuma sitonu. Hën a mbei di wosu te a kaba. Nöo hën a bakaten, hën wan gaan tjuba kai tee na soni, singi di kamian pii. Ma töku di wosu an booko kai möönsö. A fika taanputaanpu apë fu di de seti ën bunu sö.

⁴⁹ “Ma di sëmbe di ta jei di lei u mi ma an ta du kumafa mi ta lei ën, nöo a dë kuma wan sëmbe di ta mbei wan wosu fëen, nöo hën a seti ën a sandu liba mbei te a kaba. Nöo hën a baka, hën wan gaan wata ko sawa di wosu tja go fiaa. Biga di goonsei an bi dë gingin tjika.”

7

Aki Masa Jesosi kula wan wookoma u wan oposii.

Mat. 8:5-13

¹ A baka u di Masa Jesosi kaba u lei dee sëmbe naandë, nöo hën a toona go a Kapenaumi.

² Nöo wan oposii u dee Loomë Köndë sodati bi dë a di köndë dë. Nöo a abi wan futuboi fëen di a lobi gaanfa, ma nöo hën di futuboi siki tee a dë a maunmaun.

³ Nöo hën di di oposii jei u Masa Jesosi, nöo hën a go a wanlö Gaan Womi u dee Dju sëmbe go hakisi de ee de sa go a Masa Jesosi go begi ën faa ko kula di futuboi fëen dëen.

⁴⁻⁵ Nöo hën dee sëmbe hopo go a Masa Jesosi, hën de begi ën seei taa be a ko heepi di womi da de, mbei di futuboi fëen ko bunu. De taa: “Di womi aki, a dë wan sëmbe di lobi u Dju sëmbe e. Biga di keiki fuu seei a heepi u mbei fiaa. Wë nöo hën u si taa a fiti fii sa du ën di bunu aki da u.”

⁶ Nöo hën Masa Jesosi hopo wante faa go ka di oposii ta libi. Nöo hën de ta waka nango. Ma nöo di de ko zuntu, hën di oposii manda sëmbe u de taki dëen taa: “Ma bumbuu tjika fii musu ko a mi wosu e.

⁷ Hën mbei miseei an ko a i tu. Ma be i taki wan wöutu nöo, nöo di sëmbe u mi o ko bunu kaa.

⁸ “Wë biga miseei, fa mi dë aki nöo mi dë a sëmbe basu, nöo mi abi sodati a mi basu tu. Nöo ee mi taki da wan u de taa be a go ala, nöo a o hopo go. Ee mi taki da wan otowan taa be a ko aki, nöo wante a dou kaa. Ee mi taki da di futuboi u mi taa be a du di dë, nöo wantewante a ta du ën. Nöo söseei mi sabi taa ee i, Masa Jesosi, taki ee wan wöutu seei, nöo a o pasa sö kaa.”

⁹ Nöo hën dee sëmbe go, hën de da Masa Jesosi di buka te de kaba.

Nöo di a jei fa di oposii taki, nöo a bigi dëen tee na sondi. Hën a bia luku hii dee sëmbe dee bi ta waka ku ën naandë. Hën a taa: “Dee sëmbe, a bigi da mi e. Biga di wakama dë ko ta biibi mi möön leki un dee Isaëli sëmbe u di köndë aki seei.”

¹⁰ Nöo hën dee sëmbe dee bi tja di buka ko dë toona go. Nöo di de go dou a wosu, hën de si taa di futuboi u di oposii ko bunu kaa.

Aki Masa Jesosi weki wan

kijoo mii a dëdë.

¹¹ Nöo baka u di dë, hën Masa Jesosi go a wan köndë de kai Nain, hën ku dee bakama fëen ku wanlö hia oto sëmbe.

12 Nöo di de go dou a di döobuka u di peni di lontu di köndë, nöo hën de si wanlô sêmbë kumutu ta waka ta ko ku wan dëdë de ta tja go bei. Di sêmbë naandë bi dë di wan kodo womi mii tö fëën mama, nöo di mama manu bi dëdë disëen kaa. Nöo di mama ku sômëni sêmbë ta waka ta ko.

13 Nöo di Masa Jesosi si di mama u di mii, nöo tjali fëën kisi ën. Hën a fan ku di ën taa: “Mujëë o, kabuka.”

14 Nöo hën a waka go panjan di daagi, nöo hën dee sêmbë ta tja di dëdë taanpu pii. Nöo hën a taa: “Womi, hopo.”

15 Nöo hën wantewante dë, hën di dëdë sêmbë weki. Hën a hopo sindo, hën a seti fan. Nöo hën Masa Jesosi taki da di mama taa: “Luku di mii fii aki. Ko tei i soni.”

16 Wë nöo di soni di pasa dë, a bigi da dee sêmbë tee na soni. De taa: “Masa Gadu bigi e, dee sêmbë. A ko heepi u dee sêmbë fëën te a manda wan gaan tjabukama fëën ko da u.”

17 Nöo hën di oto dë paaja a hii Judea te dou ku dee oto köndë tuu dee dë zuntu dë.

Aki Johanisi di Dopuma manda wan buka go da Masa Jesosi.

Mat. 11:2-19

18 Wë nöo di dee bakama u Johanisi di Dopuma jei hii dee oto u Masa Jesosi dë, hën de go konda de da Johanisi ka a dë a dunguwosu dë.

Nöo hën Johanisi kai tu u dee bakama fëën ko nëen

19 faa manda de go a Masa Jesosi. A taki da de taa: “Wë un sabi taa Masa Gadu bi paamusi taa a bi o manda wan sêmbë ko da u faa puu u a dee fuka fuu. Nöo un go a Jesosi e, go hakisi ën ee hën da di sêmbë dë, naa a dë a baka ta ko eti.” Sö Johanisi manda di buka.

20 Nöo hën dee bakama u Johanisi nango tefa de go dou a Masa Jesosi. Nöo hën de taki dëen taa: “Wë Johanisi di Dopuma manda u fuu musu ko hakisi i ee i da di sêmbë di Masa Gadu bi paamusi taa a bi o manda ko da u, naa a dë a baka ta ko eti?”

21 Nöo a di ten dë seei, Masa Jesosi bi dë ta kula wanlô hia sêmbë. De bi ko nëen ku pepei siki, ku gadu a hedi, so u de dë bookowojo sêmbë, nöo de ko faa heepi de. Hën a ta kula de te a kaba.

22 Hën a fan ku dee bakama u Johanisi taa: “Wë un toona go, nöo un konda dee soni dee un si aki dëen e, ku dee soni dee un jei aki. Un taki dëen taa bookowojo sêmbë ko ta si soni, lan sêmbë ko ta waka, tjinama ta ko bunu, bookojesima ko ta jei soni, dëdë sêmbë ta weki baka a dëdë, dee möfina sêmbë ta jei di buka u Masa Gadu leti kumafa di tjabukama bi taa sö a o dë te di Paamusi Könu ko.”

23 “Nöo i taki da Johanisi tu taa di sêmbë di ta futoou mi te an ta mati fu di ma ta du kumafa a bi mëni, nöo sö wan sêmbë dë bunu e. Sö fuun taki dëen.”

Aki Masa Jesosi taki soni u Johanisi di Dopuma.

24 Hën di dee bakama u Johanisi go kaa, nöo hën Masa Jesosi bia ko ta hakisi dee sêmbë dee sai dë taa: “Dee sêmbë aki, fa un bi go a Johanisi a di sabana ala, un sooti sêmbë un go si ala? Un si wan sôsö sêmbë di na a pakisei fëën seei nö, kuma wan kambaluwa di di ventu ta tja nango ta ko?”

25 Andi un bi si? Un si wan sêmbë di bisi wan gaan hanso bisi ta wai ta njan ta bebe nö? Nönö e! Dee sêmbë ta libi di lö libi dë, a guduma wosu de ta dë, na a sabana dendu.

26 Naa un si wan gaan tjabukama u Masa Gadu? Aai, hën un si dë tuu. Ma Johanisi bigi möön wan tjabukama seei e.

²⁷ Biga hën da di sëmbe di Buku u Gadu bi taki taa a o manda ko a di Heepima fesi, faa seeka di pasi dëen.

²⁸ “Nöö mi taki da unu e, taa fu dee sëmbe de bi pai a fesiten te kisi fa u dë aki, nöö Johanisi di Dopuma hei möön de tuu. Ma tökuseei fa Masa Gadu ta hopo di Njunjun Tii fëen aki, nöö dee möön lagi sëmbe dee ta dë a di Tii fëen kendu, nöö de a’ bunu hedi möön Johanisi e.” Sö Masa Jesosi taki.

²⁹ Wë nöö fa Johanisi bi ko dë, nöö dee sösö sinkii sëmbe u di köndë ku dee sëmbe ta pii lanti möni, de bi piki di buka fëen. Biga de ko si taa Masa Gadu a’ leti. Nöö hën de bia de libi hën de mbei Johanisi dopu de.

³⁰ Ma dee fesima u keiki kuma dee Faliseima ku dee Sabima u Wëti, de an bi kë di heepi Masa Gadu bi o heepi de möönsö. Biga de bi niinga u bia de libi fu Johanisi dopu de.

³¹ Nöö hën mbei Masa Jesosi taki da de taa: “Wë nöö ambë seei mi sa tei maaka ku dee sootu pei sëmbe aki?”

³² De djei dee müi ta pëe a sitaati. Ee i mbei fofio da de u de baja, de an o baja. Ee i kanda këe kanda da de u de këe, de an o këe. „Nöö sö dee fesima u keiki dë tu. Ja sa du soni te a kai ku de möönsö.”

³³ Wë biga di Johanisi di Dopuma ko, nöö an ta njan dee njanjan u di köndë, an ta bebe dee soni u di köndë, hën de feni taa didibi dë nëen liba.

³⁴ Nöö hën Mi di ko dë Libisëmbe Müi aki ko, nöö hën mi ta njan ta bebe kuma dee otowan. Nöö hën de feni taa mi a’ langabëe, mi dë bebesonima, mi ta hoi mati ku dee sëmbe ta pii lanti möni ku dee oto hogilibi sëmbe u di köndë.

³⁵ “Ma antoobi. Fa de ta taki dë seei, ma töku dee sëmbe u Masa Gadu o sabi di köni fëen. „De o sabi taa mi ku Johanisi tuu ta libi bunu.”

Aki wan Faliseima kai Masa

Jesosi faa ko njan ku ën

nëen wosu.

³⁶ Hën de dë te wan daka, hën wan u dee Faliseima de kai Simon kai Masa Jesosi faa ko nëen wosu ko njan ku ën. Nöö hën Masa Jesosi hopo, hën a go a Simon wosu. Nöö hën a sindo a wan langa bangi „tëndë futu buta nëen liba, kumafa guwenti u de dë a di köndë te de o sindo a tafa u njan.”

³⁷ Nöö wan mötjö mujëe bi dë a di köndë. Nöö di a jei taa sö Masa Jesosi dë a Simon wosu, nöö hën a o go ala tu. Nöö di a nango, hën a tja wan gaan dii bata sumëesuti fatu.

³⁸ Nöö hën a go dou. Hën a go taanpu leti a Masa Jesosi futu së, nöö hën a seti këe. Hën a ta bosu Masa Jesosi futu ta këe tefa di wojowata fëen munjëen futu pëtëeë, nöö hën a dëe ën ku di uwii u hedi fëen. Nöö hën a tei di sumëe suti fatu hën a tutu ën a Masa Jesosi futu.

³⁹ Nöö di Simon si di sondi, nöö hën a ta guunjëen nëen hati taa: “Wë, ee di sëmbe aki dë wan tjabukama u Masa Gadu tuu, nöö a musu u sabi taa di mujëe naandë dë wan jajo mujëe. An bi musu nama nëen seei.”

⁴⁰ Nöö hën Masa Jesosi kai ën, “Simon.”

Hën a piki.

A taa: “Wë, mi kë taki wan soni da i.”

Hën a taa: “Andi wë, Mësitë?”

⁴¹ Hën a taa: “De bi dë tu womi bi juu möni a wan sëmbe. Wan u de juu teni dusu kölu, di otowan juu feifi höndö kölu.

⁴² Nöö hën de dë a di taki dë ta bia nango ta ko biga de an sa feni di möni u de paka di womi.

“Te wan pisi hën di womi ko taki da de taa an dë u de paka di möni möön. Be de disa di möni dë soni seei ku piizii.”

Sö wan oto Masa Jesosi taki te a kaba, nöö hën a hakisi Simon taa: “Wë de tu sëmbë dë, undi u de o lobi di sëmbë möön taanga?”

⁴³ Hën Simon taa: “Wë misikuma di womi di bi juu möön hia möni.”

Hën a taa: “Wë awa, i piki bunu.

⁴⁴⁻⁴⁶ Nöö luku, fa i kai mi, mi ko a i wosu aki.”

A taki aai.

“Ja da mi wata fu mi wasi futu, ja bosu mi, ja tutu fatu a mi hedi, ja du na wan wojo soni da mi kumafa di guwenti dë. Ma nöö luku di mujëë aki. Fu sensi di a ko aki, hën a ta këë ta munjan mi futu ku ën wojowata ta dëë mi futu ku di uwii u hedi fëën. A bosu mi futu seei, hën a tei wan gaan dii sumëësuti fatu lobi a mi futu.

⁴⁷ “Nöö mi taki e, di mujëë i si aki sö, nöö Masa Gadu puu ën a bëë u hii dee hogilibi fëën tuu dee a bi ta libi. Hën mbei wë i si a lobi mi ta wai ku mi sö.

“Biga di sëmbë di sabi taa a du hia hogi hën Gadu puu ën a bëë, nöö di sëmbë dë hën o lobi Gadu möön taanga. Ma di sëmbë di pakisei taa wan piki hogi sö nöö a bi du nöö Gadu puu ën a bëë, nöö di sëmbë dë o lobi Gadu wan pikiwan nöö.”

⁴⁸ Nöö hën Masa Jesosi bia fan ku di mujëë taa: “Mujëë, i kisi paadon e. Masa Gadu an hoi dee hogi fii i bi du nëën bëë möön!”

⁴⁹ Nöö hën dee oto sëmbë ku Masa Jesosi bi sindo a tafa naandë, hën de ta fan ku deseëi taa: “Wë ambë da di sëmbë aki di ta puu sëmbë a Gadu bëë?”

⁵⁰ Hën Masa Jesosi taa: “Mujëë, di biibi fii heepi i e. Nöö i go fii a wosu ku piizii.”

8

Aki Lukasi ta taki soni u wanlö

mujëë dee bi ta waka

ku Masa Jesosi ta lontu.

¹ A baka u di dë, hën Masa Jesosi go ta waka a dee köndëköndë ta tja di Bunu Buka ta konda da lanti taa Gadu tja di Njunjun Tii fëën ko a goonliba awaa. Nöö de tuwalufu bakama fëën bi dë ku ën,

² ku wanlö mujëë tu. A fesi nöö dee mujëë dë bi dë ku siki, nöö hën a kula de ko bunu. So u de, soni bi kisi de a hedi hën a jaka de puu. Wan u dee mujëë de ta kai Malia u di köndë de kai Magidala, hën bi abi sëbën gadu nëën hedi hën Masa Jesosi puu de tuu dëën.

³ Wan otowan möön de kai Johana, hën manu de kai Kusasi, wan hedima u Könu Helodi wosu, ku wan de kai Susana, ku sëmëni otowan möön bi dë ku Masa Jesosi ku dee bakama fëën ta waka ku de ta lontu. De ta heepi de a dee soni dee de bi abi fanöudu u de sa libi, ta puu de a fuka a di së u möni soni.

Aki Masa Jesosi da wan woto

u wan sëmbë di ta jaa böngö.

Mat. 13:1-23; Maik. 4:1-20

⁴ Wan daka hën sëmëni sëmbë kumutu a dee köndëköndë ta ko a Masa Jesosi te a hila. Nöö hën a tei wan oto faa lei de soni. A taa:

⁵ “Wan daka hën wan sëmbë go nëën goon go ta paandi wan soni kuma alisi. Nöö di a ta jaa di sii, nöö hafu kai a pasi liba, nöö sëmbë ta waka dë ta makisëën ku futu te an sa ko soni, ufö dee piki fou ta pii ën ta njan tu.

6 “Nöo hafu u di sii kai a sitonu goon. Nöo di a booko wojo ko nöo hën a toona dëdë, fu di di kamian aan doti tjika nöo an ta feni wata kumafa a dë fanöudu.

7 “Nöo so fëen kai ka maka dë, nöo hën di maka göo ko peetëen kii. An sa ko soni möönsö.

8 “Ma nöo hafu u di sii kai a bunu goon, nöo hën a göo tee a puu njanjan te a hila.”

Sö wan oto Masa Jesosi taki te a kaba. Nöo hën a taa: “Fa mi fan ku unu aki, nöo un pakisei ën bunu e, be un fusutëen.”

9 Nöo baka u di dë, hën dee bakama fëen ko hakisi ën faa puu di hedi u di oto da de.

10 Nöo hën a taa: “Wë un haika e. Dee tjubitjubi soni u di Njunjun Tii u Masa Gadu, unu musu sabi de tuu. Ma dee oto sëmbë, de dë kuma dee sëmbë Esaja bi taki taa:»

De ta luku ma de an ta si soni.

De ta haika ma de an ta fusutan.

Hën mbei mi ta fan ku de a nöngö.”

11 Hën a taki da de taa “Wë di puu u di oto dë sö taa: di sii, hën da di Wöutu u Gadu.

12 Nöo di ka di sii kai a di pasi, hën da te wan sëmbë jei di Wöutu, nöo di didibi ko puu ën nëen hati wante fu an fika ta biibi u Gadu heepi ën.

13 “Nöo di ka a kai a sitonu goon, nöo hën da di sëmbë di kisi di Wöutu seei ku wai, ma te toobi miti ën faa poobëen luku ee a biibi Gadu tuutuu, nöo a ta toona tuwëen disa biga aan lutu wan bëtë.

14 “Nöo di ka a kai a maka kamian, nöo hën da di sëmbë di tei di Wöutu tuu, ma a a’ bookohedi u dee soni u di goonliba aki tumisi. A ta pakisei dee peipei libi u di goonliba aki, hoga wan ku bunu wan tuu, ta suku gudu ku piizii. Dee lö soni dë ta fuu di sëmbë hati te nöo di Wöutu an sa ko soni möönsö.

15 “Ma nöo ka di sii kai a bunu goon, hën da a kai a wan bumbuu sëmbë hati. Nöo di a jei di Wöutu, nöo a ta hoi ën nëen hati ta pakisei ën tee a ko soni seei nëen libi.”

Aki Masa Jesosi ta taki

andi limbo ta du.

Maik. 4:21-25

16 Nöo hën a taki möön taa: “Di Wöutu u Masa Gadu dë kuma wan faja e.» Nöo na wan sëmbë o sëndë faja te a kaba, nöo a butëen a wan bungu dendu, nasö a soni basu. Ma a o butëen a wan heihei kamian ka hii dee sëmbë dë a di wosu sa si soni ku ën.

17 Nöo te di limbo fëen kai ko dë, nöo na wan soni o fika tjubitjubi tee nöo sëmbë an o si ën e, nöo na wan soni sa danga tee an o sa ko a limbo.

18 “Nöo un seti jesi be un jei bunu e, dee sëmbë. Biga di sëmbë di bi jei soni kaa, nöo a o sa jei möön hia. Ma di sëmbë di an kë jei seei, nöo di piki soni di a bi mëni taa a jei, hën a o toona lasi.”

Aki Masa Jesosi mbei de ko sabi ambë da famii fëen.

Mat. 12:46-50; Maik. 3:31-35

19 Wan daka hën Masa Jesosi dë a wan wosu ta lei sëmbë. Te wan pisi hën hën mama ku dee baaa fëen ko u ko luku ën, ma dee sëmbë bi hia a di kamian tee de an sa feni pasi u go dou nëen.

20 Nöo hën wan sëmbë go taki da Masa Jesosi taa: “Mësitë o, i mama ku dee baaa fii ko a i aki. De dë a döo dë, nöo de kë si i.”

21 Hën a taa: “Sö nö baa? Wë nöö dee sëmbë i si mi ku de dë aki, nöö de da mi mama ku mi baaa e. Wë biga dee sëmbë dee ta jei Gadu buka ta piki ën, de da mi bëë kaa.”

Aki Masa Jesosi mbei di ventu ku di wata ko kötö.

Mat. 8:23-27; Maik. 4:35-41

22 Wan daka hën Masa Jesosi ku dee bakama fëën dë a wata bandja dë, hën a taki da de taa: “Un boo subi a boto koti wata go a di oto së banda ala.” Nöö hën wante hën de subi a boto tuusi go a mindi wata.

23 Nöö hën Masa Jesosi go kandi ta duumi.

Hën de nango te wan pisi, hën wan gaan ventu ko ta seki di wata tee di boto ta biinga seei u singi.

24 Hën de go kai ën weki taa: “Masa hesi, hopo ooo, hopo! Woo dëdë a wata tuu kaba!”

Nöö hën Masa Jesosi hopo, nöö hën a gandji da di wata ku di ventu. Nöö hën wantewante dë hën di wata ku di ventu tuu ko kötö pii.

25 Nöö hën Masa Jesosi hakisi de taa: “Dee sëmbë aki, andi mbei un fëëë sö? Naasë di biibi fuunu dë? Wan sabi taa mi ku unu dë aki nö?”

Ma nöö fa a du dë, nöö a foondo de te de ko fëëë. Hën de ta hakisi de na de taa: “Wë ambë seei da di sëmbë aki, dee sëmbë? Biga ventu ku wata tuu ta piki ën buka.”

Aki Masa Jesosi puu wanlö hia taku soni a wan sëmbë liba.

Mat. 8:28-34; Maik. 5:1-20

26 Nöö baka u di dë, hën Masa Jesosi ku dee bakama fëën nango teefa de go tjökö a di pisiwata u dee Galasëni sëmbë, leti a oto banda u Galilea dë.

27-29 Nöö di a nango a tela, hën wan sëmbë u di köndë ko miti ku ën. Di lö sëmbë dë, a abi wanlö hia taku soni nëën liba, nöö de dë nëën liba longi kaa. An ta bisi koosu a sinkii, an ta libi a wosu, an ta libi seei kumafa libisëmbë ta libi möön, ma a ta dë fëën a dee sitonu baaku ka de ta bei dëdë. Dee sëmbë u di köndë mbei möiti a hii fasi te de wei. De ta tai ën ku bui, ma a ta booko dee bui kölökölö seei lusu puu, nöö dee taku soni nëën liba ta hai ën ta tja go a dee sabana kamian. Na tide oto de ta penëën sö.

Nöö hën di a si Masa Jesosi, nöö hën a kai olo tuwëen seepi a goon a Masa Jesosi fesi. Nöö hën a taa: “Jesosi, i di Mii u di Möön Hei Gadu a liba, andi mi ku i abi? I ko aki fii ko pena mi nö? Mi begi i, na sitaafu mi e!” Biga Masa Jesosi bi bai ën kaa taa a musu kumutu a di sëmbë liba.

30 Nöö hën Masa Jesosi hakisi ën taa: “Un në fii?”

Hën a taa: “Mi da A-Hila-Möön-Hii.” Biga de bi dë hia te sëmbë an sa konda de.

31 Nöö hën de begi Masa Jesosi fa an musu tuwë de go a di sitaafu kamian u de eti.

32 Nöö wanlö hagu bi dë a wan kuun bandja ta pii soni ta njan. Nöö hën dee soni taa be Masa Jesosi da de pasi fu de go a dee hagu dë. Nöö hën a taa: “Un go!”

33 Nöö hën de kumutu a di womi, hën de go a dee hagu. Nöö fa u ta taki aki, hën dee hagu kumutu kule gililili go kai a wata djulululu dëdë fiaa.

34 Hën dee sëmbë dee bi ta luku dee hagu, hën de kule go a ganda go paaja di buka te dou a hii kamian u di köndë dë tuu taa sö wan soni de si.

35 Nöö hën hii dee sëmbë tuu booko kumutu a dee kamiankamian ko luku andi pasa. Nöö hën de go si di womi di dee soni bi dë nëën liba dë, sindosindo a Masa Jesosi bandja a goon dë pii. A dë ku koosu a sinkii, ku ën bumbuu fusutan. Nöö hën de tuu ko fëëë.

³⁶ Nöo hën dee sëmbë dee bi si di soni, hën de konda da dee otowan fa Masa Jesosi bi puu dee soni a di sëmbë liba.

³⁷ Nöo hën di fëëë de fëëë dë, hën mbei hii dee sëmbë u di pisiwata dë begi Masa Jesosi taa, gaantangi be a kumutu a di köndë u de go. Nöo hën Masa Jesosi subi a di boto faa go.

³⁸ Nöo hën di sëmbë di Masa Jesosi bi puu dee soni nëen liba naandë, hën a taki da Masa Jesosi taa a kë go ku ën.

Ma Masa Jesosi taki dëen taa:

³⁹ “Wë, nönö, mati. Toona go a i köndë, nöo i go konda da dee sëmbë kumafa Gadu du i bunu tjika.”

Hën di sëmbë piki, nöo hën a go nëen köndë go ta paaja di buka ta konda da hii sëmbë di bunu di Gadu du ën.

⁴⁰ Hën Masa Jesosi ku dee bakama fëen toona koti go a di oto së banda ka de bi kumutu. Nöo di de go dou, nöo hën dee hia sëmbë bi sai dë wai ku de, biga de bi dë ta luku Masa Jesosi faa toona ko.

Aki Masa Jesosi heepi wan mujëë ku wan mujëë mii.

Mat. 9:18-26; Maik. 5:21-43

⁴¹ Nöo a di ten dë seei, hën wan hedima u keiki de kai Jailusi ko a Masa Jesosi. Nöo hën a tjökö kini a goon nëen fesi begi ën taa gaantangi be a ko nëen wosu.

⁴² Biga a abi wan kodo mujëë mii fëen tö nöo a abi tuwalufu jaa, ma nöo a siki seei tee a dë a dëdë ku libi maun.

Nöo hën Masa Jesosi piki ën taa, “Söö. Wë antoobi, mati. Un boo go.”

Nöo hën de tei pasi nango, nöo hën wanlö hia sëmbë ta waka ku ën ta peetëen seei tee na soni.

⁴³ Nöo di juu dë, hën wan mujëë bi sai a di köndë naandë, a bi dë ku wan siki tuwalufu jaa longi kaa, soni ta kule nëen an ta tapa möönsö. A go a data seei te a wei, ma an sa ko bunu möönsö.

⁴⁴ Hën di a jei taa Masa Jesosi ko dë, nöo hën wë a waka saapisaapi nëen baka go panjëen a dee jëkëjëkë u di koosu buka fëen. Nöo hën wante, hën a ko bunu kaa.

⁴⁵ Ma nöo hën Masa Jesosi bia hakisi taa: “Ambë panjan mi?”

Nöo hën de tuu ta piki taa: “Na mi.” Disi taa: “Na mi.” Disi taa: “Na mi.”

Nöo hën Petuisi taa: “Wë Masa, luku fa dee sëmëni hia sëmbë ta peeta i aki. Nöo unfu joo du sabi ambë panjan i?”

⁴⁶ Hën Masa Jesosi taa: “Aai, ma seei mi sabi taa wan sëmbë panjan mi. Biga mi fii wan kaakiti kumutu a mi sinkii go kula wan sëmbë.”

⁴⁷ Nöo hën di mujëë si taa wë di soni an sa tjubi möön. Nöo hën a ko ku panta seei ko tjökö kini a goon a Masa Jesosi fesi a hii dee sëmbë wojo dë. Nöo hën a konda hii soni dëen, andi mbei a waka ko panjan di koosu jëkëjëkë fëen, ku fa a ko bunu. De tuu a pii konda dëen.

⁴⁸ Nöo hën Masa Jesosi taa: “Mujëë, na fëëë möön e. Di biibi fii aki, nöo a heepi i kaa. Go fii a i wosu ku piizii.”

⁴⁹ Nöo di juu dë seei, hën wan u dee sëmbë u di hedima u keiki di bi ko kai Masa Jesosi faa ko kula di mujëë mii fëen dëen, ko dou. Hën a taki dëen taa: “Mati, gaan soni. An dë fii mbei di Mësitë ko möön e, biga di mii fii dëdë kaa.”

⁵⁰ Ma nöo hën Masa Jesosi seei taki da di tata u di mii taa: “Na fëëë e, mati. Hoi di biibi fii a mi liba nöömö, nöo joo si. Di mii fii o toona ko bunu.”

⁵¹ Nöo hën de nango te de go dou a di wosu. Nöo Masa Jesosi an kë oto sëmbë go ku ën a di wosu ka di mii dë möön leki Johanisi, Petuisi, Jakobosi, ku di mii tata ku ën mama nöo.

⁵² Nöo di a go dou a di wosu dendu, hën a taki da dee sëmbë dee ta bai ta këë naandë taa be de an këë möön. Wë biga di mii na dëdë a dëdë, duumi a ta duumi.

⁵³ Nöo hën de lafu ën mbei ën fa, biga de bi sabi tuutuu taa di mii dëdë.

⁵⁴ Nöo hën a pasa go dou a di mujëë mii. Nöo hën a panjëën a maun, hën a kai ën taa: “Mujëë mii, hopo e.”

⁵⁵ Nöo hën wantewante dë, hën di mujëë mii weki hën a hopo. A libi baka. Nöo hën Masa Jesosi taa be de dëën soni u njan.

⁵⁶ Nöo di soni foondo di mama ku di tata u di mii te na soni. Ma Masa Jesosi taki da de taa: “Di soni i si pasa aki, nöo wan musu taki ën da sëmbë e.”

9

Aki Masa Jesosi manda dee bakama fëën go a dee köndëköndë.

Mat. 10:5-15; Maik. 6:7-13

¹ A baka u di dë, hën Masa Jesosi kai dee tuwalufu bakama fëën ko nëën. Hën a da de kaakiti ku taki fu de ta jaka dee gadu ta puu a sëmbë hedi. Söseëi da de kaakiti tu u de ta kula hii sootu pei siki u sëmbë.

² Nöo hën a manda de u de go ta lontu a dee peipei köndë ta konda da sëmbë taa Masa Gadu ta hopo di Njunjun Tii fëën fa u dë aki. Nöo söseei tu de musu kula dee sikima ko bunu.

³ Hën a taki da de taa: “Fa woon go aki, nöo wan musu tja soni go ku unu e. Wan musu tja wakatiki. Wan musu tja saku. Wan musu tja njanjan. Wan musu tja möni. Nöo dee koosu dë a unu sinkii dë, nöo ku de nöo un musu go.

⁴ Nöo te wan sëmbë hoi unu nëën wosu, nöo naandë un musu dë fu tee un kumutu a di köndë dë.

⁵ “Nöo te un go a wan köndë, nöo te de an kë haika di buka fuunu, nöo un musu feki di sandu u di köndë di bi peka a unu basufutu puu tuwë da de e, be a fika kuma wan maaka taa un bi konda di buka da de ma de an bi këën. Nöo a fika da de.”

⁶ Nöo hën de go. De ta waka a dee köndëköndë ta konda di Bunu Buka u Masa Gadu ta kula sëmëni sikima.

Aki lei fa dee soni u Masa Jesosi ta danga Könu Helodi.

Mat. 14:1-12; Maik. 6:14-29

⁷ Di juu dë, hën Könu Helodi, di ta tii Galilea Köndë, ko jei hii dee soni Masa Jesosi ta du. Nöo a toobi ën tee na soni, biga de an sabi ambë ta du dee soni dë. So sëmbë taa wë Johanisi di Dopuma ₁di di könu bi kii, hën hopo baka a dëdë ko ta du dee soni.

⁸ So sëmbë taa di fesiten tjabukama u Masa Gadu de kai Elia hën toona ko, ee nasö wan u dee oto awoo fesiten tjabukama hën weki baka.

⁹ Hën Könu taa: “Wë Johanisi miseëi bi kii, nöo ma sabi ambë da di sëmbë dë.” Nöo hën a ta mbei möiti nöömö faa musu si ën.

Aki Masa Jesosi da feifi dusu sëmbë soni u njan.

Mat. 14:13-21; Maik. 6:30-44; Joh. 6:1-14

¹⁰ Nöo hën a baka wan pisiten, nöo hën dee tjabukama toona ko a Masa Jesosi, hën de konda dëën fa soni bi waka di de tja di Buka go a dee köndëköndë. Nöo hën Masa Jesosi tei de, nöo hën de ku ën go a ₂wan sabana kamian zuntu ku, wan köndë de kai Betisaida, de wanwan.

¹¹ Nöo di lanti jei taa Masa Jesosi go a di kamian dë, nöo hën de faakëën. Nöo di a si de, hën a kisi de ku wai. Nöo hën a ta konda da de kumafa Masa Gadu ta hopo di Njunjun Tii fëën fa u dë aki. Hën a ta kula dee sikima u de tu.

¹² Nöo hën de dë te di sapate buka, hën dee bakama u Masa Jesosi ko nëen. Hën de taki dëen taa: “Masa o, fa u dë a di kamian aki, nöo a lati kaa. Nöo na fii manda dee sëmbë go nö, be de go a dee boiti ku dee kôndë dee dë a zuntu aki go suku soni u njan ku kamian u duumi.”

¹³ Nöo hën Masa Jesosi taki da de taa: “Wë nönö, wan musu mbei dee sëmbë go e. Un da de soni u njan.”

Hën de taki dëen taa: “Wa abi soni u njan aki möön leki feifi bëëe ku tu fisi tö. Ee na i kë fuu go bai soni u njan da de, ma de hia e!”

¹⁴ Nöo hën Masa Jesosi taki da de taa: “Wë un mbei dee sëmbë sindo a hipihipi u feifiteni sö te dou.” Biga dee sëmbë bi dë kuma feifi dusu womi sö bifö i abi mujëe ku mii.

¹⁵ Nöo hën dee bakama go seeka dee sëmbë buta te de kaba.

¹⁶ Nöo hën Masa Jesosi hopo wojo a liba, nöo hën a da Masa Gadu tangi. Hën a booko dee bëëe ku dee fisi pisipisi, hën a da dee bakama fëen. Nöo hën de tja go paati da dee sëmbë,

¹⁷ hën de njan tee bëe u de fuu. Nöo hën dee bakama go pii dee pisi dee fika te de kaba, de fuu tuwalufu gaan manda.

Aki Petuisi taki ambë da

Masa Jesosi.

Mat. 16:13-19; Maik. 8:27-29

¹⁸ Wan daka möön, hën Masa Jesosi go dë a wan kamian hën wanwan ta begi. Te wan pisi hën dee bakama fëen ko nëen, hën a hakisi de taa: “Wë fa mi ku unu ta waka ta lontu aki, ambë lanti ta taki taa mi dë? Andi u mi de ta pakisei?”

¹⁹ Hën de taa: “Wë u ta jei de ta taki taa i da Johanisi di Dopuma di de bi kii, hën toona weki. So sëmbë taa i da Elia, di fesiten tjabukama u Masa Gadu, hën toona weki ko a goonliba baka. Ee nasö wan u dee oto fesiten tjabukama kuma ën, hën toona weki. Sö de ta mëni.”

²⁰ Nöo hën Masa Jesosi hakisi de taa: “Wë unu wë, fa mi ku unu ta waka ta lontu aki, ambë un mëni da mi?”

Nöo hën Petuisi piki ën taa: “Masa o, i da di Paamusi Könu e, di Keesitu di Gadu bi paamusi taa a o manda ko da u faa heepi u.”

²¹ Nöo hën Masa Jesosi bai de taa de an musu konda di soni dë da na wan sëmbë.

Aki Masa Jesosi ta konda da de kumafa de o kii ën.

Mat. 16:20-28; Maik. 8:30-9:1

²² Nöo hën a taki da de taa: “Un haika e, dee sëmbë. Mi di ko dë Libisëmbë Mii aki musu tja sëmëni sitaafu e. Fa dee Gaan Womi ku dee Gaan Begima ku dee Sabima u Wëti sai dë, de an dë a mi du nöo de o tja mi go kii. Ma a di u dii daka fëen nöo mi o toona weki baka a dëdë e.”

Sö Masa Jesosi taki da de te a kaba.

Aki Masa Jesosi konda da de fa de musu du bifö de sa waka nëen baka.

²³ Hën a taki da de möön taa: “Ee wan sëmbë i kë ko a mi baka, nöo dee du fii an musu hati i fii disa e. Nöo hiniwan daka i musu ta tja di sitaafu di o ta miti i fu di i ta waka a mi baka, leti kumafa wan sëmbë ta tja wan lakpa pau u de pekëen kii.

²⁴ Biga ee wan sëmbë i ta suku fii hoi i libi ku dee du fii, nöo ja o feni ën kumafa i kë möönsö e. Ma di sëmbë di hopo ën seei ku telu da mi, nöo hën o feni ën kumafa a kë.

²⁵ Wë biga ee wan sëmbë i feni hii bunu u di goonliba aki tuu ma i dëdë go a didibi faja, nöö andi i wini? „Nëen da i sei i hedi bai kaapusa nö?”

²⁶ “Biga ee wan sëmbë sen ta kisi i fii piki taa i nama ku mi ta tei dee lei u mi a goonliba aki, nöö söseei tu te mi go te mi ko u mi ko tei di kõnu bangi u mi, nöö sö sen o kisi mi da i tu. Biga wan daka o dou di mi o ko ku di gaan waiti u mi ku di u mi tata, ku di u dee basia u Gadu Köndë ala tuu. Nöö di juu dë, sen o kisi mi tu fu mi nama ku di sëmbë naandë.

²⁷ “Nöö dee sëmbë, un haika bunu e. Fa mi ta fan ku unu aki, nöö so u dee sëmbë dë aki an o dëdë bifö de o si fa Masa Gadu o hopo di Njunjun Tii fëen.”

Aki Masa Jesosi ko tooka

a dee bakama fëen wojo.

Mat. 17:1-8; Maik. 9:2-8

²⁸ A baka u aiti daka fu di Masa Jesosi taki dee oto dë, nöö hën a tei Johanisi ku Petuisi ku Jakobosi go a wan kuun liba go ta begi.

²⁹ Nöö di a ta begi tee wan pisi, nöö hën fesi fëen ko tooka. Dee koosu nëen sinkii tuu ko ta sëndë kuma te Gadu ta koti faja.

³⁰⁻³¹ Te wan pisi, hën tu sëmbë ko naandë ko ta fan ku Masa Jesosi. Dee sëmbë dë seei sinkii ta sëndë te na soni tu, kumafa dee sëmbë ta libi a Masa Gadu Köndë sinkii ta sëndë. Nöö fa de ko ta fan ku ën naandë, de dë wanlö fesiten tjabukama u Masa Gadu dee bi dëdë gaanduwe kaa. Wan de kai Mosesi, wan da Elia. De ko ta fan ku Masa Jesosi u di wooko di Masa Gadu bi mandëen ko a goonliba faa du. Biga de ta taki soni u di fa a o dëdë a Jelusalen.

³² Di juu dë, nöö Petuisi ku dee otowan fëen bi ta duumi. Te wan pisi, nöö hën de weki. Nöö hën de bia luku, de si Masa Jesosi sinkii ta sëndë seei, nöö de si de tu sëmbë tu dee ku hën ta fan dë.

³³ Nöö hën di de tu sëmbë o toona go, nöö hën Petuisi taa: “Wë Masa o, a suti fa u dë aki. Nöö ee i kë, nöö u sa mbei dii tjëkëliba, wan fii, wan u Mosesi, ku wan u Elia.” (Ma wë fa Petuisi ta fan dë seei, nöö a dë kuma an saandi a ta taki e.)

³⁴ Nöö an kaba u fan seei, hën de si wan bundji saka zaa ko tapa de. Nöö dee bakama ko fëëë.

³⁵ Nöö hën de jei wan tóngö a di bundji dendu taa: “Di sëmbë aki sö, hën da di Womi Mii u mi di mi tei manda ko a goonliba. Nöö hën fuun musu haika e.”

³⁶ Nöö di de jei di fan sö kaa, hën de ko si taa Masa Jesosi wanwan tö nöö fika naandë.

Nöö sö wan soni dee sëmbë si pasa e. Ma nöö fa de si ën seei, ma de an kondëen da na wan sëmbë möönsö di ten dë.

Aki Masa Jesosi puu wan soni

a wan mü liba.

Mat. 17:14-21; Maik. 9:14-27

³⁷ Di dobooko fëen, hën de kumutu a di kuun liba saka ko a goon, nöö sömëni sëmbë ko müti ku de.

³⁸ Nöö hën wan sëmbë a de mindi bai taa: “Mësitë, gaantangi, heepi mi ku di wan kodo womi mii u mi aki o.

³⁹ Wan soni ta ko nëen liba, nöö a ta bai ta tuwëen a goon, nöö sukuma ta kumutu nëen buka. Ee fuu taki, an ta disëen möönsö. Möönmööna a ta kabëen a söso.

⁴⁰ Nöö mi bi begi dee bakama fii fu de puu ën da mi, ma de an sa puu ën.”

41 Hën Masa Jesosi taa: “Huun? Andi seei mi feni a dee sëmbë u di ten aki maun? Fa mi ku de ta dë aki, de an ta biibi möönsö. Taangajesi nöö de abi sö. Fu un longi ten mi musu dë ku unu ta hoi pasensi da unu ufö woon biibi mi?”

Hën a taki da di sëmbë taa: “Tja di mii ko da mi aki.”

42 Nöö hën di sëmbë ta waka ta ko ku di mii a Masa Jesosi. Ma nöö de an dou seei, hën di soni kisi di mii tuwë a goon dobëen buta kakakaa.

Nöö hën Masa Jesosi bai ën taa, “Hetji pasa kumutu a di mii liba e!” Nöö hën a kumutu wante, di mii ko bunu. Nöö hën Masa Jesosi tei di mii hën a dëen tata.

43 Nöö di soni foondo dee sëmbë tee de taa: “Maingë, mi fëë di kaakiti u Masa Gadu e! Aai, a’ poosian tuu.”

Aki Masa Jesosi taki soni

u di dädë fëen möön.

Mat. 17:22-23; Maik. 9:30-32

Fa dee sëmbë ta fan dë, hën Masa Jesosi taki da dee bakama fëen taa:

44 “Un haika e, dee sëmbë. Mi o taki wan soni da unu aki, nöö un musu hoi ën fu wan fëekëtëen. Fa i si dee sëmbë ta gafa mi aki seei, ma wan ten o dou nöö de o tja Mi di ko dë Libisëmbë Mii aki go sei da sëmbë fu de kii mi puu.”

45 Ma nöö di fan a fan dë, a dë wan foombo soni da dee bakama fëen. De an fusutëen möönsö, biga a dë wan tjubitjubi soni da de. Ma seei de bi fëë u de hakisi ën andi da di soni.

Aki Masa Jesosi ta lei ambë

da fesima.

Mat. 18:1-5; Maik. 9:33-37

46 Wë nöö di juu dë, hën wan gaan toobi hopo a dee bakama dendu. De ko ta hakisi deseeti taa: “Undi fuu seei dë di möön hei wan a di wooko aki?”

47 Nöö hën Masa Jesosi saandi de ta pakisei, hën a go tei wan mii tja ko buta nëen bandja naandë.

48 Hën a taki da de taa: “Dee sëmbë o, un si di mii aki sö? An dë wan hei sëmbë, ma tókusei di sëmbë di ta tei sö wan lagilagi sëmbë kuma di mii aki fu mi hedi, nöö hën da a ta tei miseeti tu. Nöö di sëmbë di ta tei mi, nöö hën ta tei di Sëmbë di manda mi ko aki.

“Nöö di sëmbë di a sakafasi te a ta butëen seei a hii dee otowan fëen basu, nöö hën da di möön hei sëmbë a Masa Gadu wojo e, dee sëmbë.”

Aki ta lei ambë ku Masa

Jesosi dë a wan së.

Maik. 9:38-40

49 Nöö hën wan u dee bakama u Masa Jesosi de kai Johanisi taki dëen taa: “Masa, u bi si wan sëmbë ta puu soni a sëmbë liba ku i në, ma di sëmbë dë an bi ta nama ku i kumafa u ku i nama aki. Nöö hën u tapëen taa be an musu du sö.”

50 Hën Masa Jesosi taa: “Wë nönö womi, wan musu tapëen e. Biga ee wan sëmbë an dë feantima fuunu, nöö hën da unu ku ën dë a wan së.”

Aki wan köndë an kë da Masa Jesosi kamian u duumi.

51 Wë nöö di juu dë, Masa Jesosi ten ko zuntu faa toona go a Gadu Köndë ka a bi kumutu. Nöö di a sabi sö kaa, hën a buta taa a o go a Jelusalen.

52 Nöö hën a manda wantu u dee bakama fëen go a fesi u de go suku kamian u de duumi a pasi.

Nöö hën dee bakama fëen go te de go dou a wan u dee köndë u dee Samalia sëmbë, hën de go hakisi wanlô sëmbë dë kamian u de ku Masa Jesosi duumi.

⁵³Ma nöö dee sëmbë sabi taa a Jelusalen de nango, nöö hën mbei de piki de taa de aan kamian da de u de duumi.

⁵⁴Nöö hën dee sëmbë bia toona ko piki Masa Jesosi baka.

Nöö hën di Johanisi ku Jakobosi jei di soni, hën de hakisi Masa Jesosi taa: “Masa o, ja kë fuu kai faja kumutu a liba ko kaba dee sëmbë dë a sösö nö?”

⁵⁵Nöö hën Masa Jesosi bai de taa: “Nönö womi, un sooti pei pakisei da di dë? Un kaba ku dee soni dë!”

⁵⁶Nöö hën de pasa go suku kamian a oto köndë duumi.

Aki Masa Jesosi ta leti dee sëmbë kë waka nëen baka.

Mat. 8:19-22

⁵⁷Nöö fa de dë a pasi nango dë, hën wan sëmbë ko a Masa Jesosi ko taki dëen taa: “Mi kë go ku i aluwasi naasë i nango.”

⁵⁸Hën Masa Jesosi piki ën taa: “Wë a bunu, ma i sabi nö? Dee mbeti abi baaku ka de ta kandi duumi, nöö söseei dee piki fou abi wosu tu. Ma Mi di ko dë Libisëmbë Mii aki, ma abi kamian ka mi ta dë e. „Ma ee i kë sö, nöö i ko boo go.”

⁵⁹Nöö hën wan oto daka möön, hën Masa Jesosi kai wan womi faa musu ko dë bakama fëen. Hën di womi taa: “Antoobi, mi sa ko, ma mi kë begi i wan soni ufö. Mi kë dë te mi tata dëdë mi bei te mi kaba, nöö mi ko e.”

⁶⁰Hën Masa Jesosi taa: “Wë nönö womi, be dee sëmbë dee an dë a mi du bei dee dëdë sëmbë u de e. Ma ju, be i ko go ku mi go paaja di Buka, be sëmbë ko sabi taa Masa Gadu ta hopo di Njunjun Tii fëen fa u dë aki.”

⁶¹Nöö hën wan oto daka möön, hën wan womi taki da Masa Jesosi taa a kë ko bakama fëen. Ma a kë faa dëen pasi be a go da dee sëmbë fëen wosu adjoisi ufö a ko.

⁶²Nöö hën Masa Jesosi piki ën taa: “Aai, wë mi jei, ma i sabi nö? Ee wan sëmbë ta du wan wooko ku tu hati nöö di wooko dë an o ko bumbuu soni möönsö. Nöö ee wan sëmbë ta wooko a di lô fasi dë, nöö an bumbuu tjika faa ko dë wan wookoma a di Tii u Gadu dendu e.”

10

Aki Masa Jesosi manda wanlô

hia bakama fëen u de go

paaja di Buka.

¹Wan oto daka möön, hën Masa Jesosi kai sëbënteni-ku-tu u dee bakama fëen ko nëen. Nöö hën a manda de tu ku tu u de musu go a dee pikipiki köndë ku dee gaangan köndë ka hënseei bi pakisei faa musu go, „be de konda da dee sëmbë taa Gadu ta hopo di njunjun tii fëen.”

²Nöö hën a taki da de taa: “Un haika e, dee sëmbë. Di goon bigi nöö di njanjan lepi u koti, ma wookoma biti poi. Nöö un begi Masa Gadu e, faa puu hia sëmbë manda go a di wooko fëen.”

³Nöö hën a toona taa: “Fa mi ta manda unu aki, mi ta manda unu leti kuma sikafu mü nango a pëndë mbeti dendu. Ma un go nöö. Mi ta manda unu.

⁴Nöö fa woon go dë, wan musu tja möni e, wan musu tja saku. Nöö dee susu un tuusi a unu futu dë, nöö ku de nöö un musu go. Nöö te un nango, wan musu ta buuja ta da oto ku sëmbë a pasi.

⁵⁻⁶“Nöö ee de kai unu a wan wosu fuun go duumi, nöö un musu begi da di sëmbë abi di wosu taa: ‘Masa Gadu musu dë ku i e.’ Nöö fa woon taki dë, nöö

ee wan bumbuu sëmbë sai naandë di fiti u feni di bunu i begi dëen dë, nöö di bunu o tan a di wosu. Ma ee di sëmbë an fiti di lö bunu dë, nöö di bunu o toona ko a unu baka.

⁷“Nöö fa de o tei unu a di wosu dë, nöö naandë un musu tan e. Wan musu kumutu ku unu lai go libi a oto wosu. Nöö te de da unu soni u njan, nöö un musu njan mën. Sen an musu kisi unu. Biga wan wookoma musu feni hën paima fu di wooko di a ta du.

⁸“Nöö te un go a wan köndë nöö ee de kisi unu ku piizii, nöö di soni i si de seeka da unu fuun njan nöö hën un musu njan e.

⁹“Nöö un kula dee sikima dee sai a di köndë dë. Nöö un taki da hii dee sëmbë taa di ten kisi u Masa Gadu hopo di Njunjun Tii fëen awaa, nöö be de seeka u ko nëen.

¹⁰“Ma te un go a wan köndë, nöö ee dee sëmbë dë nëen an kë haika unu, nöö un musu go taanpu a sitaati u di köndë, nöö un taki da de taa:

¹¹‘Di doti u di köndë aki di bi peka a u futu, nöö u feki ën puu tuwë disa da unu e, kuma wan maaka taa Masa Gadu o sitaafu unu. Biga u bi ko fuu konda da unu taa Masa Gadu ta hopo di Njunjun Tii fëen fa u dë aki, ma wan këen. Nöö di hebi fëen fika da unu e. U, u nango.’ ”

¹²Nöö hën a toona taki möön taa: “Nöö un musu sabi taa a di daka di Masa Gadu o kuutu hii mundu, nöö di sitaafu di köndë dë o kisi o möön hogi möön leki di hogi köndë de kai Sodom bi kisi e.”

Aki Masa Jesosi bai helu

da wanlö köndë.

Mat. 11:20-24

¹³Nöö hën Masa Jesosi taa: “Mi bai helu da un dee sëmbë ta libi a Kolazin ku dee u Betisaida e. Wë biga ee dee köndë de kai Sidon ku Tilusi bi si dee gaan foombo wooko dee mi ta du a unu mindi aki, nöö de bi o bia de libi gaanduwe kaa. Di hogilibi u de bi o hati de tee de bi o bisi djodjo go sindo a goon ta tuwë sindja a de sinkii. Sö a bi o hati de tjika. Ma un dee sëmbë u Kolazin ku Betisaida si dee foondo wooko u mi, ma töku wan a’ toobi möönsö fuun disa dee hogilibi fuunu.

¹⁴“Nöö hën mbei mi taki taa tee Masa Gadu o kuutu goonliba, nöö di sitaafu woon kisi o hogi möön di Sidon ku Tilusi o kisi.

¹⁵“Nöö un dee sëmbë u Kapenaumi tu, unfu un mëni? Un mëni taa di hei fuunu aki o tja unu go a Gadu Köndë nö? Nönö e, na seei. Ma a didibi faja a o tja unu go! Biga mi ko a unu ma wan tei di lei u mi u soni möönsö.”

¹⁶Nöö hën Masa Jesosi taki da dee bakama fëen taa: “Ee wan sëmbë ta piki unu buka, hën da a ta piki di buka u mi kaa. Ma ee wan sëmbë an tei unu, nöö hën da an tei mi tu, söseei an tei di Sëmbë di manda mi ko aki tu.”

Aki Masa Jesosi ta lei

dee bakama fëen

andi de musu wai da.

¹⁷Nöö hën de sëbënteni-ku-tu bakama u Masa Jesosi go tefa de toona ko, nöö de ta wai seei. De taki dëen taa: “Masa o, fa u go dë, nöö dee gadu bi saka a u basu seei, di u tei di në fii bai de.”

¹⁸Hën Masa Jesosi taki da de taa: “Awa, sö de o saka da unu tuu.. Biga miseei bi si fa di kaakiti u didibi bi booko saka gaanduwe kaa. Mi si ën, a kumutu a liba ala pasa a mi wojo valau sö, kuma liba koti faja go a goon. Nöö fa dee gadu saka a unu basu dë, nöö sö de o ta saka.

19 “Biga mi ta da unu makiti a di gaan felantima fuu liba e, ku hii dee hogi soni dee a o manda ko a unu, te dou ku sindeki ku kukutulabu tuu. De an o sa da unu hogi.

20 “Ma tökuseei na fu di soni dë hedi un musu ta wai e. Na fu di dee gadu ta saka a unu basu mbei un musu ta wai tu. Ma un musu ta wai seei fu di un sabi taa nē fuunu dē sikifisikifi a Masa Gadu Köndë ala.”

*Aki Masa Jesosi konda da dee bakama fëen kumafa de abi bunuhedi tjika.
Mat. 11:25-27, 13:16-17*

21 Nöo hën di Akaa u Gadu mbei Masa Jesosi ko wai tee na soni. Hën a taa: “Masa Gadu, gaantangi fii o. I da Masa u liba ala ku goonliba aki tuu. Nöo mi da i tangi u di a dë taa i tjubi dee soni fii da dee kōnima ku dee sabisonima u di goonliba aki te de an sa sabi de möönsö. Nöo hën i toona mbei dee lagilagi sēmbë aki dee ta piki i buka, ko sabi de. Aai Taata, gaantangi fii e. Biga sö i feni ën taa a bunu. Wë nöö i bigi e, Taata.”

22 Hën a taa: “Dee sēmbë o, mi Tata buta hii soni a mi maun e. Nöo na wan sēmbë sabi kaba u di Mii boiti di Tata nöö. Söseei na wan sēmbë sabi kaba u di Tata tu boiti di Mii nöö, ku di sēmbë di di Mii kē faa ko sabi ën.”

23 Nöo hën a bia luku dee bakama fëen, nöo hën a taki da de taa: “Un dee sēmbë aki, un abi bunuhedi e, fu dee soni dee un ta jei ku dee un ta si aki.

24 Biga sōmēni u dee fesiten tjabukama ku dee kōnu tuu bi hangı u de si dee soni un ta si aki. De bi hangı tu u de jei dee soni dee un ta jei aki, ma de an bi sa jei de.”

Aki Masa Jesosi konda di oto u wan bunuhati Samalia sēmbë.

25 Te wan daka, hën wan u dee sabima u wëti hopo go a Masa Jesosi u go poobëen luku. Nöo hën a hakisi ën taa ee andi faa musu du te nöö a sa feni di teego libi u Masa Gadu.

26 Hën Masa Jesosi hakisi ën taa: “Andi sikifi a Gadu Buku? Andi i ta lesi nēen?”

27 Hën a taa: “Wë mi ta lesi taa i musu lobi Masa Gadu ku hii i hati ku hii i akaa ku hii i taanga ku hii pakisei fii. Nöo i musu lobi di otowan fii leti kumafa i lobi i seei.”

28 Nöo hën Masa Jesosi taa: “Wë fa i piki dë, nöö i piki bunu. Sö fii libi tuu, nöö joo dou a Masa Gadu Köndë.”

29 Ma di di womi si taa di soni a hakisi dë nēen a feni, hën a toona hakisi Masa Jesosi taa: “Wë ambë da di otowan u mi di mi musu lobi kuma miseei?”

30 Nöo hën Masa Jesosi tei wan oto konda dëen. A taa: “Wan sēmbë bi kumutu a Jelusalen nango a Jelikou. Nöo hën a nango te wan pisi, hën wanlö fufuuma ko kisi ën panjan. Hën de fon mēn te a fon. Hën de tei dee soni fëen dee a bi tja tuu, te kisi ku dee koosu dee bi dë nēen sinkii. Hën de disëen a goon dë a dëdë ku libi maun, hën de go u de.

31 “Nöo hën a sai dë te wan pisi, hën wan u dee begima di ta wooko a Masa Gadu Wosu ko ta pasa. Nöo di a si di womi a goon dë, hën a koti lontu a oto sē pasa go fëen.

32 “Nöo a baka u di dë, hën wan u dee bakamii u Leifi di ta wooko a Masa Gadu Wosu ko ta pasa tu. Nöo di a ko si di womi a goon dë, hën a luku ën diin te a kaba. An du wan wojo soni möönsö. Hën a koti lontu a oto sē pasa go fëen.

33 “A baka fëen hën wan Samalia sēmbë ko ta pasa dë tu. Nöo di a si di womi a goon naandë, nöo hën tjali fëen kisi ën te a taa: ‘Wë di sēmbë aki, fa u ku dee lö sēmbë aki dë feanti seei, ma tjali fëen kisi mi, nöo ma sa disëen aki go. Mi musu heepi ën.’

³⁴ “Nöö hèn a go a di womi go lobi deesi a dee koti buka fëèn hèn a tai de te a kaba. Hèn a hopo èn buta a di mbeti fëèn liba, hèn a ta tjëèn te a wan lantiwosu. Nöö naandë a go sölugu èn.

³⁵ “Nöö di mamate hèn a hopo, nöö hèn a go a di sëmbë di abi di wosu. Nöö hèn a tei möni, hèn a dëèn. Hèn a taki dëèn taa: ‘Womi o, gaantangi baa, luku di sëmbë aki bunu da mi, nöö ee di möni an tjika nöö te mi toona nöö mi o paka i dou.’ ” Sö wan oto Masa Jesosi taki te a kaba.

³⁶ Nöö hèn a bia hakisi di womi di bi ko nëèn dë taa: “Wë mati, andi i pakisei u de dii sëmbë naandë? Undi u de libi ku di womi kuma di otowan fëèn di a ta lobi kuma hënseei?”

³⁷ Hèn di womi taa: “Wë misikuma di sëmbë di bi a’ tjalihati fëèn dë.”

Hèn Masa Jesosi taa: “Wë nöö i piki bunu. Nöö i go e, nöö i libi kumafa di womi dë libi dë.”

Aki Masa Jesosi dë

a Maita ku Malia wosu.

³⁸ Nöö di Masa Jesosi ku dee bakama fëèn dë a pasi nango a Jelusalen dë, te wan pisi hèn de go dou a wan köndë. Nöö hèn wan mujëe de kai Maita kai èn faa ko nëèn wosu. Nöö hèn a go.

³⁹ Wë nöö Maita bi abi wan sisa fëèn de ta kai Malia. Nöö fa Masa Jesosi ko a de dë, hèn Malia go sindo leti nëèn fesi a goon naandë ta haika dee soni a ta taki.

⁴⁰ Ma Maita bi dë ku bookohedi ta seeka soni u njan da Masa Jesosi ku dee bakama fëèn. Hèn de dë te wan pisi, an sa tjëèn möön. Nöö hèn a fan ku Masa Jesosi taa: “Masa o, ja si nö? Fa i si i ko aki, nöö hèn Malia disa mi wanwan tö fu mi seeka hii soni da unu. Ja sa mandëèn fa a ko heepi mi nö?”

⁴¹ Hèn Masa Jesosi piki èn taa: “Wë Maita o, mujëe, haika e. I dë ku gaan pakisei ta booko heddi a sëmëni soni.

⁴² Ma wan soni nöö dë fanöudu e, mujëe. Fa i si Malia ko sindo ta haika mi aki, nöö hèn du di möön bunu soni, nöö ma o puu èn nëèn.”

11

Aki Masa Jesosi lei dee bakama fëèn fa u de begi Gadu.

Mat. 6:9-13, 7:7-11

¹ Wan daka hèn Masa Jesosi bi dë a wan kamian ta begi. Hèn a begi teefa a kaba, nöö hèn wan u dee bakama fëèn hakisi èn taa: “Masa o, andi mbei ja sa lei u fa fuu begi tu, kumafa Johanisi lei dee bakama fëèn?”

² Hèn a taki da de taa: “Antoobi. Mi o lei unu. Te woon begi, nöö sö fuun musu taki:

Ke, u Tata a liba, hii sëmbë musu lesipeki i e.

De musu sabi taa i dë bumbuu limbolimbo.

U begi taa di Tii fii musu paaja a hii goonliba.

³ Nöö u begi i fii da u dee soni u abi fanöudu fuu pasa u libi tide.

⁴ Nöö u begi i tu, be i puu u a bëe u dee hogi dee u ta du,

leti kumafa u seei ta puu dee otowan fuu a bëe fu dee hogi de ta du u.

Nöö u begi i taa na disa u da dee soni dee sa hai u tja go a di së u hogi e.

Sö fuun ta begi e, dee sëmbë.”

⁵⁻⁶ Hèn a toona taki da de taa: “Ee wan sëmbë i a’ wan bunu mati, nöö hèn wan sëmbë ko a i a mindi ndeti, nöö joo go a di mati fii. Nöö joo taki dëèn taa: ‘Mati, gaantangi baa, mi ko begi i soni. Wan mati u mi kumutu a kamian ko a mi, nöö ma a’ sondi u njan fu mi dëèn. Gaantangi, juu mi dii bëeë.’

7 “Nöo di sêmbê o piki i taa: ‘Haika, na toobi mi a di juu aki e. Mi sôotô döo go kandi kaa. Mi ku dee mii u mi dê a kamba aki, de ta duumi. Ma sa hopo go tei bêê da i möön e.’ Ma nöo fu di di fuka fii bigi, nöo joo ta naki di döo kodo ta begi ên nango nöömö.

8 “Nöo mi taki e, kandê an o jabi di döo da i fu di un dê mati hedi. Ma fu di i ta naki di döo nêên hedi nöömö te an sa feni pasi duumi, nöo hên mbei a musu hopo tei di bêê da i kuma di mênî i abi fanôudu.

9 “Fêên mbei mi taki da unu taa i musu ta begi Masa Gadu nöömö e, nöo a o da i di soni di i ta begi ên. I musu ta suku di soni i abi fanôudu nêên, nöo joo feni ên. I musu ta naki di döo fêên, nöo a o jabi ên da i.

10 Biga di sêmbê di ta begi ên, nöo hên a ta da. Di sêmbê di ta suku nêên, nöo hên o feni. Nöo di sêmbê di ta naki di döo fêên, hên a o jabi ên da.

11 “Wê nöo fa un dê aki, ee di mii fii pidi i wan pisi fisi nöo i sa tei wan sindeki pisi dêên nö? Na seei.

12 Nöo ambê dê a unu mindi aki tu di o tei kukutu labu da hên mii ee a pidi i obo. Nônö, sêmbê an dê e.

13 “Wê nöo fa un ta du hogi so juu seei, ma un sabi taa un musu da dee mii fuunu bumbuu soni, wê nöo unu Tata a liba wê? An sa da unu di Akaa fêên tu nö, te un ta begi ên.”

Aki Masa Jesosi ta taki soni fêên ku dee didibi.

Mat. 12:22-30, 43-45; Maik. 3:20-27

14 Te wan oto daka möön, hên Masa Jesosi puu wan soni bi dê a wan womi liba. Di soni bi tapa di womi buka nöo di Masa Jesosi jakêên puu, nöo wantewante a ko ta fan bumbuu baka. Nöo di soni foombo hii sêmbê.

15 Ma seei so u dee sêmbê kosi Masa Jesosi. De taa: “Fa i si a ta puu dee soni a sêmbê liba aki, nöo na ku wan oto kaakiti möönsö, ma ku dí kaakiti u di hedima u dee didibi de kai Belisabo, ku ên wê a ta du ên e.”

16 Nöo hên wanlö sêmbê sai dê kê poobêên luku. Hên de hakisi ên taa: “Wê dee soni dee i ta du aki, nöo ee i da sêmbê u Masa Gadu tuu, nöo lei u wan maaka be u sa sabi taa Gadu dê ku i tuu.”

17 Ma Masa Jesosi sabi fa de ta pakisei, taa na sêmbê u Gadu a dê, ma a dê sêmbê u didibi. Nöo hên a taki da de taa: “Hiniwan köndê di hopo ta feti ku ên seei, nöo an sa tan e. A o booko. Söseei hiniwan famii di hopo ta feti ku ên seei o kaba a sösö tu.

18 “Wê nöo ee dee didibi hopo ko ta feti ku deseai, nöo unfa i mênî de o du? Na kaba de o kaba a sösö nö? Didibi sa jaka dee otowan fêên go nö?

“Wê nöo di un bai taa ku kaakiti u di hedima fu dee didibi mi ta puu dee otowan fêên,

19 nöo dee sêmbê fuunu dee ta puu soni a sêmbê liba wê? Ambê kaakiti de tei ta du ên? Biga di wan puu nöo u tuu ta puu de. Nöo naandê a o waka mbei dee sêmbê fuunu seei o da unu adjabê.

20 “Nöo un mênî unu seei ku dee lö pakisei dê e. Biga ku di kaakiti u Masa Gadu wê mi ta du dee soni aki. Wê nöo di mi ta du de ku di kaakiti u Masa Gadu, nöo hên da Gadu hopo di Njunjun Tii fêên a unu mindi awaa.”

21 Hên a toona taki da de möön taa: “Un haika. Solanga wan taanga sêmbê dê fêên seekaseeka ku ên feti lai ta luku ên wosu, nöo na wan kodo sêmbê seei sa ko fufuu soni fêên tja go e.

22 Ma te wan oto sêmbê ko di taanga möön hên, nöo a o sa ko kisi ên panjan feti ku ên tee a wini ên. Nöo a o tei hii dee feti lai fêên dee a bi ta mênî u heepi ên seei, ku dee gudu fêên tuu, tja go paati da dee otowan.”

²³ Nöo hën Masa Jesosi taki da de möön taa: “Fa u taki dee soni aki, nöo di sëmbë di an kë nama ku mi, nöo hën da felantima u mi kaa e. Söseei di sëmbë di an ta suku sëmbë tja ko da mi, nöo hën ta jaka sëmbë puu a mi.”

²⁴ Nöo hën a taa: “Te wan gadu dë a wan sëmbë hedi, nöo te a kumutu disëen go, nöo a o ta waka ta lontu ta suku kamian ka dee otowan fëen ta libi te a wei. Nöo a o taa: ‘Wë, nönö, ma feni kamian aki u mi tan.’

“Nöo a o bia toona ko a di sëmbë hedi ka a bi kumutu dë seei.

²⁵ Nöo te a ko naandë nöo a o si di kamian limbolimbo hooo. [Di sëmbë an feni wan bumbuu soni buta nëen möönsö.]

²⁶ Nöo paa, tjala! A toona ko a di sëmbë hedi baka. Nöo a o go kai sëbën gadu hogiwan möön leki ën seei, nöo de o ko lai a di sëmbë naandë hedi. Nöo di lö sëmbë naandë, tan fëen o ko dë möön hogi gaanfa möön fa a bi dë a fesi.”

Aki Masa Jesosi ta konda ambë da dee sëmbë sa feni di möön gaan bunu.

²⁷ Nöo fa Masa Jesosi ta fan dë, nöo hën wan mujëë bi sai a dee sëmbë mindi dë hopo bai fan ku ën. A taa: “Womi, di mama fii di pai i, a abi kölöku e, fu di Gadu feni taa hën musu pai i.”

²⁸ Hën Masa Jesosi piki ën taa: “Aai, mujëë, ma fa i si u dë aki, nöo dee sëmbë dee ta jei di Wöutu u Masa Gadu ta piki ën buka, nöo de ta feni di möön gaan bunu möön leki di sëmbë di pai mi e.”

Aki Masa Jesosi ta taki soni

u dee sëmbë fëen ten.

Mat. 12:38-42; Maik. 8:12

²⁹ Nöo fa de dë ala, nöo sëmbë ta ko a Masa Jesosi naandë gidjii sö. Hën a taa: “Dee sëmbë u di ten aki, de abi takuhatiböö. Na biibi de kë biibi sö e, ma de ta ko a mi u de feni maaka a mi. Ma ma abi oto maaka u lei de möön leki di maaka u di fesiten tjabukama de ta kai Jona e.

³⁰ “Wë biga leti kumafa Jona bi dë wan maaka da dee sëmbë u Ninifei, nöo söseei Mi di ko dë Libisëmbë Mii aki dë wan maaka da dee sëmbë u di ten u dë aki tu.

³¹ “Nöo un haika e. Gaanduwe a fesiten, wan mujëë könu bi kumutu tee a wan longi köndë ko a Jelusalen faa ko jei di köni u Könu Salumon. Ma nöo un dee sëmbë u di ten aki abi wan sëmbë a unu dendu kaa di hei gaanfa möön di fesiten könu dë e, ma tökuseei wan kë haikëen.

“Wë nöo woon si fa a o waka a di Gaan Kuutu Daka di Masa Gadu o kuutu hii sëmbë. Biga di mujëë u taki dë, hënseei o hopo ta kuutu unu e, taa: ‘Mi wë bi kumutu a sö wan longi kamian ko haika di fan u di könu, ma unu bi dë leti a wan möön hebi Sëmbë bandja, ma wan bi kë haikëen möönsö.’

³² “Nöo söseei dee sëmbë u Ninifei dee bi piki di buka u Jona o hopo a di Daka dë fu de kuutu unu tu. Biga de bi bia de libi wantewante fu di de jei di fan fu Jona. Ma aki un ta si wan Sëmbë a unu mindi di hei möön Jona gaanfa, ma töku wan kë piki ën buka.”

Aki Masa Jesosi toona ta lei de ku di oto u di faja möön.

Mat. 5:15, 6:22-23

³³ Hën a toona taki da de taa: “Na wan sëmbë o sëndë wan faja te a kaba, nöo a tjubi ën a soni basu e. Ma a o sëndëen buta a wan kamian fu hii sëmbë di o ko a di wosu musu sa si limbo ku ën.

³⁴ “Nöo ee i sëndë wan faja, nöo ee wojo fii bunu nöo i ta si limbo ku ën fii saandi i ta du. Biga di wojo hën da di faja fii sinkii. Ma nöo ee wojo fii booko nöo ee i sëndë faja buta naandë seei, töku ja o si soni. A söso dungu nöo joo ta dë. Ja o saandi i ta du.

35 “Hën mbei i musu ta kõni ku i wojo fu an musu ko dungu. „Nöö söseei i musu ta kõni fu hogi pakisei an musu dë a i hati.”

36 Biga leti kumafa i ta si soni bunu te wojo fii dë limbolimbo, nöö söseei ee hati fii dë limbolimbo fii tei Gadu wöutu ta hoi, nöö i o ko dë bumbuu sëmbë te dou.”

Aki Masa Jesosi ta bai helu da

dee Faliseima ku dee

Sabima u Wëti.

Mat. 23:1-36; Maik. 12:38-40; Luk. 20:45-47

37 Di Masa Jesosi fan sö tefa a kaba, hën wan Faliseima kai ën faa ko njan nëen wosu. Nöö hën a go ku ën.

38 Nöö di juu de sindo u de njan, nöö soni u Masa Jesosi toobi di Faliseima. Biga an wasi „maun kumafa dee Faliseima ta wasi maun.”

39 Nöö di Masa Jesosi si taa di soni dë toobi di Faliseima, hën a taki dëen taa: “Un dee Faliseima aki, andi mbei un ta biinga fu sinkii fuunu musu ta dë limbolimbo, ma hatiböö fuunu lai te dou ku hii sootu pei hogi.

40 Un wisiwasi di dë? Un ninga taa Masa Gadu kë fu di sinkii fuunu wanwan nöö musu ta dë limbolimbo nöö? Wë di hatiböö fuunu wë?”

41 “Wë un musu biinga be hati fuunu dë limbolimbo e, be un ta libi bunu ku hii sëmbë ta heepi dee penama. Biga te un libi sö, nöö an o dë fuun suku fuun ta wasi soni a dee peipei fasi dë möön. Biga hii soni fuunu o ta dë limbolimbo kaa.”

42 Nöö di a taki sö da de te a kaba, hën a taa: “Un dee Faliseima aki, mi bai helu da unu e. Fa un sai dë, un ta mbei taa un dë bumbuu möön hii sëmbë. Un ta paati hii soni fuunu, fii da Gadu di fëen së te dou ku dee pikipiki goon njanjan fuunu tuu kumafa di wëti dë. Nöö di naandë bunu tuu, ma an tjika. Biga wan ta libi bunu ku sëmbë, nöö wan lobi Gadu tu.”

43 Hën a toona taa: “Mi bai helu da unu wan pasi möön e, un dee Faliseima. Biga te un go a keiki, nöö un lobi u sindo a di möön hei kamian u di wosu. Te un ta waka a sitaati, nöö un ta kë hii sëmbë musu ta da unu odi a lanti dendu, kuma un hei möön hii sëmbë.

44 “Nöö mi bai helu da unu e. Un dë leti kuma wan awoo geebi, sëmbë ta waka ta pasa nëen liba söndö de sabi taa ku sö wan hogi soni de ta nama dë.”

45 Nöö di Masa Jesosi taki sö kaa, hën wan u dee Sabima u Wëti hakisi ën taa: “Wë Mësitë o, fa i taki aki, na u i ta kosi tu nöö?”

46 Nöö hën Masa Jesosi bia fan ku de awaa, a taa: “Mi bai helu da unu tu, un dee Sabima u Wëti. Biga fa un ta lei lanti dee wëti u Mosesi dë, un ta suku u lai hebi soni a de liba fu de musu tjai, ma unu seei wan ta pooba u tjëen wan pikiwan seei.

47 “Nöö mi bai helu da unu möön e. Biga un ta seeka dee geebi fu dee fesiten tjabukama u Masa Gadu te de hanso. Dee gaan sëmbë fuunu wë bi kii de, nöö unu ta seeka dee geebi.

48 Nöö di soni dë mbei hii mundu ko ta si gbelin taa fa dee gaan sëmbë fuunu bi kii dee tjabukama dë, nöö a bunu a unu. Dee gaan sëmbë bi kii, nöö dee mii ta seeka dee geebi.

49 “Ma antoobi, Masa Gadu sabi fa fuunu. Biga a bi taki a fesi taa a o manda dee tjabukama ku dee futuboi fëen ko da unu, nöö so u de woon kii. So u de woon sitaafu.

⁵⁰ Fëen mbei, un dee sootu pei sëmbë aki, unu wë Masa Gadu o sitaafu fu hii dee tjabukama fëen tuu dee de bi kii tuwë buuu a goon, fu sensi goonliba seti.

⁵¹ Fu kumutu a Abeli te dou ku Sakaliasi di de bi kii a di Wosu u Masa Gadu dendu, leti a di begi tafa ku di möön hebi kamba mindi dë, nöö u de tuu woon kisi sitaafu e.”

⁵² Nöö hën Masa Jesosi taki da de möön taa: “Mi bai helu da unu möön, un dee Sabima u Wëti. Biga un ta tei dee oto u Masa Gadu tuu ta tapa buta dë fu sëmbë an musu sabi de. Unu seei, wan kë mbei möiti fuun musu sabi de, nöö ee wan sëmbë kë sabi de nöö un ta tapa pasi da de. „Biga wan kë lei de a di fasi.”

⁵³⁻⁵⁴ Nöö hën di Masa Jesosi fan ku de sō te a kaba, hën a kumutu go fëen. Nöö a baka u di dë, hën dee Faliseima ku de Sabima u Wëti seti ta ko nëen ku hatiboonu fasi nöömō ta hakisi ën peipei soni. De ta seti taapu dëen faa musu taki wan soni fu de sa feni ën tja go kaagi da lanti.

12

Aki Masa Jesosi ta wasiköi dee

bakama fëen a di ganjan libi

u dee Faliseima.

Mat. 10:26-27

¹ Nöö di juu Masa Jesosi ta fan dë, nöö dusudusu sëmbë ta ko nëen naandë tee kamian an dë u de tan, nöö de ta peeta deseai.

Nöö hën Masa Jesosi seti wasiköi dee bakama fëen, a taki da de taa: “Womi, un mëni unu seei ku di sooda u dee Faliseima e. Dati wan taki wan musu tei di ganjan libi u de. Biga de ta mbei taa de dë bumbuu sëmbë ma na tuu. Nöö hën mbei wan musu djeesi de e.

² “Biga na wan soni sa tjubi te nöö an ko a döö. Nöö na wan soni sa danga tu te nöö sëmbë an o ko sabi ën.

³ Fëen mbei di soni di i si un ta taki a ndeti a dungudungu, nöö de o jei ën a gaan didia. Nöö di soni di un ta konda sapisapi da unu seei a kamba dendu, nöö hën de o feni ta bai basia a di köndë.”

Aki Masa Jesosi ta taki taa libisëmbë an dë u fëë.

Mat. 10:28-33, 12:32; 10:19-20

⁴ Nöö hën a taki da dee bakama fëen möön taa: “Un dee mati u mi aki, wan musu fëëe dee sëmbë dee o sa kii unu e. Wë biga ee wan libisëmbë kii i, nöö an sa du oto soni ku i möönsö. Biga an sa du soni ku di akaa fii, hën mbei wan musu ta fëëe de.

⁵ Ma Masa Gadu hën un musu ta fëëe e. Biga tee a kii wan sëmbë te a kaba, nöö a sa toona sitaafu ën a bakaten. Biga hën abi di faja ka didibi o go, nöö hën mbei hën un musu ta fëëe.

⁶⁻⁷ “„Nöö un musu ta mëni Masa Gadu tuu e, dee sëmbë, biga hën ta sölugu fuunu.” Wë biga luku dee piki fou ta buwa aki. De ta sei feifi u de u wan bangunötu nöö, ma töku Gadu ta mëni de. Wë nöö un dee libisëmbë wë? An möönsö nö? Nöö Masa Gadu sabi unu finifini te kisi ku dee uwii u hedi fuunu tuu.”

⁸ Nöö di a fan sō te a kaba, hën a taki da de taa: “Mi taki da unu e, taa dee sëmbë dee ta piki a libisëmbë fesi taa de sabi Mi di ko dë Libisëmbë Mii aki, nöö a bakaten nöö miseei o piki a dee basia u Masa Gadu fesi taa mi sabi de tu.

9 “Ma ee wan sɛmbɛ an kɛ piki taa a sabi mi a libisɛmbɛ fesi aki, nɔɔ a bakaten nɔɔ ma o piki taa mi sabi ɛn tu, a dee basia u Masa Gadu fesi ala.”

10 Hɛn a toona taa: “Ee wan sɛmbɛ kosi Mi di ko dɛ Libisɛmbɛ Mii aki, nɔɔ Gadu sa puu ɛn a bɛɛ eti. Ma ee wan sɛmbɛ ta kosi di Akaa fɛɛn, nɔɔ an o puu ɛn a bɛɛ mɔɔnsɔ e.”

11 Hɛn a toona taki da de mɔɔn taa: “Haika, dee sɛmbɛ. Te de kisi unu u tja go a kuutu a dee keiki u de, ee nasɔ de tja unu go a dee gaan sɛmbɛ ku dee gaama u kɔndɛ u de kuutu unu, nɔɔ wan musu ta pakisei taa: ‘Ee maingɛ, unfa woo du? Andi seei woo taki?’

12 Biga te di juu dou, nɔɔ di Akaa u Masa Gadu seei o lei unu andi fuun musu taki e.”

Aki Masa Jesosi ta bai de taa de an musu suku hia gudu a goonliba aki.

13 Nɔɔ di juu naandɛ seei, nɔɔ hɛn wan sɛmbɛ bi dɛ a de mindi naandɛ taki da Masa Jesosi taa: “Mɛsitɛ o, mi kɛ begi i wan soni. Di tata fuu dɛdɛ disa di gudu fɛɛn naandɛ. Nɔɔ mi kɛ i taki da di baaa u mi taa be a paati dee gudu, be a da mi u mi sɛ.”

14 Hɛn Masa Jesosi piki ɛn taa: “Womi, na di wooko dɛ mi ko aki u ko du e. Ma ko u ko kuutu soni fuunu ta paati gudu da unu.”

15 Nɔɔ hɛn a taki da dee sɛmbɛ sai dɛ tuu taa: “Dee sɛmbɛ aki, un musu mɛni unu seei fu wan abi langawojo a soni e. Biga na gudu ta mbei sɛmbɛ ta libi gaandi, sɔseei an ta mbei sɛmbɛ libi suti tu.”

16 Hɛn a konda wan oto da de, a taa: “Wan guduma bi dɛ, hɛn a ta koti goon ta wooko ta paandi njanjan nɔɔmɔ tefa a feni hia njanjan.”

17 Hɛn a sindo pakisei taa: ‘Wɛ unfa mi o du? Biga ma a’ wosu tjika fu mi lai dee njanjan dee mi abi.’

18 “Hɛn a sai dɛ te wan pisi, hɛn a taa, ‘Sɔɔ. Wɛ mi saandi mi o du. Mi o booko dee wosu aki tuwɛ, nɔɔ mi o mbei wanlɔ gaan gindi wan. Nɔɔ a de mi o lai dee njanjan ku dee gudu u mi tuu,

19 nɔɔ mi o dɛ kumafa mi kɛ awaa. Dee gudu dee mi abi, nɔɔ de o tja mi sɔmɛni jaa. An o dɛ u mi wooko mɔɔn. Mi o ta njan ta bebe ta mbei piizii ta libi suti kumafa mi kɛ.’

20 “Ma nɔɔ te faa mɛni, hɛn Masa Gadu taki dɛɛn taa: ‘I lauma ju! A di ndeti aki seei de o ko tei di akaa fii puu a i tja go. Nɔɔ dee gudu i abi dɛ ku dee njanjan i tjubi buta dɛ, ambɛ seei de o fika da?’ ”

21 Nɔɔ hɛn Masa Jesosi taa: “Wan si o? Nɔɔ sɔ a ta pasa ku dee sɛmbɛ dee ta suku gudu u goonliba aki, sɔndɔ de ta suku u libi kumafa Masa Gadu kɛ, fu de feni gudu nɛɛn ala.”

Aki Masa Jesosi ta konda da dee

bakama andi dɛ fanɔudu

u de suku.

Mat. 6:25-34

22 Hɛn Masa Jesosi bia fan ku dee bakama fɛɛn awaa. A taa: “Fɛɛn mbei wan musu abi bookohedi tumisi taa andi woon njan, nasɔ andi woon bisi.

23 Biga di libi ₁ di Masa Gadu da unu dɛ, nɔɔ ₂ a dɛ gaan soni mɔɔn leki dee njanjan fuun njan. Nɔɔ di sinkii ₃ Masa Gadu da unu dɛ ₄, a dɛ gaan soni mɔɔn leki dee koosu fuun bisi nɛɛn. ₅ Nɔɔ di a da unu libi ku sinkii kaa, nɔɔ an sa toona da unu njanjan ku koosu u bisi tu nɔɔ?’

24 “Wɛ biga fa dee fou sai dɛ, de an ta diki goon paandi njanjan. De an ta diki alisi. De an a’ kɛdɛ ee nasɔ gaan suwa ta tjubi njanjan mɔɔnsɔ, ma Masa

Gadu hèn ta sölugu de. Wè nöö unu libisëmbë wë? Wan bumbuu gaanfa möön dee fou nö? Nöö an sa sölugu fuunu tu nö?

²⁵ “Nöö un sëmbë sa libi ee wan juu langa seei möön fa Gadu bi buta dëen, fu di a ta booko hedi mbei? Di libi fii an o pusa pasa di daka a bi da i möönsö.

²⁶ Wë nöö ee di bookohedi fii an sa heepi i a di piki soni dë, nöö ee i ta bookohedi a gaangan soni seei nöö a sa heepi o?

²⁷ “Nöö luku dee folo dee ta nasi a pepei kamian, fa de hanse. De an ta wooko, nöö de an ta nai soni u bisi tu. Ma nöö mi taki da unu taa, fa di gaan könu de kai Salumon bi dë ku hii dee gaan waiti bisi fëen seei, ma an bi ta bisi hanso kuma dee folo dë e.

²⁸ “Ma nöö fa i si dee folo hanse seei ma te sapate de puu kai pökö. De kaba a sösö kaa. Wë nöö di Masa Gadu ta bisi dee sösö uwii ku so wanlö hanse folo, nöö an sa da unu koosu fuun bisi tu nö? Ke dee sëmbë aki, luku fa di biibi fuunu piki. Biga wan ta buta mëni a Masa Gadu tjika.

²⁹ “Dee sëmbë o, mi taki e, wan musu a’ bookohedi fu njanjan ku soni u bebe. Wan musu ta kai dee soni naandë gaan soni poi.

³⁰ Biga a dee lö soni dë, dee sëmbë dee an ta dë ku Masa Gadu a wan së ta booko hedi. Ma unu Tata sabi dee soni un abi fanöudu kaa e.

³¹ Nöö be un suku nöö fuun dë a di Tii fëen basu, nöö hënseei o da unu hii dee soni dee un abi fanöudu.”

Aki Masa Jesosi lei taa ja musu tjubi gudu a di goonliba aki.

Mat. 6:19-21

³² Nöö hèn a toona taki da dee bakama fëen möön taa: “Dee sëmbë u mi aki, fa un dë biti seei, ma wan musu fëëe e. Biga unu Tata Masa Gadu bi feni ën u bunu faa buta unu u di Njunjun Tii fëen dendu, fuun sa njan dee bunu fëen.

³³ “Nöö fa i si un dë aki, wan musu lai hia gudu a wosu te poi. Ma un musu sei de, nöö un paati di möni da dee pena sëmbë. Nöö hèn da un ta lai möni a wan saku di an sa gaandi möönsö. Biga di lö möni dë an o kaba a sösö möönsö ka a dë a Gadu Köndë ala. A o dë u teego. Fufuuma an o sa go ala go fufuu ën möönsö, nöö bitju an o sa go ala go njan mën tu. Nöö naandë fii lai di gudu fii buta e, dee sëmbë, ma na a goonliba aki.

³⁴ Biga ka di gudu fii dë, naandë hati fii ta dë tu.” Nöö sö Masa Jesosi taki da dee bakama fëen di ten dë.

Aki Masa Jesosi ta konda da de taa de musu ta dë seekaseeka.

Mat. 24:45-51

³⁵ Nöö hèn a toona taki da de taa: “Dee sëmbë o, un musu dë kabakaba e, ku faja sëndësëndë a unu maun. Un musu bisi wooko koosu, be i dë kabakaba ta luku di Masa fuunu.

³⁶ “Nöö woon dë leti kuma wanlö futuboi de Masa go a kamian a wan piizii. Nöö de o dë a wosu dë pii kabakaba ta luku ën, fu te a ko dou naki di döo nöö de musu hopo jabi di döo dëen wantewante.

³⁷ Nöö te di Masa u dee futuboi ko si taa de dë kabakaba kaa, nöö de o feni paima. Biga hënseei o puu ën koosu nëen sinkii buta a wan së, nöö a o hopo tafa sölugu de te a kaba.

³⁸ “Wë nöö hèn da bunu u dee futuboi seei te de Masa ko baka a wosu nöö a ko si taa de dë kabakaba. Biga wë hiniwan juu di a ko dou, nöö de musu dë kabakaba, ee a ganian kanda, ee a mindi ndëti seei.

³⁹ “Nöö un musu pakisei di soni dë bunu e. Biga ee wan sëmbë sabi a fesi taa a sö wan juu fufuuma o ko nëen, nöö a o dë ku wojo ta watji bunu fu an musu ko booko di wosu fëen fufuu soni.

⁴⁰ Nöo fëen mbei un musu hoi unu seei bunu fuun dë kabakaba tu. Biga Mi di ko dë Libisëmbë Mii aki o toona ko a goonliba a wan juu di sëmbë an o mëni taa nëen mi o ko.”

⁴¹ Nöo di Masa Jesosi fan sô te a kaba, nöo hën Petuisi hakisi ën taa: “Wë Masa o, fa i ta da u dee oto ta lei u dee soni aki, a dë fuu wanwan nö? Naa a dë u hii sëmbë?”

⁴² Nöo hën Masa Jesosi piki ën taa: “Wë mi ta fan di fan aki da dee sëmbë dee abi bumbuu fusutan, ku dee lanti sa a’ futoou a de liba. Biga sô wan sëmbë hën di masa o tei buta hedima nëen wosu, fu te di juu dou hën musu paati njanjan da dee otowan.”

⁴³ Nöo te di Masa fëen toona ko, nöo ee a ko si taa a dë wan bumbuu futuboi, a ta du di wooko fëen bunu, nöo a o kisi wan gaan paima.

⁴⁴ Mi taki da unu e, taa nëen maun hën masa o buta hii dee gudu fëen.

⁴⁵ “Ma ee di futuboi dë bi taki nëen hati taa: ‘Wë mi masa an o ko eti,’ nöo hën a hopo ta fon dee otowan fëen, womi ku mujëë tuu, ta njan ta bebe ta piizii ta dööngö,

⁴⁶ nöo te hën masa toona ko baka a wan daka di an sabi ku wan juu di an bi mëni, nöo a sa sitaafu ën wan hogi sitaafu e. A o du ku ën seei kumafa a ta du ku dee oto sëmbë dee an ta piki ën buka.

⁴⁷ “Biga di sëmbë di ta du soni ku sabi, nöo hën o kisi wan möön hogi sitaafu.

⁴⁸ Ma di sëmbë di ta du hogi söndö a saandi a ta du, nöo hën an o sa kisi sô wan hogi sitaafu kuma di sëmbë di ta du hogi ku sabi. Biga di sëmbë di i bi du bunu, nöo nëen i ta pakisei u feni bunu baka. Söseei di sëmbë di i bi da möön hia, nöo nëen joo ta mëni taa joo feni möön hia.”

Di pisi aki ta lei u taa

sëmbë ku sëmbë sa paati

fu Masa Jesosi hedi.

Mat. 10:34-36

⁴⁹ Nöo hën Masa Jesosi toona taa: “Fa i si mi ko a goonliba aki, nöo mi ko u ko suti faja kumafa sëmbë ta suti faja a goon. Ma dee sëmbë o, mi bi kë u di faja dë bi suti kaa e.

⁵⁰ Biga di sitaafu mi musu tja bifö mi kaba di soni di mi ko u ko du aki, a hebi da mi o.

⁵¹ “Nöo unfa un pakisei, dee sëmbë? Un ninga taa mi ko aki u tja fii ko a di goonliba aki nö? Nönö e, ma mi ko u paati sëmbë ku sëmbë.

⁵² Biga ee feifi sëmbë dë a wan wosu dendu, nöo de o ta kisi toobi ku deseei fu mi hedi. Dii o dë ku mi a wan së, tu dë a wan oto së. Ee nasö, tu o dë ku mi a wan së, dii dë a wan oto së.

⁵³ Wan tata o poi ku di womi mii fëen fu mi hedi e, nöo wan womi mii o poi ku ën tata. Wan mama o poi ku di mujëë mii fëen. Wan mujëë mii o poi ku ën mama. Mai ku mai o poi ku de seei. Hën mbei mi taa na u piizii mi ko e.”

Aki Masa Jesosi taki da

dee sëmbë taa de musu sabi

na un juu de dë.

Mat. 16:2-3, 5:25-26

⁵⁴ Hën Masa Jesosi ko ta fan ku dee hia sëmbë ko nëen dë awaa. A taki da de taa: “Dee sëmbë aki o, unfa un du ta sabi dee maaka dë a liba ala, ma dee u goonliba aki wan ta sabi de? Biga te un hopo wojo luku liba, nöo ee un si taa

di bundji bë njaaan a di së ka sonu ta kumutu, nöö un taa tjuba o kai. Nöö a ta kai tuu.

⁵⁵ “Nöö te un hopo wojo luku a di së u libasë, nöö te di ventu ta ko nöö un taa: ‘Ma di ventu di ta ko di ko aki, di sonu o hati e.’ Nöö sonu ta hati tuu.

⁵⁶ “Wë nöö dee soni u liba ala, de un dë aki ta sabi. Wë nöö dee soni ta pasa a unu fesi a goonliba aki wë? Unfa wan ta si de fuun sabi na un juu u dë, un bödjëema?

⁵⁷ “Biga un saandi da di leti soni fuun du, nöö faandi mbei wan ta seeka soni fuunu buta a pasi?

⁵⁸ Te i ku i felantima a’ soni nöö i si taa a kë tja i go a kuutu u di soni dë hedi, nöö, te i si taa i a’ föutu, nöö be i dëen leti wante e, be di taki koti bifö un dou a di kuutama. Ma ee nasö, te di kuutu kaba, nöö dee siköutu o kisi i buta a dunguwosu,

⁵⁹ fu teee i paka di lasiti bë sënsi u di paima de kai da i fii paka.”

13

Aki Masa Jesosi ta bai dee

sëmbë u de disa dee

hogilibi u de.

¹ Nöö di juu naandë, hën wanlö sëmbë ko konda da Masa Jesosi taa wanlö Galilea sëmbë bi ta kii wan mbeti u de tjuma da Masa Gadu. Nöö fa de dë ta seeka di paima naandë, nöö de an kaba seei, hën dee sodati u Gaama Pilati ko kii de tuwë leti dë a di paima liba.

² Hën Masa Jesosi piki de taa: “Wë dee sëmbë o, unfa un mëni u dee Galilea sëmbë dee sodati kii naandë? Un mëni taa de dë möön hogi möön hii dee oto sëmbë u Galilea mbei di soni dë miti de nö?”

³ Wë nönö, na di soni dë mbei e. Ma nöö mi taki da unu taa ee wan bia unu libi, nöö sö unu seei sa dëdë kaba a sösö tu.

⁴ “Nöö di di tölu u Siloam bi kai kii dee teni-a-aiti sëmbë, nöö unfa fëen un pakisei? Un mëni taa dee teni-a-aiti sëmbë naandë bi hogi möön hii dee sëmbë u Jelusalen, mbei di soni dë miti de nö?”

⁵ Nönö e, ma mi taki da unu taa ee wan bia unu libi, nöö söseei un sa dëdë kaba a sösö tu.”

Aki Masa Jesosi ta konda di oto u di fuuta pau.

⁶ Nöö hën a toona da de wan oto möön. A taa: “Wan sëmbë bi abi wan goon fëen, nöö hën a paandi di fuuta pau de ta kai figa nëen. Nöö hën a dë te wan daka, nöö hën a go a di goon go suku njanjan a di pau. Ma nöö an feni na wan kodo njanjan nëen.

⁷ “Nöö hën a taki da di sëmbë di ta luku di goon taa: ‘Wë i sabi nö? Dii jaa longi kaa mi ta ko ta suku njanjan a di pau aki, ma ma ta feni möönsö. Nöö fii faa ën e. Andi a dë a di goon ta du?’

⁸ “Nöö hën di sëmbë di ta luku di goon taa: ‘Wë un boo disëen di jaa aki möön, nöö mi o diki wan ngötö lontu ën buta deesi dëen.

⁹ Nöö te di oto jaa ee an pai njanjan, nöö te i toona ko nöö i sa faa ën awaa.’”

Aki Masa Jesosi kula wan mujëë a saba daka.

¹⁰ Nöö hën Masa Jesosi dë teefa wan saba, hën a go a wan keiki go ta lei sëmbë.

¹¹ Nöo wan mujëe sai naandë bi dë ku wan siki teni-a-aiti jaa longi kaa. Wan gadu wë bi du ku ën sô te sinkii fëen bendi doba fika sô, an sa hopo luku liba.

¹² Nöo di Masa Jesosi si di mujëe hën a kai ën ko nëen. Hën a taki dëen taa: “Mujëe o, i ko bunu e. I böö u di siki fi.”

¹³ Nöo hën a buta maun a di mujëe liba. Nöo wantewante dë hën di mujëe ko bunu leti kumafa a bi dë. Nöo hën a da Masa Gadu tangi taa: “Ke! Masa o, i bumbuu e. Gaantangi fi. Mi böö.”

¹⁴ Wë nöo di di hedima u di keiki si sô, nöo hën a mati. Hati fëen boonu te na soni, fu di kula Masa Jesosi kula di mujëe a di saba. Hën a hakisi dee oto sëmbë dë taa: “Na sikisi daka u abi fuu wooko nö? Wë a dee sikisi daka dë dendu un musu ko suku kula, ma na a saba e!”

¹⁵⁻¹⁶ Ma Masa Jesosi piki taa: “Un dee bödjëema aki, hiniwan saba un ta lusu dee kau ku dee buliki fuunu ta tja de go bebe wata. Nöo di mujëe aki wë? Fa a dë wan bakamii fu Abahamu nöo a dë wan apaiti sëmbë u Gadu kaa, ma töku di didibi sitaafu ën teni-a-aiti jaa longi kaa. Wë nöo di tatai di tai ën aki, ee a saba seei an musu lusu nö?”

¹⁷ Nöo di Masa Jesosi fan sô teefa a kaba, nöo hën sen kisi dee felantima fëen te na soni. Ma hii dee oto sëmbë tuu ta wai seei ku hii dee gaan wooko dee a ta du.

Aki Masa Jesosi ta konda soni

u di Njunjun Tii u Masa Gadu.

Mat. 13:31-33; Maik. 4:30-33

¹⁸ Nöo hën Masa Jesosi toona seti lei de baka. A taki da de taa: “Andi mi sa tei taki da unu tee nöo a djeesi di Njunjun Tii u Gadu?”

¹⁹ Wë a dë kuma wan sii de kai mutaadi di wan sëmbë tei paandi nëen goon. Di sii piki tee kuma wojo an sa si ën. Ma te i paandi ën, nöo a ta nasi ta göö tee a ko pau seei. A ta paaja maun tee fou seei ta feni kamian a dee maun fëen ta mbei wosu. Nöo sô di Njunjun Tii u Masa Gadu dë e.”

²⁰ Hën a toona taa: “Andi mi sa tei möön fu mi lei unu fa di Njunjun Tii u Gadu dë?”

²¹ Wë a dë leti kuma wan piki sooda di wan mujëe tei tuwë a wan hia boon, nöo di sooda ta soopu hii di boon te dou. Sô di Njunjun Tii u Masa Gadu dë e.”

Aki Masa Jesosi taa i musu biinga fi pasa a di piki döö.

Mat. 7:13-14, 21-23

²² Nöo a baka u di dë, hën Masa Jesosi toona tei pasi nango a Jelusalen. Nöo fa a nango dë nöo a ta pasa a sëmëni köndë, nöo a ta lei sëmbë a dee pepei köndë nango.

²³ Nöo hën wan sëmbë ko nëen ko hakisi ën taa: “Masa o, biti së u sëmbë nöo o dou a Gadu Köndë nö?”

Hën Masa Jesosi piki ën taa:

²⁴ “Un sabi nö? Na suku di soni dë e. Ma biinga be i dë wan u dee sëmbë di sa pasa a di piki döö go a dendu. Biga mi taki e, taa a a’ wan juu ta ko dë, nöo sëmëni fuunu o kë biinga fu de pasa go a di piki döö ma wan o sa feni ën.

²⁵ Woon sai dë te di sëmbë di abi di köndë o hopo tapa di döö. Nöo woon go taanpu a di döö buka ta naki di döö ta begi di sëmbë taa: ‘Masa o, gaantangi jabi di döö da u.’ Ma a o piki unu taa: ‘Un disa mi. Ma sabi unu. Unsë un kumutu?’

²⁶ “Nöo di juu dë woon piki taa: ‘Wë nönö, Masa, i sabi u. U ku i bi ta njan ta bebe makandi. A u köndë seei i bi ta lei u hiniwan juu.’

²⁷ “Ma nöö a o piki unu taa: ‘Mi taki e, ma sabi unu e. Ma sabi naasë un kumutu. Un kumutu a mi fesi dë, un takusëmbëma.’

²⁸ “Nöö naandë woon fika ta si dee fesiten sëmbë fuunu te a Gadu Köndë ala, de Abahamu, Isaki, ku Jakopu, ku hii dee tjabukama u Masa Gadu. Woon ta si de ma wan o sa dou a de. Nöö naandë woon dë ta du soni ta kai olo te un wei.

²⁹ Nöö sëmbë o kumutu a hii së u di goonliba go a Gadu köndë ala, nöö de tuu o go sindo a tafa ala, ma wan o sa dou a de.

³⁰ Nöö hën mbei mi ta taki da unu limbolimbo taa dee sëmbë dee bi dë fesiwan aki sa ko bakawan ala. Dee bi dë bakawan aki sa bia ko dë fesiwan ala. Da sö.”

Aki u ta si fa Masa Jesosi

lobi Jelusalen.

Mat. 23:37-39

³¹ A di wan seei daka naandë, hën wanlö Faliseima ko a Masa Jesosi ko taki dëen taa: “Mësitë, a bëtë i kumutu aki go e, biga Könu Helodi ta suku i faa kii.”

³²⁻³³ Ma nöö Masa Jesosi piki de taa: “Un go taki da di bödjëema naandë taa mi dë aki ta jaka dee didibi ta puu a sëmbë liba, mi ta kula dee sikima ko bunu. Nöö mi o wooko di wooko u mi wantu daka eti. Ma fu go, mi musu fu go a Jelusalen nöömö. Biga de an ta kii wan tjabukama u Masa Gadu a wan oto kamian möön leki a Jelusalen.”

³⁴ Hën a bia ta fan soni u Jelusalen. A taa: “Aai baa, di köndë de kai Jelusalen, dee sëmbë fëen nöö ta kii dee tjabukama u Masa Gadu sö. Dee sëmbë a ta manda da de tuu de ta naki ku sitonu ta kii. Nöö a tjali möönsö, un dee sëmbë a Jelusalen dë. Biga fa un sai dë, un sabi un mëni pasi mi kai unu fuun ko a mi nö, leti kumafa wan ganian mama ta kai dee mü fëen fu de ko tjubi nëen hanza basu. Ma wan bi kë.

³⁵ “Hën mbei fa u dë aki, nöö di köndë fika da unu awaa. Biga mi, ma o dë ku unu möön. Mi o go. Ma te wan ten dë, woon toona si mi möön. Nöö woon kisi mi ku wai awaa, ta bai taa: ‘Gaantangi u Gadu fu di sëmbë di ko a u a di në u Masa.’”

14

Aki Masa Jesosi kula wan sikima a saba daka.

¹ A wan saba daka hën wan u dee fesima u dee Faliseima kai Masa Jesosi faa ko njan nëen wosu. Nöö di a ko, nöö wanlö Faliseima ku wanlö Sabima u Wëti, dë leti dë ta watji ën u de feni wan soni nëen di an bunu, u de tjëen go kaagi.

² Nöö wan womi sai dë tu ku wan siki fëen. Di sëmbë bi siki taanga te hii sinkii fëen soi.

³ Nöö hën Masa Jesosi hakisi dee Faliseima ku dee Sabima u Wëti dee sai dë taa: “Wë dee sëmbë aki o, mi kë hakisi unu wan soni. Te saba daka, a bunu fii kula wan sëmbë ko bunu, naa i musu disëen? Unfa di wëti u Mosesi taki?”

⁴ Ma nöö na wan sëmbë piki ën. De an taki aai, de an taki nöönö. Nöö hën Masa Jesosi tëndë maun panjan di womi. Nöö hën a kulëen te a kaba, hën a mandëen go.

⁵ Nöö hën a toona hakisi de möön taa: “Ee wan sëmbë i abi wan womi mii fii ee nasö wan kau, nöö hën a kai a tobo wata, nöö fu di a dë saba daka nöö joo disëen faa dëdë nö, naa joo go puu ën?”

⁶ Ma nöö de an piki ën na wan wojo soni möönsö.

Aki Masa Jesosi taa na wan sɛmbɛ musu suku hei fɛɛn seei.

⁷ Nöo fa de de sindosindo a tafa naandɛ, nöo hɛn Masa Jesosi luku dee sɛmbɛ dee ko a di piizii dɛ te a kaba lontu dou. Nöo hɛn a si taa sɛmbɛ sai dɛ kɛ sindo a dee möön hebi kamian fu di tafa, biga de ta suku hei u deseei tumisi. Nöo hɛn a konda wan oto da de.

⁸ A taki da de taa: “Te wan sɛmbɛ kai i fii ko a wan piizii nɛɛn wosu, nöo te i go, nöo ja musu suku u go sindo a di möön hei kamian wante e. Ma i musu sindo te a wan sɛ buka ala. Biga kandɛ sɔ, di sɛmbɛ di kai i ko dɛ, bi kai wan oto sɛmbɛ tu di hei möön i.

⁹ Nöo a o ko taki da i taa: ‘Wɛ mati o, saka ko sindo a baka aki, be di otowan sindo a i kamian.’ Nöo di juu naandɛ, ku gaan sen joo hopo go sindo a di möön lagi kamian.

¹⁰ “Ma ee wan sɛmbɛ kai i fii ko a wan piizii nɛɛn wosu, nöo te i go, nöo go sindo a di möön lagi kamian e. Nöo te di juu a ko, nöo ee a si taa wɛ di kamian i sindo ala an fiti i, nöo a o kai i taa: ‘Mati o, na sindo ala baa. Ko sindo aki.’ Nöo a o tei i tja go buta a wan möön hei kamian. Nöo fa joo hopo ka i bi sindo dɛ fii waka go sindo a di möön hei kamian, nöo dee oto sɛmbɛ o si taa aai, i dɛ wan hei sɛmbɛ tuu.

¹¹ “Biga di sɛmbɛ di ta hopo ɛn seei, nöo hɛn de o saka. Ma di sɛmbɛ di ta sakɛɛn seei, nöo hɛn de o hopo.”

Aki Masa Jesosi taki da di

Faliseima ambɛ faa musu ta

kai a piizii.

¹² Nöo hɛn Masa Jesosi taki da di sɛmbɛ di kai ɛn a di piizii naandɛ taa: “Mati o, te joo kai sɛmbɛ möön fu de ko njan ku i, nöo na kai dee bɛɛ fii e, ku dee bunu mati fii, ee nasɔ dee gudu sɛmbɛ dee ta libi a i bandja dee sa du i bunu baka. Wɛ biga ee i kai dee sɛmbɛ dɛ wanwan, nöo te de o njan nöo de o toona kai i tu. Nöo te de kai i, i go njan te i hopo, nöo hɛn di njanjan i njan dɛ, hɛn nöo da di paima i feni fu di i bi kai de ko njan ku i. Nöo a kaba.

¹³ “Ma te joo kai sɛmbɛ u de ko a i wosu ko njan, nöo i musu suku dee pootima e. Ee wan sɛmbɛ aan möni, ee wan sɛmbɛ wojo booko, ee wan sɛmbɛ lan, nöo de di musu ta kai be de ko njan a i wosu.

¹⁴ Nöo joo feni bunu fɛɛn. Biga dee lö sɛmbɛ dɛ, de an sa toona paka i baka. Ma wan daka ta ko Masa Gadu o weki dee sɛmbɛ a dɛdɛ dee bi libi bunu nɛɛn wojo, nöo a di daka dɛ joo feni di paima fii e.”

Aki Masa Jesosi ta konda di oto u di gaan piizii.

Mat. 22:1-10

¹⁵ Nöo hɛn di Masa Jesosi fan sɔ te a kaba, nöo hɛn wan u dee sɛmbɛ ku ɛn dɛ sindosindo a tafa dɛ taki dɛɛn taa: “Wɛ di sɛmbɛ di o feni kamian go sindo a di tafa u Masa Gadu nɛɛn köndɛ ala, nöo a a’ bunuhedi e!”

¹⁶ Nöo hɛn Masa Jesosi piki ɛn, a konda wan oto dɛɛn taa: “Wan womi bi dɛ, nöo hɛn a kai hia sɛmbɛ u de ko nɛɛn. Nöo hɛn a seeka soni u njan te a hia u de musu ko njan ku ɛn.

¹⁷ “Nöo di di juu kisi, nöo hɛn a manda wan wookoma fɛɛn u go taki da dee sɛmbɛ taa di juu dou, be de ko. Biga hii soni dɛ seekaseeka kaa.

¹⁸ “Ma nöo di di wookoma go kai de, hɛn de tuu ta pii soni ta konda. Wan u de taa: ‘Wɛ fa mi dɛ aki, nöo ma sa ko e. Biga mi bai wan goon, nöo mi musu go luku ɛn. Nöo taki da i masa taa an musu tei mi u hogi.’

19 “Di otowan taki taa: ‘Wë mi bai teni kau, nöö mi musu go wooko ku de luku. Nöö hën mbei ma o feni pasi u ko. Nöö taki da i masa taa be an tei mi u hogi.’

20 “Di otowan taki möön taa: ‘Wë djunsu aki mi tei wan mujëë, nöö ma o sa ko.’

21 “Hën di wookoma toona ko dëen masa dee bosikopu. Nöö hën di masa hati boonu seei, hën a taki dëen taa: ‘Wë nöö toona go hesihesi e, nöö i waka a dee gaangaan sitaati ku dee pikipiki sitaati dee dë a di köndë aki tuu, nöö i suku dee lanlan sëmbë ku dee sëmbë dee an sa wooko, ku dee bookowojo sëmbë ku dee pena sëmbë, nöö i tja de tuu ko.’

22 “Hën di wookoma go tefa a ko, hën a taa: ‘Wë Masa, wë mi feni dee sëmbë nöö de ko kaa, ma misikuma kamian dë eti.’

23 “Hën a taa: ‘Wë nöö toona go a dee pandasi kamian ku dee boiti ku dee sabana dendu, nöö te i feni sëmbë nöö i panjan de a maun hai tja ko. Biga di wosu u mi musu fuu.

24 Ma nöö mi taki da unu taa dee fosu sëmbë dee mi bi kai dë, nöö na wan u de sa feni di njanjan u mi aki njan möön e.’”

*Aki Masa Jesosi ta lei dee sëmbë andi de musu du ufö de sa dë bakama fëën.
Mat. 5:13, 10:37-38; Maik. 9:50*

25-26 Nöö fa Masa Jesosi ta waka nango dë, nöö wanlö hia sëmbë ta waka ku ën nango. Tee wan pisi, hën a bia luku de. Hën a taki da de taa: “Ee wan sëmbë ja sa kai mi gaan soni möön i mama ku i tata ku i mujëë ku dee mii fii ku dee baaa fii ku dee sisa fii ku hii dee libi dee i abi tuu, nöö ja sa dë wan bakama u mi e. Biga i musu sa tja sitaafu u mi hedi. Ee i dëdë seei fu mi hedi, ja musu a’ toobi.

27 Biga ee wan sëmbë i kë waka a mi baka, nöö ja musu abi kë fii seei e. Ma di soni di mi kë, hën nöö i musu du, nöö joo dë wan bakama u mi tuutuu.

28 “Wë nöö un musu pakisei di soni bunu e. Biga ee wan fuunu kë mbei wan wosu nöö unfa joo du? Ja o go sindo pakisei te i kaba luku ee di möni fii tjika u du di wooko bifö i go seti mbei ën ö?

29 “Wë biga ee i go seti ën nöö hën di möni fii kaba, nöö te wan sëmbë ko dë ko si ën nöö a o taa:

30 ‘Di womi aki, luku wan gaan wosu a seti mbei disa aki. Na mbei wë an kë mbei ën e, ma di möni fëën wë kaba.’ Nöö di juu dë nöö de o ta mbei i fa.

31 “Nöö söseei ee wan könu abi teni dusu sodati nöö hën a pakisei taa a o go feti ku wan oto könu di abi tuwenti dusu sodati, nöö bifö a go a musu pakisei bunu ee a sa feti ku ën.

32 “Ma ee a luku te a kaba nöö a si taa: ‘Wë di könu di abi tuwenti dusu sodati dë, ma sa wini ën,’ nöö an musu luku te di könu ko zuntu poi e. Ma a musu manda sëmbë a fesi go begi ën te a kaba, be di taki koti bifö de ko miti.

33 “Wë nöö söseei hiniwan fuunu musu sindo pakisei ee i sa disa dee soni dee i abi, nöö ee ja sa disa de fii ko ta waka a mi baka nöö ja sa dë bakama u mi e.

34 “Wë biga un luku, dee sëmbë. Satu dë wan suti soni u njan tuu, ma ee di satu kaba a sösö te an sa kisi gansë möön, nöö andi i sa du ku ën möön?

35 A kapëë nöö i sa tei ën tuwë, biga aan heepi a goonliba möön. [Nöö söseei joo dë tu e, ee ja waka ku hii i hati a mi baka.]

“Nöö fa mi fan ku unu aki, nöö un pakisei ën bunu e, dee sëmbë, be un fusutëën.”

15

*Aki Masa Jesosi ta konda soni**u wan lasi sikapu.**Mat. 18:12-14*

¹ Wan daka hèn dee sëmbë ta pii lanti möni ku dee oto takulibima u di köndë, hèn de go a Masa Jesosi faa musu konda Gadu oto da de.

² Nöö hèn dee Faliseima ku dee Sabima u Wëti ko si Masa Jesosi ku dee sëmbë naandë makandi. Nöö hèn de taa: “Ee! Aai baa. Di sëmbë aki, a ta butëen seei kuma bumbuu sëmbë, ma a ta hulu dee gaan takulibima u di köndë. So juu hèn ku de ta njan makandi seei. A bunu nö?”

³ Nöö Masa Jesosi sabi taa sö de ta guunjëen, nöo hèn a da de wan oto. A taa:

⁴ “Un haika e, dee sëmbë. Ee wan fuunu abi wan höndö sikafu nöo wan u de kumutu a dee otowan dendu go lasi, nöo unfa joo du? Ja o seeka dee nëniteni-ku-nëni naandë disa a sabana dë, nöo i go suku di lasi wan te i feni ën nö?”

⁵⁻⁶ Nöö te i feni ën kaa, nöo joo wai seei hopo ën buta a gangaa baaku tja ko a ganda. Nöö te i ko dou ku ën kaa, nöo joo kai dee mati fii ku dee sëmbë dë a i bandja naandë taa: ‘Un ko mbei piizii ku mi e, dee sëmbë. Biga di mbeti u mi bi lasi, nöo mi feni ën baka.’

⁷ “Wë nöo fa i si hii sëmbë ta wai naandë, nöo söseei a dë a Gadu Köndë tu te wan takulibima biëen libi ko ta waka a Masa Gadu baka. De ta piizii ku ën möön leki dee oto nëniteni-ku-nëni sëmbë dee bi dë seekaseeka dë kaa.”

Aki Masa Jesosi ta konda di oto u di kpëngëlë möni di bi lasi.

⁸ Nöö hèn a toona taki da de möön taa: “Nöö söseei tu, ee wan mujëe abi teni kpëngëlë möni nöo hèn wan u de lasi, nöo an o sëndë faja nöo a ta bai di wosu köniköni ta suku ën teefa a feni ën baka nö?”

⁹ Nöö te a feni ën kaa, nöo a o kai dee mati fëen ku dee sëmbë dë nëen bandja tuu ko. Nöö a o taki da de taa: ‘Dee sëmbë o, mi bi abi teni kpëngëlë möni nöo wan u de bi lasi, hèn mi ta suku ën tefa u dë aki hèn mi feni ën. Nöö un ko wai mbei piizii ku mi makandi.’

¹⁰ “Wë nöo fa i si dee sëmbë ta wai u di wan kodo kpëngëlë möni bi lasi de feni dë, nöo söseei dee basia u Masa Gadu ta wai tu e, ee wan kodo takulibima seei biëen libi ko ta waka a Masa Gadu baka.”

Aki Masa Jesosi ta konda di oto u di mii di bi lasi.

¹¹ Nöö hèn a toona taki da de möön taa: “Wan tata bi dë e, nöo a bi abi tu womi mii fëen.

¹² Nöö hèn wan daka hèn di piki wan ko nëen. Hèn a taki dëen taa: ‘Taata o, mi kë fi paati dee gudu fii, nöo i da mi di u mi sê di mi bi o feni wante.’ Nöö hèn di tata paati di gudu fëen da dee womi mii fëen te a kaba.

¹³ “Nöö an longi möön, hèn di piki wan sei dee gudu fëen. Hèn a tei di möni. Hèn a go a wan longi köndë, nöo naandë a poi di möni fëen tuu ku jajo libi.

¹⁴ Nöö hèn a sai dë te wan pisi, hèn wan gaan hangi ko a di köndë. Nöö hèn pena ko ta kii ën a hii fasi, biga di möni fëen bi kaba gaanduwe kaa.

¹⁵ “Nöö hèn a go a wan sëmbë u di köndë go suku wooko. Nöö hèn di sëmbë dëen wan wooko, a mandëen faa musu go ta luku dee hagu fëen dëen.

¹⁶ Nöö hangi ko ta kii di womi mii tee dee hagu njanjan seei a bi kë feni njan fu bëe fëen fuu, ma na di dë seei de dëen. Na wan sëmbë dëen soni u njan a di köndë möönsö.

17 “Nöö hën a sai dë tee wan pisi, nöö hën wojo fëen ko limbo. Hën a taa: ‘Luku fa mi dë aki. Sömëni wookoma mi tata abi ta da njanjan, de ta njan te tjika de, nöö hën mi ko dë aki ta pena da hangi ta kii.

18 Nöö mi sabi andi mi o du. Mi o toona go a mi tata, nöö mi o go taki dëen taa: “Taata, wë mi du hogi ku i tee dou ku Masa Gadu tuu.

19 Nöö ma waiti möön seei fii musu tei mi kuma mii fii e, ma tei mi kuma wan wookoma fii nöö.”

20 “Nöö hën a hopo ta waka nango nëen tata.

“Nöö di tata bi dë a wosu naandë. Te wan pisi, hën a tuwë wojo go te ala, hën a si wan sëmbe ta ko. Hën a si taa di womi mii fëen hën ta ko naandë. Nöö hën tjali fëen kisi ën tee. Hën a hopo vu kule go kisi ën baasa, a bosu ën wai ku ën te a bigi.

21 “Nöö hën di womi mii taa: ‘Taata o, wë ma waiti tjika möön fii tei mi kuma mii fii e, biga mi du i hogi tee dou ku Masa Gadu seei tu.’

22 “Ma di tata an haika di mii seei. A taki da dee wookoma fëen taa: ‘Un hesi go tei di möön waiti wojo koosu tja ko bisi dëen. Nöö un go tei andelu tja ko tuusi nëen finga, nöö un tja saapatu ko dëen be a bisi.

23 Nöö un go kii di fatu kau tja ko, boo boi njan mbei piizii.

24 Biga di womi mii u mi aki bi go kaba a sösö, ma a toona ko a u baka.’ Hën de seti mbei di piizii.

25 “Nöö a di ten dë seei, di gaan baaa fëen bi dë a goon dendu. Nöö hën di a kumutu a goon ta ko, hën a jei de ta wai ta pëe ta mbei piizii te a bigi.

26 Nöö hën a kai wan u dee wookoma fëen tata ko, hën a hakisi ën taa: ‘Andi ta pasa bigi di bigi aki sö?’

27 “Hën a piki ën taa: ‘Wë di piki baaa fii di bi go, hën wë toona ko a wosu. Nöö hën i tata kii di fatu kau ta wai ku ën fu di a toona ko ku libi a wosu baka.’

28 “Nöö di di gaan baaa jei sö, hën hati fëen boonu tee a taa an o go a wosu. “Nöö hën di tata ko jei, hën a go nëen a döo go begi ën taa: ‘Womi, gaantangi, ko boo go a wosu.’

29 “Hën a taa: ‘Wë nönö Taata, më o ko a wosu. Wë biga sëmëni jaa longi mi ku i dë aki, mi ta du hii soni da i dee i ta manda mi fu mi musu du. Na wan daka seei mi pasa i buka. Mi ta wooko da i kuma mi da wan sitaafuma fii, ma na wan daka i da mi wan u dee kaabita seei fu mi mbei piizii ku dee mati u mi.

30 Ma di womi mii fii aki di go poi dee gudu fii ku di jajo libi fëen, tefa a toona ko aki nöö hën i ta mbei sō wan gaan piizii te i kii di fatu kau dëen. Nöö ma sa ko a wosu. A hati mi poi.’

31 “Hën di tata taa: ‘Wë mii o, wë fa mi ku i ta libi makandi aki, nöö hii dee soni dee mi abi aki tuu dë fii, na sō nö?’

32 Ma di baaa fii di bi go sëmëni longi te u mën taa a dëdë kaba a sösö, hën wë toona ko a u ku libi baka. Nöö an fiti fuu wai mbei piizii ku ën nö?’ ”

16

Aki Masa Jesosi ta konda taa i musu seeka da di bakaten libi fii.

1 Nöö hën Masa Jesosi toona taki wan oto woto möön da dee bakama fëen. A taa: “Wan guduma bi dë, nöö a a’ hia wookoma. Hën a tei wan sëmbe buta basi a dee wookoma fëen liba faa ta seeka di wooko ta luku hii dee gudu fëen dëen.”

“Nöö hën a dë tee wan daka, nöö hën wan sëmbe ko nëen ko taki dëen taa: ‘Mati o, haika e. Di basi i buta a dee wookoma fii liba dë, an ta wooko bunu e. A ta njan di möni fii.’

“Hën di guduma taa: ‘Sö nö?’ Hën a taki aai. Hën a taa: ‘Wë antoobi.’

2 “Nöö hën a manda kai di basi ko nëën. Hën a taki dëën taa: ‘Womi, mi jei wan soni. Wë nöö hën mi kai i ko hakisi fii musu konda da mi. De taki da mi taa i ta njan di möni u mi tuu. Wë nöö i musu taki da mi unfu i wooko ku di möni, biga abiti möön mi o puu i. Ja o dë basi fu di wooko u mi möön.’

3 “Nöö hën di basi taki nëën hati taa: ‘Ee maingë, di soni aki, a bigi da mi. Wë nöö ee di masa u mi ko puu mi a wooko, nöö andi seei mi o du? Biga ma sa wooko a goon dendu te tja heepi ko da mi fu mi feni soni njan. Nöö fu mi ta waka ta pidi njanjan a sëmbë wosu, mi a’ sen fëën. Ma sa du ën.’

4 “Hën a sai dë te wan pisi, hën a taa: ‘Söö. Wë mi saandi mi o du u te de puu mi a di wooko, nöö oto sëmbë sa hoi mi a de wosu. Nöö pena an o kii mi.’

5 “Hën di a pakisei sö kaa, nöö hën a kai hii dee sëmbë dee bi juu soni nëën masa söndö paka. Nöö hën di de ko nëën, hën a taki da di fosuwan taa: ‘Womi o.’ A piki. A taa: ‘Un mëni i bi abi fii paka di masa u mi?’

6 “Hën a piki ën taa: ‘Wë basi, mi abi wan höndö bali fatu dee mi bi tei fu mi musu paka.’

“Hën a taki aai. Hën a tei di pampia a bi sikifi dee soni a bi juu, hën a tënëën tuwë. Hën a dëën wan oto pampia taa: ‘Luku wan oto pampia aki. Go sindo, nöö i toona sikifi ën. Ma te joo sikifi, na sikifi wan höndö möön e. Sikifi feifiteni bali nöö.’ Hën a tei, hën a go sindo hën a sikifi.

7 “Hën a kai wan otowan, di u mbei tu. Hën a taa: ‘Womi o, fa u ta wooko aki, nöö dee soni mi bi juu i, un mëni i abi fii musu paka?’

“Hën a piki ën taa: ‘Wë basi, mi abi wan dusu saku boon fu mi musu paka.’

“Hën a tei di biifi hën a tënëën. Hën a taki dëën taa: ‘Go sindo, nöö i sikifi otowan. Ma te joo sikifi, nöö i sikifi aiti höndö nöö. Na sikifi wan dusu möön.’
 Nöö sö a saka di möni da de tuu.]

8 “Nöö hën di di guduma si fa di basi du dë, hën a taa: ‘Aai, di sëmbë aki,]hii fa a hogi, ma a sabi u du soni e. A kōni tuu.]A sabi fa u heepi ën seei fu te di fuka ko nëën a bakaten, nöö a sa libi.]’”

Nöö hën Masa Jesosi toona taa: “Luku fa di guduma gafa di sëmbë. Nöö mi taki e, dee sëmbë u di goonliba aki dee an ta waka a Masa Gadu baka, de ta libi a wan fasi u tja wini ko da de a bakaten möön leki dee sëmbë dee ta waka a Gadu baka e.”

9 Nöö hën a toona taki da de taa: “]Un si fa di basi du aki nö? A seeka di soni faa musu toona heepi ën seei a bakaten.] Nöö sö unu seei musu du tu e, dee sëmbë. Dee möni un si un ta wooko a goonliba aki, nöö un musu ta wooko ku de a wan fasi fu te di daka un kumutu a di goonliba aki, nöö de o kisi unu ku piizii seei te un dou a Gadu köndë ala ka woon dë fu teego.

10 “Nöö a dë sö taa ee wan sëmbë ja sa seeka wan piki soni te a ko bumbuu soni, nöö söseei ja o sa seeka gaan soni tu. Nöö ee i ta fufuu piki soni, nöö söseei joo ta fufuu gaan soni tu.

11 “Nöö ee wan sëmbë ja ta seeka di gudu i ta feni a goonliba aki a wan bumbuu fasi, ja ta njan mën kumafa a fiti, wë nöö unfu Masa Gadu o sa futoou i faa da i gaan gudu nëën köndë fii seeka?

12 Nöö ee wan sëmbë ja ta seeka oto sëmbë soni te de butëën a i maun, nöö unfu de o da i soni fii seei, fii seeka?

13 “Nöö na wan sëmbë sa dini tu masa makandi e, dee sëmbë. Biga joo lobi wan möön wan. Ee i hëngi a wan, nöö ja o sa hëngi a di otowan möön. Wë nöö i sa dë a Gadu baka, ee nasö i sa dë a gudu baka, ma nöö ja sa dë a de tuu baka makandi e.”

14 Nöo di Masa Jesosi taki dee oto aki teefa a kaba, nöo hën dee Faliseima jei, nöo hën de an kë sö. Biga deseei a' langabëë u möni tumusi. Nöo hën de bia ta sösö Masa Jesosi ta mbei ën fa.

15 Hën Masa Jesosi taki da de taa: "Wë unu wë mi ta taki tuu e. Biga a sëmbë wojo un ta mbei taa un dë bumbuu sëmbë, ma Masa Gadu hën sabi unu hati e. Nöo di soni libisëmbë ta si u gaan bumbuu soni, nöo a Masa Gadu wojo an dë wan wojo soni."

Aki Masa Jesosi ta konda soni u

di awoo tii ku di Njunjun Tii

u Masa Gadu.

16 Nöo hën a taki da dee Faliseima möön taa: "Un haika e, dee sëmbë. Fu sensi di ten u Mosesi te kisi di ten u Johanisi di Dopuma, nöo dee wëti Mosesi ku dee tjabukama bi kisi a Gadu bi ta konda da libisëmbë fa u de waka a Gadu baka. Ma nöo fa u dë aki, wan njunjun buka ko taa Masa Gadu hopo wan Njunjun Tii. Nöo hia sëmbë ta biinga a di Njunjun Tii dë baka kaa.

17 Ma tökuseei an dë taa dee awoo wëti an bunu e. Mundu ku goonliba sa kaba, ma na wan piki wan u dee wëti seei o kaba a sösö möönsö."

Aki Masa Jesosi ta lei fa

manu ku mujëe an musu tuwë.

Mat. 5:31-32; Maik. 9:42

18 Hën a toona taki möön taa: "Ee wan sëmbë i go tei wan mujëe te nöo hën i tuwëen disa nöo i toona go tei wan otowan, nöo di wëti u Masa Gadu hën i booko dë kaa e. Nöo söseei tu, ee wan sëmbë i go tei wan tuwë mujëe fu wan oto womi, nöo i seei booko di wëti u Gadu tu."

Aki Masa Jesosi ta konda di oto u di guduma ku Lazalosi.

19 Nöo hën a toona taki da de möön taa: "Wë un haika e, dee sëmbë. Wan guduma bi dë a wan köndë. Nöo a gudu tee na sipootu. Hiniwan juu a ta libi fëen kumafa a kë ta bai dee gaan dii koosu ta bisu ta mbei gaan piizii.

20 "Ma nöo wan sëmbë bi dë a di köndë naandë tu de ta kai Lazalosi. A pena te an saanfa u du ku ën seei. Kasikaasi kisi ën hii ën sinkii. Na hopo seei a ta hopo ta waka. Nöo de ta hopo ën ta tja nango ta buta a di guduma dööbuka

21 fu te di guduma njanun nöo a kandë a sa feni so u dee sakasaka u dee njanjan fëen dee ta kumatu nëen tafa ta kai a goon. Nöo dee dagu u sitaati ta ko ta lëmbë dee kasikaasi fëen nëen sinkii.

22 "Nöo hën de dë te wan pisi nöo hën di penama dëdë. Hën dee basia u Masa Gadu ko tei ën tja go nëen gaan sëmbë Abahamu bandja. Nöo a sai dë ta wai ta piizii ta libi suti kumafa di libi dë ala."

"Nöo a baka fëen hën di guduma dëdë tu, hën de tjëen go bei.

23 Ma nöo fa a dëdë dë, nöo hën a go a didibi faja. Hën a go sai dë a di faja dendu ta tja sitaafu ta bai ta kai olo.

"Tee wan pisi, nöo hën a hopo wojo luku te ala, a si Lazalosi a Abahamu bandja dë.

24 "Hën a bai kai Abahamu taa: "Taata oo, Taata, gaantangi, tei tjali u mi nöo i manda Lazalosi be a tuusi finga fëen a wata tja ko munjan mi töngö. Biga ka mi dë aki, di faja ta kendi mi tumusi."

25 "Nöo hën Abahamu piki ën taa: "Ke, aai mii, wë mi jei e. Ma mëni taa di ten di i bi dë a goonliba ala, i bi ta libi bunu kumafa i kë. Soni seei an bi ta fuka i. I bi njan di bunu libi fii a goonliba ala tuu bifö i dëdë ko aki. Nöo

Lazalosi, di a bi dë a goonliba ala, nöö hii fuka a bi ta tjai. Wë nöö fa u dë aki i ko ta tja sitaafu, ma Lazalosi hën ko feni böö awaa.

²⁶ “ ‘Ma haika, boiti u di dë, pasi an dë fu dee sëmbë u mi aki aba ko a unu ala e. Sösei pasi an dë a unu ala tu fu un sa aba ko a u aki. Biga wa sa pasa di gaan fundu ngötö a u mindi aki fuu ko miti ku u seei.’

²⁷ “Nöö hën di guduma taa: ‘Aai, wë mi jei. Ma nöö i sabi nö? Mi begi i Taata, gaantangi, manda Lazalosi be a go a mi tata wosu,

²⁸ nöö a o si wanlö baaa u mi naandë. De dë feifi. Nöö gaantangi be a wasiköi de da mi taa de an musu libi kumafa mi bi libi a goonliba ala möön, fu de ko a di sitaafu kamian aki.’

²⁹ “Nöö hën Abahamu piki ën taa: ‘Sö nö, womi?’ Hën a taki aai. Hën a taa: ‘Wë, mi jei. Ma i sabi nö? Dee sëmbë a goonliba ala, de abi dee buku fu Mosesi ku dee u dee tjabukama u Masa Gadu kaa. Nöö be dee baaa fii haika andi dee buku ta taki nöö de waka a de baka.’

³⁰ “Hën di guduma taa: ‘Aai, Taata, sö a dë tuu. Ma di dë wanwan an tjika. Ma ee wan dëdë sëmbë hopo go wasiköi de, nöö de o bia de libi.’

³¹ “Hën Abahamu piki ën taa: ‘Ma haika e, mati. Ee de an sa tei dee sikifi a dee buku naandë, nöö ee wan sëmbë hopo kumutu a dëdë kondë go fan ku de seei, de an o jei möönsö e.’ ”

Sö wan gaan oto Masa Jesosi konda dë e.

17

Aki Masa Jesosi bai dee bakama

fëën u de an ganjan sëmbë

puu a Gadu pasi.

Mat. 18:6-7, 21-22; Maik. 9:42

¹ Hën Masa Jesosi taki da dee bakama fëën taa: “Un musu sabi taa dee soni ta hai sëmbë puu a Gadu pasi an o sa kaba a di goonliba aki möönsö. Ma mi bai helu da dee sëmbë dee o ta tja dee lö soni dë ko a sëmbë.

² Biga ka fii du sö wan soni, nöö a möön bunu de tai wan gaan gindi sitonu a i gangaa, nöö de tja i go tuwë a ze mindi be i dëdë kaba a söso wante, fu ja du di hogi di i bi pakisei dë. Di sitaafu dë hogi, ma an hogi kuma di i bi o feni ee i bi feni pasi puu sëmbë a Gadu pasi.

³ Un musu luku bunu ku di soni naandë fu an musu miti unu e.”

Aki Masa Jesosi ta lei de

fa u de libi ku dee sëmbë

dee ta du de hogi.

Hën a toona taa: “Wë nöö ee i si taa di otowan fii du i hogi, nöö i musu fan ku ën be an du sö ku i möön. Nöö ee i si taa a piki disa di hogi du fëën dë, nöö i musu disëën. Ja musu hoi ën a bëë.

⁴ Ee a du i hogi sëbën toon a wan daka seei nöö hën a ko a i sëbën toon ko begi i fii dëën paadon, nöö i musu disëën. Na hoi ën a bëë möön e.”

Aki Masa Jesosi konda taa

ee di biibi fii piki seei

ma a sa du gaan wooko.

⁵Nöö hën dee bakama taki da Masa Jesosi taa: “Wë Masa o, u ta biibi a Masa Gadu liba, ma di biibi fuu an tjika. Nöö u begi i gaantangi, heepi u be di biibi fuu ko möön taanga.”

⁶Nöö hën Masa Jesosi piki de taa: “Aai. Wë womi, ee i abi wan piki biibi a Gadu liba kuma ahun sii seei, hën i taki da di pau i si aki sō taa: ‘Hön kumutu aki go paandi i seei a ze,’ nöö a o piki i buka e.”

Aki Masa Jesosi ta konda da de kumafa di wooko u de dë.

⁷Nöö hën a taki da de möön taa: “Undi fuunu o abi wan wookoma, nöö te a go a wooko a goon dendu nasō a go luku dee mbeti a sabana tee a ko, nöö i taki dëen taa: ‘Ko sindo njan?’

⁸“Na tuu fii. Ma joo taki dëen taa: ‘Wë luku, di i ko kaa, nöö i seeka hesihesi nöö i go boi njanjan seti tafa da mi be mi njan. Nöö te mi njan te bëë u mi fuu kaa, nöö i seei sa njan tu.’

⁹“Wë nöö unfa un pakisei u di soni naandë? Un pakisei taa di basi u di wookoma musu da di wookoma fëen apaiti tangi fu di a wooko dëen taanga sō nō? Nönō. An dë faa dëen tangi e. Wë biga fa a wooko naandë, sō nöö a bi musu wooko.

¹⁰“Wë nöö unu seei tu e, te un wooko da Masa Gadu kumafa a da i di wooko, nöö an dë fuun suku tangi nëen e. Biga sō nöö di wooko fuunu dë kaa.”

Aki Masa Jesosi kula teni sëmbë dee bi siki tjinasiki.

¹¹Nöö fa Masa Jesosi nango a Jelusalen dë, nöö hën a ta pasa a di pisiwata u Samalia ku Galilea mindi.

¹²Nöö hën a go dou a wan piki köndë. Hën teni sëmbë ko miti ku ën naandë, nöö dee sëmbë dë tuu siki tjina siki. Hën de taanpu te ala,

¹³de bai taanga kai Masa Jesosi taa: “Jesosi, Masa o, ke gaantangi, tei tjalihati fuu nöö i heepi u baa!”

¹⁴Nöö di Masa Jesosi jei di bai, nöö hën a bia luku. Hën a si dee sëmbë. Hën a taki da de taa: “Ee, aai mi. Wë un sabi nō? Un pasa go a dee begima be de si unu fa un dë.”

Nöö di de seti nango, te wan pisi hën de tuu ko bunu djee.

¹⁵Nöö di wan u de si taa a ko bunu, hën an go möön ma a bia toona. Nöö hën a ta bai taanga ta gafa Gadu ta dëen tangi u di bunu a du ën naandë.

¹⁶Nöö hën a kule go kai a Masa Jesosi fesi a goon naandë. Hën a taki dëen taa: “Ke Masa, gaantangi fii e, fu di bunu i du mi aki. A bigi. Nöö mi si ën!” Nöö di sëmbë dë bi dë wan Samalia sëmbë. „An bi dë Isaëli sëmbë seei kuma dee oto nëigi, faa bi musu da Gadu tangi sō.”

¹⁷⁻¹⁸Nöö hën Masa Jesosi hakisi ën taa: “Wë womi o, fa i ko i wanwan aki, na teni sëmbë un bi dë ko bunu nō? Unsë dee otowan fii dë? Na wan u de toona ko fu de ko da Gadu tangi möönsō möön leki di dōösë sëmbë aki nō? Wë a bigi a mi.”

¹⁹Hën a taki dëen taa: “Wë womi o, hopo go fii e. Di biibi di i abi a mi liba, nöö a heepi i kaa.”

Aki Masa Jesosi ta konda soni u di ten di a o toona ko a goonliba.

Mat. 24:23-28, 37-41

²⁰Wan daka, hën wanlō Faliseima ko a Masa Jesosi ko hakisi ën taa: “Mësitë o, na un ten Masa Gadu o ko a goonliba ko tei di Könu Tii fëen, faa taki a hii sëmbë liba?”

Nöö hën Masa Jesosi piki de taa: “Wë un haika e. „Di tii u Gadu an ta ko kumafa un ta mëni ën dë e. Biga, dee könu u di goonliba aki te de o ko u tii

dee köndë, nöö hii sëmbë ta sabi taa de ta ko. „Biga de ta wai ta pëe doon, tutu ta piki.” Ma di ko u di tii u Masa Gadu hën an o dë sô e.

21 “Biga te a o ko, nöö na wan sëmbë o sa taki taa: ‘Luku ën aki.’ Ee nasö: ‘Luku ën ala.’ De an o sa lei sëmbë sô. Biga di Tii fëen ta dë a dee sëmbë dee ta waka nëen baka hati.”

22 Nöö hën a taki da dee bakama fëen taa: “Fa mi o disa unu go aki, nöö wan ten o ko nöö un tuu o hangi u si ee wan u dee daka seei di Mi di ko dë Libisëmbë Mii aki o dë nëen kônubangi ta taki a hii mundu liba. Ma wan o sa si ën eti.

23 Sëmbë o taki da unu taa: ‘Un luku ën aki!’ Ee nasö: ‘Un luku ën ala.’ Ma wan musu go luku e. Wan musu piki möönsö.

24 “Biga te di daka di Mi di ko dë Libisëmbë Mii aki o toona ko, nöö a o dë leti kuma te liba koti faja walau sô, hii sëmbë ta si ën. Biga liba ala o limbo gbegede te kisi ku goon aki tuu. Nöö sôseei di ko u mi o dë tu.

25 Ma bifö mi toona ko aki a sô wan fasi, nöö mi musu tja sitaafu ku pena tee bifö. Biga dee lö sëmbë u di ten u dë aki, de an dë a mi du. Kwetikweti.

26 “Ma di ten di Mi di ko dë Libisëmbë Mii aki o toona ko a goonliba, nöö a o dë leti kumafa di ten u Noa bi dë. Biga leti kumafa soni bi ko miti dee sëmbë a di ten dë, nöö sôseei a o miti dee sëmbë u di ten di mi o ko tu.

27 Biga a Noa ten de bi ta njan ta bebe, dee womi bi ta tei mujëe, dee mujëe bi ta tei manu. De bi ta libi u de kumafa de kë söndö mëni Gadu möönsö, tefa di daka Noa go a di sipi dendu. Hën di tjuba seti kai, gaan wata ta ko te a kii de tuu fia puu dë.

28 “Nöö sôseei tu a bi miti dee sëmbë a di ten u Lotu. Dee sëmbë bi sai dë ta njan ta bebe, de bi ta bai soni ta sei, de bi ta koti goon ta paandi njanjan, de bi ta mbei wosu,

29 tee di daka di Lotu kumutu a Sodom go. Nöö hën di wan seei daka naandë faja kumutu a liba mökisi ku di soni de kai zuwalufu kai ko a goon tjuma dee sëmbë u Sodom kii tuu fiaa puu dë.

30 Wë nöö sôseei a o pasa tu te Mi di ko dë Libisëmbë Mii aki o toona ko a goonliba fu sëmbë musu si mi.”

31 Nöö hën a taki da de möön taa: “A di daka dë nöö ee wan sëmbë dë nëen baiko, nöö an musu tei ten faa go tei soni fëen nëen wosu dendu e. A musu bazia ko a goon wante nöö a kule go tjubi. Nöö sôseei ee wan sëmbë dë nëen goon dendu ta wooko, nöö an musu kule go a ganda go tei soni nëen wosu, ma a musu kule go tjubi nöö.

32 “Nöö fa mi ta fan aki, un mëni di soni di bi pasa ku di mujëe fu Lotu e.

33 Biga di sëmbë di ta biinga faa hoi ën libi kumafa a këen ku dee soni fëen dee a abi a goonliba aki, nöö a o lasi ën nöömö. Ma di sëmbë di aan toobi faa lasi ën, nöö hën o feni ën fa a kë.”

34 Hën a taki möön taa: “A di daka di Mi di ko dë Libisëmbë Mii aki o ko, nöö tu sëmbë sa dë a wan bedi ta duumi, nöö wan u de Gadu o tei tja go nöö di otowan a o disëen.

35 Nöö tu mujëe o dë makandi a wan kamian ta mbei boon, nöö wan u de Gadu o tei tja go, nöö di otowan a o disëen. [

36 Sôseei tu sëmbë sa dë makandi ta wooko a goon dendu, nöö wan u de Gadu o tei tja go, nöö di otowan a o disëen dë.]”

37 Nöö hën dee bakama u Masa Jesosi hakisi ën taa: “Wë, Masa o, na unsë u di goonliba di soni naandë o pasa?” Nöö hën a koti wan nongö da de taa: “Ka wan mbeti dëdë fika, nöö naandë dee opete ta ko.”

18

Aki Masa Jesosi taki fa u musu ta begi nöömö söndö wei.

¹ Nöo hèn Masa Jesosi taki wan woto da dee bakama fëen faa lei de kumafa de an musu ko wei u begi Gadu, ma de musu ta begi èn hiniwanten söndö lasi hati.

² A taa: “Wan fisikai bi dè a wan köndè, nöo a bi hogi tee an ta fëèè Gadu, nöo aan toobi ku libisèmbè tu.

³ Nöo wan mujèè bi ta dè a di köndè dè tu, manu fëen bi dèdè. Nöo a bi ta ko a di fisikai nöömö ta ko ta begi èn taa: ‘Fisikai o, mi kè i heepi mi. Mi ku wan sèmbè a’ sondi, nöo mi begi i fii kuutu di soni da u. Da mi di leti u mi nöo i dëen di adjabèè fëen.’

⁴ “Nöo a fesi di fisikai an bi kè heepi di mujèè. Ma a baka fëen a ko pakisei tee a kaba, hèn a taa: ‘Wè aluwasi fa ma ta fëèè Gadu, nöo ma a’ toobi ku libisèmbè tu,

⁵ ma tökuseei di mujèè aki ta ko a mi nöömö, an ta disa mi ku di taki möönsö. Nöo mi o heepi èn be a feni di leti fëen, be mi böö fëen. Biga ee nasö, a o ta ko ta kaakei mi ku di taki fëen dè nöömö.’ ”

⁶ Nöo hèn Masa Jesosi taa: “Un haika fa di fisikai taki dè. A abi hogihati, ma tökuseei, a piki di mujèè buka.

⁷ Wè nöo Masa Gadu di abi sö bunuhati wè? Ee wan sèmbè fëen ta begi èn nöömö a ndeti ku didia, an sa heepi èn nö? Biga a bi pii de puu a oto sèmbè dendu tei ko fëen sèmbè kaa, nöo a o buuja ufö a ko a de nö? Nönö, an o buuja e.

⁸ Mi taki e, a o ko hesihesi a de ko kuutu soni da de.

“Ma nöo fa mi fan dè seei, ma fa de o du ku dee sèmbè u mi a di goonliba aki tjika dè, nöo, te Mi di ko dè Libisèmbè Mii aki toona ko u mi ko heepi de, nöo mi o feni sèmbè möönsö di ta biibi a mi eti nö?”

Aki Masa Jesosi da wan oto

u wan Faliseima

ku wan pii-lanti-mönima.

⁹ Nöo hèn Masa Jesosi da de wan oto u dee sèmbè dee ta wisiwasi otowan ta mbei deseei taa de dè bumbuu sèmbè.

¹⁰ A taa: “Wan daka nöo hèn tu sèmbè hopo, hèn de go a Masa Gaangadu Wosu fu de go begi Gadu. Nöo wan u dee sèmbè bi dè Faliseima nöo di otowan bi dè wan sèmbè di ta pii lanti möni.

¹¹ “Nöo hèn di de go naandè, hèn di Faliseima go taanpu te a wan sè ala, hèn wanwan. Nöo hèn a begi taa: ‘Masa Gadu, gaantangi fii e, fu di ma dè kuma dee takusèmbèma, kuma dee fufuuma, kuma dee sèmbè dee ta tei sèmbè mujèè, kuma di sèmbè ta pii lanti möni aki.

¹² Tu toon hiniwan wiki mi ta disa u njan ta begi i. Hiniwan soni mi abi nöo mi ta paati, nöo mi tjia fii sè ko da i a keiki kumafa di wèti dè. Sö mi ta libi.’ Sö di Faliseima begi.

¹³ “Ma di sèmbè ta pii lanti möni naandè, nöo a sabi taa an ta libi bunu tuu. Nöo sen kisi èn tee an sa hopo wojo luku liba möön. A fika a baka ala ta naki maun nëen hati taa: ‘Ke, Masa Gadu, a’ tjalihati u mi nöo i heepi mi o. Biga mi sabi taa mi dè wan gaan takusèmbèma tuu.’ ”

¹⁴ Nöo hèn Masa Jesosi taa: “Wè mi taki da unu taa fa di sèmbè ta pii lanti möni go a wosu dè, nöo Masa Gadu an hoi dee hogi du fëen nëen bëè möön e, ma a tei èn ko sèmbè fëen. Ma di Faliseima dè, Gadu disèèn a go fëen a wosu

nöö. Biga hiniwan sêmbê di hopo hênseei, nöö Gadu o sakêen. Ma hiniwan sêmbê di saka hênseei, nöö hên Gadu o hopo.”

Aki de tja dee mii ko

a Masa Jesosi.

Mat. 19:13-15; Maik. 10:13-16

¹⁵ A di juu dë seei, nöö hên de ta tja dee piki mii ko a Masa Jesosi faa musu buta maun a de liba „begi da de„. Ma di dee bakama u Masa Jesosi si sô, nöö hên de gandji da de taa: “Wan musu tja dee piki mii dë ko aki e.”

¹⁶ Ma di Masa Jesosi jei fa dee bakama taki, hên a taa: “Nönö. Wan tapa de e! Un be dee mii ko a mi nöö. Biga sêmbê kuma dee mii aki, de ta dë a di Njunjun Tii u Masa Gadu dendu ta feni di bunu fêen.

¹⁷ Nöö mi taki e, ee wan sêmbê i kê ko dë a di Tii u Gadu dendu, nöö i musu abi sakafasi ta futoou Masa Gaangadu kumafa wan mii ta abi sakafasi ta futoou dee gaan sêmbê fêen.”

Aki Masa Jesosi ta konda

soni u gudu da de möön.

Mat. 19:16-30; Maik. 10:17-31

¹⁸ Nöö hên wan hedima u dee Isaëli sêmbê ko a Masa Jesosi. Hên a hakisi ên taa: “Mêsitê o, mi sabi taa i dë wan bumbuu sêmbê, nöö hên mi ko hakisi i andi mi musu du fu mi feni di libi u teego.”

¹⁹ Hên Masa Jesosi piki ên taa: “Womi, fa i ta kai mi bumbuu sêmbê aki, ma i saandi i ta taki dë nô? Bumbuu sêmbê an dë boiti Gadu wanwan nöö.

²⁰ Ma nöö fii feni di libi u teego, nöö ja sabi dee wêti u Masa Gadu eti ô, taa ja musu go a oto mujêe möön leki di mujêe fii u wosu. Ja musu kii sêmbê. Ja musu fufuu sêmbê soni. Ja musu mindi soni da sêmbê. I musu ta lesipeki i tata ku i mama.”

²¹ Hên di hedima piki taa: “Wê, hii dee wêti dë tuu mi ta hoi fu sensi di mi dë piki mii.”

²² Nöö hên Masa Jesosi toona taki dëen taa: “Wê, mi jei. Ma ee fuu taki ên gbelin kumafa a dë, wan soni nöö toobi i eti. Hên da i musu go sei hii dee soni fii dee i abi te i kaba, nöö i paati di môni da dee pena sêmbê. Nöö te i du sô kaa, nöö i ko ta waka a mi baka. Nöö a bakaten nöö joo feni wan möön bunu gudu a Gaangadu Köndê.”

²³ Nöö di di sêmbê jei sô, hên tjali ko kisi ên tee kuma a sa kêe, biga a abi hia gudu tuu.

²⁴ Nöö di Masa Jesosi si fa tjali kisi di womi fu dee gudu fêen hedi, nöö hên a taki taa: “Aai, di soni aki, a taanga e. Fu wan guduma butêen seei a di Tii u Masa Gaangadu basu, a dë wan taanga soni tuu.

²⁵ A dë leti kuma te wan gaan mbeti ta biinga faa pasa a wan aguja baaku. Sô a taanga tjika.”

²⁶ Nöö di de jei sô, hên de hakisi ên taa: “Wê, ee a taanga da wan sêmbê „di Gadu seei heepi sô te a ko gudu„, nöö ambê seei o sa go a Gadu Köndê?”

²⁷ Hên Masa Jesosi piki de taa: “Di soni dë, na wan libisêmbê a’ taanga u du ên, ma Gaangadu hên a sa du hii soni.”

²⁸ Nöö hên Petuisi taki dëen taa: “Wê Masa, luku. U disa hii soni tuu, fuu ko ta waka a i baka.”

²⁹ Nöö hên Masa Jesosi piki ên taa: “Wê sô a dë tuu. Ma haika e. Ee wan sêmbê i kê dë a di Njunjun Tii u Gadu dendu te nöö hên i disa i wosu ee nasô i tata ku i mama ee nasô dee baa fii ee nasô i mujêe ku dee mii fii,

³⁰ Nöö mi taki e, taa hii dee soni naandë tuu joo toona feni baka möön leki fa i bi abi a goonliba aki, nöö a bakaten nöö joo feni di bunu libi u teego tu a Gadu Köndë.”

Aki Masa Jesosi konda soni u di dëdë fëen da de möön.

Mat. 20:17-19; Maik. 10:32-34

³¹ A baka u di dë, hën Masa Jesosi kai de tuwalufu bakama fëen a së. Hën a taki da de taa: “Un haika e. Fa u dë aki, nöö u nango a Jelusalen. Nöö hii dee soni dee tjabukama u Gadu bi sikifi u Mi di ko dë Libisëmbë Mii aki, nöö de tuu o pasa ku mi awaa.

³² Dee feantima u mi o tja mi go a dee döösë sëmbë dee abi taki a di köndë aki, nöö de o ta mbei mi fa ta kosi mi ta tunta a mi.

³³ Nöö de o wipi mi te de kaba ufö de o kii mi awaa. Ma nöö di u mbei dii daka fëen, nöö mi o toona weki hopo baka.”

³⁴ Ma fa Masa Jesosi fan ku dee sëmbë fëen dë, nöö de an fusutëen. A dë wan tjubitjubi soni da de, biga de an saandi a ta taki dë.

Aki Masa Jesosi kula wan bookowojoma.

Mat. 20:29-34; Maik. 10:46-52

³⁵ Nöö hën de nango tefa de ko zuntu ku di köndë de ta kai Jelikou. Nöö wan bookowojoma bi dë sindosindo a bandjapasi naandë ta pidi möni.

³⁶ Nöö di a ta jei dee hia sëmbë ta fan ta ko dë hën a hakisi taa: “Sëmbë hën ta ko hia naandë sö nö? Andi ta pasa?”

³⁷ Hën de taki dëen taa: “Di sëmbë de ta kai Jesosi u Nazalëti, hën wë ta pasa aki e.”

³⁸ Nöö di a jei sö, nöö hën a bai taanga taa: “Jesosi eee, i di bakamii u Dafiti dë, na i da di Heepima nö?, Gaantangi mi begi i, a’ tjali u mi, nöö i heepi mi ooo.”

³⁹ Ma di dee sëmbë dee bi ta waka a Masa Jesosi fesi jei di bai, hën de gandji dëen taa a musu kabuka dë. Ma tökuseei an disa. A bai möön taanga eti taa: “Jesosi eee, di mii u Dafiti dë, saa mi ooo, heepi mi, gaantangi!”

⁴⁰ Nöö di Masa Jesosi seei jei di bai, nöö hën a taanpu pii. Hën a taki da dee sëmbë taa be de go tei di sëmbë naandë tja ko nëen.

Nöö hën de tjeën ko. Hën Masa Jesosi hakisi ën taa:

⁴¹ “Mati o, wë andi i kè u mi du da i?”

Hën di bookowojoma piki ën taa: “Masa, mi kè ta si soni baa.”

⁴² Hën Jesosi taki dëen taa: “Wë antoobi. Be wojo fii ko limbo e. Biga di biibi i ta biibi a Masa Gadu dë heepi i kaa.”

⁴³ Nöö wantewante dë, hën wojo fëen ko limbo gbegedee. Nöö hën a ta waka nango a Masa Jesosi baka ta gafa Gadu u di bunu a du ën dë. Nöö fa hii dee sëmbë dee bi sai dë si andi pasa dë, nöö hën de tuu gafa Gadu seei.

19

Aki Masa Jesosi go

a Zakeosi wosu.

¹ Nöö hën di Masa Jesosi kula di bookowojoma te a kaba, nöö hën a pasa go dou a Jelikou. Nöö a ta latja pasa a di köndë ganda faa go a Jelusalen.

² Nöö wan guduma de kai Zakeosi bi ta dë a di köndë. A dë wan hedima u dee sëmbë ta pii lanti möni.

³⁻⁴ Nöö fa Masa Jesosi ta pasa naandë, nöö Zakeosi bi kè si ën faa sabi ën. Ma an bi sa si ën a dee hia sëmbë dendu, biga a dë wan sati sëmbë. Nöö hën a

kule go a fesi go subi a wan pau go dë a liba ala, fu te Masa Jesosi ta pasa dë nöö a musu u si ën.

⁵ Te wan pisi hën Masa Jesosi ko ta pasa, nöö hën a hopo wojo a liba hën a si Zakeosi. Hën a kai ën: “Mati Zakeosi!” Hën a piki. Hën a taa: “Saka hesi ko a goon. Biga a dë fanöudu fu mi ko a i wosu tide.”

⁶ Nöö hën Zakeosi saka hesihesi ko a goon, nöö ku gaan piizii seei a tei Masa Jesosi tja go nëen wosu.

⁷ Ma nöö di dee oto sëmbë si sô, hën de mati. De tei Masa Jesosi fu hogi seei fu di a de taa a go a wan takusëmbëma wosu.

⁸ Ma nöö hën Zakeosi hopo taanpu₁ a dee sëmbë dendu₁ nöö hën a fan ku Masa Jesosi. A taki dëen taa: “Masa o, wë luku, te kuma tide nöö mi o paati dee gudu u mi leti mindi, nöö mi o da dee pootima u di köndë wan së. Nöö ee mi bi fufuu wan sëmbë, nöö mi o dëen fô toon möön hia möön fa mi bi tei.”

⁹ Hën Masa Jesosi piki taa: “Wë un dee sëmbë u di wosu aki, un a' bunuhedi e. Biga tide Masa Gadu heepi unu. Nöö di sëmbë di a' di wosu aki, a bi dë fanöudu u mi ko nëen, biga hënseei da wan bakamii u Abahamu di gaan sëmbë fuu tu. Wë nöö luku, a bi poi seei te kaba a sösô, ma tide a toona ko a Gadu baka.

¹⁰ Nöö fu dee lö sëmbë aki hedi mbei Mi di ko dë Libisëmbë Mii aki ko a goonliba e. Biga mi ko fu mi suku dee sëmbë dee kaba a sösô u mi tja de ko da Gadu.”

Aki Masa Jesosi konda di oto u di guduma di bi paati möni da dee wookoma fëen.

Mat. 25:14-30

¹¹ Nöö di juu Masa Jesosi ta fan ku dee sëmbë naandë, nöö de bi dë zuntu ku Jelusalen. Nöö dee Dju sëmbë bi ta mëni taa naandë nöömô Masa Gadu o bazia ko a goonliba faa ko tei di Könu Tii fëen a hii sëmbë wojo. Nöö dee sëmbë ta waka ku Masa Jesosi dë, de ta mëni taa wantewante di soni dë o pasa. Nöö fëen mbei Masa Jesosi da de wan oto, fu de musu sabi taa an o pasa kumafa de ta mëni ën dë.

¹² Nöö hën a taki da de taa: “Wan hebima bi o go a wan longi köndë fu de butëen ko könu, bifô a o toona ko ta tii di köndë awaa.

¹³ “Nöö fëen mbei di juu a o go, nöö hën a kai teni u dee wookoma fëen ko nëen. Hën a da hiniwan u de wan dusu kölu. A taki da de taa: ‘Un wooko ku di möni aki fu mi sa feni wini nëen te mi toona ko.’ Nöö di a taki sô kaa, nöö hën a go fëen.

¹⁴ “Ma dee sëmbë u di köndë fëen bi buuse ën te de manda buka go da dee sëmbë u di köndë ka a nango ala taa: ‘Wa kë di sëmbë aki ko könu fuu e.’

¹⁵ Ma tökuseei de butëen ko könu.

“Nöö hën a baka fëen hën a toona ko a di köndë ko seti di könu tii fëen awaa. Nöö di a ko, hën a manda buka kai dee wookoma fëen dee a bi da di möni fu de musu wooko dëen, be de musu piki ën unfa de bi wooko ku di möni.

¹⁶ “Nöö hën di fosuwan ko nëen nöö hën a tja di möni ko dëen. Hën a taa: ‘Masa o, luku, i bi da mi wan dusu kölu. Nöö hën mi ta wooko ku ën tefa i ko aki, mi feni dusu kölu buta nëen liba. Nöö hën mi tjëen ko da i.’

¹⁷ “Nöö hën di masa fëen taa: ‘Aai womi, wë i wooko bunu e. Wë nöö fu di i wooko a sô wan futoou fasi ku di piki soni aki, nöö mi o da i wan gaan wooko awaa. Mi o buta i be i dë hedima u teni köndë.’

¹⁸ “Nöö hën di u mbei tu ko. Nöö hën a taki dëen taa: ‘Masa, luku, i bi da mi wan dusu kölu, nöö hën mi wooko ku ën tee mi wini feifi dusu kölu buta nëen liba. Nöö ja si ën aki, mi tjëen ko da i.’

19 “Nöö hën di masa fëen taki dëen taa: ‘Söö. Wë nöö fu di i wooko sö, nöö hën mbei mi o buta i fii dë hedima u feifi köndë. Nöö hën a taki aai.

20-21 “Nöö hën di u mbei dii ko nëen. Hën a taki dëen taa: ‘Masa, ja ta si di möni fii aki nö. I bi da mi wan dusu kölu. Nöö u di mi sabi taa i dë wan taangalibi sëmbë, langahatima, i ta tei soni ka ja bi buta, i ta koti soni ka ja bi paandi, nöö mi fëëë i. Hën mbei mi tai di möni fii a di hangisa aki fu an musu kaba a sösö, nöö hën mi tja i soni ko da i.’

22-23 “Hën di masa fëen taki dëen taa: ‘Womi, sö i hogi gaanfa wë nö? Wë di i sabi taa mi dë wan taangalibi sëmbë, langahatima di ta tei soni ka ma bi buta, mi ta koti soni ka ma bi paandi, nöö faandi mbei ja bi tei di möni u mi tja go buta a banku, fu te mi toona ko nöö a möön hia. A bi sa göö a di banku. Ma fa i du ku ën aki, nöö andi seei mi wini? Wë antoobi.’

24 “Nöö hën a taki da dee oto sëmbë sai dë taa: ‘Un hesi ko puu di möni aki nëen maun e, nöö un da di sëmbë di abi teni dusu kölu dë, be disi fika ku sösö maun.’

25 Hën de bai: ‘Huun? Wë Masa, di sëmbë ala, hën a feni teni dusu kölu kaa.’

26 A taki: ‘Aai, mi sabi sö. Ma di sëmbë di abi hia, nöö hën o feni möön hia eti. Ma di sëmbë di na abi, nöö nëen maun de o puu di pikiwan di a abi, be a fika ku maun.

27 “ ‘Nöö dee felantima u mi, dee na bi kë u mi dë könu u de, nöö un musu tja de tuu ko kii a mi fesi aki.’ ”

Aki de ta wai ku Masa Jesosi

fa a dë a di buliki liba.

Mat. 21:1-11; Maik. 11:1-11; Joh. 12:12-19

28 Nöö di Masa Jesosi taki di soni dë tefa a kaba, nöö hën hën ku dee bakama fëen tei pasi nango a Jelusalen, nöö Masa Jesosi hën dë a de fesi.

29 Nöö hën de nango tefa de ko zuntu ku de tu köndë de ta kai Betifaigi ku Betania, leti a di gaan kuun de ta kai Oleifi Kuun naandë. Nöö hën Masa Jesosi manda tu u dee bakama fëen fu de waka a fesi.

30 A taki da de taa: “Un nango te un go dou a di köndë a unu fesi ala, nöö woon si wan buliki mii taitai naandë. Sëmbë an sindo nëen liba waka wan daka. Nöö un lusu ën tja ko da mi e.

31 Ma a kandë sö, wan sëmbë o ko hakisi unu taa: ‘Wë faandi mbei un ta lusu di mbeti u du?’ Nöö un musu taki dëen taa: ‘Masa abi ën fanöudu.’ ”

32 Nöö hën de tu bakama go, hën de go si hii soni leti kumafa Masa Jesosi bi taki da de.

33 Hën di de go seti lusu di buliki, hën sëmbë ko hakisi de taa: “Wë, faandi mbei un ta lusu di mbeti u du?”

34 Hën de piki taa: “Masa abi ën fanöudu.”

35 Nöö hën de tei ën tja go da Masa Jesosi. Hën de jabi koosu a di buliki baka mindi, hën de mbei Masa Jesosi sindo nëen liba.

36 Hën de seti u waka go. Nöö hën dee sëmbë ku ën ta waka nango dë ta jabi koosu a di gaan pasi liba fu di buliki musu waka a dee koosu liba. ‘Sö de ta hei Masa Jesosi tjika.’

37 Nöö hën de nango tefa de dou ka de o seti bazia di kuun fu de go a goon, nöö hën dee hia sëmbë ta waka nëen baka naandë tuu seti mbei piizzi. De ta bai taanga ta gafa Gadu fu dee gaan bunu de bi si Masa Jesosi du a goonliba.

38 De taa:

“Gaantangi u Masa Gadu öoo.
A manda di Könu fëen ko da u.
Masa Gadu musu dë ku ën e.

Gadu, gaantangi fii!

I mbei i ku libisëmbë toona ko fii!

Di nè fii musu bai te dou a di möön hei kamian a liba ala!”

³⁹ Ma di dee Faliseima jei fa de ta bigi Masa Jesosi nöö de an kë sö. Hën de taki dëen taa: “Mësitë o, bai dee sëmbë fii be de kabuka dë.”

⁴⁰ Hën a taki da de taa: “Un haika e. Ee dee sëmbë u mi kabuka, nöö dee sitonu a bandjapasi aki seei o bia bai a dee sëmbë dë kamian. „Biga di bai aki musu u bai.”

Aki tjali u Jelusalen kisi

Masa Jesosi.

⁴¹ Nöö hën Masa Jesosi nango te a ko dou ka a sa si Jelusalen, nöö hën a hopo wojo luku di köndë. Nöö hën tjali fëen kisi ën te a bai këë.

⁴² A taa: “Un dee sëmbë u Jelusalen aki, ee a di ten aki un bi sabi di soni di bi sa heepi unu fuun sa feni böö, nöö wan bi o libi sö e. Ma luku, kumafa u dë aki, a poi da unu kaa, ma wan sa si ën biga a tjubi da unu.

⁴³ Nöö wanlö hogi daka ta ko, nöö a dee daka dë dee felantima fuunu o ko lontu di köndë fuunu tapa buta a djegi, nöö woon fika a di köndë ganda naandë. Na wan fuunu o sa pasa ko a döö.

⁴⁴ “Nöö naandë woon dë ta pena ta tja sitaafu fu te de kii unu ku dee miii fuunu tuu. Nöö dee gaan sitonu de tei mbei wosu a unu naandë, na wan u de o fika oto a oto liba möön e. De tuu de o booko tuwë a goon paaja fanjanfanjan. Sö de o booko di köndë fuunu tjika, fu di wan bi kë sabi di juu di Gadu bi ko faa ko heepi unu.”

Aki Masa Jesosi jaka sëmbë puu a di Wosu u Gadu.

Mat. 21:12-17; Maik. 11:15-19; Joh. 2:13-22

⁴⁵ Nöö hën Masa Jesosi go dou a Jelusalen awaa, hën a dendu go a di Gaan Wosu u Masa Gadu. Nöö wanlö sëmbë bi sai naandë ta sei soni a di wosu dendu. Nöö hën Masa Jesosi jaka de tuu puu tuwë a döö.

⁴⁶ Hën a taki da de taa: “A sikifi a Gadu Buku taa: ‘Di wosu u mi aki, a dë wan wosu fuun ta ko ta begi mi.’ Ma un dee bödjëema aki tei ën buta ko fufuuma kamian ta du kumafa un kë.”

⁴⁷ Nöö di juu dë, hën Masa Jesosi ta lei sëmbë a di Wosu u Masa Gadu dendu hiniwan daka. Ma dee Gaan Begima ku dee Sabima u Wëti ku dee oto fesima u di köndë tuu bi ta suku wan fasi fu de musu kii ën.

⁴⁸ Ma de an saafa u du u de sa feni ën kii, biga hii sëmbë lobi u go nëen go jei dee soni a ta taki.

20

Aki dee sëmbë ko hakisi Masa

Jesosi ambë dëen taki faa

du dee soni a ta du.

Mat. 21:23-27; Maik. 11:27-33

¹ Wan daka hën Masa Jesosi bi dë a di Wosu u Masa Gaangadu dendu ta lei sëmbë ta konda di Bunu Buka u Gadu da de. Nöö hën de Gaan Begima ku dee Sabima u Wëti ku dee Gaan Womi u di köndë ko nëen.

² Hën de hakisi ën taa: “Wë dee soni i ta lei sëmbë aki, ku hii dee oto soni i ta du tuu, ambë seei manda i fii ta du de? Köndëen da u.”

³ Nöo hën Masa Jesosi piki de taa: “Söö. Wë antoobi. Ma miseei o hakisi unu wan soni tu. Nöo te un kondëen da mi, nöo mi o piki unu di Sëmbë di manda mi fu mi ta du dee soni aki.”

⁴ Hën a hakisi de taa: “Di dopu Johanisi bi ta dopu sëmbë, naasë a kumutu, a Masa Gadu naa a libisëmbë? Ambë un sabi mandëen? Un kondëen da mi.”

⁵ Nöo hën de kuutu ku deseei tefa de wei, de taa: “Wë ee u piki ën taa Masa Gadu hën mandëen, nöo a kandë a o hakisi u taa: ‘Andi mbei wan bi kë biibi ën?’

⁶ Ma ee u piki ën taa a bi dë u libisëmbë, nöo lanti o kë naki u ku sitonu kii.” Biga hii lanti bi tei Johanisi kuma wan tjabukama u Gadu.

⁷ Fëen mbei de piki ën taa: “Wë wa sa naasë a kumutu.”

⁸ Hën Masa Jesosi taki da de taa: “Wë da miseei tu, ma sa konda da unu ambë manda mi fu mi du dee soni aki.”

Aki Masa Jesosi konda di oto u

di guduma ku di pandasi

kamian fëen.

Mat. 21:33-46; Maik. 12:1-12

⁹ Nöo hën a toona da de wan oto möön. A taa: “Wan sëmbë bi koti wan gaan goon fëen faa mbei pandasi kamian. Nöo hën a paandi wan fuuta de ta kai doloifi nëen tefa a kaba. Nöo fu di a o go a wan oto köndë go tan te a longi, nöo hën a suku wanlô sëmbë tja ko buta a di pandasi kamian u de ta luku ën dëen. Nöo hën wë a go fëen.

¹⁰ “Hën a go dë ala teefa a sabi taa di fuuta u di goon sa lepi. Nöo hën a manda wan u dee wookoma fëen go a dee sëmbë, fu de musu dëen hafu u dee njanjan u di goon faa tja ko dëen.

“Ma di di wookoma go dou a di pandasi kamian, nöo hën dee sëmbë kisi ën. Hën de fon mën tee a fon, hën de mandëen go nëen masa ku sôsô maun.

¹¹ “Hën di masa u di goon toona manda wan oto wookoma go luku möön, nöo sösei de du ku ën tu. De kisi ën fon dëen sen tee a tjika de, hën de mandëen go nëen masa ku sôsô maun tu.

¹² “Nöo hën di masa u di goon toona manda wan otowan u dee wookoma fëen go möön, di u mbei dii. Ma sösei de du ku ën tu. De naki ën koti hii ën sinkii, hën de jakëen puu a di pandasi kamian. Hën a toona go nëen masa ku sôsô maun.

¹³ “Hën di masa u di goon taa: ‘Wë andi seei mi musu du möön? Wë nöo mi o manda di lobi mii u mi aki go. Kandë sô de sa a’ lesipeki fëen fu di a dë mi mii.’

¹⁴ Nöo hën wë a mandëen go.

“Ma di de si di mii u di masa ta waka ta ko, nöo hën de fiti buka makandi taa: ‘Söö. Luku di mii fëen ta waka ta ko dë. Hën wë di tata o disa di goon aki da e. Nöo un boo kii ën wante, nöo woo feni di goon ku dee soni dee dë nëen tuu ko fuu seei.’

¹⁵ “Nöo hën di di mii ko dou, hën de kisi ën. Hën de puu ën a di pandasi kamian ganda, hën de kii ën.”

Nöo hën Masa Jesosi hakisi dee sëmbë taa: “Wë nöo fa de kii ën dë, nöo andi di sëmbë di abi di pandasi kamian o du ku dee sëmbë dee kii di mii fëen dë?”

¹⁶ Na a o ko kii de tuu puu a di pandasi kamian fëen nöo? Nöo a o suku oto sëmbë tja ko buta dë fu de ta luku di kamian fëen dëen.”

Wë nöo di dee Isaëli sëmbë dee sai dë jei a fan sô, nöo de an këen. Hën de taa: “Nönö, di sondi aki an musu pasa sô e!”

¹⁷ Hën Masa Jesosi luku de diin sò te a kaba, hën a taki da de taa: “Wë a o pasa tuu. Biga ja jei fa de sikifi a Gadu Buku nõ? De koti wan nõngõ taa: Di sitonu dee tẽmbẽma bi feni taa an bunu te de tuwë a kapëë, hën wë ko dë dí mama posu ta hoi di wosu.”

¹⁸ Hën a taa: “Ee wan sẽmbë i kai a di sitonu dẽ liba, nõõ a o booko hii i sinkii. Ma ee di sitonu seei hën kai a i liba, nõõ ja o a’ pisi mõõn. Biga a o lala i finufinu.”

Aki de go hakisi Masa Jesosi

soni u lanti mõni.

Mat. 22:15-22; Maik. 12:13-17

¹⁹ Nõõ fa Masa Jesosi da de di oto naandë, nõõ dee Gaan Begima ku dee Sabima u Wëti bi kẽ kisi ãn tja go sòõtõ wantewante, biga de sabi taa de a tjõkõ ku di oto. Ma de fëëë dee hia sẽmbë bi sai naandë.

²⁰ Nõõ hën de sai dë ta watji ãn nõõmõ tefa de feni wanlõ sẽmbë. Hën de taki da de taa: “Wë u kẽ begi unu wan soni fuun heepi u, nõõ u paka unu.”

Hën dee sẽmbë taa: “Sõõ, wë antoobi.”

Hën de taa: “Un go a Jesosi kuma bumbuu sẽmbë. Nõõ un hakisi ãn soni a kõni fasi fuun feni wan tõngõ nãen fuu sa tjëen go kaagi da di gaama.” Nõõ hën dee sẽmbë go.

²¹ Nõõ hën de go a Masa Jesosi, hën de hakisi ãn taa: “Mësitë o, u ko a i aki. U kẽ hakisi i wan soni e, ma na u gaan womi fasi. Biga u sabi taa di fan fi dë bumbuu soni. I ta lei sẽmbë di pasi u Masa Gadu bunu. I ta luku hii sẽmbë di wan fasi nõõ, ta konda fa Gadu kẽ u sẽmbë musu libi sõndõ ganjan.

²² “Nõõ hën wë u ko a i aki ko hakisi i wan soni. Fa u ta paka di Gaan Kõnu lanti mõni aki, nõõ a bunu fuu pakëen nõ, naa an bunu? Unfa a dë a di wëti u Gadu?”

²³ Ma fa de taki dë, nõõ Masa Jesosi sabi kaa taa de kẽ kisi ãn, hën a taa:

²⁴ “Un tja wan kpëngëlë mõni ko i si.”

Hën de tei wan mõni hën de tja ko dëen.

Hën a hakisi de taa: “Wë ambë fesi dë a di mõni? Un nẽ un si dë sikifisikifi nãen?”

Hën de taa: “Wë di u di Gaan Kõnu.”

²⁵ Hën a taa: “Wë, ee a dë u di Gaan Kõnu, nõõ un dëen hën soni e. Nõõ un da Masa Gadu di soni di dë fëen.”

²⁶ Nõõ fa a fan dë, a foondo de tee. Hën de taa: “Aai, di sẽmbë aki, wa a mõiti fuu mbei te nõõ u sa kisi ãn mõõnsõ.” Nõõ hën de disëen.

Aki Masa Jesosi piki dee Saduseima taa sẽmbë ta weki baka a dëdë tuu.

Mat. 22:23-33; Maik. 12:18-27

²⁷ Ma a baka u di dë, hën so u dee sẽmbë u di keiki paatëi de ta kai Sadusei ko a Masa Jesosi. Dee sẽmbë naandë an kẽ biibi mõõnsõ taa dëdë sẽmbë sa weki baka. Hën de hakisi ãn taa:

²⁸ “Wë Mësitë o, Mosesi bi sikifi wan wëti da u taa ee wan womi libi ku wan mujëe nõõ ee di womi dëdë disa di mujëe sõndõ de pai mihi, nõõ wan u dee baaa u di womi musu tei di mujëe hoi, be de pai mihi fu di bõngõ u di baaa di dëdë dë an musu kaba.

²⁹ “Wë wan tata ku wan mama bi abi sëbën womi mihi. Nõõ hën di gaan wan tei wan mujëe. Hën de dë te wan pisi, hën di womi dëdë disa di mujëe sõndõ de pai mihi.

³⁰ Nõõ hën di baaa di waka nãen baka tei di mujëe hoi, ma a dëdë disa di mujëe mõõn sõndõ de pai mihi.

³¹ Hën di baada di u mbei dii toona tei ën, hën a dëdë disëen tu. Nöo sö a pasa ku hii dee sëbën baa tuu fiaa. Na wan u de pai mihi ku di mujëe möönsö.

³² A baka u di dë hën di mujëe ko dëdë tu.

³³ “Wë te dee dëdë sëmbë o toona weki ko ku libi, nöo undi u de sëbën baa o abi di mujëe? Biga de tuu bi libi ku ën kaa.”

³⁴ Nöo hën Masa Jesosi piki de taa: “Dee sëmbë aki, wan fusutan di soni bunu e.” Biga a goonliba aki nöo, womi ta tei mujëe, mujëe ta tei manu.

³⁵⁻³⁶ Ma a Gadu ala dee lö libi dë an dë ala e. Biga dee sëmbë dee ta dë a Gadu Köndë ala, nöo de ko dë kuma dee basia fëen köndë kaa, de an ta dëdë möön.

“Nöo di soni mbei sëmbë an ta dëdë ala. Biga dee sëmbë ta dë ala, de dë Masa Gadu mii, nöo de dëdë weki ko feni di libi u teego kaa. Nöo dee sëmbë dee Masa Gadu si taa de dë bumbuu nëen wojo, nöo de a o weki tei tja go u de feni di lö libi dë e.”

³⁷ Nöo hën a toona taki da dee Saduseima taa: “Unfa wan kë piki taa te sëmbë dëdë nöo akaa fëen ta fika ku libi eti, faa toona ko nëen sinkii möön a bakaten?” Biga luku di Buku u Gadu, ka Mosesi bi sikifi kumafa a bi si di faja a di uwii. A bi sai dë ta luku di soni te wan pisi, hën a jei wan töngö a di faja dendu taa: ‘Mi da di Gadu di dee gaan sëmbë fuunu, Abahamu, ku Isaki, ku Jakapu ta begi. Di Gadu u de wë disii.’

³⁸ “Wë fa Gadu fan dë, hën kë taki taa dee sëmbë a kai dë, de dë ku libi eti. Biga Gadu an dë wan Gadu u dëdë sëmbë e. Nöo hën da hii dee sëmbë dee Gadu mbei tuu dë ku libi eti nëen wojo.”

³⁹⁻⁴⁰ Nöo hën wanlö Sabima u Wëti piki ën taa: “Mësitë, i abi leti e, i taki bunu.” Nöo a baka u di dë, nöo na wan sëmbë abi hati u hakisi Masa Jesosi na wan soni möön.

Aki Masa Jesosi hakisi dee sëmbë soni u di Paamusi Könu.

Mat. 22:41-46; Maik. 12:35-37

⁴¹ Nöo hën Masa Jesosi taki da de taa: “Wë mi o hakisi unu wan soni awaa. Dee mësitë ta lei unu di Buku u Gadu taa di Paamusi Könu o dë Dafiti bakamii, na sö nö?”

⁴² Wë nöo sö a dë tuu. Ma Dafiti seei sikifi soni fëen a di Kanda Buku. A taa: Masa Gadu taki da mi Masa taa: ‘Ko sindo a mi letimaun së aki.

⁴³ Nöo i dë aki fu tee mi buta dee felantima fii tuu a i basu futu.’

⁴⁴ Wë nöo di Dafiti ta kai ën ‘mi Masa’, nöo unfa a sa dë bakamii fëen nöo?”

Aki Masa Jesosi ta bai lanti u de

musu luku bunu ku dee

Sabima u Wëti.

Mat. 23:1-36; Maik. 12:38-40; Luk. 11:37-54

⁴⁵ Nöo leti a hii dee hia sëmbë dendu naandë Masa Jesosi taki da dee bakama fëen taa:

⁴⁶ “Un musu luku bunu ku dee Sabima u Wëti e. Biga fa de sai dë, de lobi u tapa gaan langa bandjakoosu ta waka ta lontu u de a köndë ganda mindi nango a wojowojo, fu hii sëmbë musu ta si de ta da de odi a lesipeki fasi a hii sëmbë fesi. Nöo söseei tu, te de go a keiki, ee nasö tee de o go fu de go sindo a tafa a wan piizii, nöo de lobi u go sindo a dee möön hei kamian.

⁴⁷ “Ma nöo hii fa de ta mbei taa de bumbuu dë, ma de an bumbuu e. Biga dee mujëe söndö manu dee aan heepi u deseeri, nöo de dee Sabima ta njan hii soni de abi te kisi ku de wosu tuu. Nöo ku di fasi dë seei, de ta kumutu u de

nango ta begi wanlö gaan langa begi u sëmbë musu sabi taa de dë bumbuu sëmbë. Nöö dee lö sëmbë dë, de o kisi di möön gaan hebi sitaafu a Gadu e.”

21

Aki Masa Jesosi ta luku fa

de ta tja möni ko da Gadu.

Maik. 12:41-44

¹ Nöö hën Masa Jesosi dë a di Wosu u Gadu te wan pisi, hën a hopo wojo luku ala hën a si fa dee guduma ta tuwë möni a di möni kädë u di keiki.

² Nöö hën a si wan pena mujëë, manu fëën bi dädë, hën a tja tu köpö sensi fëën ko tuwë a di kädë.

³ Nöö hën Masa Jesosi luku ën te a kaba, hën a taki da dee bakama fëën taa: “Un si ô? Fa de ta buta möni a di kädë aki, nöö di pena mujëë i si naandë buta gaan möni möön de tuu e.

⁴ Biga di wan piki möni dë, hën nöö a bi abi faa njan. Aambi a wosu möönsö. Ma dee guduma abi hia möni a wosu eti.”

Aki Masa Jesosi ta konda dee

soni o pasa a bakaten da

dee bakama fëën.

Mat. 24:1-22; Maik. 13:1-19

⁵ Wë nöö fa de dë a di Wosu dë, hën so u dee bakama u Masa Jesosi taa: “Ja si fa di Wosu u Gadu aki waiti nö? De tëmbëën te a hanso. Nöö hën de bisi ën seei ku dee soni dee de ta tja ko ta da Masa Gadu.”

Nöö hën Masa Jesosi taki da de taa:

⁶ “Aai, sö a dë tuu. Ma i si fa di Wosu dë aki nö? Fa i si de mbei ën hanso seei, ma wan ten o ko de o booko ën fiaa tuwë a goon. Dee sitonu i si dë, na wan u de o dë oto a oto liba möön. De tuu o booko paaja.”

⁷ Nöö hën de hakisi ën taa: “Wë mësitë o, u kë fii lei u wan maaka fuu sabi na un ten di soni dë o pasa.”

⁸ Nöö hën Masa Jesosi piki de taa: “Un musu luku bunu a di ten u ta taki aki fu sëmbë an musu ko ganjan unu. Biga hia sëmbë o ta ko a unu ku mi në. So u de o taa: ‘Mi wë da di Paamusi Kõnu,’ nöö di otowan o taa: ‘Di ten dou kaa.’ Ma wan musu piki e. Wan musu haika dee soni de ta taki da unu möönsö.

⁹ “Nöö te un ta jei taa takitaki, toobi, feti, buja ta pasa a kamiankajian, nöö wan musu fëëë e. Biga dee lö soni dë musu ko pasa ufö, ma di kaba u di goonliba nëën di dë eti.

¹⁰ Wan kõnu o ta suku di otowan a toobi ta feti ku ën tee a bigi. Nöö söseei wan köndë o hopo ta suku di oto köndë a toobi, de o ta feti te a bigi.

¹¹ “Nöö di juu dë, goon o ta seki ta latja a sëmëni kamian u di goonliba ta kii sëmbë. Gaan hangï o ta ko tee soni seei an o ta dë u njan. Nöö taku siki o ko a mundu ta kii piki mii ku gaan sëmbë tuu. Gaangaan soni seei o ta pasa a goonliba tee dou a mundu a liba ala tu. Gaangaan maaka o ta pasa dee ja bi mëni, te hii sëmbë o ko ta fëëë a di ten dë.

¹² “Ma bifö hii dee soni aki ko, nöö de o buta unu da siköutu kisi. De o sitaafu unu ta du hogihogi ku unu te a tjika de. De o tja unu go kuutu a dee keikiwosu u de. De o tja unu go söötö buta a dinguwosu. De o tja unu go a dee kõnu ku dee gaama go kuutu unu fu di un ta waka a mi baka.

¹³ Ma nöö te a pasa sö kaa, nöö woon feni pasi fuun konda di Bunu Buka u Masa Gadu da dee sëmbë awaa.

14 “Ma nöö fa woon go a dee kuutu dë, nöö an dë fuun booko hedi a di soni woon taki e.

15 Biga miseei o da unu dee wöutu dee fuun taki. Mi o da unu fusutan fuun sabi unfa fuun piki de. Nöö te un fan te un kaba kaa, nöö na wan u dee felantima fuunu o feni soni u piki möön e.

16 “Unu tata ku unu mama ku dee baaa fuunu ku dee famii fuunu ku dee mati fuunu, de tuu o tja unu go kaagi da lanti fu de musu sitaafu unu. Nöö sômëni fuunu de o kii puu.

17 Nöö hii sëmbë o buuse unu, fu di un ta biibi a mi hedi.

18-19 Ma tökuseei wan musu fëëë. Biga ee un hoi a di biibi go dou, nöö na wan u dee uwii a unu hedi seei sa lasi. Ee un dëdë seei, ma woon toona weki fuun feni di bunu libi fu teego.”

Aki Masa Jesosi ta konda soni

u di fa Jelusalen o booko.

Mat. 24:15-21; Maik. 13:14-19

20 Hën a taki möön taa: “Te un si sodati lontu Jelusalen buta a djegi, nöö un musu sabi taa di ten dou fu de booko ën puu dë e.

21 Nöö dee sëmbë dee dë a Judea a di ten dë, nöö de musu kule go tjubi a dee gaan kuun mindi. Nöö dee sëmbë dee dë a köndë ganda, nöö de musu kule kumutu dë. Dee sëmbë dee dë a goon dendu, de an musu toona go a köndë ganda möön.

22 Biga a di daka dë Gadu o sitaafu dee sëmbë u Jelusalen fu hii dee hogi du u de, kumafa di Buku fëën bi taki a fesi.

23 “Nöö a tjali fu dee mujëë dee dë ku bëë a di lö ten naandë e, ku dee mujëë dë ku miii a maun. Biga sō wan gaan hebi sitaafu o ko a di köndë. Masa Gadu hati o boonu tee na sipootu.

24 Nöö hafu u dee sëmbë de o kii ku sëufangi, hafu u de de o kisi tja go paaja a hii köndë. Nöö dee döösë sëmbë o ko tei Jelusalen ko u de nöö de o ta du ku ën kumafa de kë, fu tee dou di ten Masa Gadu bi buta da de pasa.”

Aki Masa Jesosi ta konda soni

u di toona ko fëën a goonliba.

Mat. 24:29-35; Maik. 13:24-31

25 Nöö hën a toona taki da de möön taa: “Di ten u ta taki soni fëën aki, nöö de o ta si gaangan maaka a di sonu ku di libawojo, ku dee teeja tuu a gaangadu ala. Nöö a goonliba aki, nöö di ze o ta seki ta giinta tee hii sëmbë a dee köndëköndë o ko fëëë.

26 De o ta panta tee. Biga de o si taa de dë a dëdë ku libi maun, fu di de an saandi o ko a di goonliba. Di mundu a liba ala o ta seki te na soni, nöö hii dee soni ala tuu o pusa kumutu a de kama ka de bi dë.

27 “Nöö di juu dë, Mi di ko dë Libisëmbë Mii aki o kumutu a liba ala ta bazia ta ko a goon a wan bundji dendu, ku di gaan kaakiti u mi ku di limbo u mi kuma sonuwojo.

28 Nöö te un si dee soni naandë seti ko, nöö un musu dë waiwai awaa. Biga di juu zuntu fuun kumutu a di fuka di un dë aki.”

29-30 Nöö hën a da de wan oto taa: “Un luku. Te i si di pau de kai figa ku dee oto pau buta folo, nöö i musu sabi taa de o buta njanjan.

31 “Wë nöö söseei tu, te un si taa hii dee soni mi ta taki da unu aki tuu seti ko, nöö un musu sabi taa Masa Gadu juu dou faa ko a di goonliba ko tei di Könu Tii fëën ta taki a hii mundu liba awaa.

³² “Nöö mi taki da unu tuutuu taa dee lö sëmbë u di ten u dë aki, de an o dëdë kaba bifö hii dee soni u taki aki ko pasa.

³³ Nöö fa mi ta fan aki, nöö di mundu a liba ala ku di goonliba u dë aki tuu sa lasi go kaba a sösö, ma dee wöutu u mi aki na wan u de sa lasi möönsö.”

³⁴⁻³⁵ Hën a taki da de möön taa: “Dee sëmbë o, un mēni unu seei e, fu wan booko unu hedi ku dee sölugu u di goonliba aki ku dee jajo libi fëen, te nöö un fëekëtë di Daka dë e. Wan musu ta sai dë ta dööngö ta poi ten te nöö di daka kisi unu söndö un mēni. Biga a o ko kai a hii sëmbë tuu liba kuma aviti. Aan fa fii köni te nöö an o kisi i.

³⁶ Hën mbei un musu dë ku wojo ta begi Gadu nöömö fuun sa pasa dee soni u ta taki aki söndö un lasi di biibi di un abi a mi liba. Nöö un sa ko taanpu a Mi di ko dë Libisëmbë Mii aki fesi söndö fëëë.”

³⁷ Nöö sö Masa Jesosi ta lei dee sëmbë nöömö a di Wosu u Masa Gadu dendu. Mamate a ta lei de tee sapate, ma a ndeti a ta dë a di Kuun de ta kai Oleifi Kuun.

³⁸ Nöö te mamate biten, nöö dee sëmbë u di köndë ta toona ta ko a di Wosu u Gadu naandë möön fu de jei andi a o ko taki da de möön.

22

Aki Judasi taki da dee hedima u

Dju taa a sa heepi de u de

kisi Masa Jesosi.

Mat. 26:1-5, 14-16; Maik. 14:1-2, 10-11; Joh. 11:45-53

¹ Wë nöö di ten dë, di daka u dee Isaëli Sëmbë ko zuntu kaa di de ta njan bëë söndö sooda. „Di daka dë, hën de ta kai Pasika.”

² Nöö dee Gaan Begima ku dee Sabima u Wëti ta suku wan köni fasi nöömö fa de sa du de feni Masa Jesosi kii. Biga ee lanti ko sabi, a kandë de o mbei gaan toobi ku de.

³ Di juu naandë, hën di didibi go a di womi de kai Judasi Isikaliotu hati. Nöö di womi aki bi dë wan u dee tuwalufu bakama u Masa Jesosi.

⁴ Nöö hën a hopo go a dee Gaan Begima ku dee hedima u dee sodati dee ta hoi wakiti a di Wosu u Masa Gadu naandë. Hën a taki da de taa ee de kë nöö a sa mbei möiti da de fu de sa kisi Masa Jesosi.

⁵ Nöö di dee sëmbë jei sö, hën de wai seei. De taa de sa pakëen möni ee a heepi de sö.

⁶ Nöö hën di Judasi jei sö kaa, hën a ta suku fa fu de sa feni Masa Jesosi kisi a wan fasi fu lanti an musu sabi.

Aki Masa Jesosi ku dee bakama fëen njan di Pasika.

Mat. 26:17-30; Maik. 14:12-26; Joh. 13:21-30; 1 Kol. 11:23-25

⁷ Nöö hën de dë tefa di daka dou u de kii di sikapu mii fu de njan di daka.

⁸ Nöö hën Masa Jesosi manda Petuisi ku Johanisi a wan soni. A taki da de taa: “Wë un go, nöö un seeka boi soni fuu njan di Pasika.”

⁹ Hën de hakisi ën taa: “Wë Masa o, unsë i kë fuu go seeka?”

¹⁰ Hën a taa: “Un go a di köndë ganda, nöö woon si wan womi ta waka nango ku wan djogu wata, nöö un waka go nëen baka. Nöö te un si a denda a wan wosu, nöö unu seei musu go denda naandë tu.

¹¹ Nöö un musu taki da di sëmbë abi di wosu taa: ‘Di mësitë manda u fuu ko hakisi i ee naasë di kamba dë ka hën ku dee bakama fëen sa ko njan di piizii?’

12 Nöo a o lei unu wan gaan kamba a liba dë ku hii dee soni dee un a' fanöudu. Nöo naandë un musu go seeka soni te un kaba."

13 Nöo hën dee sëmbë go. Hën de go si hii soni tuu leti kumafa Masa Jesosi bi taki da de. Nöo hën de go seeka soni.

14 Nöo hën de sai dë tee di juu kisi, hën Masa Jesosi ku dee oto bakama fëen ko dou. Hën de tuu go sindo a tafa u de njan.

15 Nöo hën a taki da de taa: "Wë mi bi hangî seei fu mi njan di daka aki ku unu e baa, ufö di juu dou fu mi tja di sitaafu di mi musu tjai.

16 Wë biga ma o njan sö wan daka ku unu möön eti e, u tee dee soni u ta mëni ku di piizii aki tuu pasa, nöo Masa Gadu seti di Njunjun Tii fëen a libisëmbë mindi."

17 Nöo hën a tei di kan hën a da Masa Gadu tangi te a kaba. Nöo hën a taki da de taa: "Un tei ën nöo un tuu bebe lontu ko kai.

18 Wë biga fa i si u ta bebe di win aki sö, nöo ma o bebëen möön eti e. Ma te Masa Gadu tja di Njunjun Tii fëen ko bifö mi o toona bebëen möön."

19 Nöo hën a tei di bëë hën a da Gadu tangi te a kaba. Hën a booko ën paati da dee bakama fëen. Nöo hën a taki da de taa: "Di bëë i si aki, hën da di sinkii u mi di o dëdë fuunu hedi. Nöo kumafa i si u ta njan mëni aki, sö nöo un musu ta du nöömö, fuun ta mëni di dëdë di mi o dëdë da unu."

20 Nöo di de njan te de kaba, hën a tei di kan, hën a taa: "Di win un ta si a di kan aki, nöo hën da di njunjun buka Masa Gadu mbei ku unu fu di mi o tuwë di buuu u mi a goon, „dëdë fuunu hedi„."

21 Nöo hën a taa: "Ma un haika e, dee sëmbë. Wan fuunu di mi ku ën dë sindosindo ta njan a tafa aki o tja mi go könku fu de musu kii mi.

22 Nöo sö nöo a musu pasa e. Biga Mi di ko dë Libisëmbë Mii aki musu u dëdë kumafa Masa Gadu bi butëen. Ma helu u di sëmbë di o könku mi sö e, biga di sitaafu di a o kisi, a o bigi."

23 Nöo di Masa Jesosi taki sö, nöo hën dee bakama seti hakisi de na de taa: "Wë undi fuu seei dë aki di sa du sö wan soni baa?"

Aki Masa Jesosi lei de u de

musu saka deseei.

24 A di ten dë seei hën dee bakama u Masa Jesosi kisi toobi ku deseei. De ta fia ku de na de ta hakisi taa fa de sai dë undi u de sa dë möön hei möön dee oto.

25 Ma Masa Jesosi taki da de taa: "Dee sëmbë aki, un haika e. Dee könku u di goonliba aki dee ta tii köndë, de ta duwengi sëmbë fu de musu du dee soni de kë. Nöo de ta suku u sëmbë musu buta de hei möön oto sëmbë.

26 Ma di lö libi naandë an musu dë a unu mindi e. Biga di sëmbë di dë di möön hei wan fuunu, hën musu dë di möön sakafasi sëmbë. Nöo di hedima fuunu hën musu dë kuma wan wookoma a unu mindi.

27 "Biga di sëmbë di ta sindo ta njan a tafa ku di sëmbë di ta buta njanjan a di tafa, undi u de möön hei? Na di sëmbë ta sindo a tafa nö? Ma luku mi fa mi dë kuma wan wookoma a unu mindi aki, kuma di sëmbë di ta buta njanjan a tafa da dee otowan. Nöo söseei unu musu dë tu e."

28 Nöo hën a taa: "Wë un haika e baa. Unu bi da dee sëmbë dee bi dë ku mi sömëni longi, ku dee pena u mi ku dee fuka libi u mi te kisi fa u dë aki.

29 Wë nöo fëen mbei mi paamusi unu taa te mi subi a di Könu Tii u mi, nöo mi o da unu taki a sëmbë liba e. Wë biga sö mi Tata bi paamusi mi taa a o da mi taki a sëmbë liba, nöo söseei mi toona paamusi unu tu.

30 Nöo un sa sindo a tafa ta njan ta bebe a di köndë u mi ka mi dë könu. Nöo un sa sindo a dee könubangi ta kuutu dee tuwalufu lö u dee Isaëli sëmbë.
 “Sö mi paamusi unu e, dee sëmbë.”

Aki Masa Jesosi wasiköi Petuisi taa di didibi o poobëen.

Mat. 26:31-35; Maik. 14:27-31; Joh. 13:36-38

31 Nöo hën Masa Jesosi kai Petuisi, a taa: “Simon o.”

Hën a piki.

Hën a taa: “Haika e, mi o taki wan soni da i. Di didibi Saatan hakisi pasi faa pooba unu e. Nöo a o pooba unu leti kuma te wan sëmbë ta fon alisi ta böö, faa musu sabi undi da di kakisa, undi da di njanjan.

32 Ma haika Simon, mi begi da i kaa e, fu ja musu disa di biibi fii di i abi. Biga joo disa mi. Ma te i toona ko a mi baka nöo i musu heepi dee otowan fii tu, fu de ko möön taanga a di biibi.”

33 Hën Petuisi taa: “Höön, Masa, nönö! Mi, fa mi dë aki, nöo hiniwan kamian ka i nango mi sa go ku i. Ee a dinguwosu seei mi sa go. Ee te a dedëköndë seei mi sa go ku i. Ma o disa i möönsö.”

34 Hën Masa Jesosi taki dëen taa: “Womi Petuisi, mi taki e, taa tide seei bifö ganian kanda joo fia dii pasi nöömö taa ja sabi mi, mi ku i na mati.”

Aki Masa Jesosi konda da de andi ku andi de musu tjai te de nango a kamian.

35 Nöo hën a toona taki da de möön taa: “A fesi mi bi ta manda unu go a kamian söndö möni, söndö tasi, söndö susu a futu. Wë nöo di un bi nango un bi ta pena nö?”

Nöo hën de tuu piki ën taa: “Wë nönö, Masa, soni an bi ta fuka u e.”

36 Nöo hën a taa: “Söö. Wë un haika e. Fa u dë aki, te woon go a kamian möön nöo ee wan sëmbë abi saku nöo be a tjëen e. Ee wan sëmbë a’ möni nöo be a tjëen. Nöo ee wan sëmbë aambi sëufangi, nöo be a sei di gaan koosu fëen nöo a bai sëufangi.

37 “Wë biga wan soni u mi dë sikifisikifi a Gadu Buku taa de ta si mi ku dee takusëmbëma di wan fa. Nöo hii dee soni di Buku bi taki u mi, nöo fa u dë aki de tuu musu ko pasa e.”

38 Hën de taki dëen taa: “Masa o, luku. U abi tu ufangi aki kaa.”

Hën Masa Jesosi taki da de taa: “Aaa, wë un boo disa di oto ufö.”

Aki Masa Jesosi ta begi.

Mat. 26:36-46; Maik. 14:32-42

39 A baka u di dë, hën Masa Jesosi ku dee bakama fëen go a döö. Hën de nango tefa de go dou a di kuun de ta kai Oleifi Kuun, kumafa de bi guwenti.

40 Nöo di de go dou a di kamian, hën a taki da de taa: “Un begi e, dee sëmbë, be di tési di ta ko a unu aki an musu wini unu.”

41 Nöo hën a waka kumutu dë go a wan së buka. A go longi tjika kuma ka wan sëmbë sa hiti kodjo dou.

Nöo hën a tjökö kini a goon dë begi Masa Gadu. A taa:

42 “Taata o, gaan tangi mi begi i, luku di soni dë a mi liba aki. Nöo ee i feni ën bunu nöo un boo du ën a wan oto fasi. Biga a hebi da mi poi. Ma fa mi taki aki seei, na du kumafa mi kë e, ma du kumafa i kë.”

43 Nöo di juu dë hën a si wan basia u Masa Gadu Köndë ko nëen ko dëen kaakiti.

44 Ma nöo hën di soni ko hebi nëen liba möön tee an saanfa faa du. Hën a ko begi möön taanga eti tee di suwa fëen ko dë kuma buuu ta koti ta kai a goon.

⁴⁵ Nöo di a kaba u begi, hën a hopo toona go a dee bakama fëen. Nöo di a go dou, hën a si de tuu ta duumi. Biga tjali bi kisi de poi.

⁴⁶ Nöo hën a taki da de taa: “Duumi un ta duumi sö nö, womi? Wë un hopo e, nöo un begi Masa Gadu faa musu heepi unu fu di soni di ta ko a unu aki an musu wini unu.”

Aki de ko kisi Masa Jesosi.

Mat. 26:47-56; Maik. 14:43-50; Joh. 18:3-11

⁴⁷ Nöo an kaba u fan seei, hën de bia luku hën de si wanlö hia sëmbë ta ko. Nöo fa de ta ko dë, Judasi di bakama u Masa Jesosi dë a fesi, nöo hën a waka ko zuntu ku Masa Jesosi faa musu bosu ën.

⁴⁸ Hën Masa Jesosi hakisi ën taa: “Womi Judasi, andi wë, baa? Ku bosu i ta sei Mi di ko dë Libisëmbë Mii aki nö?”

⁴⁹ Nöo hën dee bakama fu Masa Jesosi hakisi ën taa: “Masa o, andi u musu du? U musu tei sëufangi heepi i kii dee sëmbë aki ö?”

⁵⁰ Nöo fa u mbei dë, nöo hën wan u dee bakama koti di letisë jesi u wan u dee futuboi u di Kaba Hei Begima belim puu.

⁵¹ Nöo hën Masa Jesosi taa: “Womi, nöönö. Na du sö e.” Nöo hën a go panjan di jesi u di sëmbë hën a ko bunu baka.

⁵² Nöo hën a fan ku dee Gaan Begima ku dee hedima u dee sodati dee ta luku di Wosu u Gadu, ku dee Gaan Womi dee ko dë, a taa: “Dee sëmbë, faandi mbei un ko a mi aki ku ufangi ku kodjo kuma un ta ko kisi wan bookoköndëma di ta kii sëmbë?”

⁵³ Biga mi ku unu bi ta dë hiniwan daka a di Wosu u Masa Gadu, ma na wan daka un buta maun a mi taa woon kisi mi tja go a kuutu. Nöo hën un ko a mi aki tide sö nö?

“Ma wë antoobi, awaa di juu fuunu ku didibi dou, biga hën a’ taki a di mindi aki.”

Aki Petuisi fia taa an sabi

Masa Jesosi.

Mat. 26:57-58, 69-75; Maik. 14:53-54, 66-72; Joh. 18:12-18, 25-27

⁵⁴ Wë nöo di Masa Jesosi fan sö te a kaba, hën de kisi ën gbolou panjan. Hën de tjëen go tee a di Kaba Hei Begima pisi. Nöo fa de nango dë, hën Petuisi seei ta waka saapisaapi nango a de baka.

⁵⁵ Nöo hën de nango tefa de go dou hën de tja Masa Jesosi go a wosu dendu.

Ma nöo de bi mbei wan gaan faja a di djai dendu, nöo hia sëmbë bi sindo naandë ta këndë faja. Nöo di Petuisi ko dou, hën a go sindo a dee sëmbë bandja ta këndë faja tu.

⁵⁶ Nöo hën a sai dë te wan pisi. Hën wan mujëe ta wooko a di wosu ko si ën a di faja bandja naandë, nöo hën a luku ën diin sö. Hën a taa: “Huun, di womi aki, mi si kuma di sëmbë de tja ko aki dë sëmbë fii.”

⁵⁷ Hën Petuisi fia taa: “Ambë? Mi? Di sëmbë dë, ma sabi ën!”

⁵⁸ Te wan pisi hën wan oto sëmbë ko dou dë möön. Hën a taa: “Wë womi, di fasi mi si i aki, i musu u dë wan u dee sëmbë u di womi naandë.”

Hën Petuisi toona fia möön taa: “Nönö womi, di sëmbë un ta taki dë, ma sabi ën e! Na kai mi në mökisi ku ën.”

⁵⁹ Nöo kuma baka wan juu langa sö, hën wan otowan ko dou dë möön. A taa: “Huun? Di womi aki, a musu dë sëmbë u di womi dë, biga a dë Galilea sëmbë.”

⁶⁰ Hën a taa: “Nönö e, dee sëmbë. Mi taki e, di sëmbë dë ma sabi soni fëën e! Un disa mi ku soni fëën!” Nöö di a taki sô, nöö hën wë di ganian bai kanda kënkenjênkëën.

⁶¹ Di juu dë, hën Masa Jesosi bia luku ën diin. Nöö Petuisi ko pakisei di woto di a bi taki dëen taa: “Womi, a di ndeti aki seei ufô ganian kanda, nöö joo fia dii pasi taa ja sabi mi.”

⁶² Nöö hën wë a kule kumutu go a döö, hën a go bai këë te a bigi. „Di disa di a disa Masa Jesosi dë, nöö hën wë hati ën sô.”

Aki dee hedima u dee Isaëli sëmbë kuutu Masa Jesosi.

Mat. 26:59-68; Maik. 14:55-65; Joh. 18:19-24

⁶³ Ma nöö fa de kisi Masa Jesosi tja go buta naandë, nöö hën dee sëmbë sai dë ta watji ën. De ta hoi ën a sipootu ta naki ën wanwan böö.

⁶⁴ Nöö hën de tei wan koosu hën de tai ën wojo tapa. Hën de ta naki ën ta hakisi ën taa: “Ee Gadu ta fan ku i tuu, nöö i taki da u ambë naki i?”

⁶⁵ Nöö hën de ta kosi ën peipei takutaku kosi tefa a tjika de.

⁶⁶ Nöö hën di dobooko fëën, mamate biten, nöö hën dee Gaan Womi ku dee Gaan Begima ku dee Sabima u Wëti, hën de ko makandi fu de kuutu a Masa Jesosi liba awaa. Nöö hën de go tei ën tja ko.

⁶⁷ Nöö hën de hakisi ën taa: “Wë unfä i ta pakisei fii seei, fa i dë aki? I da di Paamusi Kõnu nõ? Taki da u.”

Hën a piki de taa: “Wë ee mi taki da unu seei, wan o kë biibi mi e.

⁶⁸ Nöö ee mi hakisi unu wan soni tu, nöö wan o piki mi.

⁶⁹ Ma wan soni nöö mi sa taki da unu taa, fu kumutu a di ten aki nöö Mi di ko dë Libisëmbë Mii aki o dë sindosindo a letimaun së u Masa Gadu ka a dë ku di gaan kaakiti fëën.”

⁷⁰ Nöö hën de tuu hakisi ën taa: “Wë womi, fa i fan dë, nöö i da di Mii u Gadu nõ?”

Hën a taki da de taa: “Wë, leti kumafa un taki dë, nöö sô nöö a dë e.”

⁷¹ Nöö hën de tuu bai taa: “Söö. Un toobi u abi fu de tja kaagi fëën ko da u möön? Biga u seei jei nëën seei buka fa a taki. A taa hën da Masa Gadu Mii. U feni soni fuu kii ën awaa.”

23

Aki de tja Masa Jesosi go a Gaama Pilati ku Kõnu Helodi.

Mat. 27:1-2, 11-14; Maik. 15:1-5; Joh. 18:28-38

¹ Nöö hën hii dee sëmbë tuu hopo vu taanpu. Hën de tei Masa Jesosi, hën de tjëën go a Gaama Pilati, di hedima u di köndë.

² Nöö di de ko dou, hën de seti kaagi ën taa: “Di sëmbë i si aki sô, a ta tja gaan toobi ko a di köndë e, ta bia sëmbë hedi ku dee lei fëën. A taa wa musu paka di Gaan Kõnu lanti möni möön. Nöö a taki taa hën da di Keesitu, di Paamusi Kõnu di Masa Gadu bi taa a o manda da u.”

³ Nöö hën Pilati hakisi ën taa: “Womi, i da di kõnu u dee Dju sëmbë tuu nõ?”

Hën Masa Jesosi piki ën taa: “Leti kumafa i taki dë, sô nöö a dë.”

⁴ Nöö hën Pilati taki da dee Gaan Begima ku hii dee oto sëmbë dee ko naandë taa: “Wë di sëmbë aki, ma feni föutu nëën u mi sitaafu ën e.”

⁵ Ma nöö hën dee sëmbë tuu ta piki nöömô taa: “A ta tja gaan toobi ko a hii di köndë ku di lei fëën e. Biga a seti a Galilea hën a ta waka ta lontu hii dee köndë teefa a ko dou ku ën a u a Judea aki.”

⁶ Wë nöö di Pilati jei sô, hën a hakisi ee Jesosi dë sëmbë u Galilea.

⁷ Biga Pilati seei aan taki a Galilea, ma Könu Helodi hën abi taki ala. Nöo hën de piki ën taa: “Aai, a dë sëmbë u Galilea.”

Nöo di Pilati ko jei sö, hën a mandëen go a Könu Helodi be hën kuutu soni fëen. Biga a di juu dë di könu bi dë leti a Jerusalem dë tu.

⁸ Wë nöo di Könu Helodi si Masa Jesosi ko dou, hën a wai. Biga a bi ta jei fëen nöömö, ma hën ku ën an bi miti wan daka. Nöo fa de miti dë nöo a bunu dëen, biga kandë a sa du wan foombo soni dëen be a si.

⁹ Nöo hën di könu hakisi Masa Jesosi wanlö hia soni faa konda dëen, ma Masa Jesosi an piki ën. A dë fëen pii.

¹⁰ Nöo hën dee Gaan Begima ku dee Sabima u Wëti djombo tei fesi ta konda sëmëni soni fëen ku hatiboonu da di könu.

¹¹ Hën di könu ku dee sodati fëen, hën de lafu Masa Jesosi te a bigi, ta wisiwasi ën ta mbei ën fa. Hën de bisi wan gaan waiti koosu dëen kumafa könu ta bisi, hën de toona mandëen go a Gaama Pilati baka.

¹² Nöo a di daka naandë seei Gaama Pilati ku Könu Helodi ko mati, ma a fesi de bi dë felantima.

Aki de piki taa Masa Jesosi

musu dëdë.

Mat. 27:15-26; Maik. 15:6-15; Joh. 18:39-19:16

¹³ Nöo hën Pilati kai hii dee Gaan Begima ku dee hedima u Isaëli ku hii dee oto sëmbë ko nëen makandi.

¹⁴ Hën a taki da de taa: “Wë un tja di sëmbë aki ko a mi taa a du hogi. Un taa a ta tja gaan toobi ko a di köndë. Ma fa mi luku ën ta hakisi ën soni a unu fesi aki, nöo ma si taa a du dee soni un ta konda dë e. Nöo ma si föutu nëen.

¹⁵ Nöo Könu Helodi seei an bi feni föutu nëen tu, biga a toona mandëen ko a u aki baka. An du wan wojo hogi tjika faa musu dëdë e.

¹⁶ Fëen mbei mi o sitaafu ën nöo, nöo mi o toona puu ën da unu.” [

¹⁷ Wë biga hiniwan jaa a di piizii aki dendu di Gaama bi guwenti u puu wan sëmbë a dunguwosu da dee Isaëli sëmbë.]

¹⁸ Ma nöo di a taki taa a o puu Masa Jesosi da de, nöo hën hii dee sëmbë tuu fiaa bai taa: “Nönö e, nönö! Kii ën puu dë! Balabasi, hën i musu puu da u.”

¹⁹ (Wë nöo di Balabasi aki, hën de bi buta a dunguwosu fu wan gaan toobi a bi tja ko a di köndë, bifö a bi kii sëmbë tu.)

²⁰ Ma Pilati bi kë puu Masa Jesosi. Nöo hën a taa: “Jesosi, hën mi o puu e, biga ma si di föutu di a du!”

²¹ Ma de ta bai nango nöömö taa: “Kii ën! Pekëen a lakpa pau kii!”

²² Nöo hën a toona hakisi de möön di u mbei dii pasi taa: “Wë un hogi seei a bi du? Biga ma feni na wan kodo soni nëen fu mi mandëen go kii. Fëen mbei mi o sitaafu ën nöo, nöo mi o puu ën be a go.”

²³ Ma dee sëmbë ko bai möön taanga eti taa de musu pekëen a lakpa pau kii. De ta bai ta kai olo tee kamian ta mbei wajawaja. Nöo Pilati an ko saanfa u du möön.

²⁴ Nöo hën mbei a taki da de taa: “Söö. Wë ma sabi möön e. Fa un kë du nöo un du.”

²⁵ Nöo hën a puu di sëmbë di de kë da de. Di sëmbë dë, hën de bi buta a dunguwosu fu di a bi kii sëmbë nöo a bi tja gaan toobi ko a di köndë tu. Ma di hën de kë, hën a puu ën a dunguwosu. Ma Masa Jesosi, hën a disa da de fu de du ku ën kumafa de kë.

Aki de peka Masa Jesosi

*a di lakpa pau.**Mat. 27:32-44; Maik. 15:21-32; Joh. 19:17-27*

26 Nöo hën de ta tja Masa Jesosi nango tee wan pisi hën de miti ku wan sëmbë de ta kai Simon fu di køndë de ta kai Sileni. A bi kumutu a kamian ta ko a ganda, hën de miti ku ën a pasi. Nöo hën de kisi ën panjan taa a musu tja di lakpa pau u Masa Jesosi dëen. Hën de hopo ën buta nëen baka, hën a ta tjëen dëen.

27 Wë nöo di juu dë, nöo sëmëni sëmbë ta waka nango a Masa Jesosi baka, womi ku mujëe tuu. Nöo tjali fëen kisi de tee dee mujëe ta bai ta këe.

28 Nöo hën Masa Jesosi bia luku de, hën a taki da de taa: “Un dee mujëe mii u Jelusalen aki, wan këe u mi hedi e. Ma un musu këe fuunu seei ku dee mii fuunu hedi.

29 Biga abiti möön nöo wan sitaafu ten o ko, nöo sëmbë o dë ta taki taa: ‘Ee maingë, di ten di u dë aki, a bunu da dee mujëe dee an pai mii wan daka, ku dee mujëe mii dee na a’ miii a maun.’

30 Biga a di lö ten dë, nöo hia sëmbë o dë ta bai taa: ‘Dee gaan kuun aki eee, gaantangi, un kai ko a u liba ooo.’ Nöo de o taki da dee piki kuun taa: ‘Gaantangi, un kai ko tapa u, be soni fuu an dë a di goonliba aki möön. Biga di ten aki hogi tumusi.’

31 “Wë biga ee ku di kuwakuwa pau de ta du sö, nöo di dëedëe pau wë?” Sö Masa Jesosi taki da dee mujëe.

32 Wë nöo fa de ta tja Masa Jesosi nango dë, nöo de ta tja tu oto sëmbë tu fu de go kii ku ën makandi. De tu sëmbë naandë bi du gaan hogi a di køndë.

33 Nöo hën de nango te de ko dou a di kamian de ta kai Hedibonu. Nöo hën de peka Masa Jesosi ku de tu hogi sëmbë dë a lakpa pau, nöo hën de hopo de taanpu a pë, wan dë a Masa Jesosi letimaun së, di otowan dë nëen töötomaun së, Masa Jesosi dë a de mindi.

34 Nöo hën Masa Jesosi taa: “Taata o, na hoi dee sëmbë ta kii mi aki a bëe e, biga de an saandi de ta du.”

Nöo hën dee sodati tuwë lötu paati dee koosu fëen.

35 Nöo sëmëni sëmbë bi sai dë taanputaanpu ta luku dee soni ta pasa. Dee hedima u di køndë seei dë a dendu tu, nöo de ta wisiwasi ën ta mbei ën fa. De taa: “A bi heepi oto sëmbë ta du de gaangaan bunu, nöo be a heepi ën seei tu, ee hën da di Keesitu, di Paamusi Könu.” Sö dee hedima ta taki.

36 Nöo söseei dee sodati ta mbei ën fa tu. De tja gandji win u ko dëen fa a bebe.

37 Hën de taa: “Ee i da di könu u dee Dju sëmbë tuu, nöo i heepi i seei be i kumutu naandë.”

38 Nöo de sikifi wan soni peka a di lakpa pau hedi taa: DISI DA DI KÖNU U DEE DJU SËMBË.

39 Nöo söseei wan u dee sëmbë di de peka ku Masa Jesosi a di lakpa pau naandë ta kosi ën tu. A taki dëen taa: “Womi, ee i dë di Paamusi Könu di Masa Gadu manda da u aki, nöo i puu i seei a di lakpa pau e, nöo i ko puu u tu.”

40-41 Ma di otowan gandji dëen taa: “Womi, fa i si mi ku i ta kisi di sitaafu aki, u ta kisi ën leti kumafa a fiti, biga u bi du hogi tumusi. Ma di sëmbë aki sö, hën an bi du hogi möönsö. Nöo fa i ta kosi ën dë, ja ta fëeë Gadu nö? Ja sabi taa u tuu o dëdë aki nö?”

42 Nöo hën a bia fan ku Masa Jesosi taa: “Jesusi o, gaantangi mi begi i, te i tei di Könu Tii fii nöo i mëni mi e.”

43 Nöo hën Masa Jesosi piki ën taa: “Antoobi. Mi taki da i gbelin taa tide seei mi ku i o dë makandi a di waiti kamian u Masa Gadu de ta kai Paladëisi.”

Aki Masa Jesosi dëdë.

Mat. 27:45, 56; Maik. 15:33-41; Joh. 19:28-30

⁴⁴ Hën de sai dë te tuwalufu juu sonuati, nöö hën kamian ko dungu tee a dë kuma ndeti. Nöö hën a tan sô tee di dii juu sapate,

⁴⁵ sonu seei an jabi möönsö.

Nöö hën di gaan koosu di bi tapa di Kaba Hebi Kamian u di Wosu u Masa Gadu tënë leti mindi puu tu pisi.

⁴⁶ Nöö hën Masa Jesosi bai ku taanga tōngō taa: “Taata o, gaantangi, tei di Akaa u mi e. Mi disëen da i.” Nöö fa a fan dë, hën böö fëen koti. A dëdë pii.

⁴⁷ Nöö di di oposii si fa hii soni pasa, nöö a bigi dëen te na soni. Hën a bia gafa Gadu taa: “Aai oo dee sëmbë, di sëmbë i si aki sô, a bi dë wan gaan bumbuu sëmbë a Gadu wojo e.”

⁴⁸ Nöö di dee hia sëmbë dee bi ko naandë si fa hii soni pasa, hën de naki maun a de hati taa: “Ee, aai maingë, di soni pasa aki, a hogi. A tjali da u.” Nöö hën de paaja go a wosu.

⁴⁹ Nöö dee mati u Masa Jesosi ku dee mujëe dee bi kumutu a Galilea ko ku ën a Judea dë, de bi dë taanputaanpu te a wan së ala ta luku fa hii soni ta pasa ku ën.

Aki de bei Masa Jesosi.

Mat. 27:57-61; Maik. 15:42-47; Joh. 19:38-42

⁵⁰⁻⁵¹ Nöö wan gaan kuutuma u dee Isaëli sëmbë bi dë de ta kai Josëfu, nöö a di köndë de kai Alimatea a ta libi. Nöö a dë wan bumbuu sëmbë, hii sëmbë ta lesipeki ën. Nöö a dë wan sëmbë ta luku fu Masa Gadu musu ko hopo di Tii fëen a di köndë. Nöö di ten de ta kuutu u kii Masa Jesosi dë, nöö hën an bi dë wan ku de a dee soni de ta taki dë.

⁵² Nöö di di womi aki si taa Masa Jesosi dëdë, nöö hën a go a Pilati go begi ën faa dëen di dëdë go bei.

⁵³ Nöö hën a dëen pasi.

Nöö hën a go puu Masa Jesosi a di lakpa pau, hën a lolu ën ku wan gaan limbo koosu. Nöö a bi abi wan njunjun baaku de bi diki a sitonu dendu u de bei sëmbë, ma de an bi bei sëmbë nëen wan daka eti. Nöö naandë a tja Masa Jesosi go bei.

⁵⁴ Wë nöö a di daka naandë de ta seeka soni u de njan di saba, biga a di sapate juu dë di saba o kai a goon.

⁵⁵ Nöö dee mujëe u Galilea dee bi ko ku Masa Jesosi naandë, hën de go ku Josëfu fu de musu luku unsë de buta di dëdë sinkii u Masa Jesosi.

⁵⁶ Nöö hën di de si kaa, nöö hën de bia toona. Nöö hën de go seeka sumëe suti soni, u de tja go lobi a di dëdë sinkii u Masa Jesosi kumafa di guwenti bi dë te wan sëmbë dëdë. Ma di de si taa saba kai a goon kaa, nöö hën de disa hii soni, hën de go dë pii ta böö, kumafa di wëti u dee Isaëli sëmbë bi dë.

24

Aki Masa Jesosi weki a dëdë.

Mat. 28:1-10; Maik. 16:1-8; Joh. 20:1-10

¹ Nöö hën a di sonde mamate biten, hën dee mujëe hopo. Hën de tei dee soni de bi seeka buta naandë fu de tja go sakwi a di dëdë sinkii u Masa Jesosi, nöö hën de go a di kamian ka de bi bei Masa Jesosi.

² Ma nöö di de go dou, hën de si di baaku jabijabi hooo. Di gaan sitonu de bi tapa di geebi bi logoda kumutu a di baaku buka.

³ Nöo hën de denda go a di baaku dendu, ma nöo de an si di dëdë sinkii u Masa Jesosi naandë möön.

⁴ Hën de bai: “Huun? Wë andi pasa maingë? Unsë de tjëen go?”

Nöo fa de ta fan dë, te u de kë mëni, hën de si tu womi sëmbë dë taanputaanpu leti a de bandja naandë. De dë ku gaan limbo koosu a de sinkii ta koti faja te na soni.

⁵ Nöo hën de panta tee, de saka kai ku kini tapa de fesi a goon.

Nöo hën dee basia taki da de taa: “Dee mujëe, andi mbei un ko suku wan libisëmbë a geebi dendu?”

⁶ Di sëmbë un ta suku an dë aki e. A hopo kumutu a dëdë. Wë nöo un pakisei dee oto a bi taki da unu, di unu ku ën bi dë a Galilea ala.

⁷ Biga a bi taki da unu taa de o tja di Sëmbë di ko dë Libisëmbë Mii go sei da dee hogihati sëmbë. Nöo de o pekëen a lakpa pau kii, ma nöo a di u dii daka fëen a o toona weki hopo baka. Na sô a bi taki nö?”

⁸ Wë nöo di dee basia taki sô kaa, hën dee mujëe ko mëni fa Masa Jesosi bi taki awaa. Hën de taa: “Aai, sô a bi taki da u tuu.”

⁹ Nöo hën de bia toona go. Hën de nango tee a de ëlufu bakama u Masa Jesosi ku dee oto sëmbë fëen, nöo hën de konda di soni da de taa sô wan soni de go si.

¹⁰ Wë nöo dee mujëe dee konda di soni naandë, wan u de de ta kai Malia Magidala, di otowan da Johana, di otowan möön da Malia di mama u Jakobosi, ku wanlô oto mujëe möön dee bi dë ku de naandë. De wë go konda di buka da dee tjabukama u Masa Jesosi.

¹¹ Ma dee sëmbë an kë biibi, biga de feni taa dee soni de ta taki dë, na bumbuu soni. Sôsô soni de ta taki.

¹² Ma nöo hën Petuisi hopo, hën a kule go a di geebi. Nöo di a go dou, hën a bendi luku a di baaku dendu, hën a si dee koosu dee bi dë a Masa Jesosi sinkii leti dë. Nöo hën a bia toona go a wosu. Di soni foombo ën tee a taa: “Ee maingë, andi seei miti u aki? Andi pasa?”

Aki Masa Jesosi miti ku tu sëmbë nango a Emausu.

Maik. 16:12-13

¹³ Wë nöo a di daka dë seei, hën tu u dee sëmbë bi ta waka a Masa Jesosi baka kumutu a Jelusalen dë nango a wan köndë de kai Emausu. An longi ku Jelusalen tumusi, ma a sa dë kuma wan teni-a-fô kilomëti sô fu waka.

¹⁴ Nöo di de nango, hën de ta da oto u de a pasi ta taki dee soni dee bi pasa ku Masa Jesosi.

¹⁵ Nöo hën de nango te wan pisi, nöo hën de si wan sëmbë ko ta waka ku de a di pasi. De si di sëmbë, ma de an sabi taa Masa Jesosi hën di dë.

¹⁶ A bi dë kuma wojo u de bi tapa u de an si ën sabi.

¹⁷ Te wan pisi, hën di sëmbë hakisi de taa: “Wë, dee sëmbë, un oto un ta da a pasi taangataanga sô? Andi du unu?” Hën de taanpu pii ku tjali.

¹⁸ Nöo hën wan u de de ta kai Kelopasi mbei: “Huun? Wë nöo ja jei di gaan soni di bi pasa a Jelusalen a dee daka aki nö? A sa kë taa wakama i dë mbei ja jei ën nö?”

¹⁹ A taa: “Andi pasa?”

De taa: “Ja jei di soni fu di sëmbë de kai Jesosi u Nazalëti nö? A bi dë wan tjabukama u Masa Gadu ta du foombo wooko ta lei sëmbë ku kaakiti leti kuma hën abi di lei. Masa Gadu ku hii sëmbë bi feni ën taa a dë wan gaan hei sëmbë a goonliba.

²⁰ Ma dee Gaan Begima ku dee hedima fuu tjëen go a di Gaama faa kuutu ën, nöö hën wë Gaama piki taa a musu dëdë. Nöö hën de pekëen a lakpa pau kii.

²¹ Wë u bi pakisei taa hën sa dë di sëmbë di bi o puu u dee Isaëli sëmbë a dee fuka fuu, ma nöö tide mbei dii daka kaa di de kii ën.

²² “Ma na di dë nöö, ma tide wanlô mujëe sëmbë fuu ko taki wan foondo soni da u. De taa a di mamate biten, de go a di baaku ka de bi bei ën.

²³ Ma nöö di de go luku, de an si di dëdë sinkii fëen naandë möön. Hën de toona ko taki da u taa de si basia u Masa Gadu Köndë naandë. Nöö dee basia taki da de taa Jesosi dë ku libi, a weki baka.

²⁴ Nöö wantu sëmbë fuu kule go a di geebi go luku tu. Hën de go si di baaku hoo leti kumafa dee mujëe bi taki da de, ma de an si Jesosi.”

²⁵ Nöö hën Masa Jesosi taki da de taa: “Ma dee sëmbë aki, unfa un don gaanfa sö? Andi mbei a taanga da unu sö fuun biibi dee soni dee tjabukama u Masa Gadu bi taki? Biga hii dee soni aki tuu de bi taki a fesi kaa.

²⁶ Nöö un bi musu sabi taa di Paamusi Könu bi musu fuu pena sö bifö a sa go sindo a di kõnubangi fëen.”

²⁷ Nöö hën a seti taki a dee soni liba, dee Mosesi ku dee oto tjabukama u Masa Gadu bi sikifi buta dë. A mbei de ko fusutan hii dee soni fëen seei tuu dee bi dë sikifisikifi a Gadu Buku.

²⁸ Nöö hën de ta fan di fan nango tefa de ko zuntu ku di köndë ka dee sëmbë nango, nöö hën Masa Jesosi mbei kuma a kë pasa go fëen.

²⁹ Hën dee sëmbë begi ën taa: “Mati o, gaantangi, tan ku u aki. Na pasa go, biga a ko lati kaa. Ndeti.” Nöö hën a piki hën a waka go ku de a wosu.

³⁰ Nöö hën de ko sindo a tafa fu de njan. Nöö hën Masa Jesosi tei di bëë, hën a da Masa Gadu tangi te a kaba, nöö hën a booko di bëë paati da de.

³¹ Nöö di juu dë, hën wojo u de ko limbo gbegeedee awaa. De ko sabi taa di sëmbë i si de ta si aki, nöö Masa Jesosi wë. Ma te u de kë mëni, nöö de an si ën möön. A go djee.

³² Nöö hën de taki ku deseei taa: “Hoo, aai baa, luku fa hati fuu bi fii piizii di a ta fan ku u a di pasi ta puu Gadu Buku da u.”

³³ Nöö di juu dë seei, hën de hopo bia toona go a Jelusalen baka. Nöö naandë de go miti ku dee ëlufu bakama u Masa Jesosi ku dee otowan makandi.

³⁴ Nöö di de dou, hën dee sëmbë taki da de taa: “Dee sëmbë aki o, Masa Jesosi hopo kumutu a dëdë tuu, biga Simon seei si ën.”

³⁵ Nöö hën dee sëmbë seei toona konda hii soni da de wante. De seti ku dee soni bi pasa ku de a pasi, di de nango a Emausu tefa de dou a wosu. Hën de toona konda fa de go sindo u njan, ku di fa Masa Jesosi booko di bëë paati da de nöö hën wojo u de ko limbo fu de sabi taa hën di dë.

Aki Masa Jesosi ko a dee bakama fëen, be de si ën.

Mat. 28:16-20; Maik. 16:14-18; Joh. 20:19-23; Tjab. 1:6-8

³⁶ Ma nöö dë an kaba u fan seei, nöö te u de kë si nöö Masa Jesosi dë taanputaanpu a de mindi dë pii. Nöö hën a da de odi, a taa: “Dee sëmbë, Masa Gadu musu dë ku unu ta da unu böö e.”

³⁷ Ma nöö fa de si ën dë, nöö de panta seei. De fëë biga de mëni taa jooka de ta si dë.

³⁸ Nöö hën a hakisi de taa: “Wë andi du unu un ta panta gaanfa sö? Andi mbei wan kë biibi?”

39 Biga luku mi maun ku mi futu aki ,ka de bi peka mi, Mi seepi wë disi e. Nöo un ko panjan mi fii luku. Biga jooka an ta abi mbeti, an ta a' bonu kumafa un si mi abi aki."

40 Wë nöo di a taki sö da de kaa, nöo hën a lei de hën maun ku hën futu.

41 Nöo di soni bigi da de te na soni. A da de piizii te kuma de an sa biibi ën. Nöo hën a hakisi de taa: "Wan abi soni u njan aki nöo?"

42 Hën de taki aai. Nöo hën de tei wan pisi fisi jasajasa hën de dëen.

43 Nöo hën a tei ën njan leti a de wojo dë, be de si.

44 Nöo hën a taki da de taa: "Wë hii dee soni aki tuu mi bi taki da unu di ten mi ku unu bi dë e, taa sö dee soni o pasa ku mi leti kumafa de dë sikifisikifi a dee buku u Mosesi ku dee tjabukama, ku di Kanda Buku."

45 Nöo hën a mbei de wojo ko limbo fu de musu fusutan di Buku u Gadu.

46 A taki da de taa: "Sö nöo a dë a di Buku e, taa di Paamusi Kõnu musu pena te a dëdë, ma a di u dii daka fëen a o weki hopo baka a dëdë.

47 Nöo di Buku taki tu taa de musu konda soni fëen da hii sëmbë, be de bia de libi ko ta waka nëen baka, be Gadu an hoi dee hogilibi u de a bëë möön. Nöo a Jelusalen fosu de musu seti konda di Buka, nöo de musu kondëen da hii pei nasiön sëmbë u goonliba. Sö a dë sikifisikifi a di Buku kaa.

48 "Wë nöo unu wë da dee sëmbë dee musu kondëen e. Biga unu da dee kotoigima dee si hii dee soni pasa aki tuu.

49 Ma nöo fa mi ta da unu di wooko aki, nöo un musu luku te di kaakiti di mi Tata bi paamusi unu ko ufö. Biga mi o mandëen ko da unu. A Jelusalen aki un musu dë ta luku ën e, fu te Gadu mandëen ko a unu liba."

Aki Masa Jesosi hopo go a liba.

Maik. 16:19-20; Tjab. 1:9-11

50 Nöo a baka u di dë, nöo hën de ta waka nango te de ko zuntu ku di köndë de kai Betania. Nöo hën a hopo maun a de liba hën a begi da de.

51 Nöo an kaba seei, hën Masa Gadu tei ën tja go a liba.

52 Nöo hën de fika dë ta wai ku ën ta gafëen te wan pisi, nöo hën de bia toona go u de a Jelusalen baka ku gaan wai.

53 Nöo hën de go sai dë a di Wosu u Masa Gadu ta gafa Gadu ta dëen tangi nöömö.

Dee woto u Masa Jesosi dee Johanisi sikifi

Wan wöutu a fesi.

Söö. Wë disa da di u fö pampia di ta taki u di libi u Masa Jesosi ku dee soni dee a fan di a bi dë a goonliba aki. Nöö wan u dee möön gaan mati fëen di bi ta waka ku ën hiniwanten, hën sikifi ën.

Nöö fa Johanisi mbei di pampia aki, nöö a tooka gaanfa ku di u Mateosi ku di u Maikusi ku di u Lukasi. Biga sômëni gaan soni de oto dii sëmbë taki Johanisi an taki, kuma di fa Masa Jesosi bi go a di sabana hën didibi ko tesi ën, ku di fa hën ku de dii bakama fëen bi go a di kununu liba hën a ko tooka a de wojo. An taki di fa Masa Jesosi ku dee bakama fëen bi sindo njan di lasiti njan. An taki andi di diingi ku di bëë kë taki di de bi njan a di Pasika daka dë. An taki kumafa a bi go begi a di djai de kai Gëtiseimani. Dee lö oto naandë an dë a di pampia u Johanisi aki seei.

Ma a di pampia aki nöö i sa lesi fa Masa Jesosi bi fan ku Nikodemusi di bi ko nëen a ndeti, ku di fa a fan ku di Samalia mujëe a di baaku wata. A di pampia aki i sa si fa a weki Lazalosi a dëdë. Di pampia aki ta konda finifini tu dee soni ku dee soni Masa Jesosi taki da dee bakama fëen bifö a dëdë, faa kötö de hati.

Nöö a 20:31 u di pampia aki, Johanisi seei taki faandi mbei a sikifi ën. A taa a sikifi ën fu te sëmbë lesi ën, nöö de musu biibi taa Masa Jesosi hën da di Kõnu di Gadu paamusi taa a o manda ko a goonliba faa heepi libisëmbë. Hën da di Womi Mii u Gadu seei. Biga te i biibi sö kaa, nöö joo feni di libi u teego a Gadu.

A di pisi aki, de o taki soni u di Sëmbë de kai Di Wöutu u Gadu.

Söö. Wë dee sëmbë, mi da unu piimisi e, taa mi kë konda wan gaan soni da unu aki.¹⁻² A dë sö taa bifö hii soni u mundu bi seti, nöö di Sëmbë de ta kai di Wöutu u Gadu bi dë gaanduwe kaa. Nöö di Sëmbë dë ku Gadu bi dë makandi. Hën seei wë bi da Gadu e.

³ Hën mbei hii dee soni dee dë a mundu tuu. Biga na wan soni seei dë di ko fëen seei, söndö hën mbei ën.

⁴ Hën abi libi, nöö te wan sëmbë i feni libi nëen kaa, nöö i kumutu a dungu ko a limbo. Biga hënseei da di limbo.

⁵ Nöö di limbo dë ta sëndë seei a di dungu. Hii fa i si di dungu ta mbei möiti u tapëen, ma an sa tapëen möönsö.

⁶ Söö. Wë u dë te wan pisi, hën wë Masa Gadu manda wan womi de kai Johanisi ko,

⁷ faa konda soni a fesi u di Limbo di o ko abiti möön. Nöö fa a o konda soni fëen dë, a o kondëen fu hii sëmbë musu jei, be de biibi dee soni a o taki.

⁸ Ma nöö di Johanisi dë, nëen da di Limbo eti e, ma ko a ko nöö faa konda dee soni dee a sabi u di Sëmbë di da di Limbo.

⁹ Biga di Sëmbë di o ko dë, hën da di tuutuu Limbo di sa limbo hiniwan sëmbë wojo. Nöö abiti möön nöö a o ko a lanti wajaa u si.

¹⁰ Nöö di Sëmbë di u ta konda soni fëen aki, nöö a ko a di goonliba aki tuu e, di goonliba di hënseei bi mbei. Ma dee sëmbë bi dë a di ten dë, de an bi sabi ambë dëen.

¹¹ Dee Dju sëmbë dee bi musu dë sëmbë fëen seei an tei ën u soni.

¹² Ma tókuseei sèmbè bi dè dee bi tei èn u soni, hèn de ko biibi nëen liba. Nöö hiniwan sèmbè di tei èn sò kaa, nöö sò wan sèmbè a da i di leti fii ko miii u Gadu.

¹³ Ma na kumafa de ta pali miii a libisèmbè fasi e. Nönö. Ma fu di Gadu hèn o wooko sò a i, nöö hèn mbei joo ko miii fèèn.

¹⁴ Nöö di Sèmbè u ta konda soni fèèn aki di de ta kai di Wöutu u Gadu dè, a ko wan libisèmbè tuu e, nöö hèn a ko libi a u mindi fu wan pisiten. Nöö u seei bi si di waiti fèèn di a abi. Nöö di waiti u si nëen naandè, a dè di waiti di di wan kodo womi mii u Masa Gaangadu tō nöö sa abi. Biga fa a libi a u mindi aki, nöö nëen u si fa Gadu abi bunuhati u libisèmbè tjika. Nöö nëen u si tu kumafa a sabi hii soni gbelingbelin tjika, „leti kumafa a dè a Gadu wojo.”

¹⁵ Nöö kumafa u taki dè, Johanisi hèn bi ta konda soni fèèn. Nöö hèn di a si èn, hèn a bai taa: “Söö. Un si di Sèmbè dè nö? Hèn wè mi bi ta konda da unu taa o ko a mi baka di hebi gaanfa möön mi. Mi, djunsudjunsu aki ufò de pali mi, ma hèn a bi dè gaanduwe kaa a mundu. Nöö hèn wè i si di dè e!”

¹⁶ Nöö di Sèmbè di i si Johanisi taki dè, nöö u seei ko sabi èn tu e, dee sèmbè. „Hèn da Masa Jesosi Keesitu.” Nöö fa di bunuhati fasi u Gadu dè nëen tjika dè, nöö u tuu ta feni sòmèni bunu nëen baka na baka te a hia.

¹⁷ Biga a Mosesi Gadu bi manda dee wèti ko da u fuu hoi. Ma a Jesosi Keesitu a mbei u ko sabi di bunuhati fasi fèèn di a abi. Hèn a mbei u ko sabi soni gbelingbelin tu, „leti kumafa a dè a Gadu wojo. Sò wanlò gaangaan bunu u feni a Masa Jesosi e.”

¹⁸ Dee sèmbè, fa Masa Gadu sai dè, na wan daka seei libisèmbè si èn ku wojo möönsò e. Ma di wan kodo Womi Mii fèèn dè, di hèn ku èn dè wan makandi te wata an sa pasa a de mindi, hèn mbei u ko sabi èn awaa.

A di pisi aki de manda sèmbè go fini Johanisi di Dopuma.

Mat. 3:1-12; Maik. 1:1-8; Luk. 3:1-18

¹⁹ Wè nöö di juu Johanisi ko dè, nöö dee gaan hedima u Dju bi ta dè a di köndè de ta kai Jelusalen. Nöö hèn dee hedima dè manda wanlò begima u Dju ku wanlò oto sèmbè ta wooko ku de makandi a di Gaan Wosu u Masa Gaangadu a Jelusalen dè, u de go hakisi Johanisi ee ambè dèèn.

²⁰ Nöö hèn dee sèmbè dè nango tefa de go dou a Johanisi, hèn de hakisi èn ee hèn da di Keesitu, di Heepima di Gadu bi paamusi taa a o manda ko a goonliba.

Nöö Johanisi an ganjan de. A piki de gbelin taa: “Nönö, na mi da di sèmbè dè e.”

²¹ Nöö hèn de toona hakisi èn möön taa: “Wè a sa kë taa i da Elia di tjabukama u Gadu, hèn weki toona ko nö?” Hèn a piki taa: “Nönö, nëen disi e.”

Hèn de taa: “Wè di oto Tjabukama di Gadu bi o manda ko wè, hèn da i nö?”

Hèn a toona piki de möön taa: “Nönö, nëen da mi e.”

²² Hèn de taa: “Wè nöö ambè seei da i? Taki da u bumbuu, fuu sa toona go piki dee sèmbè dee manda u ko a i aki. Andi i ta taki fii seei?”

²³ Nöö hèn a taa: “Wan bi jei fa di tjabukama u Gadu de kai Jesaaja bi sikifi buta a di Buku u Gadu nö? A taa:

U ta jei wan tòngö kuma wan basia ta bai a di sabana taa,

‘Un seeka di pasi oo, be a ko dè tololoo da Masa!

„Un seeka di libi fuunu buta a tatai liba!”

Wè di sèmbè di Jesaaja bi taki abi di tòngö dè, nöö hèn wè disi e. Awaa di soni ta pasa kumafa Jesaaja bi taki.” Sò Johanisi piki dee sèmbè.

24 Nöo fa de ko ta hakisi Johanisi dee soni dë, nöo wanlö sëmbë u di Dju keiki paatëi de kai Falisei bi dë a dendu tu.

25 Nöo hën de toona hakisi ën taa: “Wë ja dë di Keesitu. Ja dë Elia. Ja dë di oto Tjabukama tu. Nöo andi mbei i ta dopu sëmbë u du?” Sö de hakisi ën.

26 Hën a taa: “Wë nõnõ, fa mi ta dopu sëmbë aki nõo an bigi sô e. Biga ku wata nöo mi ta dopu de. Ma wan sëmbë dë a unu mindi di wan sabi, nöo hën o du wan möön gaan wooko.

27 Hën wë mi ta taki da unu taa mi ta seeka di pasi da. Nöo fa a sai dë, a hei teee wa hei tjika fu mi sa dë futuboi fëen seei. Na di susu fëen seei mi sa lusu puu nëen futu.”

28 Nöo di kamian ka de ko ta fini Johanisi dee soni dë, a dë zuntu ku di kõndë de kai Betania, a di oto së banda u di lio de kai Joodan Lio. Ala wë Johanisi ta dopu dee sëmbë.

A di pisi aki Johanisi ta taki soni u di Sikapu Mii u Gadu.

29 Nöo di dobooko fëen, nöo hën Johanisi si Masa Jesosi ta waka ta ko nëen. Hën a taa: “Un luku di Sikapu Mii u Gadu dë e. Hën wë Gadu manda faa ko paka fu dee hogi du fu hii libisëmbë, kumafa de ta kii sikapu ta paka paima.”

30 Nöo hën wë mi bi ta konda da unu taa mi ta seeka di pasi da. Nöo a hebi möön mi e. Biga a bi dë gaanduwe kaa bifõ de pali mi.

31 “Nöo mi seepi tu, ma bi o sabi ën. Ma nöo fu soni fëen musu ko wajaa a limbo da u dee Isaëli sëmbë aki, hën mbei i si mi ko ta dopu sëmbë a di wata aki.” Sö Johanisi taki u Masa Jesosi.

32 Nöo un haika bunu fa Johanisi konda fëen e. A taa: “Mi seepi si di Akaa u Masa Gaangadu saka ko kuma wan pomba ko tan a di Sëmbë dë liba e.

33 “Nöo ma bi o sabi ën, ma Masa Gadu di manda mi fu mi dopu sëmbë aki, nöo hën bi taki ën da mi a fesi. A taa di sëmbë di mi o si di Akaa fëen saka ko fika nëen liba, nöo hën da di Sëmbë di o dopu sëmbë ku di Akaa u Gadu.

34 “Nöo di soni Gadu taki da mi dë, mi si ën tuu e. Nöo fëen mbei wë mi ta konda da unu gbelingbelin taa di Sëmbë i si dë, hën da di Womi Mii u Masa Gaangadu.” Sö Johanisi taki da de di ten dë.

A di pisi aki sëmbë ta o seti waka

a Masa Jesosi baka.

35 Di dobooko möön, hën Johanisi ku tu u dee bakama fëen dë taanputaanpu a di wan seei kamian naandë.

36 Te wan pisi hën Johanisi si Masa Jesosi ta waka ta pasa, hën a taa: “Un luku di Sikapu Mii u Gadu, hën wë di dë e.”

37 Nöo di de tu sëmbë dë jei a taki sô, nöo hën de tei nëen baka wante ta faakëen.

38 Te wan pisi hën Masa Jesosi bia luku, hën a si de ta ko nëen baka. Nöo hën a hakisi de taa: “Andi un kë sô baa?”

Hën de piki taa: “Wë Labi, wë u kë ko sabi unsë i ta dë.” (“Labi” hën da “Mësitë” a de tõngõ.)

39 Hën a taa: “Wë antoobi. Un ko luku nöo woon si.”

Nöo hën wë de go. Nöo a di juu ten de go dë, nöo a bi dë kuma fõ juu sapate, hën de fika ku ën dë tefa ndeti.

40 Wë nõõ de tu sëmbë dee go ku Masa Jesosi naandë, wan u de de kai Andiasi, nöo a abi wan baa fëen de kai Simon.

41 Nöo hën wë di de kumutu a Masa Jesosi dë, hën Andiasi go nëen baa Simon wante. Hën a taki dëen taa: “Womi e, womi, u feni di sëmbë baa, di Gadu bi paamusi taa a o manda da u faa ko Kõnu fuu.”

⁴² Nöo hën a tjëen baaa Simon go a Masa Jesosi. Nöo hën wë di Masa Jesosi si de ko nëen, nöo hën a fan ku Simon taa: “Di mii u Jonasi aki, fa u dë aki de ta kai i Simon. Ma bakaten nöo de o bia ta kai i Kefasi e.” (Nöo Kefasi, hën kë taki “gaan sitonu.” Hën seei da “Petuisi”.)

Aki Nataniëli ko sabi

Masa Jesosi.

⁴³ Nöo di dobooko fëen möön, nöo hën Masa Jesosi kë go a di pisiwata de kai Galilea. Hën a suku wan womi de ta kai Filipi tefa a si ën. Hën a taa: “Womi, mi kë i ko go ku mi e, baa.”

⁴⁴ Nöo di soni mbei a kai Filipi. Biga a dë sëmbë u wan köndë u Galilea de kai Betisaida. Hën da di köndë u Andiasi ku ën baaa Petuisi tu.

⁴⁵ Ma nöo ufö de go, nöo hën Filipi seei go a wan womi de kai Nataniëli, hën a fan ku ën taa: “Womi, u feni di sëmbë di Mosesi ku dee fesiten tjabukama bi sikifi soni fëen e. Di sëmbë dë, hën da Jesosi, di Mii u Josëfu u di köndë de kai Nazalëti.”

⁴⁶ Nöo hën Nataniëli hakisi ën taa: “Ma wan bumbuu soni sa kumutu a Nazalëti nö, womi?”

Hën a piki ën taa: “Wë ko luku nöo joo si.” Hën de hopo nango a Masa Jesosi.

⁴⁷ Nöo hën wë di Masa Jesosi si Nataniëli ta waka ta ko nëen, hën a taa: “Un luku wan sëmbë ta ko aki. Bumbuu Isaëli sëmbë e. Biga aan ten seei a ta ganjan sëmbë möönsó.”

⁴⁸ Nöo hën Nataniëli hakisi ën taa: “Wë unfä i du sabi mi baa?”

Hën a piki ën taa: “Mi bi si i sabi gaanduwe kaa a di ten i bi dë a di figa pau basu, ufö Filipi ko kai i.”

⁴⁹ Nöo di soni bigi da Nataniëli tee, hën a taa: “Ee, aai Mësitë, i da di Mii u Gadu tuu e. I da di Könu fu u dee Isaëli sëmbë.”

⁵⁰ Nöo hën Masa Jesosi taki dëen taa: “Awa, wë di mi taki sö da i taa mi bi si i a di figa pau basu, hën mbei i biibi sö nö? Wë joo si möön gaan foombo soni möön di dë e.”

⁵¹ Biga mi taki da unu gbelin, taa a a’ wan ten woon si mundu jabi wajaa, nöo dee basia u Masa Gadu Köndë o kumutu a Mi di ko Libisëmbë Mii aki ta subi nango a Gadu ta saka ta ko.” Sö Masa Jesosi fan ku ën.

2

Aki Masa Jesosi go a wan touu.

¹ Nöo baka tu daka u dee soni u taki dë, nöo hën de hoi wan tööu wosu a di köndë u Galilea de kai Kana, nöo di mama u Masa Jesosi ko a di piizii.

² Nöo de bi kai Masa Jesosi ku u dee bakama fëen tu, fuu ko a di piizii.

³ Nöo hën wë u dë te wan pisi, hën di win u ta bebe ko kaba. Hën Masa Jesosi mama go nëen go taki dëen taa: “Wë Baa o, gaan soni, di win u dee sëmbë kaba.”

⁴ Hën Masa Jesosi piki ën taa: “Faandi mbei i ko a mi? Juu u mi an kisi eti e.”

⁵ Ma nöo hën di mama bia fan ku dee futuboi dee ta wooko a di wosu taa: “Haika e. Di soni di i si a o taki da unu, nöo hën fuun du e.”

⁶ Nöo de bi abi sikisi gaan sitonu djogu naandë. A dee djogu dë de bi guwenti u lai wata u wasi kumafa di wëti u dee Dju bi dë, nöo hiniwan u dee djogu ta hoi kuma wan höndö liti wata sö.

⁷ Nöo hën Masa Jesosi fan ku dee futuboi taa be de go ba wata lai a dee djogu naandë tuu. Nöo hën de go ta tja di wata ta tuwë a dee sikisi gaan gindi djogu dë te de fuu pöö.

⁸ Hën a taa: “Un go ba so u di wata tja go da di hedima u di piizii be a tesi en luku.”

Nöö hën de ba di wata tja go da di hedima,

⁹ nöö hën di hedima tesi en te a kaba. Ma nöö bifö de bi tjëen go dëen, nöö di sösö wata dë bi bia ko win kaa. Nöö fa di hedima tesi en dë, an sabi naasë di win kumutu. Dee futuboi wanwan nöö sabi, biga de bi tja di wata lai a dee djogu.

Nöö hën di hedima u di piizii kai di tööuma a së.

¹⁰ A taa: “Womi, unfa di soni waka? Biga hii sëmbë lobi u da di suti win a fesi, nöö te dee sëmbë bebe te a tjika de ufö de o ta da de di möön sösö wan awaa. Ma nöö i ja du sö. I hoi di suti win a baka hën i buta de bebe di sösö wan fosu, ufö i ko ta da di möön suti wan awaa. Mi kë sabi faandi mbei.”

¹¹ Wë nöö fa di soni pasa dë a Kana a di pisiwata u Galilea naandë, nöö hën da di fosu foondo wooko Masa Jesosi du e. Ku en a mbei sëmbë si di Gadu fasi fëen di a abi, nöö hën u dee bakama fëen ko biibi möön taanga nëen liba.

¹² Nöö hën a baka u di dë, hën Masa Jesosi ku en mama ku dee baa fëen ku u dee bakama fëen tuu, hën u go a di köndë de kai Kapenaumi, hën u tan ala wantu daka.

Aki Masa Jesosi go a di Wosu

u Gadu a Jelusalen.

Mat. 21:12-13; Maik. 11:15-17; Luk. 19:45-46

¹³ Nöö di ten dë, di gaan daka fuu dee Dju de kai Pasika, juu fëen ko zuntu faa kai. Nöö hën Masa Jesosi tei pasi, nöö hën a go a Jelusalen.

¹⁴ Nöö hën a nango tefa a go dou a di gadii u di Gaan Wosu u Masa Gadu. Nöö hën a luku, hën a si hia sëmbë sai dë ta sei kau, ta sei sikapu, ta sei pomba. So sëmbë dë sindosindo ta tooka möni da dee sëmbë dee ta kö dë.

¹⁵ Nöö di a si dee soni de ta du a di Wosu, hën a tei wanlö tatai mbei wipi tefa a kaba. Nöö hën a buta ku dee sëmbë ta jaka de ku dee kau u de ku dee sikapu u de tuu ta puu a di gadii dë. Hën a ta du soni a di kamian teee, ta tombi dee tafa u dee tookamönima ta tuwë djolou a goon ta paaja dee möni fanjaan a goon dë.

¹⁶ Nöö hën a bai dee sëmbë ta sei pomba dë taa: “Un hopo kumutu aki ku dee soni fuunu dë, biga di wosu u mi Tata aki na wojowojo a dë e!”

¹⁷ Nöö fa a du dë, nöö hën wë u dee bakama fëen ko fusutan wan soni bi dë a Gadu Buku sikifisikifi taa: “Di biinga di mi ta biinga da di wosu fii, Gadu, a o njan di kaakiti u mi tuu fiaa.”

¹⁸ Wë nöö di soni Masa Jesosi du naandë an kai ku dee hedima u Dju seei. Hën de hakisi en taa: “Womi, ambë manda i fii du di soni naandë? Un maaka joo da u fuu sabi taa Gadu da i leti u du sö.”

¹⁹ Hën Masa Jesosi piki de taa: “Un sa booko di Wosu u Masa Gadu aki, nöö baka dii daka mi o toona hopo en baka.”

²⁰ Hën de taa: “Höön, föteni-ku-sikisi jaa longi de tei kaa ta mbei di Wosu aki, nöö hën i taa i sa hopo en a dii daka dendu nö?”

²¹ Ma nöö fa Masa Jesosi ta fan naandë, na di wosu dë a ta mëni. Ma a ta mëni hënseei sinkii. Biga hën da di Wosu u Gadu kaa ka Gadu ta dë. Nöö Masa Jesosi sabi taa a bakaten nöö de o kii en, ma a di u dii daka fëen nöö a o toona hopo baka.

²² Nöö hën u dë te a bakaten di a hopo baka a dëdë tuu, bifö u dee bakama fëen ko mëni taa sö wan soni a bi taki. Nöö hën u ko biibi hii dee soni dee dë sikifisikifi a Gadu Buku ku dee soni dee Masa Jesosi seei bi fan ku u tuu awaa.

²³ Wë ma nöö di juu ten dë di Masa Jesosi dë a Jelusalen faa njan di Pasika dë, nöö a du sëmëni foombofoombo soni e, nöö fëen mbei sëmëni sëmë ko biibi nëen liba taa Gadu hën mandëen.

²⁴ Ma hii fa de biibi ën dë seei, ma Masa Jesosi an ta futoou de möönsö. An hopo hënseei tuwë da de, biga a sabi libisëmë fasi fa de dë.

²⁵ Fa a sai dë, an bi a' fanöudu u sëmë musu konda soni u libisëmë dëen, biga a sabi gbelin hii soni di dë a de hati kaa.

3

A di pisi aki Masa Jesosi ku Nikodemusi ta fan.

¹ Nöö di juu dë, wan Faliseima bi dë de ta kai Nikodemusi, nöö a bi dë wan u dee kuutuma u dee Dju.

² Nöö hën wë a ko a Masa Jesosi a wan ndeti gbolo. A kai ën: "Mësitë o." Hën a piki.

A taa: "Wë u sabi taa i da wan leima di Gadu seei manda ko. Biga na wan sëmë sa du dee gaan foombo wooko dee i ta du, ee na Gadu dë ku i."

³ Nöö hën Masa Jesosi piki ën taa: "Wë a bunu di i taki sö, mati. Ma mi o taki wan soni da i, nöö tuutuu soni seei a dë. Mi taki e, ee wan sëmë i dë, nöö de an toona pai i fii feni wan njunjun libi baka, nöö ja o sa dë a dendu u dee sëmë Gadu ta tii."

⁴ Nöö hën Nikodemusi hakisi ën taa: "Wë nöö unfa de o du pai wan sëmë möön di ko gaangan sëmë kaa? A o toona go nëen mama bëë dendu, faa pai ën di u tu pasi nö?"

⁵ Hën a piki ën taa: "Be mi taki wan soni da i gbelin, mati. Fa de pai i a libisëmë fasi aki, nöö an tjika eti e. Ma di Akaa u Gadu hën musu toona pai i a wan hii oto fasi baka. A musu da i wan njunjun libi a i akaa ufö joo sa dë a dendu u dee sëmë Gadu ta tii."

⁶ Biga te de pai i a libisëmë fasi, nöö i ta feni libi a i sinkii nöö. Ma te di Akaa u Gadu pai i, nöö i ta feni libi a i akaa.

⁷ "Nöö fa mi ta fan ku i aki, taa de musu toona pai i baka, nöö an musu dë gaan soni da i sö e."

⁸ Biga na hii soni mbei fii sa fusutëen wantewante.

"Luku fa u dë aki, di ventu ta böö nango ka a kë. Fa a ta mbei vuuu dë, di bai fëen nöö i ta jei, ma ja sabi naasë a ta kumutu, ja sabi naasë a nango tu. Wë sö nöö a dë tu ku hii dee sëmë dee di Akaa u Gadu mbei ko pai baka fu de toona feni di njunjun libi u ta taki aki. Ja o fusutëen, ma joo sabi nöö taa sö a dë."

⁹ Ma nöö fa Masa Jesosi ta fan dë, di soni toobi Nikodemusi eti. Hën a hakisi taa: "Unfa seei di soni dë o sa waka maingë?"

¹⁰ Hën Masa Jesosi toona piki ën taa: "Wë mati o, fa i dë wan gaan leima u Isaëli aki, nöö hën ja fusutan dee soni u ta taki aki eti ö?"

¹¹ "Wë haika e. Mi o taki da i gbelin taa uu sabi andi u ta taki e. Biga dee soni dee u si nöö de wë u ta konda. Ma nöö wan kë piki dee fan fuu."

¹² Wë nöö ee wan kë piki te mi ta konda soni u di goonliba aki da unu, nöö unfa woon du piki te mi ta konda soni u Gadu?

¹³ Biga na wan sëmë go ka Masa Gadu ta dë wan daka, boiti mi wanwan tó di kumutu nëen ala ko dë Libisëmë Mii aki.

¹⁴ "Luku di soni di bi pasa a fesiten a di sabana. Gadu manda Mosesi faa mbei wan köpö sindeki hopo buta a liba, nöö hiniwan sëmë di luku di sindeki dë ku biibi, nöö a ko bunu kaa. Wë nöö söseee de o hopo Mi di ko dë Libisëmë Mii aki a liba tu e."

15 Nöo ee wan sëmbë i ta biibi a mi, nöo joo feni libi a Gadu fu teego.

16 “Wë biga Masa Gadu lobi libisëmbë sò tee a da de di wan kodo Womi Mii fëen di a abi. Nöo ee wan sëmbë i ta biibi a di Mii fëen aki liba, nöo ja o lasi go kaba a sösö möönsö, ma i abi di libi u teego kaa.

17 Biga fa Masa Gadu manda di Mii fëen ko a goonliba aki, nöo an mandëen ko faa kuutu sëmbë tuwë go da sitaafu e. Ma a mandëen ko faa hai sëmbë puu a didibi basu, be de feni di libi u teego.

18 “Nöo ee wan sëmbë i ta biibi a di Mii u Gadu aki liba, nöo ja o kisi sitaafu a Gadu e. Ma ee ja kë biibi ën, nöo Gadu kuutu i kaa fii kisi di sitaafu dë. Biga ja kë piki taa di Sëmbë aki, hën da di wan kodo mii u Gadu di a manda ko.

19 “Nöo di soni aki sò, hën da di soni mbei sò wan sëmbë musu kisi sitaafu. A dë sò taa Gadu manda limbo ko a goonliba u limbo libisëmbë wojo, ma nöo de an këen. Fa de sai dë, de lobi di dungu möön di limbo. Biga de an kë disa di hogilibi u de fu de ko a di sè u limbo.

20 Biga di sëmbë di ta du hogi, hën ta buuse limbo. An o ko seei ka di limbo sa kai nëen, fu di an kë u sëmbë si dee hogi a ta du.

21 “Ma nöo ee wan sëmbë ta libi leti, nöo hën aan toobi ee di limbo kai nëen. Biga a kë u de si taa Gadu dë ku ën a dee soni a ta du.”

Sö Masa Jesosi fan ku Nikodemusi di ndeti dë.

A di pisi aki sò, Johanisi di Dopuma ku dee bakama fëen ta taki soni u Masa Jesosi.

22 Nöo a baka u di dë, nöo hën Masa Jesosi ku u dee bakama fëen kumutu la Jerusalem dë, nöo hën u go a wan oto kamian u Judea, fuu ku ën sa dë u wanwan ufö. Nöo hën u go dë ala te wan pisi, hën sëmbë ta ko a u ala fuu dopu de.

23-24 Wë nöo di juu dë, nöo de an bi buta Johanisi a dunguwosu eti e. Nöo hënseei dë a wan kamian de kai Anon ta dopu sëmbë tu. Nöo di Anon dë, a dë zuntu ku di köndë de kai Salim, nöo naandë bi abi hia wata, hën mbei Johanisi ta dopu sëmbë ala. Nöo sëmëni sëmbë ta ko nëen tu faa dopu de.

25 Te wan pisi hën dee bakama u Johanisi ku wan oto sëmbë u Dju ko ta fia wan gaan fia a unfi a musu wasi ufö i sa ko limbo a Gadu wojo.

26 Nöo hën dee bakama u Johanisi ko nëen, hën de taki dëen taa: “Wë Mësitë, ja jei nö? Di sëmbë u bi si ku i a di oto sè banda ala, di i bi ta konda soni fëen nöömö dë, a dë leti a wan kamian ala ta dopu sëmbë seei tee a hia. Hii sëmbë nango nëen ala gililili sò ta disa i.”

27 Nöo hën Johanisi piki de taa: “Un haika e, dee sëmbë. Na wan sëmbë sa feni sò wan hei ee na Gadu hën hei ën sò e.

28 Nöo wan bi jei fa mi bi fan ku unu kaa nö, taa na mi da di Paamusi Könu, ma Gadu manda mi ko nëen fesi nöö.

29 “Wë nöo fa di soni un taki ta pasa dë, nöo a dë leti kuma te wan womi o tööu ku wan mujëe, a o abi wan mati fëen ta seeka soni dëen. Nöo te di mati seeka te a kaba kaa, nöo a o go dë fëen pii, ta haika ee unfi soni ta waka. Nöo ee a si taa a ta waka bunu, nöo a o wai seei gaanfa. Na sò nö? Wë nöo di wai di mati u di tööuma ta wai dë, nöo hën da di wai di miseei ta wai aki e.

30 Biga di Sëmbë dë hën musu ta hei nango nöömö, ma mi musu ta saka nango möönmöö.

31 “Biga wë di sëmbë di kumutu a Gadu nöo hën hei möön hii sëmbë. Mi, a goonliba aki de pai mi e. Hën mbei goonliba sëmbë nöo mi dë, nöo te mi ta fan mi ta taki soni nöö kumafa goonliba sëmbë sa fusutan soni. Ma di Sëmbë dë, fa a sai dë, hën a musu hei möön hii sëmbë biga a Masa Gaangadu a kumutu.

³² Nöo fa a kumutu nëen dë, nöo a ta konda dee soni dee a si ku dee a jei a Gadu ala, ma tökuseei libisëmbë an kë tei dee soni a ta taki.

³³ “Ma ee wan sëmbë i ta piki taa dee soni a ta taki dë, de dë tuu, nöo hën da i ta sitampu taa dee soni Gadu seei ta taki, de dë tuu.

³⁴ Biga di Sëmbë dë, fa i si a sai dë, nöo Gadu wë mandëen e, nöo a ta konda soni leti kumafa Gadu ta dëen. Nöo i si fa Masa Gadu dëen di Akaa fëen dë nö? An dëen hafuhafu e, ma a dëen tuu seei ku telu faa sa ta wooko nëen liba nöömö.

³⁵ “Di sëmbë i si u ta taki aki sô, nöo Masa Gadu seei Mii a dë e, dee sëmbë. Nöo hën Tata lobi ën tee, nöo hën a buta hii soni nëen maun faa ta tii.

³⁶ Nöo ee wan sëmbë i ta biibi a di Womi Mii u Gadu i si dë, nöo i abi di libi u teego kaa. Ma ee wan sëmbë ja kë biibi ën, nöo ja o feni di libi dë möönsô, biga di hatiboonu u Gadu dë a i liba kaa.”

Sô Johanisi fan ku dee bakama fëen di daka dë te a kaba.

4

Aki Masa Jesosi ta fan ku

wan mujëe u Samalia.

¹ Wë nöo di juu dë, hën dee Faliseima ko jei taa sëmbë ta ko a Masa Jesosi te a hia faa dopu de. Nöo de ta fika ku ën dë ta ko bakama fëen, teefa dee bakama u Masa Jesosi ko hia möön dee u Johanisi seei.

² Ma nöo fa u ta taki aki seei, na Masa Jesosi ta dopu dee sëmbë e, ma u dee bakama fëen, u ta dopu de.

³ Nöo hën wë di Masa Jesosi ko jei taa sô dee Faliseima ko sabi fëen kaa, nöo hën a kumutu a Judea dë wante faa toona go a Galilea.

⁴ Ma nöo a musu latja pasa a di pisiwata de kai Samalia ufö a sa go dou.

⁵ Nöo hën u nango te u go dou a wan köndë u Samalia de ta kai Sikali. A dë zuntu ku wan pisi goon di di gaan sëmbë fuu de kai Jakopu bi da hën mii Joséfu.

⁶ Naandë Jakopu bi diki wan baaku wata fëen, nöo a sai dë eti. Wë nöo di juu dë, Masa Jesosi ko wei u waka, nöo hën a go sindo a di baaku bandja dë. Nöo a bi dë wan soni u tuwalufu juu sô u didia.

⁷ Te wan pisi nöo hën wan mujëe u di köndë naandë ko u ko ba wata. Hën Masa Jesosi hakisi ën taa: “Mujëe o, mi begi i, da mi wan piki wata mi bebe.”

⁸ (Di juu dë, u dee bakama fëen bi go a di köndë ganda u go bai sondi u njan.)

⁹ Nöo hën di mujëe hakisi ën taa: “Wë womi, unfa i sa hakisi mi wata u mi da i fii bebe? Na i da wan Dju nö? Wë mi da wan Samalia mujëe.” (Biga dee Dju ku dee Samalia sëmbë an ta koti.)

¹⁰ Nöo hën Masa Jesosi piki ën taa: “Wë mujëe, ee i bi sabi di bunu di Gadu kë da i, ku ee i bi sabi di Sëmbë ta hakisi fii dëen wata aki, nöo i bi o bia begi ën faa da i kuwakuwa wata fii sa feni libi nëen.”

¹¹ Nöo hën di mujëe piki ën taa: “Wë womi, fa i ta fan dë, nöo ja abi na wan wojo sondi naandë fii kisi wata, ufö di baaku aki fundu poi tu. Nöo naasë joo feni di wata dë u da mi?”

¹² Fa i sai dë, i hei möön di gaan sëmbë fuu de kai Jakopu nö? Biga di baaku i si aki, nöo hën wë diki ën da u, nöo hën seepi bi ta bebe di wata fëen, hën ku dee mii fëen ku dee mbeti fëen tuu.”

¹³ Nöo hën Masa Jesosi toona taki taa: “Wë di sëmbë ta bebe di wata aki sô, nöo dëewata ta toona kisi ën.

14 Ma di sɛmbɛ di o bebe di wata di mi o dɛɛn, nɔɔ hɛn dɛɛwata an o kisi mɔɔnsɔ a mundu. Biga di wata di mi o dɛɛn, nɔɔ a o dɛ nɛɛn dendu kuma wan kiikihedi ta kule wata ta ko nɔɔmɔ. An o kaba mɔɔnsɔ. Nɔɔ so wan sɛmbɛ abi di libi u teego e.”

15 Nɔɔ hɛn di mujɛɛ taki dɛɛn taa: “Wɛ womi o, wɛ mi kɛ di wata dɛ e baa, fu dɛɛwata an musu kisi mi mɔɔn. Nɔɔ an o dɛ u mi ta ko aki ta ko ta ba wata hiniwanten mɔɔn.”

16 Hɛn Masa Jesosi taki dɛɛn taa: “Wɛ antoobi. Go kai i manu be i ku ɛn ko.”

17 Hɛn di mujɛɛ taa: “Ambɛ? Mi nɔ? Ma a’ manu e!”

Hɛn Masa Jesosi piki ɛn taa: “Sɔɔ mujɛɛ, fa i piki naandɛ, ja ganjan e. Ja a’ manu tuu.

18 Biga feifi womi i tei tuwɛ kaa. Nɔɔ di i ku ɛn sai naandɛ fa u dɛ aki, nɔɔ an dɛ manu fii tu. Hɛn mbei mi taa i piki bunu.”

19 Nɔɔ hɛn di mujɛɛ taa: “Aai, womi, awaa mi si taa i da wan tjabukama u Gadu tuu.

20 “Wɛ nɔɔ dee gaan sɛmbɛ fuu bi ta begi Gadu a di kuun aki sɔ. Ma un dee Dju taa Jelusalen ala da di mɔɔn bunu kamian fuu ta begi Gadu. Nɔɔ unfa i ta taki u di soni dɛ?”

21 Hɛn Masa Jesosi taki dɛɛn taa: “Mujɛɛ, mi o taki wan soni da i aki, nɔɔ i biibi mi e, taa wan ten ta ko, nɔɔ na a di kununu i si aki, na a Jelusalen tu woo go u go begi Gadu di Tata fuu mɔɔn. ɁBiga di kamian ka fuu begi ɛn, nɛɛn o dɛ di gaan soni mɔɔn.”

22 “Ma nɔɔ haika e. Fa i si un dee Samalia sɛmbɛ ta begi Gadu aki sɔ, ma an dɛ taa sabi un sabi ɛn ufɔ un ta begi ɛn e. Ma nɔɔ u dee Dju uu sabi ɛn kaa bifɔ u ta begi ɛn, biga a u di heepi u Gadu ta kumutu ta paaja go a oto sɛmbɛ.

23 “Ma mi taki e, di soni dɛ seei an o dɛ gaan soni mɔɔn tu. Biga wan ten o ko, nɔɔ a dɛ kaa tu, taa te sɛmbɛ o begi Gadu u Tata, nɔɔ ku hii dɛ akaa de o ta begi ɛn ta hopo ɛn nɛ a wan gbelingbelin fasi sɔndɔ ganjan. Nɔɔ te i begi ɛn sɔ kaa, nɔɔ hɛn da i ta begi ɛn a wan leti fasi. Nɔɔ sɔ wanlɔ sɛmbɛ Gadu ta suku u ta begi ɛn e.

24 “Biga fa Gadu sai dɛ an dɛ libisɛmbɛ ku sinkii e, ma a dɛ akaa. Nɔɔ ee wan sɛmbɛ i kɛ begi ɛn, nɔɔ ja musu begi ɛn a wan dɔɔsɛ fasi nɔɔ e, ku ganjan. Nɔnɔ. Ma i musu ta hopo ɛn nɛ ta begi ɛn a wan tuutuu fasi ku hii i akaa.”

25 Nɔɔ hɛn di mujɛɛ taa: “Wɛ i sabi nɔ? Un boo disa di oto ufɔ e, baa. Biga di Kɔnu di Gadu bi paamusu u taa a o manda ko, nɔɔ te a ko, nɔɔ a o lei u hii soni mɔɔn fini.”

26 Nɔɔ hɛn Masa Jesosi piki ɛn taa: “Mujɛɛ o, di Sɛmbɛ i taki dɛ, hɛn wɛ i si ta fan ku i aki kaa e.”

A di pisi aki dee bakama u

Masa Jesosi toona ko.

27 Nɔɔ di juu dɛ, nɔɔ u dee bakama u Masa Jesosi toona ko nɛɛn. Nɔɔ di u si taa a ta fan ku wan ɁSamalia, mujɛɛ nɔɔ a bigi da u seei. Ma tɔkuseei na wan fuu hakisi ɛn ee andi a ta taki, ee nasɔ un oto de ta da naandɛ.

28 Nɔɔ fa u mbei dɛ, hɛn di mujɛɛ tuwɛ di djogu fɛɛn disa dɛ, hɛn a kule go a kondɛ ganda. Nɔɔ hɛn a go kai dee sɛmbɛ ala taa:

29 “Un ko luku wan womi ala, dee sɛmbɛ. A konda hii soni dee mi bi du tuu da mi. A sa kɛ hɛn da di Kɔnu di Gadu bi o manda da u nɔ?”

30 Nɔɔ fa a fan dɛ, nɔɔ hɛn dee sɛmbɛ hopo gililili nango a Masa Jesosi.

31 Nɔɔ di juu dɛ, u dee bakama bi dɛ a di baakuwata dɛ ta begi Masa Jesosi taa: “Mɛsitɛ o, wɛ fii ko njan.”

³² Hën a piki u taa: “Mi abi wan njanjan aki ta njan di wan sabi e, ɿnöö hën ta da mi kaakiti kaa.”

³³ Nöö hën u ta hakisi u seei taa: “Wë a sa kë fa u go ala, nöö hën wan sëmbë tja soni u njan ko dëen aki a njan nö?”

³⁴ Nöö hën Masa Jesosi piki u taa: “Di njanjan u mi, hën da te mi ta du dee soni di Sëmbë manda mi ko aki kë fu mi du, be di wooko fëen go dou.

³⁵⁻³⁷ “Wan jei fa de taki nö? De taa a fika fö liba nöö dee njanjan u dee goon o lepi u koti. Ma mi taki da unu taa, un hopo wojo luku dee njanjan u dee goon. De lepi tjika u koti kaa. ɿBiga ja ta si dee sëmbë ta ko gidjii ala nö?” De lepi kaa e, fuu heepi de feni di libi u teego wantewante aki. U sa hai de tja ko buta a suwa seei. Nöö hën da u dee kotima ta feni u paima kaa.

“Nöö aki sö di nöngö ko tuu taa wan sëmbë ta paandi, di otowan ta koti. Nöö te di njanjan u di goon lepi, nöö di sëmbë di bi paandi ku di sëmbë di ta koti tuu ta wai makandi.

³⁸ “Fa mi bi manda unu go dë, dee sëmbë, mi bi manda unu go fuun koti dee soni dee oto sëmbë bi paandi. Dee otowan dë, de bi waka a unu fesi, nöö de bi wooko taanga ta konda di buka, nöö hën un ko a baka aki ko ta feni di wini. Biga awaa ufö dee sëmbë ta piki di buka.”

A di pisi aki hia sëmbë u

Samalia ko biibi a Masa

Jesosi liba.

³⁹⁻⁴⁰ Nöö di juu dë, dee Samalia sëmbë ko dou gidjii dë kaa. Nöö hën de begi Masa Jesosi faa tan ku de naandë. Nöö hën a fika ku de tu daka.

Wë nöö fa de bi ko nëen naandë, nöö sëmëni u de bi ko biibi nëen kaa, fu di fan di di mujëe bi fan ku de taa, “A konda hii dee soni mi bi du tuu da mi.”

⁴¹ Ma nöö fa Masa Jesosi fika ku de dë, nöö hën sëmëni oto sëmbë ko biibi nëen möön, fu dee wöutu u Gadu dee a tei ta lei de hedi.

⁴² Nöö hën de piki di mujëe taa: “U bi ta biibi fu di i bi fan ku u, ma nöö fa u dë aki u seepi jesi ko jei dee soni dee a taki. Nöö hën mbei u ko sabi tuutuu taa di Sëmbë i si aki, hën da di Paamusi Könu, di Heepima di Gadu manda ko u heepi hii sëmbë u goonliba.”

A di pisi aki Masa Jesosi kula wan womi mii u wan sëmbë.

⁴³ Wë nöö kumafa u taki dë, Masa Jesosi fika dë tu daka a Samalia ala, nöö hën u kumutu dë. Hën u go dou a Galilea awaa.

⁴⁴ Wë nöö Masa Jesosi bi taki taa wan tjabukama an ta feni nëbai nëen seei köndë.

⁴⁵ Ma nöö ɿdi pasi aki, di a ko dou a Galilea, nöö dee sëmbë kisi ën seei ku wai. Biga sëmëni u de bi dë a Jelusalen ta njan di Pasika piizii, nöö de bi si fa Masa Jesosi bi du sëmëni gaan foombofoombo soni ala. Hën wë mbei de wai ku ën gaanfa sö.

⁴⁶⁻⁴⁷ Nöö hën a toona go a Kana ka a bi mbei di wata bia ko win. Nöö di a go dou, hën wan womi kumutu a Kapenaumi ko nëen. Di sëmbë aki, a dë wan lantima ta wooko da di Könu. Nöö di a jei taa sö Masa Jesosi kumutu a Judea ko a Kana dë, nöö hën a go nëen wante go begi ën faa ko kula wan womi mii fëen dëen, biga a siki te a fika piki a dëdë.

⁴⁸ Nöö hën Masa Jesosi taki dëen taa: “Söö, wë fa un dë aki, ee na un si foombo wooko, nöö wan o biibi mi möönsö nö?”

⁴⁹ Ma nöö tökuseei hën di womi fan ku ën taa: “Mësitë o, gaantangi mi begi i baa, ko go heepi mi ku di mii u mi bifö a dëdë.”

⁵⁰ Hën Masa Jesosi taki deën taa: “Wë antoobi. Go fii a wosu e. Di mii fii an o dedë, a libi kaa.” Nöo fa a fan ku di sëmbë dë, nöo a biibi, nöo hën a go fëen.

⁵¹ Nöo fa a tei pasi nango dë, te wan pisi hën dee futuboi fëen ko miti ën a pasi. Hën de tja buka ko deën taa di mii libi, a bëtë kaa.

⁵² Nöo hën a hakisi de taa: “Wë nöo na un juu u di daka di mii ko bëtë?”

Hën de taa: “Jeside a di sonuati a di wan juu ten, nöo hën di fëbë an kisi ën möön e.”

⁵³ Nöo hën di tata kai pakisei diin. Hën a si taa a kai leti a di ten Masa Jesosi bi fan ku ën dë taa di mii libi, an o dedë. Nöo hën di de ko sabi sô kaa, nöo hën di womi ku hii dee sëmbë fëen wosu dendu tuu fiaa ko biibi a Masa Jesosi.

⁵⁴ Nöo di soni di i si pasa naandë, hën mbei di u tu gaan foombo wooko di Masa Jesosi du a Kana, nöo a du ën di a kumutu a Judea toona ko a Galilea baka.

5

Aki Masa Jesosi kula wan suwakima a wan petiwata bandja.

¹ Nöo a baka u di dë, hën wan oto piizii u dee Dju o dë. Hën Masa Jesosi tei pasi hën a toona go a Jelusalen.

² Wë nöo di juu dë, wan peti wata bi dë a Jelusalen ganda, zuntu ku di djai döobuka ka de ta tja dee sikapu ko a di köndë dendu. Di peti naandë sô, dee Dju bi ta kai ën Batesita, nöo de mbei feifi baiko lontu ën.

³ Nöo a dee baiko naandë sômëni sikima sai dë kandikandi: bookowojoma, sômëni lanlan sëmbë, de tuu sai dë [ta luku di ten di wata o seki.

⁴ Biga de taa a ta a' juu nöo wan basia u Gadu Köndë ta saka ko naandë ko seki di wata, nöo ee wan sëmbë i fosu go nama a di wata, nöo i sa ko bunu nöömö aluwasi un sootu siki i bi abi].

⁵ Wë nöo wan womi bi sai naandë, diiteni-ku-aiti jaa longi a siki, an sa hopo waka.

⁶ Nöo di Masa Jesosi go si ën kandikandi dë, nöo a sabi taa a bi sai dë longi kaa. Nöo hën a hakisi ën taa: “Wë womi, unfa wë? Ja kë ko bëtë nö?”

⁷ Hën a piki ën taa: “Wë awa, mi kë bëtë, ma ma abi sëmbë u tja mi go a di wata. Biga te a ta seki, nöo ufö mi penapena go dou nëen nöo wan oto sëmbë bi go a mi fesi gaanduwe kaa.”

⁸ Nöo hën Masa Jesosi taki deën taa: “Wë antoobi. Hopo, nöo i tei di kama fii, nöo i waka go fii a wosu.”

⁹ Nöo fa i si a taki dë, wantewante hën di womi ko bunu kaa. Hën a tei ën kama hën a go. Ma nöo di soni aki pasa leti a wan saba daka u dee Dju.

¹⁰ Nöo di a nango te wan pisi hën wanlô hedima u Dju ko si taa a ta waka ta tja di kama fëen. Hën de hakisi ën taa: “Womi, unfa i du ta tja di kama fii a di saba daka aki? Ja sabi di wëti taa ja musu wooko a saba ö?”

¹¹ Hën a piki de taa: “Wë nönö, di sëmbë di kula mi, hën taki da mi taa mi musu hopo tei mi kama nöo mi go a mi wosu.”

¹² Nöo hën de hakisi ën taa: “Ambë da di sëmbë di manda i sô?”

¹³ Ma nöo di sëmbë an bi sabi Masa Jesosi seei. Biga hia sëmbë bi dë a di kamian, nöo di a kulëen te a kaba, hën a fusi go fëen.

¹⁴ Ma nöo te wan pisi hën Masa Jesosi ko si di womi möön a di Wosu u Masa Gadu. Hën a fan ku ën taa: “Womi.” A piki. A taa: “Fa i si i ko bunu aki, nöo i musu kaba ku hoglibi e, ee nasö wan möön gaan soni o miti i.”

¹⁵ Nöo di di womi ko sabi Masa Jesosi, hën wë a go konda wante da dee Dju hedima taa Jesosi hën wë kulëen mbei a ko bunu.

Aki ta lei fa Masa Jesosi piki

dee Dju hedima.

16 Nöo di dee Dju hedima jei sö kaa, hën de bia buta ku Masa Jesosi taa a ta poi tjina fu di saba.

17 Nöo hën a piki de taa: “Wë mi tata an ta disa bunu fëen u du fu di a dë saba daka hedi e, nöo hën mbei miseei di Mii fëen aki, më sa disa bunu u du a saba tu.”

18 Wë nöo fa a piki de dë, nöo an bunu da dee hedima, nöo hën hati u de boonu seei te de ta suku kōni u de feni ën kii. Biga na di tjina u di saba nöo a poi, ma a kai Gadu hën eigü tata ta mbei taa hën ku Gadu dë pei.

19 Nöo hën Masa Jesosi fan ku de, a taa: “Söö. Wë mi o taki wan soni da unu aki, nöo a tuu möön hii soni. Mi taki da unu e, taa fa mi ku mi Tata dë di wan tjika aki, ma sa du na wan soni mi wanwan möönsó söndö ën. Di soni mi si a ta du nöo hën nöo mi seei ta du tu, biga u tuu ta du di wan soni.

20 “Fa mi dë aki, mi Tata lobi mi e, nöo hii dee soni a ta du kaa tuu a ta lei mi. Nöo a o lei mi möön gaan soni eti u mi du möön leki dee un si aki kaa, nöo a o foombo unu seei.

21 Biga fa i si mi Tata ta weki dëdë sëmbë toona da de libi, nöo sö nöo mi di Mii fëen aki sa da hiniwan sëmbë di mi kë libi tu.

22 “Nöo na mi Tata ta kuutu libisëmbë e. Ma hii kuutu tuu a buta a mi maun.

23 Nöo di soni mbei a du sö, fu hii sëmbë musu sa hei mi di Mii fëen aki leti kumafa de ta hei mi Tata.

“Nöo sö e. Ee wan sëmbë an kai di Mii fëen aki gaan soni, nöo söseei an kai mi Tata di manda mi ko aki gaan soni tu.

24 “Nöo tuutu mi o taki wan oto soni da unu, taa ee wan sëmbë i tei dee fan mi ta fan aki taa tuu nöo i ta biibi a di Sëmbë manda mi ko aki liba, nöo i abi di libi u teego kaa. De an o sa kuutu i tuwë go da di sitaafu u teego, biga i kumutu a di së u dëdë ko a di së u libi.

25 “Nöo mi taki da unu e, taa wan juu o dou nöo a dë kaa tu, taa dee sëmbë dee an bi feni di libi u Gadu eti o jei di fan u mi di Mii u Gadu aki. Nöo ee de piki mi, nöo de o feni libi.

26 Biga leti kumafa Gadu hën abi libi, nöo sö nöo mi di Mii fëen aki abi libi tu. Sö a butëen da mi kaa.

27 Nöo hën a da mi di leti tu fu mi kuutu libisëmbë fu di mi seei ko dë libisëmbë miii.

28 “Dee soni mi ta fan aki nöo de an musu bigi da unu poi e, dee sëmbë. Biga wan juu o dou, nöo hii dëdë sëmbë tuu o jei mi di Mii u Gadu aki ta kai de u de musu ko a kuutu, nöo de tuu o weki kumutu a geebi toona ko ku libi baka.

29 Dee bi libi bunu a Gadu wojo, de o weki fu de libi ku Gadu fu teego. Ma nöo dee bi libi hogi a Gadu wojo, nöo de o toona weki fu de feni di sitaafu u teego. Sö mi o kuutu a de liba e.

30 “Nöo te mi ta kuutu a sëmbë liba, nöo di kuutu u mi ta dë leti. Biga ma ta du na wan kodo soni mi wanwan, ma kumafa mi ta jei a mi Tata nöo sö nöo mi ta kuutu buta. Nöo ma ta du na wan wojo soni tu faa kai ku miseei e, ma mi ta du dee soni dee ta kai ku mi Tata di manda mi ko aki.”

Aki Masa Jesosi ta lei dee fesima u Dju taa a abi kotoigima

ta taki soni fëen.

31 Hën a taa: “Un haika e. Ee mi ta konda soni u miseei da unu kumafa mi dë, nöo wan o kë piki mi e.

³² Ma nõõ wan oto sēmbē ta konda soni u mi, hēn da mi Tata, nõõ a ta kondēēn leti kumafa a dē.

³³ “Nõõ Johanisi seei tu bi ta konda soni u mi. Unu seei bi manda sēmbē go fini ēn u dee soni a bi ta konda, nõõ fa i si a piki dē an ganjan unu e. Ma a piki unu leti kumafa a dē.

³⁴ “Ma nõõ fa mi ta fan aki seei, ma an dē taa mi ta langi a dee soni libisēmbē ta taki u mi e. Ma mi taki ēn sō nõõ fuun musu piki, be un feni libi u teego.

³⁵ Biga Johanisi bi dē kuma wan lampu sēndēsēndē ta lei sēmbē di pasi, nõõ a bi suti da unu fu wan pitsiten. Di juu dē un bi kē jei ēn seei.

³⁶ “Ma nõõ wan oto soni mõõn dē eti di ta konda u mi, nõõ a mõõn hebi mõõn dee fan u Johanisi seei. Hēn da dee wooko dee mi Tata manda mi ko u mi ta du aki. Biga fa i si mi ta du dee foombo wooko aki, nõõ de ta sitampu gbelin taa mi Tata Masa Gadu hēn manda mi ko aki tuu.

³⁷ “Nõõ fa a manda mi ko aki, hēnseei bi ta taki soni u mi tu. Ma kumafa un dē aki, un wan jei fan fēēn wan daka. Wan si ēn sabi wan daka tu.

³⁸ Fa un ta jei dee wōutu fēēn dē, de an ta fika a unu hati mõõnsō. Biga wan kē piki mi, di Sēmbē di a manda ko da unu aki.”

³⁹ Hēn a taki da de mõõn taa, “Wan oto soni dē mõõn di ta konda soni u mi, hēn da di Buku u Gadu. Nõõ un ta hulu di Buku dē ta bia nango ta ko kodo, fu di un sabi taa nēēn un sa feni di libi u teego. «Wē nõõ sō a dē tuu.» Ma fu mi wē di Buku ta taki di taki e,

⁴⁰ ma wan kē ko a mi mõõnsō fuun sa feni di libi dē.

⁴¹ “Ma nõõ fa mi ta fan aki, dee sēmbē, wan musu mēni taa pena mi ta kēē e, fu di un libisēmbē wan kē hei mi. Nōnō. Biga a Gadu nõõ mi ta suku hei.

⁴²⁻⁴³ Ma nõõ fa un sai dē, mi sabi unu taa wan lobi Gadu. Biga ee un bi lobi ēn, nõõ un bi o tei mi u soni. Biga fa mi ko aki, a Gadu nē mi ko. Hēn da mi Tata, nõõ hēn manda mi ko aki tuu. Ma nõõ wan ta tei mi u soni mõõnsō. Ma te wan oto sēmbē hopo ko nēēn seei nē, nõõ hēn un ta tei u soni waiwai seei.

⁴⁴ “Ma nõõ fa mi fan dē, unfa un sa biibi mi? An foombo mi tu. Biga a libisēmbē nõõ un ta suku u feni nēbai, ma wan a’ bisi mõõnsō fuun feni nēbai a di wan kodo Gadu u mundu.

⁴⁵ “Ma nõõ hii fa i si mi ta fan ku unu aki seei, dee sēmbē, ma wan musu mēni taa mi o tja unu go kaagi da mi Tata e. Ma wan sēmbē dē kabakaba kaa u kaagi unu. Hēn da Mosesi di i si un ta buta mēni fuunu sō gaanfa nēēn liba taa woon feni heepi a dee soni a sikifi buta dē.

⁴⁶ Ma ee un bi biibi Mosesi tuu nõõ an bi o toobi unu fuun sa biibi mi e, biga soni u mi wē a bi sikifi buta dē.

⁴⁷ Nõõ sō wē i si taa wan ta biibi dee soni a sikifi dē, nõõ unfa un sa biibi dee soni mi ta fan ku unu aki?”

Sō Masa Jesosi fan ku dee hedima u Dju dē te a kaba.

6

A di pisi aki Masa Jesosi ta da feifi dusu sēmbē soni u njan.

Mat. 14:13-21; Maik. 6:30-44; Luk. 9:10-17

¹ Hēn u dē te wan daka hēn u ku Masa Jesosi koti di ze u Galilea de kai Tibelia, go te a di oto sē banda.

²⁻⁴ Hēn u subi go sindo a wan kununu bandja. Nõõ di ten dē, di gaan daka fuu dee Dju de kai Pasika ko zuntu faa kai.

Nõõ di juu dē, wanlō gaan hila sēmbē ta lontu a futu ta faaka Masa Jesosi ta ko, fu di de bi si a du sōmēni foombofoombo soni ta kula sōmēni sikima.

⁵ Nöo fa u ku Masa Jesosi dē sindosindo naandē, te wan pisi hën a hopo wojo hën a si dee hia sēmbē ta ko.

Nöo hën a hakisi Filipi taa: “Wē womi, dee sēmbē ta ko dē, naasē woo feni soni u njan u da de?”

⁶ Ma fa a hakisi ën dē seei, ma a ta poobēen luku ee unfā di biibi fēen bigi tjika. Wē biga a bi saandi a o du kaa.

⁷ Hën Filipi piki ën a taa: “Wē Masa o, ee u bi wooko tu höndö daka seei, ma töku möni fēen an o tjika fuu bai soni u njan da dee hia sēmbē gidjii dē e. Aan fa fuu paati ën pikipiki te nöo a sa tjika de.”

⁸ Nöo hën Andiasi di baau u Simon Petuisi taa:

⁹ “Wan mii dē aki abi feifi piki bēēē ku tu pikipiki fisi tö, ma nöo unfā dee soni dē sa du heepi dee hia sēmbē aki?”

¹⁰ Nöo di a taki sō, hën Masa Jesosi taa: “Antoobi.” Hën a manda u taa u musu mbei dee sēmbē sindo a goon, biga di kamian naandē bi dē ku hia ahun.

Nöo hën dee sēmbē saka sindo. Nöo fa de bi ko hia dē, nöo de dē feifi dusu womi, söndö de konda dee mujēē ku dee mii. Sō dee sēmbē bi hia tjika.

¹¹ Nöo hën Masa Jesosi tei dee bēēē ku dee fisi dē, hën a da Gadu tangi te a kaba. Nöo hën a booko de pisipisi te a kaba, hën a tēndēen da u dee bakama fēen fuu paati da dee sēmbē.

¹² Nöo hën u tja go paati da de, hën de njan tefa de bēē fuu.

Nöo di de kaba u njan, nöo hën Masa Jesosi manda u taa: “Söo. Wē nöo be un go pii dee pisipisi dee fika e, be de an poi kaba a sösö.”

¹³ Nöo hën u go pii te a fuu tuwalufu gaan manda. Sö a fika hia tjika u dee feifi bēēē dee sēmbē njan.

¹⁴ Wē nöo di dee sēmbē si di gaan soni Masa Jesosi du dē, nöo a bigi da de te na soni. Hën de taa: “Söo. Wē di soni aki an dē u fia. Di sēmbē i si aki, hën da di Tjabukama di i si Masa Gadu paamusi taa a o manda ko a goonliba.”

¹⁵ Nöo hën di de taki sō kaa, hën de kē kisi ën ku taanga buta könu u de wante. Ma nöo di Masa Jesosi sabi sō kaa, nöo hën a fusi kumutu a de mindi, hën a go a dee kununu ala hën wanwan.

A di pisi aki Masa Jesosi waka

a wata liba.

Mat. 14:22-33; Maik. 6:45-52

¹⁶⁻¹⁷ Nöo hën u sai dē tefa di ndeti buka, Masa Jesosi an ko möönso, nöo hën u dee bakama fēen go subi a di boto fuu aba go a Kapenaumi. Nöo di juu dē kamian ko ta dungu kaa.

¹⁸ Nöo hën di u nango te wan pisi, hën wan gaan ventu ko ta böo teee, di wata ta seki te na soni.

¹⁹ Hën u ta puu ku taanga nango te u go kuma wan feifi kilomēti longi ku ka u bi kumutu, nöo hën u bia luku. Hën u si wan sēmbē ta waka ku futu a di wata liba ta ko a u. Nöo hën u ko fēēē te, u ta tēēmē tjatjatjat sō, biga wa saandi da di soni ta ko a u dē. Nöo hii u di dē, Masa Jesosi wē gbolo, ma wa bi sabi.

²⁰ Nöo hën a fan ku u taa: “Dee sēmbē, wan fēēē e. Mi wē disi.”

²¹ Nöo di u jei sō kaa, hën hati fuu ko kötö, nöo wa fēēē möön faa ko a di boto. Ma nöo fa i si a subi a di boto dē kaa, nöo te fuu mēni hën u dē a di oto sē banda ala pii, ka u bi nango.

²² Di dobooko fēen möön, hën dee hia sēmbē dee bi dē a di oto sē banda ka u kumutu ala, hën de ko foondo tee. De an sa naasē Masa Jesosi bi go. Biga

oto boto an bi sai dē möönsö möön leki di fuu boto, nöö de sabi taa na u ku Masa Jesosi bi go di go.

²³ Nöö di juu dē wanlö gaan boto fu Tibelia Köndē ko tjökö naandē zuntu ku di kamian ka Masa Jesosi bi tei dee bēēē da Gadu tangi paati da de de njan.

²⁴ Nöö hën di dee sēmbē ko sabi taa Masa Jesosi an sai dē möön, u dee bakama fēen seei wa sai dē möön tu, hën de subi a dee gaan boto hën de koti ko a Kapenaumi.

A di pisi aki Masa Jesosi ta fan ku dee sēmbē taa hën da di bēēē di ta da sēmbē libi u teego.

Hën dee hia sēmbē ta suku Masa Jesosi

²⁵ teefa de ko si ën. Nöö hën de hakisi ën taa: “Mësitē o, na un ten seepi i ko aki baa?”

²⁶ Nöö hën Masa Jesosi taki da de taa: “Fa i si mi o fan ku unu aki, nöö tuutuu soni a dē e. Wan ta kule a mi baka fu di un ta fusutan dee foombo wooko mi ta du hedi e, ma fu di a dē taa mi bi da unu di bēēē un njan te bēē fuunu fuu.

²⁷ “Nöö mi taki e, taa wan musu ta biinga fuun feni di njanjan di ta hoi unu fu wan pisiten nöö e, dee sēmbē. Ma be un biinga fuun feni di njanjan di sa mbei un feni libi u teego. Di njanjan dē, Mi di ko Libisēmbē Mii aki nöö sa da unu ën e. Biga mi nöö Gadu si taa fiti faa da mi di taki fu da unu sö wan soni.”

²⁸ Nöö hën de piki ën taa: “Wē nöö unfa u musu du te nöö u sa du dee wooko Gadu kē fuu du?”

²⁹ Hën a piki de taa: “Di wooko Gadu kē nö? Hën nöö da fuun musu biibi a Mi di Sēmbē di a manda ko aki.”

³⁰ Hën de toona hakisi ën taa: “Wē nöö un maaka joo lei u fuu sabi taa a i u musu biibi?”

³¹ I sa du foombo wooko kuma Mosesi nö? Biga hën bi ta da dee fesiten sēmbē fuu di njanjan de kai ‘mana’ hibiwan daka, u de njan a di gaan sabana kumafa di Buku taki taa: ‘Gadu Köndē bēēē a da de de njan.’ Nöö i sa du sö wan soni tu nö?”

³² Hën Masa Jesosi piki de taa: “Dee sēmbē, be mi taki wan tuutuu soni da unu e. Na Mosesi bi da de di mana dē e, ma mi Tata seei bi da de ën. Ma nöö fa mi taki dē seei, ma nēen bi da di tuutuu njanjan di ta kumutu a Gadu ala eti.

³³ Biga awaa ufö a ta da libisēmbē di tuutuu njanjan awaa. Hën da di Sēmbē aki di kumutu nēen ala, nöö hën bumbuu möön di mana. Biga hën sa mbei sēmbē feni di tuutuu libi di dē u teego.”

³⁴ Hën de taa: “Wē nöö Mësitē o, tide wante fii seti da u di njanjan dē, fuu sa ta njan mën nöömö.”

³⁵ Nöö hën Masa Jesosi piki de taa: “Un haika e. Mi wē da di njanjan di i si mi ta taki dē, di ta da sēmbē libi u teego. Biga ee wan sēmbē i ko a mi, nöö hati fii an o hangi na wan soni möön. Ee i ta biibi a mi liba, nöö dēewata seei an o kisi i möön. [Biga joo dē bööböö.]

³⁶ “Ma nöö a dē leti kumafa mi bi taki da unu dē kaa. Un ta si mi fa mi dē, ma wan ta kē piki taa Gadu hën manda mi ko aki.

³⁷ Ma fa mi fan dē seei, ma hii dee sēmbē dee mi Tata Gadu ta da mi, nöö de tuu o ko a mi nöömö, nöö di sēmbē di ko a mi ma o jakēen möönsö.

³⁸ “Biga fa mi kumutu a liba ala ko aki, dee sēmbē, ma ko u mi du kumafa mi kē e. Ma mi ko u mi du dee soni dee di Sēmbē manda mi ko kē u mi du.

³⁹ Nöö andi da di kē fēen? Hën wē da ma musu lasi na wan u dee sēmbē dee a da mi, ma mi musu weki de a dēdē a di kaba lasiti daka.

40 “Tuu wë e, dee sëmbë, disi da di soni mi Tata kë, taa hiniwan sëmbë di ta si mi di Mii fëen aki nöö i biibi a mi liba, nöö di sëmbë dë i abi di libi u teego kaa. Nöö sò wan sëmbë mi o weki a di kaba lasiti daka.” Sò Masa Jesosi taki da dee hia sëmbë dee ko nëen dë.

41 Nöö fa de jei di fan fëen naandë taa hën da di njanjan di kumutu a liba, hën so u de tei ën fu hogi seei. Hën de ta guunjëen,

42 taa: “Wë di mii aki sò, nëen da di mii u Josëfu de kai Jesosi nò? U sabi hën mama ku ën tata, nöö unfa a sa taki da u taa a kumutu a liba?”

43 Nöö hën Masa Jesosi taa: “Dee sëmbë o, un disa di guunjan un ta guunjan mi naandë e.

44 Biga na wan sëmbë sa ko a mi ee na mi Tata di manda mi ko aki hën hai ën ko. Nöö sò wan sëmbë, hën mi o weki a dëdë a di kaba lasiti daka.

45 “Wan jei fa dee tjabukama sikifi buta a di Buku u Gadu nò? De taa hii sëmbë tuu o kisi lei a Gadu. Wë nöö ee wan sëmbë i jei di lei u Gadu dë, nöö i tei ën tja go a i hati, nöö a mi joo ko nöömö.

46 Biga fa sëmbë ta kisi lei a Gadu seei, ma na wan sëmbë bi si ën ku wojo wan daka, boiti mi tö di kumutu nëen ala. Hën mbei a mi i musu ko fii sabi soni fëen.

47 Nöö fëen mbei mi taki da i tuutuu taa di sëmbë di ko biibi a mi, nöö hën feni di libi a Gadu di dë u teego.

48 “Mi taki da unu möön e, taa mi da di njanjan di ta da sëmbë gbelingbelin libi.

49 Dee fesiten sëmbë fuunu, de bi njan di mana a di sabana tuu, ma töku de bi dëdë.

50 Ma aki sò di njanjan dë awaa di kumutu a Gadu ko, nöö ee wan sëmbë i njan mën nöö ja o dëdë, ma joo feni di libi a Gadu di dë fu teego.

51 “Mi taki da unu möön e, dee sëmbë, taa mi da di njanjan ta da sëmbë libi. A Gadu mi kumutu, nöö di sëmbë di ta njan di njanjan aki hën abi di libi u teego. Nöö di njanjan di mi ta taki aki, nöö hën wë da di sinkii u mi aki, di mi o da fu hii goonliba sëmbë musu sa feni libi.”

52 Nöö di dee hedima u Dju jei a fan sò, hën de bigi ta fia ku deseei makandi taa: “Unfa di sëmbë aki sa da u hën sinkii fuu njan, maingë?”

53 Nöö hën Masa Jesosi piki de taa: “Tuutuu soni seei mi o taki da unu aki, dee sëmbë, taa ee wan sëmbë ja tei di sinkii u Mi di ko Libisëmbë Mii aki kuma njanjan fii, nöö ee ja tei di buuu u mi kuma wata di i ta bebe, nöö ja feni libi seei eti e.

54 Ma ee wan sëmbë i tei di sinkii u mi kuma njanjan fii u njan, nöö i tei di buuu u mi kuma wata fii u bebe, nöö i abi di libi u teego kaa, nöö mi o weki i a dëdë a di kaba lasiti daka.

55 “Biga di sinkii u mi aki, hën da di tuutuu njanjan fii njan ee i kë libi. Nöö di buuu u mi, hën da di tuutuu wata fii bebe.

56 Nöö ee wan sëmbë tei di sinkii u mi aki kuma njanjan fëen a ta njan, nöö a tei di buuu u mi kuma wata fëen a ta bebe, nöö mi ku di sëmbë dë ko di wan. Wa o paati ku u seei möönsö.

57 “Dee sëmbë o, fa mi Tata sai dë, nöö hën wë abi libi e, nöö hën toona da mi ën fu mi abi ën tu. Nöö hën manda mi ko aki. Nöö ee wan sëmbë tei mi kuma njanjan fëen a ta njan, nöö di sëmbë dë hën mi o da di libi dë tu e.

58 Fëen mbei mi taa mi da di njanjan di kumutu a Gadu ala di ta da sëmbë libi. An dë kuma di mana di dee fesiten sëmbë fuunu bi njan, biga wë de bi dëdë, ma ee wan sëmbë njan di njanjan aki sò, hën o abi di libi u teego.”

59 Nöö a sò wan fasi Masa Jesosi ta lei dee sëmbë e, a di keikiwosu u dee Dju a Kapenaumi.

Aki sɛmbɛ bia go disa

Masa Jesosi.

⁶⁰ Nöo fa dee sɛmbɛ dee bi ta waka a Masa Jesosi baka jei di fan a fan dɛ, nöo hɛn sɔmɛni u de taa: “Maingɛ, andi da dee soni a ta lei dɛ? Ambɛ tjika u tei de?”

⁶¹ Ma nöo Masa Jesosi sabi kaa taa sɔ de ta fan, nöo hɛn a fan ku de taa: “Wɛ di soni mi taki dɛ, hɛn taanga da unu fuun tei sɔ nöo?”

⁶² Wɛ nöo unfa seei a o dɛ da unu te un si Mi di ko dɛ Libisɛmbɛ Mii aki toona go a liba ka mi bi kumutu?

⁶³ Dee soni dee mi fan ku unu dɛ, na a sɔsɔ sinkii fasi un musu fusutan de e. Biga sinkii soni an sa heepi i fii feni di lö libi dɛ. Ma Akaa soni mi fan naandɛ, nöo ee i tei ɛn, nöo joo feni di libi u teego.

⁶⁴ Ma nöo fa mi ta biinga ku unu aki seei, so fuunu an kɛ piki mi.” Biga Masa Jesosi bi sabi gaanduwe kaa ambɛ ku ambɛ an o kɛ biibi ɛn, nöo a sabi di sɛmbɛ di o sei ɛn a bakaten tu.

⁶⁵ Nöo hɛn a toona taki da de taa: “Di soni aki wɛ mbei mi taki da unu taa na wan sɛmbɛ sa ko a mi ee na mi Tata da i taanga.”

⁶⁶ Nöo kumutu a di ten naandɛ, hɛn sɔmɛni u dee sɛmbɛ bi ta waka nɛɛn baka kumutu go disɛɛn, de an dɛ ku ɛn möön.

⁶⁷ Nöo hɛn a bia hakisi u dee tuwalufu bakama fɛɛn dee a bi pii tei apaiti taa: “Unfa un pakisei baa? Un kɛ go tu nöo?”

⁶⁸ Nöo hɛn Simon Petuisi piki ɛn taa: “Masa o, na ambɛ seei u sa go möönsɔ? Biga i nöo abi dee wɔutu dee ta da sɛmbɛ libi u teego.

⁶⁹ Nöo u ta biibi a i liba, biga u sabi taa i da di Paamusi Könu, di Mii u Gadu gbelingbelin di a manda ko.”

⁷⁰ Nöo hɛn a piki de taa: “Awa, sɔ un ta piki tuu. Ma nöo a dendu fuun dee tuwalufu womi mi pii tei aki, wan fuunu dɛ didibi e.”

⁷¹ Fa a taki naandɛ, nöo di mii u Simon Isikaliotu de kai Judasi, hɛn wɛ da di sɛmbɛ a ta taki. Biga hii fa i si a dɛ a dendu fuu dee tuwalufu bakama u Masa Jesosi seei, ma hɛn o sei ɛn a bakaten.

7

Aki Masa Jesosi o go a wan piizii u dee Dju sɛmbɛ.

¹ Nöo a baka u di dɛ, hɛn Masa Jesosi ta waka a dee köndɛköndɛ fu Galilea. An nango a dee köndɛ u Judea ala möön, fu di dee hedima u Dju ta watji ɛn fu de feni ɛn kii.

² Ma nöo di juu dɛ, wan oto piizii fuu dee Dju sɛmbɛ de ta njan bi zuntu faa kai. A dee daka dɛ, u ta mbei tjɛkɛliba ta toona mɛni fa dee gaan sɛmbɛ fuu bi libi a di sabana hii föteni jaa longi.

³ Nöo hɛn dee baaa u Masa Jesosi ko ta kaakei ɛn taa: “Womi, andi i ta fika aki u du? Na a Judea ala fii go nö, fu dee sɛmbɛ dee lo’ u nama ku i si dee foombo wooko i ta du.

⁴ Biga ee wan sɛmbɛ ta suku nɛbai, nöo an o ta dɛ tjubitjubi, ma a o go lei ɛn seei a lanti wajaa be hii mundu si ɛn. Wɛ nöo di i ta du dee soni aki kaa, nöo fii go a lanti ala e, be de si i.”

⁵ Biga wɛ hii fa de dɛ baaa fɛɛn seei, ma de an ta biibi ɛn. Hɛn wɛ mbei de fan sɔ.

⁶⁻⁸ Nöo hɛn Masa Jesosi piki de taa: “Awa, mi sa go, ma di ten u mi an kisi eti e. Ma be un go nöo. Biga hiniwan juu uun kɛ, nöo un sa go ala. Fa un dɛ aki, dee sɛmbɛ u di goonliba aki an ta buuse unu, ma mi de ta buuse. De an sa

si mi a wojo seei, fu di mi ta konda da de gbelingbelin taa de an ta libi bunu a Gadu wojo. Nöo be unu wanwan go a di piizii e.”

⁹ Nöo di a fan ku de sö kaa, hën de de go, ma hën a fika a Galilea naandë ufö.

¹⁰ Ma baka u di de go, nöo hën a tei pasi faa go a di piizii awaa. Ma fa a nango naandë, an waka u lanti si ën. A waka a wan tjubi fasi sö.

¹¹ Nöo di juu dë, fa de dë a di piizii dendu a Jelusalen naandë, nöo dee hedima u Dju ta watji ën ta hakisi taa: “Naasë a dë? Unsë di womi dë?”

¹² Nöo dee hia sëmbë dee ko a di piizii naandë, nöo deseei ta taki soni fëën tu. So u de ta gafëën taa a dë bumbuu sëmbë. Otowan taa: “Nönö huun, a dë wan ganjansëmbëma, politikima.”

¹³ Ma hii fa de ta fan naandë seei ma na wajaa a lanti, biga de ta fëëe dee hedima u Dju.

A di pisi aki, Masa Jesosi ko

dou a di piizii.

¹⁴ Nöo dee daka dee de buta u de njan di piizii nöo de pasa mindi kaa bifö Masa Jesosi ko dou awaa. Hën a go fëën wante a di gadii u di Wosu u Masa Gaangadu, nöo hën a seti lei sëmbë.

¹⁵ Nöo dee hedima u Dju ko sai dë ta haikëën tu, nöo de ko foondo seei teee, de taa: “Wë unfa di lagilagi sëmbë aki ko sabi soni sö, ma na a dee siköö fuu a go?”

¹⁶ Hën Masa Jesosi bia piki de. A taa: “Dee sëmbë, un haika e. Di lei i si mi ta lei aki, nöo na a mi a kumutu e. Ma di Sëmbë di manda mi ko aki, nëën a kumutu.

¹⁷ Nöo ee wan sëmbë i ta hangi fii du fa Gadu kë nöo joo sabi ee a Gadu di lei u mi ta kumutu, ee miseei sondi mi ta tei ta taki.

¹⁸ “Ma nöo ee wan sëmbë hopo ta konda soni fëën seei, nöo nëbai nöo a ta suku, na sö a dë nö? Ma ee a ta suku nëbai da di sëmbë di mandëën ko, nöo di sëmbë dë dë bumbuu sëmbë kaa. Na politiki a ta naki.”

¹⁹ Nöo hën a taa: “Dee sëmbë, na Mosesi bi tja dee wëti u Gadu ko da unu nö? Hën mbei un ta hei ën sö. Ma töku na wan fuunu kë hoi dee wëti dë, biga un kë kii mi. Nöo mi kë sa faandi mbei.”

²⁰ Nöo hën de piki ën taa: “Soni hën ko a i hedi nö, womi? Ambë da di sëmbë di kë kii i?”

²¹ Nöo hën a taa: “Fa mi dë aki, wan kodo foondo wooko tö mi du a saba, hën wë a bigi da unu te wan saanfa fuun du.

²² Ma nöo unu, hiniwanten un ta poi saba. Biga Mosesi bi da unu wan wëti taa un musu koti di maaka u Dju a dee womi mii fuunu sinkii, te de abi aiti daka u di de pai ën. Ma nöo tökusee na a Mosesi ten wë di wëti dë kumutu e, ma sensi a dee oto gaan sëmbë fuunu dee bi dë ufö ën.

²³ Nöo ee wan sëmbë ko a unu fuun koti di maaka a di mii fëën sinkii dëën, nöo ee a kai a saba daka seei ma un ta koti ën waiwai fu di di wëti musu hoi. Wë nöo na wooko un ta wooko a di saba dë nö?

“Wë nöo faandi mbei un musu ta guunjan mi u di mi heepi wan sëmbë ko bumbuu ku telu a saba daka?

²⁴ I si ö? Wan musu ta kuutu soni hesihesi sö e, dee sëmbë, ma un musu ta wegii soni luku fini ufö un kuutu, nöo di kuutu fuunu o dë leti.” Sö Masa Jesosi fan ku dee hedima naandë.

Di pisi aki ta lei i kumafa sëmbë ta mëni u Masa Jesosi.

25 Nöo fa dee sëmbë u Jelusalen dë ta haika di fan u Masa Jesosi, nöo so u de ta hakisi taa: “Wë di sëmbë aki, nëen dee hedima fuu bi ta suku u kii nö?”

26 Nöo hën a ko dë aki ta fan a lanti dendu wajaa sö. Ma na wan sëmbë dë aki ta suku u tapëen seei. Wë a sa kë sonte dee hedima fuu ko si taa hën da di Paamusi Könu di Gadu bi o manda ko nö?”

27 Ma ee de ta mëni sö seei, ma u sabi naasë di sëmbë aki kumutu. U sabi ën bumbuu. Ma te di Paamusi Könu ko, sëmbë an o sabi naasë a kumutu.”

28 Nöo di de fan sö, hën Masa Jesosi bai fan möön taanga ka a dë a di djai dendu dë taa: “Awa, un sabi mi tuu, di da un taa un sabi naasë mi kumutu. Ma tökuseei wan sabi fini fëen eti e. Biga fa mi ko aki, ma ko u mi seepi ma wan Sëmbë hën manda mi ko. Nöo di Sëmbë dë an ta ganjan sëmbë. Ma fa uun sai dë, wan sabi di Sëmbë mi ta taki aki möönsö.”

29 Ma nöo mii sabi ën biga nëen ala mi kumutu. Hën manda mi ko aki.”

30 Nöo fa a fan dë, nöo di fan fëen an kai ku dee hedima seei, nöo hën de kë kisi ën tja go. Ma tökuseei na wan sëmbë panjëen, biga di juu fëen an dou eti.

31 Ma nöo hii fa dee hedima bi ta suku ën u kisi seei, ma wanlö hila sëmbë sai dë ko ta biibi nëen. Biga de taa: “Wë mi hakisi e, te di Paamusi Könu ko, nöo a o sa du möön gaan foombo wooko möön fa di sëmbë aki ta du nö?”

32 Nöo fa dee lanti ta fan kusikusi naandë, nöo dee Faliseima an kë jei seei taa sö de ta mëni u Masa Jesosi taa hën da di Paamusi Könu. Nöo hën de go a dee Gaan Begima dee ta dë a di Gaan Keikiwosu dë, hën de fiti buka makandi. Nöo hën de manda dee wakitima dee ta watji di Wosu taa be de go kisi Jesosi tja ko da de.

33 Di juu dë, Masa Jesosi ta fan ku dee sëmbë eti. A taa: “Wan sati pisiten nöo mi o dë ku unu möön eti e, nöo mi o toona go a di Sëmbë di bi manda mi ko aki.”

34 A di juu dë woon ta suku mi te un wei, ma wan o feni mi möönsö. Biga ka mi o go dë, wan o sa ko dou ala e.”

35 Nöo hën dee Dju hedima hakisi deseei taa: “Wë nöo naasë di womi aki sa go maingë te nöo wa o sa si ën möön? A sa kë taa a o go a dee oto köndë ka dee Dju sëmbë fuu paaja go, faa musu go ta lei dee oto köndë sëmbë nö?”

36 Andi da di oto a ta taki naandë taa woon suku mi te un wei, wan o si mi möön, nöo ka mi o go nöo wan o sa dou ala?”

37 Nöo di kaba lasiti daka u di piizii dë, hën bigi möön hii dee oto daka tuu. Nöo a di daka dë, hën Masa Jesosi hopo taanpu hën a bai taa: “Ee wan sëmbë dëwata kisi i nöo be i ko a mi e, ko tei wata fii bebe.”

38 Biga a sikifi a Masa Gadu Buku taa, di sëmbë di ko biibi a mi nöo a o dë nëen hati dendu kuma wan kiiki hedi ta kule wata ta ko nöömö, ta tja di libi u teego ta paaja.”

39 Wë nöo fa a fan naandë, a ta taki u di Akaa u Gadu di dee sëmbë ta biibi nëen o kisi a bakaten. Biga di juu dë, sëmbë an bi kisi di Akaa eti fu di Masa Jesosi an bi toona go a Gadu Köndë faa feni di nëbai fëen eti.

40 Nöo di dee sëmbë jei fa a bai dë, hën so u de taa: “Maingë, di sëmbë dë, a musu u dë di Tjabukama di Gadu bi o manda ko e.”

41 Otowan taa: “Hën di Paamusi Könu seei di dë wante.” Otowan taa: “Hun? Nönö, na a Galilea di Paamusi Könu bi o kumutu e.”

42 Biga Gadu Buku taki taa a o dë wan bakamii u Dafiti, nöo a Betelehem a o kumutu, ka Dafiti bi ta libi.”

43 Nöo da sö dee sëmbë ko paati fu Masa Jesosi hedi.

44 So u de kë go kisi ën seei fu de tja go a kuutu, ma tökuseei na wan sëmbë panjëen möönsö.

Aki ta lei fa dee Dju hedima buuse Masa Jesosi tjika.

⁴⁵ Nöö fa de mbei dë, hën wë dee wakitima toona go a dee Faliseima ku dee Gaan Begima, dee bi manda de ko. Hën dee hedima hakisi de taa: “Unfa wë? Wan kisi ën tja ko nö?”

⁴⁶ Hën de taa: “Wë nönö. Fa u jei di fan fëen te u kaba dë, nöö a bigi da u poi. Biga wa jei na wan sëmbë fan sò wan daka.”

⁴⁷ Nöö hën dee Faliseima taa: “Ambëë? A ganjan unu kisi tu nö?”

⁴⁸ Fa u dë aki, un jei wan daka taa wan fuu dee takima ku dee Faliseima aki ko biibi nëen ö?

⁴⁹ Wan sabi taa dee lagilagi sëmbë sösö wan dë, dee na sabi wan wojo soni u Gadu wëti, de nöö ta biibi ën nö? Helu u de tu!”

⁵⁰ Nöö fa de fan dë, nöö Nikodemusi di bi go fan ku Masa Jesosi a wan ndeti, nöö hënseei dë wan u dee hedima tu. Nöö hën a hakisi de taa:

⁵¹ “Wë nöö unfa di wëti fuu dë? U sa kuutu wan sëmbë da sitaafu söndö u dëen pasi faa fan, fuu sabi taa hogi a du tuu nö?”

⁵² Nöö hën de piki ën taa: “Aa, fa u dë aki, nöö i seei dë a di së u dee Galilea sëmbë tu nö? Wë go suku a di Buku luku ee unsë joo si taa wan tjabukama u Gadu kumutu a Galilea wan daka.”

⁵³ Nöö fa de fan dë, nöö hën hii sëmbë booko paaja go u de a wosu.

8

¹ Ma nöö Masa Jesosi hën a go a di kununu de kai Oleifi Kununu.

A di pisi aki de tja wan mujëë ko a Masa Jesosi di de bi kisi ku waka manu.

² Nöö di dobooko fëen mamate biten, hën Masa Jesosi toona ko a di Wosu u Masa Gadu möön. Nöö fa a ko dë, nöö hën hii sëmbë hai ko wante nëen naandë, hën a seeka sindo faa lei de.

³ Nöö di juu dë, dee Sabima u Wëti ku dee Faliseima tja wan mujëë ko nëen naandë. A dë sò taa de kisi di mujëë dë ku wan womi, hën de tjëen ko buta taanputaanpu leti a dee hia sëmbë fesi dë.

⁴ Hën de taki da Masa Jesosi taa: “Wë Mësitë o, di mujëë aki, hën wë u kisi ku womi djunsu dë nöö hën wë u tjëen ko a i.

⁵ Wë nöö a dee wëti Mosesi bi da u, nöö a taa te u kisi wan mujëë sò nöö u musu naki ën ku sitonu kii. Nöö unfa ii taki u di soni dë?” Sò de hakisi ën.

⁶ Ma nöö fa de ta hakisi ën dë, taapu tö nöö de ta seti dëen sò fu de feni föutu nëen u de tjëen go kaagi. Ma nöö Masa Jesosi an piki de, hën a bendi ta sikifi soni ku ën finga a goon.

⁷ Hën de ta buta ku ën nöömö faa musu taki wan soni.

Te wan pisi hën a hopo taanpu. Hën a taa: “Luku, di fuunu di si taa a dë söndö föutu a Gadu wojo, nöö be a hiti di fosu sitonu naki di mujëë.”

⁸ Hën di a fan sò kaa, hën a toona bendi ta sikifi soni ku finga a goon möön.

⁹⁻¹⁰ Nöö di dee sëmbë bi tja di mujëë ko dë jei sò, nöö hën de bia ta fusi nango u de oto a oto baka, seti a dee gaan wan te dou a dee möön njönku wan. Biga de tuu ko si taa de an dë söndö föutu a Gadu wojo.

Nöö hën Masa Jesosi hopo taanpu, nöö an si na wan kodo sëmbë dë möön boiti di mujëë wanwan tö sai dë taanputaanpu. Hën a hakisi ën taa: “Wë mujëë o, unsë dee sëmbë dee tja i ko aki dë? De an da i sitaafu möön nö?”

¹¹ Hën a taa: “Wë nönö, Mësitë.”

Nöö hën a taa: “Söö, wë antoobi. Nöö miseei, ma o da i sitaafu tu. Nöö i toona go fi, ma te i go nöö na du hogi möön e, mujëë.”]

A di pisi aki dee hedima u dee Dju ta fia ku Masa Jesosi.

12 Nöo hën Masa Jesosi toona seti fan ku dee sëmbe dee bi ko nëen naandë. A taa: “Mi da di limbo u di goonliba aki e. Hën mbei ee wan sëmbe i ta waka a mi baka nöo ja o waka a dungu möönsö, ma fusutan fii o dë limbolimbo gbegedee. Biga i kisi di libi u Gadu kaa.”

13 Nöo di a taki sö, hën dee Faliseima buta ku ën wante. De taa: “Haika fa i ta fan fii seei naandë. Ja abi na wan sëmbe u dë kotoigima da i, hën mbei sëmbe an sa piki di fan fii taa tuutuu soni i ta taki.”

14 Hën Masa Jesosi piki de taa: “Ee soni u miseei mi ta konda seei, ma nöo tuutuu soni mi ta taki e. Biga mii sabi naasë mi kumutu, nöo mi sabi naasë mi nango tu. Ma fa un sai dë, un wan sabi dee soni dë.”

15 “Nöo fa un ta kuutu mi aki, un ta kuutu mi a libisëmbe fasi nöo. Ma fa mi dë aki, ma ta kuutu na wan sëmbe.”

16 Ma te mi o kuutu, nöo di kuutu u mi o dë leti e, biga na mi wanwan o kuutu ën. Ma mi ku mi Tata di manda mi ko aki tuu o kuutu ën makandi.

17 “Nöo unfa a dë a di wëti fuunu, dee sëmbe? Na tu sëmbe musu taki di wan soni ufö de sa piki taa tuu nö?”

18 Wë nöo mi dë wan sëmbe ta kotoigi da miseei kaa, nöo di otowan hën da mi Tata di manda mi ko aki.”

19 Nöo hën de hakisi ën taa: “Sö nö? Wë naasë di tata fii dë?”

Hën a piki de taa: “Wë di wan sabi mi, hën mbei wë wan sabi mi Tata. Ma ee un bi sabi ambë da mi, nöo un bi o sabi ambë da mi Tata tu.”

20 Nöo dee fan Masa Jesosi ta fan naandë, nöo a fan de leti a di Wosu u Masa Gaangadu dendu, zuntu ku di kamian ka de ta tja möni ko u da Gadu. Ma nöo fa hii sëmbe bi dë guntji dë seei, ma töku na wan sëmbe kisi ën panjan, biga di juu fëen an dou eti.

A di pisi aki Masa Jesosi ku dee hedima u Dju ta fan eti.

21 Nöo hën a toona fan ku de möön taa: “Mi o go, nöo woon suku mi te un wei ma wan o sa dou ka mi nango e. Nöo woon dëdë söndö Gadu puu unu a bëë u dee hogidu fuunu.”

22 Nöo hën di a taki sö, hën dee hedima u Dju taa: “Wë unsë a o go di a taa ka a o go wa o sa dou ala? A sa kë a o go kii ën seei nö, maingë?”

23 Ma nöo hën a taki da de taa: “Un haika e, un dë u goonliba aki, ma nöo mii dë u Gadu.”

24 Nöo fa mi taki da unu taa woon dëdë söndö Gadu puu unu a bëë u dee hogi du fuunu aki, nöo tuu e. Biga ee wan kë piki mi taa mi da di Sëmbe di mi taki da unu taa mi dë aki, nöo woon dëdë a dee hogi du fuunu liba söndö Gadu puu unu a bëë.”

25 Nöo hën de hakisi ën taa: “Wë fa i ta fan dë, ambë seei da i?”

Nöo hën a piki de taa: “Mi da di Sëmbe di mi ta taki da unu nöömö kaa taa mi dë. Hën nöo mi dë eti.”

26 Nöo fa mi dë aki, mi abi sömëni soni u mi sa tei kuutu unu, ma nöo ma o du sö e. Biga di Sëmbe di manda mi ko aki, nöo dee sondi dee a ta taki da mi nöo de nöo mi ta tei ta taki. Nöo tuutuu sondi a ta taki e, dee sëmbe. I sa futoou ën.”

27 Ma nöo fa Masa Jesosi ta fan naandë, de an ta fusutan taa soni fëen Tata Masa Gadu a ta taki.

28 Fëen mbei a taki da de taa, “Te di daka woon hopo Mi di ko Libisëmbe Mii aki buta a liba bifö woon ko sabi ambë da mi awaa. Nöo a di ten dë, nöo woon ko si taa ma ta du na wan wojo sondi u mi seei, söseei tu ma ta fan wan soni u miseei, ma dee soni mi Tata lei mi, nöo de mi ta taki.”

29 Nöo fa a manda mi ko aki, nöo a ta dë ku mi tu e. An ta disa mi wanwan möönsö, biga hiniwan juu mi ta du dee sondi dee ta kai ku ën.”

30 Nöo di dee hia sêmbê bi sai dê jei fa a fan, nöo sômêni u de bia ko biibi nëên, te kisi so u dee hedima u Dju.

A di pisi aki Masa Jesosi ta taki da de taa de an dê tuutuu bakamii u Abahamu.

31 Nöo hên Masa Jesosi fan ku dee hedima u Dju dee ko biibi ên dê taa: “Ee un ta hoi dee lei mi ta lei unu aki nango nöömö, nöo woon ko dê bakama u mi tuutuu.

32 Nöo woon ko sabi sondi gbelingbelin, leti kumafa a dê a Gadu wojo. Nöo te un ko sabi sondi sö kaa, nöo a o mbei un ko fii kumutu a di saafu un sai dê.”

33 Nöo hên de piki ên taa: “Ambêê? Fa uu dê aki, u da Abahamu böngö. Hên da gaan sêmbê fuu. Na wan ten u bi dê saafu a sêmbê basu wan daka. Nöo unfa i sa taa woo ko fii kumutu a saafu?”

34 Nöo hên Masa Jesosi piki de taa: “Fu tuutuu mi taki da unu taa ee wan sêmbê i ta du hogi nango nöömö, nöo saafu wê i dê a hogi du basu e.

35 “Nöo ee i dê saafu ta wooko da wan famii, nöo ja a’ wan tan kamian a di famii dê möönsö. Biga saafu nöo i dê. Ma nöo di sêmbê di dê miiu u di famii, nöo hên o dê a di famii nöömö, nöo hên o abi taki a di wosu dendu.

36 Wê nöo ee di Mii u Gadu aki, hên puu i a saafu mbei i ko fii, nöo i ko fii tuutuu seei.

37 “Dee sêmbê, fa un sai dê, mi sabi taa unu da dee böngö u Abahamu, ma nöo wan ta djei ên e. Biga un dê kabakaba u kii mi fu di wan kê tei dee soni mi ta lei unu aki. Ee Abahamu wê, an bi o du sö o.

38 Fa mi dê aki, mi ta lei unu dee sondi dee mi si ku dee mi jei a mi Tata, ma nöo unu ta du dee sondi dee un si a di tata fuunu.”

39 Nöo hên de piki ên taa: “Un tata fuu i ta taki dê? Na di böngö u Tata Abahamu u dê nö?”

Hên a piki de taa: “Ee un bi dê dee gbelingbelin böngö u Abahamu, nöo un bi o libi kuma hên.

40 Ma un dê kabakaba u kii mi, hii fa mi da di Sêmbê di ta lei unu dee tuutuu soni u Gadu dee miseei jei nëên. Abahamu an bi o du sö wan soni e.

41 Ma un ta du dee soni dee un si a unu tata, hên mbei un kê kii mi.”

Nöo hên de piki ên taa: “Wê nöo fa i ta fan dê, i kê mbei taa u da oto tata mii nö? Nönö. Masa Gaangadu mii seei u dê. Hên nöo da u Tata.”

42 Nöo hên Masa Jesosi piki de taa: “Ee Gadu hên bi da unu tata, nöo un bi o lobi mi e, biga nëên ala mi kumutu ko aki. Hên seei wê manda mi ko aki.

43 Nöo faandi mbei wan ta fusutan dee soni mi ta taki aki? A dê fu di wan dê a di fa fuun tei de, hên wê mbei e.

44 “Di didibi seei wê da unu tata e, dee sêmbê. Biga dee soni dee a lo’ u du, nöo deseêi wê un ta kê du dê kaa. Fa a sai dê, sensi a di seti u mundu a bi ta kii sêmbê kaa. An nama wan daka seei a tuu soni möönsö, biga di soni de kai tuu, an dê nëên hati seei. Mindi soni, hên da di hiniwan daka fan fêên di a ta fan kaa, biga nëên mindi soni ku lëgêdê kumutu.

45 Nöo fu di un nama ku ên, hên wê mbei wan kê piki mi a dee tuutuu soni mi ta lei unu aki.

46 “Fa un dê aki, na wan fuunu sa lei finga a mi taa mi du hogi wan daka möönsö. Wê ee wan sa lei sö, nöo hên da tuutuu soni nöo mi ta taki. Nöo faandi mbei wan kê piki mi?”

47 Na fu di wan dê sêmbê u Gadu nö? Aai, hên wê mbei. Wê biga di sêmbê di dê u Gadu nöo hên ta haika Gadu woto.”

48 Nöo hên de piki ên taa: “Söö. Wa bi taki leti o, taa ju da wan takusêmbêma, ju Samalia sêmbê ju? Wan hogi soni wê dê a i liba ta fan dee lö fan naandê!”

⁴⁹ Hën Masa Jesosi piki de taa: “Nönö e, dee sëmbë. Na soni hën dë a mi liba e, ma mi Tata nê hën nöö mi ta suku u bai. Ma unu ta wisiwasi mi.

⁵⁰ Ma nöö ma a' toobi, biga ma ta suku nêbai da miseei. Ma nöö wan Sëmbë dë di ta suku ën da mi, nöö hën ta kuutu buta ambë fiti nêbai ku ambë an fiti.

⁵¹ Nöö k a hei mi tjika aki, nöö fu tuutuu mi taki da unu taa ee wan sëmbë ta hoi dee soni mi ta fan aki, nöö an o dëdë kaba a sösö möönsö.”

⁵² Nöö hën dee Dju hedima piki ën taa: “Söö. Awaa u ko si gbelin taa wan didibi hën dë a i liba tuu, fa i ko ta fan dee laulau fan naandë, Biga Abahamu dëdë gaanduwe kaa, söseee dee fesiten tjabukama tu. Ma nöö ii ko dë aki ta bai taa ee wan sëmbë ta hoi a dee lei fii nöö an o dëdë möönsö.

⁵³ Fa i sai dë, i hei möön Abahamu ku dee oto tjabukama u Gadu dee dëdë kaa nö? Unfa seei i ta mëni fii seei?”

⁵⁴ Hën Masa Jesosi piki de taa: “Ee miseei ta hei miseei, nöö an dë wan wojo soni. Ma mi Tata di un taa hën da Gadu fuunu, hën ta hei mi e.

⁵⁵ Nöö hii fa un taa a dë unu Gadu ma töku wan sabi ën, ma nöö mii sabi ën. Ee mi taa ma sabi ën, nöö hën da mi dë wan lëgëdëma kuma unu. Ma nöö mii sabi ën e, nöö mi ta hoi dee taki fëen tu.

⁵⁶ Nöö Abahamu, di gaan sëmbë fuunu, bi wai tumusi e, di a sabi taa a o si di daka di mi o ko a goonliba aki. Wë nöö a si ën tu, nöö a wai seei.”

⁵⁷ Fa a fan dë, hën de mbei: “Höön, andi i ta taki dë? Fa I sai naandë, ja gaandi dou feifiteni jaa eti, hën i bai taa i si Abahamu nö?”

⁵⁸ Nöö hën Masa Jesosi piki de taa: “Tuutuu mi taki da unu taa bifö de pai Abahamu, nöö mi bi dë gaanduwe kaa.”

⁵⁹ Nöö fa a piki dë, nöö de jei seei gbelin taa a taki taa hënseei da Gadu. Nöö hën de kule go kisi sitonu mii u de naki ën kii. Ma nöö Masa Jesosi fusi a de dendu pala kumutu a di Wosu dë go fëen.

9

A di pisi aki Masa Jesosi kula wan bookowojoma a

wan saba daka.

¹ Nöö hën fa Masa Jesosi nango dë, te wan pisi hën a si wan bookowojoma di de bi pali sö.

² Nöö hën u dee bakama fëen hakisi ën taa: “Wë Mësitë o, fa de pali di sëmbë bookobookowojo aki, hogi hën tata ku ën mama du mbei de pali ën sö nö, naa nëën seei a kumutu?”

³ Nöö hën a piki u taa: “Nönö, na hogi di womi aki du e, na hogi hën mama ku ën tata du tu. Ma a ko pasa sö u di kaakiti u Masa Gadu musu ko a limbo nëën libi.

⁴ Fa u dë aki, nöö u abi ten eti fuu ta wooko da di Sëmbë di manda mi ko aki, biga didia dë eti. Ma te wan pisi ndeti o ko, nöö na wan sëmbë o sa wooko möön.

⁵ Hën mbei solanga mi dë a goonliba aki, nöö mi da di Limbo di ta limbo sëmbë u di goonliba aki wojo.”

⁶ Nöö fa a fan naandë, hën a tunta a goon wante. Nöö hën a mbei ën pötöpötö, hën a lobi a di bookowojoma naandë wojo.

⁷ Nöö hën a taki dëen taa be a go wasi a di tobo de kai Siloam. (Nöö di “Siloam” dë, hën kë taki “de mandëen”.)

Nöö hën di sëmbë go, hën a go wasi te a kaba. Nöö fa a du naandë, hën wojo fëen limbo gbegedee, a ko ta si soni, nöö hën a toona go fëen a wosu.

⁸ Wë nöö di a dou a wosu, hën dee sëmbë ku ën ta libi bandja ku bandja naandë, ku dee oto sëmbë dee bi naa si ën ta pidi möni, hën de ko si ën naandë.

Hèn de ta hakisi taa: “Wè nöö di sèmbè aki, nëen u bi ta si sindosindo ta pidi mōni nō?”

⁹ Otowan taa: “Hèn seei wè di dè e.”

Otowan taa: “Nönö, nëen. Oto sèmbè nöö wè djei èn sō.”

Ma nöö hènseei piki taa: “Mi seei wè disi wante e, dee sèmbè!”

¹⁰ Hèn de taa: “Wè nöö unfa a waka wojo fii jabi te i ko ta si soni baa?”

¹¹ Hèn a piki de taa: “Wan womi de kai Jesosi hèn wè mbei wan pötöpötö lobi a mi wojo, hèn a manda mi u mi go wasi a di tobo de kai Siloam. Nöö hèn di mi go wasi, nöö hèn mi ko ta si soni.”

¹² Hèn de hakisi èn taa: “Wè nöö naasè di sèmbè dè?”

Hèn a taa: “Wè nönö, ma sabi.”

¹³ Nöö hèn wanlō sèmbè bi sai naandè tei èn tja go a dee Faliseima.

¹⁴ Wè biga di daka di i si Masa Jesosi kulèen naandè, nöö a bi dè leti a wan saba.

¹⁵ Hèn dee Faliseima hakisi èn taa: “Wè womi, unfa i du ko ta si soni? Kondèen da u.”

Hèn di sèmbè piki taa: “Wè di sèmbè tei doti mbei pötöpötö lobi a mi wojo, hèn mi go wasi. Hèn wè wojo u mi ko limbo, mi ko ta si soni e.”

¹⁶ Nöö hèn so u dee Faliseima taa: “Hön, di sèmbè naandè, na a Gadu a kumutu e. Biga an hoi di saba.”

Ma dee otowan u de taa: “Ma wan hogi sèmbè an bi o sa du sō wan gaan foondo soni e.” Hèn de kisi toobi ku deseei naandè.

¹⁷ Nöö hèn de toona bendi ko a di sèmbè di wojo bi booko naandè baka, hèn de taa: “Wè ju a bi kula mbei i ko ta si soni. Nöö unfa fèen ii taki?”

Hèn a taa: “Wè mi si taa a dè wan tjabukama u Gadu.”

¹⁸ Ma nöö de an kè piki seei taa de bi pai èn bookobookowojo ma nöö fa u dè aki a ko ta si soni. Nöö hèn de dè a di taki tee, hèn de kai hèn tata ku èn mama ko.

¹⁹ Hèn de hakisi de taa: “Wè di sèmbè aki sō, miii fuunu nō? Nöö bookobookowojo un bi pai èn nō? Nöö unfa a waka ufō a ko ta si soni fa u dè aki? Un piki u boo jei.”

²⁰ Nöö hèn di tata ku di mama piki de taa: “Wè u sabi taa a dè miii fuu, nöö u sabi gbelingbelin tu taa u bi pali èn bookobookowojo.

²¹ Ma nöö fa a waka ufō a ko ta si soni, nöö di dè wa sabi. Nöö wa sabi tu ambè da di sèmbè di kulèen te a ko ta si soni. Ma nöö di a dè gaangan sèmbè kaa, nöö a kandè un sa hakisi èn seei i si, be hènseei fan ku unu.”

²² Nöö sō di tata ku di mama u di womi piki, u di de fèè dee hedima u Dju. Biga wè de bi buta taa ee wan sèmbè ta piki taa Jesosi hèn da di Paamusi Kōnu, nöö de o puu i a keiki.

²³ Hèn mbei de piki a di lō fasi dè taa: “Un hakisi hènseei biga a ko gaan sèmbè kaa.”

²⁴ Nöö hèn de toona kai di womi di u tu pasi ko a de.

Hèn de taki dèen taa: “Wè womi, fa i fan dè, u kè jei èn möön. Ma nöö i musu hopo maun a liba soi a Gadu fesi taa tuutuu soni gbelin joo taki awaa. Biga u sabi taa di sèmbè di i taa hèn kula i dè, nöö takulibima a dè e.”

²⁵ Nöö hèn di sèmbè piki de taa: “Wè ee a dè takulibima nöö di dè ma sabi. Ma wan kodo soni nöö mi sabi. Hèn da mi bi dè bookowojoma, ma nöö fa u dè aki mi ko ta si soni.”

²⁶ Nöö hèn de hakisi èn möön taa: “Wè andi ku andi seei a du da i baa, ufō i ko ta si soni. Piki u boo jei.”

²⁷ Nöö hën a piki de taa: “Wë mi bi taki di soni da unu kaa ma nöö wan kë piki. Andi fëen seei un kë jei a mi möön? A sa kë taa unu seei kë bia ko bakama fëen tu nö?”

²⁸ Nöö fa a piki de naandë, hën de kisi faja awaa. Hati u de boonu ku ën tee hën de kosi ën te a bigi. De taa: “Höön, wë nöö i kë dë bakama u sô wan lagilagi sëmbë nö? U dee sëmbë aki, bakama u Mosesi uu dë,

²⁹ biga u sabi taa ku Mosesi wë Gadu bi fan. Ma di lö sëmbë dë, hën wa sabi naasë seei a kumutu ko aki.”

³⁰ Nöö hën di sëmbë taa: “Aa, wë a foombo mi tumisi o, di un taa wan sabi naasë a kumutu, ma nöö a kula mi te mi ko ta si soni.

³¹ Wë u sabi taa fa Gadu sai dë, an ta haika di begi u wan takulibima. Ma di sëmbë di ta lesipeki ën ta du dee soni dee a ta taki, nöö te hën begi ën nöö a ta jei.

³² Wë nöö fu sensi di goonliba mbei te kisi tide, nöö wa jei taa de mbei wan sëmbë di de pali bookobookowojo ko si soni wan daka.

³³ Ee di sëmbë dë an bi dë u Gadu, nöö an bi o sa du sô wan soni e.”

³⁴ Nöö fa di womi piki naandë, hën dee hedima kosi ën tee, de taa: “Ju! Fa i si de pali i bookobookowojo dë, nöö ja sabi taa hogilibi mbei de pali i sô nö? Nöö andi i abi u lei u?” Nöö hën de jakëen puu a di keikiwosu dë buta go a döö.

³⁵ Nöö di Masa Jesosi ko jei taa sô de jaka di womi, hën a ko miti ku ën. Hën a hakisi ën taa: “Unfa wë baa? I ta biibi a di Mii u Gadu di ko libisëmbë mii nö?”

³⁶ Nöö hën di womi piki ën taa: “Wë nöö Mësitë o, unsë seei a dë baa? Mi kë biibi nëën.”

³⁷ Nöö hën a piki ën taa: “Hën wë i si disi kaa e. Hën seei wë ta fan ku i aki.”

³⁸ Nöö hën di womi taa: “Aaa, wë Masa, mi ta biibi o.” Hën a saka tjökö kini a goon dëen.

³⁹ Nöö di soni pasa dë, hën mbei Masa Jesosi taki wan soni aki sô. A taa: “Fa mi ko a goonliba aki, nöö mi ko fu mbei libisëmbë musu kuutu paati ku deseëi. Dee bookowojoma, de o ko a mi fu mi limbo de wojo be de fusutan soni. Ma nöö dee sëmbë dee taa wojo u de an booko, de ta si soni kaa, nöö de o ko fika bookowojoma awaa.”

⁴⁰ Nöö fa a fan naandë, nöö wanlö Faliseima bi sai naandë ta jei, nöö de sabi taa de a ta tjökö. Hën de taa: “Ee? Unfa i taki? I kë taa u dë bookowojoma nö?”

⁴¹ Hën a piki de taa: “Wë ee un bi piki taki wojo fuunu booko, nöö wan bi du hogi e. Ma nöö di un taa soni an du unu, un ta si soni kaa, nöö fëen mbei föutu fika a unu liba.”

10

Aki Masa Jesosi ta taki soni u sikafu ku di sëmbë ta kiija de.

¹ Nöö hën Masa Jesosi ta lei dee sëmbë möön, a taa: “I sabi fa a dë te wan sëmbë o kiija sikafu. A o mbei wan sitonu peni ta tjubi de fu hogi mbeti an sa ko kisi de kii. Na sô a dë nö? Wë nöö fa a o mbei di peni dë, nöö wan kodo dööbuka tó a o abi.” Nöö mi o konda wan soni da unu aki, nöö tuutuu soni seei a dë e. Ee wan sëmbë an kë waka a di dööbuka, ma a ta subi fëen a wan oto kamian fu go a di peni dendu, nöö di sëmbë dë nöö fufuuma e, hogihatima gbelin seepi a dë wante.

² “Ma di sëmbë di o waka a di dööbuka ko a di peni dendu, nöö hën da di kiijama u dee sikafu seei.

³ Nöö fa i si a ko dou dē, nöö wantewante di wakitima o jabi di döo dēen, faa pasa go a dendu. Nöö te a go a dendu kaa, nöö hiniwan u dee sikafu a o kai de nē, nöö de o jei en biga de sabi en tōngō. Nöö a o tja de kumutu a di peni dendu go a döo faa sölugu de.

⁴ Nöö fa de o go a döo dē, nöö di sikafuma o ta waka a de fesi, nöö de o dē nēen baka, biga de ta sabi en tōngō.

⁵ “Ma ee wan oto sēmbē di nēen ta kiija de ko a de naandē, nöö de an o go nēen baka e. De o kule seei dēen, biga de an sabi wan oto sēmbē tōngō mōon leki di sēmbē ta kiija de.”

⁶ Sō wan woto Masa Jesosi tei lei dee sēmbē a nōngō fasi, ma nöö de an saandi a ta taki da de mōonsō.

⁷ Nöö di a si taa de an ta fusutan, hēn a toona fan ku de mōon. A taa: “Mi taki e, dee soni i si mi o fan ku unu aki, nöö tuutuu soni seei de dē e. Mi seepi wē da di döobuka, di fii waka go dou a dee oto sikapu.

⁸ Hii dee sēmbē dee bi buta deseei a di kamian di i si mi abi aki, nöö fufuuma sōsō nöö de bi dē e. Fēen mbei dee sikafu dee dē u mi tuutuu an bi ta piki de buka.

⁹ “Mi taki da unu e, taa mi da di döobuka da hiniwan sēmbē di sa kē pasa go a di peni dendu faa feni di heepi u Gadu. Nöö sō wan sēmbē i dē fii bōōbōō seei. I sa ta waka fii nango a döo toona ko, ta feni di sölugu u Gadu.

¹⁰ “Dee fufuuma dee mi bi taki dē, de ko u de ganjan tee sikapu kii poi kaba a sōsō. Ma mi ku u ko da de gbelingbelin libi seei ku teu.”

¹¹ Hēn a toona taki mōon taa: “Mi da di mōon bumbuu sikafuma u sikafu e. Biga fa mi dē aki, mi dē kabakaba u mi dēdē da dee sikafu u mi.

¹² Ma di sēmbē de ta juu u luku sikafu u de pakēen, nöö hēn an o dē sō e, biga nēen abi dee sikafu. Nöö te a si taa hogi mbeti ta ko, nöö a o kule disa de naandē go fēen faa. Nöö di hogi mbeti o booko ko a de ko paaja de fanjanfanjan. Wan si o?

¹³ Di sēmbē de ta juu ta paka dē, a go fēen gaanduwe biga aan toobi ku dee sikafu. Mōni nöö a ta wooko fēen. Ma mi, ma dē sō e.

¹⁴ “Mi taki da unu mōon e, taa mi da di mōon bumbuu kiijama u sikafu. Mi sabi dee sikafu u mi, nöö dee sikafu u mi seei sabi mi tu.

¹⁵ Leti kumafa i si mi ku mi Tata sabi u seei bunu aki, nöö sō mi ku dee sikafu u mi sabi u seei tu, hēn mbei wē mi o dēdē da de.

¹⁶ “Nöö mi abi oto sikafu dee an dē a di hipi aki dendu eti e, nöö deseei mi musu tja ko mōkisi ku dee disi tu. Biga de o jei di tōngō u mi, nöö te de jei en nöö de o piki ko a mi, nöö woo dē wan kodo hipi sikapu ku wan kodo sikafuma.

¹⁷ “Nöö fu di soni i si mi fan naandē, fēen hedi mbei mi Tata lobi mi sō e, fu di mi o lasi mi libi da dee sikafu u mi, fu mi toona feni en baka.

¹⁸ Nöö fa mi o lasi mi libi dē, na sēmbē hēn o puu en a mi e. Nōnō. Ma ku miseei kē mi o lasi en. Nöö mi abi leti fu mi lasi mi libi, mi abi leti fu mi sa toona feni en baka tu, biga sō mi Tata buta da mi kaa u mi musu du.”

Sō Masa Jesosi fan ku dee sēmbē ta haikēen dē te a kaba.

¹⁹ Nöö fu di fan u Masa Jesosi naandē hedi mbei dee hedima u Dju kisi toobi buja te a bigi paati ku deseei.

²⁰ So u de taa: “Di sēmbē naandē, didibi dē nēen hedi e. Hēn wē poi en sō. Faandi mbei un sai naandē ta haikēen eti?”

²¹ Otowan taa: “Wan sēmbē di didibi dē nēen hedi, nöö a sa fan sō wan fan nō? Unfa wan didibi sa kula wan sēmbē di de pali bookobookowojo te a ko ta si soni?”

Aki ta lei fa dee hedima u Dju

an ta biibi tjika.

22 Nöo di juu dë, de ta njan wan gaan piizii a Jelusalen möön, di de ta mēni kumafa de bi toona wēi di Gaan Keikiwosu da Gadu. Nöo di ten dë da di möön kötö ten u di jaa.

23 Nöo hēn wē Masa Jesosi ta waka a di baiko u di Wosu u Masa Gadu de ta kai di Baiko u Salumon.

24 Nöo hēn wē aan soni, hēn dee hedima u Dju ko lontu ēn naandē wante.

Hēn de hakisi ēn taa: “Womi, un longi seei joo ta bia u ta daama nango ta ko? Fan ku u limbolimbo awaa. Ee i da di di Paamusi Könu, nöo i piki u gbelin boo sabi awaa.”

25 Hēn Masa Jesosi piki de taa: “Wē mi bi taki ēn da unu kaa, ma nöo wan bi kē biibi. Biga sōmēni gaan wooko mi du a mi Tata nē, nöo de ta konda gbelin ambē da mi.

26 Ma wan kē piki möönsö. Nöo di soni mbei, fu di wan dē a dee sikafu u mi dendu.

27 “Fa dee sikafu u mi sai dē nöo de sabi mi töngö e, nöo mi seei sabi de tu. Nöo de ta waka ta ko a mi baka,

28 nöo mi ta da de di libi u teego. Soni an o mbei te de sa lasi go kaba a sösö möönsö e, nöo de an sa puu de a mi maun dendu tu.

29 Biga mi Tata hēn da mi de, nöo hēn abi di möön gaan kaakiti u mundu. Hēn mbei de an sa puu de nēēn maun möönsö, nöo de an sa puu de a mi maun möönsö tu.

30 Biga mi ku mi Tata dē di wan.”

31 Nöo fa i si Masa Jesosi fan dē, nöo hēn dee hedima hati boonu wante, te de kisi sitonu mii möön u de naki ēn kii.

32 Nöo hēn Masa Jesosi fan ku de taa: “Sōmēni gaan foondo wooko mi du a unu mindi u lei unu di kaakiti u mi Tata. Wē nöo fu undi u de hedi mbei un kē naki mi ku sitonu kii?”

33 Hēn de taa: “Nönö e! Fa i si u kē naki i aki, na u dee foondo wooko fii hedi e. Ma fu di i ta sösö Masa Gaangadu, hēn mbei. Biga fa i dē aki, nöo i da wan sösö libisembē leti kuma u, ma nöo hēn i sai naandē ta pēē i seei taa i dē Gadu. Hēn mbei wē u kē naki i ku sitonu kii.”

34-35 Nöo hēn Masa Jesosi piki de taa: “Wē nöo di soni dē hēn bigi da unu sō nö? Wan sabi fa a sikifi a di Buku u Gadu di un taa hēn ta tii libi fuunu naandē nö? A taa, Gadu bi kai so sēmbē ‘gadu’ fu di a buta de fu de kuutu nēēn kamian. Sō di Buku taki, nöo ja sa puu na wan soni a di Buku.

“Wē nöo ee dee sösö sinkii sēmbē dē a kai ‘gadu.’

36 nöo mi wē? Unfa un sa taki taa mi ta sösö Gadu te mi taa mi da Mii fēēn? Andi mbei a ta bigi da unu sō? Biga mi Tata seei wē tei mi apaiti fēēn seei vö, hēn a manda mi ko a goonliba aki.

37 “Ma nöo fa i si mi ta fan ku unu aki seei, ma an dē fuun piki e, ee na un si mi ta du dee lö wooko dee mi Tata nöo bi sa du.

38 Ma ee un si mi ta du de, nöo be un biibi fu de hedi e, ee wan kē piki fa mi ta fan aki. Biga te un biibi u de wooko hedi kaa, nöo woon ko fusutan taa di Tata dē a mi tuu, nöo mi dē a di Tata. Mi ku ēn, sō u dē di wan.”

39 Nöo fa Masa Jesosi fan dē, hēn de kē kisi ēn panjan tja go wante, ma nöo hēn a fusi kumutu a de dendu go fēēn.

40 Nöo hēn a koti go a di oto sē banda u Joodan Lio ka Johanisi bi ta dopu sēmbē a fesi,

41 nöo naandē sēmbē ta ko nēēn seei te a hia.

Hën de taa: “A dë sö tuu, taa Johanisi an bi du na wan foondo wooko möönsö. Ma Gadu bi dë ku ën e, biga hii dee soni dee a bi taki u di sëmbe aki, de tuu dë tuu.” Sö de ta fan ku deseeti.

⁴² Nöo fu di soni dë hedi mbei hia sëmbe ko biibi a Masa Jesosi a di kamian dë.

11

Aki ta konda fa Masa Jesosi weki Lazalosi a dëdë.

¹⁻² Wë nöo di juu dë, nöo hën wan womi bi dë de kai Lazalosi, nöo hën a kai a siki. Nöo a abi tu sisa fëen: wan da Maita, di otowan da Malia. Nöo de dii sëmbe dë tuu ta dë a di köndë de kai Betania. Nöo di Malia aki sö, hën da di mujëe di o tutu di sumëe suti fatu a Masa Jesosi futu te a kaba nöo a o dëe ën ku di uwii u hedi fëen.

³ Nöo hën wë de tu sisa manda buka da Masa Jesosi ka a dë ala taa Lazalosi di mati fëen di a bi lobi di gaan lobi, nöo a siki teee na soni.

⁴ Nöo di Masa Jesosi jei di buka dë kaa, hën a taa: “Awa, ma di siki fëen i si aki, na dëdë o dë kaba fëen e, ma fu Masa Gaangadu kisi nëbai. Biga di Mii fëen aki o feni gaan nëbai a di soni di o pasa aki.”

⁵ Wë nöo Masa Jesosi lobi de dii sëmbe dë gaanfa: Maita, ku Lazalosi, ku Malia.

⁶ Ma tökusee fa a jei di buka naandë seei, ma a tan tu daka eti ufö a o go haika dee sëmbe awaa.

⁷ Nöo hën a taki da u dee bakama fëen taa: “Un seeka, boo toona go a Judea awaa e.” „Biga Betania da wan köndë fu Judea.”

⁸ Nöo hën u taa: “Wë ma Mësitë o, djunsudjunsu dë dee hedima bi kë naki i ku sitonu kii ala, nöo hën i kë fuu toona go ala möön nö?”

⁹ Nöo hën Masa Jesosi piki u a wan nongö fasi, a taa: “Hiniwan didia ta limbo tuwalufu juu langa, nöo di sëmbe di ta waka a dee juu dë an sa naki futu kai. Biga di sonu ta tuwë limbo dëen.

¹⁰ Ma nöo di sëmbe di ta waka a ndeti nöo hën sa naki futu biga limbo an dë. I si?”

¹¹ Nöo hën a fan ku u taa: “Di mati fuu de kai Lazalosi duumi e. Ma mi o go weki ën baka.”

¹² Nöo hën u taa: “Wë Masa o, wë ee a dë sö nöo an hogi poi. Biga ee duumi a duumi, nöo hën da a o bëtë.”

¹³ Ma nöo fa Masa Jesosi fan dë, a taki ën fu di a si taa Lazalosi dëdë kaa, ma u dee bakama fëen ta mëni taa söso duumi nöo a ta taki.

¹⁴ Nöo hën a fan ku u limbolimbo awaa taa: “Lazalosi böö koti e.

¹⁵ Ma nöo mi wai fuunu hedi u di a dë taa ma bi dë ala, biga di soni ta pasa aki hën o mbei un ko biibi möön taanga. Nöo un hopo seeka, boo go haika di dëdë.”

¹⁶ Nöo hën Tomasi, di de kai Tumii, taki da u dee otowan taa: “Womi, un boo go nöo e, be dee hedima kii u ku Masa Jesosi tuu makandi, „be de böö fuu.”

¹⁷ Nöo fa de fan dë, nöo hën de hopo, hën de nango teefa de go dou a di köndë. Nöo hën de ko sabi taa Lazalosi dëdë, de bei te a abi fö daka kaa.

¹⁸ Nöo di köndë de kai Betania dë, hën ku Jelusalen an bi dë longi tumisi. Dii kilomëti nöo de bi dë,

¹⁹ nöo hën mbei sömëni u dee hedima u Dju kumutu a Jelusalen ko a Betania u de ko këe pena ku Maita ku ën sisa Malia.

²⁰ Nöo hën di Maita ko jei taa sö Masa Jesosi dë a pasi ta ko, hën a hopo wante waka go faa go miti ën a pasi. Ma Malia nöo hën a fika a wosu ala eti.

21 Nöo fa Maita ko dou a Masa Jesosi naandë, hën a taki dëen taa: “Ee Masa o, ee i bi dë aki, nöö di baa u mi an bi o dëdë e.

22 Ma nöö mi sabi taa hiniwan soni di i hakisi Gadu kaa, nöö Gadu o da i ën.”

23 Nöo hën Masa Jesosi taa: “Mujëë, na fëëe e. Di baa fii o toona weki baka.”

24 Hën a taa: “Aai, wë mi sabi taa a di kaba lasiti daka teee hii sëmbë o toona weki nöö hënseei o weki tu.”

25 Nöo hën Masa Jesosi piki ën taa: “Mujëë o, miseei wë disi kaa e, di ta weki sëmbë a dëdë ta da de libi. Nöo di sëmbë di ta biibi a mi, ee hën sinkii dëdë seei ma nëen da kaba u di libi fëen eti e. Biga a abi di libi u teego kaa.

26 Nöo hiniwan sëmbë di biibi a mi te a feni di libi dë, nöö na wan ten seei a o dëdë kaba a sösö möönsö. I ta piki di soni dë nö, mujëë?”

27 Hën a taa: “Aai Masa, mi ta biibi tuu taa i da di Mii u Masa Gaangadu. I da di Könu Gadu bi paamusi taa a o manda ko a di goonliba aki.”

28 Nöo fa de fan te de kaba naandë, nöö hën Maita toona go a wosu. Hën a kai ën sisa Malia tja go a wan së, hën a taki dëen taa: “Di Mësitë ko e, nöö a hakisi fa fii.”

29 Wë nöö di Malia jei sö taa Masa Jesosi ko, nöö hën a hopo wante nango nëen.

30 Biga fa Masa Jesosi bi ko dë, nöö an bi dou a di köndë ganda eti. A fika a hafu pasi ka i si Maita bi go miti ku ën naandë.

31 Nöo di dee hedima u, Dju dee bi ta këë pena ku Malia dë ko si fa a hopo hesihesi go a döo ala, nöö hën de mëni taa kandë a nango këë a di geebi ka de bei Lazalosi ala. Nöo hën de nango nëen baka.

32 Nöo hën Malia waka te go dou a Masa Jesosi. Nöo di a si ën, hën a hiti hënseei tuwë a goon nëen fesi dë. Hën a taa: “Ee, Masa, ee i bi dë aki nöö di baa u mi an bi o dëdë.”

33 Nöo di Masa Jesosi si fa Malia ku dee hedima u, Dju ta këë, nöö a fukëen nëen hati gaanfa te a fika piki an sa hoi ën seei möön.

34 Hën a hakisi de taa: “Wë naasë un bei di dëdë?”

Hën de taa: “Masa, ko go luku nöö joo si.”

35 Nöo di ten naandë, nöö wata ta pasa a Masa Jesosi wojo.

36 Hën dee Dju hedima taa: “Dee sëmbë, un luku fa a bi lobi ën!”

37 So u de taa: “Wë nöö ma di sëmbë aki, nëen bi heepi di bookowojoma te a ko ta si soni nö? Nöo faandi mbei an bi heepi di womi aki be an dëdë?”

38 Nöo di de fan sö, hën Masa Jesosi toona ko dë ku fuka möön te na soni, nöö hën a waka go dou a di geebi. Nöo di geebi dë wan baaku di de bi diki a sitonu, nöö hën de logoda wan gaan sitonu tapa di geebi buka.

39 Nöo hën Masa Jesosi taki da de taa: “Un logoda di sitonu puu a di baaku buka e.”

Nöo hën Maita, di sisa u di womi di dëdë naandë, taki taa: “Masa, nönö e. A ta tingi kaa, biga disi mbei fö daka di a dëdë.”

40 Nöo hën Masa Jesosi taki dëen taa: “Mujëë o, ma bi taki da i taa ee i ta biibi a mi, nöö joo si fa Gadu bigi nö?”

41 Nöo fa a fan dë, nöö hën de logoda di sitonu puu a di baaku buka awaa.

Hën Masa Jesosi hopo wojo luku liba, hën a taa: “Taata o, gaantangi fii e, fu di a dë taa i ta jei mi kaa.

42 Nöo mi sabi tu taa hiniwanten te mi ta fan ku i nöö i ta jei mi. Ma nöö fu dee sëmbë dee taanpu aki hedi mbei mi ta fan sö e, fu de sa ko biibi tuu taa i wë manda mi ko a goonliba aki.”

⁴³ Nöo fa i si a begi te a kaba dë, nöo hën a bai kai Lazalosi ku wan taanga tōngō taa: “Lazalosi, hopo kumutu ko a döo!”

⁴⁴ Nöo hën di sëmbë di i si a kai dë, hën a hopo kumutu ko e, ku dee geebi koosu lolululu nëen sinkii eti te dou ku ën maun ku ën futu. Fesi fëen seei dë taitai ku wan hangisa.

Nöo hën Masa Jesosi taki da dee sëmbë taa: “Un lusu dee koosu puu nëen sinkii, be a go.”

*A di pisi aki dee hedima ta
kuutu unfa de o du ku*

Masa Jesosi möön.

Mat. 26:1-5; Maik. 14:1-2; Luk. 22:1-2

⁴⁵ Wë nöo di dee hedima u, Dju dee bi sai dë si di soni Masa Jesosi du naandë, nöo hën sëmëni u de ko biibi nëen.

⁴⁶ Ma nöo so u de kule go konda da dee Faliseima taa sö wan gaan soni Masa Jesosi toona du möön.

⁴⁷ Nöo hën wë aan soni, hën dee Gaan Begima u dee Dju ku dee Faliseima kai wan gaan kuutu hakisi ee andi de musu du möön.

De taa: “Wë wa ta du. Wan si fa di bödjëema dë ta du dee foondo wooko fëen nango nöömö nö?”

⁴⁸ Wë nöo ee wa tapëen, nöo hii sëmbë o ko biibi nëen taa hën da di kõnu di bi musu ko. Nöo dee sëmbë u Loomë dee ta tii u, nöo de o ko booko di kõndë fuu puu u a di kamian i si u dë aki.” Nöo sö de taki.

⁴⁹ Nöo wan womi de kai Kajafasi, hën bi da di Kaba Hei Begima a di lö ten naandë, nöo hën a taki da dee otowan taa: “Dee sëmbë aki, unfa un don sö?”

⁵⁰ Wan sabi taa a möön bunu di wan kodo sëmbë aki dëdë, möön leki hii di nasiön fuu aki tuu fiaa musu dëdë kaba a sösö nö?”

⁵¹ Ma nöo fa a fan dë, nöo na fan fëen seei a fan e, ma fu di hën da di Kaba Hei Begima a di ten naandë, nöo hën mbei Masa Gaangadu seei dëen di fan naandë faa konda fa Masa Jesosi o dëdë a hii Dju sëmbë kamian.

⁵² Ma na Dju sëmbë wanwan nöo e, ma a o dëdë da hii dee sëmbë tuu dee o ko miii u Gadu. Fa de dë paajapaaja a hii goonliba, ma nöo a o tja de ko a di wan.

⁵³ Nöo fa Kajafasi fan te a kaba dë, nöo hën dee hedima tuu piki ku ën makandi. Nöo fu kumutu a di ten naandë, nöo de ta suku fu de sa kisi Masa Jesosi tja go kii nöömö.

⁵⁴ Hën mbei Masa Jesosi an ta waka wajaa a dee Dju sëmbë dendu möön, ma a hai go fëen te a wan kamian zuntu ku di sabana. Naandë sö a go a wan kõndë de kai Efalaim ufö, hën ku u dee bakama fëen.

⁵⁵ Nöo di juu dë, di ten ko zuntu u de toona njan di Pasika. Nöo sëmëni hia sëmbë u dee boiti kamian hai ko dë a Jelusalen naandë, u de wasi a wëti fasi be de dë kabakaba fu de njan di daka.

⁵⁶ Nöo fa de ko dë, nöo de ta tuwë wojo ta suku Masa Jesosi ee a ko. De taanpu a di Wosu u Masa Gadu ta hakisi de na de taa: “Wë dee sëmbë, unfa un mëni fëen? A o ko a di piizii aki möönsö nö?”

⁵⁷ Nöo di soni mbei de ta hakisi sö, fu di dee Gaan Begima ku dee Faliseima bi buta kaa taa ee wan sëmbë i sabi naasë a dë, nöo i musu piki de be de kisi ën tja go a kuutu.

Malia tutu sumëesuti fatu

a Masa Jesosi futu.

Mat. 26:6-13; Maik. 14:3-9

¹ Wë nõõ di a fika sikisi daka ufõ di Pasika kai, nõõ hën Masa Jesosi toona ko a Betania ka a bi weki Lazalosi a dëdë naandë.

² Nõõ di a ko, nõõ hën dee sëmbë wai te de hopo tafa dëën. Nõõ Maita bi dë wan u dee sëmbë ta seeka soni u njan da dee sëmbë ko dë. Nõõ fa de sindo a tafa naandë, nõõ Lazalosi seei dë sindosindo ku de dë tu.

³ Hën de sai dë te wan pisi hën di oto sisa u Lazalosi de kai Malia hopo go tei wan bata sumëesuti fatu. Nõõ di fatu dë, de mbei ën ku wan sootu pei pau lutu nõõ a dii te na soni. Nõõ hën Malia tutu hii di fatu a Masa Jesosi futu te a kaba këë, nõõ hën a ta dëë hën futu ku di hediwii fëën. Nõõ fa a du ën dë, nõõ hii di wosu ta sumëë suti te na soni.

⁴ Nõõ hën di soni dë fuka Judasi Isikaliotu te na soni. Wë di sëmbë dë, hën o sei Masa Jesosi, hii fa a dë wan bakama fëën. Nõõ hën a ta guunjan taa:

⁵ “Na poi a poi di fatu dë nõ? Faandi mbei de an bi sei ën, nõõ de tja di mõni ko da u fuu paati da dee penama u di kõndë?” Biga di fatu bi dë kuma wan hafu liti sõ, nõõ i bi musu wooko wan hii jaa ufõ i sa feni mõni tjika fii bai ën.

⁶ Ma nõõ fa i si Judasi fan dë, na pootima seei a ta mëni sõ e, ma fu di a dë wan fufuuma nõõ hën wë mbei a taki sõ. Biga hën ta tja di mõnisaku fuu, nõõ a ta fufuu hafu u dee mõni dee sëmbë ta da u.

⁷ Nõõ hën Masa Jesosi taki dëën taa: “Nõnõ womi, un disa di mujëë e. A bi dë fanõudu faa tjubi di fatu dë tuwë a mi futu ufõ di daka dou u de bei mi.

⁸ Biga dee pootima o dë ku unu nõömõ fuun sölugu, ma mi, ma o dë aki ku unu nõömõ e.”

⁹ Nõõ di juu dë, nõõ sëmëni u dee Dju ko jei taa Masa Jesosi dë a Betania, nõõ hën de booko gililili kumutu a Jelusalen ala ko luku ën. Ma na Masa Jesosi nõõ de ko u ko luku e, ma de kë si Lazalosi tu, di a bi weki a dëdë.

¹⁰ Nõõ di soni dë mbei dee Gaan Begima fiti buka u de musu kii Lazalosi tu.

¹¹ Biga fëën hedi mbei sëmëni u dee Dju sëmbë ta paati ku de ta hiibi a Masa Jesosi.

A di pisi aki, dee sëmbë ta bigi Masa Jesosi tee na soni.

Mat. 21:1-11; Maik. 11:1-11; Luk. 19:28-40

¹² Nõõ di dobooko mõön, hën dee hila sëmbë bi ko a Jelusalen naandë u de ko njan di Pasika ko jei taa Masa Jesosi dë a pasi ta ko.

¹³ Nõõ hën de go booko palomaun te a hila, hën de kule gililili go kisi Masa Jesosi a pasi ta wai dee palomaun dëën. De ta bai a de tõngõ taa:

Hosana! Di sëmbë ta ko a u aki,
Gadu dë ku ën e!

Hën da di kõnu fuu dee Isaëli sëmbë

di u bi ta luku nõömõ faa musu ko.

Hën wë i si ta ko aki awaa a di në u Masa!

¹⁴ Nõõ Masa Jesosi bi feni wan njõnku buliki, hën a subi nëën liba. Nõõ di buliki ta tjëën leti kumafa de bi sikifi a Masa Gadu Buku taa:

¹⁵ Wan fëëë, un dee sëmbë u Sion.

Un luku, hën di kõnu fuunu wë ta ko a unu dë e.

A dë sindosindo a wan njõnku buliki liba ta waka ta ko a unu.

Sõ di Buku bi taki kaa, nõõ hën wë i si ko pasa dë.

¹⁶ Ma nõõ di juu dë, u dee bakama u Masa Jesosi wa bi fusutëën eti. A bakaten di a dëdë weki ko feni di hei di a bi musu feni a Gadu ufõ u ko sabi awaa taa

sö wan soni fëen bi sikifi a di Buku gaanduwe kaa, nöö hën wë i si pasa leti a u wojo dë.

¹⁷ Wë nöö dee sëmbë dee bi dë ku Masa Jesosi a di ten a bi weki Lazalosi a dëdë naandë, nöö de bi ta konda di soni nango nöömö teefa hii lanti ko jei ën.

¹⁸ Hën mbei i si dee hia sëmbë kule go miti ku Masa Jesosi naandë, fu di de bi jei taa sö wan gaan foombo soni a du.

¹⁹ Nöö hën dee Faliseima hai go dë a wan së gudjuu ala, go ta taki ku deseei taa: “Wë di soni aki, wa ta du seei möönsö. Biga hii mundu seei ta kule gililili nango nëen baka.”

A di pisi aki Masa Jesosi ta

taki fu di dëdë fëen.

²⁰ Nöö fa dee hia sëmbë ko a Jelusalen naandë, nöö wanlö pei sëmbë de ta kai Giiki ko tu. De ko fu de ku dee Dju musu begi Gadu makandi, nöö de kë si Masa Jesosi tu.

²¹ Nöö hën de go a wan fuu dee bakama u Masa Jesosi de kai Filipi. Biga di Filipi aki, a kumutu a Betisaida, di dë wan köndë u Galilea. „Nöö hia Giiki sëmbë bi dë a Galilea di ten dë.”

Nöö hën wë de go fan ku ën taa: “Wë mati, u ko a i aki e baa. U ko fuu si Jesosi, ee u sa si ën.”

²² Nöö di Filipi jei sö, nöö hën a go a Andiasi. Hën de tu sëmbë dë, Andiasi ku Filipi, hën de go a Masa Jesosi go piki ën taa: “Masa o, wanlö Giiki sëmbë ko aki nöö de kë si i.”

²³ Nöö hën a piki taa: “Wë awa, di juu dou tuu e, fu dee oto köndë sëmbë sa ko a mi tu. Biga awa ufö di Sëmbë di ko Libisëmbë Mii aki o feni di hei di a musu feni a Gadu.”

²⁴ Nöö fu tuutuu mi taki da unu seei gbelin taa ee wan kalu sii an kai a goon te a pondi, nöö a o fika hën wanwan tö logoo dë. Ma te a kai a goon pondi toona nasi ufö a sa feni otowan kuma hënseei te a hia.

²⁵ “Nöö söseei a dë ku unu tu e, dee sëmbë. Biga ee wan sëmbë ja kë saka i seei kuma di kalu sii di kai a goon naandë, ma i kë libi fii seei kumafa i kë, nöö ja o feni ën fa i kë möönsö e. Ma ee di libi fii a goonliba aki an dë gaan soni da i ta saka i seei da Gadu,” nöö joo feni ën fa i kë tee dou ku di libi u teego tuu. „Nöö hii fa mi ta taki u di kalu sii aki, nöö sö wan soni o pasa ku mi fa u dë aki.”

²⁶ “Nöö ee wan sëmbë i kë ko futuboi u mi, nöö i musu ta waka a mi baka a hii futu, te dou ku di dë tu.” Biga hiniwan kamian ka mi nango nöö naandë di sëmbë ta dini mi musu go tu. Nöö ee wan sëmbë ta dini mi a sö wan fasi, nöö mi Tata o hei ën gaanfa seei.”

²⁷ Nöö di Masa Jesosi fan sö te a kaba, hën a taa: “Dee sëmbë, hati u mi nöö dë ku fuka sö, fu di soni di o pasa ku mi aki. Wë andi seei mi musu taki maingë? Mi musu begi mi Tata faa puu mi nëen nö? Wë nönö, ma sa begi ën sö, biga fu di soni dë hedi mi dë te kisi di ten aki.

²⁸ “Taata o, be sëmbë si di hei ku di kaakiti di i abi e, be di në fii bai.”

Nöö fa a fan dë, nöö hën wan töngö piki kumutu a liba ala wante taa: “Mi feni në a i liba kaa e, nöö mi o toona feni në a i möön eti.”

²⁹ Nöö dee sëmbë dee bi taanpu lontu ën naandë jei, hën so u de taa: “Wë maingë, liba hën bai sö nö?”

Otowan taa: “Nönö, wan basia u Masa Gadu Köndë wë fan ku ën sö e.”

³⁰ Nöö di Masa Jesosi jei de taki sö, hën a taa: “Dee sëmbë, fa i si un jei di töngö naandë, nöö na u mi hedi a fan e, ma fuunu hedi wë.

³¹ Biga di juu dou kaa u di soni di Gadu o tei fu kuutu hii sɛmbɛ u goonliba musu pasa. Awaa di takulibima di ta tii goonliba musu lasi ɛn kamian awaa.

³² Ma nɔɔ mi, fa de o hɛngi mi kii aki, nɔɔ hɛn o mbei mi o sa hai hii pei fɔluku ko a mi.”

³³ Nɔɔ fa Masa Jesosi ta fan dɛ, nɔɔ pindja wɛ a ta pindja dee sɛmbɛ fu de sabi un pei dɛdɛ o kii ɛn.

³⁴ Nɔɔ di soni a fan dɛ bigi da dee sɛmbɛ te na soni. Hɛn de hakisi ɛn taa: “Wɛ fa i taa i da di Sɛmbɛ di ko Libisɛmbɛ Mii dɛ, na di Paamusi Kɔnu i ta taki nɔ? Wɛ nɔɔ unfa i sa taki taa de o hɛngi i kii? Biga a sikifi a di Buku u Gadu taa di Paamusi Kɔnu o libi u teego. Ambɛ da di Sɛmbɛ di ko Libisɛmbɛ Mii i ta taki naandɛ?”

³⁵ Hɛn Masa Jesosi piki de taa: “Un haika e, dee sɛmbɛ. Fa mi dɛ a unu mindi aki, mi ta limbo unu wojo a dee soni u Gadu eti. Nɔɔ be un waka a di limbo dɛ e, biga na sɔ a o dɛ nɔɔmɔ. Biga abiti mɔɔn nɔɔ di dungu o ko, nɔɔ di sɛmbɛ di o ta waka a dungu an o sabi naasɛ a nango.

³⁶ “Fɛɛn mbei fa i si mi dɛ aki ta limbo unu wojo eti, nɔɔ be un biibi a mi liba e, nɔɔ unu seei o ko dɛ sɛmbɛ di sa limbo oto sɛmbɛ wojo a Gadu soni tu.”

Nɔɔ di a fan ku dee sɛmbɛ dɛ sɔ te a kaba, hɛn a kumutu a de dendu go tjubi da de.

Di pisi aki ta lei fa dee hedima u Dju abi taangajesi tjika.

³⁷ Nɔɔ sɔ i ta si taa hii fa dee sɛmbɛ si dee hia foondo wooko Masa Jesosi bi du a de fesi dɛ seei, ma de an kɛ biibi mɔɔnsɔ taa Gadu hɛn mandɛɛn ko.

³⁸ Nɔɔ hɛn da a pasa sɔ leti kumafa di fesiten Tjabukama u Gadu de kai Jesaaja bi fan di a taa:

Masa o, fa u ta konda di Buka fii aki,
nɔɔ ambɛ seei ta piki ɛn?

Ambɛ seei ta si di gaan kaakiti fii fu de fusutɛɛn mɔɔnsɔ?

³⁹ Nɔɔ sɔ a ko dɛ taa dee sɛmbɛ dee Jesaaja taki dɛ, de an bi sa biibi mɔɔn e.

⁴⁰ Biga a toona taki a wan oto kamian mɔɔn taa:

Gadu bi dungu de wojo

fu de an musu si soni fɛɛn mɔɔn.

A mbei de aan fii a de hati mɔɔn

u de sa fusutan soni fɛɛn.

Nɔɔ hɛn Gadu taa:

Fa u dɛ aki, de an sa piki fu de bendi ko a mi mɔɔnsɔ,

u mi kula de puu a hogi du.

Sɔ Masa Gadu bi manda Jesaaja fa a fan.

⁴¹ Nɔɔ di soni mbei Jesaaja fan sɔ e. A bi si di Gadu fasi u Masa Jesosi gaanduwe kaa, ku di gaan waiti fɛɛn di a o abi, hɛn mbei a kɛɛ pena a di fasi dɛ sɔ.

⁴² Ma tɔku fa u taki ɛn dɛ seei, ma sɔmɛni u dee hedima u Dju ko biibi nɛɛn, ma de an kɛ ta tjɛɛn wajaa a lanti u sɛmbɛ sa sabi. Biga de fɛɛɛ dee Faliseima taa ee de jei nɔɔ de o puu de a keiki.

⁴³ Nɔɔ sɔ wɛ i si de bi kɛ abi bunu nɛ a libisɛmbɛ mɔɔn leki fu de abi bunu nɛ a Gadu.

⁴⁴ Nɔɔ a wan ten naandɛ, Masa Jesosi bi bai fan ku de a wan taanga tɔngɔ, a taa: “Ee wan sɛmbɛ i ta biibi a mi, nɔɔ na a mi wanwan nɔɔ i ta biibi e. Ma i ta biibi a di Sɛmbɛ di manda mi ko aki tu.

⁴⁵ Nɔɔ di sɛmbɛ di ta si mi, nɔɔ di Sɛmbɛ di manda mi ko aki hɛnseei a ta si dɛ tu.

46 “Fa mi ko a goonliba aki, mi ko kuma wan faja ta tuwë limbo a dungu, nöö ee wan sëmbë ta biibi a mi nöö an sa fika a dungu e.”

47 Nöö hën a taa: “Ee wan sëmbë ta jei dee lei mi ta lei aki ma an kë piki de, nöö di sëmbë dë nöö ma ta kuutu ën e. Biga fa mi ko a goonliba aki, nöö ma ko u ko kuutu libisëmbë da sitaafu, ma mi ko u ko heepi de puu de a hogi basu.

48 Ma ee wan sëmbë an kë mi ku dee lei mi ta lei aki möönsö, nöö hii fa mi taa ma ta kuutu ën dë, ma an dë taa an o feni kuutu e. Nönö. Di kuutu fëën hën a dë kaa. Biga dee lei i si a bi jei a mi aki, deseeri o kuutu ën a di kaba lasiti daka.

49 “Biga dee soni mi ta lei unu aki, nöö an dë taa soni u mi seei mi ta tei ta konda e. Nönö. Ma mi Tata di manda mi ko aki, hën ta buta da mi andi u mi musu taki ku unfa mi musu taki ën.

50 Nöö mi sabi gbelin taa dee soni dee a ta manda mi u mi konda aki, nöö de sa heepi i fii feni libi u teego. Hën wë mbei mi ta konda de gbelingbelin leiti kumafa mi Tata taki da mi u mi konda.”

Nöö sö Masa Jesosi fan di ten dë.

13

A di pisi aki Masa Jesosi wasi dee bakama fëën futu.

1 Nöö di juu dë, nöö di Pasika daka bi zuntu kaa faa kai. Nöö Masa Jesosi sabi taa di ten fëën ta kisi faa musu kumutu a di goonliba aki toona go nëën Tata. Wë nöö a bi lobi u dee sëmbë fëën dee bi nama ku ën apaiti, ma awaa a o lei u fa a lobi u gaanfa tjika.

2 Nöö hën wë di sapate woo njan makandi. Nöö di juu dë, di didibi bi buta di pakisei a Judasi di mii u Simon Isikaliotu hati kaa, faa musu sei Masa Jesosi.

3 Nöö fa u ko a tafa dë, nöö Masa Jesosi bi sabi taa hën Tata bi dëën taki a hii soni liba kaa. A sabi taa a Gadu a bi kumutu nöö a Gadu a o toona go baka.

4 Nöö hën a hopo hën a puu dee liba koosu fëën nëën sinkii buta go a wan së ala, hën a tei wan duku tai nëën mindi.

5 Hën a tombi wata tuwë a wan gaan paabi te a kaba faa wasi u futu. Nöö hën a ta wasi u futu ta lontu ta dëë ku di duku di a bi tai nëën mindi dë.

6 Te wan pisi hën a go dou a Simon Petuisi faa wasi ën futu. Hën Petuisi taa: “Ambë, Masa! Na tuu fii! Ja sa wasi mi futu.”

7 Hën Masa Jesosi piki ën taa: “Di soni di mi ta du aki, ja o fusutëën eti e, ma bakaten ufö joo fusutëën.”

8 Hën a taa: “Kwetikweti! Ja o feni mi futu wasi e!”

Hën Masa Jesosi taki dëën taa: “Womi, haika. Ee ma wasi i futu, nöö mi ku i an o sa nama möön e.”

9 Nöö di Petuisi jei sö kaa, hën a bia piki ën awaa, taa: “Masa o, di a dë sö, nöö na mi futu wanwan fii wasi e, ma be i wasi mi futu te dou ku mi maun ku mi hedi tuu.”

10 Hën Masa Jesosi piki ën taa: “Wë nönö, womi. Ee wan sëmbë i bi wasi kaa, nöö an dë fii toona wasi hii sinkii fii möön e, ma futu fii nöö dë u wasi ee a sundju. Nöö fa un dë aki, uun dë limbolimbo kaa, ma nöö na hii unu tuu e.”

11 Nöö di soni mbei a taa na u tuu dë limbolimbo, biga a sabi undi fuu o sei ën.

12 Nöö hën di a wasi u futu te a kaba, hën a toona go tei dee koosu fëën bisi baka, hën a go sindo a tafa awaa.

Hën a hakisi u taa: “Wë dee sëmbë o, di soni mi du aki, un saandi nöö?”

13 Wë un haika e. Fa un dë aki, un ta kai mi 'Mësitë' ku 'Masa,' nöö un a' leti biga sô mi dë tuu.

14 Wë nöö ee mi dë di Masa ku di Mësitë fuunu, nöö hën mi saka miseei sô te mi wasi futu fuunu, wë nöö unu wë? Na sô fuun du tu nöö?

15 Biga di soni mi du da unu dë, nöö mi du ën fuun sa djeesi mi ta du sô tu.

16 "Biga mi taki da unu gbelin taa wan futuboi an sa hei möön hën masa. Söseei tu wan bosikopuma an sa hei möön di sëmbë di dëen di buka.

17 Wë nöö te un ko sabi dee soni mi ta lei unu aki ta du de kaa, nöö Gadu o ta dë ku unu e.

A di pisi aki Masa Jesosi taki kumafa wan u dee bakama

fëen o sei ën.

Mat. 26:20-25; Maik. 14:17-21; Luk. 22:21-23

18 "Ma fa mi ta fan aki seei, nöö na hii unu tuu o dë a di fan mi ta fan aki dendu e. Biga mi sabi unu tuu hati fa un dë. Ma töku mi bi pii unu tei nöö, fu di soni di sikifi a di Buku u Gadu musu ko tuu taa:

Di sëmbë mi ku ën sindo ta njan a wan tafa, hënseei hopo ën futu makisa mi.

Sô di Buku taki.

19 Nöö mi ta kondëen da unu a fesi, fu te a ko pasa nöö woon biibi taa mi da di Sëmbë di mi bi ta konda da unu nöömô taa mi dë.

20 "Nöö un haika e. Mi o manda unu kuma tjabukama u mi, nöö mi taki da unu tuutuu taa di sëmbë di tei unu nöö miseei a tei dë e. Nöö di sëmbë di tei mi kaa, nöö a tei di Sëmbë di manda mi ko a goonliba aki tu."

21 Nöö fa Masa Jesosi fan naandë, nöö hën wan gaan fuka ko nëen liba, hën a fan ku u limbolimbo. A taa: "Un haika e. Wan tuutuu soni mi o fan ku unu aki, dee sëmbë. Wan fuunu dë leti aki o tja mi go sei."

22 Nöö di a taki sô kaa, nöö hën u tuu luku u seei lontu ko kai. Nöö a bigi da u poi, biga wa sabi undi fuu a ta taki.

23 Nöö wan fuu bi dë gaan mati u Masa Jesosi möön de oto, nöö a dë sindosindo leti a Masa Jesosi bandja dë.

24 Nöö hën Simon Petuisi njan wojo dëen faa hakisi Masa Jesosi ee undi fuu a ta taki.

25 Hën di womi pusa ko möön zuntu ku ën hën a taa: "Masa, undi fuu seei dë aki sa du di soni dë baa?"

26 Nöö hën a piki ën taa: "Fa i si mi o tuusi di bëëë a di baafu aki, nöö di sëmbë di mi o tëndëen da, nöö hën dëen e."

Nöö hën a tei di bëëë hën a tuusi ën a di baafu nöö hën a tëndëen da Judasi Isikaliotu, di mii u wan tata de kai Simon.

27 Nöö fa Judasi tei di bëëë dë, nöö wante hën di didibi subi nëen.

Nöö hën Masa Jesosi taki dëen taa: "Womi, di soni di i si i ta pakisei fii du dë, nöö hopo go du ën wante e."

28 Ma nöö fa u dee oto bakama dë sindosindo dë, nöö na wan fuu sabi faandi mbei Masa Jesosi fan ku ën sô.

29 So fuu mëni taa, awa, wë di Judasi hën ta tja di mõnisaku da u, nöö a kandë Masa Jesosi mandëen faa go bai soni fuu njan di daka. Ee nasô kandë a musu tja mõni go da dee penama u di kõndë. Sô u bi pakisei.

30 Nöö di Judasi tei di bëë, nöö hën a hopo go a döo wante. Nöö di ten naandë ndeti ko kaa.

Aki Masa Jesosi ta fan ku Petuisi u wan soni a o du.

Mat. 26:31-35; Maik. 14:27-31; Luk. 22:31-34

³¹ Nöo di Judasi go kaa, hën Masa Jesosi fan ku u dee otowan fika ku ën naandë taa: “Söo. Wë dee sëmbë, awaa di juu dou e, fu Mi di ko Libisëmbë Mii aki musu feni nëbai. Nöo na di dë nöo, ma a di soni di o pasa ku mi aki, nöo Gadu seei o feni nëbai tu.

³² Nöo fu di a o feni nëbai a mi, nöo hënseei o buta mi di Mii fëen aki ko feni möön hia nëbai eti, nöo wantewante seei a o du ën.”

³³ Nöo hën a taa: “Dee mii o, a fika wan sati ten nöo fu mi ku unu dë aki eti. Woon ta hangi mi, ma wan o si mi möön. A o dë leti kumafa mi bi fan ku dee hedima kaa, nöo söseei mi o toona fan ku unu aki taa ka mi o go nöo wan o sa ko dë.

³⁴ “Nöo fa mi nango aki, nöo mi o manda unu a wan njunjun soni e. Wan si fa mi lobi unu nö? Wë nöo sö un musu lobi unu seei tu.

³⁵ Biga te un ta lobi sö kaa, nöo hii sëmbë o si taa bakama u mi gbelin un dë e.”

³⁶ Nöo hën Simon Petuisi hakisi ën taa: “Wë Masa o, naasë seei joo go disa u baa?”

Hën a piki ën taa: “Ka mi o go di pasi aki, nöo ja o sa ko ku mi eti, ma te bakaten ufö.”

³⁷ Nöo hën Petuisi toona hakisi ën möön taa: “Ma wë Masa, faandi mbei ma sa ko ku i wante? Biga mi dë seei kabakaba fu mi lasi mi libi da i.”

³⁸ Nöo hën Masa Jesosi piki ën taa: “Awa, i taa i sa lasi i libi da mi. Ma nöo haika. Fu tuutuu mi taki da i womi, taa ganian an o bai kanda seei di ndeti aki, ufö joo fia dii toon taa ja sabi mi.”

Sö Masa Jesosi fan ku Simon Petuisi te a kaba.

14

Aki Masa Jesosi ta kötö dee bakama fëen hati.

¹ Nöo hën Masa Jesosi bia fan ku hii u dee bakama fëen tuu awaa, a taa: “Dee mii o, wan musu dë fukafuka e. Un ta futoou Gadu kaa, nöo un musu futoou mi tu.

² Biga ka mi Tata ta dë nöo kamian u libi sai dë te a hia. Ee an bi dë sö, nöo mi bi o taki ën da unu.

³ Nöo mi o go ala go seeka kamian da unu te mi kaba, nöo mi o toona ko tei unu, be mi ku unu dë makandi ala.

⁴ Nöo fa mi ta fan aki, un sabi di pasi u go dou ka mi nango, nasö nö?”

⁵ Nöo hën Tomasi piki ën taa: “Wë Masa o, wa sabi naasë i nango seei, nöo unfa u sa du sabi di pasi baa?”

⁶ Hën Masa Jesosi piki ën taa: “Womi, miseei wë da di pasi ku di tuu, ku di libi. „Biga a mi nöo i sa feni di libi u teego ku dee tuutuu soni dee an dë ganjan.” Nöo na wan sëmbë sa dou a mi Tata e, ee na mi tja i go nëen.

⁷ Nöo ee un bi sabi mi tuu kumafa mi dë, nöo un bi o sabi mi Tata tu. Nöo fu kumutu a di ten aki, un sabi ën e, biga un si ën kaa.”

⁸ Nöo hën Filipi taa: “Masa o, lei u di Tata nöo a tjika kaa.”

⁹ Hën Masa Jesosi taa: “Ma womi Filipi, fu di ten mi dë ku unu aki, nöo ja sabi mi eti nö? Ja sabi taa di sëmbë di si mi, nöo mi Tata a si naandë kaa nö? Unfa i sa taki taa mi musu lei i di Tata möön?”

¹⁰ Ja kë biibi taa mi ku mi Tata dë di wan nö? Biga dee lei mi ta lei aki, nöo na mi abi de e, ma mi Tata hën abi de, nöo hën dë a mi ta wooke a mi liba.

¹¹ “Biibi mi e baa, taa mi ku mi Tata dë di wan. Ma nöo ee di fan u mi taanga da i poi fii piki, nöo be i biibi mi nöo u dee foondo wooke dee i bi si mi ta du.

12 “Nöö tuutuu soni mi ta taki da unu aki e, taa ee un abi biibi a mi liba nöö unu seei o ta du dee wooko mi ta du tu. Nöö möön gaan wooko seei woon sa du eti, biga mi nango a mi Tata.

13 Nöö fa mi nango aki, nöö hiniwan soni di un ta hakisi mi Tata a mi në, nöö mi o ta du ën da unu. Nöö a di fasi dë mi, di Mii fëen aki, o tja nëbai ko da mi Tata.

14 “Nöö mi taki da unu wan pasi möön e, taa hiniwan soni di un hakisi mi a mi në nöö mi o du ën da unu e, dee sëmbë.

Aki Masa Jesosi taki soni u di Akaa di a o manda ko.

15 “Nöö un haika e. Ee wan sëmbë i lobi mi, nöö joo du dee soni dee mi ta manda i fii du.

16 Nöö fa mi o go aki, nöö mi o begi mi Tata be a manda wan oto Sëmbë ko da unu, faa taanpu ku unu ta heepi unu. Nöö di Sëmbë i si dë, hën an o disa unu möönsö. Unu ku ën o dë fu nöömö.

17 Nöö i sabi ambë dëen nö? Di Akaa u Gadu wë e, di ta lei unu soni gbelin kumafa a dë tuutuu, nöö hën wë mi o manda da unu.

“Ma nöö fa i si a o ko dë, nöö dee sëmbë u di goonliba aki dee an dë ku mi a wan së, nöö de an o tei ën u soni e. Biga de an o si ën u de fusutëen seei, de an o sabi ën. Ma unu sabi ën kaa, biga a ta dë ku unu fa u dë aki nöö abiti möön a o dë a unu hati ta tii unu. Un si?”

18 “Nöö fa mi nango aki, ma o disa unu a zengezenge kuma miii di na a’ mama ku tata e, ma mi o toona ko a unu baka.

19 A fika wan sati ten eti, nöö dee sëmbë u di goonliba aki an o si mi möön, ma unu woon toona si mi baka. Nöö fu di mi o toona libi baka nöö söseei unu seei o toona libi baka tu.

20 Nöö a di ten dë ufö woon ko fusutan gbelin taa mi ku mi Tata an dë paatipaati möönsö, di wan nöö u dë. Söseei tu woon ko si taa mi ku unu an dë paatipaati, di wan nöö u dë.

21 “Nöö mi taki e, di sëmbë di sabi andi ku andi mi mandëen faa du nöö a ta piki mi buka, nöö di sëmbë dë, hën lobi mi e. Nöö ee wan sëmbë i lobi mi sö, nöö söseei mi Tata o lobi i tu. Nöö miseei o lobi i, nöö mi o hopo miseei da i fii sa ko sabi mi.”

22 Nöö fa a fan dë, hën Judasi hakisi ën soni, ma na di de kai Isikaliotu e. A hakisi taa: “Wë Masa o, faandi mbei u nöö joo hopo i seei da, ma ja o hopo i seei da hii mundu?”

23 Hën Masa Jesosi piki ën taa: “Di soni mbei nö? Haika e. Di sëmbë di lobi mi, nöö hën o ta piki mi buka a soni, nöö hën mi Tata o lobi. Nöö mi ku mi Tata o ko tan ku ën nöö woo hopo u seepi dëen.

24 Ma nöö ee wan sëmbë an lobi mi, an ta piki mi buka, unfa mi sa du hopo miseei dëen? Biga hën da a ta sösö mi, nöö na mi wanwan nöö a ta sösö, ma a ta sösö mi Tata tu. Biga, dee soni mi ta konda aki, de an dë soni u mi e, ma de dë u mi Tata di manda mi ko aki.

25 “Nöö hii dee soni aki sö tuu mi ta fan ku unu e baa, fu di mi dë ku unu aki eti.

26 Ma te mi go, nöö mi Tata o manda di Akaa fëen ko da unu a mi në. Nöö hën o ta lei unu hii soni. Fa i si a o ko dë, hii dee soni dee mi ta fan ku unu aki tuu kaa a o toona mbei un ko sabi de baka.

27 “Nöö fa mi nango aki, di soni di mi ta disa da unu aki, hën da kötöhati. Nöö an o dë kuma di kötöhati i ta feni a goonliba aki e. Nönö. Ma a o dë wan gbelingbelin kötöhati kuma di miseei abi aki. Hën mbei wan musu ta dë fukafuka fëëfëëe e, baa.

28 “Wê dee sêmbê, un jei fa mi bi taki da unu naandê taa mi o go ma mi o toona ko a unu baka. Wê ee un lobi mi tuutuu, nöö misikuma a sa suti da unu fu di a dê taa mi nango a mi Tata. Biga mi Tata hei möön mi.

29 “Nöö mi ta konda dee soni aki da unu a fesi e, fu tee di juu dou de ko pasa, nöö woon ta biibi möön taanga.

30 Ma nöö ma sa fan ku unu möön longi e baa, biga di hedima u di goonliba aki ta ko kaa, faa ko du ku mi. Ma fa i si a ta ko dê seei, ma an o feni na wan wojo soni a mi faa musu a’ leti a mi liba.

31 Ma nöö fu di dee sêmbê u di goonliba aki musu ko sabi gbelin taa mi lobi mi Tata, fêen mbei baa ma ta biinga u mi puu miseei, ma mi ta hoi miseei lololo a dee soni dee mi Tata buta da mi fu mi du. Da sô e, dee sêmbê.

“Wê nöö un hopo boo kumutu aki go.”

15

Aki Masa Jesosi ta taki soni u wan pau ku dee maun fêen

ku di fuuta a ta pai.

1 Nöö di juu u ku Masa Jesosi ta waka nango, nöö hên a taki wan oto da u a wödu fasi. A taa: “Wan sabi fa wan doloifi pau ta dê nö? A abi sômëni maun nëen sinkii. Wê sô nöö a dê a mi ku unu tu e.”

1 “Biga mi da di tuutuu doloifi pau, nöö mi Tata hên da di sêmbê di abi di goon.

2 Nöö unu da dee maun u di pau. Wê nöö ee wan u dee maun u mi an ta pai, nöö mi Tata o djafu ên puu. Ma hiniwan maun di ta pai, nöö a o ta seekêen djafu faa musu toona pai möön hia njanjan. Sô e.

3 “Ma nöö fa u dê aki, un dê seekaseeka kaa e, fu di un tei dee fan mi bi fan ku unu. Nöö mi taki e baa, taa un fika namanama ku mi nöömö u di kaakiti u mi musu dê a unu.”

4 Biga un sabi taa ee wan paumaun an dê namanama a di pau sinkii nöö an o sa pai. Nöö sô nöö a dê ku unu tu e. Ee wan fika namanama ku mi, nöö wa o pai dee fuuta dee un musu pai.

5 “Mi taki e, mi da di doloifi pau, nöö unu da dee maun u mi. Di sêmbê di i si ta fika namanama ku mi u di kaakiti u mi musu feni pasi wooko nëen, nöö a o dê kuma wan fuuta pau di ta pai njanjan te a hia. Biga söndô mi ja sa du na wan bambuu soni möönsô.

6 “Ee wan sêmbê an fika namanama ku mi, nöö a dê leti kuma wan paumaun di an ta pali. Dee lö maun dê, de ta djafu de puu tuwê go a wan sê ala be de dê. Nöö te wan pisi nöö de ta pii de tuwê a faja tjuma.

7 “Ma ee un fika namanama ku mi fu di lei di mi ta lei unu aki ta feni pasi wooko a unu libi, nöö un sa hakisi hiniwan soni di un kê nöö woon feni ên e.

8 Nöö a di fasi dê mi Tata o feni gaan nêbai e, dee sêmbê, ee di libi fuunu ta pai hia fuuta dëen. Nöö sêmbê o si tu taa unu wê da bakama u mi tuutuu.

9 “Wê nöö mi taki da unu e, taa leti kumafa i si mi Tata lobi mi aki, nöö sô nöö miseei lobi unu tu e baa. Nöö be un ta fika a di kamian ka di lobi u mi sa dou a unu.

10 Nöö un sabi fa fuun sa du fuun fika sô nö? Un musu ta piki mi buka a dee soni mi ta manda unu. Nöö ee un du sô, nöö woon ta si di lobi u mi nöömö, leti kumafa mi ta si di lobi u mi Tata, fu di mi ta piki ên buka a dee soni a ta manda mi. Sô e.

11 “Nöö di soni mbei mi ta fan dee soni aki ku unu, fu di mi kê u di wai mi abi a mi hati aki musu dê a unu hati tu. Nöö mi kê u di wai dê musu dê ku telu fu nöömö.

¹² “Nöo mi o manda unu a wan soni aki, dee sëmbë. Un musu ta lobi unu na unu e, leti kumafa i si mi ta lobi unu aki.

¹³ Biga na wan sëmbë sa lobi sëmbë ku sò wan gaan lobi kuma di sëmbë di o lasi èn libi fëèn mati hedi. Un si?

¹⁴ Nöo mi ku unu o dë mati, ee un ta du dee soni dee mi ta manda unu fuun ta du.

¹⁵ “Fa u dë aki ma ta kai unu futuboi möön e. Biga wan futuboi an ta sabi soni fëèn masa wan bëtë. Ma mati mi ta kai unu. Biga hii dee soni dee mi jei a mi Tata tuu mi tei konda da unu finifini.

¹⁶ Nöo fa i si un ko dë mati u mi aki, na unu wë bi tei mi e, ma mi bi pii unu tei. Nöo mi buta unu fu di libi fuun musu pai hia fuuta di o tan fu nöömö. Nöo te a dë sò kaa, nöo hiniwan soni di un hakisi mi Tata a mi nè, nöo a o da unu èn.

Aki Masa Jesosi ta bai dee bakama fëèn a di fa sëmbë

o du ku de.

¹⁷ “Nöo mi ta manda unu taa be un ta lobi unu na unu e, baa.

¹⁸ Biga fa dee sëmbë u goonliba sai dë, de an dë ku Gadu a wan së, nöo de an o lobi unu möönsö. De o buuse unu seei. Ma nöo an musu dë gaan soni da unu e, biga un musu mëni taa mi fosu de bi buuse kaa bifö unu.

¹⁹ Ee un bi dë ku de a wan së, nöo de bi o lobi unu seei kuma sëmbë u de. Ma wan dë sò, biga mi pii unu puu a de dendu tja ko buta a mi së, nöo hën mbei de an sa si unu a wojo seei.

²⁰⁻²¹ “Wan mëni fa mi bi fan ku unu möön nö, taa wan futuboi an hebi möön hën Masa. Wë nöo leti kumafa i si sëmbë ta sitaafu mi aki, nöo sò nöo de o ta sitaafu unu tu fu mi hedi. Nöo di soni mbei de o du sò, fu di de an sabi taa Masa Gadu hën manda mi ko a goonliba aki. Ma nöo kumafa i si so sëmbë dë a de dendu ta piki mi buka, nöo sò nöo de o ta piki unu buka tu e.

²² “Fa dee sëmbë dee an dë ku Gadu a wan së sai dë, ee ma bi ko a goonliba aki ko fan ku de, nöo an bi o dë taa de du hogi. Ma nöo fa u dë aki, de an sa fia. Biga mi fan ku de kaa, nöo hën de buuse mi seei.

²³ Nöo ee wan sëmbë buuse mi, nöo mi Tata seei a buuse tu e.

²⁴ Ee ma bi du gaan foombo soni a de dendu di na wan sëmbë u goonliba aki bi sa du, nöo an bi o dë hogi sò ee de an kë piki mi. Ma mi du de, de si, ma tökusei de ta buuse mi ku mi Tata tuu. Fëèn mbei di zöndu u de hebi sò.

²⁵ “Ma nöo fa i si di soni ta pasa aki sò, nöo a kai ku di soni di dë sikifisikifi a di Buku u Gadu, di de taa dë ta tei ta tii libi u de naandë. Biga a taa: De ta buuse mi seei, ma an dë taa soni wë mi du de e.

²⁶ “Ma nöo te mi o go a mi Tata, nöo mi o manda di Sëmbë mi bi taki dë da unu e, faa ko taanpu ku unu. Hën da di Akaa di ta mbei sëmbë ko sabi hii soni gbelingbelin leti fa a dë. A Gadu seei a o kumutu, nöo a o ta konda soni u mi.

²⁷ Nöo unu seei o ta konda soni u mi tu, biga a seti u di wooko hën mi ku unu bi dë kaa fu te kisi fa u dë aki.”

16

Aki Masa Jesosi ta fan soni möön u di Akaa fëèn di

a o manda ko.

¹ Hën Masa Jesosi ta fan ku u dee bakama fëèn eti, a taa: “Dee sëmbë o, mi ta konda dee soni aki da unu a fesi e, fu bakaten wan musu buuja te un disa u biibi a mi liba.

² Biga dee hedima o puu unu a dee keiki u de. A o ko dë sò taa kii seei de o ta kii unu, nöo de o ninga taa Gadu wë de ta heepi fa de ta du dë.

3 Ma di soni mbei de o du sō, fu di de an sabi mi Tata, nōo de an sabi ambē da mi tu.

4 Nōo mi ta konda dee soni aki da unu a fesi, fu te di juu dou de ko pasa nōo an o bigi da unu poi. Biga woon toona mēni taa sō mi bi taki da unu kaa.

“Nōo ma bi ta konda dee soni aki da unu fu di mi bi dē ku unu eti.

5 Ma awaa mi o toona go a di Sēmbē di manda mi ko aki baka. Ma nōo na wan fuunu ta hakisi mi mōönsō ee naasē mi nango.

6 Ma fu di mi ta fan dee soni aki ku unu, nōo mi si taa hati fuunu dē fukafuka te na soni.

7 “Ma mi taki da unu gbelin, dee sēmbē, taa a dē wan gaan heepi da unu fa i si mi nango aki. Biga ee ma go, nōo di Akaa u Gadu di mi o manda u ko taanpu ku unu, nōo an o sa ko e. Ma te mi go kaa, nōo mi o mandēen da unu.

8 Nōo te a ko, nōo a o ta lei dee goonliba sēmbē aki taa de an saandi da hogilibi e, de an saandi da letilibi, dē an sabi u wegi soni kuutu tu.

9 “Nōo di soni mbei mi taa de an saandi da hogilibi, biga de an kē biibi mi mōönsō.

10 Nōo di soni mbei mi taa de an saandi da letilibi, biga mi libi leti tee mi sa toona go a mi Tata ka dee libisēmbē u goonliba aki an sa si mi mōön seei. Sō mi libi leti tjika, ma de an si ēn mōönsō.

11 Nōo di soni mbei mi taa de an sabi u wegi soni. Wē biga Gadu kuutu di hedima u de te a buta dēen taa a o feni sitaafu u nōömō, „ma töku de ta waka nēen baka eti.”

12 “Wē mi abi hia soni mōön u konda da unu e, dee sēmbē, ma wan o sa fusutan de eti.

13 Ma te di Akaa ko, di ta lei soni leti kumafa a dē „a Gadu wojo,” nōo a o mbei i ko sabi hii soni kumafa a dē. Biga fa a o ko naandē, an o tei soni fēen seei konda, ma dee soni dee a jei a mi ku mi Tata, nōo de a o ta taki. Nōo a o fan ku unu a dee soni liba dee dē u ko eti.

14 “Fa a o ko dē, nōo a o mbei un si di hei ku di nēbai di mi abi e. Biga a o ta tei dee soni u mi ta konda da unu finifini fuun sabi de.

15 Nōo hii soni di mi Tata abi dē u mi kaa, hēn mbei mi taa di Akaa o tei a dee soni u mi faa lei unu.”

16 Hēn Masa Jesosi toona taki da u mōön taa: “Abiti mōön wan o si mi mōön baa, ma nōo te wan pisi woon toona si mi baka.”

17-18 Nōo hēn di u jei a taki sō, hēn u bia ta hakisi u na u makandi taa: “Womi, andi da di soni di a ta fan naandē taa abiti mōön wa o si ēn mōön, ma te wan pisi nōo woo toona si ēn baka? Andi a ta fan dē taa a nango nēen Tata? Andi seei a kē taki di a taa ‘Abiti mōön’? Wa saandi a ta taki e.”

19 Nōo hēn Masa Jesosi si taa u kē hakisi ēn soni fēen, hēn a taa: “Fa un ta fan ku unu seei sapisapi naandē, fu di mi taki taa abiti mōön wan o si mi mōön, nōo te wan pisi woon toona si mi baka, hēn ta toobi unu sō nō?”

20 Wē un haika e. Fu tuutuu mi taki da unu gbelin taa dee sēmbē dee an dē ku mi a wan sē, de o ta wai seei, ma unu, woon dē ku gaan fuka ta kēe ta kusumi te na soni. Ma nōo wan fēēe e. Di fuka i si woon ta fuka naandē o bia ko wan gaan wai seei da unu.

21 “Wan sabi fa a dē te wan mujēe dē ku bēe nō? Te di juu fēen kisi faa pali, nōo di bēe ta njan mēn seei, ma te a pai kaa nōo an ta mēni di fuka naandē mōön. Wai nōo a ta wai fu di a pai wan mi.

22 “Nōo sō nōo a o dē ku unu tu e baa. Fa i si un sai naandē, nōo un dē ku gaan fuka seei a unu hati fu di mi taa mi nango. Ma mi o toona si unu baka e, nōo di juu dē woon bia ta wai seei. Nōo na wan sēmbē o sa puu di wai dē a unu hati mōön.

²³ Nöö di juu naandë, nöö wan o ta hakisi dee lö hakisi dë möön tu.

“Nöö mi taki e baa, taa hiniwan soni di woon begi mi Tata a mi në, nöö woon feni ën e.

²⁴ Te kisi kumafa u dë aki, wan hakisi na wan soni a mi në eti. Ma nöö fuun seti hakisi awaa nöö woon feni, nöö di wai fuunu o ko dë telutelu awaa.

²⁵ “Dee sëmbë o, fa mi ta fan ku unu aki, nöö mi ta fan ku unu a nongö fasi nöö. Ma nöö wan juu o ko di ma o ta konda soni da unu a sö wan fasi möön. Ma mi o ta fan ku unu limbolimbo seei awaa ta lei unu soni u mi Tata.

²⁶ Nöö di juu dë, nöö unu seei o ta begi ën soni awaa a mi në. An o dë u mi nöö musu ta begi ën da unu möön.

²⁷ Biga mi Tata lobi unu, fu di un lobi mi nöö un ta biibi taa nëën mi kumutu ko aki.

²⁸ Nöö sö a dë tuu e. Biga a mi Tata mi kumutu ko a goonliba aki, nöö awaa mi o toona go nëën baka.”

²⁹ Nöö di a fan sö, nöö hën u taa: “Aaa, u si taa i ta fan ku u limbolimbo awaa tuu. Ja ta fan ku u a nongö fasi möön.

³⁰ Nöö u ko si tu taa an dë fanöudu fu wan sëmbë musu hakisi i soni biga i sabi hii soni kaa. Hën mbei u ta biibi taa a Gadu i kumutu ko.”

³¹ Hën a piki u taa: “Awa, un ta biibi tuu.

³² Ma nöö un haika e. Wan juu o ko nöö a ta ko seei zaaa kaa, di unu tuu seei o paaja disa mi wanwan tö. Hiniwan fuunu o go fëën nëën wosu. Ma nöö ma ta dë mi wanwan möönsö e, biga mi Tata ta dë ku mi nöömö.

³³ “Sö wë e, dee sëmbë. Mi tei dee soni aki konda da unu baa, fuun sa abi kötöhati fu di un nama ku mi. Biga a di goonliba aki fuka ku sitaafu dë nëën. Ma wan lasi hati e, biga mi wini hii soni a di goonliba aki kaa.”

17

Aki Masa Jesosi ta begi.

¹ Nöö di Masa Jesosi fan sö ku u te a kaba kaa, nöö hën a hopo wojo luku liba. Hën a taa: “Wë Taata o, ja si di juu dou. Nöö mi begi i taa a di soni di o pasa aki, nöö fii mbei dee sëmbë u goonliba aki ko si di waiti di dë a di Mii fii aki e, nöö di waiti di i seei abi o ko a döö tu.

² Wë biga i da mi taki a hii sëmbë liba kaa, fu mi sa da dee sëmbë dee i da mi di libi u teego.

³ Nöö andi da di libi u teego? Hën da u de ko sabi i, di wan kodo tuutuu Gadu u mundu ku mi, Jesosi Keesitu, di i manda ko a goonliba aki.

⁴ “Nöö fa i manda mi ko aki, nöö mi mbei libisëmbë si di hei ku di waiti di i abi o. Biga di wooko di i da mi u mi du nöö mi kabëën.

⁵ Wë nöö di i si a dë sö kaa, nöö be mi toona ko a i e, Taata, u mi sa toona feni di hei ku di waiti baka di mi ku i bi abi makandi ufö di goonliba aki mbei.

⁶ “Wë nöö luku dee sëmbë aki dee i tei a dee oto sëmbë u goonliba dendu da mi. Mi mbei de ko sabi fa i dë e. De bi dë fii kaa, nöö hën i tei de hën i da mi de. Nöö de an disa dee wöutu fii e, Taata. De piki de hoi seei.

⁷ Nöö hën mbei de ko sabi gbelin taa hii dee soni dee i da mi, nöö a i de tuu kumutu.

⁸ Biga mi konda dee wöutu fii da de, nöö de tei de. Nöö hën wë de ko sabi gbelingbelin taa aai, a i mi kumutu. De biibi seei taa i manda mi ko aki.

⁹ “Nöö fa mi ta begi i aki, Taata, nöö mi ta begi da dee sëmbë dee i da mi aki. Ma ta begi da dee oto sëmbë u goonliba dee an dë ku u a wan së e. Nönö. Biga dee i si aki, nöö de wë da fii.

¹⁰ Biga hii dee soni mi abi, nöö de dē fii, nöö hii soni i abi nöö de dē fu mi. Nöö fa i si dee disu dē aki, nöö de o ta mbei oto sēmbē si di waiti di mi abi, „hēn wē mbei mi ta begi da de sō.”

¹¹ Biga ma o dē a goonliba aki möön. Mi ta ko a i kaa, ma de o dē aki eti. Taata, fa i si i dē fii limbolimbo söndö föutu dē, nöö i tjubi dee sēmbē dee i da mi aki ku di kaakiti u di nē fii o, be de dē di wan makandi leti kumafa mi ku i dē di wan aki.

¹² “Hii di ten mi bi dē ku dee sēmbē aki, nöö mi bi ta tjubi de ku di kaakiti fii nē. Mi bi ta luku de seei fu de an kumutu a di pasi. Fēen mbei na wan u de lasi, boiti di hogi wan di i si fasi fēen tjēen go kaba a sōsō naandē, u di soni di Buku fii taki musu ko tuu.

¹³ “Ma nöö awaa mi ta ko a i, Taata. Nöö mi ta fan dee soni aki fu di mi dē a goonliba eti. Biga mi kē u dee sēmbē aki musu abi di wai di mi abi aki tuu ku telu a de hati.

¹⁴ Hii di juu ten mi dē ku de aki, nöö mi bi ta da de dee wöutu fii, hēn mbei dee oto sēmbē u di goonliba aki ta buuse de sō. Biga de an dē ku de a wan sē a dee hogi de ta du, leti kumafa i si miseei an dē ku de a wan sē tu.

¹⁵ “Ma nöö ma ta begi fii puu de a goonliba e. Nönö. Ma mi kē fii tjubi de be di didibi an musu wini de.

¹⁶ Biga na sēmbē u di goonliba aki de dē möön e, leti kumafa mi seei an dē sēmbē u di goonliba aki tu.

¹⁷ Nöö mi begi i, Taata, fii lei de di Wöutu fii, be de si soni gbelingbelin kumafa a dē tuutuu, nöö de o ko dē apaiti da i söndö föutu. Biga di Wöutu fii hēn da di Tuu.

¹⁸ “Nöö leti kumafa i si i manda mi ko a goonliba aki, nöö sō nöö mi ta manda dee sēmbē aki go a goonliba tu, „fu de ta lei sēmbē soni fii.”

¹⁹ Nöö fu de hedi mi ta buta miseei ku telu a i maun fu de si, nöö deseei o buta deseei ku telu a i maun tu söndö ganjan.

²⁰ “Ma nöö na dee sēmbē aki nöö mi ta begi da e, Taata. Ma mi ta begi da dee sēmbē tu dee o jei di buka a de nöö de bia ko biibi.

²¹ Taata o, mi begi i gaantangi, be de tuu ko dē wan makandi e, leti kumafa mi ku i dē wan aki. Sō u ku de tuu musu dē wan makandi. Biga ee a dē sō kaa, nöö dee oto sēmbē u goonliba o ko sabi awaa taa aai, i manda mi ko aki tuu.

²² “Fa mi ku i dē aki, i bi da mi sō wan hei taa mi ku i sa dē di wan. Nöö mi ta toona da dee i si aki di wan seei hei dē tu, fu de dē di wan makandi.

²³ Nöö mi o dē a de dendu, nöö joo dē a mi dendu, nöö sō u tuu o dē di wan makandi. Nöö te a ko sō kaa, nöö dee oto sēmbē u goonliba o ko sabi gbelingbelin taa i manda mi ko aki. Nöö de o ko si tu taa i lobi dee sēmbē fii naandē leti kumafa i lobi mi aki.

²⁴ “Nöö Taata, fa mi ta begi i aki, nöö mi kē dee sēmbē i buta a mi maun aki musu ko dē ku mi ka mi dē e, be de sa si di waiti ku di hei di i da mi. Biga i bi lobi mi bifö i mbei di goonliba seei.

²⁵ “Taata, fa i ta du soni ku leti tjika naandē, nöö dee oto sēmbē u di goonliba aki an sabi i e. Ma nöö mii sabi i. Nöö dee sēmbē i da mi aki nöö deseei ko sabi taa i manda mi ko aki.

²⁶ Fa mi ku de bi dē aki, mi mbei de ko sabi i gbelin kumafa i dē, nöö mi o ta mbei de ko sabi i möönmöön eti. Biga te de sabi i kumafa i dē kaa, nöö de o ta lobi deseei ku di wan seei lobi di i si i ta lobi mi aki. Nöö miseei o dē a de dendu tu ta tii de.”

Sō Masa Jesosi fan ku ěn Tata tefa a kaba.

18

Aki de kisi Masa Jesosi.

Mat. 26:47-56; Maik. 14:43-50; Luk. 22:47-53

¹ Nöo hën di Masa Jesosi begi sö te a kaba, hën u ku ën kumutu dë, hën u pasa di kiiki de kai Gidilon go a di oto sê tela. Nöo ala wan djai dë ku wanlô hia pau, nöo hën u go a di djai dë dendu.

² Ma nöo Judasi, di sêmbë di o sei Masa Jesosi, nöo a bi sabi di kamian naandë bunu kaa, biga u ku Masa Jesosi bi lobi u ko makandi naandë.

³ Nöo hën u sai dë te wan pisi, hën u si Judasi ta ko ku wanlô hia sodati, ku wanlô siköutu dee ta wakiti a di Wosu u Gadu a Jelusalen dë. Nöo fa de ta ko dë, nöo dee Gaan Begima ku dee Faliseima, de wë manda de nöo de ta ko ku feti soni a maun, so sêmbë ta tja falambo, so sêmbë dë ku lampu, biga a bi dë ndeti.

⁴ Ma nöo Masa Jesosi bi sabi hii dee soni dee o pasa ku ën kaa, nöo hën a waka go miti ku de. Hën a hakisi de taa: “Ambë un ta suku sö?”

⁵ Hën de taa: “Jesosi u di köndë de kai Nazalëti.”

Hën a piki de taa: “Wë mi disi kaa.” (Nöo fa dee sêmbë ta fan dë, nöo Judasi di kônkuma bi dë leti dë.)

⁶ Nöo di Jesosi piki de sö, nöo hën de tuu hai baka naki de na de tuwë a goon.

⁷ Hën a toona hakisi de möön taa: “Ambë da di sêmbë un ta suku?”

Hën de taa: “Jesosi u Nazalëti.”

⁸ Hën a piki de taa: “Wë mi bi piki unu kaa taa miseei disi wante. Nöo ee mi un ta suku, nöo un disa dee oto sêmbë aki be de go u de.”

⁹ Nöo da sö di wöutu ko leti kumafa a bi taki taa:

Dee i bi da mi, na wan u de mi lasi möönsö.

¹⁰ Nöo wan u dee sêmbë ko dë de kai Malikusi. A dë wan futuboi u di Kaba Hei Begima. Nöo fa i si u mbei dë, nöo hën Petuisi hai di sëufangi fëen valau puu nëen dosu, hën a koti wan sê jesi u di sêmbë dë belim puu tuwë a goon dë.

¹¹ Hën Masa Jesosi bai ën taa: “Nönö womi. Tuusi di ufangi fii nëen dosu baka. Di sondi di mi Tata da mi u mi bebe aki, ma musu bebëen tuu ku telu nö?”

Aki de tja Masa Jesosi go a

di Gaan Begima.

Mat. 26:57-58; Maik. 14:53-54; Luk. 22:54

¹² Nöo di juu dë, hën dee hia sodati ku di hedima u de ku dee siköutu u dee Dju hedima, hën de kisi Masa Jesosi awaa. Hën de tai ën maun te de kaba.

¹³ Hën de tjëen go a di wosu u wan tata de kai Ananasi. Nöo di Ananasi dë, hën bi dë di Kaba Hei Begima a fesi ufô Kajafasi, nöo Kajafasi tööu ku wan mujëe mii fëen.

¹⁴ (Nöo Kajafasi hën wë bi da di sêmbë di bi da dee hedima u Dju lai a di kuutu taa, ka u hii di nasiön tuu kaba a sösö nöo a möön bunu wan kodo sêmbë nöo dëdë.)

Aki Petuisi fia taa an sabi

Masa Jesosi.

Mat. 26:59-75; Maik. 14:55-72; Luk. 22:55-71

¹⁵ Nöo fa de kisi Masa Jesosi tja go naandë, nöo Simon Petuisi ku wan oto bakama bi dë tee a baka ala ta waka ta ko. Nöo di bakama naandë, di Kaba

Hei Begima bi sabi ën kaa, fëen mbei de dëen pasi faa go ku Masa Jesosi a di djai dendu. Ma Petuisi hën a fika a döo naandë.

¹⁶Nöo hën wë di oto bakama dë toona go fan ku di mujëe mii ta watji a di döobuka, nöo hën a mbei Petuisi pasa ko a di djai dendu tu.

¹⁷Nöo hën di mujëe mii hakisi Petuisi taa: “Womi, na i da wan u dee bakama u di sëmbë de tja ko aki nö?”

Hën Petuisi piki taa: “Nönö, na mi e.”

¹⁸Nöo fa de dë a di djai dendu a di ndeti dë, nöo kamian bi kötö, hën de mbei wan faja buta dë ta këndë. Dee wookoma ku dee siköutu tuu sai naandë, hën Petuisi seei go ta këndë faja ku de tu.

¹⁹Nöo di juu naandë, de bi tja Masa Jesosi go a di awoo Kaba Hei Begima de kai Ananasi kaa. Nöo hën Ananasi ta hakisi ën peipei soni fuu dee bakama fëen, ku di lei a abi ta lei sëmbë a di köndë.

²⁰Hën Masa Jesosi piki ën taa: “Wë fa i ta hakisi mi dee soni aki, wë hibiwan juu mi bi ta lei sëmbë a lanti wajaa. Biga mi bi nango a hii dee keikiwosu te dou ku di Wosu u Masa Gadu tuu, ka hii dee Dju sëmbë ta ko makandi. Nöo na tjubitjubi mi bi ta du ën.

²¹Wë nöo na mi i musu hakisi. Hakisi dee sëmbë dee bi ta haika dee fan u mi naandë, biga misikuma de musu sabi andi da dee soni mi bi ta lei de.”

²²Nöo fa a fan dë, hën wan u dee wakitima di bi dë zuntu ku ën dë, hën a dëen wan baaimaun a bandjajesi dë kpa a taa: “Sö joo piki di Kaba Hei Begima nö?”

²³Hën Masa Jesosi piki ën taa: “Womi, ee mi taki wan hogi soni, nöo lei mi di hogi mi taki. Ma ee mi fan leti, nöo andi mbei i naki mi u du?”

²⁴Nöo fa a fan naandë, nöo hën de disa di taki, hën Ananasi mandëen taitai maun go a Kafafasi awaa.

²⁵Nöo di juu dë, Simon Petuisi dë fëen taanputaanpu naandë ta këndë di faja eti. Te wan pisi hën de bia ko ta hakisi ën möön taa: “Wë womi, na i da wan u dee bakama u di sëmbë naandë nö?” Hën a fia taa: “Nönö, nönö, na mi e!”

²⁶Nöo wan futuboi u di Kaba Hei Begima sai dë. A dë famii u Malikusi di Petuisi bi koti ën jesi, nöo hën a hakisi ën taa: “Tan. Wë womi o, na i ku ën mi bi si a di djai ala ö?”

²⁷Nöo hën Petuisi toona fia möön taanga taa: “Nönö hön, na mi da di sëmbë di i bi si dë e!”

Nöo hën wantewante dë hën ganian bai kanda.

Aki de tja Masa Jesosi go

a Gaama Pilati.

Mat. 26:59-66, 27:1-2, 11-14; Maik. 14:55-66, 15:1-5; Luk. 22:66-23:5

²⁸Nöo hën baka u di dë, hën de kumutu a Kafafasi. Hën de tja Masa Jesosi go a di kuutuwsu u dee Loomë sëmbë dee ta tii di köndë. Naandë wan Gaama de kai Pilati ta dë, di dee Loomë lanti buta ta tii di köndë. Nöo di juu dë a bi dë mamate biten. Nöo abiti möön di Pasika o kai, nöo fëen mbei dee hedima u Dju an sa go a di kuutuwsu, biga an dë wosu u dee Dju. Nöo de an kë poi di tjina taa dë go a wan wosu na u Dju sëmbë, biga de kë hoi deseei limbolimbo u de sa njan di daka.

²⁹Fëen mbei Gaama Pilati musu ko a de a döo.

Nöo di a ko dou, hën a hakisi de taa: “Wë un hogi di sëmbë aki du mbei un tjëen ko a mi aki?”

³⁰Nöo hën de piki ën taa: “Hön, nönö. Wë di soni dë an dë u hakisi. Wë biga ee an bi dë wan sëmbë di ta du hogi, nöo wa bi o tjëen ko da i aki.”

³¹ Nöo hën di Gaama taa: “Sö nö? Wë nöö di a dë sö kaa, nöö be unu seei tei ën tja go kuutu ku dee wëti fuunu.”

Nöo hën de piki ën taa: “Wë nönö, wa sa kuutu ën e, biga un dee Loomë lanti an ta da u pasi u kii sëmbë!”

³² Nöo di soni mbei a musu pasa sö. Biga Masa Jesosi bi pindja de kaa taa de an o kii ën kumafa dee Dju sëmbë ta kii sëmbë, hën mbei de bi musu tjëen go da di Loomë Gaama fu hën musu mandëen go kii.

³³ Nöo hën Pilati toona go a di kuutuwasu, hën a kai Masa Jesosi ko nëen. Hën a hakisi ën taa: “Wë nöö i da di könu u dee Dju sëmbë tuu nö, kumafa de ta taki taa i taki?”

³⁴ Hën a piki ën taa: “Wë fa i ta hakisi mi aki, na un fasi i ta mëni ën? A di fasi i seei ta mëni u könu, naa a di fasi dee Dju ta mëni ën?”

³⁵ Hën Gaama taa: “Hön, ambë? Mi da Dju nö? Unfa mi sa mëni ën a Dju fasi? Na dee sëmbë fii seei ku dee Gaan Begima fii tja i ko a mi aki nö? Nöo hën mi ko hakisi i andi da di soni di i du mbei de tja i ko aki?”

³⁶ Hën a piki ën taa: “Wë de taa mi ta mbei miseei könu. Wë ma di Könu Tii u mi an dë wan tii kuma di u dee sëmbë u di goonliba aki e. Biga ee a bi dë sö, nöö dee futuboi u mi bi o hopo heepi mi feti fu dee Dju hedima an bi musu kisi mi tja ko aki. Ma nöö di tii u mi, na a di goonliba aki a kumutu e.”

³⁷ Nöo hën Gaama piki ën taa: “Söö. Wë nöö hën da i ta piki taa i dë könu.” Hën Masa Jesosi taa: “Awa, mi da wan könu tuu. I a’ leti a di dë. Ma boiti di dë, di soni mbei de pai mi ko a di goonliba aki, fu mi sa lei sëmbë andi da tuu ku andi da ganjan. Nöo hibiwan sëmbë di kë jei tuutuu soni, nöö a o haika andi mi ta fan.”

³⁸ Nöo hën di gaama taa: “Ambë tjika u sabi andi da di tuu?”

Nöo fa de fan naandë, nöö hën Gaama Pilati toona go a döo a dee hedima u Dju ala, hën a taa: “Wë mi suku föutu a di womi te mi wei. Ma feni soni nëen möönsö u mi musu kuutu ën.

³⁹ Ma nöö un sabi nö? Un bi guwenti fu te Pasika kai, nöö mi lusu wan sëmbë di dë a dunguwosu da unu. Nöo unfa fëen un mëni? Un kë mi lusu di könu fuunu aki da unu nö?”

⁴⁰ Nöo fa a fan dë, nöö hën de tuu kai olo taa: “Ambë? Nëen i musu lusu e! Balabasi, hën fii lusu!”

Nöo di Balabasi dë, a bi dë a dunguwosu fu di a bi dë wan sëmbë ta tja toobi ko a di köndë.

19

Aki de manda Masa Jesosi go kii.

Mat. 27:15-31; Maik. 15:6-20; Luk. 23:13-25

¹ Nöo hën Gaama Pilati manda sëmbë, de wipi Masa Jesosi wan hogi wipi.

² Nöo baka u di dë, hën dee sodati tei wan tatai ku maka kuma agbago maka djangadjanga hën de lolu ën mbei kuma könu kaapusa te de kaba, hën de tuusi ën a Masa Jesosi hedi. Nöo hën de tei wan baau djakiti langa wan kumafa könu ta bisi, hën de bisi ën dëen te de kaba.

³ Nöo hën de nango nëen ta mbei ën fa taa: “Odi o, könu u dee Dju, odi o!” Hën de ta naki ën nëen bandjajesi ku ën fesi tuu.

⁴ Nöo hën di gaama toona go a döo a dee hedima u Dju, hën a taa: “Wë un haika, mi o toona tja di sëmbë ko da unu e. Biga mi, ma feni na wan föutu nëen möönsö fu mi sa dëen sitaafu.”

⁵ Nöo fa a fan dë, nöö hën a mbei de tja Masa Jesosi ko a döo da de. A dë ku di langa djakiti nëen sinkii, ku di maka kaapusa nëen hedi.

Hën di gaama taki da de taa: “Un luku di womi. Hën wë disi e.”

⁶ Ma nöö di dee Gaan Begima ku dee siköutu u de si ën, hën de bai kai wan gaan wolo taa: “Un kii ën oo! Un pekéën a lakpa pau kii! Un pekéën a lakpa pau kii!” „Biga a sö wan fasi dee Loomë sëmbë bi guwenti u kii dee sëmbë ta du hogi a di köndë a di ten dë.”

Nöö hën di gaama piki taa: “Mi? Na mi e! Ee a lakpa pau un kë kii ën, nöö be unu seei tjëen go hëngi kii, biga ma feni föutu nëen möönsö.”

⁷ Hën dee Dju bai piki taa: “Ja feni föutu nëen nö? Wë haika, u abi wan wëti nöö di wëti taa ee wan sëmbë ta mbei hënseei Gadu nöö a musu dëdë. Wë nöö di womi aki taa hën da Miii u Gadu, nöö hën mbei a musu dëdë e!”

⁸ Wë nöö di di gaama jei de fan sö, nöö a ko möön fëëë seei.

⁹ Hën a toona go a di kuutuwasu dendu, hën ku Masa Jesosi, hën a hakisi ën taa: “Wë, ambë seei da i? Naasë i kumutu ko aki?” Ma Masa Jesosi an piki ën na wan soni.

¹⁰ Hën Gaama taa: “Ja kë piki mi nö? Ja sabi di makiti di mi abi aki nö, taa mi sa lusu i be i go, ee nasö mi sa mbei de peka i a lakpa pau kii?”

¹¹ Hën Masa Jesosi piki ën taa: “Wë nönö, ja sa abi sö wan makiti a mi liba, ee na Gadu hën da i ën. Fëën mbei di sëmbë di i si tja mi ko da i aki, hën du di möön gaan hogi.”

¹² Wë nöö di di gaama jei a fan sö, nöö hën a ta suku wan baaku nöömö faa sa lusu ën. Ma nöö dee hedima u Dju an dë nëen. De ta bai wolo seei taa: “Kaba! Ee i lusu di sëmbë aki go, nöö i ku di Gaan Könu a Loomë o ko a wan gaan toobi e. Biga ee wan sëmbë ta mbei hënseei könu nöö hën ku di Gaan Könu dë gaan felantima!”

¹³ Wë nöö di Gaama Pilati jei fa de fan dë, hën a mbei de toona tja Masa Jesosi ko a di djai möön. Hën a go sindo a di kuutubangi fëën awaa faa koti di taki. Nöö di kuutubangi dë a wan hei sitonu liba. Mbei de mbei di kamian dë, nöö a di Dju tóngö de kai ën Gabata.

¹⁴ Nöö di ten di soni aki ta pasa, nöö a bi dë kuma nëigi juu mamate sö. Nöö de ta seeka seei u de njan di Pasika daka di o kai dë.

Nöö hën di gaama taki da dee hedima u Dju taa: “Wë un luku di könu fuunu aki e!”

¹⁵ Ma nöö de an sa jei di soni dë. Hën de bai taa: “Un tjëen puu dë. Un tjëen puu dë. Un pekéën a lakpa pau kii!”

Hën a taa: “Di könu fuunu, hën u musu peka a lakpa pau kii nö?”

Hën dee Gaan Begima bai piki taa: “Wa a’ oto könu a u liba möönsö e, möön leki di Gaan Könu a Loomë!”

¹⁶ Nöö di Gaama Pilati jei de taki sö, nöö hën a da de Masa Jesosi awaa fu de tja go peka kii.

Aki de peka Masa Jesosi

a di lakpa pau.

Mat. 27:32-44; Maik. 15:21-32; Luk. 23:26-43

Nöö hën dëë sodati tei ën, hën de ku ën ta waka nango.

¹⁷ Nöö fa de nango dë, hënseei ta tja di lakpa pau fëen ku taanga nango ka de o pekéën kii. Nöö hën de nango te de go dou a di kamian de kai Hedibonu. A Dju tóngö de kai ën Golugata.

¹⁸ Nöö naandë sö de go pekéën a di lakpa pau te de kaba. Nöö de peka tu oto sëmbë a lakpa pau di daka dë tu. Hën de hopo de taanpu a pë nöö Masa Jesosi dë a de mindi.

¹⁹⁻²⁰ Ma nöö di gaama bi mbei de sikifi wan soni peka a di lakpa pau u Masa Jesosi, nöö de sikifi ën a dii pei tóngö: a dë a di Alamaiki tóngö di u dee Dju

sëmbë ta fan, a dë a Latein, a dë a Giiki, a taa: JESOSI FU NAZALËTI, DI KÖNU U DEE DJU SËMBË, HËN DISI. Nöo di kamian ka de peka Masa Jesosi a di lakpa pau naandë, a dë zuntu ku Jelusalen, nöo sômëni u dee Dju sëmbë ta waka ta pasa dë, nöo de ta lesi di sikifi di dë a di lakpa pau.

²¹ Nöo hën dee Gaan Begima go ta mbei toobi ku Gaama Pilati taa: “Ja bi musu sikifi ën sö taa hën da di könu fuu dee Dju sëmbë e. Ma i bi musu sikifi taa, hën bi ta mbei taa a dë könu fuu.”

²² Nöo hën di Gaama bai de taa: “Un disa mi e! Di soni mi sikifi naandë, a fika sö.”

²³ Wë nöo di dee sodati peka Masa Jesosi te de kaba kaa, hën de tei dee bisi fëen hën de paati de a fô pei, hiniwan sodati ku fëen. Ma nöo di gaan djapona fëen di de bi mbei ku telu söndö miti, hën nöo fika.

²⁴ Hën de taa: “Wan boo tënë di djapona aki e, ma un boo tuwë lötu luku ee undi fuu o feni ën.”

Nöo sö wë i si taa a kai ku di soni di bi sikifi a Gadu Buku taa
Dee bisi u mi de paati da de na de;
de tuwë lötu da di koosu u mi.

Nöo leti sö dee sodati du e.

²⁵ Nöo fa Masa Jesosi dë a di lakpa pau dë, nöo hën mama ku ën mama sisa dë taanputaanpu naandë, ku wan mujëe de kai Malia di da di mujëe u Kelopasi, ku Malia fu Magdala. Sö de tuu sai dë makandi.

²⁶ Nöo hën Masa Jesosi bia luku, hën a si hën mama dë ku di bakama fëen di dë gaan mati fëen. Hën a taki dëen mama taa: “Mujëe o, luku di womi i si dë. Hën wë da mihi fii e.”

²⁷ Hën a fan ku di bakama tu taa: “Womi, luku i mama dë.”

Nöo kumutu a di ten dë, hën di bakama naandë tei Masa Jesosi mama buta nëen wosu ta sölugu.

Aki Masa Jesosi dëdë.

Mat. 27:45-56; Maik. 15:33-41; Luk. 23:44-49

²⁸ Ma nöo Masa Jesosi sabi taa hii dee soni hën Tata bi buta dëen faa du nöo de tuu pasa kaa, boiti wan oto soni nöo di bi sikifi a di Buku u Gadu. Hën a taa: “Dëewata kisi mi.”

²⁹ Nöo wan gandjigandji win kuma asin bi dë a wan paniki dendu dë, hën de tei sipönsu tuusi nëen. Hën de tei wan maun u di piki pau de kai hisopu hën de tuusi di sipönsu nëen hën de tëndëen buta nëen buka.

³⁰ Nöo di a tjupeën te a kaba hën a bai taa: “A kaba!” Hën a saka hedi hën a manda di akaa fëen go. Böo fëen koti.

³¹ Nöo di juu dë, dee Dju bi ta seeka seei u de njan di daka, biga fa a o kai dë, a dë wan gaan apaiti saba. Nöo hën mbei de go begi Gaama Pilati faa mbei sëmbë go booko dee sëmbë dee dë a dee lakpa pau tuu futu, be de dëdë möön hesi fu de sa puu de. Biga de an kë di sinkii u de musu fika hëngihëngi naandë kisi di saba.

³² Nöo hën dee sodati go booko di fosu sëmbë futu te de kaba. Hën de go booko di u tu.

³³ Ma nöo di de dou a Masa Jesosi fu de booko ën futu, hën de ko si taa a dëdë kaa. Nöo hën de an booko ën futu möön.

³⁴ Ma wan u dee sodati tei wan lanza hën a suti ën nëen bandja, nöo hën gadjabia ku wata ta kule ta kumutu nëen bandja dë tjölölölo ta kai a goon.

³⁵ Nöo di sëmbë i si ta taki dee soni aki, hën seepi si de ku wojo e. Nöo fa a ta fan aki, na soni a ta mindi e. Tuutuu soni seei a ta taki, fu te i jei nöo i musu bia ko biibi a Masa Jesosi tu.

³⁶ Biga hii dee soni i si pasa aki, de pasa sò fu dee soni dee dè a di Buku u Gadu tuu musu ko tuu. Biga di Buku bi taa:

Na wan kodo bonu fëen o booko möönsò.

³⁷ Ufò a taki a wan oto kamian taa:

De o ko si di sèmbè sabi di de bi suti di suti naandè.

Aki de bei Masa Jesosi.

Mat. 27:57-61; Maik. 15:42-47; Luk. 23:50-56

³⁸ Nöo di juu dè, i bi abi wan womi de kai Josèfu u di köndè de kai Alimatea. Nöo a bi dè wan bakama u Masa Jesosi tu, ma a tjubitjubi fasi fu di a bi fëèe dee hedima u Dju.

Nöo di Josèfu aki go a Gaama Pilati go hakisi èn pasi faa sa go tei di dèdè sinkii u Masa Jesosi tja go bei. Hèn di Gaama dèen pasi.

³⁹ Nöo hèn ku di womi de kai Nikodemusi di bi ko a Masa Jesosi a wan ndeti, hèn de ko tei èn. Nöo fa Nikodemusi ko dè, a tja sumèè suti sondi te a hila mökismökisi faa seeka di dèdè sinkii u Masa Jesosi. Dee soni dee a tja ko naandè, de sa hia kuma wan feifiteni kilo sò, sò de hia tjika.

⁴⁰ Nöo hèn wè de tu sèmbè dè lolu di dèdè sinkii u Masa Jesosi ku wanlò weti koosu pisi mökisi ku dee sumèè suti soni dè te de kaba, kumafa dee Dju sèmbè guwenti fu seeka wan dèdè bei.

⁴¹ Wè nöo zuntu ku ka de bi peka Masa Jesosi kii naandè, wan djai bi dè ku wan sitonu kununu ka de bi seeka wan gaan baaku u de ta bei sèmbè. Ma de an bei sèmbè nèen wan daka eti.

⁴² Nöo fa di gaan daka o kai dè, nöo dee sèmbè ta biinga seei. Nöo fu di di geebi bi dè zuntu naandè kaa, hèn de tei Masa Jesosi sinkii tja go bei a di baaku dè te de kaba. Nöo hèn de go u de.

20

Aki Masa Jesosi weki baka.

Mat. 28:1-8; Maik. 16:1-8; Luk. 24:1-12

¹ Söo. Wè nöo a di fosu daka u di wiki di hopo dè, hèn da sonde, mamate biten, kamian an limbo eti, nöo hèn Malia u Magidala hopo go a di geebi ka de bi bei Masa Jesosi. Nöo fa i si de bei Masa Jesosi naandè, nöo de bi logoda wan gaan gindi sitonu tapa di baaku buka. Ma nöo di Malia go dou, nöo hèn a si taa di sitonu an dè a di baaku buka möön.

² Nöo hèn a kule toona go konda da Simon Petuisi ku di oto bakama u Masa Jesosi di hèn ku èn dè gaan mati taa: “Dee sèmbè, u go a di geebi di mamate aki e, ma nöo wa si Masa naandè. De puu èn dè tja go, nöo wa sa naasè de tjèen go buta.”

³ Nöo hèn di de tu bakama naandè jei sò, hèn de hopo tei pasi ta kule nango a di geebi u de go luku.

⁴ Nöo fa de ta kule dè, hèn di oto bakama kule go pasa Petuisi, nöo hèn fosu go dou a di geebi.

⁵ Hèn a bendi luku a di baaku dendu, nöo hèn a si dee koosu de bi lolu Masa Jesosi ala, ma nöo hèn an go a di baaku dendu.

⁶ Nöo hèn Petuisi ko dou, nöo hèn a denda go a di baaku dendu wante. Hèn a si dee koosu de bi lolu Masa Jesosi sinkii a wan kamian dè,

⁷ ma nöo di hangisa de bi tai èn hedi, hèn a si èn dóbodoba te a wan sè ala.

⁸ Nöo hèn di oto bakama ku èn ko dè, hèn a denda go a di baaku dendu awaa, go luku dee soni te a kaba, nöo hèn a ko biibi awaa.

⁹ Ma nöo fa a ko biibi naandè seei, ma de an fusutan eti taa sò Masa Gadu Buku bi taki gaanduwe taa di Paamusi Könu musu toona weki baka.

10 Nöo hën de tu bakama toona go a wosu.

Aki Malia si Masa Jesosi.

Mat. 28:9-10; Maik. 16:9-11

11 Ma nöo Malia bi toona ko dë möön. Hën a ko taanpu leti a di geebi naandë ta kää nöömö. Te wan pisi, hën a bendi luku a di baaku dendu.

12 Nöo hën a si tu basia u Masa Gaangadu köndë sindosindo naandë gbolo, leti ka Masa Jesosi sinkii bi dë. Wan dë nëen hedi së, wan dë nëen futu së ala, nöo de tuu hisi weti koosu faan a de sinkii.

13 Nöo hën de hakisi ën taa: “Mujëë, andi seei du i, i ta kää sö baa?”

Hën a taa: “Wë nönö, de puu di Masa u mi aki e, nöo ma sa naasë de tjëen go buta.”

14 Nöo fa a fan dë, nöo hën a bia luku, hën a si Masa Jesosi taanputaanpu leti naandë, ma hii fu di dë an sabi taa hën di dë.

15 Nöo hën Masa Jesosi hakisi ën taa: “Mujëë o, andi seei du i, i ta kää sö? Ambë fii lasi i ta suku?”

Ma nöo Malia bi mëni taa di sëmbë ta luku di djai wë ta fan ku ën dë, hën a taa: “Wë baa, ee i puu ën aki tja go a wan oto kamian, nöo gaantangi mi begi i, lei mi ka a dë be mi go tei ën.”

16 Nöo fa a fan dë, hën Masa Jesosi kai ën nëen në awaa taa: “Malia!”

Nöo hën di mujëë bia vau luku ën hën a kai ën: “Laboni!” (Hën da Mësitë a di Alamaiki tóngó di de ta fan.) Hën a go u go panjëen.

17 Nöo hën Masa Jesosi fan ku ën taa: “Nönö mujëë, na panjan mi e, biga ma go a mi Tata eti. Ma nöo bia toona go piki dee otowan u mi taa mi nango a mi Tata di dë Tata fuunu tu, ku mi Gadu di dë di Gadu fuunu tu. Sö fii taki da de e.”

18 Nöo di de fan te de kaba, nöo hën Malia tja di buka ko konda da u dee bakama u Masa Jesosi taa: “Dee sëmbë, mi si Masa e!” Hën a da u di buka di a manda nëen da u.

Aki Masa Jesosi ko a dee

bakama fëen.

Mat. 28:16-20; Maik. 16:14-18; Luk. 24:36-49

19 Nöo a di sapate dë seei, hën u ko dë a wan wosu makandi, hën u söötö di döo fu di u fëëë dee hedima u Dju. Nöo te fuu kë mëni hën Masa Jesosi ko taanpu leti a u mindi naandë.

Hën a da u odi taa: “Un dë nö? Be hati fuunu kötö e, dee sëmbë.”

20 Nöo hën a lei u dee peegu maaka nëen maun dendu ku di lanza buka nëen bandja, be u si taa hënseei di dë kaa. Nöo hën u wai te na soni.

21 Hën a toona taki da u möön taa: “Un musu dë ku kötöhati e, dee sëmbë.”

Hën a taa: “Wë un haika e. Leti fa i si mi Tata bi manda mi ko a dee sëmbë u goonliba aki, nöo söseei mi ta manda unu go a de tu e.”

22 Nöo fa a fan naandë, nöo hën a böö u vuuu ku buka hën a taa: “Un tei di Akaa u Gadu a unu liba e.

23 Nöo fa woon tei ën dë, nöo di sëmbë woon puu a bëë fu dee hogi du fëen, nöo Gadu puu ën a bëë tu. Ma nöo dee sëmbë dee un hoi a bëë fu dee hogi du u de hedi, nöo Gadu o hoi de a bëë tu e.” Sö a taki da u.

Aki Tomasi si Masa Jesosi.

24 Ma nöo wan otowan fuu de kai Tomasi, hënseei de kai Tumii, hën an bi sai naandë di daka dë.

25 Nöo di u si ën, hën u fan ku ën taa: “Womi, u seei si Masa Jesosi e.”

Hën a piki u taa: “Un disa mi e, womi. Mi, fa mi dë aki, ee na mi seei si dee peegu maaka nëen maun dendu u mi buta finga a de, ee nasö mi tuusi maun a di lanza buka nëen bandja, ma o piki möönsö e!” Sö Tomasi fia ku u tjika.

²⁶ Nöo baka aiti daka fëen, hën u toona ko makandi a di wosu möön, nöo Tomasi seei bi ko tu. Nöo hën u dë söötösöötö döo naandë, te wan pisi hën u si Masa Jesosi dë taanputaanpu leti a u mindi dë.

Hën a da u odi taa: “Un musu dë ku kötöhati e, dee sëmbë.”

²⁷ Nöo hën a bia fan ku Tomasi wante taa: “Söö. Wë Tomasi, luku mi maun dendu aki ku dee peegu maaka. Nöo tëndë di finga fii ko buta a de e. Tëndë di maun fii ko buta a di lanza buka a mi bandja aki.”

Nöo hën a fan ku ën taa: “Womi o, di fasi di i abi taa ja ta kë ta biibi, nöo i musu disëen e, nöo i bia ko ta biibi awaa.”

²⁸ Nöo hën Tomasi piki awaa taa: “Aai o, Masa. I da mi Masa ku mi Gadu tuu.”

²⁹ Hën Masa Jesosi taa: “Womi, di i si nöo hën mbei i biibi nö? Ma nöo Gadu ta wai ku dee sëmbë dee ta biibi söndö de si.”

³⁰ Nöo fa u sikifi dee soni aki, dee sëmbë, nöo sömëni oto foombo soni dë di Masa Jesosi bi du eti e, faa mbei u dee bakama fëen ko si taa sö wan sëmbë a dë, ma dee di dë wa sikifi de buta a di buku aki.

³¹ Ma nöo dee aki, u sikifi de fuun musu biibi taa Masa Jesosi hën da di Keesitu, di Könu di Masa Gadu bi paamusi taa a o manda ko. Hën da di Womi Mii u Masa Gaangadu seei gbelingbelin. Nöo te un biibi sö kaa, nöo woon feni di libi u teegu fu di un nama ku ën.

Da sö.

21

Aki dee bakama u Masa Jesosi toona si ën möön.

¹ Wë nöo a baka u di dë, hën Masa Jesosi tjëen seei ko lei u dee bakama fëen wan pasi möön, a di piki ze de kai Tíbelia.

Wë di oto aki, a pasa sö taa

² Simon Petuisi ku Tomasi, di de kai Tumii naandë, ku Nataniëli u Kana fu di pisiwata u Galilea, ku u de tu womi mii u Zebedeosi, ku tu otowan fuu möön, sö u bi dë makandi a wan kamian.

³ Te wan pisi hën Simon Petuisi taki da u dee otowan taa: “Wë mi o go tuwë nëti luku e baa.”

Hën u piki taa: “Antoobi. Woo go ku i tu e, womi.”

Nöo hën u hopo, hën u go tei boto wante, nöo hën wë u go e. Ma nöo fa u go dë, hii di ndeti tefa didia wa kisi na wan wojo soni möönsö.

⁴ Nöo hën di mamate biten, kamian ta mbei bëëë sö, hën wë Masa Jesosi ko dë taanputaanpu leti a bandja wata naandë, ma nöo wa bi sabi taa hën di dë.

⁵ Nöo hën a bai hakisi u taa: “Dee kijoo dë e, andi un kisi baa?”

Hën u bai piki taa: “Nönö, wa feni e.”

⁶ Nöo hën a taki da u taa: “Wë un sabi nö? Un hiti di nëti fuunu go a di letimaun së u di boto, nöo woon kisi.”

Nöo di u jei sö, nöo hën u puu di nëti a di së dë hiti go a di oto së. Nöo wantewante naandë hën u kisi fisi te a hila seei, tee wa sa hai di nëti ko a di boto dendu.

⁷ Nöo hën di bakama di hën ku Masa Jesosi dë gaan mati taki da Petuisi taa: “Womi, Masa Jesosi wë i si di dë e!”

Nöo di Petuisi jei sö kaa, hën a bia kisi koosu bisi, biga an bi dë ku bumbuu soni a sinkii. Hën a djombo kai a wata djubuu sun go a Masa Jesosi.

⁸ Ma nöö u otowan fika a di boto dendu ta diipi ta ko ku dee gaan hia fisi u kisi dē, biga wa bi dē longi ku lampeesi poi. A bi dē kuma wan hōndō mēti sō nōō.

⁹ Nōō di u ko tjōkō kumutu a di boto nōō hēn u ko si zonka hēii naandē kaa, ku fisi a faja liba. Hēn u si bēēē naandē tu.

¹⁰ Hēn Masa Jesosi taki da u taa: “Wē un go tei so u dee fisi un kisi ala tja ko.”

¹¹ Nōō hēn Simon Petuisi go ta hai di nēti ta tja ko a tela. Nōō dee fisi u kisi dē dē wan hōndō ku feifiteni-ku-dii, nōō de tuu bi dē gaangan fisi. Ma nōō hii fa de hia seei, ma na wan tatai u di nēti koti mōōnsō.

¹² Nōō hēn Masa Jesosi kai u taa: “Wē un ko boo njan.”

Ma nōō hii fa i si di soni ta pasa dē, nōō u dee bakama fēēn ta wegi ēn ta luku. Nōō a bigi da u, u ta si kuma nēēn ma da hēn. Ma nōō na wan fuu bi a’ hati u hakisi ēn ee ambē dēēn.

¹³ Nōō hēn Masa Jesosi tei di bēēē ku di fisi di bi dē a faja liba dē, hēn a paati da u.

¹⁴ Wē nōō disi mbei dii pasi di Masa Jesosi tjēēn seei ko lei u dee bakama fēēn, baka u di a weki a dēdē.

Aki Masa Jesosi toona tei Petuisi a wooko baka.

¹⁵ Nōō di u njan te u kaba, hēn Masa Jesosi fan ku Simon Petuisi, a kai ēn: “Simon o.” A piki.

A taa: “Ju di mii u Jonasi aki, i lobi mi mōōn dee disi ö?”

Hēn Petuisi piki taa: “Wē aai Masa, i seei sabi taa mi lobi i e.”

Nōō hēn a taa: “Antoobi. Wē nōō fii ta da dee njunjun sēmbē dee ko biibi a mi liba di buka u mi e. Sölu gu de da mi leti kumafa wan kiijama u sipapu ta sölu gu dee sipapu mii.”

¹⁶ Nōō hēn a toona hakisi ēn di u tu pasi taa: “Simon, ju di mii u Jonasi aki, i lobi mi nō?”

Nōō hēn a piki ēn di wan seei fasi taa: “Aai Masa, i seei sabi taa mi lobi i.”

Nōō hēn a taki dēēn taa: “Antoobi. I musu sölu gu dee sipapu u mi da mi e.”

¹⁷ Hēn a toona hakisi ēn di wan seei soni di u mbei dii pasi taa: “Simon, di mii u Jonasi aki, i lobi mi nō?”

Nōō di a jei a hakisi ēn di u dii pasi ee a lobi ēn, nōō a ko hati ēn seei. Hēn a taa: “Masa o, wē i seei sabi hii soni kaa. I sabi taa mi lobi i.”

Nōō hēn Masa Jesosi taki dēēn taa: “Sōō. Wē nōō i musu sölu gu dee sipapu u mi da mi e.”

¹⁸ Nōō hēn a toona fan ku ēn taa: “Womi, mi o taki wan soni da i aki e, nōō a dē tuu mōōn hii soni. Fa i dē njōnku aki, nōō i seei ta bisi koosu da i seei te i kaba, nōō i ta waka fii nango ka i kē, nasō nō? Ma nōō haika e. Te i ko gaandi, nōō joo tēndē maun fii da oto sēmbē be de bisi koosu da i, nōō de o tja i go a wan kamian ka ja o kē go.”

¹⁹ Nōō ku di fan naandē, Masa Jesosi ta pindja Petuisi kumafa dēdē fēēn o waka, nōō di dēdē fēēn naandē o tja gaan nēbai da Masa Gaangadu.

Nōō hēn Masa Jesosi taki dēēn taa: “Womi o, Petuisi, be i ta waka a mi baka nōō e.”

²⁰ Ma nōō fa de ta fan dē, te wan pisi hēn Petuisi bia luku, hēn a si di bakama di hēn ku Masa Jesosi dē gaan mati ta waka ta ko a de baka. (Di bakama aki, hēn wē da di sēmbē di bi sindo hēngi a Masa Jesosi, di de bi ta njan di Pasika. Hēn bi hakisi taa: “Undi fuu o kōnku i di kōnku?”)

²¹ Nōō fa Petuisi si ēn dē, hēn a hakisi Masa Jesosi taa: “Wē di sēmbē aki wē? Andi fēēn i ta taki?”

²² Hën Masa Jesosi piki ën taa: “Wë womi, ee mi kë faa fika ku libi fu te mi toona ko a goonliba aki baka seei, nöö andi fëën i kë? Be i ta waka a mi baka nöö e.”

²³ Wë nöö fu di soni dë hedi mbei dee biibima seti ta mindi soni taa di bakama naandë hën an o dëdë möönsö. Ma nöö fa i jei dë, Masa Jesosi hën an taki sö e. Ma a bi taa: “Ee mi kë faa fika ku libi u te mi toona ko, nöö andi fëën i kë?” Sö a bi taki di taki.

²⁴ Wë da sö e, dee sëmbë. Di bakama u taki naandë, nöö hën wë i si ta sikifi hii dee soni aki, nöö u sabi taa de dë tuu.

²⁵ Nöö sëmëni oto soni möön Masa Jesosi du tu, ma misikuma ee fuu sikifi de tuu buta a buku, nöö di mundu aki seei an o bigi tjika u hoi hii dee buku naandë e.

A kaba.

Dee woto u dee Tjabukama u Masa Jesosi

Wan wöutu a fesi.

Söö. Wë andi seei di pisi u Gadu Buku aki ta taki da u, dee sëmbë? Wë a di fosu kamian nöö di pampia aki hën ta waka a di de kai Lukasi baka e, biga di data de kai Lukasi hën bi sikifi de tu tuu da wan mati fëen de kai Teofilusi. Nöö de taa a bi sikifi de kuma baka 80 te go miti 90 jaa u di de pai Masa Jesosi.

Nöö di pisi u di Buku aki ta lei u fa dee bakama u Masa Jesosi bi ta paaja di Bunu Buka a köndëköndë ku di kaakiti u di Akaa di bi ko a de liba. De seti a Jelusalen ku dee oto köndë u Judea naandë, nöö hën de go a Samalia köndë, ufö de go a dee oto köndë u goonliba dee de bi sabi a di ten dë. (Luku Tjab. 1:8.)

Nöö di në de da di pampia aki, nöö ee i luku ën te i kaba, nöö an fiti ën ö. A bi möön bunu de kai ën Di Woto u di Akaa u Gadu. Biga na dee Tjabukama bi ta du dee wooko dë, ma di Akaa hën wë du dee wooko a de liba. Nöö an taki soni u hii dee tjabukama tuu e, ma a taki soni u Petuisi ku Paulosu möön taanga.

Nöö dee oto u di pampia aki, nöö de paati a tu gaan pisi. Biga a kapitë 1 te go miti 12 nöö Petuisi në hën ta ko a fesi möön gaanfa. Ma nöö kumutu a kapitë 13, nöö Paulosu në hën ta ko a fesi möön gaanfa. Biga di Akaa u Gadu bi buta Petuisi ta paaja di Buka a Judea köndë da dee Dju sëmbë, nöö hën a toona buta Paulosu ta paaja di Buka da dee sëmbë dee an dë Dju.

Nöö dee soni Lukasi sikifi aki, de dë dee soni a bi jei sëmbë bi ta konda, ku dee hënseei bi ta hakisi sëmbë tu. Ma so juu i sa si taa hënseei bi dë a dendu tu a so u dee soni a sikifi aki.

Aki Lukasi seti di biifi.

¹⁻² Mati Teofilusi, mi Lukasi manda gaan odi da i e, taa mi dë bumbuu., Womi, mi bi mbei wan fosu pampia manda da i kaa, hën mi toona ta mbei disu u mi manda da i möön, di u mbei tu.

Wë nöö di fosu pampia di mi bi mbei dë, nöö mi bi sikifi sëmëni soni u Masa Jesosi da i, u di fa a bi libi a goonliba aki ku di fa a bi ta lei sëmbë soni u Gadu bifö Masa Gadu tei ën tja go a liba. Ma bifö a go, nöö a bi lei dee sëmbë a bi pii tei u de musu ko tjabukama fëen apaiti, fa u de musu du di a o go. Leti kumafa di Akaa u Masa Gadu mandëen, nöö so a lei de.

³ Biga baka u di a dëdë toona weki baka., a nango a de ta ko nöömö te kai fōteni daka, ta du peipei soni u de musu sabi taa a toona weki baka tuutuu. De seei ta si ën ku deseji wojo, nöö a ta fan ku de ta lei de fa di Njunjun Tii u Gadu dë.

⁴ Nöö hën de dë te wan daka, hën a kai de te de piki, a taa: “Un haika e, dee sëmbë. Wan musu kumutu a Jelusalen aki eti e. Un musu tan aki ta luku di soni Masa Gadu o du da unu. Biga a o da unu wan gaan bunu, leti kumafa mi bi paamusi unu kaa.

⁵ Fa i si Johanisi di Dopuma bi sai dë, a bi ta dopu sëmbë ku wata, ma abiti möön nöö Masa Gadu o dopu unu ku di Akaa fëen. Biga a o mandëen ko a unu liba.” Sö wan soni Masa Jesosi fan ku dee bakama fëen te a kaba.

⁶ Nöö hën de sai dë tee wan daka, nöö hën de hakisi ën taa: “Wë Masa, unfa joo du? Joo puu dee Loomë sëmbë a u dee Isaëli sëmbë liba awaa, fuu sa toona tii u seei baka nõ?”

7 Hën a piki de taa: “Wë nönö, an dë fuun biinga fu un ko sabi dee soni dë e. Biga mí Tata Masa Gadu nöö abi di taki faa buta di daka ku di juu di de o pasa.

8 “Ma unu, a o da unu di Akaa fëen. Nöö fa di Akaa o ko a unu liba dë, nöö a o da unu kaakiti fuun sa tei dee soni u mi dee un sabi konda da lanti be de jei. A Jelusalen aki woon seti konda di buka, nöö woon ta kondëen te dou hii Judea köndë te kisi Samalia köndë, nöö woon toona ta kondëen be a paaja a hii dee köndëköndë u goonliba tuu ka sëmbë dë. Sö woon ta waka ta paaja di buka tjika.” Sö Masa Jesosi taki da dee bakama fëen di ten dë.

Aki Masa Jesosi toona go a liba di a weki a dëdë.

9 Nöö hën de dë te wan pisi, hën Masa Gadu tei ën tja go a liba gbolo leti a de wojo dë. A tjëen go tee bundji tapëen, de an sa si ën möön.

10 Hën dee bakama fëen sai dë ta luku ka a go a liba ala diin. Hën te u de kë mëni, hën de si tu sëmbë taanputaanpu a de bandja dë, ku wetiweti bisi faan a de sinkii.

11 Hën de tu sëmbë hakisi dee bakama taa: “Dee sëmbë u Galilea aki, andi mbei un taanpu ta luku liba diin sö? Di wan seei sëmbë di un si Masa Gadu tja go a liba dë, Masa Jesosi, te wan ten a o toona ko a goonliba baka e. Nöö a di wan seei fasi kumafa i si a go dë, sö nöö a o toona ko baka.” Sö de tu sëmbë taki da de.

12 Wë nöö di juu dë, de bi dë a di kuun de kai Oleifi Kuun. Nöö di di soni pasa sö kaa, nöö hën de kumutu dë hën de toona go a Jelusalen. Biga di kuun an longi ku di köndë, a sa dë kuma wan kilomëti sö nöö.

13 Nöö di de go dou a Jelusalen, hën de toona go a di wosu ka de bi guwenti u go, a wan kamba a liba ala.

Nöö dee sëmbë ku dee sëmbë dee go dë, de da dee tjabukama u Masa Jesosi: Petuisi, Johansi, Jakobosi, Andiasi, Filipi, ku Tomasi, Batolomisi, Mateosi, Jakobosi di da di womi mii u Alufasi, ku Simon di womi di bi kë puu Loomë lanti a dee Dju liba. Ufö i abi di oto Judasi, di womi mii u wan tata de kai Jakobosi.

14 Dee lö sëmbë dë, sö de bi guwenti u ta ko makandi fu de ta begi Gadu nöömö, de ku Malia di mama u Masa Jesosi, ku wanlö oto mujëe, ku dee baaa fu Masa Jesosi.

Aki de ta kuutu u buta sëmbë

a Judasi kamian.

15 Nöö hën de dë te wan daka, hën wanlö hia sëmbë ko dë makandi a di kamian. De dë wan höndö ku tuwenti sëmbë, biibima u Masa Jesosi wanwan.

Te wan pisi, hën Petuisi hopo taanpu a de mindi.

16-17 Hën a taki da de taa: “Dee sëmbë u mi aki, wë un sabi fa di Akaa u Masa Gadu bi ko a Dafiti liba gaanduwe a fesi, faa sikifi soni u di soni Judasi du aki. Wë ee wan soni sikifi a di Buku kaa, nöö a musu pasa nöömö, nöö hën i si a pasa ku Judasi a u mindi aki. Biga Judasi bi dë wan fuu. Masa Jesosi bi tei u ku ën tuu fuu musu dë a di wooko u Masa Gadu makandi. Nöö hën wë i si a tja dee sëmbë ko kisi Masa Jesosi kii.”

18 Wë nöö fa Judasi bi du di hogi dë, nöö dee felantima u Masa Jesosi bi pakëen. Nöö hën a tei di möni, hën a go bai wan goon. Nöö a di goon di a bai dë, naandë seei a kai gbolo dëdë pii. Bëe fëen latja puu tiipa a döö. Sö wan soni pasa ku Judasi e.

19 Nöö hën hii dee sëmbë u Jelusalen ko jei taa sö a dëdë a di goon dendu, nöö hën de ko ta kai di goon Akelidama, hën da Buuu Goon.

20 Hën Petuisi taki möön taa: “A bi dë sikifisikifi a di pisi u Gadu Buku de kai Kanda Buku taa:

Di wosu fëen ka a bi ta dë,

a musu fika söndö sëmbë.

Na wan sëmbë musu go libi nëen möön.

Hën a toona sikifi taa:

Oto sëmbë musu subi a di wooko nëen kamian.

21-22 “Wë nöö hën da wan sëmbë musu ko a Judasi kamian e, fu toona heepi u a di wooko. Nöö di sëmbë di woo tei, a musu dë wan sëmbë di bi dë ku u a bigi fu di soni, kumutu a di daka di Johanisi bi dopu Masa Jesosi tee dou di daka di Masa Gadu tei ën tja go a liba. A bi musu si taa Masa Jesosi dëdë toona weki baka. Sö wan sëmbë wë u musu tei buta a Judasi kamian e.”

23 Nöö di Petuisi taki sö te a kaba, nöö hën de kai tu womi ko buta. Wan u de de kai Josëfu. Hën da Basabasi, hënseei da Jusutusi. Nöö di otowan de kai Matiasi.

24-25 Nöö hën de begi te de kaba taa: “Masa Gadu o, wë u ko a i. Biga i sabi hiniwan libisëmbë hatiböö fa a dë.

“Wë nöö fu di Judasi an dë aki möön, fëen hedi wan oto sëmbë musu subi a di wooko nëen kamian ko tjabukama fii. Nöö hën i si u tja de tu womi aki ko da i, fii lei u undi u de i kë. Biga Judasi disa u hën a go a di kamian di fiti ën.” Sö wan begi de begi.

26 Nöö di de begi sö te de kaba, hën de tuwë lötu. Nöö hën Matiasi wini, hën a ko mökisi ku dee ëlufu Gaan Tjabukama u Masa Jesosi dee bi fika mbei tuwalufu.

2

Aki ta lei fa di Akaa u Gadu ko

a dee Tjabukama liba.

1 Hën de dë te wan daka, dee Dju sëmbë o njan di daka de kai Pensiti, nöö hën dee biibima u Masa Jesosi tuu hai ko makandi a wan wosu möön.

2 Hën de sai dë te u de kë mëni, hën de jei wan soni kuma gaan ventu kumutu a liba ta ko te a ko dou a di wosu dendu voo sö, ka de dë sindosindo.

3 Hën de si wan soni kuma faja tóngö paaja fingafinga go nama a hiniwan u de.

4 Hën di Akaa u Masa Gadu wë i si ko a de liba sö e. Nöö a tja wan kõni ko da de, hiniwan u de ko ta taki oto tóngö.

5 Nöö di juu dë, wanlö hia Dju sëmbë fu dee pepei köndë u goonliba bi dë a Jelusalen. De tuu ta biibi Masa Gadu, nöö de bi ko a Jelusalen dë u de njan di daka.

6 Nöö di de jei di bai, hën de booko gililii ko a dee sëmbë u Masa Jesosi, ko haika. Nöö hën de ko ta jei de ta fan pepei tóngö, hiniwan sëmbë ta jei di tóngö fëen seei di a ta taki.

7 Hën de taa: “Woo maingë, andi da di soni aki? A bigi da u. Naasë dee Galilea sëmbë aki lei dee tóngö sabi sö? Biga na deseei tóngö de ta fan dë.

8 Unfa a waka de ko sabi hii dee tóngö fuu tuu ta taki.

9 Biga a sömëni pepei köndë u kumutu nöö u ta fan di tóngö u di köndë ka u kumutu: Paatia, Media, Elam, Mesopotamia, Judea, Kapadosia, Pontusi, Asia,

10 Fiigia, Panfilia, Egepiti, dee köndëköndë u Libië dee dë zuntu ku Sileni, ufö i abi Loomë, ku Keeta, ku Alabia. A dee köndë dë tuu u kumutu.

¹¹ So fuu dē Dju sēmbē, so fuu an dē Dju sēmbē, ma u ko ta biibi Masa Gadu kuma de, nōō hēn u ko ta jei dee sēmbē aki ta konda dee foondofoono soni u Masa Gadu da u a dee tōngō dee u sabi. Nōō a bigi da u e!”

¹² Nōō hēn de fika ta hakisi de na de nōōmō taa: “Andi disi maingē? Wa fusutēen e!”

¹³ Ma nōō otowan a de dendu dē mbei dee Tjabukama u Masa Jesosi fa taa: “Maingē, wan piki e! Dōōngō nōō de dōōngō sō.”

Aki Petuisi ta fan ku dee sēmbē.

¹⁴ Nōō di dee Tjabukama jei de taki sō, hēn Petuisi hopo, hēn ku dee otowan fēen tuu. Hēn a bai taki da dee hia sēmbē dē taa: “Dee sēmbē aki, un haika e. Un dee Dju sēmbē u Jelusalen aki ku hii un dee wakama tuu, un haika bunu fa mi o fan ku unu aki. Mi kē lei unu andi ta pasa aki.

¹⁵ “Wē fa un taa u dōōngō aki, nōō na tuu e, dee sēmbē. Fa di nēigi juu mamate u dē aki, a tjika u sēmbē bebe soni dōōngō kaa nō? Nōnō.

¹⁶ Ma di soni pasa aki, a dē di soni di di fesiten tjabukama u Gadu de kai Joēli bi taki a fesi. A taa:

¹⁷ Masa Gadu manda wan buka ko taa:

‘A di kaba ten u goonliba mi o du wan soni.

Mi o da hii pei sēmbē di Akaa u mi.

Dee womi mii fuunu ku dee mujēē mii fuunu o ta kisi fan a Gadu ta konda da sēmbē.

Dee kijoo mii fuunu o ta si soni u mi ku wojo limbo.

Dee gaan womi o ta sunjan soni u mi.

¹⁸ Di juu dē, di Akaa u mi o ko a dee sēmbē dee ta wooko da mi liba, womi ku mujēē tuu.

Nōō de o ta kisi fan a mi u de konda da sēmbē.

¹⁹ Nōō mi o du foombofoombo soni a liba ala.

Mi o du bōdjēē soni a goonliba aki tu, kuma maaka sō.

Biga sēmbē o si buuu, de o si faja, de o si sumuku baakabaaka.

²⁰ Di sonuwojo o dungu pii,

nōō di libawojo o ko bēēē sō kuma buuu.

Sō o pasa bifō di Gaan Hebi Daka u Masa Gadu o dou.

²¹ Ma nōō hiniwan sēmbē di o kai Masa Gadu nē faa feni heepi nēen, hēn Gadu o puu fu an feni sitaafu.’

Sō Masa Gadu bi fan a Joēli liba, nōō hēn i si ta pasa aki e, dee sēmbē.”

²² Hēn Petuisi toona taki da de mōōn, a taa: “Dee sēmbē fu Isaēli aki, un haika mi bunu e.

“Di sēmbē de kai Jesosi fu di kōndē de kai Nazalēti, hēn bi ta du sōmēni foombofoombo soni a unu dendu, leti kumafa un tuu sabi kaa. Masa Gadu wē dēen di kaakiti faa ta du sō e, be un musu sabi taa hēn mandēen.

²³ Ma nōō di Jesosi dē, hēn Masa Gadu bi buta a fesi taa a o da unu pasi fuun kii ēn. A bi sabi kaa taa woon tjēen go da dee hogihati sēmbē fu de pekēen a lakpa pau kii. Sō a bi sabi a fesi kaa.

²⁴ “Ma fa un kii ēn dē, nōō Gadu an disēen a dēdē kōndē e. A puu ēn a di sitaafu dē, toona weki ēn baka. Biga Dēdē Kōndē aan di kaakiti u tapēen buta dē u nōōmō. Nōō hēn i si a toona weki baka.

²⁵ “Wē nōō Dafiti bi sikifi wan soni. [Buka da fēen ma wōutu na fēen. Biga Masa Jesosi hēn abi di wōutu.] A taa:

Fa mi dē aki, ma ta fēēē na wan soni,

biga mi sabi taa Masa Gadu dē leti a mi bandja aki.

Nōō a o ta dē ku mi nōōmō.

²⁶ Fa i dē ku mi tjika aki, Masa Gadu,
nōō mi ta wai seei te dou a mi hati dendu.
Dee wōutu dee mi ta tei ta taki,
nōō waiwai soni de dē.
Biga fa i si mi dē ku mi sōsō sinkii aki seei,
ma ma ta fēēē dēdē mōōnsō,
biga mi sabi taa joo tja mi.

²⁷ Nōō mi sabi tu taa ja o disa mi a dēdē kōndē.
Di futuboi fii di dē apaiti da i vō,
ja o disēēn sinkii a dēdē kōndē faa lulu poi kaba a sōsō.

²⁸ I lei mi di pasi kaa, ka fu mi go mi feni libi,
nōō joo dē ku mi, hēn mbei mi o dē waiwai.
Sō Dafiti bi sikifi a fesiten e.

²⁹ “Wē nōō dee sēmbē u mi aki, be mi puu di soni a sikifi dē da unu. Biga fa Dafiti taki dē, nōō na hēnseei soni a tei taki e. A bi dē wan gaan sēmbē fuu, nōō a dēdē te de bei gaanduwe kaa. Geebi fēēn sai leti dē eti.

³⁰ “Ma nōō fa Dafiti fan naandē, nōō a bi dē wan tjabukama u Gadu, nōō a bi ta konda u wan soni o pasa a bakaten. Biga a bi sabi taa Masa Gadu bi paamusi ēn wan soni ku soi seei taa wan u dee bakamii fēēn o ko tei di kōnu sutuu fēēn fu nōōmō.

³¹ “Wē nōō di Dafiti sabi sō kaa, hēn mbei a taki di lō soni dē fu di sēmbē di Masa Gadu o manda ko. Hēn de kai di Keesitu. A o dēdē ma a o toona weki baka. A taa Masa Gadu an o disēēn a dēdē kōndē fu hēn sinkii musu poi. Sō Dafiti bi taki.”

³² Nōō hēn Petuisi taa: “Un haika e, dee sēmbē. Di sēmbē Dafiti taki dē, hēn da Jesosi e. Biga a bi dēdē, ma nōō Masa Gadu an disēēn a dēdē kōndē, a weki ēn baka a dēdē. U dee sēmbē i si aki tuu seepi bi si ēn ku u wojo taa sō a pasa tuu.

³³ Nōō fa u dē aki, a dē leti a di letimaun sē fēēn Tata Masa Gadu a liba ala, ka a tjēēn go buta a di mōōn kaba hebima kamian.

“Nōō fa i si Masa Jesosi go ala, nōō hēn di tata fēēn dēēn di Akaa fēēn kumafa a bi paamusi ēn taa a o dēēn. Nōō hēn Masa Jesosi toona da u ēn. Nōō fa i si u ta taki dee peipei tōngō fuunu aki, nōō di Akaa u Gadu hēn mbei e. Sō Masa Jesosi toona da u ēn tjika.

³⁴ “Nōō i sabi fa Dafiti bi sikifi mōōn, a taa:

Masa Gadu taki da mi Masa taa:

‘Sindo fii a mi letimaun sē aki,

³⁵ ta luku fa mi o buta dee felantima fii a i basufutu.’

Sō wan soni Dafiti sikifi. Wē nōō fa a sikifi dē, ma na Dafiti bi go a Masa Gadu a liba ala e. Fa a taki dee soni dē, na hēnseei soni a ta taki, ma Masa Jesosi soni a taki.

³⁶ “Nōō dee sēmbē u Isaēli aki, un musu sabi taa di Jesosi di un peka a di lakpa pau kii dē, hēn wē Masa Gadu tei buta ko Masa fu hii mundu e. Hēn da di Kōnu di a bi paamusi u kaa, di Keesitu.”

Sō Petuisi taki da dee sēmbē.

³⁷ Nōō di dee hia sēmbē jei fa a taki dē, nōō hēn hati u de latja te na soni. A go a de sinkii. Hēn de bai hakisi Petuisi ku dee oto Tjabukama u Masa Jesosi taa: “Woolo, dee sēmbē fuu dē, unfa woo du mōōn?”

³⁸ Hēn Petuisi piki de taa: “Un musu disa di hogilibi fuunu, be hiniwan fuunu go dopu a di nē u Jesosi Keesitu. Nōō te un du sō kaa, nōō Masa Gadu an o hoi dee hogilibi fuunu a bēē mōōn. Nōō a o da unu di Akaa fēēn tu, faa wooko a unu liba.

³⁹ “Wë biga Masa Gadu bi paamusi unu kaa taa sö a o da unu di Akaa fëën. Unu, ku dee mii fuunu, ku hii dee böngö fuunu, ku hii dee sëmbë dee ta dë a dee longi köndë dee a ta kai fu ko sëmbë fëën, de tuu a bi paamusi.” Sö Petuisi taki da de.

⁴⁰ Nöö hën a tei sëmëni oto soni möön ta bai de. A ta biinga ku de kodo u de musu piki di fan fëën, be de an musu feni di sitaafu ta tja kumafa dee hogihatima u di köndë o feni ën.

⁴¹ Nöö di a taki sö kaa, nöö hën sëmëni sëmbë piki tuu. Biga di daka dë, nöö kuma wan dii dusu sëmbë sö piki di buka go dopu. Nöö hën de ko mökisi ku dee sëmbë u Masa Jesosi dee bi biibi kaa.

⁴² Nöö fa de ko biibi dë, hën de nango ta lei soni u Masa Jesosi a dee Tjabukama nöömö. De ta libi suti ku deseeri ku piizii, ta begi Masa Gadu, ta njan makandi fu di de tuu ta biibi a Masa Jesosi.

⁴³ Nöö di juu dë, dee Tjabukama u Masa Jesosi ta du sëmëni foombofoombo soni e, te hii lanti ko ta fëëë.

⁴⁴ Nöö fa de dee sëmbë ko biibi Masa Jesosi dë, de ta libi makandi seei. De an ta mömbi deseeri soni. Te wan sëmbë abi, a ta da di otowan.

⁴⁵ Nöö ee wan sëmbë dë ku fuka, nöö di otowan o sei wan goon fëën, ee nasö wan oto soni di a abi, nöö te a feni di möni nöö a tja ko paati da dee otowan puu de a fuka.

⁴⁶ Nöö hiniwan daka de ta ko ta mökisi a di djai u di Wosu u Masa Gadu a Jelusalen naandë. Nöö sö de ta waka ta njan makandi a dee wosu u de ku piizii, ku limbohati seei.

⁴⁷ Nöö de ta gafa Masa Gadu nöömö.

Nöö fa de ta libi dë, hii sëmbë u di köndë tuu ta luku de taa: “Aai maingë, dee sëmbë aki, bumbuu sëmbë de dë e.”

Nöö hiniwan daka Masa Jesosi ta tja oto sëmbë ko nama ku de, dee sëmbë dee ta ko a Gadu fu de feni di heepi fëën.

3

Aki Petuisi kula wan lan sëmbë ku di në u Masa Jesosi.

¹ Nöö hën de dë te wan daka, nöö hën Petuisi ku Johanisi nango a di Wosu u Masa Gadu a wan dii juu sapate. Biga hiniwan daka sëmbë bi guwenti u go begi Gadu a di lö ten dë.

² Nöö di djai u di Wosu u Masa Gadu bi abi wan döo fëën de kai Hanse Nëngë Döö, nöö naandë de ta tja wan sëmbë ko buta. Di sëmbë dë bi lan sensi nëen mama bëë dendu, nöö hiniwan daka de ta tjëen go buta naandë faa musu ta pidi möni a dee sëmbë ta pasa nango a di Wosu u Gadu.

³ Nöö hën di di sëmbë si Petuisi ku Johanisi ta pasa nango a di Wosu, nöö hën a pidi de möni.

⁴ Nöö hën de luku ën diin. Hën Petuisi taki dëen taa: “Womi, hopo wojo luku i si.”

⁵ Hën a luku de. A a’ di pakisei taa de o dëen wan soni.

⁶ Hën a taki dëen taa: “Ma a’ möni e, ma di soni di mi abi nöö hën mi o da i. A di në u Jesosi Keesitu fu Nazalëti mi taki da i taa hopo waka e!”

⁷ Nöö hën a panjëen a leti maun faa hopo ën taanpu. Fa u du dë, hën futu u di womi ko taanga,

⁸ hën a hopo vu taanpu apë. Hën a denda go ku de a di djai dendu. Hën a ta waka ta djombo ta bai ta gafa Masa Gadu ta dëen tangi u di bunu di a du ën dë.

Aki Petuisi ta fan ku dee sɛmbɛ bi dɛ a di Keikiwosu.

⁹ Nöo di juu dɛ, sɔmɛni sɛmbɛ bi dɛ a di Keikiwosu kaa, nöo de tuu si di womi fa a ta waka ta gafa Masa Gadu ta dɛɛn tangi.

¹⁰ Nöo de sabi taa hɛn da di sɛmbɛ bi dɛ sindosindo a di Hanse Nɛngɛ Döobuka ta pidi möni, nöo hɛn a ko hopo taanpu ta waka.

¹¹ Nöo hɛn de kule go a Petuisi ku Johanisi ka de sai dɛ a di pisi u di Keikiwosu de kai Salumon Baiko. Nöo di womi di bi lan dɛ, a dɛ ku de maun ku maun panjanpanjan. Nöo a bigi da de te na soni.

¹² Hɛn di Petuisi si dee hia sɛmbɛ ta kule ta ko a de, hɛn a taki da de taa: “Dee Isaɛli sɛmbɛ u mi aki, andi bigi da unu sɔ? Fa di womi ko bunu aki, un ninga taa ku u seei kaakiti u kulɛɛn nö? Ee na un mɛni taa fu di hati fuu limbo möön oto sɛmbɛ mbei Masa Gadu da u kaakiti sɔ? Nönö e! Nɛɛn mbei.

¹³ “Ma Masa Gadu, di dee fesiten sɛmbɛ fuu bi ta begi kaa, dee Abahamu, Isaki, Jakopu sɔ, hɛn wɛ kɛ da Masa Jesosi gaan nɛbai, nöo hɛn mbei a kula di sɛmbɛ aki, be un sabi taa sɔ wan sɛmbɛ Jesosi dɛ. Biga Jesosi bi dɛ di Futuboi u Gadu seei di a manda ko da u, ma nöo unu tjɛɛn go da dee tiimu u di köndɛ fuu aki u de musu kii. Hɛn di un tjɛɛn go, nöo Gaama Pilati an bi si na wan föutu nɛɛn faa musu dɛdɛ e. Hɛn a taa an o kii ɛn, a o disɛɛn be a go. Ma di a taki sɔ, nöo hɛn un ko ta bai taa an musu disɛɛn go.

¹⁴ “Di apaiti sɛmbɛ u Masa Gadu, ku hɛn wɛ i si un du sɔ e, dee sɛmbɛ. A bi bunu te Masa Gadu seei an feni na wan föutu nɛɛn wan daka, ma unu taa wan kɛɛn. Hɛn un begi di gaama faa musu puu wan oto sɛmbɛ a dunguwosu da unu nɛɛn kamian. Hɛn un kai di sɛmbɛ dɛɛn. Wan gaan hogi sɛmbɛ di bi ta kii sɛmbɛ, hɛn un mbei a puu da unu.

¹⁵ Ma di bumbuu Sɛmbɛ di ta da hii mundu libi, nöo hɛn un kii puu.

“Ma fa un du dɛ seei, ma Masa Gadu toona weki ɛn baka e. Biga u seepi si ɛn ku u seei wojo.

¹⁶ Nöo hɛn di kaakiti fɛɛn wɛ i si kula di sɛmbɛ bi lan aki. Fu di u ta biibi nɛɛn liba, hɛn mbei di sɛmbɛ ko dɛ tjɛntjen a unu fesi aki kumafa un tuu ta si ɛn kaa.

¹⁷ “Nöo haika e, dee sɛmbɛ u mi aki. Mi sabi taa fa un ku dee hedima fuu kii Masa Jesosi dɛ, wan bi sabi taa sɔ wan gaan hogi un bi ta du e.

¹⁸ “Ma nöo gaanduwe a fesi Masa Gadu bi da dee tjabukama fɛɛn wan buka taa di sɛmbɛ fɛɛn di a o manda ko a goonliba, di Keesitu, a musu tja sitaafu nöömö. Nöo hɛn wɛ i si pasa aki.

¹⁹ “Nöo dee sɛmbɛ o, dee hogilibi fuunu musu hati unu te nöo un bia disa de e, ko a Masa Gadu. Nöo an o hoi unu a bɛɛ möön. Nöo te un du sɔ kaa, nöo a o ta da unu böö.

²⁰ Nöo a o toona manda Jesosi Keesitu ko da unu möön e. Biga a bi buta a fesi taa sɔ a o toona mandɛɛn da u kaa.

²¹ Ma nöo fa u dɛ aki a musu fika a Masa Gadu köndɛ ala ufö. Te dou di juu fu Masa Gadu musu puu hogi a goonliba buta hii soni ko bunu baka ufö a o toona ko. Biga sɔ wan soni Masa Gadu bi paamusi dee gaan sɛmbɛ fuu a dee tjabukama fɛɛn taa sɔ a o du.

²² “Nöo Mosesi bi taki da dee gaan sɛmbɛ fuu taa:

Fa i si Masa Gadu manda mi ko da unu aki, nöo sɔseei a bakaten a o manda wan oto Tjabukama ko da unu.

Nöo di sɛmbɛ di o ko dɛ,

a o dɛ di wan köndɛ sɛmbɛ kuma unu.

Nöo te a ko, nöo dee soni dee a o taki da unu,

nöo de tuu un musu piki e.

²³ Biga ee wan sɛmbɛ ja kɛ piki di buka u di Tjabukama dɛ,

nöö joo kumutu a dee sëmbë u Masa Gadu dendu go kaba a sösö. Sö wë Mosesi bi taki da dee gaan sëmbë fuu e, dee sëmbë.

²⁴ “Nöö hii dee tjabukama u Gadu, kumutu a Samueli te dou ku hii dee otowan dee bi ta konda soni u Gadu da sëmbë, de tuu kisi di wan seei buka taa sö wanlö soni o pasa, nöö hën de ko ta pasa a di ten u dë aki.

²⁵ De bi konda taa sö wanlö bunu Masa Gadu o du sëmbë. Nöö unu wë da dee sëmbë dee musu kisi dee bunu dë e. Masa Gadu ku dee gaan sëmbë fuu bi abi di buka, ma unu wë ta feni dee bunu de bi taki.

“Biga a bi taki da u gaan sëmbë Abahamu taa a di böngö fëën hii pei sëmbë u goonliba o feni heepi. ǀ Wë nöö di böngö di a taki dë, Masa Jesosi wë e, dee sëmbë.”

²⁶ Hën a manda ko kuma Futuboi fëën. Nöö fa a mandëën ko dë, u dee Isaëli sëmbë fosu a mandëën da e. Biga a kë faa heepi unu mbei un disa dee hogilibi fuunu.” Sö wë Petuisi taki tuwë da dee hia sëmbë a di Keikiwosu dë.

4

Aki de kisi Petuisi ku Johanisi tja go a kuutu.

¹ Nöö di juu dë, Petuisi ku Johanisi an kaba u fan seei hën dee begima ku di hedima u dee siköutu dee ta watji a di Wosu u Gadu, ku dee sëmbë u di keiki paatëi de kai Sadusei, hën de ko dou a de.

² Hati u de boonu ku de te na soni, biga de ta konda da dee otowan taa Masa Jesosi dëdë toona weki baka. ǀ Biga dee Saduseima an sa jei taa sëmbë sa dëdë toona weki baka.”

³ Nöö hën de kisi Johanisi ku Petuisi panjan gingin tja go sötö a dunguwosu. Nöö de o luku te amanjan bifö de o kuutu de, biga ndeti kaa.

⁴ Ma nöö fa dee Tjabukama bi fan ku dee sëmbë dë, nöö wanlö hia sëmbë bia piki di buka bendi ko a di së u Masa Jesosi. Nöö fa de go mökisi ku dee oto biibima u Masa Jesosi naandë hën de ko dë kuma feifi dusu sëmbë sö.

⁵ Nöö hën de dë te mamate, hën dee Dju hedima, ku dee Gaan Womi, ku dee Sabima u Wëti, de tuu hai ko mökisi a Jelusalen naandë u de kuutu.

⁶ Di awoo hedima u dee begima de kai Ananasi, ku di Kaba Hei Begima de kai Kajafasi, wan oto sëmbë de kai Johanisi, ku Alekesani, ku hii dee oto famii u Ananasi, sö de ko a di kuutu.

⁷ Nöö hën de manda sëmbë u de go tei de tu Tjabukama u Masa Jesosi, Petuisi ku Johanisi, tja ko a de.

Nöö di de ko dou, hën de hakisi de taa: “Ku un kaakiti un kula di lan sëmbë dë? Un sëmbë në un kai ufö un du sö wan soni?”

⁸ Nöö di juu dë di Akaa u Masa Gaangadu bi dë a Petuisi liba hebi seei. Nöö hën a piki de gbelin taa: “Gaan lanti, un piimisi fuunu e.

⁹ Un kë sabi unfa u du ufö u heepi di lan sëmbë ö?

¹⁰ Wë be mi taki ën da unu, biga a dë fanöudu fuun musu sabi. A dë fanöudu fu hii un dee sëmbë u Isaëli tuu musu sabi taa Jesosi Keesitu u Nazalëti hën kulëën ku ën kaakiti. Hën mbei i si a ko taanpu telutelu a unu fesi aki. Di sëmbë di un bi peka a di lakpa pau naandë kii, nöö hën kulëën e. Unu wë bi kii ën, ma Masa Gaangadu weki ën baka.

¹¹ “Wë wan sabi fa de sikifi ën buta a Masa Gaangadu Buku nö? De taa: Dee sëmbë ta mbei sitonu wosu, hën de si wan sitonu taa an bunu, nöö hën de tuwëën a kapëë. Ma nöö bakaten, hën di sitonu dë ko mama posu u di wosu.

Wē di sitonu dē, Masa Jesosi wē e, dee sēmbē.

¹² Hēn nōo sa puu sēmbē a hogi basu fii sa dou a Masa Gaangadu fesi. Oto nē an dē a goonliba aki mōönsō di u libisēmbē sa kai fuu feni di heepi u Gadu.”

¹³ Wē nōo di dee kuutuma jei fa Petuisi ku Johanisi ta fan sōndō fēēē sō, hēn de taa: “Maingē, dee sēmbē aki, na sōsō sinkii sēmbē de dē nō? Biga de an go a sikōō wan bētē, ma nōō hēn de ko ta fan ku u sōndō fēēē sō.” Di soni bigi da de, nōō hēn de ko si taa di fa dee Tjabukama bi ta dē ku Masa Jesosi, hēn wē mbei de sabi u fan sō.

¹⁴ Nōō soni an dē u fia mōön tu. Biga di lan womi di de bi kula sai leti dē taanputaanpu ku de.

¹⁵ Nōō hēn de manda Petuisi ku Johanisi ku di womi di bi lan taa be de kumutu a di kuutu kamba ufō. Nōō hēn de kumutu go. Nōō hēn dee kuutuma fika dē ta hakisi taa:

¹⁶ “Wē unfa woo du ku dee sēmbē? Biga hii sēmbē fu Jelusalen aki tuu sabi fa de bi kula di lan sēmbē dē. A dē wan gaan foondo soni da hii mundu, nōō wa sa fia, biga a bōdjēē tuu.

¹⁷ Ma nōō un boo bai de nōō taa de an musu tei di nē u Jesosi ta paaja a di kōndē mōön.”

¹⁸ Nōō di de kuutu tefa de kaba, hēn de toona kai Petuisi ku Johanisi taa be de ko. Hēn de ko dou. Hēn de buta ku de seei taa de an musu ta kai di nē u Jesosi ta lei sēmbē soni fēēn mōön a mundu.

¹⁹ Nōō hēn Petuisi ku Johanisi piki de taa: “Lanti, fa un taki da u aki, nōō u jei. Un bai u taa wa musu konda soni u Masa Jesosi. Ma Masa Gaangadu manda u fuu musu konda. Nōō unfa un mēni? Undi u dee buka un si kuma Masa Gaangadu o kē fuu musu piki?

²⁰ Wē nōō wa sa tjubi dee soni u wojo bi si ku dee u jesi bi jei. U musu konda de nōömō.” Sō de piki de.

²¹ Hēn dee kuutuma toona bai de seei gbelin taa de an musu konda de, nōō hēn de manda de go. De an saanfa u de du fu de musu da de sitaafu, biga hii sēmbē ta gafa Masa Gaangadu ta bai ēn nē fu di gaan soni di bi pasa dē.

²² Biga di sēmbē di de bi kula a di gaan foondo fasi dē, nōō a bi abi jaa pasa fōteni, ma an bi waka wan daka.

Aki dee Tjabukama u Masa Jesosi ku dee oto biibima ta begi.

²³ Nōō fa dee kuutuma manda Petuisi ku Johanisi go dē, nōō hēn de go a dee oto biibima u Masa Jesosi go taki da de unfa dee Gaan Begima ku dee Gaan Womi bi taki da de. Hēn de konda te de kaba.

²⁴ Nōō di dee otowan u de jei sō, nōō hēn de tuu ko ta gafa Masa Gaangadu taa: “Masa Gadu oo, i mbei hii soni a liba ala, ku goon aki tuu, te dou ku di ze.

²⁵ Nōō hēn i manda di Akaa fii faa fan a di futuboi fii liba, u gaan avo Dafiti, taa:

Andi du dee peipei sēmbē u goonliba mbei hati u de boonu sō?

Faandi mbei de ta suku pasi sō te de wei,
u de du hogi ku Masa Gaangadu?

²⁶ Dee kōnu u goonliba ku dee oto tiima tuu
ta hai ko fiti buka u de feti ku Masa Gaangadu
puu hēn ku di Kōnu fēēn di a buta, a de liba.

Sō Dafiti taki.

²⁷ “Wē nōō Masa Gaangadu, di soni Dafiti bi taki dē hēn wē i si ta pasa fa u dē aki. Biga dee hedima u goonliba, Helodi ku Pontuisi Pilati, ku dee Isaēli sēmbē fuu, ku dee oto kōndē sēmbē tuu ko mōkisi leti a Jelusalen aki fu de du

hogi ku Masa Jesosi, di Futuboi fii di dë apaiti da i. Di Sëmbë di i bi da taki a hii mundu liba, nõö hën de bi sitaafu sô e.

²⁸ Nõö hën de du hii dee soni dee i bi buta a fesi taa sô o pasa. Wë Masa, sô i seei abi di kaakiti tuu, fu buta hii soni fu de musu pasa leti kumafa i bi kë.

²⁹ “Nõö fa u dë aki ja si o? Dee sëmbë bai u taa de o du ku u. Nõö hën u begi i, Masa, fii da u dee futuboi fii degihati, be u sa ta konda di Buka fii nõömö söndö fëëë.

³⁰ Masa Gaangadu, i musu kula dee suwakima, be sëmbë si di kaakiti fii di i abi. Be u tei di në u Masa Jesosi ta du foondofoono soni, be hii sëmbë si di kaakiti di a abi. Biga hën wanwan tó dë di apaiti Futuboi fii di i buta. Nõö da sô u begi i, Masa.”

³¹ Nõö di de begi sô te de kaba, hën di kamian ka de dë ko ta seki seei te na soni. Hën di Akaa u Masa Gaangadu toona ko taanga a de liba, hën de ko ta konda di buka u Gadu seei söndö fëëë.

Aki ta lei fa dee biibima u Masa Jesosi bi ta libi makandi tjika.

³² Nõö di juu dë, hii dee biibima u Masa Jesosi tuu bi dë ku wan hati. Na wan sëmbë ta hoi ën gudu buta nëën wosu fëën wanwan, ma de tuu ta abi soni makandi.

³³ Hën dee Tjabukama u Masa Jesosi ta konda da lanti nõömö fa Masa Jesosi weki a dëdë. Nõö fa de ta fan dë, di fan u de abi kaakiti, nõö a dë u si tuutuu taa Masa Gaangadu ta tja de ku ën bunuhati seei.

³⁴ Fa de sai dë, na wan sëmbë bi dë a de dendu ta pena. Biga ee wan sëmbë i dë ku pena nõö dee otowan ee dee a’ goon ee nasó wosu, nõö de ta sei ën

³⁵ nõö de tei di möni tja ko da dee Tjabukama u Masa Jesosi. Nõö dee Tjabukama tei di möni nõö de paati da dee penama puu de a fuka. Sô de bi ta libi di ten dë.

³⁶ Nõö hën wan sëmbë bi dë de kai Josëfu. Dee Tjabukama u Masa Jesosi ta kai ën Banabasi; hën kë taki “wan sëmbë di ta da sëmbë hati.” Nõö a dë u di lõ u Isaëli de kai Leifi, nõö a kumutu a di kõndë de kai Sipuusi.

³⁷ Nõö hën di womi aki bi abi wan goon, hën a sei ën. Hën a tei hii di möni fëën tuu tja ko da dee Tjabukama u Masa Jesosi u de paati da sëmbë.

5

Aki ta lei andi pasa ku Ananiasi ku hën mujëë.

¹ Di juu dë, hën wan womi bi dë de kai Ananiasi, nõö hën mujëë de kai Safala. Nõö de bi abi wan goon u de. Nõö hën de sei di goon.

² Nõö hën di womi tei hafu u di möni hoi buta dë, hën a tei di fika tja go da dee Tjabukama u Masa Jesosi, taa tuu u di möni di a sei di goon hën di dë. Nõö fa a du dë, hën mujëë seei dë a dendu tu.

³ Nõö di a du sô, hën Petuisi gandji dëën taa: “Womi Ananiasi, unfa i du bifó di didibi subi a i liba sô, te i kë ganjan di Akaa u Masa Gadu?”

⁴ Andi mbei i du sô? I seei bi abi di goon, nõö di i sei ën kaa, nõö i bi sa hoi hii di möni. Ma nõö hën i tjubi hafu fëën buta dë, hën i tei di fika tja ko da u taa, tuu fëën di dë. Wë na ku libisëmbë i du di hogi e, ma ku Masa Gadu i du ën.”

⁵ Nõö di Ananiasi jei di fan wante, nõö hën a tombi kai a goon dëdë pii, böö fëën koti.

Nõö fa di soni pasa dë, dee oto sëmbë jei nõö hati u de latja seei.

⁶ Nõö hën wanlô kijoo mii hopo hën de ko dimboli di dëdë tefa de kaba, hën de tei ën tja go bei.

7 Hën de dë te baka dii juu langa sò, hën di mujëe u di womi ko dou. An bi sabi taa sò wan soni bi pasa ku ën manu.

8 Nöo di a ko dou, hën Petuisi hakisi ën taa: “Mujëe, haika. Fa di manu fi bi tja di möni u di goon ko aki, tuu fëen a tja nö?”

Hën a piki taa: “Aai, tuu fëen di dë e.”

9 Hën Petuisi toona taki dëen taa: “Faandi mbei i ku i manu tuu fiti buka makandi taa woon pooba di Akaa u Masa Gadu luku sò? Wë dee womi mii dee bi tja di manu fi go bei, haika futu u de a döobuka dë. Nöo de o tja i go bei tu e.”

10 Hën di a taki sò, di mujëe jei. Hën a kai gbolo a Petuisi fesi dë dëdë pii. Hën dee kijoo ko dou, hën de si ën dë dëdëdëdë. Hën de toona hopo ën tei tja go bei nëen manu bandja.

Sò wan gaan soni pasa di juu dë.

11 Nöo di dee biibima u Masa Jesosi ku dee oto sëmbë jei, nöo hën hii de tuu fëeë te na soni. De si taa libi u de musu dë tololoo a pasi seei.

Aki ta lei fa dee Tjabukama u Masa Jesosi ta kula sëmbë.

12 Di juu dë, dee Tjabukama u Masa Jesosi ta du hia soni, foondofoono wan kuma maaka sò, nöo sëmbë ta si taa Gadu dë ku de tuu. Nöo dee sëmbë dee ta biibi a Masa Jesosi ta ko a di kamian u di Keikiwosu de kai Salumon Baiko nöömö ta mökisi makandi.

13 Ma fa de ta ko dë, na de ku oto sëmbë e. Biga dee oto sëmbë dee an ta biibi a Masa Jesosi liba, de ta fëeë seei u de ko mökisi ku de, hii fa de ta gafa de nöömö taa bumbuu sëmbë de dë.

14 Nöo dee sëmbë u Masa Jesosi ta ko möön hia seei. Hiniwan juu oto sëmbë ta ko biibi, womi ku mujëe tuu, ta mökisi ku dee otowan bi biibi a fesi.

15 Nöo fa Gadu ta da dee Tjabukama kaakiti tjika dë, nöo sëmbë ta tja dee suwakima u de ta ko ta buta a bandja pasi. De ta tja de ta buta a kama liba a goon dë, so u de dë a bedi, nöo de dë ta luku Petuisi faa pasa dë, sonte di jeje fëen sa kai a de nöo de sa ko bunu.

16 Gaan hia sëmbë seei ta kumutu a dee köndëköndë a Jelusalen bandja dë ta tja dee suwakima u de ta ko, ku dee sëmbë dee dë ku soni a hedi ta sitaafu de ta kii. Nöo de tuu dee Tjabukama kula ko bunu.

Aki wan basia u Masa Gadu Köndë ko heepi dee Tjabukama.

17 Nöo fa dee Tjabukama u Masa Jesosi ta du dee foombo soni sò, nöo hën di Kaba Hei Begima u dee Isaëli sëmbë ku dee mati fëen u di Sadusei paatëi, de ko ta haun ku de te na soni.

18 Te wan daka, hën de go kisi de tja go söötö a dunguwosu.

19 Ma a di ndeti dë seei, hën wan basia u Masa Gadu Köndë ko jabi dee döo u di dunguwosu puu dee Tjabukama tja ko a döo.

20 Hën a taki da de taa: “Un go taanpu a di Wosu u Masa Gadu e, nöo un ta konda da lanti nöömö taa wan njunjun libi dë u feni a Masa Gadu. Un puu hii soni fëen da de be de sabi.”

21 Nöo hën dee Tjabukama piki. Biga di dobooko fëen, hën de toona go dë a di Wosu go ta lei lanti leti kumafa di basia bi taki da de.

Aki dee Isaëli hedima kai dee Tjabukama u Masa Jesosi a kuutu möön.

Di mamate dë seei, hën di Kaba Hei Begima ku dee mati fëen ko makandi u de kuutu di soni u dee Tjabukama u Masa Jesosi. Hën de kai hii dee hedima u dee Isaëli sëmbë ku hii dee oto kuutuma u Isaëli tuu taa be de ko a kuutu.

Hën di de ko, hën de manda buka da dee wakitima u di dunguwosu taa be de go tei dee Tjabukama tja ko da de.

22 Nöo hën dee wakitima go. Ma nöo di de go dou nöo pii, djee. Dee sëmbë an sai dë.

Hën de toona go a dee kuutuma go taa:

23 “Dee sëmbë aki, wë u dou e. Nöo gaan soni. Dee sëmbë dee un manda u fuu go tei, wa si de e. U go a di dunguwosu, u si dee döo tuu dë söötösöötö ku dee siköutu dë a dee döobuka ta hoi wakiti tuu u si. Ma nöo di u go dou hën u jabi di döo, wa si sëmbë. De an sai dë e. Wa sabi naasë de go.”

24 Nöo di di Kaba Hei Begima ku dee Gaan Begima ku di hedima u dee wakitima u di Wosu u Gadu jei sö, nöo a toobi de tumisi. De an saandi pasa.

25 Te wan pisi, hën wan sëmbë ko dou, a taa: “Un haika e, dee sëmbë. Dee womi un bi buta a dunguwosu, de dë leti a di Wosu u Gadu dë ta lei sëmbë e.”

26 Nöo di de jei sö, hën di hedima u dee wakitima kai dee otowan fëen, hën de kule go tei dee Tjabukama tja ko. Ma na ku taanga e, biga de fëëe taa a kandë dee lanti hatï o boonu ku de te de o naki de ku sitonu kii.

27 Nöo hën de tja dee Tjabukama ko, hën de ko taanpu a dee kuutuma fesi.

Hën di Kaba Hei Begima taki da de taa:

28 “Dee sëmbë aki, u bi bai unu kaa e, taa wan musu ta lei lanti dee soni u Jesosi möön. Jetiseei wan disa möönsö. Un ta lei sëmbë kodo, tefa hii sëmbë u Jelusalen tuu jei kaa. Nöo fa un ta du ën dë, un ta biinga kodo fu un buta a u hedi taa u kii ën.”

29 Hën Petuisi ku dee oto Tjabukama toona piki ën taa: “Aai, wë u jei, dee sëmbë. Ma Masa Gadu buka hën u musu piki möön gaanfa möön libisëmbë buka e.

30 Nöo unu wë bi kii Masa Jesosi tuu. Un pekëen a di lakpa pau, ma Masa Gadu seei, di dë di Gadu di dee gaan sëmbë fuu bi ta begi gaanduwe kaa, nöo hën toona weki ën baka.

31 Nöo hën a tjeën go buta te a di möön hei kamian nëen letimaun së a liba ala, be a ko dë di kaba Fesima u mundu. Nöo fa a ko dë Fesima dë, nöo a dë di Heepima tu, di sa puu u a hogilibi basu.

“Fa Masa Gadu sai dë, dee sëmbë, an kë hoi di hogilibi fuu Isaëli sëmbë a bëë möön e. A kë fuu tuu musu bia libi, be a sa puu dee hogi du fuu a u liba. Sö a kë heepi u tjika.

32 Nöo u abi fu konda di buka aki da lanti be de jei e. Biga u seei dë kotoigima u dee soni u Masa Jesosi u ta taki aki, u ku di Akaa u Gadu di a ta da dee sëmbë dee ta piki ën buka.”

33 Nöo hën di dee kuutuma jei fa dee Tjabukama fan, hën de kisi faja seei. Nöo hën de taa de o kii de puu a goonliba nöömö.

34 Ma nöo wan sëmbë bi dë a de dendu de kai Gamalijëi. A bi dë wan sëmbë u di keiki paatëi de kai Faliseima di ta lei sëmbë dee wëti dee Gadu bi da dee Isaëli sëmbë. Nöo hii sëmbë abi gaan lesipeki dëen. Nöo hën a hopo taanpu a di kuutu. Hën a manda sëmbë taa be de tja dee Tjabukama go a döo ufö. Hën de tja de go a döo.

35 Nöo hën Gamalijëi fan ku dee kuutuma taa: “Dee Isaëli sëmbë aki, un musu mëni unu seei e, ku andi woon du ku dee womi dë.

36 Wan saandi bi pasa ku di womi de kai Teodasi nö? Di soni pasa wan pisiten kaa taa a bi kë buta hënseei fesima u di köndë. Nöo hën fö höndö womi go nama ku ën. Hën de dë te wan pisi hën wanlö sëmbë kii ën puu dë, nöo hën hii dee sëmbë fëen paaja tuu. Nöo hën di soni u Teodasi kaba.

37 “Nöo baka fëen hën wan oto sëmbë de kai Judasi, di u Galilea pisiwata, ko hopo a di ten lanti bi ta konda sëmbë ta sikifi sëmbë në buta a buku. Nöo sömëni sëmbë nama ku ën tu, kumafa de bi nama ku di fosu sëmbë u taki dë. Ma söseei sëmbë kii ën tu, nöo hën dee bakama fëen paaja. Kaba u di oto di dë.

³⁸ “Nöö hën mbei mi kë taki da unu taa wan musu du soni ku dee sëmbë aki e. Un disa de be de go. Biga ee libisëmbë soni nöö de ta du, nöö a o kaba a sösö.

³⁹ Ma ee a Masa Gaangadu a kumutu, nöö wan o sa wini de. Te wan pisi un o ko si taa ku Gadu wë un ta du.” Sö Gamalijëi taki da dee kuutuma te a kaba.

Nöö di de jei fa a fan dë, hën de piki ku ën makandi.

⁴⁰ Nöö hën de toona kai dee Tjabukama u Masa Jesosi ko. Hën de buta sëmbë fon de ku wipi te de kaba. Hën de toona gandji da de möön taa de an musu ta kai Masa Jesosi në ta lei sëmbë soni fëen möön.

Nöö di de bai de te de kaba, hën de manda de go.

⁴¹ Nöö hën dee Tjabukama kumutu a di kuutu seei ku wai, fu di Masa Gadu bi si taa de bumbuu tjika u de tja sen fu Masa Jesosi në hedi.

⁴² Nöö hën de nango hiniwan daka a di Wosu u Masa Gadu kumafa de bi guwenti kaa, ku sëmbë wosu tuu, ta konda di Bunu Buka da lanti taa Jesosi hën da di Paamusi Könu di Masa Gadu bi o manda ko.

6

Aki de tei sëmbë u heepi

dee Tjabukama.

¹ Nöö hën dee biibima u Masa Jesosi sai dë e, nöö hiniwan daka de ta hia nango möönmöön. Di gaan së u de bi dë Dju sëmbë, ma de dë tu pei. Biga hafu u de ta fan Giiki töngö, hafu u de ta fan wan oto töngö de kai Alamaiki. Nöö de tuu bi abi pooti mujëë söndö manu a de dendu.

Hën de dë te wan daka, hën de tu pei sëmbë dë ko kisi toobi ku deseei. Dee Giiki töngö wan ta guunjan dee otowan taa de an ta da dee pooti mujëë u de soni u njan tjika kumafa de ta da dee u deseei mujëë.

² Nöö hën de tuwalufu Tjabukama ko jei. Hën de kai dee biibima u Masa Jesosi tuu ko makandi u de fan. Nöö hën de ko.

Hën de taki da de taa: “Un haika e, dee sëmbë fuu aki. U dee Tjabukama aki, wa musu disa di buka u Masa Gadu u konda fuu go ta seeka njanjan soni e.

³ Nöö u kë fuun suku sëbën sëmbë a unu dendu, fu de heepi u ku di soni dë. Dee lö sëmbë dë, de musu abi në a hii sëmbë taa de abi bunu fusutan, nöö de musu dë ku telu a di Akaa u Masa Gadu leiki. Dee lö pei sëmbë dë fuun tei buta e.

⁴ Nöö u seei sa dë ku telu a di fuu wooko ta begi Masa Gadu ta konda di Buka u Masa Jesosi da sëmbë.”

⁵ Nöö fa dee Tjabukama fan dë, nöö dee oto biibima piki ku de. Nöö hën de go suku sëmbë. Nöö dee sëmbë de pii tei, wan u de de kai Sitefani. A dë wan sëmbë ta abi taanga biibi a Masa Gaangadu, nöö a dë ku telu a di Akaa leiki. Söseei de tei Filipi, ku Pokolu, ku Nikanou, ku Timon, ku Paamenasi, ku Nikolasi. Nöö Nikolasi bi dë wan sëmbë u di köndë de kai Antiokia. An dë Isaëli sëmbë, ma a ko ta biibi Masa Jesosi kuma de.

⁶ Nöö sö de pii dee sëbën womi dë tei, hën de tja de ko da dee Tjabukama. Hën dee Tjabukama buta maun a de liba hën de begi Masa Gadu da de te de kaba, buta de a di wooko.

⁷ Nöö di juu dë, di wöutu u Gadu ta paaja seei möönmöön. Dee biibima a Jelusalen ta ko möön hia seei, nöö wanlö hia begima piki di Buka tu ko dë a de dendu.

Aki de mindi soni da Sitefani.

⁸ Nöo di sëmbë de kai Sitefani dë, a bi dë wan sëmbë Masa Gadu dë ku ën a wan apaiti fasi. Biga a ta dëen kaakiti seei, a ta du gaangaan soni, foombofoombo wan, sëmbë ta si.

⁹ Ma nöo te wan pisi, hën wanlö sëmbë hopo ta fia ku ën. Dee lö sëmbë dë, de dë u wan Dju keiki de kai "Fiima." Isaëli sëmbë de dë, ma fu wanlö oto köndë de kai Sileni ku Alekesania, nöo de bi kumutu a de köndë ko fika a Jelusalen dë. Nöo hën de ku wanlö oto Dju sëmbë u Silisia ku Asia tuwë gogo a wan së ta fia ku Sitefani.

¹⁰ Ma di Akaa u Masa Gadu da Sitefani köni tefa dee sëmbë an sa wini ën a di fia.

¹¹ Nöo hën dee sëmbë kumutu dë, hën de go suku sëmbë saapi u de ko mindi soni da Sitefani taa a bi kosi Mosesi, di gaan sëmbë u de, ku Masa Gadu tuu. De seei jesi jei ën. Sö de taki.

¹² Nöo hën de paaja di taki dë go a hii lanti te dou ku dee Gaan Womi ku dee Sabima u Wëti. Nöo di dee sëmbë jei sö, nöo hën hati u de boonu te na soni. Hën de kule go kisi Sitefani hai tja go a gaan kuutu.

¹³ Nöo hën de tja sëmbë ko fu de musu mindi soni dëen möön. Hën de ko taki taa: "Di sëmbë i si aki, a ta kosi di Gaan Keikiwosu u Masa Gadu kodo, tee dou ku dee wëti u Gadu tuu. An ta disa möönsö."

¹⁴ Biga a taa di womi de kai Jesosi u Nazalëti o ko booko di Keikiwosu fuu, nöo a o puu dee wëti fuu dee Gadu da Mosesi fuu musu libi ku de. Sö u seepi jei ën ku u seei jesi di a taki sö." Sö dee mindisonima taki a di kuutu.

¹⁵ Hën hii dee kuutama bia luku Sitefani diin. Hën de si taa fesi fëen djei wan basia u Masa Gadu Köndë. „Sö a limbo tjika.”

7

Aki Sitefani ta fan ku dee sëmbë.

¹ Hën di Kaba Hei Begima hakisi Sitefani taa: "Womi, fa dee sëmbë ta taki aki, nöo sö i bi taki tuu nö?"

² Hën Sitefani piki ën taa: "Dee sëmbë u mi aki, un piimisi fuunu e. Mi kë toona mëni unu a wanlö soni bi pasa ku dee gaan sëmbë fuu a fesiten.

"Masa Gadu, di Gadu fuu di hei tee libisëmbë wojo an sa kai ku ën, hënseei bi ko a di gaan sëmbë fuu de kai Abahamu, ka a bi ta dë a Mesopotamia köndë. Di juu dë, Abahamu an bi foloisi go a Halan eti.

³ Nöo di Masa Gadu ko nëen, hën a taki dëen taa: 'Womi, foloisi kumutu disa di köndë fii ku dee sëmbë fii aki, nöo i go a wan oto köndë ka mi o lei i fii go.'

⁴ "Nöo hën Abahamu kumutu a Kalidea naandë go a di köndë de kai Halan. Hën a ko sai dë teefa hën tata dëdë, a bei. Hën Masa Gadu puu ën dë manda go a di köndë ka i si u ta libi aki. „Ma nöo a di ten dë de bi ta kai di köndë Kaana.”

⁵ "Ma nöo fa Masa Gadu tja Abahamu ko a Kaana aki seei, ma an dëen di köndë fëen seei eti bifö a dëdë. Na wan kodo pisi fëen a dëen. Ma a bi paamusi ën taa a o dëen di köndë nöömö, nöo a o ko köndë fëen ku dee bakamii fëen dee a o pai. Wë nöo di juu di Masa Gadu paamusi Abahamu di soni dë, Abahamu an bi pai na wan kodo mii eti.

⁶ "A di fasi aki wë Gadu fan ku ën e. A kai ën taa: 'Mati.' A piki. A taa: 'Dee bakamii fii o go ta dë a wan oto köndë kuma wakama e. Nöo dee sëmbë u di köndë dë o buta de a sitaafu seei. De o ta du hogihogi ku de tee dou fö höndö jaa.

⁷ Ma bakaten mi o sitaafu dee sëmbë ta du hogihogi ku de awaa, nöo dee bakamii fii o kumutu a di köndë ka de bi ta sitaafu de. Nöo de o toona ko a di

së aki baka, fu de sa toona begi mi a di kamian aki möön.' Sö Gadu bi fan ku Abahamu.

⁸ "Nöö baka di a fan ku ën sö, hën a dëen wan wëti taa a musu koti wan maaka nëen sinkii faa dë taa hën ku hën a' buka. Nöö di maaka fika fu hiniwan womi müi di de o pai, de musu koti ën nëen sinkii. Hën mbei di a pai Isaki, baka aiti daka hën a koti di maaka nëen sinkii. Tefa bakaten, hën Isaki toona pai Jakopu hën a koti ën. Hën teefa Jakopu ko pai dee tuwalufu gaan sëmbë fuu, sö seei a toona koti de tu, fu di maaka musu fika nango nöömö a u Isaëli sëmbë sinkii."

⁹ Hën Sitefani toona taki möön, a taa: "Wë kumafa i sabi kaa, dee gaan sëmbë fuu bi ta haun ku di otowan u de de kai Josëfu, hën de sei ën da wanlö sëmbë. Hën dee sëmbë dee bai ën dë tjëen go a Egepiti köndë go buta a sitaafu. Tökusei Masa Gadu bi dë ku ën e.

¹⁰ A puu ën a hii dee fuka fëen tuu.

"Hën de dë te dou wan ten, hën di gaan könu fu Egepiti köndë de kai Falao manda kai Josëfu. Nöö di Josëfu go a di könu, nöö Masa Gadu bi dë ku ën eti ta dëen bumbuu fusutan ku köni seei. Nöö hën di könu si taa a dë bumbuu sëmbë, nöö hën a tei ën buta ko takima fëen könuwosu te dou ku hii Egepiti köndë tuu.

¹¹ "Nöö hën de dë tee wan gaan hangi ko. Hii dee sëmbë a Egepiti köndë ku dee dë a Kaana tuu ta tja fuka ta dëdë ku di hangi. Dee gaan sëmbë fuu seei an sa feni soni u njan.

¹² Nöö hën Josëfu tata Jakopu, hën a sai dë te nöö hën a jei taa wë di köndë de kai Egepiti hën abi soni u njan. Nöö hën a manda dee gaan sëmbë fuu, dee womi müi fëen, hën de go bai soni u njan. Nöö hën bi da di fosu pasi di Jakopu manda de go a Egepiti köndë.

¹³ "Nöö di de go di u tu pasi, hën Josëfu kai de ko nëen, hën a piki de awaa taa: 'Hën di baaa fuunu disii e. Mi wë disii, Josëfu.' Nöö di juu dë ufo Könu Falao ko sabi fa u Josëfu taa dee famii fëen dee di dë.

¹⁴ "Baka u di dë, hën Josëfu manda kai hën tata Jakopu taa hii di wosu dendu fëen ku ën seei tu musu ko a Egepiti köndë, nöö a o sölugu de. Nöö di juu dë, de bi dë sëbënteni-ku-feifi sëmbë.

¹⁵ "Nöö hën di Jakopu kisi di buka, nöö hën de tei pasi go te a Egepiti köndë. Hën de sai dë teee nöö hën Jakopu ku hii dee müi fëen tuu ko dëdë.

¹⁶ Nöö fa de bi ta dëdë dë, nöö dee müi u de ta tei de ta tja ko a di së aki a di köndë de kai Sikëm go bei. Di geebi Abahamu bi bai a dee bakamii u Hamolu, nëen de ta tja de go bei.

¹⁷ "Nöö da sö dee bakamii fu Jakopu fika dë a Egepiti köndë. De ta pai teee de ko gaan hia sëmbë. Nöö di ten dë, di juu ta zuntu fu Masa Gadu da de di köndë Kaana kumafa a bi paamusi Abahamu.

¹⁸ "Nöö di juu dë, hën wan oto könu ko dë ta tii Egepiti köndë. Nöö di könu dë aan bisi ku Josëfu biga an bi sabi ën.

¹⁹ Nöö hën a ganjan dee gaan sëmbë fuu ta du hogihogi ku de teee. A taa de musu tja dee nunjun pai müi u de go buta a döo be de dëdë kaba a sösö.

²⁰ "Nöö a di ten dë, de pai Mosesi. A bi dë wan apaiti müi, biga Gadu seei si taa a hanse. Nöö hën de ta kijjën tjubitjubi a wosu te a a' dii liba. Nöö di de si taa de an sa tjubi ën möön hën de tjëen go buta a wan kamian ka sëmbë sa si ën tei kiija.

²¹ Nöö hën di mujëe müi u Könu Falao ko si ën, hën a tei ën tja go kiija kuma hënseei müi.

²² Dee Egepiti sɛmbɛ ta lei ɛn hii dee kɔni dee de abi, ku hii dee sabi dee de abi tuu de lei ɛn. A ko dɛ wan hebi sɛmbɛ u di kɔndɛ seei. Biga a sa' u fan, nɔɔ a sa' u du soni tu.

²³ “Nɔɔ hɛn Mosesi sai dɛ te a abi fɔteni jaa, nɔɔ hɛn a taa a o go luku dee sɛmbɛ fɛɛn, dee Isaɛli sɛmbɛ, _dee ta libi a wan sɛ u di kɔndɛ_.”

²⁴ Nɔɔ di a go dou, hɛn a si wan u dee Egepiti sɛmbɛ ta du hogihogi ku wan u dee Isaɛli sɛmbɛ fɛɛn. Hɛn a naki di Egepiti sɛmbɛ kii pii, fu di a bi du hogihogi ku di fɛɛn sɛmbɛ.

²⁵ Fa a du dɛ, a bi ninga taa dee Isaɛli sɛmbɛ fɛɛn o sabi taa Masa Gadu hɛn ta wooko nɛɛn liba faa puu de a di sitaafu de sai dɛ. Ma de an si ɛn sɔ.

²⁶ “Di dobooko mɔɔn, hɛn a toona go si tu u dee Isaɛli sɛmbɛ ta feti ku deseɛi. Hɛn a paati de puu. A taa: ‘Womi, faandi mbei un ta libi sɔ? Biga un dɛ baaa ku baaa. Faandi mbei un ta du sɔ ku unu seei u du?’

²⁷ “Hɛn di sɛmbɛ di abi adjabɛ tuii Mosesi puu dɛ. A taa: ‘Ambɛ buta i fii musu dɛ hedima ta kuutu a u liba?’

²⁸ Kii i kɛ kii mi kumafa i bi kii di Egepiti sɛmbɛ jeside nɔ?”

²⁹ “Nɔɔ di Mosesi jei sɔ, hɛn a panta. A si taa di soni di a bi du, a ko a dɔɔ. Nɔɔ hɛn a kule kumutu dɛ fusi go tee a wan oto kɔndɛ de ta kai Midian. Hɛn a go sai dɛ te a tei mujɛɛ pai miii. A pai tu womi mi.

³⁰ “Nɔɔ hɛn a dɛ a Midian fɔteni jaa longi. Te wan daka hɛn a go a di sabana dendu, zuntu ku wan gaan hei kuun de kai Sinai. Nɔɔ hɛn a bia luku, hɛn a si wan faja ta kisi a wan uwii nɔɔmɔ, an ta tapa mɔɔnsɔ. Wan Sɛmbɛ u Masa Gadu Kɔndɛ wɛ ko a Mosesi a di faja dɛ e.

³¹ Nɔɔ di Mosesi si di faja ta kisi nɔɔmɔ, nɔɔ a bigi dɛɛn. Hɛn a waka go zuntu ku di uwii go luku ɛn bunu ee andi.

“Nɔɔ di a go dou, hɛn a jei Masa Gadu tɔngɔ fan ku ɛn a di faja dendu taa:

³² ‘Womi, mi wɛ disi e. Di Gadu di dee gaan sɛmbɛ fii ta begi, de Abahamu, Isaki, Jakopu, hɛn wɛ disi e.’ Nɔɔ di Mosesi jei di tɔngɔ sɔ kaa, nɔɔ hɛn a panta te a ta tɛɛmɛ tjatjatjatja, aan hati u toona luku di faja mɔɔn.

³³ “Hɛn Masa Gadu toona taki dɛɛn taa: ‘Puu di susu fii a i futu. Biga ka i taanpu dɛ, nɔɔ a dɛ wan apaiti kamian u mi, nɔɔ i musu a’ lesipeki dɛɛn.’

³⁴ “Hɛn a taki mɔɔn taa: ‘Haika e. Mi si fa de ta sitaafu dee sɛmbɛ u mi a Egepiti kɔndɛ ala. Mi ta jei djɛmɛ u de, nɔɔ hɛn mi ko awaa u ko puu de. Nɔɔ hɛn mi ko kai i taa i musu toona go a Egepiti kɔndɛ.’ ”

³⁵ Nɔɔ Sitefani ta fan nango eti. Hɛn a taa: “Wɛ di Mosesi dɛ, hɛn da di sɛmbɛ di dee Isaɛli sɛmbɛ an bi kɛ. De bi dɛɛn gaan buka taa ee ambɛ mandɛɛn faa ko takima ta kuutu a de liba. Ma nɔɔ awaa Masa Gadu seei toona mandɛɛn da de baka faa musu ko dɛ takima u de, faa puu de a di fuka di de sai dɛ. Di Sɛmbɛ di dɛ a di faja dendu ta fan ku ɛn, hɛn wɛ mandɛɛn sɔ.

³⁶ “Nɔɔ hɛn Mosesi hopo hɛn a go a Egepiti Kɔndɛ. Hɛn a go du pepei foombo soni ala, te a puu dee sɛmbɛ fɛɛn a di kɔndɛ tja de go pasa di ze de kai Bɛ Ze, tja go buta a di sabana dendu ala. Hɛn de go sai a di sabana te dou fɔteni jaa. Nɔɔ hii di ten dɛ, Masa Gadu dɛ ku Mosesi ta du sɔmɛni gaan foondo soni nɛɛn liba.

³⁷ “Wɛ nɔɔ di Mosesi u ta taki aki, nɛɛn liba wɛ Gadu wooko sɔ e, nɔɔ hɛnseei wɛ bi fan ku dee gaan sɛmbɛ fuu taa: ‘A bakaten Masa Gadu o manda wan Tjabukama da unu, kumafa a manda mi da unu aki. A o dɛ wan Isaɛli sɛmbɛ leti kuma unu seei.’

³⁸ “Wɛ nɔɔ sɔ Gadu bi abi futoou a Mosesi liba tjika e. Hɛn mbei a dɛɛn di taki faa musu tii dee gaan sɛmbɛ fuu a di sabana sɔ. Hɛn seei bi dɛ di sɛmbɛ di Masa Gadu bi fan ku ɛn a di sabana, di a bi dɛ a Sinai dɛ, nɔɔ hɛn a kisi fan

a Gadu faa musu toona da u ën. Nöo ee u tei dee soni a fan dë, nöo woo feni libi a de e.

³⁹“Ma nöo hii fu dati, dee gaan sëmbë fuu an bi kë piki Mosesi buka möönsö. De an bi kë di fan fëen. De kë toona go u de a Egepiti köndë baka.

⁴⁰Hën de ko taki dëen baaa Alon taa: ‘Womi, u kë begi i fii musu mbei wanlö gadu da u. Nöo dee lö gadu dë, de woo ta begi fu te u nango a kamian de musu tja u. Biga wa saandi pasa ku di womi de kai Mosesi dë, di bi tja u kumutu a Egepiti köndë ko aki.’

⁴¹“Nöo hën de mbei wan pindigadu kuma wan kau mii sö te de kaba. Hën de hoi wan gaan piizii da di soni deseei mbei ku deseei maun dë, ta tuwë soni dëen.

⁴²Nöo hën Masa Gadu disa de be de libi kumafa de kë. Hën de ko ta begi di sonu, di libawojo, dee teeja, dee soni dë tuu de ko ta begi.

‘Fa de du ën tjika dë, hën mbei Masa Gadu bi fan a dee fesiten tjabukama liba, a taa:

Dee sëmbë u Isaëli, un haika mi e.

Fa un bi ta kii dee mbeti fuunu
ta begi a di sabana te dou föteni jaa dë,
mi un bi ta kii de da nö?

⁴³Nönö, na mi un bi ta kii de da e.

Biga di wosu u di gadu de kai Mölökö,
hën un bi ta tja ta lontu ku unu.

Nöo di teeja u di gadu de kai Lomfa,
hën u bi ta hei.

De wë da dee soni un bi ta begi e.

Nöo hën mbei mi o disa unu,

be de tja unu go buta a sitaafu a di köndë de kai Babilon.

Sö Masa Gadu taki a dee tjabukama fëen.

⁴⁴“Wë fa dee gaan sëmbë fuu bi sai dë, nöo de bi dë ku di Wosu u Masa Gadu di de bi ta tja a di sabana. Te de ta si di Wosu nöo de ta sabi taa Gadu dë ku de. Di wosu dë, de mbei ën leti kumafa Masa Gadu bi lei Mosesi taa a sö wan fasi de musu mbei ën.

⁴⁵“Hën de dë te bakaten nöo hën Josua ko a Mosesi kamian ta tii dee Isaëli sëmbë. Hën tja de go feti ku dee köndëköndë. Nöo fa de ta feti dë, nöo de ta tja di Wosu ta lontu ku de. Nöo hën de ta feti tefa Gadu puu dee peipei sëmbë bi dë a di köndë da de, fu de sa go libi a di köndë u de. Hën di Wosu fika ku de dë tefa de ko pai Könu Dafiti.

⁴⁶Nöo hën Könu Dafiti libi a wan fasi tee Masa Gadu seei tei ën fu wan bambuu sëmbë.

“Nöo hën de dë te wan pisi, hën Könu Dafiti taki da Masa Gadu taa a kë mbei wan wosu dëen. Fa a bi dë di Gadu u Jakopu ta tja dee Isaëli sëmbë fëen te kisi di ten fëen Könu Dafiti seei dë, nöo a kë mbei wan wosu dëen faa ta libi.

⁴⁷Ma fa Könu Dafiti taki dë seei, ma nëen seei mbei di wosu e. Di mi fëen de kai Salumon, hën mbei di wosu.

⁴⁸⁻⁴⁹“Ma nöo hii fa u ta taki aki, dee sëmbë, ma Masa Gadu hei poi fu libi a wan wosu di libisëmbë mbei e. Wan fesiten tjabukama bi taki ën kaa. A taa: Masa Gadu taki e, taa:

‘A gaangadu a liba aki di könubangi u mi dë
di mi ta sindo.

Nöo goonliba da mi piki bangi

di mi ta buta futu te mi sindo.

Nöo un wosu seei i sa mbei da mi

fu mi feni kamian u mi böö sinkii?

⁵⁰ Biga mi mbei hii dee soni tuu kaa.'

Sö di tjabukama bi sikifi u Masa Gadu."

⁵¹ Nöo hën Sitefani fan taanga ku dee sëmbë awaa, a taa: "Dee sëmbë aki, unfa un mbei? Misikuma jesi fuunu taanga kuma sitonu. Hati fuunu dë leti kuma dee sëmbë dë a goonliba aki dee an sabi soni u Masa Gadu. Biga te di Akaa u Gadu kë lei unu soni, nöo wan ta kë piki möönsö, leti kumafa i si dee gaan sëmbë fuunu an bi ta kë piki ën. Sö nöo un dë eti.

⁵² "Dee gaan sëmbë fuunu bi ta sitaafu hii dee fesiten tjabukama u Masa Gadu tuu. Na wan u de fika. Hii dee sëmbë Gadu bi manda da de tuu de kii, te dou ku dee sëmbë dee bi ta konda taa sö wan Futuboi fëen o ko. Nöo di Futuboi fëen dë, Masa Gadu an feni föutu nëen wan daka. Nöo tefa di juu dou hën a mandëen ko tuu. Nöo di a ko, hën un könku ën kii.

⁵³ Un dee Isaëli sëmbë aki, unu wë Masa Gadu bi manda dee basia fëen köndë da fu de tja dee wëti fëen ko da unu, ma wan ta hoi dee wëti möönsö. Biga un kii sö wan bumbuu sëmbë."

Aki de naki Sitefani kii.

⁵⁴ Nöo di a taki sö, nöo hati u dee sëmbë boonu te de an sa tjëen möön.

⁵⁵ Ma nöo di juu dë, hën di Akaa u Gadu ko taanga a Sitefani liba. Hën a hopo wojo luku liba. Hën a si di waiti u Masa Gadu kuma sonuwojo. Hën a si Masa Jesosi dë a di letimaun së u Masa Gadu taanputaanpu.

⁵⁶ Hën di a si sö, nöo hën a bai taa: "Wë un luku, mi si Masa Gadu Köndë jabijabi ala, nöo mi si di Sëmbë di ko Libisëmbë Mii leti a Masa Gadu letimaun së taanputaanpu."

⁵⁷ Nöo di de jei sö kaa, hën de tei de maun hën de tapa de jesi fu de an musu jei andi a ta taki. Hën de tuu bai kai wan gaan olo. Nöo hën de kule ku baai go a Sitefani,

⁵⁸ nöo hën de kisi ën panjan. Hën de hai ën gulululu tja go tuwë a wan së u di köndë. Hën de kisi sitonu mii ta naki ën u de kii ën.

Nöo fa de go a di du dë, hën de puu koosu a sinkii disa da wan kijoo de kai Saulosu faa hoi da de.

⁵⁹ Nöo hën de ta naki Sitefani te wan pisi, hën a bai taa: "Masa Jesosi, gaantangi, tei di akaa u mi hoi e."

⁶⁰ Nöo hën a kai ku kini a goon begi taa: "Masa, fa dee sëmbë ta du ku mi aki, nöo na hoi de a bëë e." Hën di a fan sö te a kaba, hën a dëdë. Böö fëen koti.

8

Nöo Saulosu sai leti dë ta luku fa de ta kii Sitefani, nöo a bunu dëen. A kai ku ën seei.

Aki de sitaafu dee biibima te de paaja go a oto köndë.

¹ Di daka dë seei, hën dee sëmbë u di köndë ko ta buta ku dee biibima u Masa Jesosi a Jelusalen dë te a bigi, tee de kule paaja go a kamiankamian. So u de go a dee oto köndë u Judea, so u de go a Samalia. Dee Gaan Tjabukama u Masa Jesosi nöo fika a Jelusalen dë.

² Nöo wanlö sëmbë sai dë dee lobi Masa Gadu, nöo hën de go tei di dëdë sinkii u Sitefani. Hën de këë dëen te a bigi, biga a hati de. Hën de tjëen go bei.

³ Ma Saulosu kë kaba dee biibima u Masa Jesosi seei gbelin puu dë. Hën a nango ta denda a dee wosuwoosu u de ta pii de ta tja go söötö a dunguwosu, womi ku mujëe tuu.

Aki Filipi go a Samalia Köndë.

⁴Nöö fa dee biibima ta kumutu a Jelusalen ta kule ta paaja dë, nöö de ta tja di buka u Masa Jesosi ta paaja tu a dee köndëköndë nöömö be sëmbë jei.

⁵Di juu dë, hën Filipi di bi dë wan u dee sëbën womi de bi pii tei dë, hën a go a Samalia Köndë. Hën a ta konda di buka da sëmbë taa Masa Jesosi hën da di Keesitu, di Heepima di Gadu bi paamusi taa a o manda da libisëmbë.

⁶Nöö fa a ta fan ku dee sëmbë dë, nöö de tuu ta haikëën, biga a ta du gaan foombofoombo soni.

⁷Dee gadu dee ta dë a sëmbë liba ta bai ta kai olo ta kumutu, nöö a ta kula sëmëni lan sëmbë ko bunu tu.

⁸Nöö dee soni Filipi ta du dë tuu ta mbei de ta wai a di köndë te na soni.

Aki ta taki u wan tofuma

de kai Simon.

⁹Nöö wan sëmbë bi dë a di köndë dë de kai Simon. A bi sai dë longi kaa ta du wanlö tofu soni fëen a di köndë tee a ta foondo hii dee Samalia sëmbë tuu. Nöö a ta njan buka ta mbei ën seei bigima.

¹⁰Nöö fa a ta du dë, nöö hii dee sëmbë u di köndë, sösö sinkii sëmbë ku nëbai sëmbë tuu, tei ën u soni. De ta tei ën fu wan gadu seei taa: “Di sëmbë aki hën de kai Taanga Gadu, Poosian Gadu.”

¹¹Wë biga a ta foombo de nöömö ku dee tofutofu soni fëen.

¹²Nöö hën Filipi ko a di köndë ko ta konda di Bunu Buka ta taki taa Gadu tja wan Njunjun Tii ko da de. A ta konda taa Masa Gadu manda Jesosi Keesitu da libisëmbë faa heepi de. Nöö hën de ta piki di buka seei nango ta dopu, womi ku mujë tuu.

¹³Nöö Simon di tofuma seei piki di buka tu, hën a go dopu te a kaba. Nöö hën a fika ta waka ku Filipi hii ka a nango. Hii dee foombofoombo soni Filipi ta du tuu a ta si, nöö de bigi dëen.

¹⁴Nöö hën wë dee Gaan Tjabukama u Masa Jesosi dë a Jelusalen ala ko jei taa sö dee sëmbë u Samalia Köndë ko ta piki di buka u Masa Gadu. Nöö hën de manda Petuisi ku Johanisi go haika.

¹⁵Nöö di de go dou, hën de begi Masa Gadu faa musu manda di Akaa fëen da dee njunjun biibima dë.

¹⁶Biga fa de biibi Masa Jesosi naandë, nöö de dopu a di në u Masa Jesosi ma di Akaa an ko a de eti.

¹⁷Nöö hën Petuisi ku Johanisi buta maun a de, hën di Akaa u Masa Gadu ko a de awaa.

¹⁸Nöö fa u du dë, Simon sai leti dë ta luku. A si taa te dee Tjabukama buta maun a sëmbë, nöö di Akaa ta ko a de. Hën a go tei möni tja ko faa paka Petuisi ku Johanisi.

¹⁹A taa: “Dee sëmbë aki, mi begi unu fuun da mi di poosian di un abi dë, fu te mi buta maun a sëmbë di Akaa sa ko a de tu.”

Hën Petuisi gandji dëen te na soni. A taa:

²⁰“Waka pasa kumutu aki ku di möni fii dë! I ku di möni fii tuu musu kaba a sösö, i takuhatima ju! I ninga taa möni i sa tei paka Gadu faa da i wan soni fëen di a ta da ku ën bunuhati ö?”

²¹Ja o feni ën möönsö, biga di hati fii di i abi an bunu da Masa Gadu.

²²I musu disa di hogilibi fii, nöö i begi ën fu an hoi di pakisei fii dë a bëë möön.

²³Biga misikuma di hati fii dë fuufuu pöö ku haun. Di hogilibi fii kaba i a sösö.”

24 Fa a fan dē, hèn Simon panta. Hèn a begi de taa: “Dee sēmbē, gaantangi mi begi unu, un begi Masa Gadu da mi o, be dee soni un taki dē an musu pasa ku mi.”

25 Nōō hèn Petuisi ku Johanisi fika a Samalia dē wan pisiten eti ta konda di Buka u Masa Jesosi ku dee soni de sabi fēen da sēmbē. Nōō hèn de toona go a Jelusalen. Nōō di de nango, de ta latja dee peipei köndē u Samalia ta konda di Bunu Buka u Masa Gaangadu nango tefa de go dou a Jelusalen baka.

Aki Filipi ku wan Etiopia

sēmbē miti.

26 Nōō hèn Filipi sai dē te wan pisi, nōō hèn wan basia u Masa Gadu Köndē ko nēen ko taki dēen taa: “Womi, hopo seeka. Gadu manda i fii go a di sē u libasē, a di sabana pasi di kumutu a Jelusalen go a Gaza.”

27 Nōō di Filipi jei sō, hèn a hopo seeka wante hèn a go. Nōō fa a nango dē, hèn a go si wan sēmbē u di köndē u Afikan de kai Etiopia ta pasa dē. Di sēmbē dē, a dē wan hei sēmbē nēen köndē ta seeka hii di mōni u di mujēē kōnu u de de kai Kandasi. Nōō di womi dē bi go a Jelusalen go begi Masa Gadu te a kaba,

28 nōō awaa a ta toona nango nēen köndē. A dē nēen wagi sindosindo ta lesi wan buku nango. Nōō di buku di a ta lesi dē, nōō a dē wan pisi u Gadu Buku di di fesiten tjabukama u Gadu de kai Jesaaja bi sikifi.

29 Nōō hèn Filipi go si en dē, hèn di Akaa u Gadu taki dēen taa: “Womi, go waka a di wagi bandja e.”

30 Nōō hèn Filipi kule go a di wagi bandja. Hèn a jei di sēmbē ta lesi di soni di di tjabukama bi sikifi.

Hèn a hakisi en taa: “Mati o, dee soni i ta lesi dē, i ta fusutan de nō?”

31 Hèn a taa: “Wē nōnō mati, unfa mi sa du fusutan de? Biga ma a’ sēmbē u puu de da mi.” Hèn a taa: “Ja sa ko sindo ku mi a di wagi dendu aki nō?” Nōō hèn Filipi subi go sindo.

32 Nōō hèn di womi ta lesi nango, nōō di pisi u Gadu Buku a ta lesi dē, a dē wan soni kuma nōngō sō taa:

Di sēmbē dē,

a dē kuma wan sikafu de ta tja go kii.

A dē pii seei kuma wan sikafu mii

de ta limba puuma fēen puu nēen sinkii.

An ta bai mōönsō.

33 Fa de ta sösō en ta mbei en fa dē,

nōō de an ta da pasi u na wan sēmbē heepi en mōönsō.

Ambē sa taki soni u dee bakamii fēen?

Biga de kii en puu a goonliba aki.

Sō wan soni di womi ta lesi.

34 Nōō di a lesi te a kaba, hèn a hakisi Filipi taa: “Wē mati, ambē de ta taki a di pampia aki? Di sēmbē di bi mbei di pampia, naa oto sēmbē?”

35 Nōō di a hakisi en sō kaa, nōō hèn Filipi tei di Buku hèn a seti ku di pisi di womi bi lesi dē, hèn a konda di Bunu Buka u Masa Jesosi dēen. A taa: “Di sēmbē de ta taki a di pampia aki, hèn da Masa Jesosi e.” Hèn a puu en dēen te a kaba.

36 Nōō hèn de nango te wan pisi, de ko dou a wan wata. Hèn di sēmbē taki da Filipi taa: “Mati, wē wata dē aki. Na u mi dopu wante nō?”

37 Hèn Filipi piki en taa: “Ee i ta biibi di buka u Masa Jesosi ku wan hati, nōō i sa dopu.”

Hën a piki taa: “Aai, mi ta biibi taa Jesosi Keesitu hën da di Womi Mii u Masa Gadu.”]

³⁸ Hën a manda di sëmbë ta tja di hasi taa be a tapa di wagi. Nöö hën de kumutu. Nöö hën ku Filipi, hën de go a di wata hën Filipi dopu ën te a kaba.

³⁹ Nöö di de kumutu a di wata, hën wante di Akaa u Masa Gadu tei Filipi tja go, di Etiopia sëmbë an si ën möön. Ma aan toobi, a go fëen nëen köndë ku wai.

⁴⁰ Nöö di Filipi kisi ën seei baka, hën a si taa a dë a wan köndë de kai Azotusi. Nöö hën a ta lontu a dee pepei köndë nango ta konda di Bunu Buka u Masa Jesosi tefa a go dou a di köndë de kai Sesalia.

9

Aki ta lei fa Saulosu bia hën libi.

Tjab. 22:6-16; 26:12-18

¹ Di juu dë, di sëmbë de kai Saulosu bi ta dë ku di libi fëen ta toobi dee biibima u Masa Jesosi nöömö. A ta waka ta konda taa a o du ku de te kaba fëen seei a o kii de tuu nöömö puu a goonliba. Nöö hën a go a di Kaba Hei Begima u Isaëli,

² hën a go hakisi ën pampia faa sa ta tja go a dee Dju keikiwosu u di köndë de kai Damasikusi. Nöö di pampia o dëen pasi faa sa kisi dee biibima u Masa Jesosi tja go a Jelusalen go soötö, womi ku mujëe tuu. Sö wan pampia a hakisi di Gaan Begima. Nöö hën a dëen di pampia, nöö hën a go.

³ Hën a nango tefa a go zuntu ku Damasikusi. Nöö tefa a kë mëni hën wan faja kumutu a liba ala valau tuwë limbo lontu ën ko kai.

⁴ Hën a pasa kai a goon.

Hën a jei wan tóngö kai ën tu pasi taa: “Saulosu! Womi Saulosu!”

Hën a piki.

Hën a taa: “Andi mbei i ta sitaafu mi sö u du?”

⁵ Hën a hakisi taa: “Ee Masa o, ambë ta fan ku mi di fan aki?”

Hën a piki ën taa: “Mi, Jesosi wë, di Sëmbë di i si i ta sitaafu sö, mi ta fan ku i aki e.

⁶ Nöö hopo go a di köndë a i fesi ala, nöö te i go, nöö de o konda da i andi ku andi fii musu du.”

⁷ Di juu dë, dee sëmbë ku Saulosu bi nango dë nöö de dë pii. De an saandi ta pasa. Biga de ta jei wan tóngö ma de an ta si sëmbë.

⁸ Nöö hën Saulosu hopo, hën a jabi wojo te a wei, an sa si soni möön. Wojo fëen dungu pii. Hën de panjëen a maun tja go dou a Damasikusi.

⁹ Hën a go sai dë. A abi dii daka an sa si soni, an ta njan, an ta bebe wata. A de fëen nöö.

Aki Gadu manda Ananiasi

faa go a Saulosu.

¹⁰ Nöö di ten dë, wan womi bi dë a Damasikusi de kai Ananiasi. A dë wan biibima u Masa Jesosi. Nöö hën a dë nëen wosu, te wan pisi hën a sunjan wan sunjan, ma ku wojo limbo. Masa Jesosi ko fan ku ën. A kai ën taa: “Ananiasi!” A piki.

¹¹ A taa: “Womi, hopo seeka, nöö i go a di sitaati de kai Tololoo Sitaati. Nöö i go a di wosu u di sëmbë de kai Judasi,

¹² go hakisi fa u di sëmbë de kai Saulosu u di köndë de kai Taasusi. A sai leti a di wosu dë ta begi Masa Gadu. Nöö a sunjan wan sunjan ku wojo limbo taa a si wan womi de kai Ananiasi ko nëen ko nama maun nëen mindihedi, hën

di wojo fëen toona ko bunu kumafa a bi dë. Sö a bi si a di wojo limbo sunjan fëen kaa.”

¹³ Hën Ananiasi piki ën taa: “Wë Masa, mi jei. Ma nöö mi jei hia soni fu di sëmbë dë di a ta du. Sëmbë konda da mi taa a ta du hogihogi tumisi ku dee sëmbë fii dee ta dë a Jelusalen.

¹⁴ Nöö fa a ko a Damasikusi aki, nöö a ko faa ko du ku u tu. Biga mi jei taa dee Gaan Begima seei dëen di taki faa ko aki ko kisi u dee sëmbë dee ta kai i në tja go söötö a dunguwosu.”

¹⁵ Hën Masa Jesosi piki ën taa: “Antoobi, go nëen nöö. Biga mi tei ën kaa faa dë wan wookoma u mi. A o tja di buka u mi go konda da dee Isaëli sëmbë ku dee sëmbë na u Isaëli tuu, te dou ku dee kënu u de seei.

¹⁶ Nöö fa mi o mandëen go a de dë, nöö miseei o taki dëen a fesi fa de o sitaafu ën tjika fu di a ta konda soni u mi hedii.”

¹⁷ Nöö hën di Ananiasi jei sö kaa, nöö hën a hopo, hën a go a di wosu. Hën a denda go nama maun a Saulosu hedii.

Hën a kai ën taa: “Matii Saulosu, mi baaa.”

A piki.

A taa: “Womi, Masa Jesosi seepi, di Sëmbë di bi ko a i a pasi ala di i bi ta ko aki, hën wë manda mi ko a i aki fu di wojo fii sa ko bunu baka. A manda mi tu, be di Akaa u Masa Gadu ko a i liba.”

¹⁸ Hën di a fan sö te a kaba, nöö hën wante wan soni kumutu a Saulosu wojo kuma fisi kakisa sö. Hën wojo fëen ko limbo gbegede, hën a hopo go dopu wante.

¹⁹ Hën a go njan te a kaba, hën sinkii fëen ko taanga baka.

Aki Saulosu dë a Damasikusi.

Nöö fa Saulosu ko ta biibi Masa Jesosi dë, hën a fika a Damasikusi sëmëni daka ku dee biibima u Masa Jesosi ala.

²⁰ Nöö wantewante dë, hën a bia ta fan a dee keikiwosu u dee Isaëli sëmbë u di köndë, ta konda taa Jesosi da di Womi Mii u Masa Gaangadu tuu.

²¹ Nöö fa a ta fan dë, nöö a foondo hii mundu. De taa: “Maingë, wa ta fusutan di libi u di sëmbë aki. Nëen da di sëmbë di bi dë a Jelusalen ta sitaafu dee biibima u Masa Jesosi ta kii nö? Nöö fa a ko aki, na ku pampia a ko faa kisi de tei tja go da dee Gaan Begima u de sitaafu de nö? Soni fëen ta toobi u.”

²² Ma nöö di fan u Saulosu an saka möönsö. A fika ta fan ku dee Dju sëmbë u Damasikusi nöömö, ta buta ku de u de piki taa Jesosi hën da di Keesitu di Masa Gadu bi paamusi taa a o manda ko. Nöö di fan fëen ta a’ kaakiti möönmöön, biga a ta wini dee sëmbë nöömö dee ta fia ku ën dë.

²³ Nöö hën de dë te bakaten, dee Dju sëmbë an ko a’ peesa ku ën möön. Hën de ko kuutu fa fu de sa du de feni ën kii.

²⁴ Nöö hën de ko dë a dee nëngë döö u di köndë ta watji ndeti ku didia fu te a o ko pasa dë, nöö de feni ën kii.

Te wan pisi, hën Saulosu ko jei taa sö de ta watji ën.

²⁵ Hën a dë te wan ndeti. Hën dee sëmbë dee nama ku ën, hën de tei ën tja go a di sitonu peni di de tapa di köndë, ka wan baaku bi dë. Hën de butëen a wan manda sakëen go a goon.

Aki Saulosu dë a Jelusalen.

²⁶ Hën Saulosu fusi kule kumutu dë, hën a toona go a Jelusalen. Nöö di a go dou, hën a kë go nama ku dee oto biibima u Masa Jesosi, ma de fëëë ën poi. Hii fa a ta taki da de nöömö taa hënseei da wan bakama u Masa Jesosi kuma de, ma de an kë piki. De ninga taa a ta ganjan de faa du hogihogi ku de möön.

27 Nöo hën di sëmbë de kai Banabasi heepi ën. Biga a tjëen go da dee Gaan Tjabukama taki da de taa: “Un piki di sëmbë aki e, dee sëmbë. Biga a bi si Masa Jesosi tuu di a bi dë a pasi nango a Damasikusi. Masa seei wë fan ku ën. Nöo fa a bi dë a Damasikusi dë, a bi ta konda dee soni u Masa Jesosi seei da hii mundu. An ta fëëë de u konda.”

28 Nöo di Banabasi fan sô, hën de biibi ën awaa. Hën Saulosu fika ku de a Jelusalen wan hii pisiten ta waka ta lontu hii di köndë söndö fëëë, ta konda dee soni u Masa Jesosi da sëmbë.

29 Ma nöo so u dee sëmbë a bi ta fan ku de dë bi dë Dju sëmbë ma de ta fan Giiki töngö. Nöo Saulosu bi ta fan ku de ta biinga ku de u de piki di buka u Masa Jesosi. Ma de an kë di fan fëen. Te wan pisi hën de ko ta suku ën u kii.

30 Nöo di dee biibima u Masa Jesosi ko jei sô, hën de tei ën tja go a di köndë de kai Sesalia, di dë a di ze bandja. Hën de butëen a boto manda go a di köndë de kai Taasusi, ka a bi kiija.

Aki Petuisi du tu foombo soni.

31 Nöo baka u di dë, nöo hën dee biibima u Masa Jesosi u Judea naandë ku Galilea tuu te kisi Samalia, de feni böö a di mindi dë. Di juu dë, di keiki u Masa Jesosi ko abi kaakiti seei. Biga di Akaa u Gadu dë ku de ta da de degihati, nöo sômëni oto sëmbë ta ko ta nama ku de nöömö. Nöo fa de sai dë, de ta libi a pasi seei ta lesipeki Masa Gadu.

32 Nöo hën Petuisi ta waka ta haika dee sëmbë u Masa Jesosi dee dë a dee peipei köndë, tefa a go dou a wan köndë de kai Lida.

33 Hën a go si wan lan womi de kai Eneasi. A dë suwakisuwaki na amaka aiti jaa longi kaa.

34 Hën Petuisi ko kai ën taa: “Mati Eneasi.”

Hën a piki.

A taa: “Womi, Jesosi Keesitu kula i kaa e. Nöo i hopo seeka di kama fii.”

Hën di womi hopo wante.

35 Nöo fa di soni pasa dë, hën hii dee sëmbë u Lida ku dee sëmbë ta dë a di köndë de kai Salon tuu ko si fa di womi ko bunu naandë, nöo hën de tuu bendi ko a di së u Masa Jesosi.

36 Nöo a wan oto köndë de kai Jopa, wan mujëë bi dë de kai Tabita, Giiki töngö kai ën Doluka. Hën da “mbata”. Nöo di mujëë dë wan bumbuu sëmbë, wan biibima u Masa Jesosi. Hiniwan juu a ta puu sëmbë a fuka ta heepi dee pootima.

37 Ma nöo hën a ko suwaki tefa a dëdë. Hën de wasi ën te de kaba, hën de tjëen go buta a wan kamba a liba.

38 Wë nöo di köndë de kai Jopa dë, a bi dë zuntu ku Lida ka Petuisi dë. Nöo di dee biibima a Jopa jei taa sô Petuisi dë a Lida, hën de puu tu womi manda go kai ën taa be a hesi ko a de.

39 Nöo hën Petuisi hopo hën a go a di köndë. Nöo di a go dou, hën de tjëen go a di kamba a liba ka di dëdë dë. Di juu dë, hii dee pooti mujëë u di köndë man u de dëdë, de tuu dë ala ta këë. Hën de tei dee peipei koosu tja ko lei Petuisi taa: “Luku dee soni aki di di mujëë mbei da u, di a bi dë ku u eti. Bumbuu sëmbë a bi dë e.”

40 Nöo hën Petuisi taki da de taa be de kumutu a di kamba ufö. Hën de go. Hën a tjökö kini a goon begi Masa Gadu te a kaba. Hën a bia luku di dëdë. Hën a kai ën taa: “Tabita, hopo.”

Hën di mujëë jabi wojo gbolo. Hën di a si Petuisi, nöo hën a hopo sindo.

⁴¹ Nöo hën Petuisi tëndë maun panjëen hën a hopo ën taanpu a pë. Nöo hën a kai dee mujëë ku dee oto bakama u Masa Jesosi taa be de toona ko. Hën de ko. Hën a tei di mujëë hën a da de. Biga a toona ko libi baka.

⁴² Nöo fa di gaan soni pasa dë, hii sëmbë u di köndë jei, nöo hën wanlö hia sëmbë bendi ko a di së u Masa Jesosi.

⁴³ Hën Petuisi fika a Jopa dë wan pisiten ta libi a di wosu u Simon, wan sëmbë ta dëë mbeti kakisa ta sei.

10

Aki Gadu ko fan ku Konelisi.

¹ Di juu dë, i bi abi wan womi de ta kai Konelisi ta libi a di köndë de kai Sesalia. Nöo a dë di hedima u wan kulupu u dee Loomë köndë sodati de ta kai Italia Lö.

² Nöo di womi dë, a ta biibi Masa Gadu ta lesipeki ën, hën ku hii ën wosu dendu tuu. Hii fa an dë Isaëli sëmbë seei, ma a ta dini Masa Gaangadu ta begi ën hiniwanten. Nöo a ta libi bunu ku sëmbë ta puu dee penama a fuka. Sö wan sëmbë a bi dë e.

³ Nöo hën a dë te wan daka a wan didia kuma dii juu ten sö, hën Gadu lei ën wan soni a wan wojo limbo sunjan. A si wan basia u Masa Gadu Köndë ko nëen ko kai ën taa: “Womi Konelisi!”

⁴ Hën Konelisi ta luku di basia diin. A fëëë poi. Hën a piki ën taa: “Abii, Masa.”

Hën di basia taki dëen taa: “Womi, di fa i ta begi Masa Gadu ku di fa i ta heepi dee penama ta puu de a fuka, nöo Gadu si ën e. Nöo a ko piki i awaa.

⁵ “Nöo haika e. Wan sëmbë de kai Simon Petuisi dë a Jopa ala.

⁶ A ta libi a di wosu u wan womi de kai Simon, wan sëmbë ta dëë mbeti kakisa ta sei. Wosu fëën dë a ze bandja. Nöo i musu manda sëmbë go tei di womi dë tja ko da i.”

⁷ Sö di basia fan ku ën te a kaba, nöo hën a go.

Nöo hën Konelisi kai tu futuboi fëën ku wan futoou sodati. Nöo di sodati ta biibi Masa Gadu ta lesipeki ën tu.

⁸ Hën a konda da de dii sëmbë dë taa sö wan soni a si. Hën a manda de taa be de go a Jopa go tei Petuisi tja ko dëen.

Aki Gadu lei Petuisi wan

foondo soni.

⁹ Nöo hën dee sëmbë tei pasi hën de nango a Jopa.

Di ten dë, Petuisi dë a di sëmbë wosu a Jopa dë. Hën a dë tefa sonuati hën a subi go a di wosu liba u go begi Gadu. „Biga dee wosu u di köndë mbei paatapaata fii sa go sindo a de liba.”

¹⁰ Hën a dë te nöo hangi ko kisi ën, a ta luku u de seeka soni u njan dëen. Hën Gadu lei ën wan soni a wan wojo limbo sunjan.

¹¹ Biga a si kuma mundu jabi hoo, hën a si wan soni kumutu a liba ala ta ko kuma wan gaan koosu sö. De ta hoi ën a dee fö së buka fëën tuu ta sakëen ta ko a goonliba.

¹² Nöo di Petuisi luku a di gaan koosu dendu, hën a si hii pei mbeti, hii pei fou, ku dee soni ta hai ku bëë a goon, de tuu dë a di gaan koosu dë dendu.

¹³ Hën Petuisi jei wan töngö taki dëen taa: “Womi Petuisi, hopo. Kii dee soni aki nöo i njan.”

¹⁴ Hën a taa: “Wë nöno, Masa, ma sa njan dee lö soni dë e, kwetikweti. U a tjina u de. Ma njan de wan daka.”

15 Hën a toona taki dëen taa: “Nönö womi. Te Masa Gadu taa wan soni bunu u njan, nöö ja musu fia taa i a’ tjina fëen.”

16 Sö wan soni Petuisi si, nöö hën a si ën dii pasa baka na baka ufö di gaan koosu hai go a liba baka ka a bi kumutu.

17 Nöö hën Petuisi sai dë ta pakisei taa: “Maingë, andi di lö soni dë kë taki?”

Aki Petuisi go a Konelisi.

Nöö di juu dë dee sëmbë u Konelisi ko dou a di wosu. De bi ta lontu ta suku ën tefa de ko si ën. Nöö hën de sai dë taanputaanpu a di djai buka.

18 Hën de kai sëmbë te de piki. Hën de hakisi de taa: “Di sëmbë de kai Simon Petuisi, aki a ta dë nö?”

Hën de piki taki: “Aai, a dë aki.”

19 Wë nöö di juu dë, Petuisi dë a wosu liba ala eti ta pakisei di soni di a bi si dë. Hën di Akaa u Masa Gadu taki dëen taa: “Womi, haika. Dii womi dë leti a basu ala ta suku i.

20 Nöö hopo saka go a goon. Nöö te de kai i fii go ku de, an dë fii buuja. Go ku de nöö, biga miseei manda de fu de ko kai i.”

21 Hën Petuisi hopo, hën a saka go a goon. Hën a go piki de taa: “Dee sëmbë o, di sëmbë un ta suku nöö hën disi e. Andi un bi kë?”

22 Hën de taa: “Wë wan sodati hedima de kai Konelisi, hën manda u taa fuu musu ko a i. A dë wan bumbuu sëmbë ta biibi Masa Gadu fëen Gadu. Biga hii dee Dju sëmbë fu ala ta kai bunu në fëen. Nöö wan basia u Masa Gadu Këndë ko nëen ko taki dëen taa be a manda kai i fii ko nëen wosu be a jei andi i abi u taki dëen.”

23 Nöö di Petuisi jei fa de fan dë, hën a kai de taa be de ko a wosu. Hën de ko a wosu.

Nöö hën de duumi dë tefa di mamate. Nöö hën de ku Petuisi, ku wanlö oto bakama u Masa Jesusi u Jopa dë, nöö hën de tei pasi u go a Sesalia.

24 Dobooko fëen, hën de dou a Sesalia. Nöö Konelisi bi kai dee famii fëen ku wanlö mati fëen u de ko nëen, nöö hën de tuu ko sai dë ta luku Petuisi faa ko.

25 Nöö di Petuisi ko dou, hën Konelisi go nëen go tjökö kini a goon nëen fesi ta lesipeki ën.

26 Ma Petuisi tapëen, a taa: “Nönö mati, na du sö e. Hopo taanpu fii. Mi dë libisëmbë nöö leti kuma i seei.”

27 Nöö di a fan ku ën sö, nöö hën a hopo. Hën de ta fan nango te de go denda a di kamba ka dee hia sëmbë dë, dee Konelisi bi kai ko dë.

Aki Petuisi ta fan ku dee sëmbë a Konelisi wosu.

28 Nöö di Petuisi si de, hën a kai de te de piki, a taa: “Dee sëmbë aki o, unu seei sabi taa u Dju sëmbë abi wan wëti taa wa musu hulu oto sëmbë möön leki Dju sëmbë nöö. Wa musu denda a de wosu seei. Ma Masa Gadu lei mi taa ma musu a’ tjina fu hulu na wan oto sëmbë.

29 “Nöö hën di un manda sëmbë ko kai mi, nöö ma niinga. Nöö hën mi ko wante. Wë di mi ko kaa, nöö hën mi hakisi unu taa andi da di soni mbei un kai mi?”

30 Hën Konelisi piki ën taa: “Söö. Wë sö mi manda kai i tuu. Wë biga wan soni pasa ku mi. Nöö fö daka fëen disi di a pasa. A wan dii juu sapate kuma di juu aki mi bi dë a mi wosu aki ta begi Masa Gadu. Te u mi sabi hën mi si wan sëmbë a mi fesi. Dee koosu dë a di sëmbë sinkii tuu ta koti faja te wojo u mi an sa kai ku de.

31 “Nöö hën a kai mi: ‘Konelisi.’ Hën mi piki. A taa: ‘Dee begi i ta begi Masa Gaangadu ku dee soni i ta da dee pootima, nöö Masa Gadu si de e.

32 Nöo i musu manda sëmbë go a Jopa go kai wan sëmbë de ta kai Simon Petuisi tja ko da i. A dë a di wosu u wan womi ta dëe mbeti kakisa de kai Simon. Wosu fëen dë a di ze bandja. Nöo i musu manda sëmbë go kai ën da i. Sö di basia u Gadu Köndë taki da mi.

33 “Hën i si mi manda sëmbë ko kai i wante. Nöo di mi kai i, i ko a mi, nöo hën da i du mi wan gaan bunu kaa. Nöo hën i si u ko makandi aki u ko jei hii dee soni dee Masa Gadu manda i fii taki da u. Nöo fa u ko aki, misikuma Gadu seei dë aki tu.” Sö Konelisi taki da Petuisi.

34 Nöo hën Petuisi toona taki da de taa: “Aai, wë dee sëmbë, mi jei. Nöo awaa mi ko sabi taa Masa Gadu an ta luku fesi. A ta si hii sëmbë di wan fasi.

35 Biga ee wan sëmbë i ta lesipeki ën ta libi bunu nëen wojo, nöo a o tei i ko sëmbë fëen kaa, ee i dë Isaëli sëmbë, ee ja dë Isaëli sëmbë.”

36 “Wë nöo di bunu buka di Masa Gadu manda da u Isaëli sëmbë, hën da disi: Jesosi Keesitu hën da Masa u hii mundu. Nöo hën seeka di pasi da u fuu ku Masa Gadu sa toona ko fii baka.

37-38 “Nöo misikuma un bi jei fa soni bi pasa wi a Isaëli köndë. Di womi de kai Johanisi, hën ko ta konda di buka u Masa Gadu da sëmbë ta dopu de. Te wan pisi, hën Jesosi u di köndë de kai Nazalëti hën a ko a Johanisi ko dopu, nöo hën Gadu manda di Akaa fëen ko nëen liba. A dëen gaan kaakiti, nöo hën a seti di wooko fëen a Galilea te kisi hii Isaëli köndë tuu. A ta waka ta lontu a hii kamian ta kula sëmbë ta puu dee sëmbë a fuka dee dë a di didibi basu. Biga Masa Gadu bi dë ku ën.

39 “Nöo fa u taki ën aki, u seei bi dë leti dë ta si dee soni a ta du a dee pepei köndë fuu dee Isaëli sëmbë, te dou ku di gaan köndë fuu de ta kai Jelusalen. Ku u seei wojo u si ën.

“Nöo hën u dë te wan daka, nöo hën dee sëmbë tei ën peka a lakpa pau kii.

40 “Ma nöo a di u dii daka fëen, nöo hën Masa Gadu toona weki ën baka e, tja ko lei u.

41 Na hii sëmbë si ën, ma u wojo si ën biga Masa Gadu buta a fesi taa u musu si ën. Nöo di a toona weki baka, nöo u ku ën bi toona njan bebe makandi.

42 Nöo fa a hopo baka a dëdë dë, hën a taki da u taa u musu konda di buka fëen da lanti taa hën Masa Gadu buta faa kuutu a hii mundu liba, dëdë wan ku libi wan tuu.

43 “Wë nöo gaanduwe hii dee fesiten tjabukama u Masa Gadu tuu bi ta taki soni fëen kaa taa sö wan Sëmbë o ko a di goonliba nöömö. Nöo di Sëmbë dë, ee i piki ën buka ko a di së fëen, nöo Masa Gadu an o hoi dee hogilibi fii a bëë möön e. A o da i paadon fu di i nama ku di Sëmbë dë ta kai ën në. Da sö a dë e, dee sëmbë.”

Aki di Akaa u Gadu ko

a dee sëmbë liba.

44 Nöo Petuisi an kaba u fan seei, hën di Akaa u Gadu ko a hii dee sëmbë dë tuu liba, dee ta jei di buka.

45 Nöo dee oto biibima u Masa Jesosi, dee Isaëli wan fu Jopa dee tja Petuisi ko dë, di de si taa di Akaa u Gadu ko a dee sëmbë dë liba, nöo a bigi da de te na soni. Biga de an bi sabi taa Masa Gadu o paati di Akaa fëen da oto sëmbë ee na Isaëli sëmbë i dë.

46 Ma nöo hën de ko si dee sëmbë aki ta gafa Gadu ta taki oto pei tóngö di dë an bi sabi, nöo hën de si taa di Akaa ko a de liba tuu.

47 Nöo hën Petuisi taa: “Wë Masa Gadu manda di Akaa da dee sëmbë aki kaa, kumafa a bi mandëen da u seei. Na fuu dopu de wante nö?”

48 Nöo hën a taki da dee oto biibima u Masa Jesosi dë taa be de dopu de wante a di në u Masa Jesosi Keesitu. Hën de dopu de te de kaba.

Nöo hën Konelisi ku dee otowan fëen tapa Petuisi taa be a fika ku de wantu daka ufö a go.

11

Aki Petuisi fan ku dee

Isaëli biibima.

1 Hën de dë te wan pisi, nöo hën dee oto Tjabukama u Masa Jesosi ku dee oto biibima dee dë a Isaëli köndë ala ko jei taa sö dee sëmbë na u Isaëli ko piki di buka u Masa Gadu. Wë nöo di juu dë, dee biibima bi ta mëni taa ee wan sëmbë an ta hoi dee wëti u Isaëli te dou ku di maaka de ta koti a sinkii, nöo Gadu an o limbo fesi da i. Sö de ta mëni.

2 Nöo hën di Petuisi ko dou a Jelusalen, hën dee sëmbë ko buta ku ën.

3 De taa: “Womi, faandi mbei i go a oto sëmbë wosu dee na Isaëli sëmbë? Dee sëmbë ala, de an koti di maaka a de sinkii da Masa Gadu wan daka, ma töku i go sindo njan ku de. Nöo ja du bunu.”

4 Di de taki sö, hën Petuisi tei di soni konda da de tefa a kaba, kumafa a bi pasa.

5 A taa: “Dee sëmbë aki, un haika e. Mi bi dë u mi a di köndë de kai Jopa ta begi Masa Gadu. Te wan pisi hën Gadu lei mi wan soni a wan wojo limbo sunjan. Mi si wan soni kumutu a liba kuma gaan koosu sö. De panjëen a dee fö së buka ta saka, hën a ta ko te a ko dou a mi fesi.

6 “Hën mi luku ën dendu diin. Hën mi si hii pei mbeti u goonliba ku fou ku dee soni ta waka ta hai ku bëe a goon tuu nëen dendu.

7 Hën mi jei wan sëmbë taki da mi taa: ‘Womi Petuisi, hopo kii dee soni aki njan.’

8 “Hën mi taa: ‘Wë nönö, Masa, ma sa njan dee lö soni dë, kwetikweti. U tjina. Ma njan de wan daka.’

9 “Hën di töngö toona taki da mi möön taa: ‘Wë nönö, womi. Te Masa Gadu taa wan soni bunu u njan, nöo ja musu fia ku ën taa an bunu.’

10 “Nöo sö mi si di soni nango ta ko a mi te dou dii pasi, ufö a toona hai go a liba baka.

11 “Nöo di juu dë seei, hën dii womi dou a di wosu ka mi bi dë. Wan sëmbë fu Sesalia hën bi manda de ko a mi.

12 Nöo hën di Akaa u Masa Gadu taki da mi taa be mi go ku de wante, ma musu buuja seei. Nöo hën mi ku de sikisi biibima u Masa Jesosi fu Jopa i si aki, sö u go ku de. Nöo hën u nango te u go dou a Sesalia a di wosu u di womi di bi manda kai mi.

13 “Nöo hën di womi taki da u taa a bi si wan basia u Masa Gadu Köndë taanputaanpu nëen wosu dë. Hën di basia taki dëen taa a musu manda sëmbë go a Jopa go kai mi, Simon Petuisi, ko nëen.

14 Hën di basia taki da di womi taa, fa mi o ko nëen dë, nöo mi o taki dëen fa Masa Gadu sa puu ën ku dee sëmbë fëen a bëe u dee hogi u de de bi du.

15 “Nöo di mi jei sö, nöo hën mi seti fan ku di womi ku dee sëmbë fëen, hën wantewante dë di Akaa u Masa Gadu ko a de liba. Leti kumafa a bi ko a u a fesi, sö a ko a de liba tu.

16 “Nöo fa mi si di soni pasa ku dee sëmbë dë, nöo mi mëni di soni Masa Jesosi bi taki da u taa: ‘Johanisi bi ta dopu unu ku wata, ma Masa Gadu o dopu unu ku di Akaa fëen.’

17 “Wë nöö fa i si mi si di soni pasa dë, nöö ma a’ soni u taki möön. Masa Gadu ta du ën wooko. Biga a da dee oto köndë sëmbë di wan seei soni di a bi da u di u piki di buka u Masa Jesosi Keesitu. Wë nöö ma tjika u tapa Gadu a di soni di a ta du e.” Sö Petuisi piki dee sëmbë.

18 Nöö di dee sëmbë dee bi ta fia ku ën dë jei sö kaa, nöö hën de kabuka pii awaa. Nöö hën de bia ko ta gafa Masa Gadu taa: “Ke baa, awaa u ko sabi taa na u Isaëli sëmbë wanwan Masa Gadu jabi pasi da e, ma a ta da hii sëmbë pasi u de disa dee hogilibi u de ko feni di libi u teego!”

Nöö sö wan gaan soni dee sëmbë dë ko fusutan di ten dë.

Aki ta taki u dee sëmbë u Masa Jesosi dee dë na Antiokia.

19 Wë nöö ‚kumafa u bi taki kaa taa, di juu ten de bi kii Sitefani, nöö hën de toona ko ta sitaafu dee oto biibima u Masa Jesosi tee nöö hën dee biibima bi kule kumutu a Jelusalen paaja go a sëmëni oto köndë. So u de go te a dee longi köndë, kuma Finisia, kuma Sipuusi, te kisi di köndë de kai Antiokia. Nöö fa de go dë, nöö de ta konda di buka u Masa Jesosi nöömö, ma Isaëli sëmbë wanwan de ta kondëën da.

20 Ma nöö te wan pisi, hën wanlö biibima u Masa Jesosi fu Sipuusi köndë ku wan oto köndë de kai Sileni, hën de go na Antiokia go ta konda di buka da dee sëmbë na u Isaëli.

21 Nöö fa de ta du dë, nöö Masa Gadu dë ku de nëen te sëmëni hia sëmbë piki di buka bendi ko a di së u Masa Jesosi.

22 Hën de dë te wan pisi, nöö hën dee biibima u Masa Jesosi dë a Jelusalen jei taa sö wan soni ko pasa a Antiokia. Nöö hën de manda Banabasi go haika.

23 Nöö hën Banabasi go dou. Nöö di a go dou, hën a si taa Masa Gadu dë ku dee sëmbë tuú, ta tja de ku di bunuhati fëen. Nöö hën a wai ku de te na soni. Hën a da de taanga taa: “Dee sëmbë aki, un musu fika a Masa Jesosi leiki nöömö ta biibi ën ku wan hati nango.”

24 Wë nöö di Banabasi aki, a bi dë wan bumbuu sëmbë seei ta biibi taanga a Masa Jesosi liba. Nöö a dë ku telu a di Akaa u Masa Gadu leiki. Nöö fa a ko na Antiokia dë, hën sëmëni oto sëmbë u di köndë möön bia ko a di së u Masa Jesosi.

25 Nöö hën de sai dë te wan pisi, hën Banabasi kumutu a Antiokia go a Taasusi go suku Saulosu.

26 Hën a go ta suku ën tefa a ko si ën, nöö hën hën ku ën toona ko na Antiokia baka. Nöö hën de tu womi fika wan hii jaa ku dee hia biibima naandë ta lei de dee soni u Masa Jesosi.

Nöö a Antiokia dë, ala fosu sëmbë seti ta kai dee biibima u Masa Jesosi Keesitu sëmbë. De an bi ta kai de sö a fesi.

27 Nöö di juu ten dë, wanlö sëmbë dee ta kisi fan a Gadu, hën de kumutu a Jelusalen ko na Antiokia.

28 Nöö wan u de de kai Agabusi, di Akaa u Gadu bi dë nëen liba, hën a hopo konda taa abiti möön nöö wan gaan hangi o ko. (Nöö sö a pasa tuu a di juu ten Kalaudio bi dë di Gaan Könu a Loomë.)

29 Nöö di de jei sö kaa, hën dee biibima u Masa Jesosi taa de kë heepi dee otowan u de a Judea Köndë pasa di hangi. Nöö hën de pii möni te de kaba. Hiniwan u de da kumafa a sa da, hën de tja di möni ko mökisi.

30 Hën de buta di möni a Banabasi ku Saulosu maun u de tjëen go da dee tiima u dee biibima u Masa Jesosi, dee ta dë a Jelusalen. Nöö hën de go.

12

Aki wan basia u Gaangadu köndë ko puu Petuisi a dunguwosu.

1 Nöo di juu dë, wan oto Helodi bi ko dë könu, nöo a ta buuse dee sëmbë u Masa Jesosi tee na soni. Nöo hën a manda sëmbë go kisi so u de söötö a dunguwosu faa da de sitaafu a bakaten.

2 Ma nöo di baaa u Johanisi de kai Jakobosi, hën di könu manda sëmbë kii ên ku së ufangi wantewante dë.

3 Nöo fa di könu du dë, nöo a suti seei da dee Dju sëmbë dee an ta biibi a Masa Jesosi. Nöo di a si taa a suti da de, hën a toona manda sëmbë go kisi Petuisi söötö a dunguwosu. (Nöo di juu dë, a bi dë di ten u di jaa di dee Dju sëmbë ta njan dee gaan daka u de de kai Pasika. Nöo a dee lö daka dë, de ta njan bëëë söndö sooda.)

4 Nöo hën de tja Petuisi go söötö a dunguwosu. Hën de kai teni-a-sikisi sodati fu de musu ko watji ên fu an musu kumutu. Hiniwan ten fö u de ta dë ku ên ta watji ên, te dee disi kumutu, otowan ko. Hën Könu Helodi taa: “Te dee daka u Pasika pasa kaa, nöo mi o tja Petuisi go a kuutu a hii lanti fesi, be de si fa mi o mandëën go kii.”

5 Nöo fa Petuisi dë a dunguwosu dë, nöo dee oto biibima u Masa Jesosi dë a wan kamian ta begi Masa Gaangadu dëën nöömö taangataanga seei.

6 Nöo hën de dë wan daka tefa ndeti, nöo kuma amanan sö de o tja Petuisi go a di kuutu. Hën Petuisi sai dë ta duumi. De bui ên ku tu sodati mökisi maun ku maun, dee oto sodati dë a dööbuka ta watji ên.

7 Te u Petuisi mëni, hën wan basia u Masa Gaangadu köndë ko a di kamba dë. Fa a ko dou, nöo hii di kamian ko limbo gbedede kuma de sëndë faja nëën.

Hën di basia tuwë maun seki Petuisi weki. Hën a taki dëën taa: “Womi, hesi, hopo!” Hën Petuisi weki, hën dee këti bi dë nëën maun lusu wante kai a goon.

8 Hën di basia toona taki dëën taa: “Womi, hopo bisi dee koosu fii, nöo i tuusi i susu a i futu.” Hën a hopo bisi.

Hën di basia taa: “Söö. Tei di gaan koosu fii tapa i sinkii, nöo i ko boo go.”

9 Hën de go. Di basia dë nëën fesi, Petuisi dë a baka. Hën de ta waka nango u de kumutu a di dunguwosu. Ma Petuisi an sabi taa di basia dë tuutuu soni, a ninga taa soni a ta sunjan ku wojo limbo.

10 Hën de ko dou a di fosu lö u dee sodati. Hën de pasa. Hën de go dou a di u tu lö, hën de pasa. Hën de ta waka tefa de go dou a di gaan felu nëngë döo di i ta jabi fii ko kai a döo.

Nöo di de ko dou nëën, hën a jabi ên seei da de, hën de pasa kai a sitaati. Hën de ta waka langalanga te de go dou a wan kamian. Hën djee, Petuisi an si di basia möön. A go disëën a sitaati dë.

11 Hën wante dë, hën Petuisi wojo ko limbo. Hën a taa: “Aaaa, mi saandi pasa awaa. Masa Gaangadu hën manda wan u dee basia fëën ko puu mi a Könu Helodi maun. Dee Dju sëmbë an o feni mi fu de du ku mi kumafa de kë möön.”

12 Nöo di a sabi sö kaa, hën a pasa go dou a di wosu u Malia, di mama u Johanisi Maikusi, ka sömëni sëmbë bi ko mökisi ta begi Masa Gaangadu dëën.

13 Hën a go naki di döo kökökökö.

Te wan pisi hën wan mujëë saafu de ta kai Looda ko u ko jabi di döo,

14 hën a jei Petuisi töngö. Hën a sabi taa hën. Ma nöo a wai te a fëëkëtë u jabi di döo dëën. Hën a toona kule go taki da dee sëmbë taa: “Dee sëmbë o, Petuisi ko aki e! A dë leti a dööbuka dë.”

15 Ma dee sëmbë dë a di wosu dendu an kë biibi. De taki da di mujëë mii taa: “Lëgëdë fii. Soni i ta mindi.”

Hën di mujëe mii toona taki taa: “Nönö, na lëgëdë. A sai dë tuu.” Hën de ta fia ku ën tee nöö hën de taa: “Na Petuisi i ta jei. Di akaa fëen, hën i ta jei dë ta hën.”

¹⁶ Di juu dë, Petuisi sai dë ta naki di döö nöömö, te nöö hën de ko jabi dëen awaa. Hën de ko si ën këdë.

Hën de taa: “Woo maingë, di soni aki bigi da u. Petuisi tuu.”

¹⁷ Hën Petuisi tapa maun da de taa: “Wan fan taanga e, dee sëmbë.” Hën a konda da de fa Masa Gaangadu puu ën a di dunguwosu. Hën a taki da de taa de musu piki Jakobosi ku dee oto biibima u Masa Jesosi taa sö Gadu puu ën a dunguwosu. „Bigi di juu dë wan baa u Masa Jesosi de kai Jakobosi, hën ko dë wan fesima u dee biibima a Jelusalen.”

Nöo di Petuisi fan sö te a kaba, nöö hën a kumutu dë go tjubi.

¹⁸ Di dobooko fëen hën dee sodati dë a di dunguwosu ko fanjaan. Hati u de latja biga de an si Petuisi möön, nöö de an saandi pasa ku ën möönsö tu.

¹⁹ Nöo di Könu Helodi ko jei, hën a manda sëmbë u de go suku Petuisi. Hën de suku ën te de wei, de an si ën möönsö. Nöo hën di könu manda kai dee sodati dee bi ta watji Petuisi. Hën hën ku de kuutu di soni te de kaba, de an sabi fa u piki ën. Nöo hën di könu toona kai oto sodati u de ko kii dee di dë puu.

Sö Könu Helodi du tefa a kaba, nöö hën a kumutu a Judea go a Sesalia go tan wan pisiten.

Aki ta taki andi pasa ku

Könu Helodi.

²⁰ Wë nöo di juu dë, hën dee sëmbë fu di köndë de kai Tilusi ku di de kai Sidon, de ku Könu Helodi bi a’ soni te a bigi. Nöo hën dee sëmbë u de tu köndë dë fiti buka makandi u de go fan ku di könu be hati fëen kötö. Biga a di köndë u di könu dee sëmbë bi ta bai njanjan ta libi, hën mbei de kë toona ko bunu ku ën baka.

Nöo hën de waka te de ko dou a Könu Helodi köndë. Nöo hën de go mbei guwenti ku wan sëmbë de kai Balitusi. Hën bi dë wan futoou futuboi u di könu ta seeka soni dëen nëen wosu. Hën mbei de go mbei guwenti ku ën. Nöo bakaten bifö de o go a di könu.

²¹ Nöo hën de buta wan daka. Hën di di daka dou, hën di könu bisi dee könu bisi fëen tee a kaba. Hën a go sindo fëen nëen könu sutuu a hii sëmbë fesi. Hën a fan ku lanti.

²² Hën di a fan tefa a kaba, hën dee sëmbë dee haikëen dë bai taa: “Woolo maingë, di sëmbë di fan di fan aki, na libisëmbë möön e! Wan gadu hën fan di fan aki!”

²³ Nöo fa de bai dë, nöo a kai ku di könu seei. Hën wante dë hën wan basia u Masa Gaangadu Köndë tjökö maun nëen. Biga a tei di hei di Gadu nöo musu feni. Hën a buta bitju kisi ën a bëë ta njan mën tefa a kii ën piiii. Sö wan soni pasa ku Könu Helodi fu di a hopo hënseei sö.

²⁴ Ma nöo di buka u Masa Gaangadu hën a dë ta paaja nango nöömö. Möönmöön sëmbë ta jei ën ta piki këdë.

²⁵ Nöo hën Banabasi ku Saulosu tja di möni di de bi pii naandë go da dee Jelusalen sëmbë tefa de kaba. Nöo hën de tei di kijoo de kai Johanisi Maikusi hën de toona go na Antiokia baka ka de bi kumutu.

Banabasi ku Saulosu.

¹Nöö dee biibima u Masa Jesosi fu Antiokia, de abi wanlô sêmbê a de dendu ta kisi fan a Gadu, ku wanlô otowan ta lei sêmbê soni fu Masa Jesosi. Wan da Banabasi, ku wan baakama de kai Simion, ku wan de kai Lusua u Sileni kôndê, ku wan de kai Manên. Hên ku Kônu Helodi bi kiija a wan wosu. Ufô i abi Saulosu. Sô de feifi sêmbê bi dê a dee Antiokia biibima dendu ta heepi de.

²Nöö hên de dê te wan daka, hên de ko miti u begi Masa Gadu. De dê ta begi ên ta hopo ên nê sôndô njan. Te wan pisi nöô hên di Akaa u Gadu ko taki da de taa be de buta Banabasi ku Saulosu apaiti dëên faa manda de go a wan wooko.

³Nöö hên de begi go dou sôndô njan tefa de kaba. Nöö hên de tei Banabasi ku Saulosu hên de buta maun a de wêi de da di wooko tefa de kaba. Hên de manda de go.

Aki de dê a di paati de

kai Sipuusi.

⁴Nöö fa di Akaa u Gadu kai Banabasi ku Saulosu a di wooko dê, nöô hên de go a wan kôndê de kai Selusia. Hên de tei zeboto, hên de pasa go a di gaan paati de ta kai Sipuusi.

⁵Hên de go tjökô a wan kôndê u di paati de ta kai Salami.

Nöö hên de go a dee keikiwosu u dee Dju sêmbê u di kôndê go konda di buka u Masa Gadu da de be de jei. Nöö fa de ta du dê, nöô di kijoo de kai Johanisi Maikusi bi dê ku de ta heepi de.

⁶Nöö hên de kumutu dê. Hên de ta waka langalanga hii di paati ta konda di buka u Masa.

Te wan pisi hên de go dou a di oto sê u di paati a wan kôndê de ta kai Pafosi. Hên de go si wan tofuma de ta kai Baliesosi. Hên da Elimasi. A dê wan Dju sêmbê ta mbei hênseei kuma wan tjabukama u Masa Gadu, ma na tuu seei.

⁷Nöö di tofuma aki bi nama ku di gaama u di paati. Hên de kai Seligiusi Paulosu. Nöö di gaama dê, a dê wan sêmbê abi bunu pakisei. Nöö fa de tu tjabukama u Masa Jesosi ko dê, nöô hên di gaama jei, hên a kai de taa be de ko nêên ko konda di buka u Masa Gadu dëên.

⁸Nöö hên de go u go konda di buka dëên. Ma nöô hii fa de ta kondëên, di tofuma sai leti dê ta suku u poi di buka. An kê di gaama piki seei.

⁹Nöö hên di Akaa u Masa Gadu ko hebi a Saulosu liba. (Hên seei da Paulosu e.) Nöö hên a luku di tofuma diin.

¹⁰A taa: “Mi ku i miti aki tide, i didibi womi mii, ju felantima u hii bunu u mundu. I ta ganjan sêmbê ku dee kôni tofu fii di i abi tumisi. Faandi mbei i ta bia di buka u Masa Gadu ta mindi soni dëên?”

¹¹“Wê Masa Gadu o seeka i. Wojo fii o booko, nöô joo tan wan pisiten möön bifô joo si soni ku di wojo fii dê möön.” Nöö fa Paulosu fan dê, hên wantewante di tofuma si wan bundji baakabaaka ko tapëên wojo, a fika a ta waka ta tuwê maun ta suku sêmbê fu de musu panjêên a maun tja.

¹²Nöö hii fa de du dê, di gaama sai leti dê ta luku. Hên di a si sô kaa, nöô a biibi awaa. Biga dee soni u Masa de bi taki dëên dê, de foondo ên.

Aki de tja di Buka ko a Antiokia u Pisidia Kôndê.

¹³Nöö hên Paulosu ku dee sêmbê fëên, hên de tei wan boto a Pafosi pasa go dou a di pisiwata de ta kai Panfilia a wan kôndê fëên de kai Peliga. Nöö di de go dou dê, hên Johanisi Maikusi kumutu disa de toona go fëên a Jelusalen baka.

14 Hën de kumutu a Peliga pasa go a di pisiwata de ta kai Pisidia. Hën de go dou a wan köndë de kai Antiokia möön, ma disi dë fu Pisidia Köndë. Hën de dë tefa di saba daka, hën de go sindo a di keikiwosu u dee Isaëli sëmbë.

15 Di juu dë, dee keiki tiima ta lesi di Buku u Gadu da dee sëmbë ko dë kumafa de bi guwenti. De ta lesi a di pisi u dee wëti dee Mosesi bi kisi a Gadu ufö de toona ta lesi di u dee fesiten tjabukama tu.

Nöö baka u di dë, hën de manda sëmbë hakisi Paulosu ku Banabasi taa: “Dee sëmbë, fa un ko mökisi ku u aki, ee un a’ wan soni u taki di sa da u hati, nöö un tuwë ko boo jei.”

16 Nöö hën di de kai de sö kaa, hën Paulosu hopo taanpu a pë. Hën a seti ta fan ku de ta tuwë maun taa, “Dee sëmbë, mi da unu piimisi e, un dee Isaëli sëmbë kuma miseei ku un dee oto lö sëmbë dë aki tuu, hiniwan fuunu di ta biibi Masa Gadu ta lesipeki ën. Mi o fan wan fan ku unu aki nöö un haika bunu o.

17 “Wë kumafa un sabi kaa, di Gadu fuu di u ta dini aki, hën bi tei dee gaan sëmbë fuu u de ko hën sëmbë. De bi dë a Egepiti köndë, nöö hën a kiija de tefa de ko gaan hia sëmbë. Hën a puu de a di köndë dë ku di gaan kaakiti fëen tja go a di sabana.

18 Aluwasi fa de hogi seei ma a ta tai hati ta tja de a di sabana te dou hii föteni jaa.

19 Hën a ta heepi de ta feti da de te de wini hii dee sëbën pei sëmbë dee bi dë a di köndë de kai Kaana. A puu de dë, nöö hën a da dee gaan sëmbë fuu di köndë fu de libi nëen.

20 “Nöö hën de libi ala te dou kuma föhöndö-ku-feifiteni jaa longi. Hii di ten dë, Gadu ta da de tiima ta heepi de. Nöö hën de dë tefa de pai Samueli, hën a ko dë wan tjabukama u Masa Gadu.

21 “Te wan pisi, hën dee gaan sëmbë fuu ko a Samueli, hën de begi ën taa be a da de wan könu u tii de. Hën Gadu da de Saulosu, di womi mii u di tata de kai Kisi, sëmbë u di lö u Benjamin. Hën Saulosu tii de föteni jaa longi.

22 “Hën Masa Gadu puu ën, hën a buta Dafiti ko könu nëen kamian. Nöö fa Dafiti sai dë, Gadu bi kai ën soni e. A taa:

Di womi mii u di tata de kai Isai,
fasi fëen ta kai ku mi a hii futu.

Hën o piki mi buka

ta du hii soni kumafa mi kë.

Sö Masa Gadu taki fu Dafiti.

23 “Ma nöö Gadu bi paamusi taa a o manda wan Heepima da u dee Isaëli sëmbë faa puu u a hogi basu. Hën o dë wan bakamii u Dafiti. Nöö hën i si u dë te di ten u dë aki, hën di Heepima ko tuu. Hën da di bakamii u Dafiti de kai Jesosi.

24 “Ma nöö bifö Jesosi ko, nöö Johanisi di Dopuma bi ko kaa, hën a ta bai basia ta konda da hii dee sëmbë u Isaëli köndë taa de musu disa di hogilibi u de bia ko tei dopu.

25 “Nöö hën de dë te Johanisi dë fa u kaba di wooko fëen, hën a taki da de taa: ‘Andi un ninga? Un ninga taa di Heepima di Gadu bi paamusi taa a o ko, hën disi nö? Nönö, nëen disi eti e. Ma wan fëëë, a o ko a mi baka nöömö. Nöö te a ko, nöö a o hei möön mi gaanfa. Ma bumbuu tjika seei u sa lusu di susu fëen puu nëen futu.’ Sö Johanisi taki.

26 “Wë nöö dee sëmbë u mi aki, un dee bakamii u Abahamu kuma mi seei, ku un dee oto sëmbë dee ta biibi Masa Gadu ta lesipeki ën aki, un tuu haika

mi e. Di buka di Masa Gadu manda ko taa sô a sa puu sêmbê a hogi basu, nöö u wê a manda di buka da e.

²⁷ “Nöö dee oto sêmbê fuu a Jelusalen dê ku dee hedima fuu, de an bi sabi taa Masa Jesosi hên da di Heepima e. Fa de ta lesi dee pampia u dee fesiten tjabukama u Masa Gadu hiniwan saba dê seei, ma tôku de an bi sabi ên. Nöö hên de du hogihogi ku ên leti kumafa dee tjabukama bi taki a fesi.

²⁸ Biga hii fa de an sa feni na wan fôutu nëen fu de musu kii ên, ma tôku de begi Pilati faa kii ên nöö.

²⁹ “Leti kumafa di Buku u Masa Gadu taki ên dê, nöö sô de du ku ên tefa de kaba kêê, hên de puu ên a di lakpa pau tja go bei.

³⁰ “Ma Masa Gadu toona weki ên baka e, dee sêmbê.

³¹ Nöö hên dee bakama fêen toona si ên baka ku deseeri wojo. A nango ta ko a de te dou sômêni daka. Hên ku dee lô sêmbê dê bi kumutu a Galilea ta waka ta lontu makandi te dou a Jelusalen. Nöö fa u dê aki, dee lô sêmbê dê fika ta konda dee soni fêen nöömô da u dee oto Isaêli sêmbê be u jei.

³² “Nöö hên awaa u seei ko a unu aki ko tja di bunu buka u Masa Gadu dê ko konda da unu

³³ taa dee soni dee a bi paamusi dee gaan sêmbê fuu, de ko pasa awaa da u dee bakamii u de. Biga Masa Gadu puu Jesosi a dêdê toona weki ên baka tuu.

“Wê wan sabi fa de bi taki a di Buku u Gadu nô? De taki ên a di u tu kanda u di Kanda Buku, taa:

Tide mi tja i ko buta a lanti fesi,
be de si taa ju da mi Mii, mi da i Tata.

Sô Gadu bi taki u di Heepima di o ko.

³⁴ Nöö a wanlô oto pisi u di Buku a taki u di fa a o weki ên puu a dêdê fu sinkii fêen an musu poi kaba a sôsô. Biga a taa:

Dee gaan bunu dee mi bi paamusi Dafiti ku mi bunu hati,
mi o da unu de nöömô.

³⁵ Hên a taa:

Di Sêmbê fii di dê apaiti da i,
ja o disêen a dêdê kôndê fu sinkii fêen poi kaba a sôsô.
Kônu Dafiti wê sikifi sô e.

³⁶ Ma nöö fa a taki ên dê, na hênseei a taki dê e. Nônô. Biga fa a bi sai dê, a bi ta libi ku dee oto sêmbê u di ten ala ta du dee soni Masa Gadu kê tefa juu fêen dou a dêdê. Hên de tjêen go bei a dee gaan sêmbê fêen bandja. Sinkii fêen sai dê tefa a poi kaba a sôsô.

³⁷ “Ma di Sêmbê Masa Gadu bi weki puu a dêdê kôndê u ta taki aki, sinkii fêen an bi poi mөөnsô e. Hên wê da di sêmbê Dafiti bi taki.

³⁸ “Nöö dee sêmbê u mi aki, un haika mi bunu. Fa mi ta fan ku unu aki, un musu fusutan mi. A Masa Jesosi di pasi jabi da u fu Masa Gadu an hoi u a bөө möön e.

³⁹ Dee wêti u kisi a Mosesi an sa mbei u ko limbo a Gadu wojo möönsô, biga de an sa puu u te dee hogilibi fuu an fika a u liba. Ma awaa a ko dê taa hiniwan sêmbê di ta biibi Masa Jesosi ta piki ên buka, nöö Gadu sa puu dee hogilibi fêen nëen liba. Boo taa hii dee soni di dee wêti an bi sa du da u, Masa Jesosi sa du da u fa u dê aki.

⁴⁰ “Nöö un musu mēni unu seei fu di soni an musu pasa ku unu di dee tjabukama u Gadu bi taki a fesi e. De bi taa:

⁴¹ Haika, dee sêmbê dê.

Fa un ta mbei tjô da di buka u Masa Gadu dê,
un ko luku wan soni aki di o toobi unu,

nöö un go kaba a sösö.

Biga di soni di mi o du a di ten fuunu aki,
nöö wan o biibi.

Ee sëmbë puu ën da unu seepi, wan o piki.

Sö dee fesiten tjabukama bi sikifi. Ma na sö a musu pasa ku unu e.” Sö Paulosu fan ku dee sëmbë tefa a kaba.

Aki ta lei fa sëmbë piki di Buka, ku fa de an piki.

⁴² Nöö di de kumutu a keiki, hën dee sëmbë hakisi Paulosu ku Banabasi taa te saba möön, nöö be de toona ko a de ko lei de di soni möön fini.

⁴³ Nöö hën de go. Nöö di de nango, hën wanlö hia Dju sëmbë ku wanlö otowan na Dju ma de ko ta begi Masa Gadu tu, hën de ko ta waka a Paulosu ku Banabasi baka.

Hën Paulosu ku Banabasi fan ku de. De da de hati taa fa de ta libi dë ta mëni Masa Gadu faa tja de ku di bunuhati fëen dë, nöö be de ta libi sö go dou.

⁴⁴ Hën de dë tefa saba daka möön. Nöö hën gaan së u di köndë hai ko makandi u ko haika di buka u Masa Gadu.

⁴⁵ Ma nöö fa dee oto Dju sëmbë u di köndë ko si fa dee hia sëmbë ta haika di buka, nöö hën de ko ta haun seei. Hën de sai dë ta fia ku Paulosu ta kosi ën.

⁴⁶ Ma Paulosu ku Banabasi an fëen seei. Hën de taki da de taa: “A bi fiti fuu konda da unu Isaëli sëmbë fosu di buka u Masa Gadu. Ma di wan këen hën un buta unu seei sösö fasi te wan sa feni di libi u teego, wë nöö woo disa unu go a dee oto köndë sëmbë na u Isaëli e.

⁴⁷ “Biga Masa Gadu fan ku u kaa, a taa:

Mi buta unu kuma wan lampu faja
u limbo di pasi da dee oto köndë sëmbë,
be hii pei sëmbë u goonliba feni di heepi u Gadu.”

Nöö sö Paulosu taki da de te a kaba.

⁴⁸ Nöö di dee oto köndë sëmbë na u Isaëli jei fa a fan, nöö hën de wai. Hën de ko ta hei di buka u Masa Gadu taa a dë wan bumbuu buka. Nöö hën dee sëmbë dee a kai da u de feni di libi u teego, hën de piki bendi ko a di së u Masa Jesosi.

⁴⁹ Nöö baka u di dë, hën di buka u Masa paaja a hii dee köndëköndë u di pisiwata dë.

⁵⁰ Nöö hën dee Dju sëmbë hati boonu, hën de hopo go a dee hedima ku wanlö nëbai mujëe u di köndë, dee ko ta biibi Masa Gadu. Nöö hën de taki da de taa dee sëmbë dee ta tja di buka dë, na bumbuu sëmbë de dë.

Nöö hën dee hedima ku dee oto sëmbë dë piki, hën de buta ku dee Tjabukama u Masa Jesosi jaka puu a di pisiwata dë.

⁵¹ Nöö hën di de jaka de sö kaa, hën Paulosu ku Banabasi naki dee susu u de puu di sandu u di köndë tuwë disa dë da de, fu dee sëmbë u di köndë si taa ee Masa Gadu o sitaafu di köndë dë, nöö na de mbei möön. Biga de konda di Buka fëen da de kaa. Nöö hën de go u de. Hën de pasa go dou a wan köndë de ta kai Ikonium.

⁵² Nöö dee biibima u Masa Jesosi dee fika a di pisiwata dë, nöö de dë ku wai seei. Biga di Akaa u Masa Gadu ta wooko a de liba.

14

Aki Paulosu ku Banabasi dë

a Ikonium.

¹ Nöö kumafa u taki dë, Paulosu ku Banabasi bi go a di köndë de kai Ikonium. Nöö hën de go a di Dju keikiwosu kumafa de bi guwenti. Hën de

go konda di buka u Masa Jesosi da de. Nöo fa de kondëen tjika dë, hën sëmëni sëmbe ko piki di buka bendi ko a di së u Masa Jesosi, Dju sëmbe ku na Dju sëmbe tuu.

² Ma wanlö Dju sëmbe dë a di kondë tu, de an kë piki di buka. Nöo de ta poi dee biibima u Masa Jesosi da dee oto sëmbe u di kondë dee an dë Dju sëmbe.

³ Ma nöo fa dee sëmbe ta du ku de dë seei, ma töku Paulosu ku Banabasi fika a di kondë dë longi ta konda di buka söndö fëëë. De ta taki da de nöömö taa Masa Jesosi an ta libi ku u ku di fuu libi, ma a ta libi ku u ku di fëen bunuhati. Nöo hën Masa Gadu nama ku de, a da de kaakiti u de du peipei soni, foombofoombo wan, be sëmbe sabi taa fa de ta konda di buka dë nöo tuutuu soni de ta taki.

⁴ Nöo hën de dë te nöo hën dee sëmbe u di kondë ko paati a tu. Hafu dë a di së u dee Dju sëmbe, hafu u de dë a di së u dee Tjabukama.

⁵ Nöo hën dee Dju sëmbe ku dee otowan na bi kë di buka, ku dee hedima u de, de tuu fiti buka taki taa de o buta ku dee Tjabukama naki de ku sitonu kii.

⁶ Ma nöo hën di dee Tjabukama jei sö, nöo hën de kule kumutu dë go. Hën de ta waka ta lontu a dee köndëköndë u di pisiwata de kai Likonia dë, kuma Lisita ku Deebi. A hii di pisiwata dë tuu de ta waka ta lontu,

⁷ ta konda di bunu buka u Masa Jesosi nöömö da sëmbe.

A di pisi aki de kai Paulosu ku Banabasi gadu.

⁸ Nöo a di kondë de kai Lisita dë, nöo wan lan womi bi sai dë. Söseei de pai ën, an hopo waka wan daka a goonliba.

⁹ Hën a dë sindosindo ta haika di fan u Paulosu. Te wan pisi hën Paulosu bia luku ën diin, nöo hën a si taa a abi biibi tjika fu Gadu sa kulëen be a ko bunu wante.

¹⁰ Hën a bai taa: “Womi, hopo taanpu a pë!” Hën a hopo vu taanpu, hën a ko ta waka ta lomboto. A ko bunu gbege.

¹¹ Wë nöo dee sëmbe u di kondë dë an sabi Masa Gadu. De abi wanlö oto gadu u de de ta begi. Nöo fa de si di soni Paulosu du dë, nöo hën de ko ta bai a di Likonia töngö u de taa: “Dee sëmbe aki eee, dee gadu fuu bia ko libisëmbe saka ko a u ooo!”

¹² Nöo hën de seti ta kai Banabasi Jupitë. Hën da di hedima u dee gadu u de. Nöo Paulosu de ta kai Mekui, biga hën da di basia u dee gadu u de. Biga Paulosu hën ta fan möön di otowan.

¹³ Nöo di gaduwosu u di gadu u de de kai Jupitë dë leti a wan së u di kondë. Nöo hën di basi fëen jei di dee sëmbe ta bai taa sö Jupitë ko, hën a go tei wanlö kau ku wanlö hia folo tja ko buta a di nëngë dööbuka u di kondë. Hën ku hii dee sëmbe u di kondë o kii dee mbeti dë tjuma tuwë da Paulosu ku Banabasi kumafa de ta tuwë njanjan da dee gadu u de.

¹⁴ Te wan pisi, nöo hën Banabasi ku Paulosu ko jei taa sö wan soni de o du. Nöo a hogi a de tee de tënë de koosu kule go a dee sëmbe mindi

¹⁵ ta bai taa: “Dee sëmbe aki, andi u ta du aki eee! Un disa ooo, gaantangi un disa! U seei da söso sinkii sëmbe kuma unu tu! Ma u ta tja wan bunu buka ko da unu taa be un disa dee söso soni un ta begi aki, nöo un bia ko ta begi di libilibi Gadu di mbei hii soni, wata ku tela, goon ku liba, fou ku mbeti ku libisëmbe, hii soni a mbei. Nöo hën fuun biibi e.

¹⁶ “Nöo a fesi Gadu bi disa sëmbe fu de ta libi u de kumafa de kë.

¹⁷ Ma tökuseei a bi seti dee soni fëen buta fu sëmbe musu si sabi taa wan bunuhati Gadu dë nöömö. Nöo wan si ën nö? Biga te juu dou, a ta da unu tjuba. Te juu dou, a ta mbei dee soni i paandi göö fuun ta feni soni u njan. Un

dë ku wai. „Da a dë taa un musu sabi taa di lö Gadu dë hën da di tuutuu Gadu u mundu.”

¹⁸ Ma fa Paulosu ta taki dë seei, ma ku gaan möiti ufö hën u Banabasi tapa dee sëmbë fu de an kii dee mbeti da de.

¹⁹ Hën de dë te wan pisi, nöö hën wanlö Dju sëmbë kumutu a di köndë de kai Antiokia u Pisidia Köndë naandë, ku di oto köndë de kai Ikonium, ka de Paulosu bi go a fesi, hën de go dou a Lisita. Hën de ko ta fan ku dee sëmbë u di köndë ta poi dee Tjabukama u Masa Jesosi da de, tefa dee sëmbë tuu disa Paulosu ku Banabasi djee bia ko ta buuse de. Hën de naki Paulosu ku sitonu tee wan pisi, de ninga taa a dëdë. Nöö hën de hai ën gulululu a goon tja go tuwë a bandja së u di köndë.

²⁰ Nöö hën dee biibima fu di köndë ko taanpu lontu ën. Hën a weki. Hën a hopo toona go a di köndë baka.

Di dobooko fëen, hën hën ku Banabasi kumutu dë pasa go a di köndë de kai Deebi.

Aki de Paulosu toona go

a Antiokia.

²¹ Hën di de go dou a Deebi, hën de ta konda di bunu buka u Masa Jesosi da dee sëmbë u di köndë dë tee wanlö hia sëmbë piki di buka bendi ko a di së u Masa Jesosi. Nöö hën de kumutu dë, hën de bia toona go a dee köndëköndë ka de bi waka kaa. De go a Lisita, Ikonium, ku Antiokia u Pisidia Köndë.

²² Nöö fa de ta waka nango dë, nöö de ta da dee biibima u Masa Jesosi taanga taa de musu tai hati ta biibi a Masa Jesosi nöömö. De ta taki da de taa: “Sö nöö a dë e, dee sëmbë. Ee wan sëmbë i kè dë a di Tii u Gadu dendu ku telu, nöö i o tja hia sitaafu a goonliba aki.”

²³ Nöö a hiniwan u dee keiki ka de Paulosu ta waka, de ta buta tiima. Nöö fa de ta buta de dë, nöö de ta du ën ku begi seei te de an ta njan. De ta begi da de ta buta de a Gadu maun fu di nëen de ta biibi.

²⁴ Nöö hën Paulosu ku Banabasi kumutu a di pisiwata u Pisidia dë pasa go dou a di pisiwata de kai Panfilia baka.

²⁵ Hën de toona go a Peliga. De go konda di buka u Masa Jesosi da dee sëmbë u di köndë dë te dë kaba, nöö hën de kumutu dë. Hën de go a wan köndë de kai Atalia di dë a di ze bandja.

²⁶ Hën de go subi a boto. Nöö hën de pasa go dou a Antiokia di u Silia Köndë baka, ka de bi kumutu. Naandë dee sëmbë bi buta de a Gadu maun faa musu tja de ku di bunuhati fëen ta heepi de a di wooko. Nöö di di wooko kaba ufö, hën mbei de toona go ka de bi kumutu.

²⁷ Nöö di de ko dou a Antiokia dë, hën de kai hii dee biibima u Masa Jesosi tuu u de musu ko mökisi be de jei unfa de bi waka. Nöö di de ko, hën de konda hii dee soni Masa Gadu bi du a de liba, fa a jabi di pasi da dee oto sëmbë dee na Isaëli sëmbë u de sa ko biibi a Masa Jesosi liba tu.

²⁸ Nöö hën de fika wan hii pisiten ku dee biibima u Masa Jesosi na Antiokia naandë.

15

Aki i ko a Antiokia.

¹ Nöö di juu dë wanlö sëmbë kumutu a Judea Köndë, ko a Antiokia, ka Paulosu ku Banabasi dë. Hën de tja wan lei ko ta lei dee sëmbë fu Masa Jesosi taa ee ja koti i sinkii buta di maaka u Isaëli, nöö ja o feni di heepi u Gadu. Biga sö Gadu da Mosesi di wëti dë faa da dee sëmbë u Gadu. Sö de taki.

² Ma di Paulosu ku Banabasi ko jei taa sö de ta lei, hën de ta fia ku de ta taki da de taa di soni an dë sö. „Biga ee i ko ta biibi a Masa Jesosi liba kaa, nöö an dë fanöudu fii musu hoi dee peipei wëti u Isaëli ufö Gadu o limbo fesi da i.”

Nöö hën di fia ko wan gaan soni. Te wan pisi hën de ko si taa di taki musu koti. Hën de puu sëmbë u de manda go a Jelusalen go piki dee Gaan Tjabukama u Masa Jesosi ku dee oto tiima u keiki taki sö wan soni. Nöö unfä de musu du ku sö wan taki?

Nöö Paulosu ku Banabasi ku wanlö oto biibima fu Antiokia dë, nöö de da dee sëmbë de puu fu go jei di taki da de.

³ Hën dee oto biibima u Masa Jesosi u di köndë tja de go buta a pasi. Hën de go. Nöö di de nango, hën de ta latja Finisia ku Samalia ta pasa. Nöö de ta piki dee Isaëli biibima a dee köndëköndë u dee pisiwata dë taa dee sëmbë na u Isaëli ko ta piki di buka awaa. Nöö di dee oto sëmbë u Masa Jesosi jei sö kaa, nöö de ta wai seei.

Aki de hoi wan gaan kuutu

a Jelusalen.

⁴ Nöö hën de ko dou a Jelusalen. Nöö di de dou, hën dee Gaan Tjabukama u Masa Jesosi, ku dee tiima u keiki, ku hii dee oto biibima u Masa Jesosi u Jelusalen tuu wai ku de. Hën de sindo kai kuutu. Hën de Paulosu konda da de hii dee soni dee bi pasa, kumafa Masa Gadu bi wooko a de liba di de bi ta tja di buka fëen ta konda.

⁵ Ma nöö i bi abi wanlö Faliseima a dee biibima dendu dë. Nöö di de jei taa sëmbë dee na u Isaëli sëmbë ko ta biibi Masa Jesosi, nöö hën de hopo. Hën de taa: “Fa dee oto köndë sëmbë ta ko ta biibi dë, nöö de musu koti di maaka a de sinkii e, ta hoi dee wëti u kisi a Mosesi. A musu dë sö nöömö. De musu abi sëmbë ta buta ku de be de hoi dee wëti dë.” Sö dee Faliseima taki.

⁶ Nöö di de fan sö te de kaba, nöö hën dee Gaan Tjabukama ku dee tiima u keiki toona kai kuutu baka fu de taki di soni u dee Isaëli wëti, ee a dë u de disa de, nöö de disa. Ee a dë u de hoi de, nöö de hoi.

⁷ Nöö hën de ta kuutu di soni nango ta ko tee, nöö hën Petuisi hopo. Hën a fan ku de. A taa: “Un dee sëmbë u mi aki, an dë u mi piki unu möön di fa Masa Gadu bi kai mi apaiti fu mi musu go konda di bunu buka fëen da wanlö oto köndë sëmbë na u Isaëli, be de ko ta biibi a Masa Jesosi liba.

⁸ “Nöö fa mi bi go dë, hën mi konda di buka da dee sëmbë. Nöö Masa Gadu sabi hii sëmbë hatiböö. A si taa de ko ta biibi ën tuutu, hën a tei di Akaa fëen hën a da de kumafa a bi da u ën a fesi. Nöö fa a da de di Akaa fëen dë, hën da a tei de kaa. „An dë taa de hoi dee wëti u Mosesi möönsö ufö a tei de.”

⁹ “Nöö fa dee sëmbë sai dë, Masa Gadu ta luku u ku de tuu ku di wan wojo sabi taa fa u bi biibi ën a fesi, nöö sö nöö de ko ta biibi ën tu. Nöö hën a da de wan njunjun limbo hati kumafa a bi da u kaa.

¹⁰ Nöö hën un ko ta taki taa de musu hoi dee Isaëli wëti fuu. Wë nëen da pooba un ta pooba Gadu nö? Wë biga dee gaan sëmbë fuu a bi da dee wëti u hoi, nöö hën wë de an bi sa hoi de. Nöö söseei tu, u dee bakawan aki bi ta biinga u hoi de te u wei. Nöö hën un kë ko da dee njunjun biibima u Masa Jesosi dee wëti dë fu de hoi. Kwetikweti. Ma dë nëen e.

¹¹ “Biga fa u ko a biibi aki, u sabi taa Masa Jesosi Keesitu hën nöö sa mbei u feni di heepi u Gadu. Na di hoi u ta hoi wëti, nëen o tja u pasa, ma Jesosi Keesitu nöö sa tja u ku hën bunuhati.

“Nöö söseei a dë ku dee sëmbë dee na Isaëli sëmbë tu. An dë u de hoi dee wëti ufö Gadu sa heepi de e.” Sö Petuisi taki da de.

¹² Nöo baka fëen, hën Banabasi ku Paulosu konda da de fa Masa Gadu bi ta wooko a de liba di de bi go a dee sëmbë na u Isaëli. A bi du sômëni foombofoombo soni kuma maaka, u de sa si taa Gadu buka de ta tja tuu. Nöo fa de ta fan dë, hën dee hia sëmbë naandë ko dë pii ta haika.

¹³ Nöo di de fan tefa de kaba, hën Jakobosi di da wan u dee gaan tiima, hën a tei. A taa: “Un dee sëmbë u mi aki, un haika mi.

¹⁴ Wë u jei fa Petuisi fan dë kaa. A konda da u fa Masa Gadu seti pii sëmbë a dee sëmbë na u Isaëli sëmbë dendu u de ko sëmbë fëen.

¹⁵ Nöo fa a fan dë, a kai ku dee soni Masa Gadu bi buta dee fesiten tjabukama u de taki, taa:

¹⁶ Te wan pisi möön, nöo mi o toona ko a unu e.

Nöo mi o ko seeka dee bakamii u Könu Dafiti.

Biga de kaba a sösö

kuma te wan wosu booko ja abi ën möön.

Sö di lö u Könu Dafiti kaba a sösö tjika.

Ma mi o toona hopo ën baka e,

be a ko kumafa a bi dë.

¹⁷ Nöo fa mi o du ën dë,

nöo dee oto sëmbë u goonliba o si,

nöo de o suku u de ko sëmbë u mi tu.

Dee oto köndë sëmbë na u Isaëli,

dee mi tei u ko sëmbë u mi,

de tuu o suku di pasi fu de sa ko a mi.

¹⁸ Sö Masa Gadu bi taki.

Di Sëmbë di ta mbei sëmbë ko sabi dee soni

dee a bi buta gaanduwe a fesi faa du,

hën wë taki sô e.

Sö di tjabukama bi sikifi, dee sëmbë.

¹⁹ “Wë nöo fa mi wegi di soni luku te kaba aki, nöo ma si kuma u musu toobi dee oto köndë sëmbë e, dee ko ta biibi Masa Gadu dë, fu de musu ta hoi dee wëti fuu Isaëli sëmbë.

²⁰ Ma un boo mbei wan pampia manda piki de taa:

Be de an njan njanjan di dee oto sëmbë ta tuwë da dee gadu u de.

De an musu libi fanafiti a di së u manu ku mujëë.

De an musu njan wan mbeti di dëdë sitaafu dëdë, buuu an kumutu nëen sinkii.

De an musu njan soni buuu.

„Dee disi, de da wëti de sa hoi, ma wan boo toobi de fu de hoi dee oto wëti u Isaëli.”

²¹ “Nöo ee de kë sabi soni möön fu dee wëti dee u kisi a Mosesi, nöo be de go a dee leima fuu go lei. Biga de ta taki soni u dee wëti dë a hii dee köndëköndë tuu, ka Isaëli keikiwosu dë. Gaanduwe de bi dë ku ën a fesi kaa te tide, hiniwan saba sëmbë ta dë a dee keikiwosu fuu ta lesi dee wëti ta puu da sëmbë u de musu sabi. Nöo ala fu de go ee de kë sabi de.”

Aki de mbei wan biifi manda

go na Antiokia.

²² Nöo di Jakobosi fan sö te a kaba, nöo hën dee Gaan Tjabukama u Masa Jesosi, ku dee tiima u keiki, ku dee oto biibima u Masa Jesosi tuu mökisi, de feni taa a taki bunu. Hën de taa a fiti fu de tei wantu fesima a de dendu manda go na Antiokia ku Banabasi ku Paulosu, „go piki de unfa de kuutu buta.”

Nöö hën de tei tu sëmbë dee dë fesima u de. Wan u de da Judasi, hënseei de ta kai Basabasi. Di otowan de kai Silasi.

²³ Hën de mbei wan pampia fu de manda go da dee biibima u Antiokia taa:

U dee Tjabukama u Masa Jesosi, ku dee oto tiima u keiki, dee sëmbë fuunu a Jelusalen aki, u ta mbei di pampia aki manda da un dee sëmbë na u Isaëli ta biibi Masa Jesosi na Antiokia, ku dee oto köndë u Silia, ku dee köndë u Silisia tuu. [U ta manda gaan odi da unu taa u dë.]

²⁴ Nöö u jei taa wanlô sëmbë fuu ko a unu dë ko ta toobi unu ku di lei u de [taa un musu koti sinkii buta di maaka u Isaëli ufö Gadu o limbo fesi da unu]. Fa de tja di lei ko a unu dë, nöö a mbei un ko ta pakisei fasifasi te nöö wan saandi fuun tei. Wë dee soni de taki dë, na u manda de e, fu de fan sô ku unu.

²⁵ Nöö di u jei sô kaa, nöö hën u ko fiti buka puu wantu sëmbë a u dendu aki manda ko piki unu unfa u si di soni. Nöö ku de tu lobi mati fuu, Banabasi ku Paulosu, ku de dee sëmbë fuu o waka.

²⁶ Wë un sabi Banabasi ku Paulosu kaa fa de dë, dee sëmbë. De dë wanlô sëmbë ta sei de hedi fu di në u Masa Jesosi Keesitu musu paaja.

²⁷ Nöö dee otowan u ta manda da unu aki, de da Judasi ku Silasi. Nöö de da kotoigima u di soni di u ta sikifi manda da unu aki taa u taki sô.

²⁸ Nöö a di së u di soni di ta toobi unu dë, nöö di Akaa u Masa Gadu ku u seei tu feni ën taa a bunu fu wa buta oto wëti da unu möönsô möön leki dee fanöudu wan u ta kai da unu aki taa:

²⁹ Be wan njan dee soni de ta tuwë da dee gadu u de.

Na be un njan soni buuu.

Na be un njan wan mbeti buuu an kumutu nëën sinkii.

Na be un libi fanafiti a di së u manu ku mujëe.

Ee un hoi de fö wëti aki, nöö woon du bunu. Hën nöö u kë taki da unu. U ta manda gaan odi da unu.

³⁰ Nöö di de mbei di biifi te de kaba, hën de manda dee sëmbë go. Hën de go dou na Antiokia. Hën de kai dee biibima u Masa Jesosi tuu ko makandi, nöö hën de da de di pampia di dee hedima a Jelusalen bi mbei da de.

³¹ Nöö di dee sëmbë lesi di biifi te de kaba, hën de wai. A da de hati seei. [Biga de si taa an dë u de buta deseei a dee hia Isaëli wëti basu.]

³²⁻³³ Nöö Judasi ku Silasi seei bi dë sëmbë ta kisi fan a Masa Gadu da sëmbë. Hën de fika na Antiokia dë wan hii pisiten ta fan ku dee sëmbë u Masa Jesosi, ta da de taanga u de tai hati ta hoi a di biibi nöömö.

Nöö di de o toona go a Jelusalen baka a dee sëmbë dee bi manda de ko, nöö hën dee biibima u Masa Jesosi tja de go buta a pasi ku kötô hati. [

³⁴ Ma Silasi kai pakisei taa an o go möön, a o fika na Antiokia ufö.]

³⁵ Nöö Paulosu ku Banabasi fika dë tu. Nöö de ku wanlô hia oto sëmbë ta konda di buka nöömö, ta lei dee sëmbë u di köndë soni u Masa Jesosi.

Aki Paulosu ku Banabasi paati.

³⁶ Hën de dë te wan pisi, hën Paulosu taki da Banabasi taa: “Mati, un boo toona go ka u bi ta konda di buka, go haika dee sëmbë fuu a dee köndëköndë luku fa de ta du.”

³⁷ Nöö di a taki sô, hën Banabasi taa a kë toona tja Johanisi Maikusi go ku de tu.

³⁸ Ma Paulosu an kë faa musu go. Wë biga a bi disa de a Panfilia köndë kaa, an bi kë dë ku de a di wooko möön, hën mbei Paulosu an kë faa go.

³⁹ Nöo hën di soni ko wan gaan fia da de te de paaja. Banabasi tei Maikusi hën de subi a boto hën de go a Sipuusi.

⁴⁰ Nöo Paulosu kai Silasi fëen ku ën waka. Nöo di de o go, hën dee sëmbë u de a Antiokia, de begi Masa Gadu da de faa tja de ku ën bunuhati. Nöo di de begi sô tefa de kaba, nöo hën de go.

⁴¹ Hën de waka a dee pisiwata u Silia ku Silisia. Nöo fa de ta waka nango dë, Paulosu ta fan ku dee biibima fu Masa Jesosi dee ta ko makandi a dee peipei köndë ta da de taanga.

16

A di pisi aki Timoteo seti

wooko ku de.

¹ Nöo hën Paulosu ku Silasi ta waka te de go dou a dee köndë de kai Deebi ku Lisita, ka Paulosu ku Banabasi bi konda di Buka kaa. Nöo hën de go si wan biibima u Masa Jesosi dë de kai Timoteo. Hën mama da Isaëli sëmbë, nöo hënseei ta biibi Masa Jesosi tu. Ma hën tata an dë Isaëli sëmbë, a dë wan Giiki sëmbë.

² Nöo fa Timoteo sai dë, a abi bunu në a dee otowan fëen ta biibi Masa Jesosi a Lisita ku di oto köndë de kai Ikonium, de tuu ta gafëen fa a ta libi.

³ Nöo di hën ku de Paulosu ko miti, hën Paulosu kë faa musu go ku de. Hën a mandëen fu de koti di maaka nëen sinkii kumafa Dju sëmbë ta koti. Wë nöo di soni mbei a mandëen, fu di an kë Timoteo musu abi hogi në a dee Dju sëmbë a dee köndë dë. Biga de tuu sabi taa hën tata da Giiki sëmbë, nöo an bi koti di maaka.

⁴ Nöo hën de ta waka nango a dee köndëköndë. Nöo hii fa de nango dë, nöo di buka di dee Gaan Tjabukama u Masa Jesosi ku dee oto tiima u keiki a Jelusalen bi da de, hën de ta tja go da dee biibima fu de musu jei, be de hoi di taki kumafa de bi kuutu buta.

⁵ Nöo fa de ta du dë, nöo a ta heepi dee sëmbë u Masa Jesosi gaanfa, dee ta miti makandi a dee köndëköndë. Biga de ta kisi kaakiti nango fesi seei a di biibi, nöo hiniwan daka möön hia sëmbë ta piki di buka ta ko ta nama ku de.

Aki Paulosu si wan sëmbë u Masadonia a wan

wojolimbo sunjan.

⁶ Nöo di ten dë, de Paulosu bi kë go a di pisiwata de kai Asia go konda di buka. Ma nöo hën di Akaa u Masa Gaangadu bai de taa de an musu go ala. Nöo di a bai de sô kaa, hën de bia latja di pisiwata de kai Fiigia kisi Galasia.

⁷ Nöo di de ko zuntu ku di pisiwata u Misië, hën de ta suku unfa de sa du go dou a Bitinia köndë, ma di Akaa u Masa Jesosi toona tapa de möön fu de an go ala.

⁸ Nöo hën de go a oto köndë. De latja Misië kisi di köndë de kai Toasi.

⁹ Te wan ndeti, hën Paulosu si wan soni a wan wojolimbo sunjan. A si wan womi u wan pisiwata de kai Masadonia ko taanpu nëen fesi ta kai ën taa: “Gaantangi, aba ko a di sê fuu aki ko heepi u baa.”

¹⁰ Nöo di Paulosu si di soni, nöo hën u ta seeka fuu go wante. Biga u sabi taa Masa Gaangadu hën ta manda u fuu go konda di bunu buka fëen da dee sëmbë fu Masadonia.

Aki wan mujëe de kai Lidia

ko a di biibi.

11 Hën u kumutu a Toasi waka tololoo ku sipi go dou a di köndë de kai Samotaake. Hën u duumi. Tefa di mamate hën u go nama a di köndë de kai Niapolisi.

12 Hën u kumutu a di sipi. Hën u waka a futu go dou a di köndë de kai Filipi. Hën da di gaan nëbai köndë u di së pisi u Masadonia ala, ma dee Loomë köndë sëmbë de ta libi nëen ta tii ën. Hën u tan sëmëni daka ala.

13 Tefa di saba dou, hën u kumutu a di köndë go dë a wan lio bandja ka u sa' taa sëmbë o ko begi Masa Gaangadu. Nöo di u go dou, hën u si wanlô mujëë bi ko makandi dë kaa. Hën u go sindo ku de ta konda di buka u Gaangadu da de.

14 Nöo wan u dee mujëë hën de kai Lidia. A dë wan sëmbë ta mbei baau koosu ta sei, nöo di köndë fëen hën de kai Tiatila. Di mujëë dë ta biibi a Masa Gaangadu. Nöo fa a dë pii ta haika di woto u Masa Jesosi, nöo hën Masa heepi ën faa tei dee soni dee Paulosu taki dë nëen hati.

15 Nöo di a ko biibi kaa, hën de dopu ën ku dee sëmbë fëen wosu dendu tuu. Hën a begi u gaantangi taa: "Ee un feni taa mi ta biibi Masa tuutuu, nöo be un ko tan ku u a u wosu." Nöo hën a ta begi u nöömö tefa u du kumafa a hakisi u.

*Aki de buta Paulosu ku Silasi
a dinguwosu.*

16-17 Nöo di juu dë wan mujëë mii dë a di köndë ku wan gadu a hedi ta konda a fesi andi o pasa amanjan. Hën wanlô sëmbë u di köndë tei ën buta saafuma u de, nöo de ta wooko gaan hia möni a dee soni dee di gadu ta konda da sëmbë. Nöo di u nango a di kamian ka woo begi, hën di mujëë mii dë ko miti ku u. Hën a ta ko a u ku Paulosu baka ta bai nöömö taa: "Dee sëmbë dee dë a mi fesi aki, de da futuboi fu di kaba hei Gadu u mundu e. De ta lei unu di pasi di fuun waka nöo Gaangadu sa heepi unu puu a hogi basu." Sö a ta bai a u baka nöömö.

18 Hën a ta bai seei nöömö te dou sëmëni daka. A ko ta toobi Paulosu gaanfa. Nöo hën a bia luku ën, hën a fan ku di gadu nëen hedi taa: "Mi tei di në fu Jesosi Keesitu bai i taa, hetji pasa kumutu a di mujëë mii liba e!"

19 Nöo wantewante dë hën a kumutu nëen liba wala. Wojo fëen ko limbo.

Nöo di dee basi u di mujëë mii si taa de lasi di wini fëen di de bi ta feni, hën hati u de boonu. Hën de panjan Paulosu ku Silasi dë gbalau hai gbululuuu tja ko a di köndë ganda mindi ka dee takima fu di köndë ta dë.

20 Nöo hën de tja kaagi u de go da dee Loomë sëmbë dee ta tii di köndë taa: "Dee Dju sëmbë i si aki tja toobi ko a u e, te hii di köndë ta mbei seei wajawaja.

21 Biga de ta tja pepei wëti ta ko ta da u a köndë. Ma wa musu tei de biga u dë Loomë köndë sëmbë, nöo dee wëti an ta kai ku dee fuu wëti." A di fasi dë de kaagi de Paulosu.

22 Nöo di de taki sö te de kaba, nöo hën hii dee sösö sinkii sëmbë u di köndë piki ku de. Nöo hën dee hedima hai dee koosu u Paulosu ku Silasi puu a de sinkii, hën de manda sëmbë fon de taku fon.

23 Nöo hën de tja de go söötö a dinguwosu. Hën de piki di wakitima taa a musu hoi de bumbuu fu de an musu kumutu.

24 Nöo di di wakitima jei sö, nöo hën a tja de go buta seei a di kaba lasiti kamian a di dinguwosu gogo. Hën de tuusi de tu së futu u de a kaapa bui söötö gingin fu de an musu kumutu.

25 Nöo hën de dë te wan juu ten kuma tuwalufu juu ndeti sö, Paulosu ku Silasi dë a di dinguwosu ta begi Gaangadu ta kanda dëen ta gafëen. Nöo dee oto sëmbë dee dë söötösöötö dë tuu sai dë ta haika.

²⁶ Te u de kë si hën di goonliba ko ta seki seei te dou ku dee dunguwosu posu. Hii dee döo tuu ko dë jabijabi hooo, nöo hii dee sëmbë bi dë a di dunguwosu sөөтösөөтö ku bui dë, de tuu lusu.

²⁷ Hën di wakitima u di wosu panta weki a duumi. A ko si taa dee dunguwosu döo tuu dë jabijabi. Hën a hai ën së ufangi faa kii ën seei. Biga a ninga taa hii dee sëmbë dë sөөтösөөтö a wosu dë, de tuu kule go. Nöö hën mbei a o kii ën seei.

²⁸ Ma di Paulosu si taa sö a o du, hën a bai taki dëen taa: “Nönö mati, na kii i seei e! U tuu dë aki eti. Wa go!”

²⁹ Hën di wakitima bai kai sëmbë taa be de tja faja ko. Hën de tja ko dëen. Hën a kule wou go kai a goon a de Paulosu fesi gbolou. Nöö a ta tëëmë tjatjatjatja. Hati fëen nöo latja sö.

³⁰ Hën a tja de go a döo. Hën a hakisi taa: “Mati, andi mi musu du ufö mi sa feni di heepi u Gadu?”

³¹ Hën de piki ën taa: “I musu biibi Masa Jesosi Keesitu fii Gadu, i ku i wosu dendu tuu, nöo wan o lasi go kaba a sösö.”

³² Hën de konda di woto u Masa Jesosi dëen ku hii dee sëmbë fëen wosu tuu.

³³ Nöö wante a di gaan ndeti dë seei, hën di wakitima tja de Paulosu go wasi dee wipi buka u de te a kaba. Nöö hën de Paulosu dopu ën ku hii dee sëmbë fëen wosu dendu, fu di de ko ta biibi a Masa Jesosi liba.

³⁴ Hën di wakitima tei Paulosu ku Silasi tja go nëen wosu, hën a da de soni u njan. Fa hën ku hii dee sëmbë fëen wosu ko ta biibi a Masa Gaangadu liba dë, nöo de ta wai tee na soni.

³⁵ Hën di mamate fëen, hën dee gaan lanti u di köndë manda siköutu taa be de lusu Paulosu ku Silasi be de go u de.

³⁶ Nöö hën di wakitima ko fan ku Paulosu taa sö wan buka dee gaan lanti manda, nöo be de kumutu go ku kötöhati awaa.

³⁷ Ma nöo hën Paulosu toona piki de taa: “Ambëe? U da goon mii u Loomë. Wa bi du soni möönsö ufö de manda sëmbë ko fon u a lanti dendu sөөтö a dunguwosu. Na kuutu de kuutu di soni möönsö. Nöö awaa de ko manda u fuu musu go tjubitjubi. Wa o go e. Be deseeri ko tja u go, ee de kë fuu go.”

³⁸ Hën dee siköutu go a dee gaan lanti go piki de taa sö wan soni Paulosu taki. Nöö di de jei sö kaa, nöo de panta. De ko fëë. Biga de an bi sabi taa de da goon mii u Loomë.

³⁹ Hën de ko fan ku de da de leti te de kaba. Hën de tei de tja go a döo awaa. Hën de begi de gaantangi taa be de kumutu a di köndë.

⁴⁰ Nöö di Paulosu ku Silasi kumutu a di dunguwosu, hën de toona go a Lidia wosu. Hën de go si dee oto sëmbë u de dë, dee ta biibi Masa Jesosi kuma de. Hën de fan ku de te de kaba da de hati ufö de tei pasi kumutu a di köndë awaa.

17

Aki de mbei toobi ku de Paulosu a Tesalonika.

¹ Nöö di Paulosu ku Silasi kumutu a Filipi, hën de latja wanlö köndë de kai Amfipoli ku Apolonia, hën de pasa go dou a di köndë de kai Tesalonika. Nöö dee Dju sëmbë fu ala abi wan keikiwosu a di köndë dë.

² Nöö hën Paulosu go a di keikiwosu kumafa a guwenti. Nöö a go dii saba baka na baka. A nango ta lesi di Buku u Masa Gadu da dee Isaëli sëmbë fu de musu jei, nöo a ta toona puu ën da de be de fusutan.

³ A ta taki da de taa: “Kumafa un sabi kaa, Masa Gadu paamusi taa a o manda wan Heepima di de kai di Keesitu ko a goonliba. Nöö de o sitaafu ën te de kii, ma nöö a o toona weki baka. Sö a dë sikifisikifi a di Buku e.

“Wë nöö di Sëmbë di Buku taki dë, hën da Jesosi e. Hën da di Keesitu Gadu bi o manda ko.” Hën di soni dë Paulosu ta konda da dee sëmbë nöömö fu de musu biibi.

⁴ Nöö di dee Dju jei sö kaa, nöö so u de ko biibi hën de nama ku Paulosu ku Silasi. Nöö i abi wanlö hia Giiki sëmbë a de dendu bi ta biibi Masa Gadu kaa, nöö deseel ko piki di buka tu, ku sëmëni u dee gaan nëbai mujëë u di köndë.

⁵ Ma di dee oto Dju sëmbë u di köndë ko si taa dee otowan ko nama ku de Paulosu, nöö hën de ko ta haun seei. Hën de pii wanlö wisiwasi sëmbë bi dë a sitaati hën de manda de fu de kule go mbei toobi a di köndë. Nöö a ko gaan soni. De kule gililili ko a di wosu fu wan womi de kai Jason, biga de mëni taa naandë de Paulosu dë, nöö de kë tja de ko buta a lanti fesi.

⁶ Ma di de go dou a di womi wosu, de an si de dë. Ma de si wanlö oto biibima u Masa Jesosi, hën de panjan de ku Jason tuu hai tja ko a dee hedima dee ta taki u di köndë.

Hën de bai taa: “Un si dee sëmbë aki ö? De ta waka a mundu ta toobi hii köndë ku dee fan u de nöömö, hën wë i si de ko dou a u aki tu.

⁷ Nöö Jason fuu köndë, hën ta hoi de nëen wosu. Nöö fa de dë u de dë, nöö de tuu ta sösö dee wëti fu di Gaan Könu fuu a Loomë taa wan oto könu dë de kai Jesosi.” Hën di soni dë de taki.

⁸ Hën di de jei de taki sö, nöö hën hii dee sösö sinkii sëmbë u di köndë te kisi dee hedima tuu ko ta mbei seei wajawaja sö.

⁹ Hën dee hedima naki Jason ku dee otowan butu ufö de disa de go.

Aki Paulosu tja Gadu wöutu

go a Belia.

¹⁰ Nöö di ndeti dë seei, hën dee biibima fu di köndë manda Paulosu ku Silasi go a wan oto köndë de kai Belia. Nöö di de go dou, nöö hën de go a di keikiwosu u dee Dju sëmbë fu naandë.

¹¹ Nöö dee sëmbë u Belia bi abi bunu pakisei möön dee sëmbë fu Tesalonika. Biga di Paulosu fan ku de, nöö de haikëën ku piizii seei. De an tuwë dee fan fëen a kapëë. Nöö hiniwan daka de ta lesi Gadu Buku finifini ta wegi ta luku ee di soni Paulosu ta taki dë ee a ta kai ku di Buku. Nöö di de si taa tuu soni de ta taki dë,

¹² nöö hën sëmëni u dee Dju sëmbë fu Belia ko piki di buka ko dë biibima u Masa Jesosi. Sëmëni womi dee an dë Dju, ku wanlö gaan nëbai mujëë u de tu, ko a di biibi tu.

¹³ Ma nöö te wan pisi hën dee Dju sëmbë a Tesalonika ala ko jei taa sö Paulosu ko ta konda Gadu buka a Belia. Nöö hën de hopo hën de go a Belia go ta fon faja a dee sëmbë u di köndë fu de an musu piki di buka. Fa de du dë, nöö hën dee sösö sinkii sëmbë u di köndë piki ku de ta du soni wajawaja.

¹⁴ Nöö di dee sëmbë u Masa Jesosi si sö taa lanti o mbei toobi ku Paulosu, hën de mandëën go wantewante a di ze bandja. Ma Silasi ku Timoteo, de de an o go eti. De o fika a Belia ufö.

¹⁵ Fa Paulosu ko dë a Belia tefa di a nango, hën wantu sëmbë o tjëën go buta a pasi. Hën de ta tjëën te de go dou a di köndë de kai Atene. Nöö hën di de ta toona go baka, hën Paulosu manda buka da Silasi ku Timoteo taa de an musu tan a Belia ala longi poi. Te de sa ko, nöö be de ko nëen wante.

Hën dee Belia sëmbë toona go ka de bi kumutu. Paulosu fika na Atene dë.

Aki Paulosu dē na Atene.

¹⁶Nöo fa a dē na Atene ta luku dee otowan fēen dē, a ko ta si dee pindigadu gidjii hii di köndē. Nöo a toobi ēn gaanfa, a ta fukēen seei.

¹⁷Nöo di ten dē, a nango a di Dju keikiwosu u di köndē nango ta ko. Dee Dju sēmbē ku wanlō oto sēmbē na Dju ma de ta biibi a Masa Gadu tu, sō de ta miti dē. Nöo fa Paulosu nango a de dē, nöo hēn ku de ta taki u Masa Jesosi nango ta ko.

Nöo hiniwan daka Paulosu nango a di gaan sitaati u di köndē tu. „Biga naandē hii sēmbē u di köndē ta ko ta haika njunsu.” Nöo Paulosu ta fan ku dee sēmbē ta ko dē ta taki soni u Masa Jesosi da de.

¹⁸Te wan daka hēn dee leima fu wan pei feleniki de ta kai Epikuli ku wan otowan de ta kai Sitoiki ko ta da woto ta fia ku ēn. Fa de ta fia dē, so u de ta kosi ēn taa: “Di fanhiama aki, andi da di sōsō a ta fan dē? An saandi a ta taki.”

Otowan taa: “Misikuma a feni wanlō oto köndē gadu soni tja ko ta konda da u.” Wē biga Paulosu ta konda dee soni u Masa Jesosi da de, be de sabi taa sēmbē sa dēdē weki baka.

¹⁹Hēn de tei Paulosu tja go a wan gaan kuutu gangasa u de de kai Aleopakusi. Hēn de kai ēn taa: “Womi.” Hēn a piki. Hēn de taa: “Wē andi da di njunjun soni i ta tja ta lei sēmbē. Köndēen da u boo jei.

²⁰Biga wē dee soni i ta fan, u jesi an bi jei de wan daka a goonliba. Nöo u kē sabi andi.”

²¹Di soni mbei de hakisi sō. Wē biga dee Atene sēmbē ku dee oto sēmbē dee ko ta libi ku de dē tuu, na soni seei de ta suku möönsō möön leki njunjun soni fu de sa feni tja go konda.

Aki Paulosu ta fan ku dee sēmbē a di kuutuwasu.

²²Nöo hēn Paulosu hopo taanpu a pē a hii dee kuutama naandē fesi. Nöo hēn a taa: “Dee Atene sēmbē aki, fa mi ko dou aki, nöo mi ta si tuutuu taa un ta dini dee gadu fuunu a hii fasi.

²³Biga wē fa mi ta lontu di köndē fuunu aki, nöo mi ta luku dee sonisoni fuunu dee un ta begi a dee kamiankamian. Nöo hēn mi si wan gadu tafa, a abi wan soni nēen sikifisikifi taa DI TAFa AKI, A DĒ FU DI GADU DI WA SABI.

“Wē nöo di Gadu dē di un taa wan sabi soni fēen, ma tōku un mbei wan tafa dēen fu hati fēen an musu boonu ku unu, nöo hēn soni wē i si mi o konda da unu aki.

²⁴“Di Gadu di i si mi ta taki aki, hēn un musu dini e, dee sēmbē. Biga wē hēn mbei goonliba ku hii dee soni dē nēen tuu. An ta libi a wosu di libisēmbē mbei ku maun e, biga hēn da Masa u hii soni, dee u liba ala ku goon aki tuu.

²⁵An a’ fuka fu libisēmbē musu heepi ēn. Biga hēnseei ta da hii sēmbē libi. Hēn ta da i böö, a ta da i hii soni.

²⁶“Di Gadu i si mi ta taki aki sō, a seti ku wan kodo sēmbē tō, nöo di wan sēmbē dē böngō paaja dou goonliba tefa i si hii dee peipei sēmbē ko fika a goonliba aki. Hēn seei buta di ten da de di de o libi, nöo hēnseei paati dee köndēköndē tu, buta libisēmbē peipei ka u de musu ta dē.

²⁷“Nöo di soni mbei a buta libisēmbē sō, fu de suku ēn ee de sa feni ēn. Tōku an dē longi poi ku hibiwan fuu e. Ee i kē sabi soni fēen, nöo i sa sabi.

²⁸Biga hēn ta da u libi, mbei u ta dē ta buli.

“Fa dee kandama fuunu sai dē, de mindi wan kanda taa:

U dee disisi tuu da böngō fēen.

²⁹“Wē di u dē böngō fēen kaa, nöo wa musu mēni taa Masa Gadu dē wan soni kuma goutu, sitonu, soofu soni, kumafa wan sēmbē sa tēmbē ku di köni fēen. An dē sō e.

³⁰ “Masa Gadu si fa libisëmbë bi ta du ma nöö an bi ta tei de fu hogi. Wë biga de an bi sabi soni fëen wan bëtë. Ma fa u dë aki, nöö u ko sabi soni fëen. Nöö hën a ko ta bai hii sëmbë a hii kamian taa de musu disa di hogilibi u de bia ko nëen.

³¹ “Biga a buta daka kaa faa kuutu a libisëmbë liba kumafa a fiti. Hën a tei wan Sëmbë buta faa dë fesima u di kuutu. Hën di Sëmbë di a tei dë, a weki ën baka a dëdë e, be sëmbë si taa dee lö soni a ta taki dë o pasa a mundu nöömö.” Sö Paulosu taki da dee Atene sëmbë.

³² Nöö fa a ta fan dë, nöö de bi dë pii ta haika. Ma di de jei a taa sëmbë dëdë weki baka, hën so u de lafu ën mbei ën fa seei taa di soni dë na tuu. Ma so u de taa: “Antoobi. Te wan pisi, nöö woo toona ko a i möön ko jei di soni aki.”

³³ Hën Paulosu kumutu a de dendu.

³⁴ Nöö hën so u dee sëmbë dee bi haikëen dë ko nama ku ën. Wan u de da Dionisi, hënseei da wan u dee kuutuma fu di Aleopakusi kuutu wosu. Wan otowan da wan mujëe de kai Damalisi ku wanlö otowan möön. De tuu ko dë biibima u Masa Jesosi.

18

Aki Paulosu tja Gadu wöutu go a di köndë de kai Kolenti.

¹ Hën Paulosu kumutu na Atene hën a go a wan köndë de kai Kolenti.

² Nöö di a go dou, hën a ko miti ku wan womi de kai Akila, wan Dju sëmbë. Nöö hën mujëe hën de kai Pesila. Wan köndë de kai Pontusi, hën da Akila mama köndë, ma hën ku ën mujëe bi ta dë a di gaan köndë u Italia de kai Loomë. Ma nöö te wan pisi hën di Gaan Könu u Loomë de kai Kalaudio jaka hii Dju sëmbë puu nëen köndë, nöö hën Akila ku ën mujëe ko a Kolenti ko libi. Nöö hën Paulosu ko a de dë.

³ Nöö hën a fika ku de naandë ta wooko makandi ku de. Wë biga de tuu ta du di wan wooko ta mbei wan soni kuma pelawosu ku mbeti kakisa ta sei.

⁴ Nöö fa Paulosu ko a Kolenti dë, nöö hiniwan saba a nango a di keikiwosu u dee Dju sëmbë nango ta fan ku dee sëmbë dee ta ko dë, Dju sëmbë ku dee oto sëmbë dee na Dju tuu. A ta biinga ku de nöömö fu de musu piki di buka u Masa Jesosi.

⁵ Hën a dë te wan pisi, hën Silasi ku Timoteo kumutu a Masadonia köndë ko nëen. Nöö di de ko dou, hën Paulosu disa di tëmbë wooko fëen go a di wooko u Masa Gadu ku telu. A ta fan ku dee Dju sëmbë nöömö taa Masa Jesosi hën da di Paamusi Könu de bi ta luku, nöö awaa Gadu mandëen ko.

⁶ Nöö fa a ta fan ku de dë, nöö dee Isaëli sëmbë ta fia ku ën ta kosi ën ta dëen gaan buka. De an kë piki dee fan fëen.

Nöö hën Paulosu hopo. Hën a sakwi di koosu nëen sinkii bugubugu da de. Hën a taa: “Buuu fuunu fika a unu liba e! Biga ee un dë fuunu aki ta du sösö te wan sa dou a Masa Gadu köndë, an o fika a mi hedi e. Mi nango a dee sëmbë dee na Dju go fan ku de.”

⁷ Nöö hën a kumutu a de dendu. Hën a go a wan wosu u wan womi de kai Titiusi Jusitusi. A dë wan sëmbë ta biibi Masa Gadu, nöö di wosu fëen ku di keikiwosu u dee Dju sëmbë dë bandja ku bandja.

⁸ Nöö di hedima u di Dju keiki hën de kai Keesipusi, nöö hën seei ku hii dee sëmbë fëen wosu tuu bia ko ta biibi Masa Jesosi. Sömëni u dee oto sëmbë u di köndë dee bi jei di buka ko ta biibi u ta tei dopu.

⁹ Nöö hën de dë te wan ndeti, hën Masa Jesosi ko fan ku Paulosu a wan wojolimbo sunjan taa an musu disa u ta konda di buka möönsö. Be a ta fan ku dee Kolenti sëmbë nango nöömö kumafa a ta du dë kaa.

10 A taa: “Fa mi ta fan ku i aki, nöö na panta e. Mi ta dë ku i. Nöö na wan sëmbe o du soni ku i a di köndë i si aki e. Biga mi abi hia sëmbe aki eti dee o bia ko ta biibi mi.”

11 Nöö di Paulosu jei sö kaa, hën a fika a Kolenti dë wan hii jaa ku hafu eti ta lei de u de fusutan Gadu wöutu.

12 Te wan pisi hën di Gaan Könu a Loomë manda wan womi de kai Galion ko a Kolenti faa musu tii di köndë. Hën de dë te wan daka, hën dee Dju sëmbe u di köndë fiti buka ko kisi Paulosu tja go a kuutu gangasa.

Hën de tjëen go kaagi da Galion taa:

13 “Di womi i si aki ta fan ku sëmbe ta suku u puu de fu de begi Gadu a wan oto fasi möön leki di fuu wëti di u abi aki.”

14 Nöö fa de fan dë, Paulosu bi dë leti fa u piki. Ma Galion an dëen pasi. A fan ku dee sëmbe tja Paulosu ko dë taa: “Dee Dju sëmbe aki, un haika mi. Ee wan gaan hagi un bi ta tja ko taki da mi, nöö mi bi dë u jei ën.

15 Ma di soni un tja ko aki, an dë gaan soni e. Soni fuunu nöö un ta pii ta fia, soni u dee lö fuunu, kuma dee wëti fuunu soni. Nöö ma dë nëen u piki unu. Unu seei sa kuutu dee soni naandë. Na soni u tja go a gaan lanti di dë e.”

16 Hën a manda sëmbe jaka de puu a di gangasa.

17 Nöö fa di kuutu booko dë, hën de kisi wan womi de kai Sositeni gbulu gingin, di sëmbe di bi ko hedima u di Isaëli keikiwosu a di otowan kamian. Hën de fon mën a di gangasa dööbuka dë te a fon. Galion sai leti dë ma aan toobi ku di fa de ta du ku di sëmbe dë.

Aki Paulosu toona nango a Silia.

18 Nöö hën Paulosu fika a Kolenti dë wan hii pisiten eti.

Hën a da dee otowan fëen adjoisi taa a o toona go a Silia köndë ka a bi kumutu. Hën ku Akila ku ën mujëë Pesila, sö de o waka makandi.

Nöö hën de nango te de dou a di köndë de kai Kenkelea. Nöö naandë Paulosu mbei de koti di uwii fëen hedi te de kaba puu. Nöö fa sëmbe o si ën dë, nöö de o sabi taa a bi mbei buka ku Gadu faa du wan soni.

19 Nöö hën de subi a boto go a di köndë de kai Efeise. Nöö Pesila ku Akila a di köndë naandë de o fika.

Paulosu seei go a tela go denda a di keikiwosu u dee Dju sëmbe go ta fan ku de. De ku ën ta öndösuku soni u Gadu makandi.

20-21 Nöö hën de begi ën faa musu tan ku de möön longi. Ma nöö a da de adjoisi taa: “Dee sëmbe, mi o go. Ma wan fëëë. Ee Masa Gadu kë, nöö mi o toona ko a unu baka.” Hën de taki aai. Hën a go.

22 Hën di boto kumutu a Efeise dë ta waka tee fa a nama a Sesalia. Hën Paulosu kumutu a di boto hën a tei pasi go a Jelusalen go da dee biibima u Masa Jesosi naandë odi. Nöö di a da de odi te a kaba, hën a kumutu dë waka go dou na Antiokia ka a bi kumutu awaa. Di lö waka dë kaba.

23 Hën Paulosu sai na Antiokia wan hii pisiten, hën a toona kumutu dë möön. Hën a ta waka a dee köndëköndë fu Galasia ku Fiigia ta lontu. A nango ta haika dee biibima u Masa Jesosi a hii dee peipei köndë ka a bi go, ta da de taanga.

Aki de taki soni fu Apolo.

24 Nöö di ten dë, hën wan Dju sëmbe de kai Apolo ko dë a Efeise. Di köndë de kai Alekesania hën dëen köndë. Nöö a dë wan sëmbe a goonliba di lei soni tee, nöö a di së u Gadu buku nöö a sabi soni finifini tu.

25 Di womi aki sö, sëmbe bi lei ën di pasi u Masa kaa, fa faa waka a dou nëen. Nöö a ta lei sëmbe dee soni fëen fajafaja seei ku hii ën hati. Ma wan soni du ën. Di dopu di Johansi bi ta dopu sëmbe, hën nöö a sabi a di së u dopu soni.

²⁶ Nöo fa di womi aki ko a Efeise dë, a ta fan söndö fëëë a di keikiwosu u dee Dju sëmbë. Nöo Pesila ku Akila dë leti dë sindosindo ta haikëën andi a ta taki. Hën de si taa an sabi di soni dou. Nöo hën de tjëen go a wosu go fan ku ën butëen a pasi faa sa sabi soni u Gadu möön fini.

²⁷ Te wan pisi hën Apolo kë go a Giiki Köndë. Hën dee biibima u Masa Jesosi a Efeise, hën de heepi ën. De mbei pampia manda da dee otowan u de a Giiki Köndë ala, dee ta biibi Masa Jesosi kuma de, taa de musu hoi Apolo kuma sëmbë u de.

Nöo di Apolo kisi di pampia, nöo hën a go. Hën a go ta heepi dee Giiki sëmbë seei, dee ko dë biibima fu di Masa Gadu abi bunuhati u libisëmbë.

²⁸ Wë biga a ta taki di wöutu u Gadu da dee Dju sëmbë u di köndë ta kuutu ku de nango ta ko a hii mundu fesi naandë. A ta tei Gadu Buku ta puu da de, be de si taa sö Masa Jesosi dë di Könu di Masa Gadu bi o manda ko a goonliba. Nöo fa a ta fan dë, nöo dee Dju sëmbë an saanfa u de du de toona piki ën baka. Wë biga dee fan fëen abi kaakiti.

Aki wanlö sëmbë fu Efeise kisi

di Akaa u Gadu.

19

¹ Wë nöo di juu ten Apolo dë a Kolenti dë, nöo Paulosu ta waka a dee köndëköndë dee dë longi ku di ze. Hën a ta ko tefa a ko dou a Efeise, hën a ko si wanlö biibima naandë.

² Hën a hakisi de taa: “Fa un ko ta biibi aki, di Akaa u Masa Gadu hën ko a unu liba nö?”

Hën de piki ën taa: “Wë nönö, wa bi jei soni u di Akaa dë wan daka.”

³ Hën a taa: “Wë fa de dopu unu dë, andi da di dopu de dopu unu?”

Hën de piki ën taa: “Kumafa Johanisi bi ta dopu sëmbë, nöo sö de dopu u.”

⁴ Hën a taa: “Wë fa i si Johanisi bi ta dopu sëmbë dë, nöo di sëmbë di kë di dopu bi musu kë disa hogilibi bifö Johanisi bi o dopu ën. Ma wan oto soni möön Johanisi bi ta taki tu. Fa a bi ta bai basia a di lio bandja dë, nöo fu wan Sëmbë di bi o ko nöo hii mundu musu biibi a di Sëmbë o ko dë liba. Nöo di Sëmbë di i si a bai basia taki dë, hën wë da Jesosi Keesitu e.” Sö Paulosu taki da de.

⁵ Nöo di de ko jei sö, nöo hën de toona dopu de a di në u Masa Jesosi.

⁶ Hën Paulosu buta maun a de, nöo hën di Akaa u Gadu ko a de liba. De ko ta taki peipei töngö, nöo de ta kisi fan a Masa Gadu ta fan.

⁷ Nöo dee sëmbë aki bi dë kuma tuwalufu womi sö.

Aki hia sëmbë ko lei soni u

Masa Jesosi a Paulosu.

⁸ Nöo dii liba longi Paulosu fika a di köndë dë nango ta fan ku sëmbë a di keikiwosu u dee Isaëli sëmbë. Nöo fa a ta fan ku de dë, an ta fan fëëëfëëë. A ta fan gbelingbelin ta biinga ku de kodo fu de sa ko ta fusutan taa Masa Gadu ko ta tii libisëmbë a wan hii nunjun fasi.

⁹ Ma so u dee sëmbë ta ko dë, de abi taangajesi tumisi. De ko ta sösö di fa Gadu buta taa sëmbë sa feni heepi a Masa Jesosi ta kosi ën a hii sëmbë dendu. Nöo hën Paulosu ku dee oto biibima u Masa Jesosi kumutu a de dendu go disa de.

Nöo di juu dë wan womi de kai Tilanusi bi abi wan wosu fëen ka lanti ta ko ta lei soni. Nöo ala Paulosu ku dee otowan fëen go. Nöo hibiwan daka hën ku dee sëmbë ta ko a di wosu ta fan soni u Masa Jesosi makandi.

¹⁰ Nöo sö Paulosu ta du te dou tu jaa longi, tefa hii dee sëmbë fu Asia pisiwata dë tuu ko jei di buka u Masa Jesosi, Dju sëmbë ku na Dju sëmbë tuu.

Aki dee sëbën womi mii u Sikefasi pooba u jaka wanlö gadu ku di në u Masa Jesosi.

¹¹ Nöo Masa Gadu ta dë ku Paulosu ta dëen kaakiti seei faa sa du foondo-foondo soni.

¹² De ta tei dee saka angisa fëen ku dee koosu bi nama nëen sinkii tja go nama a dee suwakima, nöo de bëtë kaa. Ee soni bi kisi sëmbë a hedi, a ta kumutu.

¹³ Nöo wanlö Dju sëmbë bi dë kaa ta waka ta lontu ta jaka dee soni ta kisi sëmbë a hedi ta puu a de liba. Hën de taa de o kai Masa Jesosi në luku ee a sa puu dee gadu a sëmbë liba da de. Ma töku de ku Masa Jesosi an dë a di wan së.

Nöo hën de fan ku so u dee gadu taa: “Mi tei di në fu Jesosi di Paulosu ta konda soni fëen manda i taa, hetji kumutu a di sëmbë liba e!”

¹⁴ Nöo dee sëmbë dee ta pooba di soni aki luku, de dë sëbën womi mii fu wan tata de kai Sikefa. Hën da wan u dee Gaan Begima fu dee Dju sëmbë.

¹⁵ Nöo di de taki sö kaa, nöo hën di gadu taki da de taa: “Jesosi mi sabi, nöo mi sabi Paulosu tu. Ma un dee sëmbë ta fan ku mi aki, ambë da unu?”

¹⁶ Nöo hën di womi dë ku di gadu nëen hedi djombo vu kisi de gbolou. Hën a ta feti ku de a di wosu tee tënë koosu u de a de sinkii fon de tee hii de tuu kule kumutu a di wosu ko a döo pënëpënë. Sinkii u de koti fanjanfanjan.

¹⁷ Fa di soni pasa dë, hii dee Dju sëmbë u Efeise tuu te kisi dee otowan na u Dju, de tuu ko jei. Hën de panta. De ko fëë seei u de kai Masa Jesosi në fu söso. Nöo di në u Masa Jesosi ta hei nango nöömö fu di soni dë hedi.

¹⁸ Nöo sëmëni u dee sëmbë dee bi ta biibi ën kaa ko ta pakisei dee hogi soni de bi ta du. Nöo hën de ko ta puu deseei gogo a döo taa sö de bi ta du hogi.

¹⁹ Nöo sëmëni u dee obiama tja dee obia pampia u de go mbei gufalu tjuma gbegede a lanti fesi dë. Nöo di de konda di mëni dusu de bi sa feni fu dee pampia dë, nöo a pasa feifiteni dusu soofu möni.

²⁰ Nöo sö di buka u Masa Jesosi ko ta a’ poosian nango fesi nöömö a Efeise köndë dë.

Aki Dëmëtusi mbei wan wajawaja hopo a Efeise.

²¹ Te wan pisi hën Paulosu ko kai pakisei taa a o ta waka a dee köndëköndë fu Masadonia te kisi dee fu Giiki ta konda di Buka, ufö a o toona go a Jerusalem. Nöo a taa baka u di dë nöo a o waka go te a Loomë.

²² Nöo hën a manda Timoteo ku wan womi de kai Elatusi fu de waka nëen fesi go a Masadonia. Wë biga de tu womi dë ta heepi ën a di wooko. Ma Paulosu seei o fika a di pisiwata u Asia dë wan pisiten möön bifö a o go.

²³ Nöo di juu dë, wan gaan wajawaja ko a Efeise fu di sëmëni sëmbë ko ta waka a Masa Jesosi baka hedi.

²⁴ Di soni mbei, fu di wan womi bi dë a di köndë de kai Dëmëtusi, nöo a dë wan gaan tëmbë basi ta mbei pikipiki gaduwosu ku soofu ta sei da sëmbë. Dee gaduwosu a ta mbei dë, nöo de ta djei di gaan wosu u di mujëë gadu u de de kai Diana. Nöo Dëmëtusi abi sëmëni otowan ta wooko dëen ta tëmbë ku soofu, nöo de tuu ta kisi gaan möni fu di wooko.

²⁵ Nöo hën Dëmëtusi kai dee otowan ku ën ta wooko, ku dee oto tëmbëma ta mbei dee lö soni dë a di köndë tuu, be de ko sindo a kuutu.

Hën a taki da de taa: “Womi, di wooko aki u ta wooko mbei wë u ta feni möni sö e.

26 Ma unu tuu ta jei dee soni di wisiwasima dē de kai Paulosu ta fan. A ko ta bai sēmbē taki taa dee gadu u ta mbei ku maun aki, de an dē gadu. Nōō di fa a ta fan dē, nōō na u kōndē sēmbē nōō jei ēn e. A fika piki nōō dee fan fēēn dou hii kōndē u Asia.

“Nōō fa a ta fan dē, nōō sēmbē pakisei a ta bia tuu. Biga sōmēni sēmbē ko piki ēn buka kaa.

27 “Wē nōō fa a ta lontu ta taki ēn dē, abiti mōōn nē fuu o poi taa u ta mbei sōsō soni ta ganjan sēmbē. Fa u dē aki, hii Asia kōndē sēmbē ku hii mundu tuu ta begi di gaan mujēē gadu fuu de kai Diana. Ma fa Paulosu ta du dē, nōō di gaduwosu u Diana an o abi waiti da sēmbē mōōn. Nōō di nēbai di a bi abi, nōō a o saka.” Sō Dēmētusi taki da dee tēmbēma dē.

28 Nōō di dee sēmbē jei fa a fan ku de, nōō aan soni. Hati u de boonu te na sipootu. Nōō hēn de seti ta bai taangataanga taa: “Diana fuu Efeise sēmbē a a’ gafa e! Diana fuu Efeise sēmbē a a’ gafa e!” Sō de ta bai nōōmō.

29 Hēn de ko ta taki ēn wajawaja seei paaja te dou hii lanti u di kōndē. Hēn de kule go kisi tu u dee sēmbē dee ku Paulosu ta waka. Wan u de de kai Gajusi, di otowan da Alisitakusi. Nōō de tu tuu da sēmbē fu Masadonia kōndē. Hēn de kisi de tu sēmbē dē kule ku de gilili tja de go a wan pisi u di kōndē ka sēmbē ta hai ko luku pēē.

30 Paulosu seei kē go fan ku lanti, ma dee oto biibima u Masa Jesosi u di kōndē tapēēn taa an musu go. [Biga de si taa ee a go a dee hia sēmbē dendu dē, nōō de o du soni ku ēn.]

31 So u dee takima fu Asia kōndē, dee mati u Paulosu, deseei manda go tapēēn tu taa be an go a di kamian naandē.

32 Di juu dē, de ta fan seei wajawaja sō a di kamian ta bai ta kai hii soni, ma di fan an ta kai a di wan baaku, biga hiniwan sēmbē ta taki fēēn nango ka a kē. Nōō gaan sē u dee sēmbē dee sai dē an saandi mbei de ko hia naandē sō.

33 Hēn de dē te wan pisi. Nōō wan Dju sēmbē de kai Alekesani bi dē a de dendu. Hēn dee Dju sēmbē tuusi ēn go a fesi faa musu fan ku dee hia sēmbē da de. Nōō a bi o fan ku de suku leti a de da dee Dju sēmbē fēēn taa na de mbei di soni ko wajawaja sō. Hēn a hopo maun da de taa be de kabuka.

34 Ma di de si ēn taa hēn da wan Dju sēmbē, nōō hēn de an kē jei andi a o taki. Nōō hēn de tuu bai makandi tapēēn taa: “Diana fuu Efeise sēmbē a a’ gafa e! Diana fuu Efeise sēmbē a a’ gafa e!” Sō de bai tu juu longi sōndō bōō.

35 Hēn wan basia u di kōndē ta penapena ku de ta fan ku de tefa de ko kabuka. Hēn a fan ku de taa: “Dee sēmbē fu Efeise aki, mi kē fan ku unu. Hii sēmbē sabi kaa taa di kōndē fuu hēn ta hoi di wosu fu di gaan mujēē gadu fuu de kai Diana. U ta hoi di pindi fēēn di bi kumutu a liba kai ko a goon.

36 Na wan sēmbē sa fia ku u a dee soni dē e. Nōō un dē fuunu pii. An dē fuu ta mbei toobi a di kōndē sō. Biga di Diana fuu a’ gafa kaa.

37 “Nōō un haika e. Dee sēmbē un tja ko aki, nōō de an fufuu soni a gaduwosu wan daka e. De an kosi di mujēē gadu fuu wan daka tu, ma tōku un tja de ko a u fesi aki.

38 “Wē ee Dēmētusi ku dee oto tēmbēma fēēn, ee de ku sēmbē a’ soni, nōō be de go a dee kuutuma go taki ēn e. Biga dee kuutuma ta dē leti a dee kuutuwosu naandē hiniwanten. Ee un kē da kaagi u wan sēmbē, nōō be un go a de ala.

39 “Nōō ee un a’ wan soni u taki mōōn eti, nōō be un go a kuutu be lanti seeka di taki.

⁴⁰ Ee nasö dee hedima fu Loomë dee ta taki a u liba, de o kai u a kuutu nöö wa o saanfa fuu taki. Biga di soni ko a u aki a pasa wajawaja poi, nöö aan hedi.”

⁴¹ Hën di a taki sö kaa, hën de tuu paaja waaa djee go a de pisi.

20

Aki Paulosu ku wanlö hia sëmbë dë a wan lëisi.

¹ Nöö baka u di wajawaja dë, hën Paulosu manda kai dee biibima u Masa Jesosi u di köndë fu de musu ko nëën. Hën a fan ku de te a kaba da de hati a di biibi. Hën a da de adjoisi faa pasa go a Masadonia köndë awaa.

² Nöö di a nango, hën a ta waka a dee köndëköndë u Masadonia ta fan ku dee sëmbë dee ta biibi a dee köndë dë ta da de hati fu de hoi di biibi dou. Hën a nango tefa a go dou a Giiki köndë.

³ Nöö hën a fika dë dii liba longi. A bi ta seeka faa toona go ku boto a Silia Köndë, ma nöö hën de ko konda dëën taa dee Dju sëmbë ta suku kōni u de kisi ën a pasi du wogi ku ën. Nöö di a jei sö kaa, nöö hën a bia pakisei taa an o go ku boto möön. A o bia toona nëën bakafutu, fula a Masadonia lontu go kisi Silia.

⁴ Nöö fa Paulosu o go dë, nöö sëmëni sëmbë o go ku ën. Wan womi fu Belia de kai Sopate, di fu Piilusi mii, o go ku ën. Tu womi fu Tesalonika, wan da Alisitakusi, wan da Sekundi, o go ku ën. Wan womi fu Deebe de kai Gajusi o go ku ën. Timoteo o go ku ën. Tu womi fu Asia köndë, wan de kai Tikikusi, di otowan da Toofimusi, o go ku ën tu. Hii dee sëmbë dë tuu o waka ku ën makandi go a Silia Köndë.

⁵ Nöö hën dee sëmbë aki tei pasi hën de waka a u fesi go dë a Toasi ta luku u, fuu ku de go makandi a Silia.

⁶ Nöö uu go a Filipi. Nöö di ten dë, dee Isaëli sëmbë o njan dee gaan daka u de di de ta njan bëëë söndö sooda. Nöö hën u tan a Filipi pasa dee daka dë. Nöö hën u tei boto nöö baka feifi daka hën u go dou a Toasi ka dee otowan fuu dë ta luku u. Nöö hën u tan ala sëbën daka.

⁷ Nöö a di fosu daka fu di wiki jabi dë, hën u tuu hai ko miti fuu booko bëëë paati njan. Nöö hën Paulosu ta konda Gadu woto da dee sëmbë dë te dou tuwalufu juu fu ndeti. Di soni mbei a du sö. A di mamate fëën, nëën woo go, hën mbei a fan ku de longi sö.

⁸ Nöö u dë a wan libawosu ku sëmëni faja sëndësëndë ta haika Paulosu.

⁹ Nöö wan kijoo de kai Etikusi bi dë a di fënsë buka sindosindo. Nöö fa Paulosu ta fan nango dë, nöö hën duumi kisi di kijoo mii, a ta djönkö. Te fuu sabi a duumi pii puu viin kai go a goon. Hën de kule go tei ën. A dëdë pii. Biga di kamian di a puu kai dë bi dë dii södö hei ku goon.

¹⁰ Hën Paulosu saka go nëën a goon ala. Hën a go kisi ën baasa. Hën a taa: “Dee sëmbë, wan fëëë. A dë ku libi eti.”

¹¹⁻¹² Hën de toona tjëen go a wosu. De wai tee. Hati u de toona kisi goon baka.

Hën u ku Paulosu, hën u toona subi go a di kamba ka u bi dë. Hën u go tei di bëëë hën u booko, hën u njan tefa u kaba. Hën a toona ta fan ku u tefa didia gbegede. Nöö hën u kumutu a di köndë awaa.

¹³ Nöö hën u ku Paulosu o paati fu wan sati ten. U seei o waka a boto lontu go nama na Asusi. Nöö Paulosu o waka a futu ko a u na Asusi ufö a subi a di boto, biga da sö a bi seeka kaa taa sö a o du.

¹⁴ Nöö hën di u ku ën go miti na Asusi, hën a subi a di boto hën u nango te u go nama a di köndë de kai Mitilene.

15 Hën u kumutu a Mitilene hën di oto daka möön hën u go zuntu ku di paati de kai Kiosi. Doboooko fëen hën u aba go a Samosi. Hën di doboooko fëen möön hën u go dou a Milete.

Aki Paulosu kai dee hedima

u Efeise ko fan.

16 Nöo fa u nango, wa nama a Efeise möönsö. Paulosu pakisei fuu pasa a wata liba. Wë biga a ta biinga faa sa go dou a Jelusalen faa njan di Pensiti Daka ala, hën mbei an kë hoi na Asia köndë poi.

17 Nöo hën mbei tu, di u ta ko tefa u dou a Milete, nöo hën a manda kai dee tiima u keiki fu Efeise taa be de ko nëen.

18 Nöo di de ko dou, nöo hën a fan ku de taa: “Womi, mi kai unu taa sö mi ta pasa aki, nöo mi bi kë fan ku unu. Wë nöo wan si fa mi bi ta libi ku unu a Efeise nö? Sensi di mi bi ko na Asia köndë njunjun, sö nöo i si mi bi ta libi tefa di mi kumutu a unu, ma bia möönsö.

19 Hii di ten dë, mi dini Masa Jesosi kuma wan futuboi fëen, nöo ma du ën ku gaan fasi o. A bi a’ juu di wooko ta da mi fuka, a ta da mi këë, a ta da mi sitaafu fu di dee Dju sëmbë ta suku mi u kisi fu di mi ta konda di buka.

20 “Fa mi ku unu bi libi dë, dee sëmbë, ma hoi na wan soni a baka di sa heepi unu a unu libi e. Mi konda dee wöutu u Masa da unu a lanti fesi te kisi ku unu wosu dendu tuu. Sö mi bi ta lei unu tjika fuun sa fusutan.

21 Mi bi ta bai hii sëmbë a unu dë, dee Dju sëmbë ku dee na Dju tuu, taa be de disa dee hogilibi u de bia ko a di së u Masa Gadu, be de ko biibi a u Masa Jesosi Keesitu liba. Sö mi bi ta fan nöömö.

22 “Nöo awaa di Akaa u Masa Gadu ta manda mi go a Jelusalen. Ma nöo fa mi nango aki, ma saandi o pasa ku mi ala e.

23 Ma a hiniwan köndë ka mi nango, di Akaa ta piki mi kodo taa de o kisi mi bui buta a sitaafu.

24 “Ma fa mi dë aki ma a’ toobi. Biga mi libi an dë wan gaan soni da mi. Wan soni nöo a dë da mi. Di wooko di Masa Jesosi da mi fu mi du dëen, nöo mi kë du ën te dou. Mi kë ta konda di bunu buka fëen nöömö da sëmbë ta lei de kumafa Masa Gadu abi bunuhati fuu libisëmbë tjika. Sö nöo di libi u mi dë da mi.

25 “Nöo fa i si mi bi ta lontu a unu dendu dë ta lei unu fa di Njunjun Tii u Gadu dë, nöo ma o du ën möön e. Biga mi sabi bunu taa fa mi nango aki, wan o si mi ku unu wojo möön.

26 “Nöo hën mbei mi piki unu gbelin taa di buuu fuunu an dë a mi liba. „Ee wan sëmbë i lasi pasi te ja go dou a Masa Gadu, nöo ma o tei hebi fii tjai e.”

27 Biga ma hoi baka möönsö fu konda da unu fa Masa Gadu kë heepi libisëmbë tjika.

28 “Nöo awaa di Akaa u Gadu tei unu buta fuun ko hedima u dee sëmbë fëen u Efeise dë. Nöo un musu buta mëni taanga a di fa un ta libi e, ku di fa un ta tii dee sëmbë dee dë a unu maun. Leti kumafa wan sikafuma ta abi sikafu ta luku de ta seeka, nöo sö nöo un musu ta luku dee sëmbë fuunu ta hoi de a pasi bumbuu e. Wë biga de da sëmbë u di keiki u Masa Gadu di Masa Jesosi dëdë paka da ku di fëen seei buuu.

29 “Nöo mi sabi taa fa mi o go disa unu aki, nöo sëmbë o ko a unu dendu kumafa takumbeti ta denda a sikafu mindi ta paaja de ta kisi ta kii. Sö sëmbë o ko a unu, nöo de an o a’ tjalihati fuunu möönsö.

30 “A unu dendu aki seei, sɛmbɛ o hopo ta bia di buka tee an o dɛ tuutuu soni mōön. Nōö a di fasi dɛ, de o ta biinga u ganjan dee oto biibima fu Masa Jesosi hai ko a de sɛ.

31 “Hɛn mbei unu musu ta dɛ ku kōni nōömō e, dee sɛmbɛ. Un musu ta mɛni kumafa mi bi ta bai unu a di sɛ u Masa Jesosi soni hii dii jaa longi, ta fan ku hibiwan fuunu a ndeti ku didia. Mi bi ta tja fuka ku wata a wojo seei, ma ma disa u fan ku unu mōönsō.

32 “Nōö fa mi nango aki, mi ta disa unu da Masa Gaangadu ku di Wōutu fɛɛn fu de tja unu. Biga di Wōutu fɛɛn ta lei u taa Gadu an ta libi ku u kumafa u dɛ, ma a ta libi ku u ku di fɛɛn bunuhati. Nōö fa un ta piki di Wōutu dɛ kaa, nōö a o sa ta heepi unu mōönmōön, be un sa ko kumafa Masa Gadu kɛ. Nōö a o sa heepi unu tu, fuun feni hii dee bunu fɛɛn dee a ta da dee sɛmbɛ fɛɛn dee ko bunu nɛɛn wojo kaa.

33 “Fa mi bi libi ku unu dɛ, dee sɛmbɛ, ma bi abi giii hati wan daka fu mi sa tei mōni a unu, ee nasō dee koosu fuunu a unu sinkii.

34 Unu seei sabi taa ku miseei maun mi bi ta wooko ta sōlugu mi seei ku dee sɛmbɛ mi ku de bi sai dɛ tu.

35 “Nōö mi bi ta du sō fuun sa si taa un musu wooko taanga ta heepi dee otowan dee suwaki mōön unu. Un musu ta mɛni nōömō fa Masa Jesosi bi taki taa dee sɛmbɛ ta da sɛmbɛ soni, de dɛ waiwai mōön leki dee sɛmbɛ ta feni.” Nōö a sō wan fasi Paulosu fan ku dee Efeise hedima u keiki te a kaba.

36 Nōö di a taki sō kaa, hɛn a tjökō kini a goon, hɛn ku dee otowan tuu, hɛn a begi Masa Gadu da de.

37 Nōö hɛn de tuu ta bai ta kɛɛ ta baasɛɛn ta bosi ɛn.

38 Tjali nōö kisi de sō fu di a bi taki da de taa de an o si ɛn mōön. Hɛn de tjɛɛn go buta a boto.

21

Aki Paulosu dɛ a pasi nango

a Jelusalen.

1 Nōö di u ku dee hedima u keiki fu Efeise paati, hɛn u buta a mindi. Hɛn u nango tefa u dou a di paati de kai Koosi, hɛn u nama nɛɛn. Hɛn di u kumutu dɛ, hɛn di dobooko mōön hɛn u go dou a Lodosu, hɛn u nama naandɛ. Hɛn u kumutu a Lodosu hɛn u go dou a Patala.

2 Nōö di u ko dou a Patala, hɛn u si wan oto boto namanama naandɛ di o go a Finisia. Hɛn u subi nɛɛn. Tefa di juu dou hɛn u tötō buta a mindi.

3 Hɛn u nango tefa u pasa Sipuusi a u tōötōmaun sɛ. Hɛn u nango tefa u nama a di köndɛ u Silia de kai Tilusi, nōö naandɛ de o puu lai a di boto.

4 Hɛn u go a tela go suku dee biibima u Masa Jesosi naandɛ tefa u si de. Hɛn u tan ku de dɛ sɛbɛn daka. Nōö fa u sai ku de dɛ, nōö di Akaa u Masa Gadu ta wooko a de liba hɛn de ta bai Paulosu nōömō taa be an go a Jelusalen.

5 Hɛn u dɛ tefa di juu dou fuu go. Nōö hɛn dee biibima u Masa Jesosi te dou ku mujɛɛ ku mii u de tuu tja u go buta a pasi. U ku de kumutu a di köndɛ nōö hɛn u waka go dou a ze buka. Nōö hɛn u tuu tjökō kini a goon leti a sandu liba dɛ, hɛn u begi Masa Gadu te u kaba.

6 Nōö hɛn u toona hopo taanpu, hɛn u da adjoisi te u kaba. Hɛn u subi a di boto, hɛn dee sɛmbɛ toona go a wosu.

7 Hɛn u kumutu a Tilusi ku di boto nango tefa u go dou a Tolemais. Hɛn u go da dee biibima u di köndɛ dɛ odi. U dɛ ku de dɛ wan daka te ndeti.

Aki lei andi pasa a Sesalia.

⁸ Dobooko möön hèn u pasa. Hèn u nango tefa u go dou a Sesalia, nöö hèn u go a di wosu u Filipi. Hèn da wan tjabukama u Masa Jesosi ta konda di buka fëen da sëmbë nöömö fu de sa biibi nëen liba. Di de bi pii dee sëbën womi tei a Jelusalen dë fu de musu ta sölugu dee biibima u Masa Jesosi, nöö di Filipi aki hèn bi dë wan u de. Nöö hèn u tan ku ën nëen wosu.

⁹ Wë nöö Filipi abi fö mujëë mii de aan man u wan daka, nöö dee mujëë mii tuu ta kisi fan a Gadu fu de konda da sëmbë.

¹⁰ Nöö hèn u dë sëmëni daka. Hèn di womi de kai Agabusi kumutu a Judea köndë ko a u. Nöö hënseei dë wan sëmbë di ta kisi fan a Gadu tu.

¹¹ Nöö di a ko dou a u dë, hèn a tei di banti u Paulosu, hèn a tai ën seei futu ku maun te a kaba. Hèn a taki da u taa: “Di Akaa u Gadu taki e, a taa a só wan fasi dee Dju sëmbë fu Jelusalen o kisi di sëmbë abi di banti aki, tai ën maun ku ën futu te de kaba. Nöö de o tjëen go da dee oto sëmbë na Dju.” Sö Agabusi taki.

¹² Wë nöö di u jei sö kaa, nöö u ku dee otowan dë tuu ta begi Paulosu gaantangi taa be an go a Jelusalen.

¹³ Hèn a taki da u taa: “Dee sëmbë aki, andi seei ta bigi da unu un ta këë ta fuka mi hati? Fa mi dë aki, nöö ee de tai mi maun ku mi futu ma a’ toobi. Biga ee mi musu dëdë a Jelusalen fu Masa Jesosi hedi seei, nöö mi dë kabakaba fëen kaa.”

¹⁴ Wë di u si taa wa a’ köni fëen, u bai ën te u wei hèn a nango fëen, nöö hèn u disa. Hèn u taa: “Wë antoobi. Fa i si i nango naandë, nöö di soni Masa Gadu kë, hèn musu pasa ku i e.”

¹⁵ Nöö hèn u seeka, hèn u tei pasi fuu go a Jelusalen.

¹⁶ Nöö fa u nango dë, so u dee biibima fu Sesalia go ku u. Hèn u ta waka tefa u go dou. Hèn de tja u go a wan wosu u wan womi de kai Naason. Hèn da wan u dee fosu sëmbë ko ta biibi Masa Jesosi a fesi. A dë wan sëmbë u Sipuusi ma a ko ta libi a Jelusalen. Nöö hèn u tuwë lai nëen wosu.

¹⁷ Nöö di u ko dou a Jelusalen kaa, nöö hèn dee otowan fuu dë, dee biibima u Masa Jesosi, de wai ku u tee na soni.

Aki dee tiima u keiki

da Paulosu lai.

¹⁸ Di dobooko fëen, hèn u ku Paulosu, hèn u go haika Jakobosi. Nöö di u go dou, hèn u si dee oto tiima u keiki tuu nëen ala.

¹⁹ Hèn Paulosu da de odi, hèn de piki. Hèn a sindo. Hèn a pii dee soni tuu fia konda da de, dee Masa Gadu bi du nëen liba di a bi dë a dee sëmbë dendu na u Isaëli.

²⁰ Nöö di de jei dee soni Paulosu taki dë, nöö hèn de ta wai seei ta gafa Masa Gadu fu dee soni dee a du.

Hèn de taki da Paulosu taa: “Wë u jei. Wë ma womi, u kë taki wan soni da i aki. I sabi taa fa u dë aki nöö dusudusu Dju sëmbë ko ta biibi a Masa Jesosi liba, ma awaa de dë ku dee wëti u Mosesi gaanfa eti.

²¹ “Nöö de ta jei fii taa i ta lei dee oto Dju sëmbë dee ta libi a dee oto köndë taa de musu disa dee wëti u Mosesi. De ta jei taa i ta taki taa de an musu koti dee womi mii sinkii buta di maaka möön. De ta jei taa i ta taki taa de an musu hoi dee wëti dee de bi guwenti möön. Sö fii de ta jei.

²² “Wë unfa woo du? Biga de o jei nöömö taa i ko dou aki, nöö de o kë sabi ee dee soni fii dee de bi ta jei, ee de dë sö tuu.”

²³ “Wë u abi wan pakisei fëen taa hèn di soni aki fii du e. U a’ fö womi aki, de mbei buka ku Masa Gadu kaa fu de du wan soni.

²⁴ Nöo de musu go a Gadu wosu go puuma de hedi kumafa di wëti u Mosesi dë. Nöo be i go ku de e, go seeka unu sinkii be un dë limbolimbo a Gadu fesi kumafa di wëti taki. Nöo joo paka di paima da de, nöo baka fëen de o puuma unu hedi. Nöo te sëmbë si sô kaa, nöo kumafa de bi jei fii nöo de o tei ën taa lëgëdë. Soni de ta mindi da i. Biga i seepi ta hoi dee wëti tu.

²⁵ “Ma a di së u dee otowan na Isaëli sëmbë dee ta biibi a Masa Jesosi liba dë, nöo u bi manda pampia da de kaa u di taki di u bi sitampu dë taa de an musu njan di njanjan di dee oto sëmbë ta tuwë da dee gadu u de. De an musu njan soni buuu. De an musu njan wan mbeti ee buuu an kumutu nëen sinkii. De an musu libi fanafiti a di së u manu ku mujëë. Dee na Isaëli sëmbë, nöo dee fö wëti aki nöo fu de musu hoi.”

²⁶ Nöo di dee hedima fan sô te de kaba, nöo hën Paulosu du kumafa de taki dëen. Di dobooko fëen, hën a go nama ku de fö womi nöo hën de go seeka de sinkii kumafa di wëti bi dë fu de sa dë limbolimbo a Gadu fesi. Hën de go a di Wosu u Masa Gadu dendu go piki dee begima taa a sô wan daka de o ko limbo fu de sa tja paima ko da Gadu. Biga a bi musu dou sëbën daka bifö de limbo.

Aki de kisi Paulosu a

di Wosu u Gadu.

²⁷ Nöo a fika piki dee sëbën daka kaba, hën Paulosu go a di Wosu u Masa Gadu. Hën wanlö Dju sëmbë fu Asia köndë ko si ën naandë. Hën de ko kisi ën gbolou panjan.

²⁸ Hën de bai kai olo kai hii mundu taa: “Un Isaëli sëmbë un hesi ko a u oo! Di womi di ta sösö u Isaëli sëmbë da hii mundu u si ën. A dë aki. Di sëmbë aki ta waka ta lontu ta konda taa dee wëti fu Mosesi an bunu, di wosu aki da sösö soni a goonliba. Sô a ta taki. Nöo awaa a ta tja dee oto köndë sëmbë ta ko a di Wosu u Masa Gadu aki ta poi ën.”

²⁹ Wë di soni mbei de taki sô. Biga de bi si ën a di köndë ganda mindi ku di womi de kai Toofimusi, di fu Efeise. An dë Isaëli sëmbë. Nöo hën de ninga taa a bi tjëen ko ku ën a di Wosu u Gadu ko booko di wëti u Isaëli.

³⁰ Nöo di de jei de bai sô, nöo hën de kule seei gililili ko gidjii. Hii di köndë ta mbei wajawajawajawaja. Hën de hai Paulosu voo puu tuwë ko a döo. Hën de hai dee döo u di Wosu tapa gbaa.

³¹ De ta biinga u kii ën wante fu di de ninga taa a booko di wëti.

Nöo fa de ta du dë, nöo hën sëmbë manda buka go a di gaan hedima u dee Loomë sodati dee dë a di köndë kaa taa hii Jelusalen ko ta mbei seei wajawaja sô.

³² Nöo di di hedima jei sô, hën a kai wanlö sodati fëen ku dee kabiteni u de taa de musu go ku ën wantewante. Hën de kule tjalalaa go dou. Di juu dë, de bi seti ta fon Paulosu kaa, ma nöo di de si dee sodati ta ko, hën de disëen u fon.

³³ Hën di hedima ko dou. Hën a panjan Paulosu puu a dee sëmbë ta fon mën dë maun. Nöo hën a manda sëmbë söötö ën ku tu bui buta dë, faa sa ko sabi andi da di soni ta pasa.

Hën a hakisi dee sëmbë taa: “Ambë da di sëmbë un ta fon di fon aki? Un hogi a du ufö un ta fon mën sô?”

³⁴ Nöo hën de ta bai ta konda di soni kpatjakpatja ma di fan u de an ta kai a di wan kamian. Hibiwan sëmbë ta taki fëen tee di hedima u sodati an ta jei di soni bunu möönsö andi bi pasa. Nöo hën a manda dee sodati taa be de tja Paulosu go a dee sodati wosu ka sëmbë an sa kisi ën möön.

³⁵ Nöo di de go dou a di sikada buka fu de subi go a liba, nöo dee hia sëmbë dë gidjii a de baka. Hën dee sodati hopo Paulosu a liba tja fu de an musu sa dou nëen.

³⁶ Nöo hën de ta waka a de baka ta ko ta bai ta manda de taa: “Un kii ën, un kii ën, un kii ën.”

³⁷ Nöo di dee sodati dou fu de tja Paulosu go a di wosu u de, nöo hën Paulosu kai di hedima taa: “Wë piimisi fii, mi sa fan ku i ö?”

Hën a mbei: “Hun? Sö i sabi u fan Giiki tòngö nö?”

³⁸ Na i bi dë di Egepiti sëmbë di bi kë buta sëmbë feti ku lanti nö? Na i bi tja dee fö dusu hogihatima bi ta kii sëmbë go a di gaan sabana nö? Mi ninga taa i wë bi da di sëmbë.”

³⁹ Hën Paulosu piki ën taa: “Nönö, mi da wan Dju sëmbë fu di köndë de kai Taasusi, wan köndë u Silisia. Nöo di köndë u mi na sösö köndë e. Nöo mi kë begi i gaantangi be i da mi pasi be mi fan wan soni ku lanti aki be de jei.”

⁴⁰ Hën a dëen pasi. Hën Paulosu taanpu a di sikada dë. Hën a hopo maun da de be de kabuka. Hën de kabuka pii u de haikëen. Hën a fan ku de a di Isaëli tòngö taa:

22

Aki Paulosu ta fan ku dee Isaëli sëmbë dee bi kisi ën.

¹ “Un haika, un dee Isaëli sëmbë u mi aki, mi kë taki wan soni da unu, be un si taa na hogi mi du e.”

² Nöo di de jei a ta fan a di Isaëli tòngö „di de seei ta fan„, nöo hën de kabuka seei pii sö ta haikëen andi a o taki.

Hën a taa:

³ “Mi wë da wan Dju sëmbë tu e, kuma unu. De pai mi a Taasusi a Silisia köndë, ma nöo a Jelusalen aki seei de kiija mi. Nöo di womi de kai Gamalijëi, hënseei lei mi finifini a di së u hii dee wëti u dee gaan sëmbë fuu. Nöo mi seepi tu, mi bi ta biinga seei a dee soni u Masa Gadu leti kumafa unu seei ta biinga nëen tide tu.

⁴ Biga a fesi nöo mi bi ta pena dee sëmbë dee ta libi a di njunjun biibi aki ta kii de. Mi seei bi ta kisi de ta buta a dunguwosu. Sö mi bi ta du ku de tjika. Womi ku mujëe tuu mi bi ta da sitaafu.

⁵ “Nöo fa mi ta taki aki, dee kuutuma fuu ku di Kaba Hei Begima fuu, tuu da kotoigima taa sö mi bi ta du e. Biga deseei mbei pampia da mi fu mi tja go da dee oto Isaëli sëmbë fuu dee dë a Damasikusi, fu go kisi dee biibima u Jesosi dee dë a di köndë ala bui tja ko a Jelusalen aki fu da de sitaafu. Hën wë mi bi nango a Damasikusi u go du.

⁶ “Ma nöo di mi dë a pasi nango, mi bi ko zuntu ku di köndë, nöo a bi dë kuma tuwalufu juu, sonuati. Hën te u mi kë si hën wan gaan limbo kumutu a gaangadu kai ko lontu mi tapa.

⁷ “Hën mi panta kai a goon. Hën mi jei wan tòngö kai mi tu pasi taa: ‘Saulosu, Saulosu, faandi mbei i ta sitaafu mi sö u du?’

⁸ “Hën mi hakisi ën taa: ‘Masa ee, ambë ta fan ku mi dë?’

“Hën a piki mi taa: ‘Mi, Jesosi fu Nazalëti, di sëmbë di i ta sitaafu sö, hën wë ta fan ku i aki.’

⁹ “Nöo di juu dë, dee sëmbë mi ku de bi nango dë, de an saandi ta pasa. De si di limbo ma de an jei di tòngö u di Sëmbë di ta fan ku mi di fan.

¹⁰ “Hën mi toona hakisi taa: ‘Masa, andi i kë fu mi musu du?’

“Hèn a piki mi taa: ‘Hopo, nöö i go dou a Damasikusi. Nöö te i dou nöö sèmbè o ko konda da i dee soni ku dee soni dee Masa Gadu buta da i fii musu du.’ Sö a fan ku mi te a kaba.

11 “Nöö di mi hopo fu mi go, hèn ma ta si soni möön. Di gaan limbo dungu mi wojo. Nöö hèn dee sèmbè ku mi bi sai dè panjan mi a maun tja go dou a Damasikusi go buta a wosu.

12 “Nöö di juu dè, nöö wan womi de kai Ananiasi bi dè a di köndè. Nöö di womi dè, a dè wan sèmbè ta libi a dee wèti fuu Dju sèmbè gaanfa. An ta misi de. Hii dee Dju sèmbè fuu u di köndè tuu ta gafèèn seei taa a dè wan gaan bumbuu sèmbè.

13 “Nöö hèn di womi dè waka ko taanpu a mi bandja. Hèn a kai mi: ‘Mi baa Saulosu.’ Hèn mi piki. A taa: ‘Wojo fii musu limbo e.’

“Di juu dè, hèn mi hopo wojo luku èn. Mi si soni gbegeede.

14 “Hèn a taki da mi taa: ‘Di Gadu fu dee gaan sèmbè fuu, hèn tei i buta fii musu ko sabi dee soni dee a kë du. A tei i buta fii sa si di Gaan Bumbuu Sèmbè fèèn di na poi èn wèti wan daka, söseei tu fii sa jei èn töngö.

15 Nöö joo dè kotoigima u dee soni dee i bi si ku dee i bi jei ta konda de da hii mundu.

16 “‘Nöö fa i si u dè aki, an dè fii buuja möön e. Hopo be de dopu i. Kai Masa Jesosi nè be a puu dee hogi dee i bi du a i liba.’ Sö Ananiasi fan ku mi di daka dè.

17 “Nöö hèn mi dè tee wan daka, hèn mi toona ko a Jeralalen aki, hèn mi go a di Wosu u Masa Gadu go ta begi èn. Te fu mi kë si, wan soni ko a mi a di wosu kuma mi ta sunjan. Ma na sunjan.

18 Masa Jesosi seei ko fan ku mi.

“A taa: ‘Womi hesi, kumutu a Jeralalen aki e. Fa i ko ta fan ku dee sèmbè u di köndè aki ta konda dee soni u mi da de, de an o jei möönsö u de piki i buka.’

19 “Hèn mi taa: ‘Masa, unfa a waka de an o jei? Biga de bi sabi tuutuu taa mi wè bi da di sèmbè di bi nango a dee keikiwosu fuu Isaèli sèmbè ta kisi dee biibima fii ta fon ta söötö a dunguwosu.

20 Nöö di dee sèmbè bi ta kii Sitefani fu di a bi ta konda soni fii da de hedi, nöö mi bi sai leti dè ta hoi dee koosu u dee sèmbè dee kii èn dè. Di di buuu fèèn bi ta kule ta kai a goon dè, mi bi dè taanputaanpu dè ta da de leti fu di kii de ta kii èn dè.

“ ‘Nöö fa de si di libi u mi ko tooka sö aki, ma dè kuma fa mi bi dè möön, nöö unfa de an o sa piki mi?’ Sö mi hakisi èn.

21 “Hèn a piki mi taa: ‘Tei pasi go nöö, womi. Mi ta manda i go a dee sèmbè na u Isaèli dee ta dè a dee longi köndè, fii tja di buka u mi go da de.’ ”

Aki de jei taa Paulosu da

goon mii u Loomè.

22 Wè nöö fa Paulosu ta fan dè, dee gaan hia sèmbè naandè tuu dè pii ta haika andi a ta taki. Ma di de jei sö taa Masa mandèèn faa go a dee sèmbè na u Isaèli, nöö aan soni. Hati u de boonu te na soni. Hèn de tuu bai taanga taa: “Di sèmbè aki an fiti faa musu libi möön. Un kii èn puu a goonliba e!”

23 Hèn de ta bai ta kai wolo nöömö ta wai dee koosu u de ta hiti gudugudu a liba ta du soni. Hati u de nöö boonu sö.

24 Wè nöö di hedima u sodati an saandi mbei dee Isaèli sèmbè hati boonu sö, biga an dè Isaèli sèmbè faa fusutan soni u de. Nöö hèn a manda dee sodati taa de musu tja Paulosu go buta a di sodati wosu, nöö de musu hupi èn faa sa konda di soni mbei de ta bai taanga sö.

²⁵ Hën de tjëen go seeka tai fu de hupi.

Hën Paulosu hakisi di kabiteni u sodati taanputaanpu dë taa: “Unfa di wëti dë? Un sa hupi wan goon mii u Loomë ufö un kuutu soni fëën ö?”

²⁶ Nöö di di kabiteni jei sö kaa, nöö hën a ko fëëë. Hën a go a di gaan hedima taa: “Wë di soni di i manda u fuu musu du aki, ma i sabi andi u ta du nö? Di sëmbë di i si u ta du di soni ku ën aki, a dë wan goon mii u Loomë.”

²⁷ Nöö hën di hedima ko a Paulosu. Hën a ko hakisi ën taa: “Tuu nö? I da goon mii u Loomë nö?”

Hën a piki taa: “Aai, sö mi dë e.”

²⁸ Hën di hedima taa: “Fa mi dë aki, mi paka möni tee a hia fu mi musu ko goon mii u Loomë e.”

Hën Paulosu piki ën taa: “Wë mi, an bi dë u mi paka. Wë biga dee sëmbë dee pai mi bi dë goon mii u Loomë kaa.”

²⁹ Nöö di dee sëmbë bi o hupi ën dë jei sö kaa, hën de hai kumutu wantewante nëen sinkii. Di hedima seei panta tu. Biga fa Paulosu bi dë goon mii u Loomë seei ma töku de bi söötö ën ku bui fu de hupi.

³⁰ Di dobooko fëën, nöö hën di hedima u sodati manda de taa be de lusu Paulosu puu di bui. Hën a manda kai dee Gaan Begima u Isaëli ku hii dee oto kuutuma u de be de ko miti kuutu, biga a kë sabi andi de ku Paulosu abi. Nöö di a kai di kuutu te de ko sindo, hën a tja Paulosu ko fu de fan fesi ku fesi.

23

Aki Paulosu dë a di kuutu.

¹ Hën Paulosu luku dee kuutuma diin. Hën a seti fan taa: “Dee sëmbë u mi aki, sensi di mi dë piki wan, nöö hën mi ta libi kumafa mi hati ta pakisei taa Masa Gadu kë fu mi musu libi te kisi fa u dë aki.”

² Di a taki sö kaa, nöö di Kaba Hei Begima de kai Ananiasi manda dee sëmbë dë a Paulosu bandja dë taa be de naki ën a buka.

³ Hën Paulosu taa: “Gadu o sitaafu i tu, i poipoi soni kuma wan bookowosu bandja de bi feifi ala. I sindo dë ta kuutu a mi liba a di së fuu Isaëli wëti, ma i seei booko di wëti fu di i manda sëmbë u de naki mi a buka.”

⁴ Hën dee sëmbë taanpu a Paulosu bandja dë hakisi ën taa: “Sö i ta kosi di Kaba Hei Begima u Masa Gadu nö?”

⁵ Hën a taa: “Dee sëmbë, un piimisi fuunu. Ma bi sabi taa hën da di Kaba Hei Begima e. Un a’ leti tuu. Biga Gadu Buku taki taa ja musu kosi di sëmbë di dë a i liba ta tii i.”

⁶ Nöö di juu dë, Paulosu sabi taa fa dee kuutuma sai dë, nöö de dë a tu keiki paatëi. Hafu u de dë Saduseima. Hafu u de dë Faliseima. Nöö de tu pei sëmbë dë an ta biibi di wan soni. Hën Paulosu fan möön taanga bai da de taa: “Dee sëmbë u mi aki, miseei dë wan Faliseima e, söseei dee gaan sëmbë u mi bi dë tu. Nöö fu di mi ta biibi kuma de taa dëdë sëmbë sa weki baka, hën mbei de tja mi ko a kuutu aki.”

⁷ Nöö di a taki sö kaa, nöö hën de tu paatëi bia ko ta fia ku deseai.

⁸ Wë biga dee Saduseima an ta biibi taa sëmbë sa dëdë toona weki. De an ta biibi taa Gadu abi basia nëen köndë. De an ta biibi taa sëmbë abi wan soni de kai akaa di ta libi u nöömö. De dii soni dë de an ta biibi. Ma dee Faliseima ta biibi dee soni dë tuu.

⁹ Hën dee kuutuma ta bai ta fia ku de na de nango ta ko. Nöö so u dee Faliseima dë bi dë Sabima u Wëti. Te wan pisi, nöö hën de hopo ta fia ku hatiboonu taa: “Di womi aki, Paulosu, wa ta feni wan föutu nëen möönsö.

Kandë wan akaa ee nasö wan basia u Masa Gadu Köndë bi ko nëen tuu ko fan ku ën.”

¹⁰ Nöo hën di fia u de ko gaan buja seei, te di hedima u sodati di bi kai di kuutu ko fëë taa dee kuutuma o kisi Paulosu hai tënë pispisi. Hën a manda dee sodati go a goon ka de ta kuutu dë go puu ën ku taanga a de dendu tja go a dee sodati wosu, fu dee kuutuma an sa dou nëen möön.

¹¹ Hën di ndeti dë seei, Masa Jesosi ko taanpu a Paulosu bandja. Hën a fan ku ën taa: “Womi, tai hati e. Kumafa i si i bi dë kotoigima u mi ta konda soni u mi a Jelusalen aki, nöo söseei i o dë a Loomë ta konda de tu.”

Aki wanlö sëmbë fiti buka

u kii Paulosu.

¹² Hën di dobooko fëen, hën dee Dju sëmbë fiti buka djula taa de an o njan möön, de an o bebe wata möön tu ee na de kii Paulosu.

¹³ Nöo dee sëmbë dee djula di djula dë, de pasa föteni womi.

¹⁴ Nöo hën de go a dee Gaan Begima ku dee Gaan Womi u Isaëli taa sö de djula u de kii Paulosu, ee nasö de an o njan möön, de an o bebe.

¹⁵ Hën de taa: “Nöo fa u ta fan ku unu aki, nöo u kë unu ku dee oto gaan kuutuma manda wan buka da di hedima u sodati mbei taa un kë kai Paulosu a kuutu, fuun fan di soni fëen möön fini seeka. Nöo tefa a bazia dou a unu, nöo woo feni ën kii ufö a dou.” Sö de fan ku de te de kaba.

¹⁶ Ma di ten dë, nöo hën wan sisa mii u Paulosu jei taa sö de ta fiti buka fu de kii ën tio. Hën a go denda a dee sodati wosu go piki Paulosu taa sö dee sëmbë o du fu de feni ën kii.

¹⁷ Nöo di di kijoo fan ku ën sö te a kaba, hën Paulosu kai wan u dee sodati kabiteni taa: “Kabiten, ja ta si wan kijoo aki. A kë go a di gaan hedima u sodati. Hën mi kai i ko begi fii tjëen go nëen, ee a sa dou nëen. A a’ wan soni fu hën ku ën musu taki.”

¹⁸ Hën di kabiteni tjëen go da di hedima. Hën a taa: “Di womi de kai Paulosu di dë söötösöötö dë, hën manda mi taa be mi tja di kijoo aki ko a i. A abi wan soni faa taki ku i be i jei.”

¹⁹ Hën di hedima tja di kijoo a maun go a së go hakisi ën taa: “Andi da di soni i abi u fan ku mi, kijoo? Fan be mi jei.”

²⁰ Hën a taa: “Dee Dju sëmbë ko fiti buka ku deseei makandi. Nöo de o begi i fu amanjan nöo i tja Paulosu go a di gaan kuutu u de. De o mbei taa de kë kuutu soni fëen möön fini.

²¹ “Nöo na piki e. Möön föteni womi ta seeka fu de kisi ën kii. De bi soi makandi taa ee de an kii ën, nöo de an o njan möön, de an o bebe tu. Nöo de dë kabakaba fëen kaa e. I nöo de ta luku fii mandëen ko da de nöo de kii.”

²² Hën di hedima bai di kijoo taa be an konda da na wan sëmbë taa sö a bi ko nëen ko fan di soni ku ën. Hën a toona mandëen go.

Aki de manda Paulosu go

a Sesalia.

²³ Hën a kai tu sodati kabiteni taa: “Un musu seeka tuhöndö sodati fu de go a Sesalia e. Nöo un tja sëbënteni sëmbë ku hasi ku tuhöndö sëmbë ku lanza. A nëigi juu fu ndeti, nëen un musu dë kabakaba seei pii fuun go.

²⁴ “Nöo un musu seeka wan hasi di sa tja Paulosu nöo un tjëen ku köni e, go a Gaama Felikisi.” „Biga Sesalia, hën bi da di köndë u di gaama u di pisiwata di ten dë.”

²⁵⁻²⁶ Nöo hën a mbei wan pampia manda da di gaama taa:

Mi, Kalaudio Lisiasi, mbei di pampia aki manda gaan odi da di gaan lesipeki Gaama Felikisi taa mi dē.

²⁷ Nöo di womi i si mi ta manda da i aki, a dē wan womi di dee Dju sēmbē bi kisi panjan ta biinga seei u kii, nöo hēn mi ko ku dee sodati u mi ko puu ēn a de maun. Biga mi bi jei taki taa a dē wan goon mii u Loomē.

²⁸ Nöo fa mi denda a di taki u de dendu aki, nöo mi bi kē jei andi de ku ēn abi mbei de kē kii ēn. Hēn mi ko tei ēn tja go a di gaan kuutu u dee Dju sēmbē.

²⁹ Ma di mi ko luku di soni u de te mi kaba, nöo mi ko si taa a dē wan soni de ta fia a di sē u dee wēti u Dju. Di soni an bi dē gaan soni sō fu de kii ēn, ee nasō sōötō a dinguwosu.

³⁰ Nöo baka fēēn, hēn mi ko jei taa wanlō sēmbē fiti buka fu de kii ēn. Hēn mbei i si mi mandēēn da i wantewante aki sō. Nöo mi o manda dee sēmbē dee ku ēn a' soni fu de musu tja kaagi fēēn ko da i ala. „Na soni möönsō möön leki gaan odi.”

Sō wan pampia di hedima u sodati manda da Gaama Felikisi.

³¹ Nöo hēn dee sodati seeka tefa de kaba kumafa de bi manda de, hēn de tei Paulosu a di ndeti dē tja go te na Antipatisi.

³² Hēn di dobooko fēēn möön, hēn de paati baka ku baka. Dee sodati söndō hasi toona go a de wosu,

³³ hēn dee dē ku hasi tja Paulosu go dou a Sesalia.

Nöo di de dou, hēn de tja Paulosu go a di gaama. Hēn de tei di pampia hēn de da Gaama faa lesi.

³⁴ Nöo di a lesi di pampia te a kaba, hēn a hakisi Paulosu taa: “Wē un köndē fii?” Hēn a piki Gaama taa “De pali mi a di pisiwata u Silisia.”

³⁵ Hēn a taa: “Antoobi. Te dee sēmbē ku i a' soni ko dou, nöo mi o jei di soni fii.” Hēn a manda sēmbē tjēēn go buta a Könu Helodi wosu, nöo de musu tei wakitima buta fu de koti wakiti dēēn.

24

Aki dee Isaēli sēmbē ta kuutu Paulosu a Gaama Felikisi fesi.

¹ Hēn de dē te de a' feifi daka, hēn di Kaba Hei Begima Ananiasi ku wanlō Gaan Womi u Isaēli hēn de faaka Paulosu ko a Sesalia. Nöo fa de ko dē, de tja wan afokati de kai Tetulusi faa fan ku Gaama da de. Nöo sō de ko u tja di kaagi u Paulosu ko da Gaama.

² Nöo di de ko dou, hēn de manda kai Paulosu tja ko, hēn de ko sindo. Nöo hēn Tetulusi seti di fan, a taa: “Mati Köndē Masa, kumaa.”

Hēn a piki.

Hēn a taa: “Wē u ko a i aki. Wē di köndē fuu soni di i ta seeka da u, nöo u si bunu fēēn. Biga u dē söndō kisi toobi longi kaa. Nöo di köni di i, Gaama, abi a i hati, nöo hēn mbei sōmēni soni a di köndē fuu ko ta waka bunu.

³ Nöo hii fa i si un du dē, nöo hii u tuu ta si ēn. U ta tei ēn fu gaan soni. Nöo hēn i si u ko piki i da i tangi, Köndē Masa.

⁴ “Nöo fa i si u ta fan ku i aki, nöo wa kē pena i. Ma u begi i gaantangi be i hoi pasensi da u pala sō be u fan te u kaba, nöo u go.

⁵ “Wē nöo di womi di i si u tja kaagi fēēn ko da i aki, a dē seei wan gaan kaakeisēmbēma u goonliba. A ta suti faja a hii dee Dju sēmbē u goonliba tuu mindi tefa dee sēmbē ko ta mbei gidigidi a hii dee köndēköndē. Nöo a dē wan gaan nēbai sēmbē u di njunjun keiki de kai Nazaleni, nöo di keiki dē an ta kai a pasi ku di lei u Masa Gadu möönsō.

⁶ “Nöo hēn a ko seei ko biinga u poi di Wosu u Masa Gadu a Jelusalen dē, nöo hēn u kisi ēn panjan. [Nöo u bi o kuutu ēn ku dee fuu wēti,

7-8 ma nöö hën di hedima u sodati Lisiasi ko puu ën a u maun ku taanga tei tja go gbolo.

“Nöö hën wë a taa dee sëmbë a’ kaagi fëën musu ko a i.] Nöö hën i si u ko a i aki, Gaama. Nöö te i seei fan ku ën te i kaba, nöö dee soni u ta fan ku i aki, nöö joo si taa u a’ leti a de.”

9 Nöö fa Tetulusi ta fan dë, hii dee Dju hedima ku ën ko dë tuu ta piki ku ën taa aai, sö a dë tuu.

Aki Paulosu seei ta fan.

10 Nöö di di afokati fan te a kaba, nöö hën Gaama tuwë maun da Paulosu, faa musu fan. Nöö hën di a o fan, hën a kai ën: “Gaama, mi wai fu di i da mi pasi fu mi seepi fan tu. Biga sômëni jaa kaa di i ta kuutu da u Isaëli sëmbë a u köndë aki.

11 “Nöö te i luku fini, nöö joo sabi taa an pasa tuwalufu daka eti fu di mi go a Jelusalen u mi go begi Gadu a di Gaan Keikiwosu.

12 Nöö fa mi go ala, na wan daka mi ku sëmbë kisi takitaki fia wajawaja a di Wosu u Masa Gadu. Na a dee oto keikiwosu u Isaëli, na a ganda mindi seei, mi buta faja a sëmbë möönsö fu de ko ta mbei gidigidi.

13 “Dee soni de ta kaagi mi aki, ja sa suku fini a de te i si taa de dë tuu möönsö. Wë biga na wan ten de bi si ën sö wan daka a mi.

14 “Ma wan soni nöö mi sa piki taa tuu. Hën da di taki de taki dë taa mi dë wan sëmbë fu wan njunjun biibi, nöö sö mi go a di Pasi dë tuu. Ma fa de konda dë taa an ta kai ku di lei u Masa Gadu, nöö na tuu e. Mi ta begi di wan seepi Gadu di dee gaan sëmbë fuu bi ta begi a fesi. Nëen nöö mi dë eti. Dee soni dee Masa Gadu bi buta Mosesi ku dee oto tjabukama fu de sikifi dëen, nöö de tuu mi ta piki eti.

15 “Nöö mi ta biibi tu taa tee sëmbë dëdë de o toona weki baka, dee bi libi bunu a Masa Gadu wojo ku dee an bi libi bunu tuu. Nöö söseei dee sëmbë ta kaagi mi aki, söseei de ta biibi tu.

16 Nöö fu di mi ta biibi dee soni dë, nöö hën mbei mi ta biinga nöömö fu mi dë ku limbohato a Masa Gadu fesi ku libisëmbë fesi tuu.

17 “Wë nöö sômëni jaa u mi disi fu di mi kumutu a Jelusalen. Nöö di soni mbei mi toona ko, fu di mi tja möni ko fu de da dee penama u dee Isaëli sëmbë fuu. Nöö mi bi kë tja paima go buta da Masa Gadu tu. Dee soni dë mbei mi toona ko a Jelusalen.

18 “Nöö di mi dou, nöö hën mi o go a di Wosu u Masa Gadu u go du dee soni dë. Mi bi seeka sinkii u mi kaa buta limbolimbo kumafa di wëti taki. Nöö fa mi go dë, sëmbë an bi hia a di Wosu. Wajawaja an dë.

19 “Ma nöö wanlö Dju sëmbë fu Asia bi sai dë, „nöö hën wë de ko si mi dë, nöö hën de mbei toobi ku mi. Ma nöö fa de mbei toobi ku mi seei,„ ma de an ko a i aki möönsö. Ee mi ku de bi a’ soni, nöö misikuma de wë bi musu tja di kaagi u mi ko da i.

20 “Ma ee nasö, nöö mbei dee otowan aki konda da i andi de feni di de bi kuutu soni u mi a dee gaan kuutuma fesi a Jelusalen.

21 “Wë biga ma saandi u mi de sabi u de ko konda da i möönsö möön leki di wan kodo soni tö di mi bi fan ku de taa fa de ta kuutu a mi liba dë, de ta kuutu da mi fu di mi ta biibi taa sëmbë sa dëdë toona weki. Hën nöö da di soni di mi taki ala fu de sa tja kaagi u mi ko taki da i aki.”

22 Fa Paulosu ta fan dë, nöö Gaama Felikisi ta haikëen. Wë a sabi soni bunu u dee sëmbë dee ta waka a di Pasi u Masa Jesosi, fa de ta libi.

Hën a taki da dee kuutuma taa: “Woo luku di sodati hedima Lisiasi be hën konda da u andi a bi si, bifö woo kuutu di soni dou.”

Aki ta lei fa Paulosu bi dē

a Sesalia.

²³ Hën a manda di sodati kabiteni taa a musu buta wakitima da Paulosu. Ma an dē taa hiniwan juu de musu ta dē nëën liba. De musu ta dēën pasi be a ta feni wan piki böö. Nöö de an musu tapa dee mati fëën tu fu de an sa sölugu ën.

²⁴ Baka sëmëni daka, hën Gaama Felikisi toona ko a di kuutuwasu möön, ku di mujëë fëën de kai Duusila, di dē Isaëli sëmbë. Hën Gaama toona manda kai Paulosu ko nëën möön. A kē jei di fan fëën andi a ta taki. Hën Paulosu fan ku de di fa sëmbë musu ta biibi a Masa Jessosi Keesitu liba.

²⁵ Hën a ta fan ku Gaama ku ën mujëë ta bai de taa de musu libi bunu a Masa Gadu wojo. De musu sabi u tai hati disa soni. De an musu libi kumafa de hati kē a di sē u hogi. Hën a bai de taa: “Woo dē te wan daka, nöö Masa Gadu o kuutu a libisëmbë liba kumafa de bi libi.” Sö Paulosu ta fan ku de gbelingbelin tjika.

Nöö fa a ta fan dē, nöö Gaama ta haika, hën a ko fëëë. Wë biga an ta libi bunu. Hën a taki dēën taa: “Wë womi, fa i fan aki, mi jei. Nöö toona go fii ufö. Te mi feni pasi möön nöö mi o manda kai i, be i toona ko fan ku u möön.”

²⁶ Baka u di dē, sëmëni pasi Gaama ta manda sëmbë ta kai Paulosu nöömö, a ta ko ta fan ku ën. Nöö Gaama ninga taa te Paulosu ko nëën, nöö a o pakëën gaan möni fu Gaama sa puu ën a dunguwosu.

²⁷ Baka tu jaa hën Gaama Felikisi kumutu a gaama, hën de buta wan otowan de kai Polisiusi Fesitu fu tja di köndë. Nöö fa Felikisi kumutu dē, a disa Paulosu leti a dunguwosu dē fu di a kē abi bunu nē a dee Dju sëmbë hedi. Hën mbei an puu ën möönsö.

25

Aki dee Isaëli sëmbë ku Paulosu ta fan a Gaama Fesitu fesi.

¹ Baka dii daka u di Gaama Fesitu ko a Sesalia faa subi a gaama, hën a go a Jelusalen go waka.

² Nöö di a go dou, nöö hën a ta fan ku dee Gaan Begima ku dee oto tiima u dee Dju sëmbë. Hën de tja kaagi u Paulosu ko dēën wantewante.

³ Hën de begi Gaama taa gaantangi be a du de wan bunu, be a manda Paulosu ko a Jelusalen da de. Nöö fa de ta begi ën dē, nöö de ta seeka u te a mandëën da de, nöö de tapëën a pasi kii.

⁴ Hën Gaama piki de taa: “Wë fa Paulosu dē a Sesalia dē, a dē a wakitima kaa, nöö be a dē fëën nöö. Abiti möön nöö mi seei o toona go ala.

⁵ Nöö te mi nango, nöö un sa manda so u dee fesima fuunu ko ku mi. Ee Paulosu bi du wan hogi nöö un sa tja kaagi fëën go kuutu ala.” Sö a piki de.

⁶ Hën Gaama fika a Jelusalen kuma teni daka sö ufö a pasa go a Sesalia awaa. Tefa di dobooko hën a ko sindo a kuutu. Hën a manda sëmbë taa be de tja Paulosu ko nëën.

⁷ Nöö di de tja Paulosu ko dou, nöö hën dee Dju sëmbë dee kumutu a Jelusalen lontu ën buta a djegi. Hën de tja sëmëni kaagi fëën ko konda da Gaama taa a ta du gaan hogi. Ma fa de ta fan dē seei, ma de an saanfa u taki ën te Gaama sa si taa sö Paulosu bi du tuu.

⁸ Paulosu seepi piki de taa: “Fa mi Paulosu dē aki, ma buuse na wan u dee Isaëli wëti fuu. Ma du soni di na bunu a di Wosu u Masa Gadu wan daka. Ma du soni na bunu ku di Gaan Könu u Loomë wan daka tu. Fa mi dē aki, na wan u dee soni dē mi du wan daka.”

⁹ Di Gaama haika tefa a kaba, nöö a kë feni bunu në a dee Dju sëmbë. Nöö hën a hakisi Paulosu taa: “Wë i sa go a Jelusalen be de go kuutu dee soni de ta taki aki a mi fesi ala ö?”

¹⁰ Hën Paulosu piki Gaama taa: “Ka mi dë taanputaanpu aki a wan u dee kuutu wosu u di Gaan Könu u Loomë, mi dë aki kaa, nöö de sa kuutu mi leti aki. Biga ma du dee Dju sëmbë hogi wan daka, leti kumafa i seepi sabi dë, fu de puu mi aki tja go ala.

¹¹ “Ee mi bi du wan gaan hogi tjika fu de kii mi, nöö ma bi o fëëë sitaafu fëën. Ma dee soni dee sëmbë ta kaagi mi aki, nöö ee de aan leti nöö na wan sëmbë a’ pasi fu de tei mi buta a de maun fu de du hogi ku mi. Fa mi dë aki, mi kë go a di Gaan Könu a Loomë e, be a kuutu da mi.”

¹² Di Paulosu taki sö te a kaba, Gaama jei. Nöö hën hën ku dee oto kuutama fëën dee ku ën ta tja di köndë, go a së go kuutu te de kaba. Hën Gaama piki Paulosu taa: “Wë antoobi. Di i taa i kë go a di Gaan Könu, nöö mi o manda i go nëën.” Nöö di a taki sö kaa, nöö hën di taki dë kaba.

Aki Könu Agiipa ku Gaama Fesitu ta fan.

¹³ Hën de dë tefa wan daka. Hën di Isaëli könu de kai Agiipa hën ku ën sisa Benisi ko a Sesalia ko wai ku Gaama Fesitu fu di de butëën Gaama u di köndë.

¹⁴ Nöö di de ko, hën de sai naandë sëmëni daka. Hën Gaama Fesitu fan soni u Paulosu ku Könu Agiipa, a taa: “Di womi di bi dë gaama a mi fesi de kai Felikisi, di a kumutu a gaama, hën a disa wan womi söötösöötö a dunguwosu aki.

¹⁵ “Nöö hën di mi go a Jelusalen, hën dee Gaan Begima ku dee gaan womi u Dju tja kaagi u de womi ko da mi ko begi mi gaantangi taa mi musu da di womi adjabëë da de.

¹⁶ “Hën mi piki de taa an dë guwenti fuu dee Loomë sëmbë fu da wan sëmbë adjabëë söndö na kuutu u kai fu hënseei musu piki dee sëmbë ku ën a’ soni.

¹⁷ “Nöö di mi taki sö kaa, hën de ko a Sesalia aki. Nöö ma buuja. Di dobooko fëën wante, hën mi go sindo a kuutu fu mi kuutu da de. Hën mi manda sëmbë taa be de tjëën ko a mi.

¹⁸ “Hën dee felantina fëën hopo taanpu a pë fu de kaagi ën konda dee soni fëën da mi. Ma de an taki gaan hogi fëën kumafa mi bi mëni taa de bi o taki.

¹⁹ Ma de ta fia ku ën a di së u di biibi u de soni. De ta fia ku ën fu wan dëdë sëmbë de kai Jesosi, ma Paulosu ta piki de kodo taa a dë ku libi eti.

²⁰ “Nöö fa de ta fia ta fan dë, mi ta jei, ma ma saanfa u kuutu möönsö a di së u dee keiki soni u de. Hën mi hakisi Paulosu ee a kë go a Jelusalen fu de tja dee kaagi fëën go kuutu ala.

²¹ “Ma a taa a kë fuu sa hoi ën aki fu te u sa mandëën go da di Gaan Könu a Loomë be hën kuutu di taki seeka dëën. Hën mi manda dee wakitima taa de musu hoi ën da mi. Te mi feni okasi, nöö mi o mandëën go da di Gaan Könu.”

²² Di Gaama Fesitu taki sö kaa, hën di könu taki dëën taa: “Wë miseei kë jei fa di womi ta fan.”

Hën a taa: “Wë antoobi. Amanjan wante nöö joo jei ën.”

Aki de seti kuutu Paulosu baka.

²³ Hën di dobooko fëën hën Könu Agiipa ku Benisi ko dou. Nöö di de ko dou, hën dee sëmbë u di köndë ta wai ta mbei piizii da de te na soni. Hën de denda a di kuutu wosu ku dee hedima u sodati ku dee tiima u di köndë. Hën de ko sindo. Hën Gaama Fesitu manda sëmbë taa de musu tja Paulosu ko da de. Hën de tjëën ko.

²⁴ Hën Gaama Fesitu seti di kuutu taa: “Wë Köndë Masa, hedima u köndë ku föluku, ja si di womi u tja ko taanpu a u fesi aki. Wë nöö hii dee Dju sëmbë fu

Jelusalen te dou ku Sesalia aki tuu tja kaagi fëen ko da mi. De bai taa a musu dëdë, an musu dë a libi möön. Nöo hën di womi wë i si disi.

²⁵ “Nöo fa mi wegi soni fëen luku tefa mi kaba aki, ma si a du soni tjika faa musu dëdë e. Ma di hën seepi taki taa a kë go a di Gaan Könu faa kuutu dëen, nöo hën mi piki taa mi o mandëen go a Loomë kumafa a kë.

²⁶ “Ma nöo wan soni toobi mi. Ma sabi di soni fëen fini tjika fu mi mbei pampia manda da di Gaan Könu taa sö wan soni a du. Hën mbei mi manda kai ën faa ko a u aki, be un kuutuma tuu musu jei fa a o taki, ma u kë be Könu musu haika möön fini. Nöo fa a o taki te a kaba aki, i musu feni piki mi fu mi manda pampia da di Gaan Könu.

²⁷ “Biga an bunu da mi u mi manda wan sëmbë buibui da di Gaan Könu söndö pampia e. Mi musu piki ën di soni di u ku ën abi te mi mandëen go.”

26

Aki Paulosu ta fan ku Gaama Fesitu ku Könu Agiipa.

¹ Wë nöo di di Gaama taki sö te a kaba, hën Könu Agiipa taki da Paulosu taa: “Womi, wë da di soni aan soni. I sa piki kumafa di soni fii dë, boo jei.”

Hën Paulosu hopo maun a liba da de faa fan ku de.

² Hën a taa: “Köndë Masa, kölöku tja mi fu di mi ko dou a i aki, fu ko piki i fu hii dee soni dee Dju sëmbë tja mi ko kaagi da unu.

³ Wë biga i sabi hii dee guwenti fuu Isaëli sëmbë finifini, te dou ku dee soni dee u ta fia ta taki. Nöo fa i si mi o fan ku i aki, nöo mi begi i hoi pasensi haika mi.

⁴ “Fa dee Dju hedima tja kaagi u mi ko da i aki, an bi dë fanöudu fu de du sö e. Biga fu sensi di mi bi dë pikiwan ta libi a mi köndë te kisi Jelusalen fu tefa u dë aki, hii dee Dju sëmbë tuu bi sabi fa mi ta libi.

⁵ Biga de sabi mi longi kaa. Nöo ee de bi kë, nöo de bi sa taki da i taa Faliseima mi bi dë. Nöo dee sëmbë fuu dee dë u di paatëi dë, de ta hoi dee wëti u Dju möön hii dee oto sëmbë fuu tuu. Nöo söseei miseei bi ta hoi de tu.

⁶⁻⁷ “Nöo kumafa i seei sabi kaa, Masa Gadu bi paamusi dee fesiten sëmbë fuu taa te wan daka dëdë sëmbë sa weki baka. Nöo, Köndë Masa, di soni Masa Gadu paamusi dë, nöo hii u dee tuwalufu lö sëmbë fu Dju, u tuu këen. Hën mbei u ta lesipeki Gadu ta begi ën a ndeti ku didia nöömö fuu tuu musu feni ën. Ma tökuseei dee Dju sëmbë seei ta kuutu a mi liba fu di mi ta piki di soni dë taa a dë sö tuu.

⁸ “Köndë Masa, faandi mbei un Isaëli sëmbë wan sa piki taa Masa Gadu sa weki sëmbë puu a dëdë köndë?”

⁹ “Ma wë sö mi seepi bi dë tu o. Biga mi bi abi di pakisei taa mi musu ta biinga u tapa dee soni u Jesosi fu Nazalëti, fu në fëen an musu kisi gafa.

¹⁰ Nöo hën wë da di soni di mi bi ta du a Jelusalen. Dee Gaan Begima fuu seei da mi taki taa sö mi musu kisi dee sëmbë u Jesosi tja go söötö a dunguwosu. Nöo fa de bi ta manda sëmbë u de kii de dë, nöo mi seepi bi dë a dendu tu.

¹¹ “Sömëni pasi mi bi ta denda a dee keikiwosu fuu go kisi dee biibima fu Jesosi ta sitaafu. Mi bi ta buta ku de seei fu de musu poi hën në taa de an dë ku ën möön. Mi bi dë fajafaja a di soni dë tee mi ta kule ta suku de te dou a dee köndëköndë na u Isaëli ka de bi kule go, fu mi sa sitaafu de.

¹² “Nöo a di soni dë mi bi nango a Damasikusi e. Fa mi nango dë, nöo dee Gaan Begima fuu bi da mi pampia ta da mi pasi a dee hogi mi nango du dë.

13 Ma nöö Köndë Masa, fa mi bi nango dë, a wan juu ten fu sonuati, hën mi si wan gaan limbo kumutu a gaangadu, a sëndë möön sonu lontu u koti zaaa tapa, mi ku dee sëmbë nango ku mi dë.

14 Hën u tuu panta te u tombi kai a goon.

“Hën mi jei wan tōngō kuma sëmbë. A fan ku mi a u Isaëli tōngō hakisi mi taa: ‘Womī Saulosu, faandi mbei i ta sitaafu mi sō? Ja ta si taa ku i seei i ta du hogihogi nō?’

15 “Hën mi hakisi ën taa: ‘Ee Masa, ambë ta fan ku mi aki?’

“Hën a taa: ‘Mi wë e, Jesosi, di sëmbë di i si i ta sitaafu sō.

16 “ ‘Nöö hopo taanpu e. Biga mi ko a i fu tei i ko futuboi u mi. Nöö fa mi ko a i tide aki, nöö i musu taki ën da sëmbë, te dou ku hii dee oto soni dee mi o toona lei i möön.

17 “ ‘Nöö fa i si mi ta manda i aki, nöö na fëëë. Mi o taanpu ku i a hii së ka mi o ta manda i go, fu dee Dju sëmbë ku dee sëmbë na Dju tuu an o sa feni i kii.

18 “ ‘Biga mi ta manda i fii musu ta fan ku de e, be wojo u de ko limbo, be de kumutu a di së u dungu ko a di së u limbo. I musu fan ku de puu de a di kaakiti u di didibi basu, be de feni di heepi u Gadu. Nöö fa de o piki i buka dë, nöö ma o hoi dee hogi du u de a bëë möön. Nöö mi o konda de a dee otowan u mi dendu dee ko dë apaiti da Gadu fu di deseëi bi biibi a mi tu.’ Sö a taki da mi e.

19 “Nöö Köndë Masa, wë di soni di ko a mi dë, nöö Masa Gadu soni wë. Nöö ma niingëën. Mi piki leti kumafa a taki da mi.

20 Biga mi go a Damasikusi hën mi go konda di buka da dee sëmbë fu ala te mi kaba. Hën mi toona go a Jelusalen go fan ku dee sëmbë a Jelusalen te dou ku dee oto Dju sëmbë u hii Judea köndë tuu. Nöö hën mi toona fan ku dee sëmbë na Dju. Fa mi ta konda di buka da dee sëmbë a dee köndëköndë dë, nöö mi ta taki da de taa de musu disa di hogilibi u de bia ko a di së u Masa Gadu. De musu libi bunu be hii sëmbë sa si taa hati u de bia tuu.

21 “Nöö fu di mi ta waka ta konda di buka da dee Dju sëmbë ku dee na u Dju tuu dë, nöö fëën hedi dee Dju sëmbë kisi mi a di Wosu u Masa Gadu a Jelusalen dë ta biinga u de kii mi.

22 “Ma Masa Gadu heepi mi mbei de an kii mi. Nöö hën i si mi dë ku libi te tide eti, ta taanpu aki ta konda dee soni u Gadu nöömö da sösö sinkii sëmbë ku hedima tuu. Ma ta taki wan oto soni möön leki dee soni Mosesi ku dee oto fesiten tjabukama fuu bi ta taki.

23 Biga de bi ta konda taa a bakaten di sëmbë de kai di Keesitu o ko, nöö de o dëën sitaafu kii. Hën o dë di fosu sëmbë o dëdë weki a goonliba faa feni libi u teego. Nöö a o jabi pasi da dee Dju sëmbë fëën ku dee na Dju sëmbë tuu u de sa ko a di së u limbo. [Sö dee fesiten sëmbë bi taki e, nöö fa u dë aki nöö a ko pasa tuu.]”

24 Di ka Paulosu fan dou dë, nöö hën Gaama Fesitu bai taa: “Paulosu, i lau e. Dee hia soni fii i lei dë mbei i ta fan laulau sō.”

25 Hën a piki taa: “Mi lesipeki Köndë Masa, ma lau e. Dee soni mi ta taki aki nöö tuutuu soni de dë e, fii musu sa pakisei.

26 Nöö mi sabi taa di Könu sabi de kaa, biga de an pasa a wosu dendu tjubitjubi fu sëmbë an sa sabi de. De tuu pasa a lanti wojo wajaa. Hën mbei ma ta fëëë u taki de.”

27 Hën a bia hakisi di Könu taa: “Könu o, dee soni dee fesiten tjabukama u Masa Gadu bi sikifi buta dë, ja ta piki de nö? Mi sabi taa i ta piki de.”

²⁸ Hën Könu piki ën taa: “Wë ma womi, fa i ta fan ku mi aki, i mëni taa i sa mbei mi ko biibi a Jesosi wantewante aki sô nô?”

²⁹ Hën Paulosu piki ën taa: “Ee wantewante i sa ko, ee te bakaten seei, ma a’ toobi. Ma mi ta begi Masa Gadu da i ku dee otowan ta haika mi aki tuu taa un sa ko kuma mi, boiti di fa mi dë buibui a maun aki.”

³⁰ Di Paulosu taki sô kaa, nôö hën Könu Agiipa ku Gaama Fesitu hopo, de ku Benisi ku hii dee otowan tuu dee bi dë sindosindo dë, hën di kuutu booko.

³¹ Nôö fa de nango dë, hën de ta fan ku deseeri taa: “Di womi aki an du hogi möönsô fu de musu kii ën e. An musu dë a dunguwosu seei.”

³² Hën di kënu fan ku di gaama taa: “Ee an bi hakisi i kaa fii mandëën go a di Gaan Könu u Loomë, nôö u bi sa puu ën a dunguwosu. Wë ma di a hakisi i sô kaa, nôö wa sa puu ën möön.”

27

Aki de ta tja Paulosu go a Loomë.

¹ Hën de dë te wan daka, hën de buta taa de o manda Paulosu ku wanlö oto sëmbë söötösöötö ku bui go a Loomë. Nôö hën de tei wan sodati kabiteni de kai Julisi buta faa musu tja dee sëmbë dë go a di Gaan Könu. Nôö di kabiteni dë ta wooko da di Gaan Könu seei.

² Nôö di juu dë, wan zeboto bi kumutu a di köndë de kai Adamitia, ko tjökö a Sesalia dë, ufö a o go a Italia Köndë. Nôö a di boto dë de o tja Paulosu, biga a Italia Köndë Loomë dë. Nôö di boto o ta nama a dee köndëköndë fu di ze bandja u Asia nango te a dou a Italia.

Hën u subi a di boto dë tefa u kaba. Hën u wai buta a mindi. Nôö fa u nango dë, nôö di womi u Masadonia de kai Alisitakusi di ta dë a Tesalonika hën o go ku u tu.

³ Hën di dobooko fëën hën u nango tefa u nama a Sidon. Nôö di sodati kabiteni libi bunu ku Paulosu. Biga a dëën pasi faa go a tela a dee mati fëën fu de sa sölugu ën.

⁴ Hën u toona ko subi a boto. Hën u buta a mindi. Ma di ventu ta hai u baka taanga te wa sa go. U musu ta waka a bandja së u di paati de kai Sipuusi nango ka di ventu an ta hai u baka sô möön.

⁵ Baka fëën möön, hën u waka a di ze langalanga ta pasa dee köndë u Silisia ku Panfilia, hën u go nama a di köndë de kai Mila u Lisia köndë.

⁶ Hën di u ko dou, hën di sodati kabiteni ko si wan boto fu di köndë u Afiiikan de kai Alekesania nango a Italia. Hën a mbei u tei di boto dë.

⁷ Nôö di u kumutu a Mila, wa sa waka hesi. U ta waka teigiteigi ta ko nöömö te dou sömëni daka ufö u ko zuntu ku di köndë de kai Kinidusi. Tökuseei wa dou möönsô. Di ventu ta hai u baka kodo te wa sa go a di pasi di u bi musu go möön. Hën u ko pasa di paati de kai Saamoni kisi di gaan paati de kai Keeta, nôö hën u ta waka a di së bandja fëën ka di ventu an ta naki u sô möön.

⁸ Ma nôö fa u ta waka zuntu ku di bunu së u di paati nango dë seei, ma tökuseei di ventu ta tja u nango baka eti. Nôö hën u ta waka ku taanga nango, tefa u go nama a wan kamian u Keeta de kai Bumbuu Lampeesi. A dë zuntu ku di köndë de kai Lasea.

⁹ Nôö fa u ta du dë, u ta lasi ten seei. Biga di gaan begi daka u dee Dju sëmbë di de ta begi söndö njan pasa kaa, nôö te di daka dë pasa nôö an bunu u waka a di ze möön.

Te wan pisi hën Paulosu hopo bai de taa:

¹⁰ “Womi, mi si taa ee u kumutu aki go möön, nôö di boto o booko nôö woo kisi makei. A kandë lai fuu o go. A kandë so fuu o dëdë tu.”

11 Fa Paulosu fan dë, hën di sëmbë abi di boto ku di sëmbë di ta tjëen, piki taa de sa go. Hën di sodati kabiteni nama ku de, an piki di fan u Paulosu.

12 Nöo di gaan së u dee sëmbë dee dë a di boto, deseei tu an kē tan a Bumbuu Lampeesi dë. Biga di kamian an bunu da di kötō wei, nöo de kē biinga luku ee de sa go dou a di köndë de kai Fenikisi go tan ala tefa di kötō ten pasa. Biga Fenikisi hën da wan bunu lampeesi u Keeta. Di ventu an ta kisi taanga ala a hii së kumafa a ta kisi a Bumbuu Lampeesi.

13 Hën u dë te wan pisi. Hën wan ventu kumutu a di ze ko a u, an bigi. Nöo di lö ventu dë, hën de mëni taa de kē. Nöo di a ko wante, nöo hën de hai di hanka u di boto. Nöo hën u tuusi buta a mindi. Hën u ta waka langalanga a bandja së fu di paati kumafa u sa waka zuntu ku tela tjika.

14 Ma fa u nango dë te fuu kē mëni, nöo hën wan gaan ventu kumutu a di oto së u di paati dou a u. Nöo di ventu dë, hën da di gaan ventu u di ze.

15 Hën a kisi u a wataliba dë vuuu ku di boto. Hën a bia u vooou go a di ze mindi piiii. De biinga u tii di boto te de wei hën de disa. Hën di ventu ta tja u go ka a kē a sösō kamian.

16 Te wan pisi hën u ko zuntu ku wan piki paati de kai Kalauda, ka di ventu an ta kisi u taanga sō möön. Nöo hii fa u nango dë, u ta hai wan piki boto ta tja ku u,

17 nöo hën u hopo ën hai ku taanga tuwë ko a di boto dendu gbogolou. Hën baka fëen hën de tei köödëi hën de tai di gaan boto lontu hii ën sinkii ko dou fu di ventu an musu tjëen go booko.

Nöo hën de fëë taa di boto o tjökō a di gaan sandu de kai Siite. Nöo hën de saka di zei di dë a di boto zaaa ko basu fu di ventu an sa tja u go hesi sō möön. Nöo di de seeka sō te de kaba, nöo hën di boto dë a di wata liba ta diipi nango ta ko ta tja u go ka di ventu kē.

18 Di dobooko fëen, hën di gaan ventu ta kisi u eti ta seki di boto taanga kuma a sa singi u. Hën de puu hafu u dee lai a di boto tuwë go a wata.

19 Di u dii daka fuu di u kumutu a lampeesi, hën dee wookoma u di boto seei tei dee wooko lai u di boto tuwë go a wata.

20 Hën u dë a di boto dendu sëmëni daka. U hopo wojo luku liba te u wei, wa ta si teeja möönsō. Wa ta si sonuwojo. Di gaan ventu an ta saka möönsō, te nöo na wan fuu ta mëni möön taa woo kumutu ku libi.

21 Nöo di ten dë, dee sëmbë bi dë longi söndō njan. Biga de bi dë ku gaan pakisei te na wan u de ta mëni soni u njan möön.

Hën u dë te wan pisi, nöo hën Paulosu hopo taanpu a u mindi. Hën a taki da de taa: “Womi, hën di soni aki wë mi bi taki da unu taa wan boo kumutu a Keeta e. Ee u bi tan ala di soni aki an bi o miti u, nöo dee lai fuunu an bi o kaba a sösō.

22 “Ma nöo haika, un tai hati e. Di boto hën a o booko kaba a sösō, ma na wan fuu o lasi u libi. U tuu o kumutu.

23 “Nöo di soni mbei mi taki sō. A di ndeti, hën di Gadu di mi ta dini aki, a puu wan basia fëen köndë manda ko taanpu a mi bandja ko fan ku mi, biga mi dëen sëmbë.

24 Hën a taki da mi taa: ‘Womi Paulosu, na panta e. I musu nango te i dou a di Gaan Könu fesi nöömō faa kuutu soni fii. Nöo Gadu dë ku i. A o da i hii dee sëmbë ku i ta waka a di boto aki, de tuu o kumutu. Na wan u de o dëdë.’

25 “Wë nöo womi, mi ta futoou Masa Gadu e. Di soni i si a manda ko piki mi aki, sō nöo a o pasa nöömō. Hën mbei mi ko fan ku unu taa un tai hati e. Woo libi.

26 Ma fa i si u nango aki, di ventu o tja u go naki a wan paati, ma u tuu o kumutu.” Sö Paulosu fan ku u.

27 Nöo hën u dë tee di u teni-a-fö ndeti fuu, di ventu ta tja u nango zaaa eti a di pisi u di ze de kai Adiia. Nöo hën kuma a di tuwalufu juu fu ndeti, hën dee tiima u di boto ko ta fii taa u ta zuntu ku së tela.

28 Nöo hën de maaka di wata luku. A fundu föteni mëti. Hën di u go wan pisi möön hën de toona maakëën möön, hën a ko diiteni mëti.

29 Hën de ko panta taa di boto o go naki booko a wan sitonu kamian. Hën de saka fö hanka tuwë go a wata djolou a di boto gogo. Hën de ta begi soni fu didia musu ko.

30 Nöo di juu dë dee sëmbë ta tii di boto, de kë fusi go. Nöo hën de go puu di piki boto u bi ta tja a di boto dendu dë tuwë a wata. De ta ganjan u otowan mbei taa de kë tuwë hanka a di boto hedi së. Ma möiti wë de ta mbei fu de go disa u otowan a di boto dendu.

31 Ma Paulosu si de. Nöo hën a piki di kabiteni ku dee oto sodati sai dë taa: “Ee dee tiima u di boto kumutu go disa u, nöo wan o libi möön e. Woon dëdë.”

32 Nöo di dee sodati ko jei sô kaa, hën de hopo kisi de ufangi hën de koti dee tatai u di piki boto tuwë. Di boto diipi go fiaa.

33 Hën di ganian kanda, hën Paulosu fan ku de taa: “Un haika e, dee sëmbë. Tide mbei teni-a-fö daka un dë aki ku bookohedi. Hati fuunu ta latja te wan ta njan.

34 Nöo mi begi unu be un njan wan pikiwan. Biga ee wan njan nöo woon dëdë. Wan panta tumisi e. Biga na wan niën fuunu hedi uwii seei o lasi.”

35 Hën di a taki sô kaa, hën a tei wan bëëë. Hën a da Masa Gadu tangi a de tuu fesi te a kaba. Nöo hën a booko wan pisi, hën a ta njan.

36 Nöo di de tuu si sô kaa, nöo hën de tai hati, hën deseei njan tu.

37 Nöo u dë tuhöndö ku sëbënteni-ku-sikisi womi a di boto dë e, sô u bi hia tjika.

38 Nöo di u njan te u kaba, hën u bigi puu lai möön ta tuwë a wata fu di boto musu möön fukë. Dee lai u ta puu ta tuwë a wata dë, de dë sakusaku u di soni de ta mbei boon.

39 Tefa kamian limbo, hën de ta si tela ma de an sabi di kamian. Hën de luku ën hën de si taa di kamian abi wan godo dë ku sandu balalaa. Nöo hën de taa de o biinga luku ee de sa tjökö di boto nëën.

40 Hën de koti dee tatai ta hoi dee hanka tuwë disa a di ze. Hën de lusu dee tatai ta hoi dee pada. Hën de hopo di zei seeka faa sa kisi di ventu möön taanga be a tja u go a fesi möön hesi. Nöo di de seeka sô te de kaba, nöo hën u nango zaaaa faa tja u go dou a di sandu.

41 Nöo di u nango, te fuu kë sabi hën di sipi hedi tjökö a di sandu djoo ka tu ze buka ta kule ko miti. U peka gingin. Fa u peka dë, nöo di boto hedi hën peka, an sa buli. Ma di wata ta naki di boto gogo nango ta ko djugudjugu tefa a booko pispisi.

42 Nöo di dee sodati si sô kaa, de panta taa dee sitaafuma o sun go kumutu, nöo de kë kii de wante.

43 Ma di sodati kabiteni an kë u de kii Paulosu, hën a bai de taa be de disa dee sëmbë, be de an kii de. Hën a taa, dee sëmbë dee sa' u sun nöo be de fosu djombo go a wata sun go a së.

44 Nöo dee sëmbë na sabi u sun, nöo de musu subi a dee paanga liba ku dee bookobooko boto pisi liba, nöo de hai go a së.

Nöo di u du sô kaa, hën u tuu dou a tela. U libi.

¹ Nöo di u nango te u go dou ku libi a tela ufö u ko sabi taa di paati u naki dë hën de kai Malita.

² Nöo dee sëmbë u di köndë kisi u ku wai, de hoi u bunu, de mbei u sëmbë. Fa di tjuba ta kai ta fon u dë u ta kötö, hën de zunta faja da u, u ta këndë.

³ Paulosu seei ta pii udu ta tja ko zunta faja. Te wan pisi hën di faja kendi wan sindeki a di udu dendu, hën a kumutu ko njan mën a maun gaa peka gingin.

⁴ Hën di dee sëmbë u di köndë si di sindeki pekapeka nëen maun, hën de taa: “Wë di sëmbë di sindeki njan peka nëen maun aki, goonliba si taa an dë fa a libi möön e. Biga de singi a ze kumutu, an dëdë, nöö hën di sindeki njan mën. Wë nöö di sëmbë dë musu dë wan hogisonima.” Sö de taki.

⁵ Hën Paulosu sakwi di sindeki vau puu tuwë a faja. Fa a njan mën dë seei, töku na wan soni du ën.

⁶ Di juu dë, dee sëmbë dë pii ta luku. Biga de ta mëni taa ka a njan mën tjika dë, nöö te wan pisi maun fëen o soi ee nasö a tombi kai dëdë. Hën de luku ën te de wei, soni seei an du ën möönsö. Hën de bia pakisei taa: “Wë di sëmbë dë, a musu u dë wan gadu. Biga di sindeki aki an sa njan sëmbë sö, nöö a fika ku libi.”

⁷ Nöo di hedima fu di paati dë hën de kai Pubiisi. Nöo a abi wan gaan pisi u di köndë zuntu ka di sindeki njan Paulosu dë. Nöo hën a tja u go nëen. Hën a sölugu u bunu hoi u seei dii daka longi.

⁸ Nöo di tata u di hedima bi dë suwakisuwaki. Fëbë ku hëë dë ku ën te na soni. Nöo hën Paulosu go nëen go begi dëen te a kaba, hën a nama maun nëen. Hën di tata bëtë gbege. A ko bunu.

⁹ Nöo di dee sëmbë ta libi a di paati jei sö, hën de go piki hii dee sikima u de a hii dee köndëköndë u di paati, hën de tuu ko a u ko suku heepi nöö hën de tuu fia ko bunu.

¹⁰ Hën de bigi u a sömëni fasi seei. Tefa di daka woo kumutu dë, hën de buta dee soni u a’ fanöudu a boto da u.

¹¹ Nöo u bi a’ dii liba naandë. Nöo di woo go, hën u tei wan boto fu Alekesania de kai “De Tumii u Liba”. A bi sai dë ta luku fu di kötö wei musu pasa. Hën u subi nëen wai buta a mindi.

Aki Paulosu go dou a Loomë.

¹² Nöo di u kumutu a Malita hën u go nama a wan köndë de kai Silakuse. Nöo u hoi dii daka dë,

¹³ hën u kumutu. Hën u waka langalanga a di ze bandja. Hën u go nama a di köndë de kai Legiun. Dobooko fëen, hën wan ventu kumutu a u baka ta ko, nöö hën u kumutu ku ën. Hën di dobooko hën u nama a Puteoli.

¹⁴ Nöo di u ko nama a Puteoli, hën u ko si wanlö biibima u Masa Jesosi dë, hën de begi u fuu tan ku de sëbën daka. Hën u tan tefa di sëbën daka dou, hën u kumutu dë go dou a Loomë.

¹⁵ Wë nöö di u bi ta waka a futu fuu go dou a Loomë, nöö hën dee sëmbë u Masa Jesosi fu ala jei taa sö u ta ko. Hën de kai a pasi waka ko miti u. Hafu u de waka te dou a di wojowojo fu di gaan pasi de kai Apii. Hafu u de fika a di kamian de kai Dii Wakama Wosu ta luku u.

Nöo di Paulosu si taa sö de du, nöö hën a dëen taanga. Hën a da Masa Gadu tangi fu di piizii de mbei ku ën dë. Wë da sö di waka fuu waka bifö u dou a Loomë.

¹⁶ Nöo di u go dou a Loomë, hën de da Paulosu pasi fëen wanwan sa libi, ma a abi wan sodati ta watji ën.

Aki Paulosu ta fan ku dee Dju sëmbë a Loomë.

17 Nöo baka dii daka fëen fu di a dou, hën a kai dee hedima u Dju dee dë a Loomë taa be de ko nëen be a fan ku de. Nöo di de ko dou, hën a fan ku de taa: “Dee Isaëli sëmbë u mi aki, a Jelusalen wë mi kumutu. Ma fa mi dë buibui aki seei, ma na dee wëti u dee gaan sëmbë fuu mi poi e. Ma du hogi ku dee otowan fuu fu Isaëli tu, ma tökuseei de wë kisi mi a Jelusalen ala tja go da dee Loomë lanti fu ala.

18 “Nöo di dee lanti hedima ko öndösuku mi libi luku tefa de kaba, de an si föutu a mi seei möönsö fu de musu kii mi, nöo hën de kë puu mi a dunguwosu.

19 Ma nöo dee Dju sëmbë an kë piki. Nöo di ma si na wan oto baaku möönsö, hën mi taa mi kë ko a di Gaan Könu aki faa kuutu da mi. Ma fa mi ko aki seei, an dë taa mi kë tja kaagi u dee sëmbë fuu u Isaëli ko da di Könu e.

20 “Hën mbei mi kai unu fu mi fan ku unu, fuun saandi da di soni mbei mi dë buibui aki. Fu di mi ta biibi taa di Heepima u Isaëli di u bi ta mëni faa ko nöo a ko kaa, fëen hedi mbei mi dë söötösöötö ku di këti aki.”

21 Nöo di dee Isaëli sëmbë jei sö, hën de toona piki ën taa: “Wë nöo dee Isaëli sëmbë fuu a Judea ala an sikifi soni fii a pampia manda da u aki möönsö e. Na wan u dee sëmbë fuu dee kumutu ala tja kaagi fii ko da u aki tu.

22 “Ma nöo ee joo fan ku u a di soni di i, Paulosu, ta biibi, nöo fan ku u boo jei. Wë biga wan soni fu di biibi fii nöo u ta jei nöömö taa a hii kamian ka i ta taki a di njunjun biibi dë liba kaa, nöo a ta tja fia. Nöo u kë sabi soni fëen finifini e.”

23 Di de fan sö kaa, nöo hën de buta daka. Tefa di daka dou, nöo hën de ko a Paulosu te a hia nëen wosu. Hën a ta fan ku de wan hii daka fu tefa sapate, ta leti de fa Masa Gadu ko ta tii libisëmbë a wan hii njunjun fasi. Nöo fa a ta fan dë, a ta tei Gadu buku ta lesi dee soni Mosesi ku dee fesiten tjabukama u Masa Gadu bi sikifi, ta puu da de. A ta biinga ku de nöömö fu de musu biibi taa dee soni de bi sikifi buta dë, soni u Masa Jesosi wë de bi ta taki nöo awaa de ko pasa.

24 Nöo fa a ta fan ku de dë, de jei di fan. So u de piki taa tuu. Ma nöo so u de an kë tei ën seei.

25 Te wan pisi hën de hopo u de go. Hën Paulosu fan ku de wan pasi möön ufö de go taa: “Di Akaa u Masa Gadu bi abi leti e, di a bi ko a di tjabukama fëen de kai Jesaaja liba. Biga a fan ku dee gaan sëmbë fuunu taa:

26 Go fan ku dee Isaëli sëmbë aki taa:

‘Woon ta haika soni nöömö

ma wan o ta fusutan.

Woon ta luku soni nöömö

ma wan o ta si soni möönsö.’

27 Biga dee sëmbë dee i si u ta fan ku de aki,
de a’ taanga hati te de an sa bia pakisei möönsö.

De a’ taangajesi poi.

De tapa de wojo seei u de an si soni.

Ee de an bi tapa wojo,

nöo de bi o si soni ku de wojo,

nöo de bi o jei soni ku de jesi,

de bi o a’ fusutan a de hedi dendu,

nöo de bi o bia ko a mi.

Nöo mi bi sa kula de.

Ma de an kë.

28 Sö Gadu bi fan ku dee gaan sëmbë fuunu, nöo mi kë mbei un sabi taa sö un dë te tide eti.

“Wë nöö di wan ta kë piki di buka u Masa Gadu aki faa heepi unu, nöö mi taki da unu taa a ta manda di Buka go da dee sëmbë dee na Isaëli e, nöö de o piki.”

[²⁹ Di Paulosu fan sö tefa a kaba, hën dee Dju sëmbë kumutu dë. Nöö fa de nango dë, hën de ta fia wan gaan fia nango fu di fan a fan ku de dë hedi.]

³⁰ Baka u di dë, hën Paulosu libi a di wosu hii tu jaa longi, ta paka di wosu hënseei. Nöö a ta kisi hii dee sëmbë dee ta ko nëën tuu ku wai.

³¹ A ta konda nöömö fa Masa Gadu tja wan njunjun tii ko, nöö a ta lei dee sëmbë ta ko nëën dë dee soni u Masa Jesosi Keesitu nöömö. An ta fëëë seei u taki de. Nöö sëmbë an ta tapëën tu fu an taki de.

A kaba.

Di biifi Paulosu manda da dee biibima u Loomë

Wan wöutu a fesi.

Söö. Wë di pisi u Gadu Buku aki sò, nöö di tjabukama u Masa Jesosi de kai Paulosu hën sikifi ën manda da wanlô biibima u Masa Jesosi a di köndë de kai Loomë. Nöö fa a sikifi ën da de dë, nëen bi tja de ko a biibi e. Ma a buta taa a kè mbei wan lëisi faa go haika dee sëmbë u Loomë naandë. Nöö hën mbei a sikifi di biifi aki da de u de sabi ambë dëen, ku andi da di buka di a ta konda.

Nöö a di biifi aki, Paulosu ta lei gbegedee seei dee soni ku dee soni dee dë a di Buka u Masa Jesosi dendu. Nöö di mama sondi a taki a di biifi dë taa: Libi u teego fii fendì, nöö an dë sondi di wan sëmbë sa kisi ku ën seei kaakiti möönsö. Ma Gadu hën ta da u ën ku ën bunuhati te u nama ku Masa Jesosi.

Nöö Paulosu ta taki a sëmëni oto soni liba tu, a di biifi aki dendu. A ta lei fa hii sëmbë dë a wogi du basu, nöö de tuu o kisi sitaafu a Gadu ee na de biibi a Masa Jesosi liba. Hën tó sa mbei i ko limbo a Gadu wojo. Hën a toona ta lei fa di Akaa u Gadu tó nöö sa puu wan sëmbë fu an musu libi hogilibi möön.

Nöö a ta lei andi dee wëti u Gadu kè taki, ku fa dee Dju sëmbë ku dee sëmbë an dë Dju tuu dë a dendu u dee sondi Gadu buta faa du. Sëmëni oto soni a lei dee sëmbë u Loomë u de fusutan di Buka möön bunu.

Nöö di a o tapa di biifi, nöö hën a lei fa biibima ku biibima musu ta libi ku deseei makandì, ku fa de musu ta libi ku lanti. Nöö hën a tapa di biifi ku odi apaiti.

Nöö te joo lesi di biifi aki, nöö joo si fa Paulosu bi abi fusutan tjika fu dee soni Gadu du da u a Masa Jesosi. Nöö i seei o ko abi möön bunu fusutan u de tu.

Aki di pampia seti.

¹ Wë dee sëmbë u Loomë dë, mi ta manda gan odi da unu. Nöö di sëmbë di ta mbei di biifi aki, nöö mi da Paulosu, wan futuboi u Jesosi Keesitu di hënseei kai buta apaiti fasi taa mi musu dë wan tjabukama fëen ta konda di Bunu Buka u Gadu da sëmbë.

² Nöö di Buka mi ta konda aki sò, nöö Gadu bi paamusi ën gaanduwe a fesi e. Biga a bi taki ën da dee fesiten tjabukama fëen, nöö hën de sikifi ën buta a di Buku fëen.

³ Nöö di Buka aki, a nama a di Mii fëen de kai Jesosi Keesitu, di dë di Masa fuu.

Fa Jesosi sai dë, dee sëmbë, a libisëmbë fasi nöö a bi dë di bakamii fu Könu Dafiti,

⁴ ma nöö te i luku ën te i kaba, nöö i ta si gbegedee taa Gaangadu Mii seei di dë. Biga libi fëen bi dë limbolimbo söndö föutu, ufö a weki baka a dëdë a wan kaakiti fasi. Sö di Akaa u Gadu bi dë nëen tjika.

⁵ Nöö di Mii u Gadu di u ta taki aki, hën wë libi ku u ku ën bunuhati. Hën a da u di wooko fuu sa ta tja di Buka fëen ta paaja da dee peipei sëmbë u goonliba, be de sa biibi ën nöö de o sa piki ën buka.

⁶ Nöö un dee biibima u Loomë seei dë a dendu tu e, u dee sëmbë dee Gadu kai fuun ko dë sëmbë u Jesosi Keesitu.

⁷ Nöö hën i si mi ta mbei di biifi aki da unu.

Masa Gadu lobi unu e, dee sëmbë. A kai unu fuun ko dë apaiti sëmbë dëen. Nöo mi ta manda gaan odi da unu taa u Tata Masa Gaangadu ku Masa Jesosi Keesitu tuu musu ta tja unu ku de bunuhati. De musu da unu böö.

Aki Paulosu taki di fa a kë go haika dee biibima u Loomë tjika.

⁸ Wë nöo a di fosu kamian nöo mi ta da di Gadu fuu di mi ta dini aki tangi da unu tuu a Jesosi Keesitu në. Biga de tei di fa un ta biibi ën naandë tja go paaja a hii kamian.

⁹ Nöo fa mi ta dini ën ku hii mi hati ta konda di Bunu Buka fëen Mii aki, nöo hënseei dë kotoigima u mi e. A sabi taa ma ta fëekëtë unu a di begi u mi möönsö. Hiniwanten mi ta mëni unu.

¹⁰ Nöo mi ta begi ën nöömö, a kandë mi sa feni pasi fu mi dou a unu ala awaa, ee Gadu kë.

¹¹ Biga wë mi hangi u si unu gaanfa seei, dee sëmbë, u mi musu tja wan soni u di Akaa u Gadu ko paati ku unu, be di biibi fuunu ko möön taanga.

¹² Boo taki ën sö taa mi kë fu mi ku unu tuu musu miti fuu da u seei taanga, fa u ta biibi Gadu makandi aki.

¹³ Tuu e, dee sëmbë, mi kë mbei un ko sabi taa sëmëni pasi mi buta kaa fu mi sa ko a unu. Mi kë ko wini sëmbë a unu mindi naandë da Gadu, leti kumafa mi bi wini sëmbë a sëmëni u dee köndë ka dee sëmbë na Dju ta libi, ka mi bi ta waka. Ma nöo hën mi ta biinga te tide, soni ta tapa mi nöömö.

¹⁴ Fa mi ta konda di Buka u Masa Jesosi aki, dee sëmbë, nöo mi musu u kondëen da hii sëmbë e, dee sëmbë dee kisi lei ku dee an kisi lei wan bëtë, dee sëmbë dee ta fusutan soni bunu ku dee sëmbë dee an ta fusutan soni wan bëtë, de tuu mi musu ta konda di Buka da.

¹⁵ Hën mbei mi kë ko a unu a Loomë ala, be mi kondëen ala tu.

¹⁶ Nöo fa mi ta konda di Bunu Buka u, Masa Jesosi, Keesitu aki, nöo sen an ta kisi mi dëen wan pikiwan seei. Kwetikweti. Biga mi sabi taa hën ta tja di kaakiti u Gadu ko da hii dee sëmbë dee ta biibi ën fu de feni di heepi u Gadu, u de an lasi go kaba a sösö.

Nöo di Buka aki sö, fosufosu a bi dë fuu dee Dju sëmbë, ma fa u dë aki a ko dë da hii sëmbë tuu.

¹⁷ Hën ta lei u di fasi fuu sa ko bambuu a Gadu wojo. Nöo di fasi u ta taki aki, a Gadu a kumutu. Nöo ku biibi a ta seti, nöo ku biibi nöo a nango dou tu, leti kumafa de sikifi a di Buku u Gadu taa:

Di sëmbë di dë bambuu a Gadu wojo,

hën ta libi ku biibi nöömö nango.

Aki ta lei fa Gadu hati boonu ku dee sëmbë dee na a' bisi ku ën.

¹⁸ Dee sëmbë o, di hatiboonu u Masa Gaangadu a liba ala ta kai a so sëmbë liba kaa e, biga de an ta mëni Gadu seei. Fa de sai u de dë, nöo de ta biinga u tapa dee soni dee dë leti, fu di de kë libi di takuhatilibi u de go dou.

¹⁹ Wë biga ee fu de sabi soni u Gadu nöo de sa sabi ën o. Gadu seei wë mbei de sa sabi ën limbolimbo.

²⁰ Biga fa Gadu sai dë, ja sa si ën ku wojo e. Ma te i luku dee wooko fëen te i kaba, nöo i sa si di kaakiti fëen di dë u teego, ku di Gadu fasi fëen di a abi. Biga fu sensi di a mbei goonliba, dee soni dee a bi mbei dë limbolimbo u hii sëmbë sa si, hën mbei na wan sëmbë sa puu ën seei taa an bi sa sabi ën.

²¹ Ma hii fa dee lö sëmbë dee u bi taki dë sabi Gadu seei, ma nöo de an ta lesipeki ën ta dëen di hei di a abi taa a dë Gadu. Na tangi seei de ta dëen. Nöo fëen mbei de ko ta pakisei sösö soni, hati u de ta mëni wisiwasi te de an abi bambuu fusutan möön.

²² Hii fa de ta mbei taa de kõni seei, ma di soni dë mbei de toon gaan wisiwasima.

²³ Biga de tei di waiti u di Gadu fuu di an ta dëdë möönsö hën de tuwë go a kapëë. Nöo hën de bia mbei pindi u dee soni dee sa poi kaba a sösö buta nëen kamian, kuma libisëmbë, kuma fou, mbeti, ku dee soni dee ta hai ku bëë a goon. Dee lö soni dë de go pii tja ko ta dini a Masa Gadu kamian.

²⁴ Nöo fa de du ën tjika dë, nöo hën mbei Gadu disa de be de go du andi de kë ku dee hogihatilibi u de, tee nöo fa u dë aki de ko ta du dee soni dee na fiti libisëmbë u de du ku deseei a di së u manu ku mujëë soni. De ta poi deseei sinkii ta kaba a sösö.

²⁵ De tuwë dee leti soni u Gadu tuu fiaa a kapëë go tei ganjanganjan soni. Ka u de ta dini Masa Gaangadu di mbei hii soni u mundu, nöo hën de tei dee soni dee a mbei buta ta begi nëen kamian. De disa di bumbuu Gadu dë di u musu ta begi ta gafa nango nöömö söndö kaba. A tan sö.

²⁶ Nöo hën mbei Gadu disa de tu, be de libi söndö sen kumafa de ta hangi a de hati, tee nöo dee mujëë seei an ta libi a di fa Gadu buta u de ta libi ku womi möön. De bia ko ta du soni dee na fiti fu libisëmbë musu du.

²⁷ Söseëi dee womi tu, de disa fa Gadu buta de u de libi ku mujëë, nöo hën de ko ta kë de na de. Hën dee lö giïi dë ko dë kendikendi a de hati tee de go ta libi fanafiti ku de seepi kuma manu ku mujëë. Nöo hën wë i si taa de ko feni di sitaafu ta tja di fiti di lö takulibi di de ta libi naandë.

²⁸ Fa dee sëmbë sai u de dë, dee soni u Gadu de bi sabi naandë, hën de feni taa an dë fanöudu u de hoi de a de pakisei möön. Nöo fëen mbei Gadu disa de, be de du dee poipoi soni de ta pakisei dë go dou, be de ta du dee soni möönmöön dee na fiti fu libisëmbë du.

²⁹ Nöo hën hati u de ko fuu ku hii sootu pei hogifasi. Fa de sai u de dë, sösö hogihati ku langahati de ta abi. De aan toobi ku na wan wëti a dee hogi de ta du. De ta haun, de ta kii sëmbë, de lo' feti, de ta ganjan sëmbë, de a' hogihati u otowan, de ta tja sëmbë go sei,

³⁰ de ta guunjan sëmbë a baka. Fa de sai dë, de ta buuse Gadu seei, de ta saanti sëmbë ta wisiwasi otowan, de abi gaan fasi ta njan buka. De ta boi kõni seei unfa de sa du hogi nango nöömö. De an ta piki mama ku tata buka möönsö.

³¹ Fa dee lö sëmbë sai u de dë, de aan bumbuu fusutan möön e. Ja sa futoou de a na wan soni. De aan tjalihati möön, nöo de an ta saa sëmbë möön tu.

³² Nöo hii fa de sabi taa Gadu a' leti di a buta taa dee sëmbë dee ta du dee lö soni naandë musu dëdë paati ku ën fu nöömö, ma nöo de aan toobi. De ta du sö nango nöömö. Nöo na di dë nöo, ma de ta da oto sëmbë taanga u de du sö tu. Sö dee sëmbë dë hogi tjika e.

2

Aki ta lei fa Gadu o kuutu

a wan leti fasi.

¹ Wë nöo a kandë kumafa un jei dee soni u taki dë, nöo un ta kuutu a dee sëmbë liba dee ta libi sö. Ma mi kë un sabi taa fa un ta kuutu dee oto sëmbë dë, ma nöo unu seei un ta kuutu tu e, dee sëmbë. Na wan fuunu sa puu hënseei a dendu, biga hii unu tuu ta du dee lö wogi naandë tu.

² Nöo u sabi taa Gadu abi leti te a ta kuutu a dee sëmbë liba dee ta libi a dee lö fasi dë. Na sö nö?

³ Ma nöö fa i ta suku u kuutu dee oto sëmbe dë, nöö i seei ja dë wan libisëmbe ta du dee soni dë tu nō? Nöö unfa i pakisei? I mëni taa di kuutu u Gadu an o kai a i liba tu nō? A o kai a i liba e!

⁴ Fëen mbei ja musu hei i seei fu di Gadu ta libi bunu ku i sō. Biga fa a abi gaan pasensi ku taihati da i dë, nöö a kë fu hati fii musu bia, fëen mbei a ta libi bunu ku i sō te kisi fa u dë aki.

⁵ Ma nöö fa i si i ta mbei taangajesi da Gadu naandë, hati fii an kë bia, ma i saandi i ta du ö? I ta pii di hatiboonu u Gadu buta dë faa musu kai a i liba a di daka di Gadu buta faa kuutu libisëmbe. Nöö a di daka dë, a o ko a limbo gbegeede fa Gadu ta kuutu leti tjika.

⁶ Biga a di juu dë, nöö a o paka hiniwan sëmbe a di sondi di a bi du.

⁷ Dee sëmbe dee bi ta libi bunu nöömö fu de feni gafa a Gadu ku di hei di a abi u da de, dee an bi kë dëdë, nöö dee lö sëmbe dë Gadu o da de libi fu teego.

⁸ Ma nöö dee sëmbe dee ta suku soni da deseei nöö, de aan bisi ku dee leti soni u Gadu möönsö, de ta waka a hogilibi baka nöömö, nöö a dee sëmbe naandë liba di hatiboonu u Gadu o ko e.

⁹ Nöö fa i si dee sëmbe sai dë, nöö toobi ku fuka o miti hiniwan u de, ee i dë Dju sëmbe, ee ja dë Dju sëmbe.

¹⁰ Ma ee wan sëmbe i ta libi bunu a Gadu wojo, nöö joo feni gafa a Gadu e, ku nëbai, ku kötöhati, ee i dë Dju, ee ja dë Dju.

¹¹ Biga fa Masa Gadu sai dë, an ta luku ambë da i.

¹² Ma haika e, dee sëmbe. Ee wan sëmbe i ta du hogi ma ja sabi dee wëti u Gadu dee a bi da u dee Dju, nöö Gadu an o kuutu i ku dee lö wëti dë e. Ma seei joo kisi sitaafu, biga hogi i du. Ma ee wan sëmbe i sabi dee wëti ma jetiseei i ta du hogi, nöö ku dee wëti dë seei a o kuutu i da sitaafu.

¹³ Biga an dë taa te i jei dee wëti nöö Gadu o luku i u bumbuu sëmbe nëen wojo e, ma te i piki de ufö.

¹⁴ Dee sëmbe o, fa i si dee oto sëmbe dee na dë Dju sai dë, de an sabi dee wëti dee Gadu da u Dju sëmbe e. Ma te i luku de te i kaba, nöö so juu i ta si kuma de ta libi leti kuma de sabi dee wëti. Hii fa de an abi dee wëti dë seei, ma a dë kuma de ta buta deseei a de basu.

¹⁵ Nöö hën mbei i ta si taa dee soni dee wëti ta taki, nöö de tuu dë sikifisikifi a libisëmbe hati kaa. Biga te de ta poi de, nöö hati u de ta fon de. Fa de sai dë, hiniwan u de ta kuutu ku ën seei ta dëen seei leti ee nasö adjabëë, leti kuma a bi sabi dee wëti u Gadu kaa.

¹⁶ „Nöö fëen mbei na wan sëmbe o fika söndö Gadu kuutu ën e.” Biga wan daka o ko, nöö Gadu o buta Jesosi Keesitu faa kuutu hii dee tjubitjubi soni tuu dee dë a libisëmbe hati, leti kumafa di Buka di mi ta konda aki ta taki.

Aki ta lei taa aan heepi ee i dë Dju sëmbe ma ja ta hoi dee wëti.

¹⁷ Söö. Wë awaa mi o fan ku un dee sëmbe dee ta hopo unu seei naandë fu di un dë Dju hedi. Fa un sai dë, un ta langi a dee wëti dee Masa Gaangadu bi da dee fesiten sëmbe fuu taa de o tja unu go a Gadu. Un taa un dë wan apaiti sëmbe di Gadu ta luku fëen seei. Sö un sai dë ta njan buka ta taki.

¹⁸ Un taa un sabi hii soni Gadu kë kaa, un lei dee wëti fëen tee sabi andi da dee möön bumbuu soni u goonliba. Sö un ta taki.

¹⁹ Un taa un sa leti dee sëmbe seei dee an bi sabi soni u Gadu wan daka, be wojo u de ko limbo. Un ta taki taa un sa heepi de, be de kumutu a dungu ko a limbo.

²⁰ Un taa ee wan sëmbe aan fusutan, nöö un sa heepi ën be a ko sabi unfa faa musu libi. Un ta lei sëmbe seei kuma unu da mësitë nöö de da miii. Biga

unu abi dee wëti dee ta mbei sëmbë ko sabi andi da tuu ku andi da ganjan. Na sò un ta taki nõ?

²¹ Ma nõö mi hakisi unu e, taa fa un ta lei oto sëmbë dë, un ta lei unu seei tu ö? Fa un ta konda taa sëmbë an musu fufuu, wë nõö unu seepi wë? Wan ta fufuu ö?

²² Un sai dë ta bai sëmbë taa ja musu tei wan mujëë di an dë mujëë fii. Wë nõö unu wë, wan ta du ën nõ? Un taa un ta buuse dee pindigadu u dee oto sëmbë, ma nõö mi hakisi unu taa wan ta feni njan a dee pindigadu wosu u de nõ?

²³ Un si? Fa un ta njan buka naandë ta mbei unu seei hei taa unu abi dee wëti u Gadu, ma nõö wan ta poi de ta sösö Gadu nõ, dee sëmbë?

²⁴ Wan sabi fa di Buku bi taki nõ? A taa: “Fu un dee Dju sëmbë i si aki hedi mbei dee oto kondë sëmbë ta kosi Gadu në e.”

²⁵ Dee sëmbë o, fa un dë Dju sëmbë tjika aki, nõö un abi di maaka a unu sinkii kaa taa un dë apaiti sëmbë da Gadu. Na sò nõ? Wë nõö ee un ta hoi dee wëti dee Gadu bi da, nõö di maaka dë abi waiti. Ma nõö ee un ta booko dee wëti fëen nõö di maaka dë an abi wan wojo heepi. Biga di maaka nëen da di gaan soni. Nõö fa i ta booko Gadu wëti dë, nõö i ko dë leti kuma dee sëmbë dee na abi di maaka.

²⁶ Haika e, ee wan sëmbë an abi di maaka u Dju nëen sinkii, ma nõö libi fëen ta kai ku dee wëti u Gadu, nõö na Gadu o luku ën apaiti leti kuma a abi di maaka nëen sinkii, na sò nõ?

²⁷ Nõö di lö sëmbë dë sa kuutu i o. Biga hii fa i abi dee wëti u Gadu sikifisikifi ku di maaka a i sinkii dë tuu seei, ma töku i ta booko dee wëti.

²⁸ Nõö sò wan Dju, an dë wan leti Dju a Gadu wojo e. Nõö sò seei tu di maaka a i sinkii dë, nëen da di tuutuun maaka di a ta si. Kwetikweti.

²⁹ Biga di sëmbë di dë wan leti Dju a Gadu wojo, nõö hati fëen hën tooka, na sinkii fëen. Nõö fa di hati fëen tooka dë, an dë fu di a abi dee wëti u Gadu sikifisikifi a pampia e, ma fu di di Akaa u Gadu hën du ën wooko nëen hati. Nõö sò wan sëmbë an ta feni gafa fëen a libisëmbë e, ma a ta feni ën a Gadu.

3

Aki ta lei fa Gadu dë u futoou

u nõömö.

¹ Wë a kandë fa mi taki dë, nõö so fuunu dee Dju sëmbë o hakisi taa: “Wë ee a dë sò, nõö un heepi seei a abi ee u dë Dju? Un heepi a abi fa u abi di maaka a u sinkii aki?”

² Aai, wë a abi heepi seei te a hila e. Nõö di fosu wan, hën da a u dee Dju sëmbë maun wë Gadu bi futoou dee wöutu fëen.

³ Ma nõö i abi so Dju sëmbë de an kë biibi Gadu, nõö unfa un pakisei? Fu di de an kë biibi, nõö hën da Gadu disa dee soni a bi taki ö? Sò un pakisei nõ?

⁴ Nönö, kwetikweti! Gadu hën a o dë u futoou nõömö. Fa u dë aki, hii sëmbë u goonliba tuu sa ta lëgëdë ta mindi soni u de, ma Gadu hën an o du sò. A o du dee soni dee a taki nõömö.

Wan bi jei fa Dafiti bi taki a di Buku di a fan ku Masa nõ? A taa:

Joo feni leti a dee fan fii dee i ta fan.

Fa de ta kuutu i dë, a bakaten i o wini de nõömö.

Sò a sikifi a di Buku.

⁵ Nõö a kandë wan sëmbë sa taa: “Wë ee di hogilibi fuu ta tja di bunulibi u Gadu ko a döö, nõö unfa a sa kuutu u te u ta du hogi? Naa fuu ta du wogi nango möönmöön nõ, be në fëen bai.” Sò wan libisëmbë o fan.

⁶ Ma di lö fan dë, an bunu e. Biga ee sö a dë, nöö hën da Gadu an o sa kuutu a libisëmbë liba möönsö fu dee hogi de ta du.

⁷ A kandë tu wan sëmbë o taa: “Wë mi o ta mindi soni ta lëgëdë, biga hën o ta mbei di fa Gadu an dë mindisonima o ko möön limbo u sëmbë si. Nöö Gadu an o sa kuutu mi tu, biga mi ta heepi ën fu sëmbë sa si fa a bambuu tjika.

⁸ Un boo ta du hogi nango nöömö, biga a ta tja bunu ko.” Sö wan soni so sëmbë ta mindi da u e, taa sö u ta lei sëmbë. Ma dee sëmbë dee ta fan dee lö soni dë, a fiti u de feni wan gaan sitaafu seei a Gadu e.

Aki ta lei taa hii sëmbë dë

a hogidu basu.

⁹ Wë nöö fa u taki dë taa Gadu bi hei u dee Dju sëmbë, nöö andi u lei a di dë? U dë bambuu sëmbë möön dee sëmbë an dë Dju nö? Kwetikweti. Biga wë u bi taki kaa taa ee i dë Dju, ee ja dë Dju, ma hii u tuu ta dë a hogidu basu makandi a Gadu wojo.

¹⁰ Hën di soni dë wë de sikifi buta a di Buku u Gadu taa:
Na wan sëmbë dë di ta libi bunu a Gadu wojo e.

Na wan kodo seepi.

¹¹ Na wan sëmbë dë tu di abi fusutan.

Na wan dë di ta suku Gadu.

¹² Hii de tuu fia bia disa Gadu,
de ko dë kaba-a-sösöma u mundu.

Na wan sëmbë ta suku u du wan bunu soni möönsö.

Na wan kodo seei.

¹³ Ee i haika di fan u de te i kaba
nöö a dë gaan poipoi soni,
leti kuma te i jabi wan baaku ka de bei sëmbë.
Nöö a de töngö, sösö ganjan tö nöö dë nëen.

¹⁴ Dee soni de ta puu a de buka ta taki,

de dë hogi kuma te sindeki njaan i.

Fa i si de sai dë,

buka dendu u de fuu ku siba ku bita fasi.

¹⁵ Hiniwanten de ta dë setiseti u de kule go kii sëmbë.

¹⁶ Hii ka de ta waka,

soni nöö de ta poi ta tja fuka ko da sëmbë.

¹⁷ Nöö di soni de kai fii ku sëmbë,

de an sabi ën seei.

¹⁸ Di fa libisëmbë musu fëëë Gadu,

de an saandi de kai sö.

Sö di Buku taki e, dee sëmbë.

¹⁹ Ma nöö fa di Buku u Gadu ta taki dë, nöö ambë a ta taki tuwë da? Na u dee Dju sëmbë nö? U wë a ta taki e. Biga u sabi taa u dee sëmbë dee dë a dee wëti u Dju basu, nöö u di Buku sikifi da. Wa sa puu u seei a dendu.

Ma na u dee Dju sëmbë nöö Gadu o kuutu e. Ma hii sëmbë u goonliba tuu o hai ko a Gadu makandi faa kuutu de. Nöö fa woo dë a di kuutu dë, na wan sëmbë seei o feni soni u piki. U tuu o kabuka pii.

²⁰ Biga na wan sëmbë sa hoi wëti te nöö a ko bambuu sëmbë a Gadu wojo möönsö e. Nöö boiti u di dë, na u di soni dë hedi tu mbei Gadu da u dee wëti, ma a da u de faa lei u fa u dë hogi tjika. Nöö sö e.

Aki ta lei fa i sa ko bunu

a Gadu wojo.

²¹ Ma nöö fa u dë aki, dee sëmbë, awaa ufö a ko a döo di fa Gadu bi buta fu libisëmbë sa ko bunu nëen wojo. Nöö ee i bi lesi dee buku u Mosesi ka a sikifi dee wëti buta, ku dee soni dee oto tjabukama u Gadu bi sikifi tu, nöö i bi o si taa de bi taki soni u di fasi aki gaanduwe kaa.

²² Nöö di fasi fa i sa ko bunu a Gadu wojo di u ta taki aki, na a wëti a nama e, ma a nama a biibi. Biga Gadu buta taa hiniwan sëmbë di ta biibi a Jesosi Keesitu liba, nöö a ko bumbuu sëmbë a Gadu wojo kaa, „ee i dë Dju, ee ja dë Dju,“. Aan toobi un pei sëmbë i dë.

²³ Haika e, dee sëmbë. Hii libisëmbë tuu du hogi a Gadu wojo. Na wan kodo seei kumutu a dendu. Di fa a mbei u fuu dë waiti kuma hën, nöö u tuu misi ën.

²⁴ Ma nöö fa u dë aki, u tuu Gadu du wan gaan soni da, kuma wan kado di a da u waiwai ku ën bunuhati. Biga a mbei u tuu sa ko bunu nëen wojo fu di Jesosi Keesitu dëdë paka faa puu u a hogi basu.

²⁵ Masa Jesosi hën wë Gadu bi da e, kuma wan paima a paka fu tja u ko bunu ku ën. Nöö ee wan sëmbë i ta buta biibi a di fa a dëdë tuwëen buuu da u dë, nöö ii ko bunu a Gadu wojo e.

Nöö fa u ta taki ën aki, dee sëmbë, nöö di soni mbei Gadu buta Masa Jesosi faa paka paima da u, faa lei u taa a dë wan leti kuutumama. Biga a bi dë sô kuma Gadu an bi a' leti, biga an bi ta sitaafu sëmbë u dee hogi de bi ta du. A bi ta hoi pasensi ku de ta tai hati ku de te kisi fa u dë aki.

²⁶ Ma nöö a di ten aki nöö a ko lei u taa a dë wan leti kuutumama. Biga a mbei Masa Jesosi dëdë da u. Nöö a di fasi dë a lei u taa sô a ta du soni ku leti tjika, nöö sô a sa mbei sëmbë ko bumbuu nëen wojo tu, ee i ko biibi a Masa Jesosi.

²⁷ Wë nöö fa u jei dee soni te u kaba aki, dee sëmbë, nöö u sa njan buka möön nö? Kwetikweti! Faandi mbei? Wë biga u si gbelin taa di ko bunu ku Gadu an nama seei a di fa i ta hoi wëti. Nönö. Ma a biibi nöö a nama.

²⁸ Mi taki e, dee sëmbë, ee wan sëmbë i kè ko bunu a Gadu wojo, nöö be i biibi nöö. A di fa dë nöö Gadu o luku i u bumbuu sëmbë, na te i ta hoi wëti ufö.

²⁹ Wë nöö mi hakisi e, taa Masa Gadu dë fuu Dju sëmbë wanwan nöö nö? An dë Gadu u dee oto föluku tu ö? Wë aai, a dë Gadu u de tu,

³⁰ biga hën wanwan tó nöö da Gadu u mundu. Nöö hën ta mbei u dee sëmbë dee abi di maaka u Dju a u sinkii, ku dee sëmbë dee na abi di maaka tuu, sa ko bumbuu sëmbë nëen wojo. Ma nöö a o luku ee i ta biibi ufö, biga ku di wan seei biibi nöö a ta tei u tuu.

³¹ Wë nöö a kandë i sa taki taa: “Wë nöö di a dë sô kaa, nöö nëen da u tuwë dee wëti a kapëë nö?” Na mëni sô e, dee sëmbë. Biga fa i si u ko ta biibi aki, nöö awaa ufö u ta hoi dee wëti u Gadu awaa.

4

Aki ta lei fa Abahamu ko bunu

a Gadu wojo.

¹ Wë dee sëmbë, fa u ta taki di soni aki, nöö un boo luku andi pasa ku di gaan sëmbë fuu dee Dju de kai Abahamu.

² Abahamu bi ko wan bumbuu sëmbë a Gadu wojo e. Nöö ee soni a bi du mbei a ko sô, nöö a bi sa njan buka, na sô nö? Ma nöö u sabi taa na wan sëmbë sa njan buka a Gadu fesi e.

³ Ma nöö unfa di Buku u Gadu taki? A taa: Abahamu bi biibi Gadu.

Hën mbei Gadu luku ën kuma wan bumbuu sëmbë nëën wojo.

I si?

⁴ Wë nõõ sö a dë e. Ee wan sëmbë du wan soni te a kaba, nõõ an dë gaan soni te de pakëen. Biga wooko nõõ a wooko ën.

⁵ Ma ee wan sëmbë na soni a du, ma biibi nõõ a biibi Gadu taa a ta kai dee takulibima fu de ko bumbuu sëmbë nëën wojo, nõõ di sëmbë dë hën Gadu ta tei u bumbuu sëmbë e, fu di biibi fëen hedi.

⁶ Nõõ Dafiti seei bi taki u dee lõ sëmbë dë, dee Gadu ta luku u bumbuu sëmbë ma na u dee du u de hedi. A taki u di kõlõku di de kisi. Biga a taa:

⁷ Kõlõku u dee sëmbë dee Gadu puu a bëe u di fa de bi poi ën wëti.

Kõlõku u de di Gadu an ta si dee hogi

de bi du mõõn e.

⁸ Hën a toona taki mõõn taa:

Kõlõku u di sëmbë di Gadu an o mbei a paka u dee hogi dee a du mõõn.

Sõ Dafiti bi taki e.

⁹ Wë nõõ di kõlõku dee sëmbë naki naandë, nõõ unfä i mëni? A dë u dee sëmbë wanwan dee abi di Dju maaka a de sinkii ö? An dë u dee oto föluku tu nõõ? Aai e, a dë u de tuu. Biga wë u bi taki kaa taa fu di Abahamu biibi hën mbei Gadu tei ën fu wan bumbuu sëmbë nëën wojo.

¹⁰ Ma nõõ na un ten Gadu bi tei ën sö? A baka u di a kisi di maaka, naa bifõ a kisi ën? Wë bifõ a kisi ën e!

¹¹ Nõõ hën a kisi di maaka, nõõ di maaka hën ta lei taa ufõ a kisi ën seei Gadu bi tei ën kaa fu di a biibi ën hedi.

Nõõ sö i si taa Abahamu ko dë gaan sëmbë fuu na akaa fasi, biga u ko ta waka nëen baka a di fa a bi ta biibi. Ee ja abi di maaka u Dju a i sinkii seei ma i ta waka a Abahamu baka ta biibi Gadu, nõõ Abahamu ko gaan sëmbë fii kaa. Nõõ Gadu ta tei i u bumbuu sëmbë nëën wojo.

¹² Nõõ fa u taki dë, Abahamu dë gaan avo tuu u dee sëmbë dee abi di maaka, ma tõku na de tuu e, ma dee ta waka nëen baka ta biibi Gadu leti kumafa hënseei bi ta biibi bifõ a kisi di maaka naandë.

¹³ Wë u sabi taa Gadu bi paamusi Abahamu ku dee böngö fëen wan soni taa de o feni di goonliba a de maun a bakaten. Nõõ di paamusi naandë, Abahamu an kisi ën fu di a bi hoi wëti e, ma a kisi ën fu di a biibi Gadu hën Gadu tei ën u bumbuu sëmbë. Hën mbei a paamusi ën sö wan gaan soni.

¹⁴ Wë nõõ ee a bi dë sö taa di gaan bunu dë sëmbë sa feni ën fu di de ta hoi wëti hedi, nõõ hën da biibi aan heepi e. Nõõ söseei di paamusi Abahamu bi kisi a Gadu dë an bi sa dë wan wojo soni tu, ee wëti i bi musu hoi ufõ i feni ën. Ma na sö a dë e, dee sëmbë. Wëti an sa tja di lõ bunu dë ko.

¹⁵ Ma i saandi wëti ta tja ko nõõ? Sitaafu wë a ta tja e. Biga ka wëti an dë nõõ sëmbë an ta feni ën poi faa tja sitaafu ko da de. Ma ka a dë, nõõ naandë sëmbë ta poi ën nõõ i kisi sitaafu.

¹⁶ Nõõ fëen mbei ee Gadu paamusi i wan soni, nõõ an o da i ën fu di i ta hoi wëti e. Ma fu di i ta biibi, hën mbei joo feni ën. Di bunuhati u Gadu hën nõõ sa mbei di paamusi fëen ko tuu. Nõõ di paamusi u Gadu di u taki dë, a dë sitampusitampu da hii u dee böngö u Abahamu tuu fu di u ta biibi Gadu, ee i dë Dju ee ja dë Dju. Biga Abahamu da di gaan sëmbë fuu tuu.

¹⁷ A dë leti kumafa Gadu bi taki da Abahamu a di Buku. A taa:

Mi tei i buta fii ko dë di gaan sëmbë fu hia föluku.

Sõ wë Gadu bi taki da Abahamu. Nõõ sö wan fasi i si taa Gadu ta luku u kuma böngö u Abahamu. Fa Abahamu bi biibi tjika dë, a bi sabi taa Gadu hën ta

weki dëdë sëmbë seei toona da de libi baka, hën ta si dee soni dee an dë u si leti kuma de dë kaa.

¹⁸ Nöo fa Abahamu bi ta biibi Gadu dë, a bi ta pakisei di soni di Gadu bi paamusi ën taa a o ko di gaan sëmbë u hia föluku. Ma an bi dë faa mëni sö wan soni seei, biga di ten faa pai mihi bi pasa gaanduwe kaa. Ma fu di Gadu hën bi paamusi ën taa dee böngö fëen o ko hia kuma dee teeja dë a liba, hën mbei a fika dë ta mëni ën nöömö.

¹⁹ Nöo di juu di Gadu bi paamusi ën di soni dë, nöo Abahamu bi ko gaandi seei kaa tee a fika piki a tapa höndö jaa, nöo hën mujëë Sala tu ko gaandi tee bëë fëen bi tapa. Na wan u de bi dë a di fa u pai mihi möön e.

²⁰ Ma nöo Abahamu an luku di dë. An bi pakisei seei taa dee soni dee Gadu paamusi ën dë an sa pasa. Ma a ta biibi Gadu nöo. Nöo fa a ta biibi nango dë, nöo di biibi fëen ko gingin te a ta wai ku Gadu seei,

²¹ taa a abi kaakiti tjika faa du leti kumafa a bi paamusi ën dë. Biibi nöo a biibi sö.

²² Nöo hën di soni dë wë mbei de sikifi fëen a di Buku u Gadu taa Gadu bi tei ën u bumbuu sëmbë nëen wojo.

²³ Ma nöo fa de sikifi ën dë, na u Abahamu wanwan hedi mbei de sikifi ën e, dee sëmbë,

²⁴ ma fuu hedi tu. Biga u ta biibi Masa Gadu taa a bi weki Jesosi u Masa a dëdë tuu, nöo fëen mbei u seei ko dë bumbuu sëmbë nëen wojo tu.

²⁵ Fa Gadu buta Masa Jesosi a dee sëmbë maun de kii ën dë, nöo hën da di paima a paka fu dee hogi du fuu. Nöo di i si taa Gadu toona weki ën baka, nöo hën da a tei di paima, nöo a ta luku u kuma u dë söndö föutu awaa e, dee sëmbë.

5

Aki ta lei andi u kisi

a Masa Jesosi.

¹ Wë kumafa u taki dë, dee sëmbë, u ku Gadu ko fi awaa e. Nöo di soni mbei, fu di u biibi ën hedi hën u ko bumbuu sëmbë nëen wojo. Jesosi Keesitu u Masa, hën wë i si heepi u sö e.

² Hën jabi di pasi da u fuu dë a di kamian ka i si u dë aki. Biga fa u ta biibi ën aki, hën mbei i si Gadu ta libi ku u ku ën bunuhati. Nöo u ko ta wai seei fu di u sabi taa woo feni di waiti u Gadu nöömö di Gadu bi kë fuu feni.

³ Ma nöo na di dë nöo u ta wai da e, ma u ta wai tu da dee sitaafu dee u ta tja. Biga u sabi taa sitaafu ta heepi u fuu abi degihati.

⁴ Nöo te u abi degihati, nöo woo ko möön bumbuu sëmbë. Nöo te u dë bumbuu sëmbë kaa, nöo wa o dë pantapanta, biga woo ta biibi nöömö taa Gadu o du kumafa a bi taki.

⁵ Nöo an o dë fuu panta möönsö e, dee sëmbë, taa di fa u ta biibi ën o dë u söso. Biga u sabi fa Gadu lobi u tjika. Di Akaa fëen di i si a manda ko da u aki, hën ta mbei u ta fii di gaan lobi fëen taanga seei a u hati. Wan si nö?

⁶ Un kë sabi fa Masa Gaangadu lobi u tjika nö, dee sëmbë? Wë haika e. A di leti juu di a buta, nöo hën a mbei ‚Masa Jesosi,‘ Keesitu dëdë da u. A di ten dë wa bi a kaakiti u du na wan kodo soni di bunu nëen wojo. Gaan takulibima u bi dë, ma tökusei Masa Jesosi dëdë da u e.

⁷ Wë nöo un pakisei ën bunu. Ee wan sëmbë i ta libi leti seei, ma a sa taanga fu wan oto sëmbë musu mëni faa dëdë da i. Na sö nö? Ee i abi bunuhati, nöo a kandë de sa kë dëdë da i fu di i abi bunuhati hedi.

⁸ Ma nöö Gadu lei u taa di lobi fëen pasa di dë gaanduwe. Biga na bumbuu sëmbë a manda „Masa Jesosi, Keesitu ko dëdë da e, ma u dee takulibima aki wë. „Dee sëmbë, a bigi o!“

⁹ Wë nöö un luku di soni di Masa Jesosi du dë. A dëdë tuwëen buuu paka da u fuu sa ko bunu a Gadu wojo. Wë nöö ee sò wan gaan soni a du da u kaa, nöö an dë fuu mëni seei taa di hatiboonu u Gadu o kai a u liba e!

¹⁰ Nöö ee di Mii u Gadu dë dëdë da u a di ten di u ku ën bi dë gaan felantima hën a mbei u ko fii ku Gadu, nöö unfa i mëni? Na awaa a o möön fukë dëen faa heepi u te dou nò, dee sëmbë, fa a dë a libi aki. Biga u ku ën ko bunu kaa.

¹¹ Fa u dë aki u ta wai seei ku Gadu fu di soni di u Masa Jesosi Keesitu du da u naandë e. Biga a bigi o, dee sëmbë, di fa a tja u ko bunu ku Gadu aki.

Aki ta lei fa di soni Adam tja ko

ku di Masa Jesosi tja ko

tooka tjika.

¹² Söö. Wë un boo luku di soni aki a di sëmbë de kai Adam. Adam hën tja hogi du ko da hii sëmbë a goonliba aki e, nöö di hogi du tja dëdë ko. Hën wë mbei dëdë ko ta kii hii sëmbë te kisi tide, biga hii sëmbë tuu ta du hogi.

¹³ Un boo taki ën sò taa bifò Gadu da dee fesiten sëmbë fuu dee wëti, nöö hogi du bi dë kaa e. Ma nöö de an bi kai ën sò, biga dee wëti an bi dë eti. Nöö ka wëti an dë nöö sëmbë an ta sabi taa de pasëen fu de kisi sitaafu fëen.

¹⁴ Ma nöö hii fa dee wëti an bi dë seei eti, ma hogi du bi dë kaa, biga kumutu a di ten u Adam te kisi di ten u Mosesi nöö hii sëmbë bi ta dëdë. Hii fa de an bi poi wëti a di wan seei fasi fa Adam bi poi ën, ma tōku de bi du hogi, biga de tuu dëdë.

Nöö di soni u Adam dë, nöö a bi dë kuma wan peentje fuu luku nöö woo fusutan soni. „A ta lei u u wan Sëmbë bi dë a pasi u ko a bakaten. Nöö di Sëmbë dë, Masa Jesosi wë e.

¹⁵ Fa a sai dë, hën ku Adam djei a wan soni. „Biga Adam, di wan kodo sëmbë dë, nëen wan soni kumutu paaja ko a sëmbë. Nöö sòseei Masa Jesosi tu, di wan kodo Sëmbë dë, nëen wan soni kumutu paaja ko a sëmbë.

Ma di soni di Adam tja ko, ku di Masa Jesosi tja ko, nöö de tooka gaanfa e. De an djei seei. Biga Adam pasa Gadu buka hën a tja dëdë ko ta kii hii sëmbë u goonliba aki. Ma nöö Masa Jesosi hën a piki Gadu buka hën a tja wan kado ko. Hën da a mbei u sa ko fii ku Gadu. Nöö unfa i mëni? Di soni Jesosi Keesitu du da u ku ën bunuhati aki, aan möön hia kaakiti nò? Aai a abi. Hën a tja bunu ko da sòmëni sëmbë. Sò wan soni Gadu du da u ku ën bunuhati e.

¹⁶ Nöö un boo luku wan oto soni möön u di fa de tooka gaanfa ku dese. Di wan kodo pasi naandë Adam du hogi, nöö hën a tja sitaafu ko da hii sëmbë. Ma nöö di wan kodo soni Gadu du da u aki, a du ën a baka u sòmëni hia hogi di libisëmbë bi du, ma tōkusee a tjika u puu dee hogi du tuu fiaa a u liba mbei u ko bunu nëen wojo.

¹⁷ Di pasa Adam pasa Gaangadu buka dë, dee sëmbë, hën buta dëdë ko tiima. Nöö unfa i mëni? Di fa Gadu libi ku u ku ën bunuhati tjika aki te a sa mbei u ko bumbuu sëmbë nëen wojo, nöö aan kaakiti gaanfa möön di hogi du u di sëmbë dë nò? Nöö ee u tei ën, nöö a o mbei u ko tiima a dëdë kamian fu di u abi di libi u Gadu di dë u teego kaa.

Nöö sò wë i si taa di soni di di wan kodo Sëmbë du di ko a baka aki, Jesosi Keesitu, a pasa di hogi du u di oto sëmbë dë gaanduwe e.

¹⁸ Wë dee sëmbë, un boo toona mëni dee soni u bi taki aki möön. Fa i si di wan kodo hogi du fu di wan kodo sëmbë dë bi mbei sitaafu musu ko a hii

sëmbë liba, nöö sö nöö di wan kodo leti du u di wan kodo Sëmbë aki sa mbei hii sëmbë ko bunu a Gadu wojo tu, fu de feni di libi u teego.

¹⁹ Nöö leti kumafa di wan kodo sëmbë dë bi pasa Gadu buka te a mbei hii sëmbë ko takulibima a Gadu wojo, nöö söseei di wan kodo Sëmbë aki piki Gadu buka, te a mbei sömëni sëmbë ko bumbuu sëmbë a Gadu wojo.

²⁰ Nöö fa dee Dju wëti sai dë, dee sëmbë, de ko a baka e, fu mbei sëmbë si fa dee hogi du u de hia tjika. Ma nöö hii fa hogilibi hia söseei, ma nöö di bunuhati u Gadu dë möön hia gaanfa eti u heepi u.

²¹ Leti kumafa i si di hogi du bi dë ta pëë basi a u liba te fa a bi ta kii u kaba aki, sö nöö di bunuhati u Gadu ko basi a dëdë kamian fa u dë aki. Hën a mbei u ko bunu nëën wojo fuu sa feni di libi u teego. Sö wan soni Gadu du da u e, dee sëmbë, fu di Jesosi Keesitu u Masa dëdë da u.

6

Aki ta lei taa u musu luku u seei kuma u dëdë da hogilibi.

¹ Wë fa u jei soni te u kaba naandë, nöö unfa un fusutan fëën? Un ninga taa u taa fuun du hogi go dou, fu di di bunuhati u Masa bigi gaanfa te pasa dee hogilibi fuu ö? Sö u taki nöö, dee sëmbë?

² Kwetikweti, wa taki sö e. ‚Biga fa u nama ku Masa Jesosi aki, nöö hën da u ku hogilibi paati kaa. A dë seei leti kuma u dëdë dëen, biga wa dë nëën soni möön. Nöö unfa u sa du toona go nëën möön? Nönö e, wa sa du sö baa!

³ Wan sabi andi di dopu di u dopu aki kë taki nöö, dee sëmbë? A kë taki taa fa Jesosi Keesitu dëdë dë, nöö u seei dëdë tu da di awoo libi fuu u bi dë.

⁴ Fa de bei ën dë, nöö u ku ën wë de bei makandi e. Nöö fa i si hën Tata weki ën a sö wan foondo fasi ku di gaan kaakiti fëën dë, tja go a wan njunjun libi dendu, nöö sö u seei tu toona ko ta libi wan hii njunjun libi fa u dë aki.

⁵ Biga ee u ku ën bi dëdë makandi tuu, nöö na u ku ën toona weki makandi tu nöö ‚fuu libi wan hii njunjun libi,?‘

⁶ Dee sëmbë o, fa Masa Jesosi dëdë a di lakpa pau dë, nöö a dë kuma di awoo fasi fuu u bi ta libi, hën wë dëdë ku ën makandi e. Nöö di soni mbei a pasa sö, fu dee hogi du di di hati fuu ta kë ta du an musu a' kaakiti a u liba möön. An dë fuu dë saafu a de basu möön e.

⁷ Biga te wan sëmbë dëdë, nöö a kumutu a hogilibi basu ko fii.

⁸ Wë nöö fa u ku Keesitu dëdë makandi dë kaa, dee sëmbë, nöö u a' di biibi taa u ku ën o ta libi makandi tu.

⁹ Biga u sabi taa Masa Gadu toona weki ën, nöö an o sa toona dëdë möön e. Dëdë an abi kaakiti nëën liba möön seei.

¹⁰ Fa i si a dëdë di wan pasi dë dë kaa, nöö dee hogidu u libisëmbë wë a dëdë da. Ma nöö fa a dë ku libi aki, nöö Masa Gadu wanwan nöö a ta libi da.

¹¹ Wë nöö sö a dë ku unu tu e, dee sëmbë. Un musu si unu seei ‚kuma hogilibi aan na wan kaakiti a unu liba möön e.‘ Un dëdë dëen gbegedee kaa. Un musu sabi taa Gadu tö nöö un ta libi da, biga unu ku Masa Jesosi Keesitu nama kaa.

¹² Nöö fu di un dë sö kaa, nöö dee hogi soni dee i hati ta kë du, wan musu da de pasi u de ti unu sinkii möön e. Wan musu haika de seei.

¹³ Biga wan musu da hogilibi pasi faa sa wooko a na wan pisi fuunu sinkii u du fanafiti soni ku ën. Nönö. Ma un musu hopo unu seei ku telu tuwë da Gadu. Un musu buta dee kamiankamian fuunu sinkii tuu nëën maun kuma wooko felu, faa sa du dee leti wooko fëën ku de. Biga un dëdë da di awoo libi fuunu, fuun toona ko a wan hii njunjun libi dendu.

¹⁴ Di ten di un bi dë a dee wëti basu dë, dee sëmbë, nöö wan bi sa hoi de tjika te un ko bumbuu sëmbë a Gadu wojo. Ma fa u dë aki, Gadu naki unu kölöku te a tei unu u bumbuu sëmbë nëen wojo. Hën mbei nōiti hogilibi musu dë basi fuunu möön e.

Aki ta lei ambë saafuma

u musu dë.

¹⁵ Wë dee sëmbë, fa un jei dee soni dë, nöö kandë woon taki taa awa, wë di wa dë a dee wëti basu möön nöö da u sa du hogi, biga Gadu ta luku u ku ën bunuhati kaa. Sö nö? Na sö e.

¹⁶ Wan sabi taa te i tuwë i seei da wan sëmbë, nöö i dë saafuma u di sëmbë naandë nö? Hën buka nöö joo ta piki a soni. Wë aki i sa tei de tu soni. Ee i kë dë saafu a hogidu basu, nöö joo dëdë. Ma nöö ee i kë dë saafu a Gadu basu ta piki ën buka, nöö joo ta libi wan leti libi nëen wojo.

¹⁷ Ma fa mi taki dë seei, mi ta da Gadu tangi fuunu hedi e, dee sëmbë. Biga un bi dë saafuma a hogidu basu tuu, ma nöö di un kisi di lei u Gadu hën un piki tuwë unu seei dëen ku hii unu hati.

¹⁸ Fa u dë aki, un ko fii kumutu a hogilibi basu. Hën un ko saafu seei da Gadu fuun ta libi wan leti libi nëen wojo.

¹⁹ Fa mi ta fan dee soni aki, dee sëmbë, nöö mi ta taki de a libisëmbë fasi fu un musu sa fusutan. Biga wë libisëmbë nöö un dë, hën mbei a taanga da unu fuun fusutan andi Gadu kë. Nöö mi taki e, a fesi dee kamiankaman fuunu sinkii bi ta du fanafiti soni. Hii fan sootu pei hogi un bi ta du ku de nango nöömö. Ma fa un ko sabi Gadu aki, nöö un musu buta de tuu nëen leiki kuma saafu fëen, be de ta du dee letileti soni dee ta kai ku ën. Sösö gbelingbelin soni i musu ta du ku de e, dee soni dee dë limbolimbo a Gadu wojo.

²⁰ Haika e, dee sëmbë. Di ten un bi dë saafuma a hogidu basu naandë, nöö wan bi a' toobi seei fuun libi leti a Gadu wojo e. Na seei!

²¹ Wë ma mi hakisi unu, un wini seepi un bi feni u dee lö libi dë? Na dëdë nöö de bi o tja ko da unu nö? Nöö fa u dë aki de ko ta tja sen ko da unu. Un si ö?

²² Ma fa un ko fii kumutu a hogilibi basu naandë hën un ko dë saafu u Gadu aki, nöö awa ufö un abi wini. Biga un dë a pasi awaa fuun ko gbelingbelin da Gadu söndö föutu, nöö di kaba fëen hën da woon libi ku Gadu fu teego.

²³ Dee sëmbë o, hogilibi abi hën paka, hën da dëdë. Ma nöö Gadu, na paka a ta paka u. Soni a ta da u fu sösö, hën da di libi u teego di u sa feni a Jesosi Keesitu u Masa.

7

Aki Paulosu ta lei taa biibima kumutu a wëti basu.

¹ Wë fa mi ta fan aki, dee sëmbë, nöö mi ta fan ku un dee sëmbë fuu, dee sabi dee Dju wëti kaa. Wë nöö wan sabi nö, taa wëti ta abi kaakiti a wan sëmbë liba solanga a dë ku libi. Ma tee a dëdë kaa, nöö aambi kaakiti nëen liba möön.

²⁻³ Nöö un boo luku ën a wan futu aki i si. Wan mujëe te a tööu nöö a dë a wan wëti basu taa solanga di womi dë ku libi nöö an sa abi oto manu. Na sö a dë nö? Ee a tei oto manu nëen manu wosu, nöö de o kai ën wan puta mujëe. Biga a booko di tööu. Ma te di womi dëdë kaa, nöö di mujëe an dë a di wëti dë basu möön. Ee a ko abi oto manu seei, ma an du wogi.

⁴ Wë nöö dee sëmbë, söseei a dë ku unu tu e. A wan juu dë un bi dë a wëti basu. Ma fa i si unu ku Masa Jesosi, Keesitu ko nama naandë kaa, nöö wan dë a wëti basu möön e. Un ko abi wan oto masa awaa. Hën da di Sëmbë di bi weki baka a dëdë, faa sa ta wooko a u liba u tja wini ko da Gadu.

⁵ A wan ten dë dee hogi pakisei dee bi dë a u hati bi ta wooko a u liba fu de hai u tja go a di sê u dëdë. Biga wa sa hoi dee wëti u Gadu.

⁶ Ma nöö fa u dë aki, di awoo fa u bi ta libi dë an dë wan wojo soni da u möön. A dë leti kuma u dëdë kumutu nëën basu ko fii. Biga wa ta dini Gadu a di awoo fasi dë möön, ta biinga u hoi wëti sikifisikifi a pampia e. Nönö. U ko ta dini ën a wan hii njunjun fasi. Nöö di njunjun fasi u ta taki aki, hën da di Akaa u Gadu seei dë a u hati ta tii u.

Aki ta lei fa hogilibi ta fia ku dee wëti u Gadu.

⁷ Wë unfu u sa taki u di sondi dë baa? Dee wëti dë, de hogi nö? Nönö, de an hogi e. Biga ma bi o sabi andi da hogilibi ee na dee wëti bi lei mi ën. Mi o taki ën sô, dee sëmbë. Bifö mi ko sabi dee wëti u Gadu, nöö di wëti bi dë kaa taa ma musu abi langahati u na wan soni. Ma nöö di mi ko jei di wëti dë ufö mi ko fusutan taa sô wan libi da hogilibi.

⁸ Ma nöö andi pasa? Fa mi jei di wëti dë, nöö hën mi ko si taa sômëni soni dë a mi hati mi ta kë dee an ta kai ku Gadu. Ee i luku te i kaba, nöö a ta djei taa ka wëti an dë nöö hogilibi dë duumiduumi.

⁹ A fesi di ma bi sabi dee wëti u Gadu eti, nöö mi bi dë ta libi u mi seei waiwai. Soni an bi ta toobi mi. Ma di mi ko sabi dee wëti kaa, nöö mi ko si fa dee hogi pakisei dë hia a mi hati tjika. Nöö di lö libi di mi bi ta libi fifi söndö soni ta toobi mi dë, nöö a ko kaba gbelin.

¹⁰ Nöö hën mi ko si taa dee wëti dee bi musu heepi mi u mi feni libi a Gadu, nöö de tja gaan paati ko a mi ku Gadu. Biga ma sa hoi de möönsö.

¹¹ Ee i luku ën te i kaba, nöö a djei taa dee hogifasi dee dë a mi hati tei dee wëti u Gadu ganjan mi. Biga mi bi mëni taa mi sa hoi de fu mi feni libi a Gadu, ma hii u di dë ma sa hoi de. Dëdë nöö mi bi o feni.

¹² Ma nöö fa mi taki ën dë seei, an dë taa dee wëti an bunu e. De bunu, biga de dë u Gadu. De dë wan leti soni gbelingbelin.

¹³ Wë nöö hën wë mi ta hakisi, dee sëmbë, dee bumbuu wëti naandë, de poi mi ku Gadu sö nö? Nönö e, na de. Ma di hogi di dë a mi hati aki kaa, hën wë tja mi ko a di lö sitaafu dë, faa musu ko a limbo taa gaan hogi logologo seei a dë. Biga a tei dee bumbuu wëti u Gadu dë kisi mi ku de, fu tja mi go kaba a sösö. Nöö di soni mbei a pasa sô, fu mi musu ko sabi di fasi di dë a u libisëmbë hati aki, fa a hogi tjika.

Aki ta lei fa di hogilibi fuka Paulosu tjika.

¹⁴ Wë nöö u sabi taa dee wëti dee i si u ta taki aki, de kumutu a di Akaa u Masa Gaangadu. Ma nöö andi da di toobi? Wë di toobi dë a mi aki. Biga ma ta dë a di leiki u di Akaa u Gadu. A dë kuma dee hogi fasi u libisëmbë dee dë a mi hati aki, de bai mi tei ko saafuma u de.

¹⁵ Nöö andi mbei mi taki sö? Wë biga ma ta fusutan seei andi mi ta du. Biga di soni di mi ta kë du, nöö nëën mi ta du e, ma di soni di mi buuse gaan buuse, nöö te u mi mëni nöö mi du ën kaa. Ja si nö?

¹⁶ Wë dee sëmbë, di ma kë du dee hogi soni dee mi ta du naandë, nöö hën da mi ta tei dee wëti u Gadu u gaan bumbuu soni.

¹⁷ Nöö hën wë mi ko si taa na mi seepi ta du möön e, ma dee hogifasi dee dë a u libisëmbë hati aki, de wë ta buta mi u mi ta libi di lö libi dë. I si nö?

¹⁸ Nöö mi ko sabi taa fa mi dë aki, ma sa du na wan bumbuu soni möönsö a mundu e. Di lö soni dë an dë a di fasi u mi seei. Fu mi du bumbuu soni mi dë kabakaba, ma di kaakiti an dë a mi u mi du ën.

¹⁹ Biga di bunu di mi kë du nöö nëën mi ta du, ma di hogi di ma kë du seei nöö hën nöö mi ta du nöömö.

²⁰ Hën mbei mi taki taa na mi wë ta du. Ma di hogi pakisei u libisëmbë di dë a mi hati aki, nõö hën wë i si buta mi u mi musu libi a sò wan wisiwasi fasi.

²¹ Wë sò a dë e, dee sëmbë. Wan soni ta wooko a mi liba hebi fu te mi go u go du wan bumbuu soni nõö hogi nõö mi ta du.

²² Fa mi dë aki, mi sa wai tumisi fu mi ta du kumafa dee wëti u Gadu taki.

²³ Ma nõö mi ta si taa wan oto soni dë ta wooko a hii dee pispipi u mi sinkii tuu. A ta feti taanga ku dee wëti u Gadu dee dë a mi pakisei, ta hoi mi gingin a hogidu basu.

²⁴ Ee maingë, unfa seei mi o du te mi kumutu a di fuka aki basu? Ambë seei o puu mi a dee fasi u di sinkii u mi aki, fu ma musu paati ku Gadu?

²⁵ Wë gaantangi u Gadu di a dë taa a manda heepi ko a Jesosi Keesitu u Masa.

Wë da sò e, dee sëmbë. Fa mi dë aki, a mi hati mi ta kè dë saafu u Gadu ta piki dee wëti fëen, ma di fasi u mi ta buta mi saafu a hogilibi basu.

8

Aki ta lei fa di Akaa u Gadu sa puu u a hogilibi basu.

¹ Wë dee sëmbë, hii fa i si u kèe di pena dë seei, ma an dë fuu panta. Biga fa u ku Masa Jesosi Keesitu nama tjika aki, nõö wa dë a pasi fu Gadu musu kuutu u tuwë go da sitaafu mõn e.

² Biga di soni mbei. Di Akaa di u feni a Jesosi Keesitu, nõö hën abi libi. Nõö hën wë i si lusu u puu a hogilibi basu, be an feni u paati ku Gadu.

³ Fa i si Gadu bi da u dee wëti fëen dë, dee sëmbë, nõö de bi musu heepi u mbei libi fuu kai ku Gadu. Ma nõö de an bi sa heepi u sò e, biga dee fii ku dee kè fuu hati tapa u fu wa sa feni di heepi dë.

Nõö hën wë i si Gadu manda di Womi Mii fëen ko a goonliba aki. Nõö fa a ko dë, nõö sinkii fëen bi djei di fuu libisëmbë di ta du hogi aki, nõö ku ën a paka paima da u fu dee hogi du fuu. Nõö a sò wan fasi a kuutu di hogi di dë a u hati puu ën a u liba, be aan kaakiti a u liba mõn.

⁴ Nõö fëen mbei libi fuu sa kai ku dee wëti u Gadu awaa a hii futu e, ee wa dë a di leiki u dee kè fuu hati mõn ma u dë a di leiki u di Akaa u Gadu.

⁵ Dee sëmbë, un haika e. Ee di sösò kè fuu hati ta tii u, nõö a dee soni fëen woo ta buta pakisei. Ma ee di Akaa u Gadu ta tii u, nõö a dee fëen soni woo ta buta pakisei.

⁶ Nõö te i dë a di tii u di Akaa kaa nõö i feni libi u teego e, sòseei i feni kötöhati tu.

Ma nõö ee di kè fuu libisëmbë hati ta tii i, nõö i ku Gadu paati kaa e. Ja abi di libi u teego.

⁷⁻⁸ Biga sò wan sëmbë i ku Gadu dë felantima. Fa i sai dë, ja kè saka i seei da dee wëti fëen. Nõö boiti di dë, ja o sa saka i seei da de tu, te i dë a sò wan fasi. Nõö ja o du wan bumbuu soni mõnsò tu fu Gadu sa wai ku i.

⁹ Ma nõö ee di Akaa u Gadu hën ta dë a i naandë, nõö na dee sösò fii ku dee kè fii hati o ta tii i mõn e. Di Akaa wë o tii i. Ma nõö ee wan sëmbë ja abi di Akaa u Masa Jesosi, Keesitu dë, nõö ja dë sëmbë fëen tu.

¹⁰ Ma ee Keesitu ta dë a i hati, nõö an dë fii panta e. Biga hii fa hogidu mbei sinkii fii o dëdë nõömö wan daka, ma töku di akaa fii hën abi di libi u Gadu kaa, biga Gadu mbei i ko bumbuu sëmbë nëen wojo.

¹¹ Fa Gadu sai dë, dee sëmbë, na sösò kaakiti a abi e! Biga hën bi weki Masa Jesosi, Keesitu a dëdë toona dëen libi. Nõö ee di Akaa fëen dë a i hati, sòseei tu

a sa weki di sinkii fuunu naandë ɽ di aan kaakiti, mbei a kisi kaakiti faa libi kumafa Gadu kë.

¹² Dee sëmbë fuu dë, un haika e. Soni dë fuu musu du tuu, ma na fuu musu piki dee fii fuu hati möön e. Nönö.

¹³ Biga ee un libi a dee lö fii naandë, nöö woon dëdë paati ku Gadu fu teego. Ma ee un da di Akaa pasi faa tapa dee lö libi naandë, nöö woon feni di libi u Gadu.

¹⁴ Biga dee sëmbë dee ta libi a di leiki u di Akaa u Gadu, nöö de wë da miii u Gadu e.

¹⁵ Nöö di Akaa di i si un kisi dë, an dë wan akaa di ta toona buta unu a katibo möön e, dee sëmbë, fuun musu ta dë fëëfëë hiniwanten kumafa un bi dë a fesi. Nönö. Ma a dë di Akaa u Gadu seei, di buta unu ko miii u Gadu. Nöö hën mbei u ta kai Gadu “Taata”.

¹⁶ Biga di Akaa fëën ta piki ku di fuu akaa taa u da miii fëën seei gbelin.

¹⁷ Nöö di u dë miii u Gadu kaa, nöö hën da u dë a pasi fuu feni dee gudu fëën a bakaten. U ku ɽMasa Jesosiɽ Keesitu tuu o feni de makandi e. Biga ee u hoi a dee sitaafu dee u ta tja aki go dou, leti kumafa hën seepi bi hoi a dee fëën sitaafu a bi tja, nöö woo dë a dendu u di waiti fëën di a abi nöömö.

Aki ta taki u di waiti

di woo feni a bakaten.

¹⁸ Dee sëmbë o, fa mi wegi soni luku te mi kaba aki, nöö mi ko sabi gbelin taa dee sitaafu u ta tja aki an sa maaka seei ku di gaan waiti di dë a u aki u booko ko a döö a bakaten.

¹⁹ Un boo taki ën sö taa hii dee soni dee Gadu mbei kaa tuu dë setiseti ta luku di ten di Gadu o tja u dee sëmbë fëën ko a limbo ta lei taa u dë miii fëën.

²⁰⁻²¹ Biga te di juu dë kisi, nöö woo feni di gaan waiti fuu di u musu abi. Woo kumutu a dëdë basu ko fii, nöö hii dee soni Gadu mbei tuu o feni di fii naandë tu.

Ma nöö fa u dë aki, dee soni Gadu mbei an sa ko wan wojo soni möönsö, dee sëmbë. Biga di soni mbei. De dë a wan hebi siba basu taa de o dëdë wan daka nöömö. An dë taa ku deseëi kë wë de ko sö e. Gadu hën buta de sö, ma nöö a du ën ku wan pakisei taa a bakaten de tuu o toona kumutu a di siba dë basu.

²² Dee sëmbë, ee i luku soni u mundu te i kaba, nöö a djei kuma hii soni tuu ta dë a gaan fuka ta djëmë seei, leti kuma te bëë ta njan wan mujëë faa pai. Sensi a fesi te kisi tide a dë sö eti.

²³ Ma an dë taa dee soni dë nöö ta fuka e, ma u seei ta djëmë a u hati te na soni tu. U kë di ten ko poi, di Gadu buta faa tja u ko a lanti ko lei taa u da miii fëën. Biga te di juu dë kisi, nöö Gadu o tooka dee sinkii fuu aki puu u a dëdë basu. Nöö u sabi taa a o du ën tu, biga di Akaa fëën di i si a da u aki hën da di fosuwan fu hii dee bunu dee a abi faa da u a bakaten.

²⁴ Nöö di soni u ta taki aki, a bi dë a dendu u di heepi di u feni a Gadu, ma tökusee an pasa sö eti. Hën mbei u fika ta mëni ën nöömö. Biga na wan sëmbë dë di te a si wan soni kaa, nöö a o fika ta mëni ën eti taa a o si ën. Biga a si ën kaa.

²⁵ Ma te u sabi taa u abi di soni kaa, hii fa wa si ën eti seei, ma woo dë ku gaan pasensi ta luku di juu faa dou fuu feni ën.

²⁶ Nöö wan oto gaan heepi dë möön. Hën da di Akaa u Gadu di ta heepi u a dee suwaki fasi fuu libisëmbë aki. Biga so juu wa ta sabi unfa fuu musu begi, ma di Akaa hën ta begi da u ku djëmë seei tee pasa di fan fu wan libisëmbë.

²⁷ Nöo Masa Gaangadu di sabi dee hati fuu finifini kaa ta fusutan andi di Akaa ta mëni te a ta begi da u. Biga a ta begi a wan fasi di ta kai gbelin ku dee soni Gadu seei ta kë a u.

Aki ta taki fa u dë winima

a Masa Jesosi tjika.

²⁸ Dee sëmbë o, u sabi taa Gadu ta wooko hii soni tuu makandi u tja bunu ko da u dee sëmbë dee lobi ën. Biga u wë da dee sëmbë dee a kai fu di a abi wan pakisei ku u.

²⁹ Biga gaanduwe a fesi a bi sabi u kaa. Hën a tei u buta fuu ko djei di Mii fëën, be hën Mii musu dë di fosuwan a dendu u sëmëni hia oto mii fëën.

³⁰ Nöo te Gadu o buta wan sëmbë fii djei di Mii fëën, nöo a o kai i nöömö. Nöo te a kai i kaa, nöo a o mbei i ko bunu nën wojo. Nöo te a mbei i ko bunu nën wojo kaa, nöo a o da i di waiti fëën nöömö di i musu abi.

³¹ Wë andi seei u sa taki möön fu hii dee soni dee u jei naandë, dee sëmbë? Fa Gadu dë ku u a wan së tjika aki, nöo ambë seei o sa du soni ku u te a wini u?

³² Biga Gadu kai u gaan soni te a da u di fëën seei Mii. An hoi ën a baka, ma a mbei a paka di paima fuu hedi. Nöo ee sö wan gaan soni a du da u kaa, nöo na waiwai seei a o da u hii dee oto soni dee u abi fanöudu nö?

³³ Wë nöo mi hakisi möön, ambë tjika u tja u dee sëmbë Gadu tei ko sëmbë fëën go kaagi? Sëmbë an tjika e! Biga Masa Gaangadu seei tei u u bumbuu sëmbë kaa, an si föutu a u möön.

³⁴ Nöo ambë seei da di sëmbë sa kë tjika u go kuutu da sitaafu? A sa kë Jesosi Keesitu nö? Nönö, an o du sö wan soni e. Biga hën dëdë da u kaa, nöo na di dë nöo ma Gadu toona weki ën baka, nöo fa u dë aki a dë sindosindo a letimaun së u Gadu ta begi da u.

³⁵ Mi hakisi unu möön, dee sëmbë, ambë sa paati u ku Masa Jesosi, Keesitu, puu u a di gaan lobi di u dë aki? A sa kë toobi nö? Na seei. Fuka ö? Na seei. Wë ee sëmbë ta sitaafu u wë? Na seei. Wë ee gaan hangi ko wë? Na seei. Wë pena wë? Kwetikweti. Wë ee i jei taa wan gaan soni sa ko miti i wë? Na seei. Wë ee de ta ko a i ku ufang'i wë? Na seei.

³⁶ Awa, kumafa i si i jei dë, sö wan soni dë sikifisikifi a Gadu Buku tuu taa: Fii hedi u dë a dëdë buka hii daka.

De ta luku u seei kuma wanlö sikapu de ta tja go koti gangaa kii. Sö u dë a libisëmbë wojo e, dee sëmbë.

³⁷ Ma nöo tökusee i hii dee soni u jei dë tuu, u dë gaanfa möön winima e! Biga di Sëmbë di i si lobi u aki sö hën wë wooko sö da u.

³⁸ Nöo hën mbei mi ko sabi gbelin taa na wan soni dë di sa paati u ku di fa Gadu lobi u tjika aki e. Na dëdë, na libi, na wan basia u Gadu Köndë ee nasö dee u didibi köndë, na wan soni u di ten u dë aki, na wan soni u bakaten tu, na wan makiti sa paati u puu a di lobi u Gadu aki.

³⁹ Na wan soni a liba ala, na wan soni a basu aki tu. Na wan kodo soni seei a hii di mundu di Gadu mbei aki abi di kaakiti u sa paati u ku di lobi di Gadu lobi u aki e, dee sëmbë, fu di u nama ku Jesosi Keesitu di Masa fuu.

9

Aki ta lei fa Gadu hei

dee Dju sëmbë tjika.

¹ Wë dee sëmbë, ka mi ku „Masa Jesosi„ Keesitu nama tjika aki kaa, nöö mi o taki wan soni da unu, nöö na sipootu mi ta mbei e. Tuutuu soni mi o taki. Di Akaa u Gadu seei ta piki ku mi hati taa tuutuu soni mi o taki aki, dee sëmbë.

² Nöö mi taki e, fa i si mi dë aki, mi dë ku wan gaan fuka a mi hati ta kusumi seei nöömö te na soni.

³ I sabi faandi mbei ö? U dee sëmbë u mi dee dë Isaëli sëmbë kuma miseei. A ta hati mi da de teee, leti kumafa i si mi o fan aki, taa ee a bi sa dë sô, nöö mi bi sa kë u „Masa Jesosi„ Keesitu jaka mi puu nëen fesi tuwë go kaba a sôsö, ee dee Isaëli sëmbë u mi bi sa ko feni di libi u teego a mi kamian.

⁴ Biga wë fa i si de sai naandë, nöö de wë bi dë a pasi u de ko mii u Gadu, u de feni dee bunu fëen a bakaten. De wë Gadu bi lei di gaan waiti fëen kaa di a abi kuma Gadu. Ku de wë a bi mbei sômëni buka, nöö sôseei de a bi da dee wëti fëen, ku di fa u de musu ta dini ën ta begi a di Wosu fëen. De wë Gadu bi paamusi sômëni gaan soni.

⁵ De abi dee nëbai gaan sëmbë fu goonliba tu, nöö a de wë Keesitu kumutu a libisëmbë fasi, hii fa a dë Gadu seei a hii soni liba, di dë u ta gafa nöömö. A tan sô.

Aki ta lei taa ja sa fia ku Gadu a di soni di a ta du.

⁶ „Ma hii fa Gadu bi hei u dee Dju sëmbë tjika seei, ma na hii u tuu dë apaiti sëmbë dëen e, dee sëmbë. Wë ma nöö fa mi fan naandë, nöö unfa fëen i mëni? „I ninga taa dee paamusi Gadu paamusi dë, de an ko soni möönsö nō? Nönö, na di soni dë mi taki e. Ma mi taki taa na hii dee bakamii u Isaëli dë tuutuu Dju sëmbë a Gadu wojo.

⁷ Leti kumafa i si i sabi tu taa na hii sëmbë dee ta kai Abahamu gaan avo dë tuutuu bakamii fëen a Gadu wojo. Biga wë Gadu bi fan ku Abahamu taa:

Fu dee bakamii fii,

nöö dee u Isaki mii nöö mi o tei konda e.

⁸ Nöö sô i si taa Gadu ta konda dee bakamii u di mii u Abahamu di a pai ku di paamusi u Gadu. An ta konda dee bakamii u di mii di a pai a libisëmbë fasi nöö.

⁹ Wë nöö haika bunu fa de pai Isaki e. Gadu kai Abahamu te a piki, a taa:

Luku, te kuma sô wan ten möön,

nöö mi o toona ko a i,

nöö Sala o dë ku wan womi mii a maun kaa.

Nöö ku sô wan paamusi u Gadu wë i si Isaki ko e.

¹⁰ Nöö sô a bi waka tu ku de tu mii u Lebeka de kai Esau ku Jakopu, dee de pai tulingi. Fa dee mii sai dë, di wan kodo taa nöö de abi, hën da Isaki, di gaan sëmbë fuu. De an tooka seei a di dë.

¹¹⁻¹² Ma nöö bifö Lebeka bi pai de tu mii dë, Gadu bi taki dëen taa:

Di gaan wan o saka a di pikiwan basu.

De an bi du bunu, de an bi du wogi seei, ufö Gadu taki sô. I si? Nöö di soni mbei a taki sô, fii musu si taa an ta nama seei a di du u wan libisëmbë, ma a ta nama nöö a di fa Gadu kai i. Sôseei tu, i sa si taa fa Gadu pakisei faa buta wan soni ko, sô nöö a musu pasa nöömö.

¹³ A ko dë nöö kumafa de sikifi a di Buku taa:

Jakopu hën mi tei, ma Esau hën mi disa.

¹⁴ Wë fa u fan dë, nöö unfa i mëni fëen, dee sëmbë? Kandë joo kë taa wë nöö Gadu an du bunu. Sô nō? Di lö pakisei naandë an musu ko a i seei.

¹⁵ Ja jei fa Gadu bi fan ku Mosesi ö? A taa:

Mi ta a' tjalihati a di sëmbë di mi kë e.

Mi ta saa di sëmbë di mi kë.

16 Nöo da sö i ta si taa an ta hëngi a di kë u wan libisëmbë, nasö a di fa i ta biinga, ma a ta dë a di fa Gadu ta abi tjalihati da i tjika.

17 Dee sëmbë, wan jei fa Gadu fan ku Kõnu Falao nö? A taa:

Mi ko buli i fu mi sa lei fa mi a' makiti tjika,
be në u mi bai a hii goonliba.

Wan jei nö, dee sëmbë?

18 Wë nöo sö u ta si taa Gadu ta abi tjalihati da di sëmbë di a kë, nöo söseei tu te a kë a ta buta wan sëmbë faa abi möön taangajesi.

19 Nöo a kandë joo hakisi taa: "Wë nöo ee a dë sö, nöo unfa Gadu sa kuutu u ee wa kë piki ën buka? Nëen seei buta u sö nö? Ambë sa bia kumutu a di soni di Gadu kë du?"

20 Aaa, sö i hakisi nö? Ma fa i sai dë libisëmbë nöo i dë, nöo i sa kai Gadu a kuutu ö? Haika e, ee wan sëmbë ta tëmbë ku doti, nöo unfa fëen i mëni? Ee a mbei wan soni, nöo di soni dë sa hopo hakisi ën taa: "Faandi mbei i mbei mi sö u du?" Nönö, an o sa taki sö e.

21 Fa i si di sëmbë ta wooko ku di doti dë, nöo a abi leti faa du ku ën kumafa a kë, na sö nö? Fa a sai dë, a sa tei wan pisi u di doti mbei paabi fu de sa du gaan bumbuu soni ku ën, nöo a sa toona tei wan oto pisi mbei paabi u de du wan möön lagi soni ku ën. Na sö nö?

22-23 Dee sëmbë o, andi i abi u taki u di fa Gadu ta wooko? Ja si fa a ta hoi pasensi ku dee sëmbë dee di hatiboonu fëen dë a de liba nö? Fa de sai dë, nöo de dë a pasi kaa u Gadu musu da de sitaafu kaba de a sösö. Nöo ee a bi kë lei kumafa hati fëen ta boonu ku de tjika, ku di fa a abi kaakiti tjika faa musu du ku de, nöo a bi sa du sö o. Ma a ta hoi pasensi da de ufö. Nöo di soni mbei, biga a kë lei di Gadu fasi fëen da u dee oto sëmbë dee a abi tjalihati da. Biga u da dee sëmbë dee a seeka buta kaa fuu musu feni di gaan waiti fëen a bakaten.

24 Nöo di waiti dë, nöo na u Dju sëmbë nöo Gadu kai fuu feni ën e, ma oto köndë sëmbë seei dë a dendu tu.

25 Nöo a kai ku di soni Gadu buta di tjabukama fëen de kai Hosea fa a taki, taa:

Dee sëmbë dee an bi dë sëmbë u mi,
nöo de wë mi o kai mi sëmbë.

Di sëmbë di sëmbë an bi lobi seei,
hën mi o kai mi lobima.

Sö Gadu taki e.

26 Hën Hosea taki möön taa:

Ka Gadu bi fan taa dee sëmbë dë
na sëmbë fëen de dë,

nöo leti naandë

de o kai de miuu u di libilibi Gadu.

Sö nöo a ta pasa fa u dë aki ku dee sëmbë dee an dë Dju.

27 Ma a di së u dee Dju sëmbë, di tjabukama de kai Jesaaja bi bai taa:

Dee Isaëli sëmbë sa hia

tee de dë kuma dee sandu sii u di ze bandja seei,

ma wan biti wan nöo o feni heepi a Gadu e.

28 Biga fa Masa Gadu buta faa du ku di goonliba aki,

nöo te juu fëen kisi,

nöo a o du ën tjua puu wante a wan leti fasi söndö buuja.

Sö Jesaaja bi taki.

29 Hën mbei a bi taki tu taa:

Ee na Masa Gadu di abi hii makiti

bi hoi wantu bakamii fuu a libi,

nöö hii u tuu bi o kaba a sösö gbededee
leti kumafa a pasa ku dee sëmbë u dee köndë de kai Sodom ku Gomola.

³⁰ Wë nöö andi u sa taki u dee soni u jei dë, dee sëmbë? Dati wan taki, dee sëmbë na u Dju u bi taki Gadu kai dë, de an bi ta biinga seei u de ko bumbuu sëmbë a Gadu wojo e, ma tókusee de ko sö o. Nöö unfa a waka? Di biibi de ko biibi, hën mbei. I si?

³¹ Ma dee Isaëli sëmbë u mi wë? De ta biinga u de hoi wëti dëdë ku libi seei fu de sa ko bumbuu sëmbë a Gadu wojo, ma fa i si i jei dë, de an ko sö möönsö e.

³² Faandi mbei? Fu di de an ta suku ën ku biibi, ma de ta suku ën ku du. Nöö hën wë i si de naki futu a di sitonu gbolo di di Buku bi taki.

³³ A taa:

Dee sëmbë, un luku.

Mi tja wan gaan sitonu ko buta

„a dee Dju sëmbë u mi dendu.”

Leti a Sion seei mi tjëen go buta.

Nöö a dë wan sitonu

sëmbë ta naki futu nëen ta kai.

Hën ta tuwë sëmbë gbolou.

Ma nöö ee wan sëmbë i ta biibi nëen liba,

nöö aan ten di joo kisi sen a bakaten möönsö.

Da sö e, dee sëmbë.

10

Aki ta lei fa dee Dju sëmbë

a' taangajesi tjika.

¹ Wë dee sëmbë, kumafa mi taki dë, nöö mi hati ta hangi seei u dee Isaëli sëmbë kuma mi musu feni di heepi u Gadu. Mi ta begi Gadu gaanfa da de fu di soni dë.

² Biga misee dë kotoigima u de taa de ta biinga taanga seei u de sa dini Gadu e, ma fa i jei dë, na ku fusutan o.

³ Biga de aan bisi ku di fa Gadu buta u sëmbë musu ko bumbuu nëen wojo. De an ta saka dëen seei, ma de ta hopo ta biinga nöömö ku dee wëti u de de ta hoi, fu de ko bumbuu nëen wojo.

⁴ Ma fa i si Gadu bi da de dee wëti dë, na u mbei de ko bumbuu nëen wojo e, ma fu tja de ko dou a „Jesosi,” Keesitu. Biga hën nöö sa mbei hiniwan sëmbë ko bumbuu a Gadu wojo, ee i ta biibi nëen liba. Nöö sö e.

⁵ Un boo toona mëni fa Mosesi bi taki da dee fesiten sëmbë fuu. A taa:

Di sëmbë di ta hoi hii dee wëti aki, nöö i feni di libi u Gadu.

Sö wë a taki e, kumafa i musu hoi wëti tjika ufö i sa ko bumbuu a Gadu wojo.

⁶⁻⁷ Ma haika fa a taki u di fa i sa ko bunu a Gadu wojo ku biibi. A taa:

Wan musu peevu hakisi a unu hati taa:

“Ambë o subi go a liba ala go tei heepi tja ko da u?”

“E nasö, “Ambë sa saka go a goonbasu go tei heepi ko da u?”

Nöö a di soni dë i musu si taa an taanga sö fii du fa Gadu kë. An nama seei a soni di woo du ku u kaakiti. Biga na u bi subi go a liba ala go tei „Masa Jesosi,”

Keesitu tja ko dëdë da u e. Nöö söseei di a dëdë nöö na u saka go a goonbasu ala go tei ën tja ko baka. Na sö u ta feni di heepi u Gadu.

⁸ Ma nöö a dë leti kumafa i si Mosesi bi toona taki dë möön, a taa:

Di taki, a dë a i seei naandë.

A dë leti a i buka kakisa ku i hati dendu.

Nöö di Buka di i si u ta tja ta konda da sëmbë aki, nöö hën nöö wë di dë e. An nama a du, ma a nama a biibi.

⁹ Biga ee i jabi i buka piki taa Jesosi hën nöö da Masa u mundu, nöö i biibi a i hati taa Gadu bi weki ën a dëdë toona dëën libi, nöö i feni di heepi u Gadu kaa.

¹⁰ Biga ku i hati i ta biibi, nöö hën ta mbei Gadu ta si i kuma bumbuu sëmbë. Nöö ku i buka i ta piki taa Jesosi da Masa, nöö hën ta mbei i sa feni di heepi u Gadu fu ja lasi go kaba a sösö.

¹¹ A dë leti kumafa di Buku u Gadu bi taki dë kaa taa:

Di sëmbë di ta biibi nëën liba,
an o kisi sen a bakaten möönsö.

¹² Nöö ee i dë Dju sëmbë, ee ja dë Dju, na wan sëmbë dë a fesi a di soni aki e. Biga u tuu abi di wan Masa a u liba, nöö a abi bunu te a hia ta da hiniwan sëmbë di ta kai ën nê ta suku heepi nëën, ee i dë Dju, ee ja dë Dju.

¹³ Biga di Buku taki taa:

Hiniwan sëmbë di ta kai Masa nê
o feni di heepi fëën.

¹⁴ Wë ma fa mi fan naandë, mi kë hakisi unu wan soni. Unfa sëmbë o sa kai wan sëmbë nê ee de an ta biibi nëën liba? Nöö unfa de sa biibi nëën liba ee de an jei soni fëën wan daka? Nöö unfa de o du jei soni fëën, ee sëmbë an kondëën da de?

¹⁵ Nöö unfa wan sëmbë sa kondëën da de ee de an mandëën go faa kondëën? Hën mbei de sikifi a di Buku taa:
Di futu u di sëmbë di ta tja wan bunu njunsu ko,
nöö a dë gaan waiti soni seei.

¹⁶ Nöö sô a dë tuu e. Ma hii fa sômëni Dju sëmbë ko jei di buka u Gadu kaa, ma na de tuu piki o. Ja jei fa Jesaaja bi hakisi nö? A taa:
“Masa o, ambë seei ta biibi di buka u ta tja aki baa?”

¹⁷ Wë nöö kumafa u bi taki dë, dee sëmbë, nöö sô a dë e. Biga te i jei di buka u Gadu ufö biibi ta ko a i hati, nöö di buka u Gadu dë hënseei da di u Keesitu di u ta konda aki kaa.

¹⁸ Nöö mi hakisi, dee Dju sëmbë an jei di buka nö? Awa, de jei ën o. Ja jei fa di Buku taki u dee bosikopuma u Masa ö? A taa:
Töngö u de ta piki a hii di mundu.
A hii dee kamiankamian u goonliba tuu seei sëmbë sa jei dee soni de ta taki.
Sö di Buku taki e.

¹⁹ Wë nöö mi toona hakisi möön, a sa kë taa dee Isaëli sëmbë an bi fusutan di buka nö? Na di soni dë! Ja si fa Gadu buta Mosesi faa sikifi nö? A taa:
Mi o mbei un haun da wanlö pei sëmbë
dee an bi dë wan nasiön.

Fa un ta si de kuma wanlö sösö sëmbë söndö fusutan dë,
ma de o ko dë a unu fesi,
nöö di juu dë hati fuunu o boonu seei.

²⁰ Nöö söseei Jesaaja konda wan soni limbolimbo, an bi fëëë u taki ën. A taa:
Gadu taki taa,
“Wanlö sëmbë ko feni mi dee an bi ta suku mi seei.
Mi tja miseei ko a limbo da wanlö sëmbë
dee an bi ta hakisi fa u mi möönsö.”

²¹ Ma fu dee Isaëli sëmbë a taa:

“Ndeti ku didia mi ta tëndë maun da de,
ma de ta hai baka.
De an kë piki mi buka.
Fa de sai u de dë,

de an kë tan seei a di tii u mi basu möönsö.”
Sô Gadu taki u dee Dju sëmbë u mi e.

11

Aki ta lei fa dee sëmbë na u Isaëli feni pasi u ko a Gadu.

¹ Wë nöö fa mi taki naandë, dee sëmbë, a sa kë un sa mëni taa Gadu tuwë dee Dju sëmbë fëen nō? Kwetikweti. An tuwë de e. Biga wë miseei da wan Dju sëmbë tu. Bôngö u Abahamu seei mi dë. De pali mi a di lô u Benjamin. I si?

² Nöö Gadu an tuwë dee sëmbë fëen dee a bi tei a fesi e. A ta mëni de eti.

Wan jei fa di Buku u Gadu taki u di tjabukama de kai Elia nō? Elia kaagi dee Dju sëmbë fëen da Gadu. A taa:

³ Masa o, fa u dë aki, hii dee tjabukama fii tuu de kii e, nöö dee sitonu tafa ka u bi ta tjuma soni da i, de booko de tuu fiaa puu. Mi wanwan tö nöö da Isaëli sëmbë fika ta begi i eti.

Nöö na di dë nöö,
ma de dë a mi baka seei u kii mi puu nöömō.
Sô Elia taki.

⁴ Ma nöö unfu Gadu piki ën? A taa:

Na di soni dë e.

Mi hoi sëbën dusu sëmbë da miseei
dee an tjökö kini a goon da Baali wan daka.

„Biga Baali hën da di pindigadu sëmbë bi ta begi a di ten dë.”

Nöö sô Gadu fan ku Elia e.

⁵ Nöö söseei a dë fa u dë aki tu e, dee sëmbë. Wanlô Dju sëmbë fika eti, dee Gadu tei fëen seei ku ën bunuhati.

⁶ Ma nöö ee a dë taa ku bunuhati a tei de, nöö an dë taa soni de du mbei e. Biga wë ee sô, nöö nëen da bunuhati möön.

⁷ Wë andi u sa taki u di soni aki baa? Fa Isaëli sëmbë ta biinga fu de ko bunu a Gadu wojo tjika dë, ma di gaan së u de an feni ën möönsö. Dee Gadu tei a de dendu, de nöö feni ën, nöö dee otowan ko abi möön taangajesi.

⁸ A ko leti kumafa i si de sikifi a di Buku taa:

Gadu buta de ko dë doon sô.

A da de wan pei wojo fu de an musu ta si soni fëen möönsö,

ku wan jesi u de an musu ta jei soni fëen tu,
te kisi tide eti.

⁹ Nöö Dafiti seei bi taki tu u dee lô Dju sëmbë dë. A taa:

Di soni de ta tei hebi kuma soni u njan u de dë,

a musu bia wan taapu da de u kisi de.

A musu dë kuma tatai a pasi da de,

nasö wan sitonu fu de naki futu kai,

u de feni di sitaafu nöömō di de musu feni.

¹⁰ Fa de sai u de dë, wojo u de musu ko dungu,

be de an ta si sondi möön.

Hiniwanten de musu dë ku fuka,

kuma wan sëmbë di ta waka bendibendi nöömō.

Sô Dafiti taki e, u dee lô sëmbë dë.

Aki ta taki fa dee sëmbë an dë Dju ko a dendu u di heepi u Gadu.

¹¹ Wë mi hakisi möön taa, fa dee Dju sëmbë naki futu dë, nöö de kai fu nöömō nō? De an o hopo möönsö nō? Aai, de o toona hopo e. Ma nöö fa i

si de kai fu wan pisiten dë, hën wë mbei un dee oto köndë sëmbë feni di heepi u Gadu. Nöo di soni mbei a ko sö, fu dee Dju sëmbë musu haun ku unu.

¹² Biga di kai i si de kai dë, hën wë mbei un dee otowan feni dee gudu u Gadu te a hila. Nöo unfa seei a o dë baa te dee Dju sëmbë toona ko a di kamian fu de feni hii dee gudu Gadu bi buta da de baka? Di juu dë, na dee gudu o ko möön hila da hii sëmbë nö? Awa, sö wë a o dë e.

¹³ Wë fa mi ta fan aki, dee sëmbë, nöo mi ta fan ku un dee sëmbë na Dju ufö. Nöo fa i si Gadu buta mi tjabukama fëen u ta konda di Buka da unu aki, nöo mi ta kai di wooko gaan soni e. Mi ta hopo ën seei.

¹⁴ Biga ku ën mi sa buli dee Dju sëmbë u mi be de haun ku unu, nöo a kandë a di fasi dë so u de sa bia ko feni di libi u teego tu.

¹⁵ Kumafa u taki dë kaa, dee sëmbë, Gadu disa dee Dju sëmbë fu wan pisiten e, nöo hën mbei un dee oto köndë sëmbë feni pasi fuun ko dë bunu ku Gadu. Nöo unfa seei soni o waka un mëni te Gadu o tei dee Dju toona tja ko nëen baka? Di soni dë, an o bigi ö, leti kuma te wan sëmbë dëdë toona weki baka? Aai, sö a o bigi tjika e.

¹⁶ Un boo mëni di soni u ta taki aki kuma te wan sëmbë ta dian boon. Ee a da Gadu wan pisi u di boon, nöo nëen da hii di boon tuu dë apaiti dëen ö? Söseee ee wan pau dë nöo di lutu fëen dë apaiti da Gadu, nöo na hii dee maun fëen tuu o dë apaiti dëen tu nö? Wë nöo sö a dë ku u dee Dju sëmbë tu. „Fa dee gaan sëmbë fuu bi dë apaiti sëmbë u Gadu tjika dë, nöo söseei u dee bakamii u de dë tu.”

¹⁷ Di fa Gadu ta wooko aki, nöo u sa mëni ën tu kuma wan sëmbë di abi di wooko ta tei wanlö oto pau maun tja ko mindi a wan oto pau, faa musu pai möön bunu fuuta. Nöo hën wë de bi abi wan pau ta pai di fuuta de ta kai oleifi. Hën de koti so u dee maun fëen puu. Hën de koti dee maun u wan matu oleifi di de an bi kiija seei, hën de tja de ko mindi a dee kamiankamian u di bumbuu pau di de ta kiija a ganda. Nöo fa de tja dee maun ko mindi dë, fu de feni di fatu u di bumbuu pau di ta kumutu nëen lutu, be de ko bumbuu soni.

¹⁸ Wë nöo dee paumaun i si de tja ko mindi dë, nöo un dee sëmbë na Dju wë e. Nöo di bumbuu pau i si dë, Dju sëmbë wë u kë taki. Nöo fa i si un nama naandë, nöo wan musu sai dë ta njan buka ta wisiwasi dee oto maun u di pau dee de bi koti puu naandë e. Biga wë fa i si un sai dë, nöo dee lutu u di pau ta hoi unu, na unu ta hoi dee lutu.

¹⁹ Wë a kandë i sa ta: “Awa, wë de koti dee di dë puu u de tei u a de kamian, na sö nö?”

²⁰ Tuu wë e, ma fa i si de koti dee maun dë, fu di de an kë biibi hën mbei de koti de puu. Nöo fu di un biibi hën mbei wë un ko nama naandë. Nöo un musu mëni unu seei be wan abi gaan fasi. Un musu fëëe seei.

²¹ Biga ku dee maun u di pau seei wë Gadu wooko sö. Nöo unfa un mëni a o wooko ku unu dee an bi dë maun u di pau seei, ma nama nöo de tja unu ko nama dë? Ee wan biibi, nöo na hesihesi Gadu sa koti unu puu tu nö?

²² Söö. Wë dee sëmbë, ee i buta pakisei bunu a dee soni u ta taki aki, nöo i o si fa Gadu abi bunuhati tjika, nöo i o si fa Gadu ta gandji da sëmbë tjika tu. Biga a gandji seei da dee sëmbë dee i si kai kumutu a di kamian de bi sai dë. Ma nöo a a' bunuhati da unu, ee un tan a di kamian nöömö faa sa lei unu di bunuhati fëen. Ma ee na sö, nöo söseei a o koti unu puu tu.

²³ Fa dee Dju sëmbë dee u taki sai dë, ee de disa di taangajesi fasi u de toona ko biibi, nöo Gadu o toona tja de ko nama baka ka de bi dë. Biga a abi kaakiti tjika faa du di soni dë e.

²⁴ Un boo pakisei wan oto futu u di nōngō aki, dee sēmbē. Fa i si Gadu koti dee paumaun puu dē, nōō de wē bi dē u di bumbuu pau seei. Nōō hēn wē a du wan soni di toobi libisēmbē fusutan. Biga unu dee bi dē a matu a tei tja ko nama a di kiijakiija oleifi pau a ganda dē. Nōō fa a heepi unu tjika dē, nōō na hesihesi a sa toona tei dee maun dee bi dē u di pau seei toona tja ko nama baka nō?

Aki ta lei taa Gadu an disa dee Isaēli sēmbē fēen u kooō.

²⁵ Dee sēmbē u mi dē, mi o taki wan soni aki awaa di bi dē wan tjubitjubi soni a Gadu hati, ma fa u dē aki an musu dē sō mōōn. Un musu fusutēen, ee nasō nōō un sa kisi gaan fasi.

Un haika e. Fa u dē aki, sōmēni u dee Isaēli sēmbē mbei taangajesi da Gadu tuu, ma fu wan pisiten nōō. Nōō te hii dee oto kōndē sēmbē dee o ko a Gadu ko a biihi kaa,

²⁶ nōō baka u di dē nōō dee Isaēli sēmbē seei o bia ko a Gadu awaa u de feni heepi nēen. Nōō di ten dē a o dē leti kumafa Gadu bi taki a di Buku. A taa: Leti a dee Isaēli sēmbē dendu dē di Heepima o kumutu, a Sion seei.

Nōō a o puu dee bakamii u Jakopu a di fa de sai dē, be de biā ko ta mēni mi.

²⁷ Nōō sō wan buka mi o mbei ku de e: mi o puu dee hogi du u de a de liba. Sō Gadu bi taki e, u dee Dju sēmbē.

²⁸ Te i luku te i kaba a di fa dee Dju sēmbē an kē piki di Buka u Masa Jesosi u ta konda aki, nōō de ku Gadu ko dē gaan felantima fu di soni dē hedi e. Ma fa de ku ēn ko felantima seei, ma un feni wini nēen, biga hēn wē mbei di Buka ko a unu. Ma tōkuseei a lobi dee Dju sēmbē eti o, fu dee gaan sēmbē u de hedi.

²⁹ Nōō dee bunu dee a buta da de kaa, ku di fa a kai de ko sēmbē fēen, dee lō soni dē an o sa puu mōōnsō.

³⁰ Fa i si un bi sai dē, dee sēmbē, nōō a fesi wan bi ta piki Gadu buka seei. Ma fu di dee Dju sēmbē an piki, hēn wē mbei un feni di tjalihati u Gadu.

³¹ Nōō te kuma tide eti dee Dju sēmbē an ta piki Gadu buka mōōnsō. Nōō di soni mbei, fu Gadu musu a' tjalihati a de liba leti kumafa a bi abi tjalihati fuunu.

³² Nōō hēn da te i luku soni te i kaba, nōō joo si taa a di wan fasi dē Gadu ta heepi hii sēmbē tuu. Biga a disa u tuu be wa piki hēn buka, fu a bakaten a sa feni pasi lei u di tjalihati fēen, ee i dē Dju, ee ja dē Dju.

Aki Paulosu ta gafa Gadu.

³³ Ke maingē, un luku fa di kōni u Gadu fundu tjika! Un luku fa a sabi soni tjika maingē! Un luku fa a gudu tjika. Fa a ta kuutu soni buta, na wan sēmbē seei sa dē u suku fini nēen te a fusutēen mōōnsō. Na wan sēmbē sa fusutan tu fa Gadu ta buta soni faa waka.

³⁴ A dē leti kumafa i si Jesaaja sikifi a di Buku, a hakisi taa: „Ambē seei sa sabi di pakisei u Gadu, andi dē nēen?

Ambē seei dēen lai wan daka taa sō a musu du?

³⁵ Ambē da Gadu soni wan daka faa musu go hakisi ēn soni baka? Un sēmbē seei baa?

³⁶ Biga nēen wē hii soni ta kumutu ko e.

Hēn ta hoi hii soni fu de an kaba a sōsō, nōō de tuu o toona ko fēen nōōmō tu.

Fa a sai dē, hēn nōō musu abi hii nēbai fu teego.

A tan sō.

12

Aki ta lei fa i musu hopo i seei

da Gadu tjika fii libi

kumafa a kë.

¹ Söö. Wë un dee sëmbë u mi o, wan si fa Gadu abi tjalihati da u nö? Wë nöö hën mbei mi begi unu gaantangi baa, be un hopo unu seei ku telu da Gadu e, kuma wan libilibi paima apaiti wan i ta tuwë dëen fu dëen tangi. Nöo a o suti dëen seei. Nöo te un du sö kaa, nöö hën da un ta dini ën a wan tuutuu fasi.

² Fa i si un sai dë, dee sëmbë, wan musu ta djeesi dee sëmbë u di goonliba aki dee na sabi Gadu a dee soni de ta du. Ma i musu da Gadu pasi faa tooka di pakisei fii, be i ko abi wan hii oto pakisei. Nöo joo sabi u wegi soni luku fii sabi andi Gadu kë. Biga di soni Gadu kë, a dë wan gaan bumbuu soni e. A dë wan gbelingbelin soni da i fii tei ku piizii.

³ Dee sëmbë o, fa Gadu buta mi a sö wan gaan wooko ku ën bunuhati aki, nöö fëen mbei mi ta fan ku hiniwan fuunu taa ja musu luku i seei hei möön fa i dë e. Ma i musu ta wegi i seei ku bumbuu pakisei ta luku andi Gadu buta da i fii tei wooko ku ën ku biibi.

⁴ Ja si fa di sinkii fuu aki dë nö? A abi sëmëni pisi, ma de an ta du di wan wooko.

⁵ Wë söseei a dë a u tu kuma biibima. Fa u ku Jesosi, Keesitu nama aki, nöö u dë hia seei, ma töku u dë kuma di wan kodo sinkii nöö, nöö hiniwan fuu dë kuma wan kamian fëen.

⁶ Biga fa Gadu paati dee köni fëen da u ku ën bunuhati aki, ma nöö de an dë di wan fasi e. De dë peipei. Nöö fëen mbei ee wan fuunu sai naandë, nöö Gadu da i di köni fii ta kisi fan nëen ta konda da otowan, nöö be i du ën kumafa di biibi fii dou.

⁷ Ee Gadu da i di köni fii ta heepi otowan, nöö be i du di dë. Ee Gadu da i di köni fii ta lei otowan soni, nöö be i ta lei nöö.

⁸ Ee Gadu da i di köni fii ta da otowan hati, nöö be i du di dë. Di sëmbë Gadu da di köni faa ta puu otowan a fuka nöö be a du ën söndö landa e. Ee Gadu da i di köni fii dë fesima ta tii oto sëmbë, nöö be i du ën ku hii i kaakiti. Ee wan sëmbë Gadu da i tjalihati fii ta heepi otowan, nöö be i ta du ën ku piizii söndö konda soni a buka. Nöo a di fasi dë, woo ko dë wan sinkii telutelu.

⁹ Söö. Nöö awaa mi o taki peipei soni kumafa fii libi kuma biibima. A di fosu kamian di lobi fuunu musu dë söndö ganjan. Nöo i musu buuse hiniwan soni di i si taa hogi, biga ku bunu soni nöö i musu ta nama.

¹⁰ Un musu ta fii makandi kuma baaa ku baaa, nöö be i ta hopo di otowan fii möön fa i ta hopo i seei.

¹¹ Dee sëmbë, wan musu dë malëngëmalëngë e. Ma i musu ta dë gaagaa sabi taa Masa hën i ta dini.

¹² Un musu ta wai nöömö e, fu di un sabi taa woon feni dee bunu u Gadu dee a bi paamusi u. Nöo un musu ta tja sitaafu ku pasensi e. Nöo un musu ta begi nango nöömö tu. Wan musu disa.

¹³ Nöo un musu ta heepi dee oto sëmbë u Gadu a dee soni de abi fanöudu. Nöö be un ta tei sëmbë ku wai a unu wosu tu.

¹⁴ Ee wan sëmbë ta toobi i ta du hogihogi ku i, nöö na sibëen e, ma wensi bunu dëen.

¹⁵ Ee i si wan sëmbë ta wai, nöö wai ku ën e. Ee i si wan sëmbë ta këë, nöö këë ku ën makandi.

¹⁶ Biga fa un sai dë, un musu ta libi ku wan hati makandi. Ja musu mbei taa i hei te nöö ja sa nama ku lagi sëmbë. Ja musu abi gaan fasi.

¹⁷ Ee wan sëmbë du hogi ku i, nöö ja musu toona du hogi ku ën baka. Ma i musu ta biinga fii libi a wan leti fasi a hii sëmbë fesi.

¹⁸ Nöö i musu biinga fii libi fiifii ku hii sëmbë, ee i sa.

¹⁹ Un dee lobi mati u mi dë, un haika e. Wan musu paka hogi ku hogi baka, ma un musu disa pasi da di hatiboonu u Gadu. Wan jei fa Gadu taki a di Buku ö? A taa:

Fu tei paima a sëmbë, nöö mi a fika da.

Te wan sëmbë du hogi, nöö mi o pakëen nöömö.

Sö Masa Gadu taki.

²⁰ Ma nöö unu, wan musu du sö e. Biga di Buku taki möön taa:

Ee hangi ta kii di felantima fii, nöö dëen soni u njan.

Ee dëewata kisi ën, nöö dëen wata a bebe.

Biga te un du sö kaa,

nöö a o hati ën kuma i tuwë zonka ku faja nëen hedi djolou.

²¹ Sö wë e, dee sëmbë. Na da hogi pasi faa wini i e, ma i musu wini hogidu ku bunulibi.

13

Aki ta lei fa u musu libi

ku dee tii lanti buta.

¹ Wë awaa woo konda da unu fa fuun musu libi ku lanti. Un haika e, hii sëmbë musu ta saka a dee tii u lanti basu e. Biga fa dee tii sai naandë, nöö na wan kodo u de dë di na Gadu buta. Biga hii dee tii u lanti dee dë kaa, nöö Gadu wë buta de.

² Nöö fëen mbei ee wan sëmbë ja kë saka a di tii u lanti basu, nöö a di sondi di Gadu buta basu wë ja kë saka. Nöö dee sëmbë dee ta libi sö, sitaafu wë de ta hai ko a deseeli liba e.

³ Biga ee wan sëmbë i ta libi bunu, nöö ja o ta fëëe dee tiima. Ma dee sëmbë ta du hogi nöö de musu dë ku gaan fëëe a hati da de. Hën mbei ee i kë kumutu a di lö fëëe naandë basu, nöö i musu bia ko ta libi bunu, nöö joo feni bunu në a lanti tu.

⁴ Biga fa i si dee tiima sai naandë, dee sëmbë, nöö futuboi u Gadu wë de dë e, fu de tja bunu ko da unu. Ma nöö ee i ta du hogi, nöö fëëe nöö fii fëëe. Biga dee sondi de ta tja a de bandja ta lontu ku de naandë, nöö na u sösö de ta tja de. Fa i si de sai dë, futuboi u Gadu de dë e, nöö ee de kisi i u da sitaafu, nöö hën di hatiboonu u Gadu wë i si ko a i liba dë kaa.

⁵ Fëen mbei a fiti fii saka i seei da di tii u lanti e, na fu di i ta fëëe sitaafu wanwan nöö, ma fu di ja musu ta dë ku latjahati taa ja ta libi bunu.

⁶ Nöö fu di dee tiima dë futuboi u Gadu kaa, nöö hën mbei u musu ta paka lanti möni tu. Biga di wooko de ta du dë musu nango nöömö.

⁷ Nöö un musu ta paka de kumafa a fiti. Ee möni fuun da de, nöö un da de e. Ee a dë fuun lesipeki de, nöö un lesipeki de. Ee a dë fuun hei de, nöö un hei de.

Aki ta lei fa u musu libi

ku dee otowan fuu.

⁸ Dee sëmbë, un haika e. Wan musu abi oto paima a unu liba fuun paka möönsö, boiti di paima di un abi kaa taa un musu ta lobi unu seei makandi. Biga di sëmbë di ta lobi di otowan fëen, nöö hën ta hoi hii dee wëti u Gadu tuu.

⁹ Biga dee soni dee i si Gadu taki naandë sô, kuma ja musu waka ku wan mujëe di na mujëe fii u wosu, ja musu kii sëmbë, ja musu fufuu, ja musu haun, ku hii dee oto wëti tuu dee Gadu buta da u, nöö a di wan kodo wôutu aki nöö de tuu nama taa i musu lobi di otowan fii kumafa i lobi i seei.

¹⁰ Biga di sëmbë di lobi di otowan fëen kaa, nöö an o du hogi ku ën e. I si? Fëen mbei baa lobi hën wanwan tō sa mbei i ta hoi hii dee wëti u Gadu tuu ku telu.

¹¹ Fa i si u ta fan ku unu aki, dee sëmbë, nöö sô fuun musu libi e, fu di un ko abi fusutan u di ten u dë aki. Biga wë di ten Gadu buta faa heepi u nöö a ko mōön zuntu mōön leki di ten un bi ko a biibi dë. Fëen mbei un musu weki a duumi buli seei.

¹² Fa u dë aki, di ndeti ta kule hesihesi ta pasa, nöö didia ta jabi ta ko. Wë nöö be wa libi kuma dee hogilibima dee ta du soni a ndeti tjubitjubi fu sëmbë an musu si de e. Nönö. Di lö libi dë u musu disa, nöö un mboo libi a wan limbolimbo fasi. Hën o dë kuma u dë ku fetilai bisibisi fu di didibi an sa wini u.

¹³ Biga u musu libi a wan fasi di fiti, kuma a didia nöö u ta libi.

Wan musu hai ko dë a wan kamian ta bebe ta dööngö ta bai ta kai olo ta du soni e. Wan musu ta booko dee wëti u Gadu a di sê u manu ku mujëe tu, ta du peipei soni dee na fiti. Söseei tu wan musu ta kisi toobi ku unu seei ta haun ku unu na unu.

¹⁴ Ja musu ta suku unfa fii sa da di sinkii fii okasi faa piki dee taku kē fii hati e. Ma be di libi u Masa Jesosi Keesitu dë a unu fu hii sëmbë sa si, kuma wan waiti koosu di un ta bisi hiniwan daka.

↳ Sô fuun libi e, dee sëmbë, nöö Gadu o abi piizii ku unu.

14

Aki ta lei fa i musu libi ku wan

oto biibima di i ku ën an ta kai

a di soni un ta du.

¹ Söö. Wë awaa woo taki a dee soni liba dee biibima ku biibima an ta kai ku deseei a de. Fa un sai naandë sô, ee wan sëmbë biibi fëen suwaki te a ta dë a wanlö wëti basu di unu ku ën an ta kai a di wan, nöö un tei ën sô nöö e. Ja musu ta kuutu nëen liba u dee lö soni dë hedi.

² Kandë wan sëmbë biibi fëen taanga tjika te a sa njan hii soni. Di otowan biibi fëen suwaki tee hën an sa njan hii soni, guluntu wanwan nöö a ta njan.

³ Wë ma nöö di sëmbë di ta njan hii soni dë an musu ta mbei di otowan fa e. Nöö söseei di sëmbë di an ta njan hii soni, guluntu nöö a ta njan, nöö an musu ta kuutu di sëmbë di ta njan hii soni, biga Gadu tei ën kaa.

⁴ Biga ambë da i fii kuutu a wan sëmbë liba di an dë futuboi fii? Na soni fii di dë e. Nöö ee a kai, ee an kai, di dë di Masa fëen hën musu sabi. Nöö an o kai tu, biga Gadu abi kaakiti tjika faa hoi ën fu an kai.

⁵ A kandë wan sëmbë ta hoi wan daka apaiti mōön dee oto daka. Di otowan ta luku hii daka tuu di wan fasi nöö. Ma fa de ta du ën dë, hiniwan u de musu sabi gbelin nëen hati taa Gadu kē faa du sô e.

⁶ Di sëmbë di ta hei wan daka mōön dee oto daka, nöö Gadu hën a ta hei ën da. Di sëmbë di u taki ta njan hii soni dë, a ta du sô fu di a si taa a kai ku Gadu, nöö a ta da Gadu tangi nëen liba. Söseei di oto sëmbë dë tu. Fa hën an ta njan hii soni dë, a dë fu di a si taa Gadu an kē faa njan mën, nöö a ta da Gadu tangi u dee soni dee a sa njan.

⁷ Dee sëmbë o, na wan kodo fuu ta libi fuu seei e, nöö na wan kodo fuu ta dëdë fuu seei tu.

⁸ Ee u dë ku libi, u dë u Masa. Ee u dëdë, u dë u Masa. Fëen mbei ee u dë ku libi, ee u dëdë, fu Masa nöö u dë nöömö.

⁹ Biga fa Keesitu dëdë toona weki ko libi baka dë, nöö a du ën sô faa musu dë Masa a libisëmbë ku dëdësëmbë tuu liba.

¹⁰ Nöö di a dë Masa fuu tuu kaa, nöö faandi mbei i ta taanpu ta kuutu a di otowan fii liba möön? Ee nasö, faandi mbei i ta sösö di otowan fii u du? Wë biga te wan daka u tuu seei o hai ko a di kuutu bangi u Gadu, faa kuutu soni fuu.

¹¹ Wan jei fa a dë a di Buku ö? Gadu taki e, taa:

Fa i si mi ta libi nöömö aki,

nöö mi soi taa hiniwan sëmbë seei kaa o tjökö kini a mi fesi nöömö wan daka. Nöö söseesi hiniwan sëmbë o jabi ën buka piki mi a dee soni dee a bi du. Sö Gadu taki e.

¹² Nöö sô i si taa hiniwan fuu o piki Gadu a dee soni dee u seei bi du.

¹³ Nöö fëen mbei u musu disa di kuutu u ta kuutu di otowan fuu. Nöö be un mëni unu seei bunu tu fu wan musu buta wan sitonu a pasi fu di otowan fii naki futu kai.

¹⁴ Dee sëmbë o, ka mi ku Masa Jesosi nama tjika aki, nöö mi sabi gbelin a mi hati taa na wan soni ₁ u njan ₁, seei abi tjina. Ma töku ee wan sëmbë si taa a abi tjina, nöö nëen dë a abi tjina tuu.

¹⁵ Nöö ee joo njan wan soni ma i sabi taa ee i njan mën a o buta di otowan fii a fuka, ma i ta njan mën sô nöö, nöö hën da ja ta libi kuma i lobi di sëmbë dë e. Haika e, ja musu mbei di otowan fii kaba a sösö fu di i kë njan wan soni hedi. Biga hënseei tu ₁ Masa Jesosi ₁, Keesitu bi dëdë da.

¹⁶ A kandë i ta si wan soni taa a bunu fii du ën, ma di otowan fii hën an si ën sô. Wë nöö ja musu du ën a wan fasi faa feni i kosi taa hogi i ta du. Na tja i seei go a dee lö fia dë.

¹⁷ Biga wë fa Gadu ko dë könu a u liba ta tii u aki, nöö an nama a soni u njan ku soni u bebe. Nönö. Ma a nama a di fa i dë a di Akaa u Gadu leiki ta libi a wan leti fasi ku kötöhati, ku piizii.

¹⁸ Nöö hiniwan sëmbë di ta dini ₁ Jesosi ₁, Keesitu a di fasi dë, nöö ku i Gadu ta wai. Nöö dee oto sëmbë o si taa i ta libi bunu tu.

¹⁹ Söö. Dee sëmbë o, un boo biinga ku dee soni dee sa mbei u dë fifii ku u seei, ku dee soni dee sa heepi u fuu ko a fesi a di biibi.

²⁰ Gaantangi baa, na poi di wooko u Gadu u soni u njan hedi e. Kumafa u taki dë kaa, Gadu an buta tjina a soni u njan. Ma nöö töku seei ee wan sëmbë i ta njan wan soni di sa mbei di otowan fii naki futu kai, nöö hën da hogi i ta du.

²¹ Nöö hën wë mbei, ee a nama a wan soni u njan, nöö i disëen. Ee soni u bebe, nöö na bebëen möön. Biga ja musu du na wan soni di sa kaba di otowan fii a sösö ₁ fu di di biibi fëen an taanga tjika eti ₁.

²² Söö. Nöö fa di biibi fii taanga tjika a dee lö soni u ta taki aki, dee sëmbë, nöö be i hoi ën fii ku Gadu nöö. An dë fii tjëen go a oto sëmbë. Nöö i dë bunu e, ee hati fii an ta foo i a dee soni i ta du taa hogi.

²³ Ma nöö ee wan sëmbë i ta panta u njan wan soni fu di ja sabi ee a bunu ee an bunu a Gadu wojo, ma töku hën i njan mën nöö, hogi i du dë kaa e. Biga ja du ën ku biibi. Nöö hiniwan soni di ja du ku biibi, nöö hën da hogi i du kaa.

15

Aki ta lei u möön fa di libi makandi musu dë.

¹ Söö. Wë dee sëmbë, kumafa u taki dë kaa, u dee sëmbë dee dë taanga a di biibi musu hoi pasensi da dee otowan e, dee an dë sö taanga eti. Wa musu ta du di soni di ta kai ku u seei nöö a kaba,

² ma un boo du di soni di sa kai ku di otowan fuu, be a tja bunu ko dëen faa ko möön taanga a di biibi.

³ Biga „Jesosi„ Keesitu seei an bi ta biinga dëen seei wanwan e. Ma leti kumafa de sikifi a di Buku, nöö sö nöö a bi pasa ku ën taa: Dee kosi de kosi i dë, Gadu, de tuu kai a mi liba.

⁴ Nöö fa de sikifi dee soni a di Buku u Gadu dë, nöö de sikifi de tuu fu de lei u soni e. Biga te u lesi fa dee sëmbë u fesiten bi abi degihati ta hoi pasensi, nöö a ta da u degihati tu fuu hoi dou ta luku dee soni dee Gadu bi paamusi u taa de o pasa nöömö.

⁵ Fa Masa Gadu sai dë, dee sëmbë, nöö hën wë abi pasensi ku taihati e. Nöö hënseei musu heepi unu fuun libi ku wan hati makandi kumafa Keesitu Jesosi bi lei u fuu libi.

⁶ Nöö te un dë sö kaa, nöö un sa fiti buka ku wan kodo hati ta gafa Gadu makandi, di dë di Gadu fu u Masa Jesosi Keesitu, bifö a dë hën Tata tu.

⁷ Söö. Wë dee sëmbë, be un tei unu na unu kumafa un dë e, leti kumafa „Jesosi„ Keesitu bi tei unu kumafa un dë, nöö Gadu o feni nëbai a unu.

⁸ Fa i si Jesosi Keesitu bi ko a goonliba dë, dee sëmbë, nöö a ko kuma wan futuboi u Gadu faa lei u dee Dju sëmbë taa Gadu dë u futoou. Biga a mbei u ko si taa hii dee soni Gadu bi paamusi dee gaan sëmbë fuu dë, nöö de tuu o pasa.

⁹ Nöö a ko a goonliba fu dee oto köndë sëmbë na u Isaëli tu, fu de sa si di gaan tjalihati u Gadu di a abi, be në fëen bai.

Ja sabi fa wan sëmbë sikifi a di Buku ö, u dee sëmbë na Dju. A fan ku Gadu taa:

Fëen mbei mi o gafa i në a dee oto köndë sëmbë dendu dee na Dju.

Mi o ta kanda ta bai di në fii.

Sö a sikifi a di Buku e.

¹⁰ Nöö de sikifi tu taa:

Un musu ta wai seei, un dee sëmbë na Dju.

Un mökisi ku dee sëmbë u Gadu ta wai.

¹¹ Nöö hën de toona taki möön taa:

Hii un dee sëmbë na Dju, un hopo Masa në e.

Hii un dee föluku tuu, un musu ta kanda dëen.

¹² Nöö söseei Jesaaja taki wan soni u dee sëmbë na Dju tu. A taa: Dee böngö u Isai,

ee i si de joo taa de kaba a goonliba.

Biga de ko dë kuma wan pau de koti tee fika lutu wanwan.

Ma te wan pisi di lutu dë o booko wojo toona nasi ko.

Nöö fa a o nasi dë,

nöö hën o ko dë Tiima a hii pei föluku liba.

Nëen liba hii dee oto köndë sëmbë na Dju o buta de futoou fu de feni heepi.

Sö Jesaaja bi taki e.

¹³ Nöö da sö e, dee sëmbë. Di Gadu di ta buta sö wan gaan biibi a u hati aki taa a o heepi u nöömö, hën musu fuu unu hati ku piizii e, ku kötöhati, fa i si un ta futoou ën naandë. Fa di Akaa fëen abi kaakiti tjika dë, hën musu ta

wooko a unu liba mbei un fika ta mēni nōömō taa Gadu o du dee soni dee a bi paamusi.

Aki Paulosu ta taki u di fa Gadu wooko nēen liba.

14 Dee sēmbē o, fa mi dē aki mi sabi gbelingbelin a mi hati taa un ta du sōmēni bumbuu soni kaa. Mi sabi taa un sabi soni te tjika, nōō un abi di kōni tu fuun sa lei unu na unu.

15 Ma tōkuseei mi mbei di pampia aki da unu nōō. Dee soni mi sikifi aki, mi fan so u de gbelin seei. Ma fēēē u taki de, fu di mi bi kē toona mēni unu de a bakafutu. Nōō di soni mbei mi du sō, fu di Gadu tei mi buta a sō wan gaan wooko ku ēn bunuhati.

16 A buta mi u mi ko wan futuboi u Keesitu Jesosi ta tja di bunu buka fēēn ta konda da un dee oto sēmbē na Dju. Mi dē kuma wan mindima fuunu ku Gadu, fu mi sa hopo unu kuma wan suti paima tja go dēēn. Nōō di paima aki, a dē wan paima di di Akaa fēēn seei seeka buta dēēn apaiti.

17 Nōō fa i si mi ku Jesosi Keesitu nama aki, nōō mi ta hopo di wooko Gadu da mi u mi du dēēn e. Mi ta kai ēn gaan soni seei.

18 Nōō te mi ta konda soni, ma ta tei na wan soni u miseei ta konda. Ma mi ta konda dee soni dee, Jesosi, Keesitu bi du a mi liba. Biga a tei dee fan dee mi fan ku dee soni dee mi du hēn a du gaan soni ku de, tee sōmēni u dee sēmbē na Dju ko piki Gadu buka seei.

19 Ka di Akaa fēēn abi kaakiti tjika dē, a mbei sōmēni gaan foombo soni pasa, u lei taa hēn abi di wooko.

Nōō sō mi bi dē ta konda di bunu buka u Jesosi, Keesitu ku telu a hii kamian ka mi bi waka. A Jelusalen naandē mi seti, nōō hēn mi ta kondēēn ta lontu a dee kamiankamian tee go dou a di pisiwata de kai Iliikum.

20 Hii fa mi du ēn dē, mi ta biinga u konda di buka nōömō a dee kamian ka de an bi jei di nē u Masa Jesosi, Keesitu wan daka eti, fu an musu dē kuma mi tei wan wosu ta mbei di wan oto sēmbē bi seti kaa.

21 A dē leti kumafa di Buku taki taa:
Te ka sēmbē an konda di buka wan daka
nōō na ala de o ko jei ēn.

Dee sēmbē dee an bi jei ēn wan daka o ko fusutēēn.
Wan si ō?

Aki Paulosu toona taki mōōn

fa a kē ko a Loomē.

22 Nōō di wooko di i si mi taki dē, hēn wē tapa mi sōmēni pasi mbei ma bi sa ko a unu ala eti.

23 Ma nōō fa u dē aki, nōō ma a' kamian a dee kondē aki mōōn fu mi konda di buka. Mi kaba di wooko u mi aki kaa. Nōō fu di mi bi hangi sōmēni jaa longi kaa u mi musu ko luku unu ala,

24 hēn mbei pakisei u mi toona kai a di soni dē liba mōōn. Mi ta mēni fu mi go a Sipanjan kondē, nōō te mi o go nōō mi o pasa a unu ala ko tan wantu daka ku unu. Nōō a baka u di suti ten di mi ku unu o abi dē, nōō mi o kē fuun sa heepi mi fu mi go a Sipanjan awaa.

25 Ma nōō fa u dē aki, nōō mi dē a pasi nango a Jelusalen ufō. Mi ta heepi dee biibima ala ku wan soni.

26 Biga a dē sō taa dee biibima u Masa Jesosi a Masadonia ku Akaja pii mōni fu de manda go da dee pooti biibima fuu, dee Dju wan, a Jelusalen ala. Nōō hēn di mōni dē wē mi ta tja go da de.

27 Nōō fa dee biibima na Dju du di soni aki, nōō waiwai seei de du ēn o. Biga ee i luku ēn te i kaba a dē sō kuma dee sēmbē na u Dju, de a' paima seei a u

dee Dju sëmbë. Biga a u de feni di bunu u Gadu a de akaa. Nöo hën mbei a fiti u de toona heepi dee Dju sëmbë fuu baka ku dee soni de abi fanöudu u de sinkii.

²⁸ Wë nöo te mi tja di möni aki go da dee sëmbë kaa, nöo mi o ko haika unu ufö mi pasa go a Sipanjan.

²⁹ Nöo mi sabi taa fa mi o ko a unu dë, nöo mi o ko ku hii dee bunu tuu dee u ta kisi a „Jesosi, Keesitu.

³⁰ Söö. Wë nöo dee sëmbë, fa mi ku unu nama ku Masa Jesosi Keesitu makandi aki, mi kë begi unu a wan soni. Biga di Akaa u Masa Gadu seei hën baku di lobi fëen a u hati mbei u ta lobi u seei sö. Hën mbei mi kë hakisi unu fuun heepi mi begi fajafaja a tu soni liba.

³¹ Di fosuwan, hën da mi kë fuun heepi mi begi fu Gadu musu puu mi a dee Dju sëmbë u Judea pisiwata maun dee an ta biibi.

Nöo di otowan, hën da fu di wooko i si mi nango du a Jelusalen aki, dee Dju biibima musu tei ën u bumbuu soni. „Biga a kandë de an o kë tei soni di kumutu a oto köndë sëmbë maun.”

³² Ma nöo te mi si taa hii soni waka bunu, nöo mi o ko a unu ala ku wai seei, ee Gadu kë, nöo woo ta da u seei hati makandi. Nöo da sö e, dee sëmbë.

³³ Nöo di Gadu fuu di nëen wanwan tö sëmbë ta feni kötöhati, hën musu dë ku unu. A tan sö.

16

Aki Paulosu ta manda odi apaiti da sëmbësëmbë.

¹ Fa i si di mujëe de kai Fiibi ko a unu naandë, dee sëmbë, mi butëen a unu maun e. Di mujëe i si aki sö, a dë wan sëmbë fuu di ta wooko a di keiki a Kenkelea.

² Nöo mi ta begi unu gaantangi be un kisi ën a wan fasi di fiti dee sëmbë dee dë apaiti da Masa Jesosi. Fa i si unu ku ën tuu nama ku Masa Jesosi dë, nöo un musu heepi ën a dee soni a abi fanöudu. Biga fa a sai dë, a heepi sömëni sëmbë gaanfa seei te kisi ku mi seei tu.

³ Nöo mi ta manda gaan odi da Pesila ku Akila taa mi dë bumbuu. Dee sëmbë dë, mi ku de bi ta du di wooko u Jesosi Keesitu makandi,

⁴ nöo a fika piki de bi dëdë fu mi hedi. Hën mbei na mi wanwan nöo ta da de tangi, ma hii dee oto biibima u Masa Jesosi dee na Dju, dee ta miti makandi a dee köndëköndë tuu, ta da de tangi tu.

⁵ Nöo un da dee biibima odi tu, dee ta hoi keiki a de wosu.

Nöo mi ta manda gaan odi da mi lobi mati Epënëntusi. Hën wë da di fosu sëmbë di ko biibi „Masa Jesosi, Keesitu na Asia köndë.

⁶ Nöo un da Malia odi tu. Di mujëe dë bi wooko taanga seei da unu e, dee sëmbë.

⁷ Nöo un da Andoonikusi ku Juniasi odi, di mi ku de dë di wan famii. Mi ku de de bi söötö a dunguwosu makandi e, nöo de abi bunu në seei a dee oto tjabukama u Masa Jesosi. Fa i si de sai dë, de bi ta biibi a „Jesosi, Keesitu kaa bifö miseei ko ta biibi nëen.

⁸ Nöo un da Ampiliatusi odi, di mi lobi fu di mi ku ën nama ku Masa makandi.

⁹ Nöo un da Ubanisi gaan odi. Hën bi heepi u a di wooko u „Jesosi, Keesitu tu.

Nöo mi ta manda odi da mi lobi mati Sitaki tu.

¹⁰ Nöo be un da Apëlësi odi. Di womi dë, de bi poobëen te de wei, nöo hën de ko si taa aai, a dë wan bumbuu sëmbë u „Jesosi, Keesitu tuutuu.

Nöo un da dee sëmbë u Alisitobu wosu tuu gaan odi da mi e.

11 Nöo un da di oto sëmbë u mi de kai Helodion odi, ku dee sëmbë u Naasisusi wosu dee ta biibi a Masa.

12 Nöo un da Teefena ku Teefosa odi da mi tu. De tu mujëë dë ta wooko taanga da Masa e.

Nöo un da mi lobi mati Pëësisu odi da mi tu. Di mujëë dë seei bi ta wooko taanga da Masa tu.

13 Nöo un da Lufusi odi da mi, di Masa bi tei apaiti. Nöo un da hën mama gaan odi da mi e, biga a dë mi mama tu.

14 Nöo un da Asinkitusi odi da mi tu, ku Filegon, ku Hëlimësi, ku Patobasi, ku Hëlimasi, ku dee oto biibima sai ku de naandë tuu.

15 Nöo un da Filologusi odi, ku Julia, ku Neluisi ku ën sisa, ku Olimpasi, boo taa hii dee biibima u Masa Jesosi tuu dee sai ku de naandë.

16 Nöo un baasa unu seei e, dee sëmbë, kuma apaiti sëmbë u Gadu.

Hii dee sëmbë u [Jesosi] Keesitu dee ta ko a keiki makandi a dee kami-ankamian tuu manda gaan odi da unu.

Aki Paulosu toona da de lai a wantu soni möön.

17 Söö. Wë dee sëmbë, mi begi unu gaantangi taa be un mëni unu seei ku dee sëmbë ta suku u poi unu na unu naandë e. Dee sëmbë i si naandë, taapu wë de ta buta a pasi fu kisi unu puu a di lei di un bi kisi kaa. Nöo wan musu hulu de möönsö.

18 Biga fa dee lö sëmbë sai dë, na [Jesosi] Keesitu u Masa de ta dini e, ma dee soni deseeti hati kë, de de ta dini. Fa i si de ta waka ta lontu ta fan suti ta naki sëmbë tëtë naandë, ganjan nöo de ta ganjan dee sëmbë dee an sabi soni möön bëtë e, fu de musu poi pakisei u de.

19 Ma töku fa i jei mi fan dë seei, ma hii sëmbë sabi unu kaa taa un ta piki Gadu buka, nöo feën mbei baa mi ta wai seei ku unu. Nöo mi kë fuun abi fusutan te tjika fuun sabi bumbuu soni, ma nöo a di së u sabi hogi, un musu ta dë kuma miii.

20 Dee sëmbë o, abiti möön nöo di Gadu fuu di ta da sëmbë kötöhati o makisa di didibi Saatan buta a unu basufutu e.

Jesosi Keesitu, di dë di Masa fuu, hën musu dë ku unu ku ën bunuhati, dee sëmbë.

21 Nöo Timoteo, di mi ku ën ta wooko makandi aki, ta manda gaan odi da unu tu, hën ku Lusiusi ku Jason, ku Sosipata. Boo taa, hii dee sëmbë u mi aki tuu ta manda gaan odi da unu.

22 Söö. Nöo mi, Teetusi, fa mi ta sikifi di biifi da Paulosu aki, nöo miseei ta manda gaan odi da unu tu a di në u Masa Jesosi.

23 Nöo mi Paulosu toona ta manda odi u Gajusi da unu tu. Fa di womi dë aki, hën wë ta hoi mi nëën wosu, nöo hii dee oto biibima dee ta ko a keiki makandi aki tuu seei a ta kisi ku wai. Söseei Elatusi, di dë wan lantima ta seeka möni soni u di köndë aki, ta manda gaan odi da unu, hën ku di oto sëmbë fuu de kai Kwatusi ta manda gaan odi da unu tu e, dee sëmbë.

[

24 Masa Jesosi Keesitu musu dë ku unu ta tja unu ku ën bunuhati. A tan sö.]

Aki Paulosu tapa di biifi ku tangi a Gadu.

25 Söö. Wë dee sëmbë, mi ta buta unu a Masa Gaangadu maun. Hën abi kaakiti faa hoi unu gingin fu di un ta piki di Buka feën di mi ta konda aki. Biga soni u Jesosi Keesitu wë mi ta konda, nöo hën ta mbei di soni ko a limbo di bi dë tjubitjubi a di pakisei u Gadu sömëni jaa longi kaa.

26 Ma fa a bi dë tjubitjubi seei, ma töku dee fesiten tjabukama bi mbei sëmbë ko sabi soni feën. Biga Masa Gadu di ta libi u teego, hën wë bi manda de u de

sikifi soni fëen, be hii föluku u goonliba sa ko biibi Masa Jesosi u de piki ën buka.

²⁷ Nöö di Gadu fuu i si dë, nöö nëen maun wë i si mi ta buta unu e, dee sëmbë. Hën wanwan abi hii kōni, nöö hën musu feni nēbai fu nöömō u di soni di a du da u a Jesosi Keesitu. A tan sö.

Di fosu biifi Paulosu manda da dee biibima u Kolenti

Wan wöutu a fesi.

Wë un haika, dee sëmbë. Di sëmbë de kai Paulosu bi dë wan u dee tjabukama u Masa Jesosi de kai apösutu. Gadu kai ën ko buta sò. Hën seei bi tja di Buka u Masa Jesosi ko da dee sëmbë u di köndë de kai Kolenti, nöö hën so u de piki di Buka tei Masa Jesosi ko Gadu u de.

Nöö di soni mbei Paulosu sikifi di biifi aki. Dee biibima u Kolenti fosu bi sikifi biifi manda hakisi ën wanlò soni unfa u de musu libi a di biibi, nöö hën a toona sikifi di biifi aki manda piki de.

Nöö a mbei di biifi aki tu, fu di a jei taa de an ta libi bunu a di biibi kumafa a bi lei de. A ta bai de be de bia ko ta libi kumafa a sa bunu da Masa Gadu.

Dee soni dë abi di biifi.

A di pisi aki Paulosu ta da

dee sëmbë odi.

¹ Dee sëmbë o, mi Paulosu, ta mbei di pampia aki e. Nöö kumafa un sabi kaa, mi da di sëmbë Masa Gadu bi kai ku ën seei kè faa ko dë wan u dee tjabukama u Jesosi Keesitu de kai apösutu. Nöö fa mi ta mbei di pampia aki, nöö mi ku wan sëmbë fuu de kai Sositeni,

² sò u ta sikifi ën ta manda odi da un dee biibima u Masa Jesosi dee dë a di köndë de kai Kolenti. U ta mandëën da un dee sëmbë dee Masa Gadu bi kai fuun ko dë sëmbë fëën a wan apaiti fasi, fu di unu ku Masa Jesosi ko dë di wan. Nöö u ta mandëën tu da hii dee oto sëmbë a dee kamiankaman, dee ta kai Jesosi Keesitu në ta begi ën. Hën da Masa fuu ku de tuu.

³ U ta manda odi da unu taa Masa Gadu ku Masa Jesosi Keesitu tuu musu dë ku unu ku de bunuhati. De musu da unu böö.

A di pisi aki Paulosu ta da

Masa Gadu tangi.

⁴ Dee sëmbë o, hiniwanten mi ta da di Gadu u mi ku unu tuu, tangi fuunu hedi e, fu dee soni dee a du da unu ku ën bunuhati, fu di un ko nama ku Jesosi Keesitu.

⁵ Biga wë a mbei un ko abi hii soni fa u dë aki a hii fasi. A mbei un ko abi fusutan ku bambuu pakisei fuun sa sabi di Buka u Gadu. Nöö sòseei a mbei un ko sa' fa u fan fuun kondëën tu.

⁶ Biga wë dee soni u Jesosi, Keesitu dee u bi konda da unu, de mbei lutu a unu hati te de dë u si a unu libi seei.

⁷ Fëën mbei fa un ta luku u Masa Jesosi Keesitu faa toona ko a goonliba aki, nöö na wan soni makei unu möön a di së u dee köni dee di Akaa u Gadu ta da dee sëmbë fëën e.

⁸ Nöö mi sabi taa Masa Gadu o hoi unu tu tee go dou a di kaba juu, fu te u Masa Jesosi Keesitu toona ko a goonliba nöö woon sa dë gbelingbelin söndö föutu.

⁹ Nöö u sabi taa a o du ën sö tuu, biga di Gadu fuu dë, un sa futoou ën. Nöö hën wë bi kai unu fuunu ku ën Mii Masa Jesosi Keesitu musu libi suti makandi.

Aki Paulosu ta fan ku dee sëmbë u de musu disa di fia libi u de.

¹⁰ Wë nõo un dee sëmbë u mi dë, fa mi gafa unu dë seei, ma mi kë toona bai unu a wan soni. Mi tei di në u Masa Jesosi Keesitu ta begi unu baa, taa be un disa di fia un ta fia ku unu seei naandë, ku di paati un ta paati ku unu na unu. Un musu dë makandi ku wan pakisei e, ku wan hati.

¹¹ Biga wë wanlõ sëmbë dee ta dë a di wosu u di womi de kai Kolu mbei mi ko sabi taa fia fasi dë a unu mindi.

¹² Mi jei taa so fuunu ta taki taa: “Fa u ta waka a Masa Jesosi baka aki, nõo mii ta tei di lei u Paulosu.” Otowan taa: “Mii ta tei di lei u Apolo.” Di otowan taa: “Mii ta tei di lei u Kefasi.” ǀHën seei da Petuisi.ǀ So sëmbë taa: “U ta waka a ǀMasa Jesosiǀ, Keesitu wanwan baka.”

¹³ Wë nõo mi hakisi unu, unfa wë? Fa un dë a peipei sëmbë baka dë, ǀJesosiǀ, Keesitu paati a pispipi nõ? Naa mi, Paulosu, de bi kii a lakpa fuunu hedi nõ? Fa un bi tei dopu dë, nõo a di në u Paulosu un bi tei ën nõ?

¹⁴ Wë mi da Gadu tangi seei fu di ma bi dopu na wan sëmbë a unu mindi e, boiti Keesipusi ku Gajusi,

¹⁵ fu na wan sëmbë sa taki taa mi dopu sëmbë a mi në ǀfu de konda taa de da bakama u miǀ.

¹⁶ Oooo, aai, mi bi dopu Sitefanasi tuu, ku dee sëmbë fëen wosu dendu. Ma ma si kuma mi dopu oto sëmbë naandë mõnsõ.

¹⁷ Biga wë ǀJesosiǀ, Keesitu an bi manda mi ǀa di fosu kamianǀ u mi dopu sëmbë e, ma fu mi konda di Bunu Buka fëen, be sëmbë jei. Nõo sõseei tu an manda mi u mi kondëen ku gaan kõni u libisëmbë. Biga an musu dë taa di suti u di fan u mi hën ta hai sëmbë tja ko a di biibi. Biga ee mi ta kondëen sõ, nõo di buka u di dëdë u Masa Jesosi a di lakpa pau o lasi ën kaakiti.

Aki Paulosu ta taki u di kõni u Masa Gadu ku di kaakiti fëen.

¹⁸ Dee sëmbë o, di Buka u di fa Masa Jesosi dëdë a di lakpa pau, a dë seei wan gaan sõsõ soni da dee sëmbë dee o kaba a sõsõ a didibi faja e. Ma fu wi dee sëmbë dee Gadu puu a dee hogi du fuu basu, te u jei ën nõo u ta si fa Gadu abi kaakiti tjika.

¹⁹ A dë leti kumafa de bi sikifi ën buta a di Buku u Gadu taa: Masa Gadu o mbei di kõni u dee kõnima bia ko sõsõ soni. Sõseei a o mbei di fusutan u dee sabisonima ko poipoi soni.

²⁰ Wë biga fa u dë aki, unsë dee kõnima dë? Unsë dee leima ku dee hulusionima u di goonliba aki dë? De an dë wan wojo soni mõn e. Biga Gadu buta di kõni ku di lei u libisëmbë tuu ko sõsõ soni kaa.

²¹ Fa a kõni tjika dë, nõo hën wë i si a seeka di soni buta sõ taa dee sëmbë u goonliba aki ku hii di kõni di de kõni ku hii di lei de lei dë seei, de an o ko sabi ën mõnsõ. Ma ku di sõsõ fan fuu dee tjabukama fëen nõo dee sëmbë dee ta biibi ën sa kumutu a dee hogi du u de basu.

²² Fa u dë aki, dee Dju kë si foombo wooko u Gadu bifõ de o biibi. Nõo dee Giiki sëmbë ta suku gaan kõni a libisëmbë fasi bifõ de, de o biibi.

²³ Ma u, u ta konda u ǀJesosiǀ, Keesitu kodo, di de bi peka a lakpa pau kii. Nõo di Buka u di dëdë u Masa Jesosi aki, nõo hën ta toobi dee Dju sëmbë te de an kë jei ën seei. A dë wan sõsõ fan tu da dee oto kõndë sëmbë, ma tõku u ta kondëen nõomõ.

²⁴ Ma dee sëmbë dee Gadu kai u de ko nëen, ee Dju, ee oto kõndë sëmbë, te u ta konda di Buka da de nõo nëen de ta si fa Gadu taanga tjika e, ku fa a kõni tjika.

²⁵ Biga di soni Gadu du, di libisëmbë kai sõsõ soni dë, kõni dë nëen mõn leki hii di kõni di libisëmbë abi. Sõseei di suwaki fëen di de ta si a di dëdë u Masa Jesosi dë, a abi kaakiti mõn hii kaakiti u libisëmbë.

²⁶ Biga wë un luku a unu seei, dee sëmbë. A di ten di Masa Gadu bi kai unu, nõö di möön gaan së fuunu an bi dë leilei sëmbë a goonliba fasi e. Wan bi abi taki a kõndë. Wan bi dë hei sëmbë.

²⁷ Ma dee sëmbë dee goonliba sëmbë ta si taa de an sabi soni, nõö de Gadu ta tei fu da dee sabisonima u goonliba aki sen. Söseei a ta tei dee suwakisuwaki sëmbë faa mbei dee taanga sëmbë kisi sen.

²⁸ A ta tei dee lagilagi sëmbë dee an bi dë wan wojo soni a goonliba aki, dee sösö wan, buta ko hei, fu goonliba sëmbë sa si taa dee soni mbei de bi ta gafa sëmbë an dë wan wojo soni.

²⁹ Nõö di soni mbei a du sö, fu na wan libisëmbë musu njan buka a Gadu fesi e.

³⁰ Biga Gadu wanwan mbei u ko feni di libi a ‚Jesosi,‘ Keesitu.

Nõö Masa Jesosi wë mbei u ko sabi fa Masa Gadu kõni tjika e. Sö seei a mbei u ko dë a Gadu wojo söndö föutu. A puu u a hii dee sitaafu dee u bi hai tja ko a u liba fu di u bi booko Gadu wëti, nõö fa u dë aki a ta puu hogi a u fuu sa ko dë limbolimbo. ‚Hii dee soni dë tuu u feni a Masa Jesosi e, dee sëmbë.‘

³¹ Fëen mbei de sikifi ën a di Buku taa:

Ee wan sëmbë kë njan buka,
nõö be a njan buka a dee soni Masa bi du dëen.

2

Aki Paulosu ta konda da de taa

ku di kaakiti u di Akaa u Gadu

a ta fan ku sëmbë.

¹ Wë, dee sëmbë, fa i si mi bi ko a unu naandë fu mi konda di woto u Gadu da unu, nõö ma bi ko kuma wan sëmbë di sabi soni tumisi e. Söseei ma bi ta fan ku unu kuma wan sëmbë di sabi u fan poi tu. Nönö.

² Biga fa mi bi dë a unu mindi dë, nõö mi buta miseei taa ma o konda oto soni möönsö möön leki di fa Masa Jesosi Keesitu bi dëdë a di lakpa pau.

³ Nõö mi bi ko a unu ku saka fasi ku fëëë, ku panta a hati seei. ‚Biga ma bi sabi ee mi sa du di wooko bunu.‘

⁴ Nõö a di fa mi bi ta konda di buka da unu dë, nõö ma bi ta mbei kijoo fa, ta tei dee kõni di libisëmbë abi u wini unu hati e. Ma mi bi kë u di kaakiti u di Akaa u Masa Jesosi hën musu tja unu ko a biibi,

⁵ fu di biibi fuunu an musu hëngi a libisëmbë kõni ma faa musu hëngi a di taanga u Gadu.

Aki Paulosu ta konda da de taa

di Akaa u Gadu wanwan tö

sa lei sëmbë soni fu Gadu.

⁶ Ma nõö hii fa ma ko a unu kuma wan kõnima seei, ma töku dee soni u ta taki aki, de ta lei u fa Gadu abi kõni tjika. Nõö wa ta taki de da hii sëmbë, ma u ta taki de da dee sëmbë dee ko taanga kaa a di biibi. Nõö di kõni u ta taki aki an dë di kõni u dee hedima u di goonliba aki e, dee o go kaba a sösö. Nönö.

⁷ Ma u ta lei sëmbë di kõni u Gadu. Nõö di kõni dë, hën Masa Gadu bi abi nëen pakisei gaanduwe faa heepi u fuu ko feni dee gaan bunu fëen. Bifö a mbei goonliba seei, nõö a bi sabi fa a o heepi u kaa, ma a fesi a bi dë wan tjubitjubi soni.

⁸ Nöo na wan u dee hedima u di goonliba aki bi sabi di lö köni dë e. Biga ee de bi sabi ën, nöo de an bi o peka di gaan nëbai Masa u mundu a di lakpa pau kii.

⁹ A dë leti kumafa de bi sikifi ën a di Buku u Gadu taa:

Di soni na wan sëmbë wojo bi si,
di soni na wan sëmbë jesi bi jei,

ku di soni di na wan sëmbë bi mëni nëen hati wan daka taa a sa feni ën möönsö,

nöö hën wë Gadu bi seeka buta a wan së kaa faa da dee sëmbë dee lobi ën.

¹⁰ Nöo sö di Buku taki, nöo sö a dë tuu. Ma uu ko sabi dee soni, biga di Akaa u Masa Gadu di a manda ko da u aki, hën ta lei u de.

Fa di Akaa u Gadu sai dë, dee sëmbë, hën ta öndösuku hii soni, te dou ku dee tjubitjubi soni dee dë a Gadu hati.

¹¹ Biga wë ambë sabi dee soni dee dë a wan sëmbë hati ee na di sëmbë dë seei? Söseei tu, ambë sa sabi dee soni dee dë a Gadu hati, boiti di Akaa fëen seei?

¹² Nöo di Akaa dë, hën Gadu manda ko buta a u hati, nöo hën ta lei u dee bunu Gadu da u ku ën bunuhati. Na ku wan libisëmbë akaa u ko sabi de e.

¹³ Nöo dee soni di Akaa u Gadu ta lei u aki, nöo dee soni dë seei u ta tei ta lei sëmbë. Nöo wa ta lei sëmbë a di fa libisëmbë ta lei sëmbë ku de köni e, ma kumafa di Akaa ta manda u fuu kondëen, nöo sö u ta kondëen.

¹⁴ Nöo ee wan sëmbë i dë nöo ja abi di Akaa u Gadu, nöo ja o piki dee soni di Akaa ta taki e. De tuu o dë kuma wan sösö soni da i, fu di ja o fusutan de. Biga fa dee soni u Gadu sai dë, di Akaa u Masa Gadu nöo sa lei i de.

¹⁵ Ee wan sëmbë i dë nöo i abi di Akaa aki a i hati, nöo i sa sabi u öndösuku hii soni. „Biga hën ta wooko a i liba.” Ma dee sëmbë dee na abi di Akaa, de an o sa fusutan di libi fi dë.

¹⁶ A dë leti kumafa di Buku taki:

Ambë seei da di sëmbë di sa sabi andi dë a Gadu hati
faa musu lei ën soni?

Ma u, fu di u abi di wan seei hati kuma di u „Jesosi,” Keesitu, „nöo u sa sabi soni fëen.”

3

Aki Paulosu ta konda da de taa hii dee wookoma u Masa Gadu

dë a di wan kodo wooko.

¹ Dee sëmbë o, di un bi ko a di biibi njanjan, ma bi sa fan ku unu kuma sëmbë di sabi u libi a di Akaa u Masa Gadu leiki e. Ma mi bi musu lei unu kuma sëmbë di ta libi a deseai kë, kuma piki mi.

² Biga wë ku bobiwata nöo mi bi ta kiija unu, na ku taangataanga njanjan. Ma nöo te tide un dë a di wan seei fasi dë eti, wan göö kumutu dë möönsö. Ee fuu taki, nöo dee fukëfukë pisi u di lei u Masa nöo mi sa tei ta konda da unu eti. Ma sa go a dee degidegi pisi u di lei,

³ fu di un ta libi kumafa dee libisëmbë u di goonliba aki ta libi eti. Biga wë ee un sai dë ta djalusu ta buja ta paati ku unu na unu, nöo nëen da unu ku dee sëmbë u di goonliba aki dë di wan fa nö?

⁴ Biga so fuunu ta taki: “Mi o tei di lei u Paulosu,” otowan ta taki: “Mi o tei di di Apolo,” nöo nëen da un ta libi kuma dee sëmbë u di goonliba aki dee na sabi Gadu nö?

⁵ Wë nöo fa un ta fia di fia dë, ambë un sabi da Apolo? Ambë un sabi da Paulosu? U tuu dë futuboi u Masa Gadu nöo. U tuu tja unu ko biibi nëen, fuun ta waka nëen baka. Biga hën da di wooko Masa da u.

⁶ Mi paandi di goon, biga mi fosu bi tja di buka ko konda da unu dē. Nöo hën a baka u di dē hën Apolo ko munjan di goon, biga a ko lei unu soni möön fini. Ma Gadu hën mbei di buka göö a unu hati.

⁷ Nöo fëen mbei na wan sëmbë hei möön di otowan, na di sëmbë di paandi, na di sëmbë di munjan di goon. Ma Gadu wanwan, biga hën ta mbei soni ta göö nëen.

⁸ Nöo di sëmbë di paandi ku di sëmbë di ta munjan di goon, a di wan wooko nöo de dē e. Nöo hiniwan o kisi ën paima kumafa a bi wooko.

⁹ Biga fa u dē aki, Gadu buta u tuu fuu ta heepi ën a di wooko. U ku ën ta wooko makandi. Nöo fa u ta taki soni u di goon aki, nöo unu wë da di goon, ma Gadu hën abi ën e.

Aki Paulosu ta taki taa dee wookoma u Gadu musu mëni u de du di wooko fëen bunu.

Wë nöo söseei fa un ko dē sëmbë u Gadu makandi dē, nöo un dē kuma wan wosu fëen tu, di a ta mbei.

¹⁰ Nöo di wosu dē, Masa Gadu da mi wan wooko nëen ku ën bunuhati, hën a lei mi tu unfa mi musu seti ën. Nöo hën mi seti di goonsei te mi kaba kuma wan sëmbë di sabi di wooko. Nöo fa u dē aki, nöo dee otowan fuu ta ko ta mbei a di goonsei dē liba. Nöo a bunu, ma hiniwan sëmbë di o ko mbei dē, a musu saandi a ta mbei buta dē.

¹¹ Biga wë na wan sëmbë sa buta wan oto goonsei möön leki di Gadu buta kaa e.

Biga fa i si di wosu seti dē, dee sëmbë, nöo a Jesosi Keesitu liba wë a seti.

¹² Nöo ee wan sëmbë joo tja soni go mbei a di goonsei dē liba, nöo i sa tja sëmëni pei soni. I sa tja goutu, i sa tja soofu, i sa tja djamati sitonu, i sa tja pau. Ma i sa tja ahun ku dëdëe uwii tu. Biga sëmëni sootu pei fasi i sa wooko di wooko u Gadu, bambuu fasi ku poipoi fasi.

¹³ Ma a di Gaan Kuutu Daka te Masa Jesosi ko, nöo hiniwan sëmbë wooko o ko a limbo. Biga dee soni dē tuu o pasa a wan faja, nöo di faja hën o mbei sëmbë si ee andi i bi tja ko buta dē.

¹⁴ Nöo ee di wooko fii pasa a di faja, nöo joo feni i paima.

¹⁵ Ma ee wan sëmbë wooko tjuma, nöo a lasi ën paima ku hii di möiti di a bi mbei tuu. Nöo hënseei o kumutu, ma ku sösö maun tjololoo. A fika piki hënseei bi o tjuma tu.

¹⁶ Nöo dee sëmbë, fa i si un dē sëmbë u Masa Gadu makandi dē, nöo unu wë da di Wosu u Masa Gadu kaa e, ka di Akaa fëen ta libi.

¹⁷ Nöo fa un ta buja ta paati ku unu seepi dē, ee wan sëmbë kaba di Wosu u Masa Gadu a sösö, Masa Gadu o kaba i seei a sösö tu e. Biga di wosu u Masa Gadu dē wan apaiti soni limbolimbo, nöo dee lö soni dē an musu ta pasa nëen dendu.

Aki Paulosu ta lei de taa

de an musu libi ku di kõni

u dee sëmbë u di goonliba aki.

¹⁸ Dee sëmbë o, na be na wan fuunu ganjëen seepi e. Ee wan sëmbë dē a unu mindi naandë ta pëe i seei kõnima a di goonliba aki, nöo a möön bëtë i disa di kõni dē, nöo i tei di lei u Gadu fii toon donma a di goonliba aki.

¹⁹ Biga wë di kõni u di goonliba aki dē wan sösö soni a Gadu wojo.

Ja sabi fa a sikifi a Gadu Buku ö? A taa:
Di kõni u dee kõnima dē seepi Gadu o tei kisi de.

²⁰ Söseei a taki möön taa:

Masa Gadu sabi di pakisei u dee kōnima taa a dē wan gaan sōsō soni.

²¹⁻²² Fēēn mbei na wan libisēmbē musu tei wan libisēmbē nē ta njan buka taa oto hei mōōn oto. Biga wē dee sēmbē tuu dē fu heepi unu. Paulosu ku Apolo ku Petuisi, u tuu Gadu manda da unu e. Sōseei tu, hii dee soni u di goonliba aki tuu dē fuunu. Ee i dē ku libi, ee i dēdē seei, hii soni u di ten u dē aki, ku hii dee soni sa ko a bakaten, dee soni naandē tuu dē fuunu, fuun feni bunu a de e.

²³ Biga unu da sēmbē u, Masa Jesosi, Keesitu, nōō Masa Jesosi dē u Gadu.

4

Aki Paulosu ta konda da de kumafa a dē tjabukama tjika.

¹ Wē nōō dee sēmbē, hiniwan sēmbē musu ta luku u dee tjabukama kuma futuboi u, Jesosi, Keesitu nōō. Un musu ta luku u kuma sēmbē Masa Gadu futoo fuu ta konda dee soni fēēn dee bi dē a tjubi.

² Wē nōō di soni sēmbē ta luku a wan basi, nōō hēn da ee a ta du di wooko kumafa hēn masa kē.

³ Nōō fa mi ta wooko aki, ee un sai dē ta kuutu mi seei ma a' toobi. Sōseei ma a' toobi tu ee hiniwan oto sēmbē ta kuutu mi, tee kisi miseei.

⁴ Ma fa mi fan dē seei, ma hati u mi an ta kuutu mi taa ma ta wooko bunu e. Ma di dē an kē taki taa mi dē sōndō fōutu. Masa Jesosi hēn nōō da di Sēmbē di sa kuutu mi.

⁵ Fēēn mbei wan musu kuutu sēmbē a fesi e, biga te Masa Jesosi ko kaa, nōō hēn o tja hii soni ko a limbo. Dee soni bi dē tjubitjubi a sēmbē hati tuu a o puu tja ko a dōō, nōō hiniwan sēmbē o feni ēn gafa kumafa a fiti.

⁶ Dee sēmbē o, fa mi ta sikifi soni da unu ta kai mi ku Apolo nē a dendu aki, nōō mi ta du ēn fuun sa lei soni e. Biga mi kē lei unu taa wan musu tei oto wēti mōōn leki dee wēti Gadu da u fuu ta wegi sēmbē ta luku. Wan musu buta wan sēmbē hei mōōn oto ta njan buka dēēn.

⁷ Biga wē ambē da i di kōni di i abi? Na Gadu ta da u hii soni nō? Wē ee Gadu hēn da i ēn, nōō unfa i sa njan buka fēēn?

⁸ Ma nōō unu, un ta mēni taa soni an makei unu mōōn. Un sabi hii soni kaa. Un abi hii soni kaa tu, dee Gadu abi faa da dee sēmbē fēēn. A buta unu kōnu fuun ta tii hii mundu sōndō u dee tjabukama. Sō un ta mēni.

Aai, mi bi sa kē un ko dē kōnu tuu o, dee sēmbē, biga ee un bi dou dē nōō u ku unu tuu bi o dē kōnu makandi.

⁹ Ma fa mi ta wegi di soni ta luku aki, nōō a djei da mi taa Gadu tei u dee tjabukama fēēn de ta kai apōsutu aki buta a di mōōn hogi kamian. U dē kuma sēmbē di lanti kuutu buta u de tja go kii a ganda mindi ta mbei fa, fu hii libisēmbē te dou ku dēe basia u Gadu Kōndē tuu, sai dē ta luku.

¹⁰ U ko dē kuma lauma u, Jesosi, Keesitu hedi. Ma unu, un dē kōnima. Un sabi hii soni fu di unu ku, Jesosi, Keesitu ko di wan kaa. Wa abi taki, ma unu dē takima. Unu de ta gafa, ma wi de ta kosi.

¹¹ Fa u dē aki, u ta dēdē ku hangi ku dēēwata. Wa a' koosu u bisi. De ta foo u ku bōō. Wa abi na wan kamian u tan seei.

¹² U ta dēdē ku wooko. U sōsō tee te sēmbē ta kosi u, wa ta kosi de baka, u ta toona ta begi da de. Te de ta sitaafu u ta du hogihogi ku u, nōō u ta tjēēn.

¹³ Sōseei te de ta lēgēdē da u ta mindi soni ta poi u nē, tōku u ta fan ku de suti. Boo taa u ko dē a sēmbē wojo kuma wan feki futu koosu, kuma wan sundju a sitaafu u de ba tja go tuwē a matu. Sō u dē da de e.

¹⁴ Fa mi ta sikifi dee soni da unu aki, dee sēmbē, nōō ma ta sikifi de u da unu sen e, ma mi ta bai unu a soni nōō, kuma unu da miii u mi di mi lobi.

¹⁵ Biga aluwasi un abi teni dusu sēmbē ta kiija unu da „Jesosi„ Keesitu seei, ma wan kodo tata nōo un abi. Fa mi fosu bi tja di Buka u Masa Jesosi ko konda da unu ala, nōo hēn mbei un ko dē kuma miui u mi.

¹⁶ Nōo mi ta begi unu baa taa be un suku fuun musu ko djeesi mi e.

¹⁷ Nōo hēn mbei mi ta manda Timoteo ko da unu ala. Hēn da wan lobi womi mii u mi di Masa Gadu da mi, nōo mi sabi taa a o du leti kumafa Gadu taki. Fa a o ko a unu dē, nōo a o toona mēni unu u di fa mi bi ta konda da unu u Jesosi Keesitu, kumafa a kē fu un musu libi. Leti kumafa mi ta kondēen a oto kamian a dee keikikeiki, nōo sō nōo a o kondēen da unu.

¹⁸ Wē a dē sō tuu taa sēmbē sai dē ta mēni taa ma o ko a unu ala mōon, hēn mbei de ta njan buka ku di gaan fasi u de.

¹⁹ Ma mi o ko e. Mi o ko hesihesi seei, ee Masa kē. Nōo te mi ko, nōo mi o si ee di kaakiti u dee gaan fasi sēmbē naandē dē a buka wanwan, naa a dē a dee du u de tu.

²⁰ Biga wē ka Gadu dē Tiima, nōo kaakiti an dē a fan a buka nōo a kaba e, ma a o dē u si a di fa i ta libi ku di kaakiti fēen.

²¹ Sōo. Wē dee sēmbē, mi fan ku unu kaa e. Nōo andi un kē? Mi musu ko a unu ku gandji, ku wipi nō? Naa mi ko a wan saapi fasi, ku lobi? A fika da unu.

5

Aki Paulosu ta konda da de taa de musu kuutu di soni u di sēmbē di bi tei ēn tata mujē.

¹ Sōo. Wē nōo mi jei taa wan taki dē a unu mindi naandē di nama a manu ku mujē soni. Nōo di lō libi dē, dee sēmbē dee an ta biibi seei ta si ēn u gaan hogi soni te de an ta libi sō. De taa wan womi dē a unu mindi dē tei ēn tata mujē.

² Ma tōku ku dee lō libi dē seei un sai dē ku gaan fasi eti. Un bi musu kisi sen ta tjali, te un jaka di sēmbē di du di hogi dē puu a unu mindi gaanduwe.

³ Fa mi dē aki, dee sēmbē, ma dē a unu mindi ma tōku di akaa u mi dē a unu ala. Nōo mi saandi mi o du ku di sēmbē dē kaa.

⁴ Nōo mi taki e, un musu kai wan kuutu makandi a di nē u Masa Jesosi Keesitu. Nōo di akaa u mi o sai dē tu, nōo Masa Jesosi o mbei a pasa leti kumafa un kuutu buta dē.

⁵ Nōo un tei di sēmbē dē nōo un tuwēen disa da di didibi be a du ku ēn te di hogi a du dē kaba nēen hati, fu di akaa fēen an musu go kaba a sōsō a di daka Masa Jesosi o ko.

⁶ Nōo hii fa di soni naandē dē gaan sen soni seei, ma tōku un sai dē ta njan buka ta mbei taa un humbuu poi. Nōo an bunu e. Wan sabi taa wan pikii sooda ta paaja nango a wan hii gaan paabi boon nō?

⁷⁻⁸ Hēn mbei dee Dju sēmbē ta puu sooda a de wosu fu de sa njan di Pasika Daka limbolimbo. Biga a di daka dē Gadu bi puu de a di saafu libi de bi dē a Egepiti kōndē. Nōo de bi kii wan sikafu mii fu de sa kumutu a di awoo libi naandē basu. Nōo di sikafu mii de kii dē, hēn kē taki u Keesitu e, dee sēmbē, di dēdē da u fuu sa kumutu a di awoo libi fuu.

Fēen mbei un musu puu hogi a unu mindi fuun sa dē limbolimbo a Gadu wojo e. Biga sō a buta da unu kaa. Un boo disa di awoo libi, fuu sa libi di njunjun libi Masa Jesosi tja ko da u, sōndō ganjan, sōndō hogihati.

⁹ Nōo mi bi sikifi wan pampia da unu kaa taa wan musu hulu dee sēmbē dee ta libi fanafiti libi a di sē u manu ku mujē soni.

¹⁰ Ma fa mi bi taki dē, na dee sēmbē an ta biibi a Gadu mi bi taki e. Biga dee lō sēmbē dē, u tuu sabi taa de ta libi dee lō libi dē kaa, de a' langahati, de dē

fufuuma, de ta njan sēmbē mōni, de ta waka a oto gadu baka. Nōo na de mi bi taki fu wan musu hulu. Biga ee de mi bi taki nōo hēn da un musu kumutu a di goonliba aki. „Biga a dee sēmbē dē mindi u dē kaa.”

¹¹ Ma dēē sēmbē mi bi sikifi taa wan musu hulu, nōo de da dee sēmbē ta kai de seepi biibima, ma de ta libi fanafiti a di sē u manu ku mujēē soni, ee nasō de a' langahati, ee nasō de ta waka a oto gadu baka, ee nasō de ta kosi sēmbē a baka, ee nasō de dē bebema, ee nasō de ta fufuu. Sō wan sēmbē wan musu njan ku ēn seei.

¹² Wē biga un bisi mi abi ku dee sēmbē dee dē a dōösē ala u mi musu kuutu de a dee soni dē? Nōnō, ma dee sēmbē dee dē a di keiki, de u abi pasi u kuutu.

¹³ Dee sēmbē dee dē a dōösē ala, Masa Gadu hēn o kuutu de. Ma unu musu kuutu di sēmbē di du di hogi dē, puu a unu mindi e, „kumafa Gadu Buku taki.”

6

Aki Paulosu ta bai de a di fa

de ta tja kuutu u de go

a dee sēmbē an ta biibi Gadu.

¹ Nōo dee sēmbē, wan oto soni fuunu dē mōön, a bigi da mi te na soni. Hēn da di fa un a' hati nango suku leti a dee kuutuma u kōndē dee na a' bisi ku Gadu, u de kuutu dee toobi un abi ku unu na unu. Na a dee biibima kuma unu un nango. Nōo anbunu e!

² Wan sabi taa a bakaten u dee biibima o kuutu hii goonliba nō? Wē ee un sabi sō kaa, nōo faandi mbei wan sa kuutu dee pikipiki toobi a unu mindi dē?

³ Wan sabi tu taa dee basia u Masa Gadu Kōndē seei u dee biibima o kuutu a bakaten nō? Wē nōo unfa a waka wan sa kuutu dee soni u di goonliba u dē aki?

⁴ Fēēn mbei te un abi wan toobi di nama a dee soni u di goonliba aki, nōo un sa kai ee dee mōön lagi biibima seei ko, fu de kuutu dee soni dē da unu.

⁵ Fa mi ta fan aki, nōo mi ta fan u sen musu kisi unu e, dee sēmbē. Biga fa un ta tja dee toobi fuunu nango a dee kuutuma u kōndē dē, nōo a djei sēmbē an dē a unu mindi mōönsō di abi fusutan tjika faa kuutu dee toobi un abi ku unu na unu.

⁶ Ma wan biibima ta tei oto biibima tja go buta seei a kuutu a dee sēmbē dee na ta biibi fesi. A bigi da mi e, baa.

⁷ Ma di soni dē seei dē wan gaan lasi soni e, dee sēmbē, taa un ta kisi sō wan gaan toobi ku unu seei tee un musu go a kuutu. Andi mbei wan sa disa unu seei be otowan nōo ta du hogihogi ku unu? A bi sa mōön bunu un tai hati be sēmbē ganjan unu nōo.

⁸ Ma ka fuun tai hati, nōo hēn un sai dē ta du hogihogi ku otowan ta ganjan de. Te dou ku biibima seei un ta du sō.

⁹ Dee sēmbē, wan sabi taa ee wan sēmbē ta libi fanafiti a Masa Gadu wojo, nōo an o sa dē a dendu te Gadu o ko Tiima ku telu nō? Wan mbei sēmbē ganjan unu e. Dee sēmbē dee ta libi fanafiti a di sē u manu ku mujēē soni, dee sēmbē dee ta waka a oto gadu baka, dee womi dee ta tei oto sēmbē mujēē, dee mujēē dee ta tei oto sēmbē manu, dee womi dee ta tei oto womi kuma mujēē, dee mujēē dee ta tei oto mujēē kuma manu u de, dee sēmbē dee ta du dee gaan sen soni dē, nōo na wan u de lō sēmbē dē o dou ka Gadu dē Kōnu.

¹⁰ Sōseei tu dee fufuuma, dee langahatima, dee dōöngōma, dee sēmbē dee ta waka ta kosi otowan, dee sēmbē dee ta ganjan sēmbē ta njan, de wan u dee lō sēmbē dē o dou tu.

11 Nöo sö so fuunu bi dë a fesi tu e. Ma fa u dë aki, di Akaa u Masa Gadu wasi unu ko limbo buta a wan së kaa da Gadu. Un ko dë seei söndö föutu a Gadu wojo fu di Masa Jesosi Keesitu dëdë da unu.

Aki Paulosu ta konda da de

u de musu libi ku di sinkii u de

faa musu tja nëbai ko da Gadu.

12 Dee sëmbë o, fa u ko a Masa Jesosi aki, a kandë wan sëmbë o taa: „Ma dë a dee fesiten wëti basu möön e,„ nöo mi sa du hii soni kumafa mi kë.”

Wë fa i taki dë, sö a dë tuu, ma na hii soni sa tja heepi ko da sëmbë e. Mi sa a’ pasi u du hii soni tuu, ma na wan soni musu kisi mi buta nëën basu kuma hën da mi masa.

13 Dee sëmbë ta du hogi a di së u manu ku mujëë soni, nöo de sai dë ta koti wan nongö ta taki taa: “Njanjan dë u bëë, bëë dë u njanjan.” Wë nöo sö a dë tuu. Gadu mbei bëë fii njan njanjan buta. Ma di bëë dë ku di njanjan tuu, Gadu o kaba ku de wan daka. Ma te woo taki a di së u manu ku mujëë soni, di dë dë oto soni. Biga Masa Gadu an mbei di sinkii fii fii libi ku ën fanafiti a di së u manu ku mujëë e. Ma hën abi di sinkii fii, nöo a mbei ën fii musu dini ën ku ën.

14 Nöo, di sinkii fii an o kaba a söso möönsö. Ma, leti kumafa Masa Gadu bi weki Masa Jesosi puu a dëdë ku ën kaakiti, nöo sösee a o weki dee dëdë sinkii fuu puu a dëdë tu, ku ën kaakiti.

15 Dee sëmbë o, wan sabi nö taa di sinkii fuu aki, a dë wan pisi u di sinkii u Masa Jesosi, Keesitu. Wë ee a dë sö, nöo mi sa tei di sinkii u Masa Jesosi aki ta waka ku mötjö nö? Nönö, kwetikweti.

16 Wan sabi taa di sëmbë di ta waka ku mötjö mujëë hën ku ën ko dë wan sinkii nö? Biga di Buku taa: “Te wan womi ku wan mujëë tei deseei kaa, nöo de tu sëmbë dë ko dë wan sinkii.”

17 Ma nöo di sëmbë di nama ku Masa, hën ku ën ko dë di wan na akaa fasi.

18 Söö. Wë dee sëmbë, di un jei sö kaa taa di fanafiti libi a di së u manu ku mujëë an bunu, nöo be u mbei möiti kumafa un sa mbei fu an musu kisi unu e. Biga wë hii dee oto hogi sëmbë ta du kaa, „de dë hogi a Gadu wojo tuu,„ ma di hogi a di së u manu ku mujëë soni ta kisi i seei sinkii a wan hii oto fasi. Biga ku i sinkii i ta du di hogi dë.

19 Dee sëmbë o, wan sabi taa di sinkii fuunu dë wan wosu u di Akaa u Masa Gadu nö? Di Akaa fëën di i si a da unu dë, a unu hati wë a ta libi e. Nöo wan dë basi fuunu seei „möön,„

20 biga Gadu bai unu di „ku di buuu u Masa Jesosi,„. Fëën mbei hii dee soni un ta du ku dee sinkii fuunu, de musu dë fu Masa Gadu sa feni gafa a de e.

7

Aki Paulosu ta konda da de unfa libi u manu ku mujëë musu dë.

1 Söö. Wë dee soni dee un bi sikifi da mi, awaa ufö mi o fan a de liba. Nöo mi taki e, ee wan womi dë nöo an kë tei mujëë, nöo antoobi. A bunu.

2 Ma fu di wakawaka libi hedi, hën mbei mi o fan sö taa be hiniwan womi tei wan mujëë fëën seei vö. Söseei hiniwan mujëë musu abi wan manu fëën seei vö.

3 Nöo di womi musu du di soni di fiti dëën mujëë. An musu niingëën a ndeti. Söseei di mujëë musu du da di womi tu e.

4 Biga di mujëë sinkii an dë fëën wanwan möön e, ma a dë fëën manu tu. Söseei di womi sinkii an dë fëën wanwan möön, ma a dë fëën mujëë tu.

⁵ Nöo fëen mbei wan musu duumi paatipaati ku unu seei ta niinga unu seei, boiti ee un tuu fiti buka taa woon begi Masa Gadu u wan pisiten. Ma te un kaba u begi kaa, nöo un musu toona ko duumi makandi baka e, be di didibi an musu feni wan baaku faa tja unu go du hogi, fu di wan a' taanga fuun hoi unu seei.

⁶ Ma fa mi taki dë seei, an dë taa wan wëti mi buta e, dee sëmbë, ma sô misikuma a sa fiti.

⁷ Biga wë mi bi kë fu hii sëmbë musu dë kumafa mi dë aki sôndö mujëë. Ma di Masa Gadu ta da hiniwan sëmbë hën apaiti taanga, wan sëmbë dë sô, di otowan dë sô, nöo hën mbei mi taki sô.

⁸ Nöo mi taki e, unu dee na tei manu nasö mujëë eti, ku un dee mujëë manu fuunu dëdë, mi taa a bunu fuun fika sô kumafa mi dë sôndö mujëë aki.

⁹ Ma ee un si taa wan sa tan sô, nöo be un tei manu ku mujëë fuunu. Biga wë a sa möön bunu un tei manu ku mujëë tööu bifö di hangî u manu ku mujëë ko möön unu.

¹⁰ Ma un dee sëmbë dee tei manu ku mujëë kaa, nöo mi o da unu wan wëti awaa, nöo di wëti aki Masa Jesosi seei butëen, taa dee mujëë an musu paati ku dee manu u de möönsö.

¹¹ Ma ee de paati, nöo de musu fika a ganda nöömö. De an musu go tei oto womi möön. Ma ee de kë tei manu nöo de musu go mindi ku di awoo manu u de. Söseee a dë da dee womi tu. De an musu tuwë dee mujëë u de möönsö.

¹² Wë nöo awaa ufö mi o taki soni u dee sëmbë a' manu ku mujëë kaa. Fa mi o fan aki, nöo na Masa hën ta taki ën e. Mi seei ta taki ën. Nöo mi taki e, ee wan womi dë biibima nöo di mujëë fëen an ta biibi, ma di mujëë tifihedi faa tan ku di lö womi dë, nöo di womi an musu tuwë di mujëë.

¹³ Söseee ee wan mujëë dë biibima ma hën manu an ta biibi, ma di womi dë tifihedi faa sa tan libi ku di mujëë, nöo di mujëë dë an musu tuwë di womi.

¹⁴ Un saandi mbei ö? Biga fu di di mujëë dë biibima, nöo Gadu ta luku di lö womi dë a wan apaiti fasi u di mujëë fëen hedi. Söseee tu, fu di di manu fëen dë biibima, nöo Gadu ta luku di mujëë a wan apaiti fasi u di manu fëen hedi. Biga ee an bi dë sô, nöo Gadu an bi o ta luku dee mii u de apaiti tu. Ma te i si Gadu ta luku dee gaan sëmbë apaiti nöo hën da a ta luku dee mii apaiti tu.

¹⁵ Ma ee di sëmbë di na ta biibi kë paati ku di biibima faa go fëen, nöo be a go e. Nöo ee sô a waka, nöo antoobi. Di womi ee nasö di mujëë di ta biibi an musu fika kuma a dë taitai a duwengi. Biga wë Gadu bi kai u fuu musu dë fififi ku hii sëmbë.

¹⁶ Unfa wan mujëë sa sabi ee a sa mbei di manu fëen ko a biibi, ee an o ko? Söseee unfa wan womi sa sabi ee a sa mbei di mujëë fëen ko a biibi, ee an o ko? „Be i disëen da Gadu nöo.”

Aki Paulosu taki da de taa be de an suku u tooka di fa de dë.

¹⁷ Wë nöo dee sëmbë, fa i si i bi dë di Gadu kai i fii ko nëen, nöo sô i musu dë e. Nöo ka i si Masa buta i, nöo i tan dë e. Sô mi ta fan ku hii sëmbë a dee oto keiki tu.

¹⁸ Ee wan womi bi a' di koti u dee Isaëli sëmbë nëen sinkii kaa bifö Masa Gadu kai ën, be an suku faa puu ën. Ee wan womi an bi kisi di maaka u Isaëli dë eti, be an go suku di lö koti naandë buta nëen sinkii e.

¹⁹ Biga wë ee i koti, ee ja koti, di soni dë an dë wan wojo soni fa u dë aki möön. Na dee soni dë Gadu ta suku a u. Ma dee wëti u Gadu fuu hoi, nöo de wë da dee gaan soni fa u dë aki.

²⁰ Fëen mbei hiniwan sëmbë musu dë fa a bi dë a di ten di Gadu bi kai ën.

²¹ Ee wan sɛmbɛ i bi dɛ saafu di Gadu kai i, nɔɔ na be di soni hati i te i hopo ta suku fii kumutu nɛɛn. Ma an dɛ taa ee i ko feni pasi fii kumutu nɔɔ ja musu kumutu e. I sa kumutu fii ku piizii. „Ma ee i tan dɛ tu an hogi.”

²² Biga wɛ wan saafuma di Gadu kai u ko nɛɛn nɔɔ a kumutu a saafu, a ko fii kaa. Sɔseei ee wan sɛmbɛ an bi dɛ saafu nɔɔ Gadu kai ɛn ko nɛɛn, nɔɔ a ko dɛ saafu e, u „Jesosi”, Keesitu,

²³ fu di a bai unu dii „ku ɛn buuu”. Fɛɛn mbei wan musu buta unu seei da libisɛmbɛ ta masa unu, tee un disa u piki Gadu buka ko ta piki libisɛmbɛ buka a di soni u ta taki aki.

²⁴ Nɔɔ da sɔ a dɛ e, dee sɛmbɛ. Leti fa i si i bi dɛ di ten Gadu kai i, nɔɔ sɔ i musu dɛ ta dini ɛn.

Aki Paulosu ta fan ku dee sɛmbɛ

an tei manu ku mujɛɛ eti, ku

dee mujɛɛ manu u de dɛdɛ.

²⁵ Wɛ nɔɔ un dee mujɛɛ mii dee an tei manu eti, ku dee womi mii an tei mujɛɛ eti, nɔɔ Masa an da mi buka a unu e. Ma kumafa a heepi mi tjika aki fu di a a’ tjalihati u mi, nɔɔ misikuma mi dɛ wan sɛmbɛ un sa futoou te un sa tei lai a mi.

²⁶ Wɛ nɔɔ fɛɛn mbei mi taki da unu taa misikuma a mɔɔn bunu fuun dɛ sɔndɔ manu sɔndɔ mujɛɛ fu di fuka libiten di u dɛ aki hedi.

²⁷ Ma nɔɔ ee wan womi a’ mujɛɛ, nasɔ wan mujɛɛ a’ manu kaa, nɔɔ de an musu paati. Ma ee wan womi an abi seei, nɔɔ be an suku mɔɔnsɔ.

²⁸ Ma nɔɔ tɔku fa mi taki dɛ seei, ee i ko abi mujɛɛ nɔɔ na hogi i du e. Sɔseei ee wan mujɛɛ mii ko a’ manu, nɔɔ na hogi a du tu. Ma dee womi a’ mujɛɛ ku dee mujɛɛ abi manu, de abi sɔmɛni fuka u de tjai a di ten u dɛ aki, nɔɔ hɛn mbei mi bi kɛ heepi un otowan a di pisi dɛ.

²⁹ Wɛ di soni mi kɛ taki, dee sɛmbɛ, hɛn da di ten u dɛ aki a ko zuntu poi fu di goonliba kaba. Fɛɛn mbei ja musu kai dee soni u di goonliba aki gaan soni te poi e. Biga ee wan womi abi mujɛɛ, nɔɔ na di mujɛɛ dɛ wanwan nɔɔ a musu ta mɛni.

³⁰ Sɔseei ee wan sɛmbɛ abi fuka nɛɛn hati te a ta kɛɛ, an musu ta kai di soni dɛ gaan soni te poi. Ee wan sɛmbɛ ta wai ta piizii, nɔɔ na di dɛ wanwan nɔɔ a musu ta mɛni.

Sɔseei tu ee wan sɛmbɛ ta bai wan soni, nɔɔ a musu sabi taa an o abi di soni dɛ fu nɔɔmɔ.

³¹ Ee wan sɛmbɛ i ta wooko ku dee soni u di goonliba aki, nɔɔ ja musu da de pasi u de tai i, biga abiti mɔɔn nɔɔ di goonliba aki o kaba e!

³² Ma nɔɔ fa mi taki da unu dɛ, dee sɛmbɛ, fu di ma kɛ un dɛ ku fuka a unu hati, hɛn mbei mi taki sɔ e. Di womi di na abi mujɛɛ nɔɔ hɛn ta a’ bookohedi a dee soni u Masa wanwan, faa sa libi kumafa Masa kɛ.

³³ Ma dee womi dee abi mujɛɛ, de a’ bookohedi u dee soni u di goonliba aki, fu de sa libi kumafa de mujɛɛ kɛ.

³⁴ Sɔ i ta si taa di bookohedi dɛ a tu sɛ.

Sɔseei tu, dee mujɛɛ dee abi manu ta a’ bookohedi u dee soni u di goonliba aki, fu de sa libi kumafa de manu kɛ. Ma wan mujɛɛ di na a’ manu, a ta a’ bookohedi u dee soni u Masa nɔɔ, fa a sa ko libi ku ɛn sinkii ku ɛn akaa tuu apaita da Masa Gadu.

³⁵ Nɔɔ fa mi taki aki, mi taki ɛn sɔ fu di mi si taa a sa heepi unu. Ma an dɛ taa tai mi kɛ tai unu e. Ma mi ta fan nɔɔ kumafa mi si a fiti, be na wan soni musu ta hai unu baka fu wan sa dini Masa ku hii unu hati.

³⁶ Nöo ee wan womi bi ta kiija wan mujëe, nöo te di mujëe ko bigi tjika nöo hën di womi ko fii taa ee an tei di mujëe fëen mujëe nöo an libi bunu ku ën, nöo antoobi. Be a tei ën fëen mujëe. An wogi.

³⁷ Ma ee di womi abi di fii nëen hati taa a taanga tjika faa sa hoi ën seei söndö mujëe, nöo a ta pakisei nëen hati taa an o tei di mujëe dë möön, nöo di dë bunu tu.

³⁸ Nöo a dë sö taki taa di sëmbë di tei, a du bunu, ma nöo di sëmbë di an tei, hën du möön bunu.

³⁹ Ma nöo haika, te wan mujëe dë ku manu, nöo a dë a wëti basu taa an sa tei oto womi solanga di fosu manu fëen dë ku libi. Te di manu fëen dëdë kaa bifö a abi pasi fu tei oto manu. Ma di womi a o tei dë, a musu dë wan biibima tu.

⁴⁰ Ma u mi aki, nöo mi pakisei taa di mujëe sa dë möön bunu ee a fika söndö manu, nöo mi ta si taa di Akaa u Masa Gadu dë ku mi a dee soni mi ta taki aki.

8

Aki Paulosu ta taki u dee njanjan sëmbë ta tuwë da dee gadu u de.

¹ Söö. Wë nöo wë da u ko a soni u dee gwamba dee sëmbë ta tja go tuwë da dee gadu u de. Nöo un ta taki taa u tuu sabi soni u de kaa, taa dee pindigadu na soni u fëëe, u sa njan di njanjan de ta tuwë da de. Awa, sö a dë tuu. Ma sabi ku sabi na di wan e. Biga i sa mbei taa i sabi soni tjika te i ko a' gaan fasi, ma lobi hën da di gaan soni biga hën ta tja heepi ko da sëmbë.

² Nöo ee wan sëmbë i mbei taa i sabi soni kaa, nöo hën da ja sabi soni kumafa a dë eti e.

³ Ma ee wan sëmbë i lobi Gadu, nöo di sëmbë dë Gadu ta sabi taa i dëen sëmbë.

⁴ Wë nöo ee fuu taki u dee soni de ta tuwë da dee gadu, wë u sabi taa dee lö gadu dë an dë wan wojo soni. Biga oto gadu an dë möön leki di wan kodo Gadu tö.

⁵ Aluwasi soni dë a goonliba aki te dou a liba ala tuu te a hia di de ta kai gadu ta begi,

⁶ ma töku u sabi taa wan kodo Gadu nöo dë. Hën da u Tata, nöo nëen hii soni kumutu ko. Fëen nöo u dë. Söseei wan kodo Masa tö nöo dë tu. Hën da Masa Jesosi Keesitu. Hën mbei hii soni u mundu, nöo hënseei ta da u libi.

⁷ Ma töku fa i jei dë seei, ma na hii u dee biibima tuu sabi bunu eti taa dee oto gadu an dë gadu e. Biga te tide eti biibima sai dë di bi guwenti oto gadu te de ta si de kuma tuutuu gadu eti. Te de go bai gwamba soni tja ko sindo u de njan, nöo de ta panta kuma kandë a bi dë wan soni de tuwë da dee gadu. Nöo de ta fëëe taa fa de ta njan mëen dë, nöo Masa Gadu o tei de u hogi.

⁸ De ta mëni sö tuu, ma na sö. Biga njanjan soni an ta puu u a Gadu e, nöo söseei an sa tja u ko nëen tu.

⁹ Ma nöo un mëni unu seepi, un dee sëmbë dee kumutu a dee oto gadu basu kaa. Fa un sabi tjika dë taa dee oto gadu an dë tuutuu gadu, ma wan musu tei di sabi dë buta kuma wan sitonu a pasi da dee sëmbë dee ta fëëe, u de naki futu kai.

¹⁰ Biga wë i sabi fa a o dë nö? Fu di i sabi bunu kaa taa dee gadu an dë tuutuu gadu, nöo joo go sindo ta njan ku dee sëmbë dee ta njan a di gaduwosu u de. Wë nöo te wan pisi, nöo di otowan fii di i si bi dë fëëefëëe dë o ko si i ta njan, nöo hën seepi o tei hati go njan tu, ma ku di gaan fëëe i si u bi taki dë.

¹¹ Wë nöö di sabi fii i sabi dë, nëen tja di otowan fii go kaba a sösö nö? Hii fa „Jesosi, Keesitu bi dëdë dëen tu, ma i ta du hogihogi ku ën sò. „Biga i mbei a du wan soni di hënseei si taa an bunu.”

¹² Nöö te un buta wan otowan fii faa du soni di ta fon mëen a hati taa an du bunu, nöö hogi i du ku „Masa Jesosi, Keesitu seei e.

¹³ Nöö fëen mbei fa mi dë aki, ee mi sabi taa ee mi njan wan soni nöö a o mbei di otowan u mi kai, nöö ma o njan di soni dë a mundu möön e. Na seei.

9

Aki Paulosu ta konda kumafa a ta puu dee leti fëen buta a wan së u di Buka u Masa Jesosi hedi.

¹ Wë fa mi ta fan ku unu aki, dee sëmbë, nöö miseei wë, ma bi ko fii kumutu a dee tjina naandë basu nö? Ma dë wan u dee tjabukama u Masa Jesosi de ta kai apösutu nö? Aai, mi dë wan u de e. Biga mi si Jesosi Keesitu u Masa ku miseei wojo. Nöö fa un ko a di biibi aki, na di wooko mi ta wooko da Masa Jesosi mbei un ko sò nö?

² Ee oto sëmbë an kë luku mi kuma wan tjabukama seei, ma unu musu luku mi sò. Biga fa i si un ko ta biibi dë, nöö hën ta lei limbolimbo taa mi da wan tjabukama u Masa Jesosi.

³ Nöö fëen mbei te dee sëmbë ta sösö mi a kamiankamian, nöö mi ta konda soni fuunu da de, be de sabi taa sò mi sa du di wooko u Gadu tjika.

⁴ Wë nöö di a dë sò kaa, nöö mi ku Banabasi, wa a' pasi fuu ta njan ta bebe ku unu nö?

⁵ Söseei kumafa Petuisi ku dee oto Tjabukama ku dee baaa u Masa Jesosi ta waka ta lontu ku dee mujëe u de nango a sëmbë de ta sölugu de, nöö u wë? Wa a' leti fu toou ku wan mujëe di dë a di biibi fuu ku ën ta waka ta lontu tu nö?

⁶ Mi ku Banabasi wanwan nöö musu ta wooko möni ufö u sa feni soni fuu njan nö?

⁷ Nöö ee wan sodati ta wooko, nöö aan leti u de pakëen nö? Söseei tu, ee wan sëmbë paandi wan fuuta fëen, nöö aan leti faa njan di njanjan fëen nö? Ee wan sëmbë ta kiija mbeti, nöö aan leti faa feni wan njan nëen nö?

⁸ Nöö fa mi fan dë, libisëmbë soni nöö mi taki ö? Naa söseei u ta lesi a Gadu Buku tu nö,

⁹ ka Mosesi sikifi dee wëti dee Gadu dëen. A taa:

Di kau di ta bia di mbii,

ja musu tai di buka fëen fu an musu njan dë.

„Biga ka i ta wooko nöö naandë joo njan.”

Wë fa Gadu fan dë, kau soni nöö a ta mëni nö?

¹⁰ An taki soni fuu tu nö? Aai, a taki soni fuu tu e. Nöö dee sëmbë ta wooko goon ku dee sëmbë ta puu njanjan wë? Fa de ta wooko dë, na de tuu o feni njan naandë nö?

¹¹ Wë nöö fa u bi konda dee soni u Masa Gadu da unu dë, nöö a sa hebi da unu poi ee u suku goonliba gudu a unu nö, dee sëmbë?

¹² Biga ee oto sëmbë abi di lö leti dë a unu, nöö u wë? Misikuma u musu abi leti möön de.

Ma nöö hii di leti fuu dë u buta a wan së ta tja pena fu soni an musu toobi sëmbë te de an sa piki di Buka u „Jesosi, Keesitu u ta tja aki.

¹³ Ma töku fa u taki aki seei, dee sëmbë, ma un sabi taa dee sëmbë dee ta wooko a di Wosu u Masa Gadu, de ta feni hafu u dee soni sëmbë ta tja ko da Gadu naandë. Nöö dee begima dee ta tjuma mbeti da Gadu naandë, nöö deseeri ta tei hafu, na sò nö?

14 Nöo söseei Masa bi taki tu taa dee sëmbë dee ta konda di buka fëen, nöo de musu ta feni soni u libi a goonliba aki a dee sëmbë dee de ta konda di Buka da.

15 Ma hii dee leti fuu dë tuu mi buta a wan së. Nöo fa mi ta sikifi dee soni aki da unu seei, nöo na paima wë mi ta suku a unu e. Biga fa mi ta wooko da unu söndö paka aki, a dë wan soni mi ta njan buka da o. Nöo ma kë poi ën. Ee de o kii mi fëen hedi seei, ma ma o hakisi paima fëen möönsö.

16 Ma nöo dee sëmbë, fa mi ta konda di Buka aki, na u di dë hedi mbei mi ta njan buka e. Biga musu mi musu u kondëen da sëmbë. Nöo helu u mi tu ee ma kondëen.

17 Ee mi bi buta miseei u mi kondëen, nöo mi bi a' leti u suku paima. Ma ee fuka mi ta puu da miseei te mi kondëen, nöo an dë taa wan apaiti soni mi du e. Biga di soni Gadu fitouu mi u mi du dëen, hën nöo mi ta du kaa. Nöo aambi wan apaiti paima.

18 Wë di a dë sö kaa, nöo un sooti wini seei mi o feni? Wë di wini di mi ta feni nëen, nöo hën da te mi konda di buka u Keesitu söndö tei paima a sëmbë kumafa dee oto tjabukama ta tei. Nöo a kai ku mi, a bunu da mi kaa. Mi a' piizii ku ën. „Biga mi du pasa möön fa Gadu bi manda mi.” Nöo hën da paima u mi kaa, nöo hën mbei ma ta tei paima kumafa di leti u mi dë.

19 Dee sëmbë o, fa mi dë aki ma dë a sëmbë basu e, ma mi dë u mi seepi. Ma nöo mi ta buta dee leti u mi a wan së ta saka mi seepi a sëmbë basu kuma wan saafu. Nöo di soni mbei mi ta du sö, u mi wini hia sëmbë kumafa mi sa wini tja ko da Masa Jesosi.

20 Fëen mbei te mi dë ku dee Dju sëmbë kuma miseei, nöo mi ta libi kuma Dju sëmbë, u mi sa wini de hedi. Fa de dë a dee fesiten wëti basu eti, mi ta hoi miseei kuma mi dë a dee wëti dë basu tu u mi sa wini de hedi, hii fa mi sabi taa ma dë a dee wëti dë basu möön.

21 Te mi dë a dee sëmbë dendu dee na abi Isaëli wëti, nöo mi ta hoi mi seepi kuma ma dë a dee wëti dë tu, u mi sa wini de hedi. (Ma fa mi fan dë seei, ma an dë taa ma ta hoi Masa Gadu wëti e, biga mi ta hoi „Jesosi,” Keesitu wëti.) Sö mi ta libi e, dee sëmbë.

22 Söseei tu, te mi dë ku dee biibima dee ta dë pantapanta fu di de an sabi soni u Masa Gadu tjika, nöo ma ta mbei taa mi sabi hii soni kaa. Ma mi ta hoi mi seepi kuma mi dë pantapanta tu, fu mi sa feni pasi heepi de. Sö mi ko sabi u libi ku hii sootu pei sëmbë u mi sa wini de. Mi ta biinga a hii pei fasi u mi sa puu de a didibi faja tja ko da Masa Jesosi.

23 Dati wan taki mi ta libi sö u di buka u Masa Jesosi sa wini hia sëmbë. Nöo mi seepi tu ta feni dee bunu Gadu ta da dee sëmbë fëen.

24 Nöo un haika möön e. Te sëmbë ta fia ta kule makandi, hii de tuu ta kule u de wini wan paima, na sö nö? Ma na de tuu o wini e, „biga na de tuu ta kule a di fasi kumafa a dë fanöudu.”

Wë nöo di kule u dee sëmbë u ta taki aki, nöo hën wë da di libi fuu e. Nöo fa i si de ta biinga ta kule fu de musu feni wan paima dë, nöo sö u seei musu biinga tu ta libi a di fasi fuu feni paima a Gadu.

25 Fa dee oto sëmbë ta kule dë, nöo de ta mbei taanga möiti u sinkii u de musu lusu tjika fu de sa kule taanga u de wini di paima. Nöo de ta du ën u de feni wan uwii kaapusa a de hedi faa lei taa de da winima. Ma di kaapusa dë an dë wan soni di o dë u nöömö e, dee sëmbë. Ma di soni uu ta suku u wini aki, hën a o dë u nöömö. An o kaba möönsö.

26 Nöo fëen mbei mi ta biinga, ma na kuma wan sëmbë nango a kamian ma an sabi naasë a nango. Na kuma wan sëmbë di ta hiti böö nango a söso kamian tu. Nönö e.

²⁷ Ma mi ta duwengi miseei a hii fasi u mi ta dë a tatai liba nöömö, fu te di juu kisi an musu dë taa hii fa mi tja oto sëmbë ko a Masa, ma libi u mi an bi bunu tjika u mi sa feni paima a Gadu.

10

Aki Paulosu ta wasiköi dee sëmbë kumafa soni bi pasa a fesiten.

¹ Dee sëmbë, un boo toona mëni dee fesiten sëmbë fuu u Isaëli. Hii de tuu bi ta waka a di wöluku u Gadu baka faa ta tjubi de ta tii. De tuu bi pasa di gaan ze ka Gadu bi paati di wata da de.

² Nöo fu di dee sëmbë waka a di wöluku baka pasa di ze, nöo hën mbei tu u sa taki taa de dopu ko dë bakama u Mosesi.

³ Hii de tuu bi ta njan di njanjan u Gadu di a bi ta tuwë da de a wan foombo fasi.

⁴ Hii de tuu bi ta bebe di wata di Gadu mbei kumutu a di sitonu dendu a wan foombo fasi. Di Sitonu dë, nöo „Masa Jesosi„ Keesitu seei wë a kë taki e, dee sëmbë. Hën bi da de di wata dë, nöo hën bi ta dë ku de nöömö ta tja de a di pasi.

⁵ Ma nöo tökuseei fa i jei dë, di möön gaan së u dee sëmbë Gadu an bi lobi di fa de bi ta libi e. Fëen mbei de bi dëdë fika a pepei kamian a di sabana naandë. „De an dou a di bumbuu köndë di Gadu bi paamusi de möönsö.“

⁶ Ma nöo dee soni i si dë, u musu tei de kuma wan wasiköi fu wa musu hangi fuu go du hogi kumafa dee fesiten sëmbë dë bi du.

⁷ Wa musu waka a oto gadu baka kumafa so u de bi waka a oto gadu baka. Biga a dë a Gadu Buku taa: Dee sëmbë bi sindo njan bebe te de kaba, hën de hopo baja „da di pindigadu.“

⁸ Sösei wa musu du fanafiti soni a di së u manu ku mujëe kumafa dee sëmbë bi du gaan sen soni a di fasi dë tefa Gadu kii tuwenti-a-dii dusu u de a wan kodo daka.

⁹ Wa musu duwengi Masa ku di hogi du fuu kumafa so u dee sëmbë bi duwengi ën tefa a manda dee sindeki ko njan sëmëni u de kii.

¹⁰ Sösei wa musu guunjan tu, kumafa so u de bi ta guunjan tefa Gadu manda di basia fëen di ta kii sëmbë go kii sëmëni u de.

¹¹ Nöo fa i si hii dee soni pasa dë, de pasa kuma wan wasiköi da u dee sëmbë dee ta libi a di kaba ten u di goonliba di u dë aki.

¹² Nöo di sëmbë di ta mëni taa a taanpu gingin, nöo a musu luku bunu be an kai e. Biga i sa kai.

¹³ Ma nöo dee soni dee ta pooba i hiniwan daka dë, na tooka soni de dë e, dee sëmbë. De seei ta pooba otowan tu. Ma Gadu dë u futoou, nöo an o disa i u di soni musu wini i. A o mbei wan baaku da i nöömö fii pasa be ja kai.

Aki Paulosu ta bai dee sëmbë

a dee oto gadu soni eti.

¹⁴ Wë nöo un dee lobi mati u mi dë, mi taki e, wan musu nama seei ku dee soni de ta kai gadu e.

¹⁵ Mi ta fan ku unu leti kuma sëmbë di abi fusutan kaa, taa be unu seei pakisei dee soni dee mi ta taki aki, ee de an dë sö tuu.

¹⁶ „Nöo mi taki möön e, taa wan musu nama seei ku dee pindigadu soni. Biga un ta nama ku Masa Jesosi kaa.“

Un luku e, dee sɛmbɛ. Di win di u ta bebe ta da Gadu tangi aki, na ku ɛn hii u tuu ta nama makandi a di dɛdɛ ɽMasa Jesosiɽ, Keesitu dɛdɛ tuwɛɛn buuu da u nɔ? Sɔseei di bɛɛɛ di u ta booko ta njan makandi aki, nɔɔ ku ɛn u tuu ta nama a di dɛdɛ ɽJesosiɽ, Keesitu dɛdɛ booko hɛn sinkii da u.

¹⁷ Biga aluwasi fa u dɛ te a hia seei, tɔku di wan kodo bɛɛɛ dɛ u tuu ta njan makandi. Nɔɔ hɛn da u tuu ko di wan sɛmbɛ,

¹⁸ Ieti kumafa dee Isaɛli sɛmbɛ ta ko wan te de ta tja soni go tuwɛ da Masa Gadu. Biga hii dee sɛmbɛ dee ta njan dee soni dɛ, de tuu nama makandi a di begi dɛ dɛndu, hɛn mbei de ko di wan.

¹⁹ Wɛ fa un jei di fan u mi aki, andi mi kɛ taki da unu? Dee pindigadu, de dɛ tuutu gadu nɔ? Dee njanjan de ta tuwɛ da de dɛ, apaiti soni de dɛ nɔ? Nɔnɔ e!

²⁰ Dee lɔ gadu dɛ an dɛ wan wojo soni. Ma fa de ta tja soni go tuwɛ da de dɛ, nɔɔ dee didibi seei de ta tja de go tuwɛ da. Na Masa Gadu de ta tja de go da. Nɔɔ ma kɛ fuun musu nama ku dee didibi e.

²¹ Wan sa bebe a di kan u Masa taa un nama ku ɛn te un kaba, nɔɔ un toona go bebe a di kan u dee didibi taa un nama ku de. Sɔseei wan sa go sindo njan a Masa tafa taa un nama ku ɛn te un kaba, nɔɔ un toona go sindo njan a dee didibi tafa taa unu ku de nama.

²² Un kɛ duwengi Masa faa djalusu nɔ? Wɛ nɔɔ fa a o djalusu dɛ, un tjika u tjɛɛn nɔ?

Aki Paulosu ta taki da de taa

Gadu musu kisi gafa

a hii soni de ta du.

²³ Sɔɔ. Wɛ mi o toona taki di soni aki wan pasi mɔɔn taa so sɛmbɛ ta taki taa: “Hii soni mi a’ pasi u du ɽee an booko Gadu wɛtiɽ.” Ma nɔɔ mi o toona piki di sɛmbɛ dɛ taa: “Wɛ sɔ a dɛ tuu, ma na hii soni ta tja heepi ko e.” Hii soni mi a’ pasi u du tuu, ma na hii soni ta heepi otowan u de ko a fesi a di libi u Masa Gadu.

²⁴ Nɔɔ hɛn mbei na wan sɛmbɛ musu ta du wan soni di bunu dɛɛn seei nɔɔ a kaba e, ma i musu ta mɛni andi dɛ bunu da di otowan fii tu.

²⁵ Nɔɔ te un go a wojowojo nɔɔ ee un bai di gwamba de ta sei ala tja go, nɔɔ un njan mɛn nɔɔ. Ma wan musu hakisi ee unsɛ a kumutu fu ja musu ta pakisei taa i njan wan soni di ja bi musu njan.

²⁶ Biga

Hii di goonliba aki ku dee soni dɛ nɛɛn tuu dɛ u Masa. Sɔ Gadu Buku taki e.

²⁷ Nɔɔ sɔseei tu ee wan sɛmbɛ di an ta biibi kai i fii ko njan nɛɛn wosu, nɔɔ ee i kɛ go nɔɔ be i go. Nɔɔ di soni a da i fii njan, nɔɔ i musu njan mɛn nɔɔ. Ma ja musu go sai dɛ ta hakisi unsɛ di soni i ta njan dɛ kumutu, fu ja musu ta pakisei taa sɔntɛ i njan wan soni di ja bi musu njan.

²⁸⁻²⁹ Ma ee wan sɛmbɛ ko taki da i taa di njanjan naandɛ de bi tuwɛ da oto gadu, nɔɔ ja musu njan mɛn mɔɔn e, fu di sɛmbɛ di fan ku i naandɛ hedi. Na fu di fii seei pakisei hedi taa i njan wan soni ja bi musu njan, ma u di oto sɛmbɛ ala hedi. ɽBiga a o mɛni taa i ta booko wɛti u Gadu.ɽ

Ma nɔɔ i sa hakisi i seei taa: “Wɛ andi mbei di sɛmbɛ di ta dɛ fɛɛɛfɛɛɛ ku dee soni dɛ musu ko buta wɛti da mi?”

³⁰ Biga ee mi ta da Masa Gadu tangi a dee soni dee mi ta njan aki, nɔɔ faandi mbei sɛmbɛ musu sai dɛ ta kuutu mi taa mi ta du hogi?”

¹ Wë i kë sabi faandi mbei nõ? Wë nõõ haika e. Ee woon njan wan soni, ee woon bebe wan soni, nasõ hiniwan soni woon du kaa, nõõ i musu du ën fu Masa Gadu musu feni gafa a i.

² Nõõ hën mbei wan musu buta wan soni kuma wan sitonu a pasi da sëmbë fu de naki futu kai e, na Isaëli sëmbë, na dee oto kõndë sëmbë dee na ta biibi a Masa Gadu, na dee sëmbë dee ta biibi nëën seei tu.

³ A hii fasi un musu suku u libi faa sa kai ku hii sëmbë, leti kumafa miseei ta libi aki. Biga ma ta suku bunu u mi seepi nõõ a kaba e. Ma mi ta suku bunu u dee otowan, u mi sa feni de puu a di didibi faja.

11

¹ Nõõ un musu ta djeesi mi e, dee sëmbë, leti kumafa mi ta djeesi Masa Jesosi, Keesitu.

Aki Paulosu ta konda da de kumafa de musu libi a di keiki.

² Wë nõõ, dee sëmbë, fa un ta mëni mi hiniwan juu ta manda biifi ta hakisi mi soni u di fa un musu libi, nõõ mi ta gafa unu u di soni dë e. Nõõ mi ta gafa unu tu, fu di un ta hoi dee lei mi bi kisi a Masa Jesosi toona lei unu.

³ Ma nõõ mi kë fuun sabi wan tu soni mõön eti.

Nõõ mi taki e, Masa Gadu hën da di hedima u Masa Jesosi Keesitu, nõõ Masa Jesosi hën da di hedima u wan womi, nõõ di womi hën da di hedima fëen mujëe.

⁴ Nõõ ee wan womi ta begi Gadu a lanti dendu, ee nasõ a ta da wan buka di Gadu dëen, nõõ ee a dë tapatapa hedi nõõ a ta da di hedima fëen sen.

⁵ Ma ee wan mujëe ta begi Gadu a lanti dendu nasõ a ta da wan buka di Gadu dëen, nõõ ee an tapa hedi nõõ a ta da di hedima fëen sen. Biga di soni dë, a hogi leti kuma wan mõtjö mujëe de puumëen hedi maakëen fu lanti musu sabi taa sõ wan mujëe a dë.

⁶ Nõõ ee wan mujëe an kë tapëen hedi nõõ be a koti ën uwii. Ma ee sen o kisi ën faa musu dë ku sati uwii, ee nasõ ku puumapuuma hedi, nõõ be a tapëen hedi.

⁷ Ma wan womi an musu tapëen hedi e, biga Gadu mbei womi kumafa hën seei dë. A mbei ën faa tja gafa ko dëen. Ma a mbei mujëe faa tja gafa ko da di manu fëen.

⁸ Biga di fosu womi an bi kumutu a mujëe, ma di fosu mujëe bi kumutu a womi.

⁹ Nõõ Gadu an bi mbei di fosu womi faa musu dë wan heepi da di mujëe e, ma a mbei di fosu mujëe faa dë wan heepi da di womi.

¹⁰ Nõõ fëen mbei wan mujëe musu tapëen hedi kuma wan maaka taa a ta sakëen seei nëen manu basu, fu dee basia u Masa Gadu Kõndë musu si sõ tu.

¹¹ Ma nõõ fa u ta biibi a Masa Jesosi aki, nõõ Gadu buta taa womi ku mujëe sëmbë tuu dë fanõudu. Womi an sa libi sõndõ mujëe, nõõ mujëe an sa libi sõndõ womi tu.

¹² Biga leti kumafa mujëe kumutu a womi sëmbë a fesi ma nõõ fa u dë aki womi ko ta kumutu a mujëe, ma de tuu ta kumutu a Gadu.

¹³ Nõõ unu seei sa kuutu a di soni aki liba luku ee un si taa a fiti fu wan mujëe musu begi Gadu sõndõ faa tapa hedi.

¹⁴ Biga wë di fa libisëmbë mbei seei ta lei u taa ee wan womi abi langa uwii nõõ an ta fiti ën,

¹⁵ ma ee wan mujëe abi langa uwii nõõ a dë wan gafa dëen. Biga di langa uwii dë, a dë wan soni di ta tapëen hedi kuma wan bisi fëen.

16 Ma ee wan sɛmbɛ kɛ fia a dee soni aki, nɔɔ be a luku a dee keiki u Gadu tuu. Wa abi wan oto guwenti mɔɔn leki fa mi taki aki.

Aki Paulosu ta bai de a di fa

de ta njan di bɛɛ ta bebe

di win u Masa.

Mat. 26:26-29; Maik. 14:22-25; Luk. 22:14-20

17 Nɔɔ mi kɛ taki wan oto soni da unu e, dee sɛmbɛ, nɔɔ a di soni aki nɔɔ ma sa gafa unu seei. Hɛn da di fa un ta ko makandi, ka faa tja heepi ko da unu nɔɔ poi a ta poi unu.

18 A di fosu kamian, nɔɔ mi jei taa fa un dee biibima ta ko makandi dɛ nɔɔ un ta dɛ paatipaati. Wɛ nɔɔ mi sa biibi hafu fɛɛn tu.

19 Nɔɔ an bunu. Ma seei so juu a dɛ fanɔudu fu paati musu ko, fuu si ambɛ a' leti a Gadu.

20 Wɛ nɔɔ kumafa i si un ta ko makandi taa woon ta njan di bɛɛ ta bebe di win u da Masa tangi u di dɛdɛ fɛɛn, nɔɔ mi kɛ un sabi taa na di soni dɛ un ta du dɛ mɔɔn e.

21 Biga di fasi un ta ko ta njan dɛ, nɔɔ an bunu seei. Biga hiniwan sɛmbɛ ta njan hɛnseei njanjan apaiti te bɛɛ fɛɛn fuu. An ta mɛni dee pootima mɔɔnsɔ. Te de ko dou, hangi ta kii de, soni an dɛ u de njan. Sɔseei so sɛmbɛ ta bebe di win fɛɛn tee de dɔɔngɔ, de an ta mɛni u de paati da dee otowan mɔɔnsɔ.

22 Unfa wɛ baa? Wan a' wosu ka un bi sa njan bebe nɔ, naa dee biibima u Masa Gadu un ko u ko wisiwasi? Dee pootima un ko u ko da sen nɔ? Wan ta si de u soni nɔ? Andi seei mi sa taki u di soni aki baa? Mi sa gafa unu nɔ? Kwetikweti.

Aki Paulosu ta lei de fa de musu njan di bɛɛ bebe di win u Masa.

Mat. 26:26-29; Maik. 14:22-25; Luk. 22:14-20

23 Haika e, dee sɛmbɛ. A Masa Jesosi seei wɛ mi feni di lei aki e. Nɔɔ mi bi lei unu ɛn kaa tu, fa un musu ta njan di bɛɛ ku fa un musu ta bebe di diingi fuun mɛmbɛ Masa Jesosi.

Mi taki da unu taa di wan seei ndeti di de kɔnku ɛn dɛ, nɛɛn a tei di bɛɛ, hɛn a da Masa Gadu tangi te a kaba, hɛn a booko ɛn paati da de te lontu ko kai. Hɛn a taki da de taa: "Di bɛɛ i si aki, hɛn da di sinkii u mi di o dɛdɛ fuunu hedi. Nɔɔ kumafa i si u ta njan mɛn aki, nɔɔ sɔ un musu ta njan mɛn nɔɔmɔ, fuun ta mɛni di dɛdɛ di mi dɛdɛ da unu."

25 Sɔseei di de njan tefa de kaba, nɔɔ hɛn wɛ a tei di kan, hɛn a taki da de taa: "Di diingi i ta si a di kan aki, nɔɔ hɛn da di buuu u mi e. Ku ɛn mi o sitampu di njunjun buka di Masa Gadu mbei ku unu, fu di mi o dɛdɛ tuwɛ di buuu u mi a goon fuunu hedi."

26 Nɔɔ hiniwanten te woon njan di bɛɛ bebe di diingi a di lɔ fasi aki, nɔɔ ku ɛn un ta mɛni fa Masa Jesosi dɛdɛ da u. Nɔɔ un musu ta du ɛn sɔ fu te a toona ko baka.

27 Fɛɛn hedi, ee wan sɛmbɛ o njan di bɛɛ aki, ee nasɔ joo bebe di diingi a di kan u Masa a wan fasi di an fiti, nɔɔ hɛn da i ta sɔsɔ di sinkii u Masa Jesosi di bi dɛdɛ fuu hedi, ku di buuu fɛɛn di a tuwɛ paka da u. Nɔɔ gaan wogi i du dɛ e.

28 Ma hiniwan sɛmbɛ di o njan di bɛɛ aki bebe di diingi a di kan, a musu wegɛ ɛn seei luku bifɔ a njan e, be an abi fɔutu nɛɛn libi.

29 Biga wɛ ee wan sɛmbɛ i ko ta njan ta bebe a wan fasi di an fiti, nɔɔ hɛn da i ta hai wan sitaafu tja ko a i seei, fu di ja lesipeki di sinkii u Masa Jesosi di bi dɛdɛ da i.

³⁰ Nöo fëen mbei sömëni sëmbë dë a unu dendu dë aan kaakiti, otowan ta dë sikisiki. So sëmbë lasi libi seei kaa.

³¹ Ma ee u seepi ta kuutu ku u hati ta seeka a fesi, nöo Gadu an o kuutu u da sitaafu möön.

³² Ma te a ta kuutu u ta da u sitaafu, nöo seeka a ta seeka u e, fu wa musu go kaba a sösö ku dee sëmbë dee an bi ta waka a Gadu baka.

³³ Wë nöo da sö e, dee sëmbë. Te un ko makandi u njan di njan aki sö, nöo un musu tan ta luku be un tuu ko makandi ufö un njan.

³⁴ Ma ee hangi ta kii wan sëmbë, nöo be a njan nëen wosu bifö a ko e, fu te un ko u ko njan makandi nöo wan o njan a wan fasi fa a tja sitaafu ko da unu. Nöo a di së u dee oto soni, te mi ko ufö mi o buta unu a pasi a de e.

12

Aki Paulosu ta taki soni u dee

köni dee di Akaa u Gadu ta

paati da sëmbë.

¹ Wë nöo dee sëmbë fuu dë, fu dee peipei köni Masa Gadu ta manda di Akaa fëen faa paati da dee sëmbë fëen, nöo ma kë fuun dë a dungu a dee soni dë e.

² Biga wë unu seepi sabi taa a fesi nöo un bi ta dini dee pindigadu ta waka a de baka. Ma dee lö gadu dë, ganjanganjan soni de dë e. De a' buka ma de an sa fan ku sëmbë, nöo wan bi sa ko sabi soni u Gadu möönsö a de.

³ Ma nöo mi kë fuun ko fusutan soni fëen awaa.

Nöo un haika. Mi taki e, ee wan sëmbë ta taki soni ta kosi Masa Jesosi, nöo i musu sabi taa di sëmbë dë di Akaa u Masa Gadu an dë nëen liba e. Nöo na wan sëmbë sa piki ku hii ën hati taa Masa Jesosi hën da di Masa u mundu, ee na di Akaa u Masa Gadu ta wooko nëen liba.

⁴ Nöo fa u ta abi dee peipei köni aki seei, ma töku di wan Akaa nöo ta paati de da u.

⁵ Söseei fa Gadu ta da dee sëmbë fëen wooko, nöo dee wooko dë peipei, ma töku di wan Masa nöo u tuu ta dini.

⁶ Nöo söseei tu di kaakiti u Gadu ta wooko a peipei fasi a sëmbë liba, ma di wan kodo Gadu nöo ta wooko a de tuu.

⁷ Ma nöo hiniwan sëmbë di abi di Akaa u Masa Gadu o abi hën apaiti köni, faa musu sa heepi dee otowan fëen ku ën.

⁸ So sëmbë di Akaa ta da wan apaiti fusutan faa sa da sëmbë lai. Wan otowan a ta da köni faa sa sabi dee tjubitjubi soni u Gadu, faa sa konda de da sëmbë. Ma hii u di dë, di wan Akaa nöo ta wooko dee wooko aki sö e.

⁹ Nöo wan otowan, di wan seei Akaa ta dëen taanga biibi möön dee otowan fu Gadu sa du gaan soni da de. Di otowan, di wan seei Akaa ta buta i fii sa kula sikima ku di kaakiti u Gadu.

¹⁰ Wan otowan, di Akaa ta dëen kaakiti faa sa du foombofoombo soni. Wan otowan, Gadu ta dëen di köni faa kisi buka nëen taki da otowan. Wan otowan, Gadu ta da köni faa sa wegì soni luku ee a Gadu a kumutu nasö a didibi. Di otowan a ta da faa sa taki a oto tóngö di an bi jei wan daka. Di otowan a ta da faa sa kisi di fan u di sëmbë dë puu da oto sëmbë.

¹¹ Ma hii dee peipei köni dë, di wan kodo Akaa u Gadu dë tö nöo ta wooko a de tuu. Hën ta paati de da hiniwan sëmbë fëen kumafa hën seepi kë.

Aki Paulosu ta konda da de taa

dee sëmbë u Gadu dë peipei, ma

hiniwan abi ën wooko faa du.

¹² Biga wë leti kumafa sëmbë sinkii mbei aki, a paati a sëmëni pisi, ma töku di wan sinkii nöö a dë. Aluwasi fa dee kamiankamian dë hia seei, ma nöö hii de tuu mökisi ko di wan sinkii. Nöö söseei Masa Jesosi Keesitu ku dee sëmbë fëën dë tu e.

¹³ Hii fa u dë peipei sëmbë seei, Dju sëmbë, Giiki sëmbë, saafuma, fiima, ma di wan Akaa hën dopu u tuu buta ko di wan sëmbë. Ee fuu taki ën, di wan seei Akaa u Masa Gadu dë hën nöö ta wooko a u tuu hati.

¹⁴ Nöö fa di sinkii fuu mbei aki, na wan kamian nöö a dë e, ma a paati a kamiankamian.

¹⁵ Nöö ee di futu fii sa mati taa: “Wë di ma dë maun, nöö ma dë wan pisi u di sinkii,” di fan dë o mbei an dë wan pisi u di sinkii tuu nö?

¹⁶ Nöö ee jesi sa mati taa: “Wë di ma dë wojo kaa nöö ma dë wan pisi u di sinkii,” di dë o mbei an dë wan pisi u di sinkii tuu nö?

¹⁷ Wë nöö ee hii di sinkii fii dë wojo wanwan, nöö ku andi joo ta jei soni? Ee hii di sinkii fii dë jesi wanwan, nöö ku andi joo ta sumëë soni?

¹⁸ Nöö fëën mbei Gadu seepi buta de peipei a i sinkii, hiniwan nëën kamian kumafa a kë.

¹⁹ Ee de tuu bi dë di wan soni, nöö unfa sinkii bi o sa dë?

²⁰ Ma nöön, an dë sö e. Dee pisipisi dë hia, ma di wan sinkii nöö de dë.

²¹ Nöö wojo an sa taki da maun taa: “Ma abi i fanöudu.” Söseei hedi an sa taki da futu taa: “Ma abi i fanöudu.” An sa dë sö e.

²² Nöö dee pisi fuu sinkii dee wa ta kai gaan soni sö, nöö i musu sabi taa ja sa dë söndö de nöö i dë bunu e.

²³ Ma nöö dee pisi da sen kamian fuu nöö de u ta möön sölugu. Biga dee pisi fuu sinkii dee an musu ko döön nöö de u ta tapa fu lesipeki fasi.

²⁴ Ma nöö dee pisi dee u ta si kuma möön waiti nöö wa ta tapa de. Biga Gadu hën bi fiti di sinkii buta makandi sö e, u dee oto pisi dee wa ta si taa de waiti ta kisi möön sölugu.

²⁵ A mbei de sö fu de an musu mbei toobi ku deseeri a i sinkii, ma fu de musu ta sölugu de na de makandi.

²⁶ Fëën mbei te wan pisi fii sinkii ta hati i, nöö dee oto pisi tuu ta hati i tu. Söseei te wan pisi kisi gafa, dee oto pisi tuu ta wai.

²⁷ Wë nöö fa u taki soni u di sinkii dë, nöö sö u ku Jesosi, Keesitu dë tu e. U dee sëmbë ta waka nëën baka, hiniwan fuu dë wan pisi fëën.

²⁸ Nöö fëën mbei Gadu buta u peipei a di keiki fëën. A di fosu kamian a buta sëmbë u de dë gaan tjabukama fëën de ta kai apösutu. A di u tu kamian, a buta sëmbë u de ta kisi fan a Gadu ta konda da sëmbë. De de ta kai poofeiti. A di u dii kamian a buta sëmbë u de ta lei oto sëmbë. A buta otowan u de ta du foombo wooko. Otowan a buta u de sa kula sikima ku di kaakiti u Gadu. Otowan a buta u de ta heepi otowan a sëmëni fasi. Otowan a buta u de dë tiima. Otowan a buta u de ta taki a peipei töngö di de an jei wan daka.

²⁹ Nöö unfa i fusutan fëën? De tuu dë gaan tjabukama nö? De tuu ta kisi fan a Gadu ta konda da sëmbë nö? De tuu ta lei sëmbë nö? De tuu ta du foombo wooko nö?

³⁰ De tuu ta kisi taanga u de sa begi da sikima te de ko bunu nö? De tuu ta fan a oto töngö nö? De tuu sa puu dee töngö nö?

³¹ Nöönö e. Ma hiniwan sëmbë abi ën wooko.

Wë nöö un suku dee möön gaan këni a dee u ta taki aki dendu e, dee sëmbë, ma mi kë taki wan oto soni da unu ufö. Mi o lei unu wan soni di un musu kai gaan soni möön hii dee otowan tuu.

13

Aki Paulosu ta taki andi da lobi.

¹ Fa mi dē aki,
 ee mi sabi u taki hii tōngö u libisëmbë
 tee kisi dee tōngö u dee basia u Masa Gadu Köndë tuu,
 ma ee ma lobi di otowan u mi,
 nöö mi dē leti kuma wan genge ee nasö wan felu
 di ta piki gbeingbein nöö a kaba.

² Sösei tu,
 ee mi ta kisi fan a Masa Gadu
 ta konda da sëmbë seepi,
 nasö mi sabi hii soni
 te kisi dee tjubitjubi soni u Masa Gadu tuu,
 nasö mi ta biibi Gadu te tjika u hopo wan hii kununu
 puu ka a dē buta go a oto kamian,
 ma ee ma ta lobi di otowan u mi,
 nöö ma dē wan wojo soni e.

³ Nöö aluwasi mi tei hii dee soni dee mi abi tuu
 nöö mi paati de da dee penama
 hën mi foona hopo miseei sinkii da sëmbë
 fu de tjuma mi kii fu Masa Gadu hedi,
 ma ee ma ta lobi sëmbë,
 di soni dē aan heepi da mi.

⁴ Wë nöö fuu taki soni u lobi otowan,
 nöö ee i lobi wan sëmbë
 joo ta hoi pasensi dëen e.
 Joo ta fii ku ën.
 Ee i lobi wan sëmbë,
 ja o ta haun ku ën.
 Ee i lobi wan sëmbë,
 ja o ta njan buka ta taki soni ta tuwë dëen.
 Ja o mbei i seei hei dëen.

⁵ Ee i lobi wan sëmbë,
 ja o ta du fanafiti soni ku ën.
 Ja o ta suku bunu fii seei wanwan nöö a kaba,
 ma joo ta suku bunu fii ku ën tuu.
 Ee i lobi wan sëmbë,
 hati fii an o ta boonu ku ën hesihesi,
 nöö ja o ta hoi ën a bëë tu.

⁶ Ee i lobi wan sëmbë,
 nöö ja o ta abi piizii ku hogi du fëen möönsö,
 ma te a ta du soni a pasi,
 nöö joo wai.

⁷ Ee i lobi wan sëmbë,
 joo ta tjubi ën fu an kisi sen a lanti.
 Joo ta suku di bunu pisi fëen nöömö.
 Joo a' di mëni taa na sö nöö a o dë,
 te wan ten seei a o ko bunu nöömö.
 Ja o lasi hati nëen möönsö.

⁸ Nöö di soni de kai lobi,
 hën an o kaba a mundu möönsö e.
 Ma di soni de kai kisi fan a di Akaa u Gadu konda da sëmbë,

di dē sa kaba.

Sösei taki a oto tōngō sa kaba tu.

Di kōni fii ko sabi dee tjubitjubi soni u Gadu, wan daka hēnseei o kaba tu.

⁹ Biga wē fa u ta sabi soni a goonliba aki, nōō wan pikiwan nōō wē u ta sabi e.

Fa u ta kisi fan a Gadu ta konda da sēmbē aki, wan piki pisi fēēn nōō wē u ta kisi.

¹⁰ Ma nōō te di tuutuu soni ko ku telu kaa, nōō dee hafuhafu soni aki tuu o kaba kēēē.

¹¹ A dē leti kuma di mi bi dē piki mii, nōō mi bi ta fan kuma wan piki mii.

Sō nōō fusutan u mi bi dē,

kuma wan piki mii.

Sō mi bi ta pakisei soni.

Ma nōō di mi ko gaangaan sēmbē kaa,

nōō mi kaba ku piki mii fasi.

¹² Nōō söseei fa u dē aki, wa ta si soni limbolimbo eti e, ma u ta si soni vitiviti sō.

Ma a bakaten woo ko ta si soni gbegedee kuma u dē fesi ku fesi.

Fa mi dē aki,

wan piki soni sō nōō mi sabi, ma bakaten mi o ko sabi soni limbolimbo, leti kumafa Gadu seei sabi mi kaa.

¹³ Wē nōō da sō e, dee sēmbē.

De dii soni aki an o kaba a mundu mōōnsō: di biibi a Gadu,

ku di mēni u abi a dee paamusi fēēn, ku lobi.

Ma nōō lobi,

hēn da mama u de tuu.

14

Aki Paulosu ta taki soni mōōn

u dee kōni di Akaa u Gadu

ta da sēmbē.

¹ Wē nōō dee sēmbē o, un musu biinga fuun feni di lö lobi dē e, söseei un musu hangi fuun feni dee kōni dee di Akaa u Gadu ta paati. Ma di fii kē mōōn taanga, hēn da fii ta kisi buka a di Akaa u Gadu fii konda da sēmbē.

² Biga di sēmbē di ta fan a wan tōngō di di Akaa u Gadu ta dēēn, nōō hēn an ta fan ku libisēmbē, ma ku Gadu wanwan a ta fan. Biga wē sēmbē an ta fusutan andi a ta taki. Ku di akaa fēēn a ta konda gaan tjubitjubi soni u Gadu.

³ Ma nōō di sēmbē di ta kisi buka a di Akaa u Gadu ta konda da sēmbē, nōō hēn ta heepi de u de go a fesi. A ta da de degihati ku kötōhati tuu.

⁴ Di sēmbē di ta fan a wan oto tōngō di di Akaa ta dēēn, nōō hēn wanwan nōō ta feni heepi a di biibi. Ma di sēmbē di ta kisi buka a di Akaa u Gadu, nōō hēn ta heepi dee otowan fēēn u de ko a fesi.

⁵ Wē nōō mi bi sa kē fuun tuu sa feni di kōni u di Akaa fuun sa fan oto tōngō, ma a bi sa mōōn bunu da mi fuun tuu feni di kōni fuun ta kisi buka nēēn ta

konda da sēmbē. Wē biga di sēmbē di ta kisi buka a Gadu, hēn u ta kai gaan soni mōön dee sēmbē dee ta fan a oto tōngō di sēmbē an ta fusutan, boiti ee sēmbē dē ta puu dee fan da sēmbē u de fusutēn.

⁶ Wē dee sēmbē, kumafa u dē aki, nōō ee hēn mi ko a unu ko ta fan a oto tōngō sōndō un saandi mi ta fan, nōō un heepi seei mi tja ko da unu baa? An bi mōön bunu mi ko konda wan soni di Gadu mbei mi ko sabi nō, ee nasō mi taki wan soni da unu di wan bi sabi? Ee nasō mi da unu wan buka di mi kisi a Gadu u mi da unu, ee nasō mi lei unu soni u di Buka fēen mōön fini.

⁷ A dē kuma dee peipei soni de ta pēē te de ta kanda a di goonliba aki, kuma foloiti ee nasō benta. Ee de an ta naki ēn limbolimbo, nōō unfa i sa sabi un kanda de kē kanda?

⁸ Sōseei tu, te dee sodati o go a feti, nōō ee di tutu an piki a di fasi, nōō unfa de o du seeka u de hopo go a feti?

⁹ Wē nōō sōseei soni sa waka ku unu tu. Ee i ta fan wan oto tōngō di sēmbē an ta fusutan, nōō a dē leti kuma i ta fan tuwē go a mundu dē nōō.

¹⁰ Biga fa u dē a di goonliba aki, sōmēni pei tōngō dē, nōō hii de tuu dē u sēmbē sa fusutan.

¹¹ Ma nōō ee mi ku wan sēmbē miti nōō ma sabi di tōngō u di sēmbē, nōō ee a ta fan nōō ma o fusutan andi a ta taki. Nōō u ko dē kuma oto sēmbē ku oto sēmbē da u seei.

¹² Wē nōō sō a dē ku unu tu e. Nōō fēen mbei fa un ta suku dee kōni u di Akaa u Gadu gaanfa naandē, nōō be un suku dee kōni dee sa heepi dee sēmbē dee dē a di biibi u de ko a fesi e.

¹³ Hēn mbei ee wan sēmbē ta fan a wan tōngō di sēmbē an ta jei, nōō a musu begi Gadu fu Gadu musu dēen kōni faa musu sa puu di fan be sēmbē sa fusutēn.

¹⁴ Biga wē ee mi ta begi a wan tōngō di sēmbē an ta jei, nōō di akaa u mi ta begi Gadu tuu, ma miseei ma ta fusutan.

¹⁵ Wē nōō unfa a musu dē? Wē a musu dē sō taa mi akaa o begi, ma miseei o begi ku mi fusutan tu. Nōō sōseei mi akaa o kanda, ma mi o kanda be sēmbē sa fusutan mi tu.

¹⁶ Ee nasō, te mi akaa ta gafa Gadu, nōō dee sēmbē dee dē sindosindo dē, de an o fusutan di soni kaba eti. Nōō unfa de o sa du nama ku mi fuu gafa Gadu makandi? Biga de an saandi mi ta taki.

¹⁷ A kandē mi ta gafa Gadu tuu, ma tōkuseei an ta tja heepi ko da otowan.

¹⁸ Nōō mi ta da Gadu tangi fu di mi ta taki a tōngō mōön hii unu tuu.

¹⁹ Ma tōkuseei te mi dē a dee biibima dendu, a mōön bētē mi fan feifi wōutu di sēmbē sa fusutan fu de lei soni nēen, mōön leki mi fan teni dusu wōutu di na wan sēmbē sa fusutan.

²⁰ Wē nōō dee sēmbē u mi dē, un disa u pakisei soni kuma piki mii e. A dē sō tuu taa a di sē u sabi hogi un musu dē kuma piki mii, ma a di sē u pakisei soni, nōō un musu dē gaangaan sēmbē.

²¹ Biga wē a Gadu Buku a sikifi sō taa, Masa Gadu taki taa:

Mi o manda oto kōndē sēmbē ko fan ku dee sēmbē aki.

Mi o manda sēmbē ko di sa fan ku de a oto tōngō tu,

ma tōkuseei de an o kē piki mōönsō.

²²⁻²³ Wē nōō sō a dē taa di taki a oto tōngō, a dē wan maaka da dee sēmbē dee an ta biibi, u de sa biibi „Ma fa un ta du ēn tjika dē, nōō an ta heepi mōön e.” Biga wē ee hii di keiki ko makandi a wan kamian, hēn de tuu bigi ta fan a oto tōngō di sēmbē an ta jei, nōō unfa i mēni? Ee wan sēmbē dē a di keiki an ta

fusutan di soni, ee nasö wan sêmbê ko dë di an bi ta biibi seei, nöö hên a jei un ta taki a oto tóngö wajawaja sö, nöö na a o taa hedi fuunu poi nö?

Ma di kisi fan a di Akaa u Gadu dë wan oto soni. A dë wan soni u tja sêmbê ko a limbo u si ambê kê biibi Gadu.

²⁴ Biga fa un ta ko makandi dë, nöö ee un tuu ta kisi fan a di Akaa u Gadu ta konda fu sêmbê musu jei limbolimbo „nöö a o dë wan bunu soni. Biga, ee sêmbê dë a unu mindi dë di an fusutan soni kaba eti, ee nasö wan sêmbê ko dë an bi ta biibi seei, nöö hên a jei di buka limbolimbo dë, nöö a o ko si gbegedee fa a dë takulibima a Gadu wojo tjika.

²⁵ Hii dee fan dee a jei dë tuu o tja dee tjubitjubi soni bi dë nëen hati ko a döö. Nöö a o kai ku fesi a goon begi Gadu, nöö a o piki taa Gadu dë a unu mindi tuutuu.

Aki Paulosu ta leti de a di fa soni

musu waka te de ko makandi

a keiki.

²⁶ Wê nöö unfa a musu dë, dee sêmbê? Wê te un ko makandi, nöö hiniwan sêmbê o abi ên soni faa du. Wan sêmbê o abi kanda faa kanda. Di otowan o abi wan soni di a kê lei sêmbê. Wan sêmbê o abi wan soni di Gadu tja ko a limbo dëen faa musu taki. Di otowan o kisi wan fan faa fan a oto tóngö, nöö di otowan o puu di fan dë da otowan. Ma hii dee soni dë tuu musu waka u dee biibima dee sai dë musu feni heepi a de e.

²⁷ Nöö ee sêmbê sai dë ta fan a oto tóngö, nöö be tu ee nasö dii nöö musu sa fan, ma de musu fan oto a oto baka. Nöö sêmbê musu dë di sa puu di fan da dee otowan.

²⁸ Ma ee sêmbê an sai dë u puu ên, nöö ja musu fan a di lö ko makandi dë, ma i sa begi Gadu i wanwan a i hati.

²⁹ Söseee a dë ku dee sêmbê dee ta kisi fan a di Akaa u Gadu ta konda da sêmbê tu. Tu ee nasö dii sa fan, ma oto a oto baka. Nöö dee oto sêmbê a keiki dë, de musu ta wegî dee soni de ta taki dë luku „ee a Gadu dee fan dë ta kumutu tuu,.

³⁰ Ma ee wan sêmbê bi ta fan, nöö wan oto sêmbê sai dë sindosindo nöö hên Gadu dëen wan buka faa taki, nöö di fosu sêmbê di bi seti fan dë musu kabuka be di otowan fan.

³¹ Un dee sêmbê ta kisi fan a di Akaa u Gadu tuu sa fan e, ma un musu fan oto a oto baka fu hii sêmbê musu lei soni fu de feni degihati.

³² Biga wê dee sêmbê dee ta kisi fan a di Akaa u Gadu, nöö di fan an ta ko a de ku duwengi, ma a ta ko a de u de sa tii deseei ku ên kumafa a fiti.

³³ Biga Gadu an dë wan Gadu ta du soni fanjanfanjan e, ma a dë wan Gadu di ta tii soni tololoo a pasi.

Söö. Nöö leti kumafa a dë a dee keiki u dee biibima a dee kamiankamian, nöö söseei a musu dë a unu tu.

³⁴ Hên da dee mujêe fuunu an musu ta fan a di keiki dendu. Biga de aan pasi u de ta fan a sö wan fasi, ma de musu saka deseei kumafa di wêti u Gadu taki.

³⁵ Ee de kê hakisi wan soni, nöö be de hakisi de manu a wosu. Biga wê an fiti sö u dee mujêe musu ta fan a di keiki dendu.

³⁶ Söö. Wê nöö unfa un pakisei u dee soni mi taki aki, dee sêmbê? Un ta mëni taa a unu di buka u Gadu kumutu paaja go a dee oto kamian nö? Naa a unu wanwan nöö a ko nö?

³⁷ Ee wan sēmbē i ta mēni taa di Akaa u Masa Gadu da i di kōni fii kisi fan nēen ta konda da sēmbē, ee nasō a da i wan oto kōni, nōō sō wan sēmbē musu sabi taa Gadu buka hēn mi ta sikifi aki.

³⁸ Ma ee wan sēmbē an kē piki di buka aki, nōō oto sēmbē an musu piki ēn buka tu.

³⁹ Wē nōō sō a dē e, dee sēmbē. Un musu kē di kōni di di Akaa u Gadu ta da sēmbē fu de ta kisi fan nēen ta konda da oto sēmbē. Ma wan musu tapa dee sēmbē dee ta fan a oto tōngō e.

⁴⁰ Ma be hii soni waka ku lesipeki fasi kumafa a fiti.

15

Aki Paulosu ta konda da de taa

Gadu ta weki sēmbē puu

a dēdē tuu.

¹ Sōō. Wē dee sēmbē u mi dē, wē mi kē toona konda di Buka u Masa Gadu da unu wan pasi mōōn, di i si mi bi konda da unu a fesi kaa. Fa mi bi kondēen da unu dē, nōō un bi piki ēn tei te nōō un dē ku ēn seei gingin.

² Nōō ee un ta hoi ēn sō nōōmō kumafa mi kondēen da unu dē, nōō hēn da un kumutu a dee hogilibi fuunu basu feni libi a Gadu. Ma ee un disēen go ta piki oto buka, nōō di Buka un bi jei a mi dē aan heepi da unu mōōn e.

³ Biga wē dee soni miseei bi jei, nōō deseiei mi toona konda da unu, nōō de da dee mōōn gaan pisi u di biibi fuu. Nōō di fosu wan, hēn da „Masa Jesosi, Keesitu dēdē u dee hogi du fuu hedi, leti kumafa de sikifi ēn a Gadu Buku a fesi kaa.

⁴ Nōō di u tu, nōō hēn da de bei ēn. Nōō di u dii, hēn da a di u dii daka dendu hēn Gadu weki ēn puu a dēdē, kumafa de bi sikifi ēn buta a Gadu Buku a fesi tu.

⁵ Nōō di a weki hopo, nōō hēn a ko a Petuisi be a si ēn. Hēn a baka u di dē, hēn a ko a dee oto tjabukama fēen dee ku ēn bi ta libi makandi, be de si ēn tu.

⁶ Nōō a baka u di dē, hēn a ko a mōōn hia mōōn feifi hōndō u dee biibima. De tuu si ēn ka de bi dē makandi a wan kamian. Sōmēni u dee biibima naandē lasi libi kaa, ma gaan sē u de dē a libi eti.

⁷ Nōō baka u di dē, hēn a ko a Jakobosi be a si ēn tu. Nōō hēn a toona go a dee tjabukama fēen mōōn, dee de ta kai apōsutu, be de tuu si ēn.

⁸ Tee kaba fēen, hēn a ko a mi tu. Biga mi da di lasiti wan u dee apōsutu di si ēn. Hēn i si miseei ko a di wooko vau sō kuma wan mii de pai bifō ten fēen kisi.

⁹ Biga wē fa mi dē aki mi dē di mōōn lagi wan a dee tjabukama u Masa Jesosi mindi. Ma bumbuu tjika u de kai mi wan tjabukama fēen seei, biga mi bi du hogi ku dee biibima u Gadu a fesi.

¹⁰ Ma fu di Gadu abi gaan bunuhati, hēn mbei i si mi ko dē di sēmbē di i si mi dē tide aki. Nōō di bunuhati u Gadu dē, an dē taa an tja heepi ko e. A tja heepi ko gbolo. Biga wē mi ta wooko taanga mōōn dee otowan tuu, ma nōō na miseei ta wooko di wooko sō e. Masa Gadu wē ta wooko a mi sō ku ēn bunuhati.

¹¹ Ma boiti u di dē, ee mi, ee nasō dee otowan, u tuu ta konda di wan seei soni da unu „taa Masa Gadu weki Masa Jesosi a dēdē,“. Hēn nōō u bi konda, nōō hēn nōō un bi piki tu.

¹² Wē nōō unfa a waka so fuunu sai dē ta fia taa te wan sēmbē dēdē an o sa weki baka, hii fa u bi konda da unu kaa taa Masa Jesosi Keesitu weki baka a dēdē.

¹³ Biga wê ee a dë sô taa dëdë sêmbê an o weki a dëdë, nöö hên da „Jesosi„ Keesitu seei an bi weki baka a dëdë tu.

¹⁴ Nöö ee an bi weki baka a dëdë, nöö hên da di buka fêên u ta konda aki dë wan sôsô soni, sôseei di biibi fuunu dë wan sôsô soni tu.

¹⁵ Ma na di dë nöö e, ma hên da u seei ta mindi soni da Gadu tu, fu di u ta konda taa a weki baka.

Biga wê ee sêmbê an sa weki baka a dëdë, nöö da Gadu an bi weki Masa Jesosi a dëdë tu.

¹⁶ Biga wê ee sêmbê an o weki baka a dëdë, nöö hên da „Masa Jesosi„ Keesitu seei an bi weki a dëdë tu.

¹⁷ Nöö ee an bi weki baka, nöö di biibi un ta biibi dë dë wan gaan kaba a sôsô soni. Hên da un dë a dee hogi du fuunu basu eti.

¹⁸ Nöö hên da dee sêmbê dee nama ku „Masa Jesosi„ Keesitu ma de dëdë kaa, nöö deseei lasi tu.

¹⁹ Nöö hên da fa u hai kumutu disa hii soni u kôndë ko ta biibi a „Jesosi„ Keesitu liba aki, nöö ee te u dëdë nöö a kaba, nöö hên da u ko dë dee möön gaan hogihedima u mundu.

²⁰ Ma an dë sô e, dee sêmbê. Keesitu weki baka a dëdë tuu. U hii dee sêmbê dee bi dëdë kaa, nöö hên da di fosu wan di weki baka „fu an dëdë möön„.

²¹ Biga leti kumafa i si a dë taa wan libisêmbê „bi booko Gadu wêti hên a„ tja dëdë ko ta kii hii sêmbê, nöö sôseei di wan Libisêmbê di hoï Gadu wêti dë tja weki baka a dëdë ko dou a hii sêmbê tu.

²² Nöö leti kumafa hii sêmbê musu dëdë fu di de da bakamii u Adam, nöö sôseei dee sêmbê u „Masa Jesosi„ Keesitu o toona weki baka a dëdë tu fu de feni libi, fu di de dë sêmbê u Masa Jesosi.

²³ Ma nöö hiniwan sêmbê abi ên leti juu faa weki baka e. Nöö di fosu wan, hên da „Jesosi„ Keesitu, nöö baka fêên te a o toona ko a goonliba, nöö dee sêmbê fêên.

²⁴ Baka u di dë, nöö Masa Jesosi o kaba ku hii dee takima ku dee hedima, ku dee soni abi makiti a goonliba aki ku mundu ala tuu fiaa. Nöö di kaba juu u di ten u dë aki o dou awaa, nöö Masa Jesosi o toona da hên Tata di kônubangi.

²⁵ Biga Masa Jesosi hên o dë kônu a di ten dë. Nöö a o dë kônu fu te kisi di juu Masa Gadu buta hii dee feantima fêên tuu nëên basufutu,

²⁶ tee kisi ku di dëdë di ta kii u aki tuu, di da di kaba lasiti felantima.

²⁷ Biga a sikifi a Gadu Buku taa: “A buta hii soni nëên basufutu.”

Ma fa a taa “hii soni” dë, hên da hii soni ma boiti Masa Gadu. Biga Masa Gadu seei hên buta dee soni a Masa Jesosi basu.

²⁸ Ma te a kaba u buta hii soni nëên basu kaa, nöö di Womi Mii fêên seei o toona sakêên seei nëên Tata basu, fu hên Tata musu dë di kaba Takima u Mundu.

²⁹ Ma ee a dë sô tuutu taa te sêmbê dëdë de an o weki baka a dëdë, wê nöö dee sêmbê dee ta tei dopu a dee dëdë sêmbê kamian wê? Faandi mbei de ta du di lô soni dë? Nöö andi a o heepi de?

³⁰ Wê nöö u seei tu, ee di weki baka a dëdë an dë, nöö faandi mbei u ta buta u seei a dëdë ku libi maun hiniwan juu u di buka dë hedi?

³¹ Sô u ta libi tuu, dee sêmbê. Mi sa djula u di dë leti kumafa mi ta njan buka u di waka un ta waka a Masa Jesosi Keesitu baka.

³² Biga di mi bi dë a Efeise kôndë, de bi dë a mi baka kuma takumbeti. Nöö ee di weki baka a dëdë an dë, nöö andi seepi di soni dë o heepi mi möönsô, ee bunu u di goonliba aki nöö mi ta suku? Aan heepi e. Nöö ee sêmbê an sa weki baka a dëdë nöö un boo bia ta njan ta bebe ta libi kumafa u kê, biga amanjan te u dëdë nöö kaba u kaba.

³³ Ma na sō a dē e, dee sēmbē. Na mbei sēmbē ganjan unu seei. Poipoi sēmbē ta poi bumbuu sēmbē.

³⁴ Nōō un bia kumutu disa di wisiwasi pakisei dē, nōō un ko ta libi wan leti libi a Gadu wojo. Un musu kaba ku dee hogi du fuunu. Biga sēmbē dē eti a unu mindi naandē dee an sabi wan wojo soni u Gadu. Nōō fa mi ta taki aki, nōō sen musu kisi unu e, dee sēmbē.

Aki Paulosu ta konda kumafa

de o kisi wan njunjun sinkii

te de weki baka a dēdē.

³⁵ Ma sonte wan sēmbē sa hakisi taa: “Wē unfa sēmbē sa weki baka a dēdē? Unfa sinkii fēēn o dē?”

³⁶ Dee sēmbē, di hakisi dē a dē wan sōsō hakisi e. Biga wē luku dee soni i ta paandi. De an musu dēdē pondi bifō de toona nasi ko a libi nō?

³⁷ Nōō dee sii i ta paandi naandē, na de da di pau eti e. Ma de dē bōngō nōō, di de ta paandi. A kandē alisi ₁ee pinda₁ ee nasō hiniwan sootu pei soni bōngō,

³⁸ ma Gadu hēn ta toona dēēn wan hii oto sinkii kumafa a kē, hiniwan sii ku fēēn sinkii.

³⁹ Sō Gadu ta mbei soni peipei. Biga luku dee sinkii u dee libilibi soni, de an dē di wan fasi e. Libisēmbē sinkii dē wan fasi. Mbeti dē wan oto fasi. Fou dē wan oto fasi. Fisi dē wan oto fasi.

⁴⁰ Sōseei dee soni dē a liba ala tooka ku dee u goon aki tu. Di waiti u dee soni ala ku dee u goon aki an dē di wan.

⁴¹ Biga sonu abi ēn fasi faa ta sēndē. Libawojo abi fēēn sēndē. Sōseei dee teeja abi u de sēndē, nōō dee sēndē u de an dē wan fasi, de tooka ku de na de.

⁴² Wē nōō sō nōō di weki baka a dēdē o dē tu e. Di sinkii de ta tja go bei dē, a dē wan sinkii di dēdē ta poi nōō. Ma di sinkii di o toona weki dē, hēn an dē soni di o dēdē poi mōōnsō.

⁴³ Di de bei dē, hēn a dē wan kaba a sōsō soni, ma fa a o toona weki ko dē, nōō a o dē wan gaan waiti soni. A bi dē wan suwakisuwaki sinkii nōō, ma te a weki baka a o dē ku kaakiti seei.

⁴⁴ Wan sinkii u goonliba hēn de tja go bei dē, ma fa a o weki baka dē nōō a o dē wan sinkii a di fasi faa sa libi a Masa Gadu Kōndē.

Sōō. Wē leti kumafa u abi wan sinkii fuu libi a di goonliba aki, nōō sōseei woo abi wan sinkii fuu libi a Gadu Kōndē ala tu.

⁴⁵ A o pasa leti kumafa a sikifi a Masa Gadu Buku kaa, u di sēmbē di mbei libisēmbē bōngō. A taa: “Gadu mbei Adam te a kaba, ₁hēn a bōō nēēn nusu₁ hēn a kisi libi.”

Ma di Sēmbē di ta mbei dee bōngō u Gadu Kōndē ala, hēn de ta kai di u tu Adam. ₁Hēn da Masa Jesosi.₁ Hēn feni wan oto pei sinkii ₁di Gadu weki ēn baka a dēdē₁ nōō ku ēn a dē a Gadu Kōndē ala ta da u libi.

⁴⁶ Ma di sinkii u Gadu Kōndē nēēn fosu bi dē e. Di u goonliba fosu bi dē. A baka ufō di u Gadu Kōndē ko.

⁴⁷ Nōō di fosu sēmbē mbei ku di doti u di goonliba aki. Ma nōō di u mbei tu sēmbē kumutu a Gadu Kōndē.

⁴⁸ Nōō di fasi u sinkii di di fosu libisēmbē u goonliba aki bi abi, hēn di wan seei fasi dē nōō dee sēmbē u goonliba aki abi te tide eti. Nōō sōseei di fasi u sinkii di di fosu Sēmbē u Gadu Kōndē abi, nōō hēn di wan seei fasi u sinkii dee sēmbē u Gadu Kōndē o abi tu.

⁴⁹ Nöo leti kumafa u dë aki u abi di wan sinkii kumafa di fosu sëmbë u goonliba bi abi, nöö söseei wan daka woo ko abi di wan sinkii kumafa di fosu sëmbë u Gadu Köndë abi.

⁵⁰ Ma nöö mi kë taki wan soni aki da unu, dee sëmbë. Mi taki e, taa dee sinkii fuu dee dë ku buuu u go dëdë poi aki, de an o sa go a Gadu Köndë söndö tooka e. Biga dee soni dee dë u poi kaba a sösö an o sa go ka soni an o poi kaba a sösö möönsö.

⁵¹⁻⁵² Nöö un haika, mi o taki wan gaan tjubitjubi soni da unu aki. Mi taki e, na hii u tuu o dëdë bifö di kaba juu dou e. Ma te di juu dou di tutu böö kaa, nöö wantewante bifö i mëni, nöö Gadu o tooka di sinkii fuu. A o da u wan sinkii di an sa poi kaba a sösö möönsö. Nöö dee biibima dee bi dëdë, de o weki toona ko dë ku libi ku di njunjun sinkii dë. Nöö söseei u dee biibima dee o dë ku libi eti, nöö u seei o tooka ko abi di njunjun sinkii dë tu. Nöö sö a o pasa e, dee sëmbë.

⁵³ Biga wë di sinkii fuu di o dëdë poi kaba a sösö aki, a musu tooka ko wan hii oto pei sinkii di an o sa dëdë poi möönsö.

⁵⁴ Nöö te a pasa sö kaa, nöö a o kai ku di soni de sikifi a Gadu Buka taa: Di wini Gadu wini, hën kaba dëdë a sösö kuma a guli ën wiööl!

⁵⁵ Nöö hën a sikifi möön taa:

Wë Dëdë oo, andi seei i wini? Naasë di poosian fii dë möön?

⁵⁶ Biga di poosian u dëdë, nöö hën da di sitaafu di u bi o kisi a baka u dee hogi du fuu hedi. Nöö di soni mbei u bi o kisi sitaafu, biga wa hoi dee wëti dee Gadu buta da u.

⁵⁷ Ma nöö gaantangi u Gadu di a mbei Masa Jesosi Keesitu wini hii dee lö soni dë tuu da u.

⁵⁸ Wë da sö a dë, un dee lobi sëmbë u mi naandë, un musu tan gingin a di biibi un ta biibi Masa Jesosi dë. Wan musu disa möönsö. Un musu ta biinga hiniwantan a di wooko u Masa, biga i sabi taa di wooko i ta wooko da Masa dë an dë u sösö.

16

Aki Paulosu ta taki

wan möni soni da de.

¹ Söö. Wë nöö, dee sëmbë, a di së u di möni di woon pii manda go da dee sëmbë u Masa Jesosi „a Jelusalen„, nöö un musu du ën leti kumafa mi fan ku dee biibima a di pisiwata u Galasia a dee keikikeiki u de taa,

² hiniwan sonde un musu pii möni buta a wan së. Hiniwan sëmbë sa da kumafa a ta kisi. Nöö sö un musu zuntëen buta dë fu te mi ko nöö an o dë fuun ta biinga ta pii möön.

³ Nöö un musu suku wanlö sëmbë buta dë, dee un ta futoou. Nöö te mi ko, nöö mi o sikifi pampia da de u de tja di möni go da dee sëmbë a Jelusalen.

⁴ Nöö ee a dë taa miseei musu go tu, nöö mi o tja de go.

Aki Paulosu ta konda da de kumafa a ta mëni u ko a de.

⁵ Nöö mi o ko a unu nöömö e, dee sëmbë. Ma te mi o ko, nöö mi o latja pasa a di pisiwata u Masadonia „go haika dee sëmbë ala pala sö ufö„.

⁶ Biga wë te mi ko, mi a' di pakisei taa mi o tan ku unu naandë wan hii pisiten. A kandë mi sa sai dë te di kötö ten pasa seei. Nöö bakaten un sa heepi mi seeka fu mi sa go a dee kamian ka mi nango.

⁷ Biga ma kë ko da unu odi vaavaa sö nöö mi pasa, ma mi kë dë ku unu wan hii pisiten, ee Gadu da mi pasi.

⁸ Ma nöö mi o dë a Efeise aki pasa Pensiti e.

⁹ Biga wë mi ta feni wooko aki te a hia, sëmbë ta piki di buka mi ta konda da de. Ma söseei feanti dë aki te a hia tu, ta mbei möiti u tapa mi.

¹⁰ Wë nöö ee un si Timoteo ko a unu ala, nöö un kisi ën a wan fasi faa sa fi bunu e, biga hënseei dë a di wooko u Masa leti kuma mi seei.

¹¹ Hën mbei na wan sëmbë musu söso ën, ma un musu butëen a pasi ku piizii be a toona ko a mi aki. Biga mi dë aki ta luku hën ku dee oto biibima u de ko a mi.

¹² Ma nöö u baaa Apolo, mi kë un sabi taa mi bi begi ën fu hën ku dee otowan fuu musu ko a unu, ma nöö an bi kë ko eti. Ma te a feni pasi, nöö a o ko.

Aki Paulosu ta tapa di biifi.

¹³ Nöö mi taki e, dee sëmbë, be un ta dë setiseti hiniwan juu fu soni an puu unu a pasi. Un musu dë gingin a di biibi un ta biibi Masa dë. Söseei un musu abi degihati ku taihati.

¹⁴ Nöö hii dee soni woon ta du kaa, nöö un musu du de fu lobi hedi e, dee sëmbë.

¹⁵ Ma nöö mi kë mëmbë unu a wan soni aki, taa dee sëmbë u Sitefanasi wosu dë, de da dee fosu sëmbë u di pisiwata fuunu na Akaja dë dee bi ko a di biibi. Nöö hën de buta deseei fu de musu ta heepi dee oto sëmbë u Gadu.

¹⁶ Wë nöö fëen mbei mi ta begi unu gaantangi be un ta piki dee lö sëmbë dë buka a soni, ku dee otowan dee ta wooko taanga da Masa a unu ala.

¹⁷ Nöö mi wai tuutuu u di Sitefanasi ku Folunatusi ku Akaikusi bi ko a mi aki. Biga de bi heepi mi leti kumafa unu bi o heepi mi.

¹⁸ De da mi degihati aki seei, leti kumafa de bi da unu hati ala tu. Nöö sö wanlö sëmbë un musu tei de u gaan soni e.

¹⁹ Da sö u taki e, dee sëmbë. Dee biibima dee dë a dee keikikeiki u di pisiwata u Asia aki tuu manda gaan odi da unu taa de dë. Akila ku Pesila seepi manda gaan odi da unu tu a di në u Masa. Nöö dee biibima dee ta ko hoi keiki a de wosu manda gaan odi da unu tu,

²⁰ ku hii dee oto biibima fuu aki tuu manda gaan odi da unu.

Nöö te woon da unu seei odi, nöö un baasa unu seei ku limbo hati e.

²¹ Nöö mi Paulosu seepi ta sikifi di lasiti pisi u di biifi aki ku mi seepi maun ta manda gaan odi da unu.

²² Ee wan sëmbë an lobi Masa Jesosi Keesitu, nöö di siba u Gadu musu kisi ën e.

Ma u dee sëmbë dee lobi ën, u ta bai taa: “Ko o, Masa.”

²³ Masa Jesosi Keesitu musu dë ku unu ku ën bunuhati e.

²⁴ Fa mi ta manda di biifi aki da unu, dee sëmbë, nöö mi lobi unu e, fu di mi ku unu tuu nama ku Masa Jesosi Keesitu.

„Na soni möönsö e. Mi, Paulosu, manda gaan odi da unu. A tan sö.”

Di u tu biifi Paulosu manda da dee biibima u Kolenti

Wan wöutu a fesi.

Disi da di u tu biifi di di tjabukama u Masa Jesosi de kai Paulosu mbei manda da dee biibima a di köndê de kai Kolenti.

Nöo di soni mbei a mbei di pampia aki. A dê sô taa wanlô sëmbê ko a de naandê ko ta hopo deseêi buta kuma de dê tjabukama u Masa Jesosi, ma na tuu e. Biga na Masa Jesosi manda de, ma de dê ganjansëmbêma. Nöo fa de ko a Kolenti dê, hên de tja Paulosu nê ko ta poi da dee biibima. De ta mbei ên fa taa an dê wan tuutu tjabukama u Masa Jesosi, nöo de aan fu piki ên buka. Sô dee sëmbê ta lei dee sëmbê u Kolenti. Nöo hên Paulosu jei, hên a manda di pampia aki go da de fu de si fa a dê tjabukama tjika, ku fa dee sëmbê naandê an dê tjabukama u Masa Jesosi seei.

Nöo a leti de a wan oto soni möön. A dê sô taa fa a bi wooko a dee sëmbê mindi naandê, nöo de ku ên bi abi buka taa a bi o toona ko haika de. Nöo hên wê an ko kumafa a bi taki möön, hên dee sëmbê tei ên fu hogi. De si taa a ganjan de. Nöo hên a manda taki da de faandi mbei an ko.

Nöo a taki wan oto soni da de möön, hên da a da de taanga u de go dou ku wan pakisei de bi abi u pii wan möni manda go da dee biibima u Jelusalen u heepi de.

Nöo de dii soni aki, de da hedi u di pampia.

Aki Paulosu ta da dee sëmbê odi.

¹ Wê un dee biibima u Masa Jesosi dee dê a Kolenti dê, mi Paulosu ta manda gaan odi da unu e. „Leti kumafa un sabi kaa,„ mi dê wan u dee tjabukama u Jesosi Keesitu de ta kai apösutu, nöo Gadu seepi tei mi buta sô e.

Wê nöo fa mi ta sikifi di pampia aki, nöo mi ku Timoteo nöo sô u ta sikifi ên makandi. U ta mbei ên manda da unu ku hii dee oto biibima dee dê a di pisiwata fu Akaja naandê te lontu dou,

² taa Masa Gadu u Tata ku Masa Jesosi Keesitu musu dê ku unu ku de bunuhati. De musu da unu böö.

Aki Paulosu ta da Masa Gadu tangi u di heepi fëên.

³ Wê dee sëmbê o, u ta da Masa Gadu tangi e, di dê di Gadu u Masa Jesosi Keesitu ku ên Tata tuu. Hên nê wê u ta hopo e. Hên seei da u Tata tu, nöo a abi tjalihati fuu. Nêên hii kötôhati ta kumutu.

⁴ Fa dee hia sitaafu ta miti u a di goonliba aki, nöo Gadu hên ta heepi u fuu feni kötôhati e, dee sëmbê. Nöo di soni mbei a du ên sô, fuu sa toona kötô dee sëmbê hati dee ta tja sitaafu tu. Leti kumafa a bi heepi u, nöo sô u seei sa heepi de tu fu de feni kötôhati.

⁵ Wê biga fa u dê aki nöo u ta tja fuka te a hia u „Masa Jesosi,“ Keesitu hedi e. Ma nöo leti kumafa dee fuka ta hia, nöo sô di kötôhati di u ta feni a Masa Jesosi ta hia tu.

⁶ Ma nöo dee sitaafu i si u ta tja aki, nöo de dê fuunu hedi wê e, dee sëmbê, fuun jei fa Gadu ta heepi sëmbê tjika fu de feni di bunu fëên. Biga fa Gadu ta kötô u hati aki, nöo sôseei woo sa toona kötô unu hati tu. Nöo te hati fuunu ko kötô kaa, nöo woon abi taihati fuun sa tja dee sitaafu go dou, leti kumafa u seei ta tja de aki.

⁷ Nöo fëen mbei wa ta panta da unu e. Biga u sabi taa leti kumafa un ta tja dee sitaafu kuma u dë, nöo söseei un ta feni kötöhati kuma u tu.

⁸ Söo. Wë nöo dee sëmbë, u kë konda da unu taa dee sitaafu dee u tja a di ten u bi dë na Asia Köndë dë, nöo de bi hebi da u tee kuma wa bi sa tjeën. U bi fëë seei tee u bi mëni taa de bi o kii u.

⁹ Tuu e, dee sëmbë. Wë biga u bi ta fii a u hati kaa taa woo dëdë. Wë ma tökusee, sö nöo a bi musu waka fuu musu puu pakisei a u seei taa wa sa heepi u seei, ma Gadu nöo u musu futoou taa hën nöo sa heepi u.

Nöo a sa heepi u tuu, dee sëmbë, biga hën ta weki sëmbë puu a dëdë.

¹⁰ Nöo sö a heepi u puu u a di hogi dëdë naandë e, nöo u ta futoou ën taa sö a o ta heepi u nöömö.

¹¹ Nöo unu seei musu ta heepi u ku dee begi fuunu tu e. Wë biga ee hia sëmbë ta begi, nöo te Gadu piki ku di bunuhati fëen manda di heepi ko da u kaa, nöo hia sëmbë o dë u dëen tangi tu.

Aki Paulosu ta konda

di soni mbei an bi ko a de

kumafa a bi taki.

¹² Wë nöo, dee sëmbë, mi kë taki soni u di fa ma bi ko haika unu möön kumafa mi bi taki. Wë un sabi ën bunu taa, u abi wan soni fuu sa hëngi nëën liba njan buka wan piki wan e. Hën da wa ta libi ku ganjan. Biga wë u hati seepi ta piki u taa wa ta ganjan sëmbë e. Hii kamian ka u ta waka ta lontu kaa, nöo u ta tja u seei a wan limbo fasi fu di u dë sëmbë u Gadu. Wë ee ku oto sëmbë u ta libi sö, nöo ku unu wë? Na möönsö nö?

Nöo fa u ta libi aki, na ku di kõni u libisëmbë u ta libi sö e. Nönö. Ma a Gadu nöo u ta hëngi taa hën o heepi u ku ën bunuhati.

¹³ Te kisi dee biifi u ta sikifi ta manda da unu seei, wa ta sikifi de ku hebi wöutu a kõnima fasi te wan sa fusutan de e. Nönö. Ma de sikifi fuun sa fusutan de gbelingbelin seei.

¹⁴ Nöo söseei un ta fusutan di libi fuu wan pikiwan tu. Ma nöo u kë fuun sa ko fusutëen ku telu. Biga ee a waka sö, nöo te Masa Jesosi toona ko a di goonliba aki, nöo woon njan buka da u leti kumafa u seepi o njan buka da unu tu.

¹⁵ Ma fuu toona go a di taki, di mi sabi taa mi ku unu dë bunu sö kaa, nöo hën mbei mi bi pakisei taa mi o ko luku unu tu pasi.

¹⁶ Biga wë a unu naandë fosu mi bi o ko bifö mi bi o pasa ko a Masadonia Köndë aki. Nöo te mi toona, nöo mi bi o ko fika a unu dë möön wan pisiten, fuun sa buta mi a pasi fu mi go a Judea. Nöo hën da un bi o feni di bunu dë tu pasi.

¹⁷ Ma nöo fa mi pakisei dë, nöo di soni an waka kumafa mi bi kë möön. Wë di an waka sö, nöo unfa un mëni? Un tei mi u ganjansëmbëma nö, kuma wan sëmbë di taki sö tide, nöo amanjan a bia taki oto soni? Ma na sö mi dë e, dee sëmbë. Nönö.

¹⁸ Ma leti kumafa i si un sa futoou Masa Gadu, nöo söseei un sa futoou u tu. Te u taki aai, nöo a tan aai. Te u taa nönö, nöo a tan nönö. Wa o ganjan unu.

¹⁹ Biga mi ku Timoteo ku Silasi, soni u Jesosi Keesitu di Womi Mii u Gadu u ta konda, nöo ganjan an dë nëën möönsö. Ma hii soni di a ta taki nöo a tan sö kaa e.

²⁰ Fa Masa Gadu sai dë, a paamusi u sömëni soni, nöo u ta feni de tuu nöömö biga Masa Jesosi hën ta tja de ko da u. Hën mbei u ta bai Gadu në, nöo hën mbei u seei wa ta ganjan sëmbë tu.

²¹ Wë di Gadu u ta taki aki, hën ta heepi mi ku unu tuu fuu sa tan gingin a ƭMasa Jesosi, Keesitu e. Biga hënseei tei u buta apaiti fuu dë futuboi fëën,

²² nöö hën a buta di Akaa fëën a u hati kuma wan sitampu taa u da sëmbë fëën seei vö. Nöö a dë di maaka tu, taa te di juu dou nöö woo feni hii dee soni tuu dee Gadu abi faa da u. ƭNöö fa u ku ën nama tjika aki, nöö u sa ganjan unu nö, dee sëmbë?,

²³ Wë nöö Gadu seepi dë kotoigima u mi e, taa di soni mbei ma ko a unu a Kolenti möön kumafa mi bi taki, a bi dë fu di ma bi kë ko ku hatiboonu a unu liba fu mi musu ta gandji da unu.

²⁴ Fa mi fan dë, dee sëmbë, an dë kuma mi kë buta miseei basi a unu liba ta taki da unu fa un musu biibi möön e, biga un dë gingin a di biibi kaa. Ma heepi nöö mi kë heepi unu fuun sa ta dë waiwai te dou.

2

¹ Fa i si mi bi pakisei u mi ko luku unu dë, nöö ma bi kë ko fu ko da unu fuka möön e, dee sëmbë.

² Biga wë ee mi ko da unu fuka, nöö ambë o dë u da mi hati möön? Biga na unu musu dë dee sëmbë ta mbei mi ta wai nö? Awa, unu wë e, dee sëmbë.

³ Wë nöö di ma kë da unu fuka, nöö hën mbei mi mbei di oto pampia manda da unu, fuun musu buta soni tololoo a tatai liba a fesi fu te mi ko nöö mi sa dë waiwai. Nöö mi sabi unu taa ee mi dë waiwai nöö unu seei o dë waiwai tu.

Ma ee sö mi musu ko si unu taa un ta libi wan libi di an fiti, nöö un dee sëmbë dee bi musu mbei mi dë waiwai nöö woon mbei mi dë fukafuka. Nöö wai an o dë.

⁴ Nöö mi kë fuun sabi taa fa mi bi sikifi di pampia dë, nöö ku gaan fuka a hati e, ku wata a wojo seei. Ma na fu da unu fuka mbei mi sikifi ën e, ma mi bi kë lei unu kumafa mi lobi unu tjika.

Aki Paulosu ta konda da de

fa de an musu hoi di sëmbë

a bëë möön.

⁵ Wë nöö dee sëmbë, un sabi di sëmbë di bi du hogi a unu mindi dë, fa a bi booko unu saka tjika. Nöö sö a booko miseei saka tu e, ma misikuma unun booko saka möön mi gaanfa.

Ma nöö fa mi taki soni u di sëmbë dë seei, ma ma kë taki ën nöömö kuma mi ta dëën sitaafu pasa maaka e.

⁶ Biga di sitaafu di di gaan së fuunu bi sitaafu ën naandë kaa, nöö a tjika.

⁷ Nöö fëën mbei mi kë fan ku unu taa be un puu ën a bëë e. Nöö un fan ku ën be hati fëën kôtö, be an musu dë ku tjali poi tee a lasi hati.

⁸ Mi begi unu baa, be un lei ën taa un lobi ën eti e.

⁹ Biga wë fu di soni aki hedi wë mi sikifi di oto pampia manda da unu, fu pooba unu luku ee un ta piki mi buka a hii soni.

¹⁰ Nöö ee un tuu puu wan sëmbë a bëë fu wan soni, nöö miseei puu ën a bëë tu e. Biga wë ee a dë u mi puu di sëmbë a bëë nöö mi ta puu ën a bëë waiwai, faa tja heepi ko da unu. Nöö ƭMasa Jesosi, Keesitu seei dë kotoigima.

¹¹ Nöö a sö wan fasi u musu libi tu, fu didibi an wini u. Biga u sabi andi dë nëën hati, taa a sai dë ta boi këni faa kisi u.

Aki Paulosu ta konda da de

fa a bi go a Toasi.

¹² Wë nõo dee sëmbë, mi kë fuun sabi kumafa di waka u mi bi dë. A dë sö taa di mi go dou a Toasi fu mi konda di Bunu Buka u ‚Masa Jesosi, Keesitu ala, nõo Gadu bi seeka di soni kaa e. ‚A bi naki dee sëmbë hati seei, biga hia sëmbë bi dë di kë jei di buka.

¹³ Ma töku hii fa sëmbë kë jei di buka seei, ‚ma hati u mi an bi dë kötökötö biga ma bi si mi mati Titusi naandë ‚fu mi jei fa fuunu. Nõo hën wë mi da dee sëmbë adjoisi hën mi pasa go dou a Masadonia aki.

Aki Paulosu ta konda fa a ta tja di Bunu Buka u Gadu tjika.

¹⁴ Ma nõo gaantangi u Gadu di a ta buta u u ta waka a ‚Jesosi, Keesitu baka kuma winima nõömö. Biga a manda u fuu ta konda soni fëen da hii sëmbë, kuma sëmbë ta tja sumëesuti fatu ta paaja a hii kamian.

¹⁵ Nõo fa u ta paaja di buka aki, nõo u seei tu ko dë kuma sumëesuti soni di ‚Masa Jesosi, Keesitu ta tjuma da Gadu ta mbei sumuku dëen. Biga hii ka u nango, sëmbë ta jei di buka. Dee sëmbë dee o kumutu a didibi faja ku dee sëmbë dee o go a didibi faja tuu ta jei ën.

¹⁶ Nõo dee sëmbë dee o kumutu a didibi faja, nõo u dë wan sumëesuti soni da de tuú, biga u ta tja libi ko. Ma nõo dee sëmbë dee o go a didibi faja, nõo u dë da de kuma wan hogi soni di sa tja dëdë ko da de.

Ma nõo fa u ta fan aki, ambë seei fiti u du sö wan wooko baa?

¹⁷ Wë a kandë u dee sëmbë aki wë e. Biga u ta konda di Buka u Gadu ku limbohata söndö ganjan. Wa ta suku möni nëen möönsö kuma so sëmbë. Nõo Gadu seei ta si taa u ta du di wooko kuma futoou futuboi u ‚Masa Jesosi, Keesitu di Gadu seei manda.

3

¹ Ma nõo fa u taki dë, nõo hën da u ta gafa u seei möön nõ? Te woo ko a unu, u musu tei pampia a oto sëmbë tja ko, be un jei fa u dë tjabukama tjika nõ? Ee nasö u musu tei pampia a unu dë tja go lei sëmbë, be de si fa u ta du di wooko tjika nõ? Nönö, di lö pampia dë an dë fanöudu e, dee sëmbë. A kandë otowan sa abi ën fanöudu, ma na u.

² Biga a u hati nõo unu wë da u pampia kaa e, fu hii sëmbë sa lesi nõo de sabi fa u dë tjabukama u Gadu tjika.

³ Biga di u bi konda di buka u Masa Jesosi da unu dë nõo hën wë un piki ën, nõo fa u dë aki hii sëmbë ta si di libi fuunu ta lesi, kuma wan pampia di Masa Jesosi Keesitu manda da de. Nõo di pampia dë, u seei toona ta tjëen ta paaja tu, biga u ta konda da sëmbë kumafa un ta dini Gadu tjika.

Ma nõo di lö pampia u ta taki aki an sikifi ku pëni e, ee nasö a wan linzo sitonu kuma dee wëti Gadu bi da Mosesi. Ma di Akaa u di Gadu di ta libi u teego, hën ta sikifi ën a libisëmbë hati.

⁴ Wë nõo di soni mbei u abi degihati u gafa u seei sö e, fu di heepi ‚Masa Jesosi, Keesitu ta heepi u ku di wooko fëen. Nõo u ta futoou Gadu taa sö a o ta heepi u nõömö.

⁵ Biga an dë taa u ta pakisei möönsö taa u seei sa du di wooko e. Ma a Gadu hii di kõni ku di kaakiti fuu du di wooko aki tuu ta kumutu.

⁶ Hën seei ta heepi u mbei u sa ta tja di Njunjun Buka di a mbei ku libisëmbë aki ta paaja da lanti.

Nõo di buka aki sö, hën an dë kuma di awoo buka di bi dë sikifisikifi a dee linzolinzo sitonu dë e. Nönö. Dee wëti de sikifi di ten dë, dëdë nõo de ta tja ko. ‚Biga sëmbë an tjika u hoi de möönsö u de kumutu a di sitaafu u Gadu. ‚Ma nõo di njunjun buka di u feni a di Akaa u Gadu aki, hën ta tja libi ko.

Aki Paulosu ta konda fa di buka

de ta tja dë möön waiti möön

di fesiten buka.

⁷ Wë nöö, dee sëmbë, fa u ta taki soni u de tu Buka aki, nöö mi taki da unu e, taa di awoo buka naandë, dee wëti Gadu bi sikifi a dee sitonu dë, nöö de bi ta tja dëdë ko e. Ma töku di sëmbë di bi tja dee wëti ko da dee sëmbë u de pikì, a bi kisi gaan nèbai e. Biga fa Mosesi ta tja dee wëti ko dë, nöö fesi fëèn bi ta sëndë seei tee sëmbë wojo an sa kai ku ën. Ma hii u di dë, di sëndë fëèn fesi bi seti saka kaa e.

Wë nöö ee di sëmbë di bi tja dee wëti naandë ko bi abi sò wan gaan hei,

⁸ wë nöö u dee sëmbë dee ta tja di njunjun buka aki ta paa ja wë? Na u musu abi möön gaan nèbai u di wooko fuu hedi nò? Biga u dee disi ta lei sëmbë fa di Akaa u Gadu ta da sëmbë libi.

⁹ Nöö di fosu buka dë bi tja sitaafu ko a sëmbë liba fu di de an sa hoi dee wëti möönsö. Wë ee di sëmbë di tja di buka dë ko bi abi sò wan gaan nèbai, wë nöö u dee sëmbë dee ta tja di njunjun buka aki ko wë? Na u musu abi möön gaan nèbai nò? Biga u ta konda da sëmbë fa Gadu seeka wan njunjun fasi fuu sa ko bumbuu sëmbë nëèn wojo.

¹⁰ Hën mbei de tu buka aki, ee i luku de te i kaba, nöö i sa si taa di awoo buka an abi waiti möön seei. Biga di waiti u di njunjun buka aki pasëèn gaanfa.

¹¹ Hën tu, ee di soni di dë u wan pisiten nöö abi nèbai, nöö di teego soni wë? Na hën musu abi di möön gaan nèbai nò?

¹² Wë nöö dee sëmbë, di u sabi sò kaa, nöö wa ta konda soni u di njunjun buka aki da sëmbë tjubitjubi ku panta e. Na seei!

¹³ Biga an o pasa ku u kumafa a bi pasa ku Mosesi. Fa fesi fëèn bi sëndë dë, nöö u wan pisiten nöö. Hën mbei a bi tapëèn fesi, fu dee Isaëli sëmbë an musu sa si fa di sëndë fëèn fesi ta saka. „Ma di waiti u di buka u ta tja aki hën an o saka möönsö.”

¹⁴ Ma i saandi pasa nò? Fa Mosesi tapëèn fesi dë, nöö na hën fesi wanwan bi tapa e, ma hatu u dee sëmbë bi tapa tu da di wooko u Gadu. Nöö te kuma tide hatu u de dë tapatapa eti. Biga te de ta lesi a di Buku ka a ta taki soni u di awoo buka Gadu bi mbei ku de, nöö de an ta fusutan möönsö u de saandi Gadu kë takì. Nöö sò nöö a o dë tu e, dee sëmbë. Biga tee wan sëmbë i ko ta biibi a „Jesosi,” Keesitu bifö wojo fii o ko limbo awaa.

¹⁵ Nöö di soni mbei mi taa wojo u de an limbo. Biga te tide eti te de ta lesi dee wëti Gadu bi da Mosesi, „de ta mëni kodo taa ee de hoi dee wëti dë, de sa kumutu a di sitaafu u di hogi du u de. Ma an dë sò e.”

¹⁶⁻¹⁷ Ma te wan sëmbë i ko biibi a Masa Jesosi bifö wojo fii o ko limbo awaa. Biga di Akaa u Masa Jesosi, hën nöö sa da sëmbë fusutan u de kumutu a dee wëti dë basu ko fii.

¹⁸ Wë nöö fa u ta biibi a Masa Jesosi liba aki, dee sëmbë, nöö soni an ta tapa u wojo möön e „kuma dee sëmbë u taki dë.” Ma u ta si Masa Jesosi gbegede seei kumafa a waiti tjika. Nöö fa u ta luku ën dë, nöö möönmöön di Akaa u Gadu ta tooka u fuu ko dë kuma Masa Jesosi seei, nöö möönmöön sëmbë ta si di waiti di Gadu abi a u.

4

Aki Paulosu ta konda kumafa

di wooko fëèn dë.

¹ Wë nöö dee sëmbë, fa i si Masa Gadu buta u a di wooko aki ku ën gaan bunuhati, nöö hën mbei wa ta lasi hati e.

² Nöö hën mbei tu, wa ta tja di Buka u Gadu a wan ganjanganjan fasi tjubitjubi, faa da u sen a bakaten. Söseei tu, wa ta bia di Buka, ma u ta kondëen gbelingbelin be libisëmbë ku Gadu tuu si taa u ta du di wooko a wan leti fasi.

³ Nöö fëën mbei ee di Buka an dë limbolimbo da sëmbë, nöö na hii sëmbë e. Ma dee sëmbë dee o go a didibi faja, nöö de a dë dungudungu da.

⁴ Biga a di ten di u dë aki nöö didibi hën dee sëmbë u goonliba ta tei kuma gadu u de de ta dini, nöö hën ta abi taki a di goonliba aki. Nöö hën poi dee lö sëmbë dë hati ku de pakisei tuu, te di buka ta dë dungudungu da de. Hën mbei de an sa ko fusutan möönsö taa di waiti u, Jesosi, Keesitu di dë a di Bunu Buka fëën u ta konda aki, nöö hënseei da di waiti u Gadu kaa. Te i si ën, nöö hën da Gadu seei i si dë kaa.

⁵ Fa i si u ta konda di Buka aki, dee sëmbë, nöö na soni fuu seei u ta konda e. Ma soni u Jesosi Keesitu tö nöö u ta tei ta konda, taa hën da di Masa u hii mundu. Ma fuu seei, u ta konda taa u dë futuboi fuunu nöö, fu Masa Jesosi hedi.

⁶ Biga di ten Masa Gadu mbei goonliba, nöö a bi taki taa di limbo musu ko jaka di dungu puu. Nöö hën seei wë sëndë wan limbo a u hati, fuu musu ko sabi taa a Jesosi, Keesitu u sa si hii di waiti fëën di a abi.

⁷ Ma nöö fa u ta tja di Buka aki, nöö a dë kuma wan sëmbë tei wan gaan gudu fëën buta a wan doti paabi dendu. Biga Gadu da u dee suwakisuwaki libisëmbë aki di Buka fëën fuu ta tja ta paaja. Nöö sö i sa si ën taa di gaan kaakiti di u abi aki, nöö na a u a ta kumutu e, ma a Gadu.

⁸ Biga hiniwan juu toobi tö nöö ta miti u, ma tökuseei an ta kaba u a sösö. So juu saanfa-u-du fuu ta kaba, ma seei wa ta lasi hati.

⁹ De ta du gaan hogi ku u, ma seei Gadu an ta disa u möönsö. So juu de ta foo u tee tuwë ku baka a goon, ma tökuseei dëdë an ta kii u.

¹⁰⁻¹¹ Fa u ta waka ta lontu aki, nöö hiniwan juu u ta nama ku Masa Jesosi a di dëdë fëën di a tja, fu di libi fëën di dë a u aki musu ko a döo u sëmbë sa si.

¹² Wë da sö i ko si taa hiniwan juu u ku dëdë ta dë fesi ku fesi. Ma töku ku ën sö nöö u ta tja di buka ko da unu fuun feni libi nëën.

¹³ Biga u ta biibi taa Gadu abi kaakiti tjika u puu u a dëdë maun. A dë leti kumafa wan sëmbë bi sikifi a di Buku u Gadu kaa taa:

Mi ta biibi Masa Gadu,

hën mbei mi ta konda soni fëën.

Nöö sö nöö u seepi sa taki tu. Biga di wan biibi dë nöö u seei abi, hën mbei u ta konda di Buka.

¹⁴ Biga wë u sabi taa di wan seei Gadu di i si bi weki Masa Jesosi puu a dëdë dë, hënseei o weki u a dëdë tu fu di u ku Masa Jesosi ko dë di wan. Söseei u sabi tu taa wan daka o dou di a o tja u ku unu tuu go buta nëën fesi.

¹⁵ Nöö hii dee soni ta pasa ku u, ee bunu ee hogi, nöö de dë nöö fuunu hedi e, dee sëmbë, fuun sa jei di buka, be un feni di heepi Gadu ta heepi sëmbë ku ën bunuhati. Nöö möönmöön sëmbë o ta jei di buka ta feni di heepi u Gadu, tee wanlö hia sëmbë o dë u ta dëën tangi. Nöö möönmöön Gadu o ta feni nëbai tu.

Aki Paulosu ta konda faandi mbei an ta lasi hati.

¹⁶ Wë nöö di u sabi sö kaa, dee sëmbë, fëën mbei wa ta lasi hati e. Aluwasi ee di sinkii fuu aki ta gaandi nango seei, ma u sabi taa a u hati dendu aki u ta njunjun nango hiniwan daka.

¹⁷ Fa i si u ta tja dee sitaafu u konda naandë seei, ma töku wa ta tei de u gaan soni. Biga fu wan pisiten nöö de dë, nöö de ta mbei woo feni wan gaan waiti bunu a Gadu ala e, di o pasa dee pena dë gaanduwe.

¹⁸ Hën mbei wa ta luku a dee soni dee u ta si ku wojo nöö e. Ma u ta tuwë wojo ta luku a dee soni a Gadu ala, ka libisëmbë wojo an sa si dou. Biga dee soni dee u ta si ku wojo aki, de dë u wan pisiten nöö, ma dee soni a Gadu ala ta dë u teego.

5

Aki Paulosu ta taki u

di tooka u sinkii.

¹ Dee sëmbë o, fa u ta libi a di goonliba aki seei, ma u sabi taa di sinkii u ta libi nëen aki, nöö a dë kuma wan gangasa nöö di o kaba a sösö nöömö wan daka. Ma u sabi tu taa te wan daka woo feni wan möön bunu sinkii a Masa Gadu ala di o dë u teego, kuma wan wosu di an o booko möönsö. Biga Gadu seei o mbei ën faa musu dë sö.

² Nöö u ta hangii seei fuu sa go libi a di oto sinkii Gadu o da u nëen köndë ala e.

³ Biga u sabi taa te u kumutu a di goonliba aki, nöö wa o go fika a zengezenge naandë söndö sinkii e. Nönö. Woo feni di njunjun sinkii fuu nöömö.

⁴ Fa u ta libi a di sinkii fuu a goonliba aki, nöö u ta tja fuka nëen tuu. U ta tja sëmëni hebi nëen. Ma nöö fa mi ta fan aki seei, ma an dë taa buuse u ta buuse di sinkii fuu aki sö e. Nönö. Ma u ta hangii fuu go libi a di oto sinkii fuu ala, be di sinkii fuu aki di ta dëdë musu tooka ko kuma di an ta dëdë möönsö.

⁵ Nöö fa u taki dë, dee sëmbë, Masa Gadu seei buta taa sö a o dë e. Nöö hën a da u di Akaa fëen kuma wan sitampu, fuu sabi taa hii dee oto gaan bunu dee a abi u da u tuu woo feni.

⁶ Fëen mbei u abi gaan taihati, hii fa sëmëni soni sa miti u aki seei. Biga u sabi taa solanga u ta libi a di sinkii fuu aki, nöö a dë sö kuma u dë a döö eti. Biga wë u ku Masa „Jesosi“, an miti fuu libi nëen köndë eti.

⁷ Nöö na ku si u ta libi eti e, ma ku biibi.

⁸ Wë nöö di u sabi dee soni dë gbelingbelin sö kaa, nöö u ta hangii seei fuu musu sa kumutu a di sinkii aki go dë ta libi ku Masa Jesosi makandi.

⁹ Nöö fëen mbei tu u ta biinga fuu sa libi bunu a hii futu, be Masa musu dë waiwai ku u, ee u dë a di sinkii aki eti ee wa dë nëen möön seei.

¹⁰ Biga u sabi taa wan daka o dou nöö hii u tuu o hai ko taanpu a di kuutu sutuu a „Masa Jesosi“, Keesitu fesi, faa da u paima u dee soni dee u bi du a di ten u bi ta libi a di sinkii fuu aki. Ee hogi, ee bunu, woo feni ën paima e.

Aki Paulosu ta konda fa a ta

biinga u wini sëmbë tja ko

bunu ku Gadu.

¹¹ Wë nöö dee sëmbë, di u ta fëëë Masa Gadu ta lesipeki ën, nöö fëen mbei u ta biinga seei u hai sëmbë tja ko a di biibi. Nöö Gadu sabi sö fuu kaa, ma nöö u kë fuunu seepi musu ko sabi sö tu.

¹² Nöö fa u taki dë, an dë taa u ta mbei u seepi bumbuu sëmbë a unu fesi e. Nönö. Ma u kë da unu pasi fuun sa gafa u da dee sëmbë dee ta kosi u da unu naandë. Fa dee lö sëmbë dë sai dë, de ta njan buka a dee döösë soni „kuma fa

sëmbë hanso tjika, kuma fa de sabi soni tjika, kuma fa de bumbuu tjika. Ma de an ta mëni fa i dë a i hati.

¹³ Biga hii soni u ta du kaa, nöö fu di u ta tja di Buka hedi e. Nöö ee sëmbë ta kosi u taa u lau, nöö a dë u Gadu hedi. Ma ee u dë ku fusutan, nöö fuunu hedi, dee sëmbë.

¹⁴ Biga fu di u sabi taa sö wan gaan lobi Masa Jesosi Keesitu lobi u, nöö fëen mbei u musu ta konda di Buka. Wa sa disa möönsö. Biga fa a dëdë dë, nöö wan sëmbë dëdë a hii sëmbë kamian.

¹⁵ Nöö di soni mbei a dëdë da u, fu wa musu libi a u seei kë möön e. Ma u musu libi a di kë u di Sëmbë di dëdë toona weki baka fuu hedi naandë.

¹⁶ Wë nöö di u ko sabi dee soni dë kaa, dee sëmbë, nöö wa ta maaka sëmbë möön a di fasi di dee sëmbë u di goonliba aki ta maaka sëmbë fu de si ee de dë bumbuu sëmbë. Sö seepi dee soni u bi ta tei ta maaka 'Masa Jesosi', Keesitu, nöö wa ta maakëen a di fasi dë möön tu. Nönö. U ko feni njunjun maaka e.

¹⁷ Biga ee wan sëmbë i ko nama ku 'Masa Jesosi', Keesitu kaa, nöö i ko wan njunjun sëmbë. Di awoo libi go kaa, wan hii njunjun libi ko.

¹⁸ Nöö di wooko dë, Masa Gadu hën wë wooko ën da u e. Biga di ten u ku ën bi dë felantima, nöö hën a manda Jesosi Keesitu faa dëdë da u fuu sa toona ko fii ku ën baka. Nöö hën a toona buta u a di wooko aki, fuu sa tja sëmbë ko fii ku ën tu.

¹⁹ Fa Masa Jesosi dëdë dë, dee sëmbë, nöö Gadu jabi pasi fu an hoi dee hogi du u libisëmbë nëen bëë möön. Nöö hën a da u di suti buka dë fuu sa konda da hii sëmbë taa de ku Gadu sa ko fiifi.

²⁰ Nöö hën mbei i si u ta lontu goonliba aki sö ta konda di Buka u Gadu da sëmbë a 'Masa Jesosi', Keesitu kamian. Nöö hën mbei tu, te u ta fan ku unu, nöö a dë leti kuma Masa Gadu seei ta fan e. Nöö hën i si u ta begi unu a 'Jesosi', Keesitu kamian taa gaantang, un ko fii ku Gadu baka e, dee sëmbë.

²¹ Biga fa Masa Jesosi sai dë, hën da di kaba limbohata Sëmbë u mundu di an du hogi wan daka. Ma nöö Gadu tei hii dee hogi du u libisëmbë tuu lai nëen liba te a ko dë hogi sösö a Gadu wojo. Nöö fa a du ën dë, a du ën fu te u ku Masa Jesosi ko dë wan, nöö Gadu o luku u kuma bumbuu sëmbë fëen hedi.

6

Aki Paulosu ta bai de fu de an musu lasi di bunu Gadu kë da de.

¹ Wë nöö dee sëmbë, fu di u ku Gadu ta wooko makandi, nöö u kë begi unu a wan soni e. Wan si fa Gadu kai unu ku ën bunuhati tefa un ko nëen naandë nõ? Wë nöö wan musu lasi di bunu di a kai unu fuun feni nëen e.

² Wan jei fa Gadu seei taki nõ? A taa:

Di juu un kai mi dë, nöö mi jei,
biga wë un bi kai mi a di leti juu.

Nöö hën mi piki, hën mi tja heepi ko da unu.

Söö. Wan jei fa a taki ö? Nöö fa u dë aki, nöö a di leti juu u dë aki. Biga a di juu aki Gadu ta puu sëmbë a hogi basu eti.

Aki Paulosu ta konda kumafa a ta biinga tjika u sëmbë musu feni di bunu u Gadu.

³ Wë nöö hën mbei u ta kõni seei, dee sëmbë, fu wa musu buta na wan sitonu a pasi da sëmbë u de naki futu kai, te de lasi di bunu Gadu kë u de musu feni nëen. Nöö u ta kõni tu, u sëmbë an musu feni wan sondi a u fu de kosi u taa wa ta du di wooko bunu.

⁴ Ma u ta biinga a hii futu seei u sēmbē si taa u dē futuboi u Gadu tuutuu. Hii fa fuka ku sōmēni gaan sitaafu ta miti u, ma u ta hoi gaan pasensi ta tja pena seei.

⁵ So juu de ta foo u. So juu de ta sōtō u a dunguwosu. So juu de ta booko seei gbululu ko a u liba. So juu u ta wooko gaan hebi wooko te na a ndeti seei u ta duumi. So juu u ta tja hangī tee, biga soni an dē fuu njan.

⁶ Ma nōō hii fa dee soni ta miti u seei, ma u ta libi ku limbohati. U ta mbei mōiti fuu fusutan soni u Gadu finifini. U ta hoi pasensi da sēmbē ta a' tjalihati da de. Sō u buta u seei a di Akaa u Gadu leiki tjika. U ta lobi hii sēmbē sōndō ganjan.

⁷ Nōō u ta konda di Buka u Gadu leti kumafa a dē, biga wē di kaakiti u Gadu hēn ta dē ku u. Ee u ta konda di Buka, ee u ta piki dee sēmbē ta fia ku u seei, ma u ta libi a wan leti fasi. Hēn da di fetilai fuu kaa.

⁸ Ee sēmbē ta gafa u, ee sēmbē ta da u sen, ee de taa u ta libi bunu, ee de taa u ta libi hogi, ee de taa u ta ganjan sēmbē, ma wa ta libi ku ganjan mōōnsō.

⁹ Ee libisēmbē an kē kai u soni, ma Gadu hēn a ta kai u gaan soni kaa. Sēmbē ta da u sitaafu te a bigi, ma tōkuseei di sitaafu an ta kii u.

¹⁰ U ta dē ku tjali, ma seei u ta wai. U dē kuma penama, ma u ta mbei hia sēmbē ko guduma a Gadu fasi. U dē kuma sēmbē di aan na wan wojo soni a mundu e, ma tōku hii dee soni u goonliba tuu ta dē a u maun.

¹¹ Dee sēmbē u Kolenti naandē, un haika o. Fa u ta fan ku unu aki, nōō u ta jabi hati fuu da unu.

¹² Wa ta tjubi bēē da unu wan pikiwan seei, dee sēmbē. Ma nōō unu, wan dē sō e. Un ta tjubi bēē da u.

¹³ Wē nōō hēn di soni dē mbei mi ta fan ku unu kumafa wan tata ta fan ku ēn mii, taa be un hopo unu hati da u baa, leti kumafa u ta hopo di fuu da unu.

Aki Paulosu ta konda fa wan biibima an musu dē wan ku wan sēmbē di an ta biibi.

¹⁴ Nōō un dee sēmbē ta biibi Gadu dē, un haika e. Wan musu fiti buka ku dee sēmbē na ta biibi Gadu, fu un tai unu seei a wan bondji e. Kwetikweti. Biga wan sēmbē di ta libi bunu a Gadu wojo ku wan sēmbē di an ta libi bunu a Gadu wojo, unfa de o sa fi ku deseei? Luku fa dungu ku limbo sai dē, de an sa mōkisi mōōnsō. Goonliba an mbei sō.

¹⁵ Nōō unfa un ta pakisei, dee sēmbē? Fa „Jesosi, Keesitu sai dē, hēn ku didibi sa fiti buka makandi nō? Wē nōō unfa a waka di sēmbē di ta biibi ku di sēmbē di an ta biibi sa tai deseei a wan? Nōnō, an musu dē sō e.

¹⁶ Di wosu u dee pindigadu ku di Wosu u Masa Gadu an o sa mōkisi mōōnsō. Nōō di sinkii fuu i si aki, hēn da di tan kamian u di libilibi Gadu e.

Ja jei fa a bi taki nō? A taa:

Mi o libi a dee sēmbē u mi dendu,
mi o ta waka a de mindi.

Mi o dē di Gadu u de, nōō de o dē sēmbē u mi.

¹⁷ Sō Masa taki e. Nōō hēn a toona taki mōōn taa:

Fēēn mbei un musu hai kumutu a dee oto sēmbē dendu.

Un musu buta unu seepi apaiti da mi.

Wan musu nama ku na wan soni di an dē limbolimbo e.

Nōō te un libi sō kaa,

nōō mi o tei unu ku wai seei.

¹⁸ Mi o dē unu Tata,

nōō unu o dē womi mii ku mujēē mii u mi.

Sō Masa Gadu taki e, di Gadu di abi hii kaakiti a mundu.

7

1 Wë nõo un dee lobi sëmbë fuu naandë, di u kisi dee paamusu u Gadu dë kaa, nõo un boo disa dee soni dee ta poi u hati ku dee ta poi u sinkii e. Un boo ta fëëë Gadu te u ta libi apaiti dëën gbelingbelin söndö föutu.

Aki Paulosu ta konda kumafa a ta wai ku dee sëmbë tjika.

2 Dee sëmbë o, u toona begi unu möön taa gaantangi, be un hopo unu hati da u baa. Biga fa i si u bi ko libi ku unu naandë, nõo wa bi du hogihogi ku na wan kodo sëmbë a unu naandë e. Wa bi poi na wan sëmbë libi nõo wa ganjan na wan sëmbë fuu njan soni fëën tu.

3 Söö. Nõo fa mi ta fan aki, nõo an dë taa mi ta fan kuma mi ta da unu föutu e. Nönö, na sö mi ta mëni ën. Biga wë mi bi taki da unu kaa taa mi lobi unu tee ee ku libi ee ku dëdë seei, ma mi ku unu dë a wan së.

4 Nõo u ta futoou unu gaanfa e, dee sëmbë. U ta njan buka da unu. Hii fa mi dë a sitaafu ta tja pena aki, ma töku mi ta wai ku unu. Un ta da mi hati seei.

5 Biga un sabi taa fa u bi ko dou a Masadonia aki, nõo wa bi dë bööböö. Hiniwan juu sëmbë bi ta suku u a toobi ta buja ku u, nõo hati fuu bi ta dë fëëfëë.

6 Ma nõo Gadu, di ta da dee lasihati sëmbë hati, nõo a da u hati e baa. Aai. Biga a mbei Titusi kumutu a unu ala ko dou a u aki,

7 nõo u ko ta wai seei. Ma na fu di u si ën wanwan e, ma fu dee soni fuunu a konda da u. Biga a konda da u kumafa un bi dëën degihati tjika, nõo a konda da u tu kumafa un lobi u. Un ta hangü u ta këë pena fuu hedi seei. Nõo hën mbei mi ko ta wai gaanfa e, dee sëmbë.

8 Fa i si mi bi mbei di fosu pampia manda da unu naandë, nõo a ko hati mi seei a baka biga mi sabi taa a o hati unu. Ma fa u dë aki an hati mi möön e.

9 Mi ko ta wai seei. Ma na u di di biifi hati unu mbei mi ta wai e, ma fu di tjali kisi unu fu dee hogi du fuunu hedi, leti kumafa Gadu bi kë. Biga un bia ko ta buta hii soni fuunu tololoo a tatai liba.

Hën mbei un musu si taa na hogi u du ku unu möönsö.

10 Biga te wan sëmbë ta tjali kumafa Gadu kë kaa, nõo a ta heepi ën faa biëën libi kumutu a hogilibi basu. Nõo di soni dë na soni u bai sabisö da. Ma ee wan sëmbë ta tjali kumafa dee sëmbë an ta biibi Gadu ta tjali, nõo di dë an ta tja heepi ko dëën möönsö. Lasi nõo a ta tja ko, biga möönmöön a ta tjëën go möön longi ku Gadu.

11 Wë nõo fa i si a dë taa di biifi hati unu kumafa Gadu kë naandë, nõo hën wë mbei un ko ta mbei möiti seei fuun libi bunu nëën wojo awaa. Biga un ko si hogi u di soni di pasa a unu mindi naandë te un tei hatiboonu seei. Un ko panta te un ta biinga a hii fasi fuun puu di föutu dë a unu liba. Söseei un ko ta hangü mi tu fu mi ku unu musu ko fi baka.

12 Ma nõo fa mi mbei di pampia manda da unu naandë, dee sëmbë, nõo ma mandëën fu di sëmbë di du di hogi dë nõo hedi e. Söseei ma mandëën tu fu di sëmbë di a du di hogi ku ën dë. Mi bi kë dee soni dë bi musu seeka tuú, ma na de da di mama u di biifi. Ma mi mandëën da unu be unu seei si taa un ta kai u gaan soni, te un ta piki u buka a soni, kumafa Gadu kë.

13 Nõo hën mbei hati fuu ko kötö, dee sëmbë.

Ma na di dë wanwan mbei u toona kisi hati baka e. Ma fa Titusi toona ko a u aki nõo a ko ku wai seei, nõo hën mbei u seei toona wai möön. Aai. Biga di a bi pakisei u ko a unu ala, nõo an bi sabi unfa soni bi o waka. Ma nõo di a ko si fa un kisi ën hoi ku wai tjika dë, nõo hati fëën toona ko kötö. Böö fëën kisi goon awaa.

¹⁴ Biga wë hii dee bunu soni fuunu dee u bi konda dëen, nöö wan da u sen a de. De tuu a si tuú. Wa ganjëen leti kumafa wa ta ganjan unu tu.

¹⁵ Nöö fa un libi ku ën naandë, nöö hën mbei di lobi fuunu ko möön taanga nëen hati e. Biga wë hiniwan juu a ta pakisei unu kumafa un bi kisi ën hoi ku wai naandë, hii fa un bi dë pantapanta taa kandë a o gandji da unu. A ta mëni di fa un bi haikëen ta tei lai nëen. Nöö hën wë i si a ko ta wai sô ku unu e.

¹⁶ Nöö sôseei u seei ta wai tu baa. Biga u ko si taa u sa futoou unu seei sabi taa woon piki u buka a hii soni.

8

Aki Paulosu ta taki soni fu wan

möni de kë manda da dee

biibima a Jelusalen

¹ Söö. Wë nöö, dee sëmbë fuu naandë, u kë taki wan soni fu dee biibima u Masadonia aki da unu. Wë biga fa dee sëmbë dë aki, nöö Gadu heepi de seei ku ën bunuhati e.

² Sömëni gaangaan tesi ta miti de aki, ma töku de ta wai tee na soni. Aluwasi fa de pena seei, ma de ta feni soni ta da sëmbë te a hia.

³ Nöö fa u dë aki, nöö de pii möni zunta te de kaba kaa u de heepi dee biibima a Jelusalen ala. Nöö fa de du ën dë, nöö de du ën te pasa maaka e. An dë taa sëmbë hën musu de, ma deseei hati pakisei ën sô.

⁴ Nöö hën de ko begi u gaanfa taa be u tei di möni u de mökisi ku di u dee otowan, be deseei dë a dendu u di piizii dë tu u de heepi dee sëmbë.

⁵ Ma nöö de du ën pasa möön fa u bi mëni seei. Biga de hopo deseei da Masa te de kaba, hën de toona hopo de seei da u tu kumafa Gadu kë.

⁶ Nöö hën mbei u begi Titusi taa be a toona ko a unu ala, faa sa go dou ku di bumbuu wooko u di möni soni aki di hënseei bi seti ku unu naandë kaa.

⁷ Biga fa un sai dë, un dë a fesi gaanfa kaa a hii soni. A di së u biibi un dë a fesi, sôseei un dë a fesi a di së u sabi dee soni u Gadu ku di fa un ta konda de da sëmbë tu. Un dë fajafaja a di wooko u Gadu hiniwanten, nöö un dë a fesi a di fa un ta lobi u. Wë nöö hën wë mbei mi taki da unu taa be un dë a fesi a di pisi u di libi aki tu, fuun heepi dee otowan fuu a di möni soni u ta taki aki.

⁸ Ma nöö fa mi ta fan aki, an dë taa mi ta duwengi unu e. Nönö. Ma mi kë fuun sabi fa dee oto keiki du kaa, be mi si fa woon du fu mi sa sabi fa di lobi fuunu dë.

⁹ Biga wë un sabi di bunuhati fasi u Jesosi Keesitu u Masa. A bi dë wan gaan guduma nëen köndë ala, ma fuunu hedi a ko libi kuma penama seei a di goonliba aki, be un feni dee gudu a abi tu.

¹⁰ Wë nöö mi kë da unu wan lai aki, dee sëmbë, biga mi si taa hën da di möön bunu soni fuun du. Biga unu fosu wë bi mëni u pii di möni aki, nöö hën a di jaa pasa dë un bi seti pii ën tu.

¹¹ Nöö mi taki da unu taa fa i si un seti ën ku wai dë, nöö sô fuun tjëen go dou e.

¹² Nöö mi taki e, be hiniwan sëmbë musu da kumafa a sa da dou. Biga wë ee wan sëmbë i kë da sëmbë soni, nöö an dë a di fa di soni hia ma fu di i kë da. Ja o da wan soni di ja abi ma joo da di i abi, nöö Gadu o si taa a bunu kaa.

¹³ Söö. Wë nöö fa mi ta fan aki, ma ta mëni ën sô taa fii puu dee otowan a fuka nöö i ko dë da pena ta kii e. Nönö, na sô mi ta mëni, ma fuun musu dë makandi.

14 Biga wë di un abi hia a di mindi aki, nöö be un heepi dee otowan fu de sa abi tu. A kandë te unu seei abi soni fanöudu a bakaten nöö de o sa heepi unu tu, nöö woon dë makandi.

15 A o dë kumafa de bi sikifi buta a Gadu Buku taa: „Fa dee sëmbë bi go pii di njanjan Gadu bi da de de ta kai “mana” naandë, nöö,„
dee sëmbë dee bi pii hia
ku dee sëmbë dee bi pii biti,
oto an bi abi möön oto.
Ma hiniwan sëmbë bi feni kumafa a dë fanöudu.

Aki Paulosu ta konda kumafa

sëmbë o ko a dee Kolenti

sëmbë naandë.

16 Söö. Wë nöö mi da Gadu tangi möön fu di a buta di wan seei fii da unu a Titusi hati kumafa miseei ta fii da unu tu.

17 Nöö fa mi begi ën faa toona ko a unu naandë, nöö a dë seei waiwai faa ko e, fu di hënseei bi kë ko kaa.

18 Nöö u begi wan oto womi aki faa tjëen ko. Nöö di womi aki, a dë wan sëmbë di hii dee biibima tuu ta kai ën bunu në seei a di fa a ta biinga ku di Buka u Masa Jesosi fu hii sëmbë musu jei ën.

19 Ma nöö na di dë nöö, ma fa woo tja di möni go da dee sëmbë „a Jelusalen,„ ala, nöö dee biibima aki seei begi di sëmbë aki faa musu tja u go ala tu. Nöö te u go sö, nöö a o tja nëbai da Masa e, nöö sëmbë o si tu kumafa u kë heepi dee sëmbë tjika.

20 Wë nöö a di lö fasi aki u kë u di möni musu tja tu e, u sëmbë an musu taki taa wa ta tjëen bunu. Biga di möni na biti möni, a hia.

21 Fëen mbei u ta kõni fu hii soni musu waka a tatai liba, na a Masa Gadu wojo wanwan nöö e, ma te dou a libisëmbë wojo seei tu.

22 Ma nöö u toona begi wan oto sëmbë fuu aki möön faa musu waka ku de Titusi ko a unu ala. Nöö di womi aki tu, u ta gafëen taa a dë wan bumbuu sëmbë. Biga fa u ku ën libi makandi aki, nöö hiniwan juu a ta dë waiwai faa heepi u a di wooko u Gadu. Nöö hën seei ta wai seei taa a sa tja de go, biga a abi gaan futoou fuunu e, dee sëmbë.

23 Wë nöö fa i si Titusi o ko a unu naandë, nöö un bi sabi ambë dëen kaa. Biga mi ku ën, sö u ta waka ta du di wooko u Gadu makandi. Fa mi bi ta biinga ku unu naandë, nöö hën wë bi ta heepi mi e.

Nöö dee womi woon si ko ku ën naandë, nöö de ko a dee sëmbë u dee keiki aki kamian. Nöö de dë bumbuu sëmbë e. „Masa Jesosi,„ Keesitu ta feni nëbai a de.

24 Nöö un musu mbei de si taa un lobi de e, dee sëmbë. Nöö deseeri o si taa fa u bi ta gafa unu da de aki, nöö wa bi ganjan de, nöö hii dee sëmbë dee dë a dee oto keiki tuu o ko sabi sö tu.

9

Aki Paulosu ta konda da de fa fu de musu da di möni ku pizii.

1 Wë dee sëmbë, mi si kuma an dë fanöudu fu mi musu sikifi da unu go möön longi a di fa un musu heepi dee oto biibima kuma unu seei. Nönö.

2 Biga mi si taa un dë kabakaba kaa fuun du ën waiwai. Nöö fa i si mi dë a Masadonia aki, nöö mi njan buka da unu taa un dee sëmbë fu di pisiwata fu Akaja ala, a di jaa di pasa naandë nöö unu bi dë kabakaba kaa fuun pii möni zunta „fuun heepi dee biibima u Jelusalen,„. Sö mi njan buka da unu aki. Nöö

fa mi fan dē, nōö a weki sōmēni otowan hati te de hopo ta pii mōni ta zunta fu de djeesi unu e.

³⁻⁴ Nōö fu di mi bi taki sō fuunu aki kaa, nōö fēen mbei mi ta manda dee sēmbē aki ko a unu, fuun seeka di mōni di un pii naandē buta kabakaba. Nōö ee sēmbē u Masadonia kumutu aki ko ku mi a unu ala, nōö de o si taa di soni fuunu mi bi ta taki da de dē, sō a dē tuu. Biga ee nasō, dee sēmbē, nōö woon kisi sen e. Nōö mi seepi o kisi sen tu u di fa mi bi futoou unu tjika.

⁵ Nōö hēn mbei mi si taa a bunu fu mi manda dee sēmbē aki waka a mi fesi ko a unu ala, be de ko seeka di mōni di un bi paamusi naandē.

Nōö a sō wan fasi sēmbē o si taa di soni un ta da dee sēmbē, nōö a dē wan peesenti di un ta da waiwai ku piizii. An o dē kuma wan soni un ta du ku duwengi.

⁶ Nōö wan jei fa de bi koti wan nōngō nō, dee sēmbē, taa: “Piki goon, piki suwa njanjan, gaan goon, gaan suwa njanjan.” Nōö sō a dē tuu.

⁷ Nōö fēen mbei mi taa ee wan sēmbē o da, nōö be a da ku piizii nēen hati, ma na ku guunjan kuma sēmbē duwengi ēn. Biga di sēmbē di ta da soni ku wai nēen hati, hēn Gadu ta lobi.

⁸ Nōö mi taki da unu taa te un du sō kaa, nōö Gadu abi kaakiti te tjika faa da unu soni ku ēn bunuhati te a hia, fii puu i seei a hii fuka nōö i toona heepi oto sēmbē tu.

⁹ Ja sabi fa Gadu Buku taki nō? A taa: Di sēmbē di ta paaja bunu da dee pootima, nōö di bunu nē fēen o fika de ta kai nōömō. Biga a bi libi bunu kumafa Gadu kē.

¹⁰ Nōö Masa Gadu di ta da di goonma bōngō faa paandi ku di njanjan di di bōngō ta puu tuu, hēn o da unu soni te a hia pasa maaka e, dee sēmbē. Nōö a o mbei dee bunu du fuunu ko hia nango mōönmōön tu.

¹¹ A o mbei i ko guduma a hii futu fu hiniwan juu i sa ta wooko hiniwan bunu wooko di dē fanōudu u du. Nōö dee bunu wooko i ta du dē o tja gafa ko da Gadu tu.

¹² Biga wē fa i si woon manda di mōni go da dee biibima a Jelusalen dē, nōö an o dē taa a fuka wanwan nōö woon puu de e, ma a o mbei dee sēmbē gafa Gadu dēen tangi seei.

¹³ Biga de o ko si taa na taki nōö un ta taki ku buka taa un ta piki di Buka u „Masa Jesosi,” Keesitu, ma de o si taa a dē sō a unu libi tu. Biga fa de o si di heepi un manda da de naandē, nōö de o da Gadu tangi seei fu di un ta piki ēn buka ta heepi de ku oto sēmbē tu.

¹⁴ Nōö de o ta begi da unu seei ku gaan lobi, fu di de si fa di bunuhati u Gadu wooko a unu tjika dē.

¹⁵ Wē andi u sa taki mōön, dee sēmbē, mōön leki gaantangi u Gadu fu di a manda Masa Jesosi kuma wan gaan gudu ko da u. A bigi tee buka an tjika u sa taki ēn, dee sēmbē.

10

Aki Paulosu ta toona taki mōön

kumafa a dē tjabukama

u Masa Jesosi tjika.

¹⁻² Wē dee sēmbē, „awaa mi toona ko a unu mōön a di toobi u mi ku unu, ku dee sēmbē dee ko a unu mindi dē.” Wē nōö mi, Paulosu, ta tei di saapihati fasi u „Masa Jesosi,” Keesitu ta fan ku unu kumafa hēnseei ta fan ku sēmbē. Mi

manda begi unu gaantangi taa, be un disa u piki dee sɛmbɛ buka dee ta poi mi da unu naandɛ e, fu te mi ko ala nɔɔ an o dɛ u mi musu fan ku unu ku hatiboonu.

Biga mi jei taa so sɛmbɛ dɛ a unu ala ta kosi mi taa te mi dɛ a unu mindi nɔɔ mi ta dɛ fɛɛfɛɛ, ma te ma dɛ a unu mindi mɔɔn nɔɔ mi ta abi degihati seei ta mbei biifi ta fan gaangaan fan a unu liba.

Fa dee lɔ sɛmbɛ ta fan dɛ, nɔɔ de ta mɛni u a libisɛmbɛ fasi nɔɔ a kaba, ma na sɔ u dɛ e.

³ A dɛ sɔ taa u dɛ a di goonliba aki tuu, ma tɔku wa ta feti ku dee felantima fuu kumafa sɛmbɛ u di goonliba aki ta feti ku deseei.

⁴ Biga dee fetilai dee u ta tei tja go a feti, nɔɔ de an dɛ soni u di goonliba aki. Nɔnɔ. Ma a Gadu de kumutu, nɔɔ de abi kaakiti tjika u ta booko dee gaan taanga kaakiti u didibi tuu faa kaba a sɔsɔ.

⁵ Ku de u ta poi hii dee sɔsɔ fia ku dee gaan heihei sabi dee sɛmbɛ ta tei ta tja ku o puu sɛmbɛ a pasi fu de an sabi Gadu kumafa a dɛ. Nɔɔ u ta booko hiniwan poipoi pakisei, be sɛmbɛ ko si taa na bumbuu soni a dɛ, be de disɛɛn nɔɔ de ko piki Masa Jesosi buka nɔɔ.

⁶ Nɔɔ fa i si woo ko a unu naandɛ, nɔɔ te un ko ta piki Gadu buka a wan bunu fasi kaa, nɔɔ woo dɛ kabakaba u da dee oto sɛmbɛ sitaafu awaa.

⁷ Wɛ nɔɔ dee sɛmbɛ, fa u ta taki di toobi u mi ku unu aki, nɔɔ un wegɛ di soni luku bunu e. Biga ee wan sɛmbɛ a unu mindi naandɛ ta taki taa a dɛ tjabukama, u Keesitu, nɔɔ a musu mɛni ɛn seei, biga u seei da tjabukama, fɛɛn tu.

⁸ Ee mi ta taki ɛn pasa seei fa u abi taki a unu liba tjika, ma tɔku sen an o kisi mi e. Biga Masa da u taki a unu liba tuú. Ma na fuu booko unu saka, ma fuu heepi unu.

⁹ Nɔɔ fa u ta mbei dee pampia ta manda da unu aki, nɔɔ wa ta manda de fu de panta unu e. Nɔnɔ.

¹⁰ Ma fu di u jei taa sɛmbɛ sai naandɛ ta taki taa: “Dee fan a dee pampia fɛɛn ta hebi tumusi te de ta panta sɛmbɛ. Ma te hɛn seepi ko a u aki, nɔɔ an dɛ wan wojo soni nɔɔ dee fan fɛɛn an ta a’ goma tu.” Sɔ u jei de ta taki.

¹¹ Ma nɔɔ mi kɛ sɔ wan sɛmbɛ musu sabi taa fa dee fan fuu hebi a dee pampia fuu, leti sɔ nɔɔ woo dɛ a unu mindi tu e, te u ko.

¹² Sɔɔ. Ma nɔɔ fa i si u taki naandɛ seei, ma wan fɛɛɛ e, dee sɛmbɛ. Biga wa a’ hati tjika u tja u seei go maaka ku dee heihei sɛmbɛ dee ta buta deseei a fesi naandɛ e. Dee sɛmbɛ dɛ ta maaka de seepi ku de na de te de kaba, nɔɔ de ta si deseei u gaan bumbuu sɛmbɛ. Ma di lɔ maaka naandɛ, a dɛ donma soni e.

¹³⁻¹⁴ Ma fuu seei, nɔɔ wa o njan buka djombo pasa di maaka di Gadu buta da u fuu wooko. Nɔɔ fa u bi ko a unu ala nɔɔ wa bi djombo pasɛɛn tu. Biga Gadu manda u tuú fuu tja di Bunu Buka u Masa Jesosi Keesitu ko konda da sɛmbɛ. Nɔɔ ee u njan buka a unu liba nɔɔ antoobi, biga unu seei bi dɛ wan pisi u di wooko fuu tu.

¹⁵ Fa u ta fan aki, wa o go suku u njan buka a wan oto sɛmbɛ wooko liba e. Nɔnɔ. Ma u ta suku nɔɔ u di biibi fuunu musu gɔɔ ko soni. U ta kɛ fu di wooko u wooko a unu mindi naandɛ musu ko wan bumbuu soni, fuu sa disa unu go a oto sɛmbɛ tu.

¹⁶ Biga u abi di mɛni fuu tja di Bunu Buka u Masa Jesosi go paaja te a dee oto kɔndɛ tu. Ma na ka oto sɛmbɛ bi go konda di Buka kaa e, be an dɛ taa u go ta njan buka a di wooko di wan oto sɛmbɛ bi wooko kaa.

¹⁷ Biga u kɛ faa dɛ leti kumafa de bi sikifi buta a Gadu Buku taa: Ee wan sɛmbɛ kɛ njan buka a wan soni,

nöö be a njan buka da Masa
 a di soni di a wooko nëen liba.

¹⁸ Biga wë ee wan sëmbë luku ën seei te a kaba si taa a bumbuu, nöo an dë bumbuu sëmbë eti e. Ma di sëmbë di Masa luku te a kaba feni taa a bumbuu, nöo di sëmbë dë hën da bumbuu sëmbë tuu.

11

Aki Paulosu ta taki soni möön u dee ganjansëmbëma dee ko a dee Kolenti sëmbë naandë.

¹ Söö. Wë nöo dee sëmbë, mi begi unu, be un hoi pasensi abiti sö möön longi, fuun haika wanlô wisiwasi fan mi o fan aki.

² Wë biga mi ta djalusu da unu leti kumafa Gadu seei ta djalusu da unu. Mi ta watji unu kumafa wan tata ta watji wan mujëe mii fëen di wan womi ta kiija, faa musu göö bunu dëen. Biga sö nöo mi paamusi unu da „Jesosi,” Keesitu, fu te di daka dou nöo mi sa buta unu nëen fesi limbolimbo söndö föutu.

³ Ma nöo mi ta fëëe da unu o. Biga a kandë sëmbë sa ko ganjan unu fu wan waka a „Masa Jesosi,” Keesitu baka ku limbo hati möön, leti kumafa i si di sindeki bi go ganjan Eva a di djai ku dee bödjëe fan fëen.

⁴ Biga fa un sai naandë, nöo misikuma te wan oto sëmbë ko a unu naandë ko ta mindi soni da Masa Jesosi te an ta djei di Jesosi di mi bi konda da unu dë möön, tökuseei wan ta fia ku ën jakëen puu dë. Söseei ee wan sëmbë ko ta mindi soni da di Akaa u Gadu te an ta djei di Akaa u Gadu di bi dë a unu kaa, nöo woon piki. Ee nasö, ee wan sëmbë tja wan oto buka ko ta konda da unu ta mindi soni tee an djei di Bunu Buka u Gadu di mi bi konda da unu naandë möön, nöo wan o jakëen. Wë dee sëmbë, a bigi a mi da unu o.

⁵ Biga misikuma ma dë möön lagi möön leki dee sëmbë dee ta buta deseei kuma gaan tjabukama naandë e, te de ta kai deseei apösutu tu.

⁶ Fa mi dë aki, nöo ma lei fa u fan tuu, ma töku sabi an pena mi e. Biga te mi ta fan, mi saandi mi ta taki. Unu seei sabi sö tu a hii futu, biga a unu mindi naandë mi bi libi.

⁷ Dee sëmbë o, kumafa u ta taki dee soni aki, na unsë seei un si mi a' föutu a unu baa? A sa kë taa fa mi bi ta wooko ta heepi mi seei fu mi sa konda di Buka u Masa Gadu da unu söndö mi tei möni a unu nö? Fa mi bi lagi miseei fu mi sa hei unu dë, hën da di föutu di mi mbei a unu mindi nö, dee sëmbë?

⁸ Biga a dë sö tuu taa ee i luku ën te i kaba, nöo a djei kuma mi fufuu dee oto keiki u mi heepi unu. Biga de wë bi ta sölugu mi ku dee soni mi abi fanöudu, hii fa unu mi bi ta heepi.

⁹ Ee mi bi abi wan soni fanöudu, nöo ma bi ta toobi unu ku ën e. Nönö. Ma dee biibima dee bi kumutu a Masadonia ko a mi dë, nöo de bi tja dee soni mi bi abi fanöudu ko da mi. Sö mi bi ta hoi mi seei a hii futu fu ma musu tuwë dee hebi u mi a unu liba. Nöö mi taki da unu taa sö nöo mi o ta libi ku unu nango nöömö tu.

¹⁰ Nöö sö mi o ta njan buka nango nöömö tu, „taa ma ta konda di Buka u Gadu fu mi feni njan a unu hedi.” Biga fa mi ku Keesitu nama aki, nöo leti fa a ta taki tuutuu soni söndö tooka töngö, nöo söseei mi ta fan aki söndö tooka töngö tu e. Nöö na wan sëmbë dë a di pisiwata fuunu ala o tapa mi a di soni mi ta njan buka aki möönsö.

¹¹ Nöö fa mi ta fan aki, dee sëmbë, nöo un ta si kuma ma lobi unu mbei nö? Nönö e. Biga Gadu sabi tuutuu taa mi lobi unu seei.

12 Söö. Ma nöö fa mi ta du aki un saandi mi ta du nö? Mi ta tapa pasi da dee sëmbë fu de an sa njan buka taa mi ku de dë pei ku pei a di wooko u Gadu. Nöö sö mi o ta du ën nango nöömö tu.

13 Biga wë dee lö pei sëmbë dë ta mbei taa de seei dë tjabukama u Masa Jesosi Keesitu kuma u dee apösutu, ma na Masa Jesosi hën manda de e. Ganjan de ta ganjan sëmbë.

14 Ma nöö fa de ta du dë, an dë gaan soni da mi tu. Biga fa didibi sai dë, nöö so juu a ta tooka seei ko dë dililii kuma wan basia u Masa Gadu Köndë, ta mbei taa a ta limbo sëmbë wojo.

15 Wë nöö andi wë? Ee dee futuboi fëen ta buta deseei kuma de dë bunulibima, nöö an dë wan foondo soni. Biga wan futuboi musu djeesi ën masa. Ma kaba u de o dë a di paima di de o kisi leti kumafa a fiti di wooko u de.

Aki Paulosu ta konda dee soni

dee ta miti ën a di tja

u di Buka baka.

16 Wë nöö dee sëmbë, mi taki da unu möön e, taa wan musu mëni taa fusutan u mi poi, fa mi ta njan buka da miseei aki. Ma ee un si sö seei ma un haika mi nöö, leti kumafa un ta haika te wan siki-a-hedima ta fan.

17 Nöö di soni mi o fan aki an dë taa Masa manda mi e. Nönö. Ma a dë wan gaan wisiwasi fan nöö, di mi o fan fu di mi sabi taa mi abi leti u miseei ta njan buka tu.

18 Biga sëmëni sëmbë dë a unu mindi naandë ta njan buka a soni u di goonliba aki ta hopo deseei buta u sëmbë si kumafa de bumbuu tjika. Nöö misikuma miseei sa njan buka sö tu.

19 Biga wë fa un sai dë, un lobi u haika di fan u dee wisiwasima kaa. Wë di un köni sö, nöö misikuma un sa haika miseei tu kumafa un ta haika dee otowan.

20 Biga fa un sai dë, ee sëmbë buta unu a katibo, wan a' toobi. Ee sëmbë ta njan möni fuunu, wan a' toobi. Ee wan sëmbë kisi unu buta nëen basu, nöö wan ta a' toobi. Ee sëmbë ta hopo ën seei buta a unu liba ta lagi unu ta wisiwasi unu, wan a' toobi. Ee de naki unu a bandja jesi seei, an dë gaan soni a unu. Biga sö dee sëmbë dë ta libi ku unu kaa.

21 Ma fu mi aki, a dë wan gaan sen soni da mi e, baa. Biga wë mii bi sösö tee ma bi libi ku unu a dee lö fasi dë.

Ma nöö ee wan sëmbë a' hati u njan buka a wan soni liba, nöö miseei a' hati u njan buka da soni tu.

Söö. Nöö mi o taki wanlö soni aki da unu möön kuma wisiwasima e, ma sö nöö mi o taki.

22 Biga ee wan sëmbë ta njan buka taa a dë lalalala Dju fu di dee Dju sëmbë dë apaiti sëmbë u Gadu, nöö miseei sa njan buka sö tu. Ee de taa de dë bakamii u Abahamu, nöö miseei dë sö tu. Ee de taa de dë Isaëli sëmbë, nöö miseei tu.

23 Ee de taa de dë futuboi u Jesosi, Keesitu, mi bi pasa de gaanfa a di soni dë.

Nöö fa mi ta fan aki mi ta fan leti kuma wan wisiwasima, ma mi o ta taki ën te go dou. Biga mi biinga da Masa Jesosi möön gaanfa möön leki dee ganjanma a unu mindi naandë e. Biga sëmëni pasi mi bi dë sötösöötö a dunguwosu fu Masa Jesosi hedi. Sëmëni toon mi bi kisi wipi fëen hedi tu. Sëmëni pasi mi ku dëdë bi miti fesi ku fesi. A hii dee soni dë tuu mi pasa dee sëmbë dë gaanduwe kaa.

²⁴ Feifi pasi dee Dju sëmbë u mi fon mi ku wipi. Hiniwan pasi fon de ta da mi diiteni-ku-nëigi wipi.

²⁵ Dii pasi de fon mi ku pau. Wan pasi de naki mi ku sitonu, te de ninga taa mi dëdë. Dii pasi sipi booko disa mi a ze mindi. Wan u de mi bi dë wan hii ndeti ku wan hii didia a zengezege a liba wata ta tja fuka.

²⁶ Fa mi dë aki, ma ta dë a wan kamian. Hii juu mi nango a kamian ta ko kodo. Nöo fa mi ta waka ta lontu aki, sëmëni pasi gaan wata bi dë fa u tja mi go kii. Sëmëni toon mi bi musu waka ka fufuuma ta watji sëmbë u de kisi. Mi bi ta dë a gaan nöutu a dee sëmbë u miseei köndë maun, te kisi ku dee oto köndë sëmbë maun tu. Mi bi dë a nöutu a ganda mindi. Mi bi dë a nöutu a sabana dendu. Mi bi dë a nöutu a wata liba. Mi bi dë a nöutu a dee sëmbë dee ta ganjan taa de dë biibima maun.

²⁷ Mi ta biinga ta wooko taanga tee so juu ma ta duumi a ndeti seei. So juu mi ta tja hangii tee na soni. So juu na wata seei mi ta feni u mi bebe tu. So juu ma ta a' soni u njan. So juu mi ta tja kötö tee, biga soni an dë u mi tapa sinkii.

²⁸ Ma nöo boiti u dee döösë soni naandë, hiniwan juu mi ta tja di hebi u dee biibima a dee kamiankamian a mi hati.

²⁹ Biga wë ee wan sëmbë dë suwakisuwaki a di biibi, nöo mi seei ta suwaki tu. Ee wan biibima kai, nöo mi ta tja di hebi fëen, biga hati u mi ta boonu ku di soni mbei a kai dë.

³⁰ Wë nöo fëen mbei ee mi musu ta njan buka a soni, nöo a dee lö soni dee miti mi dë, dee ta mbei mi lagi a sëmbë wojo naandë, nöo a de nöo mi sa njan buka.

³¹ Nöo Masa Gadu, di Tata u Masa Jesosi Keesitu di musu kisi gafa u teego, hën sabi taa fa mi ta fan aki, na soni mi ta mindi e, dee sëmbë. Tuutuu soni mi ta taki.

³² Biga di mi bi dë a di köndë de kai Damasikusi naandë, nöo di hedima di di könu de kai Aletasi bi buta dë, a manda wanlö sodati u de lontu mi watji kisi.

³³ Ma nöo hën dee biibima naandë fusi mi. De buta mi a wan manda dendu hën de saka mi go a goon a döösë u di sitonu peni u di köndë. A sô wan lagi fasi mi kumutu a dee felantima u mi maun.

Nöo sô soni bi waka ku mi, dee sëmbë. Nöo a dee lö soni dë nöo mi sa njan buka e.

12

Aki Paulosu ta konda da de fa Gadu bi lei ën tjubitjubi soni.

¹ Wë nöo dee sëmbë, leti kumafa i si mi taki da unu naandë kaa taa ee mi ta njan buka, nöo an o heepi mi a wan wojo soni. Ma töku mi o go dou. Biga mi o konda da unu kumafa Masa bi lei mi dee tjubitjubi soni fëen a wan apaiti fasi. A dë leti kuma mi bi ta sunjan sô, ma na sunjan, biga mi bi dë ku wojo.

² Mi sabi wan womi di bi biibi a Masa Jesosi Keesitu, nöo hën wan gaan soni pasa ku ën kuma teni-a-fö jaa longi kaa. Wë ee sinkii soni, ee akaa soni, di dë ma sabi. Gadu wanwan nöo sabi. Ma a dë kuma wan soni tei ën tja go pasa dee teeja u mundu go te a di köndë u Gadu seei.

³ Nöo kumafa i si mi taki dë kaa, ee sinkii soni ee akaa soni më sabi. Gadu wanwan nöo sabi.

⁴ Ma nöo de tjiën go dou a di waiti kamian u Gadu de ta kai Paladëisi. Nöo hën a jei wanlö soni ala di an sa konda seei. Ma boiti di dë, de bai ën taa an musu konda de tu.

⁵ Wë nöö, dee sëmbë, a dee lö soni dë mi bi sa njan buka e, ma nöö ma o du ën. Ma dee soni mi o tei ta njan buka da, nöö de da dee soni dee ta buta mi ko lagi a sëmbë wojo.

⁶ Ma ee u mi tei dee soni dee Gadu lei mi naandë fu mi sa njan buka a de liba, nöö ma lau e, biga sô Gadu bi lei mi de tuú. Ma nöö ma o du ën e. Biga fa mi dë aki ma kè u sëmbë musu luku mi möön hei möön leki fa de ta jei mi ta fan, ku fa de ta si mi ta libi.

⁷ Ma nöö dee sëmbë, fa mi taki dë seei, ma ma sa kisi gaan fasi fu dee gaan heihei soni i si Gadu lei mi naandë e. Nönö. Biga wë Gadu disa pasi da didibi, hën a manda wan futuboi fëen ko naki mi. A buta wan soni da mi di ta tjökô mi leti kuma maka, nöö hën ta fuka mi nöömô mbei ma sa abi gaan fasi.

⁸ Nöö dii pasi mi begi a wan apaiti fasi fu Masa musu puu di lö soni naandë a mi liba.

⁹ Ma nöö hën a fan ku mi taa: „Fa i dë aki, nöö mi sabi dee fuka fii kaa. Nöö be i tifihedu ku de nöö, biga mi o tja i ku mi bunuhati. Biga te wan sëmbë kaakiti ku saanfa-u-du fëen kaba, nöö nëen mi sa feni pasi u wooko nëen liba ku di kaakiti u mi awaa.” Sô Gadu fan ku mi e. Nöö fëen mbei a möön bunu da mi fu mi ta njan buka a dee suwaki pisi u mi libi. Mi o ta wai ku de seei, be di kaakiti u „Masa Jesosi, Keesitu tan ku mi.

¹⁰ Wë nöö da sô e, dee sëmbë. Fa u dë aki, më a toobi möön ee hiniwan soni ta pasa ku mi fu „Masa Jesosi, Keesitu hedi. Ee mi suwaki a soni, më a toobi. Ee sëmbë ta kosi mi, ee de ta sitaafu mi, an dë gaan soni da mi tu. Ee mi ta tja pena nasô mi ta tja fuka, ma a' toobi. Mi ta wai seei a dee soni dë dendu. Biga wë hii dee suwaki pisi u mi dë tuu ta buta mi fu mi dë taanga „ku di kaakiti u Gadu wanwan.

Aki Paulosu ta konda da de kumafa a kè heepi de tjika.

¹¹ Wë dee sëmbë, mi taki e, fa i si mi njan buka da miseei dë, nöö a dë leti kuma hedi u mi poi. Ma unu wë buta mi e. Biga unu bi musu ta gafa mi. Biga wë hii fa i si ma dë wan wojo soni seei fa mi dë aki, ma misikuma ma dë möön lagi möön dee sëmbë dee ta hopo deseai buta u gaan tjabukama a unu mindi naandë.

¹² Biga wë mi bi libi a unu mindi ku gaan pasensi e, nöö sômëni foondo wooko mi bi ta du a unu dë ku di kaakiti u Gadu. Sômëni maaka un si tu, nöö dee soni dë bi musu ta lei unu taa mi dë wan tjabukama u Gadu tuu.

¹³ Nöö dee sëmbë, unfa a waka un si taa mi ta seeka dee biibima a dee oto köndë bunu möön unu? A sa kè taa fu di ma bi ta tja dee fuka u mi ko tuwë da unu nö? Hën da di föutu mi mbei nö, dee sëmbë? Wë ee di dë wanwan, nöö mi begi unu be wan hoi mi a bëë. Wë biga sô mi libi ku unu tuu.

¹⁴ Ma fa u dë aki, mi dë kabakaba u mi ko a unu di u dii pasi. Ma seei te mi ko, ma o buta fuka u mi a unu liba möönsô e. Nönö. Biga wë na gudu mi ta suku a unu e, dee sëmbë, ma unu seepi wë mi kè di kè. Biga wan piki mii an musu ta sölugu ën tata ku ën mama, ma tata ku mama de ta sölugu piki mi.

¹⁵ Nöö fëen mbei fa u dë aki, mi dë seei kabakaba fu mi lasi hii soni da unu, te dou ku miseei tu. Ma nöö fu di un si taa mi lobi unu taanga, nöö fëen mbei wan sa lobi mi tu nö?

¹⁶ Ma nöö fa mi fan dë, nöö kandë sëmbë o dë a unu mindi naandë di o taa: “Höön, awa, fa i si an ta buta dee fuka fëen a u liba aki, bödjëë wë a ta pëe e. Biga a o abi kamian nöömô faa ganjan u njan a wan köni fasi.”

¹⁷⁻¹⁸ Sô un ta mëni nö, dee sëmbë? A kandë dee sëmbë mi bi manda ko a unu naandë, de un ta taki nö? Fa mi bi manda Titusi ku di otowan fëen ko a unu, nöö Titusi bi suku soni a unu a wan tjubi fasi faa tja wini ko dëen seei nö? Wë

ma sikuma a dē sō e. Biga mi ku Titusi tuu ta waka a di Akaa u Gadu leiki ta libi a di wan seei fasi nōō.

¹⁹ Wē nōō fa mi fan ku unu naandē, dee sēmbē, a sa kē un mēni taa bunu nē mi ta suku a unu nō? Nōnō e. Ma mi ta fan ku unu a Gadu fesi fu di u ku unu tuu dē sēmbē u, Jesosi, Keesitu, nōō u kē fuun musu ko taanga a di biibi. Hēn di soni dē nōō u ta suku a unu e, dee sēmbē.

²⁰ Biga wē mi ta fēēē da unu taa te mi o ko a unu ala, nōō mi o ko si unu a wan fasi di an bunu da mi seei. Nōō ee a dē sō, nōō unu seepi o ko si mi a wan fasi di an bunu da unu tu. Biga mi ta panta taa te mi ko dē, nōō mi o ko si unu taa un ta kisi toobi ku unu na unu ta haun ku unu seepi, hati fuunu ta dē boonuboonu, hiniwan sēmbē ta biinga nēēn seei soni baka, wan abi toobi ku otowan, un ta tja unu seepi ta kosi a baka ta mindi soni da unu na unu, so fuunu o sai naandē ku gaan fasi, nasō un o dē ta du fanjanfanjan soni.

²¹ Dee sēmbē, misikuma ee mi ko si unu a sō wan fasi, nōō sen o kisi mi seei a Gadu fesi o. Nōō a o ta hati mi te na soni da dee sēmbē fuunu naandē dee an disa dee pepei fanafiti libi u de, te dou ku dee sensen soni de ta du a di sē u manu ku mujēē soni. „Nōō mi kē un seeka dee lō pei libi fuunu dē bifō mi ko a unu ala e, baa.»

13

Aki Paulosu ta bai dee sēmbē

mōōn u de musu seeka de

libi bifō a ko a de.

¹ Sōō. Wē kumafa i si mi taki dē kaa, dee sēmbē, disi o mbei di u dii pasi di mi o ko haika unu. Wē nōō un sabi fa de sikifi a Gadu Buku taa ee wan sēmbē du wan hogi, nōō tu nasō dii sēmbē musu piki taa sō a du ēn tuu, bifō di sēmbē di du di hogi dē o kisi sitaafu awaa.

² Wē fa i si mi o ko a unu dē, nōō leti sō soni o waka e. Biga wē a di u mbei tu pasi di mi bi dē a unu ala, nōō mi bi bai wanlō sēmbē a dee hogi de ta du. Sōseei fa mi ta mbei di pampia aki, mi toona ta bai de mōōn. Nōō fa i si mi o ko di pasi aki, nōō hēn o mbei dii pasi. Nōō ma o fan ku de ku buka mōōn e. Ma mi o du ku de awaa te dou ku hii dee oto sēmbē dee sai dē tuu, dee an bia disa dee wogi du u de.

³ Biga wē misikuma un kē sabi ee dee fan mi ta fan ku unu, ee Masa Jesosi Keesitu hēn ta da mi de tuutuu. Biga un taa te mi ta fan nōō mi ta fan fēēēfēēē, ma Masa Jesosi hēn an ta fēēē ma a ta wooko ku kaakiti a unu dē.

⁴ Wē nōō tuu. Ma fa i si de bi kii Masa Jesosi a di lakpa pau dē, nōō wan suwakisuwaki libisēmbē de kii dē, ma nōō di a weki ko dē ku libi fa u dē aki, nōō ku di kaakiti u Gadu a ta libi e. Nōō fa u ku ēn nama makandi aki, nōō u dē suwakisuwaki libisēmbē eti tuu, ma tōkuseei ku di kaakiti u Gadu u ta libi fuu heepi unu.

⁵ Wē dee sēmbē, mi taki e, „di un lo’ u wegi sēmbē luku naandē kaa,» nōō mi kē fuun wegi unu seei luku bunu ee un dē biibima tuutuu. Biga a kandē fa i si un sai dē seei, ma Jesosi Keesitu an dē a unu hati. „Ma tōku na sō mi ta mēni e, dee sēmbē. Ma mi a’ di mēni taa un dē tuutuu biibima u Masa Jesosi.»

⁶ Nōō ee un pasa di lō tesi dē, nōō misikuma woon si taa u seei pasēēn tu „taa u dē tuutuu tjabukama u Masa Jesosi.»

⁷ Nōō mi ta begi Masa Gadu da unu fu wan musu du na wan hogi. Nōō ma taki sō fuu lei sēmbē kumafa u dē tjabukama u unu liba tjika e. Nōnō. Ma

fuun seepi hedi. Biga u kë di libi fuunu musu dë a tatai liba, hii fa sëmbë ta taki fuu taa wa dë bumbuu tjabukama tjika.

⁸ Biga wa ta mbei möiti u sëmbë musu du wan soni di an ta kai ku di Buka u Gadu e, ma fu de musu libi leti kumafa Gadu kë.

⁹ Nöö fëen mbei ma a' toobi ee mi ta libi kuma mi sösö, kuma ma abi kaakiti a unu mindi. Solanga un dë taanga a di biibi kaa, nöö mi dë waiwai. Nöö mi ta begi seei da unu fuun musu ko dë telutelu gbelingbelin kumafa Gadu kë.

¹⁰ Nöö hën mbei mi ta buta dee soni aki a pampia manda da unu a fesi, fu te mi ko a unu nöö ma o feni soni fu mi gandji da unu möön. Biga di makiti di Masa da mi aki, nöö an dë wan soni u mi booko unu saka e, ma fu mbei un ko dë gingin a di biibi.

Aki Paulosu ta tapa di biifi.

¹¹ Söö. Wë nöö ka mi sikifi tjika aki, nöö mi o tapa ufö e, dee sëmbë. Nöö mi taki e, be un piki dee soni mi sikifi aki nöö un buta unu libi a tatai liba ku telu. Nöö be hati fuunu dë bööböö ku wan pakisei makandi, nöö Masa Gadu o dë ku unu. Biga nëen lobi ku kötöhati ta kumutu.

¹² Nöö te woon da unu seei odi, nöö un baasa unu seei makandi ku limbohata e, kumafa a fiti biibima ku biibima.

¹³ Nöö hii dee sëmbë dee Gadu tei apaiti aki tuu ta manda gaan odi da unu.

¹⁴ Masa Jesosi Keesitu musu dë ku unu ku ën bunuhata e, dee sëmbë. Nöö di lobi u Masa Gadu ku di makandi libi di di Akaa fëen ta da musu dë ku unu tu.

„Na soni möönsö e, dee sëmbë. Mi, Paulosu, ta manda gaan odi da unu. A tan sö.“

Di biifi Paulosu manda da dee biibima u Galasia

Wan wöutu a fesi.

Di womi de kai Paulosu bi dë wan u dee tjabukama u Masa Jesosi de ta kai apösutu. Nöo hën mbei di biifi aki manda da dee biibima a dee köndëköndë u di pisiwata de kai Galasia.

Nöo di soni mbei a mbei di biifi aki. A bi go a Galasia faa tja di Buka u Masa Jesosi go da dee sëmbë u di köndë. Nöo hën so u dee sëmbë fu ala bia libi ko ta waka a Masa Jesosi baka. Nöo di a kumutu dë, tee bakaten hën a ko jei taa wanlô sëmbë ko a dee Galasia biibima dendu dë ko tja wan njunjun buka poipoi wan ko da de, taa di fa de biibi a Masa Jesosi dë an tjika eti. De musu koti di maaka u Isaëli ta hoi dee Isaëli wëti ufô Gadu sa limbo fesi da de. Nöo de taki wan oto soni tu taa Paulosu aan taki a di Buka a bi tja ko da de naandë, biga na Gadu bi dëen di buka. A libisëmbë nöo a feni ën. Sö de ta lei dee Galasia sëmbë.

Nöo di Paulosu jei sö, hën a mbei di biifi aki wante manda bai de a dee lö lei dë. A manda leti de tu fa u de musu libi kuma biibima u Masa Jesosi.

Aki di biifi seti.

¹⁻² Wë dee sëmbë, mi Paulosu ta manda gaan odi da unu e. Nöo mi ta mbei di pampia aki da un dee sëmbë dee ta biibi a Masa Jesosi liba ta miti makandi a dee köndëköndë u di pisiwata u Galasia dë. Fa mi dë aki, mi da wan u dee tjabukama u Masa Jesosi de ta kai apösutu e. Nöo na libisëmbë buta mi sö. Na de manda mi tu. Ma Jesosi Keesitu ku hën Tata di bi weki ën a dëdë buta mi. Nöo fa mi ta manda di biifi da unu aki, nöo mi ku dee oto biibima u Masa Jesosi dee mi ku de dë aki, sö u tuu ta mandëen.

³ Nöo u Tata Masa Gadu ku Masa Jesosi Keesitu musu dë ku unu e, ta heepi unu ku de bunuhati. De musu mbei hati fuunu dë bööböö.

⁴ Fa Masa Jesosi sai dë, dee sëmbë, nöo hën wë hopo ën seei paka di paima da u fu dee hogidu fuu hedi e. Nöo a du ën faa sa puu u a dee hogi libi basu u di ten u dë aki. Sö wë u Tata Masa Gadu bi kë kaa.

⁵ Nöo fa a sai dë a musu abi gafa ku nëbai fu teego. A tan sö.

Aki Paulosu ta piki de taa wan kodo buka u Masa Gadu nöo dë.

⁶⁻⁷ Wë dee sëmbë, di soni aki sö, a foondo mi tumisi e. Ma bi mëni sö fu unu taa un bi o bia sö hesi kumutu a di Sëmbë di bi kai unu ku ën bunuhati ko nëen. Wë biga ku ën bunuhati a bi manda „Jesosi, Keesitu ko jabi pasi da unu fuun sa ko sëmbë fëen. „Hën wë da di Buka di u konda da unu.”

Nöo hën wë un kë disa di bumbuu soni naandë go ta piki dë söso buka dee oto sëmbë ta konda da unu naandë taa Gadu buka, ma na Gadu buka seei de dë. Wë biga Gadu aambi oto pei Buka möönsö „möön leki di u konda da unu. Ma fu di un ta haika dee oto sëmbë,” hën wë i si ta buuja unu sö teefa wan saandi un ta du möön.

⁸ Nöo mi taki e, dee sëmbë, di Buka di i si u bi tja ko da unu dë, nöo hën nöo da di tuutuu wan e. Hën nöo un musu piki. „Ee u seei toona ko a unu baka ko da unu wan oto buka, nöo wan musu piki e. Ee wan basia u Masa Gadu Köndë seei bazia ko a unu dë ko da unu wan oto buka möön leki di u bi konda da unu kaa, nöo Masa Gadu musu sibëen fu nöömö e! „Biga di Buka u Gadu hën a ta poi.”

⁹ Mi toona taki en wan pasi möön leti kumafa i si u bi taki en kaa, taa ee wan sëmbe a unu de ta konda wan oto buka da unu möön leki di un bi jei a u kaa, nöö di siba u Gadu musu kisi en fu nöömö e.

¹⁰ Wë di fan mi fan aki, unfa un mēni fēen, dee sëmbe? Mi fan en faa kai ku libisëmbe ö, naa faa kai ku Gadu? Fa u de aki, un ninga taa mi ta suku gafa a libisëmbe eti ö? Wë nöön e baa. Biga ee mi ta suku gafa a libisëmbe eti, nöö hën da ma de wan futuboi u „Jesosi„ Keesitu.

Aki a ta konda da de taa na a libisëmbe a kisi di Buka.

¹¹ Be mi taki da unu e, dee sëmbe u mi de, taa di Buka di i si mi bi tja ko konda da unu de, nöö na libisëmbe abi en e.

¹² Biga na a libisëmbe a kumutu, nöö na libisëmbe lei mi en tu. Ma Jesosi Keesitu hënseei wë ko a mi ko lei mi en sö.

¹³⁻¹⁴ Biga fa un sai de, nöö un bi musu jei sö u mi taa a fesi mi bi ta biinga ku hii dee guwenti fuu Isaēli sëmbe tuu, kumafa u bi lei a dee gaan sëmbe fuu. Mi bi de a sōmēni u dee pei u mi fesi a dee soni naandē. „Biga mi bi mēni taa fa mi ta hoi dee Isaēli wēti de, nöö hën di soni de Gadu bi kē ufō a o limbo fesi da mi.„ Nöö hën wë mbei mi bi ta sitaafu dee biibima u Masa Jesosi gaanfa seei „fu di de an de ku dee wēti de möön.„ Ma hii fu di de, nöö hën di keiki u Gadu wë mi bi ta biinga u kaba a sōsō sö e. Ma bi sabi seei.

¹⁵ Ma fa i si mi bi ta du de seei, Gadu bi a' bunuhati u mi o. Biga gaanduwe a fesi bifō de pai mi, nöö a bi tei mi kaa fu mi ko sëmbe fēen a bakaten.

¹⁶ Nöö hën wë u de teefa di juu dou, hën a mbei mi ko sabi Jesosi di Mii fēen, fu mi sa ta tja di Buka fēen awaa ta konda da dee sëmbe dee an de Isaēli sëmbe.

Wë nöö fa i si a bi ko a mi naandē, nöö ma bi go a na wan libisëmbe go hakisi ee andi u mi musu du möönsö e.

¹⁷ Na a dee Tjabukama u Masa Jesosi de ta kai apōsutu, dee de a Jelusalen, seei mi bi go. Fa de bi de tjabukama ufō mi seei, ma töku ma bi go a de. Ma mi hopo u mi wante, mi wanwan, hën mi go u mi te na Alabia a di sabana köndē de. „Wë nöö fa mi ta taki en aki sö, hën da libisëmbe lei mi di buka nö?„

Nöö di mi kumutu na Alabia naandē, hën mi toona go a Damasikusi baka „ka mi bi kumutu.„

¹⁸ Nöö hën mi tan dii jaa naandē. Nöö hën mi toona kumutu a Damasikusi go a Jelusalen go haika Petuisi, be mi ku en mbei guwenti awaa. Nöö hën mi de ku en a Jelusalen de teni-a-feifi daka ufō mi kumutu de.

¹⁹ Ma nöö fa i si mi bi go de seei, ma si dee oto Tjabukama u Masa Jesosi möönsö e, ma di baaa u Jesosi de ta kai Jakobosi hën nöö mi bi si de.

²⁰ Nöö fa mi ta fan aki, Masa Gadu seei sabi taa na soni mi ta mindi e. Tuutuu soni mi ta taki.

²¹ Nöö hën di mi kumutu a Jelusalen naandē, hën mi go ta waka a dee köndëköndë u Silia ku Silisia ta konda di Buka u Masa Jesosi Keesitu ta lontu.

²² Ma dee oto biibima fēen dee ta miti makandi a dee köndëköndë u Judea, nöö deseai an bi si mi sabi eti e.

²³ Ma de ta jei soni u mi nöö taa di sëmbe di bi ta sitaafu de a fesi ta kii, nöö hën wë bia ko biibi te a tei di Buka u Masa Jesosi ta tja ta paaja, di hënseei bi ta biinga u tapa.

²⁴ Nöö di de ko jei sö, hën de ta wai seei ta gafa Masa Gadu fu mi hedi.

2

Aki Paulosu konda fa a bi go miti ku dee hedima u keiki a Jelusalen.

¹⁻² Wë nöö fa mi ta tja di buka ta paaja dë, nöö a baka teni-a-fö jaa bifö mi toona go a Jelusalen möön, mi ku Banabasi. Nöö di soni mbei u go ala, u di Gadu seei ko lei mi taa mi musu go. Nöö di u nango, hën u tja di kijoo de kai Titusi go ku u. „Biga u ku ën ta wooko di wooko u Gadu makandi.”

Nöö hën wë di u go dou a Jelusalen, hën u go a dee sëmbë dee de ta si kuma fesima u de a di biibi. Nöö hën u kai de tja go a së. Nöö hën u fan ku de te u kaba taa sô wan buka u ta tja ta paaja da dee oto köndë sëmbë dee na u Isaëli „taa, ee wan sëmbë ja dë Isaëli sëmbë ma i ko ta biibi a Masa Jesosi kaa, nöö a tjika. An dë fii ta hoi dee wëti u Isaëli ufö Gadu o limbo fesi da i.” Nöö hën u hakisi de ee fa u ta konda di buka dë, ee de dë ku u a wan së. Biga fa de dë hedima naandë nöö u kë de nama ku u, ee nasö nöö a kandë sëmbë o mëni taa sôsö soni u ta du.

³ Nöö di u fan ku de teefa u kaba, nöö hën de feni taa di buka u ta tja ta paaja naandë, nöö a bunu.” Nöö fa Titusi sai ku u dë, an dë Isaëli sëmbë e. Giiki sëmbë a dë, nöö aan di maaka u Isaëli, ma de an duwengi ën tu fu de koti ën sinkii buta di maaka.

⁴ Nöö de an bi o mëni di soni dë seei tu e, ma wanlö sëmbë ta ganjan taa de dë biibima u Jesosi Keesitu fufuu pasi ko saapi a u mindi dë, ko ta watji u ta luku fa u ta libi fiifii söndö u dë a wëti basu. Biga de kë kisi u toona tja go buta kuma saafuma a dee wëti dë basu möön.

⁵ Ma fa de ta du dë, nöö wa saka u seei da de e. Wa piki de buka seei a di soni dë. Biga u kë hoi di Buka u Gadu gbelingbelin da unu kumafa a dë.

⁶ Nöö dee sëmbë u go a de dë, nöö de wë de ta luku kuma gaan hei sëmbë e. Ma di soni dë an dë gaan soni a mi, biga mi sabi taa Gadu hën an ta luku a sëmbë fesi. Ma boiti u di dë, fa de dë heima dë seei, ma de an buta wan wojo soni a di lei mi ta lei liba möönsö. „Biga de si taa di fa mi ta lei naandë, nöö a bunu kaa.”

⁷ Nöö hën wë de ko si taa mi ku Petuisi, di wan wooko nöö wë Gadu da u ma de dë paatipaati. Petuisi hën da Tjabukama u Masa Jesosi a dee Isaëli sëmbë dendu, nöö mi da Tjabukama fëën a dee sëmbë dee na dë Isaëli sëmbë dendu.

⁸ Nöö leti kumafa Gadu dë ku Petuisi a di wooko di a sai dë, nöö söseai a dë ku mi tu.

⁹ Nöö fa i si Jakobosi, Petuisi, ku Johanisi sai dë, nöö de wë da dee sëmbë dee otowan ta si kuma posu a di biibi. Ma nöö fa de ko si fa Gadu dë ku mi ku ën bunuhati tjika, nöö hën de ko da mi ku Banabasi tuu maun. Nöö hën wë u ku de mbei buka te u kaba taa sô di wooko o paati. De o ta tja di Buka ta paaja a dee Isaëli sëmbë dendu. Nöö u, woo go a dee oto köndë sëmbë dee na u Isaëli.

¹⁰ Ma wan soni nöö de begi u taa u musu ta heepi de ku dee penama u de „dee dë a Jelusalen naandë.” Ma nöö di soni de takı dë, mi bi dë tifihedi ku ën gaanfa seei kaa.

Aki Paulosu konda taa a bi bai Petuisi a wan soni.

¹¹ Nöö mi o taki wan soni aki da unu e, dee sëmbë. Fa i si Petuisi dë gaan fesima dë seei, ma a wan juu dë nöö a bi ko a u na Antiokia, nöö hën wë mi bai ën a lanti fesi fu wan soni a bi du. Biga an bi a' leti.

¹² Biga a bi ta libi makandi ku dee biibima u Masa Jesosi fu Antiokia, dee na Isaëli sëmbë. Hën ku de bi ta njan a wan paabi. Nöö hën wanlö oto biibima u Masa Jesosi kumutu a Jakobosi a Jelusalen ala ko a u na Antiokia naandë. Nöö fa i si de ko dë, nöö de ta hoi di Isaëli wëti taa ee wan sëmbë aan di maaka u Isaëli nëen sinkii, nöö de an musu njan ku ën. Nöö di Petuisi ko si taa sô de

ta du, nõõ hën a ko fëëë. Hën a hai hënseei puu a dee sëmbë na Isaëli sëmbë dë dendu ko ta hoi di wëti dë tu,

¹³ hën ku hii dee oto Isaëli biibima dee ku u sai dë. Banabasi seei de kisi hai tja go a dendu tu, faa go ta libi a di ganjan fasi dë.

¹⁴ Nõõ di mi si taa di libi u de an ta kai ku di Buka u Masa Jesosi di u ta konda aki, nõõ hën wë mi fan ku Petuisi a hii dee oto biibima dë tuu fesi taa: “Womi.” A piki. Mi taa, “Di soni aki, a bigi a mi da i mөөnsө. Wë biga i da wan Dju sëmbë di bi ta dë a wëti basu, nõõ di wojo fi ko limbo te nõõ hën wë i kumutu. Nõõ andi mbei i kë toona hai dee sëmbë na Dju aki tja go buta a dee wëti dë basu u du?” Sө mi fan ku ën.

¹⁵ Nõõ di soni mbei mi taki sө, dee sëmbë. Biga wë un sabi fa u dee Dju sëmbë dë kaa. U ta si u seei kuma wa ta booko Gadu wëti kuma dee oto kөndë sëmbë.

¹⁶ Ma tökuseei, so fuu bi ko sabi taa di hoi di u bi ta hoi dee wëti dë, nõõ an ta heepi u fuu ko bumbuu sëmbë mөөnsө a Gadu wojo. Wan kodo soni tө nõõ sa mbei u ko sө, hën da ee u ta biibi a Jesosi Keesitu liba. Nõõ hën wë mbei u ko ta biibi nëen e.

¹⁷ Nõõ fa i si u ta suku fuu musu ko bumbuu sëmbë a Gadu wojo ku biibi a „Masa Jesosi, Keesitu sөndө hoi wëti aki, nõõ hën wë mbei dee oto Dju sëmbë fuu ta luku u kuma bookowëtima. Nõõ unfa un pakisei u di soni dë? Hën da Keesitu manda u fuu booko Gadu wëti ö? Nөnө. Kwetikweti.

¹⁸ Ma ee Gadu bai mi a wan soni te mi disëen kaa, nõõ bakaten hën mi toona go tei ën mөөn, nõõ awa ufө mi ko bookowëtima a Gadu wojo awaa.

¹⁹ Wë, dee sëmbë o, fa i si mi bi ta hoi dee wëti dë, nõõ hën wë tja mi ko a Gadu e. Biga mi bi biinga tefa mi wei, ma bi sa hoi de ku telu mөөnsө. Nõõ fa mi dë aki, nõõ ma dë a dee wëti dë soni mөөn e. Mi disa de gaanduwe fu mi sa libi kumafa Masa Gadu kë awaa.

²⁰ Biga fa, Masa Jesosi, Keesitu dëdë a di lakpa pau dë, nõõ mi ku ën tuu wë dëdë naandë e. Biga u dë di wan. Nõõ di libi i si mi abi aki, na miseei ta libi ën mөөn. Masa Jesosi seei hën dë a mi hati ta tii mi. Nõõ hii fa mi ta libi a di goonliba aki, nõõ ku biibi nõõ a di mi u Masa Gadu liba, di bi lobi mi tee a tei mi dëdë dëdë da mi.

²¹ Nõõ ee mi ta hoi wëti eti fu hën musu mbei mi ko bumbuu sëmbë a Gadu wojo, nõõ hën da mi ta sөsө di soni di Gadu du da mi naandë ku ën bunuhati. Hën mbei ma o du ën e. Biga ee a dë taa wan sëmbë bi sa hoi wëti te a ko bumbuu tjika a Gadu wojo, nõõ da an bi o dë fanөudu fu „Jesosi, Keesitu musu dëdë.

3

Aki Paulosu ta gandji da dee Galasia biibima u di de

bia go ta hoi wëti.

¹ Wë nõõ un dee Galasia sëmbë u mi dë, andi seei du unu mbei un don sө? Sëmbë hën ko ganjan unu gaanfa sө nõ, mbei un lasi unu seei te un fëëkëtë di fa Jesosi Keesitu bi dëdë da unu nõ? Ee! A bigi a mi da unu. Biga fa u bi tja Gadu Buka ko da unu dë, nõõ u bi kondëen gbelingbelin da unu te a dë kuma a unu fesi seei de bi tja Masa Jesosi go peka a di lakpa pau kii. Sө wë un bi fusutan di Buka tjika e.

² Nõõ hën wë mbei mi kë hakisi unu wan soni. Fa un bi kisi di Akaa u Gadu dë, fu di un bi ta hoi wëti mbei nõ, naa fu di u bi konda di Buka da unu hën un ko ta biibi nëen?

³ Wan a' fusutan nö? A fesi di un bi ko a Masa Jesosi, nöö di Akaa u Gadu hën bi seti di wooko a unu hati. Ma nöö fa u dë aki, un kë puu unu seei a di Akaa lei ki tjëen go dou ku di fuunu seei kaakiti nö?

⁴ Hii dee sitaafu un bi tja a fesi di un bi ko njunjun a di biibi dë, nöö u sösö un tja de nö?

⁵ Nöö fa Masa Gadu ta da unu di Akaa fëen ta du foombofoombo soni a unu dë, nöö faandi mbei a ta du sö? Fu di un ta hoi wëti mbei nö, naa fu di un bi jei di Buka nöö un ko ta biibi nëen?

Aki Paulosu ta lei fa Gadu bi tei Abahamu fëen sëmbë u di biibi fëen hedi.

⁶ Wë dee sëmbë, mi kë fuun toona mëni di soni di un bi jei u di gaan sëmbë fuu de kai Abahamu. Biga de sikifi soni fëen a Gadu Buku taa, fa a biibi Gadu dë nöö fëen mbei Gadu si ën kuma an booko ën wëti wan daka.

⁷ Nöö hën a ko fika sö taa dee sëmbë ta biibi Gadu nöö de wë Gadu ta luku kuma gbelingbelin mü u Abahamu „biga de djei ën a di biibi.”

⁸ Nöö di Buku u Gadu bi taki tu taa te wan daka nöö dee sëmbë dee an dë Isaëli sëmbë o ko ta biibi, nöö Gadu o si de kuma de an bi booko ën wëti wan daka fu di biibi u de hedi. Nöö di Buka u Masa Jesosi aki sö, hën wë i si di Buku bi taki dë e. Nöö hën wë Gadu bi ta mëni tu di a taki da Abahamu taa: A i hii fóluku u di goonliba sa feni heepi.

⁹ Nöö da sö e, dee sëmbë. Ee u ta biibi kumafa Abahamu bi biibi, nöö woo feni di bunu u Gadu leti kumafa i si di gaan biibima dë bi feni ën.

Aki Paulosu ta lei de taa Masa Jesosi puu u a di siba u dee wëti.

¹⁰ Ma hii dee sëmbë dee ta mëni u de hoi wëti fu de ko dë bumbuu sëmbë a Gadu wojo, nöö di siba u Gadu kisi de kaa e. Wë biga a dë a di Buku u Gadu taa:

Ee wan sëmbë ja ta hoi hii dee wëti u Gadu tuu

dee dë sikifisikifi a di Buku aki,

nöö di siba u Gadu dë a i liba e.

Sö di Buku taki.

¹¹ Ma nöö u sabi kaa taa na wan sëmbë sa ko bumbuu sëmbë a Gadu wojo fu di a ta hoi wëti hedi e. Biga di Buku taki möön taa:

Di sëmbë di ko bumbuu sëmbë a Gadu wojo

fu di a ta biibi nëen hedi,

nöö hën nöö o feni di libi u Gadu.

¹² Nöö wëti hoi, nëen da biibi e, dee sëmbë. Biga dee wëti dë seei taki taa:

Di sëmbë di ta du „hii” dee soni

dee dë sikifisikifi aki

o feni libi a Gadu.

Wë nöö nëen da biibi möön e. „Nöö hën tu, fa a taki dë, nöö hën da dee wëti siba u kaa. Biga na wan sëmbë tjika u hoi dee wëti u Gadu söndö misi.”

¹³ Ma fa i si „Jesosi, Keesitu sai dë, hën puu u a di siba u dee wëti naandë. Biga di Buku taki möön taa,

Hiniwan sëmbë di de tei hëngi a pau kii,

nöö di siba u Gadu wë kisi ën.

Nöö fa de tei Masa Jesosi hëngi a di lakpa pau kii dë, nöö hën wë da di siba u Gadu kisi ën fuu hedi e, dee sëmbë.

¹⁴ Nöö di soni mbei a du ën, fu hii sëmbë sa feni di bunu u Gadu awaa, kumafa Gadu bi paamusi Abahamu. Nöö a ko dë taa „na Isaëli sëmbë wanwan ma, hii sëmbë, ee i biibi a Jesosi Keesitu liba nöö joo feni di bunu dë. Nöö Gadu o da i di Akaa fëen tu di a bi paamusi u, fu di i ta biibi nëen liba.

Aki Paulosu ta lei de taa wēti an sa puu di buka u Gadu.

15 Wē dee sēmbē u mi aki o, un boo taki di soni aki sō kumafa libisēmbē guwenti taa te i ku wan sēmbē mbei buka a wan soni te un sitampu ēn a lanti fesi, nōo na wan sēmbē sa puu di buka dē mōön e. Nōo sōseei de an o sa buta wan oto soni nēen liba mōön tu. Biga di buka mbei sō kaa.

16 Nōo sō wē, Masa Gadu mbei wan buka ku Abahamu te a kaba taa a di bōngō fēen hii sēmbē u goonliba sa feni heepi. Nōo fa a taki ēn dē, an bi taa “dee bōngō” e, ma a bi taa “di bōngō”. Nōo di bōngō dē nōo hēn da Jesosi, Keesitu.

17 Nōo di ten di Gadu bi mbei di buka ku Abahamu naandē, nōo dee Isaēli wēti an bi dē eti e. A baka fōhōndō-ku-diiteni jaa bifō dee bakamii fēen ko kisi dee wēti a Gadu awaa u de musu hoi. Ma nōo fa de ko kisi de seei, ma dee soni Gadu bi paamusi Abahamu di a mbei di buka ku ēn dē, de an puu mōönsō.

18 Biga ee a dē taa dee wēti dee ko a baka dē musu hoi ufō sēmbē sa feni dee bunu u Gadu, nōo an bi o dē taa Gadu ta da sēmbē dee bunu fēen u sōsō fu di paamusi fēen hedi.

Ma na sō a dē e, dee sēmbē. Gadu ta da u dee bunu fēen u sōsō ku ēn bunuhati sōndō u ta hoi wēti e, fu di sō a bi paamusi Abahamu.

Aki Paulosu ta lei de un heepi dee wēti Gadu bi da Mosesi

abi da u.

19-20 Wē nōo mi hakisi unu e, dee sēmbē, ku un pakisei Gadu da u dee wēti? Wē a da u de faa lei u andi da bunu ku andi da hogi, nōo fu de hoi u a pasi tu fu te dou di juu di Masa Jesosi o ko. Biga hēn wē bi da di bōngō di Gadu bi paamusi Abahamu taa woo feni heepi nēen.

Nōo di paamusi di a bi paamusi dē, a hebi mōön dee wēti a bi da a baka e. Biga di Gadu bi mbei di buka ku Abahamu, nōo hēn ku ēn wanwan tō nōo bi mbei ēn. Oto sēmbē an bi dē ku de a de mindi. Ma dee wēti, mindima hēn wē tja de ko e. Biga Gaangadu manda dee basia fēen kōndē u de tja dee wēti ko da Mosesi, nōo hēn Mosesi tei de hēn a tja de go da dee Isaēli sēmbē fu de musu ta hoi.

Aki ta lei faandi mbei dee wēti

u Gadu bi ko.

21 Wē nōo unfa un mēni u dee wēti dē? De ta fia ku dee paamusi u Gadu dee a bi paamusi Abahamu nō? Wē nōnō, de an ta fia ku dē e. Kwetikweti. Biga ee wēti bi sa dē di u bi sa hoi tee nōo hēn u kisi libi a Gadu, nōo hēn da wēti bi o mbei u ko bumbuu sēmbē a Gadu wojo tuu. Ma an dē sō e!

22 Biga hii u libisēmbē tuu dē a hogidu basu, leti kumafa i si di Buku u Gadu bi taki kaa. Wa sa kumutu nēen basu fuu ko bumbuu sēmbē mōönsō.

Ma dee sēmbē dee ta biibi a Jesosi Keesitu liba, nōo de nōo sa kumutu a wogi du basu u de feni di bunu di Gadu bi paamusi dee sēmbē ta biibi nēen.

23-24 Wē un boo taki ēn sō, taa Masa Gaangadu bi buta u a dee wēti dē basu fu de ta hoi u gingin seei a pasi fu te, Jesosi, Keesitu ko. Nōo di a ko, hēn a tja di pakisei u Gadu ko a dōo taa ee u biibi nēen nōo woo ko dē bumbuu sēmbē a Gadu wojo.

25 Nōo fa u dē aki, wa dē a dee wēti basu mōön e, dee sēmbē, fu di u ko ta biibi a Masa Jesosi.

Aki Paulosu ta lei de fa biibima ku biibima dē a Gadu wojo.

26 Dee sēmbē o, fa un ko ta biibi a Jesosi Keesitu liba dē, nōo un ko miii u Gadu e.

²⁷ Fa i si un ko nama ku ën tei dopu dë, nöö unu ku ën tuu ko dë di wan sëmbë.

²⁸ Nöö aan toobi e, ee i dë Dju sëmbë ee ja dë Dju, ee i dë saafu ee ja dë saafu, ee i dë womi ee i dë mujëë, ma fu di un dë sëmbë u Masa Jesosi Keesitu, nöö unu tuu ko dë di wan.

²⁹ Nöö a Gadu wojo, nöö unu wë da dee gbelingbelin böngö u Abahamu e, nöö woon kisi hii dee bunu Gadu bi paamusu ën taa a o da dee böngö fëën.

4

Aki Paulosu ta taki soni u di guduma mii.

¹ Wë nöö aki woo taki soni u wan guduma mii. A dë sö taa te a dë miii nöö an dë fëën seei eti e. Aluwasi fa a o abi hii dee gudu fëën tata a bakaten seei, ma a dë a sëmbë basu leti kuma saafu nöö.

² Hën tata o buta wanlö futuboi faa kiijëën dëën, nöö de o ta tjëën ta manda a soni fu tee juu fëën dou faa kumutu a sëmbë basu.

³ Wë nöö a fesi, nöö sö wë u bi dë tu e, dee sëmbë, a dee wëti u libisëmbë basu.

⁴ Ma teefa di leti juu u Gadu dou, nöö hën a manda di Womi Mii fëën ko a goonliba. Wan mujëë pai ën leti kumafa mujëë ta pai miii nöö. Hën seei bi dë a wëti basu tu e.

⁵ Nöö fa a ko dë, a ko faa puu u a wëti basu buta ko miii u Gadu „kumafa di guduma mii bi kumutu a dee futuboi basu„. Biga a buta u fuu kisi hii dee soni dee wan mii u Gadu musu kisi.

⁶ Nöö fu di u dë miii u Gadu, hën a manda di Akaa u di Womi Mii fëën ko a u hati. Hën ta mbei u ta wai ku ën ta kai ën “Taata”.

⁷ Wë nöö sö a waka e, dee sëmbë. Wan dë a wëti basu möön kuma wan saafuma e, ma un ko dë miii u Masa Gadu fu di unu ku „hën mii Jesosi„ Keesitu ko di wan. Nöö woon feni hii dee bunu dee a buta da unu fuun feni fu di un dë miii fëën e.

Aki Paulosu ta gandji da de möön u dee wëti hedi.

⁸ Ma kumafa u bi taki dë seei, dee sëmbë, a fesi wan bi sabi Masa Gadu e. Un bi dë saafu a wanlö soni de ta kai gadu basu, ta hoi dee wëti u de. Ma hii fu di dë na Gadu seei de bi dë.

⁹ Ma nöö di ten un ko sabi Masa Gadu, ma fuu taki, Masa Gadu hën fosu ko sabi unu, wë nöö andi mbei un toona go a dee lö sö sö wëti dë möön u du? Saafu un kè dë sö möön nö?

¹⁰ Wë biga misikuma un toona ta hoi wantu wëti apaiti möön di ta nama a liba, bamba daka, ee nasö jaa.

¹¹ Hën mbei wë mi ko fëëë da unu e, dee sëmbë, taa fa mi bi ta wooko a unu mindi dë, nöö u sö sö mi bi ta wooko.

¹² Dee sëmbë o, mi ta begi unu gaantangi e, taa be un toona ko dë leti kumafa i si mi dë aki. Biga mi wë da wan Isaëli sëmbë di bi ta hoi dee wëti fu mi ko bumbuu sëmbë a Gadu wojo. Te wan pisi nöö hën wë mi disa de ko ta libi söndö hoi de, kuma unu. Nöö hën fa u dë aki misikuma un kè ko tei dee lö wëti dë awaa ta hoi. Wë nöö an bunu e.

Aki Paulosu ta mëni de a di fa de bi libi ku ën.

„Dee sëmbë o, mi begi unu, un boo toona libi kumafa u bi dë e. Wë biga di mi bi ko a unu dë„, nöö na wan daka un bi libi hogi ku mi seei.

13 Mi kē fuun toona mēni di soni mbei mi bi ko fika ku unu ala. Mi bi suwaki e, nōō hēn wē un bi hoi mi. Nōō fa un bi hoi mi dē, nōō naandē a waka mbei mi konda di Buka u Masa Jesosi fosu toon da unu.

14 Nōō a di ten dē, na wan fuunu seei bi mbei mi fa u di siki di bi dē a mi sinkii. Fa a bi dē wan fuka soni da unu seei, ma tōku wan bi sōsō mi e, ma un tei mi leti kuma wan basia u Masa Gadu Kōndē, kuma Jesosi Keesitu seei. Sō wē un hoi mi bunu tjika.

15 Nōō di gaan wai di un bi ta wai ku mi naandē, naasē a dē? Wē biga mi sa piki sēmbē gbelin seei taa soni an fika di wan bi sa du da mi a di ten dē. Ee dee wojo sii fuunu a unu sinkii dē seei un bi sa diki puu, nōō un bi o puu de da mi.

16 Wē nōō andi mbei mi ku unu poi? Fu di ma ta kwei fan da unu ma mi ta fan ku unu gbelingbelin, nōō hēn di soni dē mbei mi ku unu ko felantima nō?

Aki Paulosu ta bai de

a dee sēmbē dee kē tjika de ko

buta a wēti basu.

17 Wē be mi bai unu a wan soni e, dee sēmbē. Fa i si dee sēmbē ta biinga ku unu naandē, nōō na bunu fuunu de kē sō e. Ma puu wē de kē puu unu a u, be un go ta kule a de baka.

18 Wē nōō ee wan sēmbē ta biinga ku unu nōō a bunu, ee a dē taa fu wan bambuu soni hedi. Biga sōseei mi ta biinga ku unu kaa. Ma nōō na te mi ta dē ku unu bifō mi ta biinga sō e, ma hiniwanten.

19 Biga fa i si u dē aki, dee mii, mi toona ko dē seei a wan gaan fuka fuunu hedi, leti kuma te wan mujēē dē a pai liba. Biga mi ta biinga seei da unu mōōn fu mi sa si di bambuu libi fu „Jesosi„ Keesitu a unu.

20 Ma fa mi ta bai unu aki seei, nōō na sō mi bi kē e. Mi bi kē fan ku unu a wan mōōn suti fasi. Fēēn mbei mi kē toona ko a unu ala mōōn hii soni, biga mi a' booko hedi fuunu gaanfa e.

Aki Paulosu ta konda soni u Abahamu ku de tu mujēē fēēn.

21 Wē un dee sēmbē dee kē libi a wēti basu dē, un konda da mi. Wan bi jei di oto u Abahamu di dē sikifisikifi a Gadu Buku o?

22 Wē a dē sō taa Abahamu bi pai tu womi mii. A pai wan ku di saafu mujēē, nōō a pai wan ku di tōōu mujēē fēēn.

23 Nōō di mii di a pai ku di saafu mujēē, hēn an pai a wan foondo fasi e. Ma di mii di a pai ku di tōōu mujēē fēēn hēn pai a wan foondo fasi. Biga „Abahamu ku ēn mujēē an bi pai wan daka, ma fu di„ Gadu bi paamusi de taa a o da de wan mii nōō hēn mbei de ko pai ēn.

24 Nōō di soni dē leti kuma wan nōngō sō, fu de tu buka Masa Gadu bi mbei ku libisēmbē. Boo taki ēn sō taa di saafu mujēē, hēn da di buka Masa Gadu bi mbei ku dee Isaēli sēmbē di a da de dee wēti fu de musu hoi. „Di fii mujēē, hēn da di buka Gadu bi mbei ku Abahamu di a paamusi ēn taa a o dēēn sōmēni soni fu di a ta biibi ēn hedi„. Nōō di saafu mujēē, hēn de kai Hagali, nōō dee bakamii fēēn tuu dē a saafu leti kuma de mama.

25 Wē nōō a di kununu de kai Sinai na Alabia Kōndē, nēēn hedi ala Gadu bi da dee Isaēli sēmbē dee wēti u de musu hoi. Nōō di kununu dē, a ta da u mēni di saafu mujēē. Biga leti kumafa i si Hagali ku dee mii fēēn bi dē a saafu, nōō sōseei Isaēli sēmbē dē a saafu u dee wēti Gadu da de naandē fu te kisi fa u dē aki eti. Sōseei fa Jelusalen sai dē, hēn da di hedi kōndē fu Isaēli sēmbē,

nöö hënseei dë kuma di saafu mujëë tu. Biga a dë a saafu te kisi hii dee sëmbë fëën. De tuu dë a wëti basu.

²⁶Ma de ta kai wan oto kôndë Jelusalen möön tu e, ma hën an dë a goonliba aki. A dë a Masa Gadu ala, nöö di naandë dë kuma di tööu mujëë u Abahamu. Biga an dë saafu a wëti basu. Ma hën a dë fiifi. Nöö hën wë da mama kôndë fuu e, dee sëmbë, biga u seei wa dë a wëti basu tu.

²⁷Nöö haika fa di Buku taki e. A taa:
I da wan mujëë ja bi ta pai,
ma fa u dë aki, i sa ko dë waiwai awaa.
Aluwasi fa bëë an bi njan i wan daka,
ma seei joo ta wai.
Fa i bi dë i wanwan tö naandë,
nöö joo ko abi mii seei tee a hia awaa
möön di mujëë di i si bi abi di manu fii.
Sö di Buku taki e.

²⁸Nöö ku sô wan paamusi u Gadu Sala pai di mii de kai Isaki e. Nöö sôseei, dee sëmbë, fa mi ku unu ko miii u Gadu aki, nöö di paamusi u Gadu hën wë mbei u ko sô e. Biga Gadu paamusi u taa ee u biibi a Masa Jesosi nöö u sa ko miii fëën.

²⁹Nöö leti kumafa i si di mii u Hagali bi ta toobi Isaki a di ten ala, nöö sô nöö a dë ku u fa i si u dë aki tu. Biga dee sëmbë dee dë libisëmbë mii nöö, de ta toobi u dee sëmbë dee ko dë miii u Gadu ku di kaakiti u di Akaa fëën.

³⁰Wë unfa di Buku u Gadu taki möön? A taa:
Jaka di saafu mujëë ku ën mii puu dë,
be de go.
Biga di gudu u di tata,
di saafu mii an o feni na wan kodo soni fëën möönsö.
Ma di mii u di fii mujëë, hën wanwan nöö o feni ën.
Sö a sikifi a di Buku e.

³¹Wë da sô a dë e, dee sëmbë. Wa dë kuma mii u di saafu mujëë e, ma u dë kuma mii u di fii mujëë.

5

Aki Paulosu ta taki da de u de fika fiifi.

¹Wë dee sëmbë o, di soni mbei Jesosi, Keesitu puu u a di sitaafu u dee wëti basu, hën da fuu musu ko dë fiifi e. Wë nöö be wan toona go dë a wëti basu möön, ma un boo fika fiifi sô wante.

²Nöö un haika. Mi Paulosu ta fan ku unu aki, taa ee wan sëmbë i tei di maaka u Isaëli a i sinkii fu hën musu mbei i ko bunu ku Gadu, nöö hën da di dëdë u Masa Jesosi, Keesitu an heepi i seei eti e.

³Fa i si mi fan aki, nöö sô nöö mi o ta fan ku hiniwan sëmbë di tei di maaka naandë, taa fa i seti hoi wëti dë kaa, nöö i musu ta hoi hii dee wëti tuu te dou, ufö i sa ko bunu ku Gadu.

⁴Nöö hën wë da un koti paati ku Jesosi, Keesitu. Biga un kumutu a di soni di Gadu du da u ku ën bunuhati toona kai go a wëti basu möön.

⁵Ma fa i si u dë aki, wa dë sô e. Biga uu sabi taa Masa Gadu buta u bumbuu sëmbë nëën wojo kaa fu di u ta biibi ën hedi. Nöö di Akaa u Gadu wë, hën ta mbei u abi di biibi dë e, dee sëmbë. Fëën mbei u dë ku wai ta mëni di daka di woo ko bumbuu ku telu a u libi.

⁶ Nöo fa i si u nama ku Jesosi Keesitu aki, ee i abi di maaka, ee ja abi di maaka, an dë wan wojo soni e. Ma ee u ta biibi a Masa Jesosi te di lobi u Gadu dë u si a u libi, nöo hën da di soni Gadu ta suku a u fa u dë aki.

⁷ Un bi ta libi seei tolooo nango e, dee sëmbë. Wë ambë seei ko tapa unu mbei wan ta piki dee tuutuu soni u bi konda da unu möön?

⁸ Fa de tja di njunjun lei ko a unu dë, nöo na a di Gadu di kai unu fuun ko sëmbë fëen a kumutu e.

⁹ Biga di lei dë o poi dee bumbuu lei fuunu tuu fiaa, leti kumafa te wan kodo fisi poi a suwa nöo a ta kisi dee otowan tuu.

¹⁰ Ma töku fa un ta hëngi nango ala seei, ma mi ta biibi a Masa taa woon toona ko nama ku mi nöömö. Ma nöo di sëmbë di tja di buuja libi naandë ko a unu, Masa Gadu o sitaafu ën nöömö e, aluwasi ambë a dë.

¹¹ So sëmbë ta mindi soni da mi taa mi ta manda sëmbë eti fu de musu koti di maaka u Isaëli a de sinkii ufö de sa ko bumbuu sëmbë a Gadu wojo. Wë nöo ee sö mi ta lei sëmbë tuu, nöo faandi mbei dee Isaëli sëmbë ta toobi mi sö? Biga di lei dë an ta toobi de e. Ma di lei u Masa Jesosi fa a dëdë da u a di lakpa pau puu u a wëti basu, hën ta toobi de.

¹² Wë dee sëmbë dee ta buta ku unu ku di maaka u Isaëli soni dë, nöo mi kë fu de koti de sen kamian kolom puu a de sinkii tuwë wante „be di maaka soni dë kaba a mi jesi„.

Aki Paulosu ta lei de fa

u de libi awaa.

¹³ Wë dee sëmbë u mi aki, Masa Gadu bi kai unu puu a wëti basu fuun ko dë fiifi tuu e. Ma na fuun pasa maaka go ta du hii dee hogi dee di hati fii ta manda i fii du. Kwetikweti! Ma un musu ta lobi unu na unu ta dini unu seei makandi.

¹⁴ Wë biga „ee wëti un kë hoi sö„, nöo be un hoi di wan kodo wëti aki. Hën da i musu ta lobi di otowan fii kumafa i lobi i seei. Nöo te i du sö kaa, nöo hën da i hoi hii dee wëti u Gadu tuu. Na wan u de o fika.

¹⁵ Ma ee un sai dë ta kosi dee otowan fuunu ta feti ta du taku soni ku unu seei makandi kuma taku mbeti, nöo un luku bunu e. Biga dee soni dë o poi unu kaba a sösö gbegedee.

Aki ta lei di tooka u te i dë a i seei leiki, ku te di Akaa

u Gadu ta tii i.

¹⁶ Nöo mi taki e, dee sëmbë, un musu buta unu seepi a di Akaa u Masa Gadu leiki, nöo wan o ta du dee hogi soni dee di hati fii ta manda i fii du.

¹⁷ Wë biga na dee lö soni dë di Akaa u Gadu ta kë a u e. Söseei di bunu di di Akaa kë fuu du, nöo nëen di hati fuu ta kë fuu du. Nöo sö de dë ta fia ku deseei makandi te wa sa du dee soni u kë du.

¹⁸ Ma ee i buta i seei a di Akaa u Gadu leiki, nöo an o dë fii musu ta duwengi i seei fii ta hoi peipei wëti möön e, biga di Akaa hën o ta tii i kaa.

¹⁹ Nöo dee soni di hati fii ta manda i fii du dee na ta kai ku Gadu, nöo hii sëmbë sa si taa de wë disi:

I ta libi jajo libi.

I ta libi fanafiti libi söndö sen.

I ta du peipei hogi a di së u manu ku mujëe soni.

²⁰ I ta dini oto gadu möön leki Masa Gadu.

I ta wisi sëmbë.

I ta buuse sëmbë.

I lo' fia ta buja ku sëmbë.

I ta djalusu da otowan.

I a' taku hatiboonu.

I ta biinga fii wanwan tö musu feni bunu.

I lo' u suku toobi ta pii oto ta paati sëmbë ku sëmbë.

I ta hai i seei puu a sëmbë dendu fu hiniwan piki soni hedi.

²¹ I ta haun ku sëmbë.

I ta bebe soni ta dööngö ta du fanjanfanjan soni, ta libi hii dee lö libi dë.

Nöo mi ta bai unu wan pasi möön kumafa mi bi bai unu kaa, taa dee lö sëmbë ta libi dee lö libi dë, de an o dë a dendu u dee sëmbë Gadu ta tii möönsö e.

²² Ma te di Akaa u Masa Gadu ta tii i, nöo dee soni aki o dë a i libi:

Joo ta lobi sëmbë.

Joo dë ku wai a i hati.

Joo abi kötöhati.

Joo abi pasensi.

Joo abi tjalihati u sëmbë.

Joo abi bunuhati.

Sëmbë o sa futoou i a soni.

²³ Joo abi sakafasi.

Joo ta tii i seei a soni.

Nöo ee u libi sö, nöo wa o poi na wan wëti e, dee sëmbë.

²⁴ Nöo u dee sëmbë dee dë u Jesosi Keesitu, nöo uu kaba ku dee awoo libi fuu dee u bi ta libi e. Fa u bi ta hangü u du dee soni dee an ta kai ku Gadu dë, nöo u kaba ku dee lö soni dë gbegedee. A dë sö kuma u tja de go peka disa a di lakpa pau ka de bi kii Masa Jesosi, fu de aan kaakiti a u liba möön.

²⁵ Biga fa u dë aki, di Akaa u Masa Gadu da u wan njunjun libi. Wë nöo di da u ën sö kaa, dee sëmbë, nöo un boo dë nëen leiki e.

²⁶ Wan musu ta suku hei ku në, biga dee soni dë ta tja haun ku toobi ko.

6

Aki Paulosu ta lei de fa u

de libi ku deseeli.

¹ Wë dee sëmbë u mi o, kandë wan fuunu du wan soni di an kai ku Gadu. Nöo te a pasa sö, nöo un dee sëmbë dee di Akaa u Gadu ta tii, nöo unu wë musu toona heepi di sëmbë dë tjëen a wan saapi fasi ko buta a pasi baka. Ma nöo fa i si i ta heepi ën dë, nöo i musu këni ku i seei tu e, biga i seei sa misi tu.

² Un musu ta heepi unu seei makandi ta tja dee fuka fuunu e, dee sëmbë. Nöo te un du sö kaa nöo hën da un ta hoi dee wëti u „Masa Jesosi” Keesitu.

³ Nöo ee wan sëmbë i ta mbei i seei hei ma ja dë sö, nöo hën da i ta ganjan i seei e.

⁴ Hiniwan sëmbë musu wegi di soni a ta du luku ee a bunu, ee an bunu, nöo joo dë waiwai. An o dë fii luku ee di fii kai ku di u di otowan.

⁵ Wë biga hiniwan sëmbë musu piki Gadu hënseei a dee soni dee a ta du.

⁶ Nöo ee wan sëmbë i ta lei Gadu wöutu a wan sëmbë, nöo i musu libi bunu ku di sëmbë dë ta paati dee bunu fii ku ën.

⁷ Nöo wan ganjan unu seepi e, dee sëmbë, „taa di Gadu puu u a wëti basu kaa nöo u sa libi fa u kë.” Wë biga wan sa hoi Gadu a sipootu.

Di soni di i paandi, hën nöo joo koti.

⁸ Di sëmbë di butëen seei ta du dee hogi soni dee hën hati ta mandëen, nöo a o poi kaba a söso u teego. Ma di sëmbë di butëen seei a di Akaa u Gadu basu ta du dee soni di Akaa ta mandëen, nöo hën di Akaa o da di libi u teego.

⁹ Nöo fëen mbei u musu ta du bunu nango nöömö. Wa musu wei möönsö. Nöo ee wa lasi hati nöo te di lepi ten dou nöo woo koti nöömö.

¹⁰ Fëen mbei ee u feni pasi u du wan sëmbë bunu nöo u musu du ën wante. Sö u musu libi ku hii sëmbë e, ma möön gaanfa ku dee oto sëmbë dee ta biibi Masa kuma u seei.

Aki Paulosu wasikö: de wan pasi möön ufö a tapa di biifi.

¹¹ Dee sëmbë o, un luku fa dee sikifi maaka a di pampia aki bigi.

¹² Ma mi ta mbei ën sö nöo, biga mi kë bai unu taa, dee sëmbë dee lo' u hoi wëti dë, sösö gafa tö nöo de ta suku a libisëmbë. Hën mbei wë de ta duwengi unu fuun musu tei di maaka u Isaëli a unu sinkii. Na fu wan oto soni mbei, ma de an kë fu dee oto sëmbë u de toobi de. Biga de o kisi sitaaфу ee de piki taa fa Jesosi, Keesitu dëdë a di lakpa pau dë, nöo a puu u a wëti basu.

¹³ Fa dee lö sëmbë koti de sinkii dë seei, ma de an ta hoi dee wëti u Gadu e. Ma de kë fuun musu koti di maaka be de feni gaan nëbai taa de wini unu tja ko a de sè.

¹⁴ Ma mi, fa mi dë aki, ma ta njan buka a oto soni möönsö möön leki di dëdë Masa Jesosi Keesitu dëdë da u a di lakpa pau. Hën nöo mi ta kai gaan soni. Nöo hën wë puu mi a dee soni u goonliba aki basu.

Wë biga dee soni goonliba sëmbë ta kai gaan soni, nöo ma ta kai de soni möön e. Söseei dee soni mi ta kai gaan soni aki, nöo de an dë wan wojo soni da de tu.

¹⁵ Mi taki e, dee sëmbë, ee i abi di maaka, ee ja abi di maaka, an dë wan wojo soni. Ma ee i ko feni libi a Masa Jesosi Keesitu te i ko wan hii njunjun sëmbë, nöo hën da di gaan soni fa u dë aki.

¹⁶ Nöo un dee sëmbë ta libi kumafa mi ta lei unu aki, mi ta begi Masa Gadu da unu tuu taa a musu dë ku unu ku ën bunuhati ta da unu kötöhati e. Biga fa un dë aki, unu da dee apaiti sëmbë u Gadu.

¹⁷ Nöo mi ta begi unu tu, taa wan mbei sëmbë toobi mi ku dee soni aki möön e. Biga dee maaka dee mi kisi u dee fon de bi foo mi fu Masa Jesosi hedi, nöo de tuu dë leti a mi sinkii aki kaa.

¹⁸ Söö. Wë mi o tapa aki, dee sëmbë. Masa Jesosi Keesitu musu dë ku unu ta tja unu ku ën bunuhati. A tan sö.

Di biifi Paulosu manda da dee biibima u Efeise

Wan wöutu a fesi.

Wë di pampia aki, hën da wan pampia di Paulosu mbei da dee biibima u Masa Jesosi dee dë a di köndë de kai Efeise. Paulosu bi dë wan u dee gaan tjabukama u Masa Jesosi de ta kai apösutu. Nöö fa a mbei di pampia aki, nöö a djei kuma na dee Efeise sëmbë wanwan a mbei ën da, ma a mbei ën da hii dee oto biibima tuu dee dë a di pisiwata naandë. Di a dë a Loomë a dunguwosu, nöö hën wë a mbei ën e.

Nöö a mbei ën u dee sëmbë musu sabi di pakisei Gadu abi taa a kë tja hii mundu ko buta a Masa Jesosi basu. Hën a toona ta leti de taa di de ku Masa Jesosi ko di wan kaa, nöö sëmbë musu si ën a de libi.

Aki di biifi seti.

¹ A di pampia aki mi ta manda gaan odi da unu dee biibima u Masa Gadu dee dë a Efeise ala, dee ta waka a Masa Jesosi baka ta biibi nëën tuutuu. Mi, Paulosu, ta fan ku unu aki, wan u dee tjabukama u Jesosi Keesitu di Gadu seei bi buta. Nöö mi ta mbei di pampia aki manda gaan odi da unu,

² taa Masa Gadu u Tata ku Masa Jesosi Keesitu musu dë ku unu ku de bunuhati. De musu da unu böö.

Aki Paulosu ta konda da de u dee bunu Gadu da u

fu Masa Jesosi hedi.

³ Wë dee sëmbë, mi ta hopo Masa Gadu në e, di Tata u Masa Jesosi Keesitu. Mi ta dëën tangi u di a naki u sò wan gaan kölöku. Biga a seeka di akaa fuu a hii futu, nöö a da u hii dee bunu fëën köndë tuu dee a abi u da u, u di u ku Jesosi, Keesitu ko di wan.

⁴ Biga gaanduwe kaa bifö Masa Gadu mbei goonliba, nöö a bi pakisei buta dë kaa taa a o tei u ko sëmbë fëën, u di Masa Jesosi o dëdë da u fuu ku ën sa ko di wan. A bi buta taa a o seeka u fuu musu ko dë gbelingbelin söndö föutu nëën wojo. U di a lobi u hedi,

⁵ hën mbei a bi buta taa a o tei u ko mii fëën fu di u ku Jesosi Keesitu o ko di wan. Nöö sò a feni ën taa a bunu.

⁶ Nöö fëën hedi a musu kisi gafa ku gaan nëbai e, u di gaan bunuhati fëën di a abi da u te a mbei u ku di lobi mii fëën, Masa Jesosi, ko di wan. Nöö u söso seei a du ën da u o.

⁷ Nöö di bunuhati di Masa Gadu abi fuu dë, a bigi pasa maaka e, dee sëmbë. Biga fu di Masa Jesosi dëdë tuwëën buuu a goon paka da dee wogi du fuu da u dë, hën mbei Masa Gadu puu u a bëë. Sò wan gaan bunuhati a abi e!

⁸ Nöö hën a toona da u fusutan. A limbo u wojo gbegede seei.

⁹⁻¹⁰ Biga a mbei u ko sabi dee tjubitjubi pakisei dee a bi abi nëën hati, fu di a o manda Masa Jesosi ko a goonliba.

Biga a bi pakisei ën buta dë kaa taa te di juu dou nöö a o tja hii soni u mundu ko buta a Masa Jesosi, Keesitu maun. Dee soni u goonliba aki ku dee u liba ala tuu a o buta nëën maun, fu hën musu dë Masa u hii de tuu. A bi buta dee soni a fesi kaa, nöö awaa a mbei u ko sabi de.

¹¹ Nöö söseei a buta a fesi taa a o tei u ko sëmbë fëën fu di u ku Masa Jesosi Keesitu o ko di wan. Wë nöö sò a pasa tuu, biga di soni di Gadu kë hën nöö o pasa nöömö.

12 Nöo ɽu Isaëli sëmbë, u musu tja nëbai ko da Gadu e, u di fa a ta heepi u tjika. Biga ɽu bi ta mëni di Keesitu faa musu ko heepi u nöömö, nöo hën di a ko, nöo ɽu fosu ko biibi nëën. Hën mbei u musu tja nëbai ko da Gadu.

13 Wë nöo unu seepi tu, ɽun dee sëmbë na u Isaëli, di unu ku Masa Jesosi ko di wan, nöo hën Masa Gadu da unu di Akaa fëën di a bi paamusi taa a o da dee sëmbë fëën. Biga di Bunu Buka Gadu manda da u aki, hën da di leti buka di ta lei u fa Gadu ta heepi u fuu kumutu a didibi faja. Nöo di un jei ën nöo hën un piki ën, nöo hën a da unu di Akaa fëën kuma wan nöbu taa un dë sëmbë fëën.

14 Nöo di Akaa u Gadu di u ta taki aki, a dë kuma wan gaan gudu a da u a fesi e, fu lei u taa te di juu dou faa puu u a hogi basu ku telu, nöo a o da u hii dee soni tuu dee a bi paamusi u da dee sëmbë fëën.

Wë nöo, dee sëmbë, mi taki e, fu dee soni dë hedi mbei Masa Gadu musu kisi gafa ku gaan nëbai e!

Aki Paulosu ta begi da dee sëmbë a peipei soni.

15-17 Wë nöo dee sëmbë, ɽdi un dë a dendu u dee sëmbë u Gadu dee o feni dee bunu fëën, nöo hën mbei mi ta begi Masa Gadu, di nëbai Tata fuu ku di Gadu u Masa Jesosi Keesitu, da unu. Mi ta dëën tangi fuunu hedi nöömö. Biga mi jei fa un ko ta biibi a Masa Jesosi tjika, ku fa un ta lobi dee oto biibima kuma un a hii kamian.

Nöo mi ta begi Gadu u di Akaa fëën musu da unu kõni ku fusutan fuun musu sabi Gadu möön bunu.

18 Mi ta begi taa wojo fuunu musu ko limbo fuun sa ko sabi di bunu di a bi kai unu fuun musu feni nëën. Biga a paamusi u wanlö gaan waiti gudu faa da u, fu di u dë sëmbë fëën hedi.

19-20 Nöo mi ta begi tu taa un musu ko sabi di kaakiti u Gadu di dë a u, fa a bigi tjika, be a ta wooko a unu libi. Biga ku di wan seei kaakiti dë a weki ɽJesosi ɽ Keesitu puu a dëdë tjëën go buta nëën letimaun së a liba ala.

21 A tei ën buta a hii dee kõnu ku dee gaama ku dee kabiteni ku hii dee takima u kõndë ku dee u mundu ala tuu liba. Nöo hën a dëën nëbai pasa hii dee sëmbë u di ten aki tee kisi ku di oto ten di o ko a baka.

22 Da sö Masa Gadu buta hii soni a Masa Jesosi basu e. Söseei a butëën hedima u hii soni fu u dee biibima tu. Biga leti kumafa i hedi abi taki a hii i sinkii liba, nöo sö Masa Jesosi ku u dee sëmbë fëën dë tu. Hën ta taki a u liba.

23 Nöo fa u ku ën dë di wan sinkii aki, nöo a buta taa u ku hii mundu tuu o ko dë gbelingbelin ɽkumafa Gadu seei bi pakisei fuu dë.

2

Aki Paulosu ta mëni dee sëmbë fa de bi dë kuma dëdëdëdë sëmbë ma Gadu puu de

a di dëdë dë.

1 Dee sëmbë o, fa un bi dë a fesi ta libi a di hogihati fasi fuunu dë, nöo un bi ta böö nöo e, ma wan bi dë ku libi eti ɽbiga unu ku Masa Jesosi bi dë paatipaati.

2 Un bi ta libi kumafa dee sëmbë u di goonliba an dë u Masa Gadu ta libi. A di didibi baka un bi ta waka e, di abi taki a dee oto didibi dee dë a mundu ala tuu. Nöo fa u dë aki a ta wooko eti a dee sëmbë hati dee na kë piki Gadu buka.

3 Nöo sö u seei bi ta libi a fesi tu e. U tuu bi ta libi kumafa u kë. Hiniwan hogi pakisei, hiniwan taku mëni di ko a u hati, ku dee soni Gadu taa wa musu du, nöo de tuu u bi ta du. Sö u bi dë makandi tjika ku dee sëmbë dee fiti u di hatiboonu u Gadu musu kai a de liba.

⁴ Ma Masa Gadu bi a' tjalihati fuu te tjika. A lobi u gaanfa e.

⁵ Biga aluwasi fa u bi dē paatipaati ku en ta libi dee takulibi fuu seei, ma tōku a puu u a di lö dēdē dē hēn a da u libi. Biga fa Masa Gadu weki „Jesosi, Keesitu a dēdē dē, nōö u ku en tuu a bi weki makandi dē kaa. Nōö sō wē i si di bunuhati u Masa Gadu mbei u kumutu a di sitaafu u di didibi faja e, dee sēmbē.

⁶ Nōö fa Masa Gadu tja Jesosi Keesitu go buta nēen leti maun sē a liba ala faa taki a hii mundu liba dē, nōö hēn da u ku en dē makandi ala kaa e. Biga u ku Masa Jesosi dē di wan.

⁷ Nōö di soni mbei Gadu wooko sō ku u mbei u ku Jesosi Keesitu ko di wan. A du en fu hii mundu musu ta si nōömō taa sō di bunuhati fēen bigi te pasa maaka.

⁸ Biga di bunuhati u Masa Gadu hēn wē mbei un kumutu a didibi faja e, dee sēmbē. Sō a du da unu u sōsō, fu di un biibi a Masa Jesosi liba hedi. Biga na wan mōiti un mbei mbei un feni en e. Gadu wanwan hēn mbei.

⁹ Nōö hēn da na wan sēmbē sa ta waka ta njan buka taa: “Mi seei biinga mbei mi feni di lö bunu aki.” Nōnō, na seei.

¹⁰ Ma Masa Gadu hēn mbei u ku Jesosi Keesitu ko di wan. A mbei u ko wan hii njunjun sēmbē, fuu sa du dee bunu soni dee a bi buta a fesi kaa fuu musu ta du.

Aki Paulosu ta konda da de

taa de tuu ko di wan.

¹¹ Un dee sēmbē dee an dē Isaēli sēmbē, wan musu fēekētē di fa unu ku Masa Gadu bi dē longi e. U Isaēli sēmbē bi ta njan buka ta kosi unu taa fa un sai dē wan abi di maaka u Gadu a unu sinkii kuma u. (Ma hii fu di dē, a bi dē wan maaka u sinkii nōö. Libisēmbē nōö butēen.)

¹² Wan bi dē a dendu u dee sēmbē Masa Gadu bi tei fēen seei, kuma u Isaēli sēmbē. Biga ku u dee lö sēmbē aki Masa Gadu bi a' buka. A paamusi u sōmēni soni, ma unu, wan bi dē a dendu. Un bi ta libi fuunu a di goonliba aki nōö a kaba. Wan bi abi di biibi taa sō wanlö gaan bunu Gadu bi abi u da unu. Wan bi ta mēni Gadu seei. Sō un bi ta dē di ten wan bi dē ku Masa Jesosi Keesitu.

¹³ Ma fa u dē aki, nōö wan dē sō mōön e. Hii soni ko tooka. Unu ku Jesosi Keesitu ko dē di wan, u di a dēdē da unu tuwēen buuu a goon paka di paima da unu. Un bi dē longi ma un ko zuntu awaa.

¹⁴ Biga Masa Jesosi mbei u Isaēli sēmbē ku un dee oto lö sēmbē ko fii ku u seei awaa. A booko dee soni dee bi mbei u ku unu bi dē felantima, puu a pasi.

¹⁵ Biga fa a dēdē tuwēen buuu a goon dē, „nōö a paka Gadu di paima u dee pepei wēti dee Gadu bi da u Isaēli sēmbē fuu hoi, „A kaba dee wēti dē a sōsō fiaa, hēn a mbei u ku unu makandi ko wan hii oto pei sēmbē, njunjun wan. Biga u tuu ko dē wan a Masa Jesosi.

¹⁶ Nōö di u ko dē di wan sēmbē, nōö wa sa buuse u seei mōön e. Biga a di lakpa pau ka Masa Jesosi dēdē da u dē, naandē a mbei u tuu ku Masa Gadu toona ko fii, nōö naandē di taki fuu ku unu koti.

¹⁷ Fa Masa Jesosi du dē, dee sēmbē, nōö hēn tja di buka ko da hii u tuu, taa dee sēmbē bi dē longi ku Gadu ku dee sēmbē bi dē zuntu ku Gadu tuu sa abi wan libi makandi ku en. Sōseei u tuu sa abi wan libi makandi ku u seei tu.

¹⁸ Biga fa u tuu ko nama ku Masa Jesosi aki, ee i dē Isaēli sēmbē, ee i dē oto lö sēmbē, ma di Akaa u Masa Gadu sa fan ku Gadu da i, be a limbo fesi da i awaa.

¹⁹ Nöo da sö e, dee sëmbë. Fa wan bi dë a Isaëli lö, nöo un bi dë döösë sëmbë. Ma fa u dë aki, wan dë sö möön. Un ko dë goonmii u Masa Gadu köndë makandi ku u dee oto sëmbë fëën. Un ko wosu dendu sëmbë u Gadu seei.

²⁰ Fa dee fesiten tjabukama u Masa Gadu ku dee tjabukama u Masa Jesosi bi ta konda soni u Masa Jesosi da sëmbë dë, nöo de seti di wooke kuma te wan sëmbë ta seti wan wosu buta di goonsei. Nöo hën u ko dë sitonu a di goonsei dë liba, ma „Masa, Jesosi Keesitu seei da di gaan posu.

²¹ Biga hën ta hoi hii di wosu makandi ta seeka u dee biibima fëën, fuu ko dë wan apaiti wosu gbelingbelin dëën.

²² Nöo unu seei dë a dendu tu. Wë biga fa unu ku Masa Jesosi ko di wan dë, nöo di Akaa fëën ta seeka unu ku hii dee oto biibima u Masa Jesosi tuu makandi fuun ko dë wan wosu ka Gadu ta libi.

3

Aki Paulosu ta taki da de

fa di wooke fëën dë.

¹ Nöo fëën hedi mi, Paulosu, ta begi da unu ka mi dë a dunguwosu aki e. Nöo di soni mbei de tja mi ko buta aki, fu di mi konda di buka u Jesosi Keesitu da un dee sëmbë dee na Isaëli lö taa un sa ko dë sëmbë u Gadu tu.

² Nöo mi ta wooke leti kumafa un sabi kaa taa sö wan wooke Gadu bi da mi, fu mi konda di Buka u di bunuhati u Gadu da unu.

³⁻⁶ Biga a lei mi a wan apaiti fasi di tjubitjubi pakisei fëën di a bi abi, taa na Isaëli sëmbë wanwan sa feni di bunu u Gadu e, ma dee sëmbë dee na dë Isaëli sëmbë seei sa feni ën tu. A ta kai u tuu fuu ko nëën fuu ko di wan sinkii, be u feni dee bunu dee a bi paamusi u fu di u piki di buka u „Masa Jesosi, Keesitu.

Nöo di soni aki, dee fesiten sëmbë an bi sabi ën wan bëtë e. Ma fa u dë aki, di Akaa u Masa Gadu lei mi ku dee oto tjabukama u Masa Jesosi dee ta konda di buka u Gadu taa hii pei sëmbë sa ko a Gadu. Nöo mi bi sikifi di soni aki da unu kaa, nöo ee un lesi ën, nöo woon si fa mi fusutan di pakisei di Masa Gadu bi abi dë tjika, mbei a manda „Jesosi, Keesitu ko a goonliba.

⁷ Nöo Masa Gadu naki mi kölöku te a buta mi a di wooke aki, fu mi konda di buka aki da lanti. Ku di gaan kaakiti fëën a seeka mi buta a di wooke e.

⁸ Aluwasi fa mi bi dë di möön sösö wan u dee biibima tuu, ma tökusei Masa Gadu da mi di buka fëën aki ku ën bunuhati. A manda mi fu mi sa kondëën da un dee sëmbë dee na Isaëli lö, taa ee un ko bia piki di buka u „Jesosi, Keesitu, nöo unu seei sa feni dee bunu u Gadu tu. Biga Gadu abi gaan hia bunu te pasa fa hii sëmbë sa pakisei, faa da dee sëmbë fëën. Nöo un dee sëmbë na u Isaëli seei sa feni de tu.

⁹ Fa Gadu buta mi a di wooke aki, dee sëmbë, nöo a manda mi u mi mbei hii sëmbë musu ko sabi limbolimbo fa soni musu waka bifö a sa ko dë kumafa Gadu bi pakisei ën. Biga a fesi Masa Gadu, di bi mbei hii soni u mundu bi pakisei di soni aki kaa, ma a bi hoi ën tjubitjubi nëën hati ufö. Nöo awa ufö a mbei sëmbë ko sabi ën.

¹⁰ Nöo di soni mbei a du ën sö, fu dee gaan hedima u mundu dee abi taki a liba ala, musu sa si a u dee biibima fëën kumafa Gadu abi peipei köni tjika.

¹¹ A du ën leti kumafa a bi ta pakisei nëën hati nöömö taa sö a o manda Jesosi Keesitu u Masa ko a di goonliba aki.

¹² Nöo fu di u biibi nëën te u ku ën ko di wan aki, nöo u tuu sa ko a Gadu waiwai awaa söndö fëëë. Biga u sabi taa Gadu o limbo fesi da u fu Masa Jesosi hedi.

¹³ Nöo fëen hedi, dee sëmbë, fa mi dë a dunguwosu aki seei, ma mi ta begi unu fu wan musu lasi hati u dee sitaafu mi ta tja da unu aki e. Biga unu seei feni gaan wini nëen.

Aki Paulosu ta begi da

dee sëmbë möön.

¹⁴ Dee sëmbë o, „Gadu naki u kölöku tuu e,„ nöo fëen hedi mi ta tjökö kini a goon ta begi u Tata a liba,

¹⁵ di abi hii dee peipei sëmbë u mundu tuu, taa

¹⁶ fa a abi bunu pasa maaka tjika dë, nöo be a mbei di Akaa fëen da unu gaan degihati fuun ta waka nëen baka ku wan hati.

¹⁷ Nöo mi ta begi ën tu fuun musu sa biibi a „Jesosi,“ Keesitu möönmöön, be a ko dë bööböö a unu hati kuma nëen seei wosu a dë.

Nöo mi ta begi ën da unu tu, u di lobi un ta lobi Masa Gadu ku libisëmbë tuu musu göö ko bigi, kuma wan pau di lutu fëen go fundu a goon te an sa hön kai.

¹⁸ Nöo te a dë sö kaa, nöo unu ku dee oto biibima tuu o ko sabi di lobi di „Masa Jesosi,“ Keesitu lobi u, fa a hei, fa a fundu, fa a baai tjika te a pasa hii soni u mundu.

¹⁹ Di lobi a lobi u dë, sëmbë an tjika u sabi kaba fëen möönsö e. Ma töku mi ta begi da unu be un musu sa sabi ën tee a bebe unu. Sö mi ta begi da unu, dee sëmbë.

²⁰ Söö. Wë dee sëmbë o, Masa Gadu musu kisi gafa e. Biga fa di gaan kaakiti fëen ta wooko a u hati tjika aki, nöo a sa du soni gaanfa möön leki fa u ta begi ën. A sa du soni pasa ka pakisei fuu sa dou seei.

²¹ Fa a sai dë, dee sëmbë, a musu kisi gafa a u dee sëmbë fëen e, fu di u ku Jesosi Keesitu ko dë di wan. Gafa fëen an musu kaba a mundu möönsö fu ten na ten. A tan sö.

4

Aki Paulosu ta lei de taa

di wan sëmbë nöo u dë.

¹ Wë dee sëmbë, fa i si mi dë a dunguwosu aki, nöo fu di Buka u Masa Jesosi di mi ta konda hedi e. Nöo mi ta begi unu gaantangi taa fa i si Gadu tei unu fuun ko sëmbë fëen dë kaa, nöo un libi kumafa a fiti u sëmbë fëen musu libi.

² Biga un musu a' sakafasi ku saapifasi. Un musu ta hoi pasensi da unu seei nöömö. Un musu ta tei di otowan fii kumafa a dë, fu di un lobi ën hedi.

³ Söseei un musu mbei möiti be un ta libi fiifii ku unu seei. Un musu dë ku wan hati kumafa di Akaa u Masa Gadu buta unu.

⁴ Biga fa u dë peipei sëmbë seei, ma di wan kodo nöo u dë e. Di wan Akaa u Gadu hën nöo dë a u tuu hati. Di wan bakaten bunu nöo a paamusi u tuu, fu di u dë sëmbë fëen.

⁵ Wan Masa nöo u tuu abi, di wan biibi nöo u tuu ta biibi, di wan kodo dopu nöo u tuu dopu.

⁶ Wan Gadu nöo u abi, hën da di Tata fuu tuu. Hën da di Masa u hii mundu, di ta libi a u dee sëmbë fëen tuu hati ta wooko a u liba fuu musu du andi a kë.

⁷ Nöo sö a dë e, dee sëmbë, ma töku fa u dë di wan seei, ma u tooka. Biga „Jesosi,“ Keesitu paati dee peipei kóni fëen da u ku ën bunuhati kumafa a fiti.

⁸ Fëen mbei Gadu Buku taki soni „u Masa Jesosi,“ taa:

A toona hopo go a Gadu Köndë a liba ala.

Nöo fa a go dë, nöo a go kuma wan winima ku gaan nëbai seei,

ta tja sɛmbɛ te a hia ko nɛɛn baka.

Nɔɔ di a go, nɔɔ hɛn a paati pepei gudu da sɛmbɛ.

⁹ Wɛ nɔɔ unfa di oto dɛ waka taa a toona hopo go a liba? Wɛ di a taa toona a toona, nɔɔ hɛn da a bi dɛ a Gadu Kɔndɛ a liba ala a fesi, bifɔ a saka ko a di kaba lagi kamian a di goonliba aki.

¹⁰ Wɛ da sɔ e, dee sɛmbɛ. Di Sɛmbɛ di bi saka ko aki, hɛnseei toona subi go pasa dee bundji go te ka di wojo fii an sa si dou, tee dou a di kaba hei kamian a Gadu Kɔndɛ ala seei, faa sa dɛ Tiima a hii mundu liba.

¹¹ Hɛn seei wɛ da di Sɛmbɛ di bi paati dee pepei wooko da u dee sɛmbɛ fɛɛn. So fuu a buta fuu dɛ gaan tjabukama dɛɛn. So fuu a buta fuu musu kisi fan fɛɛn ta konda da sɛmbɛ. So fuu a buta fuu ta waka ta konda da sɛmbɛ taa sɔ a dɛdɛ da de nɔɔ be de bia libi ko nɛɛn. So fuu a buta fuu tan a wan kamian ta tii dee otowan ta tja de. So fuu a buta fuu ta lei otowan.

¹²⁻¹³ Nɔɔ sɔ u dee wookoma fɛɛn dɛ pepei, ma di wan wooko nɔɔ a da u. Hɛn da fuu musu ta seeka dee sɛmbɛ fɛɛn, be de du di wooko fɛɛn kumafa a fiti ta heepi de na de. Nɔɔ a di fasi dɛ woo go a fesi a di biibi, te u tuu sa ko ta libi ku u seei ku wan hati kumafa Gadu kɛ. Biga u da sɛmbɛ u Masa Jesosi Keesitu. U dɛɛn sinkii. Nɔɔ u musu ta lei soni u di Womi Mii u Gadu dɛ te u sabi ɛn humbuu kumafa a dɛ, nɔɔ woo ko dɛ gbelingbelin kumafa Masa Jesosi seei dɛ sɔndɔ fɔutu.

¹⁴ Wa o dɛ kuma miii mɔɔn, u sɛmbɛ ta tja nango ta ko ku dee ganjanganjan lei u de. Di sɛmbɛ aki taki disɛ da i, i piki. Di otowan taki sɔ, i piki. Dee lɔ sɛmbɛ dɛ ta mbei mɔiti u de ganjan sɛmbɛ tja go a sɔsɔ sɛ.

¹⁵ Ma na be uu du sɔ e. Ma un boo ta fan dee leti soni dee Masa Gadu kɛ fuu ta fan gbelin da sɛmbɛ ku lobi. Nɔɔ woo ta ko dɛ kuma Jesosi, Keesitu, di hedima fuu, a hii fasi.

¹⁶ Nɔɔ fa Masa Jesosi dɛ hedima fuu dɛ, a ta seeka u dee sɛmbɛ fɛɛn be hiniwan fuu musu dɛ leti ka i fiti a di wooko, kumafa dee kamiankamian a sɛmbɛ sinkii fiti ku deseei. Nɔɔ te hiniwan sɛmbɛ ta du ɛn wooko kumafa a fiti ta lobi dee otowan fɛɛn, nɔɔ woo nango a fesi seei.

Aki Paulosu ta bai dee sɛmbɛ taa de an musu libi dee awoo

libi mɔɔn.

¹⁷ Fɛɛn hedi, dee sɛmbɛ, mi ta tei di nɛ u Masa Jesosi bai unu taa wan musu libi kumafa dee sɛmbɛ dee an ta dɛ ku Masa Gadu a wan sɛ ta libi e. Dee sɛmbɛ dɛ, fusutan u de poi gaanduue.

¹⁸ Pakisei u de dungu. De dɛ longi ku di teego libi u Masa Gadu. Biga de niinga u piki ɛn buka tee de an sabi wan wojo soni fɛɛn.

¹⁹ De an ta fii sen da na wan soni mɔɔn. De ta waka a dee taku giii u de hati baka ta du fanafiti soni tee a ko de sinkii kaa. Nɔɔ soni an dɛ mɔɔn di sa hogi da de te de an sa du ɛn.

²⁰ Ma unu, wan musu dɛ sɔ e. Na a dee lɔ fasi aki u bi lei unu taa sɔ dee sɛmbɛ u Jesosi, Keesitu ta libi.

²¹ Biga un bi kisi lei fɛɛn, na sɔ nɔ? Aai, de bi lei unu dee tuutuu soni dee de bi si ku dee de bi jei a Masa Jesosi.

²² De bi lei unu taa un musu kaba ku dee awoo fasi dee un bi abi a fesi. Biga di hatibɔɔ fuu libisɛmbɛ hɛn ta ganjan u ta tja u go kaba a sɔsɔ.

²³ Nɔɔ un musu bia disa di awoo fasi dɛ. Di hatibɔɔ fuunu ku di pakisei fuunu musu tooka te i ko wan hii njunjun sɛmbɛ.

²⁴ Un musu tei di njunjun libi di Gadu da u, nɔɔ woon ko ta djeesi ɛn seei. Biga hɛn ta libi bunu a hii futu ku limbo hati.

²⁵ Wë nöö fa u ta taki ën aki, dee sëmbë, nöö un musu kaba ku mindi soni e, nöö un fan ku unu seei gbelingbelin söndö ganjan. Biga di wan sëmbë nöö u dë, sëmbë u Masa Jesosi.

²⁶ Ee hati fii boonu, nöö i musu mëni i seei fu ja du hogi. Sonu an musu go bifö hati fii kötö.

²⁷ Biga di didibi ta suku pasi faa buta i fii du hogi, nöö na dëen pasi e.

²⁸ Ee wan sëmbë i bi ta fufuu, nöö be i disa. Be i go suku bumbuu wooko ta du, fii sa ta heepi i seei te dou ku dee sëmbë dee dë a fuka.

²⁹ Na mbei poipoi fan kumutu a i buka e, ma be i ta fan dee lö fan dee dë fanöudu fu sa heepi sëmbë tja de ko a fesi.

³⁰ Wan musu libi a wan fasi di an fiti te nöö di Akaa u Masa Gadu kisi tjali e. Biga ku di Akaa dë seei Masa Gadu maaka u, fu tee di daka dou fu Masa Jesosi Keesitu musu toona saka ko a goonliba nöö woo kumutu a sitaafu ku telu awaa.

³¹ Nöö un musu kaba ku hoi sëmbë a bëë, dee sëmbë, ku di gandji un ta gandji da sëmbë. Un musu kaba ku dee lö libi aki e: hatiboonu, buja ku sëmbë, feti, kosi sëmbë. Hii dee sootu takuhati libi dë tuu fiaa musu kaba a unu.

³² Ma un musu ta fii ku di otowan fii ta tjali ku ën. Un musu ta dëen paadon. Biga fa „Masa Jesosi, Keesitu dëdë da i dë, nöö Gadu an ta hoi i a bëë möön e. Nöö sö u taki e, dee sëmbë.

5

Aki Paulosu ta lei dee sëmbë fa u de libi kuma sëmbë

di dë a limbo.

¹ Dee sëmbë o, unu da dee lobi mii u Masa Gadu, nöö un musu mbei möiti be un ko kuma hën, kumafa wan mii kë djeesi ën tata a soni.

² Un musu lobi unu seei gaanfa e, kumafa „Masa Jesosi, Keesitu lobi u tefa a tuwë hën libi da u, kuma wan paima di a paka di suti da Gadu.

³ Un musu kaba ku dee peipei takulibi a di së u manu ku mujëë soni. Un musu kaba ku langa hati ku jajo libi. Dee lö libi dë an fiti unu, biga unu da sëmbë u Masa Gadu „nöö un dë limbolimbo nëen wojo kaa.

⁴ Sösei dee peipei wisiwasi fan an musu ta kumutu a unu buka e, dee dëewojo fan, ku dee gaan sipootu, ku dee fanafiti fan a manu ku mujëë soni. Dee lö fan dë an ta fiti wan sëmbë u Gadu. Ka fii dë ta fan dee lö fan dë, nöö a möön bunu fii ta da Gadu tangi.

⁵ Nöö wan soni i musu sabi gbelin e, dee sëmbë. Hën da, te Gadu buta „Jesosi, Keesitu ko kënu a hii mundu liba kaa, nöö di bunu fëen këndë an o dë u dee sëmbë dee ta libi dee fanafiti libi ku dee mötjö libi u di goonliba aki. Sösei an o dë u dee sëmbë dee abi langahati u soni tu. Biga dee langahatima ku dee sëmbë ta begi oto gadu tuu dë di wan soni. Nöö di bunu u Gadu Köndë, dee lö pei sëmbë dë an o feni ën seei.

⁶ Wan musu mbei na wan sëmbë ganjan unu ku dee söso fan u de taa Gadu u dini an taanga sö. Biga u dee lö libi naandë hedi mbei Gadu o kuutu dee sëmbë dee an kë piki ën buka, ku gaan hatiboonu seei.

⁷ Hën mbei wan musu nama ku de.

⁸ Biga a fesi unu seei bi dë a dungu tu, ma fa u dë aki wan dë sö möön. Masa Gadu tja unu ko buta a limbo, nöö un musu libi kuma sëmbë di dë a di së u limbo.

⁹ Biga ee i dë a di së u limbo, nöö joo ta libi bunu ku sëmbë, nöö joo ta libi letileti söndö ganjan.

10 Nöo un musu mbei möiti fuun sabi di libi di Gadu lobi e, dee sëmbë.

11 Wan musu a' bisi ku dee soni dee sëmbë dë a dungu ta du, biga de an ta tja heepi ko. Ma un musu libi a sô wan fasi u dee sëmbë dë musu si taa de an ta libi bunu.

12 Biga dee soni de ta du tjubitjubi dë, de dë gaan sen soni seei, te ja sa tei de taki da sëmbë.

13 Ma fa woon ta libi bunu a de dendu dë, nöo deseeri o ko si taa de an ta libi bunu. Biga ka limbo dë nöo naandë sëmbë ta si hii soni gbegedee.

14 Fëen hedi de taa:

Di sëmbë di dë a duumi dë, weki.
Hopo kumutu a dee dëdë sëmbë mindi dë,
be di Keesitu tuwë faja da i fii si limbo.

15 Fëen mbei i musu mëni i seei kumafa i ta tja i libi e. Wan musu libi kuma dee sëmbë söndö fusutan, ma un musu libi kuma sëmbë di a' bumbuu pakisei.

16 Nöo ee i feni okasi fii du wan bunu soni, nöo i musu du ën wante e, biga u dë a wan gaan hogi ten.

17 Fëen hedi ja musu dë kuma dee wisiwasima, ma i musu mbei möiti fii sabi andi Gadu kë a i.

18 Ja musu bebe soni te a buta i nëen leiki e, biga hën ta buta i ko kaba-a-sösöma. Ma be i ta dë a di Akaa u Gadu leiki.

19 Nöo un tei dee kanda dë a di Buku u Gadu ku dee oto kanda dee biibima mindi u ta gafa Gadu, nöo un ta fan ku unu seei ku de ta kanda ta mbei piizii da Masa Gadu ku hii unu hati.

20 Sô un musu ta da Masa Gadu u Tata tangi hiniwan juu e, dee sëmbë. I musu ta dëen tangi u hii soni a di në u Masa Jesosi Keesitu.

Aki Paulosu ta fan ku dee womi ku dee mujëë fa u de musu

libi ku deseeri.

21 Sô wë, dee sëmbë, un musu ta saka da unu seei e, fu di un ta lesipeki Gadu.

22 Dee mujëë, un musu ta saka da unu manu fu di un ta nama ku Masa Jesosi.

23 Biga di womi hën da hedima fëen mujëë, leti kumafa Jesosi, Keesitu dë hedima fuu dee sëmbë fëen. Hën seei da di Heepima fuu tu. Hën ku u dë leti kumafa sëmbë hedi ku ën sinkii dë, biga hën ta taki a u liba.

24 Nöo leti kumafa u dee biibima ta saka da Masa Jesosi, Keesitu a hii soni, söseei dee mujëë musu ta saka da de manu a hii soni.

25 Nöo un dee womi, un musu lobi dee mujëë fuunu leti kumafa Jesosi, Keesitu lobi u dee sëmbë fëen teefa a dëdë da u.

26 Nöo di soni mbei a dëdë da u e, dee sëmbë, faa musu puu sundju a u hati seeka u buta gbelingbelin söndö föutu da Masa Gadu. Biga a bi konda di buka fëen da u te a kaba nöo hën a manda u fuu go dopu ku wata. Nöo a de tu fasi dë a buta u ko dë limbolimbo.

27 Nöo a du ën sô fuu sa dë wanlö waiti sëmbë dëen seei gbelingbelin söndö föutu a u hati, kuma wan mujëë de seeka bisi buta dililii faa toou ku wan womi.

28 Nöo sô dee womi musu ta lobi dee mujëë u de kuma deseeri sinkii. Biga fa i si manu ku mujëë sai dë kaa, nöo de dë di wan sinkii e. Nöo hën mbei te wan womi ta lobi ën mujëë, nöo hën da a ta lobi ën seei.

29 Biga leti kumafa na wan sëmbë ta buuse hënseei sinkii ma a ta lobi ën ta dëen njanjan ta tjubi ën faa musu dë bumbuu, nöo leti sô nöo Masa Jesosi ta lobi u dee sëmbë fëen ta sölogu u fuu musu dë bumbuu.

30 Biga u da dee kamiankamian fëen sinkii.

³¹ Fëen mbei a sikifi a Gadu Buku taa:
Ee wan womi i dë nöö i a' wan mujëë fii,
nöö i musu kumutu disa i mama ku i tata go libi ku i mujëë,
be i ku ën ko di wan.

³² Nöö di fa wan womi ku ën mujëë ta libi ku deseei dë, nöö a fesi a bi dë wan tjubitjubi soni di libisëmbë an bi fusutëën. Ma fa u dë aki, Gadu lei mi taa di libi u de dë kuma wan peentje ta lei u fa di libi u ‚Jesosi,‘ Keesitu ku dee sëmbë fëen dë.

³³ Wë nöö sô di soni dë e, dee sëmbë. Fa mi ta fan ku unu aki, nöö hën da hiniwan womi musu lobi ën mujëë kuma hënseei sinkii. Nöö sôseei tu hiniwan mujëë musu lesipeki ën manu. Da sô.

6

Aki Paulosu ta fan ku dee mii

ku dee gaan sëmbë u de.

¹ Un dee mii, un musu piki unu mama ku unu tata buka e, kumafa a fiti biibima u Masa Jesosi.

² Ja sabi fa a sikifi a Gadu Buku nô? A taa: I musu lesipeki i mama ku i tata. Hën da di fosu wëti di dë ku wan paamusi a dendu taa,

³ ee i lesipeki i mama ku i tata nöö soni fii o waka bunu a di goonliba, nöö joo libi gaandi.

⁴ Nöö un dee gaan sëmbë, wan musu ta libi ku dee mii fuunu a wan fasi di na fiti e, te de ko ta hoi unu a bëë. Ma un musu kiija de a wan leti fasi ta lei de kumafa Masa Gadu kë u de musu libi.

Aki Paulosu ta fan ku dee saafu ku dee masa u de.

⁵ Nöö un saafu, un musu ta piki dee masa fuunu buka gaanfa ku fëëë seei, u di un ta lesipeki ‚Masa Jesosi,‘ Keesitu hedi. Un musu du ën ku hii unu hati, leti kumafa un ta piki di buka u Masa Jesosi.

⁶⁻⁷ Wan musu ta wooko a sô wan fasi taa te di basi sai dë bifö un ta wooko bunu, ma te an sai dë nöö un bazia sindo fuunu. Biga te un wooko sô, nöö hën da un ta suku gafa a libisëmbë wojo nöö, ma na a Gadu. Ma un musu wooko leti kuma saafu u ‚Masa Jesosi,‘ Keesitu, ta du andi Gadu kë waiwai.

⁸ Biga i sabi taa Masa Gadu ta paka hiniwan sëmbë hën paima kumafa i ta du bunu tjika, ee i dë saafuma, ee i dë fima.

⁹ Wë nöö sôseei, un dee masa un musu libi bunu ku dee saafu fu unu tu. Wan musu ta bai de ta musu de ta da de gaan buka. Biga unu tuu abi di wan Masa di dë a liba ala, nöö an ta luku a fesi. Di wan fa nöö a ta si u tuu.

Aki Paulosu ta konda da dee sëmbë fa u de tei dee fetilai u Gadu u de musu feti ku didibi.

¹⁰ Wë nöö wan soni nöö fika bi fuu taki möön. Hën da fa unu ku Masa Jesosi ko di wan dë, nöö un musu tei di gaan kaakiti fëen di a abi faa heepi unu fuun ko dë gingin seei a di libi fuunu.

¹¹ Leti kumafa dee sodati ta bisi dee peipei soni u de nango a feti, sô nöö i musu wooko ku hii dee fetilai Gadu ta da u. Nöö te di didibi ko a i, nöö an o kisi i ku dee hogi kõni fëen a ta boi.

¹² Biga na ku libisëmbë sinkii ku nongö u ta feti e, ma ku dee tiima dee dë a mundu a liba ala, dee hedima u dee hia didibi dee abi taki a di dungu ten u dë aki.

13 Nöo fëen hedi i musu biinga seei fu te de dou a i nöö i dë kabakaba këëe ku dee fetilai Gadu da i fii wini de. Nöo joo taanpu gingin, fu te di feti kaba nöo joo dë di winima.

14 Nöo seeka i seei sö: ta waka a dee tuutuu soni u Gadu baka söndö ganjan. Nöo te i du sö kaa, nöo hën da i dë seekaseeka kuma wan sodati dë ku wan degi banti nëen mindi faa go a feti.

Nöo i musu ta libi bunu a Gadu wojo. Nöo te i libi sö kaa, nöo hën da i dë seekaseeka kuma wan sodati di bisi wan felu soni ta tapëen hati.

15 Nöo hiniwan juu i musu ta dë kabakaba fii go konda da sëmbë kumafa Gadu ta puu sëmbë a hogi basu ta da de böö. Nöo te i dë sö kaa, nöo hën da i dë ku susu taitai a i futu kuma wan sodati nango a feti.

16 Nöo söseei hiniwan juu i musu abi biibi a Gadu liba. Nöo te i dë sö kaa, nöo didibi an o feni baaku a i faa kisi i. I o dë kuma dee sodati ta hoi wan pei felu soni goboo sö a de fesi fu de tapa dee faja piiwa u dee felantima.

17 Nöo hiniwan juu i musu sabi tuutuu taa Gadu puu i didibi faja. Ja dë a di didibi basu möön. Nöo te i sabi sö kaa, nöo hën da i dë kuma dee sodati ta tjubi de hedi ku felu kaapusa.

Nöo i musu tei di wöutu u Gadu di di Akaa fëen ta da i. Hën da sëufangi fii kaa.

18 Nöo hiniwan juu i musu ta tja hii dee fuka i abi tuu ko a Gadu fesi ku begi ku djëmë, kumafa di Akaa fëen ta manda i fii begi. I musu ta dë kabakaba fii ta begi da hii dee sëmbë u Masa Gadu nöömö. Ja musu wei möönsö.

19 Nöo un musu begi da mi tu, dee sëmbë, be Gadu heepi mi u mi konda di buka fëen waiwai söndö fëëe, fu sëmbë sa ko sabi di pakisei fëen di a bi abi a fesi tjubitjubi nëen hati kumafa a bi kë heepi sëmbë tjika.

20 Biga tjabukama fëen mi dë ta fan ku sëmbë nëen kamian. Fëen mbei de söötö mi ku bui buta a dunguwosu aki. Nöo un begi da mi u mi sa ta konda di Buka waiwai söndö fëëe kumafa, a fiti u mi musu kondëen da sëmbë.

Aki Paulosu ta tapa di biifi.

21 Wë kumafa libi u mi dë aki, dee sëmbë, nöo mi o manda Tikikusi be a ko piki unu be un sabi. Di womi dë dë wan bumbuu futuboi u Masa Gadu e. A dë wan sëmbë fuu, nöo u lobi ën seei. Nöo te a ko a unu ala, nöo a o piki unu kumafa hii soni u mi dë.

22 Fëen hedi mi mandëen ko a unu faa piki unu be un jei fa mi dë, be hati fuunu kötö.

23 Söö. Wë dee sëmbë fuu dë, Masa Gadu u Tata ku Masa Jesosi Keesitu musu da unu böö. De musu heepi unu be un lobi unu seei ta hoi di biibi nango nöömö.

24 Di bunuhati fasi u Masa Gadu musu dë ku unu ku hii dee oto sëmbë dee ta lobi Jesosi Keesitu a wan tuutuu fasi.

„Na soni möönsö. Mi, Paulosu, manda gaan odi da unu. A tan sö.”

Di biifi Paulosu manda da dee biibima u Filipi

Wan wöutu a fesi.

Di tjabukama u Masa Jesosi de kai Paulosu, hën sikifi di biifi aki manda da wanlô biibima u Masa Jesosi dë a wan köndë de kai Filipi. Paulosu seei bi go konda di buka u Masa Jesosi da dee sëmbë aki tefa de bia ko piki di Buka ta biibi a Masa Jesosi. (Luku Tjab. 16.) Nöo hën di Paulosu kumutu a dee Filipi sëmbë ta paaja di Buka a köndëköndë tee wan pisi, hën lanti kisi ën tja go söötô a dunguwosu u Masa Jesosi hedi. Nöo hën dee Filipi biibima ko jei, nöo hën de manda wan sëmbë u de de kai Epafodisi go haikëen. Nöo di di sëmbë ko haikëen tefa a o toona go, nöo hën Paulosu sikifi di biifi aki manda tangi da dee Filipi biibima u di fa de libi ku ën. Söseai a manda lei de unfa u de libi kumafa Gadu kë.

Nöo fa a mbei di biifi aki, nöo a dë söötôsöötô eti. An sikifi na un köndë a bi dë, a kandë a dë a Loomë. A sai dë ta haika lanti fu de musu kuutu soni fëen, ee de o kii ën ee de o puu ën.

Aki Paulosu ta manda odi da de.

¹ Wë dee sëmbë, mi Paulosu manda gaan odi da unu. Fa mi ta mbei di biifi aki, nöo mi ku Timoteo, nöo sö u dë aki, u dee futuboi fu Jesosi Keesitu. Nöo u ta manda di odi da hii unu tuu, un dee sëmbë a Filipi dee dë apaiti da Gadu fu di unu ku Masa Jesosi Keesitu ko di wan. U ta mandëen da un dee hedima ku dee basia u keiki tuu.

² Fa un sai dë, u Tata Masa Gaangadu ku Masa Jesosi Keesitu musu dë ku unu ta heepi unu ku de bunuhati e. De musu ta da unu böö.

Aki Paulosu ta begi ku wai

da dee sëmbë.

³ Wë dee sëmbë, hiniwan juu te mi ta mëni unu, nöo mi ta da di Gadu fuu di mi ta dini aki tangi fuunu hedi.

⁴ Hiniwan ten mi ta begi da unu tuu ku gaan piizii seei,

⁵ fu di u ku unu dë a di wan wooko makandi ta paaja di Buka u Masa Jesosi. Wë biga fu di ten un jei di Buka, nöo hën wë un tei ën, hën i si un dë ku mi makandi a di wooko fu te tide eti.

⁶ Nöo mi sabi taa di Sëmbë di seti di bambuu wooko a unu hati dë, an o disëen a hafu pasi möönsö. Ma a o tjëen go dou fu te di daka Jesosi Keesitu o toona ko a goonliba aki baka.

⁷ Wë dee sëmbë u Filipi dë o, a fiti fa mi ta wai ku unu aki e. Mëni fuunu dë a mi hati. Biga fa Gadu naki mi di kôlôku ku ën bunuhati aki fu mi sa ta tja di Buka u Masa Jesosi dëen, nöo mi sabi taa un tuu dë ku mi nëen makandi nöömö. Di juu mi bi ta waka ta lontu ta biinga ku di Buka u sëmbë musu piki ën, ta sitampu ën a kamiankamian, nöo un bi dë ku mi nëen kaa. Nöo fa de söötô mi a dunguwosu aki, un dë ku mi nëen eti. Wan disa mi möönsö.

⁸ Nöo Masa Gadu seei dë kotoigima ta si mi hati kumafa mi ta hangi unu tjika e. Jesosi Keesitu hën wë i si buta di gaan lobi fuunu a mi hati aki e.

⁹ Nöo te mi ta begi Masa Gadu da unu, dee sëmbë, nöo mi ta begi ën fu di lobi fuunu musu ta göö ku fusutan ku kõni nango nöömö.

¹⁰ Biga te un dë sö kaa, nöo woon ko sabi unfa u wegî soni te un kaba luku ee undi da di möön bunu wan fuun tei. Nöo woon dë bambuu sëmbë

gbelingbelin seei söndö föutu te di daka dou di „Masa Jesosi„ Keesitu o toona ko a goonliba.

11 Biga hën o ta wooko a unu liba fuun ta libi bunu a hii futu, be sëmbë sa si. Nöo de o ta gafa Masa Gadu seei, në fëën o ta bai fuunu hedi. Sö wë u ta begi da unu e, dee sëmbë.

Aki ta lei taa di fa de söötö Paulosu dë, a a'wan heepi.

12 Wë un dee sëmbë u mi dë o, mi kë fuun sabi taa di soni pasa ku mi aki, hën wë mbei di paaja u di Buka u Masa Jesosi nango a fesi seei.

13 Biga hii dee wakitima u di Gaan Kõnu wosu aki palalaa dou, ku hii dee oto sëmbë aki, de tuu ko si taa na wan wojo soni mi du möönsö bifö de kisi mi bui buta aki. Ma fu di mi dë wan futuboi u „Jesosi„ Keesitu hedi hën mbei.

14 Nöo hën wë mbei gaan së u dee oto sëmbë fuu dee ta biibi a Masa Jesosi aki ko tei taanga a mi, hën de ko ta konda di Buka waiwai söndö fëëë. Biga de si taa fa de kisi mi fu Masa Jesosi hedi aki, nöo ma a' toobi.

15 Fa u dë aki, a ko dë taa so sëmbë ko ta konda di Buka u „Masa Jesosi„ Keesitu ku felanti, fu di de ta haun ku mi. Biga de kë u në u de musu bai kuma mi tu. Ma so sëmbë ta tjëën ku limbohati,

16 ku lobi. Biga de sabi taa na wan hogi mi du mbei de söötö mi buta aki möönsö, ma fu di mi ta fia ku sëmbë u de sabi taa di Buka u ta tja aki, tuutuu soni a dë.

17 Fa dee sëmbë ta tja di Buka fu de feni nëbai hedi dë, nöo de an ta tjëën ku limbohati e. Biga de ta mëni taa fa de ta du dë, nöo möönmöön mi o fuka a di sitaafu mi dë aki.

18 Wë nöo andi seei mi abi u taki fu di soni dë, dee sëmbë? Biga ee de ta tjëën ku limbohati mi ta wai. Ee de an ta tjëën ku limbohati mi ta wai. Wë biga möönmöön seei di Buka u Keesitu ta paaja nango a hii mundu.

Aki ta lei fa di libi u Paulosu

dë dëën.

Nöo mi o ta wai nöömö tu e.

19 Biga fa un ta begi da mi naandë, ku fa di Akaa u Jesosi Keesitu ta heepi mi tjika aki, nöo mi sabi taa mi o kumutu nöömö a di sitaafu i si mi dë aki.

20 Nöo mi abi di biibi a Gadu taa ma o du na wan soni fu sen fëën musu kisi mi a bakaten. Ma mi o abi degihati fu mi sa tja miseei a wan bunu fasi, be „Masa Jesosi„ Keesitu feni gafa fu mi hedi kumafa a bi ta feni nöömö kaa, aluwasi ee mi libi ee mi dëdë.

21 „Nöo fa i si mi ta fan aki, nöo mi dë kabakaba fu hiniwan u de tu soni dë e, dee sëmbë.“ Biga hii libi u mi dë a „Jesosi„ Keesitu kaa. Hii soni mi ta du kaa, nöo fëën hedi. Nöo ee mi dëdë seei a o dë wan wini da mi „biga nëën ala mi o go.“

22 Ma ee mi dë ku libi eti, nöo a kandë mi o sa heepi möön hia sëmbë fu de ko a fesi a di së u Gadu.

Fëën mbei ee a bi dë soni u mi tei, nöo ma bi o sabi undi u de mi kë.

23 Biga mi kë de tuu. Mi kë kumutu a di goonliba aki go dë a „Masa Jesosi„ Keesitu ala. Di dë sa dë di möön gaan bunu soni da mi o.

24 Ma nöo a dë möön fanöudu da unu fu mi fika a goonliba aki ta heepi unu eti.

25 Hën mbei misikuma mi o fika tu, fu mi sa heepi hii unu tuu fuun sa ko möön fesi a di biibi un sai dë, ta wai ku ën.

26 Nöo ee mi dë te mi toona ko a unu, nöo di wai di un ta wai ku Jesosi Keesitu dë kaa, nöo a o möön bigi eti.

Aki Paulosu ta da de taanga a dee sitaafu de ta tja.

²⁷ Wē nōo dee sēmbē, fa soni o waka ku mi ku fa soni an o waka ku mi, nōo di dē ma sabi eti e. Ma unu, un musu tan ta libi nōomō kumafa a fiti dee lō sēmbē dee piki di buka u Keesitu. Ee mi toona ko a unu, ee ma ko a unu seei, ma mi musu ta jei fuunu nōomō taa un ta hoi dou ku wan hati, un ta tuwē gogo a wan sē makandi fu sēmbē musu sabi taa di Buka u Masa Jesosi un ta biibi dē, a dē wan bumbuu buka.

²⁸ Fa so sēmbē ko dē felantima ku unu dē seei, dee sēmbē, ma wan musu panta e. Un musu ta hoi nango nōomō sōndō fēē. Nōo te un du sō, nōo de o ko si taa unu ta feni heepi a Gadu, ma de, de ta kaba a sōsō. Sō fuun libi ku dee felantima fuunu e, dee sēmbē.

²⁹ Biga fa un feni bunu a Gadu naandē fu di un nama ku Jesosi, Keesitu, nōo na fuun ta biibi nēen nōo a kaba e, ma fuun ta tja sitaafu fēen hedi tu.

³⁰ Nōo di sitaafu di un ta tja a Filipi ala, hēn da di wan seei sitaafu un bi si mi tja dē, ku di un jei mi ta tja aki tu. Hēn da u tuu ta tja di wan sitaafu makandi e, dee sēmbē.

2

Aki Paulosu ta manda de

u de libi makandi.

¹ Wē dee sēmbē o, fa unu ku Masa Jesosi Keesitu ko di wan naandē, nōo an ta da unu degihati nō? Fa a lobi unu tjika naandē, nōo hati fuunu an ta dē bööböō nō? Fa un kisi di Akaa u Masa Gadu dē, an ta heepi unu fuun libi makandi a wan suti fasi nō? Wan ko ta abi fii ku tjalihati da unu na unu nō?

² Ma seei a fika wan soni eti o. Biga mi kē ta jei fuunu taa un tuu ta libi makandi ku wan hati nōomō. Mi kē ta jei taa un ta lobi unu seei ta fiti buka makandi ta biinga ku di wan soni nango nōomō.

³ Wan musu ta du soni fuun feni nēbai hedi e, dee sēmbē. Wan musu mbei taa i hei mōon otowan tu, ma be i saka i seei da dee otowan fii ta luku de kuma de hei mōon i.

⁴ Ja musu ta mēni fii wanwan soni nōo a kaba e, ma hibiwan fuunu musu ta mēni soni u di otowan fēen tu.

⁵ Dee sēmbē o, fasi fuunu musu djeesi di u Masa Jesosi Keesitu e.

⁶ Wē biga fa a sai dē, Gadu a dē. Hēn ku Masa Gaangadu abi di wan hei. Ma an bi biinga faa hoi ēn seei gingin a di hei a bi abi naandē e. Nōnō.

⁷ Ma a butēen a wan sē, nōo hēn a bazia ko a goonliba aki ko dē kuma wan futuboi u libisēmbē. Sinkii fēen bi dē leti kuma libisēmbē.

⁸ nōo de bi ta si ēn kuma libisēmbē nōo tu. Nōo hēn wē a ta sakēen seei ta piki Gadu buka teefa i si a dēdē gbolo. Nōo di dēdē a dēdē naandē, nōo hēn da di mōon gaan sen dēdē u goonliba e. Biga de pekēen a lakpa pau kii. Sō a saka hēnseei tjika.

⁹ Nōo fa a du dē, nōo hēn wē mbei Masa Gaangadu weki ēn tja go buta a di mōon kaba hei kamian u mundu. Hēn a dēen wan nē di hei mōon hii nē,

¹⁰ taa hii mundu musu saka deseēi nēen basu. Ee i dē a Gaangadu ala, ee i dē a goonliba aki, ee i dē a goonbasu seei, ma hibiwan sēmbē o saka tjökō kini a goon nēen fesi nōomō wan daka.

¹¹ Nōo hii mundu o ko piki taa Jesosi Keesitu hēn nōo da Masa. Nōo gaan nēbai seei hēn Tata Masa Gadu o kisi awaa.

Aki Paulosu ta lei de fa u de libi a oto sēmbē dendu.

12 Wë dee lobi sëmbë u mi naandë, di mi bi dë a unu ala nöö un bi ta piki di Buka kaa. Nöö fa ma dë a unu mindi dë möön, nöö awaa seei un musu ta piki ën möön eti e. Un musu ta biinga nöömö ku gaan lesipeki, ku panta u Gadu, be di heepi un feni nëen musu dë u sëmbë sa si a unu libi.

13 Biga hënseei wë ta wooko a i hati fii kë du dee soni dee ta dëen piizii, nöö hënseei ta toona da i taanga tu fii sa du de.

14 Nöö dee sëmbë, wan musu ta kuutu soni a buka ta fia ku sëmbë e.

15 Ma hii libi fuunu musu ko gbelingbelin söndö föutu fu sëmbë sa si.

Fa dee oto sëmbë sai dë, de ta libi fanjanfanjan. Libi u de an ta kai ku Gadu möönsö. Ma un dee mii u Gadu musu dë a dee lö sëmbë naandë mindi leti kuma dee teea ja liba dee ta sëndë faja ta tuwë limbo a mundu. Sö di libi fuunu musu dë limbolimbo tjika.

16 Nöö dee sëmbë an dë a Masa Gadu së o si taa unu abi dee wöutu dee ta da sëmbë di libi u teego. Nöö te un libi sö kaa, nöö mi o wai seei a di daka Masa Jesosi, Keesitu o toona ko e. Biga mi o si taa fa mi bi ta biinga ku unu dë, nöö ma wooko u sösö.

17 Wë dee sëmbë, fa un ko ta biibi a Masa Gadu ta dini ën naandë, nöö a dë kuma wan paima un ta tja go dëen tangi e. Nöö ee a dë taa fu di Buka di mi ta konda aki hedi dëdë musu kii mi, nöö ma a' toobi. Mi o dë seei waiwai fu di dë. Biga di dëdë u mi o dë sö kuma mi mökisi miseei ku di paima di un ta tja go dëen dë.

18 Nöö unu seei tu, an o dë fuun kusumi fu di dëdë u mi hedi e, ma un musu ta wai ku mi fu di mi ku unu tuu sa tja di paima dë go da Gadu makandi.

Aki Paulosu taki soni u Timoteo.

19 Dee sëmbë o, fa mi dë aki mi a' di mëni taa abiti möön nöö Masa Jesosi o jabi pasi da mi u mi manda Timoteo ko haika unu. Nöö te mi jei unfa un dë, nöö mi o dë bööböö ku telu.

20 Biga ma abi sëmbë aki kuma hën möönsö di ta mëni unu ku hii ën hati. Fa a sai dë, hiniwan juu a ta kë jei fa fuunu.

21 Ma dee otowan u ku de dë aki, de an dë sö e. De ta biinga ku deseeri soni nöö. De aan toobi ku soni u Jesosi Keesitu wan bëtë.

22 Ma unu seei sabi Timoteo. Fa mi ku ën ta wooko makandi ta paaja di buka u Masa Jesosi, nöö a dë leti kuma wan mii ta heepi hën tata a wooko. Sö a ta libi bunu ku mi tjika.

23 Nöö fëen hedi te mi jei andi o pasa ku mi aki, nöö mi o mandëen hesihesi ko a unu be un jei.

24 Ma mi a' di biibi a Masa taa abiti möön miseei sa ko a unu tu.

Aki Paulosu taa a ta manda Epafodisi toona go.

25 Nöö dee sëmbë, un haika e. Mi si taa a dë fanöudu fu mi manda Epafodisi toona ko a unu baka. Di un mandëen ko a mi aki faa sölogu mi, nöö mi ku ën libi suti seei kuma baa ku baa. U bi dë a di wooko makandi ta biinga seei fu di buka u Masa Jesosi musu paaja.

26 Ma fa u dë aki, a ko ta hangii unu tee na soni. A ta mëni unu te a ta kusumi, fu di un bi jei taa a suwaki.

27 Wë nöö a bi suwaki tuu o, tee a fika piki nöö a bi dëdë. Ma Gadu bi abi tjali u mi ku ën tuu, hën a heepi ën fu ma musu tja sitaafu a sitaafu liba.

28 Nöö fëen mbei mi kë mandëen ko da unu hesihesi be un si unu seei wojo ku wojo, nöö miseei hati o kötö tu.

²⁹ Nöo fa i si a o ko a unu ala, nöo mi kē fuun kisi en hoi ku wai e, biga unu ku en tuu da sēmbē u Masa Jesosi makandi. Nöo sō wan sēmbē un musu a' lesipeki fēen e,

³⁰ biga fu di wooko u „Jesosi„ Keesitu hedi wē mbei a bi fika piki nöo a bi dēdē. A dē wan sēmbē an ta a' toobi ku en libi, ma a ta biinga kodo ta heepi mi a unu kamian, fu di wan sa dē ku mi aki.

3

Aki Paulosu ta bai de u de musu kōni ku dee sēmbē dee ta kē buta de a wēti basu.

¹ Wē un dee sēmbē u mi naandē, di unu ku Masa Jesosi ko di wan kaa, nöo un musu ta wai u di dē hedi.

Söo. Wē nöo fa a dē taa mi ta sikifi di wan seei soni da unu hibiwanten aki, nöo ma a' toobi. Ma mi o ta du en nöömō biga mi si taa a dē wan soni di sa tjubi unu fu sēmbē an sa feni unu ganjan.

² Nöo mi o bai unu a wan soni e, dee sēmbē. Biga mi jei taa wanlō daguhatibōō sēmbē takulibima u goonliba ta ko a unu naandē u ko poi sinkii fuunu. „De taa un musu kotu unu sinkii buta di maaka u Isaēli ufō un sa ko sēmbē u Masa Gaangadu.“ Ma wan musu piki de e!

³ Wē biga fa u dē aki, nöo u da dee sēmbē dee Gadu ta luku apaiti e, na dee sēmbē dee abi di maaka a sinkii. U da dee sēmbē Gadu buta di Akaa fēen a u hati fuu ta begi en ta gafa. Nöo Jesosi Keesitu, hēn wanwan u ta mēni faa heepi u. Hēn wanwan u ta wai da, na di maaka dē möön.

⁴ Wē ee a dē taa Masa Gadu musu luku wan sēmbē a di fa de pai en kiija a libisēmbē fasi, nöo misikuma sēmbē an sa möön mi a di dē.

⁵ Biga mi da wan Isaēli sēmbē seei dju. De pai mi a di lö u Benjamin, nöo baka aiti daka fēen, nöo hēn de koti mi buta di maaka. Nöo a di sē u dee Isaēli wēti fuu nöo mi bi dē basi seei, biga mi kisi lei fēen te mi ko wan Faliseima.

⁶ Ka mi bi ta du en tjika dē, dee sēmbē, nöo mi nama ku dee Isaēli wēti fuu tee mi ko ta sitaafu dee biibima u Masa Jesosi seei „fu di de disa dee wēti dē u hoi.“ Ee i luku en te i kaba, nöo i sa si taa mi bi ta hoi dee gaangaan pisi ku dee pikipiki pisi fu dee Isaēli wēti tuu. Hii sēmbē bi sa si taa mi bi dē söndō föutu a dee soni dē.

Aki ta lei andi da dee soni Paulosu ta kai gaan soni

nēen libi awaa.

⁷ Ma fa mi ko nama ku „Jesosi„ Keesitu a baka aki, nöo dee lö soni i si mi bi ta kai gaan soni dē, nöo ma a' bisi ku de möön e. De ko dē sösō soni da mi seei.

⁸ Nöo na de nöo, ma fa mi ko luku hii soni te mi kaba aki, nöo ma si na wan soni a mundu di dē möön bambuu soni da mi möön leki fa mi sa ko sabi Jesosi Keesitu mi Masa. Fēen mbei hii dee oto soni tuu fia ko dē gaan sösō soni seei a mi wojo, nöo hēn wē mi disa de tuu. Biga Masa Jesosi hēn wanwan tö nöo mi kē.

⁹ Fa mi ku en ko nama aki, nöo mi kē ko bambuu sēmbē a Masa Gadu wojo tuu, ma na fu di mi ta hoi wēti mbei e, ma fu di mi ta biibi a „Jesosi„ Keesitu hedi. Wē biga te wan sēmbē i biibi nēen ufō Gadu ta tei i u bambuu sēmbē tuutuu awaa.

¹⁰ Dee sēmbē o, di soni di mi kē, hēn da u mi ko sabi Masa Jesosi gaanfa e. Mi kē feni di lö kaakiti dē a mi libi di bi weki en baka a dēdē. Mi kē nama ku en makandi a dee sitaafu dee a bi tja. Nöo fa a piki Masa Gadu buka tefa dēdē kii en dē, nöo mi kē djeesi en a di dē tu.

11 Biga tee mi ko dē sō kaa, nōō mi abi di biibi taa mi o feni di njunjun libi di Masa Jesosi bi feni di a hopo baka a dēdē.

12 Ma nōō fa mi ta fan aki seei, ma mi sabi taa ma dou ka fu mi dou eti e. Wē biga ma ko dē wan gbelingbelin sēmbē sōndō fōutu eti. Ma mi ta biinga nōōmō fu mi musu ko kumafa Jesosi Keesitu bi kē u mi ko, di a tei mi ko sēmbē fēen.

13 Mi taki e, dee sēmbē, ma dou a di maaka dē eti e! Ma fa i si mi dē aki, a di biinga naandē nōō mi dē. Ma a' toobi ku dee soni dee bi pasa ku mi kaa, ma mi ta biinga seei ku dee soni dee dē a mi fesi ta ko.

14 Biga mi kē go dou fu mi wini di paima a Masa Gadu Kōndē ala di a bi kai mi fu mi ko tei, fu di mi ku Jesosi Keesitu ko di wan.

15 Nōō fa mi ta fan ku unu aki, nōō uu dee sēmbē dee göō ko a fesi a di biibi, nōō be u tuu abi di wan pakisei a dee lö soni aki e. Ma ee wan sēmbē ja tifihedu ku wan pisi fēen, nōō i disēen da Gadu, nōō a o da i fusutan fēen a bakaten.

16 Ma nōō di soni di u ko abi fusutan fēen kaa, nōō ku en fuu libi e.

Aki ta lei kumafa dee biibima ku dee sēmbē an ta biibi tooka.

17 Nōō dee sēmbē o, un musu luku kumafa mi ta libi, nōō un djeesi mi e. Nōō te i si wan sēmbē ta libi a di fa u bi lei unu dē kaa, nōō un nama ku en tu.

18 Biga wē fa u dē aki sōmēni sēmbē an dē ku u a wan sē. Leti kumafa i si mi bi taki en da unu sōmēni pasi kaa, nōō sōseei mi o toona taki en da unu wan pasi mōōn, ku gaan tjali a hati ku wata a wojo seei, taa sōmēni sēmbē ta libi felanti ku di dēdē. Jesosi, Keesitu dēdē a di lakpa pau. De ta libi leti kuma an bi dē fanōudu faa bi musu dēdē da u.

19 Nōō fa i si de sai dē, nōō kaba seei de o kaba a sōsō go a didibi faja e. Biga dee taku hangu u de hati, nōō a de baka nōō de ta kule, teefa i si a ko kuma gadu u de de ta dini. A sen soni baka nōō de ta waka e, ta suku gafa. Fa de sai u de dē, dee soni u di goonliba aki tō nōō ta dē a de pakisei.

20 Ma u wa dē sō e, baa. Fa u dē aki, u da goonmii u Masa Gadu Kōndē, nōō ku gaan piizii seei u dē aki ta luku Masa Jesosi Keesitu di Heepima fuu, faa musu ko a u. Biga wan daka a o bazia ko a u nōōmō.

21 Nōō te a ko, nōō a o tooka dee goonliba sinkii fuu aki buta ko kuma di fēen seei. Nōō ku di gaan kaakiti fēen di ta mbei hii soni saka nēen basu, nōō ku en wē a o du en e.

4

Aki Paulosu ta manda wan apaiti buka da wanlō sēmbē.

1 Dee sēmbē u mi dē, mi lobi unu e, nōō mi ta hangu unu seei. Unu da dee sēmbē mi ta wai da. Fa un bia ko piki di Buka u Masa Jesosi di mi tja ko da unu naandē, nōō mi ta feni gafa a Gadu fuunu hedi o. Nōō hēn mbei wē mi kē fuun finga gingin a Masa Jesosi. Wan musu disēen mōōnsō.

2 Nōō un de tu mujēē dē, Jodia ku Sentike, gaantangu mi begi unu taa be un ta dē makandi ku wan pakisei e, fa i si un tuu ta biibi a Masa Jesosi liba dē.

3 Nōō mi ta begi mi mati Sisigusi di mi ku en bi ta wooko sō bunu dē, taa be a heepi de tu mujēē dē e. Biga de bi ta biinga seei ta heepi mi, mi ku de bi ta paaja di buka u Masa Jesosi makandi, u ku Kilemeti ku dee otowan tuu. Fa de sai dē, nōō de tuu nē dē sikifisikifi a Masa Gaangadu buku ala fu de feni di libi u teego.

Aki Paulosu ta lei de mōōn

fa biibima musu libi.

⁴ Nöo un haika e, dee sëmbë. Fa un ta biibi a Masa Jesosi liba dë, nöo sösö wai nöo fuun ta wai e. Mi o taki ën da unu wan pasi möön taa un musu ta wai nango nöömö.

⁵ Nöo un musu ta libi ku saka fasi a hii sëmbë dendu be de ta si, biga abiti möön nöo Masa Jesosi o toona ko.

⁶ Nöo wan musu ta booko hedi a na wan soni e, ma un musu ta begi Masa Gadu nöömö ta dëen tangi. I musu ta tja hii dee fuka fii nango ta konda dëen,

⁷ nöo a o da i kötöhati. Nöo di kötöhati di a o da i dë o bigi pasa hii sëmbë fusutan, nöo a hoi hii pakisei fii ku i hati tuu a Jesosi Keesitu liba.

⁸ Nöo dee sëmbë u mi dë, fa i si un sai dë, „pakisei fuunu an musu ta dë a poipoi soni e. Ma dee soni dee dë tuutuu ku dee dë fanöudu ku dee soni dee dë leti, dee soni dee dë gbelingbelin a Gadu wojo, ku dee soni dee dë u lobi, ku dee soni dee dë u kai gaan soni, a dee lö bumbuu soni dë nöo fuun musu buta pakisei e. Wë biga dee soni dee dë u gafa nöo musu ta dë a unu hati un ta mëni.

⁹ Nöo hii dee soni un bi lei a mi tuu ku dee un bi si mi ta du, nöo de fuun ta du e. Nöo Masa Gaangadu di nöo ta kötö sëmbë hati o dë ku unu.

Aki Paulosu manda tangi da

dee sëmbë bi heepi ën.

¹⁰ Dee sëmbë o, mi ta wai seei ta da Masa tangi fu di mi si maun fuunu möön e. Biga mi ko sabi taa un ta mëni mi eti. Ma fa i si mi taki ën dë seei, ma mi sabi taa un bi ta mëni mi nöömö. Wan bi disa mi, ma di wan bi feni sëmbë nöo hën wë mbei.

¹¹ Ma fa mi ko ta wai aki seei, ma an dë taa mi bi dë fukafuka e. Biga mi lei kaa u mi dë tifiheddi hiniwan juu ku dee soni dee mi abi.

¹² Biga fa mi dë aki, nöo mi saandi de kai fuka. Sösei mi sabi unfa a dë te mi abi hia. A dee fasi dë tuu mi lei u mi libi. Ee mi abi, mi sabi unfa u libi taa mi abi. Ee ma abi, mi sabi unfa u libi taa ma abi. Mi lei u mi njan hia te mi abi hia, nöo mi lei u tja hangì te ma abi soni u njan.

¹³ Hiniwan sootu pei soni di ko a mi, nöo mi dë tifiheddi ku ën kaa, biga „Masa Jesosi, Keesitu ta da mi kaakiti.

¹⁴ Ma tókusei fa un du dë, nöo hën da un du bunu e, dee sëmbë, biga un nama ku mi a dee sitaafu dee i si mi ta tja aki.

¹⁵ Nöo sö mi ku unu bi dë kaa e. Biga unu seei sabi taa di ten di un bi ko piki di Buka njanjun, nöo dee oto biibima a dee köndëköndë an bi ta libi ku mi kumafa mi ku unu bi libi. Wë biga di ten mi kumutu a di pisiwata u Masadonia a unu ala u go paaja di Buka a dee oto köndë, nöo unu wanwan nöo da sëmbë di bi ta manda soni da mi.

¹⁶ Fa mi dou a Tesalonika seei, nöo hën un seti manda soni da mi wante te dou sëmëni pasi, dee soni dee mi bi abi fanöudu.

¹⁷ Ma nöo fa i si mi ta fan aki, dee sëmbë, an dë taa un musu ta manda soni da mi hiniwan juu e. Ma mi kë fuun ta libi a sö wan bunu fasi nango nöömö, be di paima fuunu di woon feni a Gadu musu ta göö nango nöömö tu.

¹⁸ Fa un manda dee soni a Epafodisi da mi aki, nöo mi abi soni te a hia awaa. Soni seei an fuka mi möön. Nöo na mi nöo un da e, dee sëmbë, ma Masa Gadu seei wë un da tu. Wë biga di bunu di un du mi aki, nöo a suti dëen. A dë leti kama wan paima un tja ko dëen, nöo hënseei ta wai ku unu tu.

¹⁹ Nöo fa a dë di Gadu u mi „ku unu, aki, nöo a abi sëmëni gudu e, nöo a o da unu hiniwan u de di un abi fanöudu. A o da unu ën te a hia tjika pasa maaka seei, fu di unu ku Jesosi Keesitu ko di wan.

²⁰ Wë nõö Masa Gadu u Tata, hën musu feni gafa ku nëbai nõömö. A tan sö.

Aki Paulosu tapa di biifi.

²¹ Söö. Wë ma a soni u taki möön möön leki, mi ta manda gaan odi da hii un dee sëmbë ala tuu, dee Gadu ta luku apaiti fasi fu di unu ku Jesosi Keesitu ko di wan. Nõö dee oto sëmbë fuu dee dë ku mi aki, nõö deseei ta manda gaan odi da unu tu.

²² Söseei hii dee oto sëmbë u Masa Jesosi u di kõndë aki tuu ta manda odi da unu tu. Nõö dee sëmbë fuu dee ta dë a di wosu u di Gaan Kõnu ta manda gaan odi da unu apaiti.

²³ Söö. Wë aki mi tapa di biifi taa Masa Jesosi Keesitu musu tja unu ku ën bunuhati e, dee sëmbë. A musu ta tii unu akaa. A tan sö.

Di biifi Paulosu manda da dee biibima u Kolosën

Wan wöutu a fesi.

Di ten Paulosu bi dë a dunguwosu, nöö hën a manda di biifi aki go wasiköi dee biibima u Masa Jesosi a di köndë de kai Kolosën, fu de an musu kumutu a di biibi. Biga a jei taa sëmbë ta ko ta ganjan de dë. De ta lei de wan oto fasi u de dini Gadu taa de musu hoi peipei wëti. Ma Paulosu taki da de taa de an musu buta deseeri a wëti basu möön. Biga de abi Masa Jesosi, nöö a tjika kaa.

Aki di biifi seti.

¹ Wë dee sëmbë, mi da Paulosu e, wan u dee tjabukama u Jesosi Keesitu de ta kai apösutu di Masa Gadu buta ku ën seei kë fu mi ta tja di buka fëën dëën. Nöö mi ku u baaa Timoteo

² ta manda gaan odi da un dee sëmbë u Masa Gadu a Kolosën ala, dee ta biibi a Masa Jesosi Keesitu liba ta piki ën buka nöömö. Masa Gadu u Tata ku Masa Jesosi Keesitu musu ta tja unu ku de bunuhati e. De musu da unu böö.

Aki Paulosu ta wai fu di dee sëmbë piki di buka

u Masa Jesosi.

³ Wë nöö dee sëmbë, fa u ta begi hiniwanten da unu aki, nöö u ta da di Tata u Masa Jesosi Keesitu tangi fuunu hedi e.

⁴ Biga u ta jei u di libi fuunu kumafa un ta biibi a Jesosi Keesitu liba tjika, ku di fa un ta lobi hii dee oto sëmbë fëën dee ta waka nëen baka.

⁵ Sensi di un jei di tuutuu Buka u Gadu taa a abi wan suti libi nëen köndë u da unu, nöö hën un piki ën, hën un bia ko ta libi kumafa di Buka taki.

⁶ Nöö di Buka u ta taki aki, nöö hënseei da di Buka di ta paaja a hii goonliba fa u dë aki e. Möönmöön sëmbë ta piki ën ta bia de libi, leti kumafa unu seei bi piki ën di un jei taa sö wan bunuhati fasi Gadu abi tuu.

⁷ Nöö fa un jei di Buka dë, nöö u fusutan taa Epafasi, hën tjëen ko da unu ala. Nöö a dë wan futoou futuboi u Jesosi, Keesitu e, di ta wooko ku u aki faa heepi unu ala. A dë wan sëmbë di u lobi aki seei.

⁸ Nöö hën seei konda da u kumafa di Akaa u Masa Gaangadu buta di lobi fëën a unu hati.

Aki Paulosu begi da dee sëmbë.

⁹ Nöö fëën mbei di mi ku Timoteo jei sö fuunu, nöö hën u ta begi Masa Gadu da unu nöömö, fuun musu ko sabi bumbuu fa a kë fuun musu libi, be un abi di fusutan ku telu di di Akaa u Masa Gadu ta da u.

¹⁰ Nöö u ta begi tu fuun sa ko libi bunu nëen wojo, leti kumafa a fiti u dee sëmbë fëën musu ta libi. U ta begi fuun musu ta libi bunu ku sëmbë a hii fasi nango nöömö. Möönmöön un musu ko sabi Masa.

¹¹ Nöö u ta begi ën tu faa musu da unu di kaakiti fëën a unu libi e. Biga di kaakiti u Gadu bigi te pasa maaka, nöö ee a ta wooko a unu nöö woon a' taihati a soni. Woon sa tei hii dee soni dee ta miti unu ku pasensi, ku wai a hati seei.

¹² Woon ta da u Tata Masa Gadu tangi nöömö, u di a seeka u buta fuu feni dee bunu dee a abi u da u dee sëmbë fëën, dee dë nëen tii basu ta waka a di limbo fëën.

Sö u ta begi da unu e.

*Aki Paulosu ta konda da de**fa Masa Jesosi hei tjika.*

¹³ Dee sɛmbɛ o, Masa Gaangadu puu u a di sɛ u dungu, hɛn a tja u ko buta a di Tii u di lobi Womi Mii fɛɛn basu.

¹⁴ Nɔɔ di a du sɔ kaa, nɔɔ wa o tja di sitaafu u dee hogilibi fuu mɔɔn e. Biga di Womi Mii u Gadu dɛ paka di paima puu u a Gadu bɛɛ kaa.

¹⁵ Fa Masa Gadu sai dɛ, dee sɛmbɛ, na wan sɛmbɛ si ɛn ku wojo wan daka e, ma ee i si di Womi Mii fɛɛn dɛ nɔɔ hɛn da Masa Gadu seei i si dɛ kaa. Biga di wan sɛmbɛ nɔɔ de dɛ. Nɔɔ hɛn fosu bi dɛ bifɔ hii soni u mundu ko, nɔɔ a dɛ hedima u hii soni Gadu mbei.

¹⁶ Biga di Womi Mii fɛɛn dɛ seei bi mbei hii soni. Dee soni dɛ a Masa Gadu Kɔndɛ a liba ala ku dee teeja u mundu ku dee soni a goonliba aki tuu, hɛn mbei de. So u dɛ i sa si ku wojo, so u dɛ ja sa si ku wojo seei, ma hɛn wanwan mbei hii de tuu. Nɔɔ a mbei hii dee takima a goonliba aki, ku dee makiti a mundu ala tu.

Dee soni u taki dɛ tuu Masa Gaangadu manda di Womi Mii fɛɛn faa mbei e, dee sɛmbɛ, nɔɔ fɛɛn hedi hii dee soni dɛ tuu bi musu dɛ fɛɛn wanwan tɔ.

¹⁷ Hɛn fosu bi dɛ ufɔ hii dee lɔ soni dɛ ko, nɔɔ ku ɛn kaakiti a ta hoi de tuu fu de an musu booko pisipisi paaja fanjanfanjan.

¹⁸ Nɔɔ fa u ku Masa Jesosi dɛ aki, nɔɔ Masa Jesosi hɛn da hedi fuu e, nɔɔ u da di sinkii fɛɛn. Biga leti kumafa wan sɛmbɛ hedi abi taki fɛɛn sinkii, nɔɔ sɔ Masa Jesosi abi taki a u dee sɛmbɛ fɛɛn liba. Hɛn abi di libi ta da u tu, biga hɛn da di fosu sɛmbɛ dɛ bi weki kumutu a dɛdɛ. Fɛɛn mbei a dɛ mɔɔn hei mɔɔn hii soni u mundu tuu.

¹⁹ Fa Masa Jesosi bi ko a goonliba aki, dee sɛmbɛ, nɔɔ a ko ku libisɛmbɛ sinkii, ma a bi dɛ Gadu seei gbelin e. Biga sɔ hɛn Tata bi kɛ fa a musu dɛ.

²⁰ Hɛn seei Masa Gadu tei faa musu paka di paima da u. Nɔɔ hɛn a dɛdɛ a di lakpa pau tuwɛɛn buuu a goon paka da u te a kaba. Nɔɔ hɛn i si a ko dɛ taa Masa Gadu ku hii soni u mundu sa toona ko bunu baka, dee u liba ala ku dee u goon aki tuu.

«Sɔ di Womi Mii u Gadu du da u e.»

Aki Paulosu ta konda fa Gadu manda di Mii fɛɛn faa seeka libi fuu da u.

²¹ Dee sɛmbɛ o, a fesi unu ku Gadu bi dɛ felantima e. Biga hii dee pakisei ku dee wooko fuunu tuu bi dɛ hogi nɛɛn wojo.

²² Ma fa u dɛ aki, unu ku ɛn ko bunu u di Masa Jesosi dɛdɛ da u hedi. Di libisɛmbɛ sinkii fɛɛn di a bi abi, ku ɛn a dɛdɛ da u, faa seeka u buta gbelingbelin sɔndɔ fɔutu faa tja u ko da Gadu. Hɛn mbei kaagi fuunu an dɛ a Gadu mɔɔn.

²³ Ma un musu ta biibi nango nɔɔmɔ e, dee sɛmbɛ. Un musu dɛ gingin ta mɛni dee bakaten bunu woon feni nɛɛn, dee un bi jei a di Buka di a manda da unu.

*Aki Paulosu ta biinga ku dee sɛmbɛ u Masa Gadu u de feni**di bunu di Gadu kɛ da de.*

Nɔɔ di Buka i si u ta taki aki, a paaja a hii goonliba kaa. Mi seei ko dɛ wan sɛmbɛ di ta kondɛɛn nɔɔmɔ tu. Hɛn da wooko u mi kaa.

²⁴ Nɔɔ mi ta tja gaan sitaafu u di wooko Gadu da mi u mi ta du da unu e. Ma ma a' toobi. Mi ta du ɛn waiwai seei. Biga di sitaafu mi ta tja aki, nɔɔ a dɛ wan pisi u di sitaafu di bi fika u «Masa Jesosi» Keesitu musu tja u dee sɛmbɛ fɛɛn hedi, dee dɛ kuma hɛn sinkii. Mi ta heepi tja dee sitaafu go dou.

²⁵ Nöo söseei mi ko dë wan futuboi fuun dee sëmbë u Masa Gadu tu. Biga hënseei buta mi u mi heepi un₁ dee sëmbë dee na Isaëli sëmbë. A manda mi u mi konda di Buka fëen da unu, be un tuu jei hii soni fëen.

²⁶ Nöo di Buka aki sō, a bi dë wan tjubitjubi soni fu sensi seti u goonliba, ma fa u dë aki Masa Gaangadu mbei a ko limbo da u dee sëmbë fëen.

²⁷ Biga a kë fuu ko sabi di gaan bunu di a kë da hii sëmbë.

Nöo di gaan waiti bunu u ta taki aki, hën da te i ko piki di buka, nöo Masa Jesosi Keesitu seei o ko ta libi a i hati, ee i da Isaëli sëmbë, ee ja dë Isaëli sëmbë. Nöo te di juu dou faa toona ko kisi di nëbai fëen a goonliba aki, nöo i seei o dë a dendu tu.

²⁸ Fëen mbei wë u ta konda dee soni u Jesosi Keesitu da hii sëmbë e. U ta bai de ta lei de ku hii di köni di u abi, be de sabi fa u de libi, fu te di juu dou fu de dou a Gadu fesi nöo de o dë gbelingbelin sëmbë kumafa Gadu kë.

²⁹ Hën da di soni mi ta biinga da e, ku hii di gaan kaakiti Gadu ta da mi u mi du di wooko fëen.

2

Aki Paulosu ta begi dee sëmbë u de hoi di biibi de ta biibi

a Masa Gadu.

¹ Wë nöo fa mi ta biinga taanga aki, nöo fuunu hedi wë e, dee sëmbë, un dee biibima a Kolosën dë ku dee u Laodisea, ku dee otowan dee an si mi fesi wan daka.

² Mi ta wooko sō fuun musu kisi degihati, be un dë ku wan hati ta lobi unu seei. Biga te un ta libi sō kaa, nöo woon ta fusutan soni u Gadu gbelingbelin seei. Nöo woon ko sabi dee tjubitjubi soni u₁ Masa Jesosi₁ Keesitu awaa, dee Gadu u Tata bi abi nëen pakisei a fesi.

³ Nöo te wan sëmbë i ko sabi Masa Jesosi kaa, nöo joo feni köni ku fusutan e. Biga hën nöo abi dee gaan gudu dë.

⁴ Nöo mi ta konda dee soni aki da unu, dee sëmbë, u sëmbë an musu ko ganjan unu ku dee bödjëebödjëe fan u de.

⁵ Biga aluwasi ee miseei an dë a unu mindi seei, ma mi hati dë a unu ala. Nöo te mi jei taa un dë gingin a pasi ta biibi₁ Jesosi₁ Keesitu ku wan hati nango, nöo mi ta wai seei.

⁶ Wë dee sëmbë, fa i si un tei Jesosi Keesitu ko unu Masa dë kaa, nöo ku ën nöo un musu ta libi e. Biga unu ku ën ko di wan.

⁷ Nöo un musu dë a Masa Jesosi kuma wan pau di hën lutu go fundu a goon. Un musu ta biibi ën taanga nango möönmöön, leti kumafa i si de bi lei unu dë. Nöo hiniwan juu un musu ta dë ku tangi seei a unu hati u dee soni a bi du da unu.

Aki Paulosu ta bai de taa de an musu mbei sëmbë ganjan de buta a wëti basu möön.

⁸ Nöo un haika, dee sëmbë. Un musu köni e, be na wan sëmbë musu ko lei unu wan oto fasi fuun dini Gadu. Biga de o ko biinga u de wini unu ku dee sōsō lei u di goonliba aki taa ee i kë dini Gadu nöo i musu hoi dee peipei wëti u de, dee deseei mbei. Ma wan musu piki e. Biga dee lö lei dë an kumutu a Keesitu, ma a libisëmbë pakisei ku dee makiti dee ta tii goonliba de kumutu.

⁹⁻¹⁰ Wë biga di unu ku Masa Jesosi ko di wan kaa, nöo soni an ta makei unu möön e. Biga fa Masa Jesosi dë wan libisëmbë seei, ma Gadu seei gbelin a dë. Hën nöo da di hedima u hii dee basia u Masa Gadu Köndë, nöo a hei möön hii dee didibi tuu a mundu ala. Hii soni dë nëen basu, nöo nëen hii soni fuu dë.

11 Nöo di unu ku en ko di wan kaa, nöo hën Masa Gadu maaka unu u sëmbë musu sabi taa un da sëmbë fëen. Ma di maaka fuunu, hën an dë a sinkii kuma di u dee Isaëli sëmbë e. Nöo na libisëmbë maaka unu tu, ma Jesosi, Keesitu seei hën maaka unu. Biga a puu dee takuhati fasi fuunu tuwë.

12 Nöo fa un kisi dopu dë, dee sëmbë, nöo hën ta lei taa un kaba ku di awoo libi fuunu. Biga di de kii Masa Jesosi bei, nöo unu ku en wë de bi bei makandi dë e. Nöo Gadu weki en puu a dëdë dëen njunjun libi dë, nöo hën da unu ku en tuu kisi wan njunjun libi makandi. Biga un ko ta biibi taa Gadu abi kaakiti te tjika u puu unu a hogilibi basu.

13 Nöo a fesi un bi ta böo nöo, ma wan bi dë ku libi eti e. Biga unu ku Masa Gadu bi dë paatipaati u dee hogihati libi fuunu hedi. Wan bi dë sëmbë u Gadu kuma u dee Isaëli sëmbë, dee bi abi dee wëti u Gadu. Ma fa Masa Gadu weki Masa Jesosi puu a dëdë dëen njunjun libi dë, nöo a da unu njunjun libi tu. Biga unu ku en ko di wan. A puu unu a bëe u hii dee hogi du fuunu.

14 A fesi un bi a' föutu a Gadu, nöo un bi musu kisi sitaafu kumafa Gadu bi buta, fu di un bi booko dee wëti fëen. A dë kuma hii dee wëti tuu dee u bi poi bi dë sikifisikifi a pampia, ma nöo hën Gadu tei di pampia naandë tja go peka a di lakpa pau ku Masa Jesosi, be a kaba ku dee wëti naandë.

15 Nöo a di lakpa pau dë seei tu, naandë Masa Jesosi wini hii dee didibi ku dee makiti u de tuu faa kaba de a sösö. A da de sen a hii mundu wojo, be hën wanwan nöo dë winima.

16 Söö. Wë nöo dee sëmbë, wan musu mbei na wan sëmbë toobi unu möön a di së u dee lö wëti dë e. Ee de ta kuutu unu taa wan ta hoi dee tjina u njanjan ku soni u bebe, ee nasö saba, ee nasö dee oto peipei daka de ta hoi, nöo wan musu a' toobi ku de e.

17 Biga dee tjina u bi ta hoi dë bi dë wan soni nöo u bi ta du fuu ta mëni di ko u Jesosi, Keesitu a bi o ko. Ma fa u dë aki a ko kaa e, nöo an dë fanöudu fuu hoi dee lö wëti dë möön.

18 Nöo söseei wan musu piki ee wan sëmbë ko a unu ku gaan sakafasi ta taki taa Masa Gadu bi lei en wan soni, nöo fa a lei en dë nöo a si taa wan ta libi bunu. Sö wan libi wan o feni paima fëen, biga wan ta saka unu seei kumafa a fiti ta begi dee basia u Masa Gadu köndë. Sö so sëmbë ta fan.

Ma nöo te wan sëmbë ko taki sö wan soni da unu, nöo wan musu piki en e. Biga dee lö sëmbë dë ta mëni taa de bumbuu möön hii sëmbë, ma na tuu. Gaan fasi ku dee taku pakisei u libisëmbë nöo de abi sö.

19 Fa de sai dë, de disa Masa Jesosi gaanduwe. Ma hën da di Hedima fuu di ta sölgu u ta seeka fuu ko dë kumafa Gadu kë. Hën ta hoi hii u tuu makandi kumafa dee tatai u sinkii ta hoi di sinkii fii makandi faa sa göö kumafa a dë fanöudu.

20-21 Wë nöo dee sëmbë, kumafa u taki dë, unu ku Masa Jesosi, Keesitu dëdë makandi e, nöo un ko a wan njunjun libi dendu. Un kaba ku dee awoo guwenti fuunu dee un bi abi, ku dee awoo fasi u di goonliba aki. Nöo an dë fuun hoi dee gaduwëti dee libisëmbë ta buta da unu möön e, taa ja musu panjan disi, ja musu tesi di dë, ja musu nama a di soni dë.

Nöo di un kaba ku de kaa, nöo faandi mbei un musu toona go ta libi a peipei wëti basu möön baa?

22 Biga dee lö soni dë an dë wan wojo soni möönsö. Tuu u de di dë kaa, biga libisëmbë wëti nöo de dë.

23 Nöo dee sëmbë dee ta lei i de, a djei taa de köni fu di de ta konda da i taa a sö wan fasi i musu ta dini Gadu. De taa i musu saka i seei gaanfa, be sëmbë si taa ja dë wan wojo soni. I musu ta pena i seei sinkii ta dëen sitaafu. Ma fa

de taki ɛn dɛ seei, ma na kɔni de kɔni sɔ e. Biga dee lɔ wɛti dɛ an ta puu dee taku hangɪ fii hati da i.

3

Aki Paulosu ta taki da de taa de musu suku dee soni u Masa Gadu dee a ta kai gaan soni.

¹ Dee sɛmbɛ o, di unu ku ɽJesosi, Keesitu weki makandi ko a wan nɽunjun libi dendu naandɛ, nɔɔ fɛɛn mbei hati fuunu musu dɛ a dee soni u Gadu Kɔndɛ ala e, ka Masa Jesosi dɛ sindosindo a di letimaun sɛ u Gadu.

² Wan musu ta buta pakisei a dee soni u di goonliba aki mɔɔn e, ma be un buta pakisei fuunu a dee soni u Gadu Kɔndɛ ala.

³ Biga fa unu ku ɽJesosi, Keesitu dɛdɛ makandi dɛ, nɔɔ dee soni u di goonliba aki an dɛ wan wojo soni da unu mɔɔn. Biga na di tuutuɔ libi fuunu disɪ eti e. Di waiti libi di un abi, nɔɔ a dɛ tɽubɪtɽubi a ɽMasa Jesosi, Keesitu ala. Biga u ku ɛn dɛ di wan, leti kumafa hɛn ku Gadu seei dɛ di wan.

⁴ Nɔɔ te a toona ko a goonliba aki baka u kisi di nɛbai fɛɛn, nɔɔ unu seei o dɛ a dendu tu e, nɔɔ sɛmbɛ o si di tuutuɔ libi fuunu di un abi awaa.

Aki Paulosu ta bai de u de disa dee takulibi u goonliba.

⁵ Wɛ nɔɔ dee sɛmbɛ, di un sabi sɔ kaa, nɔɔ un musu kaba ku dee takulibi u di goonliba aki e, kuma mɔtɽɔ libi sɔ, fanafiti libi, dee taku hangɪ a di sɛ u manu ku mujɛɛ, langawojo u soni. Wɛ biga ee i a' langawojo, nɔɔ i dɛ leti kuma dee sɛmbɛ dee ta waka a oto gadu baka.

⁶ Nɔɔ fu dee lɔ soni dɛ hedi Gadu o kuutu dee sɛmbɛ dee an kɛ piki ɛn buka. A o sitaafu de ku gaan hatiboonu.

⁷ Nɔɔ a fesi unu seei bi dɛ kuma de tu, ta libi a di leiki u dee taku hangɪ fuunu hati.

⁸ Ma fa u dɛ aki nɔɔ wan musu libi sɔ mɔɔn e, dee sɛmbɛ. Un musu kaba ku dee lɔ libi aki faa: dee hatiboonu fasi, buuse sɛmbɛ, du soni ku otowan ku hogihati, ta guunjan di otowan fii ta tɽɛɛn ta kosi, ta taki dee dɛɛwojo taki dee na fiti. Dee soni dɛ an musu dɛ a unu seei.

⁹ Ja musu ta lɛgɛdɛ ta mindi soni da di otowan fii ta ganɽɛɛn. Biga i kaba ku hii dee awoo takuhati fasi dee un bi abi.

¹⁰ Masa Gadu da i wan nɽunjun hati kaa e, nɔɔ a ta seekɛɛn faa ko dɛ kuma di fɛɛn seei. Nɔɔ mɔɔnmɔɔn i sabi ɛn, mɔɔnmɔɔn joo ko dɛ kuma hɛn.

¹¹ Nɔɔ antoobi mɔɔn aluwasi ee i dɛ Dju sɛmbɛ, ee ja dɛ Dju sɛmbɛ, ee i koti di maaka u Dju, ee ja koti ɛn, ee i sabi soni, ee ja sabi wan wojo soni, ee i dɛ saafuma, ee i dɛ fiima. Biga di wan kodo sɛmbɛ nɔɔ u dɛ. Masa Jesosi hɛn nɔɔ u tuu ta kai gaan soni. Hɛn nɔɔ ta dɛ a u tuu hati.

Aki Paulosu ta konda da de fa u de musu libi bunu a goonliba.

¹² Dee sɛmbɛ o, fa Masa Gadu tei u buta apaiti fɛɛn seei aki, nɔɔ a lobi u gaanfa e. Nɔɔ fɛɛn mbei un musu a' tɽalihati u otowan. Un musu libi ku ɛn ku bunuhati, ku saka fasi. Nɔɔ un musu abi sapifasi ta mɛni di otowan fii ta hoi pasensi dɛɛn.

¹³ Un musu a' tɽifhedi da unu na unu e. Ee i ku sɛmbɛ a' soni, nɔɔ ja musu hoi ɛn a bɛɛ, leti kumafa ɽMasa Jesosi, Keesitu an ta hoi i a bɛɛ.

¹⁴ Nɔɔ u hii dee libi aki tuu, nɔɔ lobi hɛn da di mama u de e. Biga te un lobi unu na unu, nɔɔ un sa libi makandi ku wan hati kumafa Gadu kɛ.

¹⁵ Fa un ko a ɽMasa Jesosi, Keesitu dɛ, dee sɛmbɛ, nɔɔ un ko dɛ bɔɔbɔɔ. Fɛɛn mbei na wan toobi musu dɛ a unu mindi. Biga un tuu dɛ di wan sinkii, nɔɔ

Gadu kai unu fuun ta libi makandi ku wan hati. Nöo un musu ta da Gadu tangi nöömö e.

¹⁶ Nöo un musu sabi dee wöutu u „Masa Jesosi, Keesitu bunu ta piki de nango nöömö. Un musu ta lei unu seei dee soni u Masa Gadu ta fan ku unu na unu ku fusutan ta kanda dee kanda dee dë a Gadu Buku ku dee di Akaa u Gadu ta da unu. Un musu ta gafëen ku hii unu hati ta dëen tangi nöömö fu dee soni dee a du da unu.

¹⁷ Nöo fa un ko dë sëmbë u Masa Jesosi aki, nöo hii dee soni un ta du ku dee un ta fan tuu musu kai ku ën e. Un musu ta da u Tata Masa Gadu tangi nöömö, biga Masa Jesosi jabi di pasi da u kaa fuu sa tja tangi ko dëen.

¹⁸ Nöo un dee mujëe, un musu ta piki unu manu buka a soni e. Biga sö a fiti biibima u Masa Jesosi fu de musu libi.

¹⁹ Nöo un dee womi dee abi mujëe a wosu, un musu lobi dee mujëe fuunu. Wan musu libi hogi ku de e.

²⁰ Nöo un dee mii, un musu ta piki dee gaan sëmbë fuunu buka a hii soni, biga sö Masa Jesosi kë fuun ta libi.

²¹ Nöo un dee tata, wan musu libi ku dee mii fuunu a wan fasi te de ko ta lasi hati e.

²² Nöo un dee sëmbë dee ta wooko a oto sëmbë basu, un musu ta piki dee basi fuunu buka e. Na te de sai dë ufö, kuma un ta suku gafa a libisëmbë. Nönö. Ma un musu piki de buka ku hii unu hati fu di un ta lesipeki Masa.

²³ Nöo fëen mbei hiniwan soni di woon ta du kaa, nöo un musu ta du ën ku hii unu hati. Biga na libisëmbë un ta wooko da e, ma Masa hën un ta wooko da.

²⁴ Nöo fa a dë Masa fuu dë, nöo hën o paka u di paima leti kumafa a paamusi u kaa, fu di u dë sëmbë fëen.

²⁵ Söseei tu, a o sitaafu hiniwan sëmbë di ta du hogi, leti kumafa a fiti dee du fëen. Biga an ta luku a fesi.

4

¹ Nöo un dee sëmbë ta a' sëmbë ta wooko a unu basu, un musu ta libi bunu ku de kumafa a fiti. Biga i seei sabi taa i abi wan Masa a i liba tu di ta dë a Gadu Köndë ala.

Aki Paulosu ta taki soni u begi.

² Nöo wan musu wei fu begi Gadu e, dee sëmbë. Ma hiniwan juu un musu ta dë kabakaba fu un begi ën ku hii unu pakisei, nöo un musu ta dëen tangi nöömö u di heepi di a ta heepi u.

³ Nöo un musu ta begi da u tu, dee sëmbë, u Gadu musu da u pasi fuu ta konda di Buka, be sëmbë jei dee tjubitjubi soni u Gadu dee bi kô a limbo a „Jesosi, Keesitu. Di Buka dë, fu di mi ta kondëen, fëen mbei wë i si de bui mi buta aki.

⁴ Nöo un ta begi da mi o, u mi sa kondëen limbolimbo nöömö, be hii sëmbë musu sa fusutëen. Biga hën da di wooko u mi kaa.

Aki Paulosu ta lei dee sëmbë kumafa de musu libi a dee sëmbë dee an ta biibi dendu.

⁵ Nöo te un dë a dee sëmbë dendu dee an ta biibi Masa Jesosi, nöo un musu mëni unu seei fuun ta libi ku fusutan e. Wan musu lasi di okasi fii du wan soni di sa tja heepi ko.

⁶ Nöo te woon fan ku sëmbë, nöo un musu fan a wan bunuhati fasi. Wan musu ta fan sösö soni, ma di fan fuunu musu abi goma. Nöo un musu sabi fa fuun ta piki dee sëmbë dee o ta hakisi unu soni, kumafa a fiti wan biibima.

Aki Paulosu ta tapa di biifi.

⁷ Nöo di fa hii soni u mi dë aki, nöo Tikikusi hën o kondëen da unu e. Di womi dë, a dë wan bumbuu futuboi u Masa Gadu di u lobi aki. Nöo a ta heepi u seei a di wooko u Gadu.

⁸ Nöo mi ta mandëen da unu ala fuun sa jei fa u dë aki, be hati fuunu ko kötö.

⁹ Hën ku Onësimusi, di sëmbë fuunu, o ko a unu ala makandi. Nöo te de ko, nöo de o konda hii soni di ta pasa aki da unu. Fa Onësimusi sai dë, a dë wan sëmbë di u lobi aki tu e, nöo u a futoou nëen liba.

¹⁰ Alisitakusi di mi ku ën dë a dunguwosu aki makandi, hënseei ta manda gaan odi da unu tu, dee sëmbë, hën ku Maikusi di dë famii u Banabasi. Nöo un bi kisi buka u Maikusi kaa, nöo te a ko a unu ala nöo be un hoi ën bunu e.

¹¹ Nöo Josua ta manda odi da unu tu. Hën seei da Jusitusi.

Dee sëmbë mi kai aki, de nöo da Dju sëmbë ta heepi mi a di wooko u Masa Gadu aki ta paa ja di tii fëen a goonliba, nöo de ta da mi degihati seei.

¹² Nöo Epafasi, di dë wan sëmbë fuunu, manda gaan odi da unu tu. Hën seei dë wan futuboi u „Masa Jesosi, Keesitu tu, nöo a ta begi taanga seei da unu fuun musu dë gingin a di biibi un ta biibi a Masa Jesosi. A ta begi fuun musu ko gaan sëmbë a di biibi e, be un sabi bumbuu kumafa Gadu kë fuun musu libi.

¹³ Nöo di mi sabi sö fëen, nöo mi kë fuun seei musu sabi sö tu taa a ta mbei möiti gaanfa da unu ku dee sëmbë u Laodisea ku dee dë a Hilapolisi tu.

¹⁴ Nöo di lobi data fuu de ta kai Lukasi, hënseei ta manda gaan odi da unu tu, hën ku Demasi.

¹⁵ Nöo un da dee biibima u Laodisea gaan odi da u e, dee sëmbë, ku Ninfa, ku hii dee sëmbë nango nëen wosu a keiki.

¹⁶ Nöo fa woon kisi di biifi aki, nöo un musu lesi ën da hii dee sëmbë u Masa Jesosi a unu ala, be de tuu jei ën. Nöo te un kaba u lesi ën dë, nöo un mandëen da dee biibima u Laodisea be de lesi ën a keiki ala tu. Nöo un tei di oto biifi di mi manda da dee sëmbë a Laodisea ala tja ko lesi a unu naandë tu.

¹⁷ Nöo un taki da Akipusi taa be a mbei möiti faa go dou ku di wooko u Masa di a buta nëen maun e.

¹⁸ Nöo fa mi dë a dunguwosu aki, nöo un musu ta mëni mi nöömö e, dee sëmbë. Na soni möönsö. Mi, Paulosu seepi, ta sikifi di pisi u di biifi aki ku miseei maun. Mi ta manda gaan odi da unu taa Masa Gadu musu dë ku unu ku ën bunuhati. A tan sö.

Di fosu biifi Paulosu manda da dee biibima u Tesalonika

Wan wöutu a fesi.

Tesalonika bi dë wan köndë a wan pisiwata de kai Masadonia. Nöö a di ten di di tjabukama u Masa Jesosi de kai Paulosu bi ta lontu ta paaja di buka u Masa Jesosi, nöö hën a go dou a Tesalonika. Hën a da dee sëmbë u di köndë di buka. Nöö di de jei ën, hën so u de piki tei Masa Jesosi fu de Gadu. Ma nöö dee oto sëmbë u di köndë an kë sô, nöö hën de mbei toobi ku Paulosu te a kumutu a di köndë go.

Nöö fa Paulosu go dë, a sabi taa dee biibima u Masa Jesosi a Tesalonika ta kisi sitaafu nöömö fu di de ta biibi hedi. Nöö a ta dëen bookohedi. Nöö hën a dë te wan pisi, hën a manda di kijoo de kai Timoteo faa go haika de luku ee de disa di biibi, ee de ta hoi dou.

Nöö di Timoteo go te a ko, hën a tja wan suti buka ko da Paulosu taa dee Tesalonika biibima ta hoi dou eti. Nöö di Paulosu jei sô, hën a mbei wan biifi manda da de u di wai di a ta wai ku de. Nöö hën wë da di pampia aki.

Nöö Paulosu taki sômëni soni a di biifi aki tu u di fa Masa Jesosi o toona ko tei dee sëmbë fëen tja go. Nöö a ta leti dee Tesalonika biibima a di fa de musu libi fu tee Masa Jesosi toona ko.

Aki Paulosu ta da Gadu tangi u di fa dee biibima u Tesalonika hoi di biibi tjika.

¹ Wë dee sëmbë, mi Paulosu ku Timoteo ku Silifani, „hënseei da Silasi,„ u ta mbei di biifi aki manda da un dee sëmbë fuu Tata Masa Gaangadu ku Masa Jesosi Keesitu, dee ta ko makandi a keiki a Tesalonika. Masa Gadu musu dë ku unu ku ën bunuhati e. A musu da unu kötôhati.

²⁻³ Wë nöö dee sëmbë, u kë fuun ko sabi taa hibiwanten te u ta begi nöö u ta mëni hii unu tuu a u Tata Masa Gaangadu fesi. U ta dëen tangi da unu seei. Biga u ta mëni fa un ta biinga da di wooko u Gadu fu di un ta biibi ën hedi, nöö u ta mëni tu fa un ta wooko taanga fu di di lobi u Gadu dë a unu hati. U ta mëni fa un ta tai hati a dee sitaafu dee un ta tja naandë te go dou, fu di un ta mëni dee soni Masa Jesosi Keesitu paamusi u taa de o pasa nöömö. Dee lö soni dë wë mbei u ta dëen tangi da unu e.

⁴ Wë nöö dee sëmbë, Gadu lobi unu tuú o, nöö u sabi taa a tei unu ko sëmbë fëen.

⁵ Nöö di soni mbei u sabi sô. Fa u bi tja di Buka u Masa Jesosi ko konda da unu naandë, nöö wa tjeën kuma sôsô wöutu u ta taki nöö a kaba. Ma u ko ku di kaakiti u Gadu seei. Di Akaa fëen bi dë ku u, nöö hën u fan gbelingbelin ku unu, te un ko si taa di Buka dë, a dë wan gaan bambuu soni fuun musu piki.

Nöö unu seei sabi fa u bi libi bunu a unu mindi a di lö ten naandë. Nöö di soni mbei u bi libi sô e, fuunu hedi wë, fuun sa bia ko a di së u Masa.

⁶ Hën wë i si un ko ta djeesi u ku Masa Jesosi tuú. Biga di un piki di Buka, nöö hën dee sëmbë fuunu köndë dë da unu sitaafu te fu kii, ma töku wan disa. Ma un kisi di Buka hoi ku wan gaan wai di di Akaa u Masa Gadu seei da unu.

⁷ Nöö hën un ko dë wanlö sëmbë di hii dee oto biibima u Masa Jesosi tuu musu djeesi, dee ta dë a unu pisiwata a Masadonia ala te dou ku dee ta dë a u a Giiki Köndë aki tu.

⁸ Ma fa u taki dë, na dee sëmbë u dee pisiwata fuu aki nöö jei fuunu e, dee sëmbë. Ma di buka u Masa Jesosi paaja seei a mundu, biga hii sëmbë tuu ko

ta taki kumafa un ko ta biibi tjika. Te u ta waka an dē fuu ta kondēen da oto sēmbē mōön,

⁹ biga hii sēmbē jei ēn kaa. Nōo deseeti tei ēn ta konda da u kumafa un bi hoi u ku gaan piizii di u bi ko a unu naandē. De ta konda da u tu kumafa un disa dee ganjanganjan gadu ko ta waka a di tuutuu Gadu baka di ta libi u nōömō.

¹⁰ De ta konda da u taa un ta luku di Mii fēen nōömō, faa kumutu nēen Tata kōndē ko a u. Sō fuunu de ta konda e, dee sēmbē. Nōo fa Masa Jesosi sai dē, Gadu weki ēn puu a dēdē tuu, nōo hēn puu u a di sitaafu u Gadu di o ko.

2

Aki Paulosu taki u di wooko

di a bi du a Tesalonika.

¹ Wē nōo fa u fan dē, dee sēmbē, hēn da unu seei musu sabi taa di ko u bi ko a unu naandē an bi dē u sōsō.

² Ma nōo bifō u bi ko a unu u bi tja gaan sitaafu a Filipi e. De bi sōsō u ala gaanfa, kumafa un sabi kaa. Ma nōo tōku Gadu bi dē ku u, hēn a da u hati te u pasa tja di Buka fēen ko da unu tu. Hēn u ta kondēen nōömō, hii fa felantima fuu bi dē a unu kōndē ala tu ta buta ku u.

Ma wa bi a' toobi ku dee felantima dē e.

³ Biga di Buka u ta tja aki tuutuu soni a dē, na ganjanganjan soni fuu sa ta tjēen ku ganjan fasi ta naki unu tētē fuu wini soni a unu.

⁴ Nōnō e, dee sēmbē. Ma u ta tjēen fu di Gadu seei futoou u te a butēen a u maun, hēn mbei u ta tjēen ta konda. Nōo hēn mbei tu wa ta suku u kondēen faa kai ku libisēmbē e, ma u ta suku faa kai ku Gadu. Biga hēn ta wegi di hati fuu ta luku ee a dē limbolimbo.

⁵ Dee sēmbē o, unu seei sabi fa u bi libi a unu ala. Na wan ten seei u bi ta mbei mōiti fuu kisi sēmbē tja ko a u ku suti oto e. Nōo na ku langahati u bi ko a unu tu. Biga na wan daka u tei di hei Gadu da u aki fuu ganjan unu njan. Fa u ta fan aki, Gadu seepi sabi taa tuutuu soni u ta taki.

⁶ Nōo fa u bi libi a unu mindi dē, wa bi ta suku bunu nē a na wan libisēmbē, na a unu, na a oto sēmbē mōönsō tu, boiti a Gadu wanwan nōo.

⁷ Dee sēmbē, ka u dē tjabukama u „Masa Jesosi“, Keesitu tjika aki, nōo u bi sa buta ku unu seei fuun dini u. Ma nōo wa du sō. Ma u bi dē a unu mindi leti kuma wan mama ta kiija dee piki mii fēen.

⁸ U bi lobi unu tee na soni, hēn mbei u bi ta wai seei taa u sa paati di Buka u Masa Gaangadu da unu. Nōo na di buka wanwan u bi paati da unu e, dee sēmbē, ma di libi fuu seei tu. Sō un ko dē wan hati soni da u tjika.

⁹ Wan mēni fa u bi wooko taanga di u bi dē a unu ala nō? Ndeti ku didia u bi ta wooko ku u seei maun, biga wa bi kē buta di hebi u soni u njan fuu a unu liba.

¹⁰ Unu seei, ku Masa Gaangadu tuu, bi si fa u libi bunu a un dee biibima u Masa Jesosi mindi di ten dē. U bi libi limbolimbo a Gadu wojo e. U libi a wan leti fasi ku unu te na wan sēmbē bi sa feni fōutu a u.

¹¹ Nōo un sabi fa u bi ta tja unu tu leti kumafa wan tata ta kiija dee mii fēen dee a pai.

¹² Te un lasi hati, u ta da unu degihati. Te soni miti unu, u ta ko kēē pena ku unu. U bi ta buta ku unu fuun libi leti kumafa a fiti dee sēmbē dee nama ku di Gadu di u ta dini aki. Biga hēn kai unu fuun ko dē a di tii fēen dendu, be un ko a dendu u di hei ku di waiti fēen di a abi.

¹³ Wē nōo dee sēmbē, hiniwan juu u ta da Masa Gadu tangi fuunu hedi e. Wē biga di u konda di Buka da unu naandē, nōo un piki ēn leti kuma a Gadu

a kumutu, na a libisëmbë. Nöo Gadu Buka a dë tuu o, nöo fa un ta biibi ën dë nöo a ta wooko a unu hati seei.

¹⁴ Nöo hën un ko djeesi dee biibima u Jesosi Keesitu dee ta dë a Judea. Fa de ta miti makandi a dee peipei köndë u Judea dë, nöo de ta kisi gaan sitaafu a dee oto Dju sëmbë kuma de, leti kumafa unu seei ta kisi sitaafu a dee sëmbë fuunu.

¹⁵ Dee sëmbë o, fa i si dee Dju sëmbë sai naandë, de hogi tuu o. Biga dee gaan sëmbë u de wë bi kii dee fesiten tjabukama u Gadu, nöo hën dee disi toona kii Masa Jesosi tu. Nöo hën awaa de toona ko ta jaka u puu a dee köndëköndë. Fa de sai naandë, dee soni de ta du an ta kai ku Gadu seei, kwetikweti. Nöo de ko felantima u hii sëmbë,

¹⁶ biga de ta biinga ku u nöömö fu wa musu konda di Buka da dee oto sëmbë dee an dë Dju. A di fasi dë, de ta tapa de u de an musu feni di heepi u Gadu möönsö.

Nöo fa de ta du ën naandë, nöo di hogi du u de hia te a ko dë tjongoo. Biga di hatiboonu u Gadu ta kai leti a de liba awaa.

Aki Paulosu ta taki fa a hangi dee biibima u Tesalonika tjika.

¹⁷ Dee sëmbë fuu o, fa i si dee sëmbë paati u ku unu ku taanga naandë, nöo a hati u e. Ma hii fa u paati a sinkii fasi fu di sati pisiten aki seei, ma pakisei fuu dë leti a unu naandë eti. U ta hangi unu te na soni. Nöo u mbei möiti te u wei fuu toona ko a unu.

¹⁸ Sömëni pasi kaa mi Paulosu seei bi kë ko a unu, ma di didibi, Saatan, ta tapa u. Hën wë mbei i si wa dou a unu ala eti.

¹⁹ Biga dee sëmbë, ambë seei u ta mëni fuu lei Masa Jesosi te a ko? Ambë da di hei fuu, ku dee sëmbë u ta wai da fa u dë aki? Na unu nö? Unu wë e, dee sëmbë. Fuunu hedi wë woo poolo a di daka di Masa Jesosi Keesitu o toona ko baka.

²⁰ Biga unu wë da di hei fuu e, ku di wai fuu u ta wai.

3

Aki Paulosu taki faandi mbei

a manda Timoteo.

¹ Wë dee sëmbë, u bi ta mëni unu tee wa saanfa u du möön. Nöo hën wë u kuntu taa woo manda Timoteo ko a unu ala, nöo mi ku Silasi wanwan o fika na Atene aki.

² Nöo hën wë i si u mandëën ko a unu e, baa. Wë nöo un sabi Timoteo, taa a dë wan sëmbë fuu vö. U ku ën tuu ta dini Gadu makandi ta paaja di buka u Jesosi, Keesitu. Nöo hën wë u mandëën ko a unu ala faa ko da unu taanga ku degihati, be un go dou ku di biibi.

³ Biga wa kë na wan fuunu musu dë buujabuuja fu di dee sëmbë ta sitaafu unu hedi.

Ma nöo fa mi fan dë seei, dee sëmbë, ma un bi musu sabi taa sö woon kisi sitaafu fu di biibi hedi, na sö nö?

⁴ Biga di u ku unu bi sai dë, nöo u bi ta taki ën da unu nöömö taa ee wan sëmbë ko biibi a Masa Jesosi nöo a o kisi sitaafu nöömö. Sö u bi mbei un ko sabi kaa, dee sëmbë, nöo hën wë ta pasa ku unu fa u dë aki, kumafa unu seei sabi kaa.

⁵ Ma seei u bi panta da unu o, dee sëmbë. Hën mbei di mi si taa wa sa tan möön longi, nöo hën mi manda Timoteo be a ko haika unu, ee un dë a di biibi eti. Biga mi bi panta taa kandë di Gaan Tesima de kai di didibi ko tesi unu a

wan fasi te a hai unu puu a di biibi. Nöo di wooko u bi wooko a unu mindi dë, nöo a ko dë u sösö.

Aki Paulosu ta taki u di suti njunsu di Timoteo bi tja ko dëen.

⁶ Wë nöo dee sëmbë, djunsu aki Timoteo toona ko a u. Nöo a tja wan suti njunsu fuunu ko da u e, nöo u ta wai seei. Biga a konda da u taa di lobi fuunu ku di fa un ta biibi, de dë seei tjentjen eti. Sö a ko taki da u aki. A taki da u tu taa te un ta mëni u, nöo un ta wai te na soni. Un ta hakisi ee na un ten seei u sa toona miti baka. Sö un ta hangü u tjika, leti kumafa u seei ta hangü unu aki tu.

⁷ Wë nöo dee sëmbë, di u jei taa un ta hoi a di biibi go dou eti, nöo u kisi degihati seei. Wa a' toobi möön ku fa sëmbë ta sitaafu u aki ta da u fuka.

⁸ Biga di libi fuu toona ko suti da u, fu di u jei taa un dë gingin a Masa Jesosi eti.

⁹ Nöo wa saanfa u da Masa Gaangadu tangi da unu baa, fu di wai u ta wai da unu nëen fesi fa u dë aki e.

¹⁰ Ndeti ku didia u ta begi ën gaanfa faa sa da u pasi fuu ku unu miti fesi ku fesi möön. Biga u kë lei unu dee soni dee makei unu eti, fu di biibi fuunu musu sa ko dë telutelu. Sö u kë e, dee sëmbë.

¹¹ Hën mbei u ta begi u Tata Masa Gaangadu ku Masa Jesosi tu, fu di pasi sa jabi da u be u ko a unu.

¹² Nöo u ta begi da unu tu e, dee sëmbë, taa di lobi fuunu di un ta lobi unu na unu, ku di lobi di un ta lobi oto sëmbë musu ta göö nango möönmöön, leti kumafa di lobi di u ta lobi unu ta göö.

¹³ Gadu musu seeka dee hati fuunu be un dë gingin a di biibi e. Nöo te u Masa Jesosi toona ko a goonliba, hën ku dee basia fëen köndë, nöo woon dë gbelingbelin söndö föutu a Masa Gaangadu fesi. Sö u kë fuunu e, dee sëmbë.

4

Aki ta taki fa de musu du fu di libi u de sa da Gadu piizii.

¹⁻² Wë sö wë e, dee sëmbë. Di ten u bi dë a unu naandë, nöo u bi ta lei unu fa fuun libi te nöo Gadu sa wai ku unu. Di lei u lei unu dë, nöo Masa Jesosi seei wë manda u fuun lei unu sö e, kumafa un sabi kaa. Nöo leti sö nöo un ta libi tu. Wë ma nöo u kë fuun musu ta libi sö nöömö nango, fu di un nama ku Masa Jesosi.

³ Nöo u kë toona bai unu a wan soni möön. Fa un sai dë, Masa Gadu kë fuun libi a wan apaiti fasi dëen, söndö föutu. An kë fuun libi wan fanafiti libi di na kai ku di fa a buta fu manu ku mujëe musu libi e. Nönö.

⁴ Ma hiniwan fuunu musu sabi fa fii tii i libi tololoo a di së u manu ku mujëe soni. Libi fii musu dë seei limbolimbo a Gadu fesi, be sëmbë a' lesipeki fii.

⁵ Dee sëmbë o, wan musu libi kumafa dee sëmbë dee an sabi Gadu ta libi e. Biga fa de sai dë, hiniwan hogi di hati u de kë a di së u manu ku mujëe, nöo de ta du ën waiwai kuma na hogi. Ma nöo unu wan musu libi sö e.

⁶ Biga na wan fuunu musu ta libi ku di otowan fii a dee lö hogi fasi dë. Nöo mi taki e, taa ee i du sö nöo Gadu an o disa i. A o sitaafu i nöömö u dee lö soni dë. Sö u bi bai unu kaa e.

⁷ Biga Gadu an kai u fuu ta libi a wan sundjusundju fasi, ma fuu libi wan gbelingbelin libi nëen fesi.

⁸ Fa u ta fan aki, nöo ee wan sëmbë ja kë piki dee soni u ta taki, nöo na libisëmbë buka ja kë piki e, ma Masa Gadu seei buka ja kë piki. Biga wë hën ta da u di Limbo Akaa fëen fuu sa libi wan limbolimbo libi nëen fesi.

⁹ Wë nöö dee sëmbë o, an dë fuu sikifi da unu möön fa fuun lobi unu seei makandi kuma baaa ku baaa e. Biga Gadu seei lei unu di soni dë kaa.

¹⁰ Nöö sö nöö un ta libi tu e. Biga un ta lobi hii dee otowan fuunu tuu, dee ta dë a hii Masadonia köndë ala kaa. Nöö u kë begi unu fuun musu ta libi nango sö möönmöön eti.

¹¹ Nöö u taki e, fa i si un sai dë, wan musu ta suku takitaki ku unu na unu e, ma un musu libi a wan pii fasi sö. Wan musu ta hulu dee otowan fuunu soni tumisi, ma hiniwan sëmbë musu ta hulu hënseei soni ta du fëen seei wooko kumafa a fiti. Na sö u bi taki da unu kaa nö?

¹² Biga ee hiniwan daka un ta libi sö, nöö dee sëmbë dee an ta biibi o ta lesipeki unu. Nöö an o dë fuun musu ta langi a sëmbë hiniwanten tu, taa hën nöö musu ta heepi i a soni.

Aki ta lei u fa di toona ko u Masa Jesosi o dë.

¹³ Wë nöö u kë fuun sabi wan oto soni möön, dee sëmbë. Di soni aki nama a dee otowan fuunu, dee bi ta biibi Masa Jesosi ma de dëdë kaa. Biga wa kë fuun musu ta kusumi gaanfa fu de hedi e, kumafa dee sëmbë dee an ta buta mëni u de a Gadu ta kusumi gaanfa te sëmbë u de dëdë.

¹⁴ Wë biga u ta biibi taa di Masa Jesosi dëdë nöö hën a toona weki baka. Nöö hën mbei u ta biibi tu taa te a o toona ko, nöö Gadu o tja dee otowan fuu bi dëdë dë, ko ku ën.

¹⁵ Nöö fa woo taki aki, nöö na soni u ta mindi e, biga Masa Jesosi seei bi taki di soni aki da u. A taa, uu dee sëmbë dee o dë ku libi a di ten di a o toona ko, nöö wa o waka a dee otowan fuu fesi dee bi dëdë kaa e.

¹⁶ Biga a di fasi aki sö di soni o pasa, dee sëmbë. Woo jei wan gaan bai o piki, nöö di gaan hedi basia u Gadu köndë o bai fan te a koti. Nöö wan tutu o piki kumutu a Gadu ala. Nöö di juu dë, nöö Masa Jesosi o kumutu tee a liba ala ta bazia ta ko. Nöö dee otowan fuu, dee sëmbë u Keesitu dee bi dëdë kaa, nöö de o weki wante, nöö de fosu o ta subi nango a Masa Jesosi.

¹⁷ Nöö fa i si de o nango dë, nöö u dee dë ku libi eti a di ten dë, u seei o hopo nango ku de makandi te a dee bundji ala pii, go miti ku Masa Jesosi. Nöö fa woo miti ku ën dë, nöö wa o paati ku ën möönsö e. U ku ën o dë makandi fu teego.

¹⁸ Wë nöö sö e, dee sëmbë. Fa i si u fan ku unu aki, nöö un tei dee wöutu aki nöö un ta da unu na unu taanga ku de.

5

Aki ta bai de taa de musu dë kabakaba ta luku di ko

u Masa Jesosi.

¹ Wë nöö fa u taa Masa Jesosi o toona ko baka dë, dee sëmbë, nöö di juu di a o ko ku dee soni dee o pasa ufö di ten dë dou, nöö an dë fanöudu u mi musu sikifi soni u de da unu.

² Biga un sabi kaa taa di daka dë, na wan sëmbë o sabi ën. A o ko vau sö, leti kumafa fufuuma ta ko a ndeti.

³ Biga di ten dë, dee sëmbë u di goonliba aki o ta taki taa: “Aai, hii soni dë bunu kaa. An dë fuu fëë möön.” Ma te u de kë mëni, nöö di daka o dou a de vau sö, nöö kaba seei de o kaba a sösö.

Wë nöö un sabi fa a dë ku wan mujëe te a dë ku bëe. Te juu fëen dou, nöö a musu u pali nöömö. Nöö söseei di daka aki o ko nöömö tu. Na wan sëmbë o sa kule kumutu fu an kisi i.

4-5 Ma nöö dee sëmbë, an dë fu uun fëëë di daka dë. An o kisi unu kuma fufuuma a ndeti, biga uun dë ku mëni fëën kaa. Dee lö sëmbë u taki dë, nöö de dë a dungu së e. A dë kuma de ta du soni a ndeti, biga de an saandi de ta du. Ma fa u ta biibi a Masa aki, dee sëmbë, nöö u dë a didia biga u ta si soni limbolimbo.

6 Wë nöö di wa dë sëmbë u ndeti, nöö wa musu libi kuma u ta duumi e. Nönö. Ma u musu dë seei ku wojo setiseti fuu saandi u ta du.

7 A ndeti sëmbë ta duumi e, so sëmbë ta dööngö. Fa de sai dë, de an ta saandi ta pasa. Nöö sô dee sëmbë u taki naandë dë tu.

8 Ma nöö u, wa musu dë sô e, dee sëmbë. Fa u dë sëmbë u didia aki, nöö u musu dë ku pakisei ta tii u seei kumafa a fiti.

Ja si fa dee sodati ta bisi felu soni ta tapa sinkii fu de an musu kisi makei te sëmbë suti de nöö? Wë nöö sô seepi u dee sëmbë u Masa Jesosi aki musu dë tapatapa tu. Di biibi di u ta biibi a Gadu ku di lobi fëën di dë a u hati aki, de wë musu dë di felu bisi fuu fu wa kisi makei a di biibi. Söseesi tu di mëni u ta mëni fa Gadu puu u a hogi basu aki, hën o dë kuma di felu kaapusa u dee sodati.

9 Biga Gadu an pii u tei faa sitaafu u ku hatiboonu e. Nönö. Ma a pii u tei faa heepi u puu a sitaafu, fu di u nama ku Masa Jesosi Keesitu.

10 Biga hën da di Sëmbë di bi tei di dëdë fuu dëdë. Nöö di soni mbei a dëdë da u sô, biga a kë fuu ku ën ta libi makandi. Ee u dë ku libi a goonliba aki, ee u dëdë, ma u ku ën ta libi makandi nöömö.

11 Wë nöö di un sabi sô kaa, dee sëmbë, nöö be un ta da unu seei degihati ta heepi unu na unu fuun nango fesi nöömö, leti kumafa un ta du dë kaa.

Aki Paulosu ta da de dee lasiti lai u di fa de musu libi möön.

12 Wë dee sëmbë, mi kë begi unu baa taa be un mëni dee fesima fuunu, dee ta wooko taanga a unu dendu dë ta tii unu a di së u Masa, be un ta lesipeki de e. Fa de sai naandë, nöö de ta leti unu fa fuun musu libi a Gadu wojo.

13 Nöö fëën mbei un musu abi gaan lesipeki da de. Nöö un musu ta lobi de tu fu di wooko de ta du dë hedi.

Nöö mi taki da unu e, taa un musu libi kötökötö fasi ku unu na unu. Wan musu ta suku takitaki.

14 Nöö u ta manda unu, dee sëmbë, taa ee wan malëngëma dë a unu mindi dë, nöö un bai ën be a wooko e. Ee wan fuunu dë fëëëfëëë, nöö un fan ku ën be a kisi degihati. Ee wan fuunu dë suwakisuwaki, nöö un musu heepi ën be a ko taanga. Un musu abi pasensi ku hii sëmbë. A dee lö fasi dë un musu ta libi e, dee sëmbë.

15 Nöö un musu luku bunu tu, fu ee wan sëmbë du hogi ku i nöö ja musu toona du hogi ku ën baka. Ma hiniwanten un musu ta biinga fuun libi bunu ku unu na unu te kisi ku hii oto sëmbë tuu.

16 Fa un sai dë, dee sëmbë, hiniwanten un musu ta wai.

17 Hiniwanten un musu ta begi tu.

18 Hii dee soni ta pasa ku unu, ee hogi ee bunu, tökuseei un musu sai dë ta da Gadu tangi nöömö. Nöö sô Gadu kë fuun libi e, fu di un nama ku Jesosi Keesitu hedi.

19 Nöö mi taki e, taa te di Akaa u Gadu ta wooko nöö wan musu tapëën e, ma un musu dëen pasi be a wooko go dou.

20 Nöö te sëmbë kisi fan a Gadu, nöö wan musu sôsö dee soni dee a ta taki.

21 Ma un musu ta wegi hii soni luku ee de dë u Gadu tuu. Nöö te un si taa a bunu, nöö un hoi ën.

²² Ma hiniwan soni di un si taa an bunu kaa, nöö un koti pasi dëen e, dee sëmbë.

²³ Söö. Wë nöö mi o tapa di biifi aki e. Masa Gaangadu, di nëen hii kötöhati ta kumutu ko, hën musu ta mbei un ko dë apaiti dëen seei söndö föutu. A musu tjubi unu akaa ku unu hati ku unu sinkii tuu be de dë gbelingbelin, fu te Masa Jesosi Keesitu toona ko nöö woon dë söndö föutu nëen wojo.

²⁴ Fa u ta taki aki, dee sëmbë, Masa Gaangadu hën bi kai unu fuun ko sëmbë fëen, nöö un sa futoou ën e. Hën wë o heepi unu fuun libi kumafa u taki aki.

²⁵ Wë un dee sëmbë fuu dë, un begi da u e.

²⁶ Nöö un da hii dee oto biibima ala gaan odi. Un baasa de da u seei.

²⁷ Nöö mi ta manda unu a di në u Masa taa hii dee otowan fuu dee ta biibi Masa Jesosi palalaa dou musu lesi di biifi aki.

²⁸ Dee sëmbë, Masa Jesosi Keesitu musu dë ku unu ku ën bunuhati e. A tan sö.

Di u tu biifi Paulosu manda da dee biibima u Tesalonika

Wan wöutu a fesi.

Disi da di u tu biifi di di tjabukama u Masa Jesosi de kai Paulosu sikifi manda da dee sëmbë u Masa Jesosi a di kôndë de kai Tesalonika.

Nöo di soni mbei a mbei di biifi aki, biga wë dee biibima u Tesalonika, de ko ta fëëë seei, de an saandi u de du. A dë sö taa de ko ta mëni taa Masa Jesosi toona ko a goonliba kaa. A kandë di sitaafu de ta tja u di biibi hedi hën mbei de ko mëni sö. Biga de bi sabi taa Masa Jesosi bi o ko sitaafu dee sëmbë u goonliba aki wan daka nöömö, nöo hën de ko ta mëni taa kandë di daka naandë hën dou kaa.

Nöo di Paulosu sabi sö, hën a kë mbei de ko sabi taa nöno, an dë sö. Di daka an dou eti. Nöo hën a tei wanlö soni konda da de, dee musu pasa ufö Masa Jesosi o ko sitaafu dee sëmbë u di goonliba aki.

Hën a toona leti de tu fa de musu libi a tatai liba.

Dee soni aki, de abi di biifi aki.

Aki ta lei ambë abi di biifi.

¹ Söo. Wë Paulosu ku Silasi ku Timoteo, u wë ta mbei di pampia aki manda da un dee sëmbë ta miti makandi a Tesalonika naandë, dee nama ku u Tata Masa Gaangadu ku Masa Jesosi Keesitu.

² Wë nöo Masa Gaangadu u Tata ku Masa Jesosi Keesitu musu dë ku unu ku de bunuhati ta da unu kötôhati e.

Aki ta lei fa Paulosu ta wai ku dee Tesalonika biibima

ku di fa a ta begi da de.

³ Dee sëmbë fuu dë, u musu ta da Masa Gaangadu tangi fuunu hedi e, biga di biibi fuunu ta göö nango seei möönmöön. Nöo söseei di lobi di un ta lobi unu na unu ta göö möönmöön tu. Hën mbei a fiti fuu ta da Masa Gadu tangi da unu nöömö e, dee sëmbë.

⁴ Te u ta waka ta miti ku dee biibima u Masa Gaangadu a kôndëkôndë, nöo u ta njan buka seei fuunu hedi e. U ta konda kumafa un ta biibi tjika. Nöo u ta taki tu taa hii fa dee sëmbë fuunu kôndë dë ta da unu sitaafu seei, ma un ta hoi pasensi nöömö nango kodo. Hën wë mbei u ta njan buka da unu e, dee sëmbë.

⁵ Ma nöo te un ta pakisei fa dee sëmbë ta sitaafu unu fu di un dë a di Tii u Gadu basu dë, dee sëmbë, nöo i sa si limbolimbo kumafa Gadu ta du soni ku leti tjika. Biga a ta seeka unu be un ko dë a di fa fuun sa njan di suti u di tii fëen fu nöömö nëen kôndë.

⁶ Nöo mi taki da unu taa Gadu hën ta kuutu soni ku leti e. Nöo a o paka dee sëmbë dee ta sitaafu unu naandë. A o toona da de di sitaafu baka nöömö.

⁷ Ma nöo unu a o da böö u dee fuka i si un ta tja naandë. Nöo u seei o feni böö tu e, te Gadu mbei Masa Jesosi tja di kaakiti fëen ko a limbo. Biga di juu dë, a o kumutu a liba ala ta bazia ta ko, hën ku dee hebi basia fëen kôndë. Nöo fa a o ko dë, a o ko ku gaan faja,

⁸ faa sitaafu dee sëmbë dee an sabi Gadu, dee an bi kë piki di Bunu Buka fuu Masa Jesosi Keesitu möönsö.

⁹Nöö mi taki da unu gbelin taa di sitaafu dee sëmbë dë o feni, a o dë fu teego e. Biga Masa Jesosi o jaka de tuu puu nëen fesi. A o tapa de fu de an musu si di gaan waiti fëen möönsö ku di kaakiti di a abi kuma könu.

¹⁰Ma nöö di ten dë, nöö hii u dee sëmbë dee bi dë fëen apaiti, nöö u tuu o ta bai ën në ta gafëen. A o bigi da u seei fa a hei ku fa a waiti tjika. Nöö di juu dë, nöö unu seei o dë a dendu tu e, fu di un bi piki u buka a dee soni fëen dee u bi tei konda da unu.

Aki ta lei fa Paulosu

ta begi da de.

¹¹Wë nöö dee sëmbë, di a dë sô kaa, nöö fëen hedi u ta begi Gadu da unu nöömö, be un libi a wan fasi faa si taa a fiti tuu fuun feni dee soni dee a bi kai unu fuun feni nëen.

Nöö u ta begi ën tu, fu hiniwan bumbuu soni di un ta kë a unu libi, nöö Gadu musu heepi unu fuun feni ën. Söseei tu a musu da unu kaakiti fuun sa du hiniwan bumbuu soni te dou di un ta pakisei fi du fu di un ta biibi Masa Jesosi.

¹²Sô u ta begi da unu e baa. Biga ee a dë sô kaa, nöö Masa Jesosi Keesitu o kisi gaan nëbai fuunu hedi. Nöö hënseei o hopo unu tu fu di un nama ku ën hedi. Ma nöö fa i si a o hopo unu dë, na di bumbuu fuunu seei mbei e, ma fu di bunuhati u Masa Gaangadu ku Masa Jesosi Keesitu, hën mbei.

2

Aki ta lei dee soni dee musu pasa ufö Masa Jesosi o ko u ko sitaafu goonliba sëmbë.

¹⁻²Wë dee sëmbë, u kë taki wanlô soni möön u di fa u Masa Jesosi Keesitu o toona ko ₁fu ko kuutu goonliba sëmbë, ku di fa a o kisi u hai tja ko nëen naandë. Biga wa kë sëmbë musu buuja unu ta toobi unu te wan saandi fuun pakisei a di soni dë liba.

A kandë wan sëmbë o ko a unu ko taki taa di Akaa u Gadu fan ku ën taa di daka dou kaa. Ee nasö, de o tja wan biifi ko da unu taa u sikifi ën. Ee nasö kandë de o taa a sô wan sëmbë de jei ën, taa di daka dë dou kaa.

³Ma wan musu piki e, dee sëmbë. Wan mbei sëmbë ganjan unu a na wan fasi.

Wë biga bifö di kuutu daka naandë dou, nöö tu gaan soni musu pasa. Di fosuwan dë sô taa wanlô hila sëmbë o bia baka disa Gadu. Nöö di u tu, hën da di gaan poipoi sëmbë u mundu ₁di dee fesiten tjabukama bi taki soni fëen kaa, nöö hën musu ko a limbo ufö be sëmbë sabi ën. Ma fa a o ko dë seei, ma Gadu bi buta gaanduwe kaa taa a o kabëen a sösö nöömö tuwë go a didibi faja.

⁴Ma nöö te di lö sëmbë dë ko, nöö a o hopo hën seepi buta a hii soni liba. A o buuse hii soni dee de ta kai gadu te dou ku Masa Gaangadu seei. An o kë u sëmbë ta begi wan oto soni möön leki hën wanwan. Nöö a o go denda a di Wosu u Masa Gaangadu go hopo hënseei a hii mundu fesi ta mbei taa hën tö da Gadu. Sô a o hogi tjika e.

⁵Nöö dee sëmbë, wan mëni möön nö, taa di ten mi bi dë ku unu ala nöö dee soni aki tuu mi bi taki da unu. Nöö dee soni dë, de musu pasa ufö Masa Jesosi o toona ko a goonliba.

⁶Wë ma nöö un sabi ambë ta tapa di hogima naandë mbei an ko a döö eti, na sô nö? Awa. Ma te di juu fëen dou nöö a o ko a limbo nöömö.

⁷ Ma hii fa i si di wogi sɛmbɛ dɛ an ko a limbo eti seei, ma nɔɔ wan soni dɛ ta wooko ku kaakiti kaa a sɔmɛni tjubitjubi fasi. A ta buta libisɛmbɛ u de an musu kɛ fika a tii basu. Ma nɔɔ an sa go dou ka a kɛ eti e. Biga di Sɛmbɛ di ta tapa di pasi dɛɛn, nɔɔ a o ta tapɛɛn nango te wan pisi, nɔɔ Gadu o puu ɛn.

⁸ Nɔɔ fa Gadu o puu ɛn dɛ, nɔɔ di hogima o booko ko a limbo wajaa seei awaa. Ma nɔɔ mi taki da unu taa te di juu kisi nɔɔ Masa o kabɛɛn a sɔsɔ wantewante ku di ventu fɛɛn buka. Biga fa i si Masa Jesosi o ko ku kaakiti, ku gaan waiti ku di Gadu fasi fɛɛn dɛ, nɔɔ a o booko di kaakiti u di Hogima dɛ tuu fiaa seei te an o dɛ wan wojo soni mɔɔn.

⁹ Fa i si di Hogima o ko naandɛ, nɔɔ di didibi o dɛɛn kaakiti faa du gaangaan wooko. A o ta du sɔmɛni foondofoundo soni kuma maaka ta mbei ɛn seei gadu.

¹⁰ Hii dee hogi soni dee a sabi taa libisɛmbɛ lobi u du, nɔɔ de tuu a o tja ko te a hia faa musu kisi sɛmbɛ ganjan. Nɔɔ dee sɛmbɛ dee a o ganjan dɛ, de o dɛ dee sɛmbɛ nango kaba a sɔsɔ kaa, fu di de an bi kɛ tei dee tuutuu soni Gadu bi taki da de mɔɔnsɔ fu de feni heepi nɛɛn.

¹¹ Hɛn wɛ mbei i si Gadu o mbei a ganjan de a sɔ wan kaakiti fasi. Nɔɔ fa de o piki dee ganjan soni dɛ,

¹² nɔɔ di sitaafu u Gadu o kisi de nɔɔmɔ. Biga ku sabi de bi disa dee letileti soni fɛɛn go ta waka a hogi baka ta wai.

Aki ta lei taa de musu hoi

go dou nɔɔmɔ.

¹³ Ma nɔɔ un dee lobi sɛmbɛ u Masa dɛ, u sabi taa un wan dɛ kuma dee sɛmbɛ u taki naandɛ e. Hɛn mbei, a fiti fuu da Masa Gaangadu tangi fuunu hedi nɔɔmɔ. Biga wɛ a pii unu tei a dee oto sɛmbɛ dendu, fuun musu dɛ dee fosu sɛmbɛ u Tesalonika naandɛ, dee ko feni heepi nɛɛn. Di Akaa fɛɛn wɛ, hɛn buta unu apaiti dɛɛn sɔ e, dee sɛmbɛ, fu di un piki dee leti soni fɛɛn.

¹⁴ Biga fa i si u bi tja di Bunu Buka u Masa Jesosi ko konda da unu naandɛ, nɔɔ hɛn wɛ Gadu kai unu e, fuun musu dɛ a dendu u di hei u Masa Jesosi Keesitu ku di waiti di a abi.

¹⁵ Wɛ nɔɔ dee sɛmbɛ, gaantangɛ, u wan musu mbei sɛmbɛ ganjan unu e. Nɔɔnɔ. Ma dee lei dee u bi lei unu di u bi dɛ ku unu naandɛ, ku dee u bi sikifi manda da unu, nɔɔ be un taanpu seei ta hoi de gingin.

¹⁶⁻¹⁷ Dee sɛmbɛ o, u Tata Masa Gaangadu lobi u e. A ta dɛ ku u ku ɛn bunuhati ta da u hati nɔɔmɔ. Aai. A ta da u mɛni nɔɔmɔ tu u dee bumbuu soni dee o ko a bakaten. Nɔɔ a musu dɛ ku unu e, hɛn ku Masa Jesosi Keesitu. De musu da unu taihati. De musu da unu kaakiti tu, fu ee un kɛ du wan bunu wooko nɔɔ un musu sa du ɛn. Ee un kɛ taki wan bunu soni nɔɔ un sa taki ɛn. Sɔ u ta begi ɛn da unu e, dee sɛmbɛ.

3

Aki Paulosu ta hakisi de u de heepi ɛn begi a wantu soni libi.

¹ Wɛ dee sɛmbɛ fuu dɛ, u kɛ taki wantu soni da unu aki eti ufɔ woo tapa di biifi. U kɛ fuun begi be di Buka u Masa musu paaja seei waaa go a hii kamian, be de piki ɛn tei u gaan soni kumafa a bi paaja a unu a Tesalonika naandɛ te un piki ɛn tei u gaan soni.

² Nɔɔ un begi da u tu, be Gadu puu u a dee hogi sɛmbɛ maun dee aan bisi ku ɛn. Biga na hii sɛmbɛ ta biibi Gadu e.

³ Fa Masa Gaangadu sai dē, dee sēmbē, un sa a' futoou nēen taa a o mbei un ko dē gingin a di biibi. Nōō a o ta tjubi unu tu, be di didibi an feni pasi faa du unu hogi.

⁴ Fa u dē aki, u ta futoou Masa taa a ta heepi unu kaa fuun ta du dee soni u bi taki da unu nango nōōmō. Nōō sō woon ta du de nango nōōmō tu.

⁵ Masa musu mbei un ko fusutan di lobi fēen e, dee sēmbē, te dou a unu hati dendu. A musu heepi unu be un a' degihati a hii dee sitaafu un ta tja dē te go dou, leti kumafa „Jesosi„ Keesitu seei bi abi degihati a dee sitaafu dee bi miti en tu, te go dou.

Aki a ta bai de u de an musu

ta malēngē.

⁶ Nōō dee sēmbē, woo bai unu a wan soni aki, nōō Masa Jesosi Keesitu seei da u taki fuu fan sō ku unu. U taki e, taa ee wan biibima dē a unu dendu naandē an kē wooko, nōō wan musu nama ku en e. Sōseei tu, wan musu nama ku dee sēmbē dee an ta libi a di fasi kumafa u bi lei unu fuun musu libi.

⁷ Nōō unu seei sabi fa u bi libi a unu dē, nōō sō un musu libi tu. Biga wa bi ta malēngē e.

⁸ Nōō wa bi ta njan sēmbē soni sōndō u pakēen tu, ma ndeti ku didia u bi ta biinga ta wooko seei taangataanga. Biga wa bi kē dē wan hebi a unu liba fuunu musu sōlugu u e. Kwetikweti.

⁹ Ma fa u ta fan aki, an dē taa wa bi abi leti fu hakisi unu fuun sōlugu u e. U bi abi. Ma u libi sō nōō fuun musu djeesi u ta waka a u baka kumafa a fiti.

¹⁰ Biga di ten u bi sai a unu dē, nōō u bi ta bai unu gbelingbelin taa ee wan sēmbē an kē wooko nōō an musu njan tu. Sō u bi fan ku unu.

¹¹ Ma nōō tōkuseei u ko jei taa fa u dē aki wanlō sēmbē dē a unu dē an ta kē ta wooko mōōnsō. Oto sēmbē soni nōō de ta waka ta hulu. Sō u jei aki.

¹² Wē nōō u taki e, taa fa i si Masa Jesosi Keesitu buta u a di wooko aki, nōō u tei di nē fēen bai un dee lō sēmbē dē taa be un disa di daamadaama libi fuunu dē ko tan a wan kamian, be un ta wooko fuun feni soni u njan.

¹³ Ma nōō un dee otowan fuu dē, be un ta du bunu nango nōōmō, wan musu wei mōōnsō.

¹⁴ Nōō dee soni dee u sikifi buta a di biifi aki, nōō ee wan sēmbē sai naandē an kē jei di fan, nōō sō wan sēmbē un musu ta kōni ku en e. Wan musu ta hulu en mōōnsō, fu sen musu kisi en be a sabi taa an ta libi bunu.

¹⁵ Ma nōō wan musu luku en kuma wan felantima e, ma be un ta bai en nōō be a bia, kumafa i ta bai i baaa womi a soni.

Aki Paulosu tapa di biifi.

¹⁶ Sōō. Wē nōō dee sēmbē, mi o tapa di biifi aki e. Masa Gaangadu di nēen hii kōtōhati ta kumutu ko, nōō hēn musu da unu kōtōhati a hii fasi hiniwanten. A musu dē ku unu tuu.

¹⁷ Mi Paulosu ta sikifi di lasiti pisi u di biifi aki ku miseei maun, manda gaan odi da unu. Hēn da di maaka fuun sa sabi dee biifi u mi taa a mi de kumutu tuu.

¹⁸ Masa Jesosi Keesitu musu libi ku unu tuu ku en bunuhati, dee sēmbē. A tan sō.

Di fosu biifi di Paulosu sikifi da Timoteo

Wan wöutu a fesi

Timoteo bi dë wan kijoo di di gaan tjabukama u Masa Jesosi de kai Paulosu bi ta lei di wooko u Masa Gaangadu. De bi ta waka makandi ta paaja di buka u Masa Jesosi a dee köndëköndë. Nöö wan u dee köndë ka de bi go, hën de kai Efeise. Nöö ala Paulosu disa Timoteo kuma hedima faa tii dee sëmbë u Masa Jesosi dee ta dë a di köndë. Nöö bakaten hën mbei Paulosu mbei wan biifi manda dëen faa lei ën möön fini fa faa musu ta lei dee sëmbë, ku fa a musu tjëen seei a di wooko.

Nöö di biifi di a sikifi di ten dë, hën disa.

Aki Paulosu ta manda odi

da Timoteo.

¹⁻² Söö. Wë mi mii Timoteo, mi Paulosu wë ta mbei di pampia aki manda gaan odi da i e. Womi, fa i sai dë, nöö i da miii u mi seei gbelingbelin. Biga fa i si mi bi konda di buka u Masa Jesosi da i, nöö hën wë i piki ën seei leti kumafa wan mii ta piki ën tata buka a soni. Nöö u Tata Masa Gaangadu ku Masa Jesosi Keesitu tuu musu dë ku i ku de bunuhati e, ku de tjalihati, ta da i böö.

Söö. Wë baa, kumafa i bi sabi kaa, mi da wan tjabukama u Masa Jesosi nöö na miseei wë buta miseei e. Ma Masa Gaangadu di Heepima fuu, hën wë manda mi, hën ku Masa Jesosi Keesitu di u ta buta hii mëni fuu nëen liba taa dee soni a paamusi u, woo feni de nöömö.

Aki Paulosu ta bai Timoteo

faa tapa dee fasifasi lei.

³ Wë nöö womi, di ten di mi o ko a Masadonia aki, nöö mi bi fan ku i taa be i fika a Efeise ala fii musu tapa wanlö sëmbë sai naandë ta lei wanlö fasifasi lei. Biga dee lei u dee sëmbë dë an ta kai seei ku di buka u Masa Jesosi.

⁴ Fa dee sëmbë sai dë, de ta hai dee mindimindi soni ta konda ta kai dee gaan hia avoavo u de në, ta taki soni u de nöömö. Nöö dee lö soni naandë sö, söso buja ku toobi de ta tja ko e. Ma te u ta biibi dee soni u Gadu, nöö hën ta heepi u fuu du di wooko u Gadu kumafa a fiti.

Mi taki e, womi, kaba u di lei u dee sëmbë naandë, nöö söso fia tö a ta tja ko.

⁵ Ma nöö kaba u di Buka di Gadu manda u u ta lei aki, nöö hën da lobi. Nöö unfa di lobi dë sa ko? A sa ko te hati fii dë limbolimbo. A sa ko tu, te i piki di hati fii a di bunu soni a manda i. Nöö te i ta biilbi Masa Gadu söndö ganjan, nöö hën ta tja lobi ko tu.

⁶ Ma nöö dee sëmbë dee u taki dë, de bia kumutu a di lei dë gaanduwe, go ta fan wisiwasi soni.

⁷ Fa de sai naandë, de kë abi di në taa de dë gaan leima u dee wëti u Gadu, ma deseei an sabi andi de ta taki. Biga de an sabi gogo fëen, de an sabi hedi fëen, ufö de ta fan sö gaanfa nëen liba.

⁸ Wë nöö, kijoo, fa i si u taki soni u dee wëti u Gadu naandë, nöö u sabi taa de dë gaan bumbuu soni, ee sëmbë ta wooko ku de a wan leti fasi.

⁹ Biga i sabi faandi mbei de ta buta wëti. De an ta buta wëti u tapa dee sëmbë dee ta libi a wan leti fasi e. Nönö, ma fa a tapa dee sëmbë dee na ta libi bunu, kuma dee sëmbë dee an ta libi a tii basu, dee sëmbë dee an kë piki sëmbë buka

a soni, ku dee sɛmbɛ dee an ta lesipeki Gadu, dee sɛmbɛ dee ta du gaan hogi soni, dee sɛmbɛ dee na a' toobi ku dee soni u Gadu, ku dee an kɛ dini Gadu mɔɔnsɔ.

Dee lɔ sɛmbɛ naandɛ, u de hedi wɛ mbei wɛti dɛ e, faa musu tapa de a dee soni de ta du dɛ. Biga sɔmɛni pei gaan hogi dee lɔ sɛmbɛ dɛ ta du. De ta kii sɛmbɛ fu hogihati fasi te dou ku deseei mama ku tata,

¹⁰ de ta libi fanafiti a di sɛ u manu ku mujɛɛ soni, womi ta tei womi, mujɛɛ ta tei mujɛɛ, sɛmbɛ ta kisi sɛmbɛ tei tja go buta a katibo, de ta mindi soni ta buta a oto sɛmbɛ liba, ee de bi soi fu wan soni seei ma de aan toobi u de booko di soi. Nɔɔ sɔmɛni hia oto pei hogi mɔɔn dee lɔ sɛmbɛ dɛ ta du, fu di de bia baka disa di leti lei

¹¹ di ta kai ku di gaan waiti buka u di Gadu di dɛ u gafa nɔɔmɔ. Nɔɔ di Buka dɛ, hɛn Gadu futoou mi te a butɛɛn a mi maun, fu mi sa ta tja ta paati da sɛmbɛ.

Aki Paulosu ta konda fa Masa Jesosi libi ku ɛn

ku bunuhati tjika.

¹² Wɛ nɔɔ womi, fa i si mi taki dɛ, nɔɔ mi ta da Jesosi Keesitu tangi seei fu di a futoou mi teee a buta mi ko wookoma fɛɛn, nɔɔ hɛn a toona da mi kaakiti u mi du di wooko tu. Aai, di soni dɛ, a bigi da mi e.

¹³ Biga a fesi, nɔɔ mi bi dɛ gaan hogisonima. Mi bi ta sɔsɔ Masa Jesosi taa an dɛ u Gadu. Mi bi ta sitaafu dee sɛmbɛ dee ta biibi nɛɛn liba gaanfa seei. Sɔ mi bi libi hogi ku ɛn tjika.

Ma nɔɔ an hoi mi a naɛɛ o. Nɔnɔ. Biga a sabi taa fa mi bi ta libi naandɛ, na ku sabi mi bi ta libi sɔ e, ma fu di ma bi ta biibi nɛɛn mbei.

Nɔɔ hɛn wɛ i si a a' tjalihati u mi gbolo,

¹⁴ nɔɔ hɛn a naki mi gaan kɔlɔku ku ɛn bunuhati. Biga a mbei mi ko ta biibi nɛɛn liba, nɔɔ hɛn a toona da mi di lobi di dee sɛmbɛ dee nama ku ɛn ta feni. Aai womi, di soni dɛ nɔɔ a bigi da mi e.

¹⁵ Wɛ Timoteo, mi o taki wan soni da i aki gbelin seei, kijoo. Nɔɔ a dɛ wan gaan bambuu taki di hii sɛmbɛ musu piki waiwai. Hɛn da disi: Jesosi Keesitu ko a goonliba u heepi takulibima puu de a hogi basu. Nɔɔ mi wɛ bi da di mɔɔn gaan takulibima a hii dee otowan dendu.

¹⁶ Wɛ nɔɔ fɛɛn hedi tu Jesosi Keesitu ko abi tjalihati da mi e. Aai. A hoi paseni da mi seei, fu mi sa dɛ wan maaka da hiniwan takulibima kuma mi di kɛ ko biibi nɛɛn, taa a sa feni di libi u teego tu.

¹⁷ Wɛ fa i si Masa Gadu sai dɛ, hɛn wɛ da di kaba Tiima u mundu fu nɔɔmɔ e. Fa a dɛ fɛɛn dɛ, an o dɛdɛ mɔɔnsɔ. Libisɛmbɛ an tjika u si ɛn ku wojo tu. Fa a sai dɛ, hɛn wanwan tɔ da Gadu u mundu, nɔɔ hɛn nɔɔ musu kisi gafa. Hɛn nɛ nɔɔ u musu ta hopo hiniwanten fu teego. A tan sɔ.

Aki Paulosu ta fan ku Timoteo kuma wookoma u Gadu.

¹⁸ Wɛ mi mii Timoteo, dee soni dee i si mi manda i fii du naandɛ, kijoo, wɛ nɔɔ de kai seei ku dee soni dee hedima u keiki bi taki fii a fesi e, di ten di Akaa u Gadu bi ko a de liba. Wɛ nɔɔ di i sabi sɔ kaa, nɔɔ be i biinga seei go dou e, womi.

¹⁹ Nɔɔ mi taki e, ta hoi di biibi di i si i ta biibi a Masa Jesosi naandɛ gingin e. Nɔɔ i musu ta piki di hati fii nɔɔmɔ te a ta manda i a wan bambuu soni. Biga wanlɔ sɛmbɛ an bi du sɔ, nɔɔ hɛn wɛ di biibi u de kaba a sɔsɔ gbegedee, leti kuma te i singi a dan tuwɛ lai fii go fiaa.

²⁰ Wan u dee sēmbē dee mi taki dē, da Himēnēusi, wan da Alekesani. Ma nōō mi buta de tu sēmbē dē a di didibi maun kaa, be de lei taa de an musu ta waka ta mindi soni da Gadu ta poi ēn nē mōōn. Nōō da sō.

2

Aki Paulosu ta lei fa dee biibima u Masa Jesosi musu ta tja deseei.

¹ Wē womi Timoteo, awa mi o taki da i fa fii lei dee biibima u Masa Jesosi a i ala fa u de musu libi.

Sōō. A di fosu kamian, nōō un musu ta begi Masa Gaangadu da hii sēmbē. Un musu ta tja dee fuka u de go a Gadu fesi ku djēmē. Un musu ta hakisi Masa Gaangadu faa limbo fesi da de, nōō un musu ta dēēn tangi da de tu e.

² Un musu ta begi da kōnu ku gaama ku hii oto sēmbē dee dē a tii kaa. Biga te u begi sō nōō sonte de o tii u bunu, nōō u sa abi wan kōtōkōtō libi pii sō fuu sa libi kumafa Gadu kē a hii futu.

³ Nōō te u ta begi sō kaa, nōō a dē wan bunu soni di suti da Masa Gaangadu u Heepima.

⁴ Biga fa Gadu sai dē, a kē hii sēmbē u goonliba tuu musu feni libi u teego nēēn. A kē fu hii sēmbē musu ko sabi dee soni fēēn, biga de nōō da tuutuu soni a mundu.

⁵ Biga wan kodo Gadu tō nōō dē a mundu e, hēn da Masa Gaangadu. Nōō wan kodo Sēmbē tō ta taanpu a u libisēmbē ku Gadu mindi fu seeka taki da u. Hēn da Jesosi Keesitu di bi tei libisēmbē sinkii.

⁶ Hēn wē bi dēēn seepi kuma wan paima paka puu u a hogi basu a di juu di Gadu buta. Nōō fa a du ēn naandē, ku ēn hii mundu sa si fa Gadu kē heepi u libisēmbē tjika.

⁷ Nōō fu mi sa ta konda di soni dē hedi mbei Gadu tei mi buta tjabukama fēēn e. Nōō fa mi ta fan aki, na mindi mi ta mindi soni e, womi, ma tuutuu soni mi ta taki. Nōō Gadu buta mi leima tu, fu mi ta lei dee oto sēmbē na u Isaēli dee soni u Gadu. Biga de da dee tuutuu soni fuu musu biibi. Nōō sō e.

⁸ Wē nōō mi taki e womi, taa a hii kamian ka dee biibima ta ko makandi kaa, nōō mi kē dee womi sēmbē musu dē a fesi a di begi. Ma fa de ta hopo maun ta begi naandē, nōō hati u de musu dē limbolimbo. De an musu dē ku hatiboonu ta hoi sēmbē a bēē fa de ta begi dē e.

⁹ Nōō awaa mi o taki soni u di fa dee mujēē musu ta tja deseei. De an musu bisi a wan fasi u tja sen ko da de e, ma de musu bisi kumafa a fiti. Biga di gafa u de an musu dē a di fa de ta beei uwii, ta tuusi sōmēni goutu soni nasō djamati ta bisi dee gaan diidii koosu. Nōnō.

¹⁰ Ma a musu dē a di fa de ta libi bunu ku sēmbē. Biga di lō gafa dē hēn fiti dee mujēē dee ta abi di nē taa de ta dini Gadu.

¹¹ Fa mujēē sai dē, de musu ta lei a wan saapi fasi ta saka de seei da dee womi.

¹² Mi seei ma ta da mujēē pasi un de ta lei sēmbē wajaa a lanti dendu ta pēē basi a womi sēmbē liba e. Nōnō. Ma de musu ta hoi deseei a wan saapi fasi.

¹³ Faandi mbei, womi? Biga wē a fosu Gadu mbei Adam, a baka fēēn ufō a mbei Eva.

¹⁴ Hēn tu, di sindeki, na Adam a feni ganjan e. Ma Eva a ganjan, nōō hēn a ko poi di wēti u Masa Gaangadu.

¹⁵ Nōō fu di dē hedi Gadu taa te mujēē o pai, nōō pai fēēn o taanga.

Wē sō a tu pasu tuu. Ma nōō tōku di soni an poi. Biga ee wan mujēē sēmbē ta biibi a Gadu ta hoi go dou ta lobi sēmbē ta libi a wan gbelingbelin fasi ku saka fasi nōō hēnseei sa feni heepi a Gadu tu.

Sö e, womi.

3

Aki ta lei fa dee hedima

u keiki musu dë.

¹ Womi Timoteo, awaa mi o taki soni u di sëmbë di kë ko hedima u keiki. Mi taki e, ee wan sëmbë kë di wooko dë, nöö gaan bambuu wooko a kë e.

² Ma fu dë hedima u keiki an dë sösö soni. Sö wan sëmbë musu dë gaan bambuu sëmbë. Oto sëmbë an musu sa feni fasi a di libi fëën faa konda taa anbunu e. Fa a sai dë, a musu dë ku wan kodo mujëë tö. Nöö an musu dë wan sëmbë ta du sondi ku hediwai, ma a musu sa u tii ën seei a soni. Nöö a musu dë a di fa u sëmbë sa lesipeki ën.

Sö wan sëmbë, womi, wosu fëën musu dë jabijabi da sëmbë e. Nöö a musu sabi fa u lei sëmbë soni te de fusutan.

³ Sö wan sëmbë, an musu dë bebema. Nönö. An musu abi taanga hatiboonu tu ta feti ku otowan, ma a musu abi wan saapi libi. An musu dë wan sëmbë di lo' u fia soni e. Nöö an musu abi langahati u möni tu, kwetikweti.

⁴ Nöö a musu dë wan sëmbë di sabi fa u tii hën wosu dendu a wan bunu fasi. A musu saanfa u kiija dee mii fëën te de ta lesipeki ën ta piki ën buka a soni.

⁵ Biga wë womi, ee wan sëmbë an sabi fa u tii hën seepi wosu dendu libi, wë nöö unfa a sa tii dee sëmbë u di keiki u Masa Gaangadu?

⁶ Nöö sö wan sëmbë, womi, an musu dë wan sëmbë di bi ko njunjun a di biibi e. Biga a kandë a o ko abi gaan fasi poi, nöö a o kisi di sitaafu di di didibi bi kisi fu di a ko abi gaan fasi.

⁷ Söseei tu, sö wan sëmbë musu abi bunu në a dee oto sëmbë dee an dë a biibi e, ma ee nasö nöö di didibi o kisi ën a di taapu fëën. Biga sëmbë o ta lei finga nëën nöö në fëën o poi.

Nöö da sö wan hedima u keiki musu dë e, womi.

Aki ta lei fa dee basia u keiki musu dë.

⁸ Nöö wan basia u keiki tu, a musu dë wan gbelingbelin sëmbë, di sëmbë sa lesipeki. Fa a sai dë, an musu dë wan sëmbë ta bia fan a buka te ja sa futoou ën a soni. Nöö an musu dë bebema tu. An musu ta suku u wini soni a wan fasi di na fiti. Kwetikweti.

⁹ Nöö a musu dë ku limbohata ta hoi hënseei bunu a dee fundu soni u Gadu dee a mbei u ko sabi fa u dë aki.

¹⁰ Nöö mi taki e, te de o buta wan basia faa wooko a keiki, womi, nöö be de wegë ën luku bunu ufö e. Nöö te de an feni wan fa nëën di na bunu nöö de sa butëën ko basia awaa.

¹¹ Nöö söseei dee mujëë tu e. De musu dë wan letileti sëmbë di sëmbë sa lesipeki. An musu dë wan sëmbë di ta waka ta tja sëmbë ta njan a baka, ma pakisei fëën musu dë limbolimbo. Nöö sëmbë musu sa futoou ën a hii soni tu.

¹² Nöö dee womi basia, de musu abi wan kodo mujëë tö. Nöö de musu sabi fa u tii wosu dendu libi u de bunu te dou ku dee mii u de tuu.

¹³ Nöö ee wan basia ta du di wooko fëën bunu, nöö i sabi andi o pasa o? A o feni bunu në a sëmbë. Nöö a o kisi futu seei a di wooko. Biga an o fëëë u konda da sëmbë dee soni u Jesosi Keesitu dee a ta biibi.

Nöö sö e, womi.

Aki ta lei dee gaan soni

u di biibi.

¹⁴⁻¹⁵ Womi Timoteo, mi ta mēni u mi ko a i abiti möön e baa. Ma nöö fu di ma sabi ee soni o tapa mi fu ma sa ko, fēen mbei mi ta mbei di biifi aki u manda da i, be dee sēmbē u di famii u Masa Gaangadu musu sabi fa u de libi.

Biga u dee sēmbē u Masa Gaangadu famii, u wē da di keiki u di libilibi Gadu e. U ta mbei sēmbē si limbolimbo andi da di tuutuu lei u Gadu, nöö u ta tjubi di lei dē tu fu an musu poi kaba a sösö.

¹⁶ Wē nöö dee soni u ta biibi, womi, gaan soni de dē e. A fesi de bi dē tjubitjubi, ma fa u dē aki de ko a limbo da u fuu sabi. De da: Gadu tei libisēmbē sinkii ko libi a goonliba aki.

Nöö di Akaa fēen bi dē ku ēn tee hii mundu ko si taa a a' leti a dee soni a ta fan.

Dee basia u Masa Gaangadu köndē seei bi dē kotoigima fēen.

Dee bakama fēen tja soni fēen go konda da peipei nasiön u goonliba, nöö sōmēni sēmbē ko biibi ēn.

Hēn seei wē Masa Gaangadu tei tja go a di waiti köndē fēen a liba ala.

De wē i si da dee soni dee u ta biibi, womi. Nöö ee wan sēmbē i ta biibi dee soni aki kaa, nöö a o heepi i fii kisi di fasi u Gadu a i libi.

4

Aki ta bai de a dee ganjan leima.

¹ Söo. Wē womi Timoteo, mi kē bai i a wan soni aki möön. Di Akaa u Masa Gaangadu fan ku u limbolimbo kaa, taa a bakaten nöö wanlō sēmbē o bia baka disa di fa de bi ta biibi a Masa Jesosi. Biga de o ta waka a dee hogi baka dee ta ko a sēmbē liba ta ganjan sēmbē. De o ta haika dee lei u dee didibi dē, hēn mbei de o disa di biibi.

² Wē nöö dee sēmbē ta lei sēmbē dee lö soni dē, nöö ganjansēmbēma de dē e. De o ta mbei kuma tuutuu soni de ta taki, ma na tuu seei. Fa dee sēmbē sai dē, de ku hogidu guwenti te a ko de sinkii kaa. Nöö hēn mbei an ta toobi de te de ta ganjan sēmbē a sö wan fasi.

³ Fa dee soni o ko a sēmbē liba dē, de o ta lei sēmbē u de hoi peipei wēti dee an dē fanōudu. De o taa ee i kē dē bumbuu sēmbē a Gadu wojo, nöö womi an musu abi mujēē, mujēē an musu abi manu. Sō de o taki. De o ta buta tjina da sēmbē a soni u njan taa sö wan soni ja musu njan mēn.

Wē ma womi, uu dee sēmbē dee ta biibi a Gadu aki tee u ko sabi di gbelin lei fēen kaa, nöö wa o sa hoi dee lö wēti naandē e.

⁴ Biga u sabi taa hii soni di Gadu mbei buta da u, de tuu dē bumbuu soni. Na wan u de dē u tuwē, ma de dē fuu tei ku tangi.

⁵ Wē nöö di Gadu taki taa de bunu kaa nöö hēn i begi nēen liba te i kaba da Gadu tangi, wē nöö hogi an dē nēen. I sa tei ēn ku piizii.

Aki ta lei fa Timoteo musu du

di wooko bunu tjika.

⁶ Dee soni mi ta taki da i aki i musu tei de ta leti dee otowan fii e, womi. Nöö joo dē wan bunu wookoma da Jesosi Keesitu. Biga sensi a njönku ten fii i bi ta jei dee tuutuu soni u Gadu kaa dee u ta biibi aki. I bi kisi bumbuu lei seei, nöö hēn i tei ēn, hēn i ta waka nēen baka te kisi fa u dē aki.

⁷ Nöö fa i sai dē, ja musu a' bisi ku dee peipei oto dee an ta kai ku Gadu, dee de ta mindi ta taki dē e. Ma i musu ta biinga ku i seei fii libi kumafa Gadu kē a hii futu.

⁸ Ja si fa sēmbē ta biinga ta djombo ta seki sinkii u de fia kule u de wini soni a goonliba aki nö? Wē di soni dē a ta tja wan pikii wini tuu. Ma di biinga seki

sinkii fii musu libi kumafa Gadu kë, womi, hën ta tja hii wini ko da i. Biga te i biinga sö kaa, nöö joo feni dee bunu soni dee Gadu paamusi i a di libi u di ten u dë aki, te dou ku di oto libi di ta ko a bakaten tuu.

⁹ Söö. Wë nöö di soni i si mi taki dë, nöö gaan bumbuu soni a dë fu hii sëmbë musu piki tei ku telu.

¹⁰ Biga u sabi ambë u ta futoou. U sabi na ambë liba u ta buta di mēni fuu faa tja u. A di libilibi Gadu liba wë e, womi. Hën da di Heepima fu hii sëmbë, ma möön gaanfa fuu dee sëmbë ta biibi nëen liba. Hën mbei u ta biinga seei fu sëmbë musu jei di buka fëen.

¹¹ Wë nöö di a dë sö kaa, nöö be i tei dee soni aki ta lei dee sëmbë a i ala e. Be i ta biinga ku de nöömö u de sabi de bunu.

¹² Söö. Wë baa mi taki e, fa i sai dë, ja musu mbei sëmbë dou i ku wojo fu di i njönku mbei e baa. Nönö. Ma be i libi a di fa u dee oto biibima tuu musu sa djeesi i. Di fa i ta fan, ku di fa i ta libi, ku di fa i ta lobi sëmbë, di fa i ta biibi a Masa Gaangadu, ku di fa i ta hoi i seei limbolimbo a Gadu wojo, womi, hii dee soni dë tuu musu dë a pasi fu sëmbë sa djeesi i a de.

¹³ Nöö fa i dë ku mēni u mi taa mi o ko naandë, nöö mi o kai wanlö soni da i aki fii ta du fu te mi ko: I musu ta lesi dee wöutu u Masa Gaangadu da dee sëmbë nöömö. I musu ta konda di buka fëen da de, ta leti de finifini a dee soni u Masa Gaangadu. Sö i musu ta du fu te mi ko e, womi.

¹⁴ Mi ta mēni di daka dee tiima u keiki bi buta maun a i liba, nöö hën di Akaa u Gadu ko a de hën de fan soni u di wooko di a da i fii du. Di daka naandë, i bi kisi wan apaiti kōni. Nöö mi taki e, taa ja musu tuwë di kōni naandë disa e, ma i musu ta wooko ku ën nango nöömö.

¹⁵ Dee soni mi ta fan ku i aki, womi, i musu ta du de ku hii i hati nango nöömö, nöö sëmbë o si taa i nango fesi seei.

¹⁶ Fa i sai dë, i musu ta mbei möiti nöömö be hii libi fii dë a tatai liba. Nöö di lei u Gadu di i ta lei sëmbë dë, hënseei musu dë a tatai liba tu e. I musu kōni seei fu ja tookëen. Nöö te i ta libi sö kaa nöö joo puu i seei a hogi basu, i ku dee oto sëmbë dee ta haika i dë tuu.

5

Aki ta lei fa Timoteo musu libi ku sëmbësëmbë u di keiki.

¹ Wë womi Timoteo, awaa mi o taki da i fa fii musu libi ku dee pepei sëmbë e, te joo lei de soni ee nasö te joo bai de a soni.

Ee a dë wan gaan womi möön i, nöö ja musu gandji dëen e, ma i musu dëen piimisi, nöö i fan ku ën kuma i tata.

Ee a dë wan kijoo mii kuma i seei, nöö i kai ën fan kuma i baa womi.

² Ee a dë wan gaan mujëe, nöö i musu fan ku ën ku lesipeki kumafa i ta fan ku i mama.

Ma nöö ee a dë wan njönku mujëe mii, nöö i musu mēni i seei fii fan ku ën ku limbohati seei, leti kumafa i sa fan ku i sisa mujëe.

³ Nöö awaa mi o taki soni u dee gaan mujëe dee manu u de dëdë de fika a ganda. Womi, ee sö wan mujëe aan na wan kodo sëmbë seei nëen famii fu sölugu ën möönsö, nöö i sa kai ën nē a keiki be keiki sölugu fëen.

⁴ Ma ee wan mujëe manu dëdë a fika a ganda, ma a abi miii ee nasö miii kai ën avo, nöö nëen i musu kai da di keiki u de sölugu e. Dee mii fëen, de musu sölugu ën. Biga hën da fosu soni di de musu du fu sëmbë si taa de ta waka a Masa Jesosi baka tuutuu. Leti fa dee gaan sëmbë u de bi sölugu de di de bi dë

miii, nõõ leti sõ dee mii musu toona sõlugu dee gaan sēmbē u de baka. Nõõ ee de libi sõ, nõõ a bunu, a o suti da Gadu seei.

⁵ Wē ma nõõ ee wan mujēē dē, manu fēēn dēdē a fika a ganda mindi naandē, aan sēmbē mōōnsō u sõlugu ēn, ma a hopo ēn seei da Masa Gaangadu ta begi ēn ndeti ku didia. „Nõõ te i si sõ wan mujēē, womi, nõõ i musu kaabu i seei taa di sēmbē dē, a dē fanōudu u keiki sõlugu ēn.»

⁶ Ma nõõ ee i si wan mujēē manu fēēn dēdē nõõ hēn a dē fēēn ta waka ta daama a kōndē nango a piizii sōndō a ta pakisei andi a ta du, nõõ mi taki da i taa di soni dē an bunu. Sõ wan mujēē, fa i si a dē ku libi dē seei, ma nēēn akaa a dēdē e. „Nõõ di lõ mujēē dē, nēēn de musu kai da keiki u de sõlugu.»

⁷ Hii dee soni mi ta taki da i aki, womi, i musu ta tei de ta lei dee sēmbē a i ala, be de libi fu sēmbē an musu kosi de taa de an ta libi bunu.

⁸ Biga ee wan sēmbē an ta sõlugu hēnseei wosu dendu ku dee famii fēēn, nõõ di sēmbē dē hogi mōōn leki dee sēmbē dee an dē a biibi. Fa a ta libi fēēn dē, a dē kuma an nama ku Masa Jesosi seei.

⁹ Nõõ awaa mi o lei i andi ku andi i musu luku ufō joo buta wan mujēē di hēn manu an dē ku libi mōōn faa dē wan apaiti sēmbē da di keiki. Sõ wan mujēē, a musu pasa sikisiteni jaa e. Nõõ an bi musu waka ku oto womi mōōn leki hēn manu.

¹⁰ Fa a sai dē, de musu ta konda fēēn taa bumbuu soni wanwan nõõ a bi ta du. A bi kiija dee mii fēēn a wan bumbuu fasi. A bi ta hoi wakama waiwai nēēn wosu. A musu dē wan mujēē di bi lo' u sõlugu dee sēmbē u Masa Gaangadu ku sakafasi seei. Nõõ a musu dē wan sēmbē di bi ta lobi u heepi oto sēmbē dee dē a fuka. De musu ta taki fēēn taa bunu nõõ a bi ta du. Nõõ te wan mujēē dē sõ, womi, nõõ hēn i sa buta faa dē wan apaiti sēmbē da di keiki.

¹¹⁻¹² Ma nõõ dee njōnku mujēē dee manu u de dēdē de fika a ganda naandē, nõõ an dē fii „buta de apaiti da di keiki e.„ Biga te wan pisi nõõ di piizii u manu o ko a de liba. Pakisei u de o bia, nõõ de o go ta suku manu mōōn. Nõõ ee de dē sõ, nõõ Masa Gadu ku libisēmbē tuu o tei de fu hogi fu di de booko di buka di de bi mbei taa „Jesosi,„ Keesitu nõõ de o ta dini. De an hoi ēn go dou kumafa de bi taki mōōn.

¹³ Nõõ na di dē nõõ womi, ma de o ko malēngē. Nõõ de o ta waka nango ta ko ta daama a dee wosuwosu ta tjōkō buka a sēmbē soni ta lēgēdē ta konda soni di an dē fanōudu.

¹⁴ Nõõ fēēn mbei mi taa dee njōnku mujēē dee manu dēdē disa a ganda naandē, be de tei manu toou pai miii ta tii wosu dendu u de, be de ko abi soni u du. Nõõ dee felantima fuu an o sa feni pasi u kosi u.

¹⁵ Biga sōmēni mujēē kuma dee lõ naandē bia baka disa Gadu kaa go ta libi u de kumafa di didibi kē, hēn wē mbei mi taki sõ, womi.

¹⁶ Wē mi kē taki wan soni mōōn u dee gaan mujēē dee dē sōndō manu. Ee wan mujēē dē a biibi, nõõ hēn a abi gaan sēmbē nēēn famii di manu dēdē disa, nõõ di mujēē dē, hēn musu sõlugu fu dee gaan sēmbē fēēn e. Biga di lõ hebi naandē an musu dē u di keiki. Nõõ di keiki o sa feni pasi u sõlugu dee gaan sēmbē dee dē a nõutu tuutuu.

Aki a ta taki u dee hedima

u keiki mōōn.

¹⁷ Wē awa mi o taki wan oto soni da i mōōn u dee sēmbē dee ta tii keiki. Dee ta du de wooko a wan bunu fasi, nõõ de musu kisi mōōn hia hei ku paka tuu, fuu taki dee ta konda di buka da sēmbē bunu ku dee ta lei sēmbē a wan finifini fasi.

¹⁸ Biga ja jei fa di Buku u Gadu taki nö? A taa:

Ja musu tai di kau buka fu an musu njan
ka a ta wooko naandë.

Söseee a taa:

A fiti u wan wookoma
musu feni hën paima.

¹⁹ Nöo mi taki e, ee wan sëmbë tja wan kaagi u wan u dee tiima ko a i, nöo ja musu piki ën hesi e. I musu jei ën a tu nasö dii sëmbë a wan fasi fii sabi taa tuu, ufö fii piki awaa.

²⁰ Ma nöo te i ko si taa a du hogi tuu, nöo i musu gandji dëen a lanti fesi e, mbei hii dee sëmbë dee sai dë musu tei kõni nëen.

²¹ Timoteo, fa mi ta fan ku i aki, kijoo, nöo mi kë fii sabi taa Masa Gaangadu ku Masa Jesosi Keesitu ku dee basia u Gadu kõndë tuu ta jei fa mi ta fan ku i aki. Nöo fëen mbei i musu ta du hii dee soni mi ta taki da i aki tuu da hii sëmbë, ja musu koti adjabëe da na wan sëmbë.

²² Söö. Wë nöo womi, te joo buta maun a sëmbë liba faa wooko da Gadu, nöo i musu kõni fu ja du ën hesi poi. Ma i musu wegi ën finifini luku ufö i du ën. Biga ee nasö, a kandë a baka nöo de o ko si taa di sëmbë dë an ta libi bunu, nöo a o dë taa i seei dë a dendu tu. Nöo fëen mbei wë mi fan sö, biga i musu hoi i seei limbolimbo a hii futu.

²³ Nöo mi taki e, womi, fa i si bëe ta hati i, i ta siki hesihesi dë, nöo na wata wanwan nöo fii bebe e. Ma i musu ta bebe wan piki win tu, nöo a o heepi i.

²⁴ Haika e, womi. So sëmbë di hogi di a ta du, a dë a döo kaa bifö de kai ën a kuutu. Ma so sëmbë ta du hogi a wan tjubitjubi fasi. Ma te wan daka a o ko a döo nöömö fu sëmbë sabi ën.

²⁵ Nöo sösee a dë a di bunu di sëmbë ta du tu. So fëen dë a döo kaa u hii sëmbë sa si. Ma u so sëmbë ta dë tjubitjubi, ma bakaten sëmbë o ko sabi ën biga a o ko a döo nöömö.

„Kijoo, dee soni dë i musu sabi fa i si i sai dë e.”

6

Aki ta lei fa dee saafu musu libi ku dee masa u de.

¹ Womi Timoteo, awa mi o taki da i fa wan saafu musu libi ku ën masa. Fa i si dee saafu sai dë, nöo de musu ta luku de masa u de kuma wan sëmbë di de musu lesipeki. Biga ee de libi sö, nöo sëmbë an o feni pasi u de kosi Masa Gaangadu ku di lei fëen di i si u ta lei sëmbë aki.

² A kandë wan saafu abi wan masa di ta biibi Masa Jesosi tu. Nöo hën da de dë baaa ku baaa makandi. Ma nöo di saafu an musu ta sösö di masa fëen fu di dë hedi e. Awaa seei a musu ta wooko möön taanga dëen. Biga möön a ta wooko dëen, möön di masa ta feni wini. Nöo hën da a ta heepi di fëen seei sëmbë di a lobi.

Kijoo, sö fii ta lei dee saafu e.

Aki ta lei taa di dini u Masa

ta tja hia wini ko tuu.

Nöo hii dee soni dee i si mi ta taki da i aki, womi, de tuu i musu tei ta lei dee sëmbë fii ala, nöo i ta buta ku de fu de tei de tu.

³⁻⁴ Ma nöo ee wan sëmbë tja wan oto lei ko ta lei di an ta kai ku di lei fuu Masa Jesosi Keesitu u ta lei aki, nöo gaan fasi di sëmbë dë abi e. Aan fusutan u soni. Biga an kë di bumbuu lei di sa heepi sëmbë u de libi a wan limbolimbo fasi a Masa Gadu wojo.

Fa dee lö sëmbë sai dë, de lobi u pii oto ta fan ta fia ku sëmbë. Te kaba fëën, nöö sösö haun de o bia ta haun ku deseei, ta kosi deseei, ta taki föutu u otowan ta mëni hogi u de na de. Te wan pisi de an ta futoou na wan sëmbë möön.

⁵ De an o sa si de na de a wojo möönsö tu. Sö dee lö sëmbë naandë dë e, womi. A dë kuma dee hogi fasi u de puu dee tuutuu soni u Gadu a de hati fiaa. Nöö hën de ko ta mëni taa te wan sëmbë i ta dini Gadu, nöö a ta tja gaan wini ko da i fii ko gudu.

⁶ Wë nöö womi, te i ta dini Gadu, nöö a ta tja gaan wini ko da i tuu e. Ma na möni wini a ta tja. Nönö. Ma te i ta libi kumafa Gadu kë ta tifiهدي ku dee soni i abi, nöö hën da wan gaan wini fii kaa.

⁷ Biga di de pai u ko a goonliba aki, nöö wa bi tja na wan wojo soni ko ku u e. Nöö söseei te u dëdë, wa o tja na wan soni go tu.

⁸ Nöö fëën mbei, ee u abi sondi fuu njan pasa u libi ku koosu fuu tapa u sinkii, nöö a tjika fuu dë tifiهدي.

⁹ Biga wë ee wan sëmbë i ta suku fii ko gudu, nöö di soni i ta suku dë sa hai i tja go a sëmëni soni di sa puu i a di pasi u Gadu. Te kaba fëën, a dë kuma taapu kisi i, ja sa ko kumutu möön. Biga sëmëni wisiwasi soni joo ta pakisei a i hati, nöö joo kë ta waka a de baka. Te fii sabi, libi fii poi kaba a sösö fiaa.

¹⁰ Biga wë di langawojo u möni, nöö a dë kuma wan lutu a i hati di sa nasi tja hii sootu pei hogi ko da i. Biga so sëmbë bi abi di lö langawojo dë kaa, nöö sapisapi de ta pusa ta kumutu tefa de disa di biibi fiaa. Nöö hën de ko fika dë ku sëmëni gaan hila fuka a de hati.

Aki Paulosu ta da Timoteo wanlö lasiti lai.

¹¹ Ma nöö womi, i da sëmbë u Masa Gaangadu vö, hën mbei i musu kule da hii dee hogilibi u taki dë, be de an dou a i. Nöö a dee lö soni aki baka fii ta kule e, womi: I musu biinga fii libi leti a Gadu wojo. I musu mbei möiti fu hii pakisei fii musu dë a Gadu. I musu ta biibi a Masa Gaangadu nöömö. I musu ta lobi sëmbë. I musu ta tai hati a hii dee fuka dee ta miti i. I musu ta libi ku saapi fasi ku sëmbë. Womi, a dee lö soni dë baka wë fii biinga e.

¹² Fa u ko ta biibi Masa Jesosi aki, nöö sëmëni soni dë ta biinga u puu u a di pasi fëën. Nöö i musu ta fia ku dee soni dë ta feti di bunu feti go dou te nöö i feni di libi u teego. Biga fu di ten di i bi taki sö wan bumbuu soni a lanti fesi taa joo waka a Masa Jesosi baka, nöö kumutu a di ten dë a buta di libi u teego faa da i kaa.

¹³ Kijoo, fa i si mi ta fan ku i aki, mi ta fan ku i a Masa Gaangadu fesi di ta da hii dee soni a goonliba aki libi. Mi ta fan ku i a Jesosi Keesitu fesi tu, di an bi fëë u taki di tuu da sëmbë möönsö, te dou ku Gaama Pontuisi Pilati seei.

¹⁴ Nöö mi taki e, taa be i go dou ku di wooko di i si Gadu buta a i maun naandë. I musu ta du ën a wan gbelingbelin fasi söndö föutu e, fu te dou di daka di Masa Jesosi Keesitu o toona ko.

¹⁵ Biga Masa Gadu o mbei a ko nöömö a di juu di a buta.

Womi, fa Masa Gaangadu sai naandë, nëën hii bunu dë. Hën nöö da tiima u mundu. Biga hën da di kaba hei Könu a hii könu liba, ku di kaba hei Masa a hii masa liba.

¹⁶ Fa a sai dë, hën wanwan tö nöö an sa dëdë a mundu möönsö. A ta libi a wan gaan limbo dendu ta koti faja te na wan libisëmbë sa go dou ka a sai dë. Sëmbë an dë di si ën ku wojo wan daka tu, biga libisëmbë wojo an sa kai nëën möönsö. Fa a sai dë, di nëbai fëën ku di kaakiti fëën dë u nöömö teego. A tan sö.

¹⁷ Wë nõõ Timoteo, mi taki e, taa dee sëmbë dee dë guduma a goonliba aki, nõõ i musu bai de be de disa gaan fasi, be de an buta futoou a dee gudu u de. Biga dee gudu naandë, nõõ de an dë wan soni di o tan fu nõömö, u sëmbë musu ta buta mëni a de liba. Ma Masa Gaangadu wanwan nõõ fii musu ta mëni e. Biga hën ta da u hii dee soni dee u abi, fuu sa njan de ku piizii. An ta pindja soni da u.

¹⁸ Nõõ fa dee guduma sai naandë, na di gudu u de, de musu luku kuma gaan soni e. Ma, be de ta du bunu te a hia ta paati dee gudu u de da sëmbë ku wai hati. De an musu giini.

¹⁹ Nõõ te de libi sô kaa, nõõ hën da de ta lai gudu a Gadu Këndë ala te a hia fu de sa njan a di bakaten libi. Biga di libi u teego di Gadu abi u da de a bakaten, hën wë da di tuutuu libi, na di u goonliba aki. Nõõ nëën baka de musu biinga.

Sô i musu ta bai dee guduma e, womi.

²⁰ Womi Timoteo, gaantangi mi begi i kijoo, tjubi dee soni dee i si Masa Gadu futoou i buta a i maun naandë e, be de an poi kaba a sôsö. Nõõ mi taki e, i musu kõni ku dee sëmbë dee ta fan hia ta taki dee wisiwasi soni u de dee an ta kai ku Gadu. Fa de ta fia u de dë ta mbei taa de sabi soni poi seei, ma ja musu haika de seei.

²¹ Biga so sëmbë bi ta fan dee lõ fan dë, hën wë sapisapi de hai kumutu disa di biibi a Masa Jesosi. Nõõ fëën mbei baa mi ta bai i nëën.

Womi, Masa Gaangadu musu dë ku i ku ën bunuhati e.

Di u tu biifi di Paulosu sikifi da Timoteo

Wan woutu a fesi.

Di biifi aki, hèn da di u tu biifi di di tjabukama u Masa Jesosi de kai Paulosu sikifi da di kijoo de kai Timoteo. A dè sò taa Paulosu ta paaja di buka u Masa Jesosi da sèmbè te wan pisi, nöö hèn dee felantima fèèn kisi èn hèn de tjèèn go sòotò a dinguwosu a di kòndè de kai Loomè. Nöö fa a dè a dinguwosu dè nöö a kè Timoteo musu ko nèèn. Nöö hèn a mbei di biifi aki manda dèèn.

Nöö te i lesi di biifi aki, nöö joo sabi fa Paulosu ta fii u sòmèni soni. Biga a ta taki u di fa a lobi Timoteo tjika. A ta taki u di dèdè fèèn seei di a o dèdè abiti mөөn. A ta taki fa sèmbèsèmbè libi ku èn fa a dè a dinguwosu dè. Nöö a ta leti Timoteo a di fa a musu du di wooko fèèn kuma wan wookoma u Gadu. A ta lei tu fa di lasiti ten u di goonliba o dè.

Dee soni dè tuu joo lesi a di biifi aki.

*Aki Paulosu ta manda odi
da Timoteo.*

¹⁻² Söö. Wè mi Paulosu ta sikifi di pampia aki manda da Timoteo kuma miseei miii di mi lobi gaanfa. Kumafa i bi sabi kaa, kijoo, mi da wan tjabukama u Jesosi Keesitu. Masa Gaangadu seei feni èn u bunu faa kai mi ko buta a di wooko, fu mi musu ta konda da sèmbè u di libi di Gadu paamusi u taa u sa feni a Masa Jesosi Keesitu. Womi, u Tata Masa Gaangadu ku Jesosi Keesitu musu dè ku i ku de bunuhati ku de tjalihati ta da i kòtòhati.

³ Wè nöö mi ta da Masa Gaangadu tangi da i o, di i si mi ta dini ku limbohato söndö ganjan aki, leti kumafa dee gaan sèmbè u mi bi ta dini èn. Hii juu mi ta begi da i a ndeti ku didia, womi.

⁴ So juu mi ta mèni „fa mi ku i bi paati,„ fa wata bi pasa a i wojo, nöö mi ta hangì i seei. Mi kè si i be hati u mi toona wai te dou.

*Aki Paulosu ta da Timoteo hati
a di wooko.*

⁵ Te mi ta mèni i, womi, nöö mi ta mèni kumafa i seei ta biibi Gadu söndö ganjan tu e. A di fasi dè seei i avo Loisi ku i mama Euniki tuu bi ta biibi kaa, nöö mi sabi taa di lö biibi dè, a dè leti a i naandè tu.

⁶ Fèèn mbei mi kè toona mèni i möön a di fa mi bi buta maun a i liba nöö hèn Gadu da i wan apaiti kóni fii musu sa wooko dèèn. Wè nöö di kóni i si naandè, i musu böö faja dèèn be an kòtò möönsö.

⁷ Biga wè fa Gadu da i di Akaa fèèn naandè, an da i èn fii ta dè fèèèfèèè e. Ma fii dè ku kaakiti ta lobi sèmbè ta tii i seei a soni.

⁸ Wè nöö di a dè sò kaa, nöö ja musu ta hai baka te ja sa konda soni u Masa da sèmbè e. Nöö sen an musu ta kisi i da mi tu, te ja sa nama ku mi fu di mi dè a dinguwosu aki fu Masa Jesosi hedi. Ma Gadu musu da i kaakiti fu mi ku i sa tja dee sitaafu makandì. Biga dee sitaafu dee i si u ta tja aki, de dè fu di u ta konda di Bunu Buka u Masa Jesosi hedi.

⁹ Fa Masa Gadu sai dè, womi, a kai u puu a di hogilibi fuu basu fuu musu libi wan apaiti libi dèèn. Nöö an dè taa di bumbuu fuu mbei a du èn sò e. Nönö. Ma fu di bunuhati di hènseei abi, ku di pakisei a bi abi a u liba gaanduwe kaa, hèn mbei. Biga bifö a mbei goonliba, a bi buta taa a o manda Jesosi Keesitu ko. Sò a bi abi bunuhati fuu tjika kaa.

10 Ma nõõ awaa ufõ di bunuhati fëen dë ko a döõ, di i si taa u Heepima Jesosi Keesitu ko tuu. Nõõ fa a ko aki, a booko di kaakiti u dëdë faa, puu u a di fëëë naandë basu. Nõõ nëen ufõ u ko sabi taa wan njunjun libi dë u feni, ku wan njunjun sinkii di an o poi kaba a sösö möönsö, te u ta piki di Bunu Buka fëen.

11 Wë nõõ di Bunu Buka aki, hën wë i si Gadu buta mi tjabukama fëen kuma wan basia ta bai ta kondëen da sëmbë. A buta mi u mi ta lei dee sëmbë na u Isaëli ën a wan finifini fasi tu.

12 Nõõ fu di mi ta du di lö wooko dë, hën mbei mi dë a di sitaafu aki. Ma an dë taa sen ta kisi mi e. Nönö. Biga mi sabi di Sëmbë di mi ta futoou di futoou aki taa a abi kaakiti tjika faa tjubi hii soni di mi buta nëen maun, fu tee dou di gaan daka di a o kuutu hii libisëmbë.

13 Söö. Wë womi, mi taki e, taa dee lei dee mi bi lei i, nõõ gbelingbelin soni de dë e, fii seei musu tei ta maaka ku dee lei i ta lei sëmbë dë luku ee de kai a di wan. Nõõ fa joo ta lei sëmbë dë, nõõ i musu dë gingi a di biibi ta lobi sëmbë ku di lobi di i si u ta feni a Jesosi Keesitu.

14 Nõõ di gaan bumbuu soni di Masa Gadu futoou i te a butëen a i maun naandë, womi, i musu kõni ku ën gaanfa e. I musu ta tjubi ën ku di heepi u di Akaa u Gadu di i si ta libi a u hati aki, be an kaba a sösö.

Aki Paulosu ta taki kumafa dee oto biibima u Masa Jesosi

libi ku ën.

15 Söö. Wë womi, i seei sabi taa dee biibima fu Asia Kõndë tuu go disa mi e, te dou ku Figelusi ku Hemogenesi.

16 Ma di womi de kai Onësisofulu baa, mi ta begi dëen fu Masa Gaangadu musu a' tjalihati fëen ku dee sëmbë fëen wosu dendu tuu. Biga di womi dë, sen an kisi ën seei faa nama ku mi möönsö, hii fa mi dë buibui a dunguwosu aki.

17 Biga di a ko a Loomë aki, hën a ta waka ta suku mi a hii kamian teefa a si mi.

18 Nõõ sëmëni pasi seei a ko a mi ko da mi degihati e. Nõõ i seei sabi dee hia bunu a bi du mi tu di mi bi dë a Efeise ala. Fa a libi ku mi tjika dë, nõõ Masa Gaangadu musu heepi ën a wan apaiti fasi e, a di gaan kuutu daka fëen. A musu a' tjalihati fëen.

2

Aki Paulosu ta taki da Timoteo fa a musu du di wooko fëen.

1 Söö. Wë womi Timoteo, mii, i musu da Jesosi Keesitu pasi faa libi ku i ku ën bunuhati e, be a da i taanga da di wooko.

2 Nõõ mi bi lei i ku dee otowan sëmëni soni, nõõ i musu toona tei dee soni dë ta lei bumbuu sëmbë dee ta abi kõni tjika u toona lei oto sëmbë tu.

3 Nõõ mi o konda wanlö soni aki da i e, fa fii musu ta du di wooko fii, kijoo. Fa i sai dë, i musu ta dë kabakaba fii tja sitaafu da Jesosi Keesitu e, leti kumafa wan sodati dë kabakaba faa tja sitaafu dëen kõndë.

4 Nõõ i sabi fa wan bumbuu sodati ta dë nõ, womi? An ta waka ta hulu soni a së së möönsö möön na di wooko di a sai dë. Biga a kë u di oposii musu ta wai ku ën u di fa a ta wooko.

5 Söseeei tu, te wan sëmbë ta fia ta pëe wan pëe faa wini wan soni, nõõ ee an pëe kumafa dee wëti u di pëe dë, nõõ an o wini soni dë e.

6 Nõõ söseei tu, di sëmbë di ta wooko taanga a wan goon, a fiti fu hën fosu musu feni di njanjan u di goon, na sō nõ?

⁷ Womi, dee soni mi ta fan aki, nöö be i ta buta pakisei a de liba e, nöö Masa Gaangadu o mbei i sabi unfa de nama ku di fa i musu du di wooko fii.

⁸ Söö. Wë womi Timoteo, ta mëni Jesosi Keesitu nöömö taa hën da di Sëmbë di Masa Gaangadu bi weki puu a dëdë. Hën da di Bakamii u Kõnu Dafiti tu, di o sindo nëën kõnu sutuu fu teego. Ja musu fëëkëtë dee soni dë, womi. Biga te mi ta konda di Bunu Buka, nöö de da dee soni mi ta taki nöömö.

⁹ Nöö fu di mi ta konda dee soni dë, fëën mbei i si mi dë a di sitaafu aki e, ka de bui mi buta a dunguwosu aki kuma wan sëmbë di du gaan hogi. Ma ma a' toobi e, womi. Biga mi sabi taa di wöutu u Gadu, hën an sa dë buibui möönsö. Nönö.

¹⁰ Nöö di a dë sö kaa, nöö hën mbei mi dë tifihedu i tja hii fuka. Biga mi ta mëni dee sëmbë dee Gadu tei kaa u de ko sëmbë fëën. Mi kë u de musu feni di heepi u Gadu nöömö di a abi u da de a Jesosi Keesitu, be de njan di suti u di waiti köndë fëën fu teego.

¹¹ Nöö mi o taki wanlö soni aki, de dë tuu möön hii soni, womi. Ee u ku Masa Jesosi dëdë makandi, nöö u ku ën o libi makandi tu.

¹² Ee u hoi dou a dee sitaafu dendu, nöö u ku ën o tii makandi a bakaten.

Ee u piki taa wa dë ku ën, nöö hënseei o piki taa an dë ku u tu.

¹³ Ma ee wa dë u futoou a dee soni u ta du, ma hën a o dë u futoou nöömö.

Biga di fa a dë, sö nöö a o dë u nöömö, an o sa tooka möönsö.

Aki Paulosu ta lei Timoteo fa wan wookoma u Gadu musu dë.

¹⁴ Womi o, hii dee soni mi ta taki aki, nöö i musu toona ta konda de a baka futu da dee sëmbë dee Gadu buta a i maun e, kijoo. Nöö i musu ta bai de a Gadu fesi tu taa de an musu sai dë ta fia a peipei wöutu liba. Biga dee lö fia naandë an ta tja bunu ko, ma poi nöö de ta poi dee sëmbë dee ta jei de ta kaba de a sösö.

¹⁵ Nöö fa i seei sai dë, i musu ta biinga fu Gadu sa wai ku i a hii fa i ta libi. Nöö i musu wooko a wan fasi fu sen an musu kisi i a bakaten. I musu ta tei di wöutu u Gadu ta lei ën leti kumafa a dë e, biga tuutuu soni gbelingbelin a dë.

¹⁶ Nöö womi, ja musu nama ku dee sëmbë ta fan dee sösö fan dee an ta kai ku Gadu e. Biga dee sëmbë ta fan dee lö fan naandë, nöö libi u de o ta hogi nango nöömö te de ko dë kuma de an sabi Gadu seei.

¹⁷ Dee lei u dee lö sëmbë dë ta poi sëmbë libi leti kuma te wan hogi siki kisi i paaja a hii i sinkii. Nöö Himënéusi, ku Filitusi da tu u dee sëmbë dee libi a di lö fasi naandë.

¹⁸ Fa de sai dë, de kumutu disa di tuutuu lei u Gadu gaanduwe, nöö hën wë i si de go ta fan wanlö poipoi fan ta bai taa di weki baka a dëdë pasa kaa. Nöö ku dee lö fan naandë, de go ta poi sëmbë te de an saandi u de biibi möön.

¹⁹ Ma dee lei u Gadu an dë sö e, womi. De, de dë gingin kuma wan goonsei di an sa seki. Nöö di goonsei abi tu posu. Di fosuwan hën da: “Gadu sabi ambë da dee sëmbë fëën.” Di u tu, hën da: “Hibiwan sëmbë di ta piki taa a nama ku [Masa Jesosi] Keesitu, nöö a musu disa hogi du.”

²⁰ Wë nöö i sabi fa a dë a wan gaan wosu dendu, womi. Sömëni pei soni dë nëën fii tei ta wooko ku de e. Goutu soni dë nëën, soofu soni dë nëën, pau soni, soni de mbei ku doti. Fa de sai dë, so u de dë fu du lagi wooko, so u de dë u du hei wooko, na sö nöö?

²¹ Wë nöö mi taki e, ee wan sëmbë i disa dee hogi sondi u taki dë fii ta libi limbolimbo a Gadu fesi, nöö joo dë kuma wan u dee möön waiti soni u wan

wosu di de sa tei du wan gaan wooko ku ën. Biga joo dë apaiti seei da Masa, nõo joo dë kabakaba faa tei i faa du hiniwan bumbuu soni ku i.

²² Womi Timoteo o, i musu kule da dee hangi dee ta ko a un dee njönku sëmbë hati e, dee na bunu u du. Ja musu da de pasi a i libi seei. Nõo haika dee soni dee fii musu ta kule a de baka: leti libi, biibi a Gadu, lobi, ku kötöhati. A dee lõ soni aki baka i musu ta kule e, kijoo, nõo de o si taa i mökisi ku dee sëmbë u Gadu dee ta begi ën ku limbo hati.

²³ So seei dee sëmbë ta fia sösö fia naandë, womi, ja musu nama ku de nëen e. Biga i seei sabi taa toobi nõo de ta tja ko.

²⁴ Nõo ee wan sëmbë i dë futuboi u Masa Jesosi, nõo ja musu ta suku toobi, ma i musu ta libi a wan saapi fasi ku hii sëmbë. Fa i sai dë, i musu abi di kõni fii lei sëmbë sondi a wan bunu fasi ku pasensi.

²⁵ Ee sëmbë ta fia ku i a dee soni i ta lei, nõo i musu bai de, ma ku saka fasi e. Biga wë fa de abi taangajesi dë seei, ma ja o sabi. A kandë te wan ten, nõo Gadu o mbei hati u de bia te de ko piki dee tuutuu soni fëen.

²⁶ Nõo de o kisi fusutan tjika u de sa kumutu a di kamian awaa ka di didibi bi kisi de buta fu de musu ta du andi a kè.

3

Aki Paulosu ta lei fa sëmbë o ko hogi tjika a di lasiti ten

u goonliba.

¹ Wë nõo womi Timoteo, mi kè i sabi taa a dee lasiti daka u di goonliba aki, nõo wan tumisi hogi ten o ko e.

² Biga sëmbë u di ten naandë an o lobi oto sëmbë möön leki de seei nõo. De o abi langahati möön hii soni. De o ta njan buka ta mbei deseei taa de dë gaan womi. De o ta kosi Gadu ta dëen gaan buka. Di ten dë, de an o ta saka deseei a de mama ku de tata basu möönsö. De an o ta da sëmbë tangi tu, na Gadu, na libisëmbë, te de feni bunu. Na wan pisi u di libi u de o kai ku Gadu möönsö.

³ De an o abi fii a de hati da na wan kodo sëmbë. De o ta hoi sëmbë a bëe ta mindi soni da sëmbë ta tja de ta njan a baka. Fa de sai dë, de an o ta hoi deseei a tii möönsö. De o dë hogi leti kuma taku mbeti.

Womi, mi taki da i taa dee lõ sëmbë dë an o lobi na wan soni di dë bumbuu möönsö.

⁴ Fa de sai dë, ja o sa futoou de, biga te fii sabi nõo de o ta tja i go sei da sëmbë. De o abi hesihati. De o ta abi gaan fasi. De o ta lobi piizii möön Gadu.

⁵ Nõo ku di tan u de dë seei de o ta mbei taa de ta nama ku Gadu, ma ee i luku de te i kaba, nõo de an ta da di kaakiti u Gadu pasi möönsö a de libi. Mi taki e, womi, taa dee lõ sëmbë i si naandë, i musu bia baka da de e.

⁶ Wë biga de o ta waka ta naki sëmbë tëtë kuma bumbuu sëmbë fii musu kai de ko a i wosu. Nõo ee wanlõ wisiwasi mujëe sai a di wosu, nõo de o ta suku u de kisi de buta a di tii u de basu. Fa dee lõ mujëe sai dë, de guwenti u ta piki dee hogi kè u de hati tee nõo awaa de ko ta fii di fuka u di hogilibi u de.

⁷ Nõo de o ta suku lai a hiniwan sëmbë, ma nõo de an sa fusutan dee tuutuu soni u Gadu möönsö e.

⁸ Dee lõ leima u ta taki aki, de o dë leti kuma Janësi ku Jambesi, dee tofuma u Falao, dee bi ta fia ku Mosesi. Sö dee lõ sëmbë aki o tuwë gogo ta fia ku di gbelingbelin lei u Gadu. Fa de sai dë, pakisei u de poi gaanduwe kaa te de an ta mëni bumbuu soni möönsö. De an kè ko sabi Gadu u de biibi ën seei.

⁹ Ma nõo mi taki da i taa de an o sa ta ganjan sëmbë nõömö e. Biga leti kumafa i si Janësi ku Jambesi gogo bi ko a döo wajaa da lanti, nõo leti sö nõo dee sëmbë aki gogo o ko a döo wajaa tu, u lanti si taa sösö de bi ta du.

Aki Paulosu ta taki kumafa hënseei bi du di wooko.

¹⁰ Wë ma Timoteo, i, i sabi kaa taa ma dë kuma dee lö sëmbë u taki dë, na sö nõ?, Biga i sabi hii fa mi ta lei sëmbë, i sabi unfa mi ta libi tu. I saandi mi kë musu pasa a bakaten fa i si mi ta wooko aki. I sabi fa mi ta biibi Gadu tjika, womi. I sabi fa mi ta hoi pasensi ku sëmbë. I sabi fa mi ta lobi Gadu ku libisëmbë tuu.

Womi, i sabi fa mi bi hoi dou a hii dee soni dee pasa ku mi.

¹¹ I sabi kumafa sëmbë bi ta da mi sitaafu tjika. I sabi dee oto fuka tuu dee bi miti mi. I seei sabi fa de bi sitaafu mi na Antiokia, ku Ikonium, ku Lisita tuu. Hii dee sitaafu dë mi bi tja, ma Masa Jesosi hën wë bi heepi mi puu mi a de tuu.

¹² Wë nõö sö a dë e, womi. Ee wan sëmbë i kë libi gbelingbelin kumafa Gadu kë, fii ta waka a Jesosi Keesitu baka, nõö i musu u feni sitaafu a libisëmbë maun nõömö.

¹³ Dee takusëmbëma ku dee sëmbë ta ganjan sëmbë taa de dë leima dë, nõö de o ta hogi nango fesi nõömö. Fa de sai dë, de o ta ganjan sëmbë nõö sëmbë seei o ta ganjan de tu.

Aki Paulosu ta taki soni

u Gadu Buku.

¹⁴ Söö. Ma nõö womi Timoteo, dee lei i si i lei naandë te ko sinkii fii kaa, nõö i musu tan a de go dou e. Biga i sabi dee sëmbë dee bi lei i de, taa i sa futoo de.

¹⁵ Fa i sai naandë, sensi di i bi dë piki mii seei, hën wë i bi lei Masa Gaangadu Buku te sabi. Nõö di Buku dë, a abi kaakiti tjika u ta da i fusutan fii sa biibi a Jesosi Keesitu fii feni heepi nëen.

¹⁶ Biga di fa hii dee pisipisi u di Buku u Gadu bi sikifi dë, nõö di Akaa fëen seei wë ko a peipei sëmbë liba fu de sikifi de e. Hën mbei di Buku sa heepi i fii sabi di lei u Gadu di dë tuutu. A sa heepi i tu, fu te ja ta libi bunu nõö a leti i buta a pasi. A sa bai i seei fii disa hogilibi. Fa di Buku sai dë, a ta leti i fii sa libi kumafa Masa Gaangadu kë a hii futu. Sö di Buku u Gadu bumbuu tjika, womi.

¹⁷ Nõö ee wan sëmbë i ta dini Gadu nõö hën i sabi di Buku fëen, nõö joo dë a di kamian ka i sa du hiniwan bumbuu wooko di Gadu buta da i fii du.

4

Aki Paulosu ta fan ku Timoteo taanga u di fa a musu du

di wooko.

¹ Söö. Wë nõö womi, mi o manda i a wanlö soni aki e. Nõö fa mi o fan, Masa Gaangadu seepi ta jei, ku ën mi Masa Jesosi Keesitu di o ko a goonliba aki wan daka nõömö u tei di Könu Tii fëen. Fa a o ko dë, nõö a o kuutu hii sëmbë, dee libi wan ku dee dëdë wan tuu. Nõö a de fesi mi ta fan ku i, womi,

² taa i musu ta konda di Buka u Gadu nõömö da sëmbë e. Ee i a' peesa u kondëen, ee ja a' peesa seei, ee sëmbë kë jei ën, ee de an kë jei, ma töku i musu dë kabakaba fii ta kondëen nõömö. Ee wan sëmbë an ta libi bunu, nõö i musu leti ën buta a pasi. I musu bai ën seei be a disa di lö libi dë. Ee wan sëmbë lasi hati, nõö i musu fan ku ën dëen hati. Hii dee soni dë tuu i musu ta du a wan finifini fasi ku gaan pasensi.

³ Biga mi taki da i taa wan ten o dou, nõö libisëmbë an o kë haika di bumbuu lei möön. De o ta hai peipei leima tja ko, dee ta lei de dee soni de ta giuu u de jei.

⁴ Sö de o booko jesi tapa tjika da di tuutuu lei, go ta haika mindimindi oto.

⁵ Ma nöö womi, hii fa soni o ta waka dë, ma i, i musu dë ku limbo pakisei nöömö e. Ja musu fëë u tja sitaafu da Masa Jesosi Keesitu. I musu ta konda di Bunu Buka fëen da sëmbë nöömö ta hai de tja ko nëen së. Hii dee soni Gadu buta da i fii du a di wooko fii, nöö de tuu i musu du. Nöö sö mi fan ku i e, womi.

Aki Paulosu ta taki soni

fëen seei.

⁶ Nöö di soni mbei mi ta fan ku i sö. Biga di dëdë juu u mi ko zuntu kaa. Hii di libi u mi bi dë kuma wan wata mi bi ta tuwë da Gadu u dëen tangi, nöö awaa mi ta dou a di kaba pisi fëen.

⁷ Mi bi feti di bunu feti e, womi. Nöö di pasi Gadu buta da mi u mi kule nëen, nöö mi kule nëen te mi dou a di kaba pisi fëen fa mi dë aki. Nöö hii di ten dë, nöö mi bi dë a di biibi ku telu, ma kumutu nëen möönsö.

⁸ Nöö fa Masa Jesosi dë di Leti Kuutuma tjika naandë, nöö mi sabi taa a buta wan paima kabakaba da mi kaa, fu di mi bi ta libi a wan leti fasi nëen wojo. Nöö di paima dë, a o da mi ën a di daka di a o kuutu hii libisëmbë. Ma nöö an dë taa mi nöö o feni ën e, womi, ma hii u dee sëmbë bi ta hangi Masa Jesosi faa ko, u tuu o kisi ën.

Aki Paulosu ta taki wanlō soni da Timoteo apaiti.

⁹ Nöö mi taki e, womi, mi kë fii biinga fii ko a mi hesihesi e baa.

¹⁰⁻¹² Biga de go disa mi tuu. Demasi ko lobi dee soni u goonliba aki tee a disa mi go fëen a Tesalonika. Këlësënsi hën a go a Galasia, nöö Titusi go a Dalimatia. Tikikusi hën mi manda go a Efeise. Lukasi wanwan nöö dë ku mi aki a di mindi.

Nöö te joo ko, nöö be i tja Maikusi ko ku i e, biga a dë wan heepi da mi a di wooko.

¹³ Nöö mi begi i baa taa te i ta ko, nöö i go a Toasi e, a Kaapusi wosu, nöö joo si di djapona naandë di mi ta tapa da kötö, ku dee buku u mi dee sai naandë. Nöö mi begi i be i tja de ko da mi e. Ma dee mbeti kakisa buku, ja musu fëëkëtë de möönsö.

¹⁴ Nöö mi kë i sabi taa Alekesani di sëmbë di ta wooko ku köpö, nöö a du mi gaan hogi e. Aai. Ma nöö Gadu seei o pakëen kumafa a wooko.

¹⁵ Ma i musu köni ku ën e, womi, biga fa u bi sai naandë, nöö a bi dë gaan felantima fuu ta fia ku u, u di Buka di u ta tja hedi.

¹⁶ Nöö mi kë i sabi tu taa di fosu pasi di de kai mi a kuutu fu mi piki de andi mbei mi ta libi a di fasi aki, nöö na wan sëmbë bi sai dë fu heepi mi. De tuu go disa mi. Ma Gadu an musu hoi de a bëë.

¹⁷ Ma nöö fa mi fan dë seei, ma Masa hën an disa mi e. A taanpu ku mi, nöö hën a da mi kaakiti te mi fan seei a wan limbolimbo fasi. Nöö a di fasi dë, di pasi jabi u di Buka sa feni pasi paaja seei be hii dee sëmbë na u Isaëli musu sa jei ën. Nöö sö Masa heepi mi tjika. A puu mi a lëun buka seei fu de an feni mi kii.

¹⁸ Nöö hiniwan ten sö nöö a o ta heepi mi tu, ta puu mi a hogi maun nöömö, fu te mi dou bumbuu a di Köndë fëen ka a dë Könu fu nöömö. Fëen mbei fa Gadu sai naandë, womi, a musu abi hii nëbai ku hii waiti fu teego. A tan sö.

Aki Paulosu tapa di biifi.

¹⁹ Wë baa o, mi o tapa di pampia aki. Nöö mi kë i da Pesila ku Akila gaan odi da mi e, ku dee sëmbë dee ta dë a Onësisofolu wosu.

²⁰ Mi kë i sabi taa Elatusi fika a Kolenti, nöö Toofimusi, hën mi bi disa sikisiki a Milete ala.

²¹ Nöö mi begi i baa, be i biinga seei kumafa i sa, fii ko a mi aki bifö di gaan kötö ten dou.

Jubulusi, Pudensi, Linusi, Kalaudia ku hii dee otowan fuu aki tuu ta manda gaan odi da i.

²² Masa musu dë ku i baa ku ën bunuhati ta tii di hati fii. A tan sö.

Di biifi Paulosu manda da Titusi

Wan wöutu a fesi.

Titusi bi dë wan u dee kijoo ta waka ku Paulosu ta lei di wooko u Masa Jesosi. Nöo hën Paulosu disëen a di gaan paati de kai Keeta faa seeka wanlô keiki dë. Di paati bi dë ku sômëni köndë, nöo hiniwan u dee köndë ta abi wanlô biibima u Masa Jesosi nëen. Ma dee biibima an bi abi hedima u tja de eti, nöo hën Paulosu manda Titusi faa musu seeka dee keiki buta hedima a hiniwan u de. Hën a mbei di pampia aki manda taki dëen fa faa musu du di wooko.

Aki da seti u di biifi.

¹ Mi mii Titusi, wë mi Paulosu ta manda gaan odi da i taa mi dë. Kumafa i sabi kaa womi, mi da wan futuboi u Masa Gadu e. Nöo mi da wan tjabukama u Jesosi Keesitu tu. Biga a manda mi fu mi go konda di Buka fëen, be dee sëmbë a bi tei u de ko sëmbë fëen musu ko biibi nëen liba. A manda mi tu u mi mbei de ko sabi dee tuutuu soni u Gadu, be de libi kumafa Gadu kë a hii futu.

² Nöo te de piki di Buka ko ta libi sô kaa, nöo de o dë ku di sabi taa Masa Gadu o da de di libi fëen fu teego.

Biga gaanduwe a fesi bifö a mbei goonliba, Masa Gadu bi paamusi taa sô a o da u ën. Nöo Gadu an ta lëgëdë. Di soni a taki, a o du ën nöömö.

³ Nöo fa u dë aki, di juu dou fu di libi a paamusi dë ko a limbo da sëmbë. Nöo hën wë i si de ta konda da lanti fa u dë aki. Nöo a di wooko naandë Masa Gadu, di Heepima fuu, buta mi e.

⁴ Nöo ku di pampia aki mi manda gaan odi da i, baa, kuma womi mii u mi. Biga fa mi heepi i te i ko ta biibi Gadu kuma miseei aki, nöo hën da i ko womi mii u mi kaa. Nöo Masa Gadu ku di Heepima fuu, Jesosi Keesitu, musu dë ku i ku de bunuhati. De musu da i böö.

Aki Paulosu ta lei kumafa wan hedima u keiki musu dë.

⁵ Wë di soni mbei mi disa i a Keeta dë, womi, mi disa i fii musu seeka dee soni dee dë fanöudu u seeka eti. Nöo i musu buta tiima a hii dee keiki a dee köndëköndë dë tuu kumafa mi bi taki da i fii seeka dou.

⁶ Nöo mi bi taki da i taa fa joo buta dee hedima dë, nöo hii sëmbë musu si taa dee lö sëmbë dë ta libi bunu. Na wan libi u de seepi musu toobi sëmbë möönsö. De musu dë ku wan kodo mujëe, nöo de an musu waka ku oto mujëe möönsö. Dee mii u de seei musu ta waka a Masa Jesosi baka tu. De an musu ta libi fanjanfanjan, ma de musu ta piki de tata buka a soni.

⁷ Biga di hedima u di keiki hën da futuboi u Masa Gadu ta tii di keiki fëen dëen. Hën mbei a musu libi bunu fu na wan sëmbë musu sa kaagi ën.

Nöo an musu abi gaan fasi ta buta hënseei hei tumusi. Hati fëen an musu ta boonu hesihesi. Söseei an musu lo' u suku toobi ta buja ta feti ku sëmbë. An musu ta bebe daan ku win te a dööngö. An musu abi langahati u möni tumusi ta suku faa ko guduma.

⁸ Ma fa a sai dë, bumbuu soni wanwan nöo a musu ta suku. A musu lobi u kisi sëmbë hoi nëen wosu. A musu abi fusutan ta tii ën seei fu an ta du soni di na fiti. A musu ta libi bunu ku sëmbë. A musu ta hoi dee wëti u Masa Gadu ta libi wan apaiti libi dëen.

⁹ Nöo a musu ta dë ku di Buka u Masa Gadu nöömö kumafa a bi lei ën. An musu biëen möönsö. Ma a musu sabi ën bumbuu, faa sa lei dee oto biibima

ta da de hati a di biibi. Söseei tu a musu sabi fa u leti dee sëmbë dee ta fia ku di Buka, buta de a pasi.

Aki Paulosu bai Titusi a dee sëmbë dee ta ganjan sëmbë

a di köndë.

¹⁰ Sö dee hedima u keiki musu dë e, womi, biga sëmbë sai dë dee an ta kë piki sëmbë buka a soni. De ta fan sösö ta ganjan sëmbë. Gaan së u de da dee Isaëli sëmbë dee ta kë hoi dee awoo wëti u de eti.

¹¹ Nöo di fan u de dë musu kaba e. Biga de ta ganjan sëmbë ta toobi de ku di lei u de, te de ta puu hii famii a Masa Gadu. Nöo fu möni hedi wë de ta du sö e.

¹² Wan u dee nëbai sëmbë u Keeta seei ta kosi dee sëmbë fëen seei köndë taa: “Keeta sëmbë ta lëgëdë ta mindi soni ta ganjan sëmbë nöömö. De ta libi leti kuma mbeti u matu. De malëngë te de an ta du oto soni möön leki sindo njan nöo. Sö nöo de dë.”

¹³ Nöo fa di sëmbë taki dë, nöo leti sö dee Keeta sëmbë dë tuu. Na lëgëdë. Hën mbei baa i musu bai de taanga be de ta biibi a Masa Jesosi liba ku wan hati.

¹⁴ De an musu ta mëni dee kontu oto u dee Isaëli sëmbë möön. Söseei de an musu ta hoi dee wëti u dee sëmbë dee disa di Buka u Masa Gadu.

¹⁵ Biga ee wan sëmbë abi limbohata, nöo hii soni fëen dë limbolimbo kaa. „An dë faa hoi wëti ufö a dë limbolimbo.” Ma ee wan sëmbë aambi limbohata, nöo na wan soni fëen o dë limbolimbo möönsö. „Ee a hoi wëti seei an o heepi, biga hii pakisei fëen te dou ku ën hati tuu poi. Hogi bebe ën kaa.

¹⁶ Dee lö sëmbë dë taa de sabi Masa Gadu, ma i ta si a di libi u de taa na tuu seei. Hii libi u de bita da Gadu, biga de an ta piki di buka fëen. Fa de sai u de dë, de an abi fasi u du bumbuu soni möönsö.

2

Aki Paulosu lei Titusi fa faa musu ta lei dee peipei sëmbë dee dë a dee keiki.

¹ Ma baa o, i musu ta lei sëmbë fa u de libi kumafa Masa Gadu taki e.

² I musu lei dee gaan womi fu de ta hoi deseai fu de an du soni di an fiti. De musu dë a di fa u sëmbë sa lesipeki de. De musu abi taihati ta biibi Masa Gadu ku wan hati. De musu lobi sëmbë. De musu ta waka a Masa Gadu baka nöömö.

³⁻⁴ Nöo i musu toona lei dee gaan mujëe u de libi ku lesipeki fasi kuma sëmbë u Masa Gadu. De an musu ta waka ta lëgëdë ta kosi sëmbë. De an musu ta bebe win ku daan te de ko bebesonima. Ma de musu ta lei dee wëndjë mujëe mii fa fu de libi bunu. De musu ta lei de fa fu de lobi de manu ku dee mii u de.

⁵ De musu ta lei de u de libi a wan lesipeki fasi ku bumbuu pakisei. De musu ta lei de fa fu de dë ku limbo hati. De musu ta lei de fu de ta du mujëe soni ta sölugu dee sëmbë u de ta libi bunu ku de. De musu ta lei de fu de piki dee manu u de buka, ee nasö sëmbë o ta kosi di Buka u Masa Gadu taa an ta lei sëmbë bumbuu libi.

⁶ Nöo söseei i musu lei dee kijoo mii be de a' bumbuu pakisei ta libi a wan lesipeki fasi.

⁷ Nöo i seepi tu womi, i musu ta libi bunu a hii futu u sëmbë musu sa djeesi i e. Nöo fa i ta lei sëmbë di buka u Masa Gadu dë, nöo ja musu biëen möönsö, ma i musu ta lei de a wan tuutuu fasi ku limbo hati.

⁸ Di fan fii musu bunu fu te dee felantima fuu ta jei ën nöö de an o feni soni nëen u de sa kosi u. Ee de kosi u seei, ma de sen o kisi, biga di fan fii aan soni u sëmbë feni kosi.

⁹ Nöö i musu toona lei dee saafu be de piki di masa u de buka, be de ta libi a hii futu kumafa de masa kë. De an musu ta saanti de ta da de gaan buka.

¹⁰ De an musu fufuu soni u de tu, ma de musu libi be de masa futoou de a hii soni. Biga te de libi sö kaa nöö sëmbë o si, nöö de o gafa di buka u Masa Gadu taa di lei u di Heepima fuu a dë bumbuu soni.

¹¹ Wë biga fa u dë aki, Masa Gadu du hii libisëmbë wan gaan bunu. Biga fu di a abi bunuhati fuu nöö hën a manda Masa Jesosi ko a goonliba, faa puu u a di sitaafu di u bi o kisi a didibi faja.

¹² Nöö di Buka u Gadu u kisi dë, hën ta bai u a dee libi Gadu an lobi taa u musu kaba ku de. U musu kaba ku dee soni dee sëmbë u di goonliba aki ta hangi u de feni. U musu ta hoi u seei fu wa du soni di an fiti. U musu libi lesipeki fasi kumafa Masa Gadu kë fuu libi, hii fa u ta libi a di hogi ten u dë aki.

¹³ Nöö u musu dë a goonliba aki ku gaan wai a u hati seei ta mëni u Heepima Masa Jesosi faa toona ko a u. Biga di gaan makiti Gadu fuu dë o ko nöömö ku di gaan waiti fëen sinkii di ta sëndë kuma sonuwojo.

¹⁴ Hën da di sëmbë di dëdë a u kamian faa puu hogi a u hati buta u ko wanlö limbohati sëmbë fëen seei apaiti, dee ta biinga u libi bunu dëen.

¹⁵ Wë womi, hii dee soni mi ta taki da i aki tuu i musu tei ta konda da sëmbë e. I musu ta leti de ta biinga ku de fu de musu piki di buka u Gadu. Nöö te i ta fan ku de, nöö a musu dë a wan fasi fu de sabi taa Gadu hën manda i, nöö na wan u de o kosi i taa: “Di piki mii aki, andi a sabi?”

3

Aki Paulosu ta lei Titusi möön

fa faa lei dee sëmbë a di keiki.

¹ Nöö womi, i musu toona mëni dee sëmbë fii dë, u de musu ta saka deseeri a dee sëmbë basu dee ta tii di köndë e. De musu ta hoi dee wëti u di köndë tu. Nöö de musu dë kabakaba u du hiniwan bumbuu wooko de kai de u de du.

² Nöö de an musu ta kosi sëmbë e. De an musu ta buja ku sëmbë tu, ma de musu a' saapifasi ku lesipeki ta libi suti ku hii sëmbë.

³ Wë biga a fesi nöö söseei u bi a' söso pakisei tu. Wa bi kë piki na wan sëmbë buka, na u libisëmbë, na u Gadu seei. Hii pei hangi di dë a u libisëmbë hati, ku hii piizii u di goonliba aki tuu, bi ta ganjan u kisi buta a katibo. U bi ta dë nöömö ku di söso takuhati libi fuu dë, ta haun ku sëmbë ta buuse otowan, di otowan ta buuse u tu. Sö u bi dë a fesi.

⁴ Ma tefa juu dou hën Masa Gadu, di Heepima fuu, heepi u fu di a lobi u. A puu u fu wa kisi di sitaafu u didibi faja.

⁵ Ma na fu di u bumbuu mbei a heepi u sö e. Nönö. Ma fu di a' tjali fuu nöö hën a manda di Akaa fëen ko da u. Nöö hën di Akaa wasi di hati fuu puu hogi nëen. A da u wan njunjun hati, nöö hën u bia ko njunjun sëmbë kuma njunjun pai mii.

⁶ Nöö fa i si a da u di Akaa fëen dë nöö an pindjëen da u e, ma a da u ën tuu ku telu fu di Jesosi Keesiti, di Heepima fuu, bi tei dëdë fuu dëdë.

⁷ Nöö di soni mbei a da u di Akaa fëen sö. A da u ën ku ën bunuhati faa sa heepi u ko bunu ku ën, be u dë ku di sabi taa woo feni di libi fëen fu teego nöömö di a abi u da u.

⁸ Nöo womi, fa mi ta taki dee soni da i aki, tuutuu soni wë mi ta taki da i e. Fëen mbei i musu ta lei dee sëmbë dee ta biibi Masa Gadu naandë dee soni aki nöömö, be de buta deseei ku telu fu de ta libi bunu hiniwanten. Biga dee soni mi ta taki da i aki, nöo de dë bumbuu fan di sa tja heepi ko da sëmbë.

⁹ Ma ja musu sai dë kuma dee sëmbë dee ta fan sösö fan. De ta kai dee fesiten sëmbë u de në ta fia u de hedi. De toona sai dë ta fia ta buja a dee wëti u de liba möön. Dee lö fan dë an bunu. De aan heepi, nöo ja musu dë nëen.

¹⁰ Nöo womi, ee wan sëmbë ta konda wan oto buka te a ta puu sëmbë a di tuutuu lei u Gadu, nöo i musu bai ën be a disa e. Bai ën wan pasi. Di u tu pasi, ee an jei, nöo i disëen. Na hulu ën möön.

¹¹ Biga i sabi taa di lö sëmbë dë an kë waka a Gadu baka. Hogi nöo a ta du, nöo hënseei sabi sö tu.

Aki da kaba u di biifi.

¹² Wë nöo womi, mi o manda Atemasi ko da i, ee nasö mi o manda Tikikusi. Nöo te wan u de dou a i ala, nöo i musu biinga be i ko a mi a di köndë de kai Nikopolisi. Biga ala mi kë go pasa di kötö ten.

¹³ Nöo un musu mbei möiti da Apolo ku di afokati de kai Zenasi fu te de kumutu a unu naandë u de go a dee oto kamian nöo de musu feni hii dee soni de abi fanöudu a di waka u de.

¹⁴ Biga dee sëmbë fuu ta dini Gadu dë musu lei u de ta heepi sëmbë ta puu de a fuka. Ee nasö, libi u de an o a' heepi möönsö.

¹⁵ Söö. Wë nöo hii dee sëmbë aki tuu ta manda gaan odi da i e. U ta manda gaan odi tu da hii dee sëmbë ala dee ta lobi u fu di u ku de tuu ta biibi a Masa Jesosi.

Nöo na soni möönsö, womi. Masa Gadu musu dë ku unu ku ën bunuhati.

Di biifi u Paulosu di a manda da hën mati Filemon

Wan wöutu a fesi.

Wë nöö a di ten u di tjabukama u Masa Jesosi de kai Paulosu, nöö de bi ta bai sëmbë a wojowojo. Nöö di sëmbë di i bai dë, nöö a o dë saafu fii ta wooko da i. Fa a sai dë, soni fii seei a dë. An sa du fa a kë, an sa waka fa a kë tu ee na i dëen pasi.

Wë nöö Paulosu bi abi wan mati fëen de kai Filemon. Nöö Filemon bi abi wan saafu fëen de kai Onësimusi. Nöö hën de dë te wan pisi, hën Onësimusi fufuu soni fëen masa Filemon, nöö hën wë a fusi go. Hën a nango tee a go dou a di köndë de kai Loomë, nöö hën a go miti ku Paulosu a dunguwosu. Nöö hën Paulosu konda di Buka u Masa Jesosi dëen, nöö hën a piki di Buka ko ta waka a Masa Jesosi baka.

Nöö hën de dë te wan daka, nöö hën Paulosu kë toona manda Onësimusi go nëen masa baka. Biga na Paulosu abi di saafu. Filemon hën abi ën, hën mbei a o mandëen go. Nöö hën Paulosu sikifi wan biifi dëen mati Filemon te a kaba, nöö hën a da Onësimusi di biifi faa tja go dëen.

Nöö di biifi Paulosu sikifi dë, hën wë disi.

¹⁻² U lobi mati Filemon, mi Paulosu ku u baa Timoteo ta manda odi da i. Mati, fa i si i sai dë, wë nöö u ku i tuu ta wooko di wan kodo wooko da Masa Jesosi, nöö hën u ta mbei di pampia aki manda da i. Nöö ka i si mi ta mbei hën aki, nöö a dunguwosu mi dë, mati. De sötötö mi aki fu di mi ta konda di buka u Masa Jesosi.

Nöö u ta manda gaan odi da i, ku u sisa Apifia, ku Akipusi di u ku ën ta biinga ku di wooko u Masa Jesosi makandi, ku hii dee sëmbë u Masa Jesosi tuu dee ta miti makandi a i wosu naandë. De tuu u ta manda gaan odi da.

³ Fa un sai dë, u Tata Masa Gaangadu ku Masa Jesosi Keesitu musu limbo fesi da unu. De musu ta da unu böö.

⁴ Te mi ta fan ku Masa Gaangadu, nöö mi ta mëni i e, mati, ta dëen tangi nöömö da i.

⁵ Wë biga mi ta jei fa i ta biibi Masa Jesosi ku fa i ta lobi ën tu. Nöö mi ta jei tu fa i ta lobi hii dee sëmbë fëen e.

⁶ Nöö mi ta begi ën da i, taa te sëmbë si di bunuhati libi fii dë, nöö de musu ko sabi möönmöön taa sëmëni bunu soni dë u feni te u ta waka a Jesosi Keesitu baka.

⁷ Wë biga mi ta jei kumafa i ta lobi dee sëmbë u Masa Gaangadu ta puu de a fuka. Nöö te mi ta jei sô, nöö mi ta wai te na soni. A ta da mi hati seei.

⁸⁻⁹ Nöö hën mbei mi o begi i wan gaan soni aki, mati. Mi bi sa tei Masa Jesosi në bai i taa di soni mi o begi i aki nöö hën i musu du. Ma ma kë bai i, biga mi ku i lobi poi. Begi mi ta begi i. Fa mi dë aki, nöö mi da Paulosu. Mi dë wan gaandigaandi tata a dunguwosu aki fu Masa Jesosi Keesitu hedi. Nöö hën mi kë begi i a wan soni.

¹⁰ Mi kë begi i da di womi mii u mi de kai Onësimusi. Di soni mbei mi kai ën miii u mi. Ka mi dë a dunguwosu aki nöö hën a ko aki, nöö hën mi konda di buka u Masa Jesosi dëen. Nöö hën a piki di buka ko sëmbë fuu, hën mbei mi ta kai ën mi mii.

¹¹ Wë i saandi di në Onësimusi kë taki kaa. A kë taki “heepi”. Wë nõõ a fesi nõõ di womi an bi abi heepi da i, mati. Ma fa u dë aki mi ku i tuu sa feni heepi nëën, biga di poi poi pisi fëën pasa kaa.

¹² Nõõ mi ta toona mandëën ko da i. Nõõ fa a o kumutu a mi aki, nõõ hii pakisei u mi o dë nëën, biga a dë wan hati soni da mi.

¹³ Ma bi kë mandëën ko da i mõön seei. Mi bi kë hoi ën aki, be a ta heepi mi a i kamian ta sölugu mi ka mi dë buibui aki fu di buka u Masa Jesosi hedi.

¹⁴ Ma fu di di dë fëën aki an bi dë wan soni di mi ku i bi taki, nõõ hën mbei ma o hoi ën. Biga ma kë musu i fii heepi mi, mati. Ma ku i bunu pakisei nõõ mi sa kë fii du mi sō wan bunu.

¹⁵ Nõõ mi ko pakisei wan soni aki tu. Kandë di soni mbei a go disa i fu di wan pisiten dë, a go faa sa toona ko tan ku i fu teego.

¹⁶ Biga di sëmbë an dë sōsō saafu mõön e, mati. Fa u ku ën dë a Masa Jesosi së makandi aki, nõõ a ko dë wan hati sëmbë fuu. Mi feni ën fu mi womi mii, ma i seei feni ën a tu së. Wë biga a bi dë saafuma fii kaa a di së u wooko, bifō awaa a ko dë sëmbë fii a di së u Masa Jesosi.

¹⁷ Nõõ ee i sabi taa mi ku i dë makandi a di wooko u Masa Jesosi tuu, nõõ fa i si mi o mandëën ko da i dë, nõõ mi begi i be i limbo fesi dëën leti kumafa i bi o limbo fesi da miseei. Sō mi ta begi i, mati.

¹⁸ Nõõ ee a bi poi wan soni fii ee nasō a fufuu i, nõõ mi kë fii disëën ufō, nõõ te mi ko a i ala nõõ mi o paka i di paima.

¹⁹ Mi Paulosu seei ta sikifi di soni aki ku miseei maun taa te mi ko nõõ mi o ko paka i hiniwan paima di di womi abi a i. Nõõ na langi fu di i bi a' paima fii paka mi hedi e, mati. Na di paima dë soni u ta taki. Fa i jei di Buka a mi hën i feni di libi u teego dë, nõõ hën mbei mi taa mi a' paima a i fu tee mundu kaba. Ma nëën u ta taki aki. Di u tide nõõ hën nõõ u ta taki.

²⁰ Mi begi i, mati, fu di mi ku i tuu dë u Masa Jesosi, be i limbo fesi da di kijoo be mi wai.

²¹ Fa mi ta mbei di pampia aki, nõõ mi sabi kaa taa joo du ën nõõmō kumafa mi begi i. Nõõ joo du ën te pasa tu.

²² Nõõ mi kë begi i wan oto soni mõön. Mi kë hakisi i fii seeka wan kamba u di wosu fii da mi fu mi ko pasa daka ku i. Biga ka i ta begi Masa Gaangadu da mi tjika dë, nõõ mi a' di biibi taa a sa puu mi a dunguwosu aki nõõmō be mi ko a i ala.

²³ Epafasi dë ku mi aki. Hën seei dë a dunguwosu tu fu di a konda di buka u Jesosi Keesitu hedi, nõõ a ta manda gaan odi da i.

²⁴ Maikusi, Alisitakusi, Demasi, ku Lukasi, dee dë ku mi makandi a di wooko u Masa Jesosi aki, nõõ de tuu ta manda gaan odi da i taa de dë.

²⁵ Na soni mõönsō, mati. Masa Jesosi Keesitu musu limbo fesi da i. A tan sō.

Hebelejën (Di biifi u dee Isaëli biibima)

Wan wöutu a fesi.

Di biifi aki, de sikifi ën da dee Isaëli sëmbë dee ko ta biibi a Masa Jesosi. Nöo de an sabi ambë mbei ën, biga di sëmbë di mbei ën an sikifi ën në nëën. Nöo te i lesi ën te i kaba, i ta si kuma Paulosu hën mbei ën, ma a so kamian i ta si kuma nëën mbei ën.

Nöo dee sëmbë dee di biifi aki sikifi da, a djei kuma de an dë tifihedi ku di fa de ta dini Gadu kuma sëmbë u Masa Jesosi. De kë toona go möön a di awoo fasi de bi ta dini ën kuma Isaëli sëmbë. Biga de toona ta mëni kumafa de bi ta tja mbeti nango ta kii da Gadu kuma paima. De toona ta mëni dee begima u de kumafa de bi dë, nöo de ta kë toona go a dee awoo soni dë baka.

Nöo hën di di sëmbë di mbei di biifi aki jei sö, hën a kë u dee Isaëli biibima musu sabi taa dee soni u abi a Masa Jesosi fa u dë aki, de bunu gaanfa möön dee soni de bi abi a fesi. Biga an dë fuu paka paima u na wan soni möön. An dë fuu hoi dee peipei wëti u Isaëli möön tu. Fa Masa Jesosi dëdë da u dë, nöo hën da a paka hii paima da u kaa, nöo a puu u a dee Isaëli wëti basu. Hën nöo ko dë di Mindima fuu ku Gadu fa u dë aki, nöo a bumbuu gaanfa möön dee mindima u Isaëli dee bi dë a fesi.

Nöo sëmëni oto soni möön di sëmbë di mbei di biifi aki tei konda fuu sabi fa soni ko möön bunu da u a di ten u dë aki.

Aki di biifi seti.

¹ Wë dee sëmbë, u kë taki wanlö soni da unu aki. „A bi dë sö a fesi taa Masa Gadu bi ta manda dee tjabukama fëen u de musu ta fan ku dee fesiten sëmbë fuu. Nöo sëmëni pasi de bi ta fan ku de a peipei fasi.

² Ma nöo a di lasiti ten aki, nöo hën a manda di fëen seei Mii ko fan ku u awaa.

Wë nöo di Mii u Gadu u ta taki aki, a abi kaakiti e. „Biga di ten di Masa Gadu bi mbei mundu, nöo hën wë da di Sëmbë di a bi buta mbei hii dee soni tuu dëen. Nöo fa a sai dë, Gadu buta taa a o dëen hii soni faa abi de nëen maun.

³ Fa joo si di Mii u Gadu dë, dee sëmbë, nöo i musu sabi taa Gadu seei wë i si dë kaa e. Biga hii fa Masa Gadu dë, ku hii waiti di a abi, nöo sö nöo di Mii fëen naandë dë tu. Nöo di fan fëen di a ta fan abi kaakiti e, ta hoi hii soni u mundu tuu a de kamian be de an ta waka fanjanfanjan. Hën wë bi dëdë di dëdë wasi dee hogi du fuu puu a u liba da u tefa a kaba, nöo hën a go sindo fëen a di möön kaba hei kamian a di letimaun së u Gadu a liba ala.

*Di pisi aki ta konda fa Masa Jesosi hei möön dee basia
u Gadu Köndë.*

⁴ Nöo fa u ta fan aki, dee sëmbë, nöo nëen i sa si taa Masa Jesosi hei möön dee basia u Masa Gadu Köndë gaanfa. Wë biga di në di a kisi taa a dë di Mii u Gadu, nöo hën ta lei limbolimbo taa a hebi möön de tuu.

⁵ Wë biga na un juu ten Gadu bi kai wan u dee basia fëen köndë, mii fëen? Nönö, an bi kai de sö e. Ma di Mii fëen di u ta taki aki, hën nöo a kai sö. Biga a bi taki a di Buku fëen taa:
Tide mi tja i ko buta a lanti fesi e,
be de si i taa ju da mi mii,

mi da i tata.

Nöo hën a toona taki möön taa:
Awa a de o ko sabi taa mi da i tata,
nöo ju da mi mii.

⁶Nöo te Gadu o ta tja di Mii fëen ko a goonliba, nöo a di juu ten dë nöo a taa:
Be hii dee basia u mi dee dë a mi köndë tuu
ta lesipeki ën fu di hei di a abi.

Sö Gadu taki u di Mii fëen e.

⁷Ma di soni di a buta u de sikifi u dee basia fëen köndë, an hebi sö e.
„Futuboi u Gadu nöo de dë.” Biga di Buku sikifi taa:

Dee basia Gadu abi,
a ta buta de fu de musu sa waka kuma ventu.
A mbei de futuboi fëen,
kuma faja töngö sö nango ta ko kumafa a kë.
Sö Gadu taki u dee basia.

⁸Ma te a o taki soni u di Mii fëen, „nöo an ta mbei sipootu e. Gadu seei a kai
ën. Biga, a taa:

Di Könu bangi fii i sindo nëen dë, Gadu,
ja o kumutu nëen möönsö.
Joo dë Könu u nöömö.

Nöo di tii fii ta dë wan leti tii seei.

⁹Wë biga fa i sai dë,
nöo leti libi hën i lobi.

Ma hogilibi ja sa si a wojo seei.

Nöo fëen mbei Masa Gadu, di Gadu fii, hopo i.

A buta i hei möön hii dee otowan fii i ku de ta nama tuu.

Nöo fa a hopo i dë, nöo ku gaan piizii,
ku wai, a buta i a di hei dë.

Sö Gadu taki fëen mii.

¹⁰Nöo söseei a wan oto kamian u di Buku „a kai ën “Masa” di, a taa:
Masa, i wë seti di goonseu u di goonliba.

Dee soni dee dë a mundu ala,
nöo i wë mbei de buta sö e:
„dee teeja, libawojo, sonu, dee soni dë tuu,„
i wë tëmbë de sö.

¹¹Ma hii fa i si de sai dë seei,
de tuu seei o kaba a söso nöömö wan daka.

Ma i, joo tan u nöömö.

Fa i si de sai u de dë,
de tuu o ko gaandi kuma koosu.

¹²Joo doba de kumafa de ta doba awoo koosu tja go buta a wan kamian
fii toona tei otowan.

Sö de o tooka e.

Ma i, fa i sai dë, ja o tooka möönsö.

Joo dë fu nöömö.

Sö wë Gadu taki da di Mii fëen e, dee sëmbë.

¹³Ma na wan daka seei a taki sö da wan u dee basia fëen e. Söseei tu na wan
ten a kai wan u de wan daka taa:

Ko sindo a mi letimaun së aki
be mi mbei dee felantima fii saka a i basu
kuma wan bangi di i ta buta futu.

¹⁴ Ma nöö dee basia fëen, de dë futuboi nöö na akaa fasi. Wa ta si de ku wojo ma Gadu ta manda de u de musu ta wooko da u dee sëmbë fëen, dee a buta fuu feni hii di heepi fëen di a abi u heepi u.

2

Aki ta bai de taa di baka buka aki hebi möön di fosuwan.

¹ Wë nöö dee sëmbë, dee soni u Gadu u ko jei fa u dë aki, nöö u musu ta kõni nöömö be wa misi de e.

² Wë biga di buka di Gadu mbei ku u a bakaten aki, a dë wan hebi buka.

Wan sabi fa a bi dë di Gadu mbei di fosu buka ku Isaëli sëmbë nö? Dee basia u Gaangadu kõndë wë bi tja di buka dë ko, nöö a bi abi kaakiti e. Biga ee i misi wan piki pisi fëen seei, nöö i musu fu kisi ën sitaafu nöömö kumafa a fiti.

³ Wë nöö di gaan heepi Masa Gadu manda ko da u ku di baka buka di a mbei ku u aki wë? Ee u kai ën sösö soni, nöö na a möön hogi nö? Wë biga di aki sö, Masa Jesosi seei hën fosu tjëen ko konda da sëmbë, nöö dee sëmbë dee jei ën nëen, nöö hën de tei ën tja ko konda da u tu fuu jei.

⁴ Nöö fa de ta kondëen dë, Gadu seei dë ku de nëen. Biga a du sëmëni foombo soni a de liba ku sëmëni maaka u sëmbë musu si taa dee soni de ta taki dë, de dë tuutu soni. Dee pepei kõni u di Akaa fëen seei a paati da de kumafa a kë fu de musu abi, be sëmbë si taa a nama ku de a di buka de ta konda dë.

Sö di baka buka aki hebi tjika e.

Aki ta lei fa Masa Jesosi nama ku libisëmbë tjika.

⁵ Un boo luku di soni di u bi ta taki naandë, dee sëmbë. Fa di goonliba o pasa, njunjun wan o ko dë, nöö na a dee basia fëen kõndë maun Gadu o buta di njunjun goonliba naandë e. Nönö. „Ma a libisëmbë maun a o butëen.»

⁶ Biga wan sëmbë bi hakisi Gadu soni a wan kamian u di Buku taa: Ambë seei da libisëmbë di i ta mëni ën sö?

Ambë da wan libisëmbë mii di i a' pakisei fëen sö?

⁷ I bi mbei ën fu wan pisiten möön lagi möön dee basia fii kõndë.

Nöö hën i toona hei ën dëen nëbai möön hii soni.

⁸ Hii soni i buta nëen basu.

Sö Gadu Buku taki e.

Wë di Gadu buta hii soni a u libisëmbë basu kaa, nöö na wan soni fika di dë a u liba möönsö. Ma töku wa ta si taa a dë sö eti e.

⁹ Ma wan soni u ta si tuu o, dee sëmbë, taa fa u dë aki, wan Libisëmbë dë di ko feni di hei dë. Hën da Masa Jesosi. Leti kumafa di Buku taki dë, söseei Gadu bi sakëen fu wan pisiten buta möön lagi möön dee basia fëen kõndë. Biga di a ko dë a goonliba aki, a bi tja pena tefa a dëdë seei. Nöö a di dëdë fëen dë, nëen i sa si fa Masa Gaangadu abi bunuhati fuu libisëmbë tjika, dee sëmbë. Biga a mbei Masa Jesosi tei di dëdë fu hii sëmbë dëdë da u. Ma nöö baka u di dë hën a toona hopo ën, hën a dëen di möön hei në a mundu.

¹⁰ Fa Masa Gaangadu mbei hii soni dë, dee sëmbë, a mbei de fu de musu dë fëen seei. Nöö a bi abi nëen pakisei gaanduwe taa a o mbei sëmëni libisëmbë ko miii fëen. Nöö fu di woo dë miii fëen, nöö a o mbei woo dë a dendu u di hei ku di waiti di hën Masa Gaangadu abi. Nöö hën mbei a manda Masa Jesosi ko kuma wan Fesima, faa mbei pasi da u fuu feni di hei dë.

Wë nöö a bi fiti u di Fesima dë musu tja fuka e. Biga a sö wan fasi nöö Gadu bi sa seekëen faa ko wan kaba bumbuu fesima fuu. Nöö di sëmbë di i si Gadu buta faa heepi u sö dë, hën da Masa Jesosi e, dee sëmbë.

¹¹ Hën wë ta mbei u ko apaiti sëmbë gbelingbelin da Gadu söndö föutu. Nöö fa a ta heepi u tjika dë, u ku ën tuu ko dë di wan famii. Nöö fëen mbei sen an kisi ën faa kai u sëmbë fëen.

¹² Wan sabi fa a bi taki dëen Tata a di Buku nö? A taa:

Mi o ta konda soni fii da dee baaa u mi e.

Fa de o ta ko ta miti makandi dë,

mi o ta dë leti a de mindi naandë ta kanda ta kai i në ta gafa i.

„Wan si fa a kai u “baaa” nö?”

¹³ Nöö sösee i a fan kuma wan libisëmbë di, a taki soni u Gadu a di Buku taa:

Mi o buta futoou u mi nëen liba.

Hën a toona taki möön taa:

Luku e. Luku mi aki, ku dee mii dee Gadu da mi.

Sö a nama ku u libisëmbë tjika e, dee sëmbë.

¹⁴ Wë leti kumafa i si u dee mii a taki dë abi sinkii ku gadjabia, nöö sö hënseei ko abi sinkii ku gadjabia tu, faa musu sa dëdë kuma wan libisëmbë. Nöö di dëdë fëen dë, hën kaba di sëmbë a söso di ta tja dëdë ko. Hën da di didibi. Masa Jesosi booko ën kaakiti gbegedee, dee sëmbë.

¹⁵ Fa u bi dë a fesi ta fëëe dëdë a hii di libiten fuu dë, naandë u bi dë a katibo. Ma Masa Jesosi puu u a katibo dë mbei u ko dë fiifi.

¹⁶ Nöö dee sëmbë dee i si a heepi sö, na basia u Gaangadu köndë e, ma u libisëmbë wë, kuma un dee böngö fu Abahamu dë.

¹⁷ Nöö da sö i si taa Masa Jesosi bi musu ko dë a hii pei futu leti kuma dee “baaa” fëen e, dee sëmbë, faa sa dë wan tjalihati Mindima ta fan ku Gadu da u. Fa u dë aki, u ko abi wan futoou sëmbë ta wooko da Gadu. Hën seei bi paka da dee hogi du fuu, fuu sa ko bunu ku Gadu baka.

¹⁸ Biga fu di a bi dë libisëmbë, hën mbei a ko sabi dee fuka di wan libisëmbë abi. Dee sömëni soni ta biinga u hai u fuu du hogi, de seepi bi ta biinga u hai ën tu, tefa de dëen fuka. Nöö hën mbei a sa heepi u awaa te u dë a fuka e, dee sëmbë.

3

Aki ta lei fa Masa Jesosi hei möön Mosesi.

¹ Wë nöö dee sëmbë fuu dë, un dë sëmbë u Gadu apaiti e, biga a kai unu fuun ko sëmbë fëen köndë. Hën mbei mi taki e, taa un musu buta pakisei fuunu gaanfa seei a Jesosi liba. Biga hën da di Tjabukama u Gadu di a manda ko, ufö hën da di Gaan Mindima fuu ku Gadu a di biibi di u dë aki.

² Wë nöö un sabi fa de ta tei wan sëmbë buta faa tii sömëni hia sëmbë dee ta dë a wan gaan wosu dendu. Wë sö nöö Gadu bi buta Mosesi faa musu tii hii dee sëmbë fëen dëen, a di ten de bi dë a di sabana. Nöö Mosesi bi du di wooko a wan futoou fasi tuu, leti kumafa Gadu bi kë. Nöö hën a di bakaten aki, hën Gadu tei Masa Jesosi buta a di wooko dë, faa tii dee sëmbë fëen dëen, kumafa Mosesi bi ta tii de a fesi. Nöö a ta wooko di wooko a wan futoou fasi tu, kumafa Mosesi bi ta wooko.

³ Ma fa i si Masa Jesosi ko a di kamian dë, nöö a hebi möön Mosesi e. Nöö a abi möön nëbai tu. Wë biga hën da di Mii u di Sëmbë di, abi di wosu, nöö di Sëmbë di abi di wosu hën hebi möön hii dee sëmbë dee dë a di wosu tuu, na sö nö?

⁴ Nöö hiniwan wosu ta abi hën basi, ma di gaan basi a hii soni liba nöö hën da Masa Gaangadu.

⁵ Fa Gadu bi buta Mosesi futuboi fëen dë, nöö a bi wooko bunu tuu kumafa Gadu kë, ta tii hii dee sëmbë dee dë a di wosu dendu u Gadu. Ma hii fa a bi ta du dë seei, a bi dë wan peentje nöö fu lei u dee soni dee o ko a bakaten aki.

⁶ Ma „Jesosi„ Keesitu, fa a ko aki, nöö na wookoma u di wosu wanwan nöö a dë e, ma hën da di Mii seepi u di Sëmbë di abi di wosu. Nöö hën abi taki a hii di wosu.

Nöö dee sëmbë dee ta dë a di wosu u Masa Gaangadu dendu dë, nöö u wë e. Nöö fa u ko sëmbë fëen aki, nöö u musu biibi go dou söndö lasi hati. U musu dë ku wai ta mëni dee soni dee Gadu paamusi u taa woo feni. Nöö ee u dë sö kaa, nöö u sa dë sëmbë fu di wosu u Masa Gaangadu dendu seei gbelin.

Aki ta lei fa dee Isaëli sëmbë bi lasi di böö di Gadu bi o da de.

⁷ Dee sëmbë, wan jei fa di Akaa u Gadu bi bai u nö? A taa: Tide te un ko jei di tóngö u Masa,

⁸ nöö wan musu mbei taangajesi dëen e, kumafa dee sëmbë fuunu u fesiten bi mbei taangajesi dëen a di sabana, di ten de bi pooba Gadu luku.

De bi taanpu tuwë gogo a wan së taa de an dë a mi du.

⁹ Dee gaan sëmbë fuunu wë bi pooba mi sö e, hii fa de bi si dee gaan wooko dee mi bi du da de hii de föteni jaa longi.

¹⁰ Nöö hën wë mbei hati u mi bi boonu ku dee lö sëmbë dë.

Hën mi taa:

“Fa i si de sai dë, sö nöö u de.

Hati u de an ta fika ta mëni mi möönsö.

De an kë ko sabi möönsö fa mi ta libi ku de tjika.”

¹¹ Nöö fëen mbei hati u mi boonu ku de teee,

hën mi soi taa

na wan daka de o dou a di kamian möönsö, di mi bi abi u da de, ka de sa feni böö.

Sö Gadu taki e, dee sëmbë.

¹² Nöö hën mbei un musu mëni unu seei, dee sëmbë fuu dë, be na wan fuunu seei musu abi di lö hogihati di dee sëmbë dë bi abi. An musu dë taa wan kë biibi te un bia baka kumutu disa di libilibi Gadu.

¹³ Wan jei fa di Buku taki “tide” nö? Wë nöö un musu ta da unu seei taanga hibiwan daka u nöömö, wan musu wei, sö langa a dë tide eti. Ee nasö, nöö soni o ganjan i tja go a hogi së tee ja o a’ bisi ku Masa Gadu möön seei. Nöö an musu pasa sö ku na wan kodo fuunu e, dee sëmbë.

¹⁴ Ma ee wan sëmbë i ta hoi taanga a di biibi kumafa i bi seti ën tee go dou, nöö hën da u ku i tuu o ta njan di suti u di libi di „Jesosi„ Keesitu abi u da u.

¹⁵ Wë nöö un boo haika di soni di di Buku taki dë wan pasi möön. A taa:

Tide te un ko jei di tóngö u Masa, wan musu mbei taangajesi dëen e,

kumafa dee sëmbë u fesiten bi mbei taangajesi dëen.

¹⁶ Wë nöö ambë seei bi da dee sëmbë bi jei fa Gadu taki ma nöö de taanpu tuwë gogo taa de an dë nëen? Na dee sëmbë dee Mosesi bi tja kumutu a Egepiti köndë nö?

¹⁷ Nöö ambë da dee sëmbë Gadu hati bi boonu ku de föteni jaa longi? Wë na dee sëmbë dee bi du hogi te de kai dëdë fika a di sabana dendu ala nö?

¹⁸ Nöö ambë da dee sëmbë dee a bi soi da taa de an o dou a di kamian fëen ka de sa feni böö möönsö? Na dee sëmbë dee an bi kë piki ën buka nö? De wë e, dee sëmbë.

¹⁹ Wë nöö hën wë u ko si taa de an feni di böö di Gadu bi kë da de möönsö, fu di de an bi kë biibi ën hedi.

4

Aki ta lei taa Gadu abi wan böö u da u eti.

¹ Dee sëmbë o, wan jei fa Gadu bi paamusi dee sëmbë fëèn dë taa a abi wan böö u da de nö? Wë nöö di paamusi dë, a dë eti o. An tooka möönsö. Nöö fëèn hedi u musu ta köni fu na wan fuunu musu fika a baka te ja feni di böö dë.

² Wë biga de bi konda Gadu buka da u aki leti kumafa de bi kondëèn da dee sëmbë u di ten ala, ma töku an bi heepi de e, fu di de bi jei ma de an bi kë biibi.

³ Ma fu di u ko ta biibi ën aki, nöö u, u ta feni di böö dë.

Fa dee oto sëmbë dë bi sai dë, nöö a kai da de leti kumafa Gadu bi taki di a taa:

Hati u mi boonu ku de teee,

nöö hën mi soi taa de an o feni di böö di mi abi u da de möönsö.

Ma fa Gadu soi da dee lö sëmbë dë seei, ma di böö u Gadu hën a bi sai dë kaa. Biga sensi a fesiten di a mbei goonliba, nöö hii dee wooko fëèn tuu a bi seeka buta dë kaa, te dou ku di böö fëèn di a abi u da sëmbë.

⁴ Nöö Gadu seepi feni di böö dë kaa. Wë biga a wan pisi u di Buku de bi sikifi fa Gadu mbei goonliba a de sëbën daka dendu. Hën de taki wan soni taa:

A di daka di fu mbei sëbën,

nöö nën Gadu böö u hii dee wooko dee a bi wooko.

⁵ Nöö a baka u di dë ufö Gadu taki di soni u dee sëmbë dë taa:

De an o feni di böö di mi abi u da de möönsö.

⁶ Wë ma tökuseei di böö u Gadu a sai dë eti o, dee sëmbë, nöö sëmbë dë di o sa feni ën nöömö. Dee otowan dee u bi taki dë, nöö de an feni ën möönsö fu di de bi jei di buka ma de an kë piki ën.

⁷ Nöö hën Gadu toona buta wan oto ten möön fuu sa toona piki ën buka be u feni di böö fëèn, nöö hën da “tide”. Biga a baka sòmëni jaa fu di dee sëmbë bi mbei taangajesi dëèn, nöö hën a buta Dafiti faa fan di soni dë taa:

Tide te un ko jei di töngö u Masa,

nöö wan musu mbei taangajesi dëèn.

⁸ Wë nöö u sabi taa baka u di Mosesi ku dee lö sëmbë naandë dëdë, hën Josua ko nën kamian. Nöö hën tja dee Isaëli sëmbë go dou a Kaana naandë. Biga hën bi da di köndë di Gadu da de u de böö u hii di waka de bi ta waka a di sabana dendu. Ma nöö nën bi da di tuutuu böö u Gadu di a bi mëni u da dee sëmbë fëèn eti e. Biga ee hën bi da di böö fëèn kaa, nöö an bi o taki taa woo sa feni ën möön a wan oto ten.

⁹ Ma fa i si u dë aki, nöö wan böö fika eti da u dee sëmbë u Gadu.

¹⁰⁻¹¹ Nöö leti kumafa i si Gadu bi böö a di saba daka dë, nöö söseei di sëmbë di o feni di böö aki o böö tu. Nöö un boo biinga taanga e, dee sëmbë, boo feni di böö u Gadu. Biga na wan kodo fuu seei musu lasi ën fu di a dë taa piki wa kë piki ën mbei, kumafa dee sëmbë ala bi lasi ën. Un boo piki di fan u Gadu e, be u feni di böö fëèn nöömö di a abi u da u.

¹² Wë biga dee Wöutu u Gadu a ta fan, nöö kaakiti ku libi dë a de e. De dë leti kuma wan ufangi di dë saapusaapu selenselen a de tu së tuu, ta koti dee mindimindi u kamian te dou a di bonu dendu. Nöö sö di fan u Gadu dë e. Biga te i jei ën, nöö a ta koti nango tee dou a i hatiböö kisi i akaa. A ta buta i i ta kuutu dee fasi fii ku dee soni dee dë a i hati, luku ee de bunu ee de an bunu.

¹³ Nöö u sabi taa na wan kodo u dee soni Masa Gaangadu mbei dë tjubitjubi dëèn e, te dou ku libisëmbë hati seei. Hii soni tuu dë jabijabi hoo sö nën wojo a ta si. Nöö sö wan Sëmbë wë u musu piki e, dee sëmbë, a di fa u ta libi a goonliba aki.

Aki ta lei u taa Masa Jesosi hën da di Mindima fuu ku Gadu.

¹⁴ Wë ma nöö un boo toona mëni di soni di u bi taki, dee sëmbë. U abi wan Gaan Mindima a u ku Gadu mindi ta heepi u e. Hën da Jesosi di Mii u Masa Gaangadu, nöö hën bi pasa langalanga go dou tee a Gaangadu Köndë a liba ala.

Nöö fa u ko ta biibi dee soni fëen aki, nöö be un hoi go dou e.

¹⁵ Wë biga di Gaan Mindima di u abi aki, an dë taa an ta fii ku u tee wan soni taanga da u poi fuu musu du. A ta fii ku u o. Biga dee soni dee ta pooba u puu u a di pasi u Gadu aki, nöö hii de tuu bi pooba u puu ën tu di tén a bi dë libisëmbë a goonliba aki. Ma hën an bi du hogi wan daka möönsö.

¹⁶ Nöö hën mbei an dë fuu panta, dee sëmbë. Ma un boo go nëen waiwai go begi ën ka a dë nëen könubangi dë ta tii u ku ën bunuhati. Nöö a o abi tjali fuu, nöö a o ta heepi u a soni ku ën bunuhati te u dë a wan fuka.

5

*Aki ta lei fa wan mindima musu dë ku fa di wooko fëen
hebi tjika.*

¹ Wë nöö dee sëmbë, un sabi fa dee Isaëli sëmbë dee an nama ku Masa Jesosi eti ta du. De ta abi wan sëmbë di dë di Gaan Mindima u de ku Gadu, nöö di sëmbë dë a dë wan libisëmbë kuma deseei di de tei a de dendu buta a di wooko. Nöö fa a sai a di wooko naandë, nöö a ta tja peesenti go da Gadu. So juu a ta kii mbeti ta tjuma da Gadu tu kumafa di wëti taki, u paka paima da sëmbë fu dee hogi de bi du.

² Wë nöö sò wan mindima musu ta fii ku dee sëmbë dee a ta heepi dë e. Wë biga fa de ta misi di wëti u Gadu fu di de an bi fusutëen bunu ta kumutu a pasi dë, nöö söseee a sa miti ën tu.

³ Hën mbei leti kumafa i si a ta kii dee mbeti da dee oto sëmbë ta tjuma ta paka paima da de dë, nöö söseee a musu ta kii dëen seepi tu.

⁴ Nöö sò wan sëmbë an sa tei sò wan hei wooko buta nëen seei liba e, ee na Gadu hën kai ën nëen, kumafa a bi kai di fosu mindima de kai Alon.

⁵ Wë nöö söseee *„Masa Jesosi“*, Keesitu tu e, dee sëmbë. Fa a ko dë di Gaan Mindima fuu aki, nëen seei hei ën seei sò e, ma Masa Gaangadu hën butëen a di lö wooko dë. Biga wë un sabi di soni di Gadu bi taki dëen ala kaa taa:

Tide mi tja i ko buta a lanti fesi e,
be de sabi taa ju da mi mii, nöö mi da i tata.

⁶ Nöö a taki a wan oto kamian u di Buku taa:

Ju da wan mindima kuma Melikiseideki.

Nöö di mindima di i dë aki,

ja o kumutu nëen möönsö.

Joo dë nëen fu teego.

Sò Gadu taki e.

Aki ta konda fa Masa Jesosi

dë Mindima tjika.

⁷ Nöö di Masa Jesosi bi dë a goonliba aki *„nöö a bi tja fuka e. Nöö nëen a lei u fii ku sëmbë.“* Biga a go a Gadu ku gaan begi, ku bai kèë, ku wata a wojo seei, fu di a sabi taa Gadu nöö sa puu ën fu an musu dëdë di lö dëdë di a o dëdë naandë. Nöö Gadu jei di begi fëen tu, dee sëmbë. *„An puu ën fu an musu dëdë, ma a dëen taanga faa tjëen,“* fu di a sakëen seei nëen basu ku lesipeki.

⁸ Nöö sò u si taa hii fa hën Tata bi dëen taki fëen seei seei, ma a dee fuka dendu a lei u piki hën Tata buka a soni.

⁹ A di lö fasi dë wë a ko di möön gbelingbelin sëmbë u heepi u. Nöö fa u dë aki, hiniwan sëmbë di ta piki ën buka sa ko nëën awaa faa feni heepi nëën u teego.

¹⁰ Biga Gadu butëën Gaan Mindima fuu ku ën awaa. Nöö an dë mindima a di fa dee Isaëli mindima ta dë, ma a dë mindima a di fasi u Melikiseideki.

Aki ta lei ambë da gaan sëmbë a di biibi ku ambë da piki mii.

¹¹ Wë nöö fa u ta kai Melikiseideki në aki, dee sëmbë, hia soni dë nëën fuu sa taki e, ma a o taanga da unu fuun fusutan. Wë biga un malëngë u lei soni tumisi.

¹² Wë biga fu di juu ten di un ko a biibi, a bi longi tjika fu sonte un tuu bi sa bia ko leima ta lei otowan. Ma awaa seei un sai naandë eti fu sëmbë musu toona ta lei unu hii dee goonsei pisi u di woto u Masa möön, dee un bi musu sabi gaanduwe kaa.

Fa un sai dë, un dë leti kuma wan piki mii di ta bebe bobi eti. Wan sa njan bambuu njanjan eti.

¹³ Biga di sëmbë di ta bebe bobi, nöö hën da miii e. An ta fusutan di Buka u Gadu tjika faa sabi andi da leti libi ku andi da wogi libi a Gadu wojo. Biga piki mii nöö a dë eti.

¹⁴ Ma di gbelingbelin njanjan, nöö a dë u dee gaangaan sëmbë, dee bi ta guwenti u piki di Buka tee de ko ta sabi andi da hogi ku andi da bunu.

6

Aki ta kai dee fosu soni

dee wan biibima musu sabi.

¹ Wë dee sëmbë o, wan boo fika ku dee fosu pisi u di lei u Jesosi, Keesitu ta taki nango ta ko nöömö e, ma un boo go a dee möön fundu pisi awaa. Wan boo fika kuma miii, ma un boo ta lei nango te u ko gaangaan sëmbë a di biibi. Biga u bi sabi gaanduwe kaa taa u bi musu bia disa dee lö guwenti dee an heepi u fuu feni di libi u teego. U bi sabi kaa taa u musu ta biibi Gadu ta a' futoou nëën.

² U bi sabi andi ku andi dee dopu kë taki. U bi sabi faandi mbei de ta buta maun a sëmbë mindihedi ta begi. U bi sabi taa te u dëdë, nöö woo weki baka. U bi sabi taa Masa Gaangadu hën o kuutu hii soni buta fa de musu dë u teego.

³ Dee lö soni dë tuu u bi lei sabi gaanduwe kaa, nöö ee Gadu da u pasi nöö un boo go a dee otowan awaa e.

⁴ Wë biga ee wan sëmbë wojo fii bi limbo wan pasi kaa, i bi fusutan soni u Gadu nöö hën i sai dë bia baka disëën, nöö unfa dee lei dë o du heepi i möön? Biga i bi tesi di bunu di Gadu da u luku fa a suti kaa. I ku dee otowan fii bi njan di bunu u di Akaa u Gadu makandi.

⁵ I bi fii di wöutu u Masa Gaangadu fa a suti tjika. I bi sabi soni u dee kaakiti dee ta dë a di libi di o ko a baka.

⁶ Sö wan sëmbë ee i bia kumutu disa dee soni dë, nöö unfa de sa du toona heepi i möön fii bia libi baka toona ko a Gadu möön? De an sa heepi i e baa.

Wë biga a dë leti kuma i seei toona ta tei di Mii u Gadu tja go peka a di lakpa pau möön, buta naandë da hii lanti ta hoi a sipootu ta kosi.

⁷ Biga ee wan goon dë, nöö hën tjuba ta kai nëën hiniwanten faa sa feni wata kumafa a dë fanöudu, nöö njanjan o ko bunu nëën da dee sëmbë dee bi wooko ën. Sö wan goon, Gadu wë i si dë ku ën e.

⁸ Ma ee wan goon dë, nöö sösö baakamaka ku gaanwomihati nöö ta göö nëën, nöö di lö goon dë an abi na wan wojo heepi. A hogi poi. A fika u de suti

faja nëën tjuma puu dë. Nöo sö di sëmbë u taki dë, sö a dë. Nöo ee an mëni ën seei nöo di siba u Gadu o kisi ën e. A o kaba a sösö.

Aki a ta gafa dee sëmbë

a di fa de ta libi bunu.

⁹ Ma un dee lobi sëmbë fuu dë, hii fa u ta bai unu aki seei, ma na sö u sabi taa un dë e. Wë biga u ta abi mëni a unu liba sabi taa un ta libi wan möön bunu libi da Gadu, kumafa a fiti dee sëmbë dee feni di heepi u Gadu.

¹⁰ Nöo fa Gadu sai dë, an ta kuutu kõnku e, ma a ta kuutu leti a pasi. Nöo an o fëëkëtë dee bunu libi fuunu dee un ta libi naandë. A ta si fa un ta lobi ën ta heepi dee oto sëmbë fëën. Sö un ta libi nöömö.

¹¹ Nöo sö wë u kë tu e, dee sëmbë, fu hibiwan fuunu musu ta libi sö nango nöömö te dou. Biga te un ta libi sö kaa, nöo woon sabi gbelin taa woon kisi dee bunu u Gadu nöömö dee a abi u da u a bakaten.

¹² Fëën mbei wa kë fuun ko malëngëma e, dee sëmbë. Ma be un ta djeesi dee otowan nöömö, dee bi tai hati ta biibi tefa de feni dee soni dee Gadu bi paamusi de.

Aki ta lei taa te Gadu paamusi wan soni nöo an o bia.

¹³⁻¹⁴ Wë nöo dee sëmbë, un boo toona mëni di soni Gadu bi paamusi di gaan sëmbë fuu de kai Abahamu. A taa:

Mi taki da i gbelin taa mi o dë ku i ta heepi i,

nöo mi o mbei di böngö fi ko hia seei.

Sö Gadu bi taki da Abahamu. Wë nöo di ten a paamusi ën di soni dë, nöo ku soi a paamusi ën e. Nöo an dë taa a kai oto sëmbë në soi. Nönö. Ma hënseei në wë a kai soi taa a o du sö nöömö. Wë biga oto në an dë di hebi möön di fëën, faa tei soi nëën liba.

¹⁵ Nöo fa Gadu fan dë, hën Abahamu dë ta hoi pasensi ta luku di soni nöömö di Gadu bi paamusi ën dë, teefa a ko feni ën.

¹⁶ Wë biga sö a dë e, dee sëmbë. Te wan libisëmbë o soi, nöo a ta kai wan në di hebi möön di në fëën seei nöo a soi, fu di fan fëën musu a' gaan kaakiti. Nöo sëmbë an o sa feni soni u taki nëën liba möönsö, biga fa a taki dë, a tan sö.

¹⁷ Nöo fëën mbei di Masa Gaangadu paamusi dee sëmbë fëën taa a o da de di bunu fëën, nöo a taki ën ku soi. Biga a kë u de sabi taa di soni a paamusi dë an o kaba a mundu möönsö, a o pasa sö nöömö.

¹⁸ Nöo a ko dë tu soni u Gadu di an sa puu möönsö, di paamusi fëën ku di soi fëën. Nöo hën mbei hati fuu sa kötö gaanfa awaa e, dee sëmbë. Biga fa u kule go a Gadu fuu tei dee bunu a abi u da u, nöo u sabi taa an sa ganjan u. A o da u de nöömö.

¹⁹⁻²⁰ Nöo di sabi u ta sabi taa Gadu o da u dee soni a paamusi u dë, hën ta hoi hati fuu leti kuma wan hanka de tuwë fu hoi wan sipi faa tan pii a wan kamian. Nöo leti kumafa wan sipi hanka musu abi wan kamian ka a sa peka gingin, söseei di biibi fuu dë gingin a Masa Jesosi. Biga hën waka a u fesi kaa. A pasa di gaan kosu di bi tapa sëmbë fu de an sa dou a Gadu, hën a waka tololoo go dë leti ka Gadu dë ala, faa sai dë ta heepi u. Hën wë i si ko dë di Gaan Mindima fuu ku Gadu fu nöömö e, nöo a dë kuma Melikiseideki.

7

*Aki ta konda da u ambë da Melikiseideki ku fa hën
ku Masa Jesosi djei.*

¹ Wè nöö, dee sëmbë, fa u ta taki aki taa Masa Jesosi hèn ko dë wan mindima kuma Melikiseideki, nöö andi di dë kè taki? Wè Melikiseideki bi dë wan hebi sëmbë u fosuten. Hèn bi dë kõnu ta tii di kõndë de kai Salem. Nöö a bi dë wan mindima tu e, ta fan ku di möön hei Gadu u mundu da libisëmbë.

Nöö di juu ten Abahamu bi go feti ku dee kõnu u oto kõndë wini de tefa a toona ta ko, nöö hèn di Melikiseideki aki go miti ku èn a pasi. Nöö hèn a begi da Abahamu te a kaba kai di bunu u Gadu faa ko nëèn liba.

² Nöö hèn Abahamu paati dee gudu dee a wini a di feti a teni hipi, hèn a da Melikiseideki wan hipi fu di a bi dë Mindima u libisëmbë ku Gadu.

„Nöö sò i si Melikiseideki ku Masa Jesosi djei, biga de tuu abi di wan wooko.”

Nöö fa di në u Melikiseideki sai dë, un sabi andi a kè taki nöö, dee sëmbë? A kè taki “Kõnu fu Leti Libi”. Nöö fa a bi dë kõnu u di kõndë de kai Salem dë, nöö hèn da a dë “Kõnu fu Kötöhati” tu, biga “Salem” hèn da “kötöhati” a di tòngö.

„Nöö söseei Masa Jesosi dë di Kõnu u Letilibi tu, ku di Kõnu fu Kötöhati, biga nëèn dee soni dë ta kumutu.”

³ Nöö fa Melikiseideki sai dë, nöö wa jei tata fëèn, wa jei mama fëèn. Nöö de an sikifi fëèn tu ambë da gaan sëmbë fëèn, ambë da bakamii fëèn di a abi. De an sikifi disa da u taa a sò wan daka de pali èn ku sò wan ten a dëdë. Di mindima wooko fëèn di a bi dë, hèn nöö fika dëèn u nöömö, leti kuma di Mii u Masa Gaangadu.

⁴ Nöö luku fa di sëmbë naandë hei tjika. Biga hii fa Abahamu bi dë di möön hei gaan sëmbë fuu, ma tökuseei a da Melikiseideki hafu u dee gudu a bi wini a di feti. Sö Melikiseideki bi hei tjika e.

⁵ Wè nöö sò a dë a dee Isaëli wëti taa te i abi teni soni nöö di mindima o tei wan a i da Masa Gaangadu. Ma nöö di mindima u Isaëli, a musu dë fu di lö u Leifi, biga di lö dë nöö Gadu hei te a da de di wooko dë. Aluwasi fa hii Isaëli sëmbë seei dë Abahamu böngö, ma töku sëmbë u di lö u Leifi nöö ta tei soni a dee otowan.

⁶ Ma di Melikiseideki aki, hèn an bi dë böngö u Leifi möönsö e, ma tökuseei a bi tei soni a Abahamu hèn a kai di bunu u Gadu ko nëèn liba.

Wè nöö sò u ko si taa hii fa Abahamu bi kisi dee gaan paamusi a Gadu, ma Melikiseideki bi möön hei möön hèn.

⁷ Wè biga di möön hei sëmbë hèn ta kai di bunu u Gadu ko buta a di otowan liba, na sò nöö?

⁸ Wè nöö dee sëmbë, a di soni u taki aki u ko si taa de dë tu pei mindima ta tei soni a otowan: dee mindima dee dë a di lö u Leifi, ku dee dë kuma Melikiseideki. Nöö de tooka e. Biga dee u Leifi, de ta dëdë, ma di aki sò wa jei dëdë fëèn möönsö. Libi nöö fika dëèn u nöömö, kuma Masa Jesosi.

⁹⁻¹⁰ Wè nöö u sa taki wan oto soni möön tu kumafa Melikiseideki hebi tjika. Biga fa hèn ku Abahamu bi miti, a bi dëèn dee soni dë, nöö fuu taki nöö Leifi seei wè bi dëèn tu e, hii fa a bakaten hèn ko ta pii soni a dee otowan. Biga di ten dë de an bi pai èn eti, ma a bi dë a di böngö u Abahamu ta ko eti.

Aki ta lei u faandi mbei di mindima musu tooka.

¹¹ Wè nöö di soni u Abahamu di u ta taki aki, nöö a baka fëèn ufö Gadu ko buta di wëti taa dee sëmbë ta du di mindima wooko u Isaëli nöö de musu dë u di lö u Leifi. Nöö faandi mbei a di ten fuu aki wan oto pei mindima musu toona ko dë möön, kuma Melikiseideki baka? Andi mbei de an sa fika kuma de Alon go dou, dee dë u di lö u Leifi? Wè biga dee sootu pei mindima naandë, dee u Leifi, de an sa heepi u te u ko bumbuu sëmbë a Gadu wojo möönsö e, hèn mbei di mindima musu toona tooka baka.

12 Wë nöö ee di mindima tooka, nöö dee wëti dee nama ku ën seei musu tooka tu.

13 Wë nöö sö de tooka tuu e, dee sëmbë. Biga di Mindima fuu di ko a bakaten aki, hën an bi dë a di lö u Leifi möönsö kumafa di wëti bi buta. Ma hën bi dë u wan hii oto lö, nöö na wan sëmbë fu di lö dë bi ko dë mindima wan daka ta tjuma soni da Masa Gaangadu.

14 Biga wë hii u tuu sabi taa di Masa fuu an bi dë di böngö u Leifi e, ma a bi dë di böngö u Juda. Nöö fa Gadu bi da Mosesi dee wëti dë, nöö na Juda bi kisi di mindima wooko e, ma Leifi hën bi kisi ën kumafa u bi taki dë kaa. Ma töku awa wan sëmbë u Juda ko abi di wooko dë.

15 Nöö da sö u ko si gbelingbelin taa di wëti ko tooka e, dee sëmbë. Wan oto pei mindima ko awaa nöö hën an dë kuma dee otowan. Disi toona ko dë kuma Melikiseideki baka.

16 Nöö an kisi di wooko fu di a dë a di mindima lö, ma a kisi ën fu di di libi fëen abi sö wan kaakiti tee dëdë an sa kii ën möönsö.

17 Fëen mbei Gadu bi taki fëen a di Buku taa:

I dë wan mindima kuma Melikiseideki,
nöö di mindima wooko fii dë,
an o kaba möönsö.

18 Nöö da awa u ko si taa dee lö wëti dë ku hii di awoo fasi fa libisëmbë bi musu ta dini Gadu, de tuu kaba awaa e. Nöö di soni mbei de kaba, fu di de an bi abi kaakiti u sa heepi u.

19 Fa di lö fasi u dini Gadu dë bi sai dë, an bi sa mbei na wan sëmbë ko bumbuu a Gadu wojo möönsö e, dee sëmbë. Ma fa Gadu ko tookëen a baka aki, hën u ko abi wan möön bunu soni fuu biibi. Biga u sabi awaa taa u sa nango dou te a Gadu nöömö awaa.

Aki ta lei u fa Masa Jesosi tooka ku dee oto mindima möön.

20-21 Wë nöö, dee sëmbë, fa Jesosi ko dë u mindima aki, a tooka ku dee oto mindima a wan oto futu möön e. Biga dee otowan, na ku soi de bi ta buta de e, ma di i si aki hën ko dë mindima ku wan soi fu Gadu. Biga de bi taki fëen a di Buku taa:

Masa bi soi wan soi taa di mindima wooko fii dë an o kaba möönsö.

Nöö fa a taki ën dë, nöö an o tooka pakisei möönsö.

Sö di Buku taki e.

22 Nöö hën mbei u ko si taa di buka di Gadu mbei ku libisëmbë a bakaten aki, a dë möön hebi möön di a bi mbei a fesi. Biga di mindima u di buka aki, hën Gadu buta ku soi faa dë nöömö. Hën da Masa Jesosi seepi.

23 Fa dee oto mindima bi dë, nöö de bi dë te a hia e, fu di dëdë an bi ta da na wan u de pasi fu de tan a di wooko fu nöömö. Fëen mbei wë de bi ta tooka.

24 Ma di aki sö, Jesosi, hën a o libi u nöömö. Hën mbei di mindima wooko fëen o dë fu nöömö tu.

25 Fëen mbei tu, ee wan sëmbë i kë go dou a Gadu, nöö Masa Jesosi fii begi e. Biga hën sa heepi u te dou fu di a ta libi nöömö faa ta fan ku Gadu da u.

26 Wë nöö sö wan mindima u bi musu abi e, dee sëmbë, di dë apaiti gbelingbelin da Gadu söndö föutu. Fa a sai dë, na wan daka seei a bi du hogi kuma dee otowan e. Hën wë Gadu tja go buta te a di möön hei kamian u mundu ala.

27 Nöö fa a dë a di mindima wooko dë, nöö an dë faa musu ta du kumafa dee oto mindima ta du e. De, de ta kii mbeti da Gadu hiniwan daka baka na baka ta paka u dee hogi di deseeti ta du te de kaba, ufö de musu kii da dee oto sëmbë tu. Ma disa, wan kodo pasi tö a bi hopo hënseei da Gadu paka paima da libisëmbë fu nöömö.

28 Fa u dë aki, Isaëli wëti dë sō taa wan Gaan Mindima musu dë ta fan ku Gadu da de. Nöo te de o buta di mindima dë, nöo wan libisëmbë de ta tei buta. Nöo fu di a dë wan libisëmbë, nöo an ta abi kaakiti tjika möönsō faa libi söndö föutu a Gadu wojo e. Ma di Gaan Mindima di Gadu buta ku soi a baka aki, hën da di Mii feën seei. Nöo fu di a libi söndö föutu a goonliba aki, hën mbei a ko dë di kaba bambuu Mindima fuu ku Gadu u nöömö.

8

Aki ta taki soni u di wosu u Gadu ka Masa Jesosi ta wooko

a liba ala.

1 Wë nöo dee sëmbë, di mama u di soni di u ta fan aki dë sō taa u ko abi sō wan Gaan Mindima tuu, a u ku Gadu mindi. Hën da Masa Jesosi. Nöo di bangi feën ka a go sindo dë, a dë leti a di kaba hebima kamian a letimaun sê u Masa Gaangadu ka a dë nëen könubangi a liba ala.

2 Nöo fa Masa Jesosi dë di Mindima fuu dë, a ta wooko a di leti Wosu fu Gadu e, di gbelingbelin wan, nöo di wosu dë an dë kuma di de bi ta begi Gadu a di sabana ala. Biga fa dee gaan sëmbë fuunu bi hopo di wosu u Gadu a di sabana dë, nöo ku deseai maun de bi hopo ën. Ma di Wosu di u ta taki aki, Masa Gaangadu seei hopo disi.

3 Fa dee mindima u Isaëli sai dë, dee sëmbë, hibiwan u de de ta buta u de musu ta tja soni go da Gadu. So juu de ta tja peesenti go dëen. So juu de ta tja mbeti fu de kii tjuma u paka paima. Nöo sō nöo a dë a di Mindima fuu a liba ala, a Masa Jesosi, tu. Fa a sai dë, sō hënseei musu abi soni fu tja go da Gadu tu.

4 Ma nöo Masa Jesosi, ee a bi dë a goonliba aki, de an bi o dëen pasi faa dë wan mindima e. Biga dee u goonliba aki, de ta tja soni ta tjuma da Gadu kumafa dee Isaëli wëti buta. Ma di mindima wooko u Masa Jesosi, hën an nama a dee Isaëli wëti möönsō.

5 Nöo fa dee mindima u Isaëli ta wooko a di Wosu u Gadu a goonliba aki, nëen da di tuutuu Wosu u Gadu eti e. Ma a dë kuma wan peentje u lei fa soni dë a Gadu ala. Feën mbei wë Gadu bi bai Mosesi taanga di juu ten di a o mbei di fosu Wosu u Gadu a di sabana ala. A taa:
Mëni i seei bunu ku di Wosu di joo mbei dë,
fi mbei hii soni buta leti kumafa i si mi bi lei i a di kuun liba ala.
Di soni mbei a bai ën sō, fu di a kë u hii soni musu djeesi di fa soni dë a Gadu ala.

6 Nöo fa Masa Jesosi ta wooko di mindima wooko feën a Gadu ala, nöo di wooko di a feni dë a bambuu gaanfa möön di dee mindima bi ta wooko a di fesiten wosu u Gadu naandë. Wë biga di buka di Gadu mbei ku u a bakaten aki, a dë bambuu gaanfa möön di a bi mbei ku dee sëmbë u di ten dë. Masa Jesosi seei wë tja di baka buka aki ko da u e, dee sëmbë, nöo a paamusi u möön bambuu soni möön dee soni di oto buka bi paamusi.

7 Haika e, dee sëmbë. Ee di fosu buka di Gadu bi mbei ku dee gaan sëmbë fuunu a di ten u Mosesi bi a' kaakiti tjika fu sa heepi libisëmbë kumafa a dë fanöudu, nöo Gadu an bi o suku faa toona mbei wan oto buka ku u möön e.

8 Ma hënseei si taa di buka dë an heepi dee sëmbë fu de ko bambuu tjika. Biga a feni föutu a de di a taa:
Un haika e, woo dë te dou wan ten,
nöo mi o toona mbei wan njunjun buka möön
ku dee lö u Isaëli te kisi dee lö u Juda.

9 Ma di njunjun buka an o dë kuma di mi bi mbei ku dee gaan sëmbë u de.

Biga fa i si mi bi tja dee gaan sëmbë u de kumutu a Egepiti köndë ala, nöö mi bi tja de leti kumafa wan tata ta tja hën mii a maun. Sö mi bi tja de tjika. Nöö hën mi mbei wan buka ku de. Ma de an bi hoi di buka di mi mbei ku de dë e. Nöö hën wë mbei miseei bia baka da de tu. Sö Gadu taki.

¹⁰ Nöö hën a toona taa:

Di buka di mi o toona mbei ku Isaëli sëmbë a bakaten o dë sö taa mi o tja dee wëti u mi go buta a de fusutan. Tee a de hati dendu seei de o ta fii de. Nöö mi o ko dë Gadu u de awaa, nöö de o ko mi sëmbë.

¹¹ Nöö na wan sëmbë seei o dë ta buta ku di otowan fëen möön taa a musu ko sabi mi.

Na wan baaa o ta buta ku ën baaa sö tu.

Biga hii de tuu o sabi mi kaa, kumutu a dee möön gaan wan te dou a dee piki wan.

¹² Nöö fa de o ko sëmbë u mi dë, nöö mi o a' tjali u de, nöö ma o hoi dee hogi du u de a bëë möön. Ma o ta mëni de möön seei.

Sö wë Gadu taki e, dee sëmbë.

¹³ Wë nöö di fa a taki u di njunjun buka aki, nöö nëen u ko si taa aan toobi ku di fosu buka möön. Di ala ko gaandi kaa. Nöö di soni di i si ko gaandi, te wan pisi a o kaba fiaa. De an o dë nëen du möön seei.

9

Aki ta lei fa di wosu u Gadu

a di sabana bi dë.

¹ Wë nöö dee sëmbë, di Gadu mbei di fosu buka ku dee gaan sëmbë fuunu a fesi dë, nöö a bi da de dee wëti fëen, ku unfa de musu ta begi ën ta dini. Nöö söseei a lei de unfa u de mbei di wosu fëen a goonliba aki.

² Nöö di Wosu u Gadu dë, a mbei ku mbeti kakisa leti kumafa de ta mbei pelawosu sö, ma a abi tu kamba. Nöö a di fosu kamba fëen, nöö naandë di gaan lampu bi ta dë ta tuwë limbo a di wosu, ku di tafa di de ta buta bëëë apaiti da Masa Gaangadu. Nöö di kamba dë, hën de bi ta kai di Hebi Kamian u Gadu.

³ Ma nöö a baka fu di kamba dë, nöö wan oto kamba bi dë tu, nöö a paati ku di fosuwan ku wan gaan degi koosu, hebi wan. Nöö di baka kamba dë, hën de kai di Kaba Hebi Kamian fu Gadu.

⁴ Nöö hën abi di goutu tafa de ta buta dee sumëë suti soni de ta tjuma da Masa Gaangadu, ku di kédë di de ta kai di Kédë u di Buka.

Nöö fa di Kédë u di Buka bi sai naandë, nöö de tapëen ku goutu te lontu dou. Nöö a di Kédë dendu i abi di goutu paniki di de bi buta so u di bëëë di kumutu a Gadu de kai "mana", ku di kokoti fu Alon di bi nasi folo, ku dee paatapaata sitonu di de bi sikifi dee wëti u di Buka. Dee lö soni dë bi dë a di Kédë dendu.

⁵ Nöö a di Kédë liba i abi wanlö soni de mbei kuma dee libilibi soni dee ta dë a Gadu Köndë ala ku hanza, nöö de ta lei di waiti u Gadu fa a dë. Nöö dee hanza u de ta tuwë kötö a di Kédë tampa liba ka libisëmbë ta feni paadon a

Gadu. Ma nöö dee soni dë tuu, wa sa taki de finifini nöönou kumafa de bi dë e.

Aki ta lei fa de bi ta du a di fosu Wosu u Gadu.

⁶ Wë nöö di de seeka dee soni buta sö kaa, nöö dee begima nango hiniwan juu a di fosu kamba dë, fu de ta dë a di wooko ta dini Masa Gaangadu kumafa a dë fanöudu.

⁷ Ma nöö a di u mbei tu kamba dendu, naandë di Gaan Mindima nango hën wanwan tö wan pasi nöö a wan jaa dendu. Nöö fa a nango dë, na söndö buuu e. Biga a musu kii mbeti tei buuu lëmbë di Këdë faa paka da hënseei te a kaba, bifö a musu toona tei lëmbë paka da dee oto sëmbë fu dee soni de bi misi söndö de sabi. Sö di wëti bi dë kaa.

⁸ Wë nöö ku dee soni naandë di Akaa u Gaangadu bi ta lei limbolimbo taa sö langa di fosu wosu sai dë ku di gaan koosu di paati de tu kamba, nöö hën da di pasi an jabi eti fu sëmbë sa go dou a di Kaba Hebi Kamian ka Gadu dë.

⁹ Nöö fa u dë aki u ko fusutan wan oto soni tu. Hën da, fa sëmbë bi ta tja dee peesenti ko da Gadu dë ta kii mbeti dëen seei, ma dee soni dë an bi a' kaakiti tjika u seeka di sëmbë di ko begi Gadu a di fasi dë e, te hati fëen an ta latja möön u dee hogi a bi du. Na seei.

¹⁰ Biga dee lö soni dë, dee njanjan soni sö, soni u bebe, bamba sömëni pei fasi u wasi, de bi dë döösë soni nöö fu sëmbë ta du kumafa dee wëti taki. Ma töku wan ten bi o ko nöömö di hii dee soni dë tuu o kaba, njunjun wan o ko.

¹¹ Wë nöö fa u dë aki, di ten ko kaa e, dee sëmbë. Biga „Jesosi„ Keesitu hën tja di njunjun fasi ko fu dini Gadu, nöö bumbuu soni seei dë nëen dendu. Nöö Masa Jesosi seei da di Gaan Mindima u disi.

Aki ta lei fa de soni u tide djei dee bi dë a fesi, ku fa de

tooku ku deseei.

Fa Masa Jesosi ko dë Gaan Mindima fuu aki, dee sëmbë, hën an bi denda go a wan wosu di libisëmbë maun mbei e. Ma a go a wan möön bumbuu kamian, hebi wan, di an dë soni u goonliba basu aki.

¹² Nöö fa a go naandë, an tja mbeti buuu, kuma dee kaabita sö ku dee kau mii dee dee mindima u goonliba aki ta kii ta tja buuu. Nönö. Fëen seei buuu wë a tja e. Nöö a waka seei langalanga go tee go dou a di Kaba Hebi Kamian ka Gadu dë a liba ala. Naandë sö a go e, di wan kodo pasi dë tö.

Nöö di soni di Masa Jesosi du dë, dee sëmbë, an o dë faa du ën a bakafutu möön kumafa dee oto mindima ta du. Wë biga di buuu fëen di kai a goon di wan pasi dë, hën paka di paima fu nöömö fu hii dee hogi du fuu libisëmbë.

¹³ Wë un sabi fa dee mindima u Isaëli ta du kaa. De ta tei di buuu u kaabita, ku dee womi kau, ku di sindja u dee njönku mujëe kau dee de bi tjuma, nöö de ta lëmbë sëmbë ta puu sundju a de fu de musu sa ko limbo. Ma hii fa de ta du dë seei, ma di buuu dë an ta limbo de hati dendu e. Nönö. Döösë soni nöö de ta du dë.

¹⁴ Ma nöö di buuu u „Masa Jesosi„ Keesitu di a paka da u wë? An bumbuu gaanfa möön di buuu u dee lö soni dë nöö? Biga hën ta limbo u hati ta puu dee hogi a u hati dee bi ta paati u ku Gadu, fu wa mëni de möön seei. Hën mbei u sa dini di libilibi Gadu waiwai awaa.

„Nöö i abi wan oto fasi di di buuu u Masa Jesosi tooku ku di u dee mbeti de ta kii da Gadu dë. Dee mbeti ta paka de buuu söndö de sabi.“ Ma Masa Jesosi, ku ën seei kë wë a hopo ën seei paka da u. Fa a du dë, di Akaa u Masa Gaangadu di dë u nöömö, hën wë heepi ën faa du sö e.

„Nöo leti kumafa dee mbeti de ta kii dë musu dë telutelu söndö föutu, nöo sö nöo, Masa Jesosi bi dë söndö föutu tu. Biga an du hogi wan daka.

15 Fa Masa Jesosi Keesitu du da u dë, dee sëmbë, hën mbei Gadu sa toona mbei wan hii njunjun buka ku u libisëmbë. Biga Masa Jesosi dëdë paka puu u fu wan musu kisi sitaafu u hii dee hogi u bi du di ten u bi dë a di fosu buka basu. Nöo awaa u dee sëmbë dee a kai fu ko nama ku ën a di njunjun buka aki, u sa feni hii dee bunu tuu awaa dee a bi paamusi faa da u. Nöo dee bunu naandë, de an o kaba a mundu möönsö.

Aki ta lei u fa di buuu u Masa Jesosi abi kaakiti tjika.

16-17 Wë nöo dee sëmbë, dee Buka u Gadu u ta taki aki, de dë leti kuma te wan sëmbë o mbei buka ku i taa te a dëdë nöo joo feni dee gudu fëen. Ma di sëmbë dë, de musu sabi bunu taa a dëdë tuu ufö joo feni dee gudu fëen e. Biga ee an dëdë, nöo di buka di a mbei dë aan kaakiti eti.

18 Nöo söseei di buka bi dë tu, di Gadu bi mbei ku dee gaan sëmbë fuunu a fesi. An bi sa abi kaakiti ee na wan soni bi dëdë tuwë buuu a goon.

19 Biga di Mosesi konda hii di buka pispipi da dee sëmbë te a kaba kumafa dee wëti taki, nöo hën de tei kau mii buuu ku kaabita buuu hën de mökisi ku wata. Nöo hën de tei di uwii de kai “hisopu”, ku sikafu puuma di de bi bë, nöo hën de ta nama a di buuu ta lëmbë di buku di de bi sikifi di buka, ku hii dee sëmbë dee bi sai dë tuu te de kaba.

20 Nöo hën Mosesi fan ku de taa:

Di buuu aki sö, nöo hën sitampu di buka di Gadu mbei ku unu aki e, fuun musu hoi ën.

21 Nöo söseei de lëmbë di Wosu u Gadu tu. Hii dee soni dee dë a di wosu dendu dee de ta wooko ku de apaiti, de tuu de lëmbë ku di buuu e. Ee nasö, de an bi o dë limbolimbo a Gadu wojo möönsö.

22 Nöo a fika piki möön, nöo hii soni tuu musu limbo ku buuu. Biga sö di wëti taki kaa. Wë biga ee buuu an kai a goon, nöo Gadu an bi o sa puu sëmbë a bëë u di hogi de du, fu de an kisi sitaafu.

23 Wë nöo a bi dë fanöudu fu de ta kii dee mbeti dë e, dee sëmbë, ta tei di buuu ta seeka soni faa musu ko dë limbolimbo. Ma nöo hii fa de ta du dë seei, ma a dë kuma wan peentje nöo fii fusutan fa dee soni u Masa Gadu Köndë dë. Ma a Gadu Köndë afa wan möön bumbuu soni, hebi wan, bi musu dëdë paka fu de tei buuu fëen lëmbë soni. Ee nasö soni an sa seeka limbo tjika faa sa dë ka Gadu dë.

24 Nöo di wosu ka de nango ta begi Gadu a goonliba aki, nöo hën seei dë wan peentje fuu lei soni nëen tu. Biga hën ta lei u taa a sö wan gaan hebi kamian Gadu ta dë a liba ala. Nöo na a di wosu di libisëmbë maun mbei aki Masa Jesosi Keesitu go e, dee sëmbë. Nönö. Ma a go te a liba ala ka Masa Gaangadu seei ta dë. Nöo fa a go dë, fu u libisëmbë hedi wë e.

25 „Nöo Masa Jesosi ku dee Gaan Mindima u goonliba aki, de tooka a sëmëni soni. Biga dee disi, na de seei buuu de ta tja go paka e, ma hën a paka ku fëen seei buuu. Hën tu, an dë fanöudu fu Masa Jesosi musu nango ta ko hiniwan jaa, kumafa dee disi nango a di Kaba Hebi Kamian u Gadu ta ko. Nönö.

26 Biga ee sö, nöo fu sensi di ten di Masa Gaangadu mbei goonliba, nöo a bi o ta tja pena ta dëdë sëmëni pasi kaa, tee kisi fa u dë aki. Ma nöo an dë sö e. Wë biga a di mama u hii ten, nëen a ko di wan kodo pasi tö, hën a hopo ën seei da Gadu kuma wan paima, paka puu hogi du a u liba.

27 Dee sëmbë o, Masa Gadu buta taa hibiwan libisëmbë musu dëdë wan kodo pasi tö, nöo a baka fëen a o kai i a kuutu.

²⁸ Nöo söseei wë „Jesosi„ Keesitu dëdë wan kodo pasi tö. Nöo fa a dëdë dë, naandë Gadu kuutu ën da sitaafu, fu sëmëni sëmbe sa kumutu a di sitaafu de bi o kisi u dee hogi du u de. Nöo hën wë a toona go ka a bi kumutu, ma a o toona ko di u tu pasi e. „Ma nöo fa a o ko dë, na fa a dëdë paka da sëmbe u hogi du möön e, dee sëmbe. Nönö.“ Ma a o ko faa puu u dee sëmbe dee ta luku ën tja go ka gihilibi an dë möön.

10

Aki ta lei faandi mbei Masa Jesosi ko a goonliba.

¹ Wë nöo dee sëmbe, „leti kumafa u taki dë,“ dee soni dee dë a dee wëti u Isaëli bi dë soni u luku ku wojo nöo, fu sëmbe sa sabi fa dee möön bunu soni dee bi o ko a bakaten aki o dë. Ma de an bi dë dee tuutuwan u dee soni eti e. Fëën mbei dee mbeti de ta tja ko ta kii hiniwan jaa baka na baka nöömö naandë, de an sa heepi dee sëmbe dee ta ko ta begi Gadu a di fasi dë möönsö u de sa ko dë gbelingbelin sëmbe söndö föutu a Gadu wojo.

² Biga ee de bi sa heepi, nöo dee sëmbe bi o ko dë limbolimbo a Gadu wojo di wan pasi. An bi o dë fu de musu ta tja mbeti nango ta kii baka na baka nöömö. Hën tu, ee dee soni bi a' kaakiti tjika, nöo hati u dee sëmbe an bi o ta latja sö te de misi a wan soni, biga a bi paka kaa.

³ Ma an bi dë sö e. Fa dee sëmbe ta paka hiniwan jaa baka na baka dë seei, ma an ta puu dee hogi du u de a de liba möönsö. Ma a ta toona ta da de mënii nöömö fu dee awoo hogi dee de bi du. An ta kaba a de hati möönsö.

⁴ Wë biga di buuu u dee lö soni dë, dee womi kau, de kaabita sö, an tjika u sa puu hogi a sëmbe liba e, kwetikweti.

⁵ Nöo fëën mbei a di ten di Masa Jesosi ta ko a goonliba, hën a fan ku Gadu taa:

Dee soni dee de ta tja ko kii ta paka i dë,
na de wë i bi kë e.

Ma i seeka wan libisëmbe sinkii da mi,
„fu mi sa go du di soni di i kë awaa.“

⁶ Biga dee soni de ta kii ta tjuma ta da i tangi,
ku dee de ta tjuma ta paka paima u hogi du,
ja a' piizii ku de seei.

⁷ Nöo hën mbei mi taa:

“Wë luku, mi ko e, Gadu,

fu mi ko du di soni di i kë awaa.

Sö de bi sikifi u mi buta a di buku kaa.”

Sö Masa Jesosi taki e.

⁸ Wë ja jei fa a taki dë nö? Hii fa di Isaëli wëti buta da de taa de musu ta tja dee soni dë ko da Gadu seei, ma töku Masa Jesosi taa: “Dee mbeti dee de ta tja ko ta kii ta da i dë, ku dee peesenti dee de ta da i, ku dee de ta tjuma ta paka paima u hogi du, na de i bi kë. Ja a' piizii ku de.”

⁹ Nöo hën a toona taki taa: “Wë luku, mi ko fu mi ko du di soni di i kë awaa.”

Wë nöo sö i si taa Jesosi Keesitu puu dee awoo soni dee bi dë, buta di Gadu kë.

¹⁰ Nöo hën a ko e, hën a dëdë paka dee hogi du fuu da u ku ën seei sinkii di wan pasi dë fu nöömö. Hën wë da di soni Gadu bi kë e, dee sëmbe. Nöo hën mbei u sa ko dë gbelingbelin a Gadu wojo söndö föutu awaa.

Aki ta lei fa di paima di Masa Jesosi paka hebi tjika.

11 Dee sëmbë o, fa dee mindima u Isaëli dee ta taanpu ta du di wooko u de sai dë, nõö di wan paima nõö wë de ta tja ko hiniwan daka baka na baka naandë e. Ma an ta heepi möönsö u puu hogi du a sëmbë liba.

12 Ma di oto Mindima u ta taki aki, wan kodo pasi tō a tja wan paima go paka, nõö hën tjika fu nõömō fu paka dee hogi du fu hii u libisëmbë tuu. Nõö di a paka te a kaba, nõö hën a go sindo fëen a di kaba hebima kamian a di letimaun sē u Gadu.

13 Nõö kumutu a di ten dë, hën a sai dë ta luku fu Gadu musu booko dee felantima fëen saka buta nëen basu, kuma wan piki bangi i ta buta futu.

14 Fa a sai dë, an dë fa a hopo paka oto paima möön e. Biga di wan kodo paima dë, hën tjika kaa faa seeka hii u dee sëmbë dee dë apaiti da Gadu tuu. Fa a paka da u dë, nõö u ko seei gbelingbelin sëmbë a Gadu wojo kaa, nõö sō nõö woo dë fu nõömō.

15 Nõö di soni naandë wë di Akaa u Gadu bi taki a fesi e, di a taa:

16 Sō wan buka mi o mbei ku de a bakaten.
Mi o tja dee wëti u mi go buta a de fusutan.

Tee a de hati dendu seei de o ta fii de.

Nõö hën a toona taki möön, a taa:

17 Dee awoo hogi du u de, kumafa de bi booko dee wëti u mi,
ma o mëni dee soni dë möön seei.
Sō a taki e.

18 Wë nõö ka Gadu an ta hoi dee hogi du u sëmbë a bëë möön, nõö an o dë u paka paima möön tu e, dee sëmbë. Kaba u di soni di dë.

Aki ta lei fa Masa Jesosi

heepi de tjika.

19 Dee sëmbë u mi o, fa Masa Jesosi tuwë di buuu fëen a goon da u dë, hën wë jabi di pasi da u fuu sa waka fuu seei waiwai go dou leti a di Kaba Apaiti Kamian ka Gadu dë.

20 Biga di gaan koosu di bi tapa di pasi da u, hën an dë möön. Di sinkii u Masa Jesosi di de sitaafu tefa de kii ën dë, hën wë da di gaan koosu di tënë jabi da u fuu sa go dou a Gadu awaa.

21 Nõö fu di di pasi jabi da u sō kaa, u ko abi sō wan bumbuu Gaan Mindima ta tii u dee sëmbë dee dë a di wosudendu u Gadu, nõö an dë fuu panta e, dee sëmbë.

22 Ma un boo nango a Gadu ta begi ën ku limbohatai söndō ganjan. Un boo go nëen ku bumbuu biibi seei sabi taa an o jaka u. Wë biga di hati fuu lëmbë ku di buuu fu Masa Jesosi kaa. Fa u dë aki, an ta latja möön u dee hogi u bi du. Nõö di sinkii fuu seei, hënseei wasi ku wan limbolimbo wata, biga u waka a Masa Jesosi baka te u tei dopu.

23 Nõö fa u ta piki sëmbë taa woo feni bunu a Gadu a bakaten dë, dee sëmbë, nõö wan boo disa u biibi sō e. Ma un boo hoi gingin nëen. Wë biga di sëmbë di paamusi u di bunu dë, a dë wan sëmbë di u sa abi futoou nëen liba. An o ganjan u möönsö.

24 Nõö di u sabi sō kaa, nõö un boo buta mëni a di fa u sa du heepi u seei fuu libi bunu ta lobi u seei makandi.

25 Wan boo disa u ta miti makandi e, kumafa so sëmbë ta disa. Ma un boo ta ko makandi ta da u seei taanga nõömō. Di soni dë, a dë gaan fanōudu soni da unu e, fa un ko ta si taa di daka ta zuntu di Masa Jesosi o toona ko aki.

Aki ta bai de a wan gaan soni.

26 Nöo mi kë bai unu a wan soni möön e, dee sëmbë. Ee wan sëmbë i bi ko sabi dee soni u Masa Gaangadu, gbelingbelin wan kaa, nöo hën i ta du hogi ku sabi nango nöömö, nöo paima an fika da i möön e, di sa paka puu i fu ja kisi sitaafu a Gadu.

27 Fa i sai dë, nöo ku panta nöo joo ta dë ta luku di kuutu u Gadu di a o kuutu i, ku di gaan faja di i si o tjuma dee felantima fëën.

28 Wan sabi fa a bi dë a fesi nö, dee sëmbë? Ee wan Isaëli sëmbë i sösö dee wëti dee Gadu da Mosesi taa ja dë nëën, nöo i musu dëdë. Ee tu dii sëmbë si i, hën de konda taa sö wan soni i bi du tuu, nöo sëmbë an bi dë u sa puu i möönsö fu ja dëdë e.

29 Wë nöo unfa i mëni? Ee a dë sö taa di sëmbë di misi dee lö wëti naandë sa kisi sö wan gaan sitaafu, nöo ee wan sëmbë ta makisa di Mii u Masa Gaangadu aki ku basufutu wë? Na wan möön gaan sitaafu a o kisi ö? Biga a ta sösö di buuu di bi sitampu di Buka di Gadu mbei ku u aki, di buuu di bi limbo ën kaa. A ta sösö di Akaa u Gadu di ta libi ku u ku sö wan bunuhati. Nöo sö wan pei sëmbë i musu kisi wan gaan sitaafu.

30 Nöo di sitaafu di i si joo kisi dë, na libisëmbë o da i ën e. Biga u sabi ambë bi taki di soni dë taa:

Mi a fika da, fu mi toona paka dee sëmbë
dee ta du hogi.

Gadu wë taki sö e, dee sëmbë. Nöo a dë sikifisikifi a wan oto kamian u di Buku möön taa:

Masa, hën o kuutu dee sëmbë fëën.

31 Nöo a dë wan gaan soni u panta da tuutuu, fii musu ko kai a di libilibi Gadu maun fu hën musu sitaafu i.

Aki ta bai de fu de an musu

disa di biibi.

32 Dee sëmbë o, fa i si mi ta fan ku unu aki, un musu toona mëni di ten wojo fuunu bi ko limbo njunjun. De bi ta toobi unu seei ta fuka unu, ma tökuseei wan bi hai baka disa möönsö.

33 So juu de bi ta buta unu a lanti fesi ta da sen ta sitaafu. So juu oto sëmbë bi kisi dee lö sitaafu dë, nöo hën un taanpu ku de.

34 Un bi ta kusumi makandi ku dee otowan fuunu dee de bi tuwë a dunguwosu. Di ten di de bi tei dee gudu fuunu, wan bi kai ën gaan soni möönsö, ma un bi dë ku wai seei fu di un sabi taa un abi wan möön bumbuu gudu a Gadu ala di an o kaba a sösö möönsö.

35 Fa un bi dë fuunu ku kötöhati ku wai dë, nöo wan musu bia möönsö e, dee sëmbë. Sö nöo un musu ta dë nöömö, nöo woon feni gaan paima seei a Gadu.

36 Fëën mbei wan musu lasi hati e, ma be un tai hati go dou. Be un ta du kumafa Masa Gadu kë fuun ta du nöömö, nöo woon kisi dee soni dee a bi paamusi unu.

37 Wë biga fa u dë aki an o dë longi möön, nöo di soni de bi sikifi a Gadu Buku o ko pása taa:

Di sëmbë di bi taa a o ko, nöo a o ko tuu e,
a di leti ten fëën.

An o lati.

38 Nöo di sëmbë di biibi te a ko gbelingbelin a mi wojo,
hën o feni libi.

Ma ee i ta hai baka disa nöo ma o a' piizii ku i e.
Sö Gadu taki e, dee sëmbë.

³⁹ Ma fa u taki ën dë seei, ma wa dë a dee sëmbë dë dendu e, dee ta hai baka fu de go kaba a sôsö. Ma u dë a dendu u dee sëmbë ta biibi ën, dee a heepi te u feni libi nëën kaa.

11

Aki ta lei andi da biibi.

¹ Wë dee sëmbë o, di soni de kai biibi, andi dëën? Wë biibi hën da wan soni dë a i hati i ta mëni nöö i sabi gbelingbelin taa joo feni ën nöömö. Söseei tu, a dë wanlö soni ja ta si ma i sabi gbelingbelin taa de dë tuu. Hën wë da biibi e.

² Nöö di biibi dë dee gaan sëmbë u Isaëli bi abi, hën mbei de bi feni gafa.

³ Nöö u seei tu, fa u ta biibi aki, nöö hën mbei u ko sabi taa dee wöutu u Gadu wë mbei goon ku liba ku hii soni tuu. An dë taa a tei dee soni libisëmbë wojo sa si nöö hën a mbei de e, ma fan nöö a fan, nöö hën dee soni ko.

Aki ta taki soni u di biibi u Abeli.

⁴ Wë nöö un boo toona mëni fa so u dee fesiten sëmbë u Isaëli bi ta biibi Gadu.

Fa Abeli bi sai dë, nöö a biibi Gadu e, hën wë a tja wan paima go tjuma da Gadu di bumbuu möön di fëën baa Kain. Nöö di fa a biibi dë mbei Gadu tei ën fu wan bumbuu sëmbë te hënseei gafëën taa a tja wanlö bumbuu paima ko dëën. Nöö hii fa Abeli dëdë gaanduwe kaa, ma töku di biibi di a bi ta biibi dë mbei u ta lei soni nëën eti.

Aki ta taki soni u di biibi u Enöku.

⁵ Nöö söseei Enöku bi ta biibi Gadu, hën mbei Gadu puu ën a goonliba aki söndö dëdë kii ën. De suku ën te de wei, de an si ën möönsö, biga Gadu bi tei ën puu tja go faa. Ma nöö de bi ta taki sö fëën kaa bifö di soni dë pasa taa Gadu bi abi piizii ku ën te tjika.

⁶ Nöö sö e, dee sëmbë. An dë taa Gadu sa a' piizii möönsö ku wan sëmbë di an ta biibi e. Kwetikweti. Biga te wan sëmbë joo ko nëën, nöö i musu biibi taa a dë. Nöö söseei tu i musu biibi taa a ta paka dee sëmbë dee ta suku ën ku wan hati.

Aki ta taki soni u di biibi u Noa.

⁷ Nöö Noa bi ta biibi Gadu tu e. Hën mbei Gadu bi wasiköi ën fu dee soni dee o ko ma de an bi dë u si eti. Nöö hën Noa kisi lesipeki u Gadu, hën a mbei di gaan sipi faa tjubi dee sëmbë fëën wosu dendu fu de an dëdë a di wata. Nöö di fa Noa biibi Gadu dë, nöö hën puu gogo u dee otowan a döo taa de, de an bi kë biibi möönsö. Fëën mbei de kaba a sôsö. Ma Noa hën a fika ku libi e, nöö hën Gadu kondëën a dendu u dee sëmbë dee a ta tei u bumbuu sëmbë fu di de ta biibi ën hedi.

Aki ta taki soni u di biibi u Abahamu.

⁸ Nöö söseei Abahamu bi ta biibi Gadu tu. Hën mbei di Gadu kai ën faa musu kumutu a di köndë fëën go a wan oto köndë di a o kisi a bakaten, nöö hën a piki e. Nöö hën a tei pasi, hën a nango söndö faa sabi naasë a nango.

⁹ Nöö di fa a ta biibi Gadu dë, hën mbei tu aan toobi faa libi kuma wan wakama a di köndë di Gadu bi paamusi ën dë. Biga na a wan bëtë wosu a ta libi e, ma a ta libi fëën a wanlö mbeti kakisa wosu kuma pelawosu sö, hën ku dee böngö fëën, dee Isaki ku Jakopu. Biga de tuu abi dee paamusi u Gadu makandi.

¹⁰ Fa Abahamu bi ta sai fëën dë, nöö a ta mëni wan köndë eti di o ko, nöö di köndë dë o dë seei fu nöömö, kuma wan wosu de mbei ku bumbuu sitonu

posu. Nöo di Sëmbë di buta fa di köndë dë musu mbei, ku di Sëmbë ta mbei di köndë seei, hën da Masa Gaangadu.

¹¹ Fa Abahamu biibi Gadu tjika dë, hën wë mbei a kisi kaakiti faa sa pali wan mii, hii fa di jaa fëen faa pali bi pasa gaanduwe kaa nöo di mujëe fëen Sala seei tu an bi sa pali. Ma tökusee di pali e. Wë biga fa Gadu paamusi Abahamu wan mii dë, nöo Abahamu futoou ën fu di a sabi taa a dë wan sëmbë di i sa a' futoou nëen liba, nöo di soni a taki o ko pasa nöömö.

¹² Nöo hii fa i si taa a di së u pali miii, nöo a bi dë kuma wan dëdëdëdë sëmbë di na sa pali möönsö, ma töku a pali e. Nöo hën di wan kodo sëmbë dë hën ko abi bakamii te a hia kuma dee teeja a liba ala ku dee sandu sii dee dë a ze di na wan sëmbë sa konda.

¹³ Fa u ta taki soni u dee sëmbë aki sö, nöo de tuu dëdë bifö de feni hii dee soni Gadu bi paamusi de. Ma tökusee te dou a di dëdë ten u de seei, de ta biibi Gadu eti. A dë kuma de bi ta si dee soni te a longi ala, nöo de ta wai da de seei. Hii fa de ta libi a goonliba aki seei, ma de ta piki kodo taa de an dë u goonliba aki. Wakama nöo de dë.

¹⁴ Nöo ee wan sëmbë i taki sö kaa, nöo hën da i ta mëni wan oto köndë eti, di dë fii seei.

¹⁵ Ma nöo fa i si dee sëmbë bi ta mëni wan oto köndë dë, nëen da di köndë ka de bi kumutu e. Wë biga ee hën de bi ta mëni nöo de bi sa toona go nëen baka. Ma an bi dë sö.

¹⁶ Ma di köndë di de ta hangi fu de go naandë, nöo a dë wan möön bumbuu köndë di dë a Gadu ala. Nöo fëen mbei sen an kisi Masa Gaangadu faa taa a dë Gadu u de, biga a bi seeka di köndë dë da de kaa.

¹⁷⁻¹⁸ Nöo Abahamu fa a sai dë, a bi ta biibi Gadu tuu o. Biga di ten di Gadu poobëen luku, nöo a piki. An niinga u tja di wan kodo womi mii fëen dë go faa tjuma da Gadu kuma wan paima kumafa Gadu mandëen. Hii fa Gadu bi ta paamusi ën taa Isaki, di mii fëen naandë, hën o pai mbei böngö dëen, ma nöo an hoi di mii a baka möönsö. Ma a go u go du di soni di Gadu taki dëen.

¹⁹ Wë biga a kuutu ku ën hati taa ee a kii di mii seei, ma Gadu abi taanga tjika faa sa toona weki ën baka. Nöo ee fuu taki, nöo sö a pasa tu e. Biga Abahamu toona feni hën mii, Gadu puu ën a dëdë „buka” tuu.

Aki ta taki soni u di biibi

u Isaki ku Jakopu.

²⁰ Wë nöo söseei Isaki biibi Gadu tu. Nöo fëen mbei di a o dëdë hën a fan ku dee mii fëen, Jakopu ku Esau, te a kaba konda fa soni o waka ku de a bakaten. Hën a hopo maun a de liba fu Gadu musu limbo fesi da de.

²¹ Nöo Jakopu, sö a bi ta biibi tu. Hën mbei di a o dëdë, hën a hopo maun a dee mii u Josëfu liba tu, fu Gadu musu limbo fesi da de. Fa a bi gaandi dë seei te a ta hëngi a di kokoti fëen, ma töku a ta begi Gadu ta gafëen eti.

Aki ta taki soni u di biibi

u Josëfu.

²² Nöo söseei Josëfu biibi Gadu tu. Fëen mbei di a bi sabi taa a o dëdë, nöo hën a fan ku dee sëmbë fëen manda de taa te a dëdë nöo de musu tjubi dee dëdëbonu fëen, fu te de o toona go a de köndë nöo de tja de go ku de go bei. „Wë biga a bi ta biibi taa te wan daka Masa Gadu o puu dee Isaëli sëmbë fëen a Egepiti köndë nöömö kumafa a bi paamusi de, toona tja de go a de köndë Kaana baka.”

Aki ta taki soni u di biibi u Mosesi ku dee sëmbë fëen.

²³ Söseei di tata u Mosesi ku ën mama biibi Gadu tu e. Hën mbei wë di de pai ën, de tjubi ën dii liba a wosu dendu naandë. Hii fa di kõnu u Egepiti bi buta di wëti dë taa de musu kii hii dee njunjun pai womi mii u Isaëli sëmbë, ma de an fëëe u de booko di wëti dë. Biga de si taa di mii aki sô dë wan apaiti mii, nõo an musu dëdë.

²⁴ Nõo di juu ten di Mosesi ko bigi tjika, nõo hënseei ta biibi tu e. Hën mbei an kë fika a Egepiti kõndë dë ta tja di nè taa a dë miii u di mujëe mii u kõnu Falao mõön.

²⁵ Ma a ta kuutu ku ën hati taa a mõön bunu dëen faa saka go tja sitaafu ku dee sëmbë u Gadu makandi, mõön leki fa a sai ku dee sëmbë u Egepiti kõndë ta njan dee piizii u de, dee an ta kai ku Gadu. Fa dee lö piizii sai naandë, a wan ten nõo de o kaba nõömö, „ma dee u Gadu an o kaba mõönsö.”

²⁶ Nõo hën a sakëen seei tja sen e, fu di Heepima di o ko hedi. Biga a si taa di nama a o nama ku dee sëmbë u Gadu dë, nõo a mõön bunu dëen mõön dee hia gudu fu Egepiti kõndë. Biga a o kisi wan mõön bumbuu paima a Gadu a bakaten.

²⁷ Di fa a biibi Gadu tjika dë, nõo hën mbei wë a kumutu fëen a Egepiti kõndë. Aan toobi seei ee kõnu hati boonu ku ën, ma a go fëen fiaa. Nõo hën a hoi go dou leti kuma hënseei wojo ta si Gadu nëen fesi dë, di libisëmbë wojo an sa si. Biibi nõo a biibi taanga sô.

²⁸ Nõo baka u di dë, nõo fu di a ta biibi Gadu, hën mbei a buta dee Isaëli sëmbë fëen u de njan di daka de ta kai Pasika. A di daka dë, de bi kii mbeti tei nõngö lëmbë dee wosu dööbuka u de, fu di basia u Masa Gadu Kõndë an musu kii dee fosu womi mii u de „kumafa a o kii dee fosu womi mii u dee Egepiti kõndë sëmbë.”

*Aki ta taki soni u di biibi
u dee Isaëli sëmbë.*

²⁹ Nõo söseei tu, dee Isaëli sëmbë u di ten ala bi ta biibi tu e. Nõo fëen mbei de waka a di Bë Ze dendu pasa go dou a di oto së tela ala, leti kuma de dë a wan dëdëde goon ta waka. Ma di dee Egepiti sëmbë bi go u go waka a de baka, nõo hën de dëdë kaba a sösö fiaa a di wata.

³⁰ Nõo dee sëmbë u Isaëli dee ko a baka, nõo deseei biibi Gadu tu. Fëen mbei di de waka lomboto di kõndë de kai Jelikou sëbën daka, nõo hën dee sitonu peni ta tapa di kõndë dë booko holou kai a goon, hën de waka go tei di kõndë.

Aki ta taki u di biibi u Lakabu.

³¹ Nõo söseei di jajo mujëe de kai Lakabu di bi ta libi a di kõndë de kai Jelikou bi ta biibi Gadu tu e. Hën mbei di dee sëmbë u Isaëli puu sëmbë u go luku di kõndë ee unfa de sa booko ën, nõo hën di mujëe dë kisi dee sëmbë hoi tjubi nëen wosu. Hën mbei di de booko di kõndë, nõo de an kii ën kumafa de kii dee otowan dee an bi kë piki Gadu buka.

Aki ta lei fa sëmëni soni bi pasa fu di sëmbë bi ta biibi.

³² Wë andi seei dë u mi musu taki mõön, dee sëmbë? Wë biga di ten ko sati da mi kaa u mi musu konda da unu fa Gidion bi ta biibi, fa Baaki bi ta biibi, fa Simison bi ta biibi, fa Jefita bi ta biibi, fa Dafiti bi ta biibi, fa Samuëli ku dee oto fesiten tjabukama u Gadu bi ta biibi.

³³ Biibi nõo de bi biibi Gadu sô, nõo so u de wini kõndë, so u de ko hedima ta tii kõndë a wan leti fasi. So u de ta biibi tefa de kisi dee paamusi u Gadu dee a bi da. So u de biibi te de tapa di mbeti de kai lëun buka seei fu an njan de kii.

³⁴ So u de biibi te Gadu booko di kaakiti u faja saka da de, an tjuma de kii mõönsö. So u de, a fika piki de kii de ku sëufangi, ma di biibi de biibi Gadu

nöö hën puu de. So u de an bi taanga, ma di biibi di de biibi Gadu mbei de ko taanga. So u de bi kisi gaan kaakiti a feti dendu seei fu de feti go dou, hën de fon dee gaan hia sodati u oto kôndê tuu fiaa jaka de puu tuwê go.

³⁵ So u dee mujêe, dee sêmbê u de bi dêdê nöö de toona feni de baka e. Di biibi u de wê mbei de toona weki baka.

*Aki ta lei taa na hii biibima
ta kumutu a sitaafu.*

Ma fa i si u ta taki ên aki seei, ma na hii dee biibima tuu kumutu a sitaafu e. Biga so u de, dee hogihatima da de gaan sitaafu kii. De bi sa disa di biibi kumutu a di sitaafu, ma de an kê. Wê biga de sabi taa ee de dêdê seei, ma te de toona weki nöö de o feni wan mөөn bumbuu libi.

³⁶ So u de bi dê tifihedî a hii fasi, ee de ta mbei de fa, ee de ta kosi de, ee de ta fon de, ma de bi dê u de nöö. So u de, de tai ku bui tja go sөөtö a dunguwosu.

³⁷ So u de, de vînde sitonu naki de kii pii. So u de, de san koti puu a mindi. So u de, de kii ku sœufangi. So u de bi dê a sitaafu te de ko fika de wanwan tö ta bisi sikapu kakisa ku kaabita kakisa fu koosu u de. Pena nöö de bi pena sœ.

Sœ wê libisêmbê bi ta sitaafu dee sêmbê bi ta biibi dê tjika e, ta du peipei hogi ku de.

³⁸ So u de an bi a' tan kamian hën de go ta waka ta lontu a dee sabana kamian, a dee kununu liba, ta libi a dee sitonu baaku ku dee doti baaku. Fa i si dee sêmbê dê bi ta biibi Gadu ta tja sitaafu tjika dê, nöö dee oto sêmbê u goonliba aki an bi waiti tjika e, fu de ku sœ wanlœ bumbuu sêmbê musu nama seei.

³⁹ Wê nöö dee sêmbê u taki aki, nöö de tuu kisi gafa fu di de bi ta biibi Gadu hedi, dee sêmbê. Ma di soni di Gadu paamusi de, hën nöö de an bi feni eti a di libiten u de.

⁴⁰ Biga Gadu bi ta mœni wan mөөn bumbuu sondi faa du da u a di ten fuu aki. Nöö di a du ên kaa, nöö u ku dee sêmbê u taki dê tuu makandi sa ko bumbuu sêmbê gbelingbelin a Gadu wojo awaa sœndö föutu.

12

*Aki ta lei u fa fuu ta kule
a di pasi u Gadu.*

¹ Wê nöö dee sêmbê, fa u bi taki u dee hia sêmbê gidjii dê, nöö u musu tei hati a de e. Biga de da kotoigima ta lei u taa Gadu dê wan Gadu di u sa a' futoou nœen liba.

Boo taa di libi fuu a goonliba aki, u dê kuma te wan sêmbê ta fia kule faa wini wan paima. Sœ u musu kule bunu a di pasi di Gadu buta da u. Dee soni dee ta hebi u fu wa sa kule bunu, nöö u musu puu de a u sinkii tuwê. Sœseei tu, dee soni dee lo' u kisi u a di libi fuu ma de an ta kai ku Gadu, nöö u musu lusu de puu mbei de an kisi u tuwê. Nöö un boo tai hati e, dee sêmbê, ta kule a di pasi liba nœömö di Gadu maaka buta da u fuu kule nœen.

² Ja sabi fa a dê te wan sêmbê ta fia kule nö? A abi wan maaka tee nœen fesi ala di a ta luku nœömö faa kule tololoo go dou nœen. Wê sœ nöö u seei abi wan maaka tu e. Hën da Masa Jesosi. Nöö wa musu puu wojo nœen mөөnsö e. Biga hën da di Sêmbê di waka a u fesi kaa ta lei u fa fuu musu biibi, nöö hën da di Sêmbê ta seeka di biibi fuu tu, faa musu dê gbelingbelin a Gadu wojo.

Nöö di Masa Jesosi bi dê a goonliba aki, hênseei bi abi wan maaka nœen fesi tu di a bi ta biinga u dou nœen. Hën da di wai di a o wai a bakaten. Nöö fœen mbei aluwasi fa di sitaafu u di lakpa pau bi hebi dœen u tjai, ma tökusei a

tjëen e, dee sëmbë. An bi a' toobi ku di sen di de dëen naandë. Nöö hën a tja di sitaafu dë te a kaba, nöö hën a go sindo fëen a di kaba hebi kamian a di letimaun së u Gadu ala.

³ Wë nöö hën wë fuun ta mëni e, dee sëmbë, fa a bi tja sô wan gaan sitaafu a dee takuhati sëmbë maun. De bi ta biinga seei u booko ën saka ta fon mëen ku buka, ma nöö an piki. Nöö ee un dë ta mëni fa a tja di sitaafu dë tjika, nöö wan o lasi hati a dee fuka fuunu.

⁴ Wë biga fa un ta biinga dë ku dee soni dee an ta kai ku Gadu fu de an wini unu, nöö wan biinga „kuma Masa Jesosi eti e„ Biga na wan daka buuu kumutu a unu sinkii eti.

Aki ta lei fa u de musu luku

dee sitaafu dee de ta kisi.

⁵ Dee sëmbë o, fa un ta tja sitaafu dë, a sa kë un fëekëtë di fan Gadu bi fan ku unu fu da unu hati ö? A kai unu mihi fëen taa:

Mii o, di kiija Masa ta kiija i aki ta da i sitaafu, ja musu tei ën kuma wan sôsô soni e. Ja musu lasi hati te a ta gandji da i.

⁶ Wë biga di sëmbë di a lobi, hën wë a ta kiija.

Söseei di sëmbë di a tei ko mihi fëen, hën a ta sitaafu te a du hogi.

Sô Gadu taki e.

⁷ Hën mbei te un ta tja sitaafu, nöö un musu ta luku ën kuma Gadu hën ta kiija unu kuma wan tuutu mihi fëen. Wë biga unsë un sabi wan mihi di hën tata an ta kiija ta gandji da so juu?

⁸ Ma ee ja ta kisi kiija kumafa dee oto mihi u Gadu ta kisi, nöö hën da ja dë wan leti mihi fëen e, ma i dë oto tata mihi.

⁹ Wë un sabi fa a dë a goonliba aki, dee sëmbë. U ta abi tata aki di ta kiija u, nöö u ta lesipeki de, na sô nöö? Wë nöö di kiija fuu Tata a liba wë? Na u musu saka möön gaanfa dëen möön dee tata fuu u goonliba aki nöö? Biga Gadu hën ta kiija di akaa fuu, fuu feni libi u teego.

¹⁰ Nöö fa dee tata fuu u goonliba aki sai dë, de ta kiija u fu wan pisiten nöö, ku wan kiija di de ta mëni taa sonte hën sa bunu da u. Ma Gadu hën ta kiija ku wan gbelingbelin kiija seei. Biga a sabi taa sô wan kiija o heepi u fuu ko dë bumbuu kuma hënseei, söndö föutu a u libi.

¹¹ Nöö a dë sô tuu taa te i ta kisi sitaafu a di kiija liba nöö ja ta si ën kuma wan bumbuu soni da i, biga a ta hati i. Ma ee i tai hati tei di sitaafu dë, nöö a bakaten nöö joo si taa a mbei i ko ta libi a wan leti fasi a Gadu wojo, ku wan bööböö hati seei.

¹² Nöö sô e, dee sëmbë. Fa i si un ta tja sitaafu dë, nöö wan sindo dë gudjuu möön e. Ma un hopo taanpu be dee suwakisuwaki maun fuunu ku dee suwakisuwaki kini fuunu ko taanga baka.

¹³ Un musu ta waka tololoo a di pasi u Masa Jesosi e, ta koti ën ku sinkii tee a ko gbegedee. Nöö te dee sëmbë dee an bi sa waka taanga ta ko, nöö de o feni ën limbolimbo fu de waka, nöö de o ta waka a di pasi te de ko kisi deseeri.

Aki ta lei u fa wan biibima

musu libi.

¹⁴ Nöö awaa woo taki wantu soni u di fa un musu libi kuma biibima. Fa un sai dë, dee sëmbë, un musu mbei möiti be un ta libi fiifi ku hii sëmbë e. Un musu dë seei gbelingbelin sëmbë apaiti da Masa Gaangadu. Biga ee wan sëmbë ja dë sô, nöö ja o si Masa.

¹⁵ Nöo un musu köni tu, fu na wan fuunu musu lasi di bunu di Gadu kë da u ku ën bunuhati.

Nöo ee wan hogi soni bi pasa ku i, nöo ja musu hoi ën a hati faa fika dë mbei lutu e. Biga te fii sabi a sa ko wan gaan toobi soni da i ta poi sòmëni sëmbe libi.

¹⁶ Nöo be un köni tu e, mbei na wan fuunu musu libi a wan fanafiti fasi a di së u manu ku mujëe.

Nöo wan musu dë kuma di womi de kai Esau e, dee sëmbe. Biga Esau an bi a' toobi ku Gadu, nöo hën a du sösö te a lasi di leti a bi o abi kuma di fosu mii fëen tata. Hii dee gaan bunu dë tuu a sei fu wan kodo paabi baafu hedi.

¹⁷ Nöo un sabi taa a bakaten a bi toona kë ën, ma an bi sa feni ën möön. Hii fa a toona ta suku ën ku wata wojo ku këe seei, ma de an dëen möön. Biga a poi kaa.

Aki ta lei u möön fa di fesi buka ku di baka buka tooka.

¹⁸ De sëmbe o, fa un ko a Gadu aki, nöo an dë kumafa a bi dë a fesi e, di ten Gadu da Isaëli sëmbe dee wëti. A di ten ala de bi dou a wan gaan kununu u goonliba aki. Nöo di kununu ta kisi faja, kamian ko baaka dungudungu pii, gaangadu ta koti faja ta bai, hii mundu bi dë ku panta tee na soni.

¹⁹ De jei wan tutu ta piki, wan töngö ta piki a di kununu dë liba, ta fan ku de. Gadu wë ko ta fan ku de sö e. Nöo de fëeë seei tee na soni. Hën de begi Mosesi taa be di töngö dë an musu fan ku de möön, biga de an sa tjëen.

²⁰ Söseëi tu de fëeë di wëti taa na nama seei de musu go nama a di kununu dë. Ee wan mbeti seei go nama nëen, nöo de musu tei sitonu naki ën kii wante.

²¹ Hii dee soni dë bi dë wan gaan panta soni te Mosesi seei taa: "Mi ko fëeë tee sinkii u mi ta tëmë." A sö wan fasi Gadu bi da de di fosu buka e, dee sëmbe.

²² Ma fa un ko a Gadu a bakaten aki, nöo an dë sö möön e. Biga na a di kununu ala un ko. Ma un ko dou a di kununu de kai Sion di dë a Jerusalem dendu, nöo di Jerusalem dë, an dë u goonliba aki. Ma hën da di köndë u di libilibi Gadu di dë a liba ala. Un ko dou a dee gaan hila basia u Masa Gaangadu köndë dusudusu wan, ka de dë makandi ta wai tee na soni.

²³ Un ko mökisi a di keiki u Gadu, nöo hii u dee sëmbe dee dë a di keiki aki tuu dë kuma wan fosupai mii di o kisi di bunu fëen Tata a bakaten. Biga në fuu tuu dë sikifisikifi a liba ala kaa. Un ko dou a Masa Gaangadu seei, di Kuutuma di ta kuutu ku leti a hii sëmbe liba. Un ko mökisi ku dee akaa u dee sëmbe dee Gadu bi tei fu bumbuu sëmbe di de bi dë a goonliba aki, nöo fa u dë aki de ko dë söndö föutu tuutu awaa.

²⁴ Un ko dou a Masa Jesosi tu e, dee sëmbe, di tja di njunjun buka ko, di Gadu mbei ku u aki. Nöo un ko dou tu a wan buuu di ta taki wan möön suti soni da u möön leki di u Abeli di bi ta bai ta hakisi paima. Biga di buuu i si dë, ku ën de lëmbë u puu dee hogi du fuu a u liba mbei u ko limbo.

²⁵ Nöo fa Masa ta fan ku unu fa u dë aki, nöo wan musu mbei taangajesi dëen, dee sëmbe. Biga di a bi fan ku dee sëmbe ala ta bai de a soni, nöo a wan kununu u goonliba a bi dë ta fan ku de. Nöo ee de bi niingëen, nöo aan fa u de bi sa du te nöo de an bi o kisi sitaafu e.

Wë nöo ee sö a bi pasa di a fan ku de a di goonliba aki, nöo di ka a dë a Gadu Köndë ala ta fan ku u wë? An dë möön hebi nö? Nöo ee u bia baka dëen, nöo woo kisi wan möön gaan sitaafu seei.

²⁶ Di Gadu bi fan ku dee sëmbe a di ten ala, nöo di fan fëen bi seki di goonliba. Ma nöo fa u dë aki a ko paamusi wan soni taa:

Mi o ko seki goonliba wan pasi möön e, ma na goonliba wanwan mi o seki.

Goon ku liba tuu mi o seki.

Sô Gadu taki e.

²⁷ Nöo fa a taki “di wan pasi möön” dë, a dë sô taa hii dee soni dee dë u seki tuu o puu kai kaba a sôsô di wan pasi dë wante, dee soni Gadu mbei buta a liba ala ku dee a mbei buta a basu aki tuu. Nöo di soni mbei a o pasa sô, fu dee soni dee an sa seki kaba a sôsô nöo musu fika.

²⁸ Ma uu dë sëmbë u wan köndë di an o seki kaba a sôsô möönsô, nöo Gadu hën da di Könu u di köndë dë. Nöo di u sabi sô kaa, nöo un boo ta da Gadu tangi ta lesipeki ën gaanfa a wan leti fasi di fiti ën.

²⁹ Wan boo dë felantima fëën e. Wë biga di Gadu di u ta begi aki, a abi kaakiti tjika kuma faja faa tjuma hii poipoi soni kaba a sôsô fiaa.

13

Aki ta lei fa u musu libi.

¹ Dee sëmbë o, un musu ta lobi unu seei makandi nöömö kuma baa ku baa e, leti kumafa un ta du dë kaa.

² Nöo wan musu fëekëtë u kisi oto sëmbë hoi a unu wosu e. Wë biga sô wanlô sëmbë bi du kaa, nöo hën de bi tei basia u Masa Gadu Köndë gbolo söndö de sabi.

³ Nöo un musu ta mëni dee otowan fuunu dee dë a dunguwosu, leti kuma unu seei dë makandi ku de a dunguwosu dë tu. Söseei tu, ee so fuunu ta kisi sitaafu, nöo a musu dë da un dee otowan leti kuma unu seepi ta kisi di lö sitaafu dë tu.

⁴ Nöo di fa manu ku mujëë ta libi, a musu dë wan gaan lesipeki soni da hii sëmbë e. Wan womi an musu waka ku wan oto mujëë di an dë mujëë fëën a wosu, nöo söseei tu wan mujëë an musu waka ku wan oto womi di an dë manu fëën. Ee wan sëmbë i booko di wëti dë, nöo Gadu o kuutu i da i sitaafu e. Biga a o kuutu hiniwan sëmbë di ta libi a wan fasi di na fiti di fasi di a buta fu manu ku mujëë musu libi.

⁵ Fa un sai dë, dee sëmbë, wan musu lobi möni te a kisi unu buta nëën basu e, ma un musu ta tifihedu ku dee soni un abi kaa. Biga Gadu bi taki taa: Ma o disu i seepi, kwetikweti.

Na wan juu mi o disa i wanwan möönsô.

⁶ Nöo hën mbei u sa taki seei söndö panta a u hati taa:

Masa hën da mi Heepima. Ma o fëëë.

Andi seei wan sôsô libisëmbë sa du ku mi?

⁷ Nöo dee sëmbë o, un musu ta mëni dee fesima fuunu e, dee bi tja di buka u Gadu ko konda da unu. Un musu luku un wini de wini a di libi u de, nöo un ta djeesi de a di fa de ta biibi.

⁸ Jesosi Keesitu, fa a sai dë, an ta tooka e. Di fa a bi dë jeside ku tide, sô nöo a o dë u nöömö teego.

Aki ta bai de a wanlô njunjun lei sëmbë ta tja ta lei.

⁹ Nöo mi taki e, dee sëmbë, wan musu ta bia nango ta ko a dee sëmëni njunjun lei de ta tja ko ta lei unu naandë e. Biga de ta toona buta wëti a unu liba möön, kuma sô wan soni un musu njan mën a sô wan fasi. Nöo ee i hoi dee lö wëti dë seei, un heepi de abi da i? Döösë soni nöo de dë, ma de an sa tooka di hati fii möönsô. Ma di bunuhati u Gadu di a abi ta heepi u, hën nöo sa da u taanga fuu ko kumafa a kë.

¹⁰ Wë biga wan kamian dë ka de paka dee hogi du fuu da u kaa e, hën da di lakpa pau. Nöo di sëmbë di paka de da u, hën da Masa Jesosi. Nöo di paka dë an nama seei a soni u njan a wëti fasi e. Nöo dee sëmbë dee ta suku heepi

nöömö a dee awoo döösë wëti u Isaëli, de aan leti u de mökisi ku u a di kamian aki.

¹¹ Fa i si di Gaan Mindima u Isaëli bi ta tja di buuu u dee mbeti go paka a di Kaba Hebi Kamian naandë seei, ma tökuseei a döösë u di kampu ala de bi ta tja di mbeti sinkii go tjuma.

¹² Nöö söseei a bi pasa ku Masa Jesosi tu. A döösë u di köndë a go tja di sitaafu. Naandë a tuwë di buuu fëen paka di paima da u fuu ko limbo a Gadu wojo.

¹³ Fëen mbei, dee sëmbë, ee de ta luku u kuma wan döösë sëmbë fu di u ta biibi a Masa Jesosi liba hedi, nöö an musu bigi da u. Ma un boo go nëen ala a döösë u di köndë nöö, go tja sen ku ën makandi.

¹⁴ Biga u sabi taa dee köndë ka u ta libi a goonliba aki, de an o dë fu nöömö e, ma u ta luku wan oto köndë a Gadu ala di o ko, nöö hën o dë u nöömö.

Aki ta lei fa u musu libi möön.

¹⁵ Fa Jesosi paka di paima da u dë, dee sëmbë, nöö a dë fuu ta gafa Gadu nöömö. Biga te u du sö, nöö a o dë kuma wan suti peesenti u ta tja ko dëen ta dëen tangi. Nöö di lö peesenti dë, a fiti wi dee sëmbë dee ta piki taa u ku ën nama.

¹⁶ Nöö wan musu fëëkëtë u ta libi bunu ku sëmbë e, ta paati dee bunu dee un abi da unu na unu. Biga Gadu ta tei dee lö libi dë tu kuma wanlö peesenti un ta tja ko dëen, nöö a ta wai ku de seei.

¹⁷ Dee sëmbë o, un musu ta saka unu seei a dee fesima fuunu dee ta heepi unu a di biibi e. Te de taki wan soni da unu, nöö be un ta piki de buka. Wë biga de da dee sëmbë dee ta luku unu fu hati fuunu dë a Gadu nöömö, nöö te wan daka de o piki Gadu soni fëen. Hën mbei un musu ta piki de buka a soni, be de sa dë waiwai a di wooko u de. Wan musu mbei de dë fukafuka, biga ee nasö nöö an o tja bunu ko da unu tu.

¹⁸ Fa u dë aki, dee sëmbë, u si kuma u abi wan limbo hati, an ta toobi u a soni möön, nöö u kë fuun ta begi da u be u ta libi a sö wan leti fasi nango nöömö.

¹⁹ Nöö mi kë fuun begi da mi apaiti baa taa abiti möön mi o sa toona ko a unu baka. Sö mi kë fuun begi da mi e, dee sëmbë.

Aki di biifi ta tapa.

²⁰⁻²¹ Wë dee sëmbë o, Masa Gadu di nëen hii kötöhati ta kumutu musu dë ku unu e. A musu da unu hii dee soni un abi fanöudu fuun libi kumafa a kë. Biga fa a weki Masa Jesosi a dëdë dë, hën da a tei di buuu fëen kuma paima hën a sitampu di njunjun Buka a mbei ku u libisëmbë fu nöömö. Nöö hën a butëen faa kiija u kumafa wan Bumbuu Sikafuma ta kiija dee sikapu fëen.

Fa Gadu sai dë, nöö a musu ta seeka di libi fuu e, dee sëmbë. A musu mbei Jesosi Keesitu ta heepi u nöömö fuu libi fa a kë. Fa a sai dë, hën abi hii gafa ku hii nëbai fu nöömö teego. A tan sö gbelin.

²² Nöö dee sëmbë u mi dë, mi ta hakisi unu piimisi e, fu dee fan mi fan aki kuma wan lai sö fu da unu taanga. Di fan u mi satı, ma be un tei ën sö nöö kumafa mi sikifi ën dë.

²³ Nöö mi kë fuun sabi taa de puu u mati Timoteo, a dunguwosu e. Nöö ee a ko a mi a di ten aki, nöö mi ku ën o ko haika unu ala makandi.

²⁴ Un da dee fesima fuunu ku dee oto sëmbë u Gadu ala tuu gaan odi da mi taa mi dë. Dee otowan fuu dee ta biibi Masa a Italia köndë, de seei ta manda gaan odi da unu tu e.

²⁵ Masa Gadu musu tja unu tuu ku ën bunuhati. A tan sö.

Di biifi u Jakobosi

Wan wöutu a fesi.

Wë dee sëmbë, un haika e. Di biifi aki, nöö wan sëmbë de kai Jakobosi hën sikifi ën, nöö de si kuma a dë wan baaa u Masa Jesosi. Nöö hën an bi dë wan u dee Gaan Tjabukama u Masa Jesosi de ta kai apösutu, ma a bi dë hedima u keiki a Jelusalen. Nöö a mbei di pampia aki da dee biibima u Masa Jesosi dee paaja libi a dee kamiankamian. A konda da de taa di biibi a Masa Jesosi an dë wan soni faa dë a i hati i ta konda ku buka nöö a kaba, ma a musu dë u si a di libi fii.

Aki di biifi seti.

¹ Ku di pampia aki mi, Jakobosi, ta manda gaan odi da un dee sëmbë u dee tuwalufu lö u Isaëli dee paaja libi a dee kamiankamian u goonliba, dee tei di biibi a Masa Jesosi. Fa mi ta fan ku unu aki, nöö mi da wan u dee futuboi u Masa Gadu ku ën mi Masa Jesosi Keesitu.

Aki Jakobosi ta konda da dee sëmbë fa u de libi te soni miti de.

² Wë nöö dee sëmbë, te soni miti unu a peipei futu nöö an musu bigi da unu poi e, ma wai un musu ta wai.

³ Biga hën da Masa Gadu ta tesi unu ta luku ee woon biibi ën go dou. Nöö te bakaten nöö joo si bunu fëen nöömö, biga ee ja disa di biibi i ta biibi nëen, nöö joo ko a' degihati fii hoi go dou.

⁴ Nöö di fa joo ta hoi pasensi ta tja dee sitaafu dë, nöö hën o puu föutu a i buta i ko wan gbelingbelin sëmbë a Gadu wojo.

⁵ Dee sëmbë o, ee wan sëmbë i si taa ja a' fusutan tjika a soni, nöö i musu begi Gadu faa da i fusutan e, nöö a o da i ën. An o tei i u hogi biga a lo' u da sëmbë bumbuu soni.

⁶ Ma nöö te joo begi, nöö i musu a' di biibi a Gadu taa a o da i di soni i ta begi ën naandë nöömö. Ma ee i ta panta kuma an sa da i ën, nöö i dë kuma sekiwata nango ta ko. Tide i biibi dïsi, amanjan i biibi di dë.

⁷ Nöö sò wan sëmbë ja musu a' di mëni taa ee i begi Gadu soni nöö a o da i ën.

⁸ Biga i dë ku tu hati, ja ta fika a wan kamian.

⁹ Nöö un dee pooti sëmbë dë a unu dendu dë, un musu ta wai e. Biga un bi dë möfina sëmbë, ma fa u dë aki un ko dë nëbai sëmbë a Gadu wojo.

¹⁰⁻¹¹ Söseei tu, un dee guduma musu ta wai tu, fu di un saka unu seei te wan dë a dee gudu fuunu basu möön.

Biga ee i gudu seei, i dë kuma wan folo ta jabi a mamate a hanse tee na soni, ma te di sonu jabi te sapate nöö di waiti fëen kaba kaa. Te wan pisi a puu kai a goon, a pondi. Nöö sò ta pasa ku dee guduma dee ta dë a gudu baka. De ta mbei möiti ta booko hedi ta wooko, tee wan pisi de dëdë go faa. Ja jei soni u de möön.

¹² Haika e, dee sëmbë. Ee wan sëmbë nöutu ko miti i a di biibi ma nöö i tai hati te di nöutu dë ko pasa, nöö di sëmbë dë i naki gaan kölöku e.

¹³ Biga Masa Gadu abi wan paima nëen köndë faa da i, hën da di libi u teego di a paamusi dee sëmbë dee löbi ën.

Ma nöö ee wan sëmbë hati fii ta manda i fii du hogi, nöö ja musu taa Masa Gadu hën manda i e. Biga leti kumafa Masa Gadu seei an ta pakisei faa du hogi, nöö söseei an o manda i fii du hogi tu.

14 Ma te i si wan soni ta manda i fii du hogi, nöö i musu sabi taa dee taku hangi dee dē leti a i hati dē, de wē ta hai i fii du di hogi e.

15 Nöö di taku hangi dē, te a göö ko bigi kaa nöö a ko toon hogi du, nöö hogi du hēn ta tja dēdē. *„Biga hēn ta paati sēmbē ku Gadu.“*

16 Wē nöö dee lobi sēmbē u mi dē, na mbei sēmbē ganjan unu e.

17 Fa hii soni ta ko a u a di goonliba aki, nöö dee bumbuu wan dee ta tja heepi ko, nöö de nöö Masa Gadu ta manda da u. Hēn wē mbei di sonu ku di libawojo ku dee teeja tuu dee ta tja limbo ko. Ma hii fa dee soni dē ta tooka nango ta ko, ma hēnseei an ta tooka möönsö. Fa i si a sai dē, nöö sö a ta dē nöömö. *„Hēn mbei ja musu pena mēni ēn a hogi du, biga di bumbuu fasi fēen an ta tooka möönsö.“*

18 Nöö Gadu abi bunuhati fuu tuu e, dee sēmbē. Biga a bi abi di pakisei nöömö faa heepi u ko sēmbē fēen, fuu feni wan njunjun libi. Nöö hēn a manda di buka fēen ko da u di ta lei u soni gbelin kumafa a dē a Gadu. Nöö fa u ko sēmbē fēen aki, hēn mbei fa u dē aki u ko dē a fesi u hii dee soni dee a mbei.

Aki Jakobosi taki da de taa de an musu haika di Buka nöö,

ma de musu du fa a taki tu.

19 Nöö wan soni un musu sabi, dee lobi sēmbē u mi dē. Hēn da wan musu hesi u taki soni tumisi e, ma un musu hesi u jei soni. Sōseei hati fuunu an musu lo' u boonu hesi tu.

20 Biga di hatiboonu u wan libisēmbē an ta heepi i fii libi di leti libi di Gadu kē e.

21 Nöö ee un kē libi kumafa Gadu kē, nöö un musu disa hii dee peipei fanafiti libi. Un musu kaba ku dee hogihati libi u di ten u dē aki, nöö un bia ko a' sakafasi ta mēni di Wōutu u Masa Gadu di a bi paandi a unu hati. Biga di Wōutu fēen abi kaakiti tjika u puu unu a hii dee lö hogilibi dē.

22 Nöö un haika, dee sēmbē, wan mbei hati fuunu ganjan unu. Wan musu ta haika Gadu Wōutu nöö a kaba e, ma un musu ta du dee soni dee di Wōutu ta manda u fuu du.

23 Biga ee wan sēmbē i ta haika Gadu Wōutu nöö ma ja ta du dee soni a ta taki da i fii du, nöö i dē leti kuma wan sēmbē di luku ēn fesi a sipei te a kaba hēn a hopo go fēen.

24 Nöö fa a go dē, hēn a fēekētē fiaa fa ēn fesi bi dē.

25 Ma ee wan sēmbē i ta jei di Wōutu nöö i toona ta pakisei dee soni i jei dē nöömö te nöö i hopo go du kumafa i jei ēn dē, nöö dee soni i ta du dē tuu o tja i a bunu liba. Biga dee wōutu u Masa Gadu dē gbelingbelin söndö föutu, nöö de ta puu u a hogilibi basu fuu feni böö.

26 Nöö ee wan sēmbē i taa i ta dini Gadu, ma ja sa hoi i buka fu ja taki soni di an fiti, nöö di sēmbē dē, ganjan i ta ganjan i seei e. Na Gadu i ta dini. Sösö i ta du.

27 Biga di leti fasi fii dini Gadu u Tata, nöö hēn da disa: i musu ta heepi dee sēmbē dee dē fanōudu fii heepi, kuma dee mii dee na a' gaan sēmbē u sölugu de, ku dee mujēē manu dēdē disa de. Nöö i musu hoi i seei fu ja mökisi ku dee soni u di goonliba aki de na bunu a Gadu wojo. Nöö ee i libi sö, hēn da i ta dini Gadu a wan gbelingbelin fasi e, dee sēmbē.

2

Aki Jakobosi ta bai de taa de an musu hei sēmbē möön sēmbē.

1 Wē dee sēmbē o, un haika e. Unu da biibima u Masa Jesosi Keesitu, di gaan nēbai Masa u mundu. Nöö wan musu hei wan sēmbē möön wan.

² Biga ee tu sɛmbɛ ko a di keiki fuunu, nɔɔ hɛn wan u de bisi fiafia koosu buta goutu andelu a finga nɔɔ di otowan bisi tɛnɛtɛnɛ koosu,

³ nɔɔ hɛn un fan ku di guduma ku lesipeki taa: “Mati luku, go sindo a di mɔɔn hei kamian ala,” nɔɔ hɛn un taki da di pootima taa: “Womi, ko sindo leti a mi fesi a goon aki,”

⁴ nɔɔ andi un du dɛ? Nɛɛn da un hei wan sɛmbɛ mɔɔn wan fu di a dɛ guduma nɔ? Nɔɔ hɛn da pakisei fuunu an bunu, kwetikweti.

⁵ Nɔɔ na sɔ Masa Gadu hɛn a ta libi e! Biga hɛn ta tei dee pootima u di goonliba aki u de musu ko biibi a Masa Jesosi Keesitu, fu de feni dee gaan waiti gudu nɛɛn kɔndɛ dee a bi paamusi dee sɛmbɛ dee lobi ɛn.

⁶ Ma unu, wan ta libi sɔ e. Un ta da dee pootima sen.

Dee sɛmbɛ o, un pakisei di soni bunu e! Dee guduma un ta hei dɛ, na de da dee sɛmbɛ ta ganjan unu njan ta tja go a kuutu nɔ?

⁷ Nɔɔ deseɛi wɛ ta kosi Masa Jesosi ta poi di bumbuu nɛ fɛɛn di unu ta tja taa un dɛ sɛmbɛ fɛɛn. Nɔɔ fa un ta hei sɔ wan sɛmbɛ, hɛn da un ta du bunu nɔ? Na seei.

⁸ Ma te i ta hoi di gaan bumbuu wɛti dɛ taa i ta lobi sɛmbɛ kumafa i lobi i seei, nɔɔ hɛn da i ta du bunu. Biga sɔ a dɛ a Gadu Buku.

⁹ Ma ee i ta luku taa di ala hei nɔɔ di otowan mɔfina, nɔɔ na Gadu soni i ta du mɔɔn e. Hɛn da i ta libi hogi ta booko Gadu wɛti.

¹⁰ Wɛ nɔɔ, dee sɛmbɛ, wan musu hoi dee wɛti u Gadu hafuhafu e, ma un musu hoi de tuu ku telu. Biga ee wan sɛmbɛ i ta poi ee wan kodo seei, nɔɔ hɛn da i pasa Gadu buka kaa.

¹¹ Biga di wan seei Gadu di taa ja musu tei oto sɛmbɛ mujɛɛ, ja musu tei oto sɛmbɛ manu, hɛnsɛi taa ja musu kii sɛmbɛ. Wɛ nɔɔ ee ja tei oto sɛmbɛ mujɛɛ, ja tei oto sɛmbɛ manu, ma i kii sɛmbɛ, nɔɔ hɛn da i booko Gadu wɛti kaa e.

¹² Hɛn mbei hiniwan soni di joo taki ku hiniwan soni di joo du, nɔɔ i musu dɛ ku di mɛni nɔɔmɔ taa wan daka Masa Gadu o kuutu i a de. Biga te a dou di juu, nɔɔ a o luku ee u bi ta hoi dee wɛti dee a bi da u fu puu u a wogi du basu buta ko fii.

¹³ Nɔɔ fa a o kuutu u dɛ, nɔɔ ee wan sɛmbɛ ja bi a’ tjalihati u sɛmbɛ nɔɔ sɔseei Gadu an o a’ tjalihati fii tu. Ma ee i bi ta a’ tjalihati u sɛmbɛ, nɔɔ ja o fɛɛɛ te Gadu o kuutu i. Biga a o a’ tjalihati fii baka.

Aki Jakobosi ta lei de taa di biibi a Gadu ku buka nɔɔ

aan heepi.

¹⁴ Wɛ nɔɔ dee sɛmbɛ, ee wan sɛmbɛ i taa i a’ biibi a Gadu ma ja ta libi a di fasi, nɔɔ di biibi fii dɛ o heepi i nɔ? A sa puu i a didibi faja nɔ? Nɔnɔ, an sa puu i e.

¹⁵ Biga ee wan oto biibima kuma i ko a i, hɛn a taa aan koosu faa bisi ee nasɔ aan soni u njan,

¹⁶ nɔɔ hɛn i taki dɛɛn taa: “Masa Gadu musu dɛ ku i e, mati. Go kɛndɛ faja nɔɔ i njan be bɛɛ fii fuu,” ma fa i taki dɛ seei ja dɛɛn wan wojo soni, nɔɔ hɛn da i heepi ɛn nɔ? Nɔnɔ.

¹⁷ Sɔseei ee wan sɛmbɛ taa a ta biibi a Gadu ma an ta libi a di fasi u sɛmbɛ sa si taa a ta biibi, nɔɔ di biibi dɛ, a dɛ wan sɔsɔ biibi dɛɛn. Aan heepi.

¹⁸ A kandɛ fa mi ta taki aki, sɛmbɛ dɛ a unu dendu dɛ di o sa kɛ fia ku mi taa: “Wɛ i sabi nɔ? I, i ta hoi Gadu wɛti ta du soni kumafa Gadu kɛ, ma mi, ma dɛ sɔ. Mii ta biibi a mi hati nɔɔ a kaba.”

Ma nɔɔ ee wan sɛmbɛ taki sɔ da mi, nɔɔ i sabi fa mi o piki ɛn nɔ? Mi o piki ɛn taa: “Wɛ, i sabi nɔ? Fa mi dɛ aki, ee sɛmbɛ luku mi libi te de kaba nɔɔ de

o si taa mi ta libi a di fasi. Mi ta biibi a Gadu tuu. Ma, fa ii sai dē, ee de luku libi fii te de kaba, nōō de o si taa ja ta libi a di fa. Nōō unfa de o du sabi taa i ta biibi a Gadu?”

¹⁹ Wē nōō sōseei kandē i taa i ta biibi taa Masa Gadu hēn wanwan nōō da di Gadu u mundu fuu begi, oto gadu an dē mōōnsō. Wē nōō fa i taki dē nōō a bunu, ma di dē seei an tjika e. Biga dee didibi seei ta biibi sō tu, hēn mbei de ta dēdē ku panta sō.

²⁰ Un dee wisiwasima dē, unfa mi sa du te nōō un ko fusutan taa ee i taa i a' biibi a Gadu ma ja ta libi a di fa, nōō di biibi fii dē wan sōsō soni, aan heepi da i.

²¹ Biga luku di fesiten sēmbē fuu de kai Abahamu. Fa a bi sai dē, di libi a bi libi kumafa di biibi fēen bi dē a Gadu, hēn wē mbei a ko dē wan bumbuu sēmbē a Gadu wojo e. Wē biga a bi tei di wan kodo womi mii fēen tō di a bi abi tja go faa tjuma da Gadu kumafa a mandēen.

²² Ja si nō? Sō Abahamu bi ta biibi Gadu tjika. Fa Gadu ko fan ku ēn dē, hēn a piki. Nōō hēn a go u go du di soni Gadu taki dēen. Nōō fa a du dē, nōō di biibi fēen ko dē wan gbelingbelin biibi awaa.

²³ Nōō sō i si a pasa kumafa de sikifi ēn a di Buku u Gadu taa fu di Abahamu biibi Gadu, hēn mbei a ko wan bumbuu sēmbē a Gadu wojo. Nōō hēn de kai ēn Gadu mati.

²⁴ Nōō sō u si taa di libi di wan sēmbē ta libi kumafa Gadu kē, hēn ta buta i i ko dē sōndō fōutu a Gadu wojo e, dee sēmbē. Na te i ta biibi ku buka wanwan.

²⁵ Nōō sōseei a bi pasa ku di jajo mujēe de ta kai Lakabu. A bi ta dē a di kōndē de kai Jelikou ma a bi ta fēē Gadu. Nōō hēn a tjubi dee sēmbē u Masa Gadu nēen wosu, dee bi ko luku di kōndē a wan tjubi fasi, hēn a lei de oto pasi u de musu toona go. Nōō fu di a bi libi a sō wan fasi, nōō hēn mbei a ko dē wan bumbuu sēmbē a Gadu wojo e.

²⁶ Biga leti kumafa u sabi taa wan sinkii sōndō akaa aan libi, nōō sōseei biibi ku buka sōndō du aan wan wojo heepi tu.

3

Aki Jakobosi ta lei fa sēmbē buka hogi tjika.

¹ Wē nōō mi kē fan ku un dee sēmbē ta suku fuun ko leima a dee soni u Gadu. Mi taki e, un musu mēni unu seei o. Biga fa un ta lei sēmbē soni u Gadu dē, nōō ee wan sēmbē ja ta libi a di fasi i ta lei dē, nōō Gadu o sitaafu i mōōn dee otowan tuu.

² Nōō fa u ta taki aki, nōō hii u tuu ta mbei fōutu ta misi Gadu. Nōō fa woon ta fan ta lei sēmbē dē, nōō un musu kōni ku dee soni un ta taki ku unu buka e. Biga sēmbē buka hogi. A taanga u tii. Ma ee i ta biinga ku ēn te i ko ta tii ēn tololo, nōō dee oto kamian fii sinkii o dē sōsō soni da i fii tii. Biga di sēmbē di an ta taki sōsō ku ēn buku, nōō hēn dē sōndō fōutu.

³ Nōō sēmbē buka piki, hēn sinkii bigi, ma luku dee gaangaan hasi. I ta buta wan piki tii sō a de buka, nōō ku ēn i ta tii ēn tja go ka i kē. Di tii piki, di hasi bigi, ma tōkusee di tii dē hēn ta tja di hasi.

⁴ Sōseei wan gaan sipi, aluwasi fa a bigi ku aluwasi fa di ventu di ta tuusi ēn ta a' kaakiti tu, ma wan piki pada nōō ta tii ēn ta tjēen go ka di sēmbē abi ēn kē faa go.

⁵ Nōō sōseei sēmbē buka dē tu e, dee sēmbē. A dē wan piki soni a u sinkii, ma a ta du gaan wooko ta taki gaangaan soni.

⁶ Leti kumafa wan piki faja sa tjuma wan gaan matu, nōō sō di buka fuu sa du gaan hogi e. Biga hii dee hogi u goonliba aki tuu, a sēmbē buka de ta

kumutu ta paa ja ta kaba hii libi fuu a sösö. Biga di didibi seei, hèn ta buta sèmbè u de ta suti faja a soni ku de buka.

⁷Nöö hii dee libi soni u di goonliba aki dè a libisèmbè basu kaa, de sa tii de kumafa de kè: mbeti, ku fou, ku sindeki, ku dee soni ta libi a wata tuu.

⁸Ma na wan sèmbè dè tjika u tii èn seei te nöö an mbei föutu ta taki sösö soni ku èn buka e. Biga hiniwanten sèmbè buka ta dè kabakaba ku bita u poi sèmbè libi kaba a sösö.

⁹Ku èn u ta gafa Masa Gadu u Tata, nöö ku èn seei u toona ta siba libisèmbè di Gadu bi mbei faa dè kuma èn seei.

¹⁰Bunu ku hogi tuu ta kumutu a di wan seei buka. Nönö, dee sèmbè, di dè an fiti sò e. Na sò di mundu mbei.

¹¹Biga suti wata ku bita wata an ta kumutu a di wan seei baaku.

¹²Nöö manjan an sa pai apeesina, kökönötö an sa pai awaa. Söseei tu, di peti di ta puu suti wata an sa puu bita wata möön.

Aki ta taki u tu pei fusutan.

¹³Wè un haika e, dee sèmbè. Ee wan sèmbè dè a unu mindi dè, nöö hèn a mèni taa a a' bumbuu pakisei ku fusutan, nöö a musu dè u si a di libi fèèn e. Sèmbè musu si dee bumbuu du fèèn de a ta du, ku sakafasi ku fusutan.

¹⁴Ma ee i ta haun da otowan ta suku bunu fii wanwan, ja a' toobi ku di otowan fii möönsö, nöö an bunu e. Nöö ee sò i ta libi, nöö ja musu ta waka ta mindi soni ta njan buka taa i abi fusutan.

¹⁵Biga di lö fusutan dè na a Gadu a ta kumutu e, ma goonliba fusutan di dè. Didibi fusutan seei a dè, nöö di Akaa u Masa Gadu an dè a dendu seei.

¹⁶Biga ka sèmbè ta haun ku deseeri ta suku bunu u de wanwan, nöö naandè buuja ku hii pei hogilibi dè.

¹⁷Ma di sèmbè di Gadu da fusutan, nöö a o dè u si nëèn libi e. Biga hati fèèn o dè limbolimbo, nöö a o ta libi fiifi ku sèmbè. A o ta lesipeki sèmbè. An o a' taangajesi. A o ta a' tjalihati u sèmbè. Hiniwanten a o ta mbei möiti faa heepi sèmbè a soni. An o ta luku taa wan sèmbè hei möön di otowan. An o ta ganjan sèmbè a soni tu. Sö dee sèmbè o libi e, dee abi di fusutan u Gadu.

¹⁸Nöö dee sèmbè dee lo' u libi fiifi ku sèmbè ta heepi otowan u de libi fiifi ku de na de tu, nöö dee lö sèmbè dè o ta tja di bunu libi u Gadu ko a sèmbè dendu te a hia e.

4

Aki Jakobosi ta lei de taa de musu saka deseeri a Gadu basu.

¹Wè dee sèmbè o, faandi mbei un lo' u kisi toobi ku unu seei sò? Na dee taku pakisei fuunu hati ta manda unu fuun libi dee lö libi dè nö?

²Biga dee soni un ta kè wan ta feni de, nöö hèn mbei hati fuunu ta boonu ku unu seei tee un ta mèni fuun kii otowan. Un ta haun ta biinga fuun musu abi wan soni, ma wan ta feni èn möönsö. Nöö hèn un ta buja ta feti ta du soni ku unu na unu. Ma di soni mbei wan ta feni èn, hèn da fu di wan ta begi Gadu faa da i èn.

³Nöö ee un ta begi èn wan soni seei, ma wan ta feni èn, fu di wan ta begi kumafa a fiti tu. Biga te un ta begi nöö un ta suku soni fuunu seei musu kisi piizii, nöö a kaba.

⁴Dee sèmbè o, un dè leti kuma wan mujèè di disa di manu fèèn go ta lobi oto womi. Biga un disa Masa Gadu, nöö hèn un go ta lobi dee soni u di goonliba aki dee Gadu an lobi. Wè nöö ee wan sèmbè i ta lobi dee soni dè, nöö ja sabi taa i ku Gadu dè felantima nö?

⁵Wè unfu un mèni? Un ninga taa u sösö de bi sikifi a di Buku u Gadu taa:

Di Akaa u Masa Gadu di a buta a u hati aki,
a ta haun o.

Biga an kē oto soni musu ko a u hati möönsö.

Ma a ta biinga ku u

fuu musu dē fēen wanwan vö.

⁶ Sö Masa Gadu a' toobi ku u tjika e, dee sēmbē, hēn mbei a ta heepi u ku ēn bunuhati. Nöo di heepi a ta heepi aki, a taanga möön dee taku mēni fuu hati e.

Wan sabi fa a sikifi a Gadu Buku nö? A taa:

Gadu ta saka dee sēmbē dee a' gaan fasi,

ma dee sēmbē dee ta saka deseēi dēen

nöo de a ta heepi ku ēn bunuhati.

⁷ Nöo hēn mbei un musu saka unu seei a di tii u Gadu basu. Un musu feti ku di didibi fu an ko a i hati, nöo a o kule go disa i.

⁸ Pusa go a Gadu e, nöo Gadu seei o pusa ko a i tu.

Un dee sēmbē dee dē ku tu hati, un disa dee hogilibi fuunu e. Un puu dee taku pakisei a unu hati.

⁹ Dee hogi du un bi ta du musu ta hati unu e. Wan musu go sai dē ta lafu, ma un musu ta kai wolo da dee hogi libi fuunu. Wan musu dē ta wai, ma kēē fuun musu ta kēē.

¹⁰ Un saka unu seei da Masa Gadu e, dee sēmbē, be a hopo unu.

Aki Jakobosi ta taki da de taa de an musu ta kosi otowan ta kuutu soni u de.

¹¹ Nöo dee sēmbē u mi o, fa un ta kosi unu seei ta guunjan unu na unu a baka dē, nöo un musu disa e. Biga te i ta kosi di otowan fii ta si hogi pisi fēen hiniwan juu, nöo hēn da i ta sösö di wēti u Masa Gadu seei taa an bunu. Biga Gadu bi da u di wēti taa u musu lobi di otowan fuu. Wē nöo dee wēti u Gadu, na wan sēmbē sa taki ee de bunu ee de an bunu, ma i musu piki de nöo.

¹² Wē biga Masa Gadu hēn nöo ta buta dee wēti, nöo hēn nöo sa kuutu soni fuu paati adjabēē ku leti da u. Hēn nöo sa buta u a sitaafu u dee hogi du fuu, nöo hēnseei nöo sa puu u a sitaafu tu. Wē nöo ambē da ju fii ko dē ta kuutu soni u di otowan fii?

Aki Jakobosi ta bai de fu de mēni Gadu a dee soni

de ta du.

¹³ Wē un dee sēmbē dee ta fan dee lö fan aki taa: "Amanjan woo go a sö wan köndē, nöo woo go tan dē wan jaa ta wooko ta bai soni ta sei, nöo woo feni wan gaan hia möni,"

¹⁴ nöo un sootu fan un ta fan dē? Un sabi ee amanjan woon dē ku libi nö? Naa unfa un ta pakisei u di libi fuunu? Biga di libi fuu dē kuma wan sumuku fii si pala sö, nöo ja si ēn möön.

¹⁵ Nöo ka fuun fan a di fasi dē, nöo un musu taa: "Ee Gadu kē, nöo sö wan soni mi o du."

¹⁶ Wan si ö? Di gaan fasi un abi, hēn ta mbei un ta njan buka ta konda sōmēni soni a buka. Nöo dee lö pei fan dē an bunu.

¹⁷ Wē nöo sö e, dee sēmbē. Ee wan sēmbē i sabi unfa fii libi bunu ma ja ta libi sö, nöo hēn da i du hogi kaa.

5

*Aki Jakobosi ta bai dee
guduma möön.*

1 Un dee guduma, un musu bai kää taa un kaba a sösö awaa. Biga di sitaafu juu fuunu ta ko e.

2 Dee gudu fuunu kaba a sösö. Kopikopi njan dee koosu fuunu tuu fiaa.

3 Di möni fuunu seei an dë wan wojo soni möön, un butëen dë te a poi. Nöö di poi fëen dë, hën o kuutu unu taa wan bi wooko bunu ku ën.

Nöö fa di gudu fuunu kaba a sösö dë, nöö sö unu seei kaba a sösö tu e. Biga di gihi hati fuunu dë mbei un kisi wan sitaafu kuma te faja ta tjuma i.

Nöö fa un lai dee gudu fuunu a wosu dë, dee sëmbë, wan sabi taa di goonliba aki o kaba djunsu nö?

4 Dee sëmbë bi wooko da unu seei un njan dee möni u de tuu fiaa, nöö awaa di kää u de dou a Masa Gadu jesi awaa. Di sëmbë di abi taki a hii mundu liba jei.

5 Fa un sai dë, un bi ta libi kumafa un kë a di goonliba aki e. Un bi ta njan ta bebe fuunu, nöö un ko fatu kuma wan fatu kau di de ta kiija ta seeka, fu te juu dou de tjeën go kii.

6 Biga dee bumbuu sëmbë u di köndë seei un bi ta buta u de musu kii puu, nöö de an bi mbei möiti möönsö fu de puu deseai a unu maun. «Nöö fa u dë aki nöö Gadu seepi o seeka unu awaa e. Söö.»

Aki Jakobosi ta fan ku dee biibima u de tai hati.

7 Ma nöö un dee biibima dë, un musu tai hati fu tefa Masa Jesosi ko puu unu a dee sitaafu fuunu basu e. Wan si fa dee sëmbë ta paandi goon ta hoi pasensi nö? Te de paandi goon te de kaba, nöö de ta tai hati ta luku di tjuba faa kai nasi di alisi, te juu dou a göö ko lepi u de koti.

8 Nöö söseei un musu dë tu e. Wan musu lasi hati, ma un musu ta hoi dou, biga abiti möön Masa Jesosi o toona ko.

9 Nöö hën mbei wan musu dë ta kai unu seei në ta guunjan unu na unu e. Ee un du sö nöö woon kisi gaan sitaafu, biga fa mi taki aki, di Gaan Kuutuma seei dë leti a dööbuka kaa ta ko.

10 Dee sëmbë u mi o, un luku dee fesiten tjabukama dee Gadu bi manda, kumafa de bi ta tai hati ta tja sitaafu, be unu seei ta djeesi de a dee sitaafu ta miti unu tu.

11 Dee sëmbë dë bi tai hati go dou, nöö hën u taa de naki kölöku. Masa Gadu tja de a bunu liba.

Nöö un luku di sëmbë de kai Jopu tu, fa a bi hoi degihati a dee soni dee bi miti ën dë. An bi disa Masa Gadu möönsö. Nöö baka fëen, hën Gadu toona dëen soni te a hia pasa maaka. Biga Gadu abi tjalihati u sëmbë e.

Aki Jakobosi ta lei de peipei soni u de musu du.

12 Wë nöö dee sëmbë, wan soni mi kë un musu sabi, hën da wan musu tei soni ta soi nëen liba e. Na dee soni u goonliba aki, na dee soni u liba ala, na wan sootu soni seei un musu ta tei ta soi nëen liba möönsö. Ma te un taki aai, a musu tan aai. Te un taa nöönö, a musu tan nöönö fu Masa Gadu an musu sitaafu unu.

13 Nöö ee wan sëmbë fuunu dë ku fuka, nöö be a begi Masa Gadu e. Ee wan sëmbë hati dë ku wai, nöö be a ta kanda ta gafa Gadu.

14 Ee wan sëmbë dë a unu mindi sikisiki nöö be a kai dee tiima u keiki e, be de ko nëen ko begi dëen nöö de lobi fatu nëen sinki a Masa në.

15 Nöö fa de o begi ku biibi dë, nöö di sikima o ko bunu. Biga Gadu o hopo ën. Nöö ee a bi du hogi, nöö Gadu o puu ën a bëe.

16 Hën mbei mi taki da unu taa un musu fan ku unu seei ta konda dee hogi dee un ta du ku unu na unu, nöö un ta begi da unu seei. Nöö Gadu o kula

unu. Biga te wan sēmbē ta libi bunu kumafa Gadu kē, nōō di begi fēēn a ta begi Masa Gadu nōō a ta wooko gaan wooko e.

¹⁷ Wē biga luku di fesiten tjabukama u Gadu de kai Elia. A bi dē wan libisēmbē leti kuma u tu. Ma nōō hēn a begi wan begi u tjuba an musu kai. Hēn a tan dii jaa ku sikisi liba longi, tjuba seei an kai mōōnsō.

¹⁸ Nōō hēn a baka fēēn hēn a toona begi u tjuba musu kai, nōō hēn tjuba toona kai a goonliba, hii soni toona nasi baka. Hēn mbei mi taki da unu taa un musu ta begi e, dee sēmbē.」

¹⁹ Wē dee sēmbē u mi o, ee wan fuunu bi ta waka a di tuutuu lei u Gadu baka te nōō hēn a disa go ta libi takulibi, nōō hēn wan otowan go tei ēn toona tja ko da Gadu baka,

²⁰ nōō di sēmbē di heepi ēn dē musu sabi taa a puu wan sēmbē a di sitaafu u didibi faja e, di a bi o kisi. Biga a heepi ēn u Gadu an musu hoi dee hogilibi fēēn a bēē mōōn.

Da sō a dē e, dee sēmbē.

「Wē nōō mi o tapa di biifi aki. Jakobosi ta manda gaan odi da unu. A tan sō.」

Di fosu biifi u Petuisi

Wan wöutu a fesi.

Di tjabukama de kai Petuisi bi dë wan u dee tuwalufu bakama u Masa Jesosi, dee bi ta waka ta lontu ku ën. Nöo hën sikifi di biifi aki. Nöo a sikifi ën da dee biibima u Masa Jesosi dee dë wakama a oto köndë, faa da de degihati a dee sitaafu dee ta miti de. A taa de musu mëni dee soni Gadu buta da de u de feni a bakaten, nöo de hoi go dou a di biibi. Nöo a taki sômëni soni da de tu unfa sëmbë u Masa Jesosi musu libi.

Aki Petuisi ta manda odi da de.

¹ Dee sëmbë o, mi, Petuisi, ta mbei di pampia aki. Mi da wan u dee Tjabukama u Jesosi Keesitu, nöo mi ta manda di biifi aki da un dee sëmbë u Masa Gaangadu dee dë paajapaaja kuma wakama a dee peipei köndë u goonliba, kuma Pontusi, Galasia, Kapadosia, ku Asia, te kisi Bitinia.

² Fa un sai dë, unu da sëmbë dee u Tata Masa Gaangadu bi sabi gaanduwe a fesi kaa taa woon ko sëmbë fëen. Nöo hën a pii unu tei fuun musu piki di buka u Jesosi Keesitu, be di buuu fëen puu dee hogi du fuunu a unu liba. Fa u dë aki, un ko dë bumbuu sëmbë gbelingbelin a Masa Gaangadu wojo, nöo di Akaa fëen wë heepi unu te un ko sô e, dee sëmbë.

Masa Gaangadu musu dë ku unu e, ta heepi unu gaanfa ku ën bunuhati. A musu da unu kötôhati seei.

Aki Petuisi ta gafa Gadu fu dee soni dee u sabi taa woo feni a bakaten fu di u ta biibi.

³ Un boo ta gafa Masa Gaangadu e, dee sëmbë. Hën da di Tata fuu Masa Jesosi Keesitu ku ën Gadu tu, nöo u musu hopo ën nè. Biga a bi abi gaan tjalihati fuu, nöo hën a tooka u hati mbei u ko wan hii njunjun sëmbë kuma tide pai mii. Fa a weki Jesosi Keesitu baka a dëdë dë, a mbei u ko ta abi wan gaan biibi a u hati di an ta kaba möönsô, taa woo feni libi a Gadu nöömô a bakaten.

⁴ Nöo u sabi tu taa woo feni hii dee soni dee Gadu abi u da u, fu di u dë sëmbë fëen. Nöo dee soni dee woon feni dë, de an dë kuma soni u goonliba aki e. Biga na wan daka seei de o sa poi kaba a sôsô möönsô. De an o lasi di waiti u de möönsô tu, fu wa kai de soni möön. Nöo de dë leti a Masa Gaangadu köndë ala, ka Gadu seei ta tjubi de da u fuu feni de a bakaten.

⁵ Nöo fu di un ta biibi ën hedi, dee sëmbë, nöo a ta tjubi unu ku ën kaakiti fu te di lasiti daka dou. Nöo di juu dë, hii di heepi fëen di a bi abi kabakaba kaa faa heepi u, hën tuu o ko a limbo awaa u sëmbë si.

⁶ Nöo te un ta mëni dee soni dë nöo un musu ta wai e, hii fa un ta tja sômëni pei sitaafu ku fuka a di mindi aki.

⁷ Wë biga dee sitaafu dee un ta tja naandë, de dë kuma wan soni ta pooba unu luku nöo, u sëmbë sa si taa di biibi un ta biibi Masa Jesosi dë wan tuutu soni. Na sipootu un ta mbei.

Dee sëmbë o, un sabi fa dee sitaafu dë da unu nö? De dë kuma te de ta jô goutu puu kaka, fii sa puu di gbelingbelin goutu tei. Sô wë dee sitaafu ta heepi di biibi fuunu faa musu ko gbelingbelin. Ma di biibi fuunu dë, a bumbuu pasa goutu gaanfa e. Biga hën an dë wan soni o poi kaba a sôsô möönsô, kumafa goutu ta kaba a sôsô. Nöo ee un ta biibi go dou, nöo woon

feni gafa ku nēbai di juu ten Masa Jesosi Keesitu o ko a limbo u sēmbē si di kaakiti fēēn di a abi.

⁸ Fa Masa Jesosi sai dē, dee sēmbē, hēn da di Sēmbē di wan bi si wan daka, ma tōkuseei un ta lobi ēn. Hii fa wan ta si ēn fa u dē aki seei, ma un ta biibi nēēn liba, nōō hēn Gadu buta wan gaan wai a unu hati te wan sa kondēēn da sēmbē fa a dē.

⁹ Nōō di soni mbei un ta wai sō, fu di Gadu ta heepi unu ta seeka di hati fuunu fu an musu kaba a sōsō. Hēn wē da di soni di un bi suku a Masa Jesosi di un ko biibi ēn e.

¹⁰⁻¹¹ Wē nōō di heepi Gadu ko ta heepi u a di ten aki, nōō hēn wē dee fesiten tjabukama fēēn bi ta biinga seei fu de fusutan e, ma de an bi sa fusutēēn mōōnsō. Biga di ten de bi dē a goonliba aki, nōō di Akaa u di Keesitu bi ta ko a de liba, nōō de bi ta konda fa Gadu o heepi u a bakaten aki ku ēn bunuhati. De bi ta konda seei fa di Paamusi Kōnu o ko a goonliba ko tja pena, te bakaten nōō a o kisi sōmēni nēbai. Nōō fa de ta fan dee lō soni dē, nōō de bi kē sabi ee na un ten de o pasa, ku andi ku andi musu pasa bifō di lō ten dē o dou.

Ma hii fa de ta suku fini a dee soni dē, ma de an ko sabi de mōōnsō.

¹² Nōō hēn de ko fusutan taa na soni u de de dē, ma de dē fu wi dee sēmbē dee o ko a bakaten aki.

Nōō hēn u dē tee di ten aki, „nōō hēn wē i si Masa Jesosi ko e„. Nōō hēn dee tjabukama fēēn ko konda di Buka fēēn da unu te de kaba. Nōō di Buka dē, hēn wē da di wan seei soni di dee fesiten tjabukama bi ta taki. Nōō fa dee sēmbē konda di buka da unu dē, nōō ku di kaakiti u di Akaa u Gadu di a manda kumutu a liba ala ko da u, ku ēn wē de kondēēn.

Nōō, dee sēmbē, dee soni u ta taki aki, gaan soni de dē e. Biga dee basia u Masa Gaangadu dee ta dē a Gadu Kōndē ala seei ta bendi ta luku ee deseēi sa sabi soni u de tu.

Aki ta lei u fa u musu libi

di njunjun libi.

¹³ Nōō hēn mbei un musu buta ku unu seei, dee sēmbē, fu wan fika gudjuu dē. Un musu tai hati ta buta mēni gaanfa a dee bunu Gadu o da unu ku ēn bunuhati a di ten di a o tja Jesosi Keesitu ko a limbo.

¹⁴ Nōō leti kumafa wan mii ta piki ēn tata buka a soni, nōō sōseei un musu ta piki Gadu buka a soni tu. Wan musu ta nama ku dee lō hōgi dee di hati fuunu bi lobi u du di ten wan bi sabi Gadu e.

¹⁵ Wē biga di Sēmbē di kai unu fuun ko nēēn aki, a dē wan limbolimbo Sēmbē sōndō fōutu, nōō sō un musu dē tu e, dee sēmbē. Libi fuunu musu dē gbelingbelin a hii futu.

¹⁶ Biga Gadu bi taki a di Buku taa:

Mi dē limbolimbo sōndō fōutu,
nōō sōseei un musu dē tu.

¹⁷ Dee sēmbē o, fa un ko ta kai Gadu unu Tata aki, hēn ta kuutu hii sēmbē makandi a di fa i ta libi. Nōō fēēn mbei un musu ta mēni ēn nōōmō ta lesipeki ēn gaanfa, hii di ten un ta libi kuma wakama a goonliba aki.

¹⁸ Wē biga an dē taa wan soni di sa poi kaba a sōsō kuma mōni sō a tei paka puu unu a di sōsō libi di un bi lei a dee gaan sēmbē fuunu e.

¹⁹ Ma di buuu u „Jesosi„ Keesitu di dii mōōn hii soni, hēn wē paka puu unu. Fa de kii ēn dē, nōō a bi dē kuma dee sikafu mii de bi ta kii ta paka paima u hōgi du nōōmō naandē. Nōō leti kumafa dee sikafu mii bi musu dē gbelingbelin sōndō fōutu, nōō sōseei Masa Jesosi bi dē tu.

²⁰ Wë nöö gaanduwe kaa bifö goonliba mbei, Masa Gaangadu bi buta taa sö a o manda Masa Jesosi ko paka di paima dë da u. Ma tefa di bakaten aki bifö di soni dë ko a limbo fuun sa feni heepi nëen awaa.

²¹ Nöö di nama un ko nama ku Masa Jesosi dë, dee sëmbë, hën heepi unu fuun ko biibi Gadu e. Biga un ko sabi fa a weki Masa Jesosi a dëdë te a tjëen go te a di möön hei kamian a liba ala. Hën mbei un ko ta buta mëni nëen gaanfa taa hii dee soni a bi paamusi unu tuu, woon feni de nöömö.

²² Dee sëmbë o, un bi jei di tuutuu lei u Gadu kaa, nöö hën wë i si un ta piki ën tefa hati fuunu ko dë limbolimbo, un ko ta lobi unu na unu söndö ganjan. Ma nöö un musu ta lobi unu seei möön taanga eti e, ku hii unu hati.

²³ Biga un ko feni wan hii njunjun libi awaa kuma wan njunjun mii di de pai. Ma di lö böngö di i si pai unu dë, na libisëmbë böngö e, di sa kaba a söso, ma di wöutu fu Gadu wë. Hën da di böngö di mbei un feni di njunjun libi dë.

Nöö fa di wöutu u Gadu sai dë, dee sëmbë, a dë kuma wan libilibi soni ta wooko a u hati dendu ta seekëen, nöö an o kaba a söso möönsö.

²⁴ Biga un sabi di soni di Gadu bi taki. A taa: Hii libisëmbë tuu dë kuma ahun ta languwa jööö sö.

Nöö hii nëbai fu wan libisëmbë dë kuma wan folo ta dë a sabana, te fi sabi a dëe puu kai kaba a söso.

²⁵ Ma di wöutu u Masa, hën a ta dë fu nöömö.

Nöö hën wë da di wöutu i si de bi tja ko konda da unu e, dee sëmbë.

2

¹ Wë di un ko jei dee soni dë kaa, nöö un musu disa dee hogi fasi dee un bi abi e, dee takuhati fasi sö, bödjëe fasi, ganjan sëmbë fasi, haun, ku waka njan sëmbë a baka. Un musu puu dee soni dë tuu fiaa a unu libi.

²⁻³ Nöö fa i si i bi tesi luku fa Masa abi bunuhati tjika dë, nöö i musu ta dë nëen baka nöömö leti kuma wan tide pai mii ta hangi di bobiwata fëen mama. Sö un musu ta abi hangi da di wöutu u Gadu fuun musu ta sabi soni fëen. Nöö ee un dë sö, nöö woon nango a fesi seei, te un ko gaangaan sëmbë a di biibi.

Aki ta taki soni u di wosu u Gadu ku di mama sitonu

u di wosu.

⁴ Dee sëmbë, un boo toona mëni di soni di bi dë sikifisikifi a Gadu Buku e. De bi tuwë wan sitonu a kapëe, ma Gadu si ën kuma wan gaan bumbuu soni. Nöö hën a tei ën buta ko di mama sitonu u di wosu fëen. Ma nöö di Sitonu i si dë, libilibi soni a dë e, dee sëmbë. Biga Masa Jesosi hën wë da di sitonu dë. Ku ën Gadu seti di wosu fëen.

⁵ Nöö fa un ko ta biibi ën dë, nöö unu seei ko kuma wanlö libilibi sitonu tu, di Gadu ta tei ta nama ku Masa Jesosi makandi faa mbei hën wosu. Ma nöö di wosu u ta taki aki, na soni u si ku wojo e. Akaa soni a dë.

Nöö na di wosu nöö Gadu tei unu mbei e, dee sëmbë, ma a tei unu tu fuun ko dë wanlö apaiti sëmbë fëen kuma mindima ta tja peesenti go dëen. Nöö dee peesenti un ta tja go dëen dë, deseei an dë u si ku wojo tu. Soni na akaa fasi deseei dë tu e, nöö de ta suti da Gadu seei, fu di unu ku Jesosi Keesitu nama.

⁶ Nöö di soni u bi taki dë, de bi sikifi ën buta a di Buku u Gadu taa:

Un luku, mi tja wan sitonu go buta a Sion dë.

Ku ën mi o seti di wosu u mi.

Nöö di sitonu dë, a dii möön hii soni.

A dë wan gaan bumbuu sitonu di mi tei apaiti.

Nöö ee wan sëmbë i abi biibi nëen liba,

nöö ja o lasi möönsö fii tja sen a bakaten.

Sö Gadu taki e, dee sēmbē.

⁷ Wē nöö di Sitonu i si de taki dē, gaan bumbuu soni seei a dē tuu da u dee sēmbē ta biibi ēn. Ma dee sēmbē dee an kē biibi, nöö an dē wan wojo soni da de. De dē kuma dee sēmbē dee di Buku bi taki ta mbei wosu. A taa:

Di sitonu di dee sēmbē dee ta mbei wosu an bi kē seei

te de tuwē a kapēē,

hēn ko dē di mama sitonu u di wosu.

⁸ Ma di Buku taki wan oto soni u di Sitonu dē tu taa:

A dē wan sitonu di sēmbē ta naki futu nēēn ta kai.

Hēn ta tuwē sēmbē.

Wē da sö i si taa a buta kaa taa dee sēmbē dee an ta kē piki di buka u Masa Jesosi, nöö sö de o kaba a sösö.

⁹ Ma unu, wan dē sö e, dee sēmbē. Fa un ko ta biibi Masa Jesosi dē, nöö un ko dē wanlō apaiti sēmbē dee Gadu tei ko fēēn seei. Un ko dē a dendu u wan könu famii ta tja peesenti go da Gadu. Un ko dē wan föluku u Gadu di dē fēēn vō, fuun musu ta konda da sēmbē kumafa a bumbuu tjika, ta gafēēn.

Biga a kai unu puu a dungu tja ko a di waiti limbo fēēn.

¹⁰ Wan bi dē wan wojo soni a wan ten ala e, dee sēmbē, ma fa u dē aki un ko dē wan apaiti sēmbē fu Gadu gbolo. A di ten ala wan bi si fa Gadu abi tjalihati, ma awa un ko si ēn awaa.

Aki ta lei fa u musu libi wan bunu libi ku saka fasi.

¹¹ Un dee lobi mati u mi o, fa u dē aki wan dē goon mii u di goonliba aki möön e, ma un dē wakama nöö. Döösē sēmbē seei un dē. Nöö fēēn mbei mi begi unu baa taa dee hogi soni dee libisēmbē ta hangi u du, wan musu ta da de pasi a unu libi möönsö. Biga de ta biinga u poi di hati fuunu kaba a sösö.

¹² Ma unu musu ta libi bunu a dee sēmbē dee na ta biibi naandē wojo e. Nöö fa de o ta kosi unu taa un ta du hogi dē seei, ma de o ko si gbelin taa bumbuu soni nöö un ta du. Nöö bakaten de o ko ta gafa Masa Gadu fuunu hedi a di daka di a buta faa ko a u.

¹³ Fa un ko nama ku Masa dē, nöö un musu ta saka da hii dee tii dee lanti buta e. Un musu ta saka da di könu biga hēn da di möön hei wan.

¹⁴ Nöö un musu ta saka da dee takima tu, dee a pii tei buta a kami-ankamian. Biga di soni mbei a buta de, fu de musu ta sitaafu dee sēmbē ta du hogi, nöö de gafa dee sēmbē ta du bunu.

¹⁵ Gadu kē fuun ta libi bunu e, dee sēmbē. Biga te un ta libi sö, nöö dee sēmbē dee ta fan söndö fusutan ta kosi unu dē, nöö de o ko dē pii. Biga de o ko si taa sösö soni de ta taki.

¹⁶ Fa Masa Gadu puu unu a dee peipei wēti basu buta ko fii dē, nöö un musu libi kuma fiima tuu. Ma ja musu dē ta du hogi fu di i kumutu a wēti basu hedi, kwetikweti. Ma be i toona ta saka i seei da Gadu kuma wan saafuma fēēn.

¹⁷ Nöö i musu ta libi a wan lesipeki fasi ku hii sēmbē. I musu ta lobi dee otowan dee ta biibi Masa Jesosi kuma i. Nöö i musu ta fēēē Masa Gaangadu tu e, fu wan du na wan soni di an kai ku ēn. I musu ta lesipeki könu ta luku ēn fu wan hei sēmbē tu.

¹⁸ Nöö mi kē taki wan soni da un dee saafuma dee ta wooko da wan goonliba masa. Mi taki e, un musu ta lesipeki dee masa fuunu gaanfa e, dee sēmbē. Un musu ta saka a de basu. Nöö fa mi fan dē, na dee ta libi bunu ta abi pakisei a unu liba nöö e, ma dee ta libi hogi ku unu tu.

¹⁹ Wē biga ee wan sēmbē i ta kisi sitaafu di ja bi musu kisi ma i ta tjēēn ku pasensi fu di i ta mēni Gadu hedi, nöö hēn da i ta libi seei kumafa Gadu kē.

²⁰ Ma ee i bi du hogi nöö hën de fon i fëen hedi, nöö i tjëen ku pasensi fu di i sabi taa hogi i bi du tuu, nöö di dë an dë gaan soni e. Biga i seei suku ën. Ma ee bunu nöö i ta du nöö i kisi sitaafu fëen, nöö hën i tjëen söndö guunjan, hën da i libi kumafa Gadu kë.

²¹ Biga fa Gadu kai unu fuun ko sëmbë fëen dë, nöö a fiti fuun tja sitaafu ku pasensi e, dee sëmbë. Biga „Masa Jesosi, Keesitu seei bi tja sitaafu fuu hedi söndö guunjan, nöö fëen mbei u musu ta tjëen sö tu. Nöö te u du sö, hën da u ta waka nëen baka a di lö futu dë tu.

²² Fa Masa Jesosi sai dë, a libi leti kumafa di Buku bi taki fëen e, taa: Hën an bi du hogi wan daka.

Na wan ten seei a taki ganjanganjan soni.

²³ Biga di dee sëmbë bi ta kosi ën ta dëen gaan buka ku gaan sen dë, nöö an jabi buka kosi de möönsö e. Di de du hogihogi ku ën, an bë wojo da de möönsö tu, ma a disa de da di Sëmbë di ta kuutu a wan leti fasi.

²⁴ Nöö fa i si a tja dee hogi du fuu nëen sinkii a di lakpa pau dë, nöö wa dë a de basu möön e. U dëdë da de, fuu sa toona libi wan bunu libi awaa.

Dee sëmbë o, dee maaka dee Masa Jesosi kisi nëen sinkii dë, de wë kula unu e, mbei un ko bunu.

²⁵ Fa un bi sai dë, un bi dë leti kuma wanlö sikapu na abi tiima. Sö un bi ta waka fanjanfanjan tjika. Ma fa u dë aki un ko feni di leti sëmbë di fu tii unu. Nöö di Sëmbë dë, hën ta luku di hati fuunu be a dë tololoo a pasi.

3

Aki ta lei fa manu ku mujëe musu libi ku deseei.

¹ Nöö awaa mi kë fan ku un dee mujëe dë ku manu taa be un ta saka unu seei a dee manu fuunu basu e. Nöö ee wan fuunu sai dë hën manu an piki di buka u Gadu eti, nöö a o bia piki ën söndö i fan ku ën.

² Biga a o si taa i ta libi wan gbelingbelin libi ku lesipeki u Gadu.

³ Nöö fa i si un ta beei di uwii fuunu a dee peipei fasi dë, so juu un ta bisi gaan waiti koosu, ee nasö goutu soni a unu sinkii, nöö na a dee lö soni dë un musu suku gafa e, dee mujëe.

⁴ Ma di gafa fuunu musu dë a di fa i hati dë. Te i ta libi a wan saapi fasi, pii fasi sö, hën da di soni Gadu ta kai gaan waiti soni e. Nöö di waiti dë an o saka möönsö.

⁵ Sö wan waiti dee mujëe u fesiten bi abi kaa, dee bi dë apaiti da Gadu ta mëni ën fu de feni wini nëen a bakaten. Fa de bi sai dë, nöö de bi ta saka da dee manu u de.

⁶ Biga luku fa Sala bi ta saka dëen manu Abahamu ta kai ën “Masa”. Nöö ee un ta libi a sö wan leti fasi nöö woon ko ta djeesi Sala kuma unu da mii fëen. Nöö an o dë fuun ta dë fëëfëë.

⁷ Nöö un dee womi dee dë ku mujëe, un musu ta fii da dee mujëe fuunu e. Un musu ta lesipeki de fu di de da di möön suwaki wan. Wë biga fa un sai dë, unu ku de tuu o feni di libi u Gadu makandi di a o da unu ku ën bunuhati fu di un dë sëmbë fëen. Nöö te un ta libi bunu ku dee mujëe fuunu, nöö Gadu o piki dee begi fuunu tu.

Aki ta lei taa a möön bunu fii tja sitaafu fu wan soni di ja du, möön leki i tjëen fu di i du hogi.

⁸ Nöö awaa mi o fan ku hii unu tuu taa be un ta libi makandi ku wan hati e. Un musu ta fii ku dee otowan fuunu ta lobi unu seei kuma baaa ku baaa. Un musu ta abi tjalihati da unu na unu, ta libi ku sakafasi.

⁹ Ee wan sɛmbɛ du hogi ku i, ja musu du hogi ku ɛn baka e. Ee wan sɛmbɛ kosi i, disɛɛn. Na toona kosi ɛn baka, ma begi Gadu dɛɛn be a feni bunu. Biga sɔ Gadu bi kai i fii libi, dee sɛmbɛ, nɔɔ joo feni bunu nɛɛn.

¹⁰ Biga wɛ haika fa di Buku taki. A taa:

Ee wan sɛmbɛ i kɛ abi piizii ku di libi fii,
nɔɔ i musu ta duwengi i seei fu ja fan taku fan.
Ee i kɛ u di libi suti da i,
nɔɔ i musu kɔni fu ja ganjan sɛmbɛ ku buka.

¹¹ I musu kaba ku hogi du, nɔɔ i bia ta du bunu.

I musu ta suku fii dɛ fififi ku hii sɛmbɛ.

A di dɛ baka fii ta biinga nɔɔmɔ.

¹² Biga Gadu ta luku dee sɛmbɛ ta libi bunu nɛɛn wojo faa heepi de,

nɔɔ a dɛ setiseti jesi faa jei dee begi u de.

Ma di sɛmbɛ di ta du hogi,

hɛn a o bia baka da.

Sɔ di Buku taki e.

¹³ Wɛ be mi hakisi unu wan soni, dee sɛmbɛ. Ee i ta biinga nɔɔmɔ fii ta du bunu wanwan, nɔɔ ambɛ da di sɛmbɛ di o du hogi ku i?

¹⁴ Ma etiseei ee i kisi sitaafu fu wan bunu soni di i du hedi, nɔɔ hɛn da Gadu naki i kɔlɔku e.

Ja jei fa di Buku taki nɔ? A taa:

Na fɛɛɛ libisɛmbɛ te de ta bɛ wojo da i e.

Na panta da de seei.

¹⁵ Ma Masa Jesosi Keesitu hɛn nɔɔ fuun ta mɛni a wan apaiti fasi a unu hati, dee sɛmbɛ, biga hɛn da di Masa fuu. Hɛn da Gadu seei.

Nɔɔ i musu ta dɛ kabakaba hiniwanten fu ee wan sɛmbɛ hakisi i taa: “Unfa i du ta pakisei taa joo feni wini a bakaten?” nɔɔ i musu sabi fa u piki ɛn. Ma ja musu piki ɛn ku gaan fasi e, ma ku saapi fasi, ku lesipeki.

¹⁶ Biga hati fii musu ta dɛ limbolimbo nɔɔmɔ a hii futu.

Fa i ku Jesosi, Keesitu ko di wan dɛ, dee sɛmbɛ, nɔɔ i musu ta libi bunu nɔɔmɔ e. Nɔɔ te i libi sɔ, nɔɔ sen musu u kisi dee sɛmbɛ dee bi ta suku u poi unu nɛ fu takuhati fasi dɛ. Biga de o si taa sɔsɔ de bi ta du.

¹⁷ Dee sɛmbɛ o, ee Gadu si taa a fiti fii tja sitaafu, nɔɔ a mɔɔn bunu i tjɛɛn fu wan bunu soni di i du hedi, mɔɔn leki fu wan hogi soni di i du.

¹⁸ Biga Jesosi, Keesitu seei bi tja sitaafu tee fa de kii ɛn dɛ, hii fa an bi du hogi wan daka. Fa a dɛdɛ dɛ, nɔɔ dee hogilibi fuunu wɛ a paka di wan pasi dɛ fu nɔɔmɔ e. Di Bunulibima dɛ hɛn tja sitaafu a u dee takulibima aki kamian, faa sa tja u ko a Gadu.

Fa de kii Masa Jesosi dɛ, dee sɛmbɛ, a dɛdɛ tuu, ma di akaa fɛɛn hɛn a fika ku libi.

¹⁹⁻²⁰ Nɔɔ hɛn a go konda di buka u Gadu da dee akaa u dee sɛmbɛ bi dɛdɛ a di ten u Noa, ka de bi go dɛ a di kamian ka de an sa kumutu mɔɔn. Dee sɛmbɛ dɛ, de an bi kɛ piki di buka u Gadu a di ten di Noa bi ta mbei di gaan boto. Hii fa Gadu bi ta wasikɔi de ta hoi pasensi da de seei, ma nɔɔ de an bi kɛ piki mɔɔnsɔ. Fɛɛn mbei aiti sɛmbɛ nɔɔ bi fika ku libi, dee na dɛdɛ a wata a di ten dɛ.

²¹ Nɔɔ hɛn di wata dɛ, hɛn da wan soni ta lei u fu di dopu di u ta dopu fa u dɛ aki. An dɛ taa sundju a ta puu a u sinkii e, ma a ta lei sɛmbɛ taa u mbei buka ku Gadu ku wan limbolimbo hati, fuu sa feni heepi nɛɛn. Nɔɔ di heepi dɛ, u sa feni ɛn fu di Jesosi Keesitu bi toona weki baka a dɛdɛ.

²² Nöo di a weki baka, hën a subi go tee a liba ala e, nöo awa a dë a di kaba heima kamian a letimaun sê u Gadu. Nöo hii dee basia u Masa Gaangadu köndë tuu, ku hii takima, te kisi ku hii dee kaakiti u mundu tuu fiaa dë nëën basu fa u dë aki. Hën abí taki a de liba.

4

Aki ta lei fa wan njunjun libi

dë fanöudu tjika.

¹ Söö. Wë dee sëmbë, kumafa u taki dë, [Jesosi, Keesitu hën tja sitaafu nëën sinkii. Nöo sö nöo unu seei musu dë kabakaba u tja sitaafu tu e. Wë biga te i ta tjëen söndö guunjan fu di i ta mëni Masa Jesosi hedi, nöo a o ta seeka di hati fii te nöo joo ko kaba seei ku hogi du.

² Nöo dee taku hangí ta ko a u libisëmbë hati, ja o dë a de leiki möön, ma joo ta dë a Masa Gaangadu leiki fu hii di libiten fii di fika da i a goonliba aki. Fa a kë fii du, nöo sö joo du.

³ Biga un bi ta libi te tjika kaa kumafa dee sëmbë an sabi Gadu ta libi e. Un bi ta du fanafiti soni a di sê u manu ku mujëe. Un bi ta miti makandi ta bebe ta döngö ta bai ta kai olo ta booko Gadu wëti tee, ta begi dee soni dee an dë fanöudu fuun begi. Dee lö libi dë wë un bi ta libi.

⁴ Ma fa u dë aki, wan ta libi sö möön. Nöo a ko bigi seei da dee sëmbë unu ku de bi ta libi dee lö libi dë makandi. A ko fika de ta luku unu kuma wan hii oto sëmbë fu di wan ta kule go mökisi ku de möön a dee peipei hogi de ta du. De ko ta kosi unu seei.

⁵ Ma de musu fu piki di Sëmbë nöömö e, di dë kabakaba fu kuutu hii sëmbë, dee dëdë wan ku dee libi wan tuu.

⁶ Fëen mbei di buka u Masa Jesosi bi konda da dee sëmbë dee dëdë kaa e, fu aluwasi fa de bi kisi sitaafu dëdë a libisëmbë fasi seei, ma nöo di akaa u de sa feni libi a Gadu.

Aki ta lei fa i musu wooko

ku dee kõni Gadu da i.

⁷ Dee sëmbë o, fa u dë aki di ten ko zuntu u hii soni musu kaba, nöo un musu dë ku fusutan e, fuun sa begi Gadu a wan bumbuu fasi.

⁸ Ma di gaan soni, hën da un musu ta lobi unu na unu makandi gaanfa. Biga ee i lobi wan sëmbë, nöo ee a ta du sëmëni soni seei dee an ta kai, ma nöo ja o si de biga i lobi ën.

⁹ Nöo un musu ta kisi unu seei ta hoi a wosu ku piizii e, söndö guunjan, dee sëmbë.

¹⁰ Nöo fa Masa Gaangadu paati dee kõni fëen da unu dë, hiniwan fuunu musu ta wooko ku di fëen a wan fasi di ta heepi otowan e. Biga a da unu de peipei ku ën bunuhati, nöo un musu ta wooko ku de a wan futoou fasi.

¹¹ Kuma ee wan sëmbë i abi di kõni fii ta konda Gadu wöutu da sëmbë, nöo i musu fan gbelingbelin be de sabi taa Gadu wöutu seei di dë. Ee wan sëmbë i ta heepi sëmbë a soni, nöo ja musu du ën ku i seei kaakiti. Ma i musu du ën ku di kaakiti u Gadu. A hii dee lö soni dë tuu, Masa Gaangadu hën nöo musu kisi gafa e. Biga hën wë ta da u dee kõni fu di u nama ku Jesosi Keesitu. Fa a sai dë, hën nöo musu feni hii nëbai ku hii kaakiti fu nöömö teego. A tan sö.

Aki ta taki soni u sitaafu möön.

¹² Wë un dee lobi sëmbë u mi dë, wan musu tei di sitaafu un ta tja naandë u wan gaan soni e, hii fa a hebi seei. Wan musu luku ën kuma wan soni di an bi musu miti unu.

¹³ Ma be un ta wai seepi. Biga un ko ta fii makandi ku „Masa Jesosi„ Keesitu a dee sitaafu de a bi tja. Nöo tee di juu ten dou faa ko a limbo fu hii sëmbë musu si di gaan waiti fëen di a abi, nöo woon ko ta wai gaanfa seei awaa.

¹⁴ Ee sëmbë kosi unu fu di un nama ku Masa Jesosi Keesitu hedi, nöo hën da Gaangadu naki unu kôlôku e, dee sëmbë. Wë biga di nëbai Akaa fëen seei, hën wë dë a unu liba dë.

¹⁵ Ma nöo dee sitaafu dee un ta tja dë, de an musu dë fu di i bi kii sëmbë e, ee nasô fu di i bi fufuu. An musu dë tu fu di i ta hulu sëmbë soni hedi, ee nasô fu hiniwan sootu pei hogi i sa du. Na fu dee lö soni hedi un musu kisi sitaafu e, dee sëmbë.

¹⁶ Ma ee fu di un nama ku Masa Jesosi Keesitu hën abi di sitaafu de ta sitaafu unu dë, nöo sen an musu kisi unu fu di dë hedi e. Ma be i ta gafa Gadu nöo fu di a si taa i waiti tjika u ta tja di në taa i nama ku Masa Jesosi.

¹⁷ Fa u dë aki, nöo di ten kisi fu di kuutu u Gadu musu seti. Nöo ku u dee sëmbë fëen wosu dendu fosu wë a o seti ën. Wë nöo ee u dee sëmbë fëen seei a ta sitaafu fa u dë aki, nöo dee sëmbë dee an kë piki ën buka wë? Na di u de o möön hebi nö?

¹⁸ A dë leti kumafa de bi sikifi a di Buku taa:
Ee dee sëmbë Gadu ta luku nëen wojo fu bumbuu sëmbë,
ee de musu tja sô wan gaan sitaafu
ufô Gadu sa heepi de „puu hogi a de hati„
nöo dee oto sëmbë wë, dee an dë a Gadu soni seei,
ku dee hogilibima.
Di u de an o möön hebi u tja nö?

¹⁹ Nöo da sô e, dee sëmbë. Ee Masa Gadu kë fuun musu ta tja sitaafu ufô, nöo un disa unu seei nëen maun nöo e, be un ta du bunu nango nöömö. Biga hën mbei unu, nöo a dë wan Sëmbë di i sa abi futoou nëen liba nöömö.

5

Aki ta taki soni u dee sikapu u Gadu ku dee tiima u de.

¹ Awa mi kë fan ku unu dee sëmbë dee ta dë tiima fu otowan. Fa mi dë aki, miseei dë wan tiima tu e, hën mbei mi sa feni pasi u fan ku unu sô. Biga miseei bi si ku miseei wojo fa „Masa Jesosi„ Keesitu bi tja sitaafu di a bi dë a goonliba aki. Nöo te di juu kisi fu di waiti fëen di a abi musu ko a limbo u hii mundu si, nöo miseei o dë a dendu ta njan di piizii dë tu.

² Nöo mi taki e, taa un musu ta luku dee sëmbë u Gadu bunu, dee dë a unu maun dë. Un musu dë da de kuma wan sëmbë ta luku sikapu ta tja de buta a pasi tololoo fu de an kaba a sôsö. Sö un musu ta dini de tjika. Nöo wan musu ta du ën a wan duwengi fasi e, ma be un ta du ën ku piizii, ku wai hati seei. Biga sô Gadu kë. Nöo wan musu du ën tu fu di un giui u möni hedi, ma fu di un abi wan gaan hanga i unu hati fu heepi sëmbë.

³ Fa Gadu buta dee sëmbë a unu maun fuun ta luku de dëen dë, nöo wan musu ta pëe basi a de liba e, ma be un ta libi ku de a wan suti fasi fu de sa djeesi unu.

⁴ Nöo te di Möön Gaan Sikafuma ko a limbo u hii sëmbë si ën, nöo woon kisi wan gaan paima nëen.

„Dee sëmbë o, wan sabi fa de ta du te wan sëmbë wini a wan fia kule nö? De ta bisi ën wan uwii kaapusa ta wai ku ën fu di hën da di winima. Sö wan

paima di sēmbē dē ta kisi. Ma di paima fuunu di woon kisi a bakaten, a o mōön waiti gaanfa mōön di uwii kaapusa u di winima dē e, biga di fuunu an o dēē kaba a sōsō mōönsō.

⁵ Nōō awaa mi o taki wan soni da un dee kijoo mii tu taa un mēni dee sēmbē dee dē gaan wan fuunu e, fuun saka unu seei a de basu. Nōō hiniwan daka un musu ta abi saka fasi da unu na unu, kuma wan koosu di i lo' u ta bisi hiniwan daka, an ta kumutu a i sinkii. Sō di sakafasi musu dē gaan soni da unu tjika. Wē biga a dē a di Buku taa:

Gadu dē felantima u dee sēmbē dee abi gaan fasi,
ma dee sakafasi sēmbē a ta heepi ku ēn bunuhati.

⁶ Nōō fēēn mbei i musu saka i seei a Masa Gaangadu basu, be a tii i ku ēn kaakiti maun. Nōō te di juu kisi nōō hēnseei o hopo i.

⁷ Nōō be i tuwē hii dee fuka fii tuu da Gadu e, dee sēmbē, biga a a' toobi ku i.

⁸ Nōō mi taki e, un musu dē setseti ku wojo limbo. Biga di gaan felantima fuunu de kai di didibi ta waka zuuu sō ta lontu leti kuma hogimbeti ta suku ambē a sa feni faa tēnē pisipisi njan.

⁹ Nōō i musu abi biibi a Gadu fii sa taanpu tuwē gogo dēēn e, be an feni i kisi.

Fa un ta tja sitaafu dē fu di un ta biibi ēn hedi, nōō na unu nōō ta tja dee sitaafu dē e, dee sēmbē. Sō nōō dee otowan fuunu dee ta biibi Masa a kamiankamian a di goonliba aki ta tja de tu.

¹⁰ Nōō di Gadu fuu di abi hii bunuhati o dē ku unu e. Hēn bi kai unu fuun ko feni di waiti fēēn di ta dē u nōömō, fu di un ko nama ku Jesosi Keesitu. Nōō dee sitaafu an o dē u nōömō e, dee sēmbē, ma de o dē u wan pisiten nōō. Nōō baka fēēn, nōō Gadu o da unu bōō. A o mbei un ko taanga gingin a di biibi, kuma wan sitonu posu di an sa hōn kai.

¹¹ Fa Gadu sai dē, hēn nōō da di Gadu di abi kaakiti fu nōömō e. A tan sō.

Aki Petuusi ta tapa di biifi.

¹² Fa mi ta mbei di biifi da unu aki, dee sēmbē, nōō Silifani di mi ta si u wan futoou sēmbē fuu, hēn wē heepi mi sikifi ēn. Nōō mi mbei ēn a wan sati fasi sō fuun feni degihati nēēn. Biga dee soni mi sikifi aki, de ta lei unu di bunuhati u Gadu fa a dē tuutu soni tjika, nōō un musu taanpu nēēn gingin e, dee sēmbē.

¹³ Nōō dee biibima u Masa Jesosi dee ta ko makandi a Babilon, dee Gadu bi pii tei leti kumafa a tei unu, nōō de ta manda gaan odi da unu e, ku Maikusi di mi ta si kuma mi seei miii.

¹⁴ Nōō un da unu na unu gaan odi e, ta baasa unu seei makandi a wan lobi fasi.

Nōō sō e, dee sēmbē. Un musu dē ku kōtōhati, hii un dee sēmbē tuu dee ko nama ku Jesosi Keesitu. A tan sō.

Di u tu biifi u Petuisi

Wan wõutu a fesi.

A di biifi aki, Petuisi bai dee biibima u Masa Jesosi a dee peipei lei sèmbè ta tja ko ta ganjan de dè. Biga so sèmbè ta lei de taa Masa Jesosi an o toona ko mōön, nōö de sa libi u de kumafa de kè.

Ma Petuisi taa ee de libi hogilibi, nōö de o kisi sitaafu fëen nōömö te di kuutu daka u Gadu dou. Hën mbei de musu biinga u de libi kumafa Gadu kè.

Aki di biifi seti.

¹ Söö. Wë dee sèmbè, mi Simon Petuisi ta mbei di pampia aki. Fa mi dè aki, mi dè wan futuboi fu Jesosi Keesitu, biga mi da Tjabukama fëen. Nōö mi ta mbei di biifi aki da un dee sèmbè dee ko ta biibi Masa Jesosi. Nōö mi sabi taa di biibi fuunu dè, a dè wan gaan bumbuu soni seei da unu, leti kumafa a dè da u tu.

Nōö di soni mbei u ko ta biibi, dee sèmbè, fu di di Gadu fuu di u ta dini aki ku di Heepima fuu, Jesosi Keesitu, ta woko ku leti. „De an ta luku taa wan sèmbè bunu mōön otowan,„ nōö hën wë mbei u ku unu tuu ko ta biibi ën makandi.

² Wë nōö fa un ko sabi Masa Gadu ku Masa Jesosi dè kaa, nōö un musu ko sabi de mōönmōön eti e. Biga mōön un ko sabi de, nōö mōön de o dè ku unu ku de bunuhati ta da unu böö.

Aki ta lei fa u musu libi fu di Gadu kai u ko sèmbè fëen.

³ Nōö mi taki e, dee sèmbè, di fa Masa Gadu abi kaakiti tjika dè, nōö a da u hii soni u abi fanõudu fuu sa abi libi fu teego, hën tu fuu sa libi a wan leti fasi nëen wojo a goonliba aki. Nōö fu di u ko sabi ën, hën mbei a da u dee soni dè. Biga hën kai u fuu sa kisi di waiti fasi di hënseei abi, nōö a kai u tu fuu ko bumbuu sèmbè a hii fasi leti kumafa hënseei dè.

⁴ Wë nōö di u dè a dendu u dee soni dè kaa, nōö Gadu paamusi u sòmëni gaan bumbuu soni e. Nōö ee u tei dee soni a paamusi u naandè ta libi ku de, nōö woo ko kisi di fasi u Gadu a u libi. Nōö dee poipoi libi u goonliba aki an o feni u kisi mōönsö, biga wa o ta mëni de seei fuu kè de.

⁵ Dee sèmbè, fa i si un ko ta biibi Masa Jesosi dè, nōö an tjika eti e. Ma i musu biinga fii libi bunu a hii futu. Nōö na di dè nōö, ma i musu biinga tu fii sabi soni „u Gadu,„ mōön fini.

⁶ Nōö na di dè nōö, ma i musu biinga fii tii i seei a soni tu. Nōö na di dè nōö, ma i musu biinga fii ta abi taihati a soni go dou. Nōö na di dè nōö, ma i musu biinga fii ta mëni Gadu a hii soni di i ta du.

⁷ Nōö na di dè nōö, ma i musu biinga fii libi ku dee otowan fii kuma baaa ku baaa. Nōö na di dè nōö, ma i musu biinga fii lobi di otowan fii te dou söndö ganjan e.

⁸ Biga ee dee lö soni u kai dè ta göö ta ko mōönmōön a di libi fii, nōö di fa i ko sabi Masa Jesosi Keesitu dè, nōö an o dè u söösö. Ma a o tja gaan wini ko da Gadu.

⁹ Ma ee dee lö soni dè an dè u sèmbè si a i libi, nōö hën da ja a' fusutan. I dè kuma bookowojoma, ja sabi naasè i nango, kuma i fëekëtè taa Gadu bi wasi dee hogi du fii puu a i liba.

¹⁰ Dee sɛmbɛ, wan si taa Masa Gaangadu kai unu tei fuun ko sɛmbɛ fɛɛn nɔ? Wɛ nɔɔ un musu biinga be a dɛ sɔ tuu a unu libi fu sɛmbɛ si e. Biga tɛ un biinga ku dee soni u taki dɛ, nɔɔ wan o kai kumutu a di pasi u Gadu mɔɔnsɔ.

¹¹ Nɔɔ te di juu dou, nɔɔ de o tei unu ku gaan wai seei a di kɔndɛ ka di Heepima fuu Masa Jesosi Keesitu dɛ kɔnu ta tii fu nɔɔmɔ.

¹² Ma fa mi ta fan aki seei, dee sɛmbɛ, ma mi sabi taa un sabi dee soni dɛ kaa e. Biga un ta hoi gingin a dee tuutuu soni u Gadu dee un bi kisi. Ma tɔkusee mi o toona ta taki de da unu a bakafutu nɔɔmɔ.

¹³ Nɔɔ a bunu tu fu mi toona ta mɛni unu a dee soni de fu sɔ langa libi dɛ a mi sinkii eti.

¹⁴ Biga wɛ mi sabi taa abiti mɔɔn nɔɔ di sinkii u mi aki o go fika a wan sɛ ala. Sɔ Masa Jesosi Keesitu lei mi limbolimbo kaa.

¹⁵ Nɔɔ fɛɛn mbei mi o ta biinga seei fu te di ten mi go, nɔɔ dee soni aki musu fika da unu, un ta mɛni nɔɔmɔ.

Aki Petuisi ta taki fa a bi si

di hei u Masa Jesosi.

¹⁶ Dee sɛmbɛ o, wan sabi fa u bi konda da unu kumafa Masa Keesitu Jesosi abi kaakiti tjika nɔ, ku fa a o toona ko a di goonliba aki? Wɛ nɔɔ dee soni naandɛ, na mindimindi soni u bi taki da unu e. Nɔɔ na libisɛmbɛ kɔni u bi tei taki de da unu tu, kwetikweti. Ma u seei bi si di hei fɛɛn ku di kɔnufasi fɛɛn di a abi ku u seei wojo.

¹⁷⁻¹⁸ Biga di a bi dɛ a goonliba aki, nɔɔ u ku ɛn bi dɛ makandi a di kuun liba naandɛ. U seei jesi bi jei limbolimbo kumafa di tɔngɔ bi kumutu a liba ala fan ku u. Di juu dɛ, hɛn Tata, di da di gaan nɛbai Gadu fu mundu, bi dɛɛn gaan hei di a taa: "Wan si di lobi Womi Mii u mi aki nɔ? Libi fɛɛn ta kai ku mi tee."

Sɔ wan tɔngɔ kumutu a di kaba hebi kamian ala e, nɔɔ u bi dɛ leti dɛ di di soni pasa.

¹⁹ Wɛ nɔɔ fa u si di soni dɛ, dee sɛmbɛ, nɔɔ dee soni dee tjabukama bi sikifi a fesi, de tuu ko dɛ mɔɔn limbo da u awaa. Nɔɔ a o bunu da unu tu ee unu seei tei dee soni dee tjabukama bi sikifi ta pakisei. Biga de o dɛ da unu kuma wan faja ta sɛndɛ a dungu ta lei unu di pasi, fu tee di daka Masa Jesosi toona ko. Nɔɔ a di daka dɛ, nɔɔ hii fusutan fuunu tuu o ko limbo seei gbegedee, kuma di gaan teeja di ta tja didia ko.

²⁰⁻²¹ Nɔɔ wan soni un musu sabi gbelingbelin, dee sɛmbɛ, taa dee soni dee tjabukama u Gadu bi sikifi buta a Gadu Buku, nɔɔ na wan u de de bi sikifi ku deseai kɔni e. Nɔnɔ. Ma fu di dee tjabukama bi dɛ apaiti sɛmbɛ u Gadu, nɔɔ hɛn di Akaa fɛɛn ko a de liba hɛn de sikifi de. Nɔɔ sɔ.

2

Aki ta lei taa te i du hogi,

nɔɔ joo kisi sitaafu fɛɛn.

Jud. 3-13

¹ Ma nɔɔ dee sɛmbɛ, fa i si u bi taki u dee fesiten tjabukama u Gadu dɛ, nɔɔ ganjansɛmbɛma bi dɛ leti a de dendu dɛ e, ta mbei taa de ta tja Gadu buka tu. Nɔɔ leti sɔ nɔɔ ganjan leima o dɛ a unu mindi dɛ tu, nɔɔ sapisapi de o ta tja dee lei u de ta ko fu de kaba sɛmbɛ a sɔsɔ puu a Gadu pasi.

Ma fa dee lõ leima o sai dë, libi u de o ta lei taa Masa Jesosi an bi puu de a hogilibi basu eti e. Nöo fëen mbei hesihesi seei de o hai di sitaafu u Gadu ko a de liba.

² Biga sômëni sëmbë o bia ko ta waka a de baka ta libi di wan seei poipoi libi, sensen wan, di de ta libi naandë. Nöo a di fasi dë, de o ta mbei sëmbë ko ta kosi dee bumbuu lei u Gadu dee a buta da u aki.

³ Fa i si dee lõ leima sai dë, langahati tö nöo de abi sô, nöo de o ta mindi sômëni soni ta taki fu de sa feni soni a unu njan. Ma nöo mi taki da unu taa di sitaafu di de o kisi a Gadu, a bi dë gaanduwe a de liba zëngëe dë kaa, kuma lakpë. Nöo soni an o tapëen fu an kai a de liba.

⁴ Biga na dee basia fëen köndë seei Gadu bi disa söndö da sitaafu e, di de bi booko hën wëti. A tuwë de go a di gaan sitaafu kamian a wan dungudungu baaku dendu tapa buta dë, fu te di daka dou, nöo a kuutu de da sitaafu.

⁵ Nöo söseei tu, a di ten u Noa Gadu an bi disa dee sëmbë dee bi libi hogi nëen wojo. A bi sitaafu de e. Biga a singi hii di goonliba tuu pii, kaba dee hogi sëmbë naandë faa puu. Noa ku dee sëbën sëmbë fëen wanwan nöo bi fika. Nöo di soni mbei Gadu tjubi de, biga Noa hën bi ta konda da dee sëmbë u di ten dë fa u de musu libi bunu a Gadu wojo.

⁶ Söseei tu, Gadu an bi disa de tu köndë de kai Sodom ku Gomola söndö da de sitaafu e. A tjuma de seei gililili fia te a fika sösö sindja, fu dee hogi sëmbë u dee köndë dë hedi. Nöo a di fasi dë a buta wan maaka da dee oto sëmbë dee o ko a baka, be de tei köni a de taa ee deseei ta poi Gadu wëti nöo söseei a o sitaafu de tu.

⁷ Di juu dë, nöo Lotu wanwan tö nöo a bi puu, biga hën bi ta libi a wan leti fasi a Gadu wojo. Fa a bi dë a dee sëmbë mindi dee bi ta libi söndö wëti naandë, nöo a bi dë fukafuka a hati seei fu dee gaan hogi sensen libi de bi ta libi dë hedi.

⁸ Biga hënseei bi ta si ku ën wojo, a ta jei ku ën jesi daka na daka dee soni de ta du, nöo dee poipoi libi u de naandë bi ta da di bumbuu sëmbë dë gaan fuka seei nëen hati. Nöo hën Gadu puu ën fu an musu kisi sitaafu mökisi ku dee hogilibi sëmbë naandë.

⁹ Nöo sö i ta si taa Gadu sabi fa faa puu dee sëmbë dee ta libi bunu nëen wojo fu de an kisi sitaafu. Ma nöo a sabi tu, fa faa hoi dee sëmbë dee ta libi hogi nëen wojo, buta de fu tee di daka dou faa kuutu de da de di sitaafu di de bi musu kisi awaa.

¹⁰ Ma nöo dee sëmbë dee o kisi di möön gaan sitaafu, nöo de da dee sëmbë dee ta hopo deseei ta tuwë fu de piki dee gaan poipoi soni de hati ta kë du. Nöo di soni mbei de o kisi sitaafu sö, fu di de an ta kë dë a tii basu möönsö.

Aki ta taki soni u dee ganjansëmbëma.

Nöo dee poipoi leima u ta taki aki, un be mi konda soni u de da unu. Fa de sai dë, nöo de abi degihati e. Gaanfasima seei de dë. De an ta fëëe na wan wojo soni seei. Biga dee gaan hei tiima u goonliba aki te kisi dee u mundu ala tuu de ta kosi. Sö de abi degihati tjika.

¹¹ Ma nöo dee basia u Gadu Köndë, hii fa de abi kaakiti ku taki möön dee sëmbë u ta taki aki, ma de an o kosi dee lõ hebi tiima dë e. Na wan daka de o kaagi de da Gadu. [Biga de sabi di kaakiti u de.]

¹² Ma dee taku leima mi ta taki aki, de, de aan toobi. De ta sösö hii soni te dou ku dee soni dee de an ta fusutan tuu.

Fa dee leima sai naandë, de dë leti kuma hogi mbeti e, biga de an ta du soni ku pakisei. De ta du di soni de kë du nöo a kaba. Nöo fa de ta du hogi ku sëmbë

ta poi de libi kaba a sösö tjika dë, nöö a fiti u de kisi de kii tu, kumafa de ta kii takumbeti.

13 Nöö mi taki da unu, taa te wan daka Masa Gadu o kaba de a sösö tu e. A o paka de di paima u di hogi di i si de ta du dë.

Biga fa dee leima u ta taki aki sai dë, hiniwan hogi pakisei di ko a de hati, nöö de ta du ën seei wajaa a lanti a ndeti ku didia söndö sen. Hën da piizii u de kaa. Fa de sai dë, de dë leti kuma sumuku udu a otowan dendu, fii puu tuwë go a wan së ala. Biga hii fa i si de dë ku unu a tafa sindosindo ta njan ku unu makandi naandë, piizii u deseei tö nöö de ta suku.

14 De ta tuwë wojo ta luku dee mujëe u de kisi tja go booko Gadu wëti. De an ta kaba seei u du hogi möönsö. Sö dee sëmbë naandë dë e.

Fa de sai dë, de ta suku u hai dee sëmbë dee an dë sö taanga a di biibi tja go a de, fu de libi hogilibi kuma de. Nöö di langa bëe u möni di de abi, hën buta de de lei fa u de wini möni a sëmbë tee de ko basi fëen. Mi taki da unu taa di siba u Gadu dë a dee lö sëmbë dë liba e.

15 Nöö dee sëmbë u ta taki aki, de kumutu a Gadu pasi gaanduwe kaa. De lasi go ta libi kumafa di mii u Beoli de kai Biliam bi ta libi e. Biga Biliam bi löbi möni tefa an bi a' toobi u du hogi faa feni ën.

16 Ma wan bi jei di soni bi pasa ku ën nö? Di mbeti de kai buliki a ta waka nëen liba dë, hën musu bia fan ku ën a libisëmbë töngö. Nöö sö i si taa di gaan tjabukama u Gadu naandë, nöö wan buliki hën Gadu bi musu tei bai ën puu a di wisiwasi fasi fëen di a ta waka dë, ufö a sa jei.

17 Wë nöö dee lö poipoi leima dee mi ta taki aki, be mi konda soni u de da unu möön kumafa de dë. De dë kuma wan kiiki ka i nango ta ba wata fii bebe, nöö hën i naki te i go dou, a dëe koti kalalaa. Ja feni wata nëen fii bebe möönsö. Sö dee lö sëmbë dë dë e. De dë kuma te tjuba baaka faa kai fii feni wata, te wan pisi wan gaan ventu ko böö ën vuuu tjëen pasa fiaa, ja feni wata möönsö. Sö dee sëmbë i si naandë dë. Hën mbei Gadu seeka wan gaan dungu kamian faa tuwë de go.

18 Dee lö sëmbë dë, de ta waka ta poolo ta taki sösö ta njan buka. Nöö fu di de sabi taa hogi pakisei ta dë a libisëmbë hati kaa, hën de ta taki soni nöömö fu de weki dee hogi pakisei dë. Biga de ta suku dee sëmbë dee bi kumutu djunsudjunsu a hogilibi basu, u de toona tja de go ta du hogi möön. Sö dee sëmbë aki hogi tjika e.

19 De ta paamusi de taa ee de ko nama ku de, nöö de o dë fiifi, de aan fu hoi wëti möön. Ma hii fa i ta jei naandë, deseei an dë fiifi e. Hogilibi wini de buta nëen basu gaanduwe. Biga di soni di ja sa kumutu nëen basu, nöö i da saafu fëen kaa.

20 Wë nöö mi taki e, so u dee sëmbë aki bi kumutu a dee poipoi libi u di goonliba aki basu te de kaba. Biga de bi ko sabi Jesosi Keesitu di dë u Masa ku u Heepima. Hën de toona sai dë ta du sösö teefa hogilibi toona wini de möön, de ko möön hogi möön leki fa de bi dë a fesi.

21 Wë mi taki e, a bi sa möön bëtë ee de an bi sabi fa u de libi bunu a Gadu wojo wan daka, möön leki de ko sabi ën te de kaba hën de bia toona go a dee awoo libi u de go ta booko Gadu wëti möön. Di dë hogi poi e, dee sëmbë.

22 Sö wan sëmbë, i sa maakëen leti kumafa de ta koti wan nongö taa, di soni dagu balaki, hën seei a toona go njan. Söseei de taa i wasi hagu a wata te i kaba, hën a toona go logoda a pötöpötö dendu möön.

Dee sëmbë i si u ta taki aki, nöö sö de dë e.

3

Aki ta taki taa sēmbē o mbei

de fa, fu di de ta biibi taa

Masa Jesosi o toona ko.

¹ Sō wē un haika, dee lobi mati u mi naandē, disi mbei di u tu pampia di mi ta sikifi da unu kaa. Nōō a hii de tu pampia tuu mi ta konda soni a bakafutu da unu, be pakisei fuunu musu dē limbolimbo.

² Nōō mi kē fuun toona mēni dee soni dee fesiten tjabukama u Masa Gadu bi taki, ku dee soni Masa Jesosi u Heepima bi taki tu, dee un bi jei a u dee Tjabukama fēēn seei buka.

³ A di fosu kamian nōō mi kē fuun sabi taa a di kaba ten nōō wanlō mbeisēmbēfama o ko, nōō de o ta waka a dee taku kē u de hati baka. Nōō de o ta mbei un dee sēmbē u Gadu fa seei.

⁴ De o taa: “Wē di Jesosi bi paamusi taa a o toona ko a di goonliba aki, nōō naasē a dē? Dee gaan sēmbē fuu bi dēdē gaanduwe kaa ma soni an tooka mōōnsō. De an weki baka mōōnsō u Gadu musu kuutu de, kumafa un ta taki. Biga sensi Gadu mbei goonliba tee kisi di ten aki, nōō hii soni dē di wan seei fasi eti.” Sō de o ta taki ta tuwē da unu.

⁵ Ma nōō fa de o ta fan dē, kē seei wē de an kē sabi fa soni tooka tjika kaa e. Nōō de an kē sabi tu fa di fan u Gadu abi kaakiti tjika u te a taki wan soni nōō a ta pasa. Biga di Gadu mbei goonliba, nōō hēn a fan. Hēn wē di fan fēēn paati di wata buta hafu a liba, hafu a basu, di goonliba fuu aki ku dee teeja ku dee oto soni u ta si a liba ala tuu fika a mindi.

⁶ Nōō a baka fēēn hēn Gadu si taa libisēmbē ta libi hogi poi, hēn a tei dee wata dē hēn a singi hii di goonliba kaba a sōsō pii, be an fika kumafa a bi dē. Nōō fa dee sēmbē ta fan taa soni an tooka mōōnsō dē, nōō de an sabi taa sō dee lō soni dē bi pasa nō?

⁷ Nōō hēn a bakaten, hēn Gadu toona fan mōōn. A taa di goonliba fuu aki ku dee teeja te dou ku dee oto soni tuu dē a liba ala, de tuu o tjuma kaba wan daka nōōmō. Sō a taki buta dē kaa e. Ma nōō fa u dē aki, a ta tjubi dee soni dē eti, be di gaan kuutu daka dou ufō. Biga te wan daka, nōō Gadu o kuutu dee sēmbē dee an bi a' bisi ku di fan fēēn te a kaba, nōō a o manda de go kaba a sōsō. Nōō di juu dē, dee soni u taki dē tuu o tjuma kaba a sōsō. Sō Gadu taki buta e, dee sēmbē.

⁸ Hēn mbei wan musu piki dee sēmbē ta mbei sēmbē fa dē e.

Nōō wa musu pakisei tu taa kumafa libisēmbē ta konda daka aki, nōō sō Gadu hēn a ta konda. Nōnō. Biga a Masa Gadu wojo a dē sō taa wan daka dē kuma wan dusu jaa, wan dusu jaa dē kuma wan daka. Nōō sō e, dee sēmbē.

⁹ Sōseei wan musu pakisei kuma de taa fa Masa Jesosi taa a o toona ko dē, nōō a ta buuja poi. Nōnō, kwetikweti. Ma pasensi nōō a ta hoi da libisēmbē sō. Fa i si a sai dē, an kē fu na wan kodo sēmbē musu lasi kaba a sōsō. Ma a kē u hii sēmbē musu bia de libi ko nēēn, fu de sa kumutu a di sitaafu di u taki dē basu.

Aki ta lei andi o pasa te

Masa Jesosi toona ko.

¹⁰ Sōō. Wē dee sēmbē, un musu sabi taa te Masa Jesosi o toona ko nōō a o ko kuma wan fufuuma. Biga na wan sēmbē o sabi di daka. Nōō te a ko, nōō hii dee soni dee dē a liba ala tuu o bai gbou sō paaja go fiaa, de an o dē u si

möön seei. Di juu dē, nöö di goonliba aki ku hii dee soni tuu dē nëen dendu o tjuma gbegedee kaba fiaa.

¹¹ Nöö dee sēmbē, di i si dee soni dē o pasa sō, nöö an fiti fuu libi limbolimbo da Gadu nö?

¹² Fa u ta luku di daka dē, nöö un boo ta watji ēn seei ku wai ta biinga ta du soni fu di daka musu ko möön hesi. Biga hii fa i si dee soni u di mundu aki o jō kaba a sōsō ku di gaan kendi dē,

¹³ ma nöö wan oto paamusi dē eti e, dee sēmbē. Masa Gadu paamusi u taa wan njunjun goonliba ku wan njunjun mundu o ko a dee di dē kamian. Nöö di njunjun goonliba di o ko dē, nöö hogilibi an o dē nëen fu poi ēn möönsō e. Nönō. Ma leti libi wanwan nöö o dē nëen. Sō wē Masa Gadu paamusi u e.

¹⁴ Wē di un ta luku sō wan soni ku wai sō kaa, dee sēmbē, nöö un musu biinga seei fu te Masa Jesosi toona ko, nöö woon dē limbolimbo sōndō föutu ku kötōhati nëen fesi.

¹⁵ Nöö un musu abi ēn a unu pakisei taa fa Masa Jesosi an ko aki eti nöö pasensi a ta hoi da libisēmbē. Biga a kē da de pasi u de kumutu a dee hogilibi u de basu, hēn mbei an ko eti.

„Nöö fa mi ta fan aki taa Gadu o sitaafu hogilibi,„ nöö sō nöö u lobi baaa Paulosu ta sikifi tu, ku di gaan fusutan di Masa Gadu dēen.

¹⁶ Biga hiniwan biifi di a ta sikifi te a dou a dee lö soni aki, nöö sō nöö a ta taki tu. „Hii fa a taki taa Gadu puu u a dee wēti u Isaēli basu, ma hēnseei tu ta lei taa wa musu libi hogi libi möön e.„

Fa dee biifi u Paulosu sai naandē, dee sēmbē, soni dē a de dendu di ja sa fusutan wantewante e. Nöö fēen mbei dee sēmbē dee an sabi soni tjika ku dee sēmbē dee an dē gingin a di biibi, nöö de ta tei dee fan fēen tja go a sōsō sē. Nöö sō de ta du ku hii dee oto pisi u Gadu Buku tuu. Ma nöö fa i si de ta du ēn naandē, nöö de seei wē de ta kaba a sōsō e.

¹⁷ Wē dee sēmbē, di i si un sabi dee soni aki a fesi kaa, nöö un musu kōni seei ku dee fasifasi lei u dee sēmbē ta libi sōndō wēti naandē. Wan be de kisi unu tja go ku de e, fuun kai kumutu a di bumbuu kamian un sai naandē.

¹⁸ Ma nöö un musu ta da Gadu pasi be a sa lei unu hēn bunuhati möönmöön. Un musu ko sabi Jesosi Keesitu di Heepima fuu möönmöön tu. Biga hēn da u Masa, nöö hēn wanwan tō abi nēbai a mundu fa u dē aki te kisi fu teego. A tan sō.

Di fosu biifi u Johanisi

Wan wöutu a fesi.

Di sêmbê de kai Johanisi, a bi dë wan u dee tuwalufu bakama u Masa Jesosi dee bi ta waka ta lontu ku ên. (Bakaten de ko ta kai de Tjabukama.) Nöo hên mbei di pampia aki manda da wanlô biibima u Masa Jesosi a dee kamiankaman. A mbei ên da de fu di wanlô ganjansêmbêma bi ko a de ko ta mbei taa Gadu manda de. Ma na Gadu manda de e, ma de ko u ko ganjan dee biibima. Biga de ko ta lei de wanlô poipoi soni ta mindi soni da Masa Jesosi. Hên de toona lei de taa an dë fii hoi Gadu wêti, i sa libi fii kumafa i kê. Hên mbei Johanisi mbei di pampia aki, fa a leti de buta a pasi.

Aki Johanisi ta lei ambê

da Masa Jesosi.

¹⁻² Wê dee sêmbê, fa mi o fan ku unu aki, nöo mi o seti di fan ku wanlô soni u di Sêmbê de ta kai, di Wöutu u Gadu. «Hên seei da Masa Jesosi.»

Nöo a bigi u mundu Masa Jesosi bi dë kaa. «A bi dë ku Masa Gadu a liba ala teefa juu fêên dou, hên a saka ko a goonliba aki fuu sa si di libi u Gadu tuutuu. Nöo hên di a ko,» u ku dee otowan fuu bi jei di fan fêên. U bi si ên ku u seei wojo. U panjêên ku u seei maun. Nöo hên u toona ta konda da unu taa di Sêmbê dë, nêên di Libi u Teego dë di Masa Gadu manda da u aki.

³ Nöo dee soni u bi jei dë ku dee u seei wojo bi si, deseei u toona ta konda da unu aki, fuun musu sa feni di suti libi di u ku Masa Gadu ku ên Mii Jesosi Keesitu ta libi ku u seei.

⁴ Nöo hên i si u ta mbei di pampia aki da unu fuun musu dë waiwai te dou.

Aki Johanisi ta lei de taa ee wan sêmbê dë u Gadu nöo a musu

ta libi limbolimbo.

⁵ Söo. Nöo di Buka di Masa Jesosi bi da u fuu musu toona konda da unu, nöo hên nöo i si u ta konda da unu aki taa Masa Gadu aan na wan piki hogi nêên hati möönsö. A dë limbolimbo te dou. Na wan piki dungu seei dë nêên.

⁶ Nöo ee wan sêmbê i ta libi hogilibi ma i ta mbei taa i ta libi ku Gadu, nöo hên da i ta mindi soni e. Hên da a di sê u dungu i dë, biga ja ta libi a wan tuutuu fasi.

⁷ Ma ee u ta libi a di sê u limbo kumafa Masa Gadu ta libi limbolimbo, nöo woo ta libi suti ku u seei. Nöo woo dë limbolimbo tu. Biga fu di Jesosi Keesitu, di Mii u Gadu, lasi ên buuu fuu hedi kaa, nöo Masa Gadu ta puu dee hogilibi fuu tuu a u hati fuu ta dë limbolimbo.

⁸ Ma ee u ta mbei taa wa du hogi wan daka, wê nöo u seei u ta ganjan. Nöo hên da wa ta taki di tuu, biga wê u ta du hogi.

⁹ Ma ee u piki taki aai u ta du hogi tuu, nöo Masa Gadu an o hoi dee hogi du fuu nêên bêê möön. A o ta puu dee hogilibi tuu a u hati nöömö kumafa a bi taki. Wê biga an ta ganjan sêmbê möönsö.

¹⁰ Ma ee u piki taki nönö wa du hogi wan daka, nöo hên da u ta fia ku Masa Gadu taa a mindi soni da u. Nöo hên da di buka fêên an dë a u hati.

2

¹ Wê dee lobi mii u mi dë, di pampia i si mi ta mbei da unu aki sö, mi ta mbei ên fu wan musu du hogi. Ma ee a ko dë taa un du hogi, nöo un musu

sabi taa i abi wan Sëmbë dë a Masa Gadu bandja di ta begi ën da u. Hën da Jesosi Keesitu, di Sëmbë di an du hogi wan daka.

² Nöo hënseei paka di paima da u. Nöo di paima di a paka da u dë, hën da di dëdë a dëdë fuu hedi, fu Masa Gadu an hoi dee hogi du fuu nëen bëë möön. Ma na u wanwan a dëdë paka di paima da e, ma a dëdë pakëën da hii mundu.

³ Nöo ee u ta piki Masa Gadu buka ta libi kumafa a kë, nöo woo sabi tuutuu taa u ku ën dë.

⁴ Ma ee wan sëmbë i ta mbei taa i sabi Masa Gadu ma töku ja ta piki ën buka ta libi kumafa a kë, nöo hën da ja sabi ën. Soni i ta mindi. Di buka u Masa Gadu an dë a i hati.

⁵⁻⁶ Ma ee wan sëmbë i ta piki ën buka nöo hën da i lobi ën tuutuu ku wan hati.

Nöo ee i kë sabi taa i ku Gadu dë, nöo i musu ta luku i libi ee i ta libi bunu. Biga di sëmbë di ku Gadu dë, nöo hën ta libi kumafa Masa Jesosi bi ta libi di a bi dë a di goonliba aki.

Aki Johanisi da de

wan njunjun wëti.

⁷ Nöo un dee lobi mati u mi dë, mi ta manda wan wëti da unu aki, taa un musu lobi unu seei. Nöo an dë wan njunjun wëti e. A dë di awoo wëti di de bi tja ko konda di ku a fesi.

⁸ Ma töku a ko dë kuma wan njunjun wëti aluwasi fa a bi dë a fesiten seei. Biga te un ta piki di wëti aki ta lobi sëmbë kumafa Masa Jesosi ta lobi sëmbë, nöo sëmbë ta si andi da tuutuu lobi awaa. Nöo di dungu u bi dë ta pasa, limbo ta ko kaa.

⁹ Ma ee wan sëmbë ja lobi dee oto biibima kuma i seepi nöo ja sa konda taa i dë a limbo e. A dungu i dë.

¹⁰ Ma ee wan sëmbë i lobi dee oto biibima kuma i seei, nöo hën da i dë a limbo. Soni an dë u bia i hati te nöo i go du hogi. Söseeri ja o ganjan di otowan fii faa lasi pasi tu.

¹¹ Ma ee wan sëmbë i ta buuse di otowan fii, nöo a dë kuma i ta waka a dungu söndö faja, ja ta si soni. Ja sa' naasë i nango.

Aki ta lei ambë Johanisi

sikifi di biifi da.

¹² Wë un dee mii, mi ta mbei di pampia aki da unu biga Masa Jesosi paka da unu kaa, nöo Gadu an ta hoi dee hogi du fuunu nëen bëë möön.

¹³ Wë nöo un dee gaan womi, mi ta mbei di pampia aki da unu tu, biga un sabi di Sëmbë di bi dë a seti u mundu.

Wë söseei un dee kijoo, mi ta mbei di pampia aki da unu tu, biga un wini di didibi kaa.

Nöo un dee piki mii dë, mi ta mbei di pampia aki da unu tu, biga un sabi u Tata a liba kaa.

¹⁴ Nöo un dee gaan womi, mi ta mbei di pampia aki da unu, biga un sabi di Sëmbë di bi dë a seti u mundu.

Dee kijoo mii, mi ta mbei di pampia aki da unu biga un ta biibi taanga a Masa Gadu. Di buka fëen ta dë a unu hati nöömö. Un wini di didibi kaa.

¹⁵ Dee mii o, wan musu lobi dee soni u di goonliba aki e, dee an ta kai ku Gadu. Biga ee i ta lobi de, nöo hën da ja ta lobi u Tata Masa Gadu.

¹⁶ Biga dee taku kë u libisëmbë hati ku langawojo ku gaan fasi, nöo dee lö soni dë dë soni u goonliba. De an dë fuu Tata Masa Gadu.

¹⁷ Nöo a a' wan daka di goonliba aki o kaba ku hii dee lö libi dë tuu fia. Ma dee sëmbë dee ta piki Masa Gadu buka, de, de an o kaba möönsö, ma de o dë u teego.

Aki Johanisi ta bai de taa de musu mëni deseeri ku dee buusema u Masa Jesosi.

¹⁸ Dee mii o, di kaba ten u goonliba dou kaa e. Biga de bi taki da unu kaa taa te wan ten wan Gaan Buusema u Masa Jesosi Keesitu o ko a goonliba. Nöo fa u dë aki, u musu sabi taa di kaba juu ta zuntu, biga di fasi u di sëmbë dë dë a sëmëni sëmbë hati ta wooko kaa.

¹⁹ De bi dë ku u a fesi ma de kumutu go u de, biga u ku de an dë di wan. Biga ee u ku de bi dë di wan, nöo de an bi o go. Ma de kumutu go, hën mbei hii mundu si taa u ku de an dë di wan.

²⁰ Ma unu, wan dë sö e. Biga Masa Gadu tuwë di Akaa fëen a unu liba kaa. Nöo hën ta mbei un ko sabi fuun wegi dee buka luku undi da ganjan wan ku undi da tuutuu wan.

²¹ Wë nöo fa i si mi ta mbei di pampia da unu aki, na fu di wan sabi dee tuutuu soni u Masa Gadu mbei e, ma fu di un sabi de. Nöo un sabi taa di Buka u Masa Gadu ku di buka u dee ganjansëmbëma an dë di wan.

²² Biga di sëmbë di o ko ta fia taa Masa Jesosi nëen da di Paamusi Könu Masa Gadu manda ko da u aki fuu ta biibi ën, nöo di sëmbë di ko taki sö, hën da wan ganjansëmbëma. A dë buusema seei u Masa Jesosi. An kë u Tata Masa Gadu, nöo an kë di Womi Mii fëen tu.

²³ Nöo ee wan sëmbë ko ta fia taa Masa Jesosi an dë di Womi Mii u Gadu, nöo Masa Gadu hën Tata an o dë ku di sëmbë dë seei. Ma ee wan sëmbë i ta piki taa: "Aai, Masa Jesosi Keesitu hën da di Womi Mii u Masa Gadu tuu," nöo hën Tata o dë ku i.

²⁴ Nöo dee mii, di Buka de bi taki da unu a fesi, hën un musu ta hoi a unu hati ta biibi nöömö e. Nöo te un du sö kaa, nöo unu ku di Womi Mii u Masa Gadu ku ën Tata tuu o nama ko dë di wan fu nöömö.

²⁵ Nöo Masa Gadu o da unu di soni di a paamusi u, hën da di njunjun libi fëen di a o da u fuu ta libi nöömö u teego.

²⁶ Fa mi ta mbei di pampia aki, nöo mi ta mbei ën fu dee ganjansëmbëma hedi e, fu di de ta biinga u ganjan unu.

²⁷ Ma unu, fa un sai dë, Masa Gadu tuwë di Akaa fëen a unu liba kaa, nöo hën ta dë a unu hati nöömö. Wan a' fanöudu fu sëmbë lei unu möön biga di Akaa ta lei unu hii soni. Nöo fa a ta lei unu soni dë, a ta lei unu tuutuu soni e. An ta ganjan unu. Nöo fëen mbei un musu ta dë a Masa Jesosi leiki nöömö, kumafa a taki da unu. Wan musu bia toona disëen möönsö.

²⁸ Aai, sö a dë tuu, dee mii. Fa unu ku Masa Jesosi ko di wan dë, nöo wan musu disëen möönsö e. Biga a a' wan daka nöo a o toona ko a goonliba aki. Nöo te a ko, nöo ee u bi tan nëen leiki nöo wa o dë pantapanta. Sen an o kisi u fuu waka go nëen fesi.

²⁹ Wë nöo di un sabi taa Masa Gadu hën an ta du hogi möönsö, bunu wanwan nöo a ta du, nöo un musu sabi taa dee sëmbë dee ta libi bunu nöo de da miii fëen gbelingbelin.

3

Aki Johanisi ta lei de u de libi kuma de da miii u Gadu.

¹ Dee sëmbë o, de ta kai u Masa Gadu mii e. Nöo sö a dë. U da mii fëen tuu. Wë nöo ee u ta tja di në taa u da Gadu mii, nöo nëen da Masa Gadu lobi u te

na soni nō? Ma nōo dee sēmbē dee an sabi Masa Gadu, de an sa sabi soni fuu. Biga ee ja sabi soni fu wan tata, nōo ja o sabi soni fēen mii tu.

² Wē dee lobi mati u mi dē, fa u dē aki u da miii u Masa Gadu tuu. Nōo wa sabi fa woo dē eti e. Ma u sabi nōo taa te a o ko nōo u seei wojo o si ēn kumafa a dē, nōo woo tooka ko kuma hēn seei.

³ Nōo ee u dē ku di mēni aki, nōo woo ta biinga u hogi musu kumutu a u hati, fuu ko dē limbolimbo kumafa Masa Jesosi seei dē limbolimbo.

⁴ Biga di sēmbē di ta du hogi, nōo hēn ta booko dee wēti u Masa Gadu. Biga hogilibi hēn ta booko wēti.

⁵ Ma nōo u sabi taa Masa Jesosi bi ko a di goonliba aki u ko paka puu hogi a u liba da u.

Fa Masa Jesosi sai dē, dee mii, na wan piki sundju seei dē nēen hati e. Hii ēn hati tuu dē limbolimbo, biga an du hogi wan daka.

⁶ Fēen mbei ee i ku Masa Jesosi nama ko di wan, nōo ja o sa ta libi hogilibi nōomō. Biga di sēmbē di ta libi sō an sabi Masa Jesosi. An ta fusutan soni fēen mōonsō.

⁷ Wē nōo un dee mii dē, un haika e. Wan mbei sēmbē ganjan unu. Biga di sēmbē di ta libi leti kumafa Masa Gadu kē, hēn da bumbuu sēmbē kuma Masa Jesosi Keesitu.

⁸ Ma ee wan sēmbē libi an ta kai ku Gadu wēti, nōo sēmbē u di didibi di dē e. Biga di didibi bi ta libi hogi nōomō, sensi a fesiten tee kisi tide. An disa mōonsō. Hēn mbei di Womi Mii u Masa Gadu ko a di goonliba aki faa poi dee wooko u di didibi.

⁹ Fēen mbei ee wan sēmbē dē miii u Gadu nōo an sa ta libi a wan fasi nōomō di an ta kai ku Gadu. Biga Gadu dēen wan hati kuma di fēen seei di a abi, hēn mbei an sa ta libi hogi libi nōomō biga Masa Gadu hēn dēen Tata.

¹⁰ Nōo ee i kē sabi ambē da dee mii u Gadu ku ambē da dee mii u didibi, nōo i luku a di libi u de nōo joo sabi. Biga di sēmbē di an ta libi bunu, nōo hēn an sa dē mii u Gadu e. Sōseei ee wan sēmbē ja ta lobi di otowan fii, nōo ja dē Masa Gadu mii tu.

¹¹ Wē biga di awoo buka di un bi ta jei a fesi te kisi tide, nōo hēn da disi: u musu ta lobi di otowan fuu.

¹² Nōo wan musu abi hogihati kuma Kain. Kain bi dē sēmbē u didibi, hēn mbei a a' hogihati tefa a kii ēn baaa. Nōo faandi mbei a kii ēn? A kii ēn fu di hēn baaa bi ta libi bunu, hēn mbei a haun ku ēn tefa a kii ēn.

¹³ Wē nōo dee sēmbē, fēen mbei te u si wan sēmbē ta buuse u, nōo an musu bigi da u. Biga dee sēmbē dee an dē a di sē u Masa Gadu, nōo de an o lobi u mōonsō.

¹⁴ Ma u, u feni wan njunjun libi a Gadu. A fesi u bi dē kuma dēdē sēmbē ma u bi ta bōo nōo. Ma fa u ko dē aki, u sabi taa u feni wan njunjun libi biga u ko ta lobi dee sēmbē u Masa Jesosi.

Ma di sēmbē di ta buuse di otowan fēen, nōo hēn an kumutu a di sē u dēdē ko a libi eti e.

¹⁵ Biga ee wan sēmbē i buuse di otowan fii, nōo hēn da wisihatibōo i abi. Nōo un sabi taa ee wan sēmbē i a' wisihatibōo, nōo ja abi di teego libi u Masa Gadu mōonsō.

¹⁶ Dee mii o, ee u kē saandi da lobi, nōo u musu luku a Masa Jesosi Keesitu, fa a bi tei di dēdē fuu dēdē paka di paima fuu da u. Hēn wē da lobi e. Nōo sōseei u seei tu, u musu dē kabakaba fuu sa dēdē da di otowan fuu.

¹⁷ Ma ee wan sēmbē i dē nōo i a' dee soni u goonliba aki, nōo hēn i si otowan fii ta pena fu di aambi soni ma ja dēen soni mōonsō, nōo di sēmbē dē ja lobi Masa Gadu e.

¹⁸ Wë nõo dee mii u mi dë, wan musu ta lobi sëmbë ku buka wanwan e, ma a musu dë u si a i libi tuutu.

¹⁹ Nõo te u ta lobi sëmbë ta libi bunu ku de, nõo u sabi gbelin taa u dë a di së u Masa Gadu, nõo wa o fëëë ën fuu go nëën fesi.

²⁰ Ma aluwasi u seei hati taki da u taa wa libi bunu, ma tõku Gadu hei mõn libisëmbë hati e. A sabi hii soni.

²¹ Ma nõo ee hati fuu taki da u taa u ta libi bunu, nõo woo sa waka waiwai go a Masa Gadu fesi.

²² Nõo woo feni dee soni u ta hakisi, biga a si taa u ta piki ën buka ta libi kumafa a kë.

²³ Nõo di buka fëën di u musu piki nõo a dë tu fasi. Di fosu wan dë taa u musu biibi taa Jesosi Keesitu hën da di Womi Mii u Masa Gadu. Hën da di Paamusi Kõnu di a manda da u. Nõo di u tu dë taa u musu lobi u seei makandi kumafa a bi taki da u kaa.

²⁴ Nõo di sëmbë di ta piki Masa Gadu buka, nõo hën ku Gadu dë di wan. A ta libi ku Gadu, nõo Gadu ta libi ku ën. Nõo u sabi taa sô a dë tuu, biga di Akaa u Masa Gadu di a da u aki, hën dë a u hati ta piki u taa sô a dë.

4

Aki Johanisi ta lei de fa fu de musu wegı dee buka luku

ee naasë de kumutu.

¹ Wë nõo dee lobi mati u mi dë, un haika e. Sömëni sëmbë o ta tja buka ko da unu taa di Akaa u Masa Gadu hën manda de ko. Ma nõo wan musu piki ku de wante e. Ma i musu wegı ën luku ee naasë di lõ buka dë kumutu, ee Gadu buka, ee didibi buka. Biga fa u dë aki, wanlõ hia ganjansëmbëma ta waka ta lontu a hii goonliba ta ganjan sëmbë taa de dë tjabukama u Masa Gadu, ma na tuu seei.

² Nõo ee wan sëmbë da i wan buka taa sô wan soni di Akaa u Masa Gadu taki, nõo hën i kë sabi ee tuu ee ganjan, nõo i musu luku ee unfa a o taki u Jesosi Keesitu. Ee a taa a kumutu a Masa Gadu Kõndë ko libisëmbë a goonliba aki, nõo i musu sabi taa a dë Gadu buka tuu.

³ Ma ee a fia taa nõnõ, Jesosi Keesitu na a Gadu a kumutu, nõo i musu sabi taa na buka u Gadu di dë. Hën da wan buka u di buusema u Masa Jesosi Keesitu. Biga de bi taki da unu kaa taa a a' wan daka di Gaan Buusema u Masa Jesosi o ko a goonliba. Nõo fa u dë aki, di fasi fëën dë a sëmëni sëmbë hati ta wooko kaa.

⁴ Nõo dee sëmbë u mi dë, un haika e. Unu da sëmbë u Masa Gadu, nõo dee ganjansëmbëma dë an sa feni unu ganjan. Dee lõ sëmbë dë an dë a di së u Masa Gadu, de dë a dee soni u di goonliba aki nõo. De ku di didibi tuwë gogo a wan së. Ma un wini de. Wë biga di Akaa u Gadu a unu hati dë abi kaakiti mõn leki didibi.

⁵ Ma nõo te dee ganjansëmbëma ta fan nõo dee sëmbë dee an dë ku Masa Gadu ta piki de buka, biga di fan u de ta kai ku de.

⁶ Ma u, wa dë sô e. U da sëmbë u Gadu. Nõo dee sëmbë dee sabi Gadu, nõo de ta haika u. Ma dee sëmbë dee an sabi Gadu nõo de an ta haika u mõnsõ.

Nõo sô u ta paati dee buka ta luku fuu sabi undi u de dë u di Akaa u Masa Gadu, ku undi u de dë u di Buusema fëën.

⁷ Wë nõo un dee lobi mati u mi dë, un boo lobi u seei e. Biga Masa Gadu hën abi lobi. Nõo di sëmbë di ta lobi di otowan fëën, hën da mii u Gadu. Hën sabi Masa Gadu.

⁸ Ma di sëmbë di an ta lobi di otowan fëën hën an sabi Gadu e. Biga Masa Gadu, hën hatibõõ da lobi.

⁹ Nöo u si taa Masa Gadu lobi u tuu. Biga a tei di wan kodo Womi Mii fëen tö di a abi, manda ko a di goonliba aki fuu sa feni di teego libi u Masa Gadu.

¹⁰ Dee sëmbë o, ee i kè saandi da lobi, nöö ja musu luku a di fa u lobi Gadu e, ma i musu luku a di fa Gadu lobi u. Biga a tei di wan kodo Womi Mii fëen manda ko a di goonliba aki ko tei di dëdë fuu dëdë fu an hoi dee hogidu fuu nëën bëë möön.

¹¹ Wë nöö, un dee lobi mati u mi dë, di Masa Gadu lobi u sö kaa, nöö an fiti fuu lobi u seei tu nö?

¹² Na wan libisëmbë si Masa Gadu wan daka e. Ma te u ta lobi u seei makandi, nöö hën da Masa Gadu ta dë a u hati. Nöö fa i si u ta lobi u seei dë, nöö di lobi u Gadu di u abi a u hati o ko dë telutelu.

¹³ Biga wë Masa Gadu tuwë di Akaa fëen a u liba kaa, nöö fëen mbei u sabi taa u ku ën dë. U ku ën ko di wan.

¹⁴ Nöö u seei bi si Masa Jesosi tuu di a ko. Nöö fa u si ën dë, nöö hën u toona tei ta konda da lanti taa u Tata Masa Gadu manda di Womi Mii fëen ko a di goonliba aki tuu, faa ko dë di Heepima u hii mundu.

¹⁵ Nöö di sëmbë di piki a lanti taa Masa Jesosi hën da di Womi Mii u Gadu tuu, nöö di sëmbë dë, hën ku Gadu ta libi makandi. De ko di wan.

¹⁶ Wë fa u ta taki aki, nöö hën mbei u ko sabi tuutuu taa Gadu lobi u. Biga Gadu, hën abi lobi. Nöö di sëmbë di ta lobi di otowan fëen, hën ku Masa Gadu ko di wan kaa.

¹⁷ Nöö fa u ku ën ko di wan aki, di lobi di u lobi ën, möönmöön a o ta göö ta ko tee a ko dë ku telu. Nöö te u ku Masa Jesosi ko miti fesi ku fesi a di Gaan Kuutu Daka, nöö wa o dë fëëfëë. Biga fa u dë a goonliba aki seei, ma libi fuu djeesi di fëen kaa.

¹⁸ Haika e, dee sëmbë. Di soni de ta kai lobi, hën ku fëë an ta koti e. Biga ee wan sëmbë lobi i ku hii ën hati kumafa Gadu kë, nöö ja o fëë ën. Ma te i si i fëë wan sëmbë, nöö di soni mbei i ta fëë ën, i pakisei taa a sa du i wan hogi. Nöö fa i si i ta fëë ën dë, nöö hën da di lobi makei.

¹⁹ Wë nöö dee sëmbë, Masa Gadu hën fosu lobi u, nöö hën mbei u seei sa toona lobi otowan tu.

²⁰ Nöö ee wan sëmbë i dë nöö ja ta lobi dee otowan fii ma i ta mbei taa i lobi Gadu, nöö hën da soni i ta mindi. Biga di sëmbë i ta si ku i wojo mii dë hën ja lobi, nöö unfa i sa lobi Gadu di ja si ku wojo wan daka?

²¹ Biga Masa Jesosi seei da u di wëti aki taa: “Ee i lobi Masa Gadu, nöö söseei i musu u lobi di otowan fii tu.”

5

¹ Wë nöö ee wan sëmbë i ta biibi taa Masa Jesosi hën da di Paamusi Könu di Masa Gadu manda da u aki tuu, nöö hën da i dë wan mii u Gadu. „Hën da i Tata.”

Wë nöö ee i lobi wan tata, nöö joo lobi dee mii fëen tu.

² Nöö ee u lobi Masa Gadu ta piki ën buka, nöö hën da u ta lobi dee oto mii fëen kaa.

³ Biga ee u lobi Masa Gadu tuu, nöö woo hoi dee wëti fëen dee a da u fuu hoi. Nöö dee wëti fëen an hebi da u poi.

⁴ Biga hii u dee mii u Gadu feni di kaakiti kaa fuu tai hati disa di hogi libi di sëmbë ta libi a di goonliba aki. Biga di biibi di u dee mii u Gadu ta biibi a Masa Jesosi, hën ta wini hogi du.

⁵ Nöö dee sëmbë dee ta biibi taa Masa Jesosi hën da di Womi Mii u Gadu, nöö de nöö sa abi taihati u de disa dee hogi du u di goonliba aki.

Aki Johanisi konda soni u de

dii kotoigi u Masa Jesosi

⁶ Wē nōo dee mii, Jesosi Keesitu hēn da di Sēmbē di ko a goonliba tuu. Nōo ee i kē fia, nōo i luku fa soni waka a di wata dopu fēēn, ku di dēdē fēēn di a dēdē lasi ēn buuu fuu hedi. Nōo te i luku ēn te i kaba nōo joo si taa hēn da di Womi Mii u Masa Gadu di ko a goonliba tuu. Nōo na di dopu fēēn wanwan nōo fii musu mēni e, ma i musu mēni di dēdē fēēn ku di dopu fēēn tuu. Biga di wan soni nōo di Akaa fēēn ta taki ku de, taa Masa Jesosi hēn da di Womi Mii u Masa Gadu tuutuu. Nōo di Akaa an ta mindi soni, tuutuu soni nōo a ta taki.

⁷⁻⁸ Sōo. Nōo a dē sō taki taa di dopu fu Masa Jesosi, ku di dēdē fēēn di a dēdē lasi ēn buuu fuu hedi, ku di Akaa fēēn, de dii soni dē tuu dē kotoigi ta taki da u gbelingbelin taa Masa Jesosi hēn da di Womi Mii u Gadu tuu.

⁹ Wē nōo ee i guwenti u piki te libisēmbē taki soni da i, nōo te Masa Gadu taki soni da i wē? Na i musu piki ēn mōōn eti nō? Biga Gadu buka hebi mōōn libisēmbē buka. Nōo di soni di a ko taki da u aki, hēn da Masa Jesosi da di Womi Mii fēēn.

¹⁰ Nōo di sēmbē di ta biibi a Masa Jesosi liba, a sabi te dou nēēn hati dendu taa tuu, Masa Jesosi da di Womi Mii u Gadu.

Ma di sēmbē di an ta biibi a Masa Gadu, nōo hēn ta sōsō ēn. Biga a ta mbei taa Gadu mindi soni fu di a taa Masa Jesosi hēn da di Womi Mii fēēn.

¹¹ Nōo Masa Gadu taki tu taa a da u wan njunjun libi kaa fuu libi u teego. Nōo di libi dē, a di Mii fēēn nōo u sa feni ēn.

¹² Nōo ee wan sēmbē i nama ku di Womi Mii u Gadu dē, nōo ii feni di njunjun libi dē kaa e. Ma ee ja nama ku ēn, nōo ja abi di libi dē mōōnsō.

Aki Johanisi tapa di biifi.

¹³ Wē dee mii o, mi mbei di pampia aki sō manda da un dee sēmbē ta biibi a di Womi Mii u Masa Gadu liba, fuun musu sabi taa di njunjun libi u teego u ta taki aki, nōo un abi ēn kaa.

¹⁴ Nōo u sabi tu taa te u begi ēn wan soni, nōo ee di begi kai ku di pakisei fēēn, nōo a o jei.

¹⁵ Nōo te u sabi taa a jei u kaa, nōo woo dē ku di sabi nōōmō taa a o da u di soni di u begi ēn dē.

¹⁶ Nōo ee i si taa di otowan fii ta du hogi, ma nōo di hogi di a ta du dē an bigi poi fu Masa Gadu musu sitaafu ēn kii, nōo i musu begi Gadu dēēn be a toona dēēn libi. Ma a a' di hogi fii du di musu mbei Gadu kii i puu, nōo nēēn u ta taki. Ma ee a sa mbei a fika ku libi, nōo i musu begi dēēn.

¹⁷ Te i pasa Masa Gadu buka hēn wē da i du hogi kaa e. Ma a a' di hogi fii du an bigi poi fu Masa Gadu musu kii i fēēn hedi.

¹⁸ Nōo u sabi taa wan mii u Gadu an sa ta libi hogilibi nango nōōmō, biga Masa Jesosi seei ta tjubi ēn u di didibi an sa feni ēn du hogi.

¹⁹ Wē nōo dee mii, u sabi taa u dē sēmbē u Masa Gadu, nōo hii dee oto sēmbē u di goonliba aki tuu dē a didibi basu.

²⁰ Nōo sōseei u sabi tu taa di Womi Mii u Masa Gadu ko kaa, faa da u fusutan fuu sa sabi di tuutuu Gadu. Nōo fa u dē aki, u ku di tuutuu Gadu ko di wan kaa. Biga u ku di Womi Mii fēēn, Jesosi Keesitu, ko dē di wan. Nōo di tuutuu Gadu dē, hēn wē abi di libi u teego faa da u.

²¹ Sōo. Wē dee mii u mi dē, „na soni mōōnsō mōōn leki, un mēni unu seei, fu wan waka a dee ganjanganjan gadu u goonliba aki baka e. A tan sō.

Di u tu biifi u Johanisi

Wan wöutu a fesi.

Disi da di u tu biifi u di Tjabukama u Masa Jesosi de kai Johanisi. Nöo a di biifi aki a ta kai ën seei Gaan Sëmbë u keiki. Nöo a mbei di biifi manda da wan mujëë. Ma fa a taa mujëë dë, nöo wa sabi ee mujëë tuu, ee keiki a ta kai sö.

Nöo di biifi aki ku di fosuwan di Johanisi sikifi, di wan soni nöo de tuu taki.

¹ Wë di pampia aki, di Gaan Sëmbë fu keiki hën ta mbei ën manda gaan odi da wan mujëë di Masa Gadu tei u ko sëmbë fëën. Mi ta mbei ën dëën ku dee mii fëën tuu, taa mi dë.

Wë nöo dee sëmbë, fa mi ku unu dë a di biibi aki, nöo mi lobi unu tuutuu e. Ma na mi wanwan, ma mi ku hii dee sëmbë dee sabi di tuutuu lei u Gadu, mi ku de tuu lobi unu.

² Biga di lei u Gadu u ta taki aki, nöo hën ta dë a u hati nöömö, an o kumutu möönsö.

³ Nöo mi ta manda gaan odi da unu taa fa u ta waka a dee lei dë baka ta lobi dee otowan fuu makandi, nöo u Tata Masa Gadu ku Masa Jesosi Keesitu, di Womi Mii fëën, tuu o libi ku u ku de bunuhati. De o a' tjalihati fuu, nöo de o da u böö.

⁴ Nöo di mi ko aki, nöo hën mi ko si wanlö mii fii, nöo de ta libi a dee tuutuu lei u Gadu leti kumafa u Tata Masa Gadu manda u fuu libi. Nöo di mi si sö, nöo mi wai seei.

⁵ Söö. Wë Mujëë, haika e. Mi kë da i wan wëti aki, ma na njunjun soni a dë e. Di awoo wëti fuu di de bi konda da u a fesi, nöo hën nöo. Hën da u musu lobi u seei.

⁶ Nöo di lobi u ta taki aki, nöo hën da u musu ta piki di buka u Masa Gadu ta libi kumafa dee wëti fëën ta taki. Nöo u musu lobi dee otowan fuu ta libi bunu ku u seei. Hën da di wëti kaa e.

⁷ Nöo di soni mbei mi taki sö, fu di wanlö hia sëmbë ta waka ta lontu ta mindi soni taa Jesosi Keesitu an bi ko dë libisëmbë a goonliba aki. Nöo dee sëmbë dë, de da ganjansëmbëma e. De da buusema u di Paamusi Könu Masa Gadu manda ko da u.

⁸ Nöo un mëni unu seei ku de e, fu wan musu lasi di bunu un ta suku a Masa Gadu dë. Un musu ta mbei möiti fuun feni dee paima fuunu tuu ku telu.

⁹ Nöo ee wan sëmbë i disa dee soni dee Masa Jesosi, Keesitu bi lei i nöo hën i go tei wanlö oto soni ta biibi, nöo Masa Gadu an o dë a soni fii möön e. Ma di sëmbë di ta biibi di tuutuu lei nango nöömö, nöo Masa Gadu ku di Womi Mii fëën tuu o dë ku i.

¹⁰ Nöo fëën mbei ee wan sëmbë tja wan oto buka ko a unu di an ta kai ku di buka u Masa Jesosi, nöo di sëmbë dë wan musu tei ën buta a unu wosu seei.

¹¹ Biga te i ta kisi ën ku wai, nöo a o dë taa i ku ën tuu ta du di hogi makandi.

¹² Söö. Wë nöo mi abi sëmëni soni a mi hati fu mi taki da unu eti, ma ma kë sikifi de e. Mi seei kë ko a unu, be mi ku unu miti fan fesi ku fesi, nöo woo dë waiwai te dou.

¹³ Söö. Wë na soni möönsö möön leki dee mii u di lobi sisa fii, di Gadu tei ko sëmbë fëën tu, manda gaan odi da i taa de dë bumbuu.

Di u dii biifi u Johanisi

Wan wöutu a fesi.

Disi mbei di u dii biifi u di Tjabukama u Masa Jesosi de kai Johanisi. Nöo a di biifi aki a toona ta kai èn seei di Gaan Sëmbë u keiki möön, nöo a mbei èn manda da wan womi de ta kai Gajusi. Nöo a ta taki soni u dee sëmbë dee ta tja di Buka ta paaja, ufö a ta taki u wanlö oto sëmbë möön.

¹ Wë di pampia aki, di Gaan Sëmbë u keiki hën ta mbei èn manda gaan odi da di lobi mati fëen de kai Gajusi, taa a dë. Fa mi ku i dë a di biibi aki, nöo mi lobi i tuutuu seei, mati.

² Nöo i musu dë bumbuu e, leti kumafa mi sabi taa di akaa fii dë bumbuu kaa. Hii soni fii tuu musu dë tololo a pasi.

³ Nöo fa mi dë aki, mi dë waiwai ku i o. Biga dee sëmbë fuu ta ko ta gafa i da mi aki taa i ta libi bunu, i ta waka a di pasi ta piki di lei u Masa Gadu ku hii i hati.

⁴ Wë nöo te mi ta jei sö taa dee mii u mi ta piki di lei u Masa Gadu, nöo mi ta wai te na soni. Soni seei an dë a goonliba di ta da mi wai kuma di dë.

⁵ Wë mati Gajusi, di bunu di i ta du dee bakama u Masa Jesosi dë, nöo a dë wan gaan bumbuu wooko seei e. Biga dee awoo sabima fii ku dee njunjun sëmbë dee ja sabi tuu i ta sölugu.

⁶ Nöo dee sëmbë i ta heepi dë, nöo de ta ko ta konda da u dee biibima aki taa sö i ta libi bunu ku de. Nöo sö Gadu kë fii libi tu e, mati. Ja musu disa möönsö, biga sö de ta waka ta lontu a di wooko liba.

⁷ Fa de dë a pasi nango dë, nöo fu Masa Jesosi hedi wë e. Nöo de an ta suku heepi a dee sëmbë dee an ta biibi.

⁸ Hën mbei u dee sëmbë u Masa Jesosi musu heepi de e. Nöo hën da u ku de tuu ta dë a di wooko u Masa Gadu makandi ta tja di lei fëen ta paaja.

⁹ Söö. Wë nöo haika e. Mi bi mbei wan pampia manda da un dee sëmbë u Masa Gadu dë kaa. Ma di sëmbë de kai Dioteefesi aan toobi ku u. A kë hënseei musu dë fesima a di keiki, nöo an kë piki taa mi a' taki a unu liba möönsö.

¹⁰ Nöo te mi ko a unu ala, nöo woo kuutu di soni naandë. Biga a ta kosi mi a baka ta mindi soni da mi. Nöo an tjikëen eti e. Hën a toona ta du hogihogi ku dee sëmbë ta waka ta paaja di buka u Masa Jesosi, dee ta ko a unu dë. Biga te de ko dë, nöo an ta kë ta hoi de. Nöo te dee otowan kë heepi de, nöo a ta tapa de tu. A di keiki seei a ta jaka de ta puu, fu di de kë heepi dee wakama.

¹¹ Nöo mati, fa i si i dë a goonliba aki, na djeesi dee lö sëmbë dee ta du hogi naandë e. Ma i musu djeesi dee sëmbë dee ta du bunu. Biga di sëmbë di ta libi bunu ku sëmbë, nöo hën da sëmbë u Masa Gadu. Ma di sëmbë di ta libi hogi ku sëmbë nöo an sabi Gadu e.

¹² Nöo di womi de kai Dëmëtusi, fa a sai dë, nöo hii sëmbë ta gafëen taa a dë bumbuu sëmbë. Wë nöo sö a dë tuu, biga libi fëen ta kai ku di lei u Masa Gadu. Mi seei si èn sö tu hën mi taki èn da i, nöo i sabi taa ma o ganjan i.

¹³ Wë nöo mi a' wanlö hia soni a mi hati u mi taki da i eti, ma ma kë sikifi de a pampia manda da i.

¹⁴ Mi seepi kë ko a i hesihesi, be mi ku i sa fan fesi ku fesi.

¹⁵ Söö. Wë na soni möönsö e, mati, möön leki hati fii musu ta dë bööböö. Nöo dee mati fuunu aki manda gaan odi da i ku hii dee mati fuu dee dë a i ala tuu, hiniwan sëmbë ku fëen odi.

Di biifi u Judasi

Wan wöutu a fesi.

Di biifi aki sô, wan biibima de kai Judasi hên sikifi ên, nöö de si kuma a bi dë wan u dee baaa u Masa Jesosi.

Nöö di soni mbei a mbei di pampia aki. A ko sabi taa wanlö leima ko a wanlö biibima u Masa Jesosi ko ta taki taa fa Masa Jesosi bi dëdë paka dee hogi du da de, nöö an dë u de ta hoi wëti möön. De sa libi hogilibi kumafa de kë. Sô dee leima ta lei dee biibi sëmbë. Nöö hên Judasi ta bai de taa de an musu piki di soni dë, biga an dë sô. Nöö hên a hai sômëni oto u fesiten konda da de kumafa Gadu bi sitaafu wanlö sëmbë dee bi du hogi.

Nöö ee Gadu bi sitaafu dee sëmbë u fesiten ala, nöö hên da ee sëmbë du hogi pasëên buka fa u dë aki, nöö sô a o sitaafu de tu. Sô Judasi ta bai dee sëmbë. Nöö a ta konda da de fa dee leima naandë hogi tjika tu, de an dë soni u futoou.

Nöö di a ko faa tapa di biifi, hên a taki da dee biibima taa be de libi kumafa a fiti. Nöö hên a gafa Masa Gadu dëên tangi.

Nöö hên da di biifi aki.

Aki di biifi seti.

¹ Söö. Wë dee sëmbë, mi Judasi wë ta sikifi di pampia aki manda da un dee sëmbë dee u Tata Masa Gadu kai ko dë sëmbë fëên apaiti. Fa mi dë aki, mi dë wan futuboi u Jesosi Keesitu, nöö mi da wan baaa u Jakobosi tu.

Dee sëmbë, Gadu lobi unu e, nöö a ta tjubi unu a Masa Jesosi.

² Nöö a musu dë ku unu te tjika, ku ên lobi, ku ên tjalihati, ta da unu böö.

Aki Judasi ta taki soni u dee ganjansëmbëma.

2 Pet. 2:1-17

³ Wë dee sëmbë, mi bi dë kabakaba këe seei u mi sikifi soni da unu möön fini u di fa Gadu ta puu u ku unu makandi a hogi basu ta heepi u a hii soni, ma nöö mi ko si taa a möön bunu mi sikifi wan hii oto soni da unu.

Mi taki e, dee sëmbë, un musu biinga seei da di Buka u Gadu di a buta a u dee sëmbë fëên maun fuu biibi aki. Fa a da u di buka di wan pasi dë sô kaa, nöö u musu hoi ên sô e. Wan musu mbei sëmbë tookëên da u möönsö.

⁴ Nöö di soni mbei mi taki sô. Mi jei taa wanlö sëmbë fusi saapi ko dë leti a unu dendu dë söndö un sabi, nöö dee lö sëmbë dë an dë ku Gadu a wan së möönsö. Biga di fa Gadu libi ku u ku ên bunuhati fuu kumutu a wëti basu aki, nöö hên de ta tei tja go a sösö së. De taa Gadu puu u a wëti basu kaa, nöö u sa du hii hogi fa u kë. Biga wëti an dë u sitaafu u möön. Sô dee sëmbë dë ta taki, nöö sô de ta libi tu. De an ta kë piki möönsö taa Jesosi Keesitu hên nöö da Takima a hii sëmbë liba. Hên nöö da u Masa.

Wë nöö mi taki da unu seei gbelin, taa fa de ta libi dee lö libi dë, nöö Gadu o kuutu de da sitaafu nöömö. Sô a bi sikifi gaanduwe kaa.

Aki a ta toona mëni de a wanlö sëmbë Gadu bi sitaafu.

⁵ Dee sëmbë, mi kë toona mëmbë unu a wanlö soni bi pasa, hii fa mi sabi taa un sabi de kaa.

Wan bi jei fa Gadu bi puu dee Isaëli sëmbë fëên a dee Egepiti sëmbë basu mbei de ko fii nö? Ma nöö bakaten, sômëni u de an bi kë biibi ên möön, nöö hên a manda dëdë go kii de wante.

⁶ Nöö un bi jei tu taki taa so u dee basia u Masa Gadu Köndë an bi kë tan a dee kamian ka Gadu bi buta de, hên de kumutu go ta du di soni de kë. Nöö

hën wë Gadu kisi de buta a wan gaan dungu kamian tai de ku kēti gingin te de an sa kumutu. Nöo a dē ta luku te di gaan kuutudaka dou bifō a o kuutu de da de sitaafu awaa.

⁷Nöo un bi jei tu fa dee sēmbē u Sodom ku Gomola ku dee oto köndē sēmbē a de bandja naandē bi ta libi. Hiniwan hogi hangi bi ta ko a de hati de ta tei waiwai, te de poi hii dee wēti dee Gadu buta u fa womi ku mujē musu libi. „Te dou di juu nöo hën Gadu an sa tjēen möön, hën a tjuma dee köndē dē gililili puu gbegedee.” Fa u dē aki, dee köndē dē fika kuma wan maaka da hiniwan sēmbē di ta libi dee lö libi naandē taa ee i libi sö nöo söseei Gadu o sitaafu i tu ku di faja di ta kisi nöömö söndö tapa.

Sö wë Gadu bi sitaafu dee pepei sēmbē dē tjika e, fu di de an libi bunu.

Aki a ta taki soni u

dee ganjansēmbēma möön.

⁸Ma nöo dee sēmbē u ta taki aki, deseei ta libi a di wan seei fasi dē tu. Fa de sai dē, a dē leti kuma sunjan de ta sunjan. Biga de an ta mēni möönsö taa a bakaten de sa kisi sitaafu u di libi de ta libi dē. Fa de ta libi dē, sundju nöo de ta sundju deseei sö, biga de an ta kē dē a tii basu möönsö. Nöo na wan makiti u mundu seei de ta fēē möönsö tu, te dou ku dee hebi tiima dee ta dē a mundu seei de ta kosi ta da gaan buka.

⁹Ma dee basia u Gadu Köndē an dē sö. Biga hii fa di hedibasia u de de kai Mikaēli hebi tjika dē seei, ma hēseei an o da dee lö makiti u mundu dē gaan buka e. Biga di hën ku didibi bi ta fia u di dēdē sinkii u Mosesi seei, ma an puu na wan kodo kosi nēen buka kosi di didibi. Ma a taki dēen nöo taa: “Masa hën o du ku i.”

¹⁰Ma nöo dee oto sēmbē u ta taki aki, fa i si de sai dē, nöo de ta da gaan buka nango nöo, ta kosi hii soni te dou ku dee soni de an sabi seei. De dē leti kuma mbeti. De ta du go dē nöo a kaba ta libi söndö fusutan. Nöo mi taki da unu taa fa i si de ta du dē, poi nöo wë de ta poi deseei kaba a söso sö.

¹¹Nöo mi taki e, dee lö sēmbē i si naandē, di siba u Gadu kisi de kaa. Biga de abi taangajesi leti kumafa Kain bi abi taangajesi da Gadu tefa a bi hopo dou gaan hogi.

Nöo di langabēē u möni di dee sēmbē abi te kaba, hën wë buta de de kule go ta libi di fasifasi libi di Biliam bi libi, fu di hën seei bi abi langabēē u möni tu.

Fa de sai dē, nöo de ta mbei taangajesi da Gadu kumafa Koola bi mbei teefa a dēdē wan gaan hogi dēdē leti a di sabana dendu naandē. Nöo söseei dee sēmbē u ta taki aki o kaba a söso kuma Koola tu e.

¹²Fa de sai a unu dendu naandē, de dē leti kuma sumuku udu a otowan dendu. Te un ko sindo fuun njan makandi fu di un lobi unu seei, nöo de aan toobi u de hai ko sindo njan ku unu makandi ta mbei kuma unu ku de dē di wan.

Fa de sai dē, de dē leti kuma wanlö sēmbē ta kiija sikapu ma de an ta da dee sikapu soni u njan. De seei nöo de ta sölugu te de ko fatu.

De dē kuma te tjuba baaka i ta mēni taa a o kai fii feni wata, te wan pisi wan gaan ventu ko böö en tja go fiaa. Sö dee lö sēmbē naandē dē, fa i si de sai dē. Ee i ta langi a de, nöo ja o feni heepi möönsö.

Fa i si i ta si de dē, nöo de dē leti kuma wan fuita pau di an ta pai möönsö, te wan pisi a dēē tjakaa fika naandē u de go hön puu tuwë. Mi taki da unu taa sö Gadu o du ku dee lö sēmbē dē tu e.

13 Fa de sai naandë, de dë leti kuma pököpökö u sekiwata ta ko ku ën kaakiti, ma sundju nöö a ta tja ko buta a bandja sê. Sö dee sëmbë dë ta ko ku kaakiti ma sensen soni nöö de ta tja ko ta puu disa dë.

De dë kuma teeta ta kumutu a tii ko ta waka fanjanfanjan te de kaba a sösö faa a mundu. Sö dee sëmbë naandë ta waka söndö tii e. Ma mi taki da unu taa Gadu seeka wan gaan dungudungu kamian buta dë ka a o tuwë de go u teego.

14 Dee sëmbë o, un haika fa di bumbuu sëmbë u fesiten de kai Enöku bi taki kaa u dee lö pei sëmbë aki. Enöku hën mbei di u sëbën u dee bakamii u Adam. Nöö a wan juu dë, Masa Gadu bi dëen wan buka, nöö hën a taa:

Masa ta ko ku wanlö dusudusu sëmbë dee dë fëen seei vö,

15 nöö a o kuutu a hii sëmbë tuu liba.

Nöö dee sëmbë dee na bi a' bisi ku ën, de tuu a o sitaafu.

Fa dee sëmbë sai dë, de ta du sômëni pei hogi dee na ta kai ku Gadu.

De ta fan sômëni gaangaan fan ta kosi ën.

Hii dee soni dë tuu mbei a o kuutu de da sitaafu e.

Hën di buka dë Masa Gadu da Enöku fa a taki.

16 Wë dee sëmbë dee Enöku bi taki dë, na de da dee sëmbë u ta taki aki nö? Fa de dë a unu dendu dë, waka nöö de ta waka ta konda soni a buka ta suku föutu a sëmbë u de feni tja go ta konda. Fa de sai dë, ku dee taku kë u de hati nöö de ta biinga. De ta waka ta njan buka ta taki gaangaan taki. De ta ganjan sëmbë ta naki tëtë u de feni wini a de. Dee lö sëmbë naandë, sö de dë fa i si de sai naandë.

Aki Judasi ta lei de fa

de musu libi.

17 Wë nöö dee sëmbë u mi dë, mi kë mëmbë unu a wan soni. Wan jei fa dee tjabukama u Jesosi Keesitu bi bai unu nö?

18 De bi taki taa a di kaba lasiti ten u goonliba aki, nöö wanlö mbeisëmbëfama o hopo ko ta sösö di buka u Gadu. Fa de o ko dë, nöö a dee taku kë u de hati nöö de o ta waka.

19 Wë dee sëmbë dee tjabukama bi taki dë, na de u ta taki aki ö, dee ta tja paati ko a unu dendu naandë? Biga fa de sai dë, nöö di Akaa u Gadu an ta tii libi u de seei. A dee taku kë u de hati baka wanwan tö nöö de ta waka nöö a kaba.

20 Ma nöö un dee sëmbë u mi naandë, un wan musu dë sö e. Biga di un piki di buka kaa, nöö hën da un feni wan apaiti biibi seei di dë u Gadu. Nöö un musu heepi unu seei makandi be di biibi fuunu musu ta göö möönmöön u sëmbë si ën a unu libi.

Nöö un musu ta begi nöömö tu, ku di kaakiti u di Akaa u Gadu.

21 Un musu ta hoi unu seei a wan fasi ka di lobi u Gadu sa dou a unu, nöö a di lobi dë seei dendu un musu dë ta watji di ko fuu Masa Jesosi Keesitu. Biga wan daka a o ko nöömö, nöö woo feni di libi u teego di a bi buta da u kaa fu di a abi tjalihati fuu.

22 Nöö unu seei musu abi tjalihati tu e, dee sëmbë. Un musu saa dee sëmbë dee an dë taanga a di biibi eti.

23 Nöö dee sëmbë dee ta kumutu a di pasi u Gadu, un musu toona kisi de hai puu tja ko buta baka, leti kumafa i ta hai sëmbë puu a faja.

Nöö dee sëmbë dee kumutu a pasi kaa, un musu abi tjalihati u de e. Ma fa i si de ta waka ta piki dee hogi pakisei u de hati naandë, nöö un musu fëë fu de an hai unu tja go a dee du u de. Dee koosu de ta bisi a de sinkii seei u de du dee soni dë, de musu dë wan nasinasi soni da unu tee wan kë nama a de.

Aki a ta tapa di biifi.

²⁴⁻²⁵ Wë dee sëmbë, u ta buta unu a Masa Gadu maun e. Biga hën da di Heepima fuu di mbei Jesosi Keesitu u Masa ko dëdë faa puu u a dee hogilibi fuu basu. Hën wanwan tō nōō abi kaakiti tjika u tjubi u fu wa musu kai kumutu a di pasi. A abi kaakiti tu u puu föutu a u te u ko dë gbelingbelin, faa sa tja u go ka a ta dë ku di gaan waiti fëën. Nōō ku gaan piizii seei a o du ën.

Fa a sai dë, hën wanwan tō nōō da Gadu. Hën da kōnu u mundu, nōō a abi hii waiti ku hii makiti ku hii taki. Sō a bi dë kaa ufō mundu mbei, nōō sō a o dë fu teego. A tan sō.

Akoalimbo **(Dee soni dee Masa Jesosi tja ko a limbo da Johanisi)**

Wan wöutu a fesi

Söö dee sëmbë, wë di lasiti pisi u di Gadu Buku aki, nöö Johanisi hën sikifi ën di a ko gaan sëmbë. Nöö kumafa u bi taki a dee oto pisi u di Buku aki kaa, Johanisi bi dë wan u dee tuwalufu sëmbë dee Masa Jesosi bi pii tei a oto sëmbë dendu fu de waka nëen baka, nöö hën de ko dee gaan tjabukama u Masa Jesosi de kai Apösutu. Nöö di ten Johanisi mbei di pampia aki nöö a bi dë a wan paati a ze mindi. De bi tjëën go disa ala faa tja sitaafu fu di a ta waka ta paaja di buka u Masa Jesosi hedi.

Nöö di pampia aki ta taki u wanlö soni Masa Jesosi bi tja ko a limbo da Johanisi a di ten di a bi dë a di paati. Dee soni aki bi dë tjubitjubi soni da libisëmbë, ma Johanisi ko si de ku ën seei wojo kuma sunjan ma na sunjan. Biga tuutuu soni de dë, nöö de ta taki u wanlö soni bi pasa kaa, ku dee ta pasa a di ten u Johanisi dë, ku dee o ko pasa a bakaten. Ma nöö so u de taki a wödu fasi.

Nöö dee soni Johanisi konda aki, a konda de da dee sëmbë u Masa Jesosi dee bi ta miti makandi a sëbën köndë a di ten dë, faa da de kötöhati ku degihati u de musu hoi go dou. Biga sëmbë bi ta sitaafu de gaanfa seei fu di de ta biibi a Masa Jesosi liba.

Nöö te joo lesi di pisi u Gadu Buku aki, nöö joo si sëmëni soni nëen di o taanga u fusutan. Ma te i lesi ën te i kaba nöö joo ko si gbegedee taa Masa Gaangadu ku di Miii fëën di de ta kai di Sikafu Mii a di pampia aki, nöö de da kaba Winima a mundu u teego. Nöö te i nama ku de, nöö i seei o dë winima tu.

Aki di pampia seti.

¹ Wë dee sëmbë, mi Johanisi ta sikifi di pampia aki da unu e. Nöö dee soni mi o sikifi aki, nöö de dë wanlö soni dee Jesosi Keesitu tja ko a limbo da u dee sëmbë ta dini ën. Masa Gaangadu seei da Masa Jesosi de, faa musu mbei u ko sabi de. Nöö fa woo taki de aki, nöö abiti möön nöö de o ko pasa e.

Nöö a di fasi aki Masa Jesosi mbei u ko sabi de. A manda wan basia fëën köndë ko a mi Johanisi ko lei mi de, fu di mi dë futuboi fëën.

² Nöö fa mi ta sikifi dee soni aki, nöö de tuu mi jei ku miseei jesi, mi si de ku miseei wojo. A Gadu seei de kumutu, nöö de ta lei u soni u Jesosi Keesitu.

³ Nöö fëën mbei ee hën wan sëmbë i tei dee fan u Gadu aki ta lesi, nöö Masa Gadu o mbei i feni bunu e. Sösei tu, ee wan sëmbë i ta haika de te i tei de buta a i hati ta libi ku de, nöö Gadu o mbei i feni bunu tu. Biga abiti möön nöö de o ko pasa.

Aki Johanisi ta manda odi da dee sëmbë u Masa Jesosi dee dë a sëbën köndë u Asia.

⁴ Söö. Wë mi Johanisi ta sikifi di pampia aki manda da dee sëmbë u Masa Jesosi dee ta miti makandi a sëbën köndë u Asia.

Dee sëmbë o, fa Masa Gadu sai dë, nöö a bi dë kaa te kisi di ten di u dë aki, nöö a o dë u nöömö tu. Nöö hën wë musu dë ku unu ku ën bunuhati. A musu mbei un feni böö, hën ku di Akaa fëën tuu. Fa di Akaa u Masa Gadu sai dë, a dë telutelu a hii fasi e, soni seei an makei ën. Nöö a dë leti a Gadu fesi dë ka a dë sindosindo a di könubangi fëën. Nöö a musu dë ku unu tu,

⁵ Hën ku Jesosi Keesitu di bi konda dee soni u Gadu gbelingbelin da u.

Fa i si Masa Jesosi sai naandë, dee sëmbë, hën wë da di fosu sëmbë di dëdë weki fu an dëdë möön. Hën da di Sëmbë di abi taki a hii dee kõnu dee dë a goonliba aki tuu. Nöö hën wë lobi u sô tee a dëdë tuwëen buuu a goon paka puu u a hogi du basu.

⁶ A mbei u ko dë sëmbë a di kõnu tii fëen dendu, nöö hën a buta u ko mindima fuu sa ta tja libisëmbë ko a Gadu fesi. A buta u fuu sa ta dini Masa Gadu di da hën Tata ku di Gadu fëen tu. Wë nöö dee sëmbë, a musu kisi gafa ku hii kaakiti hiniwanten fu teego. A tan sô.

⁷ Nöö un luku ala e.

A dë a dee bundji dendu a liba ala ta saka ta ko.

Nöö hii sëmbë wojo tuu o si ën,

te dou ku dee sëmbë dee bi manda sëmbë u de pekëen ku peegu a di lakpa pau.

De tuu o si ën.

Nöö fa de o si ën dë, nöö hii dee nasiön sëmbë u goonliba tuu o ta bai ta këë fëen hedi.

Leti fa u taki ën dë, nöö sô a o dë e.

⁸ Masa Gadu hën taki sô, dee sëmbë. Hën a taa: “Mi da di kaba fosu wan ku di kaba lasiti wan u hii soni. Mi bi dë kaa nöö mi dë fa u dë aki nöö mi o dë u nöömô tu. A mi hii kaakiti u mundu dë.” Sô Masa Gadu taki.

Aki Masa Jesosi tjëen seei

ko lei Johanisi.

⁹ Wë nöö kumafa mi bi taki kaa, nöö mi Johanisi ta sikifi di pampia aki. Nöö mi dë wan sëmbë u Masa Jesosi leti kuma unu seei. Mi ta tja gaan sitaafu fëen hedi, leti kumafa unu seei ta tja tu. Nöö mi dë leti a di Njunjun Tii u Gadu dendu kuma unu tu, nöö Gadu ta da mi degihati fu mi hoi go dou leti kumafa i si a ta da unu ën tu.

Nöö dee soni i si mi o taki aki, nöö mi si de a di paati de ta kai Patimosi di dë a ze mindi. De tja mi ko tjökô a di paati aki fu di de an kë u mi musu ta konda dee wötu Masa Gadu da sëmbë nöö de an kë u mi taki dee soni u Masa Jesosi dee mi sabi. Hën mbei de tja mi ko tuwë disa aki.

¹⁰ Nöö di daka di mi si dee soni aki, nöö a bi dë di daka u Masa Gadu. Di juu dë, nöö di Akaa u Gadu bi dë a mi liba hebi, nöö te fu mi mëni, hën mi jei wan tòngö leti kuma afematutu ta piki seei limbolimbo.

¹¹ A taki da mi taa: “Dee soni dee joo si aki, nöö de tuu i musu sikifi buta a pampia e, nöö i musu manda di pampia go da dee sëmbë u mi dee ta miti makandi a mi në a sëbën köndë u Asia. Nöö dee disi da dee köndë: Efeise, Similina, Peegamu, Tiatila, ku Saadisi, Filadelfia, ku Laodisea. A dee köndë dë tuu i musu manda di pampia go e.”

¹² Wë nöö fa mi jei di fan naandë, hën mi bia luku ee ambë da di sëmbë ta fan ku mi naandë. Nöö hën mi si sëbën soni kuma goutu tamundu faja,

¹³ nöö leti a de mindi dë mi si wan Sëmbë kuma libisëmbë ma a tooka. Nöö a bisi wan gaan langa djapona sô ta kai nëen futu u goon ala zëë. Nöö a dë ku wan goutu banti nëen hati. Nöö sô wan Sëmbë mi si dë e, dee sëmbë.

¹⁴ Fa mi si ën dë, di uwii fëen hedi dë wetiweti faan sô kuma maaun, nöö wojo fëen ta sëndë kuma te faja ta kisi gililili sô.

¹⁵ Nöö futu fëen dë limbolimbo gbedeede kuma köpö di de bi buta a faja jö puu hii sundju te a fika di köpö wanwan njënjën.

Nöö fa a ta fan dë, nöö tòngö fëen ta giinta leti kuma wan gaan dan.

16 Nöo di mi luku nëen leti maun së, nöo hën mi si sëbën teeja nëen maun. Nöo wan saapusaapu ufangi di de maa a de tu së tuu ta kumutu nëen buka. Nöo fesi fëen ta koti faja leti kuma tuwalufu juu sonu, sô a ta sëndë tjika.

Sô wan Sëmbë mi si a dee goutu tamundu mindi e, dee sëmbë.

17 Nöo fa mi si ën dë, hën mi tombi kai gbolou a goon nëen fesi dë, leti kuma mi dëdë. Fëëë nöo mi fëëë sô. Ma nöo hën a tëndë di leti së maun fëen ko buta a mi liba, hën a taa: “Na fëëë sô e. Mi wë da di seti ku di kaba u hii soni.

18 Fa i si mi dë aki, nöo mi da di Sëmbë di o libi fu teego. Biga mi bi dëdë tuu, ma luku, mi toona weki baka. Nöo hën mbei mi abi dee sôötô u dëdë ku dëdë kôndë tuu.

19 Nöo dee soni joo si aki, nöo de tuu i musu sikifi e, dee ta pasa a di ten aki, ku dee o pasa a bakaten tuu.

20 “Nöo haika e, andi dee goutu tamundu ku dee teeja a mi leti së maun aki kë taki. Dee sëbën teeja aki, nöo de da dee tiima fu dee sëmbë u mi dee ta miti makandi a dee sëbën kôndë u Asia mi kai dë. Nöo dee goutu tamundu aki, de da dee sëmbë u mi seei dee ta miti makandi a dee lö kôndë dë.”

Sô wë di Sëmbë di mi si dë taki da mi e.

2

Aki Masa Jesosi ta fan ku dee sëmbë fëen a Efeise.

1 Hën di Sëmbë toona fan ku mi möön, a taa: “Söö. Awaa mi kë fan ku di sëmbë di ta tii dee sëmbë u mi a di kôndë de kai Efeise. Mi kë fii sikifi dëen taa:

Mi di Sëmbë di ta fan aki, Mi wë ta hoi dee sëbën teeja a mi leti maun. Mi da di Sëmbë ta waka ta lomboto a dee sëbën goutu tamundu faja mindi ta wegî soni ta luku. Nöo misei wë ta fan di fan aki.

2 Nöo mi taki e, taa mi ta si hii dee bunu sondi dee un ta du, kumafa un ta biinga tjika dë. Nöo mi si taa un ta hoi go dou sôndô lasi hati. Mi sabi taa wan ta kë ta si takulibima a wojo seei. Nöo mi si taa un wegî dee sëmbë luku dee ta ko a unu kuma tjabukama u mi, nöo un ko si taa de dë ganjansëmbëma.

3 Nöo mi si fa un ta hoi pasensi go dou a dee fuka ta miti unu fu di un nama ku mi hedi. Wan ta haî baka disa mi möönsô. Hii dee bunu soni dë tuu mi ta si e.

4 Ma nöo mi si wan föutu a unu eti di an bunu da mi seei. Hën da wan ta lobi mi kumafa un bi lobi mi a fesi möön. Di lobi fuunu ko booko saka.

5 Wë nöo un wegî luku fa un bi dë fajafaja a fesi, ku fa un ko dë fa u dë aki. Nöo mi taki e, un bia unu libi, be un toona libi kumafa un bi ta libi a fesi. Biga ee nasô, nöo mi o ko puu di goutu tamundu fuunu nëen kamian e.

6 Ma fa mi taki aki seei, ma wan oto bunu pisi dë a di libi fuunu möön. Hën da un ta buuse dee soni dee sëmbë u di feleniki de kai Nikolaiti ta du, leti kumafa misei ta buuse de tu.

7 Söö. Wë nöo di sëmbë di abi ijesi nëen bandjajesi u jei soni, nöo be a jei andi di Akaa u Gadu ta taki da dee sëmbë u mi a dee kôndëkôndë. Nöo ee wan sëmbë i wini dee soni ta tapa pasi da i fii du fa Gadu kë, nöo di sëmbë dë i dë bunu e. Biga mi o da i pasi fii njan di fuuta u di pau di de ta kai di Pau u di Libi u Teego. Nöo di pau i si dë, a dë leti a di waiti kamian u Gadu dendu de kai Paladëisi.

Hën di soni dë wë mi bi kë taki da dee sëmbë u mi a Efeise e.”

Aki Masa Jesosi ta fan ku dee sëmbë fëen a Similina.

8 “Söö. Nöo awaa mi kë fan ku di sëmbë di ta tii dee sëmbë u mi a di kôndë de kai Similina. I musu sikifi dëen taa:

Mi, di Sëmbë i si ta fan aki, nöö mi da di fosu wan ku di lasiti wan u mundu. Mi bi dëdë tuu, ma nöö mi toona weki baka, nöö mi ta fan di fan aki.

⁹ Wë nöö mi taki e, taa mi sabi dee gaan fuka dee un ta abi, ku dee sitaafu dee un ta tja. Mi sabi fa un ta pena tjika a di goonliba aki, ma a Gadu ala nöö un abi gudu te a hia e. Nöö mi sabi fa dee Dju sëmbë ta kosi unu ta tja unu nê ta poi a köndë. Fa de ta du dë, de ta mbei deseei taa de da dee sëmbë u Gadu apaiti, ma nöö wan piki e. Sëmbë u di didibi seei de dë.

¹⁰ Nöö mi taki e, taa wan musu fëëë dee sitaafu dee o ko a unu. Biga di didibi sa buta so fuunu un go a dunguwosu faa pooba unu luku unfa un dë ku mi tjika, nöö woon kisi sitaafu fu wan sati ten sö. Nöö a o hebi da unu fuun tjai tuu, ma nöö un musu ta a' futoou a mi nöömö. Ee a dë fii dëdë seei, ma be un tei ën nöö, nöö woon wini wan gaan paima a mi, hën da di libi u teego. Nöö sö mi taki da unu e, dee sëmbë.

¹¹ Nöö di sëmbë di abi jesi nëen bandjajesi u jei soni, nöö be a jei andi di Akaa u Gadu ta taki da dee sëmbë u mi a dee köndëköndë. Nöö ee wan sëmbë i wini dee soni ta tapa pasi da i fii du fa Gadu kë, nöö di sëmbë dë i dë bunu e. Biga ja o dëdë di dëdë di ta paati libisëmbë ku Gadu fu teego. Hën di soni dë wë mi bi kë taki da dee sëmbë u mi a Similina.”

Aki Masa Jesosi ta fan ku dee sëmbë fëën a Peegamu.

¹² “Söö. Awaa mi o fan ku di tiima u dee sëmbë u mi a di köndë de kai Peegamu. I musu sikifi dëën taa:

Mi, di Sëmbë ta fan aki, mi da di Sëmbë te mi ta fan nöö a dë kuma wan ufangi di dë maamaa a de tu së buka fëën tuu, sö dee wöutu u mi abi kaakiti tjika. Nöö mi wë ta fan di fan aki.

¹³ Nöö mi taki e, taa mi ta si di köndë ka un ta libi naandë taa di didibi seei hën ta libi leti dë tu ta tii ën. Ma fa a dë fëën sindosindo nëen könubangi dë seei, ma un dë gingin a mi së eti. Biga di de kui Antipasi, di sëmbë di bi ta konda soni u mi a sö wan futoou fasi dë, nöö un si ma wan disa mi u biibi möönsö.

¹⁴ Ma nöö mi si wanlö föutu a unu e, di na bunu da mi seei. Biga sëmbë dë leti a unu mindi dë ta tei di hogi lei u di fesiten lukuma de kai Biliam. Fa Biliam bi sai dë, hën bi da Könu Balaki hogi lai unfa a sa du kisi dee Isaëli sëmbë u mi poi kaba a sösö. Biga a taki dëën taa te dee sëmbë u Balaki o tuwë njanjan da dee gadu u de, nöö de musu kai dee Isaëli sëmbë tja ko a de dendu be de njan ku de makandi. Nöö naandë de o kisi de puu a dee wëti u Gadu te dou a di së u manu ku mujëë soni tuu. Sö wan hogi lai Biliam da Könu Balaki. Nöö sëmbë dë leti a unu dendu naandë ta da dee lö lai dë eti e.

¹⁵ Nöö söseei tu, sëmbë dë leti a unu dendu dë ta lei sëmbë dee poipoi lei u dee Nikolaiti sëmbë ta puu de a Gadu së.

¹⁶ Wë nöö mi taki e, taa un musu bia kumutu a dee soni naandë. Ma ee nasö, abiti möön mi o ko a unu ko feti ku dee sëmbë dë ku di ufangi di dë a mi buka aki.

¹⁷ Söö. Wë nöö di sëmbë di abi jesi nëen bandjajesi u jei soni, nöö be a jei andi di Akaa u Gadu ta taki da dee sëmbë u mi a dee köndëköndë e. Nöö ee wan sëmbë i wini dee soni ta tapa pasi da i fii du fa Gadu kë, nöö di sëmbë dë mi o da di njanjan u Gadu de kai ‘mana’ di dë tjubitjubi da oto sëmbë. Nöö mi o da di sëmbë dë wan wetiweti sitonu faan tu, ku wan njanjan nê sikifisikifi nëen. Nöö di sëmbë di o kisi ën dë, hën nöö o sabi andi di nê dë kë taki.

Hën di soni dë wë mi bi kë taki da dee sëmbë u mi a Peegamu.”

Aki Masa Jesosi ta fan ku dee sɛmbɛ fɛɛn a Tiatila.

18 “Sɔɔ. Wɛ nɔɔ awaa mi kɛ fan ku di tiima u dee sɛmbɛ u mi a di kɔndɛ de kai Tiatila naandɛ. I musu sikifi dɛɛn taa:

Mi di sɛmbɛ ta fan aki, mi da di Mii u Gadu seei di abi wojo kuma faja ta kisi gililii. Mi wɛ da di sɛmbɛ abi di futu ta sɛndɛ kuma kɔpɔ felu njɛinjɛin, nɔɔ mi wɛ ta manda di buka aki da unu.

19 Nɔɔ mi taki e, mi sabi hii dee bunu dee un ta du a Tiatila ala. Mi sabi di gaan lobi fuunu tu. Mi sabi fa un ta biibi Gadu tjika. Mi sabi fa un ta dini oto sɛmbɛ ta heepi de. Nɔɔ mi sabi fa un ta tai hati ta biibi Gadu tu. Wan hai baka mɔɔnsɔ. Mi sabi taa un ta du bumbuu soni gaanfa mɔɔn leki fa un bi du a fesi. Dee soni naandɛ tuu mi sabi e.

20 Ma nɔɔ fa mi fan dɛ seei, ma un abi wan fɔutu a mi eti. Hɛn da un ta disa pasi da di hogi mujɛɛ de kai Isebeli faa musu ta kai mi nɛ taa mi dɛɛn buka faa tja ko da unu. Un ta disɛɛn faa musu go dou ku dee poipoi lei fɛɛn. Nɔɔ a ta hai dee futuboi u mi baka u de libi sɔmɛni fanafiti libi a di sɛ u manu ku mujɛɛ. A ta buta unu fuun njan di njanjan de ta tuwɛ da dee gadu u de dɛ. Sɔ wanlɔ hogi di mujɛɛ dɛ ta du e.

21 Wɛ nɔɔ fa i si a ta du ɛn dɛ, nɔɔ mi dɛɛn ten longi tjika faa bi musu bia disa di jajo libi fɛɛn naandɛ, ma an kɛ jei mɔɔnsɔ.

22 Wɛ nɔɔ ,fu di a bi lobi u dɛ a bedi kaa, nɔɔ, mi o manda wan hebi siki ko nɛɛn, be a fika a bedi u koo. Nɔɔ dee sɛmbɛ ku ɛn bi ta libi dee lɔ libi dɛ, nɔɔ mi o mbei de kisi gaan hebi sitaafu te tjika de, ee de an bia disa dee hogilibi u de naandɛ.

23 Dee sɛmbɛ dee abi di wan hati kuma hɛn, de tuu mi o kii puu naandɛ e.

Nɔɔ te mi du sɔ kaa, nɔɔ hii dee oto sɛmbɛ u mi dee ta miti a dee kɔndɛkɔndɛ tuu o ko sabi taa mi da di Sɛmbɛ di ta wegi libisɛmbɛ hatibɔɔ ku de pakisei tuu ta luku. Nɔɔ mi o paka hiniwan sɛmbɛ leti kumafa i bi libi. Nɔɔ sɔ mi taki e.

24 Ma nɔɔ mi abi wan oto buka fii da dee otowan u mi dɛ, dee an ta piki di poipoi lei u di mujɛɛ naandɛ mɔɔnsɔ. Fa un sai dɛ, dee sɛmbɛ, nɔɔ un dɛ bunu e. Biga wan go lei dee lɔ kɔni u Saatan dɛ mɔɔnsɔ, dee de ta gafa ta kai gaan tjubitjubi kɔni. Nɔɔ fɛɛn mbei ma o buta na wan oto hebi a unu liba mɔɔnsɔ,

25 mɔɔn leki fuun hoi unu seei a dee soni un abi naandɛ kaa go dou nɔɔmɔ, u te mi toona ko.

26 Nɔɔ mi taki e, taa ee wan sɛmbɛ wini dee soni dee ta tapa pasi dɛɛn nɔɔ a ta hoi go dou ku dee soni dee mi ta mandɛɛn faa du, nɔɔ di sɛmbɛ naandɛ hɛn mi o da taki a dee nasiɔnnasiɔn u goonliba palalaa te dou.

27 Nɔɔ leti kumafa mi Tata da mi taki, nɔɔ sɔseei mi o toona da di sɛmbɛ dɛ taki tu. Biga di Buku bi taki taa:

A o ta ko a de liba ku gaan kaakiti seei,

kuma te i naki wan doti paabi ku felu kodjo gboo booko pisipisi.

Sɔ di Buku taki e. Nɔɔ sɔ wan kaakiti mi o da dee lɔ sɛmbɛ dɛ tu.

28 Nɔɔ di paima di mi o da de, a o dɛ wan gaan waiti soni limbolimbo kuma di gaan mamate teeja di ta tja didia ko.

29 Sɔɔ. Wɛ nɔɔ di sɛmbɛ di abi jesi nɛɛn bandjajesi u jei soni, nɔɔ be a jei andi di Akaa u Gadu ta taki da dee sɛmbɛ u mi a dee kɔndɛkɔndɛ e.

Sɔ wɛ mi bi kɛ taki da dee sɛmbɛ u mi a Tiatila.” So Masa Jesosi fan ku mi.

3

Aki Masa Jesosi ta fan ku dee sɛmbɛ fɛɛn a Saadisi.

¹ Hën Masa Jesosi fan möön, a taa: “Wë nõö awaa mi o fan ku di sëmbë ta tii dee sëmbë u mi dee ta miti makandi a di kõndë de kai Saadisi. I musu sikifi dëen taa:

Mi di sëmbë ta fan aki, mi abi di Akaa u Gadu di dë telutelu söndö föutu a hii fasi fëën. Mi wë ta hoi dee sëbën teeja a mi maun dendu, nõö mi ta fan ku unu aki.

Nõö mi taki e, taa mi sabi dee soni dee un ta du ala, nõö mi si fa un abi në a hii dee kõndëkõndë taa un dë seei kendikendi a di së u Masa Gadu soni. Sö në fuunu paaja. Ma mi sa piki unu taa wan dë sö seei e!

² Nõö un musu weki hopo seeka di bumbuu libi fuunu pikiwan di fika da unu dë eti, bifö a kaba a sösö. Biga ma si di libi fuunu seei taa a dë ku telu a Gadu fesi e, kwetikweti.

³ Un musu toona pakisei dee soni de bi konda da unu a fesi, nõö un bia toona piki de baka. Ma ee nasö, mi o ko a unu leti kuma wan fufuuma ta ko a wan juu di wan o mëni, nõö mi o kuutu unu seei.

⁴ Ma nõö fa i si mi taki dë seei, ma mi sabi taa un abi wantu sëmbë a unu dendu eti, libi u de dë seei gbelingbelin. Nõö dee lö pei sëmbë dë, mi ku de o ta waka makandi ku weti koosu a sinkii faan. Biga sö de libi fiti.

⁵ Nõö ee wan sëmbë i wini dee soni ta tapa pasi da i fii du fa Gadu kë, nõö di sëmbë dë i seei o ko feni di lö bisi dë tu. Nõö ma o kaabu i në puu möönsö a di Buku ka dee sëmbë në dë sikifisikifi dee o feni di libi u teego e. Ma mi o kai di sëmbë dë në a mi Tata ku dee basia fëën kõndë tuu fesi, taa mi ku ën nama.

⁶ Söö. Wë nõö di sëmbë di abi jesi nëën bandjajesi u jei soni, nõö be a haika andi di Akaa u Gadu ta konda da dee sëmbë u mi dee dë a dee kõndëkõndë e.

Sö wë mi bi kë taki da dee sëmbë u mi a Saadisi.”

Aki Masa Jesosi ta fan ku dee sëmbë fëën a Filadelifia.

⁷ Hën Masa Jesosi toona fan möön, a taa: “Wë nõö awaa mi o fan ku di sëmbë ta tii dee sëmbë u mi a Filadelifia. I musu sikifi dëen taa:

Mi di Sëmbë ta fan aki, mi dë apaiti da Gadu tuutuu nõö na wan piki ganjan seei dë a mi. Nõö mi wë abi di söötö a mi maun fu mi sa jabi di döö go sindo a di kõnubangi u Könu Dafiti. Nõö te i si mi jabi wan döö, nõö na wan sëmbë o sa tapëën e, nõö te mi tapa wan döö na wan sëmbë o sa jabi ën tu. Nõö mi wë ta fan di fan aki.

⁸ Nõö mi taki e, taa mi sabi di libi fuunu fa un ta libi naandë. Nõö mi jabi wan döö a unu fesi di na wan sëmbë sa tapa e. Biga mi sabi taa a libisëmbë wojo, nõö wan abi wan bëtë kaakiti, ma mi ta wai ku unu. Biga dee soni u mi un bi jei, nõö un ta hoi de nõömö. Na wan daka un hai baka disa mi möönsö.

⁹ Nõö fa dee Dju sëmbë dë a unu ala ta sösö unu ta mbei de seei kuma de da dee bumbuu sëmbë u Gadu apaiti dë, ma nõö na sö de dë a Gadu wojo e. Fa i si de sai dë, mindisonima de dë, didibi seei de dë. Nõö o mbei de ko saka kai a goon a unu fesi wan daka nõömö piki taa unu wë mi bi libi i tei ko sëmbë u mi apaiti.

¹⁰ Nõö fu di un bi hoi dou ku pasensi kumafa mi bi manda unu, nõö fëën mbei mi o tjubi unu fu di sitaafu di o ko a hii goonliba an musu kisi unu. Mi o tjubi unu da di lö tesi dë.

¹¹ Nõö un haika e, dee sëmbë. Abiti möön mi o ko. Nõö be un hoi go dou a dee soni dee un ta piki naandë kaa, be na wan sëmbë musu ganjan unu kisi te un lasi di hei di dë fuun kisi a bakaten.

¹² Nöo ee wan sêmbê i wini dee sondi ta tapa pasi da i fii du fa Gadu kê, nöo di sêmbê dê mi o tei buta kuma posu a di Wosu u Masa Gadu, di dê di Gadu u mi tu. Sö a o dê gingin tjika, te na wan daka seei de o sa puu ên dê möönsö. Nöo mi o sikifi dii nê buta nëen. Wan u dee nê o dê di nê u Masa Gadu. Wan u de o dê di njunjun nê u miseei. Wan u de o dê di nê u di köndê u mi di o kumutu a Gadu a liba ala bazia ko a goon, hên da di Njunjun Jerusalem. De dii nê dê tuu mi o sikifi a dee lö sêmbê dê, „be sêmbê sabi taa de da sêmbê u mi tuutuu.”

¹³ Söo. Wê nöo di sêmbê di abi jesi nëen bandjajesi u jei soni, nöo be a jei andi di Akaa u Gadu ta konda da dee sêmbê u mi a dee köndêköndê e. Nöo sö mi bi kê taki da dee sêmbê u mi a Filadelfia.”

Aki Masa Jesosi ta fan ku dee sêmbê fêen a Laodisea.

¹⁴ “Nöo awaa mi o fan ku di sêmbê ta tii dee sêmbê u mi a di köndê de kai Laodisea. I musu sikifi manda dêen taa:

Mi di Sêmbê ta fan aki, Mi da di Sêmbê ta konda dee soni u Gadu gbelngbelin söndö misi. Te mi ta fan, nöo sö nöo a dê kaa. Nöo hii dee soni dee Gadu mbei tuu fiaa, nöo a mi wanwan de kumutu. Nöo mi wê ta fan di fan aki.

¹⁵ Wê mi taki e, mi sabi hii dee libi dee un ta libi ala taa wan dê kötökötö a di sê u Masa Gadu soni e. Ma nöo wan dê kendikendi tu. A bi o möön bunu da mi ee un bi dê kötökötö ee nasö un dê kendikendi.

¹⁶ Ma di un dê gbölöö sö kuma wan wata di na bunu u bebe, nöo fêen mbei mi o fula unu puu a mi buka tuwê abiti möön.

¹⁷ Biga fa un sai dê, nöo un ta mbei unu seei taa un dê guduma, un dê fa un kê, un abi hii sondi kaa. Sö un ta mëni. Ma hii fu di dê, un dê seei gaan hogihedisêmbê, penama, makisamakisa sêmbê un dê. Un dê pênêpênê söndö koosu a sinkii, un dê bookowojoma u sêmbê musu ko kêe pena ku unu. Ma wan sabi sö möönsö.

¹⁸ Nöo mi o da unu wan lai aki e. Un ko a mi, ko bai tuutuu goutu di de jö a faja puu sundju te a ko gbegedee, nöo woon dê tuutuu guduma awaa. Un ko a mi ko bai limbo koosu faan fuun bisi, be wan waka pênêpênê möön. Un ko bai wojo deesi a mi fuun tuwê a wojo, nöo wojo fuunu o ko limbo fuun si sondi bunu awaa.

¹⁹ Nöo mi taki e, di sêmbê di mi lobi nöo hên mi ta gandji da ta kiijëen ku sitaafu faa musu ko bumbuu sêmbê. Nöo un biinga e, be un bia disa dee hogilibi fuunu dee un abi dê.

²⁰ Fa i si mi dê aki, mi dê taanputaanpu leti a unu dööbuka ta naki di döö fuunu nöömö. Nöo ee wan sêmbê i jei mi tóngö nöo hên i jabi döö da mi, nöo mi o ko a dendu nöo mi ku i o ta njan makandi.

²¹ Nöo di sêmbê di wini dee soni dee ta tapa pasi dêen, nöo hên mi o da pasi fu mi ku ên sa sindo makandi a di könubangi u mi, leti kumafa mi bi wini dee soni bi ta tapa pasi da mi, nöo hên mi ku mi Tata ko sindo makandi a di könubangi fêen.

²² Söo. Wê nöo di sêmbê di abi jesi nëen bandjajesi u jei soni, nöo be a jei andi di Akaa u Gadu ta konda da dee sêmbê u mi a dee köndêköndê e. Sö wê mi bi kê taki e, da dee sêmbê u mi a Laodisea.”

Sö wanlö buka Masa Jesosi manda da dee sêmbê fêen dee dê a dee köndêköndê.

4

Aki Johanisi si fa de ta begi Gadu a Gadu Köndê.

¹ Nöö hën a baka di Masa Jesosi da mi dee buka sö kaa, hën mi hopo wojo luku liba, hën mi si wan döö te ala jabijabi hoo sö. Nöö hën mi jei di wan seei tōngö di bi ta fan ku mi a fesi ta piki limbolimbo kuma te de ta böö afematutu. A kai mi taa: “Ko a liba aki, nöö mi o mbei i ko sabi dee soni ku dee soni o pasa a bakaten.”

²⁻³ Nöö hën di Akaa u Gadu ko a mi liba wante. Nöö hën mi si wan könubangi dë ku wan Sëmbë nëen sindosindo ta koti faja seei kuma dee gaan dii djamati sitonu de ta kai jasipisi ku koonaleini. Sö di Sëmbë dë waiti tjika. Nöö mi si wan mutjama lontu di könubangi, a waiti möön hii soni, hënseei dë kuma di djamati sitonu de kai samalagida.

⁴ Nöö hën mi luku möön, hën mi toona si tuwenti-a-fö könubangi möön, de lontu di fosuwan dë buta a mindi. Nöö tuwenti-a-fö tiima dë sindosindo a dee könubangi dë. Nöö fa mi si dee tiima dë, nöö de tuu dë ku weti koosu limbolimbo faan, ku goutu kaapusa a de hedi kuma könu kaapusa.

⁵ Nöö mi ta si di gaan könubangi a mindi dë ta koti faja seei kuma te gaangadu ta koti faja, liba ta bai, sömëni gaangaan giinta mi ta jei ta kumutu a di könubangi naandë. Nöö hën mi luku a di könubangi fesi, hën mi si sëbën tamundu faja dë sëndësëndë ta kisi. Hën di Akaa u Gadu wë di dë telutelu a hii fasi, hën wë i si da dee faja dë e.

⁶ Nöö hën mi tuwë wojo luku möön hën mi si wan ze, gaan limbo soni gbegedee kuma gaasi, ma a möön waiti möön gaasi. Hën seei dë a di gaan könubangi u mindi dë fesi tu.

Nöö di mi toona luku di könubangi möön, nöö hën mi si fö gaan soni, libilibi wan, lontu ën. Fa mi si de dë, nöö hii de sinkii dë ku wojo djaaa te dou, baka ku fesi tuu.

⁷ Nöö di fosuwan u dee libilibi soni ta djei lëun. Di u tu ta djei womi kau. Di u dii, fesi fëen dë kuma libisëmbë. Di u fö ta djei wan gbanini ta buwa.

⁸ Nöö hibiwan u de abi sikisi hanza, nöö kumafa u taki dë, wojo u de dë djalalaa hii de sinkii te dou a de hanza basu. Nöö fa de sai naandë, de an ta wei u gafa Masa Gaangadu möönsö. Ndeti ku didia de ta gafëen ta taki taa:

Ke Masa Gadu oo, i wanwan tö nöö dë limbolimbo söndö föutu.

Masa Gadu, i wanwan tö abi hii kaakiti a mundu.

I bi dë kaa, nöö i dë fa u dë aki eti,

nöö i o dë u nöömö tu.

Sö de ta taki.

⁹ Nöö fa dee fö libilibi soni sai dë, nöö sö de ta gafa Masa Gadu nöömö di dë a di könubangi dë, ta hei ën ta dëen tangi. Biga hën nöö da di Gadu u teego di an o dëdë möönsö.

¹⁰ Nöö de tuwenti-a-fö tiima dee bi dë sindosindo a dee könubangi naandë, nöö deseeti ta tjökö kini ku fesi a goon a Masa Gadu fesi ta puu dee könu kaapusa u de a de hedi ta tuwë a goon nëen fesi naandë. Nöö de ta gafëen ta bigi ën, biga hën da di Gadu ta libi u nöömö. De ta taki taa:

¹¹ Ke Masa Gadu o, i bigi.

I nöö waiti tjika fii kisi gafa e.

I wanwan fiti fii kisi hei, ku makiti a mundu o.

Biga fa i sai naandë,

nöö i wë mbei hii soni u mundu tuu.

Nöö fu di i bi kësö,

nöö hën mbei i mbei de buta fa i si de sai dë.

Sö de ta gafëen ta taki.

5

Aki ta taki u wan pampia di hebi te na wan libisëmbë

a' hati u jabi ën.

¹ Nöo di mi toona luku möön, hën mi si taa di Sëmbë di dë sindosindo a di könubangi, a abi wan pampia nëen leti maun panjanpanjan. Di pampia dë lolulolu, nöo a sikifi a dendusë ku döösë tuu. Nöo fa mi si di pampia dë, a dë palakipalaki gingin ku sëbën sitampu fu sëmbë an musu jabi ën.

² Nöo hën mi si wan gaan hebi basia u Masa Gadu Köndë ta bai basia taanga seei taa: “Ambë dë bumbuu tjika fu sa booko dee sitampu a di lolulolu pampia aki jabi ën?”

³ Ma fa di basia bai dë seei, de an feni na wan sëmbë möönsö di bumbuu tjika u jabi di pampia dë, an dë a liba ala, an dë a goonliba aki, an dë a goonbasu seei tu u de feni.

⁴ Nöo a bigi da mi tee ma saanfa u du, nöo hën mi këë te a bigi, fu di a dë taa na wan sëmbë fiti u sa jabi di pampia luku andi dë nëen dendu möönsö.

⁵ Ma nöo hën wan u dee tuwenti-a-fö tiima taki da mi taa: “Mati, na këë möön e. Kabuka. Sëmbë dë di bumbuu tjika u booko dee sëbën sitampu jabi di pampia lolu e. Hën de kai di Lëun fu di lö u Juda. Hën da di bakamii u Könu Dafiti di Gadu bi taki taa a o manda ko fu tii goonliba, nöo hën nöo sa du di soni naandë. Biga hën wini hii soni a mundu tuu kaa. Nöo kabuka e. Na këë möön.”

⁶ Nöo fa a taki dë, hën mi toona luku di kamian möön, ka de fö libilibi soni ku de tuwenti-a-fö tiima dë. Nöo hën mi si wan Sikafumii, a dë taanputaanpu leti mindi a di könubangi liba dë. Nöo fa mi si ën dë, nöo a djei da mi kuma de bi kii ën wan daka. Nöo a abi sëbën tutu nëen mindi hedi, ku sëbën wojo sii. Sö mi ta si ën. Nöo dee tutu ku dee wojo dë, de kë taki u di Akaa u Masa Gadu di dë telutelul a hii fasi, di Gadu ta manda go a hii goonliba palalaaa te dou.

⁷ Söö. Nöo hën wë di Sikafumii tei di pampia lolu di dë a di letisë maun u di Sëmbë di dë sindosindo a di gaan könubangi.

⁸ Nöo fa a tei ën dë kaa, hën dee fö libilibi sondi u bi taki dë ku de tuwenti-a-fö tiima, hën de tuwë deseei a goon nëen fesi. Nöo dee tiima naandë, de tuu seei dë ku wan pei gitali a maun ta pëë, de dë ku goutu komitji a de maun tu. Nöo wan sumëë suti soni dë a dee komitji dendu di de ta tjuma da Gadu. Nöo fa i ta si di sumuku fëen ta puu nango a liba dë, nöo a ta da i mëni u dee hia begi dee sômëni sëmbë u Gadu bi ta begi ën nöömö.

⁹ Nöo hën de ta kanda wan njunjun kanda da di Sikapumii taa:

I wë bumbuu tjika u tei di pampia lolu

booko dee sitampu fëen e.

Biga i wë de bi kii.

Ku di buuu fi i paka di paima bai libisëmbë da Gadu

kumutu a hii pei nasiön,

ku hii pei lö,

ku hii pei föluku,

ta fan hii dee pepei töngö u goonliba tuu.

¹⁰ Nöo hën i tja de ko buta a di Könu Tii fi basu.

I mbei de ko dë mindima ta tja libisëmbë ko a Gadu fesi.

Nöo de wë o tii di goonliba e.

Hën di kanda dë dee tiima ta kanda.

¹¹ Nöo di juu ten dë, hën mi ko ta jei sömëni basia u Gadu Köndë, dusudusu milionmilion, de hai ko gidjii dë leti ka dee könubangi sai dë ku dee fö libilibi sondi, ku de tuwenti-a-fö tiima. Nöo hën de ta wai ta piizii tee.

¹² De ta kanda ta bai ta taki taa:

I wë, di Sikapu Mii de bi kii,
I wanwan tö nöo abi di waiti tjika
fii fendi hii kaakiti u mundu,
ku hii gudu,
ku hii kôni,
ku hii taanga,
ku hii nëbai,
ku hii lesipeki,
ku hii gafa.
Sö wë i bumbuu tjika e.
Di Sikafu Mii wë de ta bigi sö e.

¹³ Nöo hën mi toona jei hii sondi dee dë ku libi a liba ala ku dee u goonliba aki, te kisi ku dee u ze ku dee dë a goonbasu tuu. Hii de tuu ta kanda seei ta taki taa:

I di Sëmbë di dë sindosindo a di könubangi dë,
ku di Sikapumii,
un musu kisi gafa e,
ku waiti
ku nëbai
ku kaakiti fu teego.

¹⁴ Nöo fa de ta kanda dë, nöo dee fö libilibi sondi dë ta piki taki: “Aai, leti sö a dë tuu.” Nöo de tuwenti-a-fö tiima ta tuwë deseei a goon ta hei Masa Gadu di dë sindosindo a di könubangi naandë.

„Sö wan gaan soni mi si e, dee sëmbë.”

6

Aki de booko sikisi u dee sitampu.

¹ Nöo hën wë mi toona luku möön, hën mi si di Sikafumii booko di fosuwan u dee sitampu u di pampia. Nöo hën mi jei wan u dee fö libilibi sondi bai a wan taanga töngö leti kuma te liba ta bai, a taa: “Ko o! Ko!”

² Nöo fa a bai dë, hën mi si wan weti hasi leti a mi fesi dë, ku wan sëmbë nëen liba. Nöo di sëmbë dë ku wan bö setiseti nëen maun. Nöo hën de dëen wan winima kaapusa faa buta a hedi, nöo a nango kuma wan gaan winima faa go wini feti.

Nöo sö wë di fosuwan u dee sitampu, sö hën a bi dë.

³ Nöo hën di Sikafumii booko wan otowan u dee sitampu möön. Nöo hën mi jei wan otowan u dee libilibi sondi naandë bai taa: “Ko o! Ko!”

⁴ Nöo hën mi bia luku hën mi si wan bë hasi hëii ta ko ku wan sëmbë nëen liba sindosindo. Nöo hën di sëmbë ko dou, hën de dëen wan gaan së ufangî, nöo de dëen makiti tu faa musu go puu fii a goonliba, be sëmbë ku sëmbë musu ta feti ku deseei ta kii de na de.

Nöo sö di u tu sitampu, sö soni fëen dë.

⁵ Nöo hën di Sikapumii toona booko di u dii sitampu. Nöo hën mi jei di u dii u dee libilibi soni ta bai taa: “Ko o! Ko!”

Nöo hën mi si wan baaka hasi piöö sö, ku wan sëmbë sindosindo nëen liba ku wan wegi nëen maun.

6 Nöo hën mi jei kuma wan töngö ta piki kumutu a de fö libilibi sondi naandë dendu, a taa: “Wan pontu boon, wan daka wooko möni. Dii pontu alisi, wan daka wooko möni. Nöo un kõni ku fatu ku win e!”

Nöo sö di u dii sitampu, sö soni fëen dë.

7 Nöo hën di Sikafumii toona booko di u fö u dee sitampu. Nöo hën mi jei di u fö u dee libilibi sondi bai taa: “Ko o! Ko!”

8 Nöo hën mi bia luku, hën mi si wan oto hasi, a dë seei fökiii sö. Nöo Dëdë dë nëen liba sindosindo, nöo Dëdëköndë seei ta waka nëen baka ta ko. Nöo hën de da Dëdë taki taa a musu kaba wan hii pisi u dee libisëmbë u goonliba ku feti, ku hangi, ku siki, ku hogimbeti.

Nöo sö wë di u fö sitampu, sö soni fëen dë.

9 Nöo hën mi si di Sikafumii toona booko di u feifi u dee sitampu.

Nöo hën mi bia luku hën mi si wan begi tafa ka de ta tjuma soni da Gadu. Nöo hën mi luku a di tafa basu, nöo hën mi si wanlö hia akaa u dee sëmbë dee de bi kii, fu di de bi ta konda di buka u Gadu ta taki soni fëen da sëmbë.

10 Nöo hën dee akaa bai taanga taa: “Ke Masa oo, i di Makiti Gadu a liba, i wanwan tö nöo dë limbolimbo apaiti söndö föutu. I ta hoi di taki fii nango nöömö söndö puu buka. Wë nöo un longi joo tan möön ufö joo kuutu dee sëmbë dee bi kii u aki, da de sitaafu?” Sö de hakisi Gadu.

11 Nöo hën de da de weti kooosu faan u de musu bisii. Hën de taki da de taa: “Tan ufö e. Biga wanlö oto futuboi u Gadu dë fu de musu kii fu Masa Jesosi hedi eti, kumafa de bi kii unu.” Nöo sö de piki de.

Sö wë di u feifi sitampu, sö soni fëen dë.

12 Nöo hën wë mi si di Sikafumii booko di u sikisi sitampu. Nöo hën goonliba ko ta seki gaanfa, di sonuwojo ko dungu kankan ma a dë kasakasa kuma anakitapu. Nöo hën di libawojo ko bë hëii sö, kuma buuu.

13 Nöo dee teeja a gadu ala ta puu ta kai a goon gililii sö, kuma te wan gaan ventu ko ta sakwi figa ta puu njanjan ta tuwë, leti sö de ta puu ta kai.

14 Nöo mundu ala jabi seei wajaa, kuma wan soni bi tapëen hën de lola ën puu, di kamian fika hoo jabijabi.

Nöo di juu ten dë, hii dee gaan kununu a dee kamiankian ku dee paati dee dë a di ze dendu, de tuu go kumutu ka de bi dë, de an dë u si möön seei.

15 Nöo hii sëmbë u goonliba ta kule nango tjubi a baaku ee nasö a dee sitonu basu a dee kununu mindi. Fëëë nöo de fëëë sö. Dee kõnu u goonliba, ku dee hebi tiima, dee sodati hedima, ku dee guduma, dee sëmbë bi abi makiti a goonliba, dee sëmbë bi dë fiifi te kisi dee saafuma tuu, sö de tuu ta kule seei gililii nango suku kamian u de tjubi.

16 Hën de ta bai ta kai wolo ta begi dee kununu ku dee gaan sitonu fu de musu kai a de liba tapa de. Biga de an kë fu di wojo u di Sëmbë di dë sindosindo a di kõnubangi a liba ala musu kai a de sinkii. Söseei de an kë u di hatiboonu u di Sikafumii musu kai a de liba tu.

17 Biga di gaan kuutudaka u Gadu faa puu hatiboonu a libisëmbë liba, nöo hën wë dou dë e, nöo ambë sa tja di soni dë?

Nöo sö wë di u sikisi sitampu, sö soni fëen dë e, dee sëmbë.

7

Aki ta taki sondi u 144.000 sëmbë dee kisi di sitampu

u Gadu a de mindifesi.

1 Nöo a baka fëen möön, nöo hën mi si fö basia u Masa Gaangadu köndë, de dë taanputaanpu a dee fö huku u di goonliba. Fa de sai naandë, nöo de ta

tapa de fō ventu fu de an musu böö ko a di goonliba möön. De an musu böö ko a tela, de an musu böö go a ze, de an musu böö a dee pau hedi möön tu.

²Nöo hën mi toona luku a di sē u sonu kumutu ala, hën mi si wan oto basia u Gadu Kōndē ta subi ta ko zuuu sō, kuma te sonu ta booko ta ko. Nöo fa mi si di basia ta ko dē, nöo a dē ku wan soni nëen maun faa maaka sēmbē buta di sitampu u di libilibi Gadu a de.

Nöo hën a bai da dee oto fō basia dee bi kisi di makiti u de sa tapa di ventu ta poi di goonliba ku di ze.

³A taki da de taa: “Un tan ufō e! Wan du hogi a di goonliba eti, na a tela, na a di ze, na a dee pau hedi tu. Biga u musu naki sitampu a dee futuboi u Gadu mindifesi ufō.”

⁴Nöo hën de naki di sitampu da de te de kaba. Nöo dee sēmbē dee kisi di sitampu naandē, nöo mi jei un mēni de dē. De dē 144.000 sēmbē kumutu a dee tuwalufu lö u Isaēli:

⁵a di lö u Juda, 12.000

a di lö u Lubēni, 12.000

a di lö u Gati, 12.000

⁶a di lö u Asē, 12.000

a di lö u Nafutali, 12.000

a di lö u Manase, 12.000

⁷a di lö u Simion, 12.000

a di lö u Leifi, 12.000

a di lö u Isakali, 12.000

⁸a di lö u Zebulon, 12.000

a di lö u Josēfu, 12.000

a di lö u Benjamin, 12.000.

Dee sēmbē dee kisi di sitampu naandē, nöo sō de hia tjika.

Aki Johanisi ko si wanlö

gaan hia sēmbē möön.

⁹Nöo hën mi bia luku a di sē ka di kōnubangi dē möön, hën mi si wanlö gaan hia sēmbē dē taanputaanpu a di Sikafumii fesi. De hia tee sēmbē an tjika u konda de. Nöo de dē sēmbē dee kumutu a hii pei nasiön, ku hii pei lö, ku hii pei föluku, ta fan hii dee peipei tōngö u goonliba tuu. Nöo de dē bisibisi ku weti djapona faan, nöo de dē ku palo maun a de maun ta wai da di Sikafu Mii.

¹⁰Nöo hën wē de bai taanga, taa:

Aai o, Masa Gaangadu,

i wē da di Gadu fuu,

di dē sindosindo a di kōnubangi,

nöo a ju ku di Sikafumii wē

hii heepi ta kumutu ta ko a u libisēmbē aki e!

Nöo sō de bai.

¹¹Nöo hën mi si dee basia u Masa Gadu Kōndē, de dē taanputaanpu gbitii lontu hii di kamian dē ko kai, ka dee tiima ku dee fō libilibi soni ku di kōnubangi sai dē. Nöo de ta tuwē deseēi a di kōnubangi fesi ka Masa Gadu dē sindosindo. De ta kai ku fesi a goon ta bigi Gadu ta lesipeki ën taa:

¹²“Aai Masa Gadu,

i wanwan tö nöo musu feni gafa,

ku nēbai,

ku kōni,

ku tangi,

ku lesipeki,

ku makiti ku hii kaakiti a mundu.

I wanwan nöö abi de fu teego nöömö.

A tan sö.”

¹³ Nöö hën wan u de tuwenti-a-fö tiima naandë hakisi mi taa: “Wë dee sëmbë dee dë ku weti koosu faan a sinkii dë, ambë da de, mati? Unsë de kumutu ko aki?”

¹⁴ Nöö hën mi piki ën taa: “Wë nönö mati, ma sabi soni u de. Ma a kandë i, i sa sabi.”

Hën a piki mi taa: “Söö. Wë mati, dee sëmbë i si naandë, de pasa di gaan hogi sitaafu söndö bia baka disa Gadu. De wë da dee sëmbë bi tei di paima di di Sikafumii bi paka da de, di a dëdë tuwëen buuu a goon. Hën wë mbei i si de ko dë limbolimbo faan sö.

¹⁵ “Nöö hën mbei tu de sa taanpu a di könubangi u Masa Gaangadu fesi dë ta dini ën ndeti ku didia, leti ka i si a dë a di Wosu fëen naandë. Nöö hënseei wë o tjubi de e, fu soni an musu du de möön.

¹⁶ Hangi seei an o kisi de möön, dëwata an o kisi de möön tu, sonu an o tjuma de. Na wan taanga kendi seei de o fi möön a mundu.

¹⁷ Biga di Sikafumii di i ta si a di könubangi dë, nöö hën o kiija de ta tja de kumafa wan bumbuu sëmbë ta kiija sikafu. Nöö a o ta tja de go ka de sa bebe di wata di ta da libi u teego. Nöö Masa Gadu seei o feki di wojowata puu a de wojo fu de an musu këë möön a mundu.”

Nöö sö wë di tiima dë fan ku mi e.

8

Aki de booko di u sëbën sitampu.

¹ Nöö hën di Sikafumii booko di u sëbën sitampu fu di pampia lolu awaa. Nöö hën mundu ko dë pii sô wan hii hafu juu langa. Na wan soni seei i ta jei di ten dë möön.

² Nöö hën mi bia luku, nöö hën mi si sëbën basia u Masa Gadu Köndë, dee hebiwan seei dee ta taanpu a Gadu fesi. Nöö hën de da de sëbën tutu, hiniwan ku fëen.

³ Hën mi luku, hën mi si wan oto basia möön ku wan goutu paabi nëen maun, nöö a di lö paabi dë de ta tjuma sumëë suti soni da Gadu.

Hën di basia waka go a di goutu tafa ka de ta tjuma soni da Gadu a di könubangi fesi dë. Nöö di a go dou, hën de dëen wanlö hia sumëë suti soni faa musu tjuma a di tafa liba da Gadu, mökisi ku dee begi u dee sëmbë u Gadu.

⁴ Nöö dee begi ku di sumuku u dee sumëë suti soni ta mökisi makandi ta subi nango te a Masa Gadu fesi a liba ala.

⁵ Nöö hën di basia dë tei faja a di begitafa hën a lai ën a di goutu paabi te a fuu, nöö hën a vindëen tuwë go a goonliba. Nöö di juu dë, liba ta koti faja hwaihwai, kamian ta bai gbalalala ta giinta gililili, goonliba ta seki.

Aki fö u dee basia u Gadu böö dee tutu u de.

⁶ Nöö hën de sëbën basia ta seeka fu de böö dee tutu u de.

⁷ Nöö hën wan u de böö di fëen tutu. Nöö hën mi si ëisi logologo kuma tjumbu mökisi ku faja ku nongö, ta kumutu a liba ta kai. A dë kuma sëmbë ta hiti de ta ko a goonliba. Nöö hën wan hii pisi u goonliba ku pau fëen ku uwii fëen tuu tjuma kaba a sôsö fiaa.

Nöö sö wë a pasa di de böö di fosu tutu.

⁸ Nöo hën baka u di dë, hën di u tu basia böö di fëen tutu. Nöo hën mi si wan gaan gindi soni kuma gaan kununu sô ta kisi faja gilili. Hën de tei ën hiti go a ze dendu djuvu, nöo hën wan hii pisi u di ze bia ko buuu hëii sô.

⁹ Nöo wan hii sê u dee soni dee ta libi a di ze dëdë kaba a sôsô fiaa, söseei sômëni u dee sipi bi dë a di ze kaba a sôsô tu.

Nöo sô wë a pasa di de böö di u tu tutu.

¹⁰ Nöo hën di u dii basia böö di fëen tutu. Nöo hën mi si wan gaan teeja kumutu a liba, ta kisi faja gilili sô ta ko. Hën a kai go a wan hii pisi u dee lio te kisi ku dee kiikihedi.

¹¹ Nöo di teeja naandë hën wë de ta kai Bita. Nöo fa a kai dë, nöo wan hii sê u dee wata u goonliba ko bita tee, nöo sômëni hia sëmbë dëdë fu di de bebe di wata dë hedi.

Nöo sô wë a pasa di de böö di u dii tutu.

¹² Nöo hën di u fô basia böö di fëen tutu. Nöo hën wan soni pasa ku di sonu te wan hii pisi fëen ko dungu kankan, an ta sëndë möön. Söseei wan hii pisi u di libawojo ku wanlô hia teeja ko dungu pii. Nöo dee soni dë wë mbei wan hii pisi u didia ku wan hii pisi u ndeti an abi na wan piki limbo möön seei.

¹³ Nöo fa mi ta luku dë, nöo hën mi si wan gbanini ta buwa ta lontu, mi jei a bai kai dii buka olo taa: “Mi bai helu oo, mi bai helu! Mi bai helu da dee sëmbë ta libi a di goonliba aki, fu de dii tutu dee fika dee dee basia musu böö eti. Biga dee soni dee o pasa dë, nöo de hogi poi.” Nöo sô mi jei di gbanini bai.

9

Aki Johanisi si wanlô hogi atiti.

¹ Nöo hën di u feifi basia böö ën tutu, nöo hën mi si wan teeja di bi kumutu a liba kai a goonliba. Nöo di teeja naandë, de dëen di sötö di ta jabi di döo u di baaku di na abi goon.

² Nöo di a jabi ën, nöo hën mi si sumuku ta kumutu nëen gbitii sô kuma te soni ta tjuma a wan gaan onfu dendu. Nöo fa a ta puu sumuku dë, nöo te i hopo wojo luku liba ja sa si sonuwojo möön, na gaangadu seei i sa si. Sô di sumuku degi tjika.

³ Nöo hën mi si wanlô soni kuma gaan atiti ta kumutu gililili a di sumuku dendu naandë ta buwa ta paaja a goonliba. Nöo hën de da dee atiti poosian leti kuma kukutulabu.

⁴ Nöo de bai de taa de an musu njan dee ahun u goon, de an musu kai a pau hedi njan dee pau wiwii, de an musu njan na wan kuwakuwa uwii u goonliba. Ma dee sëmbë dee an abi di maaka u Gadu a de mindifesi, nöo de de musu njan.

⁵ Ma nöo fa de o go njan de dë, nöo de an musu njan de kii, ma de musu sitaafu de nöo. Biga te de njaan i gbalau sô, nöo a o ta hati i seei leti kuma te kukutulabu njaan i. Nöo feifi liba longi de o sitaafu libisëmbë a di lö fasi dë.

⁶ Nöo di juu dë, sëmbë o ta kai dëdë ta suku ën te de wei, dëdë o kule go tjubi da de.

⁷ Nöo fa mi si dee atiti dë, de djei hasi dee dë kabakaba këëë u go a feti. Nöo de dë ku wan goutu kaapusa a de hedi kuma kônu kaapusa, nöo fesimindi u de dë kuma libisëmbë.

⁸ Nöo di uwii u de a de hedi, nöo a dë leti kuma mujëë uwii ma tanda u de dë kuma di mbeti de kai lëun tanda.

⁹ Nöo hatimindi u de dë ku felu djakiti. Nöo te de ta buwa, nöo dee hanza u de ta giinta kuma wanlô gaan hia hasi ku dee wagi u de ta kule nango a feti.

10 Nöo labu u de dë kuma di u kukutulabu, nöo nëen di poosian u de dë. Ku ën de ta suti sëmbë ta sitaafu de feifi liba longi.

11 Nöo fa dee atiti sai naandë, nöo de abi wan kõnu. Hën da di basia u di baaku di na abi goon naandë. Nöo hën abi taki a de liba. Nöo di kõnu abi wan në, a Dju tōngö de ta kai ën Abadon, ma nöo a Giiki tōngö de ta kai ën Apolion. „Dee në kë taki “Di sëmbë di ta poi soni ta kaba a sösö”..”

12 Söo. Nöo di fosu wan u dee helu di di gwanini bi bai hën di dë, nöo a fika tu helu eti u ko.

Aki di u sikisi basia böö ën tutu.

13 Nöo hën di u sikisi basia böö hën tutu, nöo hën mi jei wan tōngö kumutu a dee fō huku u di goutu tafa a Masa Gadu fesi naandë, ka de ta tjuma sumëë suti soni dëen.

14 A ta fan ku di basia di böö di tutu naandë taa: “Dee fō basia dee dë taitai a di gaan lio de kai Efaata, nöo fii lusu de e.”

15 Nöo hën de lusu dee basia. Nöo fa de lusu de dë, nöo de bi dë kabakaba këë kaa ta luku di jaa ku di liba ku di wiki ku di daka ku di juu faa dou, be de hopo go kii wan hii gaan pisi u dee sëmbë u goonliba.

16 Nöo mi jei fa dee sodati u de hia tjika e. De dë tuhöndö-miliön sodati.

17 Nöo fa mi ta si dee soni aki sö, nöo mi si di bisi u dee sodati ku di bisi u dee hasi u de. De tuu ta bisi felu djakiti bë, ku baau, ku kooko. Nöo dee hasi hedi dë leti kuma lëun, nöo faja ku sumuku ku wan gaan tingitingi soni de kai zuwalufu ta kumutu a de buka dendu.

18 Nöo dee soni ta kumutu a de buka dë, hogi soni fu mundu de dë e. Biga di faja ku di sumuku ku di zuwalufu siki wan hii gaan pisi u goonliba sëmbë kii pii.

19 Nöo di poosian u dee hasi an dë a de buka nöo e, ma a dë a de labu tu. Biga di labu u de abi buka leti kuma sindeki nöo ku ën de ta njan sëmbë.

20 Ma nöo fa i si dee hogi dë ta kii sëmbë seei, ma dee sëmbë dee fika an ta disa dee soni de ta dini möönsö. Dee soni dee ta ko a sëmbë liba, ku dee pindigadu dee de ta mbei ku goutu, soofu, köpö, sitonu, nasö pau, de tuu de ta begi eti. Fa dee soni de ta begi sai dë, de an sa si soni, de an sa fan ku de buka, de an sa jei soni ku de jesi, de an sa waka ku de futu, ma eti seei dee sëmbë sai dë ta begi de nango nöömö. De an ta disa möönsö.

21 Söseei de an ta disa sëmbë u kii möönsö tu, de ta du dee tofu wooko u de nango nöömö, de an ta disa di puta libi u de möönsö, de an ta disa soni u fufuu. Sö dee lö sëmbë dë abi taangajesi tjika.

10

Aki wan hebi basia u Gadu ko ku wan piki pampia.

1 Nöo hën mi si wan oto basia, gaan makiti wan, kumutu a Masa Gadu Köndë ta bazia zalalala ta ko a goon. Fa a ko dou naandë, nöo a bisi wan soni kuma bundji sö, nöo wan mutjama dë nëen hedi. Nöo fesi fëen ta koti faja kuma sonuwojo, nöo panteja fëen dë hëii sö kuma faja posu.

2 Nöo a dë ku wan piki pampia nëen maun jabijabi. Nöo fa a saka ko dou dë, hën a taanpu djam sö, letisë futu fëen dë te a ze, töötösë futu fëen dë te a tela liba.

3 Nöo hën a bai taanga, leti kuma te lëun ta bai. Nöo fa a bai dë, nöo hën dee sëbën bai fu liba ala tuu ta giinta ta piki.

⁴ Nöo di mi jei dee soni dee sēbēn bai ta taki, nöo mi bi kē sikifi de. Ma nöo hēn mi jei wan tōngō a liba fan ku mi taa: “Nōnō womi, na sikifi dee soni dē e. De musu fika tjubitjubi a i dē.”

⁵ Nöo di basia di mi si dē, di bi taanpu ku wan sē futu a ze ku wan sē futu a tela, nöo hēn wē a hopo leti maun fēēn a liba a Masa Gadu fesi.

⁶ Di Gadu di ta libi u teego di mbei liba ku goon ku di ze ku hii dee soni dee dē a de tuu, nēēn fesi a hopo maun. Nöo hēn a kai Masa Gadu nē djula taa: “Di juu dou!

⁷ Te di u sēbēn basia böo di fēēn tutu, nöo di tjubitjubi soni di Masa Gadu bi konda da dee futuboi fēēn a fesi, dee tjabukama, nöo hēn wē o ko pasa ku telu awaa.” Sō di basia taki.

⁸ Nöo hēn mi toona jei di tōngō di bi kumutu a liba ala möön. A taki da mi taa: “Haika e. Ja si di piki pampia di dē jabijabi a di basia maun dē nö? Go tei ēn nēēn.”

⁹ Nöo hēn mi waka go taanpu a di basia fesi, hēn mi hakisi ēn faa da mi di pampia.

Hēn a taki da mi taa: “Antoobi. Tei ēn, nöo i njan mēn e. Nöo te i njan mēn, nöo a o suti a i buka kuma hōniwata, ma te i guli ēn go a i bēē, nöo a o ko bita da i.”

¹⁰ Nöo hēn mi tei di pampia nöo hēn mi njan mēn. Nöo a pasa leti kumafa di basia bi taki da mi tuu. Biga fa mi njan mēn dē, nöo a suti seei a mi buka kuma hōniwata, ma di mi guli ēn go a mi bēē nöo a ko bita.

¹¹ Nöo hēn di basia fan ku mi möön taa: “Haika e. Masa Gadu o lei i sōmēni soni eti dee o pasa ku dee kōnukōnu, ku dee nasiōnnasiōn, ku hii pei sēmbē dee ta fan dee tōngōtōngō u goonliba. Nöo te a lei i dee soni, nöo joo ta konda de tuu da sēmbē e.” Nöo sō di basia fan ku mi te a kaba.

11

Aki ta taki u tu sēmbē Gadu o manda ko fu taki soni dēēn.

¹ Sōo. Nöo hēn de da mi wan langa soni kuma baluma sō u maaka soni. Nöo hēn de taki da mi taa be mi maaka di Wosu u Masa Gadu ku di kōpō begitafa di de ta tjuma soni da Gadu tu. Nöo hii dee sēmbē dee dē a di Wosu ta begi, mi musu konda de te mi kaba un mēni de dē.

² Ma an dē u mi pena maaka di djai dendu ka di Wosu dē, biga di dē o dē u dee sēmbē dee an dē u Gadu ufō. Nöo fa de o da de di kamian dē, nöo de o sai dē a di kōndē u Gadu ta du hogi soni te dou fōteni-ku-tu liba longi. Sō de taki da mi.

³ Ma nöo hēn de toona taki da mi taa tu sēmbē o ko naandē bisibisi ku djodjo a de sinkii, *„nöo di bisi u de, hēn ta lei fa dee hogilibi u dee sēmbē u goonliba ta tjika de,„* Nöo fa de o ko naandē, Gadu o da de kaakiti u de kisi fan nēēn ta konda da sēmbē hii dee fōteni-ku-tu liba dē. *„Hēn da dii jaa ku hafu,„* Sō de taki da mi.

⁴ Wē de tu sēmbē ta konda soni u Gadu dē, nöo de wē da de tu oleifi pau e, *„di di fesiten tjabukama u Gadu de kai Sakaliasi bi taki,„* Nöo de da de tu tamundu faja tu, dee ta dē taanputaanpu a Masa Gaangadu fesi nöömō, di Gadu di abi di goonliba aki.

⁵ Nöo fa dee sēmbē o ko ta konda soni u Gadu dē, nöo ee wan sēmbē i kē du de hogi nöo sēmbēwante faja o kumutu a de buka dendu ko tjuma i kii puu dē. Hiniwan sēmbē kaa di o kē pooba fu du hogi ku de, nöo a di wan seei fasi dē nöo de o dēdē.

⁶ Nöo fa de tu sëmbe u Masa Gadu o ko de, de o ko ku gaan makiti e, kuma dee fesiten tjabukama u Gadu. Biga de o sa tapa tjuba be an musu kai hii di ten di de ta kisi fan a Gadu ta konda soni da sëmbe naandë. Nöo de o abi makiti tu u mbei hii wata bia ko gadjabia. De o abi makiti u de mbei hii sootu pei hoga paaja go a sëmbesëmbe so hesi kumafa de kë.

⁷ Ma nöo a baka u di de o kaba dee fan u de dë, nöo wan gaan taku mbeti, hoga wan, o kumutu a di baaku di na abi goon naandë dendu, nöo a o ko feti ku de te a wini de, nöo a o kii de.

⁸ Nöo fa a o kii de dë, nöo dee dëdë sinkii u de o fika a sitaati gindigindi dë, leti a di gaan köndë naandë ka i si de bi manda di Masa u de go kii a lakpa pau. Fa dee sëmbe u Jerusalem sai dë, de hoga tee sëmbe ta kai di köndë u de Sodom ee nasö Egepiti köndë, sö de hoga tjika.

⁹ Nöo fa i si di mbeti o ko kii de tu sëmbe u Gadu dë, nöo hii dee nasiönnasiön sëmbe u goonliba tuu o ta si de dëdëdëdë a goon naandë. Hii dii daka ku hafu longi sinkii u de o dë a goon. Na wan sëmbe o da pasi u de bei de puu naandë möönsö.

¹⁰ Nöo di juu ten dë, dee sëmbe u goonliba o ta wai te na soni u di dëdë dee sëmbe naandë dëdë. De o ta mbei piizii ta manda soni da de na de a dee kamiankaman. Sö de o ta wai tjika e, biga de tu tjabukama u Gadu dee bi ta da de sitaafu sö, nöo de dëdë.

¹¹ Ma nöo a baka u de dii daka ku hafu dë, nöo Masa Gaangadu o da de böö ku libi baka e, nöo de o hopo taanpu a pë. Nöo hii dee sëmbe dee bi si de taa de bi dëdë, nöo hati u de o latja.

¹² Nöo di juu dë, de o jei wan taanga bai kumutu a liba ala kai de taa: “Un subi ko a liba aki.” Nöo de o ta hopo nango zaaa a wan bundji dendu te de go pii. Nöo hii dee felantima u de tuu o ta luku de diin, fa de ta hopo nango a liba dë.

¹³ Nöo di juu naandë, goonliba o ta seki gidigidi tee nöo wan hii pisi u di köndë o booko kai holou. Nöo sëbën dusu sëmbe o dëdë u di seki di goonliba o seki naandë.

Nöo dee sëmbe dee fika dee di seki u di goonliba an kii, nöo de o ko fëëë gaanfa seei, nöo de o bia ta hopo Masa Gadu në awaa, di Gadu di ta dë te a hei ala.

¹⁴ Söö. Wë nöo di u tu helu hën di dë e, nöo di u dii ta ko awaa.

Aki di u sëbën basia u Gadu

böö hën tutu.

¹⁵ Nöo hën di u sëbën basia u Masa Gaangadu köndë böö di fëën tutu awaa. Nöo hën mi ta jei sëmëni töngö ta piki taanga a liba ala. De taa:

Aai o, awa ufö goonliba kumutu a dee könu u goonliba maun e,
nöo hën a ko a di Tii u Masa Gadu,
ku di Könu fëën de kai di Keesitu di a bi paamusi u.

Hën o dë Könu fu nöömö,

Di Tii fëën an o kaba möönsö a mundu.

¹⁶ Sö de ta bai. Nöo de tuwenti-a-fö tiima dee bi dë sindosindo a dee könubangi lontu di gaan könubangi u Masa Gaangadu naandë, nöo de ta tuwë deseëi a goon ta tapa fesi ta bai Masa Gaangadu në

¹⁷ taa:

Aai Masa Gaangadu,

i wë da di Gadu di abi hii makiti.

I bi dë kaa,

nöo i dë te kisi fa u dë aki eti. Aai.

Nöo u da i tangi o,

Biga awaa i ko ku di gaan kaakiti fii,
fii tii goonliba ku telu awaa.

Awaa joo seti di kōnutii fii.

¹⁸ Dee peipei nasiōn u goonliba,
hati u de bi ta boonu ku i.

Ma awaa ufō i seei hati o ko boonu ku de awaa.

Biga di juu fii kisi

fii musu kuutu dee dēdē sēmbē.

Di juu kisi fii paka dee futuboi fii,

dee tjabukama ku dee sēmbē fii dee bi ta hopo i nē,
lagiwan ku heiwan tuu.

De tuu o kisi di paima u de awaa.

Dee sēmbē dee bi poi di goonliba fii kaba a sōsō,

nōo awaa juu fii kisi poi de kaba a sōsō tu.

Sō de tuwenti-a-fō tiima ta taki.

¹⁹ Nōo fa u mbei dē, nōo hēn di Wosu u Masa Gaangadu a liba ala jabi hoo,
nōo nēen dendu i sa si di Kēdē di bi dē a di Wosu u Gadu a goonliba aki. „Nēen
dendu de bi ta hoi di buka di Gadu bi mbei ku libisēmbē, di de bi ta booko
nōomō.” Di juu dē, nōo gaangadu ta koti faja hwaihwai, goonbasu ta giinta,
liba ta bai, goonliba ta seki ta jabi. Nōo ēisi pisi logologo ta kumutu a liba ta
kai a goon gulululu.

Nōo sō mi si e, dee sēmbē.

12

Aki ta taki u wan mujēē

ku wan hogi kaima.

¹ Wē nōo hēn baka u di dē hēn mi si wan maaka, gaan foombo wan, a
liba ala. Mi si wan mujēē bisibisi ku sonu a sinkii, nōo di libawojo dē nēen
basufutu. Nōo a dē ku wan kōnu kaapusa nēen hedi, nōo di kaapusa dē ku
tuwalufu teeja.

² Nōo fa mi si di mujēē naandē, a dē ku bēē. Nōo juu fēen kisi faa pai, bēē
ta njan mēn te a ta kai olo seei.

³ Ma nōo hēn mi toona si wan oto soni a liba dē möön kuma maaka. Mi
si wan gaan gindi kaima bē hēi sō. A dē ku sēben hedi ku teni tutu. Nōo
hiniwan u dee hedi fēen dē bisibisi ku kōnu kaapusa.

⁴ Nōo ku di labu fēen a feki wan hii pisi u dee teeja a liba ala puu tuwē ko
a goonliba. Nōo fa di kaima sai dē, a dē leti a di mujēē fesi dē, setiseti pii ta
watji ēn fu te a pai di mii tuwē a goon, nōo a feni ēn njan puu dē.

⁵ Nōo te wan pisi hēn di mujēē pai di mii tuu. A dē wan womi mii. Ma nōo di
a pai ēn tuwē a goon, nōo hēn de kisi di mii tei wante tja go da Masa Gadu ka
a dē nēen kōnubangi ala sindosindo. Biga di Mii naandē, hēn o tii hii goonliba
ku wan gaan kaakiti, leti kuma te wan felu ta naki doti paabi booko pispisi.
Sō di tii fēen o hebi tjika.

⁶ Ma nōo di mujēē, hēn a kule go te a wan sabana kamian di Gadu bi seeka
dēen faa musu ta tjubi ta kisi sōlugu wan-dusu-ku-tu-hōndō-ku-sikisiteni-daka
longi. „Hēn da dii jaa ku hafu.”

⁷ Nōo hēn mi luku a Masa Gadu Kōndē ala möön, nōo hēn mi si wan gaan
feti hopo ala. „Di gaan hedibasia u Masa Gadu Kōndē de kai,” Mikaēli ku dee
basia fēen go feti ku di gaan kaima. Nōo hēn di gaan kaima ku dee basia fēen
ta feti baka.

⁸ Nöo hën de ta feti teee, ma nöo di gaan kaima an wini, biga an taanga tjika. Nöo di hën ku dee basia fëen lasi kaa, nöo de an da de pasi u de tan a Gadu Köndë ala möön e.

⁹ Biga de kisi de vinde puu ala tuwë go a goon.

Wë nöo di gaan bë kaima i si dë, hën wë da di didibi e, Saatan seei, di ta ganjan sëmbë a hii di goonliba. Hën wë de wini sô e. De hiti ën ku dee basia fëen tuu tuwë go a goonliba gbolo.

¹⁰ Nöo hën mi jei wan taanga tóngö sô kumutu a Gadu Köndë taa:

Aai, u böö e.

Awa u si di heepi u di Gadu fuu

fa a bigi tjika.

U ko si di gaan kaakiti fëen di a abi. Aai.

Awa di Tii fëen o paaja a mundu awaa.

Nöo woo ko si di Könu fëen di a bi paamusi faa da u,

fa a abi taki tjika.

Biga di kõnkuma an dë a liba aki möön e.

Fa a bi dë aki, a bi ta sei dee otowan fuu da Gadu ndeti ku didia,

nöo awa de vindëen puu aki tuwë go a goon.

¹¹ Nöo ku dii soni wë dee sëmbë u Gadu wini di kõnkuma dë e.

De wini ën ku di buuu u di Sikafumii di a bi dëdë tuwë da de.

Nöo de wini ën fu di de bi ta piki nöömô taa de ku di Sikafumii nama.

Nöo de wini ën tu fu di de an bi ta fëëe u de dëdë fu di Sikafumii hedi.

Ku de dii soni dë wë de wini di kõnkuma.

¹² Wë nöo Gadu Köndë, ku un dee sëmbë dë nëen tuu, un wai e!

Aai, un piizii seei.

Biga u böö u di hogi dë.

Ma helu u di goonliba ku di ze,

biga di didibi saka ko a unu awaa.

Nöo fa a saka ko dë, a ko ku taanga hatiboonu,

biga a sabi taa ten fëen ko sati.

Sô mi jei di tóngö bai taki.

¹³ Nöo hën di di gaan kaima ko si sô taa de hiti ën puu a liba ala, nöo hën a seti kule ku di mujëe di bi pai di mii.

¹⁴⁻¹⁶ Ma nöo di juu ten dë, hën Gadu da di mujëe hanza kuma wan gaan gbanini sô, faa sa buwa go tjubi a di sabana kamian di Gadu bi seeka dëen.

Nöo di di kaima si taa di mujëe nango, nöo hën a ta puu wan gaan hia wata nëen buka ta tuwë nango nëen baka djululu kuma wan lio ta kule faa musu kisi ën kii kaba a sôsô. Ma nöo goonliba heepi di mujëe. Biga a jabi hooobe de di wata fiaa, an kisi di mujëe möönsô.

Nöo hën di mujëe buwa go te a di sabana dendu, nöo ala a go fika hii de dii jaa ku hafu longi, ka di kaima an sa dou nëen.

¹⁷ Nöo hën di di kaima si taa wë nönö, an sa kisi di mujëe möönsô, nöo hati fëen boonu te na soni. Hën a taa: “Mi o go buta ku dee oto mii fëen awaa.” Nöo dee oto mii fëen, de da dee sëmbë dee ta piki Gadu buka ta hoi a dee lei u Jesosi dee a bi konda da de.

¹⁸ Nöo hën wë di bë kaima go dë a di gaan ze bandja ala pii ufö.

13

Aki ta taki u wan mbeti di kumutu a ze.

¹ Söö. Nöo hën wë mi toona si wan oto mbeti möön kumutu a ze, hënseei dë ku sëbën hedi ku teni tutu tu kuma di kaima möön. Nöo dee tutu fëen tuu dë

ku könu kaapusa, nöö hiniwan u dee hedi fëen dë ku gaan hogi në sikifisikifi ta kosi Masa Gaangadu ta sösö ën.

² Nöö di mbeti aki, fa mi si ën dë, sinkii fëen dë pëndëpëndë kuma takumbeti, ma futu fëen degi kuma di hogi mbeti de kai “beer”. Nöö buka fëen djei lëun. Nöö sò di mbeti naandë dë e.

Nöö di gaan kaima u bi taki soni fëen dë, a da di mbeti aki gaan kaakiti e. Biga a dëen di könubangi fëen faa musu sindo, hën a dëen gaan taki a sëmbë liba.

³ Nöö fa mi si di mbeti dë, nöö a bi kisi wan gaan makei a wan u dee hedi fëen. A bi fika piki nöö a dëdë, ma fa u dë aki sò nöö a toona ko bunu gbelingbelin baka. Nöö di soni dë bigi seei da hii sëmbë u goonliba, fu di a dë taa di mbeti dë kisi sò wan makei ma a kula ko bunu. Hën de tuu ko ta waka nëen baka.

⁴ Nöö de tei hën ku di gaan kaima tuu kuma gadu u de de ta begi, biga di kaima hën bi da di mbeti naandë taki. De taa: “Ambë seei dë a goonliba kuma di mbeti aki? Jee? Ambë seei sa hopo taa i nango feti ku ën?” Sö de ta taki ta gafa di mbeti.

⁵ Nöö fa di mbeti dë sai dë, nöö hii föteni-ku-tu liba longi a feni pasi faa ta njan buka ta taki gaangaan taki ta sösö Masa Gaangadu. Hii de dii jaa ku hafu dë a abi taki a sëmbë liba tu ta tii de.

⁶ Nöö a ta jabi buka ta fan takutaku fan ta tuwë ta kosi Masa Gadu ku di kamian ka a sai dë, te dou ku hii dee sëmbë dee ta dë nëen köndë tuu a ta kosi. Sö a ta du nöömö.

⁷ Nöö a ta feni pasi tu faa feti ku dee sëmbë u Gadu wini de. Fa a sai dë, nöö a feni taki a hii sëmbë u goonliba liba, a hii pei nasiön, ku hii pei lö, ku hii pei föluku dee ta fan dee peipei töngö u goonliba, de tuu ko dë nëen basu.

⁸ Nöö hii de tuu tei ën kuma gadu u de de ta begi, ma boiti dee sëmbë dee në dë sikifisikifi a di Buku u di Libi u Teego. Nöö di Buku dë, di Sikafumii di bi dë u de kii fu sensi Gadu mbei goonliba, hën abi ën.

⁹ Wë nöö ee wan sëmbë i abi jesi u jei soni, nöö be i haika e.

¹⁰ Ee wan sëmbë de kisi i buta a sitaafu „fu di ja begi di mbeti naandë hedi, nöö ja a’ köni fëen„, be de du sò nöö. Ee a kai da i fu de musu kii i ku sè ufangi „fu di ja begi di mbeti„, nöö be de kii i nöö. Nöö fa u ta fan aki, nöö a dë fanöudu u dee sëmbë u Gadu musu abi taihati ku gaan futoou a Masa Gadu liba nöömö.

Aki ta taki u wan mbeti di kumutu a goonbasu.

¹¹ Söö. Nöö hën mi toona si wan oto mbeti möön, ma disii, a goonbasu hën a kumutu. Nöö a abi tu tutu kuma wan sikafu mii, ma a ta fan leti kuma di hogi kaima.

¹² Nöö fa disii ko aki, nöö a ko ku hii di taki di di oto mbeti u bi taki dë abi. Biga a ta wooko dëen. Nöö hën wë a buta ku hii sëmbë tuu taa de musu ta begi di fosu mbeti nöömö, di bi kisi makei nëen hedi dë.

¹³ Nöö di njunjun mbeti aki, nöö a ta du sòmëni foondofondo soni e. A ta kai faja kumutu a liba ta puu ta kai a goon a hii lanti fesi.

¹⁴ Nöö fa a ta heepi di fosu mbeti ta du dee foondo wooko naandë, nöö ku de a ta ganjan sëmbë u goonliba. Biga a buta de u de mbei wan pindi te de kaba da di fosu mbeti di bi abi di makei nëen hedi.

¹⁵ Hën a kisi wan gaan kaakiti faa musu da di pindi böö faa sa ta böö, nöö di a du sò, nöö hën di pindi ko ta fan.

Nöö hën di mbeti ta duwengi hii sëmbë taa de musu ta gafa di pindi ta begi ën kuma gadu. Ee wan sëmbë ja kë du sò, nöö de o kii i.

16 Hën a buta taki taa hii sëmbë, gaan sëmbë ku piki mii, guduma ku penama, fiima ku saafuma tuu musu kisi wan sitampu a de leti maun nasö a de mindifesi.

17 Ee wan sëmbë ja abi di lö sitampu naandë, nöö ja o sa bai soni möön, ja o sa sei soni da sëmbë tu.

Söö. Wë nöö di sitampu u taki aki, a dë di nöbu u di mbeti ku di në fëèn e. Hën wë dee sëmbë musu ta tja ufö de sa bai soni, ee nasö ufö de sa sei soni da sëmbë.

18 Wë nöö aki i ta si taa fusutan dë fanöudu e, fii wegi di nöbu naandë luku ee andi a kë taki. Biga a dë di nöbu u libisëmbë. Hën da sikisi-höndö-ku-sikisiteni-ku-sikisi.

14

Aki Johanisi toona si di Sikapu Mii möön ku wanlö hia

sëmbë fëèn.

1 Nöö di mi bia luku möön, nöö hën mi si di Sikapu Mii taanputaanpu te a di kununu de kai Sion liba, nöö a dë ku 144.000 sëmbë nëen bandja. Nöö hii dee sëmbë dë tuu ta tja di në fëèn ku di në fëèn Tata sikifisikifi a de mindifesi.

2 Nöö hën mi haika, hën mi jei wan gaan bai ta piki a liba ala. A ta piki kuma te gaan dan ta giinta gililili sö, kuma te gaangadu ta bai, kuma te sômëni sëmbë ta pëe wan pei soni kuma gitali. Hii dee peipei soni dë tuu mi ta jei a di bai dë dendu.

3 Nöö hën wë dee hia sëmbë naandë, de tuu ta kanda wan njunjun kanda di sëmbë an jei wan daka. De ta kandëèn leti ka de dë a di könubangi u Gadu fesi naandë, nöö de fö libilibi soni ku de tuwenti-a-fö tiima tuu sai naandë tu. Nöö di kanda di de ta kanda naandë, nöö dee sëmbë wanwan nöö sa lei ën. Oto sëmbë an sa sabi ën boiti de 144.000 sëmbë naandë, dee Masa Jesosi paka tei a dee oto sëmbë dendu ko fëèn dju.

4 Fa i si de sai naandë, nöö de an poi dee wëti u Gadu möönsö a di së u manu ku mujëe, de dë u de limbolimbo gbelingbelin a Masa Gadu wojo. Nöö hiniwan kamian ka di Sikapu Mii ta waka nango, nöö deseeti ta waka nëen baka nango tu. Dee sëmbë de wë di Sikafu Mii paka tei a libisëmbë dendu, nöö de da dee fosu sëmbë dee dë kuma wan paima da Masa Gadu ku di Sikafu Mii.

5 Fa de sai naandë, nöö na wan sëmbë o jei ganjan ku mindisoni woto a de buka, biga de dë söndö föutu tee dou.

Nöö de wë da dee sëmbë dee dë ku di Sikafu Mii taanputaanpu naandë.

Aki Johanisi si dii basia u Gadu Köndë oto a oto baka ta ko.

6 Nöö hën mi bia luku möön, hën mi si wan oto basia u Masa Gadu Köndë ta buwa a liba, nöö hën abi di Bunu Buka di dë u teego faa musu konda da dee peipei sëmbë u goonliba. Hii pei nasiön sëmbë, ku hii pei lö, ku hii pei föluku dee ta fan hii dee peipei töngö u goonliba, de tuu a musu konda di buka da.

7 Nöö hën wë a bai basia taa: "Heei! Heei! Lanti, un haika! Un musu saka unu seei da Masa Gadu e! Un musu hopo ën në. Biga di juu kisi faa musu kuutu a libisëmbë liba. Un musu begi Masa Gaangadu ta gafëèn, di mbei liba ku goonliba ku ze ku hii dee baaku ka wata ta kumutu ta ko." Nöö sö di basia bai taki.

8 Nöö hën mi bia luku möön, hën mi si wan oto basia u Gadu Köndë möön ta buwa ta ko a di otowan baka, nöö hënseei ta bai basia tu taa: "Heei, dee sëmbë, un haika ooo, un haika e! Di gaan köndë de kai Babilon, a kai e! A booko kai seei. Di köndë dë, hën bi buta hii nasiön sëmbë u goonliba u de musu ta du

peipei hogi ta libi fanafiti libi a di sè u manu ku mujëë, „nöö awa ufö de o tja di sitaafu u di hatiboonu u Gadu a de liba awaa. Nöö sö mi taki da unu e!”

⁹ Nöö hën mi toona si wan oto basia u Masa Gadu Köndë, di u mbei dii, ta buwa ta ko a di naandë baka. Nöö hën seei ta bai basia tu taa: “Ee wan sëmbe i begi di mbeti ku di pindi fëen, ee nasö i tei di nöbu fëen a i mindifesi ee nasö a i maun,

¹⁰ nöö sö wan sëmbe Gadu hati o boonu ku i e. Nöö di gaan sitaafu di a abi u da i, an o puu ën hafu da i seei. A o da i ën tuu ku telu. Nöö joo go dë a di hogi faja di o ta tingi zuwalufu da i, ta tja sitaafu. Nöö dee basia u Masa Gadu Köndë ku di Sikapu Mii tuu o sai leti dë ta si taa sö wan soni ta pasa ku i.

¹¹ Nöö di faja dë, an o tapa möönsö e. Di sumuku fëen o ta puu nöömö nango a liba. Sö wan sitaafu wë dee lö sëmbe dë o ta tja u nöömö, ndeti ku didia. De an o feni böö möönsö. Nöö sö mi taki da unu e, dee sëmbe.” Sö di basia ko naandë bai taki.

¹² Nöö fa u jei dë, fëen mbei mi taki da un dee sëmbe u Gadu dee ta hoi dee wëti fëen ta biibi Masa Jesosi dë taa wan musu disa möönsö e. Be un tai hati hoi go dou nöömö.

¹³ Nöö hën mi toona jei wan oto töngö a liba möön. A taa: “Söö. Wë nöö i musu sikifi taa bigi u tide nöö dee sëmbe dee nama ku Masa Jesosi, nöö de naki kölöku ee de dëdë.”

Nöö hën di Akaa u Gadu piki taa: “Aai, sö a dë tuu. Gaan kölöku seei de o abi. Biga de o böö fu hii dee taanga wooko de bi ta wooko. Fa i si de sai dë, nöö di libi de bi ta libi a pasi nöö paima fëen o faaka de e.” Sö di Akaa taki.

Aki di goonliba lepi tjika u koti.

¹⁴ Nöö hën mi bia luku, hën mi si wan bundji wetiweti faan sö a mi fesi dë, nöö nëen liba mi si wan sëmbe sindosindo kuma libisëmbe sö, ma a tooka. Nöö fa mi si ën dë, a dë ku wan goutu könu kaapusa nëen hedi, nöö wan gaan saapu ufangi selenselen sö dë nëen maun.

¹⁵ Nöö hën mi si wan basia u Gadu kumutu a di Wosu u Masa Gadu. Nöö hën a bai taanga da di sëmbe dë sindosindo a di bundji liba taa: “Söö. Wë di koti ten dou e. Di goonliba lepi tjika u koti buta a suwa awaa. Nöö fii koti oo, koti!” Sö a bai.

¹⁶ Nöö hën wë di soni aan soni. Hën di sëmbe di dë a di bundji liba ku di ufangi a maun, nöö hën a koti a hii di goonliba te dou.

¹⁷ Nöö hën mi bia luku möön, hën mi si wan oto basia u Masa Gadu Köndë kumutu a di Wosu u Gadu a liba ala möön. Nöö hën seei dë ku wan gaan saapu ufangi nëen maun selenselen.

¹⁸ Hën wan oto basia u Gadu di ta wooko a di Wosu u Gadu dë ta seeka di faja ka de ta tjuma soni da Gadu, a kumutu ka a ta wooko ala. Nöö hën a bai taki da di oto basia naandë di dë ku di ufangi nëen maun taa: “Söö. Koti dee doloifi bondji e, puu a dee doloifi pau u goonliba. Biga de lepi tjika.”

¹⁹ Nöö hën wë di basia naandë hai ufangi tja ko, nöö hën a ta koti dee doloifi bondji a goonliba ta hai ta tja ko te a kaba. Nöö hën a tei de tuwë go a di hatiboonu baki u Masa Gadu dendu,

²⁰ di dë a döösë u di köndë u Gadu a wan së buka. Nöö hën de makisa dee doloifi nëen. Nöö fa de ta makisa de, nöö mi ta si gaan hila buuu ta kule ta kumutu a di baki djulululu sö, kuma wan lio di langa dii höndö kilomëti, a sa fundu kuma wan feifi futu sö. Sö di buuu ta kumutu a di baki dë dendu hia tjika.

15

Aki Johanisi si sēbēn basia ku sēbēn sitaafu u Gadu.

¹ Nōō hēn mi si wan oto gaan foondo maaka a liba ala mōōn. Mi si sēbēn basia u Masa Gadu Kōndē, nōō de dē ku sēbēn sitaafu mōōn. Nōō de da dee kaba lasiti sitaafu u Gadu, biga te de pasa kaa nōō di hatiboonu u Gadu seei o kaba tu.

² Nōō hēn mi toona si wan oto sondi mōōn kuma ze, ma a dē kuma gaasi ku faja mōkisirimōkisi. Nōō fa mi si ēn dē, nōō wanlō sēmbē dē nēēn bandja taanputaanpu. Dee lō sēmbē dē, nōō de bi wini di mbeti ku di pindi fēēn tuu. Nōō de an bi da sēmbē pasi mōōnsō u de sitampu di nōbu u di mbeti a de mindifesi.

Nōō dee sēmbē naandē, de tuu Gadu da wan soni kuma gitali a de maun de ta pēē,

³ nōō de ta kanda wan kanda. Nōō a dē kuma di kanda di Mosesi di gaan futuboi u Gadu di bi dē a fesiten bi ta kanda ta gafa Gadu. Sō de ta kandēēn ta gafa di Sikafu Mii. De ta kanda ta taki taa: Ke Masa Gadu ooo, di makiti Gadu u mundu, dee soni dee i ta du, de bigi e.

Aai. De foondo tu.

Fa i sai dē, nōō i dē di kōnu ta tii fu nōōmō.

Hii dee fasi fii seei dee i abi,
de tuu dē gbelingbelin sōndō ganjan,
nōō i a leti a dee soni i ta du.

⁴ Masa Gadu o, ambē seei dē a mundu
di an sa saka hēn seepi da i
ta hopo i nē ta konda kumafa i dē?

Biga i wanwan tō seei dē a mundu limbolimbo sōndō fōutu.

Nōō hii pei nasiōn sēmbē u goonliba tuu

o ko tjökō kini a i fesi

ta hopo i nē, Masa Gadu.

Biga fa u dē aki, nōō a ko a dōō wajaa,

taa dee du fii dē letileti sōndō fōutu.

Nōō sō di kanda ta taki.

⁵ Nōō hēn a baka u di dē, hēn mi luku a liba ala mōōn, hēn mi si di Wosu u Masa Gadu dōō dē jabijabi hoo, te dou a di kamian ka Masa Gadu seei ta dē.

⁶ Nōō hēn mi si dee sēbēn basia u bi taki dē, de ta kumutu a di Wosu u Gadu ko a dōō, nōō de abi dee sēbēn lasiti sitaafu u Gadu. Fa mi si de dē, nōō de bisi gaan limbo koosu a de sinkii ta koti faja te na soni, nōō de banti de hatimindi ku goutu banti.

⁷ Nōō hēn wan u de fō libilibi soni u ta taki nōōmō aki, hēn a da hiniwan u dee basia wan goutu komitji fuufuu ku di hatiboonu u Masa Gadu di ta libi nōōmō fu teego.

⁸ Nōō di juu dē, sumuku ta puu a di Wosu u Gadu dendu te di Wosu dendu tapa ku sumuku gbitii. Nōō di sumuku i si dē, a Gadu wē a ta kumutu e, nōō hēn ta lei di hei ku di kaakiti fēēn di a abi.

Nōō fa i si u mbei dē, nōō na wan sēmbē seei sa denda go a di Wosu dendu mōōn e, solanga dee sitaafu de sēbēn basia abi naandē an pasa.

16

Aki ta taki u dee sitaafu di dee basia u Gadu ta kandi

ta tuwē a goonliba.

¹ Nöo hën mi haika, hën mi jei wan tōngö kumutu a di Wosu u Masa Gadu a liba ala möön. A bai fan ku de sēbēn basia u Masa Gadu Köndē u bi taki dē ta: “Sōö. Wē di soni na a’ soni. Un musu go kandi de sēbēn komitji dee dē fuufuu ku di hatiboonu u Gadu dē, tuwē go a goonliba.”

² Nöo hën di fosu basia kandi di komitji fēen tuwē go a goon. Nöo hii dee sēmbē dee dē ku di sitampu u di mbeti a de fesimindi ta begi di pindi fēen, hën wē kasikaasi kisi de kpatii hii de sinkii ta kii de ku njan.

³ Nöo hën di u tu basia kandi di fēen komitji tuwē a di ze. Nöo hën di ze wata bia ko buuu kuma dēdē sēmbē buuu. Nöo hën hii dee soni dee dē ku libi a di ze dendu tuu dēdē kaba a sōsō djee.

⁴ Nöo hën di u dii basia hën a kandi di fēen komitji tuwē a dee liolio ku dee baaku ka wata ta kumutu ta ko, hën hii wata u de bia ko nōngö.

⁵ Nöo hën mi jei di basia di abi taki a dee wata liba bai taki ta:

Aai, Masa Gadu, i dē apaiti sōndö föutu.

I bi dē kaa, nöo joo dē u nöömö.

Dee kuutu dee i ta kuutu aki

nöo i a’ leti nēen.

⁶ Biga dee sēmbē bi kii dee apaiti sēmbē fii ku dee tjabukama fii, tuwē buuu u de a goon u sōsö, nöo awa i toona ta da de buuu u de bebe.

Aai oo, i a’ leti e.

Biga sō di paima u de fiti.

Nöo sō de taki.

⁷ Nöo hën mi jei wan tōngö kumutu a di begitafa naandē taki ta:

Aai oo, Masa Gadu, i wē abi hii makiti u mundu e.

Dee kuutu dee i ta kuutu, i ta a’ leti a de,

nöo i ta du de a wan leti fasi tu.

Sö mi jei a taki.

⁸ Nöo hën di u fö basia kandi di fēen komitji tuwē a di sonuwojo, nöo hën di sonu ko kendi taanga tee ta tjuma sēmbē u goonliba.

⁹ Nöo fa a ta tjuma de naandē, nöo de ta tja sitaafu seei, ma ka u de disa di hogilibi u de bia suku Masa Gadu fu hopo ēn nē, nöo hën de sai naandē ta kosi ēn nöömö ta taki taku fēen a pepei futu. Hii fa Gadu abi makiti a dee sitaafu naandē liba seei, ma dee lö sēmbē dē an kē saka deseei dēen möönsö.

¹⁰ Nöo hën di u feifi basia kandi di fēen komitji tuwē go a di könubangi u di mbeti liba, ka a ta sindo ta tii libisēmbē, hën wan gaan dungu ko tapa hii dee köndē ka a ta tii dou kankan. Nöo dee sēmbē dee sai naandē, de ta fuka te na soni. De ta bai ta kai wolo ta njan tanda. Hogi nöo di sitaafu hogi sō.

¹¹ Ma nöo hii fa i si de ta tja pena ku fuka dē, dee kasikaasi ta kii de ku njan seei, ma de an ta bia disa dee hogilibi u de möönsö. Hën de sai naandē ta kosi Masa Gadu ta taki taku fēen tee ka a dē a liba ala.

¹² Nöo hën di u sikisi basia, hën a kandi di fēen komitji tuwē a di gaan lio de kai Efaata, nöo hën di lio dē seei fika pasi a mindi da dee könu u sonukumutu ku dee sodati u de fu de waka.

¹³ Nöo hën mi toona si di bē kaima möön, ku di fosu mbeti hogiwan, ku di oto mbeti di ta tja buka da di fosu mbeti ta ganjan sēmbē, nöo hën mi si dii soni kuma tödö kumutu a de buka dendu.

¹⁴ Nöo dee tödö dē, nöo dee akaa u dee didibi wē de dē e. Nöo de ta du sōmēni gaan foondofoondo soni ta ganjan sēmbē ta hai tja ko a de. De ta waka a dee köndēköndē u goonliba tuu te dou nango ta hai dee könu tja ko makandi u de feti di gaan feti a di Daka di di Gadu di abi hii makiti u mundu buta.

¹⁵ Nöo hën mi jei wan tōngö ta:

Un haika e.

Mi o ko a unu a wan köni fasi
kumafa wan fufuuma ta ko a ndeti.

Nöo ee wan sëmbë i dë ku wojo ku koosu bisibisi a i sinkii,
nöo i naki bunuhedi e.

Biga sëmbë an musu ko si i pënëpënë u sen musu kisi i.

Nöo sö di töngö taki.

¹⁶ Nöo hën de dii akaa u dee didibi hën de waka a hii goonliba pii dee könu u dee köndëköndë tuu te de kaba, nöo hën de tuu hai ko makandi a di kamian di dee Dju ta kai Amagedon fu de go a di feti.

¹⁷ Nöo hën di u sëbën basia ko kandi di fëen komitji, lasiti wan, tuwë go a di ventu dendu.

Nöo hën mi jei wan gaan töngö kumutu te a di könu sutuu u Masa Gaangadu a di Wosu dendu dë. A taa: "Söö. Kaba fëen disii e!"

¹⁸ Nöo di juu dë, liba ta koti faja hwaihwai, gaangadu ta bai gbalam gbalam, gaan giinta ta piki gililili, goonliba ta seki ta latja ta jabi. Nöo di seki di goonliba seki dë, nöo fu kumutu a di ten di Masa Gaangadu mbei goonliba buta sëmbë nëen u te dou di ten aki, nöo goonliba an bi seki sö wan daka.

¹⁹ Nöo fa a seki naandë, hën di gaan köndë de kai Babilon, booko a dii pisi. Nöo hii dee oto köndë u dee nasiönnasiön tuu kai booko pisipisi tu.

Wë nöo a di fa dë sö Gadu mëni di gaan köndë de kai Babilon e, kumafa a hogi tjika. Nöo hën a tei wan gaan kan lai di hatiboonu fëen nëen te a fuu pöö, hën a duwengi ën faa bebëen.

²⁰ Nöo hii dee paati a dee ze dendu tuu go tee na wan u de dë u si möön. Hii dee gaangaan kununu an dë u feni möön tu, goonliba ko dë palalaa, te kamian an dë u tjubi möön.

²¹ Nöo hën ëisi ta kumutu a liba ala dombodombo ta kai gbii gbii ta naki sëmbë ta kii. Dee ëisi dombo naandë, wan u de ta hebi kuma feifiteni kilo sö.

Nöo fa dee soni pasa dë seei, ma dee sëmbë fika a goonliba ta kosi Masa Gaangadu eti ta taki taku fëen fu di gaan sitaafu de ta tjä naandë hedi.

17

Aki Johanisi si wan mötjö mujëe.

¹ Nöo hën wan u dee sëbën basia dee bi abi dee sëbën komitji ko a mi. Hën a taki da mi taa: "Ko go ku mi, nöo mi o lei i di sitaafu di di gaan mötjö mujëe di dë sindosindo a dee sëmëni wata mindi o kisi.

² Fa a sai naandë, hii dee könu u goonliba ku dee sösö sinkii sëmbë tuu a butëen seei da de u de libi mötjö libi ku ën tee a dööngö de. Leti kuma te win dööngö wan sëmbë, nöo sö a dööngö de poi pakisei u de tjika."

³ Nöo fa di basia fan dë, hën a tjä mi go te a wan sabana dendu. Ma na mi sinkii go e, mi akaa. Nöo hën mi go si wan mujëe, a dë sindosindo a wan mbeti liba. Nöo di mbeti dë, sinkii fëen bë hëii sö, nöo a abi sëbën hedi, ku teni tutu a dee hedi fëen. Nöo hii ën sinkii tuu dë sikifisikifi ku wanlö hogi në ta sösö Masa Gadu.

⁴ Nöo di mötjö mujëe di i si a di mbeti liba sindosindo naandë, a dë bisibisi ku gaan dii soni nëen sinkii te a hia. Biga a bisi baau ku bë koosu, nöo a bisi sëmëni djamati sitonu ku goutu soni, ku diidii konda ta koti faja njëngënjëngë te na soni. Nöo a dë ku wan goutu kan nëen maun. Nöo di kan dë fuufuu pöö ku sösö hogi, ku poipoi soni, sensen wan. Nöo dee soni dë wë ta lei unfä di mötjö libi fëen hogi tjika.

⁵ Nöo wan wödu dë sikifisikifi a di mujëe mindifesi taa:

DISI DA DI GAAN BABILON,
DI GAAN MÖTJÖ MAMA U MUNDU.
HËN TA PAAJA MÖTJÖ LIBI A GOONLIBA
TA LEI SËMBË HII POIPOI LIBI,

SENSEN WAN DI NA FITI LIBISËMBË U DU A GOONLIBA.

Sö wan hogi mujëë mi si dë e.

⁶Nöö fa mi ta luku di mötjö naandë, nöö mi si taa a dë dööngödööngö ku di buuu u dee sëmbë u Gadu, dee de bi kii fu di de bi ta piki gbelin taa de nama ku Masa Jesosi.

Nöö a bigi da mi seei fa mi si di mujëë naandë.

⁷Nöö hën di basia hakisi mi taa: “Mati, faandi mbei di soni dë bigi da i sö? Wë haika e. Mi o puu dee tjubitjubi soni da i. Di mujëë, ku di mbeti di a dë nëën liba dë di abi dee sëbën hedi ku dee teni tutu, de tuu mi o puu da i be i sabi andi de kë taki.

⁸“Fa i ta si di mbeti naandë, nöö a bi dë kaa e, ma fa u dë aki an dë möön. Ma te wan pisi, nöö a o kumutu a di baaku di na abi goon toona ko baka. Ma nöö fa a o ko dë, nöö a o ko faa kaba a sösö go u koo awaa.

“Nöö te a o toona ko, nöö a o foondo dee sëmbë dee në u de an dë sikifisikifi a di Buku u Libi fu sensi Masa Gadu mbei goonliba. Te dee lö sëmbë dë si di mbeti a o bigi da de seei. Biga di mbeti dë an bi dë möön. A bi go ma nöö te u de kë si hën a toona ko baka.” Sö di basia taki da mi.

⁹Nöö hën a toona fan ku mi möön, taa: “Mati, fa mi o fan ku i aki sö, nöö i musu abi fusutan ku köni e, ufö i sa sabi dee soni mi o taki aki.”

Nöö hën a taa: “Haika e. Dee sëbën hedi u di mbeti naandë, de kë taki u dee sëbën kununu ka di mötjö mujëë dë a de liba. Söseei tu de kë taki u sëbën könu.

¹⁰Nöö feifi u dee könu tii pasa go kaa e, nöö di u mbei sikisi nöö hën dë ta tii eti. Nöö di u mbei sëbën nöö hën an dou eti e. Nöö fa i si a o hopo ko dë, nöö a musu u ko ma fu wan sati ten sö nöö, nöö soni fëën o kaba.

¹¹“Söö. Wë nöö di mbeti di i si an bi dë möön naandë ma te wan pisi a toona ko, nöö hën kë taki taa wan oto könu, di fu mbei aiti, o ko. Ma fa a o ko naandë, nöö a bi dë wan u dee sëbën dee bi tii kaa. A bi tii te a go, nöö hën a toona ko a tii möön. Sö di mbeti dë kë taki. Ma fa a o ko dë, nöö te wan pisi, nöö a o go kaba a sösö fu nöömö.

¹²“Nöö de teni tutu a di mbeti hedi i ta si naandë, nöö de seei da könu tu e, ma de an ko a tii eti. Nöö te juu u de dou, nöö de o kisi makiti u de ku di mbeti tuu sa tii makandi, ma fu wan sati pisiten nöö.

¹³Nöö fa i si dee teni könu o tii dë, nöö de tuu o wooko ku di wan kodo pakisei. Biga hii makiti u de ku hii taki u de tuu o dë a di mbeti maun.

¹⁴“Nöö de o hopo go feti ku di Sikafu Mii, ma di Sikafu Mii o wini de e. Biga hën da di Masa a hii masa liba, hënseei da di Könu a hii könu liba. Nöö fa a o wini de dë, a o abi wanlö hia sëmbë nëën së dee a bi pii tei buta ko sëmbë fëën apaiti. De tuu o ta waka nëën baka ku di wan kodö hati, nöö hën ku de tuu makandi o wini dee könu e.”

¹⁵Nöö hën di basia fan ku mi möön taa: “Dee wata dee i si di mujëë dë a de mindi sindosindo naandë, nöö de wë da dee gaan hia sëmbë u mundu e, dee peipei nasiön sëmbë, ku dee peipei lö, ku dee peipei föluku ta fan dee peipei töngö u goonliba.

¹⁶“Nöö di mbeti di u taki dë, ku dee teni tutu fëën tuu, o ta buuse di mötjö mujëë te de an sa si ën a wojo seei. Nöö de o puu hii soni nëën di a abi, te a

fika pēnēpēnē ku maun tjululuu. De o njan mēn te de kaba, nōö di fēēn di o fika de o tjuma a faja fiaa puu dē.

¹⁷ Ma nōö fa i si de o ta du ēn dē, nōö Masa Gadu wē butēēn a de hati u de du sō e. Nōö a o buta de teni kōnu fu de saka hii di tii u de ku telu da di mbeti, faa musu pasa a bakaten leti kumafa Gadu bi buta.

¹⁸ “Wē nōö di mujēē dē, nōö hēn wē da di gaan köndē de kai Babilon e, di ta buta hii dee kōnu u di goonliba aki tuu nēēn basu.”
Nōö sō di basia taki da mi e.

18

Aki di gaan köndē de kai Babilon kai.

¹ Nōö a baka u di dē, hēn mi si wan oto basia u Masa Gaangadu köndē kumutu a liba ta bazia ta ko a goon. Nōö fa a ko dē, nōö a abi gaan makiti, nōö di waiti fēēn sinkii di a abi ta limbo hii goonliba. Sō a abi poosian tjika.

² Nōö hēn wē a bai basia taa:

“Heei, un haika ooo, lanti un haika e.

Di gaan köndē de kai Babilon nōö a booko ooo,

a booko kai holou seei.

Fa i si u dē aki, a ko fika wan kamian ka dee didibi nōö ta libi.

Mi taki e, a ko dē wan kamian seei ka dee soni bi ta mbei deseei gadu ta daama nango ta ko.

Na ala dee tingi fou ku hii dee taku fou u goonliba tuu na bunu wan hai go fika ta libi.

³ Fa di köndē bi sai naandē,

nōö hii dee nasiōnnasiōn sēmbē u goonliba tuu

njan di poipoi libi fēēn kaa tefa de dōōngō. Aai.

Dee kōnu u goonliba seei

njan di fanafiti libi fēēn naandē ku ēn makandi.

Nōö di langahati sēmbē bi abi u dee soni fēēn,

hēn mbei dee wēnkēma ko gaan guduma seei.

Ma nōö fa u dē aki

a booko kai o,

a kai kaba a sōsō gbegedee!”

Sō di basia bai taki.

⁴ Nōö hēn wē mi jei wan tōngō piki a liba ala mōōn, a taa:

“Un kumutu a di köndē naandē e,

un dee sēmbē dee dē u mi.

Wan musu nama ku ēn a dee hogi du fēēn a ta du,

fu dee sitaafu a o tja an musu kisi unu.

⁵ Biga fa a sai dē,

nōö dee hogi du fēēn lai oto a oto liba

tee dou a Masa Gadu Köndē aki.

Sō de hila tjika.

Nōö Gadu an fēēkētē de e.

⁶ Nōö mi taki e,

a musu kisi paima fu dee hogi dee a bi ta du naandē.

Aai.

De musu sitaafu ēn tu toon mōōn hebi mōōn fa a bi sitaafu otowan.

Di kan di a bi lai da sēmbē u de bebe,

nōö de musu lai ēn tu pasi fuufuu dēēn,

be a bebēēn tuu.

Sō de musu dēēn gaan sitaafu tjika.

7 Fa a bi ta libi hebi tjika dē kuma guduma
ta njan buka a hii soni,
leti sō nōō de musu toona penēen dēen fuka e. Aai.

Biga fa a sai naandē,
a bi ta sindo ta taki nēen hati taa:

‘Fa mi dē aki,
kōnu mi dē e.

Ma dē kuma dee mujēe manū u de dēdē, de fika a ganda.

Nōnō. Di soni de kai kusumi,
na wan ten seei mi o sabi ēn a mundu mōōnsō.’

Sō a bi ta taki nēen hati.

8 Nōō fēen mbei wē a o kisi dee lō sitaafu dē e.
A di wan kodo daka de o ko nēen liba seei gilili sō ku telu.

Aai.

Ee fuu taki ēn,

nōō kusumi, ku hangī ku dēdē tuu o ko nēen a di wan kodo daka.

Faja o ko tjumēen kaba a sōsō djee.

Biga di Kuutuma fēen da Masa Gaangadu seei
di abi hii kaakiti u mundu.”

Sō di fan di kumutu a liba ala, nōō sō a taki e.

9 Nōō fa di kōndē o ta tjuma, sumuku fēen o ta hopo nango a liba naandē,
nōō dee kōnu u goonliba dee bi ta libi di poipoi libi hogi wan ku ēn makandi,
nōō de o si di sitaafu fēen di a kisi, nōō de o ta bai ta kēē ta kusumi seei te a
bigi.

10 Ma de an o sa go zuntu ku ēn e, biga de o fēēē poi. De o panta seei ta
tēēmē. Nōō de o taanpu te a longi ala ta bai taa:

“Ee, aai oo maingē, a tjali!

Babilon, di gaan gindi nēbai kōndē naandē,

hēn kisi sitaafu sō hesi nō?

Aai, wē a bigi!”

Sō de o ta kēē pena ta konda soni a buka.

11 Nōō dee sēmbē dee bi ta bai soni a dee kamiankamian u goonliba ta tja
go ta sei a Babilon dē, nōō deseei o ta kēē ta kusumi tu. Biga dee sipi u de dē
lailai ku hii pei gudu, ma sēmbē an dē u bai de mōōn.

12 Dee goutu soni, soofu soni, djamati sitonu, dee gaan diidii konda, dee
pepei koosu gaan dii wan, baubaau, ku bē, ku dee linzo koosu, dee lasua
sō, hii pepei dii pau dee ta sumēē suti, dee tēmbē de ta tēmbē ku zaun tanda,
pau, kōpō, ku dee de ta tēmbē ku hanse sitonu,

13 dee pepei soni de ta tuwē a njanjan faa ko suti, dee pepei soni de ta
tjuma a dee begitafa da dee gadu u de, dee gaan dii sumēēsuti fatu, pepei win
u bebe, fatu u lobi a sinkii, boon u jasa soni, dee alisi fania sō, kau, sikafu,
hasi, dee gaan dii wagi dee hasi ta tja, dee libisēmbē dee de ta tja ko sei u
saafu, te kisi dee de ta sei buta da fanafiti libi ta poi pakisei u de, dee lō soni
dē tuu seei sēmbē an o dē u bai de mōōn.

14 Nōō dee sēmbē bi ta tja de ta sei dē, nōō de o kēē pena da di kōndē taa:

“A tjali baa.

Hii dee soni dee i bi ta giii u de,

na wan u de fika da i mōōn e.

Hii dee gudu fii ku di nēbai i bi abi,

de an dē u si mōōn.

De tuu kaba fiaa.

Aan fa joo du te joo sa feni de mōōn a mundu oo.”

Nōō sō de o ta bai ta taki.

15 Nöo dee wënkëma dee bi ta sei soni da dee sëmbë u Babilon tefa de ko gaan guduma dë, nöö deseeri o si fa di köndë ta pena, nöö de o panta tee. De o tuwë gogo te a wan së ala ta konda soni a buka taa:

16 “Ee, aai oo maingë,
di soni aki a tjali.

A bigi da u.

Di gaan nëbai köndë naandë,
hën kaba a sösö sö. Aai.

Di köndë dë,

hën wë bi abi hii dee gaan diidii koosu sö,
bë ku baau.

Hën bi abi dee peipei goutu soni ku dee djamati,
ku dee diidii konda dee ta koti faja njëngënjëngë.

17 Nöo hën sö hesi hii dee gudu dë kaba a sösö tuu fiaa!

A bigi a mundu e baa!” Sö de o ta bai ta këë ta taki.

Nöo dee kabiteni u dee sipi, ku dee matoosi, ku dee sëmbë dee ta waka a dee sipi, ku hii dee sëmbë kaa dee ta wooko a dee sipi u de feni soni u njan, hii dee lö sëmbë dë tuu o taanpu a longi tu, ta luku fa di köndë ta tjuma ta kaba a sösö.

18 Nöo fa de o ta si di sumuku ta puu gbitii nango a liba naandë, nöö de o bai taa:

“Ee aai oo, maingë,

di nëbai foto hën ko sö nö?

Biga na wan köndë seei bi dë a mundu aki

di i bi sa tei maaka ku ën.

Aai maingë, wë a bigi.”

19 Nöo de o ta ba gudugudu ta hiti a de hedi ta bai ta këë ta konda soni a buka ta kusumi taa:

“U kai wolo da i oo,

u kai wolo da i e,

i di gaan köndë naandë.

Di soni aki bigi da u poi.

Biga dee sëmbë dee bi ta waka a di ze ta sei soni

i wë bi mbei de ko gaan guduma.

Ma nöo fa u dë aki,

nöo hën i poi kaba a sösö wantewante sö nö?

Aai, wë a bigi.”

Sö de o ta këë pena ta taki.

20 “Wë ma nöo un dee sëmbë u Masa Gadu Köndë,

un musu wai e.

Un wai seei,

un dee tjabukama u Masa Jesosi

ku un dee fesiten tjabukama u Gadu.

Un wai oo,

hii un dee sëmbë u Gadu tuu.

Biga Masa Gadu paka di köndë dë baka

u dee hogi dee a bi du unu e.”

21 Nöo hën wan gaan makiti basia u Masa Gaangadu köndë hopo wan gaan gindi sitonu kuma di de ta lala soni, nöo hën a tuwëen a di ze dendu dubuu pii.

Nöo hën a taa:

“Sö de o hiti i tu e,

ju di gaan köndë de kai Babilon dë.

Sö joo kai hebi tjika.
 Nöö fa de o tuwë i dë,
 nöö ja o dë u si ku wojo möön a mundu e, kwetikweti.

²² Dee gitalima fii,
 ku dee kandama,
 ku dee sëmbë bi ta böö foloiti ku tutu,
 na wan kodo u de o dë u jei a i möön.
 Dee tëmbëma dee bi ta mbei dee soni a i dë,
 na wan u de o dë a i möön e.
 Na wan kodo u dee mbii giinta seei o dë u jei a i möön.

²³ Faja an o dë ta sëndë a i möön tu.
 Nöö fa wan womi ku ën njunjun mujëë bi ta fan suti ku deseëi dë,
 ma di fan dë an o dë u jei a i möön e.
 Fa i bi sai dë,
 nöö dee sëmbë dee bi ta sei soni a i,
 de bi dë gaan hebi sëmbë u goonliba.
 Hii nasiön sëmbë u goonliba tuu
 i bi ta dööngö ta hai ta tja ko a i dë
 ku dee gaan tofu fii,
 ku dee ganjan fii,
 ta poi de ta kaba a sösö.

²⁴ Fa i si i sai dë,
 a di doti fii dë
 nëën wë de feni di buuu u dee tjabukama u Gadu
 ku hii dee oto sëmbë fëën dee de bi kii a goonliba aki.
 Hën wë mbei joo kisi sö wan gaan hogi sitaafu e.”
 Nöö sö mi jei di basia bai taki.

19

Aki dee sëmbë u Gadu ta wai

fu di Babilon kai.

¹ Nöö hën a baka u di dë, hën mi jei soni ta giinta a liba ala kuma wanlö
 gaan hia sëmbë ta bai taa:

Aai oo, dee sëmbë,
 un boo ta gafa di Gadu fuu e!
 Biga hën abi hii heepi a mundu.
 Fa a sai dë, a waiti e,
 nöö a a' nëbai tu.

Hën abi hii makiti u mundu.
² Dee kuutu dee a ta kuutu, a ta a' leti a de,
 nöö a ta kuutu a wan leti fasi tu.
 Biga a kuutu di gaan mötjö mujëë
 di bi poi hii goonliba ku di fanafiti libi fëën.

A dëën di sitaafu di fiti ën.
 Biga nëën maun de feni di buuu u dee futuboi u Gadu dee de bi kii.
 Hën wë mbei Gadu dëën di sitaafu dë sö e.

³ Nöö hën mi jei de bai wan pasi möön taa:
 Aai oo, un gafa Masa Gadu e.
 Biga fa a tjuma di gaan köndë dë,
 nöö sumuku fëën ta puu nango a liba ala fu nöömö.

4 Nöo hën de tuwenti-a-fö tiima ku dee fö libilibi soni, hebi wan dë, nöo hën de kai ku fesi a goon a Masa Gaangadu fesi dë ta gafëen ka a dë a di könubangi sindosindo naandë.

Nöo hën de taa:

Sö a dë. Un boo gafa Gadu e!

5 Nöo hën mi jei wan oto töngö kumutu leti ka di könubangi sai naandë. A taa:

Aai, tuu, un gafa di Gadu fuu.

Hii un dee sëmbë dee ta dini ën ta lesipeki ën,

pikiwan ku gaanwan tuu,

un gafëen e!

6 Nöo hën mi toona jei wan giinta fu wanlö gaan hia sëmbë ta piki kuma wan gaan dan ta mbei wooo, kuma liba ta bai gbalamgbalam sö. De ta bai taa:

Aai, dee sëmbë, un gafa Gadu e.

Hën da Masa fuu.

Hën wë abi hii makiti.

Fa a sai dë,

nöo hën da kõnu u mundu ta tii hii soni.

7 Un piizii ku ën.

Un boo wai ku ën ta bai ën në.

Biga di juu di di Sikafu Mii musu toou ku di mujëë fëen,

nöo a dou e.

Fa i si u dë aki,

di mujëë seekëen seei te a kaba kaa.

8 Nöo fa i si a bisi dë,

a dë ku gaan limbo koosu gbelingbelin,

waiti wan seei ta koti faja njëinjëin.

Sö wan koosu wë de dëen faa bisi e.

(Wë nöo di koosu naandë, dee sëmbë, hën wë ta lei kumafa dee sëmbë u Gadu ta libi limbolimbo nëen wojo tjika e.)

9 Nöo hën di basia di ta lei mi dee soni taki da mi taa: "Söö. Wë sikifi sö e, mati, taa: 'Dee sëmbë Gadu kai fu de ko a di toouwosu u di Sikafu Mii ko njan di piizii, nöo de a' kõlöku e.' "

Hën a taki da mi taa: "Dee soni dee i si mi ta tei ta konda da i aki, nöo de dë tuutu soni, gbelingbelin wan. Biga a Gadu seei wë de kumutu."

10 Nöo di mi jei a taki sö, hën wë mi kai a di basia dë futu ku fesi a goon naandë, u mi musu begi ën. Ma nöo hën a bai mi taa: "Nönö e, mati, na du sö e. Biga fa i si mi dë aki, nöo mi dë wan futuboi u Gadu leti kuma i seei ku dee otowan fii dee i si tei dee soni dee Masa Jesosi bi konda. Sö nöo u tuu dë e. Gadu wanwan fii musu begi. Biga hën nöo Masa Jesosi bi mbei sëmbë ko sabi di a bi dë a goonliba aki, nöo hën nöo di Akaa bi ta buta a dee tjabukama hati tu u de ta konda soni fëen da sëmbë. Nöo hën mbei hën nöo i musu begi."

Aki Masa Jesosi ku dee sodati u Gadu Köndë miti feti ku dee felantima fëen.

11 Nöo hën mi bia luku, hën mi si liba ala jabi hooo. Hën mi si wan weti hasi ku wan Sëmbë nëen liba sindosindo. Nöo di Sëmbë dë, hën de kai Futoou ku Leti. „Biga i sa futoou ën a hii soni dee a ta du, nöo dee soni a ta taki, de tuu dë gbelingbelin soni.” Hën ta kuutu ku leti, nöo söseei a ta feti ku leti tu.

12 Fa a sai dë, nöo wojo fëen ta sëndë kuma faja, „ku ën a ta si hii soni tuu tee dou, „nöo a dë ku sëmëni kõnu kaapusa nëen hedi. Nöo wan në dë sikifisikifi nëen di oto sëmbë an sa sabi möönsö, boiti hën wanwan tö nöo sabi ën.

¹³ Nöö a ta bisi wan gaan langa djapona nëen sinkii, nöö di djapona dë kuma de tuusi ën a buuu toona puu. Nöö di oto në fëen, hën da di Wöutu u Gadu.

¹⁴ Nöö fa a dë a di hasi liba ta waka ta ko dë, nöö dee sodati u Masa Gaangadu köndë tuu dë nëen baka sililii ta ko, nöö de tuu dë a weti hasi liba tu, ku gaan limbo koosu faan a de sinkii.

¹⁵ Nöö wan së ufangi saapusaapu selenselen a de tu së ta kumutu a di Fesima dë buka dendu. Ku ën a o feti ku dee felantima fëen u hii dee nasiön tuu te a wini de. A o ta tii de ku gaan kaakiti seei, leti kuma te wan felu kai a wan doti paabi liba booko ën pisipisi. Nöö fa i si a o ta ko dë, nöö hën o makisa hii dee doloifi njanjan dee dë a di hatiboonu baki u Masa Gaangadu dendu, di abi hii makiti u mundu.

¹⁶ Nöö wan në dë a di djapona fëen ku ën asakpaa tuu taa:

DISI DA DI KÖNU A HII KÖNU LIBA,
KU DI MASA A HII MASA LIBA.

Aki wan basia ta bai da fou

u de jei.

¹⁷ Nöö hën mi bia luku leti a di sonuwojo ala, hën mi si wan basia u Gadu taanputaanpu. A ta bai da hii dee tingifou ta buwa a liba ala taa:

Un hai ko ooo!

Un hai ko e!

Un ko njan di gaan njan di Masa Gaangadu ta seeka da unu.

¹⁸ Biga hia gbamba o dë u njan e! --

dee könu,

ku dee sodati hedima,

ku dee gaan hebima u mundu,

ku hasi,

ku dee sëmbë bi ta waka a dee hasi liba,

sö di gbamba hia tjika e!

Un hai ko njan dee sinkii u hii pei libisëmbë dee dë a goonliba e:

fiima ku saafuma,

lagima ku hebima,

pikiwan ku gaanwan tuu.

Un tuu ko njan e!

Sö di basia bai da dee fou.

¹⁹ Wë nöö fa a bai dë, hën mi si di mbeti ku dee könu u goonliba ku hii dee sodati u de, ka de bi hai go zunta ta seeka fu de go feti ku di Sëmbë di dë a di weti hasi liba ku dee sodati fëen.

²⁰ Nöö hën wë aan soni. Hën di Fesima dë ku dee sodati fëen hën de kisi di mbeti gbolo, ku di ganjan tjabukama fëen di bi ta du dee foondofoondo wooko da di mbeti. Di ganjan tjabukama dë, hën bi ganjan hii dee sëmbë dee dë ku di nöbu u di mbeti a de mindifesi tuu, dee ta begi di pindi fëen. Hën ku di mbeti seei tuu de kisi ku libi vinde vïoo tuwë go a di gaan faja kuma ze di ta kisi ku zuwalufu fu nöömö.

²¹ Nöö hën de toona kii dee bakama u di mbeti tuu puu ku di sëufangi di dë a di Fesima buka dë.

Nöö hën wë dee fou kai de na de e, nöö hën de go ta njan dee dëdëdëdë sëmbë a goon naandë teefa bëë u de fuu.

Sö wan soni mi si e, dee sëmbë.

20

Aki ta taki u di dusu jaa tii u Masa Jesosi ku fa de du

ku di didibi.

¹ Nöo hën a baka u di dë, hën mi si wan basia u Masa Gadu Köndë möön kumutu a liba ala ta bazia ta ko. Nöo fa a ta ko dë, nöo a dë ku wan söötö mii nëen maun. Nöo di söötö mii dë, hën ta jabi di baaku di na a' goon. Nöo a dë ku wan gaan këti nëen maun tu.

²⁻³ Nöo hën a kisi di gaan bë kaima gbaa, di oto në fëen da di awoo sindeki, hën da di didibi Saatan seei. Nöo hën wë a bui ën ku di këti te a kaba, vinde viiin go a di baaku di na abi goon naandë dendu. Nöo fa a vindëen tuwë go dë, nöo a o sai dë wan dusu jaa longi bifö de o toona lusu ën baka.

Nöo hën di basia söötö di baaku buka te a kaba naki sitampu nëen gbai be di kaima tan a di kamian dë. An musu kumutu faa go ta ganjan dee nasiönnasiön sëmbë u goonliba möön, hii dee dusu jaa longi naandë. Ma nöo a baka u di dë, nöo de musu toona lusu ën fu wan sati pisiten sö.

⁴ Nöo di mi toona luku möön, nöo hën mi si wanlö sëmbë sindosindo a wanlö könubangi dë. Dee sëmbë naandë, de Gadu da taki fu de musu dë kuutama.

Nöo hën mi toona si dee akaa u dee sëmbë dee de bi koti hedi kii fu di de bi nama ku Masa Jesosi ta konda di buka u Gadu. Dee lö sëmbë naandë, de an saka deseei da di mbeti ku di pindi fëen wan daka möönsö, de an tei di maaka fëen a de mindifesi nöo de an tei ën a de maun tu. Nöo de wë toona weki ko dë ku libi e, nöo de ku Masa Jesosi tuu ta tii makandi a de dusu jaa longi dë.

⁵ Nöo fa dee sëmbë toona weki dë, hën wë o dë di fosu wekibaka u dëdë sëmbë. Ma dee oto sëmbë an o weki baka eti e. Te dee dusu jaa pasa ufö de o weki.

⁶ Fa dee fosu sëmbë weki dë, nöo de dë apaiti sëmbë u Gadu, nöo de dë bunu. Biga di u tu dëdë di ta paati libisëmbë ku Gadu fu nöömö an o kisi de möönsö. Nöo fa de sai naandë, de o abi di mindima wooko ta tja sëmbë go a Gadu ku Masa Jesosi di Keesitu, nöo de ku ën o ta tii di tii makandi di wan dusu jaa longi dë.

Aki ta lei fa di didibi kaba a sösö.

⁷ Nöo a baka u de dusu jaa dë nöo de o lusu di didibi puu a di baaku dendu ka de bi tuwëen go.

⁸ Nöo a o ta waka a hii kamian u goonliba ta lontu ta kai dee nasiönnasiön sëmbë u de musu hai ko fu de feti ku Gadu. Nöo dee sëmbë a o ganjan hai tja ko dë, nöo de o ta kai de Gögi ku Magögi, nöo de o hia teee kuma dee sandu sii dee dë a di ze bandja di na wan sëmbë sa konda.

⁹ Nöo fa dee hia sëmbë o kumutu a hii köndë u goonliba dë, nöo de o booko ku baai gililili hai ko lontu dee sëmbë u Gadu, ka de dë a di köndë di a lobi dë. Hën da Jelusalen. Nöo de o paaja lontu di köndë buta a djegi u de feti ku ën. Ma nöo di juu dë, wan gaan soni o pasa. Faja o kumutu a liba ala kai a de liba tjuma de kii tuu fiaa puu dë.

¹⁰ Nöo de o kisi di didibi di bi ganjan dee hia sëmbë di gaan ganjan naandë, nöo de o tuwëen go a di gaan faja di ta kisi u nöömö ta tingi zuwalufu, ka de bi hiti di mbeti ku di ganjan tjabukama tuwë go kaa. Nöo naandë wë de o fika ta tja gaan sitaafu fu teego. De an o kumutu dë möönsö.

*Aki ta lei di kaba lasiti kuutu
u Gadu.*

¹¹ Nöo hën mi bia luku, hën mi si wan gaan könubangi wetiweti faan sö, ku wan Sëmbë nëen sindosindo. Nöo fa u mbei dë, hën mundu ku goon go kumutu a di Sëmbë naandë fesi te de an dë u si möön seei, kwetikweti. „Sö wë di kaakiti u Gadu bi hebi a di kamian dë e.”

¹² Nöo hën mi si dee dëdë sëmbë, heiwan ku lagiwan tuu, taanputaanpu a di Sëmbë di dë a di könubangi fesi.

Nöo aan soni, hën de jabi dee buku. Nöo hën de tei wan oto buku bi sai dë möön de kai di Buku u Libi, nöo hën de jabi ën tu. „Nöo a di buku naandë, dee sëmbë dee kisi di libi u teego në dë sikifisikifi.” Nöo hën de kuutu dee dëdë sëmbë dee dë taanputaanpu dë te dou kumafa de bi libi a goonliba. Biga hii fa de bi libi a goonliba tuu dë sikifisikifi a dee buku de jabi naandë dendu.

¹³ Nöo fa de du dë, nöo di ze seei puu hii dee dëdë sëmbë dee bi dë nëen dendu tuu tja ko, nöo dëdë ku dëdëköndë seei puu dee sëmbë u de tja ko tu. Nöo hën di Sëmbë di dë a di könubangi kuutu hiniwan u dee lö sëmbë dë te dou kumafa de bi libi.

¹⁴ Nöo hën de tei dëdë ku dëdë köndë tuu tuwë ku telu go a di gaan faja dendu. Nöo di faja dë, hën wë da di u tu dëdë e. Naandë dee sëmbë dee o paati ku Gadu o go dë fu nöömö.

¹⁵ Nöo hiniwan sëmbë di në an dë sikifisikifi a di Buku u Libi, nöo de o hiti ën tuwë go a di gaan faja kuma ze dë dendu.

Sö wan gaan soni mi si möön e, dee sëmbë.

21

Aki ta taki u di njunjun mundu ku di njunjun goonliba di o ko.

¹ Nöo hën mi bia luku möön, hën mi si wan njunjun mundu ku wan njunjun goonliba, biga di fosu mundu ku di fosu goonliba an dë möön. Nöo di ze seei an dë u si möön tu. De tuu pasa go fiaa.

² Nöo hën mi si di apaiti köndë u Masa Gaangadu, hën de kai di Njunjun Jerusalem, ta kumutu a Gadu ala ta saka ta ko. Nöo fa a ta ko dë, nöo a hanse leti kuma wan mujëe de seeka bisi te de kaba këë da wan womi faa tööu ku ën. Sö di köndë waiti tjika.

³ Nöo hën mi jei wan tóngö piki leti a di könubangi naandë. A bai taanga taa: “Fa u dë aki, nöo di tan kamian u Masa Gaangadu ko dë a libisëmbë dendu e. Aai. Masa Gadu o ta libi ku libisëmbë awaa. De o dë sëmbë fëen, nöo hënseei o dë Gadu u de tu.”

⁴ Nöo fa de o ko sëmbë fëen dë, nöo a o feki hiniwan u de wojowata puu. Këë an o ta kisi de möön. Dëdë ku tjali ku kusumi an o dë a de dendu möön tu. Söseei sinkii hati an o dë möön seei, kwetikweti, biga dee awoo soni dee bi dë tuu pasa go kaa.”

⁵ Nöo hën di Sëmbë dë sindosindo a di könubangi naandë taki taa: “Wan si ö? Mi ta tooka hii soni buta ko njunjun.”

Nöo hën a taki da mi taa: “Dee soni i si mi ta konda da i aki, nöo i musu de tuu sikifi e. Biga bumbuu soni seei de dë fii sa a’ futoou a de liba, nöo de tuu seei o ko pasa.”

⁶ Nöo hën a taki da mi möön taa: “Wë a kaba. Mi wë da di seti u hii soni ku di kaba fëen. Nöo ee wan sëmbë dëewata kisi i nöo be i ko a mi e, nöo mi o tja i go ka di wata fu di libi u teego ta kumutu. Nöo di wata dë an o dë fii paka ufö mi da i ën.

⁷ “Nöo hii dee suti soni u ta taki aki tuu dë u di sëmbë di wini dee soni dee bi ta tapa pasi dëen faa du fa Gadu kë. Dee lö sëmbë dë o dë miii u mi e, nöo mi o dë Gadu u de.

8 “Ma nöö dee sëmbë ta fëëë sëmbë te de an sa nama ku mi, ku dee sëmbë dee an kē biibi a mi liba, ku dee sëmbë dee ta du dee soni ma sa si a wojo, dee kiisëmbëma, dee sëmbë ta libi fanafiti libi a di së u manu ku mujëë, ku dee tofuma, dee wisima, dee sëmbë ta begi oto gadu, dee mindisonima, mi taki da i taa di kamian u dee lö sëmbë dë, nöö hën o dë di gaan faja ze di ta kisi gililili dë ta tingi zuwalufu. Nëen dendu dee lö sëmbë dë o dë e. Hën wë da di u tu dëdë.” Sö di Sëmbë sindosindo a di könubangi dë taki da mi.

Aki ta taki fa di Njunjun Jelusalen o hanse tjika.

9 Nöö hën wan u dee sëbën basia u Gadu Köndë di bi abi dee sëbën komitji ku dee lasiti sitaafu u Gadu, nöö hën wë a ko a mi. Hën a taa: “Ko boo go. Be mi tja i go lei di tööu mujëë u di Sikafu Mii.”

10 Nöö hën a tei mi na akaa fasi tja go tee a wan gaan kuun liba, hei wan, nöö hën a mbei mi si di köndë u Masa Gaangadu, di njunjun Jelusalen di ta kumutu a Gadu ala ta bazia ta ko.

11 Nöö fa a ta ko naandë, nöö a ta sëndë seei. Nöö di sëndë fëen, hën di waiti u Gadu di a abi, hën i ta si dë e. Nöö a hanse teee, i ta si ën kuma di djamati sitonu de kai jasipisi, sö a ta koti faja tjika. Nöö a dë limbolimbo gbegedee tu, kuma gaasi.

12 Nöö de mbei wan gaan hei peni lontu di köndë, nöö di peni abi tuwalufu dööbuka fii denda go a di köndë dendu. Nöö hiniwan u dee dööbuka naandë ta abi wan u dee në u de tuwalufu lö u Isaëli sikifisikifi nëen liba, nöö a abi wan basia u Masa Gadu ta watji ën.

13 Nöö dee dööbuka dë a de fö së kanti u di peni. Dii u de dë a di së u sonukumutu, dii dë a di së u sonugo, dii dë a di së u basusë, dii dë a di së u libasë.

14 Nöö fa di peni u di köndë sai dë, a mbei a tuwalufu gaan sitonu liba. De da goonsei fu di peni. Nöö hiniwan u dee sitonu abi di në u wan u de tuwalufu tjabukama u di Sikafu Mii sikifisikifi.

15 Wë nöö fa di basia ta fan ku mi naandë, nöö a dë ku wan goutu pau nëen maun, faa maaka di köndë ku dee dööbuka fëen ku di peni fëen tuu, luku unfa de langa tjika.

16 Nöö di köndë mbei fökanti e, langa fëen ku baai fëen dë makandi.

Nöö hën di basia maaka di köndë te a kaba ku di pau dë nëen maun naandë, nöö a langa kuma tu-dusu-ku-fö-höndö kilomëti sö. Nöö di baai fëen ku di hei fëen dë tu-dusu-ku-tu-höndö kilomëti sö tu.

17 Nöö hën a maaka di degi u di peni te a kaba tu, nöö a dë kuma 60 mëti sö. Nöö hii fa wan basia u Gadu hën maakëen seei, ma a maakëen ku di wan seei maaka di libisëmbë ta maaka soni.

18 Nöö fa di peni sai dë, ku di djamati sitonu de kai jasipisi de mbei ën e, nöö a dë gaan hanse soni. Nöö di köndë seei mbei ku goutu wanwan tö, nöö di goutu dë dë limbolimbo gbegedee kuma gaasi sö, ta koti faja njëngënjëngë. Sö a limbo tjika.

19-20 Nöö de tuwalufu sitonu u taki dë, dee dë di goonsei u di peni, nöö deseëi dë bisibisi ku gaan hanse djamati sitonu, hiniwan sitonu ku hën pei djamati:

Di fosuwan de bisi ën ku di djamati sitonu de kai jasipisi.

Di u tu de bisi ën ku di djamati sitonu de kai safila.

Di u dii de bisi ën ku di de kai agaati.

Di u fö de bisi ën ku di de kai samalagida.

Di u feifi de bisi ën ku di de kai saadonisi.

Di u sikisi de bisi ën ku di de kai koonaleini.

Di u sēbēn de bisi ēn ku di de kai kiisoliti.

Di u aiti de bisi ēn ku di de kai belileesi.

Di u nēigi de bisi ēn ku di de kai tapasiōn.

Di u teni de bisi ēn ku di de kai kiisopasi.

Di u ēlufu de bisi ēn ku di de kai hiasin.

Di u tuwalufu hēn de bisi ku di djamati sitonu de kai ametisi.

„Nōō fa u kai dee peipei sitonu dē, nōō so u de dē bē, so u de dē guu-unguuun, so u de dē kuma jaiffolo sō, so u de dē kuma baau, so u de dē kookokooko. Fa de sai dē, de dē gaan hanse soni e, ta koti faja njēinjēin.” Nōō sō de mbei di goonsei u di peni hanse tjika.

²¹ Sōō. Nōō de tuwalufu dōō u di peni mbei ku wan hanse soni tu, kuma di weti konda faan sō de kai paaleli. Hiniwan dōō mbei ku wan sii fēēn.

Nōō di gaan pasi u di kōndē naandē mbei ku goutu wanwan limbolimbo gbegedee te dou. Nōō fa di goutu sai dē, i sa si pasa nēēn te dou a goon kuma gaasi, sō a limbo tjika.

Nōō sō wē di kōndē waiti e, dee sēmbē.

²² Nōō fa mi si di kōndē naandē, nōō Wosu u Gadu an dē nēēn dendu e. An dē fanōudu, biga Masa Gaangadu di abi hii makiti, ku di Sikafu Mii, nōō de dē a hii di kōndē kaa. „An dē fii go a kamian u go begi de mōōn.”

²³ Nōō sonu ku libawojo an dē fanōudu u tuwē limbo da di kōndē tu. Biga di waiti u Gadu ku di limbo u di Sikafu Mii ta tuwē limbo da hii di kōndē kaa.

²⁴ Nōō ka di kōndē o limbo tjika dē, nōō hii sēmbē u goonliba o dē a di limbo dē dendu ta libi. Nōō hii dee kōnu u di goonliba tuu o tja hii nēbai u de ko a di kōndē kaa.

²⁵ Nōō dee dōō u di kōndē an o ta tapa mōōnsō. Jabijabi nōō de o ta dē hii daka, biga ndeti an o dē mōōn.

²⁶ Nōō di nēbai ku di hei fu hii nasiōn o dē a di kōndē naandē dendu.

²⁷ Ma nōō fa u taki aki, ee wan soni an dē limbolimbo, nōō an o sa ko a di kōndē e. Dee sēmbē ta du fanafiti soni, sen soni, ganjan, mindi soni, de an o ko dē. Ma dee sēmbē dee nē dē sikifisikifi a di Buku u di Sikafu Mii, nōō de nōō o sa pasa ko a di kōndē dendu u de feni di libi u teego.

22

Aki Johanisi ta tapa di pampia.

¹ Nōō hēn wē di basia lei mi di lio di abi di wata u di libi u teego. Fa mi si di lio dē, nōō a dē seei limbolimbo gbegedee ta koti faja njēngēnjēngē sō, nōō a kumutu leti ka di kōnubangi u Masa Gadu ku di Sikafu Mii dē.

² Nōō di lio ta kule seei langalanga leti a mindi u di gaan pasi u di kōndē, nōō a de tu sē bandja tela fu di lio, nōō i abi di pau de ta kai Di Pau u di Libi u Teego. Nōō tuwalufu pasi di pau i si dē ta pai a wan jaa dendu, hiniwan liba a ta pai wan pasi. Nōō di uwii fēēn ta kula hii nasiōn u goonliba.

³ Nōō di juu ten dē, na wan soni o dē mōōn di siba dē nēēn liba e. Nōō di kōnubangi u Masa Gadu ku di Sikafu Mii o dē leti a di kōndē ganda mindi. Nōō naandē dee futuboi fēēn o ta dini ēn.

⁴⁻⁵ De o ta si ēn fesi hiniwan juu, nōō di nē fēēn o dē a de mindifesi. Nōō sō hēn ku de o ta tii makandi fu nōōmō teego.

Nōō di juu ten dē, ndeti an o dē mōōn e. Nōō de an o abi lampufaja fanōudu mōōn u limbo kamian. Sonu seei an o dē fanōudu mōōn faa tuwē limbo ko a di kōndē, biga di waiti Masa Gaangadu abi, hēnseei da di limbo u di kōndē kaa.

⁶ Nöö hën di basia taki da mi taa: “Söö. Wë haika e. Dee soni dee i si ku dee i jei aki, nöö tuutuu soni de dë e. Nöö i sa a’ futoou a de liba biga a Masa Gadu seei de kumutu. Fa i si a bi ta manda di Akaa fëen ko a dee tjabukama fëen liba a fesiten u de ta konda soni dëen, nöö söseei a manda di basia fëen ko konda dee soni dee o pasa abiti möön da i tu. Biga a kë fu dee futuboi fëen musu sabi de.” Nöö sö di basia taki da mi.

⁷ Nöö Masa Jesosi seei fan tu. A taa: “Mi ta ko djunsu e. Nöö di sëmbë di o ta piki dee soni dee dë a di Buku aki u dee soni o ko a bakaten, nöö di sëmbë dë hën o feni bunu a Gadu.”

Sö wë Masa Jesosi taki.

⁸ Wë nöö mi Johanisi, miseei piki tu taa miseei si dee soni aki ku miseei wojo, mi jei de ku miseei jesi. Nöö de bigi da mi tee mi kai a di basia di ta lei mi de dë fesi, fu mi begi ën.

⁹ Ma a taki da mi taa: “Nönö mati, na du sö e. Biga mi dë wan futuboi u Masa Gadu leti kuma i seei ku hii dee otowan fii, dee tjabukama u Gadu ku hii dee sëmbë dee ta piki dee soni dee dë sikifisikifi a di Buku aki. Nöö ja musu begi mi e. Masa Gaangadu hën wanwan nöö i musu begi.”

¹⁰ Nöö hën a toona taki da mi taa: “Haika e. Dee soni dee dë a di Buku aki, de ta taki u dee soni o pasa a bakaten, nöö ja musu hoi de buta kuma wan tjubitjubi soni. Biga di ten ta zuntu u de pasa.

¹¹ Nöö di sëmbë di ta du hogi, nöö be a ta du hogi nango nöömö, nöö a o si. Di sëmbë di ta libi fanafiti libi, nöö be a ta libi sö go dou, nöö a o si. Ma nöö di sëmbë di ta libi bunu a Gadu wojo, nöö be hënseei libi sö go dou tu e. Di sëmbë di dë apaiti da Gadu, nöö be a dë sö go dou.” Sö a taki da mi tefa a kaba.

¹² Nöö haika fa Masa Jesosi taki möön. A taa: “Mi o ko hesihesi e. Nöö te mi ko, nöö mi o tja paima ko paka hiniwan sëmbë kumafa i bi libi a goonliba.

¹³ “Mi wë da di A ku di Z, di fosuwan ku di lasiti wan. Mi da di bigi ku di kaba u hii soni.

¹⁴ “Nöö mi taki e, kölöku u di sëmbë di ta wasi ën koosu fa a ta dë limbolimbo. Biga joo feni pasi u denda go a di köndë dendu fii go njan di fuuta u di pau u di libi u teego.

¹⁵ “Ma nöö dee sëmbë dee ta libi doti libi kuma dagu, ku dee sëmbë dee ta du tofu wooko ta wisi otowan, ku dee ta booko Gadu wëti a di së u manu ku mujëe, dee sëmbë dee ta kii sëmbë, ku dee ta biibi oto gadu, ku dee mindisonima, ku dee lëgëdëma, nöö dee lö sëmbë dë, de an o sa denda go a di köndë möönsö e.

¹⁶ “Nöö mi Jesosi, miseei manda di basia u mi faa konda hii dee soni aki da un dee sëmbë dee ta miti makandi a mi në, be un sabi de. Nöö mi wë da di Böngö u Könu Dafiti, di bakamii fëen di di Buku bi taki taa o ko könu. Mi da di gaan waiti teeja di ta tja didia ko.” Sö Masa Jesosi taki.

¹⁷ Nöö fa a fan dë, hën di Akaa fëen ku di mujëe u di Sikafu Mii tuu ta piki taa: “Aai, Masa, ko e!” Nöö di sëmbë di ta jei di kai dë, nöö hënseei tu musu piki taa: “Aai, ko o, Masa!” Nöö ee wan sëmbë dëewata kisi i, nöö be i ko e. Hiniwan sëmbë di kë kaa, nöö be i ko tei di wata u di libi u teego u ta taki aki. Biga di wata dë, a dë u feni söndö i paka fëen.

¹⁸ Wë nöö un dee sëmbë dee ta jei dee soni dee dë sikifisikifi a di Buku aki fu ko pasa a bakaten, mi kë bai unu a soni e. Mi taki e, taa ja musu sikifi wan soni buta a liba möön leki dee soni dee dë sikifisikifi aki kaa. Biga ee i du sö, nöö Gadu o tja dee sitaafu dee dë sikifisikifi a di Buku aki ko buta a i liba tu.

¹⁹ Nöö ja musu puu soni a dee soni dee dë sikifisikifi aki tu. Biga ee i du sö, nöö Gadu o puu i tu, fu ja feni dee suti soni dee di Buku aki ta taki. Sö wan

sëmbë ja o sa ko a di köndë fëën dendu möönsö, nöö ja o sa feni di fuuta u di pau u di libi u teego njan möönsö tu.

²⁰ Wë nöö di Sëmbë di taanpu kuma kotoigima taa dee soni aki dë sö tuu, nöö hënseei taa: “Aai, mi o ko hesihesi tuu.”

Soni antoobi, Masa Jesosi. Ko fii nöö!

²¹ Söö. Wë dee sëmbë, u tapa aki e. Masa Jesosi Keesitu musu dë ku unu ku ën bunuhati. A tan sö.